


Didza' cubi rucá'ana
tsahui



New Testament in Zapotec, Rincón (MX:zar:Zapotec, Rincón)

Didza' cubi rucá'ana tsahui'**New Testament in Zapotec, Rincón (MX:zar:Zapotec, Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
58bf86df-ae22-508c-81dc-936dbf138c25

Contents

Salmos	1
San Mateo	129
San Marcos	195
San Lucas	236
San Juan	305
Hechos	355
Romanos	419
1 Corintios	446
2 Corintios	472
Gálatas	488
Efesios	498
Filipenses	507
Colosenses	513
1 Tesalonicenses	519
2 Tesalonicenses	524
1 Timoteo	527
2 Timoteo	535
Tito	540
Filemón	544
Hebreos	546
Santiago	565
1 Pedro	572
2 Pedro	579
1 Juan	584
2 Juan	590
3 Juan	591
Judas	592
Apocalipsis	594

YUGU' SALMO

1

¹ Bica' ba bönni' bití' runë' ca naca le ta'gú'u yöl-la' lë' nupa tu'cá'ana Dios, en bití' ridálenë' tsözxón nupa tun dul-la', en bití' runë' tsözxón le tun nupa ta'zí' quidza' Dios.

² Le raza ládxë'ë nácagaca xibá naguixjë' Xanru', en ca nácagaca xibá na' rëla, en te dza rulaba ládxë'ë.

³ Bönni' ni náquië' ca tu yaga dxe' ga naca ra' nisa, le ribía sizxöni cate' ridxín dza que, en bití' ca' rizóa gubá'ayisö.

Yúgu'të le runë' ta'rúaj dxi'a.

⁴ Bití' raca caní' quégaca nupa tuá' dö'.

Nácagaca ca bëbu zxe café ruá' le bö'.

⁵ Que lë ni na' bití' ulu'rúajë' tsahui' bönni' tu'ë dö' cate' Dios uchi'a usöröë' quégaquië',

en bití' ila'cu'ë bönni' dul-la' ga tu'dubë' bönni' tsahui'.

⁶ Rapa chi'ë Xanru' Dios nöza ga ta'dë' bönni' tsahui' na', pero uniti tsaz nu ridá gapa ta'dá nupa tuá' dö'.

2

¹ ¿Bizx que tu'tsatsa bönachi yugu' yödzo en tu'pá'a nítisö le ilúngaca?

² Bönni' ta'nná bë'ë luyú ta'dá'baguë'ë Dios.

Tun tuz xtídza'gaca nupa dë lu ná'agaca para ila'dá'baga' Xanru', en Nu na' nabö cazë' para inná bë'ë,

³ ta'nná: "Uzxuzxaj uquínnajru' le ta'nná bé'enë' rë'u, en chú'unaru' yugu' le tu'zenë' bach rë'u."

⁴ Dios na' zoë' yehua' yubá uzxidxisë'.

Xanru' Dios utitaj cazë' léguequi.

⁵ Ní'irö lu yöl-la' rilé queë' güf'ilenë' léguequi didza', en lu yöl-la' ridzá'a queë' uzënë' bach léguequi.

⁶ Innë': "Nuzóa caza' bönni' nabö caza' xilatjë' ga inná bë'ë. Inná bë'ë lu Guí'a Sión, le naca guí'a lá'ayi quia'."

⁷ Quíxjöi'ida' libí'ili' didza' nuzóë' tsaz Dios.

Xanru' Dios gudxi cazë' neda': "Li' nacu' Xzí'ina'.

Na'a dza nuzóa caza' Li'.

⁸ Gunábini neda', ate' guna' ga ilequi quiu' yugu' yödzo. Guequi ca' quiu' iduté yödzölió.

⁹ Quitsju' léguequi len tu xiyaga guíë.

Uzxuzxju' léguequi ca run nu rilá'a tu xziga' yö'öna'.

¹⁰ Que lë ni na', libí'ili' na' rinná bë'ëli', guli'tséajni'i.

Guli'sedi cuinli', nülóli' ruchi'a rusöröli' le raca luyú.

¹¹ Lu yöl-la' ba'a ladxi' queëli' guli'gún xichinë' Xanru'.

Lu yöl-la' rizxizi queëli' buli'sí' xibë'.

¹² Guli'gún bal Xzí'inë' Dios para cabí ilétenë', en para cabí udxi queëli' la' nöza.

La' ilentë yöl-la' rilé queë'.
 ¡Bica' ba yúgu'të nupa tu'zxöni ladxi' Lë'!

3

¹ Xan, chinayángacada' nupa ta'lé neda'.
 Zián nupa ta'dá'baga' neda'.

² Zián nupa ta'nnë quia', ta'nná:
 "Biti' usölë' Dios lë'."

³ Pero Li', Xan, run chí'itica'su' neda'.
 Nacu' yöl-la' ba quia', en Nu rutipa neda'.

⁴ Bë'a zidzaj didza', bulidza'-në' Xanru',
 ate' Lë' biyönnë' chí'a ga na' zoë' lataj lá'ayi queë'.

⁵ Neda' rata', en rasia',
 ate' rubana', tu' nazöntica'së' Xanru' Dios neda'.

⁶ Biti' gádxida' gayuá' gayuá' bönachi,
 nupa na' nagú'ugaca neda' lë'ajlö.

⁷ ¡Guyasa, Xan! ¡Busölá neda', Dios quia'!
 Budxia huë' xága'gaca nupa tu'dí'i neda',
 en buquínnajda' nupa nácgaca xihui'.

⁸ Xan, rusólá cazu' bönachi quiu'.
 Ben ga gaca dxi'a queégaca bönachi quiu'.
 ¡Ca' gaca!

4

¹ Bubí'i didza' cate' rulidza' Li', Dios.
 Nacu' Nu ruchí'a rusöró le raca quia'.
 Cate' gurö'a böniga, bida cazu' Li' ga zoa', en gúcalenu' neda'.
 Ruhuéchi' ladxi' neda', en ruzé nagu' le rinábida' Li'.

² Rnnë' Dios: "Libí'ili', bönachi, ¿gáca'xte ulidza dí'tajli' neda'?
 ¿Gáca'xte caz idxí'ili' le cabí nazaca', en güi'i ládxi'li' le cabí naca?"

³ Guli'tsöjné nabö cazë' Xanru' nu radxi Lë',
 ate' riyönnë' neda' cate' rulidza'-në'.

⁴ Guli'gadxi Lë', en bíti'rö gunli' dul-la'.
 Guli'sá' ladxi' ca naca lë ni cate' dëli' ga ráta'li', en guli'sóa dxisö.

⁵ Guli'cú'u lahuë' Xanru' le naca dxi'a,
 en buli'zxöni ladxi' Lë'.

⁶ Zián nupa ta'nná: "¿Nuzxi caz gun ga gaca dxi'a queëru'?"
 Lu yöl-la' dxi'i ladxi' quiu' buyú netu', Xan.

⁷ Runu' ga rudzéjade'eröda'
 ca tu'dzeja nupa tu'zí' xibé zxoá' za guizxi yu, en xisi lubá uva.

⁸ Cate' rata', la' rásitia' lu yöl-la' riböza dxi ladxi' quia',
 tu' run cazu' Li', Xan, ga riböza' dxi'a tsáhuio'do'.

5

¹ Ruzé nagu' didza' ruá'a, Xan.

Buyú ca rinnëda' ládxa'a lu yöl-la' ruhuí'ini quia'.

² Dios quia', Nu rinná be'e neda', ruzé nagu' cate' rinábida' Li'

gácalenu' neda', na' güf'ile'na' Li' didza'.

³Yugu' zila yönnu' chi'a.

Zílado' idxina' lo', en cōza' didza' ubi'u.

⁴Nacu' Li' Dios biti' raza ládxi'u le cabí'naca,
en biti' ru'u lataj íbiga' ga zu' nu ruá' dō'.

⁵Biti' ru'u lataj nupa tun ba rahui ila'dxín lo',
en biti' rilé'enu' dxi'a nupa ná'cagaca xihui'.

⁶Rusunítiiu' dērō nupa ta'z'í' ye'e luzé'eguequi,
en biti' rilé'enu' dxi'a nupa tuti bō'nachi, en ta'z'í' yē'.

⁷Gaca tsu'a neda' lu yu'u lidxu', tu' nadxí'ide'enu' neda'.

Lu yöl-la' ba'a ladxí' quia' tsu'a ga naca yudo' lá'ayi quiu', en tseaj ládxa'a Li'.

⁸Tu' nacuá' zían nupa ta'lé neda', buluf'i neda' le naca dxi'a rē'ēnu' guna', Xan.
Busēdi neda' para gaca guna' ca rē'ēnu' Li'.

⁹Biti' gaca nu tseajlé' didza' tuí'i nupa na' ta'lé neda'.

Ná'cagaca xihui' icja ládxi'do'guequi.

Naca ruá'agaca ca tu yeru ba nayalaj,
en lu yöl-la' rizí' yē' quéguequi tuí'i yulaj didza'.

¹⁰Ben lé'guequi xiguia', Dios.

Ben ga biti' udxín xtídza'guequi.

Gurú'una lé'guequi tu' túntica'sō dul-la',
en tu' ta'dá'baga' xtí'z'u.

¹¹Ulu'dzeja nupa tu'zxōni ladxí' Li'.

Lu yöl-la' rudzeja quéguequi gúl-lagaca quiu' tu' rácalenu' lé'guequi.

Tu'z'í' xibó' nupa nadxí'igaca Li'.

¹²Run cazu' Li' ga raca dxi'a quégaca nupa tun ca rnna xtí'z'u, Xan.

Lu yöl-la' dxi'i ladxí' quiu' run chí'u lé'guequi.

6

¹Biti' uzenu' bach neda' lu yöl-la' rilé quiu', Xan.

Biti' gunu' neda' xiguia' lu yöl-la' ridzá'a quiu'.

²Bué'chi' ladxí' neda', Xan, tu' rudú ládxa'a.

Bun neda', Xan, tu' riguí'i rizáca'a.

³Rō'ō bō'niga idúté le naca'.

¿Gáca'xte caz gaca caní, Xan?

⁴Gudá dusöló' neda', Xan.

Tu' nadxí'ínu' neda', busölá neda' lu yöl-la' guti.

⁵Lu lataj chul-la cuntu nu tsōjné Li'.

Cuntu nu zoa ni' nu gaca cu'u Li' yöl-la' ba.

⁶Rudú ládxa'a tu' rinnética'sō ládxa'a.

Yugu' dzō' ribisa le ráti'da' len nisa ribō'dxi quia'.

Rusubisa' xcúgua' len nisa ribō'dxi quia'.

⁷Rō'ō gui guiōj lahua' tu' ribō'dxitica'sa'.

Biti' gaca ilé'eda' tu' nō'zigaca nupa tu'dí'i neda'.

⁸Guli'cuíta ga zoa', libí'ili', ruá'ali' dō',
tu' riyōnnē' Xanru' ribō'dxa' neda'.

⁹Ruzé' naguē' le rulidza', ráta'yua' lahuē',
en rubi'ē didza' cate' bi riná'bida' Lē'.

¹⁰Ulu'tuí'i nupa tu'dí'i neda', en ila'bō' bō'niga.

Lu yöl-la' rutuí'i quéguequi ulu'biga' ga zoa'.

7

- 1 Ruzxōni ládxa'a Li', gácalenu' neda', Xana' Dios.
 Busólá neda' lu ná'agaca nupa ta' bía no neda', en gúcalen neda'
 2 para cabí soa nu cuéaj neda' ca runba' bēdxí guixi',
 en para cabí usuniti neda' ga cuntu nu zoa gácalen neda'.
 3 Xana' Dios, channō caní nuna':
 Channō nabága'a xiguia',
 4 o channō bubi'a dō' que nu gúcalen neda',
 o channō bi'a dō' que nu biti' bi ben quia' lu biti' rilé'e neda' dxi'a,
 5 bē' lataj soa regu' neda' nu na' biti' rilé'e neda' dxi'a, en ucul-la neda'.
 Bē' lataj nu na' quin neda' lu yu,
 en ucá'ana neda' cá'asō.
 6 Lu yōl-la' rilé quiu' guyasa, Xan.
 Gudá'baga' nupa na' lu yōl-la' ridzá'a quéguequi tá'baga' neda'.
 Guyasa, gúcalen neda' tu' nacu' Nu ruchi'a rusōró le raca quia'.
 7 Ben ga ulu'dubi quiu' yúgu'tē bōnachi,
 en gunná be'e léguequi ga ni' zu' xitsá'tērō.
 8 Ruchi'a rusōróu' quéguequi yúgu'tē bōnachi, Xan.
 Bubéaj neda' tsahui', Xan, tsca naca le tsahui' nuna', en tu' naca' idú tsahui'.
 9 Ben ga udxi que le xihui' tun nupa tuá' dō',
 pero buzóa tsutsu nupa tun le naca dxi'a,
 tu' nacu' Li' idú tsahui', Dios, en ruchi'a rusōróu'
 le ta'zá' ládxi'gaca bōnachi, en le ta'guinnaj ícaguequi.
- 10 Naca cazē' Dios Nu run chi'i neda'.
 Rusölē' nupa náca'gaca idú ladxi'.
 11 Dios ruchi'a rusōrōē' queēru' ca naca le naca tsahui',
 en richúgutica'sē' quégaca nupa tuá' dō'.
 12 Channō cabí ulu'bí'i ladxi' bōnachi, utuchē' guíe tuchi' queē'.
 Chinucōzē' uxiti' yaga queē'.
 13 Chinupē'ē yugu' le rudí'inē' lu gudil-la,
 en nudxié' lu du uxiti' yugu' yaga túchi'do' zoa guí' láchuiguequi.
- 14 Buyútsōca', riguinnaj icjē' bōnni' ru'ē dō' le xihui' gunē'.
 Ruí'i ládxe'ē le naca dō', en rizí' yē'ē.
 15 Nachō'ōnē' ga rē' tu yeru zxōn ga nu ibixi,
 pero lé cazē' yōjbixē' lu yeru na' guchō'ōnē'.
 16 Budxín la' queézē' dō' na' bi'ē,
 en dxíé' huē' ca naca xiguia' nabáguē'ē.
- 17 Guía'-nē' Xanru': "Xclenu'" tu' náquiē' tsahui',
 en gul-la' yōl-la' ba que Lē' Xanru', Nu nayépisētērō.

8

- 1 ¡Xana' Dios,
 bica' ba Lo' idútē yōdzōlió!
 ¡Xitsá'tērō ca lúxiba nayépisu' Li'!
 2 Túl-labi' bí'ido', enca' bi'i huē'ēnido' yōl-la' zxōn quiu'
 sal-la' nacué' nupa ta'dá'baga' Li'.
 Uzóa dxíu' nupa na' biti' ta'lé'e Li' dxi'a, enca' nupa ta'dá'baga' Li'.

3 Cate' ruyúa' lúzxiba quiu', le nunu' len xibõn na'zu',
 enca' beu', en yugu' bõlaj bení' nuzú' xilátjaguequi,
 4 ní'irõ rnnía': ¿Bizxi caz bõnni', tu' rõjné cazu' lë'?
 ¿Bizxi caz nu naca bõnáchisõ, tu' ru'í ládXu'u Li' nu na'?
 5 Nunu' ga naquië' bõnni' ia'lati' cuidi' ca naca cazu' Li'.
 Nuzú' queë' yõl-la' ba quiu', en yõl-la' run bal ca
 tu le néquini oro dxía icjé'.
 6 Nunu' ga rinná bé'enë' yugu' le nun cazu' Li'.
 Yúgu'të nuzú' xini'ë lë'.
 7 Nuzú' xini'ë yúgu'tëba' bõ'cu' zxila', en yúgu'tëba' bëdxi,
 8 en lës caní nunu' ca' quégacaba' biguínido',
 en quégacaba' bõla dzõ'õba' nísado',
 enca' quégacaba' yúgu'tëba' bõa' ta'dõdiba' lu nísado'.
 9 ¡Xana' Dios,
 bica' ba lo' idútë yõdzõlió!

9

1 ¡Idú ládxa'a rigu'a Li' yõl-la' ba, Xan!
 ¡Usiyõnda' bõnachi ca naca yúgu'të yõl-la' huáca nunu'!
 2 ¡Udzéjada', en uzi'a xibó'!
 ¡Gul-la' yõl-la' ba que Lo', tu' nayëpisëtëru'!
 3 ¡Ta'zxunnaj nupa ta'dá'baga' neda'!
 ¡Ta'dzõ'õ, en tu'niti lo' Li',
 4 tu' nubéaju' tsahui' le naca dxi'a runa'!
 ¡Rõ'u ga rinná bë'u, en ruchi'a rusõrõu' queëtu' ca naca le naca tsahui'!
 5 Bulidza zi'u yugu' yõdzõ, en busunitiu' nupa tuá' dõ'.
 Tsaz busulu' lu guichi quiu' gapa gula'zúaj láguequi.
 6 Chigula'niti nupa gula'dá'baga' Li'.
 Tsaz naguínajgaca gapa gula'cuá'.
 Busunitiu' yugu' yõdzõ gapa na' gula'cuá',
 ate' cuntu nu zoa rõjné yugu' yõdzõ na'.
 7 Zóatica'së' Xanru' Dios.
 Naguixjë' tsaz lataj ga rõ'ë rinná bë'ë en ruchi'a rusõrõë' quégaca bõnachi.
 8 Uchi'a usõrõë' quégaca bõnachi yõdzõlió lu le naca tsahui'.
 Uchi'a usõrõë' quégaca yugu' yõdzõ lu le nácate'.
 9 Gun chi'ë Xanru' Dios nupa nácagaca yechi'.
 Gácalenë' léguequi cate' nu gun léguequi zi'.
 10 Ulu'zxõni ladxi' Li' nupa núnbë'gaca Lo'.
 Caní gaca, Xan, tu' cabí nusán ládXu'u nupa tu'guilaj Li'.
 11 Guli'gul-la yõl-la' ba queë' Xanru', zoë' ga na' nazí' le Siõn.
 Buli'siyõn bõnachi yugu' yõdzõ ca naca yugu' le nunë'.
 12 Biti' ral-la ládXë'ë nupa ta'gu'í ta'zaca' cate' tu'lidza Lë',
 tu' rõjné léguequi Nu na' ruzi' lëbi nu ruti bõnachi.
 13 Buéchi' ladxi' neda', Xan.
 Buyú ca tun neda' zi' nupa tu'dí' neda'.
 Ruchisu' Li' neda' cate' chirequi gátia'

14 para gaca usiyönda' bönachi yöl-la' ba quiu' Li'.
Ga naca ga nu tsaza yödzö quiu' nazi'i le Sión,
udzéjada' tu' nusóló' neda'.

15 Yöjbíxigaca bönachi yugu' yödzö lu yeru gula'chö'öna ga tsöjbíxigaca
luzé'guequi.

Bila'röli ni'aguequi lu yöxaj bulu'cachi' para ila'zön léguequi.

16 Chinuné' Xanru' Dios ga núnbé'gaca bönachi Lè' tu' buchi'a busöröë'
qué'guequi.

Lu lè na' nun nu ruá' dö' zön la' cuinsi.

17 Ila'yaza lataj chul-la nupa tuá' dö',

yúgu'tè nupa na' nal-la ládxí'gaca Dios.

18 Calèga tsaz ulu'gá'ana cá'asö nupa ta'yadzaj ta'yudxi,
en bití' iníti tsaz yöl-la' run löza qué'gaca nupa nácgaca yechi'.

19 Guyasa, Xan.

Bití' gu'u lataj tsépisè nu naca bönáchisö.

Buchi'a busörö qué'gaca bönachi yugu' yödzö.

20 Buxös léguequi, Xan.

Ben ga ulu'únbé' le nácgaca, tu' nácgacasö bönachi.

10

1 ¿Bizx que zu' zi'tu', Xan?

¿Bizx que rucachi' lo' cate' bi raca quia'?

2 Lu yöl-la' run ba rahui qué'gaca nupa tuá' dö'

ta'bía no nupa nácgaca yechi'.

Ben ga ila'zön du yalaj na' nucáchi'gaca la' léguéisö.

3 Run ba zxön cuinë' bönni' ru'è dö' ca naca le xihui' rizè ládxè'è.

Bönni' ruhuídi'nè' rulidza ditjè' luzé'è, en ruzöë' Dios tsölá'alö.

4 Lu yöl-la' run ba zxön cuinë' bönni' huía' dö' bití' ruí' ládxè'è Dios.

Rizá'asö ládxè'è, rnnè': Bití' ca' zoa Dios.

5 Ruzi'è xibé yúgu'tè le runè'.

Bití' ca' réquibe'enè' zoë' Dios Nu ruchi'a rusörö qué'gaca bönachi.

Ruzöë' tsölá'alö nupa bití' ta'lé'e lè' dxi'a.

6 Rè' la' cuinsè': "Gatga ichíxida'.

Catu caz bi gaca quia'."

7 Didza' ru'è nácgaca le rudxía dö', enca' le rizi' yè', en le rudidza' yudxi yugu'
luzé'è.

Ruí'tica'sè' didza' le cabí'nacaté, en le naca xihui'.

8 Rucachi' cuinë' yugu' lu yödzö.

Bagáchi'sö rútiè' nupa bití' bi nabága'gaca.

Ruyúlanè' nu bi gaca gun que.

9 Ribözè' ga na' nucachi' cuinë' ca runba' bédxi guixi'.

Ribözè' nu gaca sönè'.

Rizönè' bönni' yechi' lu du yalaj queë', en rá'ayöjè' lè' ga nagachi' queë'.

10 Riguinë' luyú nu na' nazönè'.

Zián nupa rucul-lè' len nè'è nal-la.

11 Rè' la' cuinsè': "Nal-la ládxè'è Dios.

Nucachi' lahuè', en bití' ca' rilé'enè' le runa'."

12 ¡Guyasa, Xan!

¡Gulís no'o, Dios!

¡Biti' gal-la ládxi'u nupa ta'guí'i ta'zaca'!

13 ¿Bizz que bönni' na' ru'ë dö' nuzóë' Dios tsólá'aló?

Gudxé' la' cuinsé': Biti' uzí' lé' Dios neda'.

14 Li' bilé'e quézinu' lé ni, Xan.

Ruí'i ládxi'u nu riguí'i rizáca', en nu risëbi ladxi',
en zóatica'su' gácalenu' léguequi.

Nu naca bayechi' rigú'u cuini lu no'o, Xan,

tu' zóatica'su' gácalenu' nu riyadza riyudxi.

15 Bugúa yöl-la' unná bë' quégaca nupa tuá' dö', en nácagaca xihui'.

Bubí'i quéguequi ca naca xiguia' nabága'gaca.

16 Inná bë'tica'sé' Xanru' Dios.

Nupa tu'béaj icjaguequi Xanru' ulu'niti tsaz lu xiyú cazë'.

17 Ruzé nagu', Xan, le ta'nábini Li' nupa nácagaca do' ladxi'.

Rutipu' ládxi'guequi, en ruzé nagu' chí'iguequi.

18 Ruchi'a rusöróu' quégaca nupa nácagaca uzëbi,

en nupa zoa nu ribía nó léguequi,

para cabirö ulu'xösa bönachi yödzölió ni luzë'eguequi.

11

1 Ruzxöni ládxa'a Xanru' gácalenë' neda'.

¿Naru' guíëtso' neda':

“Buzxúnnaj lu guí'a ca runba' biguínido”?

2 Buyútsöca', zóngaca nupa tuá' dö' yaga uxiti'.

Nuzóagaca yágado' lahui tuchi' lu du rusé,

para ilútië' bagáchi'sö nupa nácagaca dxi'a.

3 Channö ila' guínnaj yugu' le tu'zóa tsutsu le naca dxi'a,

¿bizxi caz gaca gun nu naca tsahui'?

4 ¡Zoa cazë' Xanru' yudo' lá'ayi queë'!

Yehua' yubá zoa ga rö'ë rinná bë'ë Xanru' Dios.

Rilé'e guiöj lahuë' para uyúë' le tun bönachi.

5 Rizí' bë'ë Xanru' nu naca tsahui'.

Biti' rilé'enë' dxi'a nu ruá' dö', en nu raza ladxi' ta'dá'baga' yúlahui'.

6 Gunë' ga sáca'gaca nupa tuá' dö' le usuniti léguequi.

Ubi'ë quéguequi guí', en le ruquéla' guí', en tu bö' régui.

7 Caní gunë' Xanru' tu' náquië' tsahui', en nadxi'inë' le naca tsahui'.

Nupa tun le nácaté ila'lé'e lahuë'.

12

1 Busólá neda', Xan, tu' cabirö zoa nitú nu naca dxi'a,

en bití' gaca nu idzöli nitú nu run ca rnna xtídzá'a.

2 Ta'zí' ye'e yúgu'të bönachi luzë'eguequi.

Lu yöl-la' rizi' yë' quéguequi tuí'ilen luzë'eguequi didza' yúlajdo'.

3 Xan, buzóa dxisó nupa na' tuí'i didza' yúlajdo',

en buzaga' ruí'igaca nupa tun ba zxon cuínguequi.

4 Ta'nná: “Güf'iru' didza' ca rizësö ládxi'ru',

ate' cuntu nu tá'baga' rë'u.

¿Nuzxi caz inná be'e rë'u ca naca didza' ru'iru'?"

⁵Rnnë' Xanru': "Na'a guída' tu' nacuá' nupa tun zi' nupa ta'yadzaj ta'yudxi, ate' rinnë ládxi'gaca nupa ni tu' zoa nu ribía no léguequi.

Ca ta'zësö ládxi'gaca, la' guídatea' dusólá' léguequi."

⁶Huáca uzxöni ládxi'ru' didza' ru'ë Xanru'.

Nácagaca ca guíë plata ba nequi, le nudxi'a gadxi luzuí tu lu guí' lálë'e.

⁷Li' caz, Xan, gun chi'u léguequi,

en usöló' léguequi lu ná'agaca nupa tuá' dö' na'a dza.

⁸Gátitës nacuá' nupa tuá' dö',

cate' tun zxön bönachi le ruá' dö'.

13

¹¿Gáca'xte caz gal-la ládxi'u neda', Xan?

¿Naru' tsaz gal-la ládxi'u neda'?

¿Gáca'xte caz ucache' cuinu' lahua'?

²¿Gáca'xte caz gun bayudxi guá' ilena' le réquida' zi'?

¿Gáca'xte caz huí'inida' rëla, en te dza?

¿Gáca'xte caz ucúl-lágaca neda' nupa ta'dá'baga' neda'?

³Buyú neda', Xan, en bubí'i didza'.

Butípa ládxa'a para cabí gátia'.

⁴Ní'irö bití' gaca ila'nná nupa ta'dá'baga' neda', bití' ila'nná: "Bucúl-laru' lë'."

Bití' gaca ulu'dzeja tu' nótjada' ládxa'a neda'.

⁵Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

⁶Gul-la' queë' Xanru',

tu' benë' quia' le naca dxi'a.

14

¹Lu icja ládxi'da'ahuë' rnnë' bönni' tu' canöz, rnnë': Bití' zoa caz Dios.

Nachixi nanítigaquië' bönni' caní, en tunë' le cabí rilé'enë' dxi'a Dios.

Cuntu nu zoa nu run le naca dxi'a.

²Ga zoë' Dios yehua' yubá buyúë' luyú ni ga nacuá' bönachi

para ilé'enë' channö zoa nu réajni'i, nu na' riguilaj Dios.

³Yúgu'të' nadódigaquië' tsölá'alö.

Nachixi nanítigaquië' tu tuë'.

Cuntu nu zoa nu run le naca dxi'a, nitú bönachi.

⁴¿Naru' cabí ta'yéajni'i nupa tuá' dö'?

Le tun nupa na' naca tsca tagu bönachi quia' ca nu ragu yöta.

Bití' ca' tu'lidza neda', Xángaca bönachi.

⁵Lu yöl-la' radxi ridzöbi quéguequi ta'zxizi

tu' ta'lë'e Xanru' Dios, en zóalenë' bönachi tsahui'.

⁶Tu'titaj xtídza'gaca nupa nácagaca yechi',

pero nupa ni tu'zxöni ladxi' gácalenë' Xanru' léguequi.

⁷Raca ládxa'a irúaj Sión Nu usölá bönachi Israel.

Cate' gunë' Xanru' ga ulu'dxín bönachi queë' nadzúngaca xilátjaguequi,
ulu'dzeja xzí'ini xi'sóë' Jacob, bönachi Israel, en ulu'zí' xibë' Dios.

15

¹ ¿Nuzxi caz bönachi tsöjsóa xilatju', Xan?

¿Nuzxi caz tsöjsóa ga naca lá'ayi quiu'?

² Nu na' naca idú ladxí', en run le naca tsahuí',
en lu icja ladxí'da'ahuí ruf'i didza' le nácatë.

³ Nu na' bití' rízí' quidza' bönachi,
en bití' ruá' dö' que luzë'e,
en bití' ruzë naga nu rízí' quidza' luzë'e.

⁴ Nu na' bití' run bal nu ruá' dö',
pero run bal nupa tun zxön Dios,
en sal-la' bi uniti cate' chinún xtidza', bití' ca' rutsá' didza' na'.

⁵ Nu na' bití' rízí' icja dumí cate' runödzej dumí que tu chí'ido'sö,
en bití' rízí' dumí para si' yë' ca naca le nun nu bití' nabaga' xiguaí'.
Nu na' run yúgu'të le caní bití' ca' idzá' xilataj.

16

¹ Ben chí'i neda', Dios, tu' ruzxöni ládxa'a Li'.

² Lu icja ladxí'da'ahua' gudxa'-në' Xanru':
"Li' nacu' Xana'.

Bití'rö bi zoa quia' le naca dxi'a, pero tuzu' Li'."

³ Riyaza ladxí'léna' nupa nácgaca queë' Dios luyú ni,
en nupa nácgaca idú ladxí'.

⁴ Ila'yán le ila'guí' ila'zaca' nupa ta'yéaj ladxí' yugu' dios izá'a.
Bití' ca' cu'a láhuiguequi rön ca tun bönachi na',
en bití' ulidza' lágaca díos na'.

⁵ Náquië' Xanru' Dios Nu nabánida', en Nu ruzi'a xibé.

⁶ Li', Xan, nuzú' xilatja'.

Lataj na' nuzú' quia' naca le ruzi'a xibé,
en lachi naca lataj na' nequi quia'.

⁷ Gul-la' yöl-la' ba queë' Xanru', Nu rigú'u yöl-la' neda' le naca tsahuí',
ga ridxintë ruzéajni'inë' neda' cate' ni' rasia'.

⁸ Chinuna' ga zóatica'së' Xanru' lahua'.
Tu' zoë' cuita' bití' bi utsá' neda'.

⁹ Que lë ni na' budzeja ládxa'a, en buzí' xibé ladxí'da'ahua',
ate' gun löza le naca' cate' igácha'a yeru ba,

¹⁰ tu' cabí ucá'anú' neda' lataj chul-la,
en bití' gu'u lataj uniti nu nequi quez quiu'.

¹¹ Nunu' ga núnbë'a nöza ichë' neda' ga soa' ibana'.
Ga zu' Li' gata' quia' yöl-la' rudzeja idú,
ate' cuitu' Li' uzí'tica'sa' xibó'.

17

¹ Ruzë nagu' neda', Xan.

Lu le naca tsahuí' quia' rulidza' Li'.

Bë' ladxí' le rinábida' Li' tu' cabí ca' rizí' yë'a.

² Buchi'a busörö quia'
tu' runu' Li' le naca tsahui'.

³ Núnbë'u Li' le yu'u ladxí'da' ahua'.

Ruyú' neda' chí'i dzö'ölö.

Guzxí' bë'u neda', ate' burúaja' tsahui'.

Biti' ca' ruá'a didza' le cabí naca idú dxi'a.

⁴ Runa' ca rinná bë' xibá quiu',
en biti' ca' ruá'a dö' ca tun bal-la bönachi.

⁵ Ridática'sa' la' nöza tsahui' quiu',
en biti' ca' ridöda' tsölá'alö.

⁶ Rulidza' Li', Dios, tu' rubi'u didza'.

Ruzé nagu' yugu' didza' ruá'a.

⁷ Buluí'i lahui yöl-la' dxi'i ladxí' quiu'.

Rusölá cazu' nupa tu'zxöni ladxí' Li'

lu ná'agaca nupa ta'dá'baga' léguequi.

⁸ Ben chí'i neda' ca run chí'u la' guiöj lo cazu'.

Bucachi' neda' cuitu' Li' ca runba' böra, rucáchi'gacaba' börado' zxan xílabá,

⁹ para cabí bi ilún quia' nupa tuá' dö',
nupa na' ta'lé neda', en nagú'ugaca neda' lë'ajlö.

¹⁰ Biti' ca' zóalen léguequi yöl-la' ruhuéchi' ladxí',
ate' tuí' didza' lu yöl-la' run ba zxön cuínguequi.

¹¹ Gáti'tës ga ridöda' ta'gú'u neda' lë'ajlö,
en tē'ēni ila'guín neda' luyú.

¹² Nácagaquië' ca yugu' bēdxi guíxi'do'.

Tē'ēnē ulu'sunítiē' neda'.

Nácagaquië' ca yugu' bēdxi guixi'.

Nucachi' cuíngaquië' para ila'zönē' neda'.

¹³ Gudá, Xan, gudá'baga' nupa ta'lé neda', en bucul-la léguequi.

Busölá neda' lu ná'agaca nupa tuá' dö', ugunu' dxin guié tuchi' quiu'.

¹⁴ Lu yöl-la' huáca zxön quiu' busölá neda', Xan,
lu ná'agaca nupa tu'zí' xibé na'a dza,
nupa na' nuhuólaj nudzē'egaca yöl-la' tsahui' quiu'.

Nayángacabi' xí'inigaquië',
ate' tu'cá'anē' lu ná'agacabi' le dē sizxöni quégaquië'.

¹⁵ pero neda' ilé'eda' lo' tu' naca' tsahui',
en tsaza ládxa'a gaca' ca nacu' Li' cate' ubana'.

18

¹ ¡Nadxí'ide'eda' Li', Xan!

¡Li' rutipa cazu' ládxa'a!

² Ruzóë' Xanru' neda' tsutsu, en rapa chí'ē neda', en rusölē' neda'.

Náquië' Dios quia', en Nu rutipa ládxa'a,
ate' ruzxöni ládxa'a Lē'.

Rácalenē' neda' lu gudil-la: Rusölē' neda', en rizönē' neda'.

³ Rulidza'-nē' Xanru' Nu ral-la' cú'uru' yöl-la' ba,
ate' usölē' neda' lu ná'agaca nupa tu'dí'i neda'.

⁴ Ia'látí'sö la' gútia',
ate' yöjbaga' neda' le usuniti neda', le ben ga gúdxida'.

5 Ia'láti'sò la' yòjtsu'a lataj chul-la que yòl-la' guti,
tu' la' gútitia'.

6 Lu le guca quia' bulidza'-nè' Xanru'.
Bulidza'-nè' Dios quia' para gácalenè' neda'.
Ga na' zoè' lataj lá'ayi queè' biyönnè' chi'a.
Buzè' naguè' le gunabi yúdxida' Lè'.

7 Ní'irò gudòdi budó' xzu', en guzxizi luyú.
Guzxízida' xilíbigaca yugu' guí'a sibi.
Guzxízigaca tu' gulénè' Lè'.

8 Birúaj dzön zxinè'è,
ate' birúaj guí' ru'è le buzegui le dè idú gásibi'ilè',
ate' buguela' guí' yugu' bo' yalaj.

9 Benè' ga bötaj lúzxiba, en bötajè' Lè' cazè',
ate' guzóa xzan ni'è le naca chul-la.

10 Gudödè' lu bö'òs dxié' tu le nayépisè nazí'i le querubín.
Carelò gudödè' tu lu bö' budunu'.

11 Busubaga' cuinë' le naca chúl-lasò.
Lè na' naca böaj gasaj le richè'lè'e nisa.

12 Lu le rëpi yösa queè' lu böaj gasaj na'
bila'rúaj bo' yalaj, en guiøj bögui' yöla sunna.

13 Gunnè guziú' que chi'è Xanru' lúzxiba xitsá'.
Biyön chi'è Dios nayépisètèrè',

lu dzön, en yugu' lu bö' yalaj, en lu guiøj bögui' yöla sunna.

14 Gusöl-lè'è yugu' yaga lahui tuchi' queè', en bèsilásiè' nupa na' tu'dí'i neda'.
Gusöl-lè'è yugu' yösa queè' yugu' le bulu'cul-la léguequi.

15 Ní'irò bilá' lahui le zoa xzan nísado',
ate' bilá' lahui xilibi yödzülió,
cate' buzenu' bach nupa biti' ta'lé'e Li' dxi'a, Xan,
en lu yòl-la' rilé quiu' bulidza zi'u léguequi.

16 Bötjè' zaca' xitsá'alò, en gudélè'è neda'.
Bubéajè' neda' lu nisa zili.

17 Busölè' neda' lu na' nu biti' rilé'e neda' dxi'a, en nál-latèrò,
enca' lu ná'agaca nupa tu'dí'i neda', en nál-lágacatèrò ca neda'.

18 Cate' ni' chizóa inítia' gula'zóa régu'è neda',
pero Xanru' gúcalenè' neda'.

19 Bubéajè' neda', en buzóè' neda' tu lu lataj zxön.
Busölè' neda' tu' guyaza ládxè'è neda'.

20 Bubi'è Xanru' quía' tsca le tsahui' naca',
en benè' quia' le naca dxi'a tu' cabí nabága'a xiguaia',

21 tu' runa' ca naca le rusédinë' Xanru' neda',
en biti' ca' ridá'baga'a Lè'.

22 Runa' ca ta'nná xibá nunè' Xanru',
en biti' ridá'baga'a le rinná bè' naguixjè' Lè'.

23 Biti' bi le naca dö' nabága'a lahuè' Lè',
ate' ben chi'a le innía' para cabí gu'a dö'.

24 Que lè ni na' bubi'è Xanru' quía' tsca le tsahui' naca',
en tu' cabí nabága'a xiguaia' lahuè' Lè'.

25 Ruhuechi' ladxu'u nupa tu'huechi' ladxi' luzé'eguequi,
en nacu' idú dxi'a len nupa nácgaca idú dxi'a.

26 Ruluf'i cuinu' idú ladxi' len nupa nácgaca idú ladxi',
pero ridá'bagu'u nupa ta'dá'bagu' xtídz'u.

27 Rusöló' nupa ta'guí' ta'zaca',
pero ruzótju' nupa tun ba rahui.

28 Ruquéla' casu' guí' quia', Xana' Dios,
en rigú'u quia' bení' cate' ridá' ga chul-la.

29 Lu yöl-la' huáca queë' Dios rucul-la' bönni' guizxi yu rójáquië' gudil-la.
Tu' zóalenë' Dios quia' neda',
rixíti'a ribixa' lu zö'ö run chí'i léguequi.

30 Idú dxi'a nácgaca le runë' Dios.

Nurúaj tsahui' xtídzë'ë.

Rapa chí'ë yúgu'të nupa ta'nábini Lë' gácalenë' léguequi.

31 ¡Tuzë' Xanru' náquië' Dios!

¡Tuzë' Dios rapa chí'ë rë'u!

32 Dios ni ruzalë' neda',
en runë' ga naca' idú ladx'a'a.

33 Runë' ga nácgaca ni'a ca ní'agacaba' bidxina' guixi',
en ruzóë' neda' yugu' lu guí'a zxön.

34 Rusédinë' neda' para gaca tseja' gudil-la,
en para gaca uguna' dxin uxiti' yaga néquini guié' bronce.

35 Lu yöl-la' rusölá quiu' run chí'u neda'.

Len no'o nál-la rizönu' neda',
en lu yöl-la' dxi'i ladxi' quiu' nunu' ga nayëpisëtëra'.

36 Ruchi'u nöza ga ral-la' töda',
en runu' ga biti' cuila'.

37 Guzóa régu'a nupa tu'dí'i neda', en bucul-la' léguequi.
Biti' buécja' ga bidxintë busunítia' léguequi.

38 Gudina' léguequi luyú, ate' biti' guca ulu'huóása.

Gula'dzö'ö zxan ni'a.

39 Benu' neda' nál-la para tseja' gudil-la,
en benu' ga bucul-la' nupa gula'dá'bagu' neda'.

40 Benu' ga bulu'zxunnaj lahua' nupa biti' ta'lé'e neda' dxi'a,
ate' busunítia' nupa na' bulu'dí'i neda'.

41 Bulu'lidza nu gácalen léguequi,
pero cantu nu zoa usölá léguequi.

Bulu'lidza ca' Xanru', pero biti' ubi'ë didza'.

42 Buzxuzxja' léguequi ca bëchtö yu nachë' lu bö'ös.

Buliba' léguequi ca ruliba' guna' la' nöza.

43 Busöló' neda' lu ná'agaca nupa ta'dá'bagu',
en nunu' ga rinná bé'eda' bönachi zían yödö.

Tun ca rnna xtídz'a' bönachi biti' núnbë'a zí'alö.

44 Cate' ta'yöni neda', la' tun ca rnna xtídz'a'a.

Tadxi neda' bönachi zían yugu' yödö izá'a.

45 Ta'cuidi' ladxi', en lu yöl-la' rixizi queguequi

ta'rúaj yugu' lu yödzo tsutsu quéguequi.

46 ¡Zoë' nabanë' Xanru'!

¡Yöl-la' ba Nu na' run chi'i neda'!

¡Guli'gün zxon Dios Nu rusöla neda'!

47 Náquië' Dios Nu rizi' la nupa tu'dí'i neda',
en runë' ga tadxi bönachi guizxi yu neda'.

48 Rusölë' neda' lu ná'agaca nupa biti' ta'lé'e neda' dxi'a.

Le nácatë runë' ga rucul-la' nupa ta'dá'baga' neda',
en rusölë' neda' lu na' bönni' ridzá'a.

49 Que lë ni na' guía' Li': Xclenu' Xan, lógaca bönachi zían yödzo,
en gul-la' yöl-la' ba que Lo' La'ayi.

50 Rusöla cazë' Xanru' bönni' rinná bë'ë uláz queë',
en nadxí'itica'së' nu na' nabö cazë',

nu na' naca David, en yugu' zxi'ini xi'sóë' ga idxinrö dza udxi.

19

1 Yugu' le nacuá' lúzxiba tu'luf'i lo yöl-la' zxon queë' Dios,
ate' yugu' le raca lu bö'ös náagaca bé' le nunë'.

2 Yugu' dza tu'zéajni'i,

en yugu' dzö' tu'luf'i lo yöl-la' réajni'i.

3 Biti' zoa didza' tu'í, en biti' riyón tu le ta'nná.

Biti' riyón chí'iguequi.

4 Le tu'zéajni'i ridxín ga naguéla'të luyú,
en le tu'sedi ridxín idütë yödzölió.

Ga na' nacuá' nuzóë' Dios xilataj gubidza,

5 le naca ca tu bönni' utsaga në'ë rirúajë' yu'u,

en naca ca' ca tu bönni' nál-la rudzéjanë' cate' zéajë' carelö lu huitaj.

6 Ga naguela' lúzxiba rilén gubidza,

en ridödi ga ridxintë ga ribía.

Biti' bi zoa le cabí rutsë'e gubidza na'.

7 Tshahi' naca ca rinná bë'ë Xanru', en run ga huóaca ládxi'ru'.

Idütë li naca didza' nuzóë' Xanru', le run ga réajni'i nu naca nöxaj ladxi'.

8 Tshahi' náagaca xibá queë' Xanru', le tun ga rudzeja ládxi'ru'.

Náagaca idú dxi'a le gunná bë'ë Xanru', en ta'gú'u bení icja ládxi'do'oru'.

9 Dxí'ado' naca gádxiru'-në' Xanru', para sóatica'siru'.

Idú li naca ca ruchí'a rusöröë' Xanru' bönachi, en idú tshahi'.

10 Nazáca'gacatërö didza' na' ca oro, enca' ca oro ba nequi.

Náagacatërö zxixi ca bidxina' buz, en ca le zxixi queëba'.

11 Didza' na' tu'zéajni'i neda', huen dxin queë'.

Uzítërö xibë nu run ca rnna xtídzë'ë na'.

12 ¿Nuzxi caz gaca inöz channö richixi rinigui?

Busöla neda' lu dul-la' nuna' le cabí gúquibe'eda' bena'.

13 Ben chí'i neda' para cabí udödi cuina' lu dul-la',

para cabí inná be'e neda' lë na' naca dul-la'.

Ní'irö ugá'ana' tshahi', en biti' ibága'a xiguia'.

14 Ben ga ilaca didza' ruá'a, en le rizá' ládxa'a ca raza ládxi'u Li'.

Nacu' Xana' ruzú' neda' tsutsu, en ruhuóá'au' neda'.

20

¹ Rinábida'-nē' Xanru' uzē' nuguē' li' cate' idxín dza qui'i sacu'u.
Dios queē' Jacob gácalenē' li'.

² Rinábida'-nē' isól-lē'ē' le gácalen li' le irúaj lataj lá'ayi queē'.
Lē' na' irúaj Sión gun ga gacu' tsutsu.

³ Rinábida'-nē' tsōjnenē' yúgu'tē' le gulú'u queē',
en si' lu nē'ē' le buzégui'u lahuē'.

⁴ Rinábida'-nē' gunnē' quiu' tsa naca le rizé' lādxi'u,
en gunē' ga gácatē' yúgu'tē' le rizá' lādxi'u.

⁵ Udzéjatu' cate' usólē' li',
en uchísatu' le gaca bē' ruidztu'-nē' Dios queēru'.
Rinábida'-nē' Xanru' gunnē' quiu' yúgu'tē' le rinábinu' Lē'.

⁶ Na'a nōzda' rusólē' Xanru' nu nabō' cazē'.
Riyōnnē' nu na' nabōē' ga ni' zoē' yehua' yubá' la'ayi queē'.
Isól-lē'ē' yōl-la' huáca idú' queē' le usólá' nu na'.

⁷ Nacuá' nupa tu'zxōni lādxi' yugu' carreta que gudil-la,
ate' nacuá' bōnachi yúbōlō' tu'zxōni lādxi' yugu' bōa',
pero rē'u ruzxōni lādxi'ru' Lē' Xanru' Dios.

⁸ Ta'cuídi'nē' nupa na', en ta'dzō'ē',
pero rē'u ni zuíru', en zóaru' tsutsu.

⁹ Busólá' netu', Xan, tu' nacu' Nu rinná' be'e netu'.
Rinábitu' Li' uzē' nugu' netu' cate' ulídztatu' Li'.

21

¹ Rudzéjanē' bōnni' rinná' bē'ē' tu' zóalen lē' yōl-la' huáca quiu' Li', Xan.
Tu' busóló' lē', yēnni'tērō' rudzéjanē'.

² Bunódzju' queē' le rizé' lādxi'ē'.
Biti' gudá'bagu'u le gunábinē' Li'.

³ Tu' raza lādxi'u lē' ruzú' queē' yugu' le naca dxi'a.
Nudxiú' icjē' tu' le néquini oro idú'.

⁴ Gunábinē' Li' gu'u queē' yōl-la' na'bán, ate' bē'u le queē'.
Nunu' ga sóatica'sē' ibanē' yugu' dza si' zaca.

⁵ Zxōntē' naca yōl-la' zxōn queē' tu' nusóló' lē'.
Nunu' lē' bal, en nunu' ga nayépisē'.

⁶ Zóatica'sō' le naca dxi'a nuzú' queē'.
Runu' ga rudzéjade'enē' tu' zóalenu' lē'.

⁷ Caní' raza queē' bōnni' na' rinná' bē'ē' tu' ruzxōni lādxi'ē' Xanru'.
Biti' bi' utsá' lē' tu' ruhuéchi' lādxi'ē' Dios nayépisētērē' lē'.

⁸ Huadeli' no'o ga nacuá' yúgu'tē' nupa ta'dá'bagu' Li'.
Huadeli' no'o ibēla' ga nacuá' nupa tu'dí' Li'.

⁹ Cate' idxín dza usiúdxu' léguequi gaca quéguequi ca tu' guí' ruzégui bla'do'.

Usunítu' léguequi, Xan, lu yōl-la' rilé' quiu',
ate' tséguiguequi tu' lu guí' zxōn.

¹⁰ Ucuítu' yugu' xzí'ini xi'sóagaca nupa na' luyú' ni,

en ubéaju' yugu' xzí'iniguequi ládjagaca bönachi.

¹¹ Caní gunu' tu' gulé'éniguequiné' ilu'ë dö' quiu'.

Gulún xtídza'gaquié' bi iluné', pero bití' gaca iluné' ca rnna xtídza'gaquié',

¹² tu' gunu' Li' ga ulu'zxúnnajé'.

Ichisu' uxiti' yaga quiu', en gunu' léguequi hué'.

¹³ Len yöl-la' huáca quiu', Xan, uxicju' lu gudil-la.

Gúl-latu', en cú'utu' yöl-la' ba que yöl-la' huáca quiu'.

22

¹ Dios quia', Dios quia', ¿bizx que nusán no'o neda'?

¿Bizx que bití' riyónnu' le rinnéda' ládxa'a, en bití' rácalenu' neda'?

² Dios quia', idú dza rulidza' Li', pero bití' bi didza' rubi'u.

Idú yèla rulidza', en bití' ca' rasia'.

³ Lá'ayi nacu' Li'.

Zu' ga riyón yöl-la' ba ta'gú'u bönachi Israel Li'.

⁴ Bulu'zxöni ládxe'ë xuz xtó'otu' Li'.

Bulu'zxöni ládxe'ë Li', ate' busöló' légaquié'.

⁵ Bulu'lidzè' Li', ate' gúcalenu' légaquié'.

Bulu'zxöni ládxe'ë Li', en bití' bulu'tuí'né'.

⁶ Naca' neda' ca tuba' bëla guna', en caléga bönni'.

Tu'dí'i bönachi neda', en tu'cá'ana neda' cá'asö.

⁷ Yúgu'tè nupa ta'lé'e neda' tu'titaj neda'.

Ta'salaj ruí'iguequi lu yöl-la' rutitaj, en tu'tá ícjaguequi, ta'nná:

⁸ "Lé' buzöni ládxe'ë Xanru' para usölé' lé'."

Xanru' usölé' lé' channö tsaza ládxe'ë lé'."

⁹ Nacu' Li' Nu guléaj neda' lé'ënu xiná'a.

Benu' ga ruzöni ládxa'a Li'

cate' ni' gúdx'a'a luchú'unu xiná'a.

¹⁰ Nagá'ana' lu no'o Li' ga gudéla'tè gulja'.

Ga gudéla'tè buzóanu xiná'a neda' nacu' Dios quia'.

¹¹ Bití' su' zítu' ga ni zoa', tu' zoa' gagu le gun neda' zítu',

ate' cünturö nu zoa nu gácalen neda'.

¹² Gula'gu'ë neda' lé'ajlò ca tunba' yugu' bédxi.

Ca yugu' bédxi que yödzo Basán gula'bía di'ë neda'.

¹³ Ta'salaj ruá'agaquié' lahua' neda'

ca runba' bédxi guixi', ridunba', en ribödxi'aba'.

¹⁴ Nuhuóaca' ca nisa nalalaj luyú, ate' nazángaca bëch dxita quia'.

Nuhuóaca ládxi'da'ahua' ca bidxina' buz la lu lé'a.

¹⁵ Nacuidi' yöl-la' huáca quia' ca tu rō'ō nalá'a,

ate' da' lúdx'a'a chichja'.

Nuzú' neda' lu bëchtö yu que yöl-la' guti.

¹⁶ Ta'gu'ë neda' lé'ajlò ca tunba' yugu' bō'cu'.

Nagú'ugaquié' neda' lé'ajlò bönni' tu'ë dö'.

Nuzóagaquié' yeru blaga na'a, en ni'a.

¹⁷ Nalá'gaca yúgu'tè dxita néquinida'.

Ta'né'ë neda', en tu'yú yénmié' neda'.

¹⁸ Ta'guísié' zxa' que queégaquié',

en tu'yúé' le gaca bë' lahui lari' rixóa cúdza'a.

¹⁹ Bití' gá'anú' zítu', Xan.

Gúcalentë neda', Li', Nu naca yöl-la' huáca quia'.

²⁰ Busölá neda' lu guíë tuchi'.

Busölá yöl-la' na'bán quia' lu ruá'agacaba' bö'cu'.

²¹ Busölá neda' lu ruá'agacaba' bëdxi guixi',

en lu lúzugacaba' bëdxi gú'una.

Li' riyön quézinu' chi'a.

²² Usiyönda' yugu' böchi' luzá'a ca naca Lo'.

Gatsaj láhui'lö ga na' tu'dubi bönachi lo' cu'a Li' yöl-la' ba.

²³ ¡Guli'cu'ë Xanru' yöl-la' ba, libí'ili' na' rádxili'-në'!

¡Guli'gun zxön Lë', yúgu'tëli' xzí'ini xi'sóë' Jacob!

¡Guli'gadxi Lë', yúgu'tëli' xzí'ini xi'sóë' Israel!

²⁴ Caní ral-la' gunlí' tu' cabí buca'anë' cá'asö',

en biti' budí'inë' nupa gula'guí'i gula'zaca',

en biti' bucachi' lahuë' para cabí ilé'enë' léguequi,

pero cate' bulu'lidza Lë', biyönnë' léguequi.

²⁵ Cu'a Li' yöl-la' ba ga tu'dubi bönachi guixzi yu lo'.

Lógaca nupa tadxi Li' usudxina' le guxzí' lu na'a guna' quiu'.

²⁶ Ilágugaca nupa nácgaca nöxaj ladxi', en ulu'huöläj ulu'dzë'e.

Nupa ta'guilaj Xanru', en ta'gú'u Lë' yöl-la' ba ulu'zí'tica'sö xibë'.

²⁷ Bönachi idütë yödölió tsöjnégaca Xanru', en ulu'huöáca queë'.

Bönachi yúgu'të yödö luyú ila'gú'u Lë' yöl-la' ba.

²⁸ Caní gaca tu' dë lu në'ë Xanru' inná bë'ë.

Inná bé'enë' yúgu'të bönachi luyú.

²⁹ Yúgu'të nupa dë lu ná'agaca luyú ni ilágugaca, en ila'gú'u Lë' yöl-la' ba.

Yúgu'të nupa ila'niti ulu'zechu xzíbigaca lahuë' Lë',

nupa na' biti' ca' gaca ilún chi'i yöl-la' na'bán quéguequi.

³⁰ Xzí'ini xi'sóali' ilún xichinë'.

Ila'guixjö' lë ni ca naca queë' Xanru' para ila'yöni nupa tsöjsëtégaca luyú ni.

³¹ Ilidë', en ulu'luí'inë' lahui náquië' Xanru' tsahui'.

Ulu'siyönnë' ca' nupa ral-la' ilalaj ca naca yugu' le benë' Lë'.

23

¹ Ruyú cazë' Xanru' Dios neda' ca tu nu ruyú bö'cu' zxila'.

Biti' bi riyádzjada'.

² Runë' ga ruzí' ládxa'a ca túngacaba' bö'cu' zxila' tu'zí' ládxi'ba' gapa dëda' le iláguba'.

Ga naca ra' nisa rizá' tsahui' ládxi'do' richë'ë neda'.

³ Runë' ga ruhuöáca ládxa'a.

Richë'ë neda' ga naca nöza tsahui' tu' nadxí'inë' neda'.

⁴ Sal-la' ridá' ga zoa bönadxi gátia',

biti' bi gádxida' tu' zóalen cazu' neda', Dios.

Len xiyaga quiu', en no'o rutipu' ládxa'a.

⁵ Ga nacua' nupa ta'zóa regu' neda', ni' rucú'u quia' le gahua'.

Rigú'u icja' le za rilá' zxixi, en ruliru' le guf'jada'.

⁶ Le nácatë dusóalengaca neda' le naca dxi'a,

en yöl-la' dxi'i ladxi' queë' yúgu'të dza soa' ibana',
ate' lu yu'u lidxë' Xanru' sóatica'sa'.

24

1 Nequi queë' Xanru' Dios luyú ni, en yúgu'të le dë lahui.
Nequi queë' yödzölió, en yúgu'të nupa nacua' ni'.

2 Naguixjë' le lahui nísado' rō'ō zxánilō,
en nuzóë' xilibi luyú ga rë' zxan nísado'.

3 ¿Nuzxi caz bönni' dë lu në'ë cuenë' gu'á lá'ayi queë' Xanru'?
¿Nuzxi caz gaca tsaza lu lataj lá'ayi queë'?

4 Huáca bönni' na' naca dxi'a ca runë', en ca rizá' ládxë'ë,
bönni' na' biti' runë' bal budó' guió'j budó' yaga,
en biti' rizí' yë'ë cate' rizí' lu në'ë bí gunë'.

5 Gunë' Xanru' ga gaca dxi'a queë' bönni' na'.
Caní gunnë' Dios, Nu rusölá lë', en náquië' tsahui'.

6 Caní náca'gaca nupa ta' dxín lahuë' Dios,
nupa na' ta' biga' lahuë' Dios quégaca xzí'ini xi'sóë' Jacob.

7 Guli'salaj ga nu riyaza yödzö la'ayi.
Guli'salaj ga nu riyaza xilatjë' Dios le nuzóë' tsaz,
ate' tsázië' Bönni' unná bë' nayëpisëtërë'.

8 ¿Nuzxi caz Bönni' unná bë' nayëpisëtërë' na'?
Náquië' Xanru' nál-latërë', en nápatërë' yöl-la' huáca,
Lë', Xanru', Nu rideli' lu gudil-la.

9 Guli'salaj ga nu riyaza yödzö la'ayi.
Guli'salaj ga nu riyaza xilatjë' Dios le nuzóë' tsaz,
ate' tsázië' Bönni' unná bë' nayëpisëtërë'.

10 ¿Nuzxi caz Bönni' unná bë' nayëpisëtërë' na'?
Náquië' Xanru' Dios quéguequi ni' a në'ë guizxi yu.
Lë' náquië' Bönni' unná bë' nayëpisëtërë' na'.

25

1 Idú ládx'a' a rulidza' Li', Xan.

2 Ruzxöni ládx'a' a Li', Dios quia'.

Ben ga cabí utuí'ida',
en cabí ulu'dzeja nupa biti' ta'lé'e neda' dxi'a.

3 Biti' ila'bō' bōniga nupa tun lōza Li',
pero ulu'tuí'i nupa ta'dá'baga' xtídz'u'u.

4 Buluí'i neda' le rë'ënu' guna', Xan,
en buzéajni' neda' le raza ládx'u'u Li'.

5 Busedi neda' para guna' ca naca le naca idútë li quiu'.
Tu' nacu' Dios, Nu rusölá neda'
gúntica'sa' lōza Li'.

6 Yōjnë ca naca yöl-la' dxi'i ladxi' quiu', Xan,
en yöl-la' ruhuéchi' ladxi' quiu', yugu' le nacua'tica'sō.

7 Buniti lo neda' ca naca dul-la' bena',
en le gudá'baga' a Li' cate' ni' zoa' iz cuidi' quia'.
Lu yöl-la' ruhuéchi' ladxi' quiu',
en yöl-la' dxi'i ladxi' quiu' yōjnë neda', Xan.

⁸ Náquië' Xanru' dxi'a tsahui', en li ladxi'.

Que lë ni na' ruluí'inë' nupa tun dul-la' le ral-la' ilún.

⁹ Ca naca le naca tsahui' richë'ë Dios nupa nácacaca nõxaj ladxi', en ruluí'inë' nupa nácacaca do' ladxi' le rë'ënë' ilún.

¹⁰ Lu yöl-la' ruhuéchi' ladxi' queë', en yöl-la' rusudxín didza' queë', richë'ë Xanru' nupa tun ca rinná bë' xibá naguixjé', en ca naca didza' rucá'ana tsahui' nunë'.

¹¹ Tu' nacu' dxi'i ladxi', Xan,

buníti lo neda' ca naca dul-la' nuna', le naca dul-la' zxön.

¹² Nupa tun bal Xanru'

uluí'í quézinë' léguequi le naca dxi'a le ral-la' ilún.

¹³ Ulu'zí' xibé le naca dxi'a gunnë' quéguequi, ate' guequi quégacabi' xzí'ini xi'sóaguequi luyú ni.

¹⁴ Xanru' zóaléntica'së' nupa tun ca rnna xtídzë'ë, en ruzéajni'inë' léguequi cá naca didza' rucá'ana tsahui' nunë'.

¹⁵ Ruyútica'sa' guídë' Xanru' gácalenë' neda', tu' usölë' neda' lu na' nu rë'ëni sön neda'.

¹⁶ Buécja quia', Xan, en buéchi' ladxi' neda', tu' zoa' tuza', en nacuídi'da'.

¹⁷ Nayán le tu'quí'í tu'saca' neda'.

Busölá neda' lu le ruúbi ruguí'í ládxi'da'ahua'.

¹⁸ Buyú ca riguí'í rizáca'a, en rudú ládxa'a.

Buníti lo neda' ca naca yugu' dul-la' nabága'a.

¹⁹ Buyú ca nayán nupa tun neda' zi'.

Buyú ca tu'dí'í neda'.

²⁰ Ben chi'í neda', en busölá neda'.

Biti' gu'u lataj utuí'ida' tu' ruzxöni ládxa'a Li'.

²¹ Ben ga ilún chi'í neda' le naca idú ladxi',

en le naca li ladxi', tu' runa' lóza Li'.

²² Buá'au' bönachi Israel,

Díos lu yugu' le raca quéguequi.

26

¹ Guléaj neda' tsahui', Xan, tu' runa' le naca dxi'a, en idú ládxa'a ruzxöni ládxa'a Li'.

² Buyú lu icja ládxi'da'ahua', Xan, en guzxi' bë' neda'.

Buyú le rizá' ládxa'a, en le ribequi icja',

³ tu' richë' yöl-la' dxi'í ladxi' quiu' neda',

ate' runa' ca naca le naca idútë' li quiu'.

⁴ Biti' runa' tsözxön nupa ta'zí' yë',

en biti' ridálena' nupa tu'luí'isö cúinguequi tsahui'.

⁵ Biti' raza ládxa'a udúbilena' nupa tuá' dö',

en biti' guna' tuz didza' len nupa nácacaca xihui'.

⁶ Richisa na'a lo' Li', Dios, cabí dxía dö' na'a,

en idú ládxa'a ribíga'a lo bucugu quiu', Xan,

⁷ para gul-la' le guía' Li': "Xclenu"

en usiyönda' bönachi ca nácacaca le zxön nunu'.

⁸ Nadxí'ida' yu'u lidxu' ga na' zu', Xan,

enca' lataj ga na' yu'u bení' lá'ayi quiu'.

⁹ Biti' usunítu' neda' tsözxön len nupa tun dul-la',
en biti' gútiu' neda' len nupa tuti bönachi,

¹⁰ nupa na' ta'yaza ladxi' tuá' dö',
en nacuá'tica'sö ila'guizxaj dumí para ulu'rúaj tsahui'.

¹¹ Gúntica'sa' neda' le naca dxi'a.
Buzá' ladxi' quia', en buá'uö neda'.

¹² Nuzóé' Dios neda' ga zoa' tsutsu ladja bönachi guizxi yu
nudúbigaca queé' para cu'a-né' yöl-la' ba Xanru'.

27

¹ Náquié' Xanru' Dios bení' quia', en Nu rusólá neda'.

¿Nuzxi caz ral-la' gádxida'?

Rapa chí'ë Xanru' Dios caz yöl-la' na'bán quia'.

¿Nuzxi caz gaca gun ga gadxi idzöbida'?

² Cate' gula'dá'baga' neda' nupa tuá' dö' para iluti neda',
nupa na' biti' ta'lé'e neda' dxi'a, en tu'dí'i neda',
yöjchégu'gaca, en yöjbíxigaca.

³ Sal-la' ila'dá'baga' neda' bönachi guizxi yu,
biti' ca' tsaza yöl-la' radxi ládxi'da'ahua'.
Sal-la' ila'díl-lalen bönachi neda',
naca' neda' tsutsu ladxi'.

⁴ Tu le rinaba' lahuë' Xanru' Dios, lë na' güi'i ládxi'sa',
le naca para sóatica'sa' lidxë' Xanru' yúgu'të dza soa' ibana',
para gaca uyúa' yöl-la' lachi queé' Xanru' Dios,
en para sa' ládxa'a ca naca queé' lu yu'u lá'ayi queé'.

⁵ Cate' idxín dza soa bönadxi quia', ucáché'ë Lë' neda' lu yu'u lidxë'.
Ga nagachi' lu yu'u lidxë' ucáché'ë neda'.
Uzóé' neda' tsutsu ca tu lu guiöjto'o.

⁶ Gunë' ga ucul-la' nupa tu'dí'i neda',
ate' lu yöl-la' rudzeja quia' cödxi'atica'sa'
cate' bi ünödza' queé' lu yu'u lidxë'.

¡Gul-la' queé'! ¡Ön, gul-la' queé' Xanru' yöl-la' ba!

⁷ Buzë' nagu', Xan, cate' ulidza' Li'.

Buzá' ladxi' quia', en bubí'i didza' ca naca le inábida' Li'.

⁸ Cate' Li' gudxu' neda': "Buguilaj neda'",
idú ládxa'a bubi'a didza', gunnía': Uguilja' Li', Xan.

⁹ Biti' ucachi' lo' lahua' neda'.
Biti' ta'bagu'u neda' lu yöl-la' rilé quiu'.
Li' nacu' Nu rácalen neda'.

Biti' ucá'anu' neda', en biti' usán no'o neda'.
Nacu' Dios, Nu rusólá neda'.

¹⁰ Huáca ulu'sán ládxi'ë xuz xiná'a neda',
pero uzí' cazé' Xanru' Dios neda'.

¹¹ Busedi neda' para guna' ca rë'ënu' Li', Xan.
Buluí'i neda' para guna' le naca tsahui',
tu' nacuá' nupa ta'dá'baga' neda'.

¹² Biti' usanu' neda' lu ná'agaca nupa biti' ta'lé'e neda' dxi'a

para cabí ilún quia' le tē'ēni.
 Ta'dá'baga' neda' nupa ta'zì' yē',
 en nupa tē'ēni iluá' dō' quia'.

¹³ Guzxf' lu nē'ē Xanru' Dios gunē' ga ilé'eda' le naca dxi'a,
 en le naca tshai' queē' ga nacuá' nupa nabángaca.
 La'tu' cabí réajlē'a lē ni, chibōaj ládxa'a.

¹⁴ ¡Guli'gún lözē' Xanru'!
 ¡Guli'gaca tsutsu, en buli'tipa ládxi'li'!
 ¡Ōn, guli'gún lözē' Xanru'!

28

¹ Rulidza' Li', Xan.

Nacu' Guiōj le ruzóa neda' tsutsu.
 Ruzē nagu' chi'a, tu' channō usayju' ru'u,
 gaca' ca tu bönni' raziē' lataj chul-la.

² Ruzē nagu' le rulidza' Li' cate' rinábida' Li' gácalenu' neda',
 cate' richisa' na'a zaca' Lataj Lá'ayi ga na' zu'.

³ Biti' ichē'u neda' tsōzxōn len nupa tuá' dō',
 en tsōzxōn len nupa nácagaca xihui',
 nupa na' tuí'i didza' dxi'a lahui' lógaca dzaga yu'u quéguequi,
 pero yu'u ládxi'do'guequi le cabí naca tshai'.

⁴ Bubí'i quéguequi tsca naca le tun, en tsca naca dō' ruí'igaca.
 Bubí'i quéguequi tsca naca le tun nē'eguequi.
 Bubí'i quéguequi tsca ral-la' gaca quéguequi.

⁵ Caní gaca quéguequi tu' cabí tun bal le nunē' Xanru',
 en bití' tun bal le nun nē'ē.
 Uquínajē' léguequi, en bití' ca' uchisē' léguequi.

⁶ ¡Yöl-la' ba Xanru',
 tu' riyōnnē' cate' rinábida' Lē' gácalenē' neda'!

⁷ Xanru' caz náquiē' yöl-la' huáca quia', en le run chi'i neda'.
 Ruzxōni ládxa'a Lē', ate' rácalenē' neda'.
 Que lē ni na' ruzí' xibē' ládxi'da'ahua',
 ate' gul-la' le guía' Lē': "Xclenu'."

⁸ Naca cazē' Xanru' yöl-la' huáca quéguequi bōnachi queē',
 en náquiē' ca' Nu run chi'i Bönni' na' bubéajē' quez queē' para inná bē'ē.

⁹ Busólá bōnachi quiu', Dios, en ben ga gaca dxi'a quéguequi nupa néquiguequi
 quiu'.
 Ben chí'i léguequi ca run tu nu ruyú bö'cu' zxila', en guchē'tica'sō léguequi.

29

¹ ¡Guli'cu'ē yöl-la' ba Xanru', libí'ili', nácali' zxf'inigaquiē' bönni'
 nayēpisēgaquiē'!

¡Guli'cu'ē yöl-la' ba Xanru', en guli'guié': "Napu' yöl-la' huáca idú'!"

² ¡Guli'cu'ē yöl-la' ba Xanru' le ral-la' gata' que Lē' tu' náquiē' lá'ayi!
 ¡Guli'gún bal Xanru', tu' naca lachi le naca lá'ayi queē'!

3 Riyón chi'ë Xanru' lu nísado'.
 Riyón chi'ë Xanru' nayëpisë' ca riyón guziú' rinnë.
 Riyón chi'ë Xanru' lu nísado'.
 4 Nál-latërö naca chi'ë Xanru'.
 Nayëpisëtërö chi'ë Xanru'.
 5 Chi'ë Xanru' rilá'a yugu' yaga zxön.
 Ön, chi'ë Xanru' riguitsaj yugu' yaga lu guí'a Líbano.
 6 Runë' Xanru' ga ta'xiti' guí'a ca tunba' bëdxido'.
 Ta'xiti' guí'a Líbano, en guí'a Sirión ca tunba' bëdx guí'a.
 7 Chi'ë Xanru' run ga rëpi yösa.
 8 Ruxizi chi'ë Xanru' la' guixi' ga dë lataj.
 Ruxizi chi'ë Xanru' la' guixi' nazí'i le Cades.
 9 Chi'ë Xanru' run ga ta'bëquiba' bidxina' guixi' böa' huë'ënido' quégacaba',
 en run ga ta'guínnaj yúgu'të laga' dxíagaca yugu' yaga.
 Lu yudo' queë' tuí'i didza' yúgu'të le nacuá', ta'nná: "¡Yöl-la' ba Lë'!"
 10 Gurö'ë gunná bë'ë Xanru' cate' gurö'ö nisa lu idútë yödzölió.
 Ön, rö'ë rinná bé'tica'së' Xanru'.
 11 Rutipë' Xanru' ládxi'do'gaca bönachi queë'.
 Gunë' Xanru' ga gaca dxi'a quégaca bönachi queë',
 en gunë' ga ila'böza dxi'a tsáhui'do'.

30

1 Guna' Li' zxön, Xan, tu' buchisu' Li' neda',
 en bití' bë'u lataj bi ilún quia' nupa bití' ta'lé'e neda' dxi'a.
 2 Rigu'a Li' yöl-la' ba, Xana' Dios,
 tu' bulidza' Li' gácalenu' neda', ate' bunu' neda'.
 3 Bubéaju' yöl-la' na'bán quia' lu yeru ba, Xan.
 Runu' ga zoa' nabana', para cabí tsu'a lataj chul-la ga dzö'ö nupa nátigaca.
 4 ¡Guli'gul-la yöl-la' ba queë' Xanru', libí'ili' néquili' quez queë'!
 ¡Guli'guíë': "Xclenu'" ca naca Lë' le naca lá'ayi!
 5 Tu chí'isö rilenë',
 pero ruzá' ládxi'tica'së' queëru'.
 Channö cödxiru' tu yëla,
 lu yöl-la' rudzeja queëru' cödxí'aru' itö yu.
 6 Cate' guca dxi'a quia', ní'irö gunnía':
 "Gatga bi utsá' neda'."
 7 Tu' buzá' ládxi'u quia', Xan, buzú' neda' ga zoa' tsutsu,
 en cate' bucachi' lo', gurö'a böniga.
 8 Bulidza' Li', Xan,
 en gúta'yua' lo'.
 9 ¿Bizxi xibé uzi'tso' channö gátia', en tsöjtsázia'
 lataj chul-la ga dzö'ö nupa nátigaca?
 ¿Naru' huácatsö cu'a Li' yöl-la' ba channö huóaca' bëchtö yu?
 ¿Naru' huácatsö ulu'a lo le naca idú quiu'?
 10 Ruzé nagu', Xan, en ruzá' ládxi'u quia'.
 Gúcalen neda', Xan.
 11 Buí'inida', ate' benu' ga buyá'a lu yöl-la' rudzeja quia'.

Bugú' lari' cá'asö gú'cua', en bugacu' neda' le ruzi'a xibé.

¹² Bil-la bö' naca caza' yöl-la' ba quiu', en bití' soa dxisö.
Guí'etica'sa' Li': "Xclenu'", Xana' Dios.

31

¹ Ruzxöni ládxa'a Li', Xan.

Bití' gu'u lataj utuí'ida'.

Tu' nacu' tsahui', busöla neda'.

² Ruzé nagu' quia', en rusöló' neda'.

Gacu' ca tu guiójt'o ga soa' tsutsu,
en ca tu ga soa' dxi'a tsáhui'do' lu gudil-la.

³ Nacu' Li' guiójt'o ga zoa' tsutsu, en le run chí'i neda'.

Para gaca yöl-la' ba que Lo' guché' neda', en buluí'i neda' le dxi'a guna'.

⁴ Ubéaju' neda' lu du yalaj nucáchi'gaquie' bönni' tu'ë dö',
tu' nacu' Li' yöl-la' nál-la quia'.

⁵ Rigu'a lu nó'o bö' naca caza'.

Böá'au' neda', Xan, Dios idú.

⁶ Bití' rilé'eda' dxi'a nupa tun zxön budó' guiójt budó' yaga,
pero neda' ruzxöni ládxa'a Li', Xan.

⁷ Udzéjada', en uzi'a xibé yöl-la' dxi'i ladxi' quiu',
tu' bilé'e quézinu' le gudí'i guzáca'a.

Nöz quézinu' yugu' le raca quia'.

⁸ Bití' bucá'anu' neda' lu na' nu bití' rilé'e neda' dxi'a,
pero nuzú' neda' tu lataj ga zoa' tsutsu.

⁹ Buzá' ladxi' quia', Xan, tu' zoa tu le raca quia'.

Lu yöl-la' ruhuí'ini quia' ribödxa', en rudú ládxa'a.

¹⁰ Riyechi' dza quia' tu' ruhuí'inide'eda',

en tu' rinné ládxa'a, en riyechi' iz quia'.

Rudú ládxa'a tu' nözi dö' nu'a,
ate' nadxita idútë le naca'.

¹¹ Tu' nözi le gulún nupa ta'dá'baga' neda'
naca' tu le run gadxi yugu' dzaga yu'u quia',
ate' nupa núnbë'gaca neda' tadxi neda'.

Nupa ta'lé'e neda' la' nöza ta'zxunnaj ga rizá'a.

¹² Nál-la ládxi'gaca neda' ca nál-la ládxi'gaca nupa chinátigaca.

Naca' ca tu rö'ö nayuzxaj naguinnaj.

¹³ Biyönda' didza' zi' ta'nné bönnachi zían quia' bagáchi'sö.

Gátí'tës zoa le run gadxi neda'.

Tun xtídza'gaca bi ilún quia'.

Ta'zá' ládxi'gaca naxci iluti neda',

¹⁴ pero neda' ruzxöni ládxa'a Li', Xan.

Rnnía' nacu' Dios quia'.

¹⁵ Yú'ugaca lu nó'o yúgu'të dza soa' ibana'.

Busöla neda' lu ná'agaca nupa bití' ta'lé'e neda' dxi'a,
en lu ná'agaca nupa ta'zóa regu' neda'.

¹⁶ Lu yöl-la' ruzá' ladxi' quiu' buyú neda', huen dxin quiu'.

Lu yöl-la' dxi'i ladxi' quiu' busöla neda'.

¹⁷ Bití' gu'u lataj utuí'ida', Xan, tu' rulidza' Li'.

Ben ga ulu'tuí'i nupa tuá' dö'.

Ben ga ila'cuá' dxisö lu yeru ba.

18 Ben ga bití' gaca bi inná nu rizí' yé',
nu na' rinné zí' queé' bönni' tsahuí',
en run ba zxon cuini, en rulidza ditaj luzé'e.

19 ¡Bica' zxon yöl-la' dxi'i ladxi' quiu',
lé na' napu' para gácalenu' nupa tadxí Li'!
Runu' caní quegaca nupa tu' zxoní ladxi' Li'
lógaca nupa tun ba zxon cuíniguequi.

20 Rucáchu'u légaquié' ga na' zu' bagáchi'sö,
ga bití' gaca idxín nu bönni' xihuí'.
Run chí' u' légaquié' bagáchi'sö ga bití' gaca idxín didza' bizxaj.

21 ¡Yöl-la' ba Xanru' Dios,
tu' buluí'iné' neda' ca nadxí'iné' neda' cate' ni' zoa' tu yödzo
ga nagú'ugaquié' lé'ajlö bönni' tu'tíl-lalené' neda'!

22 Lu yöl-la' radxi ridzöbi quia' gunní'a: "Ilútié' neda' lo' Li', Xan",
pero biyönnu' le gunábida' Li', cate' ni' bulidza' Li'.

23 ¡Gulí'dxí'i-né' Xanru', libí'ili' néquili' queé'!
Rapa chí'è Xanru' nupa ta'yéajlé' Lé',
en rubi'è ca sa'yéaj queé' bönni' run ba zxon cuiné'.

24 ¡Gulí'gaca tsutsu, en bulí'tipa ládxi'li',
yúgu'téli' na' runlí' löza Xanru' Dios!

32

1 ¡Bica' ba bönni' na' Dios buniti lahué' lé' ca naca dö' bi'è,
en bugúé' dul-la' queé'!

2 ¡Bica' ba bönni' na' Dios rnné' bití' nabágué'è xigua',
en bití' zóalen lé' yöl-la' rizí' yé'!

3 Cate' guzóa' dxisö ca naca dul-la' quia',
budú ládxa'a tu' gunnética'sö ládxa'a.

4 Réla, en te dza buquí'i busácu'u neda', Dios.
Budú ládxa'a ca raca cate' rö' böchila.

5 Ní'irö guxóalépa' dul-la' nabága'a lo' Li',
en bití' bucácha'a le xihuí' bena'.
Gunní'a: "Ixóalépa' dö' bi'a lahué' Xana",
ate' buniti lo' neda' ca naca xigua' gubága'a.

6 Que lé ni na', núti'tés nu nunbè' Li', Dios, ral-la' ulidza Li'
cate' dé lataj gü'ílen Li' didza'.

Cate' rö' nisa bach luyú ni, bití' ca' ideli' idxín ga zoa nu na'.

7 Li' nacu' ga gaca ucachí' cuina' cate' zoa bönadxi quia'.
Li' caz gun chí' u' neda' para cabí bi gaca quia'.

8 Li' gunu' ga gúl-latica'sa' quiu' Li' tu' rusóló' neda'.
Rnné' Dios: "Neda' uzéajni'ida' li', en uluí'ida' li' le ral-la' gunu'.
Usédida' li', en uyútica'sa' li'.

9 Bití' gacu' ca tu böa' o tu mula cabí ta'yéajni'iba'.
Ral-la' cu' u' guié en du rú'ugacaba' para inná bé'enu' légcaba'."
Channö cabí gunu' caní, bití' ca' ilunba' ca rē'enu'.

10 Zían le tun ga tu'huí'iniguequi nupa tuá' dö',
pero bönni' ruzzöni ládxe'è Xanru' ilé'ené' yöl-la' dxi'i ladxi' queé'.

11 Buli'dzéjalenë' Xanru', en buli'sí' xibë', libí'ili' nácali' tsahui' lahuë' Lë'.
Lu yöl-la' rudzeja queëli' guli'cödxí'a, libí'ili' nácali' idú dxi'a.

33

1 Lu yöl-la' rudzeja queëli' guli'gul-la lahuë' Xanru',
libí'ili' nácali' tsahui' lahuë' Lë'.
Nupa nácacaca tsahui' ral-la' ila'gú'u Lë' yöl-la' ba.

2 Guli'guíe' Lë': "Xclenu", quínnili' lë'e bihuél-la.
Guli'gul-la yöl-la' ba queë', quínnili' le zë chi du que.

3 Guli'gul-la queë' tu le rul-la cubi.
Guli'quinnaj dxi'ado', en lu yöl-la' rudzeja queëli' guli'cödxí'a.

4 Xtídzë'ë Xanru' naca idú tsahui',
ate' idú ládxë'ë runë' yúgu'të bi runë'.

5 Nadxí'inë' le naca dxi'a, en le naca tsahui'.
Nalá' lahui yöl-la' dxi'i ladxi' queë' Xanru' idútë yödzölió.

6 Len didza' bé'ësë' Xanru', benë' lúzhiba,
en benë' yúgu'të böljaj bení' len bö' rirúaj ru'ë.

7 Rutubë' nisa rö'ö nísado' para gaca ca tu gu'a.
Napa chi'ë nisa rö'ö zili ga na' nupë'ë xilataj.

8 Yúgu'të bönachi ral-la' ila'dxí'i Xanru'.
Bönachi idútë yödzölió ral-la' ila'cuá' nöxaj lahuë' Lë'.

9 Bë'ësë' didza' Xanru', ate' la' gúcatë ca na' gunné'.

10 Gunná bë'ë, ate' guca tsutsu le nunë'.
Runë' Xanru' ga tu huóaca cá'asö didza' túngaca bönachi yugu' yödzö.
Runë' ga bití' ilaca le té'ëni ilúngaca bönachi.

11 Sóatica'sö tsutsu didza' nunë' Xanru'.
Le rizá' ládxë'ë ulu'gá'anatica'sö quéguequi zxi'ini xi'sóaru'.

12 Bica' bágaca bönachi yödzö na' náquië' Xanru' cazë' Dios quéguequi,
bönachi na' nabö cazë' Dios para ilaca quez queë'.

13 Zoa cazë' Xanru' yehua' yubá, ruyúë' ga zóaru'.
Rilé'enë' le tun yúgu'të bönachi nacua' idútë yödzölió.

14 Ga na' zoa cazë' ruyúë' idú gásibi'ilö,
en rilé'enë' yúgu'të nupa nacua' idútë yödzölió ni.

15 Nun cazë' Lë' ládxi'do'gaca yúgu'tëguequi.
Réajni' quézine' ca naca yúgu'të le túngaca.

16 Bití' ca' ulë' bönni' unná bë' nacua' queë' bönni' guizxi yu röjáquië' gudil-la.
Bití' ulë' bönni' zoë' gudil-la tu' nál-latërë'.

17 Bití' nazaca' gunru' löza böa' para idéli'ru' lu gudil-la,
tu' cabí gaca usölabá' nu bönni' tu' nál-latëröba'.

18 Bulí'yú, ruyútica'së' Xanru' nupa tadxi Lë',
nupa na' tun löza yöl-la' dxi'i ladxi' queë',

19 para usölë' léguequi lu yöl-la' guti,
en para ughuë' léguequi cate' tsu'u gubín.

20 Idú ládxi'ru' runru' löza Lë' Xanru'.
Rácalen cazë' rë'u, en rapa chi'ë rë'u.

21 Rudzeja ládxi'lenru' Lë',
en uzxöni ládxi'ru' Lë', tu' náquië' lá'ayi.

22 Lu yöl-la' dxi'i ladxi' quiu' gúcalen netu', Xan, tu' runtu' löza Li'.

34

1 ¡Innética'sa' queë' Xanru' náquië' dxi'a!
¡Cú'utica'sa' Lë' yöl-la' ba!

2 Bô' naca caza' gun zxôn Xanru'.

Nupa nácacaga nõxaj ladxi' ila'yöni lë ni, en ulu'dzeja.

3 Guli'güi' zxonë' Xanru' tsözxôn len neda', en tsözxôn usiyônru' bönachi ca naca Lë' La'ayi.

4 Bulidza'-në' Xanru', ate' bubí'ë didza' quia', en busölë' neda' lu yugu' le gúdxida'.

5 Nupa nácacaga queë' bila'dxín lahuë', en bulu'zí' xibé'.
Bíti'rô caz ulu'tuí'i nupa na'.

6 Bulidza'-në' Xanru', ate' biyönnë' quia' neda', bönni' yechi', en busölë' neda' lu yúgu'të le guca quia'.

7 Gubáz lá'ayi que ya'abá queë' Xanru' tapa chi'ë nupa tadxi Lë', en tu'sölë' léguequi lu yúgu'të le raca quéguequi.

8 Guli'sí' bë'ë, ate' inözili' náquië' Xanru' dxi'a.
¡Bica' ba bönni' ruzxóni lãdxë'ë Lë'!

9 Guli'gadxi Xanru', libí'ili' nácali' quez queë', tu' cabí bi ila'yadzaj nupa tadxi Lë'.

10 Ta'yadzaj ta'yúdxiba' bëdxi guixi', en ta'dunba', pero nupa tu'lidza Xanru' bití' ca' ta'yadzaj le naca dxi'a.

11 Guli'dá libí'ili', b'ído', en buli'zë nágali' xtídza'a.
Uzéajni'ida' libí'ili' para gádxili'-në' Xanru'.

12 ¿Nuzxi caz bönni' ré'ënë' soë' ibanë', en ré'ënë' soë' iz zían para uzi'ë xibé le naca dxi'a?

13 Ben chi'i lúdxu'u para cabí gu'u didza' xihui', en para cabí si' yé'enu' luzó'o.

14 Bucá'ana le cabí naca tsahui', en ben le naca dxi'a.
Bë' ladxi' cözu' dxi'a tsáhui'do', en ben bayudxi gunu' yugu' lë ni.

15 Ruyútica'së' Xanru' nupa nácacaga tsahui', en riyón quézinë' cate' tu'lidza Lë'.

16 Uzáguë'ë Xanru' xinözgaca nupa tuá' dö', en gunë' ga cuntu nu tsöjné léguequi.

17 Nupa nácacaga tsahui' tu'lidza Xanru', ate' riyönnë' quéguequi, en rusölë' léguequi lu yugu' le raca quéguequi.

18 Xanru' zóalen cazë' nupa tu'hu'ini ladxi', en rusölë' nupa nácacaga nõxaj ladxi'.

19 Zían le riguí'i rizáqué'ë bönni' tsahui', pero Xanru' rusölë' lë' lu yúgu'të lë na'.

20 Xanru' rapa chi'ë yúgu'të dxita yu'ë, ate' bití' gatsaj nitú dxita queë'.

21 Le xihui' run nu ruá' dö' gun ga gati nu na', ate' ila'baga' xigua' nupa bití' ta'lé'e dxi'a le naca tsahui'.

22 Xanru' caz ruhuóá'uë' bö' nácacaga caz huen dxin queë',

ate' biti' irugu que nitú nupa na' tu'zxöni ladxi' Lë'.

35

Tu le bil-lë' David

¹ Xana' Dios, gudá' бага' nupa biti' ta'lé'e neda' dxi'a.

Butíl-lalen nupa ta'díl-lalen neda'.

² Guzxón le gun chí'i neda' lu gudil-la,
en gudá gácalenu' neda'.

³ Guzxón yaga tuchi' quiu' para uzagu'u xinözguequi nupa ta'zóa regu' neda'.
Gudxi bö' naca caza' nacu' Li' Nu rusölá neda'.

⁴ Ben ga ulu'tuí'i, en ulu'gá'ana cá'asó nupa té'ëni iluti neda'.

Ben ga ulu'huécaj, en ulu'gá'ana cá'asó nupa té'ëni iluf'i dö' quia'.

⁵ Ben ga ilaca ca bëbu zxe café zeaj lu bö'ös,

en ben ga ulaguë' gubáz lá'ayi que ya'abá quiu' léguequi.

⁶ Ben ga gaca chul-la nöza yú'ugaca, en ga cuílagaca,
ate' soa régu'ë gubáz lá'ayi quiu' léguequi.

⁷ Bulu'cáchi' du yalaj le sön neda', en biti' bi nuna' quéguequi.

Gula'chó'öna yeru ga tsöjbixa', en biti' bi nuna' quéguequi.

⁸ Ben ga idxín quéguequi tsárido'os le usuniti léguequi,

en ben ga du yalaj na' bulu'cáchi' sön la' cuínguequi quez.

Ben ga ila'bixi lu yeru na' gula'chó'öna.

⁹ Udzeja ládxi'lena'-në' Xanru',

en uzi'a xibé yöl-la' rusölá queë'.

¹⁰ Ila'nná dxita néquinida': "Xan, ¿nuzxi caz naca ca nacu' Li'?

Rusóló' nu riguí'i rizáca' lu na' nu nál-latëro' ca le.

Rusóló' nu riguí'i rizáca', en riyadzaj riyudxi lu na' bönni' ribanë' le nequi
que."

¹¹ Ta'dá'baguë'ë bönni' xihui' neda', en ta'nnë' quia'.

Ta'nabi yúdxinë' neda' ca naca yugu' le cabí nözda'.

¹² Tu'bi'ë quia' le naca dö' cate' runa' le naca dxi'a,
ate' ruhuí'inide'e ládxa'a.

¹³ Pero neda' gúcu'a' lari' cá'asó cate' guláquië' huë'.

Bena' gubasa, en busaca' zi' bö' naca caza',

en uláz quéguequi bulidza'-në' Dios zían luzuí.

¹⁴ Buí'inide'eda' tsca guca luzá'a o bi'i böchi' caza' nu na' guca huë'.

Gurödx yecha'a ca huí'inide'eda' channö gátinu xiná' caza',

¹⁵ pero cate' guchixi guníguida' neda', bulu'dzéjade'e, en bulu'dubi tsözxón.

Yugu' bönni' na' bulu'cá'anë' neda' cá'asó bulu'dubë' para ilunë' ga cö'a
baguí'i.

Yugu' bönni' na' biti' núnbë'a gulúnnatica'së' neda'.

¹⁶ Bulu'saca' zi'ë neda', en bulu'titjë' quia'.

Lu yöl-la' rilé quégaquië' neda' gulagu zxea láyi'gaquië'.

¹⁷ Xan, ¿gáca'xte caz uyú iná'asu' le tunë'?

Busölá neda' lu dö' tu'ë quia'.

Busölá neda' lu ná'agaquië' bönni' na' ná'cagaquië' ca yugu' bëdxi guixi'.

¹⁸ Guía' Li': "Xclenu'" lógaca bö'nachi zían ulu'dúbigaca quiu'.

Cu'a Li' yöl-la' ba ga nudúbigaca ziantë bö'nachi.

19 Biti' gu'u lataj ulu'dzeja nupa ta'dá'bagá' neda', en ta'zí' yě',
en biti' gu'u lataj ulu'titaj quia', nupa na' tu'dí'i neda', en biti' bi nuna'
quéguequi.

20 Catu caz tu'í didza' le gun ga soa dxisö didza' bizxaj.
Lu yöl-la' rizi' yě' quéguequi ta'nné quégaca nupa ta'bö' dxi'a tsáhui'do' yödölió
ni.

21 Bulu'salaj ru'iguequi, en gula'nné quia', gula'nná:

“jÖn, bilé'e quézitu' le nuné'!”

22 jBilé'e quézinu' Li' lě ni, Xan! jBiti' su' dxisö!

jBiti' ucá'anú' neda', Xan!

23 jGuyasa, Xan! jBusubán ládxi'u, Xan, para uchi'a usöröu' quia'!

jGúcalen neda', Xana' Dios!

24 jTu' nacu' tsahui', buchi'a busörö quia', Xana' Dios!

jBiti' gu'u léguequi lataj ulu'dzeja ni'a que le raca quia'!

25 jBiti' gu'u léguequi lataj ila'nná:

“Ön, bidéli'ru' le guzé ládxi'ru'!”

jBiti' gu'u lataj ila'nná: “Chibucúl-laru' lě”!

26 jBen ga ulu'tuí'i, en ulu'gá'ana cá'asö nupa tu'dzeja cate' ruhu'ínida'!

jBen ga ulu'tuí'i, en ulu'gá'ana cá'asö nupa ta'dá'bagá' neda'!

27 jBen ga ila'bödxi'a lu yöl-la' rudzeja quéguequi,

en ulu'zí' xibé nupa tu'í ládxi'gaca urúaja' tsahui'!

jBě' lataj ila'nnática'sö: “Nayěpisětě' Xanru' Dios,

tu' raza ládxi'ě guně' ga gaca dxi'a quégaca huen dxin quee”!

28 Ní'rö guna' ba nalí quiu', innía': “jNacu' tsahui'!”

en cu'a Li' yöl-la' ba idú dza.

36

1 Le naca xihui' ru'ílen bönni' nucá'aně' Dios lu icja ládxi'da'ahuě'.

Biti' ca' rádxiné' Dios.

2 Tu' run ba zxön cuiné'

réquině' biti' nözíně' Dios nabáguě'ě lě' dul-la', en biti' ichúguiě' Dios queě'.

3 Ru'ě didza' xihui', en rizi' yě'ě.

Biti' réajni'ině', en biti' runě' le naca dxi'a.

4 Cate' ni' dē' lu le ráti'ně' riza' ládxi'ě ca naca le xihui' guně'.

Ruí'i ládxi'ě guně' le cabí naca dxi'a,

en biti' rusaně' runě' le naca xihui'.

5 Zxöntě' ca yehua' yubá naca yöl-la' dxi'i ladxí' quiu', Xan,

ate' gúntica'su' ca rna xtídzu'u, tsca zoa yehua' yubá.

6 Naca tsutsu le tsahui' nacu' ca nácagaca tsutsu yugu' gu'á' zxön quiu'.

Ca ruchi'a rusöröu' naca ca naca nísado', tu' cabí gaca nu gúnbě'e le.

Run chí'i cazu' bönachi, en yugu bōa' guixi', Xan.

7 Nazáca těrö yöl-la' dxi'i ladxí' quiu', Dios.

Run chí'u yúgu'tě bönachi ca runba' yōjede, run chí'iba' yugu' bōrado' zxan
xílabá'.

8 Tu'huölaj tu'dzě'e bönachi quiu' le nayánda' lu yu'u lidxu',

ate' rugui'ju' léguequi le naca yöl-la' dxi'i ladxí' quiu'.

9 Yúgu'tě le nacuá' nabánigaca Li'.

Tu' naca cazu' bení' rilé'etu' bení'.

10 Bidxí'tica'sö nupa núnbě'gaca Li',

en ben le naca dxi'a quégaca nupa náçagaca tsahui'.

¹¹ Biti' gu'u lataj bi ilún quia' nupa tun ba zxon cuínguequi, en biti' gu'u nupa tuá' dö' lataj ulu'laga' neda'.

¹² Nadzö'ögaca nupa tuá' dö'.

Dëguequi luyú, en biti' ca' gaca ulu'huóása.

37

¹ Biti' ubi uguí'i ládxi'do'oli' tu' tu'zí'gaca xibé nupa tuá' dö'.

Biti' uzxé'eli' nupa biti' tun le naca dxi'a.

² Huadödité quéguequi ca raca que guixi' nacuadi, en udxi quéguequi ca raca quégaca guíxi'do' narúgugaca.

³ Buli'zxöni ládxe'ë Xanru', en guli'gún le naca dxi'a.

Buli'gá'ana luyú queë', en guli'cöz dxi'a tsáhui'do'.

⁴ Buli'sí' xibé' Xanru', ate' gunnë' queéli' le rizé ládxi'li'.

⁵ Buli'dödi cuinli' lu në'ë Xanru'.

Buli'zxöni ládxe'ë Lé', ate' gunë' le gácalen libí'ili'.

⁶ Gun cazë' Lé' ga urúajli' tsahui', en gácali' ca bení', en cate' uchi'a usöröë' queéli', gaca queéli' ca lahui' dza.

⁷ Guli'sóa dxisö lahuë' Xanru', en guli'cöza le gunë'.

Biti' cuéqui ícjali' tu' nözi bönni' ruzi'ë xibé, bönni' na' ru'ë dö'.

⁸ Bítí'rö leli', en buli'sán yöl-la' ridzá'a.

Biti' ubi uguí'i ládxi'do'oli' tu' gun lë ni ga guá'ali' dö'.

⁹ Dios caz uzáguë'ë xinözguequi nupa tuá' dö', pero nupa tu'zxöni ladxí' Xanru', guequi quéguequi luyú.

¹⁰ Ia'látí'sö xidzé, en bítí'rö soë' bönni' na' ru'ë dö'.

Uguíljali' xilatjé', pero bítí'rö soë' ni'.

¹¹ Nupa náçagaca nöxaj ladxí', guequi quéguequi luyú, ate' ulu'zí' xibé yöl-la' tsahui' que.

¹² Tun didza' nupa tuá' dö' bi ilúngaca quégaca nupa náçagaca tsahui', en lu yöl-la' rilé quéguequi tagu zxea láyi'guequi.

¹³ Ruzxidxi cazë' Xanru' quéguequi, tu' rilé'enë' dza udxi quéguequi.

¹⁴ Nupa tuá' dö' chigula'béaj guíë tuchi' quéguequi,

en nuá'gaca uxiti' yaga quéguequi

para ulu'xicja nupa ta'zaca'zi', en ta'yadzaj ta'yudxi, en para iluti' nupa tun le naca dxi'a.

¹⁵ Guíë tuchi' quéguequi ila'chiza la' ládxi'do'guequisö, ate' ila'guítsaj uxiti' yaga quéguequi.

¹⁶ Dxi'atërö le do' dësö queë' bönni' tsahui' ca le zían dë queë' bönni' ru'ë dö'.

¹⁷ Huayúzçjagaca ná'agaca nupa tuá' dö',

pero Xanru' caz rácalenë' nupa náçagaca tsahui'.

¹⁸ Rufí' ladxí' cazë' Xanru' nupa biti' bi xiguia' nabága'gaca, ate' guéquitica'sö xiyúgaca quéguequi.

¹⁹ Biti' ca' ulu'tuí'i cate' idxín dza biti' gaca dxi'a, en cate' tsu'u gubín, gáta'dëra le ilágugaca.

²⁰ Ulu'niti tsaz nupa tuá' dö',

ate' nupa biti' ta'lé'e dxi'a Xanru' ilaca ca yöl-la' lachi que guixi'.

La' töditë quéguequi, en ilaca ca dzön le rinítitë.

21 Ta'nábini nu bi gunna quéguequi tu chí'isö, pero biti' ca' ulu'bí'i lë na'.

Nu naca tsahui' ruzá ladxi' quéguequi, en runödzej quéguequi.

22 Gaca luyú quégaca nupa run lá'ayë' Xanru',

pero ila'niti tsaz nupa rudxië' Lë' dö'.

23 Le runë' bönni' dxi'a naca le nuluf'inë' Xanru' lë',

ate' raza ládxë'ë Lë' le runë' bönni' na'.

24 Cate' röjtsö'ë, biti' ca' röjtsö'ë tsaz,

tu' röjzönë' Xanru' caz bönni' na'.

25 Guca' ra'bando', pero na'a nagula',

en catu caz bilé'eda' nusán në'ë Dios bönni' tsahui',

en catu caz bilé'eda' riyadzaj le ilágubi' zxi'inë'.

26 Yugu' dza ruzá' ládxë'ë bönni' tsahui' quéguequi luzë'ë

en runödzej' le ta'nábini lë' unödzej' tu chí'isö,

Nácagacabi' zxi'ini xi'sóë' tu le run ga raza dxi'a queëru'.

27 Buli'cá'ana le cabí nácate', en guli'gún le naca dxi'a.

Channö caní gunli', sóali' tsaz,

28 tu' nadxi'inë' Xanru' nu run le naca tsahui',

en catu caz usán në'ë nupa néquiquequi quez queë'.

Gun chí'tica'së' léguequi,

pero usunítië' zxi'ini xi'sóagaca nupa tuá' dö'.

29 Guequi luyú quégaca nupa nácagaca tsahui',

ate' ila'cuá'tica'sö luyú na'.

30 Ru'ë bönni' tsahui' didza' le napa yöl-la' réajni'i,

ate' raza yöl-la' ruchi'a rusörö ni'a que didza' na' ru'ë.

31 Yu'u icja ládxí'da'ahuë' le gunná bë'ë Dios.

Que lë ni na' catu caz ichixi iníguinë'.

32 Ruyuda' nu ruá' dö' le runë' bönni' tsahui',

en riguilaj nacxi gaca guti lë'.

33 Xanru' biti' gu'ë nu na' lataj bi gun queë' bönni' tsahui' na',

en biti' gu'ë lataj irugu queë' cate' nu uchi'a usörö queë'.

34 Buli'zxöni ládxë'ë Xanru', en guli'gún ca rë'ënë' gunli',

ate' uchisë' libí'ili' para guequi queëli' luyú.

Cate' udxi quégaca nupa tuá' dö', hualé'e quézili' le.

35 Bilé'eda'-në' bönni' huía' dö'.

Gúquië' ca tu yaga zxön, en buzí'de'enë' xibé.

36 Ní'irö gudödi queë', en bíti'rö zoë'.

Yöjdilja' lë', pero biti' ca' guca udzöliida' lë'.

37 Buli'yú ca náquië' bönni' tsahui'.

Cuntu nu gaca bi innë' queë',

tu' ila'cuá'abi' zxi'ini xi'sóë' bönni' zxön ladxi'.

38 Ulu'niti tsaz nupa tu'cá'ana le gunná bë'ë Dios.

Usiúdxë' Xanru' yugu' zxi'ini xi'sóagaca nupa tuá' dö',

39 pero rusölá cazë' nupa nácagaca tsahui'.

Rutipë' ládxí'guequi cate' bi raza quéguequi.

40 Rácalenë' léguequi, en rusölë' léguequi.

Rubéajë' léguequi lu ná'agaca nupa tuá' dö', en rusölë' léguequi,

tu' tu'zxöni ládxí'guequi Lë'.

38

¹ Biti' ilenu' neda', Xan, en biti' uzenu' neda' bach.

Biti' gunu' neda' xigua' lu yöl-la' rilé quiu'.

² Ben zi'u neda', en budxiu' neda' huë'.

Nuzõtju' neda' len no'o.

³ Yu'a yödzhöhuë' zxön tu' rilenu' neda'.

Dxía huë' idütë le naca' tu' nözi dul-la' nabága'a.

⁴ Xigua' nabága'a naca ca tu nísado' ga ruchicja' nisa.

Naca ca tu yua' zi'i nabága'a neda'.

⁵ Tu' bena' yugu' le cabí naca dxi'a,

dxía huë' le rilá' siguti, en rudzu'.

⁶ Narecji' cúdza'a, en nagá'ana' cá'asö.

Idú dza ruhuí'inide'eda'.

⁷ Idütë le naca' yú'uda'a xilá,

ate' nazzí xipéla'a.

⁸ Rudú ládxa'a, en ricuídi'da'.

Rinnéda' ládxa'a tu' ruubi ruguí' ládxi'da'ahua'.

⁹ Nöz quézinu' Li', Xan, le rizé ládxa'a,

en riyömmu' le rinnética'sö ládxa'a.

¹⁰ Richunchu ládxi'da'ahua', en ricuidi' ládxa'a,

ga ridxintë richul-la guiöj lahua'.

¹¹ Bítirö ta'dzaga neda' yugu' luzá'a, en yugu' böcha'a, tu' nözi xihuë'a,

ate' tu'biga' di'a dza quia' ga zoa'.

¹² Nupa té'ëni iluti neda' ta'bequi le ila'zön neda',

ate' nupa té'ëni ulu'cul-la neda' tun xtídza'guequi nacxi ulu'suniti neda'.

Idú dza ta'bequi ícjaguequi bi ilún quia'.

¹³ Naca' ca tu bönni' nacödzuë', en bítirö riyönda'.

Naca' ca tu bönni' narugu lúdxë'ë, en biti' risaljé' ru'ë.

¹⁴ Naca' ca tu bönni' bítirö riyönnë',
en que lë ni na' biti' bi didza' rubi'ë.

¹⁵ Tuzu' Li' ruzxöni ládxa'a, Xan.

Ubí'i cazu' didza', Xana' Dios.

¹⁶ Biti' gu'u lataj ulu'dzeja ni'a que le raca quia'.

Biti' gu'u lataj ilún ba zxön cúinguequi tu' nagá'ana' cá'asö.

¹⁷ Chizóa' tsöjbixa',

en zóaléntica'sö xihuë'a neda'.

¹⁸ Que lë ni na' rixóalëpa' xigua' nabága'a,

en risëbida' ládxa'a tu' nözi dul-la' nabága'a.

¹⁹ Nacuá' dxi'a, en nál-lagaca nupa téqui neda' zi'.

Nayánda' nupa tu'dí'i neda', en biti' bi nuna' quéguequi.

²⁰ Ta'dá'baga' neda' nupa tu'bí'i le cabí naca dxi'a que nu run le naca dxi'a.

Caní tun tu' ruí' ládxa'a guna' le naca dxi'a.

²¹ Biti' usán no'o neda', Xan.

Biti' ubigu' ga zoa', Dios quia'.

²² Gudáchi gácalenu' neda', Xan,

tu' naca cazu' Li' Nu rusölá neda'.

39

¹ Gunnía': Gun chí'i cuina' ca naca le runa',

en biti' guna' dul-la' ca naca didza' ruá'a.

Biti' bi didza' gu'a
cate' nacuá' nupa tuá' dö' gal-la' ga zoa'.
2 Guzóa' dxisó, en biti' bē'a didza' ga bidxintē
biti' gunniá' le naca dxi'a, pero biyali' xihuē'a.

3 Bubi buguf'i ládxi'da'ahua',
en cate' guzá' ládxa'a que, guyegui gulá ládxi'da'ahua'.
Que lē ni na' gunábida'-nē' Xanru', gunniá':

4 Xan, ¿gáca'xte caz soa' ibana'?
Buluí'i neda' tsca iz soa' ibana'.
Ben ga inözda' channö chizóa caz gátia'.

5 Nabábasö dza nuzú' quia' soa' ibana'.
Yugu' iz soa' ibana' biti' bi zeaj naca lo' Li'.

Le nácatē biti' bi nácacaga yúgu'tē bönachi nacuá' luyú ni.

6 Nácacacasö ca tu zxul-la rigú'u böaj.
Nítisö tu'úbi tu'guí'i ládxi'do'guequi, en tun dxin.
Tu'tubi yöl-la' tsahui', pero biti' nözguequi nuzxi guequi que.

7 ¿Bizxi caz gaca guna' löza, Xan?
Ruzxöni ládxa'a Li'.

8 Busölá neda' lu xigua' nabága'a,
en biti' gu'u lataj ulu'titaj quia' nupa nácacaga canöz.

9 Soa' dxisö, en biti' bi didza' gu'a,
tu' ben cazu' Li' ga riguí'i rizáca'a lē ni.

10 Bítirö gunu' neda' xigua'.
Chizóa gátia' tu' rusaca' zí'u neda'.

11 Runu'-nē' xigua' bönni' dul-la', en ruzenu' lē' bach.
Ca tu'töba' bēlado' que le yú'uba', rusunítu' le ruí'i ládxe'ē bönni' na'.
Biti' bi naca cazē' bönni' dul-la' na'.

12 Buzé nagu' le rulidza' Li', Xan, en le rinábida' Li'.
Biti' su' dxisö cate' ribödxa' lo' Li',
en biti' gaca' ca tu bönni' zí'tu' lo' Li',
en ca tu bönni' ridasé' ca guláquiē' xuz xtó'otu'.

13 Benna neda' lataj idipa ládxa'a
zí'aló ca uzá'a yödzülió ni, en bítirö soa'.

40

1 Lu yöl-la' riböza zxön ladxi' quia' gulöza' gácalenē' Xanru' neda'.
Ní'irö buzé naguē' quia', en biyönnē' le bulidza'-nē'.

2 Bubéajē' neda' ca tu lu yeru ga rē', en lu guna' zili.
Buzóē' neda' tu lu guiójtó'o, en guléquiē' neda' tsutsu.

3 Busédinē' neda' tu le cubi le rul-la' le naca yöl-la' ba queē' Dios queēru'.
Zián nupa ila'lé'eni lē ni, en ilún Lē' zxön,
ate' ulu'zxöni ladxi'-nē' Xanru'.

4 Bica' ba bönni' ruzxöni ládxe'ē Xanru'.
Biti' runē' tsözxön nu run ba zxön cuini, nu na' run zxön yugu' dios núngaca
bönachi.

⁵ Ziántērō naca le nunu' queētu', Xana' Dios, yugu' le tun ga rubánitu'.
Ziántērō le yu'u icja ládxi'do'o ca naca le gunu' queētu'.

Biti' ca' gaca nu ulaba lo' Li' tsca nácagaca.

Channō guě'ēnda' nu usiyōnda' tsca nácagaca,
nayántērō tsca le gaca ulaba'.

⁶ Biti' rě'ēnu' gútigaca'-ba' bōa' guixi' lo', en calēga bi cu'a lo'.

Biti' rinabu' uzégui'gaca'-ba' bōa' bēdxi lo',
en calēga tu le guna' lo' para ugúa dul-la',
pero gusalju' naga' para yōnda' le guío' neda'.

⁷ Que lē ni na' gunniá': Ni zoa caza' neda' quiu'.

Lu guichi lá'ayi quiu' nazúaj caz ca naca quia'.

⁸ Raza ládxa'a runa' ca rě'ēnu' Li', Dios quia'.

Nagu'a icja ládxi'da'ahua' xibá naguixju' Li'.

⁹ Ga tu'dubi bōnachi guizxi yu quiu', Xan,
busiyōnda' lēguequi nacu' tsahui'.

Biti' ca' guzóa' dxisō.

Nöz quézinu' lē ni, Xan.

¹⁰ Biti' bucáchi'za' icja ládxi'da'ahua' ca ruúnu' tsahui' bōnachi.

Bulu'a lahui ca runu' ca rnno', en ca rusóló' bōnachi.

Ga nudúbigaca bōnachi quiu' biti' guzóa' dxisō,
pero bē'a didza' ca nacu' dxi'i ladxi', en ca ru'u didza' le nácate.

¹¹ Biti' ugú' quia' yōl-la' dxi'i ladxi' quiu', Xan.

Yōl-la' dxi'i ladxi' quiu', en ca runu' ca rnna xtídzu' ilún chí'tica'sō neda'.

¹² Zián le raca quia' nagú'ugaca neda' lē'ajlō, le cabí gaca nu ulaba.

Nabága'a yugu' dō' bi'a, en bíti'rō gaca ilé'eda'.

Nayanrō ca guitsa' icja', ate' rudú ládxa'a.

¹³ ¡Busólá neda', Xan!

¡Gudáchi gácalenu' neda', Xan!

¹⁴ Ben ga ulu'tuí'i, en ila'bō' baguí'i

nupa na' tē'ēni ulu'suniti neda'.

Ben ga ulu'huécaj, en ulu'gá'ana cá'asō

nupa na' tē'ēni gaca quia' le cabí naca dxi'a.

¹⁵ Ben ga ulu'dú ládxi'gaca tu' nabíxigaca

nupa na' tu'titaj neda', ta'nná: "¡Buyútsōca' le raca queē'!"

¹⁶ Ben ga ulu'dzeja, en ulu'zí' xibó' yúgu'tē nupa tu'guilaj Li'.

Ben ga ila'nnática'sō nupa ta'dxi'i yōl-la' rusólá quiu',

ila'nná: "Nayépsētērē' Xanru'."

¹⁷ Nacuídida', en bití' bi gaca guna',

pero ruí'i ladxi' cazu' Li' neda', Xan.

Naca cazu' Nu rácalen neda', en Nu rusólá neda'.

Biti' tsenu' guídu' quia', Dios quia'.

41

¹ Bica' ba bōnni' ruí'i ládxe'ē nupa nácagaca yechi'.

Xanru' gácalen cazē' bōnni' na' cate' bi gaca queē'.

² Xanru' Dios gun chí'ē lē', en gunē' ga soē' ibanē'.

Gunē' ca' ga uzi'ē xibé xiyú cazē'.

Biti' usán nē'ē lē' lu ná'agaca nupa bití' ta'lé'e lē' dxi'a.

- 3 Xanru' utipë' lãdxë'ë bönni' na' cate' ré'enë'.
 Uchisë' lë' lu da'a le ráti'në', en gunë' ga soë' dxi'a.
 4 Gunnía': Bena' dul-la' lo' Li', Xan.
 Buéchi' ladxi' neda', en bun neda'.
 5 Nupa biti' ta'lé'e neda' dxi'a ta'nnë' quia', ta'nná:
 "¿Bátaxi gátie', en huáca gal-la lãdxi'gaca bönnachi lë'?"
 6 Channó uduyúgaquië' neda', ta'zì' yë'ë.
 Ta'gúë' didza' ca naca le raca quia',
 en cate' ta'rúajë', tu'siyönnë' bönnachi.
 7 Tu'dubi nupa biti' ta'lé'e neda' dxi'a, en ta'nnë' quia'.
 Ta'zá' lãdxi'gaca zian le naca dö' le ilun quia'.
 8 Ta'nnë' quia', ta'nná: "Yu'ë yödzhüë' le guti lë'.
 Bítirö caz huóásë' ga na' dë' lu le denë'."
 9 Lësca' caní benë' böchi' luzá'a ruzxöni lãdxa'a-në'.
 Bönni' gudágulenë' neda' tsözxön ridá'baguë'ë neda'.
 10 Buéchi' ladxi' neda', Xan, en bun neda',
 ate' ubí'i caza' quégaca nupa na' biti' ta'lé'e neda' dxi'a.
 11 Gácabe'eda' raza lãdxu'u neda',
 tu' cabí ulu'xicja neda' nupa biti' ta'lé'e neda' dxi'a.
 12 Gáclen cazu' neda' tu' runa' le naca dxi'a.
 Gunu' ga sóatica'sa' lo' Li'.

- 13 ¡Yöl-la' ba Xanru', Dios quégaca bönnachi Israel!
 ¡Guli'cu'ë yöl-la' ba na'a dza, en yugu' dza si' zaca!
 ¡Ca' gaca!
 ¡Ön, ca' gaca!

42

- 1 Ca rizë lãdxi'ba' bidxina' guixi' nisa yégudo',
 lësca' caní rizë lãdxa'a Li', Dios.
 2 Ribidxi lãdxa'a Li' cazu', Dios.
 ¿Bátaxi udxina' ga dë quia', en tsu'a le yúbölö yudo' lá'ayi quiu'?
 3 Rëla, en te dza ribödxá', en biti' bi rahua'.
 Yugu' dza nacua' nupa ta'nábini neda', ta'nná: "¿Gazxi caz zoa Dios quiu'?"
 4 Risëbi lãdxa'a cate' röjneda' ca guca zí'alö,
 cate' guzá'lëna' bönnachi guizxi yu, en yöjnörüa' lãhuilöguequi ra' yu'u queë'
 Dios.
 Lu yöl-la' rudzeja queëtu' bíl-latu', en guyéaj lãdxi'tu'-në' Xanru', en bentu'
 laní.
 5 ¿Bizx que risëbida' lãdxa'a, en bizx que rö'a bönniga?
 Uzxöni lãdxa'a-në' Xanru' Dios, tu' huadxín dza cu'a-në' yöl-la' ba le yúbölö.
 Náquië' Nu rusólá neda', en náquië' Dios quia'.

- 6 Risëbida' lãdxa'a, Dios quia'.
 Que lë ni na' tsöjneda' Li' tsanni ni zoa', ridá' rizxúnna' ra' yegu Jordán,
 en tsanni ni ridá' lu guí'a Hermón, en lu guí'a Mizar.
 7 Ca tu guziú' rinnë lu nísado', en ca bö ruí'i tu budoá' nísado' queë' Dios,
 caní rinnë ladxi' bö' naca caza' lu yöl-la' risëbi ladxi'.

⁸ Rinábida-nè' Xanru' huéchi' láchxë'è neda' yugu' dza.

Yugu' dzö' rul-la' yöl-la' ba queé' Lè',

en rulidza' Dios, ru'ílèna'-nè' didza', Nu na' runna quia' yöl-la' na'bán.

⁹ Guía'-nè' Dios, Nu ruzóa neda' tsutsu, innía': ¿Bixx que nál-la láchxu'u neda'? ¿Bixx que run bayúdx qu'i sáca'tica'sa' lu ná'agaca nupa bití' ta'lé'e neda' dxi'a'?

¹⁰ Rutsaba yúgu'tè dxita yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu'?"

¹¹ ¿Bixx que risébida' láchxa'a, en bixx que rō'a bōniga?

Uzxōni láchxa'a-nè' Xanru' Dios,

tu' huadxín dza cu'a-nè' yöl-la' ba le yúbölö,

tu' náquiè' Nu rusólá neda', en náquiè' Dios quia'.

43

¹ Guléaj neda' tsahui', Dios, en bē' didza' uláz quia' lógaca bōnachi tuá' dō' quia'. Busólá neda' lu na' nu rizi' yē', en bití' naca tsahui'.

² Li' cazu' nacu' Dios, Nu rutipa láchxa'a. ¿Bixx que nusán no'o neda'?

¿Bixx que ruhuí'inida' tu' ta'bía no neda' nupa tu'dí'i neda'?

³ Gusól-la' quia' bení' quiu', en le naca iduté li' quiu' para ulu'luí'i neda' nōza. Ben ga ila'chē' neda' ga naca lá'ayi quiu', ga na' zoa cazu' Li'.

⁴ Tsu'a ra' bucugu queé' Dios.

Ibíg'a lahué' Dios, Nu run ga rudzėjade'eda'.

Gúl-lalena' bihuël-la, cu'a Li' yöl-la' ba, Dios, nacu' Dios quia'.

⁵ ¿Bixx que risébida' láchxa'a, en bixx que rō'a bōniga?

Uzxōni láchxa'a-nè' Xanru' Dios,

tu' huadxín dza cu'a-nè' yöl-la' ba le yúbölö,

tu' náquiè' Nu rusólá neda', en náquiè' Dios quia'.

44

¹ Biyōn quézitu' le, Dios.

Bulu'siyōnnē' netu' xuz xtó'otu'

ca naca yugu' le zxōn benu' dza ni'te,

cate' ni' gula'cu'ē légaquiè' luyú ni.

² Bulaga cazu' Li' bōnachi yugu' yōdzō izá'a,

en bucuásu' légaquiè' luyú ni.

Busaca' zí'u bōnachi izá'a na', en gurú'unu' léguequi.

³ Bití' gula'déli'nē' xuz xtó'otu' luyú ni rácasō quégaquiè',

en bití' bulu'sólá la' cuíngacasē',

pero ben cazu' Li' lē na' len yöl-la' huáca zxōn quiu',

en lu yöl-la' zxōn que le naca cazu',

ate' bulú'u lahui ca nadxí'inu' légaquiè'.

⁴ Naca cazu' Li' Dios quia', en Nu rinná be'e neda'.

Busólá bōnachi quiu', yugu' xzí'ini xí'sóē' Jacob.

⁵ Uguntu' dxin yöl-la' huáca quiu', uxícjatu' nupa ta'dá'baga' netu',

ate' tu' zóalen cazu' netu', ucúl-latu' nupa bití' ta'lé'e netu' dxi'a'.

⁶ Bití' uzxōni láchxa'a uxiti' yaga quia',

en bití' uzxōni láchxa'a guié tuchi' quia' para ilácalen neda',

7 tu' rusölá cazu' Li' netu' lu ná'agaca nupa biti' ta'lé'e netu' dxi'a,
en ruzötju' nupa tu'dí'i netu'.

8 Cú'utica'stu' Li' yöl-la' ba,
en guíetica'stu' Li': "Xclenu'."

9 Pero na'a nusán no'o netu', Dios, en bè'u lataj nu buxicja netu'.
Bíti'rö réajlenu' bönni' queétu' röjáquié' gudil-la.

10 Benu' ga buzxúnajtu' lógaca nupa ta'díl-lalen netu',
ate' gula'gúë' yugu' le nequi queétu'.

11 Bè'u lataj gulútié' ziantu' ca nu rúti-gacaba' bö'cu' zxila'.
Bésilásiu' netu' ládjagaca yödzö izá'a.

12 Naca tsca bëti'u netu', en láti'do'os guzxi'u.
Biti' ca' buzi'u xibé tsca guzxi'u.

13 Bönachi yugu' dzaga yödzö queétu' bila'lé'e lè na' benu' queétu',
ate' tu'cá'ana netu' cá'asó, en tu'titaj netu'.

14 Benu' ga tu'didza' yudxi bönachi yugu' yödzö netu'.
Tu'tá ícjaguequi lu yöl-la' rucá'ana netu' cá'asó.

15 Yugu' dza rutuí'ida' ca raca queétu',
en rö'a böniga lu yöl-la' rutuí'iquia',

16 tu' riyónnda' nupa tu'didza' yudxi neda', en tu'cá'ana neda' cá'asó,
nupa na' biti' ta'lé'e neda' dxi'a, en tu'dí'i neda'.

17 Guca queétu' yúgu'tè lè ni sal-la' biti' nál-la ládxi'tu' Li',
en biti' nucá'anatu' didza' dzaga bénlenu' netu'.

18 Biti' ca' böaj ládxi'tu' ca réajlè'etu' Li',
en biti' gudá'baga'tu' le buluí'inu' netu' guntu'.

19 pero nusán na' cazu' netu' ladaj nupa náacagaca ca yugu' böa' gui'a sínia',
en nucá'anu' netu' ga chizóa tseajtsázatu' lataj chul-la.

20 La'tu' gul-la ládxi'tu' Li', Dios queétu',
o la'tu' guyéaj ládxi'tu' tu dios izá'a,

21 la' gáquibe'etènu' lè ni, Dios,
tu' nöz quézinu' le rizá' ládxi'tu'.

22 Tu' néquitu' quiu' Li' zóatica'sö nu guti netu'.
Nactu' ca yugu' bö'cu' zxila'do' lo nu guti légacaba'.

23 ¡Bubán, Xan! ¿Bizx que rásitso' Li'?

¡Guyasa! ¡Biti' usán no'o netu' chadía chacanna!

24 ¿Bizx que nucachi' lo' lotu' netu'?

¿Naru' nál-la ládxi'u ca raca queétu', en ca riguí'i rizáca'tu'?

25 Naguíngaquié' netu' luyú.

Nadínitú' lu bëchtó yu.

26 ¡Gudáchi gácalenu' netu',
en lu yöl-la' dxi'i ladxi' quiu' busölá netu'!

45

1 Rizá' ládxa'a tu le naca dxi'a.

Ru'a didza' que le runë' bönni' rinná bë'ë.

Naca lúdxa'a ca le ruzúajlenë' bönni' nabé'ede'enë' ru'ë didza'.

2 Nácatèru' Li' lachi ca yúgu'tè bönachi.

Nabé'ede'enu' ru'u didza'.

Que lè ni na' nunë' Dios gaca dxi'a quiu' chadía chacanna.

³ Bega' lè'u guié tuchi' quiu', bönni' nayëpisë',
lu yöl-la' lachi quiu', en lu yöl-la' unná bë' quiu'.

⁴ Lu yöl-la' unná bë' quiu' idéli' nu' lu gudil-la,
ugunu' dxin le naca idútë li, en yöl-la' nōxaj ladxi', en le naca tsahui'.
Yöl-la' huáca zxon quiu' gun ga ilá' lahui yugu' le zxöntërö.

⁵ Natúchi'gacada' yaga lahui tuchi' quiu'.
Bönachi yugu' yödzo zi'tu' ta'dzö'ö lo', nupa na' ta'díl-lalen lí'.
Yugu' yaga lahui tuchi' quiu' nachöza'gaca ládxi'do'guequi.

⁶ ¡Chadía chacanna naguixju' ga rö'u rinná bë'u, Dios!

¡Ca naca le naca tsahui' rinná bé'enu' bönachi quiu'!

⁷ Nadxí'inu' le naca tsahui', en biti' rilé'enu' dxi'a le biti' nácatë.

Que lè ni na' Dios quiu' nabó cazë' lí'.

Nachízirë' icja ládxi'do'o yöl-la' rudzeja ca le nápagaca ia'zica'rö bönachi.

⁸ Rilá' zxiix lari' nacu' len zi' mirra, en zi' áloe, en zi' casia.

Tunë' bönni' huil-la ga rudzéjanu' lu yu'u lidxu' zxon.

⁹ Yugu' nigula zxi'inigaquië' bönni' ta'nná bë'ë
nútsa'gacabi' bi'i nigula nacuá'abi' lidxu'.

Nigula quiu' rinná bé'enu' zuínu cuitu' ibëla,
en nácunu le nazí'i biquitaj oro nazaca'.

¹⁰ Bë' ladxi' neda', nigúlado'.

Bë' ladxi' neda', en biyön xtídz'a'a.

Gul-la ladxi' bönachi yödzo quiu', en yugu' di'a dza quiu'.

¹¹ Ní'irö së ládxi'ë bönni' rinná bë'ë yöl-la' lachi quiu'.

Buzóa zxibu' lahuë' tu' náquië' xanu'.

¹² Ní'irö bönachi yödzo Tiro ila'dxín lo' nuá'gaca le nazáca'da' le ilunna quiu'.

Yugu' bönni' ta'lé'enë' yöl-la' tsahui' ila'nábinë' lí' bi unödzu' quegaquië'.

¹³ Yugu' bi'i nigula queë' bönni' rinná bë'ë zóagacabi' lidxë', en nácatërögacabi'
lachi.

Lari' nácubi' nadíalen du oro.

¹⁴ Ila'ché'ë-bi' lahuë' bönni' rinná bë'ë, nácubi' lari' nazáca'da'.

Ila'dabi' yugu' bi'i nigula ra'bando' cúdzi'löbi',

ate' ila'ché'ë légacabi' lahuë' bönni' na' rinná bë'ë.

¹⁵ Lu yöl-la' rudzeja, en lu yöl-la' ruzí' xibë' quegacabi' ila'dxinbi',

en ila'yázabi' yu'u lidxë' bönni' na' rinná bë'ë.

¹⁶ Ila'cuá'abi' bi'i bönni' quiu' uláz quegaquië' xuz xto'o.

Gunu' ga ila'nná bë'ëbi' idútë yödzölió.

¹⁷ Gunu' ga tsójnégacatica'sö bönachi ca nacu' Lí'.

Que lè ni na' yúgu'të bönachi ilé lí' "Xclenu'" yugu' dza si' zaca.

46

¹ ¡Náquië' Dios Nu run chi'i rë'u, en Nu ruzóa rë'u tsutsu!

² Zóatica'së' gácalenë' rë'u cate' bi' raca queëru'!

Que lè ni na' biti' gádxiru' sal-la' izxizi idútë yödzölió,

en ila'niti yugu' guí'a lu nísado',

³ en sal-la' chasa idxía, en tsu'u bö nísado' na',

en ila'zxiizi guí'ado' tu' nözi le raca.

4 Zoa tu yegu le run ga tu'dzeja nupa nacua' ladzë' Dios,
ga na' rō'ō yudo' lá'ayi ga zoë' Dios nayëpisëtërë'.

5 Zoa cazë' Dios yōdzō na', le catu caz initi.

Cate' ni' soa itō yu gácalenë' nupa nacua' ni'.

6 Tadxi ta'dzōbi bōnachi yugu' yōdzō,
ate' ta'bō' bagu'i nupa ta'nná bē',
tu' ru'ë didza' Dios, ate' riniti luyú ni.

7 Xanru' nayëpisëtërë' zóalen cazë' rë'u.
Dios quégaca xzí'ini xi'sóë' Jacob rapa chi'ë rë'u.

8 Guli'dá ilé'eli' le nunë' Xanru'.
Buli'yú ca nusunítië' luyú ni.

9 Ruzóa dxie' gudil-la rácagaca idútë yōdzōlió.

Riguitsjë' yugu' uxiti' yaga,
en rusunítië' yugu' yaga lahui tuchi' que gudil-la.

Ruzégui'ë yugu' carreta que gudil-la tu lu guí' xzōn.

10 Rnnë': "Guli'sóa dxisō, ate' guéquibe'eli' naca caza' Dios.
Nayëpisëtëra' yugu' lu yōdzō, en lu idútë yōdzōlió."

11 Xanru' nayëpisëtërë' zóalen cazë' rë'u.
Dios quégaca xzí'ini xi'sóë' Jacob rapa chi'ë rë'u.

47

1 ¡Lu yöl-la' rudzeja queëli' guli'capa' ná'ali', bōnachi yúgu'të yōdzō!
¡Guli'cu'ë yöl-la' ba Dios, len yugu' le rúl-laleni'!

2 Ral-la' gunru' bal Xanru' Dios nayëpisëtërë'.
Náquië' Nu rinná bē' idútë yōdzōlió.

3 Benë' ga bidéli'ru' yugu' lu bōnachi izá'a.
Benë' ga rinná be'eru' yugu' yōdzō.

4 Gurō cazë' luyú ga ni nuzōë' rë'u.

Naca tu luyú lachi quégaca xzí'ini xi'sóë' Jacob, nupa na' nadxí'i quézinë'.

5 Len yöl-la' ba xzōn ribenë' Dios ga rō'ë rinná bē'ë.
Le zían le tu'cōdxë' cate' ribenë' Xanru' ni'.

6 ¡Guli'gul-la yöl-la' ba queë' Dios! ¡Guli'gul-la!
¡Guli'gul-la yöl-la' ba queë' Bönni' rinná bé'enë' rë'u! ¡Guli'gul-la!

7 ¡Rinná bē'ë Dios idútë yōdzōlió ni!

¡Idú ládxi'li' guli'gul-la yöl-la' ba queë'!

8 ¡Zoa cazë' Dios lataj lá'ayi queë' ga rō'ë rinná bē'ë!

¡Rinná bé'enë' bōnachi yúgu'të yōdzō!

9 Tu'dubi nupa ta'nná be'e yugu' yōdzō
tsōzxōn len bōnachi queë' Dios queë' Abraham.

10 ¡Nequi queë' Dios yöl-la' xzōn quégaca yúgu'të yōdzō nacua' yōdzōlió!

¡Nayëpisëtërë' Lë'!

48

1 Nayëpisëtërë' Xanru', ate' run bayudxi cu'uru'-në' yöl-la' ba idú ládxi'ru'

ga zoa lu yödzo queë' Dios queëru' le zoa lu guí'a lá'ayi queë'.

² Lachi, en sibi naca guí'a lá'ayi na',
ate' raza láchxí'gaca bönachi idütë yödzölió ca naca.
Caní naca guí'a Sión le rö'ö tsölá'aló ga za' bö' ziaga.
Lu yödzo na' dë ga zoa Bönni' Unná Bë' nayëpisë'.

³ Rulu'ë lahui Dios sóaru' tsutsu cuitë' Lë'
ga zoa lu yu'u lidxë'.

⁴ Gula'dá'baga' nupa ta'nná bë' lu yu ni,
en gula'bígüi'ë ra' yödzo lá'ayi na'.

⁵ Cate' bila'lé'enë' yödzo na' bulu'bánninë'.

Gula'bö'ë böniga, en la' bulu'zxúnajtë'.

⁶ Ra' yödzo na' gula'zxízië'.

Gula'zaca' zi'ë ca raza queënu nigula chizóa uzóanu-bi' bí'ido'.

⁷ Risöl-lë'ë Dios tu bö' budunu',
le rusuniti yugu' barco zxön que yödzo Tarsis.

⁸ Biyönru' ca nácagaca le zxön benë' Dios,
ate' na'a rilé'e quéziru' le runë',
lu yödzo lá'ayi queë' Dios quégaca ni'a në'ë guizxi yu,
en náquië' ca' Dios queëru'.
Tsaz naguixjë' yödzo na'.

⁹ Ga zoa lu yudo' quiu', Dios,
röjnetu' ca naca yöl-la' dxi'i ladxi' quiu'.

¹⁰ Ca nayëpisëtë'rö Lo', Dios,
ca' ta'gú'u Li' yöl-la' ba bönachi idütë yödzölió.
Ca naca le naca tsahui' rinná bë'u.

¹¹ Ulu'dzeja bönachi nacua' yödzo Sión.
Ulu'zí'ínu xibé nigula zxí'ini xi'sóë' Judá
tu' ruchi'a rusöröu' netu' ca naca le naca tsahui'.

¹² Guli'dá idú gásibi'iló ga dë yödzo Sión,
en buli'laba yugu' yu'u sibi tun chi'i yödzo na'.

¹³ Buli'yú ca naca zö'ö run chi'i yödzo na',
en buli'yú ca' le nuzóagaca le tsutsu,
para gaca quíxjöi'ili' zxí'ini xi'sóali' ca náquië' Dios zxön ni.

¹⁴ Tsaz náquië' Dios queëru', na'a dza, en dza si' zaca.
Ulu'inë' ré'u nöza tódi gátiru'.

49

¹ Guli'yöni lë ni, libí'ili', bönachi yúgu'të yödzo.

Buli'zë nágali', libí'ili', zóali' idütë yödzölió.

² Libí'ili', nayëpsëtë'röli', en libí'ili', nácali' cá'asó.
Libí'ili', dë yöl-la' tsahui' queëli', en libí'ili', nácali' yechi'.

³ Tsójsá' láchxa'a ca naca le nápagaca yöl-la' réajni'í,
en gu'a didza' le nápagaca yöl-la' raca yenni'.

⁴ Güi'í láchxa'a ca naca tu le rucudzu' didza',
en quíxjö'a ca nácagaca tsanni quinnia' lë'e bihuël-la.

⁵ Biti' bi rádxida' cate' ridxín bi raca quia',
cate' ta'gu'ë neda' lë'ajlò bönni' tuá' dö' bití' ta'le'enë' neda' dxi'a.

⁶ Tu'zxöni láchxë'ë bönni' na' yöl-la' tsahui' quégaquië',

en tun ba zxon cúngaquiè' ca nácagaca le dè quégaquiè'.

7 Biti' gaca huóá'uè' la' cuinsè' nitué' bõnni' na'.

Biti' gaca bi unõdzjè' queè' Dios le gun ga usõlè' lè',

8 tu' naca zxõntèrõ le huóá'u yõl-la' na'bán que nu bõnni',

ate' catu caz gaca nu bõnni' quízxjè' ca naca,

9 para idéli'nè' sóatica'sè' ibanè',

en cabi tsáziè' yeru ba ga yú'ugaquiè' bõnni' nati.

10 Rilé'enè' tatiè' ca' bõnni' ta'yéajni'inè',

en ta'nitiè' tuz ca tati nupa biti' bi nõzigaca, en nupa biti' ta'yéajni'i,

ate' tu'cá'anè' yõl-la' tsahui' quégaquiè' le ulu'zì' xibé bõnachi yúbõlõ.

11 Téquinè' ila'cuá'tica'sõ lídxigaquiè' bõnni' na',

ate' tsaz ila'cu'è' ni',

ate' ta'gu'è' lágaca xiyúgaquiè' ca naca la' lágacasè'.

12 Pero yõl-la' ba zxon napè' bõnni' na' biti' gun ga sóatica'sè'.

Gati cazè' ca tátiba' bõa' guixi'.

13 Cani naca le gaca quégaquiè' bõnni' tu' zxoní lãdxè'è' yõl-la' tsahui' quégaquiè',

enca' quégaca zxi'ini xi' sóagaquiè',

yugu' bi'i na' ta'yaza lãdxi'gacabi' didza' gulu'è' xúzgacabi' na'.

14 Ilátiè' ca tátiba' bõ'cu' zxila',

ate' yõl-la' guti gaca quégaquiè' ca tu nu uyú bõ'cu' zxila'.

Yugu' bõnni' tsahui' ila'nná bé'enè' légaquiè' cate' itõ yu zila.

Ila'niti le guta' quégaquiè', ate' ila'cuá'tica'sè' lataj chul-la ga dzõ'õ nupa nátigaca.

15 Huóá'u cazè' Dios yõl-la' na'bán quia' lu yõl-la' guti,

tu' ichè'è' neda' ga tsõsõalena' Lè'.

16 Biti' gádxinu' cate' idéli'nè' nu bõnni' yõl-la' tsahui' zxon,

en cate' xõn yõl-la' lachi que yu'u lídxè',

17 tu' cabi bi u'è' cate' gátiè',

en biti' tséajlen lè' yõl-la' lachi que le guta' queè'.

18 Sal-la' cate' ni' zoè' nabanè' buzì' xibé bõ' naca cazè',

ate' gula'gú'u bõnachi lè' yõl-la' ba cate' bidéli'nè' yõl-la' tsahui' na'.

19 Tsáziè' ga na' dzõ'è' xuz xtá'ahuè',

en bíti'rõ ilé'enè' bení'.

20 Náquiè' bõnni' napè' yõl-la' zxon, pero riyádzjanè' yõl-la' réajni'i,

ca bõa' guixi' tati cázaba'.

50

1 Ru'è' didza' Xanru' Dios nayèpisètèrè'.

Nutubè' dèrõ nupa nacua' yõdzõlió ga naguéla'tè ga rilén gubidza ga ridxintè ga ribía.

2 Lu yõdzõ Sión rigu'è' Dios bení'.

Napa yõdzõ na' yõl-la' lachi idú.

3 Zè'è' Dios queèru', en biti' soè' dxisõ.

Tsõjmõru lahuè' tu guí' zxon,

ate' tsecja tu bõ' budunu' idú gasibí'ilè'.

4 Ulidzè' lúzxiba xitsá', enca' luyú

cate' uchi'a usõrõè' quégaca bõnachi queè'.

5 Rnnè' Dios: "Guli'túbì nupa néquigeequi quez quia',

nupa na' gulunlen neda' didza' dzaga,

en bulu'lalaj rón lahua' le ben tsutsu didza' dzaga na'."

6 Naca bē' náquiē' tsahui' Dios lúzxiba xitsá',
 tu' uchi'a usórōē' Dios bōnachi queē'.
 7 Rnnē': "Buli'zē nágali', bōnachi quia', ate' gu'a didza'.
 Buli'zē nágali', bōnachi Israel, ate' uzéguia' libí'ili' didza'.
 Naca caza' Dios.
 Ōn, naca' Dios queēli'.
 8 Biti' uzéguia' libí'ili' didza' ca naca le rúnнали' quia',
 en calēga ca nácagacaba' bōa' bēdxi ruzégui'li'-ba' lahua'.
 9 Biti' riquinda'-ba' bēdxi queēli',
 en calēga chivo biguiú' nacua'aba' queēli',
 10 tu' néquigacaba' quia' yúgu'tēba' bōa' guixi',
 enca' bōa'-bēdxi nacua'aba' lu gayuá' gayuá' gu'ado'.
 11 Néquigacaba' ca' quia' yúgu'tēba' bōa' zoa xiligacaba',
 enca' yúgu'tē le zoa nabán la' guixi'.
 12 La'tu' riduna' biti' guía' ca' libí'ili',
 tu' nequi quia' yōdzōlió, enca' yúgu'tē le nacua' ni'.
 13 ¿Naru' gágutsa' xipēla' gacaba' bēdxi,
 o gu'jatsa' xichōngacaba' chivo?"

14 Le ral-la' unōdzjali' queē' Dios naca yōl-la' rē Lē': "Xclenu"
 ate' ral-la' gunli' lahuē' Dios nayēpisētērē' ca naca le guzxi' lu ná'ali' gunli'.

15 Rnnē' ca': "Ral-la' ulídzali' neda' cate' bi gaca queēli'.
 Gácalen caza' libí'ili', ate' gunli' neda' bal."

16 Dios rē' bōnni' huía' dō', rnnē':
 "¿Bizx que ru'u didza' ca nácagaca xibá naguixja?
 ¿Bizx que ru'u didza' ca naca didza' dzaga núnlēna' bōnachi?
 17 Biti' runnu' lataj usédida' li',
 pero rucá'anu' cá'asō didza' ru'á'a.
 18 Cate' rilé'enu'-nē' bōnni' gubán rácalenu' lē',
 en runu' tsōzxōn nupa ta'guitsaj xibá que yōl-la' nutsaga na'.
 19 Zóatica'su' gu'u didza' xihui',
 en ruí'itica'su' didza' biti' nácate.
 20 Zóatica'su' uzéguii'-nē' bōchi' cazu',
 en rudidza' yudxu' bōchi'-zan cazu'.
 21 Caní' benu', ate' biti' bi gunnía',
 ate' gúquinu' naca' ca naca cazu' li',
 pero na'a uzéguia' li' didza', en ulu'a lahui le nunu'.
 22 Buli'zē nágali' didza' ni, núlōli' ruzóali' neda' tsōlá'aló.
 Channō cabí, usunítia' libí'ili', ate' cuntu nu gaca usólá libí'ili'.
 23 Nu rē neda': Xclenu', runna quia' le run neda' bal,
 ate' nu run ca rnna xtídza'a, usólá caza' nu na'."

51

1 Dios quia', buzá' ladxi' quia' tsca naca yōl-la' dxi'i ladxi' zxōn quiu',
 en tsca naca le zían le ruzá' ládxi'u quia', bugúa yugu' le gudá'baga'a lo' Li'.
 2 Bugu'bitica'sō neda' tsca naca dō' bí'a.
 Buchi'a neda' lu dul-la' nuna'.
 3 Nōz quézida' le gudá'baga'a,

en röjnétiqúi'sida' yugu' dul-la' nuna'.

⁴Lo' Li' cazu' bena' dul-la',

en lo' Li' ca' bi'a dö'.

Naca bē' nacu' tsahui' cate' ru'u didza',

en idú dxi'a, en tsahui' nacu' cate' ruchi'a rusöröu' queétu'.

⁵Buyútsöca', nabága'a dö' cate' gusí lotē gulja',

en lu dul-la' zoa caza' cate' buzóanu xiná'a neda'.

⁶Rē'ēnu' soa le naca idútē li icja ládxi'do'otu'.

Guchiza icja ládxi'da'ahua' yöl-la' réajni'i.

⁷Buchi'a neda' len le ruchi'aninu', ate' gaca' dxi'a.

Buguibi neda', ate' huóáca' zxi'la'do'os.

⁸Ben ga yönda' le nachē' yöl-la' ruzi' xibé, en yöl-la' rudzeja,

para huóáca ládxa'a lu le raca quia' tu' benu' ga réquibe'eda' nabága'a dul-la'.

⁹Biti' uyú' yugu' dul-la' nuna',

en busulu yúgu'tē le naca dö' nabága'a.

¹⁰Dios quia', bun dxi'a ládxi'da'ahua',

en guchiza neda' tu bö' cubi le nuzú' tsutsu.

¹¹Biti' ucuítu' neda' ga zoa' lo' Li',

en biti' ugú' Dios Bō' Lá'ayi quiu' Nu zóalen neda'.

¹²Bunna quia' yöl-la' rudzeja que yöl-la' rusólá quiu',

en ben ga guna' ca rnna xtídzu'u idú ládxa'a.

¹³Ní'irō usédida' nupa ta'guitsaj xibá quiu' ca nácgaca le rē'ēnu' ilúngaca,

ate' yugu' bōnni' dul-la' ulu'huécja quiu'.

¹⁴Dios quia', benna neda' lataj cabí ibága'a xiguia'.

Naca cazu' Dios, Nu rusólá neda'.

Lu yöl-la' rudzeja quia' gul-la' ca naca cazu' tsahui'.

¹⁵Xana' Dios, gusalaj ruá'a,

ate' usiyönda' bōnachi yöl-la' ba quiu'.

¹⁶La'tu' raza ládxi'u-ba' bōa'-bēdxi gútitu'-ba' lo', la' gúntea' caní.

Biti' raza ládxi'u-ba' nu bōa' uzégui'tu'-ba' lo'.

¹⁷Le rē'ēnē' Dios le naca ca tu le cú'uru' lahuē'

naca bö' naca cáziru' le nōtaj nagula ladxí'.

Dios quia', biti' ucá'anu' cá'asō ládxi'do'otu'

le ruhú'ini ladxí', en le naca nōxaj ladxí'.

¹⁸Lu yöl-la' ruzá' ladxí' quiu' ben le naca dxi'a

quégaca bōnachi yōdzō Sión.

Buchisa zō'ō le run chi'i yōdzō Jerusalén.

¹⁹Ní'irō tsaza ládxi'u yugu' le cú'utu' lo' le naca idú dxi'a,

yugu' bōa' guíxi'do' gútitu'-ba' lo',

en yugu' bōa'-bēdxi'do' uzégui'tu'-ba' lo'.

Ní'irō ilútiē'-ba' yugu' bēdxi biguíú'do',

en ila'gu'ē'-ba' lu bucugu quiu'.

52

¹¿Bizx que run ba zxon cuinu' ni'a que dö' ru'u, bōnni' nál-la?

Zóatica'sō yöl-la' dxi'i ladxí' queē' Dios.

²Len lúdxu'u rúnlenú' luzó'o didza' para usunítu' bōnachi.

Naca lúdxu'u, bōnni' rizi' yē', ca tu guié' tuchi'.

³ Nadxí'irönu' le naca dö' ca nadxí'inu' le naca dxi'a,
en nadxí'irönu' le cabí'nacatê ca nadxí'inu' le naca idütê li.

⁴ Nadxí'inu' yúgu'tê didza' tun ditaj bönachi,
li' na', bönni' rizí' yê'ê.

⁵ Tsaz uzötaj cazê' Dios li'.
Sönê' li', en ubéajê' li' lu' yu'u lidxu',
en ucuítê' li' ga nacua' nupa nabángaca.

⁶ Yugu' bönni' tsahui' ila'lé'enê' lê ni, en iládxinê' Dios.
Ulu'zixidxê' queê' bönni' na' rizí' yê'ê, ila'nê':

⁷ "¡Buli'yútsöca! Bönni' ni bití' gú'unnê' uzxöni ládxê'ê Dios,
pero buzxöni ládxê'ê yöl-la' tsahui' queê',
en le zían le guzê ládxê'ê le cabí bi nazaca'."

⁸ Naca' neda' ca tu yaga olivo ya'a le rö' ra' yu'u lidxê' Dios.
Uzxöni ládx'a' yöl-la' dxi'i ladxi' queê' Dios yugu' iz si' zaca.

⁹ Guíetica'sa' Li': "Xclenu" tu' ben cazu' Li' ga naca caní,
ate' guna' löza Lo' le naca dxi'a lógaca nupa néquiquequi quez quiu'.

53

¹ Ta'zá' ládxê'ê bönni' canóz, ta'nnê':
"Bití' ca' zoê' Dios."

Nácagaquiê' xihui' bönni' caní, en núngaquiê' le nácaterö xihui'.
Cuntu nu bönni' zoê' runê' le naca dxi'a.

² Ga na' zoê' Dios yehua' yubá ruyúé' gátí'tês,
en rilé'enê' bönachi nacua' idütê yödzölió,
para inözínê' channö zoa nu réajni'i,
o channö zoê' nu bönni' ruí' ládxê'ê Dios.

³ Yúgu'tê bönachi sójáquiê' ga yúbóló.
Yúgu'tê' nácagaquiê' xihui'.

Cuntu nu zoa run le naca dxi'a, nitúê' bönni'.

⁴ ¿Naru' cabí nápagaquiê' yöl-la' réajni'i bönni' na' tu'ê dö'?
Tu'sunítiê' bönachi quia' ca tu nu ragu yöta,
en bití' ca' tu'lidzê' neda'.

⁵ Tadxi ta'dzöbinê' bönni' caní, en bití' bi nuna' quégaquiê'.
Caní raca tu' rusunítiê' Dios caz nupa ta'díl-lalen libí'ílí'.
Gunlí' ga ulu'tuí'inê' tu' chigurú'unê' Dios légaquiê'.

⁶ Raca ládxí'ru' irúaj Sión Nu usólá bönachi Israel.
Cate' uchisa cazê' Dios bönachi queê' nadzúngaca,
ulu'dzeja zxi'ini xi'sóê' Jacob, en ulu'zi' xibé bönachi Israel.

54

¹ Busólá neda', Dios, para gaca yöl-la' ba que Lo'.
Len yöl-la' huáca quiu' guléaj neda' tsahui'.

² Ruzê' nagu' le rulidza' Li', Dios.
Ruzê' nagu' didza' ruá'a.

³ Ta'díl-lalen bönni' zi'tu' neda',
tu' té'ênê' bönni' zidzaj ilútiê' neda'.

Bití' ca' tádxinê' Dios.

⁴ Buli'yútsöca', naca cazê' Dios Nu rácalen neda'.

Ruzóë' tsutsu Xanru' yöl-la' na'bán quia'.

⁵ Ubi'ë quégaca nupa ta'díl-lalen neda' le usuniti léguequi.

Tu' runu' ca rnna xtídz'u, Dios, busuniti léguequi.

⁶ Idú ládxa'a gútia'-ba' böa'-bëdxi lo'.

Guía' Li': "Xclenu'" Xan, tu' naca dxi'a Lo'.

⁷ Busölá cazu' Li' neda' lu yugu' le guca quia',
ate' rilé'eda' zeaj nanítica'sö nupa ta'díl-lalen neda'.

55

¹ Ruzë nagu' le rulidza' Li', Dios,
en biti' tá'bagu' le rinábida' Li'.

² Ruzë nagu' neda', en rubí'u didza'.

Rulidza yúdxida' Li', en rō'a böniga

³ ni'a que chi'ë bönni' biti' rilé'enë' neda' dxi'a,
en tu' tu'tsá' neda' nupa tuá' dö', en tu'saca' zi' neda',
en lu yöl-la' rilé' quéguequi ta'bía no neda'.

⁴ Réqui zi' ládxi'da'ahua',

ate' yöl-la' radxi que yöl-la' guti röjtsaza ládxi'da'ahua'.

⁵ Chigula'yaza yöl-la' radxi, en yöl-la' rizxizi neda',
ate' nabaga' yöl-la' radxi ridzöbi neda'.

⁶ Gunnía': "Gaca ládxa'a gata' quia' xílaba' gu'dödo',
para gaca töda' lu bö'ös, en idxina' tu lataj ga gaca uzí' ládxa'a.

⁷ Raca ládxa'a tseja' zi'tu',

en tsöjsóa' la' guixi' ga dë lataj.

⁸ Uyija' carelō tu lataj ga tsöjsóa' tsutsu,
para cabí bi gun quia' le naca ca bö' budunu'."

⁹ Busuniti légaquië', Xan, en buxí ruá'agaquië',
tu' bilé'eda' ta'díl-lé', en tu'tsatsé' lu yödzö.

¹⁰ Rëla, en te dza ta'dödë' nöza lu yödzö.

Tu'ë dö', en tunë' le xihui' idú gásibi'ilō yödzö.

¹¹ Tu'sunítië' le nacua' ni'.

Tu'saca' zi'ë bönachi, en ta'zi' yë'ë la' nöza que yödz.

¹² Calëga bönni' biti' rilé'enë' neda' dxi'a nu rudidza' yudxi neda',
tu' huáca guá' ilena' le gunë',

en calëga bönni' rudí'inë' neda' nu ridíl-lalen neda',

tu' huáca ucachi' cuina' lahuë',

¹³ pero nacu' li', tu bönni' ca neda'.

Nacu' böchi' luzá'a, en nacu' tuz len neda'.

¹⁴ Lu yöl-la' dxi'i ladxí' queëru' gúcaru' tuz.

Ladaj bönachi zían gudarú', en bidxinru' lidxë' Dios.

¹⁵ Xana' Dios, bë' yöl-la' guti lataj idxín quégauquië' bagáchi'sö.

Ben ga tsöjtsázagaquië' nabángaquië' lataj chul-la ga nacua' nupa nátagaca,
tu' yu'u le xihui' lídxigaquië', en lu yu'u ca' gapa tu'dubë'.

¹⁶ Pero neda' ulidza'-në' Dios,
ate' usölá cazë' Xanru' neda'.

¹⁷ Chi'i dzö'ölō, en zílado', en gatsaj dza ulidza yúdxida' Lë',

en inně ládxa'a lahuë', ate' yön cazë' chi'a.

¹⁸ Huoá'uë' yöl-la' na'bán quia' lu na' nupa ta'díl-lalen neda' en uzóë' neda' lataj ga cõza' dxi'a tsáhui'do', tu' nayánda' nupa ta'díl-lalen neda'.

¹⁹ Huayõn quézinë' Dios, en ubi'ë quégaquië'.

Rõ'ë rinná bẽ'tica'së' Lë'.

Caní gunë' Dios tu' cabí tu'sané' ca tunë', en bití' tádxinë' Dios.

²⁰ Bõnni' ru'ë dö' ribía nahuë' nu ribõza dxi'a tsáhui'do', en rucá'anë' cá'asõ didza' dzaga nunë'.

²¹ Bë'ë didza' yúlado',

pero yu'u icja ládxi'da'ahuë' yöl-la' ridzá'a.

Bë'ë didza' zxíxido',

pero didza' na' bẽ'ë gulaca ca guíë tuchi'.

²² Gulú'u le nabágu'u lu nẽ'ë Xanru', ate' utipa cazë' ládxi'u.

Bití' gu'ë lataj iguinnaj tsaz nu naca tsahui'.

²³ Chú'unë' bõnni' tu'ë dö' na' lataj chul-la ga nacua' nupa nátigaca ga na' ila'nítigaquië'.

Bití' ila'cuá' gatsaj tsca ral-la' ila'cu'ë nabángaquië' bõnni' tutië' bõnachi, en bõnni' ta'zì' yë'ë.

Pero neda' uzxõni ládxa'a Li'.

56

¹ Buéchi' ladxi' neda', Dios, tu' ta'dá'baga' bõnachi neda'.

Yugu' dza nupa tu'dí'i neda' ta'bía no neda'.

² Yugu' dza nupa bití' ta'lé'e neda' dxi'a tuá' dö' quia'.

Zián nupa ta'díl-lalen neda' lu yöl-la' run ba zxon cuínguequi.

³ Cate' radxi ridzõbida', uzxõni ládxa'a Xanru'.

⁴ Ruzxõni ládxa'a-në' Dios, en rigu'a yöl-la' ba xtídzë'ë.

Ruzxõni ládxa'a-në', en bití' bi gádxida'.

¿Bizxi caz gaca ilún quia' bõnachi?

⁵ Yugu' dza tun nigui neda' nupa bití' ta'lé'e neda' dxi'a.

Ta'zá' ládxi'tica'sõ nacxi iluá' dö' quia'.

⁶ Tu'dubë' ga nagáchi'sõ, en tu'yúlanë' yúgu'të le runa', para gata' quégaquië' lataj ilútië' neda'.

⁷ Bubi'ë quégaquië', Dios, ca naca dö' tu'ë, en lu yöl-la' rilé quiu' busuniti légaquië'.

⁸ Nõz quézinu' Li' ca rõ'a bõniga.

Nurixu' Li' nisa ribõdxi quia'.

¿Naru' cabí nuzú' léguequi lu guichi quiu'?

⁹ Cate' ulidza' Li', la' dza ná'asõ ulu'huécja gúz cúdzu'lõ nupa tu'dí'i neda'.

Nõz quézida' rácalen cazu' neda', Dios.

¹⁰ Ruzxõni ládxa'a-në' Dios, en rigu'a yöl-la' ba xtídzë'ë.

Ruzxõni ládxa'a-në' Xanru', en rigu'a yöl-la' ba xtídzë'ë.

¹¹ Ruzxõni ládxa'a-në', en bití' bi gádxida'.

¿Bizxi caz gaca ilún bõnachi quia'?

12 ¡Gunna' quiu', Dios yugu' le guzxi' lu na'a!
¡Cu'a Li' yöl-la' ba!

13 Busóló' neda' lu yöl-la' guti, en nuzú' neda' tsutsu.
Ridá caza' lo' Li', Xantu' Dios, lu bení' ru'u quégaca nupa nabángaca.

57

1 ¡Buéchi' ladxi' neda', Dios!
¡Buéchi' ladxi' neda' tu' ruzxöni ládxa'a Li' gun chi'u neda'!
Guxóa no'o neda' ca runba' bóra run chí'igacaba' bórado' zxan xílaba',
ga idxinrö tödi bönadxi raca quia'.

2 Rulidza'-në' Dios nayëpisëtëre'.
Náquië' Dios Nu run ga raca dxi'a quia'.

3 Ga zoa cazë' yehua' yubá ubi'ë didza', en usölë' neda'.
Usölë' neda' lu na' nu ribía no neda'.
Lu yöl-la' dxi'i ladxi' queë', en yöl-la' idú ladxi' queë' gácalenë' neda'.

4 Naca quia' tsca zoa' ládjagacaba' bëdxi guixi'.
Yugu' bönni' zidzaj nagú'ugaquië' neda' lë'ajlö.
Nácagaca láyi'gaquië' ca yugu' yaga tuchi' que gudil-la,
ate' nácagaca lúdx'i'gaquië' ca yugu' guié tuchi'.

5 Dios quia', buluf'i lahui lúzxiba yöl-la' zxön quiu',
en yödzülió ni buluf'i lahui yöl-la' bení' quiu'.

6 Nupa tu'dí'i neda' nucáchi'gaca du yalaj le sön neda'.
Rudú ládxa'a tu' rö'a böniga.
Gula'chö'önë' yeru ga tsöjbixa' neda',
pero gula'bixë' la' légacasë' lu yeru na'.

7 ¡Chinabá'a quia', Dios!
¡Chinabá'a quia'!
¡Gul-la' quiu', en cu'a Li' yöl-la' ba!

8 ¡Bubán, bö' naca caza'!
¡Guli'bán arpa, en bihuël-la!
¡Zílado' ubana',
9 en gul-la' quiu' Li', Xan, ladaj bönachi yugu' yödzü!
¡Cu'a Li' yöl-la' ba lógaca yúgu'të bönachi!

10 Zxöntëre' naca yöl-la' ruhuéchi' ladxi' quiu', le ridxintë yehua' yubá,
ate' ridxintë yöl-la' idú ladxi' quiu' lúzxiba xitsá'.

11 Dios quia', buluf'i lahui lúzxiba yöl-la' zxön quiu',
en yödzülió ni buluf'i lahui yöl-la' bení' quiu'.

58

1 ¿Naru' ru'ili' didza' idútë li, libí'ili' na', rinná bë'ëli'?

¿Naru' ruchi'a rusöröli' ca naca le naca tsahui'?

2 ¡Biti' ca'! Rizá' ládxi'li' yugu' le xihui',
en rusaca' zí'ili' bönachi len yugu' le cabí nácate' runli'.

3 Ta'dödi tsölá'alö nupa tuá' dö' ga gudéla'të gúl'jagaca.
Ta'z'í yë' ga gudéla'të bulu'cuá'anu xiná'aguequi léguequi.

4 Yu'u ruí'iguequi le naché' yöl-la' guti ca le dxía láyi'gacaba' bëla sínia'.
 Nácagaca ca tuba' bëla sínia' nacódzuba',
 5 bëla na' bití' riyónba' chí'ë bönni' gudzá',
 o le rul-lë' bönni' runë' gudzá'.

6 ¡Dios quia! ¡Buzxuzxaj láyi'gaquië!
 ¡Guladzu' yugu' layi' tuchi' quégaquië'
 nácagaca ca layi' tuchi' quégacaba' bëdxi guixi!
 7 ¡Ben ga ila'nítië' ca raca que nisa yegu gubó'o cate' ruhuí'i!
 ¡Ben ga ila'cuádië' ca raca que guixi' rō'ō la' nōza!
 8 ¡Ben ga ila'nítië' ca yugu' böruhuinna tu'únaba' lu gubidza,
 o ca tubi' bí'ido' nuzóanu-bi' nigula zí'alō ca ral-la' gáljabi', en chinátitëbi'!

9 Zí'alō ca gaca utsë'e yusu' tu guí' zxōn,
 ugúë' Dios légaquië' lu yöl-la' ridzá'a queë',
 bönni' nabángaquië', en bönni' chizóa ilátië'.
 10 Ulu'dzeja nupa nácagaca tsahui' cate' ila'lé'e
 uzí' lëbë' Dios bönni' tu'ë dö' na'.
 Ulu'zxinë' len ná'agaquië' xichóngaca nupa na' tuá' dö'.
 11 Ila'nná bönnachi: "Le nácatë zoa le rubi'ë Dios quégaca nupa nácagaca tsahui'.
 Le nácatë zoë' Dios Nu ruchi'a rusörö quégaca nupa nacua' yödzölió."

59

1 Busölá neda', Dios, lu ná'agaca nupa ta'zóa regu' neda'.
 Buzóa neda' tsutsu ga bití' gaca ila'dxín nupa ta'díl-lalen neda'.
 2 Busölá neda' lu ná'agaca nupa tuá' dö',
 en guléaj neda' lu ná'agaca nupa tuti bönnachi.
 3 Buyútsöca', ta'bō' nísíë' neda' para ilútië' neda'.
 Ta'zóa régu'ë bönni' zidzaj neda',
 caléga tu' gudá'baga'a légaquië', o tu' ben zi'a légaquië', Xan,
 4 en caléga tu' bëtia' bönnachi, pero ta'zë'ë carelō para tíl-lalenë' neda'.
 Gudá gácalenu' neda', ate' ilé'enu' naca caní.
 5 Xantu' Dios quégaca ni'a no'o guizxi yu,
 en Dios quégaca bönnachi Israel,
 gudá dujenu' xigua' bönnachi yúgu'të yödzö.
 Bití' uzá' ládxu' tu' quégaca nupa tuá' dö' lu yöl-la' rizi' yë' quéguequi.
 6 Tu'dxinë' chí'i dzö'ölō, ta'bōdxi yechë'ë ca runba' bö'cu' ragu yéchi'ba' beo',
 ate' ta'dödë' idú gásibi'ilō yödzö.
 7 Buyútsöca', didza' tu'ë nácagaca ca le rëbigaquië'.
 Nácagaca didza' tu'ë ca yugu' guíë tuchi'.
 Ta'nnë': "¿Nuzxi caz yōni?"
 8 Ruzxidxu' ca naca le tunë', Xan.
 Rutitju' ca naca le tun bönnachi yúgu'të yödzö.
 9 Tu' nal-la cazu' Li' guna' lōza Li'.
 Nacu' Dios Nu run chí'i neda'.

10 Tu' náquië' Dios quia' dxi'i ladxi', dutságuië' neda'.
 Uxicja cazë' Dios nupa ta'díl-lalen neda'.

11 Biti' gútiu' nupa na' tuá' dö' para cabí ilal-la ladxi' bönachi ladza'.
Lu yöl-la' huáca zxön quiu' bésilasi nupa tuá' dö', en buzötaj léguequi luyú.
Naca cazu' Xantu', Nu run chi'i netu'.

12 Ben ga sön légaquié' yöl-la' run ba zxön cuíngaquié'
tu' nözi dul-la' tuné' ca tu'isé' didza',
enca' tu' tu'dxié' dö' luzá'agaquié', en ta'zí' yé'ë.

13 Lu yöl-la' rilé quiu' busuniti légaquié'.
Busuniti légaquié' tsaz para cabí ila'cuá'aré',
en para ilé'quibe'e bönachi Dios caz rinná bé'ené' xzí'ini xí'sóë' Jacob,
ga ridxinté idúté yödzölió.

14 Tu'dxiné' chi'i dzö'ölö, ta'bödxí yeché'ë ca runba' bö'cu' ragu yéchi'ba' beo',
ate' ta'dödé' idú gásibi'ilö yödzö.

15 Ta'dé' ta'guiljé' le ilahué',
ate' ta'bödxí'ë channö cabí ulu'huölaj ulu'dzé'ené'.

16 Gul-la' neda' ca naca yöl-la' huáca zxön quiu'.
Yugu' zila gul-la' lu yöl-la' rudzeja quia' ca naca yöl-la' dxi'i ladxi' quiu',
tu' naca cazu' Li' Nu run chi'i neda',
en nacu' Nu rácalen neda' cate' bi raca quia'.

17 ¡Naca cazu' Li' Nu rutipa ládxa'a!
¡Gul-la' quiu' yöl-la' ba,
tu' nacu' Li' Nu run chi'i neda', Dios, en Nu nadxí'i neda'!

60

1 Nusán no'o netu', Dios, en nuzötju' netu'.
Buécja queétu' na'a, en gúcalen netu'.

2 Ben cazu' ga gudödi budó' zxu', en guyalaj luyú.
Bun luyú ni tu' chizó'a iguínna.

3 Sizxöni busaca' zi'u bönachi quiu'.
Le guca queétu' guca tsca bugui'ju' netu' xis uva nal-la
le ben ga yöjchégu'tu' ca tu bönni' nazúdxiné'.

4 Bunödztju' quégaca nupa tadxi Li' tu lari' ulu'chisa,
le söjácálen cate' bi raca quéguequi,

5 para ulu'lágaca nupa na' nadxí'i quézinu'.
Len yöl-la' huáca zxön quiu' busólá netu', en bubí'i didza' cate' rulidztu' Li'.

6 Lu le naca lá'ayi queé' bé'ë didza' Dios, gunné':
"Uzi'a xibé, en quísia' xiyúgaca bönachi Siquem, en urixa' luyú dë cuita yegu
Sucot.

7 Nequi quia' xiyúgaca bönachi Galaad, enca' xiyúgaca xzí'ini xí'sóë' Manasés.
Naca ca tu le rusubín icja' xiyúgaca xzí'ini xí'sóë' Efraín.
Xiyúgaca xzí'ini xí'sóë' Judá naca ga rinná bé'a.

8 Xiyúgaca bönachi Moab naca ca tu ga riguibí na'a,
ate' cu'a löla' ulé'aja' xiyúgaca bönachi Edom.
Códxi'a tu' uxicja' bönachi Filistea."

9 ¿Nuzxi caz gaca iché' neda' lu yödzö zoa zö'ö idú gásibi'ilö le run chi'i yödzö
na'?

¿Nuzxi caz iché' neda' lu xiyúgaca bönachi Edom?

10 ¿Naru' cabí nusán ládXu'u netu', Dios?
 ¿Naru' cabí tséajlenu' bönni' queétu' rōjáquië' gudil-la?
 11 Gúcalen netu' cate' tíl-lalentu' nupa ridíl-lalen netu',
 tu' cabí gaca gácalen netu' nu naca bönáchisö.

12 Len yöl-la' huáca queë' Dios idéli'ru'
 tu' uxicja cazë' Lë' nupa ta díl-lalen netu'.

61

1 Ruzë nagu' le rulidza' Li', Dios.

Ruí'i ládXu'u le rinábida' Li'.

2 Ga ni zoa' zi'tu' ga dë ladza' rulidza' Li' tu' rudú ládxa'a.
 Guchë' neda' ga zoa Nu na' naca ca tu guiöjto'o, Nu na' nál-latëro ca neda'.

3 Nacu' Li' Nu run chí'i neda'.

Nacu' Nu rácalen neda' cate' zoa nu ribía no neda'.

4 Bë' lataj sóatica'sa' ga zoa cazu' Li'.

Bë' lataj sóalena' Li', guna' neda' ca tunba' bórado' ta'yázaba' zXan xílaba'
 yójede.

5 Biyön quézinu' Li' le guzxí' lu na'a guna' quiu' Li', Dios.

Benu' ga nequi quia' le runödZju' quégaca nupa tadxi Li'.

6 Gunu' ga soë' xidzé bönni' na' rinná bë'ë uláz quiu'.

Zián iz soë' ibanë'.

7 Sóatica'së' lo' Li', Dios.

Bë' queë' yöl-la' dxi'i ladxí', en le naca idútë li, yugu' le ilún chí'i lë'.

8 ¿Gúl-latica'sa' yöl-la' ba que Lo',
 para gaca guna' tu tu dza le guzxí' lu na'a!

62

1 ¿Tuzë' Dios ruzxöni ládxa'a, en rizë ládxa'a Lë'!

¿Lë' cazë' rusölë' neda'!

2 ¿Tuzë' Lë' rapa chí'ë neda', en rusölë' neda'!

¿Ruzóë' neda' tsutsu, ate' bití' gaca nu uzötaj neda'!

3 ¿Gáca'xte caz güí'i ládxi'li' ucúl-lali' neda'?

Rë'ënisili' uzötjali' neda' ca tu zö'ö chizóa iguínnaJ,
 o ca tu lë'aj yaga le chinatëbi.

4 Rë'ënisili' uzötjali' neda' ga ni tunë' neda' bal.

Ruzí'ili' xibé yugu' didza' bití' nácatë.

Ruí'ili' dxi'a didza' láchui'sö,
 pero lu icja ládxi'do'oli' rudidza' yúdxili' neda'.

5 ¿Tuzë' Dios ruzxöni ládxa'a,
 en runa' löza Lë'!

6 ¿Tuzë' Lë' rapa chí'ë neda', en rusölë' neda'!

¿Ruzóë' neda' tsutsu, ate' bití' gaca nu uzötaj neda'!

7 ¿Tuzë' Dios rusölë' neda', en runë' ga naca' bica' ba!

¿Dios nuzóë' neda' tsutsu, en rapa chí'ë neda'!

8 Libí'ili', bönachi, buli'zxöni ládXë'ë Dios yúgu'të dza.
 Bulí'siyönnë' yugu' le raca queëli', tu' run chí'i cazë' rë'u.

⁹ Le nácátë nácagaca yúgutë bönachi ca tu bö' ridödisö,
en biti' bi nazáca'gaca nupa na' nadéli'gaca lataj lo.
Tu lu xzigóns biti' bi nál-lí'guequiné'.

Nácagacarë' dzá'asö ca tu bö' riguéla'siru'.

¹⁰ Biti' uzxöni ládxi'li' bi idéli'li' len yöl-la' nál-la' queézili'.

Biti' uzí'ili' xibé le cuanli'.

Channö gata' queéli' yöl-la' tsahui', biti' güf'i ládxi'li' le.

¹¹ Tu luzuisö bē'ē didza' Dios.

Chopa luzuí biyönda' ca naca lē ni rnna:

“Nápatērē' Dios yöl-la' huáca,

¹² ate' zóatica'sö yöl-la' dxi'i ladxi' queē'.”

Ubí' i cazu', Xan, quégaca bönachi tsca naca le núngaca.

63

¹ Dios, nacu' Dios quia', ate' idú ládxa'a ruguilja' Li'.

Ribidxi ládxa'a Li', ate' idútë le naca' rizë ladxi' Li'.

Zoa' tu luyú bidxi ga ni rudú ládxa'a, ate' biti' bi dē nisa.

² Ben ga ilé'eda' Li' lu lataj ga na' zoa cazu',
para ilé'eda' yöl-la' huáca quiu', en yöl-la' bení' quiu'.

³ Tu' nácátërö dxi'a yöl-la' dxi'i ladxi' quiu' ca yöl-la' na'bán caz.
Que lē ni na' cu'a Li' yöl-la' ba.

⁴ Guía' Li': “Xclenu” tsanni ni zoa' nabana'.

Uchisa' na'a, en ulidza' Lo'.

⁵ Ruhuölej rudzé'e icja ládxi'da'ahua' le nácátërö dxi'a,
ate' lu yöl-la' rudzeja quia' rigu'a Li' yöl-la' ba.

⁶ Rójneda' Li' cate' déa' lu le ráti'da'.

⁷ Rizá' ládxa'a ca nacu' cate' rina'sa' yēla.

Rácalen cazu' neda',

en tu' run chí'u neda', lu yöl-la' rudzeja quia' rul-la' quiu'.

⁸ Nazön cazu' Li' bö' naca caza'.

Rizön cazu' Li' neda',

⁹ pero ila'yaza lataj chul-la

nupa tē'ēni iluti neda'.

¹⁰ Ilátigaca lu guié tuchi'.

Ilágugaca bö'cu' zuga' léguequi.

¹¹ Nu rinná bē' uláz queē' Xanru' udzeja ladxi' lahuē' Dios.

Ulu'z'í' xibé yúgu'të nupa tu'zxöni ladxi' Lē',

tu' usayaj cazē' Lē' ru'ígaca nupa ta'z'í' yē'.

64

¹ Dios, buzë nagu' chí'a le rinabi yúdxida' Li',
para gun chí'u yöl-la' na'bán quia' tu' rádxida' bi gun nu ridíl-lalen neda'.

² Bucachí' neda' para cabí bi ilún quia' bagáchi'sö nupa tuá' dö',
en para cabí ila'bía di'ē neda' bönni' tutiē' bönachi.

³ Nácagaca lúdxigaquiē' ca yugu' guié tuchi',

ate' nácagaca didza' z'í' tu'ē ca yugu' yaga lahui tuchi'.

⁴ Bagáchi'sö tu'zē yugu' yaga lahui tuchi' na'

para ilunē' huē' nupa biti' bi nabága'gaca.

Tsárido'os tu'zē léguequi, en biti' bi tádxiné'.

- 5 Biti' ca' tu'cá'anē' le naca dō' tē'ēnē' ilunē'.
 Tu'ē didza' ca gaca ulu'cá'hē'ē yugu' du yalaj quégaquiē', ta'nnē':
 “¿Nuzxi caz gaca il'e yugu' du na'?”
- 6 Tunē' didza' ca naca le naca dō' ilunē', ta'nnē': “Chinabá'a le gunru'.”
 Tu'cáchi'gaquiē' le ta'zá' láchē'ē, en le ta'bequi icjē'.
- 7 Uzal-lē' Dios tu yaga lahui tuchi' le ideli' légaquiē'.
 Tsárido'os gunē' légaquiē' huē'.
- 8 La' didza' tu'isē' ilún ga tseajchégu'gaquiē'.
 Lu yöl-la' rubani quéguequi ulu'tá' ícjaguequi nupa ila'lé'e légaquiē'.
- 9 Ní'irō yúgu'tē bōnachi iladxi Dios,
 en ulu'siyōn luzē'eguequi ca naca le nunē' Dios,
 en ila'zá' láchxi'gaca ca naca lē na' nunē'.
- 10 Nu bōnni' tsahui' uzi'ē xibē' Xanru', en gunē' löza Lē'.
 Yúgu'tē nupa nácgaca idú ladxí' ulu'z'í' xibē'.

65

- 1 Dios, nupa nacua' yōdzō Sión ila'gú'u Li' yöl-la' ba,
 en ilunna quiu' le gula'z'í' lu nē'eguequi,
 2 tu' riyōn quézinu' Li' cate' tu'lidza Li',
 ate' yúgu'tē bōnachi ila'dxín lo'.
- 3 Tun nígui neda' dul-la' nuna,
 pero runiti lo cazu' netu' ca naca le ridá'baga'tu' Li'.
 4 Bica' ba nupa nabō cazu' quiu', en nulidzu' quiu',
 para ila'cuá' yugu' lataj lá'ayi quiu'.
 Huōlaj udzē'etu' le nácgaca dxi'a yú'ugaca lidxu',
 enca' le yú'ugaca yudo' lá'ayi quiu'.
- 5 Tu' nacu' tsahui' rubi'u didza', en runu' yugu' le zxōn le tácalen netu'.
 Naca cazu' Dios Nu rusólá netu'.
 Nupa nacua' idútē yōdzōlió ulu'zxōni ladxí' Li',
 enca' nupa nacua' z'í'tu' ia'tsólá'alō nísado'.
- 6 Len yöl-la' huáca quiu' nucú'u yugu' guí'a zxōn,
 le naca bē'gaca nál-latērō cazu' Li'.
- 7 Ruzóa dxíu' le riyasa ridxía lu nísado', en le ru'u bō que.
 Ruzóa dxíu' bōnachi cate' tu'tsatsa.
- 8 Bōnachi idútē yōdzōlió tadxi Li' ní'a quégaca le zxōn nunu'.
 Le run cazu' Li' tun ga tu'dzeja bōnachi idapa la'a yōdzōlió.
- 9 Ruí'i láchxu'u luyú, en risól-lu'u nisa guiōj.
 Runu' ga ruhuóaca yu ya'a.
 Nucú'u luyú na' yugu' yegu yúdzugaca nisa zila,
 le run ga dética'sō xzoa'-za, tu' caní raza láchxu'u Li'.
- 10 Risól-lu'u nisa guiōj gapa dégaca na, en rusubisu' gapa chinadúz.
 Ruúnu' yúludo' luyú zidzaj, en runu' ga ta'gula guixi' cuando'.
- 11 Runu' ga rulá' yōdx yana' le nadúz luyú ni tu iz tu iz,
 en ga zóatica'sō le ilē'aj ilágugaca bōnachi.
- 12 Nacuá'aba' bōa'-bēdxi la' guixi',
 ate' tu'dzeja bōnachi yugu' lu guí'ado'.
- 13 Gapa naca lachi' nacua'aba' bō'cu' zxila',
 ate' dxiada' xzoa' xtila la' yēla.

Lu yöl-la' rudzeja queguequi ta'bödxí'a,
en tul-la bönachi quiu'.

66

¹ ¡Guli'gúí' zidzaj didza' lahué' Dios
lu yöl-la' rudzeja queéli' yúgu'téli' zóali' yödzölió!

² ¡Guli'gul-la ca naca yöl-la' ba que Lè'
¡Guli'cu'è yöl-la' ba!

³ Guli'guié' Dios: "¡Zxöntèrö nácagaca le nunu'
tu' naca zxöntèrö yöl-la' huáca quiu'!"
Nupa bití' ta'lé'e Lí' dxi'a ulu'lu'i cuini
ca nupa tun ca rnna xtídz'u.

⁴ Yúgu'tè nupa nacuá' yödzölió ilún Lí' zxön,
en ilúl-la yöl-la' ba quiu'.
Ilúl-la yöl-la' ba que Lo'.

⁵ Guli'dá ilé'eli' yugu' le nuné' Dios.
Nayépisètèrè' Dios lu le runé' quegaca bönachi.

⁶ Bené' ga böáca ca luyú bidxi ga dè nísado'.
Gula'dödè' gatsaj láhui'lö yegu, ta'zé'esó ní'agaquié'.
Ní' udzèjade'eru' ca náquié' Lè'.

⁷ Len yöl-la' unná bè' queé' rinná bè'tica'sè'.
Ruyútica'sè' bönachi yúgu'tè yödzö.
Bití' ral-la' ilún ba zxön cuínguequi nupa ta'dá'baga' xtídzè'è.

⁸ ¡Guli'gún zxönè' Dios queétu', libí'ili' bönachi yúgu'tè yödzö,
en guli'cu'è yöl-la' ba gátí'tès!

⁹ ¡Run cazè' Lè' ga zóaru' nabanru',
en bití' ru'è lataj cuila ní'atu'!

¹⁰ Guzxí' bè' cazu' netu', Dios.
Buchí'u netu' ca run nu ruchí'a guié plata lu guí'.

¹¹ Bè'u lataj bidzuntu' lu du yalaj.
Busubágu'u netu' tu yua' zì'i.

¹² Benu' ga gula'libè' icjtu' bönni' dxíagaquié'-ba' böa'.
Gudödítu' lu guí', en lu nisa,
pero guchè' cazu' netu' tu lataj ga bölaj budzé'etu'.

¹³ Tsu'a lidxu', en cu'a-ba' lo' böa'do' uzégui'a-ba' lo'.
Guna' lo' Lí' le guzxí' lu na'a guna',

¹⁴ lé na' bè'a didza' que,
le gunní'a cate' ní' riguí'i rizáca'a.

¹⁵ Cu'a-ba' lo' Lí' böa'-bèdxí renni' uzégui'a-ba' lo',
tsözxön len dzön quegacaba' chivo biguíú'.
Gútia'-ba' lo' yugu' bèdxí, en yugu' chivo biguíú'.

¹⁶ Guli'dá uzè nágali', yúgu'téli' rádxili'-nè' Dios,
ate' usiyönda' libí'ili' yugu' le bené' le gulácalen neda'.

¹⁷ Len ruá' cuinsa' bulídza' Lè',
en bena' Lè' zxön len lúdx'a'a.

¹⁸ Channö rucácha'a le naca dö' lu lúdxí'da'ahua',

biti' yönnë' Xanru' Dios didza' gu'a,
 19 pero le nácatë biyönnë' Dios didza' bë'a.
 Buzé naguë' cate' bulidza' Lë'.

20 ¡Yöl-la' ba Dios!
 ¡Biti' gudá'baguë'ë neda' cate' bulidza'-në',
 en biti' bugüë' yöl-la' nadxí' queë' neda'!

67

1 Xantu' Dios, buzá' ladxi' queëtu', en ben ga gaca dxi'a queëtu'.
 Lu yöl-la' dxi'i ladxi' quiu' buyú netu',
 2 para gaca bë' le rë'ënu' guntu' yödzölió ni,
 en para ila'nözi bönachi yúgu'të yödzö ca naca yöl-la' rusólá quiu'.

3 Ral-la' ila'gú'u bönachi Li' yöl-la' ba, Dios.
 Yúgu'të bönachi ral-la' ila'gú'u Li' yöl-la' ba.

4 Ral-la' ulu'dzeja bönachi yúgu'të yödzö,
 en ilúl-la lu yöl-la' rudzeja quéguequi.
 Tu' uchi'a usöröu' bönachi ca naca le naca tsahui',
 5 ral-la' ila'gú'u Li' yöl-la' ba bönachi, Dios.
 Yúgu'të bönachi ral-la' ila'gú'u Li' yöl-la' ba.

6 Yödxí yana' runödzej luyú ni.
 Dios queëru' runë' ga raca dxi'a queëru'.
 7 Runë' Dios ga raca dxi'a queëru',
 para iladxi Lë' yúgu'të nupa nacua' yödzölió.

68

1 Raca ládxi'ru' chasë' Dios, en usulásië' nupa ta'díl-lalen Lë',
 en gunë' ga ulu'zxunnaj nupa biti' ta'lé'e Lë' dxi'a.
 2 Ca rulaga tu bö' recja dzön, ca' bulaga léguequi.

Ca na' ruúna' lu guí' quíxí'ba' buz,
 ca' ila'niti nupa tuá' dö' lahuë' Dios.
 3 Ulu'dzeja nupa nácgaca tsahui', en ulu'zí' xibë' Dios.
 Lu yöl-la' rudzeja quéguequi ulu'zí' xibë'.

4 ¡Guli'gul-la queë' Dios!
 ¡Guli'gul-la yöl-la' ba que Lë'!
 Buli'pá'a nöza ga tödë' gapa dë' lataj.
 ¡Nazí' i lë' Xanru'!
 ¡Buli'dzeja lahuë' Lë'!

5 Náquië' ca xúzgacabi' bi'i uzëbido',
 enca' Nu ruchi'a rusörö quégacanu nigula uzëbi.
 Caní náquië' Dios ga na' zoë' lataj lá'ayi queë'.
 6 Rucu'ë Dios nupa nagá'anagaca bayechi' tu yu'u.
 Rubéajë' nupa nadzúngaca, en runë' ga raca dxi'a quéguequi,
 pero ulu'gá'ana tu luyú bidxi nupa ta'dá'baga' Lë'.

7 Yöjnöru casu' lógaca bönachi quiu', Dios,

cate' guchë'u léguequi la' guixi' ga na' dë lataj.

⁸ Gudödi budó' zxu' dza ni'.

Lësca' gula guiöjsiu' lahuë' Dios.

Guzxizi guí'a Sinaí lahuë' Dios quégaca bönachi Israel.

⁹ Benu' ga gulaj guiöjsiu', Dios.

Benu' ga böaca ya'a xiyú' ga ni' guca yu bidxi.

¹⁰ Yöjcuá' nupa néquiguequi quiu' luyú na'.

Lu yöl-la' dxi'i ladxi' quiu', Dios,

bucözu' le gácalen nupa nácgaca yechi' luyú na'.

¹¹ Bë' cazë' didza' Xanru' Dios.

Ta'guísinu nigula zían didza' dxi'a queë', ta'nnanu:

¹² "¡Ta'zxúnnajë'! ¡Ta'zxúnnajë' bönni' ta'nná bëë,

enca' bönni' röjáquië' gudil-la guixi yu quégaquië'!"

Nígula gula'bózanu lídxigacanu bulu'z'ínu xibë le gutá' quégaquië'.

¹³ Sal-la' bucachi' loli' gapa tun chí'ili' bö'cu' zxila',

gáculi' le naca lachi ca nácgacaba' gu'dödo' néquiguequiniba' guié plata,

en xitúbigacaba' néquiguequini guié oro.

¹⁴ Cate' bésilásië' Dios bönni' na' gula'nná bëë lu guí'a Salmón,

benë' ga gula guiöj bögui' lu guí'a na'.

¹⁵ Nequi queë' Dios guí'a Basán.

Naca guí'a Basán na' tu guí'a zxön.

¹⁶ ¿Bizx que ruzxé'eli', yugu' guí'a zxön?

¿Bizx que ruzxé'eli' guí'a na' guzë ládxë'ë Dios tsöjsóë' ga na'?

Le nácatë tsaz soë' Dios ni'.

¹⁷ Gayuá', en gayuá' nácgaca carreta que gudil-la queë' Dios.

Rizë'ë Xanru' lu guí'a Sinaí ga na' tseajtsazië' lataj lá'ayi queë'.

¹⁸ Buëpu' yehua' yubá richë'u bönachi zían gula'dzúngaca.

Nu'u yugu' le bulu'nödzej bönachi quiu',

en le gulunna quiu' nupa ta'dá'baga' Li',

para tsöjsóë' Dios ni' tsaz.

¹⁹ ¡Yöl-la' ba Dios, Nu ruá' sua'ru' tu dza tu dza!

¡Náquië' Dios Nu rusölá rë'u!

²⁰ ¡Dios queëru' rusölë' rë'u!

¡Rusölë' Xanru' Dios rë'u lu yöl-la' guti!

²¹ Le nácatë Dios udxíë' huë' ícgagaca nupa ta'dá'baga' Lë'.

Udxíë' huë' icjë' bönni' biti' gusanë' ca naca dö' ru'ë.

²² Ru'ë didza' Xanru', rnnë': "Ubéaja' léguequi lu guí'a Basán,

en ubéaja' léguequi lu nísado',

²³ ate' ulíbili' léguequi ga idxintë irúaj rön quéguequi,

ate' ilë'ajba' zxiculi' xichöngaca nupa ta'dil-lalen líb'ili'."

²⁴ Ta'l'é yúgu'të bönachi nupa ta'dalen Li', Dios.

Lu yöl-la' run Li' zxön ta'dá lu lataj lá'ayi quiu', Dios quia', Nu rinná be'e neda'.

²⁵ Nupa tul-la, en nupa ta'guínnaj lé'egaca bihuël-la, ta'dá ni',

ate' bi'i nigula ra'bando' tunbi' léguequi tsözxön, ta'gápabi' lé'egaca guídido'.

26 Buli'lidzè' Dios dxi'a tsáhui'do' gapa na' rudúbili' queë',
tu' náquiè' Xanru', libí'ili' zxi'ini xisóè' Israel.

27 Nacu'è zxi'ini xisóè' Benjamín ga na', bönni' gúcarè' cuidi', ate' ta'nná bē'è.
Bönni' lo quégaquiè' zxi'ini xisóè' Judá nútsa'gaquiè' ladjagaquiè',
enca' ladjagaquiè' bönni' lo quégaquiè' zxi'ini xisóè' Zabulón, en Neftalí.

28 Bulufi' lahui yöl-la' huáca quiu', Dios.
Bulufi' lahui yöl-la' huáca quiu', Dios, tu' chibenu' zían le gulácalen netu'.

29 Tu' dē yudo' quiu' lu yödzö Jerusalén,
bönni' ta'nná bē'è ila'ché'è ni' le ilunnè' quiu'.

30 Buzé le bach bönachi yödzö na' nácagaca ca böa' guixi',
enca' bönachi yugu' yödzö nácagaca ca yugu' bēdxi tsözxön len zxi'iniguequi.
Tu'libi bönachi yechi' tu' ta'zè lādxigaca dumí.
Bēsílási nupa na' ta'yaza ladxi' rōjaca gudil-la.

31 Bönni' gubáz quégaca bönachi Egipto ila'dxinè' lo'.
Bönni' Etiopía ila'chisa ná'agaquiè' lo', Dios.

32 ¡Guli'gul-la queë' Dios, bönachi yúgu'tè yödzö!
¡Guli'gul-la yöl-la' ba queë' Xanru'!

33 Rō'è yehua' yubá xitsá'tērō, le zoa caz dza ni'te.
Buli'yútsóca', ru'è zidzaj didza', en naca chí'è ca guziú' rinnè.

34 ¡Guli'gún zxönè' Dios!
Yöl-la' nayépisè queë' rusubaga' bönachi Israel.
Yöl-la' huáca zxön queë' nalá' lúzxiba xitsá'.

35 Rubániru' ca nacu' Li', Dios, lu lataj lá'ayi quiu'.
Runnu' quégaca bönachi quiu' yöl-la' nal-la, en yöl-la' huáca.

Náquiè' Dios quégaca bönachi Israel.
¡Yöl-la' ba Lē' Xanru' Dios!

69

1 Busölá neda', Xana' Dios,
tu' raca quia' tsca nabága'a nisa ga ridxintè ruchicja' nisa.

2 Raca quia' tsca ruhuötja' ga rē' lu guna', en biti' zoa ga gaca uliba'.
Zoa' ca tu lu nisa zila, en chizóa uchicja' nisa.

3 Rudú lādxa'a tu' rulidza' nu gácalen neda', ate' da' lubá'a.
Chirichul-la guiōj lahua' tu' ruyúa' ga guídu' dusöló' neda'.

4 Nayántērō ca guitsa' icja' nupa biti' ta'lé'e neda' dxi'a,
en biti' bi nuna' quéguequi.
Nál-lagaca nupa ta'díl-lalen neda', en té'eni iluti neda',
en biti' bi nuna' quéguequi.
Tunè' bayúdx ubi'a dumí le cabí gulana'.

5 Nöz quézinu' Li', Dios, yöl-la' canōz quia',
en biti' nagachi' lo' Li' dul-la' nuna'.

6 Biti' gu'u lataj nupa tu'zxöni ladxi' Li' ulu'tu'i ni'a quia' neda',
Xana' Dios nayépisétèru'.

Biti' gu'u lataj nupa tun Li' zxön ila'gá'ana cá'asö ni'a quia',
Dios quégaca bönachi Israel.

7 Tu' nadxi'ida' Li' tu'lidza ditjê' neda',
en que lê ni na' rutuf'ida'.

8 Naca' ca tu bönni' zi'tu' lógacabi' bi'i böcha'a,
en ca tu bönni' zi'tu' lógaquiê' di'a dza quia'.

9 Tu' rui'i ládxa'a yudo' quiu' régui rilá ládxi'da'ahua'.
Naca ca tu'lidza ditaj neda' nupa tu'lidza ditaj Li'.

10 Ruzötaj cuina', en runa' gubasa,
en que lê ni na' tu'didza' yudxi neda'.

11 Rácuca' lari' cá'asö ca run nu ribödxu yechi',
ate' tu'titaj neda'.

12 Ta'nnê' quia' yugu' la' nöza,
ate' nupa nazúdxigaca tul-la ca naca quia',

13 pero neda' ulidza' Li', Xan.

Bubí'i didza', Dios, cate' idxín dza raza ládxi'u Li'
tu' nadxi'ide'enu' neda',
en tu' guzxi' lu no'o usöló' neda'.

14 Guléaj neda' para cabí huötja' lu le naca ca guna'.

Ben ga ulá' lu ná'agaca nupa ta'díl-lalen neda',
en lu le naca ca nisa zila le chizóa ibaga' neda'.

15 Biti' gu'u lataj ibaga' neda' lê na'.

Biti' gu'u lataj uchicja' lu le naca ca nísado',
enca' cabí huötja' tu lu yeru ba.

16 Bubí'i didza', Xan, tu' nacu' dxi'i ladxi',
en tu' ruhuéchi' ládxi'u neda', gudá quia'.

17 Biti' ucachi' cuinu' lahua' neda', huen dxin quiu'.

¡Rö'a böniga! ¡Gudáchi gúcalen neda'!

18 ¡Gudá ga zoa' dusöló' neda'!

¡Ben ga ulá' lu ná'agaca nupa ta'díl-lalen neda'!

19 Nöz quézinu' Li' ca tu'didza' yudxi neda',

en ca tu'lidza ditaj neda', en tu'cá'ana neda' cá'asö.

Rilé'e quézinu' yúgu'tê nupa biti' ta'lé'e neda' dxi'a.

20 Rudú ládxa'a tu' tu'didza' yudxi neda', en biti' bi gaca guna'.

Gulöza' nu huéchi' ladxi' neda', pero cuntú nu guzóa.

Gú'unida' nu hué tsahui' neda', pero cuntú nu bidzöli.

21 Cate' guduna' bulu'gahué' neda' tu le silá',
en cate' gubidxa' nisa, bulu'gui'jê' neda' nupe zi.

22 Ben ga huóaca laní quégaquiê' ca tu le sön légaquiê',
en ben ga huóaca le tu'zi'ê xibé ca tu le gun ga ila'chixi ila'níguinë'.

23 Ben ga ichul-la guiöj lógaquiê' para cabirö ila'lé'enê'.

Ben ga ila'zécutica'sö cúdzu'gaquiê' zcan yua' nuá'gaquiê'.

24 Busubaga' légaquiê' lu yöl-la' rilé quiu',
en bê' quégaquiê' yöl-la' ridzá'a quiu'.

25 Ben ga cuntú nu soa ládzagaquiê',
en ga bití'rö nu soa lu yu'u lídxigaquiê'.

26 Ta'zóa régu'ë nupa na' benu' léguequi xigua'.
 Tu'siyönnë' ca ta'guí'i ta'zaca' nupa na' nunu' léguequi huë'.
 27 Buzúaj lu guichi yugu' dul-la' tunë',
 en biti' gu'u légaquië' lataj ila'déli'në' yöl-la' rusólá quiu'.
 28 Busulu lágaquië' nazúajgaca lu guichi quégaca nupa nabángaca.
 Biti' gu'u légaquië' lataj ila'bábalenë' nupa nácgaca tsahui'.
 29 Neda' riguí'i rizáca'a, en rudú ládxa'a.
 Guchisa neda', Dios, en busólá neda'.

30 ¡Cu'a-në' yöl-la' ba Dios len tu le gul-la'!
 ¡Guna' Lë' zxon, en guía'-në': "Xclenu"!

31 Chaza ládxë'ë Xanru' Dios lë ni
 ca raza ládxë'ë-ba' böa'-bëdxi rútia'-ba' lahuë',
 o ca raza ládxë'ë-ba' tuba' bëdxi zxon chinagúlaba'.

32 Nupa ta'guí'i ta'zaca' ila'lé'eni lë ni, en ulu'dzeja.
 Ila'dipa ládxi'gaca nupa tu'guilaj Dios.

33 Ruzë naguë' Xanru' Dios nupa ta'yadzaj ta'yudxi,
 en biti' ral-la ládxë'ë bönachi queë' nadzúngaca.

34 ¡Guli'cu'ë yöl-la' ba Dios, libí'ili' yehua' yubá, en luyú ni,
 enca' nísado', en yúgu'të le nacué' tu tu lataj na'!

35 Usólá cazë' Dios bönachi Sión,
 en uchisë' yugu' yödzo quégaca zxi'ini xi'sóë' Judá.
 Ila'cuá' bönachi queë' ga na', ate' guequi quéguequi luyú na'.

36 Zxi'ini xi'sóagaquië' huen xichinë' ila'z'ibi' luyú na',
 ate' ila'cuá'tica'sö ni' nupa nadxf'igaca Lë'.

70

1 ¡Busólá neda', Dios!

¡Gudáchi gácalenu' neda', Xan!

2 Ben ga ulu'tuí'i, en ila'bör' böniga nupa na' té'eni iluti neda'.

Ben ga ulu'huécja, en ulu'gá'ana cá'asö nupa na' té'eni gaca bi gaca quia'.

3 Ben ga ulu'huécja lu yöl-la' rutuí'i quéguequi

nupa na' tu'titaj neda', ta'nná: "Ja, ja."

4 Ben ga ulu'dzeja, en ulu'z'í' xibó' yúgu'të nupa tu'guilaj Li'.

Ben ga ilu'itica'sö didza' nupa ta'dxf'i yöl-la' rusólá quiu', ila'nná:

"¡Zxöntëro náquië' Dios!"

5 Neda' nacuí'da', en biti' bi gaca guna'.

¡Gudáchi gácalenu' neda', Dios!

Nacu' Nu rácalen neda', en Nu rusólá neda'.

¡Biti' ca' tsenu' guídu' quia', Xan!

71

1 Nuzóa cazu' neda' dxi'a tsáhui'do' ga na' zu', Xan.

¡Biti' gu'u lataj utuí'ida'!

2 ¡Tu' nacu' tsahui' gúcalen neda', en busólá neda'!

¡Buzë nagu' neda', en busólá neda'!

3 Nacu' le uzóa neda' tsutsu,

en le gun chi'i neda' ga gaca ucachi' cuina'.
Chigunná bé'enu' nu usólá neda' tu' nacu' Nu ruzóa neda' tsutsu,
en Nu run chi'i neda'.

⁴ Dios quia', busólá neda' lu na' nu ruá' dō',
en lu na' nu ridá'baga' Li', en run dzatsa.

⁵ Tuzu' Li' runa' löza, Xan.
Ruzxöni ládxa'a Li' ga gudéla'të naca' bí'ido'.

⁶ Ruzxöni ládxa'a Li' ga gudéla'të gulja',
tu' guzóalen cazu' neda' cate' ni' buzóanu xiná'a neda'.

¡Cú'utica'sa' Li' yöl-la' ba!

⁷ Zián nupa tu'bani ca naca quia',
tu' run chi'i cazu' Li' neda'.

⁸ ¡Rigú'utica'sa' Li' yöl-la' ba,
en tu dza tu dza rulu'a lahui yöl-la' ba quiu'!

⁹ ¡Biti' usán no'o neda' na'a, ni naca' bönni' gula!

¡Biti' ucá'anu' neda' na'a cate' ni rudú ládxa'a!

¹⁰ Tuí' didza' nupa biti' ta'lé'e neda' dxi'a ca gaca bi ilún quia',
ate' tun tuz xtídza'gaca nupa té'ëni iluti neda'.

¹¹ Ta'nná: "¡Nusán në'ë Dios lë'!
¡Gulí'dá sönru'-në' tu' cuntu nu zoa gácalen lë'!"

¹² ¡Dios, biti' su' zi'tu' ga ni zoa!

¡Dios quia', gudáchi gácalenu' neda'!

¹³ Ben ga ulu'tuí'i, en ila'niti nupa té'ëni iluti neda'.

Ben ga ulu'tuí'inë', en ila'bö'ë böniga bönni' té'ënë' ilu'ë dō' quia'.

¹⁴ ¡Neda' gúntica'sa' löza Li',
en cú'utica'sa' Li' yöl-la' ba!

¹⁵ Idú dza usiyönda' bönachi nacu' tsahui',
en rusóló' yúgu'të bönachi.

Biti' nözda' bal-laxi luzuí busóló' neda'.

¹⁶ ¡Gu'a didza' ca nácagaca le zxön benu' Li', Xana' Dios!
¡Usiyönda' bönachi tuzu' Li' nacu' tsahui'!

¹⁷ Dios, rusédinu' neda' ga gudéla'të ni' naca' bí'ido',
ate' ga ridxintë na'a dza ruá'a didza' ca nácagaca le zxön nunu'.

¹⁸ Na'a naca' bönni' gula, en chinagucha'.

¡Biti' usán no'o neda', Dios!

Benna neda' lataj usiyönda' yugu' xzí'ini xsoa' ca naca yöl-la' huáca quiu',
ate' quíxjöi'ida' nupa ilalaj ca naca yöl-la' nál-la quiu'.

¹⁹ ¡Le tsahui' nacu', Dios, ridxintë lúzxibal!

¡Nunu' Li' yugu' le zxöntërö!

¡Cúnturö nu zoa nu naca ca nacu' Li', Dios!

²⁰ Gusöl-la' cazu' quia' yugu' le guca quia' le gulún neda' zi',
pero ruúnu' neda' tsutsu,
en le yúbölö uchisu' neda' para cabí gátia'.

²¹ Gunu' ga tsépisea',
en hué tsahú'u neda' le yúbölö.

22 ¡Le nácaté cu'a Li' yöl-la' ba, en gul-la' tu bihuël-la, Dios!
 ¡Gul-la' ca runu' ca rno', en nacu' Nu naca lá'ayi lógaca bönachi Israel!
 23 ¡Lu yöl-la' rudzeja quia' cõdxi'a cate' gul-la' quiu',
 en idú lãdxa'a gul-la' tu' busöló' neda!
 24 ¡Idú dza gu'a didza' ca nacu' tsahui'!
 ¡Tu'tuí'i, en ta'bõ' baguí'i nupa gul'ëni iluá' dö' quia'!

72

1 Dios, buzéajni'iné' bõnni' rinná bẽ'ë para gaca uchi'a usörõë' ca ruchi'a rusörõu' Li'.
 Ben ga ilácagacabi' tsahui' xzí'iné' ca nacu' Li' tsahui'.
 2 Bẽ'ë lataj uchi'a usörõë' quégaca bönachi quiu' ca naca le naca tsahui', enca' quégaca bönachi quiu' ta'guí'i ta'zaca'.
 3 Ben ga ila'cuá' dxi'a tsáhui'do' bönachi quiu' yugu' lu guí'a, en ilácagaca tsahui' yugu' lu guí'ado'.
 4 Bẽ'ë lataj ubéajë' tsahui' nupa ta'guí'i ta'zaca' ladaj bönachi quiu', en usölë' yugu' xzí'inigaca nupa ta'yadzaj ta'yudxi, en ucul-lë' nu ribía no léguequi.
 5 Ben ga iladxi bönachi quiu' Li' tsanni ni' soa gubidza, enca' tsanni ni' soa beo' ga idxintë dza udxí.
 6 Ben ga gáquië' bõnni' rinná bẽ'ë ca nisa guiõj ribixi lu guíxi'do', en ca yugu' guiõj gúpa'do' tu'subisa luyú.
 7 Ben ga gaca dxi'a quégaca nupa nácgaca dxi'a yugu' dza inná bẽ'ë lë', en ila'cuá' dxi'a tsáhui'do' ga idxintë bití'rõ soa beo'.
 8 Ben ga inná bẽ'ë idapa la'a yõdzliõ, ga naguela' ra' yegu Eufrates ga idxintë idütë luyú.
 9 Ben ga ulu'zechu xzíbigaca lahuë' lë' nupa nacuá' luyú bidxi, en iladxi lë' nupa ta'díl-lalen lë'.
 10 Ben ga ila'dxinë' lahuë' bõnni' ta'nná bẽ'ë luyú Tarsis en yugu' lu yõdzõ, nuá'gaquië' yugu' le ulu'nõdzjë' queë'.
 Bõnni' ta'nná bẽ'ë luyú Sabá, en luyú Seba ilá'dxinë' bi ulu'nõdzjë' queë'.
 11 Ben ga ulu'zechu xzíbigaquië' lahuë' yúgu'të bõnni' ta'nná bẽ'ë, en ilúngaca xichinë' bönachi yúgu'të yõdzõ.
 12 Usölë' nu riyadzaj riyudxi cate' ulidza lë', enca' nu riguí'i rizaca', en nu bití' zoa nu gácalen nu na'.
 13 Huéchi' lãdxë'ë nupa nácgaca yechi', en nupa ta'yadzaj ta'yudxi, en gun chi'ë yöl-la' na'bán quégaca nupa nácgaca yechi'.
 14 Usölë' léguequi lu ná'agaca nupa tun léguequi zí', en lu ná'agaca nupa tuá' dö', en gúfi' lãdxë'ë léguequi cate' nu guë'ëni guti léguequi.
 15 Soë' ibanë', ate' iluá'gaca bönachi queë' oro que lu xiyúgaca bönachi Sabá. Ben ga ulu'lidza Dios bönachi, ila'nábitica'sõ Li' gácalenu' lë'. Ben ga ulu'lidza lë' dxi'a tsáhui'do' idú dza.
 16 Ben ga unõdzjada' zxoá' luyú queë', enca' yugu' lu guí'ado', le unõdzaj yõdxi yana' xiyúë' ca run guí'a Líbano.
 Ben ga ila'yán nupa nacuá' ladzë' ca rõ'õ guíxi'do' lu xiyúë'.
 17 Ben ga tsõjnégaca le lë' ga idxintë dza udxí.
 Ben ga gaca yöl-la' ba que lë' tsanni ni' soa gubidza.
 Ben ga ila'nabi bönachi Li' yúgu'të yõdzõ

gunu' ga gaca dxi'a quéguequi ca benu' queë' lë'.
Ben ga ila'gú'u lë' yöl-la' ba bönachi yúgu'të yödzo.

18 ¡Yöl-la' ba Xanru' Dios, Dios quégaca bönachi Israel!

¡Tuzë' Lë' runë' le túngaca ga rubániru'!

19 ¡Yöl-la' ba Lë' le naca lachi ga idxintë dza udxi!

¡Rizë láchxi'ru' ilí idútë yödzölió le naca ben' queë'!

¡Ca' gaca! ¡Ön, ca' gaca!

20 Chibudxi le rinábida'-në' Dios neda', David, xzí'inë' Isai.

73

1 Le nácatë runë' Dios ga raca dxi'a quégaca bönachi Israel,
nupa na' naca dxi'a tsahui' láchxi'do'guequi.

2 Ia'láti'só guchixi guníguida'.

Ia'láti'só tsöjdöda' tsölá'aló,

3 tu' buzxé'eda' nupa tun ba zxön cuínguequi,
en tu' dëda' yöl-la' tsahui' quégaca nupa tuá' dö'.

4 Biti' ca' téquinë' zí' bönni' tu'ë dö' na'.

Nácagaquië' tsutsu, en nacu'ë dxi'a.

5 Biti' ta'guí'i ta'záquë'ë ca ta'guí'i ta'zaca' ia'zica'rö bönachi.

Biti' ca' raca quégaquië' ca raca quégaca bönachi yübölö.

6 Naca yöl-la' run ba zxön cuini quégaquië'

ca tu le néquini oro dxía ícjagaquië'.

Yöl-la' rutsatsa quégaquië' naca ca zxágaquië' nácugaquië'.

7 Tu'zi'ë xibé le ta'dödi bë'ë tē'aj tahuë',

en ta'zá' láchxi'gaquië' quégaca le zían le ila'déli'në'.

8 Tu'titjë' ia'zica'rö bönachi,

en tu'ë didza' lu yöl-la' run ba zxön cuini quégaquië'.

Tun ba zxön cuíngaquië',

en tē'ënë' ila'bía nahuë' ia'zica'rö bönachi.

9 Ta'nnë' queë' Dios zoë' yehua' yubá,

en tu'didza' yudxë' nupa nacua' yödzölió.

10 Que lë ni na' ta'dá' bönachi queë' Dios légaquië',

en ta'yéajlé' didza' tu'ë.

11 Ta'nnë': "Biti' ca' nözinë' Dios,

en bití' ilé'e lë ni Nu na' zoa xitsá'aló."

12 Caní nácagaca nupa tuá' dö'.

Dëda' yöl-la' tsahui' quéguequi, en ta'zítica'sö ia'lati'.

13 ¿Naru' nítisó ben chí'i cuina' para gaca' dxi'a

en para cabí íbága'a dul-la'?

14 Dios, benu' ga gudí'i guzxá'a idú dza.

Yugu' zila benu' neda' zí'.

15 La'tu' bë'a didza' ca nácagaca lë ni

guzxí' yé'eda' bönachi quiu'.

16 Que lë ni na' bë' láchxa'a tséajni'ida' lë ni,

sal-la' gúcada' böniga

17 ga bidxintë dza guyu'a yudo' quiu'

en guyéajni'ida' ca gaca quégaca nupa tuá' dö'.

18 Le nácatë nuzú' léguequi ga ta'chixi ta'nigui, en runu' ga ila'niti tsaz.

19 La' ila'nititë,

en ila'yaza ga udxi quéuequi.

20 Nácagaca ca tu le rinetu' yëla le ridödi que cate' ritö yu.

Cate' chasu', Xan, la' udöditeu' léguequi tsölá'alö.

21 Cate' yöjdín icja' le nácagaca ca tu le silá',

en guzá' ládxa'a yugu' le gúquida' zì,

22 guca' tu' canöz, en bitì' bi guyéajni'ida'.

Guca' ca tuba' böa' guixi' lo' Li'.

23 Zóatica'sa' lo' Li',

ate' rizón cazu' neda'.

24 Rigú'u yöl-lu'u neda' le rugú'u neda' nöza quiu',

en ga údxitë uzi'u neda', en gunu' neda' bal.

25 ¿Núzxirö zoa yehua' yubá nu gácalen neda'?

¡Tuzu' Li'!

Tu' rácalenu' neda' cúnturö nu zoa yödzölió nu riquinda'.

26 Ricuidi' le naca', en rudú ládxa'a.

Le ruzóa tsutsu ládxi'da' ahua',

en le ruzí'tica'sa' xibé naca cazu' Li', Xan.

27 Le nácatë ila'niti nupa tu' cá'ana Li'.

Usunítu' yúgu'të nupa tu' zóa Li' tsölá'alö.

28 Raca dxi'a quia' cate' ribiga' ga zu' Li', Dios.

¡Naca cazu' Li', Xana' Dios, Nu run chi'i neda'

para ulu'a lahui yúgu'të le nun cazu'!

74

1 Dios, ¿naru' tsaz nusán ládxi'u netu'?

¿Riléde' enu' netu', bö'cu' zxila' queë cazu'?

2 Yöjné netu', bönachi tu'dubi quiu', nupa böá'u cazu' dza ni'te,

nupa böá'u cazu' para gácatu' bönachi queë cazu'.

Yöjné guí'a Sión, ga ni guzóa cazu' Li'.

3 Gudá tödu' ga ni naguínnajdërö yödzö lá'ayi quiu'.

Bulu'sunítidërö nupa gula'dá'baga' Li'

yúgu'të le gula'cuá' lataj lá'ayi quiu'.

4 Tu'tsatsa nupa na' gula'dá'baga' Li'

idú gásibi'ilö ga ni budúbitu' quiu'.

Nuca'gaquië' ni le naca bé'gaca

nuxícjagaquië' yödzö lá'ayi quiu'.

5 Nalá' lahui yödzö ni ca nalá' tu guí'a cate' nu gulú'u le bidín,

en nurixi nu na' yugu' yaga gula'cuá' lu guí'a na'.

6 Bulu'zxuzxjë' le nácagaca lachi lu yödzö ni

len yugu' guíë huága quégaquië', en yugu' yaga zidzaj.

7 Bulu'zégui'ë idütë lataj lá'ayi quiu'.

Nucá'anagaquië' cá'asö lataj ga benru' bal Lo'.

8 Lu icja ládxi'do'gaquië' gula'né': "Nuxícjadërötu' bönachi ni."

Idütë lu xiyutu' bulu'zégui'ë yúgu'të yu' u ga na' budúbitu' lo'.

9 Biti'rō caz rilé'etu' yugu' le bulu'subán ládxi'tu' gulísatu' lu xiyutu'.
Biti'rō zoa nu bōnni' ru'ē didza' uláz quiu'.

Biti'rō zóalen netu' nu bōnni' nōzínē' gáca'xte caz gaca caní queētu'.

10 Dios, ¿gáca'xte caz ulu'lidza ditaj netu' nupa ta'díl-lalen netu'?

¿Gáca'xte caz ulu'cá'ana ditaj Lo' nupa ta'dá'baga' Li'?

11 ¿Naru' cabí gácalenu' netu'?

¿Bizx que nucáchu'u yól-la' huáca zxön quiu'?

12 Rinná be'e quézinu' netu' Li', Dios, dza ni'te quez,
en rusólá cazu' bōnachi idútē yōdzölió.

13 Len yól-la' huáca zxön quiu' bubéaj cazu' chopló nísado'.

Gulá'a cazu' ícjagacaba' bōa' zxön nacuá'aba' nísado'.

14 Bzxuzxja cazu' ícjagacaba' bōa' sínia' lēba' Leviatán.

Ben cazu' ga guláguba' yugu' bōa' guixi' xipéla'ba' bōa' sínia' na'.

15 Gusalaj cazu' yugu' beaj nisa, en gapa rálajda' nisa.

Busubidxi cazu' yugu' yegu nisa gula'yúdzutica'sō nisa.

16 Nequi queē cazu' lahui' dza, en nequi ca' quiu' chí'i dzō'ölö.

Ben cazu' Li' bení', enca' gubidza.

17 Naguixaj cazu' Li' yúgu'tē buzá' nacuá' yōdzölió.

Nun cazu' Li' beo' la, en beo' ziaga.

18 Yōjné lē ni, Dios. Nupa ta'dá'baga' Li' nucá'anagaca ditaj Lo',

ate' nupa nácacaca canöz nucá'anagaca cá'asō Lo'.

19 Biti' usán no'o nupa nadxí'inu' lu ná'agaca nupa nácacaca ca yugu' bōa'
guixi' sínia'.

Biti' gal-la ládxi'u tsaz nupa néquiguequi quiu', en ta'guí'i ta'zaca'.

20 Yōjné didza' dzaga na' núnlenu' netu',

tu' nacuá' nupa tuti bōnachi gapa naca chul-la lu xiyutu'.

21 Biti' gu'u lataj ulu'gá'ana cá'asō nupa nácacaca bayechi'.

Ben ga ila'gú'u Li' yól-la' ba nupa ta'guí'i ta'zaca', en ta'yadzaj ta'yudxi.

22 ¡Guyasa, Dios, en ben ca rnna xtídzu'!

¡Ruzē nagu' ca rulidza ditjē' Li' bōnni' canöz idú dza!

23 Biti' gal-la ládxi'u didza' zi' tuí'i nupa ta'dá'baga' Li'.

Yól-la' dzatsa tun nupa tu'cá'ana Li' cá'asō riyōntica'sō.

75

1 ¡Rētu' Li': "Xclenu', Dios!"

¡Rētu' Li': "Xclenu'";

tu' zóatica'su' gal-la' ga zóatu'!

¡Tuí'i didza' bōnachi ca nácacaca le zxön nunu'!

2 Rnnē' Dios: "Nuzóa' dza cate' uchi'a usörōa' bōnachi.

Uchi'a usörō caza' léguequi ca naca le nácatē.

3 Tu'suniti yōdzölió, en nupa nacuá' ní',

pero tsaz nuzóa caza' le."

4 Gudxa' nupa tun ba zxön cuínguequi, gunnía': "Biti' gun ba zxön cuinli'",

en gudxa' nupa tuá' dō: "Biti' huē tsahui' cuinli'."

5 Biti' huē tsahui' cuinli',

en biti' gü'ili' didza' lu yól-la' run ba zxön cuinli'."

6 Calēga ga rilén gubidza, en calēga ga ribía gubidza,

en calëga la' guixi' ga dë lataj irúaj le huë tsahui' bönachi,

⁷ pero uchi'a usörö cazë Dios bönachi.

Uzötjê' tuë' bönni', en uchi'së ia'tué'.

⁸ Nuá' cazë Xanru' lu në'ë tu xiga' yudzu xisa le ribía lubá uva le ribixi rilëbi.

Chinugútsi'dërë' le, ate' rigu'ë le para ilë'aj le nupa tuá' dō' yödzolió ni,
ate' ilë'jadërö le silá' que.

⁹ Neda' usiyöntica'sa' bönachi lë ni,
en gul-la' yöl-la' ba queë' Dios queë' Jacob.

¹⁰ Ugúë' yöl-la' unná bë' quégaca nupa tuá' dō'.

Quíxjê' tsaz yöl-la' unná bë' quégaca nupa nácagaca tsahui'.

76

¹ Zxí'ini xi'sóë' Judá núnbë'gaquië' Dios.

Nayëpisë le lë' ladaj bönachi Israel.

² Zoa caz lataj lá'ayi queë' lu yödzö Jerusalen,

ate' nazi'i le Sión lataj ga na' zoa cazë'.

³ Ni' guditsjê' yugu' yaga lahui tuchi' zoa guí' láchiguequi,

enca' yugu' guíë la, en yugu' le ta'díl-lalen bönachi lu gudil-la.

⁴ ¡Yöl-la' ba Li', Dios!

¡Nayëpisëtëru' ca yugu' guí'a zxön!

⁵ Buxicju' bönni' nál-lagaquië'.

Gudödi yëla guiöj lógaquië' bönni' röjáquië' gudil-la,

en biti' guca ila'chisa ná'agaquië'.

⁶ Cate' Li', Dios queë' Jacob, gudíl-lalen cazu' légaquië'

gulátiba' böa', ate' gulati ca' nupa dxíagaca légacaba'.

⁷ Li' caz ral-la' gádxitu',

tu' cabí gaca nu soa lo' cate' ilenu'.

⁸ Ga zu' Li' yehua' yubá gunnó' uchi'a usöröu' bönachi.

Ní'irö guladxi nupa nacuá' lu yu, en gula'cuá' dxisö,

⁹ cate' guzuínë' Dios para uchi'a usöröë' quégaca bönachi,

para usölë' nupa nácagaca nöxaj ladxi' yödzolió ni.

¹⁰ Sal-la' ta'léde'e bönachi, gaca yöl-la' ba queë' Lë'.

Uzi'ë xibégaca nupa ulu'gá'ana ládjaguequi.

¹¹ Guli'sí' lu ná'ali' bi gunli' lahuë' Xanru' Dios,

en guli'gún ca na' innali'.

Yúgu'të nupa nacuá' ga na' zoë' ral-la' bi ulu'nödzaj queë',

tu' náquië' Nu ral-la' gádxiru'.

¹² Ubéaj cazë' bö' nácagaca caz nupa nadéli'gaca lataj lo.

Bönni' ta'nná bë'ë luyú ni tádxinë' Lë'.

77

¹ Rulidza'-në' Dios, en ruá'a zidzaj didza'.

Rulidza'-në' Dios, ate' riyönnë' chí'a.

² Cate' bi guca quia' bulidza'-në' Dios.

Chí'i dzó'ólö guchisa na'a lahuë', en biti' busana' rulidza'-në'.

Biti' guca nu huë tsahui' neda'.

³ Cate' röjneda'-në' Dios, rö'a böniga.

Cate' rinné ládxa'a, ní'irö rudú ládxa'a.

⁴ Bubéaj cazu' yëla guiöj lahua'.
Tu' ribö'a böniga bití' gaca gu'a didza'.

⁵ Chiguzá' ládxa'a ca guca dza ni'te,
ca guca yugu' iz chigula'dódi.

⁶ Tsöjneda' le bulá' chi'i dzö'ölö,
en tsöjsá' ládxa'a ca naca que, ate' rinábini cuina':

⁷ ¿Naru' tsaz nusán Xanru' neda'?
¿Naru' cabirö uzá' ládxe'ë quia'?

⁸ ¿Naru' cabirö gáquië' dxi'i ladxi'?

¿Naru' cabirö tsöjnenë' le guzxi' lu në'ë gunë'?

⁹ ¿Naru' nál-la ládxe'ë Dios tu' cabirö ruzá' ládxe'ë queëru'?

¿Naru' bíti'rö huéchi' ládxe'ë rë'u tu' rilenë'?

¹⁰ Ní'irö gudxi cuina': Raca caní quia' tu' risëbida' ládxa'a,
en que lé ni na' réquida' nadzá' yöl-la' unná bë' queë' Dios nayëpisë'.

¹¹ Tsöjneda' yugu' le nun cazu' Li', Xantu'.
Tsöjneda' yugu' yöl-la' huáca benu' dza ni'te.

¹² Sa' ládxa'a ca nácagaca le nunu',
en cuéqui icja' ca nácagaca le runu'.

¹³ Naca lá'ayi ca run cazu' Li', Dios.
Cúnturö nu zoa naca dios ca nacu' Li', Dios queëtu'.

¹⁴ Naca cazu' Li' Dios, runu' yugu' yöl-la' huáca zxon.
Bulú'u lahui yöl-la' huáca quiu' lógaca bönachi yúgu'të yödzo.

¹⁵ Len yöl-la' huáca zxon quiu' busöló' bönachi quiu',
nupa nácagaca xzí'ini xí'sóagaquië' Jacob, en José.

¹⁶ Bila'lé'e yugu' nísado' Li', Dios.
Bila'lé'e yugu' nísado' Li', en gula'bö' böniga.

Gula'zxízilé'e yugu' nísado'.

¹⁷ Bulu'lalaj böaj lúzxiba nisa.

Lúzxiba xitsá' gunnëda' guziú'.
Guyëpi yösa ca yugu' yaga lahui tuchi'.

¹⁸ Lu bö' budunu' biyön guziú' quiu' gunnëda'.
Yösa gula'yëpi bulu'zeni' luyú.

Gudódida' budó' zxu', en guzxizi luyú.

¹⁹ Bilá' lahui nöza quiu' gatsaj lálhui'lö nísado',
ate' guzóa nöza ga gudödu' gatsaj lálhui'lö nisa zila.

Biti' nalá' lahui na'a ga na' bulibu'.

²⁰ Guchë' cazu' bönachi quiu' ca runë' bönni' richë'ë-ba' bö'cu' zxila' huë'ënido'.
Guchë'u légequi lu ná'agaquië' Moisés, en Aarón.

78

¹ Buli'zé nágali' le uzéajni'ida' libí'ili', bönachi quia'.
Buli'zé nágali' didza' gu'a.

² Usalja' ruá'a, en ucúdz'u'a didza'.
Gu'a didza' tu le nagachi' dza ni'te quez,

³ tu didza' chibiyönru', en núnbë'ëru',
le gulë' xuz xtó'oru' rë'u.

- 4 Biti' ucáchi'ru' didza' na' lógacabi' xzí'iniru'.
Usiyönrú' yugu' xzí'ini xí'sóaru' yöl-la' ba queë' Xanru',
ca naca yöl-la' huáca queë', en yugu' le zxön benë'.
- 5 Gudixjë' tu didza' naca bë' queë' Jacob,
en nuzóë' le rinná bë'ë quégaca bönachi Israel,
le gunná bé'enë' yugu' xuz xtó'oru'.
Ulu'zéajni'inë' xzí'inigaquië' ca naca,
- 6 para ilúnbë'gacabi' le, bi'i si' zá'gacabi', enca' bi'i si' iláljabi',
para ulu'luí'ibi' ca' xzí'inigacabi' ca naca lë na' gunná bë'ë Dios.
- 7 Ulu'zxöni ládxi'gacabi' Dios,
en biti' gal-la ládxi'gacabi' yugu' le nunë' Dios.
Ilunbi' ca náca gaca le gunná bë'ë,
- 8 en biti' ilácagacabi' ca guláquië' xuz xtó'ogacabi'.
Guláquië' zidzaj ladxí' tu' gula'dá'baguë'ë xtdzë'ë Dios,
en biti' guláquië' nōxaj ladxí',
ate' lu icja ládxi'do'gaquië' biti' gula'yéajlë'ë Dios.
- 9 Yugu' xzí'ini xí'sóë' Efraín gula'gaquië' yaga uxiti',
pero bulu'zxúnnajë' lu gudil-la.
- 10 Biti' gula'dá'gaquië' didza' dzaga Dios bënlenë' légaquië',
en biti' gulunë' ca naca le gunná bé'enë' légaquië'.
- 11 Gulal-la ládxi'gaquië' yugu' le benë' Dios,
en yugu' yöl-la' huáca zxön benë' lógaquië'.
- 12 Benë' Dios le gulún ga bulu'bánninë' xuz xtó'ogaquië'
luyú Egipto, en luyú Zoán.
- 13 Gusaljë' nísado', en benë' ga gula'dödë' gatsaj láhui'lö nísado' na'.
Benë' ga guca nísado' na' ca yugu' guí'ado' tsólá'a huéaj.
- 14 Buluí'në' légaquië' nōza lahui' dza, bugunë' dxin tu böaj,
ate' chí'i dzó'ölö bugunë' dxin tu böaj ruzení' ca guí'.
- 15 Bulë'ë tu guió'j ga naca la' guixi' ga dë lataj,
en bë'ë le gulë'ajë' le guca ca tu nísado'.
- 16 Gulë'ajë' nisa yegu le gulén lu guió'jto'o.
Benë' ga birúaj nisa ca tu yegu zxön lu guió'jto'o na'.
- 17 La' ní'sö gulunë' dul-la' lahuë' Lë',
en gula'dá'baguë'ë Dios nayépisëtë'rë' la' guixi' na'.
- 18 Lu icja ládxi'do'gaquië' gula'zí' bë'ë Dios quégaquië',
cate' gula'nábinë' Lë' ugahuë' légaquië' ca gula'zësö ládxi'gaquië'.
- 19 Ní'irö gula'nnë' queë' Dios, gula'nnë':
“¿Naru' huáca cu'ë Dios le gáguru' la' guixi' ni ga dë lataj?
- 20 Buli'yútsöca', bë'ë guió'jto'o, ate' birúajda' nisa,
le guca ca nisa yegu gubó'o zxön.
¿Naru' huáca gunnë' ca' queëru' yöta gáguru'?
- ¿Naru' gaca ugahuë' bönachi queë' le naca bëla'?”
- 21 Biyönnë' Xanru' Dios didza' ni, en guléde'enë',
ate' gulén tu guí' le buzegui zían xzí'ini xí'sóë' Jacob,
tu' guléde'enë' bönachi Israel,
- 22 tu' cabí gula'yéajlë'ë Dios,
en biti' bulu'zxöni ládxi'gaquië' Lë' usölë' légaquië'.
- 23 Gunná bé'enë' Lë' yugu' böaj lúzxiba,
en gusaljë' yehua' yubá.

- 24 Gusöl-lë'ë yöta maná le ilahuë',
en bugahuë' légaquië' la' huagu que yehua' yubá.
- 25 Gulahuë' bönni' ni' yöta tahuë' gubáz que yehua' yubá.
Gusöl-lë'ë guizxi yu le ilahuë'.
- 26 Benë' ga guyecja bö' birúaj ga rilén gubidza,
ate' len yöl-la' huáca queë' gunná bé'enë' bö' recja
le birúaj tsölá'alö ga ridödi gubidza beo' ziaga.
- 27 Benë' ga böxaj bëla' ca bëchtö yu ládjalö ga na' nacu'ë,
le naca böa' zoa xiligacaba' gurö'öba' ca yuzxi dë tu ra' yegu zxön.
- 28 Benë' ga böxjagacaba' gatsaj láchui'lö ga na' nacu'ë,
en ládjagaca yugu' yu'u guídido' quégaquië'.
- 29 Ca' guca, gulahuë', en bulu'huöläj gula'dzé'enë',
tu' bë'ë quégaquië' le gula'zësö ládxi'gaquië'.
- 30 Zí'alö ca budxi bulu'huöläj gula'dzé'enë',
tsanni ni' yu'u ruá'agaquië' le tahuë',
- 31 gulénë' Dios légaquië',
en bëtië' bál-lagaquië', bönni' nál-latërögaquië' ládjagaquië',
en bucul-lë' bönni' Israel nayëpisëtërögaquië'.
- 32 Sal-la' guca caní, gulunrë' dul-la',
en biti' gula'yéajlë'ë Lë' ni'a quégaca le zxön benë'.
- 33 Que lë ni na' benë' ga böáca nítisö dxin gulunë',
ate' lu yöl-la' radxi gula'zöé' yugu' lu iz quégaquië'.
- 34 Cate' bëtië' ziángaqië', ní'irö bulu'lidzë' Lë'.
Bulu'bí'i ládxi'gaquië', en yöjtá'gaquië' Dios.
- 35 Ní'irö yöjnéguequinë' náquië' Dios Nu run chi'i légaquië',
en náquië' Dios nayëpisëtërë' Nu böá'uö légaquië'.
- 36 Gula'zí' yé'enë' Lë' len didza' gulu'ë,
tu' gulu'ë diza' biti' nácatë lahuë' Lë' len ruá'agaquië'.
- 37 Biti' gudá'gaquië' Lë' idú ládxi'gaquië',
en biti' gulunë' ca rnna didza' dzaga na' bénlenë' légaquië'.
- 38 Tu' buëchi' ládxe'ë Dios légaquië',
buniti lahuë' ca naca xigua' gulunë', en biti' busunítië' légaquië'.
- Bubequi lahuë' quégaquië', en bití'rö gulénë' légaquië',
en biti' benë' ca sa'yéaj yöl-la' ridzá'a queë'.
- 39 Ca' guca, yöjnenë' nácaagaquië' bönáchisö.
Nácaagaquië' ca tu bö' recja le ridödisö, en biti' rudxín.
- 40 Zián luzuí gula'dá'baguë'ë Lë' ga na' naca la' guixi',
en bulu'suhui'inë' Lë' lu yu bidxi na'.
- 41 Zián luzuí gula'zí' bë'ë Dios,
en gulunë' zí' Dios Lá'ayi quégaca bönachi Israel.
- 42 Biti' yöjnéguequinë' yöl-la' huáca zxön queë',
le bulu'e lahui dza ni' böá'uë' légaquië'
lu ná'agaca nupa biti' bila'lé'e légaquië' dxí'a,
- 43 cate' ni' benë' le gulaca bë' luyú Egipto,
en benë' yugu' yöl-la' huáca queë' luyú Zoán,
- 44 cate' benë' ga böáca nisa rön yugu' lu yegu luyú Egipto,
enca' nisa yugu' lu beaj quégaquië' para cabí guca ilë'ajë' le.
- 45 Gusöl-lë'ë ládjagaquië' bötsugayu guizxi yu,
böa' gula'guídxiba' légaquië'.

Gusöl-lë'ë ca' riu bulu'sunítiba' le nequi quégaquië'.

⁴⁶ Budödë' le naz nuzóagaquië' lu ruá'agacaba' böchi' zu, ate' guláguba' böchi' zu na' le rö'ö yugu' la' yëla quégaquië'.

⁴⁷ Busunítie' yugu' lubá uva quégaquië' len nisa guiöj yöla sunna na', en busunítie' yugu' yaga higo quégaquië' len bögui'.

⁴⁸ Bëtië'-ba' böa'-bëdxi quégaquië' len nisa guiöj yöla sunna na', en lu yösa gula'yëpi.

⁴⁹ Lu yöl-la' rilé queë' gusöl-lë'ë quégaquië' yugu' lë ni,

en lu yöl-la' ridzá'a queë' busaca' zi'ë légaquië',

en gusöl-lë'ë quégaquië' gubáz que yehua' yubá para bulu'sunítie' légaquië'.

⁵⁰ Biti' bubequi lahuë' quégaquië' para cabirö lenë' légaquië',

en biti' buniti lahuë' légaquië' para cabí ilátie'.

Budödë' légaquië' lu yöl-la' guti,

⁵¹ en bëtië' yúgu'tëbi' bi'i bönni' lo quégaquië' bönni' Egipto,

yugu' bi'i bönni' lo quégaquië' zxi'ini xi'sóë' Ham.

⁵² Guchë'ë bönachi queë' ca yugu' bö'cu' zxi'la'do',

en buluí'inë' légaquië' nöza la' guixi' ga dë lataj.

⁵³ Guchë'ë légaquië' lu në'ë para cabí bi iládxinë',

pero gubaga' nísado' nupa biti' bila'lé'e légaquië' dxi'a.

⁵⁴ Ca' guca, guchë'ë légaquië' ga zoa luyú lá'ayi queë',

luyú ni bidéli'në' uláz quégaquië' len yöl-la' huáca queë'.

⁵⁵ Bulágui'ë bönachi izá'a luyú ni lógaca bönachi queë',

en burixë' que queégaquië' xiyúgaquië' ga ila'cu'ë,

en benë' ga gula'cu'ë bönachi Israel yugu' lu yu'u guídido'.

⁵⁶ Le yübölö gula'zi' bë'ë Lë', en gula'dá'baguë'ë Dios nayëpisëtërë',

en biti' gulunë' yugu' le gunná bé'enë' légaquië'.

⁵⁷ Bulu'huöa ládxi'gaquië', en bulu'cá'anë' Lë' ca gulunë' xuz xtó'gaquië'.

Gula'dödë' tsölá'aló ca run tu yaga lahui tuchi' biti' nácatë li.

⁵⁸ Gulún lenë' Lë' tu' gulunë' xilátjagaca budó' guiöj budó' yaga yugu' lu gu'a,

en gulunë' ga budúli'në' légaquië' ni'a quégaca budó' na'.

⁵⁹ Cate' bilé'enë' lë ni Dios, guléde'enë',

en budí'inë' bönachi Israel.

⁶⁰ Ní'irö bucá'anë' xilatjé' lu yödzö Siló,

ga na' guzóa yu'u lá'ayi queë' ládjagaquië' bönni' ni'.

⁶¹ Bë'ë lataj gula'chë'ë bönni' zi'tu' guí'ina lá'ayi queë',

guí'ina na' buluí'i lahui yöl-la' zxön queë'.

⁶² Budödë' bönachi queë' lu ná'agaca nupa bëtigaca léguequi,

en gúquinë' zi' nupa ná'agaca quez queë'.

⁶³ Buzegui tu guí' zxön yugu' bi'i bönni' quégaquië',

ate' cuntu nu bugá'ana nu ulu'tsaga na'lenbi' yugu' bi'i nigula ra'bando'.

⁶⁴ Yugu' bixúz quégaquië' gulátie' lu guië tuchi',

ate' biti' guca ila'bödxinu nigula uzëbi quégaquië'.

⁶⁵ Ní'irö gúquië' Xanru' ca tu bönni' rubanë' lu yöl-la' rasi.

Gúquië' ca bönni' rejë' gudil-la gudödi bë'ë gu'ë xisi lubá uva nál-la.

⁶⁶ Bulágui'ë yugu' bönni' gula'díl-lalenë' bönachi queë',

en tsárido'os burixë' légaquië'.

⁶⁷ Lësca' budödë' tsölá'aló yugu' zxi'ini xi'sóë' José,

en biti' guröë' yugu' zxi'ini xi'sóë' Efraín.

⁶⁸ Guröë' yugu' zxi'ini xi'sóë' Judá,

en yödzo Sión le nadxí'i quézinë' Lë'.

⁶⁹ Ni' benë' tu lataj lá'ayi queë' le naca ca tu guí'a zxon,
le zoa tsutsu ca yödzölió ni nuzóë' tsaz.

⁷⁰ Guröë' ca' David, huen dxin queë',
en bubéajë' lë' ga na' zoë' ruyúë'-ba' yugu' bö'cu' zxíla'do'.

⁷¹ Bubéajë' lë' ga na' rapa chi'ë'-ba' yugu' bö'cu' zxíla' guná',
nacuá'aba' böa' huë'ënido' quégacaba',
para gáquië' nu uyú bönachi queë', yugu' zxi'ini xi'sóë' Jacob,
en bönachi Israel, nupa na' nácagaca quez queë'.

⁷² Ca' guca, idú ládxë'ë buyúë' David bönachi na',
en lu yöl-la' rácada' queë' guchë'ë légaquië' lu në'ë.

79

¹ Dios, nacua' bönachi izá'a lu xiyúgaca bönachi quiu'.

Nucá'anagaca cá'asó yudo' lá'ayi quiu',
en nusunítigaca yödzó Jerusalén.

² Bulu'cá'anë' bönachi quiu' nátigaca luyú para iláguba' bíchulab léguequi,
en béla' rön quégaca huen xichinu' ga iláguba' böa' guixi' le.

³ Bulu'laljë' xichöngaca bönachi quiu' ca nisa idütë' lu yödzó Jerusalén,
ate' cuntu nu bugá'ana nu ucache' léguequi.

⁴ Bönachi yugu' dzaga luyú queëtu' tu'titaj netu'.
Tu'zxidxë', en tu'didza' yudxi netu'.

⁵ ¿Naru' tsaz ilenu' netu', Xan?

¿Naru' sóatica'só yöl-la' rilé quiu' ca tu guí' ruzegui netu'?

⁶ Gulégaca bönachi yugu' yödzó zi'tu' biti' tun Li' bal,
enca' bönachi biti' tu'lidza Li'.

⁷ Bétigaca bönachi quiu' nácagaca zxi'ini xi'sóë' Jacob,
en nusunítigaca xiyutu' ga zoa cazu' Li'.

⁸ Biti' gunu' netu' xigua' tu' nözi dul-la' gulunë' xuz xtó'otu'.
Buéchi' ladxi' netu' na'a, tu' rudú ládxi'tu'.

⁹ Gúcalen netu', Dios, Nu rusölá netu', para guntu' bal Lo'.

Busölá netu', en buniti lo netu' ca naca dul-la' nabága'tu' para idxí'itu' Lo'.

¹⁰ ¿Bizx que ta'nabi bönachi yugu' yödzó izá'a netu',
ta'nná: "Gázxitë zoa Dios queëli'?"

Bë' lataj ilë'etu', en ben ga gaca bë' lógaca yúgu'të bönachi
rizí' lo' nupa tu'lalaj xichöngaca huen xichinu'.

¹¹ Buzë nagu' ca ta'nnë ládxi'gaca nupa nadzúngaca.

Len yöl-la' huáca zxon quiu' busölá nupa na' narugu quéguequi ilátigaca,

¹² en bubí'i quégaca bönachi yugu' dzaga yödzó queëtu'
ia'gadxi cö'ló ca' tsa naca didza' zi' gula'nnë quiu' Li', Xan.

¹³ Netu', bönachi quiu', enca' bö'cu' zxíla' ruyú cazu' Li',
guíëtica'stu' Li': "Xclenu",

en cú'utica'stu' Li' yöl-la' ba na'a dza, en dza si' zaca.

80

¹ Ruzë nagu' netu', Dios, Nu rapa chi'i bönachi Israel.

Nacu' Nu ruyú yugu' zxi'ini xi'sóë' José ca nu ruyú yugu' bö'cu' zxíla'.
Buzeni' queëtu', Li' na' rô'u rinná bë'u ga nacua'

nupa nál-lágacatërö quiu' lëgaca querubín.

² Bulu'í yöl-la' huáca quiu' lógaca xzí'ini xi'sóagaquië' Efraín, en Benjamín, en Manasés.

Gudá queëtu', en busölá netu'.

³ Ben ga huécjatu' quiu' Li', Dios.

Bulu'í netu' nadxí'ínu' netu', ate' ulatu'.

⁴ Xantu' Dios quéguequi ni'a no'o guizxi yu,

¿gáca'xte caz ilenu' netu', en bití' yömmu' le rulidztu' Li'?

⁵ Rugagu' netu' nisa ribödxi queëtu',
en rugui'ju' netu' sizxöni nisa ribödxi.

⁶ Nunu' ga bönachi dzaga yödözö queëtu' tu'zxidxi queëtu',
ate' nupa bití' ta'lé'e netu' dxi'a tu'titaj netu'.

⁷ Ben ga huécjatu' quiu' Li', Dios quégaca ni'a no'o guizxi yu.

Bulu'í netu' nadxí'ínu' netu', ate' ulatu'.

⁸ Guléaju' tu lubá uva le nácatu' netu' luyú Egipto.

Bulagu' bönachi izá'a yugu' lu yödözö luyú ni, en budó'o lubá na' ni.

⁹ Buchi'u lataj ga guzxón lubá na'.

Benu' ga ben luí ga rë', ate' bulí idútë luyú ni.

¹⁰ Gulú'u zxul-la lubá na' yúgu'të lu guí'ado',
ate' ni'a në'e gula'baga' yugu' guí'a zxön.

¹¹ Gula'tunna ni'a në'e ga bidxintë ra' nísado',
enca' ga bidxintë ra' yegu Eufrates.

¹² ¿Bixz que buquínaju' yugu' lë'aj gulún chí'i lubá na',
en ru'u lataj nupa ta'dódisö ta'bán le ribía lubá uva na'?

¹³ Tu'líbigacaba' cuchi guixi' le,
ate' táguba' böa' guixi' le.

¹⁴ Buécja queëtu', Dios quégaca ni'a no'o guizxi yu.

Ga ni' zu' yehua' yubá buyú ca raca que lubá quiu', en busölá netu'.

¹⁵ Gudá dusöló' lubá ni budá' cazu',
le naca ca tu lubá hué'ëni buxón cazu' Li'.

¹⁶ Nupa bití' ta'lé'e netu' dxi'a gula'chugu ni'a në'e lubá na', en bulu'quela' le
guí'.

Buyú ca tun, en lu yöl-la' rilé quiu' busuniti léguequi.

¹⁷ Gúcalen bönni' na' gurö cazu' quiu',
netu', bönachi na' nuzóa cazu' tsaz quiu'.

¹⁸ Caní gaca, bíti'rö ucá'anatu' Li'.

Bunna queëtu' yöl-la' na'bán, ate' uzxöni ládxi'tu' Lo'.

¹⁹ Ben ga huécjatu' quiu' Li', Dios quégaca ni'a no'o guizxi yu.

Bulu'í netu' nadxí'ínu' netu', ate' ulatu'.

81

¹ Lu yöl-la' rudzeja queëli' guli'gul-la queë' Dios.

Lë' náquië' yöl-la' nál-la queëli'.

Lu yöl-la' rudzeja queëli' guli'códxi'a lahuë' Dios queë' Jacob.

² Guli'gul-la tu le gúl-lali', cápa'li' lè'e guídido'.
Guli'quinnaj lè'egaca bihuél-la.

³ Guli'còdxi luzu chivo cate' zoa beo' hué'eni,
en cate' zoa beo' nál-la, en cate' raca laní.

⁴ Lè ni naca tu xibá quégaca bònachi Israel,
le naca tu le gunná bé'ené' Xanru' Dios zxi'ini xi'sóè' Jacob.

⁵ Gudixjè' le para gaca tu le gun ba nalí queé' lógaca zxi'ini xi'sóè' José,
le gudixjè' cate' gudòdè' luyú Egipto,
ga ni' biyönda' didza' izá'a bití' guyéajni'ida'.

⁶ Rnnè' Dios: "Gudúa' yua' zxoá ya' zxicjagaquié',
en bucuíta' le nuá'gaquié' le bulu'subaga' légaquié'
nupa bití' bila'lé'e légaquié' dxi'a.

⁷ Bulídzali' neda' cate' bi guca queéli', ate' busölá' libí'ili'.
Bubi'a didza' cate' bi gunábili' neda', ni' nucachi' cuina' tu lu böaj gasaj.
Guzxí' bē'a libí'ili' ga zoa nisa na' lè Meriba.

⁸ Buli'zè nágali', libí'ili', bònachi quia', ate' uxösa' libí'ili'.
Raca ládxa'a uzè nágali' neda', bònachi Israel.

⁹ Bití' ral-la' soa tu díos izá'a ga na' zóali',
en bití' gunli' zxön tu díos quégaca bònachi zi'tu'.

¹⁰ Neda', Xanli', naca' Dios queéli'.
Guléaja' libí'ili' luyú Egipto.
Guli'salaj ruá'ali', ate' cu'a ruá'ali' le gáguli'.

¹¹ Bití' bulu'zè nágagaca bònachi quia' chi'a.
Bití' gulún bònachi Israel ca rnna xtídza'a.

¹² Que lè ni na' busán ládxa'a léguequi
para gulún ca sa'yéaj yöl-la' ridá'baga' quéguequi,
en para gulún ca gula'za'sö ládxi'gaca.

¹³ Guzá' ládxa'a ulu'zè nágagaca bònachi quia' xtídza'a,
para ilún bònachi Israel ca ré'ènda' neda'.

¹⁴ La'tu' ilún caní, uxicja caza' nupa bití' ta'lé'e léguequi dxi'a,
en tíl-lalena' nupa ta'díl-lalen léguequi.

¹⁵ Ulu'lu'i' cuínguequi nupa bití' ta'lé'e neda' dxi'a,
ca nupa tun ca rnna xtídza'a,
pero tsaz guna' léguequi xigua'.

¹⁶ Lësca' ugahua' libí'ili', bònachi quia', zxoá' xtila dxí'ado',
en guna' ga huölaj idzé'eli' le zxixi que buz, le irúaj lè'e guiöj'."

82

¹ Zuínè' Dios ladaj nupa tu'dubi queé' ni' yehua' yubá.
Ruchi'a rusöröè' nupa ta'nná bē'.

² Rnnè': "¿Gáca'xte caz uchi'a usöröli' quégaca bònachi
lu yöl-la' bití' naca tsahui' queéli'?"
Caní naca tu' rubéajli' tsahui' nupa tuá' dō'.

³ Buli'béaj tsahui' nupa ta'cuidi', en yugu' bi'i uzébi.
Guli'gún le naca tsahui' quégaca nupa ta'guí'i ta'zaca',
en quégaca nupa ta'yadzaj ta'yudxi.

⁴ Buli'sólá nupa ta'cuidi', en nupa nácagaca yechi'.
Buli'sólá léguequi lu ná'agaca nupa tuá' dō'.

⁵ Bití' nöziguequi, en bití' ta'yéajni'i.

Ta'dá ga chul-la.

Rixizi xilibi yödzölió."

⁶Rnna caza' neda': "Nácali' ca yugu' dios.

Nácali' yúgu'téli' xzí'inë' Dios nayépisëtërë',

⁷pero gátili' ca tati bönachi,

en ibíxili' lu gudil-la ca ta'bixi xzí'inë' bönni' lo."

⁸Guyasa, Dios, en buchi'a busörö quégaca bönachi yödzölió ni,

tu' nácgaca queë cazu' yúgu'të yödzö bönachi.

83

¹Biti' ugá'anu' dxisö, Dios.

Biti' su' dxisö, Dios, en biti' usayaj ru'u,

²tu' tu'tsatsa nupa ta'dá'baga' Li',

ate' nupa biti' ta'lé'e Li' dxi'a tun ba xzön cuínguequi.

³Tun tuz xtídza'guequi bi ilún quégaca bönachi queë cazu',

en tu'pá yugu' le ilún quégaca nupa nadxí'i quézinu', ta'nná:

⁴"Gulí'dá, usunítiru' léguequi para cabirö ilaca tu yödzö bönachi,

en para cúnturö nu tsöjnë bönachi Israel."

⁵Núngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

⁶Yugu' bönni' Edom, en yugu' bönni' Ismael,

en yugu' bönni' Moab, en yugu' bönni' Agar,

⁷en yugu' bönni' Gebal, en yugu' bönni' Amón, en yugu' bönni' Amalec,

en yugu' bönni' Filisteo, en yugu' bönni' Tiro,

⁸enca' yugu' bönni' Asiria núngaquië' légaquië' tsözxön.

Rácalengaquië' yugu' bönni' xzí'ini xi'sóë' Lot.

⁹Ben quégaquië' ca benu' quégaca bönachi Madián, nupa na' busunítiru' dërö,

en ca na' benu' queë' Sísara, en ca na' benu' queë' Jabín ra' yegu Císón,

¹⁰nupa na' busunítiru' lu yödzö Endor,

ate' gulaca ca xiquë'ëba' bëdxi luyú ni'.

¹¹Ben quégaquië' bönni' lo quéguequi

ca benu' quégaquië' Oreb, en Zeb,

en ben quégaquië' bönni' ta'nná bé'enë' léguequi

ca benu' quégaquië' Zeba, en Zalmuna,

¹²nupa na' gula'nná: "Ilequi queëru'

yugu' lataj gapa na' gulequi queë' Dios."

¹³Dios quia', ben ga ilácagaquië' ca bëchtö yu le richë' bö',

en ca bëbu xze café le ruá' bö' budunu'.

¹⁴Ca run tu guí' xzön, ruzegui' yugu' yaga xzön,

o ca run tu guí', ruzegui' tu guí'a xzön,

¹⁵gusí regu' léguequi tu lu bö' budunu',

en ben gadxi léguequi tu lu nisa guiöjsiu' zili.

¹⁶Ben ga ulu'tuí'i

para ulu'guilaj Li', Xan.

¹⁷Ben ga ulu'tuí'i, en ila'bö' tsaz böniga.

Ben ga ulu'gá'ana cá'asö, en tsaz ila'niti,

¹⁸para iléquibe'e nayépisëtëru' tuzu' Li' idütë yödzölió

en ulu'zóa xzíbiguequi lo', Xantu' Dios.

84

1 ¡Bica' lachi gapa zoa cazu' Li', Dios!
¡Nacu' Xángaca ni'a no'o guizxi yu!

2 Rizé ládxa'a soa' lu yu'u lidxu', Xana' Dios.
Lu yöl-la' rudzeja quia' idú ládxa'a rul-la' quiu' Li', Dios ban.

3 Bidzöliba' biguínni chulí lataj ga nuzóaba' lídxiba',
en bidzöliba' xiguichi guziú' ga budxiaba' xicá'aba',
ga na' rigú'uba' biguínido' queéba',
gala' ga dē lu bucugu quiu' Li', Xángaca ni'a no'o guizxi yu.
Nacu' Nu rinná be'e neda', en nacu' ca' Dios quia'.

4 ¡Bica' ba nupa ta'yaza lu yu'u lidxu'!
¡Ta'gú'utica'sö Li' yöl-la' ba!

5 ¡Bica' ba bönni' nápaquie' yöl-la' nál-la' le nequi queé cazu',
en ta'zē ládxi'gaquie' ila'yu'ē nōza le ridxín yödzo Sión!

6 Cate' ta'dödē' lu yu bidxi tunē' ga ruhuóaca gapa ralaj nisa beaj.
Tun ga rizi' xibé yu bidxi na' yugu' nisa guiój ta'dxin bayön.

7 Lu yöl-la' huáca quégaquie' rōjáquie', en tu'zírōnē' yöl-la' huáca.
Ta'dxinē' yúgu'tēgaquie' lo' Li', Dios, lu yödzo Sión.

8 Ruzē nagu' le rulidza' Li', Dios, Xángaca ni'a no'o guizxi yu.
Ruzē nagu' neda', Dios queé' Jacob.

9 Buyúé' bönni' rinná bé'enē' netu', Dios.
Buyúé' bönni' na' nabó cazu'.

10 Nácarō dxi'a soa' tu dza lu yu'u lidxu' ca le soa' idú chi gayuá' dza ga yúbölō.
Cōa' zí'alō gaca' huen dxin ga nu riyaza yu'u lidxē' Dios
ca le soa caza' tu yu'u zxōn ga bití' zoa Dios.

11 Náquie' Xanru' Dios ca gubidza, en le rusubín rē'u.
Xanru' caz runnē' queēru' yöl-la' ruzá' ladxi' queé', en yöl-la' zxōn queé'.
Bití' ugúé' nitú le naca dxi'a gapa nacua' nupa tun le naca tsahui'.

12 ¡Li', Xángaca ni'a no'o guizxi yu,
bica' ba bönni' ruzxōni ládxi'ē Li'!

85

1 Buzá' ládxi'u quégaca bönachi quiu', Xantu' Dios.
Buchē'u Li' zxi'ini xi'sóē' Jacob gula'dzunē'.

2 Buniti lo' bönachi quiu' ca naca xiguia' gula'baga'.
Bucáchu'u yugu' dul-la' gulúngaca.

3 Buzóa dxíu' yöl-la' rilé quiu'.
Bugú' yöl-la' ridzá'a quiu'.

4 Buzóa netu' xilátjatu' le yúbölō, Dios, Nu rusölá netu',
en bití'rō lenu' netu'.

5 ¿Naru' tsaz ilenu' netu'?
¿Naru' tsaz ilenu' yugu' zxi'ini xsoatu'?

6 ¿Naru' cabí usabanu' ládxi'tu' le yúbölō,
para udzeja ládxi'lentu' Li' netu', bönachi quiu'?

7 Lu yöl-la' dxi'i ladxi' quiu' gúcalen netu',
en busölá netu', Xan.

8 Uzé naga' didza' gu'ë Xanru' Dios.

Le guié' bônachi queë' gun ga gaca dxi'a quéguequi,
nupa na' náçagaca quez queë',
pero run bayúdx bití' ulu'huõa ládxi'gaca.

9 Le nácatë chizóë' usölë' nupa tun Lë' bal,
para soa yöl-la' ba queë' luyú queëtu'.

10 Dzágagaca yöl-la' dxi'i ladxi', en le naca idútë li.

Tagu zxiixi luzé'eguequi nu naca tsahui', en nu ribõza dxi'a tsáhui'do'.

11 Luyú caz rilén le naca idútë li,
ate' yehua' yubá rirúaj le naca tsahui'.

12 Le nácatë Xanru' unödzejë' queëru' le naca dxi'a,
ate' xiyuru' unödzej le uláparu'.

13 Le naca tsahui' röjnöru lahuë' Xanru',
en gun ga soa nõza gáti'tës ga ulibë'.

86

1 Ruzé nagu', Xana' Dios, en rubí'u didza',
tu' zoa nu rusaca' zi' neda', ate' riyadzaj riyúdxida'.

2 Ben chi'i bö' naca caza', Dios, tu' naca' quiu' Li'.
Busölá neda', huen dxin quiu', Dios quia', tu' ruzxöni ládxa'a Li'.

3 Buzá' ládxi' quia', Xan,
tu' rulidza' Li' idú dza.

4 Ben ga udzeja ládxa'a neda', huen dxin quiu',
tu' rigu'a lu no' o bö' naca caza', Xan.

5 Nacu' dxi'a, Xan, en chizú' uniti lo' bônachi quiu'.
Nadxí'tica'su' yúgu'të nupa tu'lidza Li'.

6 Ruzé nagu' le rulidza' Li', Xan,
en ruí'i ládxa'u gunu' yugu' le inábida' lo'.

7 Cate' bi gaca quia' ulidza' Li',
tu' ubí'i cazu' didza' bi gunu' quia'.

8 Cúnturö nu zoa ládjagaca dios nu naca ca nacu' Li', Xan,
en bití' zoa ia'tú nu run ca náçagaca le runu' Li'.

9 Ila'dxín bônachi yúgu'të yödzo naguixju' Li', Xana' Dios,
en ila'yéaj ládxi'gaca Li', en ilún zxön Lo'.

10 Nayépisëtërosu' Li', en tuzu' Li' runu' yugu' yöl-la' huáca zxön.
Tuzu' Li' nacu' Dios.

11 Busëdi neda' ca naca le ré'ënu' guna', Xan.
Guna' ca naca le naca idútë li naguixju' Li'.

Ben ga gádxida' Lo' idú ládxa'a.

12 Idú ládxa'a guía' Li': "Xclenu'", Xana' Dios,
en guna' zxön Lo' yugu' iz si' zaca.

13 Nadxí'ide'enu' neda',
en chibusöló' bö' naca caza' lu lataj chul-la ga nacuá' nupa chinátigaca.

14 Dios quia', nupa ta'dá'baga' neda' ta'díl-lalen neda',
ate' yugu' bönni' zidzaj ládxi' té'ënë ilútië' neda',
yugu' bönni' na' bití' tunë' Li' bal.

15 Nacu' Dios ruhuéchi' ládxa'u netu', Xan, en ruzá' ládxa'u queëtu'.

Ridzenu' para ilenu' netu', en nadxí'ide'enu' netu', en runu' ca rnna xtídz'u.

¹⁶ Buyú neda', en buzá' ladxi' quia'.

Butipa ládxa'a neda', huen dxin quiu',
en busólá neda', xzí'ininu nigula huen dxin quiu'.

¹⁷ Buluí'i neda' tu le gaca bē' gaca dxi'a quia',
para ila'lé'e le nupa bití' ta'lé'e neda' dxi'a.

Ulu'tuí'i, tu' gúcalenu' neda',
en buē tsahú'u neda', Xan.

87

¹ Nuzóe' Dios xilibi zō'ō que yōdzō queē' lu guí'a lá'ayi.

² Nadxí'irōnē' Xanru' lataj ga na' tu'chi'a tu'sórō bōnachi Sión
ca nadxí'inē' ia'zíca'rō lataj gapa nacuá' bōnachi Israel.

³ Zían le lachi ta'nná bōnachi ca naca
yōdz na' nequi queē' Dios.

⁴ Cate' ulidza' bōnachi núnbē' gaca neda', Dios,
ulidza' bōnachi nníta' gaca Egipto, en Babilonia.
Ca naca quégaca bōnachi Filistea, en Tiro, en Etiopía
innía' nabábagaca yōdzō lá'ayi na'.

⁵ Cate' gu'a didza' que yōdzō Sión innía':
Bōnachi ni, en bōnachi íz'a ni nabábagaca le,
ate' neda', Dios nayēpisētēre', uzóa' tsutsu yōdzō na'.

⁶ Cate' ulabē' Xanru' nupa nácagaca queē' innē':
"Bōnni' ni nababē' yōdzō quia'."

⁷ Ní'irō iluí'i didza' nupa tul-la, en nupa tu'cōdxi gui, ila'ná:
"Ruzí'itu' xibé tuzi yōdzō ni."

88

¹ Xana' Dios, Nu rusólá neda',
rulidza' Lí' rēla, en te dza.

² Bē' lataj idxín lo' le rulidza' Lí'.
Ruzé' nagu' le rinaba yúdxida' Lí'.

³ Ruúbi ruguí'i ládxi'da'ahua',
en chizóa tsōjtsázia' lataj chul-la.

⁴ Chinabábalena' nupa chinátigaca.
Naca' ca tu bōnni' nudú dērō ládxe'ē,
⁵ en nagá'anē' cá'asō ladaj nupa chinátigaca,

en ca nupa dégaca yeru ba,
nupa na' bití'rō rōjnenu',
en nusán no'o léguequi.

⁶ Nuzú' neda' tu lu yeru zila,
ga naca chul-la, en le nácada' zila.

⁷ Rilenu' neda',
en rusaca' zí'u neda' tu lu nísado' quiu'.

⁸ Nucuásu' yúgu'tē nupa núnbē'a.
Nunu' neda' ca tu le ta'guti bōnachi.
Nadzuna', en bití' gaca irúaja'.

⁹ Tu' riguí'i rizáca'a nudú guiōj lahua'.

Tu dza tu dza rulidza' Li', Xan.
Richisa na'a zaca' ga na' zu'.

¹⁰ ¿Naru' guntso' yugu' yöl-la' huáca zxön
para gácalenu' nupa chinátigaca?

¿Naru' ulu'yasa nupa yú'ugaca lataj chul-la,
en ila'gú'u Li' yöl-la' ba?

¹¹ ¿Naru' ulu'luf'i lahui yöl-la' dxi'i ladxi' quiu'
nupa nagáchi'gaca yeru ba?

¿Naru' ulu'luf'i lahui nupa yú'ugaca lataj chul-la
ca runu' ca rnna xtídz'u?

¹² ¿Naru' gaca bē' le zxön runu' ga na' naca chul-la?

¿Naru' gaca bē' nacu' tsahui' ga na' cuntu nu bi röjné?

¹³ Rulidza' Li' neda' para gácalenu' neda',
ate' yugu' zila ridxín lo' le rinábida' Li'.

¹⁴ ¿Bizx que nusán ládXu'u neda', Xan?

¿Bizx que rucachi' lo' lahua' neda'?

¹⁵ Riguí' rizáca'a, en chizóa gátia' ga gudela' naca' bí'ido'.

Réquida' zi' tu' ruxösu' neda', en rudú ládxa'a.

¹⁶ Nabága'a neda' yöl-la' rilé quiu',

ate' chizóa usuniti neda' le ruxösu' neda'.

¹⁷ Idú dza naca quia' ca nabaga' neda' nisa.

Nagú'ugaca neda' lé'ajlö yugu' nisa.

¹⁸ Nucué'su' ga zoa' nu nadxí'i neda', enca' luzá'a.

Zóalensö le naca chul-la neda'.

89

¹ Gúl-latica'sa' ca naca yöl-la' dxi'i ladxi' quiu', Xan.

Usiyönda' zxf'ini xsoatu' ca runu' ca rnna xtídz'u.

² Gunnía': "Sóatica'sö yöl-la' dxi'i ladxi' quiu'.

Tsaz naca bē' yehua' yubá ca runu' ca rnna xtídz'u."

³ Rnnē' Dios: "Naguixja' tsaz didza' dzaga núnlēna' nupa nabö caza' quia'.

Bena' tsutsu xtídz'a'a ca guna' queē' David, huen dxin quia'.

⁴ Gunnía': Ucuá'a tsaz zxf'ini xí'sú'.

Guna' ga sóatica'sö nu inná bē' uláz quiu'."

⁵ Nupa nacué' yehua' yubá quiu' ila'gú'u yöl-la' ba le nunu' le tun ga rubánitu',
Xan.

Ga nudúbigaca nupa náca'gaca quez quiu' ila'gú'u yöl-la' ba ca runu' ca rnna
xtídz'u.

⁶ ¿Nuzxi caz zoa ni' yehua' yubá naca ca nacu' Li', Xan?

¿Nuzxi caz zoa lada'j nupa nayēpisēgaca naca ca nacu' Li', Xan?

⁷ Nupa náca'gaca lá'ayi tun Li' bal, Dios.

Ral-la' gúnröru' Li' bal ca tun nupa nacué'len Li'.

⁸ Dios, Xángaca ni'a no'o guixxi yu, ¿nuzxi caz naca ca nacu' Li', Xantu'
nayēpisētērou'?

Naca bē' rúntica'su' ca rnna xtídz'u.

⁹ Rinná be'e quézinu' le riyasa ridxía que nísado'.

Cate' riyasa ridxía nísado', ruzóa cazu' le dxisö.

10 Busuniti cazu' bönachi Egipto, ate' gulaca ca nupa chinátigaca.
Bésilásiu' léguequi len no'o nál-la.

11 Nequi quiu' yehua' yubá,
en nequi ca' quiu' luyú ni, tu' nuzóa cazu' léguequi.

12 Naguixaj cazu' le dē tsólá'a ga za' bō' ziaga,
en le dē tsólá'a ga ridōdi gubidza beo' ziaga.
Lu yōl-la' rudzeja quéguequi ta'bōdxi'a guí'a Tabor,
en guí'a Hermón cate' ta'yōni Lo'.

13 ¡Nál-latērō naca no'o!
¡Nápatērō no'o yōl-la' huáca!
¡Nayépisētērō no'o ibéla!

14 Le naca dxi'a, en le naca tsahui' tun tsutsu le rinná bē'u.
Nacuá'len Li' yōl-la' dxi'i ladxi', en le naca idútē li.

15 Bica' bágaca nupa ta'yōni didza' que yōl-la' rudzeja.
Ta'dá lu bení' que lo', Xantu' Dios.

16 Idú dza tu'dzeja tu' zóalen Lo' léguequi,
en tu' zóalen léguequi le naca tsahui' quiu', le nayépisētērō.

17 Naca cazu' Li' yōl-la' zxōn que yōl-la' huáca quéguequi,
en tu' ruzá' ládXu'u queētú' nazxōnda' yōl-la' nál-la queētú'.

18 Nequi queē' Xanru' le run chi'i rē'u,
ate' néquinē' queē' Dios bōnni' rinná bé'enē' rē'u.
Dios na' náquiē' lá'ayi ladaj bönachi Israel.

19 Dza ni'te bé'lenu' nupa néquiguequi quiu' didza'
lu yugu' le buluf'ínu' léguequi,

gunnó': "Gúcalena' tu nu nayépisētērō.
Nuchisa' tu nu gurō caza' quia' ladaj bönachi.

20 Budzólida'-nē' David, huen dxin quia'.
Gulu'a-nē' le za le naca lá'ayi quia'.

21 Len na' caza' naguixja' lē',
ate' len na'a ca' utipa' ládXē'ē.

22 Biti' si' ye'e lē' nu rilé lē',
en bití' usaca' zi' lē' nu ruá' dō'.

23 Uquínnaja' lahuē' nupa ta'díl-lalen lē',
en gu'a nupa bití' ta'lé'e lē' dxi'a.

24 Sóalena' lē' lu yōl-la' run ca rnna xtídza'a,
en lu yōl-la' dxi'i ladxi' quia',
ate' tu' ulidzē' La', uxōna' yōl-la' nál-la queē'.

25 Guna' ga inná bē'ē ga naguela' ra' nísado',
ga idxintē ra' yegu Eufrates.

26 Ulidzē' neda', innē': Li' nacu' Xuza', en Dios quia',
enca' Nu run chi'i neda', en Nu rusólá neda'.

27 Gun caza' neda' ga gáquiē' ca bi'i lo queē' caza',
ate' tsépisētērē' ca yugu' bōnni' ta'nná bē'ē yōdzólíó.

28 Lu yōl-la' dxi'i ladxi' quia' gun chí'tica'sa' lē',
en uzóa' tsaz queē' didza' dzaga quia'.

29 Ucuá'a tsaz zxi'ini xi'sóē',

ate' sóatica'sò lataj ga inná bè'è, tsca soa yehua' yubá.

³⁰ Channö ulu'cá'ané' xzí'ini xi'sóë' xibá quia',

en cabí iluné' ca naca le buchi'a busöröa',

³¹ en channö ila'guitsjé' xibá que le gunná bè'a,

en cabí iluné' ca nácagaca le gunná bé'eda' légaquié',

³² ní'irö guna' légaquié' xiguaia' ca sa'yéaj le ta'dödi bé' tuné',

en gu'a léguequi ca naca xiguaia' nabága'gaquié'.

³³ Pero bití' ugú'a' queé' yöl-la' dxi'i ladxi' quia',

en bití' usana' guna' ca rnna le guzxi' lu na'a guna'.

³⁴ Bití' ucá'ana' cá'asö didza' dzaga nuna',

en bití' utsá'a didza' bè'a.

³⁵ Tu le nuzóa' tsutsu, en nuna' ba nalí que le naca lá'ayi quia'.

Bití' ca' si' yé'eda' David.

³⁶ Gunnía' ila'cuá'tica'sè' xzí'ini xi'sóë',

en ga rö'è rinná bè'è sóatica'sö lahua' ca gubidza.

³⁷ Naguixja' le tsaz ca nuzóa' tsaz beo',

ate' nacuá'tica'sö lúzxiba le tun ba nalí."

³⁸ Pero nuzú' tsóla'alö, en nusán ládxi'u,

en riléde'enu' nupa na' gurö cazu' quiu'.

³⁹ Nuzú' tsóla'alö didza' dzaga bénlenu' huen dxin quiu'.

Nuzötju' luyú yöl-la' unná bè' queé'.

⁴⁰ Nuquínaju' zö'ö gulún chi'i lè',

en nusunítu' yugu' lataj tsutsu queé'.

⁴¹ Yúgu'té nupa ta'dódisö ta'bán le nequi queé',

ate' bönni' dzaga yu'u queé' tu'cá'ana lè' cá'asö.

⁴² Nuchisu' nupa ta'dá'baga' lè',

en runu' ga tu'dzeja nupa bití' ta'lé'e lè' dxi'a.

⁴³ Runu' ga bití' sequi' idéli'nè' lu gudil-la,

ate' cuntú nu sequi' ucul-lè' lu gudil-la na'.

⁴⁴ Bugú' yöl-la' lachi queé',

en nuzötju' yöl-la' unná bè' queé' lu yu.

⁴⁵ Benu' ga chinagulè' sal-la' ni zoè' iz cuidí',

en nunu' ga rutuí'iné'.

⁴⁶ ¿Gáca'xte caz gunu' caní, Xan?

¿Naru' tsaz nucachi' lo'?

¿Naru' gácatica'sö yöl-la' rilé quiu' ca tu guí' réguide'e?

⁴⁷ Yöjné nabábasö iz soa' ibana',

en tu chí'isö nacuá' bönachi yödzölió ni.

⁴⁸ ¿Nuzxi caz bönni' gaca sóatica'sé' ibané', en cabí gátié'?

¿Naru' huáca usóla' cuín cazè' lu yöl-la' unná bè' que lataj chul-la?

⁴⁹ ¿Gázxité' zoa yöl-la' dxi'i ladxi' quiu' guzóa zí'alö, Xan,

lè na' buzú' tsutsu xtídzu'u gunu' queé' David,

len yöl-la' run ca rnna xtídzu'u?

⁵⁰ Yöjné ca tu'cá'ana cá'asö netu', huen dxin quiu', Xan,

enca' ca tu'cá'ana neda' cá'asö bönachi zían yödzö ízá'a.

⁵¹ Tu'cá'ana neda' cá'asö nupa bití' ta'lé'e Li' dxi'a, Xan.

Tu'cá'ana cá'asö yugu' le runa' neda', bönni' gurö cazu' quiu'.

52 ¡Yöl-la' ba Xanru' Dios iz si' zaca!
¡Ca' gaca! ¡Ön, ca' gaca!

90

1 Naca cazu' Li', Xan, ca yu'u lidxa'.

2 Zí'atêlô ca gulata' yugu' guí'a, o ca guta' yödzóliô,
ga naguela' cate' gusí lo ga idxintê dza udxi, tsaz naca cazu' Dios.

3 Runu' ga tu'huôáca bônachi bëchtô yu cate' rnno':
"Gulí'huôáca le néquinili', bônachi."

4 Quiu' Li' chi gayuá' iz nácagaca
ca dza neje le chigudôdi que,

o ca tu chí'isô chí'i dzô'ôlô.

5 Bugacu' bônachi ca tu lu yegu gubó'o, ate' gúcagaca ca tu yëla rineru'.
Cate' naca zila zéaj naca ca tu guíxi'do' rilentê luyú.

6 Cate' naca lahui' dza rizxôn, en rô' ni'a nè'e,
pero cate' chiral-la, ricuadi', en ridôdi que.

7 Rinítitu' tu' rilenu' netu',
ate' tu' ridzó'o ruúbi ruguí'itu'.

8 Nuzú' lo' xigua' nabága'tu',
en nubéaju' lu bení' quiu' dul-la' yu'u ládxi'do'otu'.

9 Tu' riléde'enu' netu' ridôdi quégaca dza queétu',
ate' chibú'u iz queétu' ca tu le rinné ládxi'tu'.

10 Tsónnalalaj yu' chí'ízisô zóatu' nabantu',
o channô nál-latu', huazóatu' idú tápalalaj iz,
pero runtu' dxin bayudxi, en ruhuí'initu' yugu' iz na',
tu' ridôditê quéguequi iz na', ate' uzá'atu'.

11 ¿Nuzxi caz réajni'i tsa naca yöl-la' rilé quiu'?

¿Nuzxi caz nôzi ca naca tsöbi yu'u nu na' rilenu'?

12 Que lê ni na' busêdi netu' para guéquibe'etu' tsa gácagaca iz zóatu',
para gácatu' bônachi ta'yéajni'i lo' Li'.

13 ¿Gáca'xte caz biti' huéchi' ládxi'u netu', Xan?
Buéchi' ladxi' netu', yugu' huen dxin quiu'.

14 Tu zila tu zila buluf'i netu' ca naca yöl-la' dxi'i ladxi' quiu',
para gúl-latu' lu yöl-la' rudzeja queétu', en uzí'itu' xibé yugu' dza na'.

15 Ben ga udzéjatu' tsa chigulaca dza busaca' zi'u netu',
en tsa gulaca iz biti' guca dxi'a queétu'.

16 Buluf'i netu', yugu' huen dxin quiu', ca naca le nunu',
en buluf'i zxi'initu' ca naca yöl-la' zxôn quiu'.

17 ¡Buzá' ladxi' queétu', Xantu' Dios,
en ben ga irúaj dxi'a dxin runtu'!

¡Ön, ben ga gaca dxi'a lo' dxin runtu'!

91

1 Nu bönni' ruzxöni ládxi'ë Dios para gun chí'ë lê',
en rizi'ë Dios Nu napa idútê yöl-la' huáca, para gácalenê' lê',

2 gaca guíe' Xanru': "Nacu' Nu run chí'i neda', en Nu ruzóa neda' tsutsu.
Nacu' Dios quia', ate' ruzxöni ládxi'a Li'."

3 Usólá cazê' Dios Li' lu du yalaj que nu rizôn bônachi,
en lu yödzôhué' le rusuniti.

⁴ Usubáguë'ë li' ca rusubága'ba' böra yugu' bórado' queëba',
ate' gaca chi'u lu në'ë ca raca quegacaba' bórado' znan xilaba' yøjede.
Le run chi'i rë'u, en le ruzóa rë'u tsutsu naca yöl-la' run ca rnna xtídzë'ë cheë'.

⁵ Biti' gádxinu' le run gadxi bönachi chi'i dzö'ölö,
en bití' gádxinu' yaga lahui tuchi' tu'së bönachi lahui' dza,

⁶ en bití' gádxinu' yödzo'hué' le rilén ga naca chul-la,
en bití' gádxinu' le naca xihui' le ruti bönachi lahui' dza.

⁷ Ilátigaca chí gayuá' bönachi cuitu' lí',
en ia'chí cö' chí gayuá' cuitu' ibëla,
pero bití' bi gaca quiu' lí'.

⁸ Le nácaté uyú iná'asu',
en ilé'enu' le rubí'i quegaca nupa tuá' dö'.

⁹ Tu' nuzú'-në' Xanru' Nu run chí'i lí',
nuzú'-në' Dios nayëpisëtë'rë' Nu gácalen lí',

¹⁰ bití' bi gaca quiu' le cabí naca dxi'a,
en nitú le naché' yödzo'hué' bití' tsu'u lidxu',

¹¹ tu' cu'u cazé' Dios lí' lu ná'agaquië' gubáz lá'ayi queë',
para ilún chí'ë lí' gátí'tës ga ridó'.

¹² Lu ná'agaquië' ila'ché'ë lí',
para cabí tsøjchégu'u guiøj.

¹³ Uléaj ulibu' bëdxi guíxi', en bëla sínia'.
Usunu' lë'e labu' bëdxi guíxi'do', en bëla xitsiní'.

¹⁴ Rnné' Dios: "Nadxi'inë' neda', ate' que lë ni na' usölá' lë'.
Uzóa'-në' tsaz xitsá'tërö tu' núnbë'ë La'.

¹⁵ Ulidzë' neda', ate' ubi'a didza'.
Sóalena' lë' cate' bi gaca queë'.

Usölá' lë', en guna' lë' bal.

¹⁶ Uzánda'a dza soë' ibanë',
en ulu'í'ida'-në' ca gaca usölá' lë'."

92

¹ ¡Bica' tsahui' naca rigú'utu' Li' yöl-la' ba, Xan,
en rúl-latu' le tun Li' bal, Dios nayëpisëtë'rë',

² en rusiyöntu' bönachi yugu' zila ca ruhuéchi' ládxi'u netu',
en rulu'ítu' lahui yugu' dzö' ca runu' ca rnna xtídzu'!

³ Rúl-latu' len yugu' bihuël-la,
en rúl-latu' yugu' le lachi ca tul-la.

⁴ Le zxön nunu' Li', Xan, run ga rudzëjatu',
ate' ruzi'tu' xibé le núngaca lu no'o.

⁵ Bica' zxön náca'gaca le nunu' Li', Xan.
Zxöntërö le rizá' ládxi'u gunu'.

⁶ Zoa tu le cabí gaca inözínë' bönni' nazxí icjë',
en bití' gaca tséjni'inë' bönni' canöz le.

⁷ Nupa nucá'anagaca Dios ila'yán ca ta'yán guíxi'do',
en ulu'zí' xibé le tun nupa tuá' dö', pero ila'niti tsaz,

⁸ tu' nayëpsëtëru' Li' tsaz, Xan.

⁹ Naca bë' le gaca quegaca nupa bití' ta'lé'e Li' dxi'a, Xan.
Naca bë' ila'niti nupa bití' ta'lé'e Li' dxi'a.

Ulu'gá'ana cá'asó yúgu'të nupa tuá' dö'.

10 Nunu' ga nácatëra' nal-la ca nácaba' bëdxi.
Nagú'u neda' le za le run ga rudzëjada'.

11 Ilë'e quëzida' cate' uxicju' nupa biti' ta'lë'e Li' dxi'a,
en yönda' cate' ila'bödxi yechi' nupa tuá' dö', nupa na' ta'díl-lalen neda'.

12 Ila'yán nupa nácagaca tsahui' ca ta'yán yaga zina' ca'.

Ila'zxön ca ta'zxön yaga ró'gaca lu guí'a Líbano.

13 Nácagaca ca yaga nudá'gacu' ra' yu'u lidxu', Xan,
le ta'zxön lu lö'a lataj quiu', Dios queëtu'.

14 Cate' ni' yú'ugaca iz zían ila'bía le zxixi quëguequi.
Ilácagaca tsutsu, en ila'cuá'tica'sö ya'a.

15 Caní gaca para gaca bë' náquië' tsahui' Xanru', Nu run chi'i neda'.
Biti' bi zóalen Lë' le cabí naca tsahui'.

93

1 ¡Rinná bë'ë Xanru'!

¡Nácuë' yöl-la' ba zxön queë'!

¡Nácuë' zxë' Xanru', en núguië' lë'ë yöl-la' unná bë'!

¡Nuzóë' tsutsu yödzülió, ate' biti' utá cuini!

2 ¡Tszaz nuzú' tsutsu ga rö'u rinná bë'u, Xan,
en zóatica'su' Lí'!

3 Riyasa ridxía nisa yugu' lu nísado', Xan.

Riyasa ridxía nisa, en ru'u bö que.

Riyasa ridxía nisa yugu' lu nísado', en yugu' lu yegu.

4 Xanru' Dios yehua' yubá nápatërë' yöl-la' unná bë'
ca bö ru'u lu nísado' le riyön ca guziú' rinnë,
enca' ca le riyasa ridxía nisa lu nísado'.

5 Tszaz naguixju' xibá quiu', Xan,
ate' idú lá'ayi naca ga zoa cazu' Lí'.

Caní zóatica'sö na'a dza, en dza si' zaca.

94

1 Nacu' Dios, Xan, Nu ruzí' lëbi bönachi.

Bulu'i cuinu', Dios, Nu ruzí' lëbi.

2 Ruchi'a rusöró cazu' yúgu'të bönachi.

Guzë, ate' len yöl-la' huáca zxön quiu' bubí'i quégaca nupa tun ba zxön
cuínguequi.

3 ¿Gáca'xte caz ulu'zí' xibé nupa tu'cá'ana Lí', Xan?

¿Gáca'xte caz ulu'zí' xibé?

4 ¿Gáca'xte caz ilún ba zxön cuínguequi, en ilu'í didza' zí'?

¿Gáca'xte caz ilún ba zxön cuínguequi ní'a que dö' tuá'gaca?

5 Tu'sunítië' nupa néquiguequi quiu', Xan.

Tu'saca' zí'ë nupa néquiguequi quez quiu'.

6 Tútigaquië' nigula uzëbi, enca' yugu' bi'i uzëbido',
en tunë' le naca xihui' ladaj bönachi zí'tu'.

7 Ta'nnë': "Biti' ilë'enë' Xángaquië' rë'u,
en biti' rufí' lãdxë'ë Dios queë' Jacob lë ni."

8 Guli'tséajni'i, bönachi biti' nözguequi,

ate' libí'ili', bönachi catún bal, ¿bátaxi tséajni'ili'?

⁹ Benë' Dios guídi nágaru'. ¿Naru' cabí riyón quézinë'?

Benë' Dios guióǵ loru'. ¿Naru' cabí rilé'e quézinë'?

¹⁰ Ruzéajni'i quézinë' Dios bönachi yúgu'të yödzo.

¿Naru' cabí gunë' léguequi xiguia'?

Ruchiza cazë' icja ládxi'do'oru' yöl-la' réajni'i.

¿Naru' cabí réquibe'enë' bi runli'?

¹¹ Nöz quézinë' Xanru' yugu' le ta'zá' ládxi'gaca bönachi.

Nözinë' canöz naca le ta'zá' ládxi'gaca.

¹² Bica' ba bönni' na' ruzéajni'i quézinu'-në', Xan,

en rusedi quézinu'-në' ca naca xibá naguixju' Li'.

¹³ Gunu' ga uzi' ládxi'ë cate' bi gaca queë',

ga idxinrö dza tsú'ugaca yeru ba nupa tuá' dö'.

¹⁴ Biti' usán në'ë Xanru' bönachi queë',

en biti' uca'anë' nupa néquiquequi quez queë'.

¹⁵ Ca naca le naca tsahui' uchi'a usöröë' rë'u le yúbölö,

ate' ulu'zi' xibé nupa nácgaca tsahui'.

¹⁶ ¿Nuzxi caz tíl-lalen nupa tuti bönachi para gácalen neda'?

¿Nuzxi caz gácalen neda' cate' nacua' nupa tuá' dö' quia'?

¹⁷ La'tu' cabí gúcalenë' Xanru' neda',

la' yöjtsú'utea' lataj chul-la que yöl-la' guti.

¹⁸ Gunnía': "Chizóa' ibixa",

ate' lu yöl-la' dxi'i ladxí' quiu' guzxönu' neda', Xan.

¹⁹ Cate' ruúbi ruguí'i ládxi'da'ahua',

ruhuë tsahú'u neda', en runu' ga rudzédada'.

²⁰ Biti' ca' gunu' tsözxön nupa tu'chi'a tu'sörö netu' ca naca le cabí naca tsahui',

nupa na' tu'héaj tsahui' le cabí naca tsahui'.

²¹ Tu'dubë' tsözxön para ilútië' nupa nácgaca tsahui',

en ta'chúguië' quégaca nupa biti' bi nabága gaca ilátigaca,

²² pero run chi'i cazë' Xanru' Dios neda'.

Nuzöë' neda' tsutsu, ate' ruzxöni ládxa'a lë'.

²³ Ubi'ë quégaquië' ca naca dö' tu'ë,

en usunítië' légaquië' tu' nözi xiguia' nabága'gaquië'.

Usunítië' dërö Xanru' Dios légaquië'.

95

¹ Gulí'dá, gúl-laru' queë' Xanru' lu yöl-la' rudzeja queëru'.

Lu yöl-la' rudzeja queëru' cödxi'aru' que Nu na' naca ca tu guióǵto'o ga nuláru'.

² Uyéajru' lahuë', en guiëru'-në': "Xclenu'."

Lu yöl-la' rudzeja queëru' cödxi'aru' lahuë', gúl-laru' yugu' salmo.

³ Xanru' Dios náquië' Dios nayëpisëtërë'.

Nápatërë' yöl-la' unná bë' ca yúgu'të dios izá'a.

⁴ Lu na' cazë' yu'u le dë ga rë' znan luyú,

ate' néquiquequi ca' queë' guí'a sibi.

5 Nequi queë' nísado', tu' nun cazë' le,
en len ná'asë' benë' luyú bidxi.

6 Guli'dá, gunru'-në' zxon, en uzóa zxíbiru' lahuë'.
Uzóa zxíbiru' lahuë' Xanru' Nu ben rë'u.

7 Naca cazë' Lë' Dios queëru',

ate' nácaru' bönachi rugagu cazë', en ca bö'cu' zxila' richë' cazë'-ba' lu nëë.
Rnna cazë' Dios: "Na'a, channö rë'ënili' yönili' chi'a,

8 biti' gunli' zidzaj icja ládxi'do'oli' ca gulunë' xuz xtó'oli' lataj na' lë Meriba,
en calëga ca gulunë' la' guixi' ga dë lataj lë Masa,

9 cate' ni' gula'zì' bë'ë xuz xtó'oli' neda'.

Gula'zì' bë'ë neda' sal-la' bila'lé'enë' yugu' le bena'."

10 Idú choá' iz gúquida' zì' bönachi gula'cuá' dza ni',
ate' gunniá': "Ta'chixi ta'níguinë' lu icja ládxi'do'gaquië',
en biti' nözguequinë' le rë'ënda' ilunë'."

11 Que lë ni na' lu yöl-la' rilë quia' bena' tsutsu xtídza'a,
gunniá': "Biti' ca' ila'yázië' ga ulu'zì' ládxe'ë tsözxön len neda'."

96

1 ¡Guli'gul-la queë' Xanru' tu le cubi!

¡Guli'gul-la queë' Xanru', yúgu'tëli' zóali' yödzölió!

2 ¡Guli'gul-la queë' Xanru'! ¡Guli'gún zxon lë'!

Tu dza tu dza buli'siyón bönachi didza' dxi'a ca rusölë' rë'u.

3 Buli'siyón bönachi yúgu'të yödzö yöl-la' ba queë'.

Buli'siyón yúgu'të bönachi le nácacaca zxon nunë'.

4 Zxöntëro náquië' Xanru', ate' runda' bayúdx cú'uru'-në' yöl-la' ba.

Ral-la' gádxitëru' Lë' ca tadxì bönachi izá'a dios quéguequi.

5 Yugu' dios quégaca bönachi izá'a nácacacasö budó' guiój budó' yaga,
pero Xanru' Dios nunë' lúzxiba xitsá'.

6 Nacuá' yöl-la' bení', en yöl-la' ba lahuë' Lë'.

Nacuá' yöl-la' huáca, en yöl-la' lachi ga zoa cazë'.

7 ¡Guli'cu'ë Xanru' yöl-la' ba, bönachi yúgu'të yödzö!

¡Guli'cu'ë yöl-la' ba, en yöl-la' huáca!

8 ¡Guli'cu'ë Xanru' yöl-la' ba ni'a que Lë'!

¡Guli'guá' le unödzjali', en guli'dá lahuë'!

9 ¡Guli'gún Lë' zxon, náculi' le naca ba'a!

¡Guli'zxizi lahuë', bönachi idútë yödzölió!

10 Guli'nná lógaca bönachi yúgu'të yödzö: "Rinná bë'ë Xanru'.

Naguixjë' tsaz luyú, ate' biti' utá cuini.

Ca naca le naca tsahui' uchi'a usöröë' quégaca yúgu'të bönachi."

11 Ral-la' udzeja lúzxiba, en ulu'zì' xibé luyú.

Ral-la' cödxì'a nísado', en ila'bödxì yúgu'të le nacué' lu nísado'.

12 Ral-la' udzeja guixi' caz, en yúgu'të le nacué' la' guixi'.

Lu yöl-la' rudzeja quéguequi ilúl-la yaga

13 lahuë' Xanru', tu' si' ulé'.

Guidë' duchi'a dusöröë' nupa nacué' yödzölió.

Ca naca le naca tsahui' uchi'a usöröë' quégaca yúgu'të bönachi,
enca' quégaca bönachi yúgu'të yödzö para ilunë' ca rnna xtídzë'.

97

1 ¡Rinná bë' cazë' Xanru' Dios!

¡Ral-la' ulu'dzeja bönachi idütë yödzölió!

Buli'sí' xibë', libí'ili' zóali' yúgu'të yödzö izá'a.

2 Ró'gaca böaj, en le chul-la idú gásibi'ilö ga na' zoë'.

Le naca dxi'a, en le naca tsahui' tu'zóa tsutsu le rinná bë'ë.

3 Rinöru tu guí' zxön lahuë',

le uzegui' nupa ta'dá'baga' Lë'.

4 Tu'zení' le ta'yëpi yösa yödzölió.

Rilé'e luyú lë ni, en rizzizi.

5 Tu'úna' guí'ado' ca ruún bidxina' buz lahuë' Xanru'.

Náquië' Xani idütë yödzölió.

6 Lúzxiba xitsá' naca bë' náquië' tsahui',

ate' ta'lé'e bönachi yúgu'të yödzö yöl-la' zxön queë'.

7 Tu'tuí'i yúgu'të nupa tun zxön budó' guiój budó' yaga,

nupa na' tun ba zxön cuínguequi ní'a quégaca budó' quéguequi na'.

Ulu'gá'ana cá'asö yúgu'të dios quégaca bönachi izá'a lahuë' Xanru'.

8 Bila'yöni bönachi Sión, en bulu'dzeja,

enca' yugu' zxi'ini xi'söë' Judá.

Tu'dzéjanë' ca ruchi'a rusöröu' netu', Xan.

9 Nayépisëtë'rö cazu' Li', Xan, ca yúgu'të nupa nacuá' yödzölió.

Nayépisëtë'rö cazu' Li' ca yúgu'të dios quégaca bönachi izá'a.

10 Núlöli' nadxi'ili'-në' Xanru', guli'guequi zi' le naca dö'.

Run chi'i cazë' bö' nácagaca caz nupa néquiguequi queë'.

Rusölë' léguequi lu ná'agaca nupa tuá' dö'.

11 Ruzení'tica'sö bení' queë' nupa nácagaca tsahui',

ate' tu'zi' xibë' nupa nácagaca dxi'a.

12 ¡Buli'sí' xibë' Xanru' núlöli' nácali' tsahui'!

¡Buli'subán ládxi'li' ca nunë' Dios Lá'ayi, en guli'cu'ë yöl-la' ba!

98

1 ¡Guli'gul-la queë' Xanru' tu le cubi,

tu' nunë' le tun ga rubániru'!

Len yöl-la' unná bë' zxön queë', en yöl-la' huáca lá'ayi queë' nadéli'në' lu gudil-la.

2 Nunë' Xanru' ga naca bë' le nadéli'në'.

Nulu'ínë' bönachi yúgu'të yödzö náquië' tsahui'.

3 Len yöl-la' dxi'i ladxí' queë', en yöl-la' li ladxí' queë'

benë' ca rnna xtídzë'ë le guzxi' lu në'ë gunë' quégaca bönachi Israel.

Bila'lé'e bönachi idütë yödzölió ca busölë' rë'u Dios queëru'.

4 ¡Lu yöl-la' rudzeja queëli' guli'gul-la queë' Xanru', yúgu'tëli' zóali' yödzölió!

¡Idú ládxi'li' guli'cu'ë yöl-la' ba, en guli'gul-la queë' le naca lá'ayi!

5 ¡Guli'gul-la queë' Xanru' yugu' salmo, en guli'quinnaj yugu' bihuël-la!

¡Guli'quinnaj læ'egaca arpa, en guli'gul-la yöl-la' ba queë'!

⁶ ¡Guli'cödxí lúzugacaba' chivo, en lúzugacaba' bēdxi lahuë' Xanru' Dios, Nu rinná bē'!

⁷ ¡Buli'lidza zidzaj, nísado', en yúgu'tē le nacuaá' nisa na'!

¡Guli'gul-la yödžölió, en yúgu'tē nupa nacuaá' ni'!

⁸ ¡Guli'capa' ná'ali', yugu' yegu,

ate' lu yöl-la' rudzeja queëli' guli'gul-la lahuë' Xanru', libí'ili', guí'ado',

⁹ tu' zē'ē duchi'a dusöröë' quégaca bönachi yödžölió!

Ca naca le naca tsahui' uchi'a usöröë' quéquequi,
en ca naca le naca dxi'a tsahui' inná bé'enē' yúgu'tē bönachi.

99

¹ ¡Rinná bē'ē Xanru' Dios! Ta'zxizi yúgu'tē bönachi.

Rö'ē rinná bē'ē ladaj nupa nápagacatērö yöl-la' huáca,
légaca Querubín, ate' rixxizi luyú.

² Nayēpisētērē' Xanru' lu yödžö Sión,
ate' rinná bé'enē' bönachi yúgu'tē yödžö izá'a.

³ Ral-la' ila'gú'u Lē' yöl-la' ba yúgu'tē bönachi,
tu' caní sa'yéaj, en le run ga runru' Lē' bal.

¡Lá'ayi náquiē' Lē'!

⁴ Nadxí'i quézinu' le naca tsahui', Li', Bönni' unná bē' nayēpisē.

Tsaz naguixju' le naca dxi'a tsáhui'do',

en nuzú' quégaquiē' xzí'ini xi'sóē' Jacob le naca tsahui', en le naca idútē li.

⁵ ¡Guli'gún zxönē' Xanru' Dios!

Buli'zechu zxíbili' lahuë' Lē' ga rö'ē rinná bē'ē.

¡Lá'ayi náquiē' Lē'!

⁶ Guláquiē' Moisés, en Aarón bixúz queë',
ate' benē' Samuel tsözxön nupa gula'yéaj ládxi'gaca Lē'.

Bulu'lidzē' Xanru', ate' bubí'i cazē' didza'.

⁷ Tu lu böaj bē'lenē' légaquiē' didza'.

Gulunē' ca ta'nná bē' xibá queë', en yugu' le gunná bé'enē' légaquiē'.

⁸ Bubi'u didza' lógaca bönachi quiu', Xantu' Dios.

Bulu'ínu' légaquiē' nacu' Dios, en runiti lo' bönachi,

pero rubi'u quégaquiē' ca sa'yéaj dö' tu'ē.

⁹ ¡Guli'gún zxönē' Xanru' Dios!

¡Buli'zechu zxíbili' lahui' lo guí'a lá'ayi ga zoa cazē',

tu' náquiē' lá'ayi Xanru' Dios!

100

¹ ¡Lu yöl-la' rudzeja queëli' guli'gul-la queë' Xanru',
libí'ili' zóali' idútē yödžölió!

² ¡Lu yöl-la' rudzeja queëli' guli'cu'ē yöl-la' ba Xanru'!

¡Guli'dá lahuë' Lē', en lu yöl-la' rudzeja queëli' guli'gul-la queë'!

3 ¡Guli'tsöjné Xanru', náquië' Dios!

Buzá' cazë' rë'u, en calëga rácasö queëru' zóaru'.
Nácaru' bönachi queë', en nácaru' ca bö'cu' zxila' queë'.
4 Nálí'tsaza zaca' ra' yu'u queë', guiëli'-në': "Xclenu'."
Guli'tsaza gapa naca lö'a queë', cú'uli'-në' yöl-la' ba.
Guli'guié': "Xclenu'", en guli'gunë' zxön.

5 ¡Náquië' dxi'a tsahui' Xanru' Dios, ate' zóatica'sö yöl-la' dxi'i ladxi' queë'!
¡Zóatica'sö yöl-la' run ca rnna xtídzë'ë queë'!

101

1 ¡Gul-la' ca runu' ca rnna xtídzü'u, en ca nacu' tsahui'!
¡Gul-la' yöl-la' ba quiu' Li', Xan!

2 Güi'i ládxa'a guna' le naca idú dxi'a.

¿Bátaxi huéçju' quia' neda'?

Lu yu'u lidxa' guna' le naca idú ladxi'.

3 Biti' gu'a lataj sóalen neda' nitú le naca xihui'.

Biti' rilé'eda' dxi'a le tun nupa tu'cá'ana Li'.

Biti' ca' guna' léguequi tsözxön.

4 Biti' ca' gaca' chopá ladxi'.

Biti' ca' guna' le naca dö'.

5 Usunítia' dërö nu bönni' rinnë' que luzë'ë balándo'os.

Biti' ca' guá' ilena' nu run ba zxön cuini.

6 Uyúa' dxi'a tsáhuí'do' nupa tun ca rnna xtídzá'guequi luyú ni, para
ila'cuá'len neda'.

Nu bití' bi xiguaia' nabaga' huáca gun xichina'.

7 Biti' ca' tsöjsóá lidxa' nu rizi' yë'.

Biti' gu'a lataj ugá'ana lahua' nu ruí'í didza' le cabí naca.

8 Yugu' zila usunítia' yúgu'të nupa tuá' dö' luyú ni,
para ucuíta' lu yödzo' queë' Xanru' yúgu'të nupa tuti bönachi.

102

1 ¡Buzë' nagu' le rulidza' Li', Xan!

¡Bë' lataj idxín lo' le rinaba yúdxida' Li'!

2 Biti' ucache' cuinu' lahua' cate' bi rusaca' zi' neda'.

Buzë' nagu' neda', en gudáchi ubi'u didza' cate' rulidza' Li'.

3 Yöl-la' na'bán quia' ruúlu ca dzön,
ate' régui rilá lu dxita lu bin quia' ca tu guí'.

4 Rudú ládxa'a ca raca que guixi' nabidxi,
en bíti'rö rizé ládxa'a bi gahua'.

5 Tu' rinnëda' ládxa'a nadxítalë'a.

6 Naca' ca tuba' biguínni zóaba' luyú bidxi,
o ca tuba' cuturú dxíaba' tu lu yu'u nadachi.

7 Nabéaj yëla guióç lahua',
ate' naca' ca tuba' biguínido' dxíaba' túziba' íçjo'o yu'u.

8 Yugu' dza nupa bití' ta'lé'e neda' dxi'a tu'didza' yudxi neda'.
Nupa tu'titaj neda' tu'gún dxin la' cate' nu tu'dxía dö'.

9 Naca le rahua' ca dödo'sö,
en nutsi' nisa ribödxa' le rë'ja'.

10 Caní raca quia' tu' rilenú' neda', en réquinu' neda' zí'.
Gulisu' neda', en gurú'unu' neda' tsölä'alö.

11 Naca yöl-la' na'bán quia' ca tu zxul-la rilá' cate' ribía gubidza,
en rudú quia' ca raca que guixi' ricuádi.

12 ¡Li', Xan, zóatica'su',
en zóaléntica'sö Lo' bönachi!

13 ¡Chasu', en huéchi' ládxi'u bönachi yödzo Sión!
¡Chibidxín dza gü'i ládxi'u léguequi!

¡Ön, chibidxín dza na'!

14 Netu', huen dxin quiu', nadxí'itu' yugu' guiöj nacua' lu zö'ö run chi'i yödzo
Sión,

en ruí'i ládxi'tu' ga ridxintë bëchtö rö'ö la' nöza que.

15 Bönachi yugu' yödzo izá'a iladxi Lë' Xanru',
ate' nupa ta'nná bë' yödzoilió iladxi yöl-la' zxön queë'.

16 ¡Nuchisë' Xanru' caz yödzo Sión,
ate' ulu'i lahuë' ni' lu yöl-la' zxön queë'!

17 Riyönnë' le tu'lidza Lë' nupa ta'yadzaj ta'yudxi.
Biti' ca' uzóë' tsölä'alö le tu'lidza yudxi Lë'.

18 Buli'zúaj lë ni lu guichi para ulu'laba zxi'ini xi'sóali' le,
ate' nupa si' ilalaj ila'gú'u Xanru' yöl-la' ba.

19 Ga ni' ribözë' Xanru' xitsá' lu lataj lá'ayi queë',
ga ni' zoë' Xanru' yehua' yubá, ruzé naguë'.

20 Riyönnë' le ta'nnë ladxí' nupa nadzúngaca,
en usanë' nupa narugu quéguequi ilátigaca.

21 Soa nu usiyöni bönachi yödzo Sión ca naca Lë' Xanru',
ate' ila'gú'u Lë' yöl-la' ba lu yödzo Jerusalén,

22 cate' ulu'dubi tsözxön bönachi yugu' yödzo izá'a,
en bönachi yugu' luyú,
ate' tsözxön ila'gú'u yöl-la' ba Xanru'.

23 Benë' Xanru' ga gucuídi'da' la' nöza,
en nunë' ga soa' nabábasö dza.

24 Gunnía': Dios quia', biti' gútiu' neda'
cate' ni zoa' gatsaj iza ral-la' soa' ibana'.
Zóatica'sö casu' Li'.

25 Dza ni'te gudixju' yödzoilió,
ate' len na' casu' benu' lúzxiba.

26 Huadödi quéguequi, pero Li', tsaz idi'u.
Ilexu' yúgu'tëguequi ca riyexu' lari',
en ca tu lari' utubu' léguequi, en utsó'o léguequi.

27 Li', biti' ca' utsá' cuinu', en biti' ca' guexu'.

28 Zxi'inigaca huen dxin quiu' ila'böza dxi'a tsáhui'do',
ate' ucú'u tsutsu zxi'ini xi'sóagaquië' lo'.

103

1 ¡Bil-la yöl-la' ba queë' Xanru', li', bö' naca caza',
ate' idütë le naca', bil-la yöl-la' ba que Lë' lá'ayi!

2 ¡Bil-la yöl-la' ba queë' Xanru', li', bö' naca caza',
en biti' gal-la ládXu'u yúgu'të le ruzi'u xibë'!

3 Runiti lo cazë' neda' ca naca yúgu'të dul-la' nabága'a,
en rugüë' yúgu'të xihuë'a.

4 Ruhuoá'uë' neda' lu lataj chul-la,
en ruzá' ládXë'ë quia' yöl-la' dxi'i ladxi', en yöl-la' ruhuéchi' ladxi'.

5 Rigu'ë xinöza' yugu' le naca dxi'a,
lë na' run ga ruhuoáca' ca tu bönni' zoë' iz cuidi' queë',
ca na' raca queéba' bisia'.

6 Runë' yugu' le naca dxi'a,
en ruchi'a rusöröë' quégaca yúgu'të nupa zoa nu rusaca' léguequi zi'.

7 Buzéajni'inë' Moisés yugu' le gun cazë' Lë',
en buluí'inë' bönachi Israel yugu' le zXön runë'.

8 Xanru' ruhuéchi' ladxi' cazë' bönachi, en ruzá' ládXë'ë quéguequi.
Biti' rilétenë', pero nadxí'itiqui'sinë' léguequi.

9 Biti' ruzétiqúi'sinë' rë'u le bach,
en biti' rilétiqúi'sinë'.

10 Biti' runë' rë'u xigua' ca sa'yéaj dö' nuá'aru',
en biti' rubi'ë queëru' ca naca le xihui' nabága'ru'.

11 Naca caní tu' ca na' naca xitsá'tërö lúzxiba ca luyú ni,
la' canisö naca zXön ca nadxí'inë' Xanru' nupa tadxi Lë'.

12 Tsca nácatërö zi'tu' ga rilén gubidza ga ridxintë ga ribía,
la' canisö rucuitë' yugu' le ta'bága'ru' Lë'.

13 Ca na' ruhuéchi' ládXë'ë xúzgaca cázabi' yugu' zXi'inë',
la' canisö ruhuéchi' ládXë'ë Xanru' nupa tadxi Lë'.

14 Caní runë' tu' nözinë' le nácaru'.
Röjnenë' néquiniru' bëchtö yu.

15 Tsca nácgaca dza zóaru' nabanru',
nácagaca ca raca que xiyija guíxi'do'.

16 Cate' recaj bö', ruúlu runítisö xiyija na',
en biti' naca bë' ga na' guzóa.

17 Xanru', tsaz nadxí'inë' nupa tadxi Lë',
en runë' quégaca zXi'iniguequi le naca dxi'a.

18 Caní runë' quégaca nupa tun ca rnna xtídzë'ë,
en quégaca nupa tun ca rinná bë' xibá queë'.

19 Naguixjë' Xanru' xilatjë' yehua' yubá ga na' rö'ë rinná bë'ë.
Rinná bé'enë' yúgu'të le dë.

20 ¡Guli'cu'ë yöl-la' ba Xanru', libí'ili', gubáz lá'ayi queë',
nápateröli' yöl-la' huáca zXön, en runli' ca rnna xtídzë'ë,
libí'ili' na' runli' ca rnna didza' ru'ë!

21 ¡Guli'cu'ë yöl-la' ba Xanru', libí'ili' nácali' ni'a në'ë guizxi yu,
libí'ili', huen dxin queë' na', runli' ca rë'ëni quézinë' Lë'!

22 ¡Guli'cu'ë yöl-la' ba Xanru', yúgu'tëli' na' nucu'ë libí'ili',
libí'ili' zóali' yúgu'të lataj ga na' rinná bë'ë Lë'!

¡Bil-la yöl-la' ba queë' Xanru', li', bö' naca caza'!

104

1 ¡Gulu'ë yöl-la' ba Xanru', li', bö' naca caza'!

¡Nayëpisëtëru' Li', Xana' Dios!

¡Zxo' nacu' naca yöl-la' zxön, en yöl-la' ba!

2 ¡Nusubaga' cuinu' bení' ca zxo' nacu cazu',
ate' naguixaj cazu' lúzxiba ca tu lari' zxön!

3 Naguixju' xilataj lidxu' lahui nisa dë xitsá'alö.
Dxia cazu' lu böaj ca tu lu carreta, en ridó' lu bö'ös.

4 Rugunu' dxin bö' raca ca tu gubáz quiu',
enca' yugu' guí' ca huen dxin quiu'.

5 Nuzú' tsutsu luyú ni lu xilibi,
en bití' ca' gaca nu utsá' xilataj.

6 Gudixju' nisa zxön luyú ni ca tu lari' nabaga' le,
ate' yöjbaga' nísado' na' yugu' guí'a.

7 Buzenu' le bach nisa na', ate' burúaj,
en cate' biyön chi'u, bayúdx buzunnaj nisa na'.

8 Gurén yugu' lu guí'a, en bötaj ga naca ra' yegu,
ga bidxintë yöjsóa ga nupó'o que nisa na'.

9 Gudixju' buzá' que nísado' ga bití' gaca tódi.
Bíti'rö caz tseajbaga' nisa na' luyú bidxi.

10 Runu' ga ralaj beaj yugu' lë'e guí'ado',
enca' ga ta'dódi yegu ga rö'ögaca röga'.

11 Yudzu yugu' yegu na' nisa té'ajba' böa' guixi',
le rugúa yöl-la' ribídx quégacaba' burro ta'dásiba' la' guixi'.

12 Yugu' ra' yegu rö'ögaca yaga ga tu'dxiaba' biguínido' xcá'agacaba',
en túl-laba' yugu' lu ni'a në'eguequi.

13 Rigú'u nisa guiój quiu' yugu' lu guí'a,
en runu' ga tu'huöla tu'dzé'e yugu' le dzö'ö luyú.

14 Runu' ga rizxón yö le táguba' böa' bëdx,
en yugu' cuan guixi' tu'gún dxin bönachi,

le ilagu ni'a que le nudó'o luyú,

15 en xisi uva le run ga tudzeja ládxi'guequi,
en za olivo le ta'gú'u láhuiguequi lu yöl-la' ruzí' xibé quéguequi,
en yöta le nabániguequi.

16 Tu'zí' xibé nisa guiój yaga cedro dzö'ö lu guí'a Líbano,
yugu' yaga na' budó'o, Xantu'.

17 Ni' tu'dxiaba' biguínni xcá'agacaba',
ate' tunba' biyúz lídxigacaba' ni'.

18 Nunu' Li' yugu' guí'a sibi ga dzö'öba' bdxina' guixi',
enca' yugu' zzan bulóaj gapa tapa chi'i cuíngacaba' bizxidxu'.

19 Benu' beo' le naca bë' yugu' beo' que iz,
ate' ribía gubidza ga ral-la' cuía.

20 Benu' chi'i dzö'ölö, en cate' naca chul-la
ta'rúajba' ta'daba' böa' guixi'.

21 Ta'bödxi'aba' bëdxi guixi'do', ta'zóa régu'ba' le ila'zönba'.
Tu'guíajba' le nuzóë' Dios iláguba'.

22 Cate' rilén gubidza tu' dxinba' lídxigacaba',
en rjőxagacaba' yugu' lu zxan bulóaj quegacaba'.

23 Ní'irő ta'rúaj bönachi sőjaca huen dxin,
en tun caz dxin ga ridxintë ribía gubidza.

24 Xan, zióntërő yugu' le nunu' Li'.

Len yöl-la' réajni'i xzön quiu' nunu' yúgu'të.
Nalí luyú yődzölió ni yugu' le dxi'a nunu'.

25 Ni' zoa nisa nácatërő xzön,
ga na' nacuá'aba' bōa' guizxi yu,
bōa' cuidi', enca' bōa' xzön.

26 Ni' ta'dōdi barco xzön,
enca' bōa' xzön lēba' leviatán, bōa' na' nuzóa cazu'.

27 Yúgu'tēba' ta'bőzaba' Li',
cate' idxinrő ugagu' légacaba'.

28 Rugagu' légacaba', ate' táguba'.
Runödzu' le iláguba', ate' tu'huőlaj ta'dzé'eba'.

29 Cate' ruhucju' quiu', tádxiba',
en cate' ruzi'u bō' quiu', tátiba',
en ruhuőáca yu le néquinigacaba'.

30 Cate' rigú'u légacaba' bō', nabángacaba'.
Rucubu' yúgu'të le nacuá' yődzölió.

31 ¡Ral-la' gácatíca'ső yöl-la' ba queë' Xanru'!
¡Ral-la' ila'yaza ládxi'tíca'ső bönachi le nun cazë' Lë'!

32 Ruyúë' Xanru' luyú, ate' rízzizi.
Riganë' yugu' gu'a, ate' rirúaj dzön.

33 ¡Gul-la' queë' Xanru' yúgu'të dza soa' ibana'!
¡Gul-la' yöl-la' ba queë' Dios tsanni ni zoa' nabana'!

34 ¡Zxixi naca le rizá' ládxa'a ca naca queë'!
¡Udzéjalenda'-në' Xanru'!

35 Ila'nítië' bönni' dul-la' nacu'ë yődzölió ni,
en bíti'rő ila'cuá' nupa tuá' dō'.

¡Gulú'u yöl-la' ba Xanru', lí, bō' naca caza'!
¡Yöl-la' ba Lë' Xanru'!

105

1 ¡Guli'guíë' Xanru' Dios: "Xclenu"!

¡Buli'lidzë' Lë'!

¡Buli'siyön bönachi ca nácacaca le benë'!

2 ¡Guli'gul-la queë'! ¡Guli'gul-la yöl-la' ba queë'!

¡Guli'gü' didza' ca nácacaca le xzön nunë'!

3 ¡Buli'sí' xibë Lë' lá'ayi!

Ral-la' ulu'dzeja ladxi' yúgu'të nupa ta'guilaj Xanru'.

4 Guli'guiljë' Xanru', enca' yöl-la' huáca queë'.

Guli'gü' ládxi'tíca'ső idxinlí' lahuë'.

5 Guli'tsőjné le nácacaca xzön benë' Lë',

lë na' tun ga rubániru, enca' ca nácgaca didza' bē'ë cate' buchi'a busöröë'
bönachi,

⁶ libí'ili', xzí'ini xi'sóë' Abraham, huen dxin queë' Dios,
en libí'ili', xzí'ini xi'sóë' Jacob, nácali' nupa gurö cazë' queë'.

⁷ Lë' náquië' Xanru' Dios.

Idútë yödzölió naca bē' ca buchi'a busöröë' bönachi.

⁸ Röjnétiqui'sinë' didza' dzaga nunë',
didza' na' gunná bē'ë ila'zì' lu ná'agaquië' chi gayuá' cö' xzí'ini xi'sóë' Abra-
ham,

⁹ didza' dzaga na' bēnlenë' Abraham,
le naca didza' na' benë' tsutsu Dios ca gunë' queë' Isaac.

¹⁰ Ní'irö benë' tsutsu didza' na' lahuë' Jacob,

le naca tu le rinná bē'enë' lë' gunë',

para gaca quégaca bönachi Israel tu didza' dzaga le zoa tsaz.

¹¹ Gunnë': "Gonna' queëli' xiyúgaca bönachi Canaan,
le guequi tsaz queëli', en quégaca xzí'ini xi'sóali'."

¹² Caní gunné' Dios cate' ni' gula'cu'ë nabábagaquië' bönni' Israel.
Tu chópasë' guláquië', en guláquië' bönni' zì'tu' luyú.

¹³ Gula'dë' tu ia'tú yödzö izá'a.

Bulu'zë'ë tu ga nu gunná bē', en bila'dxínë' ga nacuá' bönachi izá'a,

¹⁴ pero bitì' bē'ë lataj Dios nu usaca' zì' bönachi queë' na',
en buzenë' le bach bönni' gula'nná bē'ë para gulácalenë' bönachi queë'.

¹⁵ Gunnë': "Bitì' bi gunli' quégaca bönachi nabö caza' quia',
en bitì' bi dö' guá'ali' quégaquië' bönni' tu'ë didza' uláz quia'."

¹⁶ Benë' ga guyú'u gubín yödzölió,
en benë' ga biyadzaj yöta ilahuë'.

¹⁷ Gusöl-lë'ë tubi' bi'i bönni', bi'i bidxinbi' ni' zì'alö ca légaquië',
tu' gulúti'ë-bi' José para gácabi' bi'i nadó'o.

¹⁸ Gulúgui'ë bönni' Egipto ní'abi' len du guíë,
en bulu'dë'ë yen ná'abi' bregui' guíë,

¹⁹ ga bidxintë dza budxín xtídzë'ë Xanru',
tu' guzxi' bē'ë Xanru' Dios José na'.

²⁰ Ní'irö gusöl-lë'ë bönni' gunná bē'ë luyú Egipto nu busán-bi'.
Bönni' na' gunná bē'enë' yödzö izá'a zían busólë'-bi'.

²¹ Benë' ga gúcabi' xan yu'u queë',
ate' guta' lu ná'abi' yúgu'të le dë queë' bönni' na' rinná bē'ë.

²² Guta' lu ná'abi' gulú'ubi' lidxi guíë bönni' ta'nná bē'ë tsa rë'ëni quézibi',
para busédibi' bönni' gula queë' yöl-la' réajni'i.

²³ Ní'irö bila'dxín ca' bönachi Israel luyú Egipto.

Caní guca, guzóë' Jacob lu xiyúgaca xzí'ini xi'sóë' Ham.

²⁴ Benë' Dios ga gula'yántërö bönachi queë' luyú ni',
ate' guláquië' zióntërë' ca nupa gula'díl-lalen légaquië'.

²⁵ Benë' Dios ga gulunë' zì' bönni' Egipto bönachi queë'.

Lu yöl-la' banis quégaquië' gula'zì' yé'enë' nupa na' nácgaca huen dxin queë'
Lë'.

²⁶ Ní'irö gusöl-lë'ë Moisés, huen dxin queë', lógaquië',
enca' Aarón, bönni' na' nabö cazë' Lë'.

²⁷ Gulunë' chopë' ni' zían yöl-la' huáca zxön queë' Dios lógaca bönachi Egipto
na'.

Gulunë' zían yöl-la' huáca que yehua' yubá lu xiyúgaca xzí'ini xi'sóë' Ham.

28 Gusöl-lë'ë Dios le naca chul-la, ate' böáca chul-la lahui' dza, en biti' guca ila'dá'baguë'ë xtídzë'ë.

29 Benë' ga nisa yegu nacuá' lu yegu quégaquië' böáca rön, en benë' ga gulátiba' böla dzö'öba' yugu' yegu na'.

30 Gula'yanba' riu lu xiyúgaquië', ga bidxintë gula'yázaba' yu' u lidxë' bönni' rinná bé'enë' légaquië'.

31 Bë'ë didza' Dios, ate' gulátsjaba' bötsugayu guizxi yu, en gulátsjaba' ca' b'ó'yudo' idútë lu xiyúgaquië'.

32 Benë' ga gurö'ö guiöj bögui' yöla sunna uláz que nisa guiöj, ate' böxaj ca' guí' lu xiyúgaquië'.

33 Guditsjë' yugu' lubá uva quégaquië', en yugu' yaga higo, en busunitië' yaga rö'gaca lu xiyúgaquië'.

34 Bë'ë didza', ate' bila'dxinba' böchi'zu guizxi yu, enca' böchi'zu hué'ëndo', cuntu nu gaca ulaba légacaba',

35 ate' guláguba' idútë guixi' cuan rö'ö lu xiyúgaquië', en guláguba' ca' idútë le naz nudá'agaquië' lu xiyúgaquië'.

36 Benë' ga gulátibi' yúgu'tëbi' bi'i bönni' lo idútë lu xiyúgaquië'. Bi'i lo na' quégaquië' bönni' nál-la.

37 Ní'irö bubéajë' Dios yugu' bönni' Israel luyú na', nu'agaquië' dumí plata, en oro,

ate' cuntu nu yöjchegu' nu nutsa' légaquië'.

38 Bulu'dzeja bönachi Egipto cate' bulu'zë'ë bönni' Israel lu xiyúgaquië', ate' guladxi gula'dzöbi tu' nöziguequinë' bönni' Israel na'.

39 Gusöl-lë'ë Dios tu böaj le gulú'u bönachi queë' zxul-la, ate' chi'i dzö'ölö gusöl-lë'ë guí' le buzení' quégaquië'.

40 Gula'nábinë' Lë', ate' gusöl-lë'ë böra guíxi'do' zían le ilahuë', en benë' ga bulu'huölaj gula'dzé'enë' yöta que yehua' yubá.

41 Bulu'ë lahui tu guiöjto'o, ate' gulalaj nisa yégudo'. Gudödi nisa na' luyú bidxi ni' ca tu nisa yegu gubó'o.

42 Caní benë' Dios tu yöjnenë' didza' lá'ayi queë', le guzxi' lu në'ë gunë' queë' Abraham, huen dxin queë'.

43 Bubéajë' bönachi queë' lu yöl-la' rudzeja quéguequi, ate' lu yöl-la' rudzeja quéguequi gula'bödxí'a bönachi gurö cazë' queë'.

44 Bunödzejë' xiyúgaca bönachi yugu' yödzö izá'a quégaquië'.

Bulu'zi'ë xibë le ilá' luyú ni'a que dxin gulún bönachi izá'a na'.

45 Caní benë' Dios para ilunë' ca rnna le gunná bé'enë' légaquië' ilunë', en ilunë' ca rinná bé' xibá gudixjë' Lë'.

¡Guli'cu'ë yöl-la' ba Xanru'!

106

1 ¡Guli'cu'ë yöl-la' ba Xanru'!

¡Guli'guíë' Xanru': "Xclenu'" tu' náquië' idú dxi'a!

¡Zóatica'sö yöl-la' dxi'i ladxi' queë'!

2 ¿Nuzxi caz gaca quixjö' ca nácagaca le zxön nunë' Xanru', en uluf'i lahui ca naca yöl-la' ba queë'?

3 ¡Bica' ba nupa tun le naca tsahui', nupa na' túntica'sö le naca dxi'a!

4 Yöjnë neda', Xan, cate' ruzá' ládXu'u quégaca bönachi quiu'.

Buzá' ladxi' quia' yöl-la' rusölá quiu',

5 para gaca ilé'eda' gata' yöl-la' tsahui' quégaca nupa naró cazu' quiu',

en para gaca udzéalenda' bönachi quiu' cate' tu'dzeja,

en para gaca uzí'léna' xibé nupa néquiguequi quiu'.

6 Nuntu' dul-la' ca guluné' xuz xtó'otu'.

Biá'atu' dö', en bentu' le naca xihui'.

7 Cate' gula'cu'ë xuz xtó'otu' luyú Egipto,

biti' gula'yéajni'iné' le nácgaca zXön benu'.

Biti' yöjnéguequiné' yugu' le benu' quégaquié' lu yöl-la' dxi'i ladxi' quiu',

pero gula'dá'bagué'ë xtídzu'u cate' gula'cu'ë ra' nísado' lé Nísado' Xiná.

8 Busölé' Xanru' Dios légaquié' para gaca bé' runé' ca rnna xtídzé'ë,
en para ulu'e lahui yöl-la' huáca zXön queé'.

9 Caní guca, buzené' le bach Nísado' Xiná na', ate' la' gubídxité.

Guché'ë légaquié' ga ré'do' lu nísado' na',

ate' gula'dé' lu yu bidxi ga na' guró'ö nisa.

10 Caní guca, busölé' légaquié' lu na' nu na' bené' légaquié' zi',

en buá'ué' légaquié' lu na' nu na' gudíl-lalen légaquié'.

11 Ní'iró gubaga' nísado' na' nupa gula'sí regu' légaquié'.

Cuntu nu bugá'ana nu bidzaga léguequi.

12 Ní'iró gula'yéajlé' bönachi queé' xtídzé'ë,

ate' gulul-la yöl-la' ba queé'.

13 Pero la' gulál-laté ládxi'gaquié' yugu' le bené'.

Biti' gula'nábiné' Lë' uluf'iné' légaquié' le ral-la' iluné'.

14 Zían le gula'zé ládXé'ë cate' ni' gula'cu'ë la' guixi' ga dë lataj,

en gula'zi' bé'ë Dios la' guixi' na'.

15 Ní'iró bé'ë Dios quégaquié' le gula'nábiné' Lë',

pero gusól-lé'ë quégaquié' tu yödzöhué' le bëti zióngaquié'.

16 Cate' bulu'zxé'ené' Moisés ga ni' gula'cu'ë tsözxön,

en bulu'zxé'ené' ca' Aarón, bönni' nubéajé' Xanru' quez queé',

17 la' ná'asö guyalaj luyú, en bucachi' Datán.

Bucachi' ca' nupa gulún tsözxön Abiram.

18 Gulaj tu guí' zXön ga na' nudúbigaquié',

en buzegui' nupa na' guluá' dö'.

19 Lu guí'a Horeb guluné' tu bédxido' néquiniba' oro,

en gula'yéaj ládXé'ë budó' oro na'.

20 Caní guca bulu'cá'ané' Dios nayépisëté'ë',

para gula'yéaj ládXé'ë budó' oro le naca ca tu bédxi ráguba' guixi'.

21 Gulal-la ládXé'ë Dios Nu busölá légaquié'.

Lé' bené' zían le zXön le gulácalen légaquié' luyú Egipto.

22 Bené' zían le tun ga rubániru' lu xiyúgaca xzí'ini xí'sóé' Ham,

en zían le tun ga rádxiru' Lë' le bené' ra' Nísado' Xiná.

23 Que lé ni na' gunné' Dios usunítie' légaquié', ate' la' cá'asö guné'

la'tu' cabí guzuíné' Moisés, bönni' rö queé', lahué' Lë',

en buzóa dxié' yöl-la' rilé queé' para cabí usunítie' légaquié'.

24 Ní'iró biti' gulé'ené' ila'yázié' luyú dxi'a na' dë lógaquié'

tu' cabí gula'yéajlé'ë xtídzé'ë Dios.

25 Gula'nné' zi'ë queé' Dios gapa naca lu yu'u guídí quégaquié',

en biti' bulu'zè náguie' chi'è Xanru'.

²⁶ Que lè ni na' benè' tsutsu Dios xtídzè'è le bē'lenè' légaquiè',
gunné' gunè' ga ilátiè' ga na' naca la' guixi' ga dè lataj.

²⁷ Gunné' gunè' ga ilasi lásiè' xzí'ini xi'sóagaquiè' ladaj zían yödzö izá'a,
en gúsiè' légaquiè' gapa nacua' bönachi zi'tu'.

²⁸ Ní'irö bulu'dödi cuíngaquiè' lu na' budó' guiè lè Baal-peor,
en gulahuè' xipéla'gacaba' bóa' guixi' gulútiè'-ba'
para gulunè' zxon yugu' dios nati.

²⁹ Ca' guca, gulún lenè' Dios ni'a que le gulunè',
ate' gulén tu yödzöhuè' zxon ladjagaquiè'.

³⁰ Ní'irö guzuínè' Finees, en benè' le raza ladxè'è Dios,
ate' guzóa dxi yödzöhuè' zxon na'.

³¹ Buzóè' Dios queè' Finees na' náquiè' tsahui' ni'a que
lè na' benè' le nuzóè' tsaz ca naca queè'.

³² Lésca' gulún lenè' Dios ga na' zoa nisa lè Meriba,
ate' Dios gulénè' Moisés tu' nözi lè na' gulunè'

³³ tu' gula'dá'baguè'è xtidxè'è Bò' Lá'ayi queè',
ate' Moisés, lu yöl-la' ridzá'a queè', gunné lizè'.

³⁴ Biti' bulu'sunítiè' bönachi tuá' dö' gula'cuá' lu yu ni,
ca na' gunná bé'enè' Xanru' légaquiè' ilunè'.

³⁵ Gulunè' léguequi tsözxön
en bila'zèdè' ilunè' ca gulún bönachi na',

³⁶ ate' gula'yéaj ladxè'è budó' guiøj budó' yaga quéguequi,
le guca quégaquiè' ca tu du yalaj le guzxön légaquiè'.

³⁷ Gulútiè'-bi' xzí'inigaquiè' lógaca bö' xihui',
yugu' bi'i bönni', en nigúlado',

³⁸ en bulu'laljè' xichöngaca nupa biti' bi nabága'gaca
tu' bulu'laljè' xichöngacabi' bi'i bönni' quégaquiè', en bi'i nigula quégaquiè',
yugu' bi'i na' gulútiè'-bi' lógaca budó' guiøj budó' yaga nacua' luyú Canaán,
ate' gúcada' xihui' luyú ni tu' nözi rön na' bulu'laljè'.

³⁹ Ca' guca, guláquiè' xihui' ni'a que le gulunè'.

Guláquiè' ca tu nigula udá dzaga tu' bulu'cá'anè' Dios quégaquiè'.

⁴⁰ Que lè ni na' guléde'enè' Xanru' Dios bönachi queè',
en biti' bilé'enè' dxi'a nupa na' néquiguequi queè'.

⁴¹ Ní'irö budödè' légaquiè' lu ná'agaca bönachi zían yödzö izá'a,
ate' nupa bulu'dí'i légaquiè' gula'nná be'e légaquiè'.

⁴² Nupa na' biti' bila'lé'e légaquiè' dxi'a gulunda' légaquiè' dxin,
en bulu'zxicaj légaquiè' lu yöl-la' unná bé' quéguequi.

⁴³ Zían luzuí gú'unè' Dios usölè' légaquiè',
pero gula'dá'baguè'è le ré'èné' ilunè',
ate' guzxöntèrö xigua' nabága'gaquiè'.

⁴⁴ Bilé'enè' Dios yöl-la' bayechi' quégaquiè'
en biyönnè' ta'bödxí yechè'è.

⁴⁵ Yöjnenè' didza' dzaga núnlenè' légaquiè',
ate' bubequi lahuè' quégaquiè' tu' nazxöntèrö yöl-la' dxi'i ladxi' queè'.

⁴⁶ Benè' Dios ga bulu'huéchi' ladxi' légaquiè'
nupa na' gula'chè' légaquiè' nadzúngaquiè'.

⁴⁷ ¡Busólá netu', Xantu' Dios!

Guléaj netu' ladjagaca yödzö izá'a
 para guíetu' Li': "Xclenu" ni'a que Lo' lá'ayi,
 en lu yöl-la' rudzeja zxön queétu' cú'utu' Li' yöl-la' ba.
 48 ¡Yöl-la' ba Lë' Xanru', Dios quégaca bönachi Israel
 na'a dza, en yúgu'të dza si' zaca!
 Ral-la' ila'nná yúgu'të bönachi: "¡Ca' gaca!
 ¡Guli'cu'ë yöl-la' ba Xanru' Dios!"

107

1 ¡Guli'guíë' Xanru': "Xclenu" tu' náquië' dxi'a,
 en tu' zóatica'sö yöl-la' dxi'i ladxi' queë'!

2 Ral-la' ila'nná caní nupa na' buá'uë' Xanru',
 nupa na' buá'uë' lu ná'agaca nupa gulún léguequi zi',
 3 en nubéajë' léguequi zían lu yödzö izá'a,
 saca' ga rilén gubidza, en saca' ga ribía,
 saca' ga za' bö' ziaga, en saca' ga ridödi gubidza beo' ziaga.

4 Bal-lë' gula'dë' nanítigaquië' la' guixi' ga dë lataj,
 en ga ni' bití' zoa nöza.
 Bití' guca ulu'dzölinë' tu yödzö ga gaca tsöjcu'ë.
 5 Gula'dunë', en gula'bidxë' nisa,
 en gudú ládxi'gaquië'.

6 Ní'irö lu lë na' raca quégaquië' bulu'lidzë' Xanru',
 ate' busölä' légaquië' lu zían le gula'guí' i gula'záquë'ë.

7 Guchë'ë légaquië' tu la' nöza tsahui',
 en guchë'ë légaquië' tu lu yödzö ga tsöjcu'ë.

8 Ral-la' ilë' Xanru': "Xclenu" tu' nadxí'inë' légaquië',
 en tu' benë' yugu' le zxön, gúcalenë' légaquië'.

9 Rugui'jë' nupa ta'bidxi ladxi',
 en rugahuë' nupa ta'dún le náacagaca dxi'a queë'.

10 Bal-lë' gula'cu'ë ga chul-la, en ga zoa bönadxi ilátië'.
 Gula'dzunë' yugu' lu du guíë, en gula'guí' i gula'záquë'ë
 11 tu' gula'dá'baguë'ë xtídzë'ë Xanru' Dios,
 en bulu'zóë' tsölá'alö le rigu'ë icja ládxi'do'gaquië'.
 12 Tu' gulunë' bayúdx dxin, gudú ládxi'gaquië'.
 Gula'dzö'ë lu yu zxan yua' nuá'agaquië',
 ate' cuntu nu zoa gácalen légaquië'.

13 Ní'irö lu lë na' raca quégaquië' bulu'lidzë' Xanru',
 ate' busölä' légaquië' lu zían le gula'guí' i gula'záquë'ë.

14 Bubéajë' légaquië' ga na' gula'cu'ë ga chul-la,
 en ga guzóa bönadxi ilátië',
 ate' guditsjë' yugu' du guíë núga'gaquië'.

15 Ral-la' ilé' Xanru': "Xclenu'" tu' nadxí'iné' légaquié',
en tu' bené' yugu' le zxön, gúcalené' légaquié'.

16 Ruquínnajé' le tá'baga' gapa nu riyaza lidxi guíë le néquiniguequi guíë
bronce,
en ruzxuzxjé' yugu' vara néquiniguequi guíë.

17 Bal-lé' gula'guí'i gula'záquë'ë tu' gula'dá'baguë'ë Dios,
en tu' nözi dó' gulu'ë.

18 Gula'gúti'né' bíti'tés la' huagu,
en gula'zóa ilátié'.

19 Ní'irö lu lë na' raca quégaquié' bulu'lidzë' Xanru',
ate' busölé' légaquié' lu zían le gula'guí'i gula'záquë'ë.

20 Gusöl-lé'ë quégaquié' xtídzë'ë, en buné' légaquié',
en busölé' légaquié' lu yöl-la' guti.

21 Ral-la' ilé' Xanru': "Xclenu'" tu' nadxí'iné' légaquié',
en tu' bené' yugu' le zxön, gúcalené' légaquié'.

22 Ral-la' ilé' Dios: "Xclenu'", en bi ulu'nödzejé' queë',
en lu yöl-la' rudzeja quégaquié' ilul-lé' ca nácgaca le nuné'.

23 Bal-lé' gula'dödë' lahui nísado' yugu' lu barco zxön,
en guluné' dxin yugu' lu nísado'.

24 Bila'lé'ené' yugu' le nuné' Xanru',
en yugu' le zxön nucu'ë lu nísado'.

25 Bé'ësë' didza, ate' guyecja bö' budunu',
ate' guyasa gudxía nísado'.

26 Gula'yasa barco ca tu lu guí'ado' nisa,
en la' bótjatë ga rö'ö röga' lu nisa na'.
Tu' guzóale'e bönadxi ilátié' gudú'ládxí'gaquié'.

27 Gula'zxízié', en yöjchégu'gaquié' ca bönni' ta'zúdxiné',
ate' nítisö guca yöl-la' rácada' quégaquié'.

28 Ní'irö lu lë na' raca quégaquié' bulu'lidzë' Xanru',
ate' busölé' légaquié' lu zían le gula'guí'i gula'záquë'ë.

29 Bené' Dios ga guzóa dxisö bö' budunu' na' recja,
ate' guzóa dxi le rasa ridxía lu nísado'.

30 Bulu'dzëjané' tu' guzóa dxi lu nísado',
en tu' guchë'ë Dios légaquié' dxi'a tsáhu'i'do' ga na' söjáquié'.

31 Ral-la' ilé' Xanru': "Xclenu'" tu' nadxí'iné' légaquié',
en tu' bené' yugu' le zxön, gúcalené' légaquié'.

32 Ral-la' ulu'lu'ë lahui yöl-la' zxön queë' ga nudúbigaca bönachi queë',
en ila'gu'ë Lé' yöl-la' ba ga nudúbigachié' bönni' gula tu'chi'a tu'söröë'.

33 Runé' Xanru' Dios ga tu'huí'i dërö yugu' yegu,
enca' yugu' beaj nisa.

34 Ga naca yu ya'a runé' ga ruhuóaca yu bidxi,

ni'a que le xihui' nabága'gaca nupa nacuá' ni'.

³⁵ Ga naca yu bidxi runë' ga ruhuóáca yu nabisa, ate' ralaj nisa ga biti' bi nisa guzóa.

³⁶ Ni' ru'ë lataj ila'cuá' nupa ta'dún para ilunë' ni' yödzo ga ila'cu'ë.

³⁷ Tazë' yugu' le tazë', en tu'dë'ë yugu' lubá uva, yugu' le ta'bía yödxi yana'.

³⁸ Runë' Xanru' ga raca dxi'a quégaquië', en ga ta'cuá'bi' zíanbi' bi'i quégaquië', en runë' ga ta'yanba' bóa' bëdxi quégaquië'.

³⁹ Cate' yugu' bönni' unná bë' zi'tu' tu'zxicjë' bönachi queë', en tu'zötjë' léguequi,

en tu'saca' zi'ë léguequi, en tu'ë dö' quéguequi,

⁴⁰ rucá'anë' Dios bönni' na' dë lu ná'agaquië' cá'asó, en runë' ga ta'dë' la' guixi' ga dë lataj, en tu luyú bidxi.

⁴¹ Rusölë' yugu' bönni' yechi' lu le ta'gu'i ta'záquë'ë, en runë' ga ta'yanbi' zxi'inigaquië' ca ta'yánba' bö'cu' zxíla'do'.

⁴² Ta'lé'e lé ni nupa nácgaca tsahui', en tu'dzeja, pero biti' bi ta'nná nupa tuá' dö'.

⁴³ Nupa ta'yéajni'i ral-la' sa' ládxi'gaca ca nácgaca lé ni, ate' iléquibe'e náquië' Xanru' Dios dxi'i ladxi'.

108

¹ ¡Chinabá'a quia', Dios!

¡Gul-la' quiu'! ¡Ön, idú ládxa'a gul-la' yöl-la' ba quiu'!

² ¡Guli'bán, libí'ili' riguínnali' bihuël-la!

¡Gúl-laru' cate' ni' ritó yu!

³ ¡Guía' Li': "Xclenu'" Xan, ládjagaca bönachi yugu' yödzo izá'a!

¡Gul-la' yöl-la' ba quiu' lógaca yúgu'të bönachi!

⁴ ¡Zxöntë'rö naca yöl-la' dxi'i ladxi' quiu', le ridxintë lúzxiba xitsá'!

⁵ Buluí'i lahui lúzxiba yöl-la' zxön quiu', Dios, ate' lahui yödzölió ni buluí'i lahui yöl-la' bení' quiu',

⁶ para usóló' netu', bönachi quiu', nupa nadxí'inu'.

Len yöl-la' huáca zxön quiu' busólá netu', en bubí'i didza'.

⁷ Lu lataj lá'ayi queë' bë'ë didza' Dios, gunné':

"Uzi'a xibé, en quisia' xiyúgaca bönachi Siquem, en urixa' luyú dë cuiti yegu Sucot.

⁸ Nequi quia' xiyúgaca bönachi Galaad,

enca' xiyúgaca zxi'ini xi'sóë' Manasés.

Naca ca tu le rusbín icja' xiyúgaca zxi'ini xi'sóë' Efraín.

Naca ga rinná bë'a xiyúgaca zxi'ini xi'sóë' Judá.

⁹ Naca ca tu ga riguibí na'a xiyúgaca bönachi Moab,

ate' lu xiyúgaca bönachi Edom chú'una' löla'.

Códxí'a tu' uxicja' bönachi Filistea."

¹⁰ ¿Nuzxi caz gaca ichë' neda' lu yödzo

dē zō'ō idú gásibi'ilō le run chi'i yōdzō na'
 ¿Nuzxi caz gaca iché' neda' lu xiyúgaca bōnachi Edom?
 11 ¿Naru' cabí nusán ládxi'u netu', Dios?
 ¿Naru' cabí tséajlenu' bōnni' queétu' rōjáquiē' gudil-la?
 12 Gúcalen netu' cate' tíl-lalentu' nupa dutíl-lalen netu',
 tu' naca dádusō gácalen netu' nu naca bōnáchisō.

13 Len yōl-la' huáca queē' Dios idéli'ru'
 tu' uxicja cazē' Lē' nupa ta'díl-lalen rē'u.

109

1 Rigu'a Li' yōl-la' ba, Xana' Dios.

Biti' su' dxisō,

2 tu' ta'nná quia' nupa tuá' dō', en ta'z'í yē'.

Lu yōl-la' rizí' yē' quéguequi tuí'i didza' le tu'zegui' neda'.

3 Nagú'ugaca neda' lē' ajlō,

en lu yōl-la' bití' rilé'e neda' dxi'a tu'ítica'sō didza'.

4 Sal-la' nadxí'ida' léguequi, tu'zegui' neda' didza',
 pero neda' rulidza' Li'.

5 Bena' quéguequi le naca dxi'a, pero bulu'bí'i quia' le naca dō'.

Nadxí'ida' léguequi, pero bití' ta'lé'e neda' dxi'a.

6 Buzóa tu bōnni' huía' dō'

para uchi'a usōrōē' que nu na' bití' rilé'e neda' dxi'a.

Ben ga soa gagu nu uzegui' nu na' didza'.

7 Cate' nu uchi'a usōrō bōnni' na', bití' gu' u lataj urúajē' dxi'a.

Buyú le rinábinē' Li' tsa naca dul-la' nabáguē'ē.

8 Ben ga ilaca nabábasō dza soē' ibanē'.

Ben ga tsu'u nu yúbōlō uláz queē'.

9 Ben ga ilácabi' zxi'inē' bi'i uzēbi,

en ga gácanu nigula queē' nigula uzēbi.

10 Ben ga ila'dásōbi' zxi'inē' ila'nábibi' nu bi unōdzaj quégacabi'.

Ben ga ila'guíljabi' le ilágubi' zi'tu' ga zoa lídxigacabi' le nadachi.

11 Ben ga ugúa nu bi benna lē' tu chí'isō idútē le dē queē',

en ben ga ila'banē' bōnni' zi'tu' le rulá' dxin runē'.

12 Ben ga bití' soa nu huéchi' ladxi' lē',

en bití' soa nu uzá' ladxi' quégacabi' zxi'inē' nácagacabi' bi'i uzēbi.

13 Ben ga udxí' quégaca zxi'ini xi'sóē',

en ga idxín dza bítí'rō soa nu si' la ca guzxi'i lē'.

14 Yōjnética'sō le xihui' gula'báguē'ē xuz xtá'ahuē', Xan,

en bití' gal-la ládxi'u dul-la' bennu xinē'ē.

15 Ben ga ila'cuá'tica'sō dul-la' na' lo' Li', Xan,

para cabirō nu soa yōdzōlió nu tsōjnē lē'.

16 Bití' buéchi' ládxi'ē luzē'ē,

pero gudxía nahuē' nupa gula'guí' gula'zaca',

en nupa gula'yadzaj gula'yudxi,

enca' nupa gula'sēbi ladxi', ate' bētiē' léguequi.

17 Bidxi'inē' le rudxía luzē'ē dō'.

Ben ga ulu'bí'i ca' queē'.

Bití' raza ládxi'ē gaca dxi'a que luzē'ē.

Ben ga bití' gaca dxi'a queē'.

18 Gulaca ca zxë' nácuë' didza' xihui' bë'ë,
ate' gula'yaza le nayá' nabanë' ca nisa,
en gula'yú'u ca' dxita queë' ca le za.

19 Ben ga ilaca queë' ca tu lari' rixóa cúdzë'ë,
en ca xipanë' rúgui'ë lë'ë.

20 Bubi' caní quégaca nupa tu'zegui' neda' didza', Xan,
enca' quégaca nupa tuí'i didza' zi' que bö' naca caza'.

21 Li', Xana' Dios, ben quia' le naca dxi'a
para gaca bë' runu' ca rnna xtídzu'u.
Tu' naca dxi'a yöl-la' dxi'i ladxi' quiu', busölá neda'.

22 Riguí' rizáca'a, en riyadzaj riyúdxida',
en raca zi' ládxi'da'ahua'.

23 Ridódi quia' ca raca que tu zxul-la cate' ribía gubidza.
Naca' ca tuba' bóchi'zu, richë' bö' recja lëba'.

24 Ta'cuidi' zxiba' tu' runa' gubasa.

Nadxita', en bití'rö rö'ö za lu bëla' rön quia'.

25 Nupa biti' ta'lé'e neda' dxi'a tu'titaj neda'.
Cate' ta'lé'e neda', tu'tá ícjaquequi.

26 Gúcalen neda', Xana' Dios.

Lu yöl-la' dxi'i ladxi' quiu' busölá neda'.

27 Ben ga iléquibe'e rácalen cazu' neda'.

Nun cazu' Li' lë ni, Xan.

28 Tu'dxía neda' dö', pero Li', ben ga gaca dxi'a quia'.

Cate' ila'yasë', ulu'tuí'inë',
pero udzëjada' neda', huen dxin quiu'.

29 Ben ga ulu'gá'ana cá'asö nupa tu'zegui' neda' didza',
en ben ga gaca yöl-la' rutuí'i quéguequi ca tu lari' nabaga' léguequi.

30 Len ruá' cuina', zían luzuí guía'-në' Xanru': "Xclenu",
en ladaj bönachi zían cu'a Lë' yöl-la' ba,

31 tu' zuinë' cuita lë'e ibëla nu riyadzaj riyudxi
para usölë' nu na' lu ná'agaca nupa tu'siúdxí bö' naca caz nu na'.

110

1 Xanru' Dios gudxë' Xana': "Gurö'i cuita lë'a ibëla
cate' gunra' ga ulu'zechu zxíbigaca lo'
nupa biti' ta'lé'e Li' dxi'a."

2 Ga zoë' yödzö Sión gusöl-lë'ë Xanru' yöl-la' unná bë' quiu',
gunnë': "Gunná be'e nupa biti' ta'lé'e Li' dxi'a."

3 Ulu'dódi cuínguequi lu no'o bönachi quiu'
cate' si'u yöl-la' unná bë' quiu'
tu' napu' yöl-la' lachi que le naca lá'ayi."

Ila'cuá' bi'i bönni' ga zu' ca ribó'ö buzén zílado'.

4 Runë' tsutsu xtídzë'ë Xanru', en biti' utsë'ë le, rnnë':
"Tsaz nacu' bixúz ca na' gúquië' Melquisedec bixúz."

5 Zoa cazë' Xanru' cuita lë'u ibëla.

Ucul-lë' bönni' ta'nná bë'ë cate' idxín dza usiúdxë' luyú.

6 Uchi'a usöröë' quégaca bönachi yúgu'të yödzö izá'a,
ate' ilí yödzólió len bëla' rön quéguequi.

Uzõtjē' nupa ta'nná bē' zían lu yōdzō izá'a.

⁷ Guí'jē' nisa beaj ra' nōza,
en ní'a que lē ni huóaca ládxe'ē.

111

¹ ¡Guli'cu'ē yōl-la' ba Xanru'!

Idú ládxa'a rea'-nē' Xanru': "Xclenu'."

Runa' caní tsazxón len bōnni' tsahui' zían ga na' nudúbigaca bōnachi queē'.

² Zxōn nácagaca le nunē' Xanru'.

Yúgu'tē nupa ta'yaza ládxi'gaca lē na' benē' tu'sēda ca nácagaca.

³ Idútē dxi'a nácagaca, en nayēpisētērōgaca le nunē' Lē',
ate' idiá'tica'sō le naca tsahui' queē'.

⁴ Chinunē' ga tsōjneru' yugu' le benē', le tun ga rubániru'.

Náquiē' Xanru' dxi'i ládxi', en ruí'i ládxe'ē rē'u.

⁵ Rugahuē' nupa tadxi Lē'.

Rōjnética'sē' didza' dzaga núnlenē' bōnachi queē'.

⁶ Buzéajni'inē' bōnachi queē' ca naca yōl-la' huáca quégaca le nunē',

le benē' ga gula'déli'nē' xiyúgaca bōnachi izá'a.

⁷ Tsahui', en idútē li nácagaca le núngaca lu nē'ē.

Nácagaca tsutsu yúgu'tē xibá gunná bē'ē.

⁸ Rucua'tica'sē' tsutsu xibá queē',

en rusudxinē' lēguequi lu le naca idútē li, en le naca tsahui'.

⁹ Gusōl-lē'ē Nu buá'uō bōnachi queē'.

Tsaz nuzóē' didza' dzaga nunē'.

Lá'ayi, en ba'a ládxi' naca Lē'.

¹⁰ Lu yōl-la' radxi queēru' Lē' risi loru' ridéli'ru' yōl-la' réajni'i.

Yúgu'tē nupa tun ca ta'nná bē' xibá queē' nápagaca yōl-la' réajni'i.

Ila'cuá'tica'sō nupa ila'gú'u Lē' yōl-la' ba.

112

¹ ¡Guli'cu'ē yōl-la' ba Xanru'!

¡Bica' ba bōnni' na' rádxinē' Xanru',

bōnni' na' raza ládxe'ē runē' ca gunná bē'ē Dios!

² Tsēpiségaca xzí'ini xi'sóē' bōnni' na' yōdzōlió ni.

Gáquiē' bica' ba bōnni' na' runē' le naca dxi'a.

³ Lu yu'u lidxe' gata' yōl-la' tsahui',

ate' idiá'tica'sō le naca tsahui' runē'.

⁴ Gulén bení' ga ridé' bōnni' tsahui' ga na' naca chul-la.

Ruzá' ládxe'ē que luzé'ē, en ruí'i ládxe'ē lē', en runē' le naca dxi'a.

⁵ Gaca dxi'a queē' bōnni' ruzá' ládxe'ē que luzé'ē,

en runnē' que tu chí'isō le riyadzaj que.

Urúajé' dxi'a cate' nu uchi'a usórō queē'.

⁶ Catu caz gaca nu utsá' bōnni' na',

ate' sóatica'sō nu tsōjné' lē'.

⁷ Biti' gádxinē' cate' nu usiyōni lē' le cabí' raza dxi'a.

Ridipa ládxe'ē tu' ruzxōni ládxe'ē Xanru' Dios.

⁸ Dios rutipē' ládxe'ē, ate' bití' gádxinē'

cate' idxinrō dza ilé'enē' nuhuótjagaca nupa ta'díl-lalen lē'.

9 Idú láchxë'ë runödzejë' quégaca bönachi yechi'.

Idía'tica'sö le naca dxi'a runë'.

Dios uchisë' lë' ga tsépisë'.

10 Ila'lé'e lë ni nupa tuá' dö', en ila'bö' baguf'isö.

Ilagu zxe láyi'gaca, en ila'niti cuínguequi.

Tsaz initi le ta'zë láchxi'gaca nupa tuá' dö'.

113

1 ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' huen dxin queë' Xanru'!

¡Guli'cú'u yöl-la' ba Lë' Xanru'!

2 ¡Cú'uru' yöl-la' ba Lë' Xanru',
cate' risí lo na'a, en yugu' iz si' zaca!

3 ¡Ga naguela' ga rilén gubidza ga ridxintë ga ribía,
cú'uru' yöl-la' ba Lë' Xanru'!

4 ¡Nayëpisëtë'rë' Xanru' Dios ca yúgu'të yödzö izá'a!

¡Nazxöntë'rö yöl-la' zxön queë' ca naca lúxiba!

5 ¿Nuzxi caz zoa naca ca náquië' Xanru' Dios?

Rö'ë rinná bë'ë ga na' nayëpisëtë'rë'.

6 Ruzötaj cuinë' para uyüë'

le dë lúxiba, en le dë luyú ni.

7 Ruchisë' nupa nácacaca yechi', rubéajë' léguequi lu bëchtö yu.

Ruchisë' nupa ta'yadzaj, rubéajë' léguequi lu dö bëbu.

8 Runë' ga ta'bö'len nupa ta'nná bë'.

Ta'bö'len nupa ta'nná be'e bönachi queë'.

9 Runë' ga zóanu nigula huödx yu'u lídxinu.

Rudzeja láchxi'nu tu' runë' ga nacua'abi' xzí'ininu.

¡Guli'cu'ë yöl-la' ba Xanru'!

114

1 Cate' bila'rúaj bönachi Israel luyú Egipto

bila'rúajë' xzí'ini xi'sóë' Judá ladaj nupa tu'i didza' izá'a.

2 Xzí'ini xi'sóë' Judá guláquië' ca lidxë' Xanru' Dios,

ate' gulaca bönachi Israel nupa rinná bé'enë' Dios.

3 Lahuë' Dios bubiga' nísado',

ate' bubí'i nisa yegu Jordán.

4 Gula'xiti' guí'a zxön ca yugu' bö'cu' zxila' biguiú',

ate' gula'xiti' ca' guí'ado' ca yugu' bö'cu' zxíla'do'.

5 ¿Bi raca quiu', nísado', tu' rubigu'?

¿Bi raca quiu', yegu Jordán, tu' rubí'i nisa quiu'?

6 ¿Bi raca queë'li', guí'a zxön, tu' rixítí'li' ca yugu' bö'cu' zxila' biguiú'?

¿Bi raca queë'li', guí'ado', tu' rixítí'li' ca yugu' bö'cu' zxíla'do'?

7 Guzxizi lahuë' Xanru', yödzölió.

Guxxizi lahuë' Dios queë' Jacob.

8 Benë' Dios ga gulaj nisa tu lë'e guiöjto'o,

en benë' ga böáca le guca guiöj jara tu ga rilén nisa.

115

¹ Calëga queëtu', Xan, calëga queëtu',
pero que lo' gaca yöl-la' ba
tu' nacu' dxi'i ladxí', en le naca idútë li.

² ¿Bizx que ta'nná bönachi yugu' yödzö izá'a:
"Gazxi caz zoë' Dios quégaquië"?"

³ Zoë' Dios queëru' yehua' yubá.
Runë' le raza ládxë'ë gunë'.

⁴ Néquiquequini plata, en oro budó' quégaca bönachi izá'a na',
yugu' le núngaca lu ni'a lu na' bönachi.

⁵ Nacuá' ruí'iguequi, pero biti' gaca iluí'i didza'.
Nacuá' guiój lógaca, pero biti' gaca ila'lé'e.

⁶ Nacuá' náagaca, pero biti' gaca ila'yöni.

⁷ Nacuá' zxiniguequi, pero biti' gaca ila'lë'e.

⁷ Nacuá' ná'agaca, pero biti' bi gaca ila'gán.

Nacuá' ní'agaca, pero biti' gaca ila'zá'.

Biti' gaca ilún bö lubá'agaca.

⁸ Nupa tun budó' guiój budó' yaga ilaca ca náagaca budó' na',
núti'tës nu ruzxöni ladxí' budó' guiój budó' yaga.

⁹ Libí'ili', bönachi Israel, buli'zxöni ládxë'ë Xanru' Dios.

Rácalen cazë libí'ili', en rapa chi'ë libí'ili'.

¹⁰ Libí'ili', zxi'ini xi'sóë' Aarón, buli'zxöni ládxë'ë Xanru' Dios.

Rácalen cazë libí'ili', en rapa chi'ë libí'ili'.

¹¹ Libí'ili' na' rádxili'-në' Dios, buli'zxöni ládxë'ë Xanru' Dios.

Rácalen cazë libí'ili', en rapa chi'ë libí'ili'.

¹² Xanru' Dios ruí'i ládxë'ë rë'u, en gunë' ga gaca dxi'a queëru'.

Gunë' ga gaca dxi'a quégaca bönachi Israel.

Gunë' ga gaca dxi'a quégaca zxi'ini xi'sóë' Aarón.

¹³ Gunë' ga gaca dxi'a quégaca nupa tadxí Lë',
nupa na' náagaca cá'asö, en nupa na' nayëpisëgaca.

¹⁴ Gunë' Xanru' Dios ga tsan le nequi queëli',

lë na' nequi queëli', en le nequi quégaca zxi'inili'.

¹⁵ Raca ládxa'a gunë' Xanru' ga gaca dxi'a queëli'.

Náquië' Nu ben lúzxiba, en luyú ni.

¹⁶ Nequi queë' Xanru' Dios lúzxiba xitsá',

pero nudödë' lu ná'agaca bönachi luyú ni.

¹⁷ Nupa chinátigaca biti' gaca ila'gú'u Xanru' yöl-la' ba,
en calëga nupa nacué' dxisö lataj chul-la que yöl-la' guti.

¹⁸ ¡Cú'uru' yöl-la' ba Xanru' Dios

na'a dza, en yúgu'të dza si' zaca!

¡Guli'cu'ë Xanru' yöl-la' ba!

116

¹ Nadxfí'ida'-në' Xanru' Dios, tu' riyönnë'
le rulidza' Lë', en le rinábida'-në'.

² Ruzë' naguë' chí'a.

Que lë ni na' ulidza' Lë' tsanni ni zoa' nabana'.

³ Guzóa bönadxi quia' gátia',
en guyu'a tsöbi que lataj chul-la que yöl-la' guti,
ate' gusëbi ládxa'a, en buí'inide'eda' ládxa'a.

⁴ Ní'irö bulidza'-në' Xanru' Dios, gunnía':
"Ráta'yua' lo', Xan, usóló' neda'."

⁵ Xanru' Dios ruzá' ládxe'ë queëru', en náquië' tsahui'.
Dios queëru' ruí'i ládxe'ë rë'u.

⁶ Rapa chi'ë Xanru' nupa nácagaca do' ladxi'.
Bulu'xicja bönachi neda', ate' busólé' neda'.

⁷ Buzí' ladxi' bō' naca caza',
tu' runë' Xanru' Dios ga raca dxi'a quia'.

⁸ Busóló' bō' naca caza', Xan, lu yöl-la' guti.
Benu' ga buí'i nisa ribödxi guió'j lahua',
en ga bití'rō cuílagaca ní'a.

⁹ Ta'a lahuë' Xanru' Dios
ga nacua' nupa nabángaca.

¹⁰ Guyéajlë'a Lë' cate' gunnía':
"Zoa le rusaca' neda' zi'."

¹¹ Lu yöl-la' rō' böniga quia' gunnía':
"Ta'zì' yë' yúgu'të bönachi."

¹² ¿Bizxi caz gu'a-në' Xanru' Dios
ní'a que yugu' le runë' le ruzi'a xibé?

¹³ Si' lu na'a yöl-la' rusólá queë' Xanru',
en ulidza'-në' Xanru' Dios.

¹⁴ Unödza' queë' Xanru' le guzxi' lu na'a unödza'.
Raca ládxa'a gaca guna' caní lógaca yúgu'të bönachi queë'.

¹⁵ Rúndë'ë Xanru' bal
yöl-la' guti quégaca nupa néquiquequi quez queë'.

¹⁶ Le nácate' naca' huen dxin quiu', Xan.
Naca' huen dxin quiu', enca' zxf'ininu nigula huen dxin quiu'.
Busedxu' le biröli neda'.

¹⁷ Cu'a lo' le unödza' quiu', en guía' Li': "Xclenu",
en ulidza' Li', Xan.

¹⁸ Unödza' queë' Xanru' le guzxi' lu na'a unödza'.
Raca ládxa'a gaca guna' caní lógaca yúgu'të bönachi queë'.

¹⁹ Ga zoa lö'a que yu'u lidxe' Xanru',
lu yödzo Jerusalén guna' caní.

¡Guli'cu'ë yöl-la' ba Xanru' Dios!

117

¹ ¡Guli'cu'ë yöl-la' ba Xanru' Dios, libí'ili', bönachi yúgu'të yödzo izá'a!

¡Guli'cu'è yöl-la' ba yúgu'tëli',
 2 tu' buxönë' queëru' yöl-la' dxi'i ladxi' queë',
 en zóatica'sö le naca idú ladxi' queë'!

¡Yöl-la' ba Lë'!

118

1 ¡Guli'guié' Xanru': "Xclenu", tu' náquië' dxi'a!
 ¡Zóatica'sö yöl-la' dxi'i ladxi' queë'!

2 Ral-la' ila'nná bönachi Israel:
 "¡Zóatica'sö yöl-la' dxi'i ladxi' queë'!"

3 Ral-la' ila'nná xzí'ini xí'sóë' Aarón:
 "¡Zóatica'sö yöl-la' dxi'i ladxi' queë'!"

4 Ral-la' ila'nná nupa tadxi Xanru' Dios:
 "¡Zóatica'sö yöl-la' dxi'i ladxi' queë'!"

5 Cate' gudí' guzáca'a bulidza'-në' Xanru',
 ate' bubí'è didza', en busölé' neda'.

6 Zoë' Xanru' cuíta' neda', ate' bití' bi gádxida'.
 ¿Bizxi caz gaca ilún bönachi quia'?

7 Zoë' Xanru' cuíta' neda' ladaj nupa tácalen neda'.
 Que lë ni na' idéli'da' láhuigaca nupa bití' ta'l'é e neda' dxi'a.

8 Nácarö dxi'a uzxöni ládxa'a-në' Xanru',
 en bití' uzxöni ládxa'a nu naca bönáchisö.

9 Nácarö dxi'a uzxöni ládxa'a-në' Xanru',
 en bití' uzxöni ládxa'a nupa ta'nná bë'.

10 Bönachi yúgu'të yödzö izá'a gula'gú'u neda' lë'ajlö.
 Len yöl-la' huáca queë' Xanru' buxicja' léguequi.

11 Gula'gu'è neda' lë'ajlö. Ön, gula'gu'è neda' lë'ajlö,
 pero len yöl-la' huáca queë' Xanru' buxicja' léguequi.

12 Gula'gu'è neda' lë'ajlö ca yugu' buzú' rön,
 pero gula'nítië' ca tu lu guí' guixi' yötsi' bidx.

Len yöl-la' huáca queë' Xanru' buxicja' léguequi.

13 Bulu'dxíguë'è neda' ga bidxintë guzóa tsöjtsö'a,
 pero gúcalenë' Xanru' neda'.

14 Naca cazë' Xanru' yöl-la' huáca quia', en le rul-la'.
 Naca cazë' yöl-la' rusólá quia'.

15 Lu yu'u lídxigaca nupa nácgaca tsahui'
 ru'u bö que nupa ta'bödxí'a lu yöl-la' rudzeja quéguequi tu' nulágaca.

¡Runda' dxin në'è ibëla Xanru'!

16 ¡Nayépisëtëro në'è ibëla Xanru'!

¡Runda' dxin në'è ibëla Xanru'!

17 Bití' ca' gátia', pero soa' ibana',
 ate' usiyönda' bönachi le nunë' Xanru'.

18 Xanru' bëndë'è neda' xiguia',

pero biti' budödë' neda' lu yöl-la' guti.

¹⁹ Guli'salaj quia' ga ta'yazë' bönni' tsahui'.
Tsu'a ni', en guía'-në' Xanru': "Xclenu'."

²⁰ Naca lataj ni ga riyaza cazë' Xanru' Dios.
Ila'yazë' ni bönni' tsahui'.

²¹ ¡Guía' Li': "Xclenu'" Xan, tu' bubu' didza' quia',
en tu' nacu' Nu rusölá neda'!

²² Zoa tu guiöj bulu'zöë' tsölá'alö bönni' tu'cu'ë zö'ö.
Na'a naca guiöj na' guiöj len squin zö'ö.

²³ Benë' Xanru' Dios ga naca caní.
Naca tu le run ga rubániru'.

²⁴ Dza ni naca dza nunë' Xanru' Dios.
Udzéjaru', en uzí'iru' xibé.

²⁵ Ráta'yutu' lo', Xan, usöló' netu'.
Ráta'yutu' lo', Xan, gunu' ga gaca dxi'a queëtu'.

²⁶ Bica' ba bönni' na' zë'ë uláz queë' Xanru'.
Guntu' Li' zxon lu yu'u lidxë' Xanru'.

²⁷ Dios náquië' Xanru', ate' bennë' queëru' bení'.
Buli'nödzej queë' Dios yugu' bëdxi renni' uzégui'ru'-ba' lahuë' lu bucugu
queë'.

²⁸ Naca cazu' Li' Dios quia', ate guía' Li': "Xclenu'."
Naca cazu' Li' Dios quia', ate' guna' Li' zxon.

²⁹ ¡Guli'-guië' Xanru' Dios: "Xclenu'" tu' náquië' dxi'a!
¡Zóatica'sö yöl-la' dxi'i ladxi' queë'!

119

Le run le gunná bé'enë' Xanru' rë'u

¹ ¡Bica' ba nupa nácacaga idú dxi'a tsáhui'do',
nupa na' tun ca rna xibá naguixjë' Xanru'!

² ¡Bica' ba nupa tun ca nácacaga le benë' ba nalí,
en idú ladxigaca ta'zë ladxí' Lë'!

³ Biti' bi le cabí naca tsahui' tun,
pero tun ca nácacaga le nulu'ë lahui.

⁴ Nuzú' queëtu' xibá quiu', Xan,
para idú ladxí'tu' guntu' ca ta'nná.

⁵ Raca ladxá'a gúntica'sa' ca ral-la' guna',
en guna' yugu' le gunná bë'u.

⁶ Ní'irö biti' ca' utuf'ida'
channö gapa chí'a yugu' le gunná bë'u.

⁷ Lu yöl-la' ba'a ladxi' quia' guía' Li': "Xclenu'"
cate' chinazi'a le buchí'a busöröu' le naca tsahui'.

⁸ Guna' ca ta'nná le gunná bë'u.
Biti' usán no'o neda' tsaz.

Ral-la' gunru' ca gunnë' Dios

⁹ ¿Nacxi gaca gunbi' tu bi'i bönni' ga ugá'ana tsahui' ládxi'do'obi'?
Ral-la' gunbi' ca rnna xtídz'u.

¹⁰ Idú ládxa'a rizé ládxa'a Li', Xan.
Biti' gu'u lataj ucá'ana' yugu' le gunná bē'u.

¹¹ Lu icja ládxi'da'ahua' runa' ca rnna xtídz'u,
para cabí guna' dul-la' lo' Li'.

¹² ¡Bica' xibó', Xan!
Busedi neda' yugu' le gunná bē'u.

¹³ Len ruá' cuina' ru'a didza'
ca nácagaca yúgu'tē le rusedi quézinu' netu'.

¹⁴ Rudzējada' ca nácagaca le nunu' ba nalí
ca nu rudzeja tu' dē yöl-la' tsahui' que.

¹⁵ Sa' ládxa'a ca nácagaca xibá quiu'
en gü'i ládxa'a yugu' le nulú'u lahui.

¹⁶ Udzējada' ca nácagaca le gunná bē'u.
Biti' gal-la ládxa'a xtídz'u.

Rudzėjade' eru' runru' le rnna cazë' Dios

¹⁷ Ben ga gaca dxi'a quia' neda', huen dxin quiu', Xan,
para soa' ibana', en guna' ca rnna xtídz'u.

¹⁸ Gusalaj guiój lahua' para gaca ilé'eda'
le tun ga rubánitu' nazúajgaca lu xibá naguixju' Li'.

¹⁹ Zoa' yödölió ca tu bönni' ridasö.
Biti' ucachu'u yugu' xibá nunu' ga bití' gaca ilé'eda' léguequi.

²⁰ Yúgu'tē dza ruhu'ini ládxa'a tu' rizé ládxa'a
yugu' le nusédinu' netu' ca ral-la' guntu'.

²¹ Ruzenu' le bach nupa tun ba zxön cuínguequi, en nupa nudxíagaca dö',
nupa na' tu'zóa tsólá'aló yugu' xibá gunná bē'u.

²² Biti' gu'u lataj nu guequi neda' zi' o nu ucá'ana neda' cá'asö,
tu' runa' ca ta'nná le nunu' ba nalí.

²³ Sal-la' ta'bö' nupa ta'nná bē', en ta'nné quia',
rizá' ládxa'a neda', huen dxin quiu', ca nácagaca le gunná bē'u.

²⁴ Raza ládxa'a yugu' le nunu' ba nalí.
Nácagaca le tu'zējni'i neda'.

Idú ládxi'ru' gunru' ca gunná cazë' Dios

²⁵ Nadinni lu yu bö' naca caza'.
Busubán ládxa'a, ugunu' dxin xtídz'u.

²⁶ Buluí'ida' Li' yugu' le nuna', ate' ubi'u didza'.
Busedi neda' yugu' le gunná bē'u.

²⁷ Buzējni'i neda' ca nácagaca xibá quiu',
ate' sa' ládxa'a ca nácagaca le nunu', le tun ga rubánitu'.

²⁸ Ribödxi bö' naca caza' tu' risébida' ládxa'a.
Butipa ládxa'a, ugunu' dxin xtídz'u.

²⁹ Ben ga bití' guna' le cabí sa'yéaj,
en buzá' ládxi' quia' xibá naguixju' Li'.

³⁰ Guröa' le naca idútē li para guna' ca rnna.
Nuzóa' lahua' yugu' le nusédinu' netu'.

³¹ Nazí' lu na'a yugu' le nunu' liná' lo.

Biti' gu'u lataj bi gun ga utuí'ida', Xan.

³² Guna' ca ta'nná xibá gunná bē'u,
tu' rutipa casu' ládxa'a.

Rē'ēniru' tséajni'iru' xtídžē'ē Dios

³³ Busedi neda', Xan, ca ta'nná le gunná bē'u,
ate' gun chí'a léguequi ga idxinrō dza udxi.

³⁴ Benna quia' yōl-la' réajni'i para gun chí'a xibá quiu',
en para idú ládxa'a guna' ca ta'nná.

³⁵ Ben ga guna' ca ta'nná le gunná bē'u,
tu' raza ládxa'a guna' ca ta'nná xibá na'.

³⁶ Ben ga güi'i ládxa'a yugu' le nunu' ba nalí,
para cabí güi'i ládxa'a yōl-la' ruhuidi'.

³⁷ Buchi'a guiōj lahua' para cabí uyúa' le cabí nazaca'.
Butipa ládxa'a para guna' le uluí'inu' netu'.

³⁸ Ben tsutsu didza' bē'lenu' neda', huen dxin quiu',
para gádxida' Li'.

³⁹ Bucuíta ga zoa' nu rudidza' yudxi neda', lē na' rádxida'
tu' nácgaca dxi'a tsahui' le nusédinu' netu' ca guntu'.

⁴⁰ Buyútsöca', rizē ládxa'a yugu' xibá quiu'.
Busubán ládxa'a, ugunu' dxin le tsahui' quiu'.

Ruzxöni ládxi'ru' xtídžē'ē Dios

⁴¹ Lu yōl-la' dxi'i ladxi' quiu' buyú neda', Xan,
en busölá neda' ca rna xtídz'u' gunu'.

⁴² Ubi'a didza' bi guía' nu run ga rutuí'ida', innía':
"Ruzxöni ládxa'a xtídz'u'", Xan.

⁴³ Biti' ucuítu' tsaz didza' idútē li lu ru'a
tu' runa' löza yugu' le nusédinu' netu'.

⁴⁴ Gúntica'sa' ca ta'nná xibá naguixju' Li'
yúgu'tē dza, en yúgu'tē iz si' zaca.

⁴⁵ Lu yōl-la' rusólá quiu' soa' ibana'
tu' bē' ládxa'a guna' ca ta'nná bē' xibá quiu'.

⁴⁶ Gu'a didza' que le nunu' ba nalí lógaquiē' bönni' ta'nná bē'ē
en bití' ca' utuí'ida'.

⁴⁷ Tsaza ládxa'a yugu' xibá gunná bē'u,
yugu' lē na' nadxí'ida'.

⁴⁸ Guna' ca' ca ta'nná xibá nunu', lē na' sē ládxa'a,
en sa' ládxa'a ca nácgaca le gunná bē'u.

Zóatica'sö xtídžē'ē Dios

⁴⁹ Yöjné didza' na' bē'lenu' neda', huen dxin quiu',
tu' benu' ga runa' löza le.

⁵⁰ Didza' na' ruhuē tsahui' neda' cate' riguí'i rizáca'a,
tu' tu'subán ládxa'a didza' bē'u.

⁵¹ Tu'titjal'ē neda' nupa tun ba xzōn cúnguequi,
pero bití' ca' usana' xibá naguixju' Li'.

⁵² Rōjneda' yugu' le busédinu' netu' dza ni'te, Xan,
ate' lē na' ruhuē tsahui' neda'.

⁵³ Lu yōl-la' ridzá'a quia' rō'a böniga ni'a quégaca nupa tuá' dö',
nupa na' tu'cá'ana xibá naguixju' Li'.

54 Rul-la' ca nácagaca le gunná bē'u.

Zoa' ni ca tu bönni' ridé' zi'tu'.

55 Chi'i dzõ'ölö röjneda' Lo', Xan,
en run chi'a xibá naguixju' Li'.

56 Nacuá'len neda' le ruzi'a xibé
ate' runa' ca rnna yugu' xibá quiu'.

Raza ládxi'ru' xtídzě'ě Dios

57 Nacu' Li', Xan, le ruzi'a xibé.

Chigunnía' guna' ca rnna xtídzu'u.

58 Idú ládxa'a inábida' Li' sóalenu' neda'.

Buéchi' ladxi' neda' ca rnna xtídzu'u gunu'.

59 Guzá' ládxa'a ca nácagaca le runa',
ate' bubí'i ládxa'a para guna' ca rnna le nunu' liná' lo.

60 Béndá'a bayúdx, en biti' gudzedá'
para guna' ca rinná bē' xibá quiu'.

61 Bönachi' zían bönachi' tuá' dõ' gula'gú'u neda' lě'ajlõ,
pero biti' gul-la ládxa'a xibá naguixju' Li'.

62 Gulahuéla riyasa', en rigu'a Li' yõl-la' ba
tu' nácagaca tsahui' yugu' le nusédinu' netu'.

63 Runa' tsõzxõn nupa tadxi Li',
enca' nupa tun ca rnna xibá quiu'.

64 Ridxín idútě yõdzõlió yõl-la' dxi'i ladxi' quiu', Xan.
Busedi neda' yugu' le gunná bē'u.

Naca le saca' le gunná cazě' Dios

65 Benu' quia' neda', huen dxin quiu', le naca dxi'a,
ca rnna xtídzu'u gunu', Xan.

66 Busedi neda' yõl-la' réajni'i idú, en yõl-la' raca yenni',
tu' réajlě'a yugu' xibá gunná bē'u.

67 Zí'alõ cate' buzõtju' neda' gudá' nanitia',
pero na'a runa' ca rnna xtídzu'u.

68 Idú dxi'a tsahui' nacu', en runu' le naca dxi'a.
Busedi neda' yugu' le gunná bē'u.

69 Nupa tun ba zxõn cuínguequi ta'zì yě' ca naca quia',
pero idú ládxa'a guna' ca rnna xibá quiu'.

70 Chul-la niti naca icja ládxi'do'guequi,
pero raza ládxa'a neda' xibá naguixju' Li'.

71 Naca dxi'a buzõtju' neda'
para bizédida' yugu' le gunná bē'u.

72 Nácagacarõ dxi'a quia' xibá rinná bē'u
ca nácagaca gayuá' gayuá'sõ dumí oro, en plata.

Naca tsahui' le gunná cazě' Dios

73 Len no'o benu' neda', en buzú' neda'.

Buzéajni'i neda' para gúnbě'a xibá gunná bē'u.

74 Nupa tadxi Li' ila'lé'e neda', en ulu'dzeja ládxi'guequi,
tu' runa' lõza xtídzu'u.

75 Nõzda' naca tsahui' ca ruchi'a rusõrõu' quia' neda', Xan,
ate' lu yõl-la' li ladxi' quiu' busaca' zi'u neda'.

76 Na'a, lu yõl-la' dxi'i ladxi' quiu' buě tsahui' neda',

ca rnna didza' chibě'lenu' neda', huen dxin quiu'.

⁷⁷ Gudá duhuechi' ládxa'u neda' para soa' ibana', tu' raza ládxa'a xibá naguixju' Li'.

⁷⁸ Ben ga ulu'tuí'i nupa tun ba zẏön cuínguequi, tu' gula'nně quia', en biti' bi bena' quéguequi, pero neda' sa' ládxa'a ca naca xibá quiu'.

⁷⁹ Ral-la' udxín quia' nupa tadxi Li', nupa na' núnbě'gaca le nunu' ba nalí.

⁸⁰ Ben ga udxín ca rnna le gunná bē'u, para cabí utuí'ida'.

Runě' Dios ca rnna xtídžě'ě

⁸¹ Rudú ládxa'a tu' ribōza' yōl-la' rusólá quiu', pero runa' lōza xtídzu'u.

⁸² Chirequi ichul-la lahua' tu' rizēda' ládxa'a xtídzu'u, rnnía: "¿Bátaxi huě tsaú'u neda'?"

⁸³ Caní raca tu' naxú'unida' ca tu buzudi guídi nal-la' lahui guí', pero catu caz gal-la ládxa'a yugu' le gunná bē'u.

⁸⁴ ¿Bál-laxi dza soa' ibana' neda', huen dxin quiu'?

¿Bátaxi usiúdxu' nupa ta'bía no neda'?

⁸⁵ Nupa tun ba zẏön cuínguequi gula'chō'ōna tu yeru ga tsōjbixa', nupa na' biti' tun ca rnna xibá naguixju' Li'.

⁸⁶ Idútě li nácagaca yúgu'tě xibá gunná bē'u.

Lu yōl-la' rizi' yě' quéguequi ta'bía no neda'.
¡Gúcalen neda'!

⁸⁷ Gula'zóa ulu'sunítiě' neda' lu yōdzōlió ni, pero biti' busán na'a xibá quiu'.

⁸⁸ Lu yōl-la' dxi'i ladxi' quiu' busubán ládxa'a, para gapa chí'a le nunu' ba nalí len ruá' cuinu'.

Réajlě'ěru' xtídžě'ě Xanru'

⁸⁹ Rulídza' Li', Xan.

Tsaz naguixju' xtídzu'u yehua' yubá.

⁹⁰ Gunu' ca rnna xtídzu'u quégaca bōnachi na'a dza, en yúgu'tě dza si' zaca. Gudíxaj cazu' yōdzōlió, ate' idía'tica'sō.

⁹¹ Ni'a que le gunná bē'u nacua' caz yúgu'tě ga ridxintě na'a dza, tu' tun xichinu' yúgu'tě lě na'.

⁹² La'tu' cabí raza ládxa'a xibá naguixju' Li', chigunítia' lu le busaca' zi' neda'.

⁹³ Catu caz gal-la ládxa'a yugu' xibá quiu', tu' busabanu' ládxa'a ni'a quéguequi.

⁹⁴ Néquida' quiu'.

¡Busólá neda', tu' ruí'i ládxa'a xibá quiu'!

⁹⁵ Nupa tuá' dō' ta'bō' nisi neda' para ulu'suniti neda', pero neda' gū'i ládxa'a le nunu' ba nalí.

⁹⁶ Chibilé'eda' ruúdxí que yúgu'tě le naca idútě yōdzōlió ni, pero catu caz udxí que le gunná bē'u guntu'.

Nadxí'iru' xtídžě'ě Xanru'

⁹⁷ Nadxí'ide'eda' xibá naguixju' Li'.

Idú dza rizá' ládxa'a ca naca que.

98 Réajni'iröda' ca nupa ta'dá'baga' neda'
tu' ruí'i ládxa'a yugu' le gunná bë'u, en tu' dá'tica'sa' léguequi.

99 Réquibe'eröda' ca yúgu'tè nupa tu'sedi neda',
tu' rizá' ládxa'a le nunu' ba nalí.

100 Réajni'iröda' ca yugu' bönni' gula,
tu' rapa chí'a xibá quiu'.

101 Gudapa chí'i cuína' para cabí guna' le cabí naca tsahui',
en para guna' ca rnna xtídz'u.

102 Biti' ca' nucá'ana' yugu' le nusédinu' netu',
le nusedi quézinu' neda'.

103 Bica' zxixi nácgaca xtídz'u.

Ön, nácgacarö zxixi ca le zxixi que buz.

104 Tu'z'éajni'i xibá quiu' neda'.

Que lè ni na' réquida' zi' yúgu'tè le cabí naca.

Xtídzë'ë Dios ruzení' lu icja ládximo'oru'

105 Ca tu bení' naca xtídz'u ga ridá',
en le ruzení' nöza ga ral-la' tóda'.

106 Guzxí' lu na'a bí guna', en nuna' tsutsu xtídz'a'a.
Gapa chí'a le nusédinu' netu' le naca tsahui'.

107 Zoa le rusaca' zi' neda'.

Busubán ládxa'a, Xan, ugunu' dxin xtídz'u.

108 Guzxí' yöl-la' ba rigu'a Li' len ru'a, Xan,
en buzéajni'i neda' yugu' le nusédinu' netu'.

109 Zóatica'sö bönadxi gátia',
pero bití' ral-la ládxa'a xibá naguixju' Li'.

110 Nupa tuá' dö' bulu'zè tu du yalaj le sön neda',
pero bití' bucá'ana' xibá quiu'.

111 Tsaz nazí' lu na'a le nunu' ba nalí,
ate' run ga rudzeja ládxa'a.

112 Ruí'i ládxa'a gúntica'sa' ca ta'nná le gunná bë'u.
Guna' caní ga idxintè dza udxi.

Nagá'anaru' dxi'a ni'a que xtídzë'ë Dios

113 Réquida' zi' nupa nácgaca chopa ladxi',
pero nadxí'ida' xibá naguixju' Li'.

114 Nacu' ca tu ga rucachi' cuína', en le run chí'i neda'.
Runa' löza xtídz'u.

115 Guli'cuíta ga zoa', libí'ili' ruá'ali' dö',
tu' guna' ca ta'nná le gunná bë'ë Xana' Dios.

116 Buzóa neda' tsutsu, ugunu' dxin xtídz'u, ate' soa' ibana'.
Biti' gu'u lataj utuí'ida' ca naca le runa' löza.

117 Buzóa neda' tsutsu, ate' ulá',
en gú'ítica'sa' ládxa'a le gunná bë'u.

118 Nusán no'o yúgu'tè nupa nusángaca le gunná bë'u,
tu' naca yöl-la' sina' quéguequi le cabí nazaca'.

119 Ugú' nupa tuá' dö' luyú ni ca nu rugúa bëbu.
Que lè ni na' nadxí'ida' le nunu' ba nalí.

120 Rizxizi idútè le nayá' nabana' tu' rádxida' Li',
en rádxida' le gaca cate' usiúdxu' bönnachi.

Ral-la' gunru' ca rnna xtídzë'ë Dios

- 121 Bena' le naca tsahui', en le naca li.
 Biti' usán no' o neda' lu ná'agaca nupa tu'saca' zi' neda'.
 122 Nacu' quia' neda', huen dxin quiu', le naca bë' gaca dxi'a quia'.
 Biti' gu'u lataj ulu'saca' zi' neda' nupa tun ba zxön cuínguequi.
 123 Chibídxíj lahua' tu' riböza' yöl-la' rusólá quiu',
 enca' didza' tsahui' quiu'.
 124 Lu yöl-la' dxi'i ladxi' quiu' ben quia' neda', huen dxin quiu',
 ca rë'ëni quézinu' gunu'.
 Busedi neda' yugu' le gunná bë'u.
 125 Naca' huen dxin quiu'.
 Benna quia' yöl-la' réajni'i para gaca gúnbë'a le nunu' ba nalí.
 126 Chibídxín dza bi gunu', Xan,
 tu' gula'guítsjë' xibá naguixju' Li'.
 127 Que lé ni na' nadxf'iröda' xibá naguixju' Li' ca nadxf'ida' oro.
 jÖn, ca oro banéquini,
 128 en réquida' nácagacarö dxi'a xibá quiu' ca yúgu'të le dë!
 Biti' rilé'eda' dxi'a yúgu'të le cabí naca.

Raca ládxi'ru' gunru' ca rnna xtídzë'ë Dios

- 129 Run ga rubánida' le nunu' ba nalí.
 Que lé ni na' bö' naca caza' nazí' lu në'e le.
 130 Cate' nalá' lahui xtídzü'u, ruzení' queëtu'.
 Run ga ta'yéajni'i nupa nácagaca nöxaj ladxi'.
 131 Gusalja' ru'a, en gunné ládxa'a,
 tu' guzë ládxa'a xibá gunná bë'u.
 132 Buyú neda', en buzá' ladxi' quia',
 ca run cazu' quégaca nupa ta'dxi'i Li'.
 133 Buzóa neda' tsutsu para guna' ca rnna xtídzü'u.
 Biti' gu'u lataj le naca xihui' inná be'e neda'.
 134 Buá'u neda' lu na' nu rusaca' zi' neda',
 para gaca guna' ca naca xibá quiu'.
 135 Ben ga gaca bë' nazí' lu no' o neda', huen dxin quiu',
 en busedi neda' yugu' le gunná bë'u.
 136 Raca nisa ribödxí guiöj lahua' ca tu yegu gubó'o,
 tu' cabí tun bönachi ca rinná bë' xibá quiu'.

Idutë li naca le rnna cazë' Xanru'

- 137 Nacu' Li' tsahui', Xan.
 Dxi'a tsahui' naca le ruchi'a rusöröu' queëtu'.
 138 Nugú'u lu na'tu' le nunu' ba nalí.
 Naca tsahui', en tsaz zoa.
 139 Tu' riböza' le naca quiu' run ga régui rilá ládxi'da'ahua',
 ate' gulal-la ladxi' xtídzü'u nupa ta'dá'baga' neda'.
 140 Idú dxi'a tsahui' naca xtídzü'u.
 Que lé ni na' neda', huen dxin quiu', nadxf'ida' le.
 141 Nöxaj ladxi' naca', ate' tu'cá'ana bönachi neda' cá'asö,
 pero bití' ral-la ládxa'a le gunná bë'u.
 142 Zóatica'sö le naca tsahui' quiu',
 en idutë li naca xibá naguixju' Li'.

143 Ba bidxín le raca quia', en le rusaca' zi' neda',
pero raza ládxa'a xibá gunná bē'u.

144 Nácatica'sō tsahui' le nunu' ba nalí.

Buzéajni'i neda' para soa' ibana'.

Ral-la' ulaba ládxi'ru' le gunná cazē Dios

145 Idú ládxa'a rulidza' Li'.

Bubí'i didza', Xan, ate' guna' ca naca le gunná bē'u.

146 Rulídatica'sa' Li'.

Busölá neda', ate' guna' ca naca le nunu' ba nalí.

147 Riyasa' zí'aló ca ritó yu zila, en rulidza' Li' para gácalenu' neda'.

Ribōza' yugu' didza' gu'u.

148 Chi'i dzó'ölö rubéaja' yēla guiōj lahua',

para ulaba ládxa'a ca naca xtídzu'u.

149 Lu yöl-la' dxi'i ladxi' quiu' buzē nagu' chi'a.

Busubán ládxa'a, Xan, ca naca le nusédinu' netu'.

150 Ta'biga' nupa tuá' dö' ga zoa' para ila'bía no neda'.

Nucá'anagaca xibá naguixju' Li'.

151 Zu' gala' ga zoa', Xan,

ate' idútē li naca le gunná bē'u.

152 Dza ni'te quez núnbē'a le nunu' ba nalí,

en nōzda' tsaz nuzú' le.

Le gunná cazē Dios run rē'u tsahui'

153 Buyú le rusaca' zi' neda', en busölá neda',

tu' cabí ral-la ládxa'a xibá naguixju' Li'.

154 Bubí'i didza' uláz quia', en buá'u neda'.

Busubán ládxa'a ca naca xtídzu'u.

155 Zi'tu' zoa yöl-la' rusölá ga nacua' nupa tuá' dö',

tu' cabí tuí'i ládxi'gaca le gunná bē'u.

156 Zxöntērö naca yöl-la' ruhuéchi' ladxi' quiu', Xan.

Busubán ládxa'a ca naca le nusédinu' netu'.

157 Ziángaca nupa ta'bía no neda', en ta'dá'bagá' neda',

pero bití' nucá'ana' le nunu' ba nalí.

158 Bití' rilé'eda' dxi'a nupa nucá'anagaca Li',

en bití' tun ca rnna xtídzu'u.

159 Buyú ca nadxí'ida' xibá quiu', Xan.

Lu yöl-la' dxi'i ladxi' quiu' busubán ládxa'a.

160 Idútē li nácagaca yúgu'tē xtídzu'u,

en tsaz nacua' yúgu'tē le nusédinu' netu' le nácagaca tsahui'.

Ral-la' udödi cuinru' lu nē'ē Dios

161 Ta'bía no neda' nupa ta'nná bē', en bití' bi bena' quéguequi,
pero runa' bal xtídzu'u lu icja ládxi'da'ahua'.

162 Rudzéjalenda' xtídzu'u,

ca rudzeja nu rudzöli tu yöl-la' tsahui' zxön.

163 Réquida' zi', en bití' rilé'eda' dxi'a le cabí nácatē,

pero nadxí'ida' xibá naguixju' Li'.

164 Gadxi luzuí tu dza rigu'a Li' yöl-la' ba,

ni'a que le nusédinu' netu', le naca tsahui'.

165 Ta'bōza dxi'a tsáhui'do' nupa nadxí'igaca xibá naguixju' Li',

en biti' bi run ga rōjchégu'gaca.

¹⁶⁶ Runa' lōza yōl-la' rusōlá quiu', Xan,
en runa' ca rna xibá nunu'.

¹⁶⁷ Yugu' le nunu' ba nalí tun chí'i bō' naca caza',
ate' nadxí'ide'eda' léguequi.

¹⁶⁸ Runa' ca ta'nná xibá quiu', en yugu' le nunu' ba nalí
tu' rilé'e quézinu' yúgu'tē le runa'.

Rudzéjalenru' xtídzē'ē Dios

¹⁶⁹ Ruzé nagu' le rulidza' Li', Xan.

Ruzéajni'i neda' ca rna xtídzu'u.

¹⁷⁰ Ruzé nagu' le rinábida' Li',
en busōlá neda' ca rna xtídzu'u gunu'.

¹⁷¹ Bē' neda' lataj cu'a Li' yōl-la' ba,
tu' rusédinu' neda' le gunná bē'u.

¹⁷² Bē' lataj gul-la lúdx'a ca naca xtídzu'u,
tu' nácgaca tsahui' yúgu'tē xibá nunu'.

¹⁷³ Guzōatē gácalenu' neda',
tu' nabōa' xibá quiu'.

¹⁷⁴ Rizé ládxa'a yōl-la' rusōlá quiu', Xan,
en raza ládxa'a xibá naguixju' Li'.

¹⁷⁵ Bē' lataj soa ibán bō' naca caza' para cu'a Li' yōl-la' ba,
en ben ga gácalen neda' le nusédinu' netu'.

¹⁷⁶ Ridōda' tsōlá'alō ca tuba' bō'cu' zxila' nanítiba'.

Gudá dudilju' neda', huen dxin quiu', tu' cabí ral-la ládxa'a xibá nunu'.

120

¹ Cate' gudí'i guzxáca'a bulidza'-nē' Xanru',
ate' Lē' bubi'ē didza'.

² Busōlá bō' naca caza', Xan, lu na' nu rizi' yē',
en lu na' nu biti' run ca gunná caz.

³ ¿Bizxi gunē' quiu' Dios, en bizxi ubi'ē quiu', lí' na' rizi' yē'u?

⁴ Ichizē' lí' yugu' yaga lahui tuchi' que nu reaj gudil-la,
en cu'ē icju' bō' yalaj que ya' yōridō'.

⁵ Bica' bayechi' neda' tu' zóasa' yōdzō Mesec,
en zoa' tu lu yu'u guídi quégaca bōnachi Cedar.

⁶ Xidzélé'ē chiguzōa bō' naca caza'
len nupa tu'suniti yōl-la' ribōza dxi'a tsáhuí'do'.

⁷ Ré'ēnda' cōza' dxi'a tsáhuí'do', pero cate' ruá'a didza'
tē'ēnnē' ila'díl-lalen neda'.

121

¹ Uchisa icja' uyúa' le raca yugu' lu guí'a.

¿Gazxi za' le gácalen neda'?

² Le gácalen neda' za' lu nē'ē Xanru'.

Lē' benē' lúzxiba, en luyú.

³ Biti' gu'ē lataj cuilu' ga ridó'.

Biti' ca' gasi Nu na' run chí'i lí'.

⁴ Buyútsōca', biti' ridōdi yēla guiōj lahuē',
en biti' rásie', Lē' na' rapa chí'ē bōnachi Israel.

- 5 Run chi'ë Xanru' Dios li'.
 Zoë' Xanru' Dios cuitu' ibêla, rigu'ë li' xzul-la.
 6 Biti' uzegui' gubidza li' lahui' dza,
 en biti' bi' gun beo' quiu' chi'i dzó'ólö.
 7 Gun chi'ë Xanru' Dios li' ga rizó'o, en ga rudxinu',
 dza ni zóaru' na'a, en yugu' dza si' zaca.
 8 Xanru' Dios gun chi'ë li' ga rizó'o, en ga rudxinu',
 dza ni zóaru' na'a, en yugu' dza si' zaca.

122

- 1 Budzédada' cate' gulé bönachi neda', gula'nná:
 "Uyeajru' yu'u lidxë' Xanru' Dios."
 2 Na'a zuíru' ni
 ga nu riyaza yödzö Jerusalén.
 3 Dxi'ado' gulunë' yödzö Jerusalén,
 ate' naca lachi, en tuz ca röjlözgaca yu'u zxön que.
 4 Ta'yaza yugu' cö' bönachi queë' Xanru' ga ni
 ca na' nusédinë' Dios bönachi Israel,
 para ila'gú'u yöl-la' ba Xanru' Dios.
 5 Ta'bö' nupa tu'chi'a tu'sörö queëru' ga ni,
 ga ta'bö' ta'nná bë' xzi'ini xi'sóë' David.
 6 Guli'nábinë' Dios gunë' ga gaca dxi'a que Jerusalén,
 en ga ulu'zi' xibé nupa ta'dxi'i yödzö ni yöl-la' tsahui'.
 7 Dios gunë' ga ila'böza dxi'a tsáhui'do' nupa nacua' yödzö ni,
 en ga ulu'zi' xibé nupa ta'nná bë' yöl-la' tsahui'.
 8 Tu' nadxi'ida' yugu' böcha'a, en yugu' böchi' luzá'a,
 rnniá': "Gaca yöl-la' riböza dxi ladxi' lu yödzö ni."
 9 Tu' nadxi'ida' lidxë' Xanru' Dios,
 rinábida'-në' gunë' ga gaca dxi'a que yödzö ni.

123

- 1 Uchisa lahua' uyúa' ga zu' Li',
 rö'u rinná bë'u yehua' yubá ni'.
 2 Ca runë' bönni' nadó'o, ruyúë' bi ulu'ë xanë',
 ate' ruyubi' bi'i nigula nadó'o bi ulú'unu nigula xanbi',
 lësca' caní ruyuru' rë'u bi ulu'ë Xanru' Dios,
 ga idxinrö dza uzá' ládxë'ë queëru'.
 3 Buzá' ladxi' queëtu', Xan. Buzá' ladxi' queëtu',
 tu' nacua' nupa tu'cá'ana netu' cá'asó.
 4 Rudú' ládxi'tu' tu' tu'titaj netu' nupa tu'zi' xibé yúgu'të le dë,
 en tu' tu'cá'ana netu' cá'asó nupa tun ba zxön cúinguequi.

124

- 1 "La'tu' cabí gúcalenë' Xanru' rë'u",
 ral-la' ila'nná bönachi Israel:
 2 "La'tu' cabí gúcalenë' Xanru' rë'u
 cate' nupa bití' ta'lé'e rë'u dxi'a gula'díl-lalen rë'u,
 3 la' gulútité rë'u
 tu' gula'léde'e rë'u.
 4 Guca queëru' ca la' usubága'të rë'u nisa,

en la' uchíjcatëru' lu nisa na'.

⁵ La' uchíjcatëru' tu lu nisa zila."

⁶ ¡Bica' lá'ayi Xanru' Dios

tu' cabí bi'ë lataj nupa bití' ta'lé'e rë'u dxi'a ulu'suniti rë'u!

⁷ Bularu' ca rulaba' biguínido' tu lu le zön lëba'.

Naröza' du yalaj, ate' nuláru'.

⁸ Le rácalen rë'u za' lu në'ë Xanru' Dios.

Lë' benë' lúzxiba, en lu yu.

125

¹ Nupa tu'zxöni ládxi'gaca Xanru' Dios náca'gaca ca guí'a Sión,
tu' cabí bi' gaca utá guí'a na', pero tsaz zoa caz.

² Ca rő'gaca guí'a idú gásibi'ilö yödzö Jerusalén,
la' canísö zoë' Xanru' Dios idú gásibi'ilö bönachi queë',
na'a dza, en yúgu'të dza si' zaca.

³ Bití' ral-la' ila'nná bë' nupa tuá' dö' lu xiyú'gaca bönachi tsahui',
para cabí iún ga ilu'ë dö' bönni' tsahui' na'.

⁴ Xan, ben ga gaca dxi'a qué'gaca nupa náca'gaca dxi'a,
en qué'gaca nupa idú ládxi'gaca tun ca rnna xtí'zdu'u.

⁵ Nupa tu'dódi cúnguequi lu le cabí nácatë,
ben lé'guequi xigua' tsözxön len nupa tuá' dö'.
Ben ga ila'cuá' bönachi Israel dxi'a tsáhui'do'.

126

¹ Cate' Xanru' Dios buchë'ë bönachi yödzö Sión
nupa gula'dzún zi'tu', gúquiru' yélasö rineru'.

² Ní'irö idú ládxi'ru' buzzí'dxiru',
en lu yöl-la' rudzeja queëru' gurö'dxi'aru'.

Ní'irö guluí'i didza' bönachi yugu' yödzö izá'a, gula'nná:
"Dios, Xángaquië', benë' le náca'gaca zxön, gúcalenë' légaquië'."

³ Xanru' Dios benë' le náca'gaca zxön, gúcalenë' rë'u,
ate' ruzí'iru' xibë'.

⁴ Buchë' netu', irúajtu' ga ni nadzuntu', Xan,
para gácatu' ca nisa rudxín lu yegu nuhuí'igaca.

⁵ Lu yöl-la' rudzeja ila'bödxi'a cate' ila'lapa
nupa lu yöl-la' ribö'dxi qué'guequi röjözagaca.

⁶ Nu bönni' lu yöl-la' ribö'dxi rizë'ë, nu'ë bínnedo' röjözë',
lu yöl-la' rudzeja cödxi'ë cate' udxinë', nu'ë le nulapé'.

127

¹ Channö cabí runë' tsutsu Xanru' Dios tu yu'u,
nítisö tunë' dxin bönni' tunë' yu'u na'.

Channö cabí run chí'ë Xanru' Dios tu yödzö,
nítisö ruyúë' bönni' na' yu'u lu në'ë yödzö na'.

² Nítisö naca rubanu' zílado', en röjö'xu' cate' chigúl-lada',
en ragu' le guzxi'u ni'a que le busaca' zi' cuinu',
tu' runnë' Xanru' Dios que nu nadxí'inë' cate' ni' rasi nu na'.

³ Buli'yú, nácagacabi' xzí'iniru' le runnë' Xanru' Dios queëru',
ate' bí'ido' tu'cuá'anu nigula queëru'
nácagacabi' le rubi'ë Xanru' Dios queëru'.

⁴ Ca nácagaca yaga lahui' tuchi' lu na' nu bönni' rejë' gudil-la
nácagacabi' xzí'inë' bönni' zoë' iz cuidi' queë'.

⁵ Bica' ba bönni' nacua'abi' queë' zíántëro'bi'.
Biti' ca' utuí'inë' cate' ru'ë didza' láhui'gaquië'
bönni' tu'chi'a tu'söröë' queë', en lógaca nupa ta'díl-lalen lë'.

128

¹ Bica' ba yúgu'të nupa tadxi Xanru' Dios,
nupa na' tun ca rë'ëni quëzinë' Lë'.

² Cate' gagu' le gata' quiu' ni'a que dxin nun cazu',
uzi'u xibé lë na', en gaca dxi'a quiu'.

³ Gácanu nigula quiu' ca tu lubá uva dxía ga naca lö'a lidxu',
ate' ilácabi' xzí'inu' ca yugu' yaga olívodo' ta'bõ'öbi' ga ni' ráguli'.

⁴ Buli'yútsöca', caní gáquië' bica' ba
bönni' na' rádxinë' Xanru' Dios.

⁵ Xanru' Dios zoë' Sión gunë' ga gaca dxi'a quiu',
en gu'ë li' lataj ilé'enu' le dxi'a gaca que yödzo Jerusalén
yúgu'të dza su' ibanu'.

⁶ Dios gu'ë li' lataj ilé'enu' yugu' xzí'ini xi'sú',
en gunë' ga ila'bõza dxi'a tsáhui'do' bönachi Israel.

129

¹ "Zian luzuí gula'bía no netu' ga gudela' nácatu' ra'bando'",
huáca ila'nná bönachi Israel:

² "Zian luzuí gula'bía no netu' ga gudela' nácatu' ra'bando',
pero biti' gula'deli' ulu'xicja netu'.

³ Guca tsa bulu'gá'ana-ba' bëdxi lu bëla' cúdzu'tu',
en gulún tunna ga gudödi xiyágaba' bëdxi quëgaquië'."

⁴ Tsahui' náquië' Xanru' Dios.
Chinachúguë' du quégaca nupa tuá' dö' le gulúgui'ni netu'.

⁵ Ben ga ulu'tuí'i, en ulu'huécja guz cúdzu'lö
yúgu'të nupa biti' ta'lé'e dxi'a netu', bönachi Sión.

⁶ Ben ga ilácagaca ca guíxi'do' da' ícjo'olö yu'u,
le ribídxitë cate' ni' naca huë'ënido'.

⁷ Biti' gaca ulí në'e nu tsøjchugu le,
en biti' gaca nu gachi tsólén guizxi que,

⁸ en biti' ta'nná nupa ta'dödi ni':
"Rinábitu'-në' Xanru' Dios gunë' ga gaca dxi'a quiu'.
Lu Lë' Xanru' rinábitu' Lë' gunë' ga gaca dxi'a quiu'."

130

¹ Ga ni nõtjada' rulidza' Li', Xan.

² Ruzë nagu' chi'a, Xana' Dios.

Ruzëda' nagu' le rinábida' Li'.

³ La' nnaru' tsøjnenu' xigua' nabága'gaca bönachi,

¿nuzxi caz urúaj tsahui' lo', Xan?

⁴ Runiti lo cazu' netu', Xan,
para guntu' Li' bal.

⁵ Runa' löza Li', Xana' Dios. Run löza bö' naca caza' Li',
ate' runa' löza gaca ca rnna xtídzu'u.

⁶ Bö' naca caza' runrö löza Li', Xan,
ca tunë' bönni' tapa chi'ë yödzö chi'i dzö'ölö ta'bözë' itö yu zila,
ca tunë' löza itö yu zila yugu' bönni' na'.

⁷ Guli'gún löza Xanru' Dios, libí'ili', bönachi Israel,
tu' náquië' dxi'i ladxi' Xanru',

en ruhuá'uë' bönachi Israel.

⁸ Xanru' Dios huóá'uë' bönachi Israel
lu yúgu'të xigua' nabága'gaca.

131

¹ Biti' run ba zxön cuina', Xan, en biti' rigú'u cuina' yöl-la' ba,
en biti' ulapa' na'a le nácgaca zxön, en le nácgaca böniga.

² Idú ládxa'a nuzóa cuina' nōxaj, en zoa' dxisö.
Ca runbí' bi'i huë'ëni ruzí' ládxi'bi' cuítanu xiná'abi',
ca' riböza bö' naca caza' lu icja ládxi'da'ahua'.

³ ¡Libí'ili', bönachi Israel, guli'gunë' löza Xanru' Dios
ga naguela' na'a dza, en yúgu'të dza si' zaca!

132

¹ Rinábida' Li', Xan, uláz queë' David tsöjnénu'
yúgu'të le gudí'i guzxáque'ë,

² en ca benë' tsutsu xtídzë'ë, Xan, en guzxi' lu në'ë bi gunë' lo',
nacu' Nu nál-latërö láhuigaquië' zxi'ini xi'sóë' Jacob, gunné':

³ "Biti' ca' tsu'a lidxa',
en biti' gáta'a le ráti'da',

⁴ en biti' gu'a lataj tódi yëla guió'j lahua',
en biti' utsudi' lahua',

⁵ ga idxinrö dza ucöza' tu lataj ga soë' Xanru' Dios,
le gaca yu'u lidxi Nu na' nál-latërö láhuigaquië' zxi'ini xi'sóë' Jacob."

⁶ Biyönitu' didza' que guí'ina lá'ayi queë' Dios cate' ni' zóatu' Efrata,
ate' budzölitu' le lu xiyüë' Jaar.

⁷ Uyeajru' ga na' zoa cazë' Xanru' Dios.
Tseaj ládxi'ru'-në' ga naca xilibi ni'ë.

⁸ Gudödi, Xan, ga na' soa cazu' Li'.
Gudá tsözxön len guí'ina lá'ayi que yöl-la' zxön quiu'.

⁹ Ben ga sóalen le naca tsahui' yugu' bixúz quiu'
ca tu lari' ta'xóë' cúdzu'gaquië'.
Ben ga ilúl-la bönachi quiu' lu yöl-la' rudzeja quéguequi.

¹⁰ Uláz queë' David, huen dxin quiu', rinábida' Li'
cabí'ucá'anu' bönni' na' gurö cazu' Li'.

¹¹ Xanru' Dios benë' tsutsu xtídzë'ë bi gunë' queë' David,
le naca idütë li, ate' Lë' biti' unítië' xtídzë'ë na', gunné':

“Uzóa’ tuë’ xzí’ini xi’sú’ xilatju’ ga inná bē’ēbi’.

¹² Channö ilunbi’ xzí’ini xi’sú’ ca rnna didza’ dzaga quia’, en le nuna’ ba nalí para uzéajni’ida’ légacabi’, ila’nná bē’ēbi’ ga rō’u rinná bē’u yúgu’tē dza si’ zaca.”

¹³ Xanru’ Dios nabō cazē’ queë’ yōdzō Sión.

Raca lādxxē’ē gaca Sión ga soa cazē’ Lē’.

¹⁴ Rnnē’: “Nácatica’sō lataj ni ga soa caza’ neda’.

Soa’ ni tu’ raca lādxxa’a soa’ ni.

¹⁵ Guna’ ga gátada’ le ilágugaca bōnachi ni, en guna’ ga ulu’huōlaj ila’dzé’e yōta xtila nupa ta’yadzaj ta’yudxi lu yōdzō ni.

¹⁶ Guna’ ga sóalen yōl-la’ rusōlá yugu’ bixúz quia’ ca tu lari’ ila’xóa cúdzu’gaquiē’,

ate’ ilúl-la bōnachi quia’ lu yōl-la’ rudzeja quéguequi.

¹⁷ Guna’ ni ga ilá’ lahui yōl-la’ unná bē’ queë’ David.

Guna’ ga sóatica’sō nu inná bē’ xilatjē’ bōnni’ na’ nabō caza’.

¹⁸ Guna’ ga sóalen nupa bití’ ta’lé’e lé’ dxi’a yōl-la’ rutufí ca tu lari’ ilácuguequi, pero tsēpi yōsa bení’ le dxía icjē’.”

133

¹ Buli’yútsōca’: ¡Bica’ dxi’a tsahui’ naca cate’ nupa náacagaca bōchi’ luzē’e ta’bōza lu yōl-la’ tuz quéguequi!

² Naca ca le za ta’gú’u ícaguequi bōnachi, le ridzún lu guitsa’ láhuiguequi, en bidzún lu guitsa’ lúxxuē’ Aarón, le bidzún ga ridxintē lu yeni xzē’.

³ Naca ca buzén le ridinni lu guí’a Hermón, en ca le ribō’a lu guí’a Sión, tu’ gunná bē’ē Xanru’ gaca dxi’a queëru’ lu guí’a na’, en gata’ yōl-la’ na’bán idú queëru’.

134

¹ ¡Buli’yútsōca’!

¡Guli’cu’ē Xanru’ Dios yōl-la’ ba, yúgu’tēli’ runli’ xichinē’ Xanru’, yúgu’tēli’ na’ zóali’ yu’u lidxxē’ Xanru’ chí’i dzō’ōli’!

² ¡Guli’chisa ná’ali’ ga zóali’ lataj lá’ayi queë’, en guli’nná dxi’a queë’!

³ Xanru’ Dios, zoa cazē’ yōdzō Sión, gunē’ ga gaca dxi’a queēli’. Naca cazē’ Nu ben yehua’ yubá, en yōdzōlió ni.

135

¹ ¡Guli’cu’ē yōl-la’ ba Xanru’ Dios!

¡Guli’cú’u yōl-la’ ba La la’ayi queë’ Xanru’ Dios!

¡Guli’cu’ē yōl-la’ ba, libí’ili’ runli’ xichinē’ Xanru’,

² libí’ili’ na’ zuíli’ yu’u lidxxē’ Xanru’,

ga na’ zóali’ lō’a que yu’u lidxxē’ Dios queëru’!

³ ¡Guli’cu’ē yōl-la’ ba Xanru’ Dios tu’ náquiē’ dxi’a!

¡Guli’gul-la yōl-la’ ba que La la’ayi queë’, tu’ naca lachi!

4 Nabó cazë Xanru' xzí'ini xi'sóë' Jacob para ilaca quez queë'.
Guröë' bönachi Israel para ilequi queë'.

5 Nözda' nayëpisë' Xanru' Dios.

Nayëpisëtë'rë' ca yugu' dios quégaca bönachi izá'a.

6 Run cazë' Xanru' ca riyaza ladxi' cazë' yehua' yubá ni',
en luyú ni, en lu nísado', en xzan lu yu.

7 Runë' ga rö' böaj gáti'tës luyú ni,
en runë' ga rëpi yösa cate' ralaj guiój.

Rubéajë' bö' recja ga rapa chi'ë le nequi queë'.

8 Bëtië' yugu' bi'i bönni' zí'aló quégaca bönachi Egipto,
xzí'inigaca bönachi, en böa' hué'ënido' quégacaba' böa' guixi'.

9 Benë' yugu' yöl-la' huáca zxön le gulaca bë' luyú Egipto,
yugu' lë na' gulaca queë' Faraón, en quégaca huen xichinë'.

10 Busunitië' Dios bönachi zían yödzo izá'a,
en bëtië' bönni' lo ta'nná bë'ë.

11 Bëtië' Sehón, bönni' gunná bé'enë' bönachi Amorreo,

en Og, bönni' gunná bé'enë' bönachi Basán,

en bönni' gula'nná bé'enë' bönachi yödzo nacua' luyú Canaán.

12 Budödë' xiyúgaquië' bönni' na'

lu ná'agaquië' bönni' Israel, bönachi queë' cazë'.

13 Tsz zoa caz Lo', Xan.

Ila'cuá'tica'só nupa tsöjnégaca Li', Xan,

14 tu' uchi'a usórou' bönachi queu', Xantu' Dios,

en huéchi' ládxi'u nupa tun xichinu'.

15 Budó' quégaca bönachi yugu' yödzo izá'a néquiniguequi
plata, en oro, yugu' le núngaca lu ni'a lu ná'agaca bönachi.

16 Zóagaca ruí'iguequi, pero biti' bi didza' tu'i.

Zóagaca guiój lóguequi, pero biti' bi ta'lé'e.

17 Zóagaca náagagaca, pero biti' bi ta'yöni,

en biti' ta'guela' bö' ruí'igaca.

18 Nupa tun léguequi ilaca ca náagaca budó' na',

en caní ilaca yúgu'të nupa tu'zxöni ladxi' léguequi.

19 Libí'ili', bönachi Israel, guli'guíë' Xanru' náquië' dxi'a.

Libí'ili', xzí'ini xi'sóë' Aarón, guli'guíë' Xanru' náquië' dxi'a.

20 Libí'ili', xzí'ini xi'sóë' Leví, guli'guíë' Xanru' náquië' dxi'a.

Libí'ili', núlöli' rádxili'-në' Xanru', guli'guíë' Xanru' náquië' dxi'a.

21 Núlöli' zóali' yödzo Sión ral-la' guiëli'-në' Xanru' náquië' dxi'a,

tu' zoa cazë' Xanru' Dios yödzo Jesusalén.

¡Guli'cu'ë yöl-la' ba Xanru'!

136

1 ¡Xclenë' Xanru' Dios tu' náquië' dxi'a!

Zóatica'só yöl-la' dxi'i ladxi' queë'.

2 ¡Xclenë' Dios nayëpisëtë'rë' ca yugu' dios izá'a!

Zóatica'só yöl-la' dxi'i ladxi' queë'.

3 ¡Xclenë' Xanru', nayëpisëtë'rë' ca yugu' xángaca bönachi!

Zóatica'sö yöl-la' dxi'i ladxi' queë'.

4 ¡Xclenë' Dios, tuzë' Lë' runë' yugu' yöl-la' huáca zxön!
Zóatica'sö yöl-la' dxi'i ladxi' queë'.

5 ¡Xclenë' Dios, len yöl-la' rácada' queë' benë' lúzxiba!
Zóatica'sö yöl-la' dxi'i ladxi' queë'.

6 ¡Xclenë' Dios, gudixjë' luyú láhuilö nísado'!
Zóatica'sö yöl-la' dxi'i ladxi' queë'.

7 ¡Xclenë' Dios, benë' gubidza, en beo'!
Zóatica'sö yöl-la' dxi'i ladxi' queë'.

8 ¡Benë' Dios gubidza para tsení' lahui' dza!
Zóatica'sö yöl-la' dxi'i ladxi' queë'.

9 ¡Benë' Dios beo', en yugu' bōlaj para ulu'zení' chi'i dzö'ölö!
Zóatica'sö yöl-la' dxi'i ladxi' queë'.

10 ¡Xclenë' Dios, bëtië' yugu' bi'i bönni' lo quégaca bōnachi Egipto!
Zóatica'sö yöl-la' dxi'i ladxi' queë'.

11 ¡Bubéajë' bōnachi Israel ladaj bōnachi Egipto na'!
Zóatica'sö yöl-la' dxi'i ladxi' queë'.

12 ¡Len yöl-la' huáca zxön queë', en lu yöl-la' nadxi'i queë' benë' caní!
Zóatica'sö yöl-la' dxi'i ladxi' queë'.

13 ¡Xclenë' Dios, bubéajë' choplö Nísado' Xiná!
Zóatica'sö yöl-la' dxi'i ladxi' queë'.

14 ¡Benë' ga gula'dödi bōnachi Israel gatsaj láhui'lö nísado' na'!
Zóatica'sö yöl-la' dxi'i ladxi' queë'.

15 ¡Lu nísado' na' busunítië' Faraón, en bönni' queë' röjáquië' gudil-la!
Zóatica'sö yöl-la' dxi'i ladxi' queë'.

16 ¡Xclenë' Dios, guchë'ë bōnachi queë' la' guixi' ga ni' naca yu bidxi!
Zóatica'sö yöl-la' dxi'i ladxi' queë'.

17 ¡Xclenë' Dios, bëtië' bönni' gula'nná bë'ë, guláquië' nal-la!
Zóatica'sö yöl-la' dxi'i ladxi' queë'.

18 ¡Bëtië' bönni' gula'nná bë'ë, dëda' lu ná'agaquië' yöl-la' unná bë'!
Zóatica'sö yöl-la' dxi'i ladxi' queë'.

19 ¡Bëtië' Sehón, bönni' gunná bé'enë' bōnachi Amorreo!
Zóatica'sö yöl-la' dxi'i ladxi' queë'.

20 ¡Bëtië' Og, bönni' gunná bé'enë' bōnachi Basán!
Zóatica'sö yöl-la' dxi'i ladxi' queë'.

21 ¡Budödë' xiyúgaquië' lu ná'agaca bōnachi queë'!
Zóatica'sö yöl-la' dxi'i ladxi' queë'.

22 ¡Budödë' le lu ná'agaca bōnachi Israel, bōnachi tun xichinë'!
Zóatica'sö yöl-la' dxi'i ladxi' queë'.

23 ¡Yöjnenë' rë'u cate' ni' bugá'anaru' cá'asö!
Zóatica'sö yöl-la' dxi'i ladxi' queë'.

24 ¡Busölë' rë'u lu ná'agaca nupa gula'díl-lalen rë'u!
Zóatica'sö yöl-la' dxi'i ladxi' queë'.

25 ¡Rugahuë' yúgu'të bōnachi!
Zóatica'sö yöl-la' dxi'i ladxi' queë'.

26 ¡Xclenë' Dios, zoa cazë' yehua' yubá!
Zóatica'sö yöl-la' dxi'i ladxi' queë'.

137

¹ Ra' yegu nacuá' lu yu Babilonia gurö'ötu',
en gurödxi yéchi'tu', cate' yöjnetu' yödzö Sión.

² Lu yaga rö'gaca yugu' ra' yegu ni'
bugála'tu' yugu' le rül-lalentu'.

³ Caní bentu' tu' gula'nabi yudxi nupa gulachë' netu' nadzuntu' ni' gúl-latu'.
Nupa bulu'saca' zi' netu' gula'naba queëtu' yöl-la' ruzxidxi, gula'nná:
"Guli'gul-la queëtu' tu le rul-la que yödzö Sión."

⁴ ¿Nacxi caz gaca gúl-latu' le rul-la queë' Xanru'
ga ni nadzuntu' tu lu yödzö izá'a?

⁵ Channö gal-la ládxa'a yödzö Jerusalén,
rinábida'-në' Dios ugüë' yöl-la' raca que na'a ibëla.

⁶ Rinábida'-në' gunë' ga ta' lúdxa'a chichja'
channö cabí tsöjnedá' ladza',

en channö cabí huí' zxönrá' yödzö Jerusalén ca ia'tú le ruzí'ida' xibé.

⁷ Yöjné le gulunë' xzí'ini xi'söë' Edom, Xan,
le gulunë' dza busiúdxu' yödzö Jerusalén,
ca na' gula'nnë': "Guli'quinnaj dëra.
Guli'quinnaj dëra ga idxintë xilibi zö'ö yödzö na'."

⁸ Libí'ili', bönachi Babilonia, libí'ili' rusunítili',
bica' ba nu ubí'i queëli' ca na' benli' queëtu'.

⁹ Bica' ba nu quela' yugu' bí'ido' queëli'
en uzxuzxaj légcabi' yugu' lu guiöj.

138

¹ Idú ládxa'a guía' Li', "Xclenu'" Xan.

Gul-la' yöl-la' ba quiu' lógaca le tun zxön bönachi yugu' yödzö izá'a.

² Uzóa zxiba' saca' yudo' lá'ayi quiu', en guía' Li', "Xclenu'"
ní'a que Lo', tu' nacu' dxi'i ladxi', en runu' ca rna didza' bë'u,
tu' benu' ca naca lu xtídxu'u, en lu le naca ca nazí'i lo.

³ La' dza ná'asö cate' bulidza' Li', bubi'u didza'.
Tu' butipu' ládxa'a, guca' rugu ladxi'.

⁴ Yúgu'të bönni' ta'nná bë'ë ilé' Li': "Xclenu'" Xan,
cate' ila'yönnë' didza' ru'u.

⁵ Ilul-lë' ca nácgaca le runë' Xanru' Dios,
tu' nácatërö zxön yöl-la' ba queë' Xanru'.

⁶ Sal-la' nayépisëtërë' Xanru' Dios
ruí'i ládxe'ë nupa nácgaca cá'asö,
pero zi'tu' zí'tu'sö ruyúë' nupa tun ba zxön cuínguequi.

⁷ Sal-la' ridá' ga zoa bönadxi quia', Li' utipa cazu' ládxa'a.
Tíl-lalen cazu' nupa ta'díl-lalen neda',
ate' len yöl-la' huáca quiu' usóló' neda'.

⁸ Xanru' gun cazë' quia' ca chinuzóa cazë' gunë'.

Zóatica'sö yöl-la' dxi'i ladxi' quiu', Xan.

Biti' usán no'o le nun cazu' len na' cuinu'.

139

¹ Ruyú cazu' le yu'u icja ládxi'da'ahua', Xan, en nunbë' cazu' neda'.

² Nöz quézinu' cate' ribö'a, en cate' riyasa'.

Nözinu' le rizá' ládxa'a ni' zu' zi'tu'.

³ Ruyú cazu' neda' cate' bi runa', en cate' rasia',
en nözinu' yúgu'të le runa'.

⁴ Zí'atëlö ca bi didza' ru'a,
chi nöz quézinu' bi innía', Xan.

⁵ Röjnöru cazu' lahua', en za' cazu' cúdza'a,
en naxóatica'sö no'o neda'.

⁶ Run ga rubánida' tu' nöz quézinu' Li'.

Biti' séqui'da' tséajni'ida' ca naca.

⁷ ¿Naru' huáca tseja' ga biti' idxín Bö' quiu'?

¿Naru' huáca izxúnnaja' ga biti' zoa cazu' Li'?

⁸ La'tu' huabena' lúxiba, ni' soa cazu' Li',
en la'tu' huötja' lataj chul-la, ni' zoa cazu' ca'.

⁹ La'tu' uyija' ga rilén gubidza,
o la'tu' huadöda' ia'tsölá'alö nísado',

¹⁰ ni' caz ichë'u neda',
ate' len no'o ibëla sön cazu' neda'.

¹¹ La'tu' innía': "Ucachi' neda' le naca chul-la",
en la'tu' huóca chul-la beni' zóalen neda',

¹² biti' gaca chul-la lo' Li' lë na' naca chul-la quia',
pero chi'i dzö'ölö gaca quiu' ca lahui' dza.

Tuz ca nácagaca lo' Li' le naca chul-la, en le naca lahui' dza.

¹³ Nun cazu' Li' le zoa icja ládxi'da'ahua'.

Benú' ga guyá' lë'ënu xiná'a le naca caza'.

¹⁴ Guía' Li': "Xclenu'" tu' run ga rubánida' ca nun cazu' neda',
ate' rádxida' Li' tu' tun le nunu' ga rubánida',
ate' bö' naca caza' nözi caz naca caní.

¹⁵ Biti' bigachi' lo' le naca caza' cate' ni' si' galja',
cate' ni' yu'a lë'ënu xiná'a.

¹⁶ Bilé'e quézinu' neda' cate' ni' si' galja',
tu' chinuzúajgaca lu guichi quiu'

yugu' dza ral-la' soa' ibana',
sal-la' biti' ridxini nitú dza na'.

¹⁷ Nazáca'tërögaca quia' le rizá' ládxi'u, Dios.
Ziántërö nácagaca lë na' rizá' ládxi'u.

¹⁸ La'tu' huáca nu ulaba léguequi,
ilácagaca ziántërö ca nácagaca guiöj yuzxi.
Cate' rubana', ni' zóalena' Li'.

¹⁹ Raca ládxa'a usunítiiu' nupa tuá' dö', Dios.

Que lë ni na', guli'cuíta ga zoa', nülöli' rútili' bönachi.

²⁰ Tuf'i didza' zi' ca nacu' Li', Dios,
ate' nupa ta'dá'baga' Li' ta'nné liz que Lo'.

²¹ ¿Naru' cabí rileda' nupa ta'lé Li', Xan?

¿Naru' cabí ruzó'a tsólá'aló nupa ta'dá'baga' Li'?

²² Idú ládxa'a bití' rilé'eda' léguequi dxi'a.
Nuzó'a' léguequi ca nupa ta'díl-lalen neda'.

²³ Buyú neda', Dios, en gúquibe'e le zoa icja ládxi'da'ahua'.
Guzxí' bē' neda', en gúquibe'e le rizá' ládxa'a.

²⁴ Buyú channö zóalen neda' le naca dö',
en buluí'i neda' nöza tsahui' quiu' zóatica'sö.

140

¹ Busólá neda', Xan, lu ná'agaca nupa tuá' dö'.
Ben chí'i neda' para cabí bi ilunē' bönni' zí' quia'.

² Ta'zá' ládxe'ē le nácgaca xihui' ilunē',
en tunē' ga ila'díl-lalen bönachi luzē'eguequi.

³ Didza' tu'ē tun ga nácgaca lúdxí'gaquiē' ca yugu' bēla sínia'.
Yu'u ruá'agaquiē' le nachē' yöl-la' guti ca le dxía lu láyi'ba' bēla na'.

⁴ Ben chí'i neda', Xan, para cabí bi ilunē' bönni' tu'ē dö' quia'.

⁵ Ben chí'i neda' para cabí bi ilunē' bönni' zidzaj quia',
bönni' na' té'ēnē' ilunē' ga ichixi iníguida'.

⁶ Nupa tun ba zxön cuínguequi nucáchi'gaca le sön neda',
enca' du yalaj iröli neda'.

Nucáchi'gaca du yalaj ga ral-la' töda'.

Nucózagaca le ila'zön neda'.

⁶ Gudxa'-nē' Xanru': "Nacu' Dios quia'.

Ruzē' nagu', Xan, yugu' le rinábida' Li'.

⁷ Xana' Dios, naca cazu' Nu rusólá neda' len yöl-la' huáca quiu'.
Ben chí'i cazu' icja' cate' ni' zoa' lu gudil-la.

⁸ Bití' gu'u lataj, Xan, gaca quia' le ré'ēnē' gunē' bönni' ru'ē dö'.

Bití' gu'u lé' lataj idéli'nē' le rizá' ládxe'ē, para cabí tsépisē'.

⁹ Nacuá' nupa nagú'ugaca neda' lé'ajlö.

Busubaga' ícjagaquiē' dö' té'ēnē' ilu'ē quia'.

¹⁰ Ben ga ila'bixaj bo' yalaj lahui ícjagaquiē'.

Bē' lataj tsöjtsázagaquiē' tu lu guí' zxön,

en yugu' lu yeru zila ga bití' ila'zéqui'nē' ulu'rúajē'.

¹¹ Bití' gu'u lataj soē' bönni' rizí' yē'ē luyú ni.

Ben ga udxín queē' bönni' zidzaj dö' ru'ē."

¹² Nözda' gunē' Xanru' ga ulu'rúaj tsahui' nupa ta'gu'í ta'zaca',
en uchi'a usöröē' quégaca bönachi yechi'.

¹³ Le nácatē ilē Li': "Xclenu'" nupa nácgaca tsahui' tu' tu'lidza Lo'.
Ila'cuá' ga zoa cazu' Li' nupa nácgaca dxi'a.

141

¹ Rulidza' Li', Xan. Gudáchi ga zoa'.

Ruzē' nagu' chí'a cate' rulidza' Li'.

² Buyú le rulidza' Li' ca dzön yalaj le ridxín lo',
en cate' richisa na'a, buzí' le ca tu böa'do' uzégui'a-ba' lo'.

³ Ben chí'i ruá'a, Xan,

en gudapa chi'i guídi ruá'a para cabí gu'a didza' zi'.

⁴ Biti' gu'u lataj gaca ládxa'a le cabí nácatē,
para cabí guna' le naca xihui'
len yugu' bönni' tutiē' bönachi.

Biti' gu'u lataj guna' léguequi tsözxön.

⁵ Bē' lataj gu'ē neda' bönni' tsahui' lu yöl-la' nadxi' queē'
para uzéajni'inē' neda'.

Le gunē' gaca quia' ca le za cu'ē icja'.

Biti' gu'u lataj tá'baga' icja' le ilún nupa tuá' dö'.

Rinábida' Li' uzagu' xinözguequi.

⁶ Ila'ládzu'gaquiē' bönni' lo quéguequi lē'e guí'a guiój,
ate' iléquibe'e gulaca dxi'a didza' bē'a.

⁷ Ca raca cate' nu rugá'ana-ba' bēdxi, en rulá'a yu,
ca' gaca que dxita yú'ugaquiē',
le gulásilasi ra' ba que xilátjagaca nupa nátigaca.

⁸ Richisa lahua' ruyúa' ga zu' Li', Xantu' Dios.

Rucachi' cuina' ga na' zu'. Biti' usán no'o neda'.

⁹ Ben ga bití' tsöjbixa' lu le sön neda', lē na' nucáchi'gaca,
en ga bití' tsöjtsaza' lu du yalaj nucözagaca nupa tuá' dö'.

¹⁰ Bē' lataj ila'yaza la' cuíngacasö lu du yalaj bulu'cachi' nupa tuá' dö',
pero benna lataj tódisa' neda' ga na' nagachi' du yalaj na'.

142

¹ Rulidza'-nē' Xanru', ru'a zidzaj didza'.

Ráta'yua' lahuē' Xanru' uzá' ládxi'ē quia'.

² Rudöda' lahuē' yöl-la' rinaba yudxi quia',
en rusiyönda' Lē' le rácagaca quia'.

³ Cate' budú ládxa'a,
gunözi quézinu' Li' le guca quia'.

La' nöza ga ridá' neda'
bulu'cachi' le sön neda'.

⁴ Buyú cuita' ibēla

tu' cuntu nu zoa nu ru'í'ladxi' neda'.

Biti' bi zoa le gácalen neda'.

Cuntu nu run chi'i bö' naca caza'.

⁵ Gurödxí'a lo' Li', Xan, gunnía':

Run chi'i cazu' neda' Li',

en naca cazu' Nu rácalen neda' ladaj nupa nabángaca.

⁶ Ruzē nagu' le rulidza' Li',

tu' nagá'ana' cá'asö.

Busöla neda' lu ná'agaca nupa ta'zóa regu' neda',

tu' nácatērögaca nál-la ca neda'.

⁷ Guléaj bö' naca caza' lu yu'u lidxi guíē,

para gaca guía' Li': "Xclenu'" tu' rulidza' Lo'.

Nupa nácagaca tsahui' ulu'dubi idú gásibi'ilö ga zoa',

tu' gunnu' sizxöni quia' le riquinda'.

143

¹ Ruzē nagu' le rulidza' Li', Xan.

Ruzě năgu' le rinabi yúdxida' Li'.

Tu' runu' ca rnna didza' bē'u, en nacu' tsahui' gunnúu'

² biti' ichē'u neda' lo' ga uchi'a usōrōu' quia', huen dxin quiu'.

Cuntu nu zoa naca tsahui' lo' Li'.

³ Nu biti' rilé'e neda' dxi'a zoa regu' bō' naca caza'.

Nuzōtjē' yōl-la' na'bán quia' lu yu.

Benē' ga zoa' lataj naca chul-la ca raca quégaca nupa gulati dza ni'te.

⁴ Que lē ni na' rudú lădxa'a, en rō'a bōniga.

⁵ Rōjneda' dza chigula'dōdi.

Rizá' lădxa'a ca năcagaca le benu' Li'.

Ribequi icja' ca năcagaca le nun no'o.

⁶ Richisa na'a zaca' ga zu' Li'.

Rizē lădxa'a Li' ca tu luyú bidxi rizē ladxi' nisa guiōj.

⁷ Bubí'tē didza', Xan, tu' rudú lădxa'a.

Biti' ucachi' lo' lahua' neda',

para cabi gaca' ca tu bōnni' ru'ē lataj chul-la ga nacuá' nupa nătigaca.

⁸ Ben ga yōnda' yugu' zila ca naca yōl-la' dxi'i ladxi' quiu',

tu' ruzxōni lădxa'a Li'.

Busēdi neda' ca ral-la' guna',

tu' ruchisa' lo' Li' bō' naca caza'.

⁹ Busōlá neda', Xan, lu ná'agaca nupa biti' ta'lé'e neda' dxi'a.

Nacu' Nu ruzóa neda' tsutsu.

¹⁰ Busedi neda' para guna' ca rē'ēnu' Li',

tu' naca cazu' Li' Dios quia'.

Bē' lataj ichē' Bō' Lá'ayi quiu' neda' lu nōza tsahui'.

¹¹ Butipa lădxa'a, Xan, para gaca yōl-la' ba que Lo'.

Tu' nacu' tsahui' busólá neda' lu le raca quia'.

¹² Lu yōl-la' dxi'i ladxi' quiu' guchugu quégaca nupa biti' ta'lé'e neda' dxi'a.

Busuniti yúgu'tē nupa tu'saca' zi' bō' naca caza',

tu' naca' huen dxin quiu'.

144

¹ ¡Yōl-la' ba Lē', Xanru' Dios!

¡Náquiē' ca tu guiōj ga zoa' tsutsu!

Rutipē' na'a para gaca tseja' gudil-la,

en rutipē' ca' xibōn na'a para gaca tıl-lalena' bōnni' năcagaquiē' nál-la.

² Naca cazē' Xanru' yōl-la' dxi'i ladxi' quia',

enca' ca tu ga zoa' tsutsu lu gudil-la.

Rusölē' neda', en náquiē' ca tu ga zoa' tsaz.

Náquiē' ca tu le run chi'i neda' lu gudil-la, ate' rucachi' cuina' ga na' zoē'.

Runē' ga tun nupa rinná bē'eda' ca rnna didza' ru'a.

³ ¿Bízcatē caz náquiē' bōnni' tu' runu' lē' ba lá'ana, Xan?

¿Bízcatē caz náquiē' bōnni' tu' ruí' ladxi' cazu' lē'?

⁴ Naca cazē' bōnni' na' ca tu bō'do' recja,

ate' yugu' dza zoē' nabanē' năcagacasō ca tu zxul-la le rigú'u tu bōaj ridōdisō.

⁵ Buzōtaj lúxziba, en bđinne ni, Xan.

Gudán yugu' guí'a, ate' irúaj dzōn lē'eguequi.

⁶ Ben ga tsēpi yōsa quiu', en bēsilasi léguequi.

Busē yugu' yaga lahui tuchi', en ben ga ila'bō' baguí'isō.

⁷ Bulí no'o ga na' zu' xitsá'alö.
 Busólá neda', en guléaj neda' lu ná'agaca bönachi zi'tu',
 le gaca ca rubéaju' neda' lu nisa zila.

⁸ Ta'zí' yë' bönachi na',
 ate' le cabí nácaté naca yöl-la' unná bë' quéguequi.

⁹ ¡Gul-la' quiu' Li', Dios, tu le cubi!
 ¡Gul-la' quiu' yöl-la' ba, en quínnia' bihuël-la nuá' chi du que!

¹⁰ Rusólá cazu' bönni' ta'nná bë'ë.
 Busóló' David, huen dxin quiu', lu guié tuchi' queé' bönni' ru'ë dö'.

¹¹ Gúcalen neda', en busólá neda' lu ná'agaca bönachi zi'tu'.

Ta'zí' yë' bönachi na',
 ate' le cabí nácaté naca yöl-la' unná bë' quéguequi.

¹² Ben ga ilácabi' bi'i bönni' queétu' ni yu'ugacabi' iz cuidi'
 ca yugu' yaga nazxóngaca,
 en ben ga ilácabi' bi'i nígula queétu'
 ca nácgaca ya'xzén que tu yu'u nazaca'.

¹³ Ben ga ilígaca yu'u queétu' xxa' za utúbitu',
 en ben ga iláljaba' gayuá' gayuá'aba' chíbodo',
 en bö'cu' zxíla'do' ga nucuá'atu'-ba'.

¹⁴ Ben ga ulu'cuá'aba' böa' hué'énido' quégaca böa' guixi' queétu',
 en ga biti' bi gaca quégacaba' bédxi zxön, en bédxido' ca'.
 Biti' gu'u lataj soa nu cödxí yechi' la' nöza que ládzatu'.

¹⁵ ¡Bica' bágaca bönachi raca caní quéguequi!
 ¡Bica' bágaca bönachi na' Xanru' Dios náquië' Dios quéguequi!

145

¹ ¡Guna' Li' zxön, Dios!

¡Nacu' Nu rinná be'e neda'!

¡Gádxítica'sa' Lo', Xana' Dios!

² ¡Tu dza tu dza cu'a Li' yöl-la' zxön,
 en cú'utíca'sa' Lo' yöl-la' ba!

³ ¡Nayëpisëtërë' Xanru' Dios, ate' cú'uru'-në' yöl-la' ba!
 ¡Biti' ca' gaca gúnbë'ëru' ca naca yöl-la' zxön queé'!

⁴ Yúgu'të bönachi ila'gú'u yöl-la' ba le nun cazu' Li',
 para ulu'siyön xzí'inígaca,
 en ulu'luí'i lahui le nácgaca zxön benu'.

⁵ Sa' ládxa'a ca naca yöl-la' zxön que yöl-la' unná bë' quiu',
 en ca nácgaca yöl-la' huáca zxön runu'.

⁶ Ilu'i didza' yúgu'të bönachi ca naca yöl-la' zxön
 quégaca yöl-la' huáca runu'.

Úsiyönda' bönachi ca naca yöl-la' zxön quiu'.

⁷ Idú ládxi'gaca ilu'i didza' cate' tsöjnégaca yöl-la' dxi'i ladxi' zxön quiu'.
 Lu yöl-la' rudzeja quéguequi ila'bödxí'a tu' nacu' tsahui'.

8 Xanru' Dios ruzá' ládxe'ë queëru', en ruhuéchi' ládxe'ë rë'u.
Biti' ilética'së', ate' zxöntërö naca yöl-la' dxi'i ladxi' queë'.

9 Runë' Xanru' Dios le naca dxi'a quégaca yúgu'të bönachi,
en ruhuéchi' ládxe'ë yúgu'të le nunë'.

10 Yúgu'të le nunu' ilë Li': "Xclenu" Xan,
ate' nupa néquiguequi quez quiu' ilún Li' zxön.

11 Ilu'i didza' ca naca yöl-la' zxön que le rinná bë'u,
en ulu'lu'i lahui yöl-la' zxön quiu',

12 para ulu'siyön bönachi ca nácagaca le zxön runu',
en ca naca yöl-la' zxön que le rinná bë'u le nayëpisëtërö.

13 ¡Zóatica'sö le rinná bë'u,

ate' idía'tica'sö yöl-la' unná bë' quiu'!

¡Lu le naca idú ladxi' queë' runë' Dios ca rnnágaca yúgu'të didza' ru'ë,
en lu yöl-la' dxi'i ladxi' queë' runë' yúgu'të le runë'!

14 ¡Rôjzönë' Xanru' yúgu'të nupa rôjtsö'ögaca,
en ruchisë' yúgu'të nupa ndínnegaca!

15 ¡Yúgu'të bönachi tu'yú Li', Xan,

ate' runödzu' le ilágugaca cate' ridxín dza que!

16 ¡Rusalajcazu' no'o

en rugagu' yúgu'të le nacua' nabángaca!

17 Náquië' tsahui' Xanru' Dios ca naca yúgu'të le runë'
en náquië' ca' dxi'i ladxi'.

18 Zoë' Xanru' gala' ga nacua' yúgu'të nupa tu'lidza Lë',
nupa na' tu'lidza Lë' idú ládxi'guequi.

19 Gunnë' le ta'zë ládxi'gaca quégaca nupa tadxi Lë'.

Riyönnë' cate' tu'lidza Lë', en rusölë' léguequi.

20 Run chi'i cazë' Xanru' yúgu'të nupa nadxi'igaca Lë',
pero usunitië' nupa tuá' dö'.

21 Len ru'a cuina' cu'a-në' Xanru' yöl-la' ba,
ate' yúgu'të bönachi ilúntica'sö Lë' zxön.

146

1 ¡Guli'cu'ë yöl-la' ba Xanru'!

¡Li', bö' naca caza', gulu'ë yöl-la' ba Xanru'!

2 ¡Cu'a-në' Xana' yöl-la' ba tsanni ni zoa' nabana'!

¡Gul-la' yöl-la' ba queë' Dios quia' tsanni ni zoa bö' naca caza'!

3 Biti' uzxöni ládxi'li' bönni' ta'nná bë'ë,

en calëga bönni' tati cazë', bönni' biti' ca' gaca ulu'sölë' rë'u.

4 Rurúaj bö' yu'ë nu bönni', ate' ruhuóáquië' yu.

La' dza ná'asö riniti le rizá' ládxe'ë gunë'.

5 Bica' ba bönni' rácalenë' Dios queë' Jacob lë',
bönni' na' runë' löza Xanru' Dios.

6 Nunë' Xanru' Dios lúzxiba, en luyú ni,

enca' nísado', en yúgu'të le nacua' yugu' lataj na'.

Rúntica'së' Lë' ca rnna didza' bë'ë,

7 en ruchi'a rusöröë' nupa zoa nu rusaca' zi' léguequi.
 Rugagu cazë' nupa ta'dún.
 Rusanë' Xanru' Dios nupa nadzúngaca.
 8 Rusaljë' Xanru' Dios guiój lógaca nupa nácacaca lo chul-la.
 Ruchisë' Xanru' Dios nupa nadzö'ögaca.
 Nadxí'inë' Xanru' Dios nupa nácacaca tsahui'.
 9 Rapa chí'ë Xanru' Dios yugu' bönni' zi'tu'.
 Rácalenë'-bi' yugu' bi'i uzëbi, enca' yugu' nigula uzëbi,
 pero ruzaguë' xinözguequi nupa tuá' dö'.
 10 Inná bë'tica'së' Xanru' Dios.

Náquië' Dios queëli', bönachi Sión.
 ¡Guli'cu'ë yöl-la' ba Xanru'!

147

1 ¡Guli'cu'ë yöl-la' ba Xanru'!
 ¡Tsahui' naca gúl-laru' yöl-la' ba queë' Dios queëru'!
 ¡Naca lachi, en le ral-la' gunru', cú'uru'-në' yöl-la' ba!

2 Runë' Xanru' Dios ga rixxón yödzö Jerusalén.
 Rutubë' bönni' Israel násilasigaquië'.
 3 Ruúnë' bönni' nácacagaquië' yechi' ladxi',
 en rudë'ë lari' ga dxíagaquië' huë'.
 4 Rulabë' tsca nacua' böljaj lúxiba.
 Nucu'ë lágacaba' tu tuba' yúgu'të böljaj na'.
 5 Nayëpisëtërë' Xanru' Dios, en nál-latërë'.
 Ga rë'ë dzu réajni'inë' yúgu'të.
 6 Xanru' Dios rácalenë' nupa ta'guí'i ta'zaca'.
 Ruzötjë' nupa tuá' dö' lu yu.

7 ¡Guli'gul-la queë' Xanru' Dios, guiëli'-në': "Xclenu"!
 ¡Guli'gul-la yöl-la' ba queë' Xanru', quínnili' lë'egaca bihuël-lado'!

8 Riguísië' yugu' böaj lúxiba,
 en risöl-lë'ë nisa guiój luyú.
 Runë' ga rilén yö yugu' lu guí'ado'.
 9 Rugahuë' yugu' böa' guíxi'do',
 enca' bóiquiajdo' ta'bödxi'aba'.
 10 Biti' raza ládxe'ë yöl-la' nál-la queëba' böa',
 en biti' ruzi'ë xibé yöl-la' nál-la queë' bönni'.
 11 Raza ládxe'ë Xanru' Dios nupa tadxi Lë',
 nupa na' tun löza yöl-la' dxi'i ladxi' queë'.

12 ¡Guli'cu'ë yöl-la' ba Xanru', libí'ili' zóali' Jerusalén!
 ¡Guli'cu'ë yöl-la' ba Dios queëli', libí'ili' zóali' Sión!

13 Bucu'ë tsutsu le tu'baga' gapa nu riyaza yödzö queëli',
 en runë' ga raca dxi'a quegaca xzí'inili' ga na' zóali'.
 14 Runë' ga ribözali' dxi'a tsáhui'do',
 en runë' ga ruhuölaj ridzé'eli' xzoa' xtila dxí'atërö.

15 Rinná bé'enè' yödzülió ni,
ate' xtídzè'è ridödité gátitès.

16 Risól-lè'è guiöj bögui' ca zxila',
en riguísiè' buzén ca dö.

17 Riguísiè' bögui' ca yugu' guiöj ruaj.
¿Nuzxi caz gaca guá' ilén le naca ziaga queè'?

18 Risól-lè'è xtídzè'è, ate' ruúna' bögui' na'.
Runè' ga recja bö', ate' ruhuóáca nisa.

19 Ruí'ilenè' xzí'ini xi'sóè' Jacob didza',
en riguixjè' xibá queè' para ilún bönachi Israel ca rna.

20 Biti' benè' caní ni'a quégaca bönachi ia'tú yödzo izá'a,
ate' bití' nözigaca ca nácagaca le gunná bè'è.

¡Guli'cu'è yöl-la' ba Xanru'!

148

1 ¡Guli'cu'è yöl-la' ba Xanru'!

¡Guli'cu'è yöl-la' ba, libí'ili' zóali' yehua' yubá!

¡Guli'cu'è yöl-la' ba, libí'ili' zóali' xitsá'aló!

2 ¡Guli'cu'è yöl-la' ba, libí'ili' gubáz lá'ayi queè'!

¡Guli'cu'è yöl-la' ba, libí'ili' tscali' dá'alí' Lè'!

3 ¡Guli'cu'è yöl-la' ba, libí'ili' gubidza, en beo'!

¡Guli'cu'è yöl-la' ba, libí'ili' bölj bení'!

4 ¡Guli'cu'è yöl-la' ba, libí'ili' zóali' znan lúxiba!

¡Guli'cu'è yöl-la' ba, libí'ili' nisa, zxóali' láhuilö lúxiba!

5 ¡Guli'cu'è yöl-la' ba La la'ayi queè' Xanru', yúgu'tèli',
tu' bè'èsè' didza', en canísö benè' libí'ili'!

6 Naguixjè' tsaz libí'ili'.

Naguixjè' xtídzè'è le catu caz tódi que.

7 ¡Guli'cu'è yöl-la' ba Xanru' iduté yödzülió,

en libí'ili' böa' ridali' lu nísado', en nísado' caz,

8 en libí'ili' guí', en guiöj bögui' yöla sunna, bögui', en böaj,

enca' lí', bö' budunu', runu' ca rna xtídzè'è,

9 en libí'ili' yugu' guí'a, en yúgu'tè guí'ado',

en libí'ili' yaga dxíagaca le ta'bía, en yugu' yaga dxi'a,

10 en libí'ili' böa' guixi', en böa' bédxi,

böa' tá'ayöj lé'eba' lu yu, en böa' zoa xíligacaba',

11 enca' libí'ili' rinná bè'èli' yödzülió, en bönachi yugu' yödzo izá'a,

yugu' xzí'inigaquiè' bönni' ta'nná bè'è, en bönni' ruchi'a rusöröli' yödzülió,

12 enca' libí'ili' bí'i bönni', en bí'i nigúlado',

yugu' bönni' zxön, en yugu' bí'ido'!

13 ¡Guli'cu'è yöl-la' ba La la'ayi queè' Xanru'

tu' nayépisètèrö tuzè' Lè'!

¡Nayépisètèrö yöl-la' ba queè' ca luyú ni, en ca lúxiba xitsá'!

14 Nuchisè' tu le nuzóa tsutsu bönachi queè',

le naca yöl-la' ba ta'gú'u Lè' nupa néquiquequi queè',

yugu' xzí'ini xi'sóè' Israel, nupa na' nadxí'inè'.

¡Guli'cu'ë yöl-la' ba Xanru'!

149

¹ ¡Guli'cu'ë yöl-la' ba Xanru'!

¡Guli'gul-la queë' Xanru' Dios tu le cubi,
en guli'gul-la yöl-la' ba queë' ga nudúbigaca nupa néquiguequi quez queë'!

² Ral-la' ulu'zì' xibë' Xanru' Dios bönachi Israel,
tu' náquië' Nu ben léguequi.

Ral-la' ulu'dzéjalen Dios nupa nacua' Sión,
tu' náquië' Nu rinná be'e léguequi.

³ Ral-la' ila'gú'u yöl-la' ba La la'ayi queë',
en lu yöl-la' rudzeja ulu'yá'a lahuë'.

Ral-la' ilúl-la yöl-la' ba queë', ila'capa' lë'e guídi,
en ila'quínni lë'egaca bihuël-lado',

⁴ tu' raza ládxe'ë Xanru' Dios bönachi queë'.

Uchisë' nupa ta'guí'i ta'zaca', en usölë' léguequi.

⁵ Nupa néquiguequi quez queë' ral-la' ulu'dzeja ládxi'gaca lu bení' queë'.

Lu yöl-la' rudzeja quéguequi ral-la' ilúl-la queë' cate' ni' dëgaca lu le ráti'gaca.

⁶ Yöl-la' ba queë' Xanru' Dios ral-la' sóatica'sö ruí'iguequi,

en tu guíë tuchi' natuchi' iropa la'a lu ná'agaca,

⁷ para ulu'zì' lëbi bönachi yugu' yödzo izá'a,

en ilún xigua' bönachi izá'a na',

⁸ para ilúguë'ë bregui' guíë ná'agaquië' bönmi' ta'ná bé'enë' bönachi yödzo izá'a
na',

en ulu'cu'ë bregui' guíë yen ná'agaquië' bönmi' lo quégaquië',

⁹ para ilunë' quéguequi ca nachuguë' Dios gaca quéguequi.

Naca lë ni le run bal nupa néquiguequi quez queë' Dios.

¡Guli'cu'ë yöl-la' ba Xanru'!

150

¹ ¡Guli'cu'ë yöl-la' ba Xanru'!

¡Guli'cu'ë yöl-la' ba Dios lu lataj lá'ayi queë'!

¡Guli'cu'ë yöl-la' ba ga dëda' lataj queë'!

² ¡Guli'cu'ë yöl-la' ba ca nácgaca le zxön nunë'!

¡Guli'cu'ë yöl-la' ba ca naca yöl-la' zxön queë'!

³ ¡Guli'cu'ë yöl-la' ba, ucödxi'li' lúzugacaba' chivo!

¡Guli'cu'ë yöl-la' ba, quínnili' lë'egaca bihuël-la ca'!

⁴ ¡Guli'cu'ë yöl-la' ba, cápa'li' lë'e guídi, en uya'ali'!

¡Guli'cu'ë yöl-la' ba, quínnili' lë'egaca bihuël-la, en ucödxi'li' gui!

⁵ ¡Guli'cu'ë yöl-la' ba, utíl-lali' guíë lë'e luzë'e!

¡Guli'cu'ë yöl-la' ba, utíl-lali' guíë zxön lë'e luzë'e!

⁶ ¡Guli'cu'ë yöl-la' ba Xanru', tscali' rizí'ili' bö'!

¡Guli'cu'ë yöl-la' ba Xanru'!

DIDZA' DXI'A BUZÚAJË' MATEO

Yugu' xuz xinë'e gudödi queë' Jesús

(Lc. 3:23-38)

¹ Ni ruzúaja' lágaquië' xuz xinë'e gudödi queë' Jesucristo. Nabábagaquië' David, enca' Abraham xuz gudödi queë'.

² Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' böchë'ë.

³ Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

⁴ Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

⁵ Salmón gúquië' xuzë' Booz, ate' Rahab gúcanu xinë'ë.

Booz gúquië' xuzë' Obed, ate' Rut gúcanu xinë'ë.

Obed gúquië' xuzë' Isaí.

⁶ Isaí gúquië' xuzë' David.

David na' gunná bé'enë' bönnachi Israel, ate' butsaga ná'alënë'-nu nigula na' gúcanu zí'aló nigula queë' Uriás, ate' David, en nigula ni guláquië' xuz xinë'ë Salomón.

⁷ Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

⁸ Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

⁹ Uzías gúquië' xuzë' Jotam.

Jotam gúquië' xuzë' Acaz.

Acaz gúquië' xuzë' Ezequías.

¹⁰ Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

¹¹ Josías gúquië' xúzgaquië' Jeconías, en yugu' bönni' böchë'ë.

Yugu' bönni' ni gula'cu'ë dza ni' cate' yugu' bönni' Babilonia gula'chë'ë bönnachi Israel nadzúngaca lu xiyúgaquië'.

¹² Jeconías gúquië' xuzë' Salatiel.

Salatiel gúquië' xuzë' Zorobabel.

¹³ Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

¹⁴ Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

¹⁵ Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

¹⁶ Jacob gúquië' xuzë' José.

José ni gúquië' bönni' queënu María, ate' María ni gúcanu xinë'ë Jesús, lë' ca' Cristo, Bönni' na' tun löza bönachi judío guídë' idinná bé'enë' légaquië'.

¹⁷ Caní naca, gulaca chidá' cö' di'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' di'a dza ga gusí lo zoë' David ga bidxintë dza yugu' bönni' Babilonia gula'chë'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'chë'ë léguequi ga bidxintë dza guljë' Cristo.

*Yugu' le guca cate' guljë' Jesucristo
(Lc. 2:1-7)*

¹⁸ Caní guca cate' guljë' Jesucristo. Cate' ni' chinazí' lu ná'abi' María, xinë'ë Jesucristo utsaga ná'aleni' José, en zí'atëlö cate' si' utsaga ná'aleni'-bi', en cabi ne sóaleni'-bi', guyú'ubi' tubi' bí'ido' lë'ëbi' María na'. Guca caní ni'a que yöl-la' huáca queë' Dios Bö' Lá'ayi.

¹⁹ Náquië' José na', bönni' queëbi' María, bönni' tsahui', pero biti' gú'unnë' uzéguie'-bi' didza' lógaca bönachi. Gú'unnë' ulá'aleni'-bi' bagáchi'sö.

²⁰ Tsanni ni' rizá' ládxi'ë José ca na' gunë', buluf'i lahuë' gubáz lá'ayi queë' Xanru' lahuë' José lu yëla béchigal, en gudxë' lë':

—José, xzí'ini xzi'sóë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bö' Lá'ayi.

²¹ Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

²² Caní guca yúgu'të lë ni para gaca lë na' gunnë' Xanru' lu ru'ë bönni' bë'ë didza' uláz queë' Dios, gunnë':

²³ Buli'yútsöca', tu nigula ra'bando',
tsú'ubi' bí'ido' lë'ëbi',
ate' gáljabi' tubi' bi'i bönni'do',
ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

²⁴ Cate' bubané' José lu yëla béchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'.

²⁵ Biti' guzóaleni'-bi' cate' bidxinrö dza chigúlajbi' bi'i bönni'do' queëbi', bi' zí'aló queëbi', ate' gulu'ë labi' Jesús.

2

Bönni' ta'yéajni'inë' ridiyúgaquië' bí'ido' Jesús

¹ Cate' gúljabi' Jesús lu yödzo Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzo dë saca' ga rilén gubidza.

² Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabi'? Cate' ni' zóatu' ga rilén gubidza bilé'etu'-ba' böljaj beni' naca bë' chigúlajbi', ate' za'tu' ni para tseaj ládxi'tu'-bi'.

³ Cate' gúquibe'enë' Herodes, bönni' rinná bë'ë, lë ni, gurö'ödë' böniga, en lësca' caní gula'bö' böniga yúgu'të bönachi nacua' Jerusalén.

4 Ní'irö Herodes na' bulidzë' yúgu'të bixúz unná bë', len bönni' yudo' tu'sédinë', ate' gunábinë' légaquië' gazxi ral-la' galjé' Cristo, bönni' na' tunë' löza bönni' judío ilá' lahuë' para inná bé'enë' légaquië'.

5 Të' lë':

—Lu yödzö Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

6 Biti' nácarö cá'asö yödzö Belén luyú Judá lahuë' Dios ca náca gaca yödzö gapa nacua' nupa ta'nná bë' luyú ni, tu' irúajë' tu bönni' yödzö Belén, en gáquië' lo, bönni' na' gun chí'ë bönachi Israel quia'.

7 Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inözinë' dxi'a gáca xte chiguca buluf'i lahui bölaj na' bila'lé'enë'.

8 Ní'irö gusöl-lë'ë légaquië' tsójáquië' Belén. Rë' légaquië':

—Guli'tséaj ni', en guli'tsöjnaba dxi'a nacxi naca queëbi' bí'ido' na'. Cate' chibidzölili'-bi', ididixjoi'ili' neda', para tseja' ca' neda', tseaj ládxa'a-bi'.

9 Gudödi bila'yönnë' didza' bë'ë Herodes na', söjáquië' bönni' ta'yéajni'inë' na', ate' bölaj na' bila'lé'enë' cate' ni' nacu'ë ládzagaquië' söjnruba' lógaquië' ga bidxintë yöjsóa ga na' dëbi' bí'ido' na'.

10 Cate' bila'lé'enë' bölaj na', bulu'dzéjade'enë'.

11 Cate' gula'yázië' yu'u, bila'lé'enë'-bi' bi'i bönni'do' na', zóalenbi'-nu María, xiná'abi'. Bulu'zóa zxi'bagaquië' lobi', en gula'yéaj ládxi'gaquië'-bi'. Gudödi na' gula'saljé' yugu' yöxaj quégaquië', ate' bulu'nödzjé' queëbi' oro, en yalaj, en nörido' rilá' zxi'xi que yaga mirra.

12 Tu' chibuzéajni'inë' Dios légaquië' lu yëla béchigal para cabí tsöjhuöjquië' ga zoë' Herodes na', que lë ni na' yöjhuöjquië' ládzagaquië' nöza yúbölö.

José, en María, ta'chë'ë-bi' Jesús luyú Egipto

13 Gudödi bulu'zë'ë yugu' bönni' ta'yéajni'inë' ni', buluf'i lahuë' tuë' gubáz lá'ayi queë' Xanru' lu yëla béchigal, ga na' dë' José, en rë' lë':

—Guyaschi. Guchë'-bi' bí'ido' ni, enca' xiná'abi', ate' buzzunnaj ni. Guyéaj luyú Egipto, ate' uga'anu' ni cate' guiëra' li' ia'tú. Caní gunu' tu' uguiljé' Herodes bí'ido' ni para gútië'-bi'.

14 Ní'irö guyasë' José, en ni' naca chí'i dzö'ölö, guchë'-bi' bí'ido' na', enca' xiná'abi', ate' yöjáquië' luyú Egipto.

15 Bulu'gá'anë' ni' cate' gútirë' Herodes. Caní guca para gaca lë na' gunnë' Xanru' Dios lu ru'ë tu bönni' bë'ë didza' uláz queë', gunnë': "Ga naca luyú Egipto bulidza' Zxf'ina'."

Risöl-lë'ë Herodes bönni' ilútië'-bi' bi'i huë'ënido' nacua'abi' yödzö Belén

16 Cate' gúquië'enë' Herodes biti' gulunë' bönni' ta'yéajni'inë' ca rnnë', gulënë', ate' gunná bé'enë' bönni' tsójáquië' ni' para ilútië'-bi' yúgu'tëbi' bi'i bönni'do' nacua'abi' yödzö Belén, en idú gásibi'ilö ga dë Belén na', yugu' bí'ido' chiyú'ugacabi' chopa iz, en bí'ido' nahuë'ënicaröbi'. Caní benë' ca busáquië' queë' Herodes na', tsca chiguca dza buluf'i lahui bölaj na', dza na' bulu'zéajni'inë' bönni' ta'yéajni'inë' na' lë'.

17 Caní guca, bidxín lë na' gunnë' Jeremías, bönni' bë'ë didza' uláz queë' Dios, gunnë':

18 Lu yödzö Ramá riyön chí'igaca nupa ta'bödxi, en nupa ta'bödxi yechi'.

Raquel ribödxinu ni'a quégacabi' zxf'ininu.

Biti' gaca nu hué tsahui' lënu, tu' chinátigacabi'.

¹⁹ Gudödi gútië' Herodes na', ní'irö buluf'i lahuë' gubáz lá'ayi na' queë' Xanru' lu yëla bëchigal lahuë' José ga ni' zoë' luyú Egipto, ate' rë' lë':

²⁰—Guyasa. Guchë'-bi' bi'i bönni'do' ni, enca' xiná'abi', ate' bôaj luyú Israel, tu' chigulátië' bönni' ni' gulë'ënnë' ilútië'-bi' bi'i bönni'do' ni.

²¹Ní'irö guyasë' José, ate' guchë'-bi' bi'i bönni'do' na', enca' xiná'abi', ate' yöhuójqüië' luyú Israel.

²²Cate' gúquibe'enë' José rinná bë'ë Arquelao luyú Judea tu' chigútië' Herodes, xuzë' Arquelao na', que lë ni na' gúdxinë' José huóje' ni'. Cate' buzéajni'inë' Dios lë' lu yëla bëchigal, guyijë' luyú Galilea.

²³Cate' bidxinë' ni', yöjsóë' lu yödzö Nazaret. Caní guca para gaca lë na' gula'nne' yugu' bönni' gulu'ë didza' uláz queë' Dios ca ral-la' gaca queë' Jesús, si' Lë', Bönni' Nazaret.

3

Juan, bönni' ruquilë' bönachi nisa runë' libán lu lataj cá'asö

(Mr. 1:1-8; Lc. 3:1-9, 15-17; Jn. 1:19-28)

¹Yugu' lu dza ni' buluf'i lahuë' Juan, bönni' na' buquilë' bönachi nisa, en runë' libán lu lataj cá'asö luyú Judea.

²Juan na' rnnë':

—Buli'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.

³Ca naca queë' Juan na', buzúajë' Isaías, bönni' bë'ë didza' uláz queë' Dios dza ni'të, le rnna caní:

Riyón chi'ë bönni' rulidzë' lu lataj cá'asö, rnnë':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödë' lu icja ládxi'do'oli'.”

⁴Nácuë' zxë' Juan lari' néquini lítsa'ba' bôa', ate' núguë'ë lë'ë le néquini guídi. Rahuë'-ba' böchi'zu, en re'jë' bidxindo' que buzdo'.

⁵Yugu' bönni' yödz Jerusalem len bönachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'.

⁶Cate' gula'xóalëpë' dul-la' nabága'gaquië', Juan na' buquilë' légaquië' nisa lu yegu Jordán na'.

⁷Cate' bilé'enë' Juan ta'dxinë' zían bönni' yudo' fariseo len yugu' bönni' yudo' saduceo ga zoë' para ila'dilë' nisa, gudxë' légaquië':

—Libi'ili', di'a dza quégacaba' bëla sínia'. ¿Zoa nu buzéajni'i libi'ili' para izxúnnajli' yöl-la' rusiúdxí na' si' gaca quégaca bönachi?

⁸Guli'gún le gaca bë' chibubí'i ládxi'li'.

⁹Biti' cuéqui ícjali', biti' innali' nácali' tsahui' tu' naca Abraham xuz gudödi queëli'. Rea' libi'ili', huáca gunë' Dios ga ulu'huóaca yugu' guiójqüië' ni di'a dza queë' Abraham.

¹⁰Chizóa riböza guíë huága para ichugu yugu' yaga le rulu'í ca gaca queëli'. Yúgu'të yaga biti' ta'bia le naca dxi'a, irúgugaca, ate' ila'gu'ë léguequi lu guí'.

¹¹Le nácatë neda' ruquila' libi'ili' nisa lu nisa, núlóli' chibubí'i ládxi'li', pero Bönni' na' ral-la' guidé' cate' tödi quia' neda', Lë' gunë' le rulu'ísö yöl-la' ridila nisa ni, uchízië' libi'ili' Dios Bô' Lá'ayi len guí' queë'. Bönni' ni nácatë'rë' lo ca neda', ate' neda' biti' naca' lesaca' ilecja' xiráchuë' nudë'ë.

¹² Zönë' lu në'ë böcö' queë', le ulúbinë' ga ridxi'a xzoa' xtila queë'. Cu'ë xzoa' xtila queë' lu yu'u ga ni' gun chi'ë le, pero uzégui'ë bëbu que lu guí', ate' guí' na' bití' ca' ulu.

Ridile' nisa Jesús

(Mr. 1:9-11; Lc. 3:21-22)

¹³ Ní'irö buzé'ë Jesús luyú Galilea, ate' bidxinë' ra' yegu Jordán ga na' zoë' Juan, para idilë' nisa lu në'ë Juan na'.

¹⁴ Juan buzágue'ë xinözë', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

¹⁵ Bubi'ë didza' Jesús, rë' lë':

—Benna lataj na'a, tu' caní ral-la' gunru' idútë le naca tsahui'.

Ní'irö Juan bë'ë Lë' lataj.

¹⁶ Cate' chinadilë' Jesús nisa, la' burúajtë' lu nisa. Ní'irö gyalaj lúzhiba lahuë' Jesús, ate' bilé'enë' ruhuötjë' Dios Bö' Lá'ayi, en bidxinë' ga na' zoë', rinë'ë ca riná'aba' gu'dódo'.

¹⁷ Ní'irö biyön chi'i nu ruf'i didza' yehua' yubá, rnna:

—Bönni' ni náquië' Xzí'ina'. Nadxí'ida' Lë', en raza ládxa'a Lë'.

4

Rë'ëni Satanás tu' xihui' ibaga' Jesús dul-la'

(Mr. 1:12-13; Lc. 4:1-13)

¹ Ní'irö la' guchë'të' Dios Bö' Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

² Idú choá' dza choá' yëla bití' bi gudahuë' Jesús, ate' gudödi ni' ridunë'.

³ Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë' Lë':

—Channö nacu' idú Xzí'inë' Dios, gunná na'a ulu'huóaca guiöj nacua' ni yöta xtila.

⁴ Bubi'ë didza' Jesús, rë' le:

—Nazúaj lu guichi lá'ayi le rnna: “Calégasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

⁵ Ní'irö tu' xihui' guchë' Jesús lu yödzö lá'ayi Jerusalén, ate' budxía Lë' ga naca xitsá' ícjo'olö yudo'.

⁶ Ní'irö tu' xihui' rë' Lë', rnna:

—Channö nacu' Li' idú Xzí'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isöl-lë'ë gubáz lá'ayi queë' para ilún chi'ë Li',

ate' ulu'chisë' Li' lu ná'agaquië',

para cabí tsöjchégu'u guiöj, en cabí gunu' zi' ni'u.

⁷ Bubi'ë didza' Jesús, rë' le:

—Ia'stú nazúaj lu guichi lá'ayi, le rë' bönachi, rnna: “Bití' ugunu' dxin Xanu' Dios.”

⁸ Ní'irö tu' xihui' guchë' Jesús ga naca tu lu guí'a sibi, ate' ni' bulufi Lë' yúgu'të yödzö nacua' yödzólió ni, en yúgu'të yöl-la' tsahui' quéguequi.

⁹ Ní'irö rë' Lë':

—Yúgu'të lë' ni udóda' lu no'o channö uzóa zxibu' lahua', en gunu' neda' zxön.

¹⁰ Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë' netu', rnna: “Xanu' Dios tseaj ládXu'u, en udódi cuinu' lu na' tuzë' Lë'.”

¹¹ Ní'irō buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

Risí lahuë' Jesús runë' libán luyú Galilea

(Mr. 1:14-15; Lc. 4:14-15)

¹² Cate' biyönnë' Jesús nadzunë' Juan lidxi gufië, guyijë' luyú Galilea.

¹³ Buzë'ë yödzö Nazaret, ate' yöjsóë' lu yödzö Capernaum ga naca ra' nísado', lu buzá' quégaca bönachi Zabolón, en bönachi Neftalí.

¹⁴ Caní guca, bidxín lë na' gunné' Isaías, bönni' bë'ë didza' uláz queë' Dios, gunné':

¹⁵ Luyú Zabolón, en luyú Neftalí,

la' nōza ra' nísado' ia'tsólá'a yegu Jordán saca' ga rilén gubidza.

Luyú Galilea, ga nacua' bönachi biti' nácaqaca judío.

¹⁶ Bönachi chul-la niti ni' bila'lé'e bení,

ate' bönni' ni' nácaqaquie' ca nupa chinátigaca, gulén quégaquie' bení.

¹⁷ Cate' ní'irō gusí lahuë' Jesús runë' libán, en rë' bönachi ni':

—Buli'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.

Jesús rulidzë' tapë' bönni' uzxön böla para tsöjtá'gaquie' Lë'

(Mr. 1:16-20; Lc. 5:1-11)

¹⁸ Cate' gudë' Jesús ra' nísado' que Galilea, bilé'enë' chopë' bönni'. Tuë' lë' Simón, en zoa ia'tú lë' Pedro, ate' dzáguie' Andrés, bönni' böchë'ë, lë'. Chopë' ni ta'chiljé' yöxaj böla quégaquie' lu nísado' na' tu' nácaqaquie' uzxön böla.

¹⁹ Jesús rë' légaquie':

—Guli'dutá' neda', ate' guna' ga ichë'ëli' bönachi quia', gunli' ca runli' rizönli'-ba' böla.

²⁰ Chopë' ni la' bulu'cá'anatë' yugu' yöxaj böla quégaquie', ate' sōjácalenë' Jesús.

²¹ Cate' gudödë' Jesús ia'lati' ní'ilö, bilé'enë' ia'chopë' bönni'. Tuë' lë' Jacobo, ate' dzáguie' Juan, bönni' böchë'ë lë'. Nácaqaquie' zxi'inë' Zebedeo. Nacu'ë lë'e bárcodo' dzágagaquie' Zebedeo, xúzgaquie', en tu'únë' yöxaj böla quégaquie'. Ní'irō Jesús bulidzë' chopë' ni para tsöjtá'gaquie' Lë'.

²² La' bulu'cá'anatë' bárcodo' na', enca' xúzgaquie', ate' sōjácalenë' Jesús.

Jesús rusédinë' bönachi zían

(Lc. 6:17-19)

²³ Gudë' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sédë' queë' Dios. Benë' libán ni' que didza' dxí'a ca si' idinná bë'ë Dios luyú ni', en bunë' yúgu'të nupa te'e tsca naca yödzöhuë' t'éguequi.

²⁴ Guzë didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquie' yúgu'të bönni' té'enë' zían yödzöhuë' que quégaquie', en ta'guí'i ta'zaquie', ga zoë' Jesús. Dujuá'gaquie' ca' yugu' bönni' yú'ugaquie' bö' xihui', en yugu' bönni' té'enë' huë' xjote', en yugu' bönni' nacú'unigaquie' bin ni'a ná'agaquie', ate' Jesús bunë' yúgu'të bönni' na'.

²⁵ Bönachi zían bila'rúajgaca luyú Galilea, en yugu' yödzö Decápolis, en yödzö Jerusalén, enca' luyú Judea, en yugu' yödzö nacua' ia'tsólá'aló yegu Jordán saca' ga rilén gubidza, ate' rōjácalen Jesús.

5

Libán benë Jesús ga naca lu gu'ado'
(Lc. 6:20-23)

1 Cate' bilé'enë Jesús bönachi zían sōjácalen Lë, ní'irō gurenë' tu lu gu'ado' ga naca xitsá'alō, ate' gurō'ë lu gu'a ní'. Ní'irō bulu'dubë' bönni' usëda queë' ga zoë'.

2 Gusí lahuë' rusédinë' légaquië', rnnë':

3 —Bica' ba yugu' bönni' téquibe'enë' ta'yádzjanë' le naca queë' Dios, tu nadéli'gaquië' lataj ga rinná bë'ë Bönni' na' zoë' yehua' yubá.

4 'Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu huë tsahuë'ë Dios caz légaquië'.

5 'Bica' ba yugu' bönni' nácagaquië' nōxaj ladxi' lahuë' Dios, tu' gata' quégaquië' luyú ni.

6 'Bica' ba yugu' bönni' ta'zë ládxi'gaquië' le naca tsahui' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lë na' ta'zë ládxi'gaquië'.

7 'Bica' ba yugu' bönni' tu'huechi' ládxi'gaquië' luzá'agaquië', tu' huechi' ládxi'ë Dios légaquië'.

8 'Bica' ba yugu' bönni' naca tsahui' icja ládxi'do'gaquië', en bití' bi dul-la' nabága'gaquië', tu' ila'lé'enë' Dios.

9 'Bica' ba yugu' bönni' ta'bequi dxíë' didza' bizxaj, tu' ila'zí' lágaquië' xzí'ini cazë' Dios.

10 'Bica' ba yugu' bönni' ta'zaca' ta'gui'ë lu le ta'bía ládxi'gaca bönachi légaquië' cate' tunë' le naca tsahui', tu' dë lataj quégaquië' ga rinná bë'ë Bönni' na' zoë' yehua' yubá.

11 'Bica' ba libí'ili' cate' tu'lidza bönachi libí'ili' zi', en ta'bía ládxi'gaquië' libí'ili', ate' lu yöl-la' rizí' yë' ta'nnë' queéli' le xihui' tu' dá'ali' neda'.

12 Bulí'dzeja, en guli'chaza ládxi'li', tu' uzí'da'ali' xibé yehua' yubá. Ca raca queéli', guca quégaquië' bönni' gulu'ë didza' uláz queë' Dios, en gula'cu'ë zí'atëlō ca libí'ili', tu' gula'bía ládxi'gaca ca' bönachi légaquië'.

Bönachi dá'gaca Cristo ilaca ca zōdi', en ca bení'
(Mr. 9:50; Lc. 14:34-35)

13 Gunnë' ca' Jesús:

—Libí'ili' nácali' ca zōdi' luyú ni, pero channō initi zōdi' na' yöl-la' siná'a que, bití' gaca gunru' ga huóáca siná'a. Bití'rō naca lesaca', pero chinaca tu le chú'unaru', ate' ulu'libi bönachi le.

14 'Libí'ili' nácali' ca bení' yōdzöliō ni para ulu'ili' lahui le naca queë' Dios. Ral-la' gácali' ca tu yōdzō rō'ō tu lu gu'a, tu' cabí gaca igachi' yōdzō na'.

15 Cate' ruquéla'ru' guí', bití' rigú'uru' le tu zzan guí'ina, pero ruzóaru' le ga liná' para uzení' yúgu'të nupa nacuá' lu yu'u.

16 Ca na' run bení', ral-la' gunli' ca' libí'ili', güí'ili' lataj gaca bë' le nácali' lógaca yúgu'të bönachi, para cate' ila'lé'e le naca tsahui' runli', ila'gú'u-në' Xúzili' Dios zoë' yehua' yubá yöl-la' ba.

Rusédinë' Jesús que le gunná bë'ë Dios lu në'ë Moisés

17 Gunnë' ca' Jesús:

—Bití' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', calëga para usunítia' yugu' lë na', pero para ulu'a lahui iduté le tu'sedi lë na'.

¹⁸ Le nácatē rea' libí'ili'. Tsanni nacuá' lúzxiiba, en yödžölió ni, bití' tódi cá' asó nitú dídzá'do', en nitú le rinná bē' xibá na', cate' gácaró yúgu'tē le ral-la' gaca.

¹⁹ Que lē ni na', núti'tēs bōnni' quítsjē' tu xibá cuídí'do'os le zoa lu xibá na', en usédinē' bōnachi para ilún caní, bōnni' ni gácatērē' cuídí'do'os ca yúgu'tē nupa ila'cuá' ga rinná bē' Bōnni' na' zoē' yehua' yubá, pero núti'tēs bōnni' gunē' ca rinná bē' xibá na', en usédinē' bōnachi para ilún ca' caní, bōnni' ni tsēpisētērē' ga rinná bē' Nu na' zoa yehua' yubá.

²⁰ Rea' ca' libí'ili': Channō cabí gunli' le nácatērō tsahui' ca le tunē' bōnni' yudo' usedi, enca' ca tunē' bōnni' yudo' fariseo, bití' ca' tsú'ulli' ga rinná bē'ē Dios yehua' yubá.

Rusédinē' Jesús ca naca que nu rilé luzē'e
(Lc. 12:57-59)

²¹ Gunnē' ca' Jesús:

—Chibiyónili' ca gula'nnē' bōnni' guta' lu ná'agaquiē' le gulē' xuz xtó'oli': "Bití' gútili' bōnachi. Nu bōnni' gútiē' bōnachi, nabáguē'ē xíguia', ate' huadxinē' ga uchi'a usöröē' Dios lē'."

²² Na'a, neda' rea' libí'ili': Nu bōnni' rilenē' bōchi' luzē'ē, nabáguē'ē xíguia' huadxinē' ga uchi'a usöröē' Dios lē'. Lēasca' caní, nu bōnni' innē' zī'ē queē' bōchi' luzē'ē nabáguē'ē xíguia' ulu'chi'a ulu'söröē' bōnni' lo tu'chi'a tu'söröē' lē', ate' nu bōnni' guiē' luzē'ē: "¡Bōa' canóz!" nabáguē'ē xíguia' tsójsu'ē lu guí' gabila.

²³ Caní naca, channō chizóa cu'u tu le unödžju' lu bucugu lá'ayi, ate' tsójnenu' ni' zoa bizx que rilenē' bōchi' luzó' o li',

²⁴ bucá'ana lē na' unödžju' lu bucugu ni', en bōaj lidxu'. Zí'aló yōjca'ana tsahui' le benu' queē' bōchi' luzó'o, ate' ní'irō gudá unödžju' lē na' nu'u.

²⁵ 'Channō zoa nu bōnni' rinábinē' li' bi ubi'u queē', en ichē'ē li' ga uchi'a usöröē' tu bōnni' li', budžáгатē tsahui' bōnni' na' tsanni ni' yú'ulenu' lē' nōza, para cabí udödē' li' lahuē' bōnni' ruchi'a rusöröē', ate' bōnni' ni udödē' li' lu nē'ē bōnni' rusayjē' lidxi guiē', ate' lē' cu'ē li' lidxi guiē' na'.

²⁶ Le nácatē rea' li', bití' ca' uruju' ni' cate' idxinrō dza quizzju' ga buitē le ral-lu'u.

Rusédinē' Jesús ca naca que nu riguitsaj xibá que yöl-la' nutsaga na'

²⁷ Gunnē' ca' Jesús:

—Chibiyónili' ca na' gula'nnē': "Bití' gunu' dul-la' le riguitsaj xibá que yöl-la' nutsaga na'."

²⁸ Na'a, neda' rea' libí'ili': Núti'tēs bōnni' ruyúē' tu nigula len yöl-la' rizē ladxí' le ruá' dö', chibenē' dul-la' len lēnu lu icja ládxi'da'ahuē'.

²⁹ 'Que lē ni na', channō guiój lo' ibēla gun ga gunu' dul-la', guléaj le, en gurú'una le. Gácarō dxi'a quiu' unítíu' tu guiój lo', en calēga idúteo' tsójsú'u lu guí' gabila.

³⁰ Channō no'o ibēla gun ga gunu' dul-la', guchugu le, en gurú'una le. Gácarō dxi'a quiu' unítíu' tu no'o, en calēga idúteo' tsójsú'u lu guí' gabila.

Rusédinē' Jesús ca naca que nu bōnni' rulá'alenē' nigula queē'
(Mt. 19:9; Mr. 10:11-12; Lc. 16:18)

³¹ Gunnē' ca' Jesús:

—Lēasca' gula'nnē': "Núti'tēs bōnni' rusanē'-nu nigula queē', ral-la' unödžjē' queēnu tu guichi le rnna rulá'alenē'-nu."

³² Na'a, neda' rea' libí'ili', channö zoë' nu bönni' rusanë'-nu nigula queë', en biti' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' si'ë-nu nigula na', lësca' gunë' dul-la' le riguitsaj xibá que yöl-la' nutsaga na'.

Rusédinë' Jesús ca naca que nu ruzötaj La la'ayi queë' Dios

³³ Gunnë' ca' Jesús:

—Lësca' biyönili' ca yugu' bönni' guta' lu ná'agaquië' gulë' xuz xtó'oli', gula'nnë': "Biti' si' yë'u cate' run tsutsu xtídz'u ni'a queë' Dios, en ral-la' gunu' lahuë' Xanru' Dios idútë lë na' run tsutsu xtídz'u ni'a queë' Lë'."

³⁴ Na'a, neda' rea' libí'ili', biti' ca' gun tsutsu xtídz'a'li'. Biti' gun tsutsu xtídz'a'li' ni'a que yehua' yubá, tu' naca ga rō'ë rinná bē'ë Dios.

³⁵ Biti' gun tsutsu xtídz'a'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayëpisëtërë' rinná bē'ë.

³⁶ Biti' gun tsutsu xtídz'u ni'a que icju', tu' cabí gaca gunu' ga huóaca chiguichi o gasaj nitú guitsa' icju'.

³⁷ Ral-la' innásili': "Ön", o innásili': "Biti'", tu' naca que tu' xihui' le nadödi bē' ca nácagaca didza' ni.

Rusédinë' Jesús ca naca que nu ruzí' lëbi luzë'e

(Lc. 6:29-30)

³⁸ Gunnë' ca' Jesús:

—Chibiyönili' ca naca le gunná bē'ë Moisés, gunnë': "Nu bi run que guiöj lahui luzë'e, ubí'i ca' que, enca' nu bi run que layi' luzë'e, ubí'i ca' que."

³⁹ Na'a, neda' rea' libí'ili': Biti' tá'baga'li' nu guá' dö' queë'li', ate' channö nu capa' xagu' ibëla, bē' lataj capa' ca' ia'tú xagu' yögöla.

⁴⁰ Channö zoa nu gun ga uchi'a usöröë' tu bönni' li', en cuë' zxo', bē' ca' queë' lari' rixóa cúdzu'u.

⁴¹ Channö zoa nu gun bayudxi gu'u yua' que tu chi'i, guyéajlen nu na' chopa chi'i.

⁴² Nu bi rinábini li', bunödzej que, en nu bi guë'ëni gunnu' que tu chi'i, biti' tá'bagu'u lë na' inabi li'.

Rusédinë' Jesús ca ral-la' idxí'iru' nupa biti' ta'lé'e rë'u dxi'a

(Lc. 6:27-28, 32-36)

⁴³ Gunnë' ca' Jesús:

—Lësca' caní biyönili' lë na' gula'nnë': "Ral-la' idxí'inu' nu nadxí'i li', en udí'inu' nu biti' rilé'e li' dxi'a."

⁴⁴ Na'a, neda' rea' libí'ili', guli'dxí'i nupa biti' ta'lé'e libí'ili' dxi'a. Guli'nábinë' Dios gácalenë' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzë' Dios inábili'-në' gunë' ga gaca dxi'a quégaca nupa ta'nnë' queë'li', en tuá' dö' queë'li'.

⁴⁵ Channö gunli' caní, gácali' xzí'ini cazë' Xúziru' Dios, zoë' yehua' yubá, tu' runë' Lë' ga ruzení' gubidza queë' ga nacué' bönachi tuá' dö', enca' ga nacué' bönachi tsahui'. Risöl-lë'ë tu nisa guiöj lu yu quégaca bönachi tsahui', enca' lu yu quégaca bönachi biti' nácagaca tsahui'.

⁴⁶ Channö nadxí'isili' bönni' nadxí'iguequinë' libí'ili', ¿nuzzi' caz cu'u libí'ili' yöl-la' ba? Lësca' caní tunë' bönni' biti' nácagaca tsahui' na', bönni' tu'quizxjé' uláz que yödzo zi'tu', nadxí'iguequinë' luzá'agaquië'.

⁴⁷ Channö rugápali' Dios tuzè' böchi' luzá'ali', ¿bizxi caz runli' le nácatèrö dxi'a? Lësca' caní tunè' bönni' biti' núnbè'gaquiè' Dios.

⁴⁸ Pero libí'ili', guli'gaca idú tsahui', ca na' náquiè' Xúziru' Dios, zoè' yehua' yubá, náquiè' idú tsahui'.

6

Rusédinë Jesús ca ral-la' gácalenru' bönachi

¹ Gunnë' ca' Jesús:

—Guli'güi' ládxi'li' gaca idú ca reaj ládxi'li'-në' Dios. Biti' gúnsili' lè ni lógaca bönachi para ila'lé'e ca na' runli'. Channö runli' caní, biti' bi gunnë' Xúziru' Dios zoè' yehua' yubá queëli'.

² Cate' bi unödzu' que nu bi riyadzaj, biti' gunu' ga ilá' lahui lè na' runu' ca tunè' bönni' tu'luf'isö tsahui' cuíngaquiè' ga naca lu yu'u ga tu'dubè' bönni' judío, en tu'sedè' queë' Dios, enca' ga naca lu yé'ëyi. Caní tunè' para ila'gú'u bönachi légaquiè' yöl-la' ba. Le nácatè rea' libí'ili', cá'asö naca yöl-la' ba gata' quégaquiè'.

³ Pero li', cate' bi unödzu' que nu bi riyadzaj, biti' ca' gu'u lataj nu inözi.

⁴ Na'a, lè na' unödzu', bagáchi'sö ral-la' unödzu', ate' Xúziru' Dios, Nu rilé'e ca na' runu' bagáchi'sö, Lè' ubi'è quiu'.

Rusédinë Jesús ca ral-la' ulídzaru'-në' Dios

(Lc. 11:2-4)

⁵ Gunnë' ca' Jesús:

—Cate' ulídzali'-në' Dios, biti' gunli' ca tunè' bönni' tu'luf'isö tsahui' cuíngaquiè', tu' ta'yaza ládxi'gaquiè' ta'zuinë' tu'lidzè' Dios gapa naca lu yu'u ga tu'dubè' tu'sedè' bönni' judío queë' Dios, en gapa naca lu yé'ëyi para ila'lé'e bönachi légaquiè'. Le nácatè rea' libí'ili', cá'asö naca yöl-la' ba gata' quégaquiè'.

⁶ Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lidzè' Dios inábili'-në' Xúziru' Dios, zóalenè' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lè' ubi'è queëli'.

⁷ Cate' ulídzali'-në' Dios biti' gunli' la' yé'ëyi la' lez ca na' tunè' bönni' biti' núnbè'gaquiè' Dios, tu' téquinè' huayönnè' Dios légaquiè' tu' tu'lidzè' la' yé'ëyi la' lez.

⁸ Biti' gunli' ca na' tunè' légaquiè'. Xúziru' Dios, zí'atèlò cate' si' inábali'-në', chinöz quézinè' le riyadzaj queëli'.

⁹ Que lè ni na', ral-la' ulídzali'-në' Dios innali' caní: Xuz netu', zu' yehua' yubá, gaca xön Lo'.

¹⁰ Gudá inná bè'u luyú ni.

Ben ga gaca luyú ni ca raza ládxi'u Li' ca na' raca yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li' ca runtu' netu', runiti lotu' nupa bi tun queëtu'.

¹³ Biti' gu'u lataj si' bè' tu' xihui' netu',

pero busólá netu' lu na' nu ruá' dö'.

Nequi quiu' ga rinná bè'u, en yöl-la' unná bè', en yöl-la' ba. Caní rë'ënitú' gácatíca'sö. ¡Ca' gaca!

¹⁴ Channö uniti loli' luzá'ali', nupa tuá' dö' queëli', uniti lahuë' Xúziru' Dios, zoè' yehua' yubá, libí'ili'.

¹⁵ Channö cabí uniti loli' luzá'ali', bití' uniti lahuë' Xúziru' Dios libí'ili' ca naca dul-la' nabága'li'.

Rusédinë' Jesús ca ral-la' gunru' gubasa

¹⁶ Gunnë' ca' Jesús:

–Cate' gunli' gubasa, bití' gunli' bayechi' loli' ca tunë' bönni' tu'lu'isö tsahui' cuíngaquië', tu' tunë' bayechi' lógaquië' para iléquite'e bönachi tunë' gubasa. Le nácatë rea' libí'ili', cá'asö naca yöl-la' ba gata' quégaquië'.

¹⁷ Libí'ili', cate' gunli' gubasa, buli'pá'a ícjali', en guli'quibi loli',

¹⁸ para cabí iléquite'e bönachi runli' gubasa. Bagáchi'sö ral-la' gunli' gubasa, ate' Xúziru' Dios, zóalenë' libí'ili' ga na' zóali' queézili', Lë' ubi'ë queéli'.

Yehua' yubá ral-la' utúbiru' yöl-la' tsahui' queëru'

(Lc. 12:33-34)

¹⁹ Gunnë' ca' Jesús:

–Bití' utúbili' yöl-la' tsahui' luyú ni, ga ni bëlado' que tu'töba' le, ate' raca ditaj, en ga ni ta'yaza gubán, ta'banë'.

²⁰ Buli'tubi yöl-la' tsahui' yehua' yubá, ga ni' bëlado' que bití' ulu'töba' le, en bití' gaca ditaj, en ga ni' bití' ila'yázië' bönni' gubán, en bití' ila'banë'.

²¹ Ga ni' dë yöl-la' tsahui' queéli', ni' gü'i ládxi'li' idxinli'.

Le rigú'u bení' icja ládxi'do'oru'

(Lc. 11:34-36)

²² Gunnë' ca' Jesús:

–Guiöj loru' naca ca tu le rigú'u bení' icja ládxi'do'oru'. Que lë ni na', channö guiöj loli' naca tsahui', idútëli' tsépili' yösa bení'.

²³ Channö guiöj loli' bití' naca tsahui', idútëli' nachúl-lali'. Que lë ni na', channö bení' zóalen libí'ili' nuhuóaca le naca chul-la, yénmi'tërö nachúl-lali'.

Dios, en dumí

(Lc. 16:13)

²⁴ Gunnë' ca' Jesús:

–Cuntu nu bönni' gaca gunë' xichíngaquië' chopa xanë', tu' uzóë' tuë' tsólá'aló, ate' ia'tué' na' idxí'inë', o ugá'analenë' tuë', ate' ia'tué' na' usán ládxi'ë. Bití' gaca gunli' xichinë' Dios, enca' dumí.

Dios rapa chi'ë nupa néquiquequi queë'

(Lc. 12:22-31)

²⁵ Gunnë' ca' Jesús:

–Ia'stú rea' libí'ili': Bití' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'tërö yöl-la' na' bán queéli' ca le gáguli', ate' nácatërö lesaca' le nácali' ca lari' gáculi'.

²⁶ Buli'yú ca raca quégacaba' biguínido' ta'daba' lúzxiba. Bití' bi taz tu'zóaba', en bití' tu'lápaba', en bití' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'tëröli' libí'ili' ca yugu' biguínido' na'.

²⁷ ¿Nuzxi caz bönni' nútsë'ë ládjali' gaca gunë' ga soë' ibanë' ia'túz dza tu' ruúbi rugu'inë' para gaca caní queë'?

²⁸ ¿Bizx que ruúbi rugu'ili' ni'a que le gáculi'? Buli'yútsöca' ca raca quégaca yöjdo' rógaca la' guixí' ca ta'zxon. Bití' tun dxin, en bití' tun du lari'.

²⁹ Neda' rea' libí'ili', Salomón, bönni' ni' gunná bë'ë, sal-la' gúta'da' yöl-la' tsahui' queë', lari' gúcuë' bití' gunná'tërö lachi ca rinná'gaca yöjdo' na'.

³⁰ Dios caz runë lachi yěj guíxi'do', le rō'gaca la' guixi', le nacua' na'a dza, ate' cuxō huidzaj ila'yegui lu guí'. Channō caní ruí'í ládxe'ë yěj guíxi'do', runë lēguequi lachi, gúnda'arē' ca' queéli', sal-la' bití' réajlë'ëli'-në' idú ládxi'li'.

³¹ Que lë ni na', bití' ubi uguí'ili', en bití' innali': "¿Bizxi gágutsatu?" o "¿Bizxi guíjatsatu?" o "¿Bizxi lari' gácutsatu?"

³² Bönachi yödžölió ni tu'ubi tu'guf'í ni'a que yúgu'të lë ni, pero zoë Xúziru' yehua' yubá, ate' Lë' nōzinë' naquínili' yúgu'të lë ni.

³³ Na'a, guli'güf'irō ládxi'li' inná bé'enë' Dios libí'ili', en gunli' le naca tsahui' lahuë' Lë', ate' Lë' cu'ë xinōzali' yúgu'të lë ni.

³⁴ Que lë ni na', bití' ubi uguí'ili' ni'a que le ral-la' gaca cuxō huidzaj, tu' huáca güf'í ládxi'li' cuxō huidzaj le gaca queéli' dza na'. Tu tu dza ilaca le ral-la' güf'í ládxi'li' dza na'.

7

Bití' ral-la' ichugu bë'ëru' böchi' luzá'aru'

(Lc. 6:37-38, 41-42)

¹ Gunnë' ca' Jesús:

—Bití' ichugu bë'ëli' böchi' luzá'ali', para cabí ichugu bë'ë Dios queéli',

² tu' ichugu bë'ë Lë' queéli' la' leze ca na' richugu bë'ëli' queë' böchi' luzá'ali', ate' ca na' rurixi rudōdili' que luzá'ali', la' cá'asō urixi udōdë' Dios queéli'.

³ ¿Bizx que ruyú' bëbudo' yu'u guiōj lahuë' böchi' luzó'o, en bití' réquibe'enu' yu'u le zxōntëro' guiōj lo' li'?

⁴ ¿Güfëtso' böchi' luzó'o: "Gulōz, cueja' bëbudo' yu'u guiōj lo'", ate' li', le zxōntëro' ca' yu'u guiōj lo' li'?

⁵ Li', bönni' rulu'isō tsahui' cuinu'. Guléaj zí'alō le zxon yu'u guiōj lo' li', ate' ní'irō ilé'enu' tsáhu'ido' para gaca cueju' bëbudo' yu'u guiōj lahuë' böchi' luzó'o.

⁶ Bití' güf'ili' quégacaba' bö'cu' le naca lá'ayi, para cabí ulu'hué'cjabá, en iláguya'aba' libí'ili', en bití' chú'unali' le naca lesaca' queéli' láhuigacaba' cuchi, para cabí ulu'zadi' ní'aba' le.

Guli'naba, guli'guilaj, en buli'lidza ra' yu'u

(Lc. 11:9-13; 6:31)

⁷ Gunnë' ca' Jesús:

—Guli'naba, ate' Dios gunnë' queéli'. Guli'guilaj, ate' gunnë' lataj idžöli queéli'. Buli'lidza ra' yu'u, ate' Lë' isaljë' queéli'.

⁸ Núti'tës bönni' rinabë', ridéli'në', ate' bönni' riguljë', ridžöli queë', ate' bönni' rulidžë' ra' yu'u, ralaj queë'.

⁹ Channō zoë' nu bönni' ládžali' libí'ili', ate' zóabi' bi'í queë', channō inábibi' lë' yōta xtila, ¿naru' unōdžjë'-bi' guiōj?

¹⁰ Channō inábibi' lë' tuba' böla, ¿naru' unōdžjë'-bi' bëla?

¹¹ Libí'ili' nácali' huiá' dō', pero nōžili' unōdžjali' xzí'inili' le naca tsahui'. Nácatëro' löza, Xúzili' zoë' yehua' yubá unōdžjë' nupa ta'nábini Lë' le naca dxi'a.

¹² 'Que lë ni na', ca na' rë'ënili' ilún bönachi queéli', lësca' caní guli'gún quégaquë'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'

(Lc. 13:24)

¹³ Gunnë' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nõza le rōjácalenē' bōnni' ga ni' ila'nítiē', ate' ta'yáziē' bōnni' zían ni'.

¹⁴ Tsúpi'do' naca ga nu riyaza, en lásido'os naca nõza le rōjácalen bōnachi ga ni' ila'deli' yōl-la' na'bán idú, ate' nabábasō nupa ta'dzōli le.

Le runru' naca bē' le nácaru'

(Lc. 6:43-45)

¹⁵ Gunnē' ca' Jesús:

—Guli'gún chi'i cuinli' para cabí ila'zì' yé'enē' bōnni' ta'zì' yē'ē libí'ili', ta'nnē' tu'ē didza' uláz queē' Dios. Ila'dxinē' bōnni' caní ga zóali', en ulu'luf'i cuíngaquiē' nõxaj lādxi'do' ca nácagacaba' bō'cu' zxíla'do', pero lu icja lādxi'do'gaquiē' nácagaquiē' ca bō'cu' gu'á sínia'.

¹⁶ Yugu' le tunē' ilaca bē' le nácagaquiē'. Biti' ruchíbiru' le ribía lubá uva lu yaga yōtsi', en bití' ruchíbiru' le ribía yaga higo lu guixi' legui lásido'.

¹⁷ Caní naca, yúgu'tē yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a.

¹⁸ Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a.

¹⁹ Yúgu'tē yaga bití' ta'bía le naca dxi'a ila'rugu, ate' ila'gu'ē léguequi lu guí'.

²⁰ Caní naca, yugu' le tunē' bōnni' na' ilaca bē' le nácagaquiē'.

Nupa bití' ila'yáziē' ga rinná bē'ē Dios

(Lc. 13:25-27)

²¹ Gunnē' ca' Jesús:

—Zian nupa tē neda': "Xan, Xan", pero calēga yúgu'tē' ila'yáziē' ga rinná bē'ē Dios yehua' yubá. Ila'yázasē' ni' bōnni' tunē' ca ré'ēnē' Xuza' Dios, zoē' yehua' yubá.

²² Cate' idxín dza údxi que yōdzōlió ni, bōnni' zían ilē' neda', ila'nnē': "Xan, Xan, bentu' libán que xtídzē'ē Dios, buguntu' dxin Lo', en buguntu' ca' dxin Lo' para bubéajtu' yugu' bō' xihui', en buguntu' ca' dxin Lo' bentu' zían yōl-la' huáca zxon'."

²³ Ní'irō neda' guía' légaquiē': "Biti' ca' núnbē'a libí'ili'. Guli'cuíta ga zoa', libí'ili' ruá'ali' dō'."

Chopa ca gaca udxíaru' xilibi zō'ō

(Lc. 6:47-49; Mr. 1:22)

²⁴ Gunnē' ca' Jesús:

—Ia'stú ca', nu bōnni' riyōnnē' xtídz'a'a ni, en gunē' ca rna, bōnni' ni náquiē' ca tu bōnni' réajni'inē', budxié' lidxē' ga naca lu guiōj.

²⁵ Cate' gulaj guiōjsiu', en guzxón yegu gubó'o, en guyecja bō', gudibi nisa cuita yu'u na', pero bití' gubixi, tu' dxía xilibi lu guiōj.

²⁶ Na'a, nu bōnni' riyōnnē' xtídz'a'a ni, en bití' runē' ca rna, bōnni' ni náquiē' ca tu bōnni' bití' réajni'inē', budxié' lidxē' lu yu dzōbi.

²⁷ Cate' gulaj guiōjsiu', en guzxón yegu gubó'o, en guyecja bō', ní'irō gudá'a nisa cuita yu'u na', ate' gubixitē', en tsaz biguinnaaj.

²⁸ Cate' Jesús budxi bē'lenē' légaquiē' didza' ni, bulu'bani bōnachi zían nacué' ni' ca naca le rusédinē',

²⁹ tu' rusédinē' légaquiē' ca tu bōnni' dē lu nē'ē, en calēga ca tunē' bōnni' yudo' usedi quégaquiē'.

8

Ruhuóáquië' tu bönni' ré'enë' huë' nudzu' ruzödi

(Mr. 1:40-45; Lc. 5:12-16)

¹ Cate' bötjé' Jesús lu guí'a na', sōjácalen bōnachi zían Lë'.

² Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxibë' lahuë' Jesús, en rë' Lë':

—Xan, channō rë'ënu', huáca unu' neda'.

³ Ní'irō Jesús la' bulitë në'ë, en gudanë' lë'. Rë' lë':

—Rë'ënda'. Huóácu' dxi'a.

La' bunítitë xihuë'ë bönni' huë' na'.

⁴ Ní'irō Jesús gudxë' lë':

—Buyú, cuntu nu guío' caní, pero guyéaj, yōlju'í cuinu' lahuë' bixúz, ate' yōjnōdzaj le gunná bë'ë Moisés le ulu'í bōnachi chibóácu'.

Jesús ruínë' bi'i huen dxin queë' tu bönni' rinná bë'ë lu gudil-la

(Lc. 7:1-10)

⁵ Cate' guyázië' Jesús yōdzō Capernaum, bidxinë' tu bönni' ga zoë', bönni' rinná bé'enë' tu gáyu'ë bönni' rōjáquië' gudil-la, ate' gúta'yuë' lahuë' Jesús,

⁶ en rë' Lë':

—Xan, bi'i huen dxin quia' dëbi' yu'u, ré'ebi' huë' nacú'unibi' bin, ate' riguí'i rizáca'da'abi'.

⁷ Jesús rë' lë':

—Neda' guída' una'-bi'.

⁸ Bubi'ë didza' bönni' na' rinná bé'enë' bönni' rōjáquië' gudil-la, en rë' Jesús:

—Xan, biti' naca' zi tsáziu' lidxa', pero tsa innasu' quia', ate' huóácabi' bi'i huen dxin quia'.

⁹ Lë'sca' neda', zoa nu rinná be'e neda', en nacu'ë ca' bönni' rōjáquië' gudil-la rinná bé'egacada'-në'. Cate' rea'-në' tuë': "Guyéaj ni'", rejë'. Cate' rea'-në' ia'tuë': "Gudá ni'", ridë'. Cate' rea'-në' bönni' huen dxin quia': "Ben dxin ni'", la' runtë' dxin na'.

¹⁰ Cate' biyōnnë' Jesús didza' ni, bubáninë', ate' gudxë' bönni' sōjácalenë' Lë', rnnë':

—Le nácatë rea' libí'ili', ga nacuá' bōnachi Israel, cuntu nu bönni' rōjxéqui'da'-në' réajlë'ë neda' ca runë' bönni' ni.

¹¹ Ia'stú rea' libí'ili': Ila'rúaj bōnachi zían saca' ga rilén gubidza, en saca' ga ribía gubidza, ate' ila'bō'len tsōzxōn Abraham, en Isaac, en Jacob, yehua' yubá ni' ga rinná bë'ë Dios,

¹² pero yugu' bönni' na' gurō cazë' Dios para ila'yázië' ga na' rinná bë'ë Lë', chú'unë' légaquië' ní'ilō ga na' naca chul-la, ate' ni' ila'bōdxë', en ulu'til-la láyë'ë lu yōl-la' ruhu'í'ini quégaquië'.

¹³ Ní'irō Jesús gudxë' bönni' na' rinná bé'enë' bönni' rōjáquië' gudil-la, rnnë':

—Bōaj lidxu'. Ca na' réajlë'u, ca' gaca quiu'.

La' ná'asō bōácatëbi' bi'i huen dxin queë' na'.

Jesús ruínë' xiná'anu nigula queë' Pedro

(Mr. 1:29-31; Lc. 4:38-39)

¹⁴ Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá.

¹⁵ Gudanë' Jesús ná'anu, ate' la' burúajtë xilá na' yú'unu. Ní'irō bōásanu, en bunōdzjanu le guluahuë'.

*Jesús ruúnë' zían nupa te'e**(Mr. 1:32-34; Lc. 4:40-41)*

¹⁶ Cate' chiridzö' dza na', dujuá'agaquië' zían bönni' yú'ugaca bö' xihui' légaquië' ga zoë' Jesús, ate' len yöl-la' rinnësö queë' bubéajë' yugu' bö' xihui' na', en bënë' ca' yúgu'të nupa te'e.

¹⁷ Caní guca para gaca ca na' gunné' Isaías, bönni' bë'ë didza' uláz queë' Dios, gunné': "Lë' bu'ë yugu' le rizáca'ru', en bu'ë ca' yugu' yödzöhuë' queëru'."

*Nupa gulë'ëni tsöjácálen Jesús**(Lc. 9:57-62)*

¹⁸ Cate' bilé'enë' Jesús nacua' bönachi zían gásibi'ilë', gunná bé'enë' yugu' bönni' usëda queë' ila'dödë' ia'tsölá'a nísado' ni'.

¹⁹ Bidxinë' tu bönni' yudo' usedi ga na' zoë' Jesús, en rë' Lë':

—Bönni' Usedi, sá'lëna' Li' gátitës ga tseju'.

²⁰ Jesús rë' lë':

—Yugu' böza' nacua' zzan guiöj quégacaba', ate' yugu' biguinnido', nudxiagacaba' xicá'agacaba', pero neda', Bönni' Guljë' Bönachi, biti' dë ga quíxaj icja'.

²¹ Ia'túë' bönni', náquië' bönni' usëda queë' Jesús, gudxë' Lë':

—Xan, benna neda' lataj huöja' ga idxinrö dza chibucácha'a-në' xuzá'.

²² Jesús gudxë' lë':

—Gudá' neda'. Bë' lataj yugu' bönni' tati cazë' ulu'cáché'ë nupa ilátigaca quégaquië'.

*Jesús ribequi dxíë' bö' budunu'**(Mr. 4:35-41; Lc. 8:22-25)*

²³ Gurenë' Jesús lë'e bárcodo', ate' dzágagaquië' Lë' bönni' usëda queë'.

²⁴ Ní'irö guyecja bö' budunu' lu nísado' na', ate' riyasa ridxiáda' nísado' na' ga bidxintë riyaza nisa lë'e bárcodo' na'. Dë' rásie' Jesús lë'e barco na'.

²⁵ Ní'irö bila'dxinë' bönni' usëda queë' Jesús ga na' zoë', ate' bulu'subanë' Lë', en të' Lë':

—Xan, busölá netu'. Chirigáchi'ru' lu nisa.

²⁶ Bubi'ë didza' Jesús, en rë' légaquië':

—¿Bizx que rádxili'? Láti'do'os réajlë'ëli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' gurö'öte dxi.

²⁷ Bulu'bánninë' bönni' na', ta'nnë':

—¿Nuzxi caz bönni' ni? Ruí'isë' didza', ate' bö' recja, en nísado' tun ca rnnë'.

*Yugu' bönni' Gadara yú'ugaca bö' xihui' légaquië'**(Mr. 5:1-20; Lc. 8:26-39)*

²⁸ Cate' bidxinë' Jesús ia'tsölá'a nísado' ga na' naca lu xiyú yödzö Gadara, bila'rúajë' chopë' bönni' ga nacua' ba quégaca nupa nátigaca, dutságagaquië' Jesús. Nácagaquië' sínia', ate' cuntu nu gaca tödi la' nöza ni'.

²⁹ La' guluf'itë' zidzaj didza' chopë' ni, ta'nnë':

—¿Bizxi ral-la'tu' quíu', Jesús, Zxí'inë' Dios? ¿Naru' bidxintso' ni dusaca' zi'u netu' zí'alö ca idxín dza queëtu'?

³⁰ Ga ni' nacué' nacua'aba' cuchi zían ta'daba'táguba', nacua'aba' láti'do' ga naca zí'tu'.

³¹ Gula'naba yechi' bö' xihui' na' Jesús, en të' Lë':

—Channö ubéaju' netu', benna lataj tsöjtsú'ugacatu'-ba' cuchi zían ni'.

³² Ní'irō Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuchi zían ni'.

Ní'irō yúgu'tëba' cuchi zían na' yöjbíxitégacaba' ga naca lë'e guiöj, en yöjcházagacaba' lu nísado', ga ni' gula'yëpiba' nisa, en gulátiba'.

³³ Guládxinë' bönni' tu'yúé'-ba' cuchi na', ate' bulu'zúnnejë'. Cate' bila'dxinë' lu yödzo, gula'guixjõ'ë yúgu'të lë na' guca quegaquië' bönni' ni' gula'yú'u bö' xihui' légaquië'.

³⁴ Ní'irō bila'rúaj bönnachi lu yödzo ni', yöjtságagaquië' Jesús. Cate' bila'lé'enë' Lë', guláta'yué' lahuë' uzé'ë lu xiyúgaquië' na'.

9

Jesús ruínë' tu bönni' nacú'unië' bin

(Mr. 2:1-12; Lc. 5:17-26)

¹ Ní'irō bubenë' Jesús lë'e bárcodo', en gudödë' ia'tsolá'a nísado' ni', ate' budxinë' ga naca ladzë'.

² Ní' dujuá'gaquië' tu bönni' nacú'unië' bin ga zoë' Jesús, zxoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládxi'u, zxi'ina'do'. Chibuníti lahua' dul-la' nabágu'u.

³ Nacu'ë ca' bönni' yudo' tu'sédinë' ni', ate' ta'nnë' lu icja ládxi'do'gaquië', ta'nnë': “Didza' ru'ë bönni' ni ruzóa Dios tsolá'alö.”

⁴ Cate' réquibe'enë' Jesús le ta'zá' ládxi'gaquië', rë' légaquië':

—¿Bizx que rizá' ládxi'li' caní le cabí naca tsahui'?

⁵ Biti' naca böniga nu guiësö bönni' ni: “Yugu' dul-la' nabágu'u chibuníti lahua'”, pero naca böniga nu gun ga huóásë', en uzé'enë'.

⁶ Na'a, uluf'ida' libí'ili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ní'irō Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

⁷ Ní'irō la' guyásatë' bönni' na' nacú'unië' bin, en böajë' lidxë'.

⁸ Cate' bila'lé'enë' bönni' nacú'ë ni' lë ni, bulu'bánninë', ate' gula'gu'ë Dios yöl-la' ba tu' bunödzejë' yöl-la' huáca caní quegaca bönachi.

Jesús rulidzë' Mateo

(Mr. 2:13-17; Lc. 5:27-32)

⁹ Cate' buzë'ë Jesús ni', bilé'enë' bönni' lë' Mateo, rö'ë ga na' ruquíxjë' uláz que yödzo zi'tu', ate' Jesús gudxë' lë':

—Gudá' neda'.

Ní'irō la' guyásatë' Mateo na', ate' sa'yéajlenë' Jesús.

¹⁰ Ia'tú le guca, cate' ni' rö'ë Jesús rahuë' ga naca lidxë' Mateo, zían bönni' tu'quíxjë', en yugu' bönni' cá'asö bila'dxinë' ga zoë', ate' gula'bó'lenë' Jesús tsözxön len yugu' bönni' usëda queë'.

¹¹ Cate' bönni' yudo' fariseo bila'lé'enë' lë ni, gula'nábinë' yugu' bönni' usëda queë' Jesús, ta'nnë':

—¿Naru' bönni' rusédinë' libí'ili' rágulentsë' tsözxön bönni' tu'quíxjë', en iá'zica'rë' bönni' dul-la'?

¹² Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönachi, pero bönni' té'enë' naquíniguequinë' nu un bönachi.

13 Guli'tséaj, en buli'sëda le rnna lë na' nazúaj lu guichi lá'ayi, le rnna caní: "Rë'ënda' ulu'huéchi ládxi'gaquië' bönni' luzá'agaquië', en calëga ilútië'-ba' böa' bëdxi lu bucugu lá'ayi quia'." Bida' ni, calëga para ulídzagaca'-në' bönni' tshui', pero bida' para ulídzagaca'-në' bönni' dul-la' para ulu'bí'íládxi'gaquië'.

Rusédinë' Jesús ca ral-la' gunru' gubasa

(Mr. 2:18-22; Lc. 5:33-39)

14 Ní'irö bönni' dá'gaquië' Juan, bönni' na' buquilé' bönachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bizx que na' netu', enca' yugu' bönni' yudo' fariseo, zían luzuí runtu' gubasa, però yugu' bönni' usëda quíu' Li' bití tunë' gubasa?

15 Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacua' laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idüë' bönni' na' rutsaga në'ë ga nacu'ë. Dza ní'irö ilunë' gubasa.

16 Bucúdzu'ë didza' Jesús, rnnë':

—Cuntu nu un tu lari' tëbi len lari' cubi, tu' uxú'uni lari' cubi na' nugu'ë lari' tëbi na', ate' ichöza'rö lari' tëbi na'.

17 Lësa' caní, cuntu nu bönni' rigué'ënë' xisi uva cubi tu lu buzudí guídí gula, tu' galaj ilëbi xisi uva cubi na', en uzxuzxaj buzudí guídí gula na', ate' gaca ditaj xisi uva na', ate' inítí ca' buzudí guídí na'. Rigá'aru' xisi uva cubi tu lu buzudí guídí cubi, ate' irópatë' taca chí'i.

Rubanbí' bí'i nigula queë' Jairo, en ruhuöácanu tu nigula gudannu lari' nacué' Jesús

(Mr. 5:21-43; Lc. 8:40-56)

18 Tsanni ní' Jesús ru'ílenë' légaquië' didza' ni, tu bönni' rinná bé'enë' bönachi judío bidxinë' ga zoë', ate' buzóa xzibë' lahuë' Jesús, en rë' Lë':

—Bí'i nigúlado' quia' la' gútitëbi'. Gudá ixóa no'o lëbi', ate' ubanbí'.

19 La' guzuítënë' Jesús, en sa'yéajlenë' lë'. Dzágagaquië' bönni' usëda queë' Lë'.

20 Ní'irö bidxinnu tu nigula zaca' cúdzu'lë' Jesús, chiguca chinnu iz ré'enu, bití' ruhu'í rön queënu que huë' quégaca cázanu nigula, ate' gudannu lari' nacué' Jesús.

21 Caní bennu tu' rizá' ládxi'nu, rnnanu: Channö cansa' zxë', huóaca'.

22 Ní'irö buécjë' Jesús, en ruyúë' lënu, ate' rë'ë-nu:

—Butipa ládxi'u, xzí'ina'do'. Chibóácateu' tu' réajlë'u neda'.

La' ná'asö böácatënu.

23 Cate' bidxinë' Jesús lidxë' bönni' unná bé' na', bilé'enë' nacu'ë ní' bönni' tu'cödxë' gui, en nupa ta'bödxí yechí'.

24 Jesús rë' légaquië':

—Guli'cuita ni, tu' cabí nátibi' bí'i nigúlado' ni. Rásisibi' na'.

Ní'irö nupa nacua' ní' bulu'titaj Lë'.

25 Cate' chinubéajë' Jesús bönachi na' ní'ilö, gúyázië', en gudélë'ë ná'abi' bí'i nigula na', ate' la' guyásatëbi'.

26 Guzë didza' ca guca lë ni, ate' bila'yöni bönachi nacua' idütë luyú na'.

Jesús ruínë' bönni' nachul-la guiöj lógaquië'

27 Cate' Jesús burúajë' ní', chopë' bönni' nachul-la guiöj lógaquië' sójácalenë' Lë'. Tu'ë zidzaj didza', ta'nnë':

—Xzí'ini xí'sóë' David, buéchi' ládxi' netu'.

28 Cate' bidxinë' Jesús ga naca lu yu'u, bila'dxinë' chopë' bönni' na' nachul-la guiöj lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

²⁹ Ní'irö Jesús gudanë' guiöj lógaquië', ate' rnnë':

—Ca réajlë'ëli', ca' gaca queëli'.

³⁰ La' bóaljatë' guiöj lógaquië'. Ní'irö Jesús buzenë' bach légaquië', rnnë':

—Gulí'gúi'ítica sò ládxi'li' cuntú nu inözi lë ni.

³¹ Cate' bulu'rúajë' ni', la' bulu'zëtë' didza' idútë luyú ni' ca naca lë na' benë' Jesús.

Jesús ruínë' tu bönni' biti' ru'ë didza'

³² Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús nachë'gaquië' lahuë' tu bönni' biti' ru'ë didza', tu' yu'u lë' bö' xihui'.

³³ Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'bánninë' bönni' nacu'ë ni', ta'nnë':

—Catu caz rilë'etu' le caní ladaj bönachi Israel.

³⁴ Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

Jesús ruhuéchi' ládxe'ë bönachi zían

³⁵ Gudë' Jesús idú gásibi'ilö gapa nacua' yödzö zxön, en gapa nacua' yödzödo', ate' gapa naca lu yu'u ga tu'dubë' tu'sédë' bönni' judío queë' Dios. Rusédinë' Jesús bönachi nacua' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'guí'i ta'zaca' yugu' lu yödzö na'.

³⁶ Cate' Jesús bilé'enë' bönni' zían ni', buéchi' ládxe'ë légaquië', tu' ta'guí'i ta'záquië', en nudú ládxi'gaquië' ca raca quégacaba' bö'cu' zxila' biti' zoa nu ruyú légacaba'.

³⁷ Ní'irö Jesús rë' yugu' bönni' usëda queë', rnnë':

—Le nácatë' dëda' yöla, pero nabábasö nupa tu'lapa.

³⁸ Que lë ni na', gulí'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queë'.

10

Jesús riböë' bönni' ilácaqaquië' gubáz queë'

(Mr. 3:13-19; Lc. 6:12-16)

¹ Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'ünë' yúgu'të nupa te'e, en yúgu'të nupa bi ta'guí'i ta'zaca'.

² Caní naca lágaquië' idxínnutë' gubáz na' nasól-lë'ë Jesús:

Simón, (lë' ca' Pedro),

Andrés, (böchë'ë Simón na'),

Jacobo, (zxí'inë' Zebedeo),

Juan, (böchë'ë Jacobo na'),

³ Felipe, Bartolomé, Tomás,

Mateo, (bönni' uquízxaj),

Jacobo, (zxí'inë' Alfeo),

Lebeo, (lë' ca' Tadeo),

⁴ Simón, (bönni' ruí'i ládxe'ë yödzö queë'),

Judas Iscariote, (bönni' udödë' Jesús lu ná'agaquië' bönni' ilútië' Lë').

Jesús risöl-lë'ë gubáz queë tsöjéngaqüë' libán

(Mr. 6:7-13; Lc. 9:1-6)

5 Ní'irö Jesús gusöl-lë'ë idxínnutë' bönni' ni tsöjéngaqüë' libán, ate' gunná bé'enë' légaquië', rnnë':

—Biti' tséajli' ga nacuá' bönachi biti' nácacaga judío, en biti' tsú'uli' ládzagaca bönachi nacuá' luyú Samaria.

6 Guli'tséaj ga nacuá' bönachi Israel, nácacagüë' ca bö'cu' zxíla'do' nanítigacaba'.

7 Guli'tsöjén libán, innali': "Chibidxín gala' dza Dios, Nu na' zoa yehua' yubá, inná bé'ë luyú ni."

8 Buli'ún nupa te'e. Buli'ún dxi'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénnasa' queëli' yöl-la' unná bé' ni. Buli'gún dxin le, en biti' bi uquízxjali'.

9 'Biti' bi guá'ali' lu buzudi queëli', calëga dumí oro, en calëga dumí plata, en calëga dumí lásido'.

10 Biti' guá'ali' yöxaj yöta queëli' le gáguli' la' nöza. Tuz lari' ixóa yenli', en biti' guá'ali' xiráchuli' o xiyaga queëli', tu' idzöli quézinë' bönni' huen dxin le gahuë'.

11 'Gáti'tës yödzö zxön o yödzödo' ga idxinli', guli'naba nuzxi naca idú ladxi' lu yödzö ni', ate' ugá'anali' lidxi nu na' cate' gála'rö dza urúajli' yödzö na'.

12 Cate' tsú'uli' tu lu yu'u, buli'gapa Dios bönachi nacuá' lu yu'u na', inábili'-né' Dios unödzejë' quégaquië' le cuéqui dxi icja ládxi'do'gaquië'.

13 Channö bönachi nacuá' lu yu'u ni' nácacaga lesaca', ugá'analen le ribequi dxi ladxi' na' léguequi, pero channö bönachi na' cabí nácacaga lesaca', inábali' cabí ugá'ana lë na' ribequi dxi ladxi' len léguequi.

14 Gáti'tës ga idxinli' ga bönachi ni' biti' ilún libí'ili' bal, en biti' ulu'zë nagui xtídza'li', buli'rúaj lu yu'u ni' o yödzö ni', ate' guli'cuibi bëchtö da' lë'e lábali', le ulu'í léguequi nabága'gaca xíguia'.

15 Le nácatë rea' libí'ili', cate' idxín dza ichúgüë' Dios quégaca bönachi, ila'gufí ila'záca'rö bönachi yödzö na' ca ila'gufí ila'záca' bönachi gula'cuá' yödzö Sodoma, en yödzö Gomorra, nupa ni' busunítie' Dios.

Nupa biti' ta'yéajlë' ulu'saca' zi' nupa dá'gaca Cristo

16 Gunnë' ca' Jesús:

—Buli'yútsöca', neda' risöl-la'a libí'ili', ate' gácali' ca bö'cu' zxíla'do' ta'daba' ga dzö'öba' bö'cu' gu'á sinia'. Guli'gaca sina' ca nácacacaba' sina' bëla sinia', pero guli'gaca ca' nöxaj ladxi' ca nácacacaba' gu'dödo'.

17 Guli'gún chí'i cuinli' quégaca bönachi, tu' ulu'dödë' libí'ili' lu ná'agaquië' bönni' yúlahui', en ila'guiné' libí'ili' gapa naca lu yu'u ga tu'dubë' tu'sédë' bönni' judío queë' Dios.

18 Lësca' caní, ila'ché'ë libí'ili' lógaquië' bönni' lo, en lógaquië' bönni' ta'nná bé'ë, tu' dá'ali' neda'. Caní gaca para gaca gunli' ba nalí quia' lógaquië' bönni' ni', en lógaquië' bönni' biti' nácacagüë' judío.

19 Ní'irö cate' ulu'dödë' libí'ili' lu ná'agaquië' bönni' unná bé' na', biti' cö'öli' böniga naxi innali', tu' ichizë' Dios icja ládxi'do'oli' didza' gü'ili', en ca innali' la' dza ná'asö.

20 Calëga libí'isili' na' innali', pero Dios Bö' Lá'ayi, Nu na' risöl-lë'ë Xúziru' Dios queëli', Lë cazë' sóalenë' libí'ili', en gu'ë didza'.

21 'Ila'cuá' bönachi ulu'dödi böchi'guequi lu ná'agaquië' bönni' ilütië' légaquië', en lësca' caní, bönni' nácagaquië' xuz ulu'dödë' xzí'nigaquië', ate' ila'cuá'abi' bi'i ila'dá'baga'bi' xúzgacabi', en ilunbi' ga ilátië' xúzgacabi' na'.

22 Yúgu'të bönachi ulu'zóa libí'ili' tsölä'aló tu' dá'ali' neda', pero nu ugá'ana tsutsu ga idxinrö dza údxi, nu ni ulá.

23 Cate' ulu'saca' zi' bönachi libí'ili' tu lu yödzo, buli'zxunnaj ni', ate' tséajli' ia'tú yödzo, tu' rea' libí'ili', huöda' neda', Bönni' Guljë' Bönachi, zí'aló cate' údxi gunli' libán gapa nacuá' yugu' yödzo quégaca bönachi Israel.

24 'Núti'tës bönni' náquië' bönni' usëda biti' nácare' lo ca nu rusëdi lë', en lësca' caní, nu bönni' náquië' huen dxin biti' nácare' lo ca xanë'.

25 Nu na' naca bönni' usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

Nu ral-la' gádxiru'

(Lc. 12:2-9)

26 Gunnë' ca' Jesús:

—Que lë ni na', biti' gádxili' bönachi. Hualá' lahui yúgu'të le raca bëdxi lándo'os, ate' huáca bë' yúgu'të le nagachi'.

27 Yugu' didza' ruí'lëna' libí'ili' ga naca chul-la, guli'quixjö' ga naca lu bení', ate' le rea' libí'ili' ga nagachi', guli'nnë' zidzaj ga naca lahui' lógaca bönachi.

28 Biti' gádxili' nupa tuti le nácagaca caz bönachi, pero biti' gaca ulu'suniti bö' naca cázaru'. Guli'gadxi Dios, Bönni' na' gaca gútië' idütë le nácali', en chú'unë' bö' naca cázali' lu guí' gabila.

29 'Ta'dá'uba' chópaba' biguínido' len tu dumí'lásido', pero biti' ibíxiba' tuba' lu yu channö cabí ru'ë Xúziru' Dios lataj gaca caní.

30 Lësca' caní, nabábagaca yúgu'të guitsa' ícjali' lahuë' Dios.

31 Que lë ni na', biti' gádxili'. Ru'itërö l ádxë'ë Dios libí'ili' ca ruí'í l ádxë'ë-ba' zianba' biguínido'.

Yugu' bönni' ta'zi' lu ná'agaquië' Cristo lógaca bönachi

(Lc. 12:8-9)

32 Gunnë' ca' Jesús:

—Nu bönni' sí' lu në'ë neda' lógaca bönachi, neda' sí' lu na'a bönni' na' lahuë' Xuza' zoë' yehua' yubá.

33 Bönni' ta'dá'baguë'ë lógaca bönachi, ila'nnë' biti' ta'dë'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

Jesús náquië' le run ga ila'rúaj choplö bönachi

(Lc. 12:51-53; 14:26-27)

34 Gunnë' ca' Jesús:

—Biti' guéquili' za'a idigu'a le ribequi dxi bönachi yödzo'lió ni. Biti' za'a idigu'a le ribequi dxi, pero za'a idigu'a le gun ga ila'rúaj choplö bönachi.

35 Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula zxoá' lídxigacanu ila'dá'baga'nu xto' xzí'ininu.

36 Caní gaca, la' di'a dzasö quégaca bönachi ulu'saca' zi' luzë'eguequi.

37 'Nu nadxí'irö xuz xinë' ca nadxí'í neda', biti' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'í neda', biti' naca bachi nu na' ta' neda'.

³⁸ Nu biti' si' lu në'e gaca ca tu bönni' sötjtë'ë lë'e yaga cruz, en ta' neda', biti' naca bachi guequi quia' neda'.

³⁹ Nu ru'i ladxi' gun chi'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queëru'

(Mr. 9:41)

⁴⁰ Gunnë' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasöl-lë'ë neda'.

⁴¹ Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'.

⁴² Núti'tës nu unödzej queë' tu bönni'do' ni tu zxi'bíndo'os nisa tu' náquië' bönni' usëda quia' neda', le nácatë rea' libí'ili', biti' uniti nu na' le ral-la' si' lu në'ë Dios.

11

Ta'dxinë' bönni' nasöl-lë'ë Juan ga zoë' Jesús

(Lc. 7:18-35)

¹ Cate' Jesús budxi buzéajni'inë' yugu' bönni' usëda queë', buzë'ë ni', sa'yéajë' röjsédinë' bönachi, en röjenë' libán yugu' lu ládzagaca bönachi na'.

² Juan, bönni' buquilé' bönachi nisa, ni' yu'ë lidxi guíë, ate' biyönnë' ca nátagaca le runë' Jesús. Ní'irö Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús.

³ Chopë' ni gula'nábinë' Jesús, të' Lë':

—¿Nacu' Li' Cristo, Bönni' na' ral-la' idxinë' yödžölió ni, o ral-la' cöztu' dza idxinë' ia'tué' bönni'?

⁴ Bubi'ë didza' Jesús, rë' légaquië':

—Guli'tséaj tsöjtíxjöi'ili'-në' Juan lë ni riyönili', en rilé'eli'.

⁵ Guli'tsöjödxe' ca raca, tu'lé'enë' bönni' guchul-la guió'j lógaquië', ate' tu'zë'ë bönni' biti' guca ila'dé'. Nuhuóacagaquië' bönni' gu'igüequinë' huë' nudzu' ruzödi, ate' ta'yönnë' bönni' gula'cödzue'. Nnita' nabánagaquië' bönni' gulátië', ate' raca libán que didza' dxi'a lóga bönachi yechi'.

⁶ Bica' ba nu bönni' biti' gáquië' chopa ládxe'ë, biti' ubéaj ládxe'ë neda'.

⁷ Cate' yugu' bönni' na' dá'gaquië' Juan bulu'zë'ë söjhü'jgaquië', ní'irö gusi lahuë' Jesús ru'ilenë' bönachi nacua' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asö? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le?

⁸ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxi'ado'? Nöz quézili' bönni' nácuagaquië' lari' dxi'ado' nacuë' lédxigaquië' bönni' ta'nná bë'ë.

⁹ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatë'rë' lo ca ia'zica'rë' bönni' gulu'ë didza' uláz queë' Dios.

¹⁰ Caní naca, tu' náquië' Juan bönni' na' ru'i didza' le nazúaj lu guichi lá'ayi ca naca queë', le rnna: Buyú, risöl-la'a bönni' gubáz quia', inöruë' ca Li'. Lë' upë'ë nöza ga tödu'.

11 Le nácatë rea' libí'ili'. Idútë yödzülió ni, cuntú nu zoa nácarö lo ca Juan, bönni' ni' buquilé' bönachi nisa, pero nu naca cuídido'os ga rinná bē' Nu na' zoa yehua' yubá nácatërö lo ca Juan na'.

12 'Cate' ni' gusí lahuë' buquilé' Juan bönachi nisa, ga ridxintë na'a dza, bayudxi túngaca bönachi para ta'yaza ga rinná bē'ë Bönni' na' zoë' yehua' yubá, ate' nupa tunsö bayudxi ta'deli' le.

13 Ga bidxintë dza na' blë'ë Juan, le rinná bē' xibá queë' Moisés, en le bulu'zúajë' lu guichi yúgu'të bönni' gulu'ë didza' uláz queë' Dios gulu'í didza' ca rinná bē'ë Bönni' na' zoë' yehua' yubá.

14 Channö rë'ënili' sí' lu ná'ali' lë ni, ral-la' inözili' Juan na' náquië' Elías, bönni' ni' bē'ë didza' uláz queë' Dios, bönni' na' Dios gunnë' ral-la' ilá' lahuë' leyübölö dza ni zóaru' na'a.

15 Nu zoa nagui, en riyöni ral-la' uzë nagui.

16 '¿Bizxi ubëqui'tseda' ca nácgaca bönachi nacua' dza ni zóaru' na'a? Nácgacuië' ca yugu' bí'ido' ta'bö'öbi' lu yë'ëyi. Zidzaj tu'lídzabi' luzá'agacabi',

17 ta'nnabi': "Rucódxitu' queëli' gui. ¿Bizx que biti' ruyá'ali'? Rul-la yéchi'tu' queëli'. ¿Bizx que biti' ribödxí yéchi'li'?"

18 Caní nácali', tu' bidë' Juan, ate' tu' cabí gü'í gudahuë' ca ráguli' libí'ili', gunnëli' queë', gunnali': "Tu' xihui' dzágui lë'."

19 Ní'irö bidxina' neda', Bönni' Guljë' Bönachi, ate' re'aj rahua', ate' rnnëli' quia', rnnali': "Náquië' bönni' huágulë'ë, en bönni' re'jë'. Náquië' luzá'agaquië' bönni' uquízaxj, en ia'zíca'rö huen dul-la'." Yöl-la' réajni'í queë' Dios naca bē' ni'a que le tun nupa ta'z'í lu nē'eguequi le.

*Le gaca que nu biti' run ca rnna xtídzë'ë Dios
(Lc. 10:13-15)*

20 Ní'irö gusí lahuë' Jesús ruzenë' bach bönachi nacua' yugu' yödzo gapa ni' benë' zían yöl-la' huáca, tu' cabí tu'bí'ini ládxi'guequi.

21 Gudxë' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzo Tiro, en lu yödzo Sidón yugu' yöl-la' huáca bena' ga zóali', dza ní'tëlö ulu'bí'í ládxi'gaca bönachi yödzo Tiro, en yödzo Sidón na', en ilácugaca lari' tēbi, en ulu'dxía dó ícjaguequi, le ulu'luf'í tu'bí'í ládxi'gaca bönachi na'.

22 Na'a, neda' rea' libí'ili', cate' idxín dza ichúguië' Dios quegaca bönachi, quí'í sáca'röli' libí'ili' ca ila'gu'í ila'zaca' bönachi yödzo Tiro, en yödzo Sidón, nupa na' busunítië' Dios.

23 Libí'ili', bönachi Capernaum, guca queëli' ca bidxintëli' ga nu riyaza yehua' yubá. Huötjali' lu gu' gabila. La'tu' gulaca yugu' yöl-la' huáca bena' ga zóali' lu yödzo Sodoma, ulu'gá'ana bönachi yödzo ni' ga ridxintë na'a dza.

24 Na'a, neda' rea' libí'ili', cate' idxín dza ichúguië' Dios quegaca bönachi, quí'í sáca'röli' libí'ili' ca ila'gu'í ila'zaca' bönachi Sodoma na'.

*Rnnë' Jesús: "Guli'dá ga zoa', uzí' ládxi'li'"
(Lc. 10:21-22)*

25 Dza na' bē'ë didza' Jesús, rnnë':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lë ni, para cabí ila'lé'enë' bönni' ta'yéajni'ide'enë' le, pero buluf'inu' nupa nácgaca ca yugu' bí'ido' le.

26 Ca' gaca, Xuza', tu' caní guyaza ládxi'u Li'.

²⁷ Yúgu'tè nudödë' Xuza' lu na'a. Cuntu nu nunbë' neda', Zxí'inë' Dios, pero tuzë' Dios Xuz, en cuntu nu nunbë' Dios Xuz, pero tuza' neda', Zxí'inë' Dios, enca' nupa na' rë'ënda' uluf'ida' léguequi Dios Xuz.

²⁸ Guli'dá ga zoa' yúgu'tèli' rójxéqui'li' tu' rúntica'sili' dxin que yöl-la' yudo', en nuá'ali' yua' zi'i quégaca xibá que, ate' neda' guna' ga uzí' ládxi'li'.

²⁹ Lu yöl-la' nójax ladxi' queéli' guli'gún xichina', gácali' ca bédxi ta'z'í'ba' yugu' quégacaba'. Guli'sëda lu na'a neda', tu' naca' nójax ladxi', en do' ladxi', ate' idzöli yöl-la' ruzí' ladxi' queéli', le cuéqui dxi ládxi'li'.

³⁰ Yugu' na' ugu'a libí'ili', le naca le inná bé'eda' libí'ili', bití' naca böniga, ate' yua' ugu'a libí'ili' le naca le rusédida', dzá'do'os naca.

12

Ta'lecjë' do bönni' usëda queë' Jesús dza lá'ayi

(Mr. 2:23-28; Lc. 6:1-5)

¹ Dza ni', le naca dza lá'ayi quégaquië' bönni' judío, gudödë' Jesús gapa dë yöla zxoá' xtila, ate' ta'dunë' bönni' usëda queë', en gusí lógaquië' ta'lecjë' do ga dxía zxoá' xtila, en tahuë' zxoá' xtila na'.

² Cate' bila'lé'enë' bönni' yudo' fariseo lë ni, të' Jesús:

—Buyútsöca', tunë' bönni' usëda quiu' le cabí ral-la' gunru' dza lá'ayi.

³ Ní'irö Jesús gudxë' légaquië':

—¿Naru' cabí nulábanili' lu guichi lá'ayi bi benë' David cate' gudunë', ate' gula'dún ca' nupa gula'cuá'len lë'?

⁴ Guyu'ë lu yu'u queë' Dios, en gudahuë' yugu' yöta xtila nagú'ugaquië' lu bucugu lá'ayi, le cabí ral-la' gahuë' lë', en bití' ral-la' ilahuë' bönni' gula'cuá'lenë' lë', pero légacsë' bixúz dë lataj ilahuë' le.

⁵ ¿Naru' cabí nulábanili' le rinná bë' xibá queë' Moisés ca tunë' bixúz yugu' dza lá'ayi? Tunë' dxin lö'a yudo' yugu' dza lá'ayi, en bití' ta'báguë'ë xíguia'.

⁶ Na'a, neda' rea' libí'ili', zoa' neda' ni, en naca' bönni' nácarë' lo ca yudo'.

⁷ Bití' réajni'ili' lë na' nazúaj lu guichi lá'ayi, le rnna: “Rë'ënda' huéchi ládxi'li' luzá'ali', en calëga gútigacali'-ba' böa' bédxido' ruzégui'gacali'-ba' lu bucugu lá'ayi quia'.” La'tu' réajni'ili' lë ni, bití' ichúguli' quégaca nupa bití' nabága'gaca xíguia'.

⁸ Ca' naca, tu' naca' neda', Bönni' Guljë' Bönachi, Xani dza lá'ayi.

Jesús ruúnë' tu bönni' narequi' në'ë

(Mr. 3:1-6; Lc. 6:6-11)

⁹ Ní'irö buzë'ë Jesús ni', ate' guyu'ë lu yu'u ga tu'dubë' bönni' judío, en tu'sëdë' queë' Dios.

¹⁰ Lu yu'u na' zoë' tu bönni' narequi' në'ë, ate' tu' të'ënnë' bönni' judío unná bë'ila'dzölinë' bi ulu'zégui'ë Jesús didza', que lë ni na' gula'nábinë' Lë', ta'nnë':

—¿Naru' dë lataj unru' nu re'e cate' naca dza lá'ayi?

¹¹ Bubi'ë didza' Jesús, rë' légaquië':

—Nu bönni' nútsë'ë ládjali', channö zóaba' tuba' bö'cu' zxila' queë', en channö íbixiba' lu yeru cate' naca dza lá'ayi, ¿naru' cabí tsójxönë'-ba', en tsöjléajë'-ba'?

¹² Nazáca'tërë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

¹³ Ní'irö Jesús gudxë' bönni' huë' na':

—Bulí no'ö.

Cate' bulí në'ë, la' böácatë dxi'a ca naca ia'tsólá'a në'ë.

14 Ní'irò bulu'rúajè' bõnni' yudo' fariseo na', ate' gulún xtídza'gaquiè' para gaca ilútiè' Jesús.

Le gunnè' tu bõnni' bē'è didza' uláz queè' Dios ca ral-la' gaca queè' Jesús

15 Cate' réquibe'enè' Jesús lè ni, buzè'è ni', ate' sòjácalen bõnachi zían Lè'. Jesús bunè' yúgu'tè nupa te'e ladaj bõnachi na',

16 en gunná bē'enè' léguequi biti' usiyõnguequi bõnachi Nu náquiè'.

17 Caní gunnè', para gaca lè na' gunnè' Isaías, bõnni' bē'è didza' uláz queè' Dios, gunné':

18 Bulí'yútsõca', Bõnni' ni náquiè' Huen Dxin quia', na' guró caza' neda' Lè'.

Nadxí'ida' Lè', en raza ládxa'a Lè'.

Ichiza' Lè' Bõ' Lá'ayi.

Lè' usiyõnnè' yúgu'tè bõnachi ca guna', uchi'a usóroa' quéguequi.

19 Cuntu nu tál-lalenè' didza', en biti' ulidzè' zidzaj.

Cuntu nu yõni chi'è ga naca zí'tu'.

20 Tu guído' zoa bõ biti' quítsjè' le, ate' guí' chizóa ulu, biti' usúluè' le, cate' uzóarè' le naca tsahuí' queè'.

21 Yúgu'tè bõnachi ilún lõza Lè'.

Ta'nnè' bõnni' judío unná bē': "Dzaga Jesús tu' xihuí'"

(Mr. 3:19-30; Lc. 11:14-23; 12:10)

22 Ní'irò dujuá'gaquiè' tu bõnni' ga zoè' Jesús, nachul-la lahuè', en biti' raca gu'è didza', tu' yu'u bõ xihuí' lè', ate' Jesús bunè' bõnni' na'. Caní guca, rilé'enè', en ru'è didza' bõnni' na' guchul-la lahuè', en biti' guca gu'è didza'.

23 Que lè ni na' bulu'bani yúgu'tè bõnachi nacua' ni', ta'nná:

—¿Naru' nácatsé' bõnni' ni Zxí'ini Xi'sóé' David, Bõnni' na' ral-la' guidè'?

24 Cate' bila'yõnnè' bõnni' yudo' fariseo lè ni, ta'zá' ládxe'è, ta'nnè': Bõnni' ni rubéajè' yugu' bõ' xihuí' tu' dzaga Beelzebú tu' xihuí', xángaca bõ' xihuí', Lè'.

25 Réquibe'enè' Jesús lè na' ta'zá' ládxi'gaquiè', ate' rè' légaquiè':

—Gátitès ga ta'nná bē' bõnachi, channó bõnachi ni' ila'rúaj chopló, en ila'díl-lalen luzè' eguequi, initi yõl-la' unná bē' quéguequi. Lësca' caní, channó ila'rúaj chopló bõnachi nacua' tu yõdzó o tu yu'u, en ila'dil-la, biti' gaca ila'día' bõnachi nacua' yõdzó na' o yu'u na'.

26 Lësca' caní, channó ubéaj Satanás tu' xihuí' la' luzè'esó, ate' yugu' bõ' xihuí' na' ila'díl-lalen la' léguequisó, ¿naru' idía' yõl-la' unná bē' que tu' xihuí'?

27 Rnnali' quia' rubéaja' yugu' bõ' xihuí' tu' dzaga Beelzebú tu' xihuí' neda'. Channó runa' caní, ¿nuzxi dzaga nupa dá'gaca libí'ili' cate' tu'béaj yugu' bõ' xihuí'? Que lè ni na' le túngaca caz naca bē' nachíxili'.

28 Na'a, channó neda' rubéaja' yugu' bõ' xihuí' tu' zóalen yõl-la' huáca queè' Dios Bõ' Lá'ayi neda', le nácate' chibidxín le rinná bē'è Dios ga zóali'.

29 ¿Naru' huácatsó nu bõnni' tsu'è lidxè' bõnni' nal-la, en cuéajè' yõl-la' tsahuí' dzó'o lidxè' channó cabí gúgu'è bõnni' nal-la na' zí'aló? Ní'irò gaca tsu'è, en ulatjè' lidxè' bõnni' nal-la na'.

30 Nu biti' rui neda' tsõzxõn, ridá'baga' neda', en nu biti' rutubi tsõzxõn len neda', rusilani nu na'.

31 'Que lè ni na' rea' libí'ili', ca naca yúgu'tè dul-la' tun bõnachi, en yugu' didza' xihuí' ta'nná, uniti lahuè' Dios léguequi, pero nu bõnni' inné' zi'è queè' Dios Bõ' Lá'ayi, biti' ca' uniti lahuè' Dios lè'.

³² Lësca' caní, nu bönni' innë' quia' neda', Bönni' Guljë' Bönachi, Dios uniti lahuë' lë', pero nu bönni' innë' queë' Dios Bó' Lá'ayi, bití' ca' uniti lahuë' Dios lë'. Bití' uniti lahuë' lë' dza ni zóaru' na'a, en bití' uniti lahuë' lë' dza si' za'.

Le runru' naca bë' le nácaru'
(Mt. 7:15-20; Lc. 6:43-45)

³³ Gunnë' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'.

³⁴ Libí'ili' nácali' di'a dza quégacaba' bëla sínia'. ¿Nacxi gaca güi'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tu'i didza'.

³⁵ Tu bönni' tsahui' ru'ë didza' tsahui' tu' yu'u le naca tsahui' icja ládxi'da'ahuë', pero tu bönni' huiá' dö' ru'ë didza' bití' naca tsahui' tu' yu'u le cabí naca tsahui' icja ládxi'da'ahuë'.

³⁶ Que lë ni na' rea' libí'ili', cate' idxín dza ichúguië' Dios quégaca bönachi, uchi'a usöröë' tu tu bönni' ca naca yúgu'të didza' gula'nnazë' ca'.

³⁷ Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ni'a que didza' na' bë'u.

Ta'nábinë' Jesús gunë' le gaca bë' nu náquië'
(Mr. 8:12; Lc. 11:29-32)

³⁸ Ní'irö bulu'bi'ë didza' yugu' bönni' yudo' fariseo, en yugu' bönni' yudo' tu sédinë', en të' Jesús:

—Bönni' Usedi, rë'ënitú' ilé'etu' tu le gunu' le gaca bë' dë lu no'o yöl-la' unná bë'.

³⁹ Bubi'ë didza' Jesús, en rë' légaquië':

—Yugu' bönni' tuá' dö' ni, bití' zoa idú ládxi'do'gaquië', ta'nábinë' neda' guna' tu le gaca bë' nu naca'. Bití' bi le gaca bë' ila'lé'enë', pero le naca bë'sö na' ca guca queë' Jonás, bönni' bë'ë didza' uláz queë' Dios.

⁴⁰ Ca na' guca queë' Jonás na', bugá'anë' lë'ëba' tu böla zxön idú tsonna dza tsonna yëla, lësca' caní gaca quia' neda', Bönni' Guljë' Bönachi, tsonna dza tsonna yëla ugá'ana' zxan yu.

⁴¹ Ila'yasë' bönni' gula'cu'ë yödzo Nínive dza ichúguië' Dios quégaca bönachi cate' uchi'a usöröë' bönachi nacua' dza ni zóaru' na'a, ate' le gulunë' usubaga' bönachi ni xíguia' tu' bulu'bi'l ládxi'gaquië' bönni' Nínive na' cate' ni' busiyönnë' Jonás légaquië' xtídzë'ë Dios, ate' na'a zoa' ni neda', en nácatëra' lo ca Jonás na'.

⁴² Lësca' caní, nigula ni' gunná bé'enu yödzo dë saca' ga ridöi' gubidza beo' ziaga chásanu dza ichúguië' Dios quégaca bönachi cate' uchi'a usöröë' bönachi nacua' dza ni zóaru' na'a, ate' le bennu usubaga' légaquië' xíguia', tu' birúajnu nigula na' ga nácatëro' zí'tu' para yöninu didza' réajni'i bë'ë Salomón, ate' na'a zoa' ni neda', en nácatëra' lo ca Salomón na'.

Cate' rudxín tu bö' xihui' xilataj
(Lc. 11:24-26)

⁴³ Gunnë' ca' Jesús:

—Cate' rirúaj tu bö' xihui' yu'u bönni', ridá gapa nabidxi, riguila'j ga uzí' ladxi'. Channö cabí idzöli ga na' uzí' ladxi',

⁴⁴ ní'irö inná: “Huöja' xilatja' ga ni' birúaja'.” Cate' udxín ga ni' birúaj, tsöjxaca' bönni' na', náquië' ca tu yu'u nadachi', en nalúaj, en chinabá'a para nu tsöjsóa ni'.

⁴⁵ Ní'irō tseaj, tsōjzxi' ia'gadxi bö' xihui' nácagacatëro xihui' ca le, ate' ila'yaza yúgu'të, en ila'cuá' icja láxdida'ahuë' bönni' na', ate' ga údxi huayáli'tëro ca gaca queë' bönni' na' ca guca queë' zí'aló. Lësca' caní gaca quegaca bönachi tuá' dö' ni.

Xinë'ë Jesús, en yugu' bönni' böchë'ë

(Mr. 3:31-35; Lc. 8:19-21)

⁴⁶ Cate' ni' ruí'ilenë' Jesús bönachi didza' ni, xinë'ë, en yugu' bönni' böchë'ë bila'dxinë' ni'. Gula'cu'ë lö'aló, en gulë'ëniagueuinë' iluf'ilenë' Jesús didza'.

⁴⁷ Ní'irō tu bönni' busiyönnë' Jesús, en rë' Lë':

—Buyútsöca', nacu'ë xinó'o, en yugu' bönni' böchu'u lö'aló, en të'ënnë' iluf'ilenë' Li' didza'.

⁴⁸ Bubi'ë didza' Jesús, en rë' bönni' na' busiyönnë' Lë' caní, rnnë':

—¿Nözili' nuzxi caz xiná'a, en nupxi caz bönni' böcha'a?

⁴⁹ Ní'irō bulí'në'ë, en bulu'e yugu' bönni' usëda queë', en rnnë':

—Buli'yútsöca', bönni' ni nácagaquië' ca xiná' caza', en yugu' böchi' caza'.

⁵⁰ Núti'tës nu run ca rë'ëni quézinë' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

13

Rucúdu'ë didza' Jesús ca naca queë' tu bönni' guz

(Mr. 4:1-9; Lc. 8:4-8)

¹ La' dza ní'isö birúajë' Jesús niu' yu'u, ate' yöjchö'ë ra' nísado'.

² Tu' bila'dxin bönachi zían ga zoë' Jesús, gurenë' tu lë'e bárcodo', en gurö'ë ni', ate' bönachi zían na' gula'cuá' luyú bidxi ra' nísado' na'.

³ Ní'irō Jesús bë'lenë' légaquië' didza', zían le busëdinë' légaquië'. Bucúdu'ë didza', rnnë':

—Buli'yútsöca', birúajë' tu bönni' guz, sōjësië' xisedo'.

⁴ Tsanni ni' sōjësië', bal-la xisedo' na' gulasi ra' nöza, ate' bila'dxinba' biguinnido', en gulë'ajba' xisedo' na'.

⁵ Gulasi ia'zica'rö xisedo' na' luyú ga rö'ö guiöj, ga na' rö'ö láti'sö yu, ate' la' gula'lentë, tu' cabí rö'öda' yu ni'.

⁶ Ní'irō cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún lui.

⁷ Gula'lén ia'zica'rö xisedo' na' ga bulu'lén lubá yötsi', ate' gula'zxön lubá yötsi' na', en bila'röli lë na' bësië', en gulún ditaj le.

⁸ Gulasi ia'zica'rö xisedo' na' ga naca luyú bëbu, ate' bulu'nödzej. Bal-la lë na' bësië' bulu'nödzej ia'tú gayuá'tëro ca'. Ia'zica'rö bulu'nödzej ia'tsónnalalaj ca', ate' ia'zica'rö bulu'nödzej ia'chí uruá' ca'.

⁹ Nu zoa nagui, en riyöni, ral-la' uzë nagui.

Le të'ëni ilún le bucúdu'ë Jesús didza'

(Mr. 4:10-12; Lc. 8:9-10)

¹⁰ Ní'irō bila'dxinë' bönni' usëda queë' Jesús ga zoë', en gula'nábinë' Lë', ta'nnë':

—¿Bizx que ruí'ilenu' bönachi didza' yugu' le rucúdu'u didza'?

¹¹ Bubi'ë didza' Jesús, en rë' légaquië':

—Dios ru'ë libí'ili' lataj tséajni'ili' le nagachi' ca rinná bë'ë Lë' yehua' yubá, pero bönachi ni bití' të'ëni ila'yéajni'i.

¹² Nu si' xtídzë'ë, Dios unödzejë' que ia'lati', ate' gáta'da'arö que, pero nu bití' si' le, la's dui le dë que udúa.

13 Que lë ni na' ru'fïlena' légaquië' didza' yugu' le rucúdzu'a didza', tu' tu'yúë' pero biti' ta'lé'enë'. Ta'yönnë' pero biti' tu'zë nágagaquië', en biti' ta'yéajni'inë'.

14 Caní raca quégaquië' para gaca ca na' gunné' Isaías, bönni' bē'ë didza' uláz queë' Dios, gunné':

Le nácatë yónili' pero biti' tséajni'ili'.

Uyuli' iná'ali' pero biti' ilé'eli'.

15 Caní raca tu' nazidi ládxi'do'gaca bönni' ni, en biti' bi riyaza icja nágagaquië'.

Nadzudi' guiöj lógaquië',

para cabí ila'lé'enë' len guiöj lógaquië' na'.

Biti' ulu'zë nágagaquië',

en biti' ulu'zéajni'i ládxi'gaquië',

en biti' ulu'huóáquië' quia' neda'

para gaca una' légaquië'.

16 'Na'a, bica' ba libí'ili', tu' rilé'e guiöj loli', en riyöni nágali'.

17 Le nácatë rea' libí'ili', zían bönni' gulu'ë didza' uláz queë' Dios en yugu' bönni' tsahui' gulë'ënnë' ila'lé'enë' le rilé'eli' libí'ili' pero biti' bila'lé'enë' le. Gulë'ënnë' ila'yönnë' le riyónili' libí'ili' pero biti' bila'yönnë' le.

Rigúxjö'ë Jesús le bucúdzu'ë didza'

(Mr. 4:13-20; Lc. 8:11-15)

18 Gunnë' ca' Jesús:

—Buli'zë nágali' ca naca le bucúdzu'a didza' que bönni' guz.

19 Núti'tës nu riyöni didza' ca rinná bē'ë Dios yehua' yubá, en biti' réajni'i le, raca que didza' riyöni nu na' ca guca que xisedo' na' gulasi ra' nōza. La' za'të tu' xihui', en rugúa didza' na' guyú'u icja ládxi'da'ahuë' bönni' na'.

20 Xisedo' na' gulasi luyú ga rō'ö guiöj rulu'í ca raca queë' bönni' riyönnë' didza' na', en la' ruzëtë náguië' lu yöl-la' rudzeja queë',

21 pero ca na' biti' ridía' xisedo' na' tu' cabí dë ga gun luí, lësca' caní raca queë' bönni' ni. Cate' idxín tu le usaca' zi' lé', ate' ila'bía nágaca bönachi lé' tu' nazí' lu nē'ë didza' na', la' gácatë chopa ládxe'ë.

22 Xisedo' na' gulasi ga na' bulu'lén lubá yötsi' rulu'í ca raca queë' bönni' na' riyönnë' didza' na', pero ru'í ládxe'ë yugu' le dë yödzölió ni, ate' nazí' yē'ë bönni' na', tu' ru'í ládxe'ë yugu' yöl-la' tsahui' que. Yugu' lë ni ta'röli didza' na', en tun ga biti' gun dxin lu icja ládxi'da'ahuë'.

23 Xisedo' na' gulasi luyú bēbu rulu'í ca raca queë' bönni' riyönnë' didza' na', en réajni'inë' le, ate' run dxin didza' na' lu icja ládxi'da'ahuë'. Nácagaca bal-la bönachi ca xisedo' na' bulu'nödzej ia'tú gayuá'tërö ca'. Nácagaca ia'zica'rö bönachi ca xisedo' na' bulu'nödzej ia'tsónnalalaj ca', ate' nácagaca ia'zica'rö bönachi ca xisedo' na' bulu'nödzej ia'chí uruá' ca'.

Tu gu'xi'do' cané le nalá' ca rilá' yöla xzoa' xtila

24 Ia'tú le bucúdzu'ë didza' Jesús, ate' rē' légaquië':

—Ca gaca cate idxín ni le rinná bē'ë Dios yehua' yubá naca ca guca que xisedo' dxi'a le guzë' tu bönni' ga naca lu xiyüë'.

25 Tsanni na' tasië' bönni' nacu'ë lidxë', bidxin tu nu biti' rilé'e xan yu'u na' dxi'a, ate' yöjōza lu xiyüë' xisedo' gu'xi'do' cané le nalá' ca naca yöla xzoa' xtila, ate' böaj xilataj.

26 Cate' gulén xzoa' xtila na', en gurö'ö do que, ga na' dxía xui'i, ní'irö gulaca bē' gu'xi'do' cané na'.

²⁷ Ní'irō bila'dxinē' bōnni' huen dxin ga zoē' bōnni' xan la' yēla na', en tē' lē': "Xan, channō guzu' xisedo' dxi'a lu yu quiu', ¿nacxi guca gula'lén guíxi'do' cané na'?"

²⁸ Xan yu na' gudxē' légaquiē', rnnē': "Tu bōnni' biti' rilé'enē' neda' dxi'a benē' caní." Ní'irō gula'nábinē' huen dxin queē' lē', ta'nnē': "¿Ba rē'ēnu' tséajtu' tsójlajtu' guíxi'do' cané na'?"

²⁹ Xángaquiē' rē' légaquiē': "¡Biti' ca! Nadx ca' cate' iládzu'li' guíxi'do' cané na', iládzu'lentēli' ca' yōla xzoa' xtila.

³⁰ Gácarō dxi'a gūf'ili' lataj ila'zxōngarō tsōzxōn cate' idxinrō dza tsójtúbiru' le, ate' ní'irō guía' nupa ulu'tubi le: Buli'tubi zí'alō guíxi'do' cané na', en guli'guga' tsójxili huéaj para uzégui'ru' le, ate' ní'irō utúbili' xzoa' xtila lu yu'u quia'."

Rucúdzu'ē didza' Jesús ca naca que xisé mostaza
(Mr. 4:30-32; Lc. 13:18-19)

³¹ Ia'tú le bucúdzu'ē didza' Jesús, ate' rē' légaquiē':

—Ca gaca ga idxín le rinná bē'ē Dios yehua' yubá, gaca ca raca que tu xisé mostaza, le guzē' tu bōnni' ga naca lu xiyüē'.

³² Le nácatē xisé mostaza na' nácatērō cuidi' ca yúgu'tē xisedo' ia'zícá'rō, pero cate' chinadúz, rizxōntērō ca yúgu'tē guixi' cuan, en rizxōn ca naca tu yaga, ate' ta'dxinba' biguínido', en tunba' xicá'agacaba' lu ni'a nē'e.

Rucúdzu'ē didza' Jesús que cúa zi que yōta xtila
(Lc. 13:20-21)

³³ Ia'tú le bucúdzu'ē didza' Jesús, ate' rē' légaquiē':

—Ca gaca ga idxín le rinná bē'ē Dios yehua' yubá gaca ca le run cúa zi que yōta xtila, le buchíxinu tu nigula len tsonna libixi yōjza xzoa' xtila, ate' guyazxa iduté cúa na'.

Le rē'ēni gun le rucúdzu'ē didza' Jesús
(Mr. 4:33-34)

³⁴ Yúgu'tē lē ni bucúdzu'ē didza' Jesús, le bē'lenē' bōnachi nacua' ni' didza', en biti' bi didza' bē'lenē' légaquiē' le cabí bucúdzu'ē didza'.

³⁵ Caní benē' para gaca lē na' buzúajē' lu guichi tu bōnni' bē'ē didza' uláz queē' Dios, gunnē':

Gu'a didza' yugu' le ucúdzu'a didza'.

Inniá' yugu' le nagachi' cate' ni' gusí lo si' guta' yōdzólió.

Rigúxjö'ē Jesús le bucúdzu'ē didza' que guíxi'do' cané

³⁶ Ní'irō buzenē' Jesús bōnachi nacua' ni' didza', en gusól-lē'ē légaquiē', ate' guyu'ē yu'u. Ní'irō bila'dxinē' bōnni' usēda queē' ga zoē', en tē' Lē':

—Gudíxjö'i' netu' le rē'ēni inná lē na' bucúdzu'u didza' que guíxi'do' cané le nalá' ca naca yōla xzoa' xtila.

³⁷ Bubi'ē didza' Jesús, ate' rē' légaquiē':

—Bōnni' razē' xisedo' dxi'a naca' neda', Bōnni' Guljē' Bōnachi.

³⁸ La' yēla na' naca yōdzólió ni, ate' xisedo' dxi'a na' tu'luf'i ca nácgaca nupa nabábagaca ga rinná bē'ē Dios. Guíxi'do' cané na' le nalá' ca naca yōla xzoa' xtila tu'luf'i ca nácgaca nupa néquiguequi que tu' xihui'.

³⁹ Nu na' biti' rilé'e dxi'a xan la' yēla na', en yōjza guíxi'do' cané na', tu' xihui' caz naca. Dza ulu'tubē' na' ruluf'i ca gaca dza údxi que yōdzólió ni, ate' nupa na' tu'tubi nácgaca gubáz lá'ayi queē' Dios.

⁴⁰ Ca na' guca, bulu'tubë' guixi'do' cané na', en bulu'zégui'è le lu guí', lësca' caní gaca cate' údxi que yödžólió ni.

⁴¹ Neda', Bönni' Guljé' Bönachi, isól-la'gaca'-në' gubáz lá'ayi quia', ate' ulu'béajé' ga rinná bē'è Dios yúgu'të nupa tun ga tun dul-la' luzé'eguequi, enca' nupa tuá' dö'.

⁴² Yugu' gubáz lá'ayi na' ila'gu'ë bönni' tuá' dö' na' lu guí' gabila. Ni' ila'bödxé', en ulu'tíl-la láyi'gaquié'.

⁴³ Ní'iró ila'yëpi yösa bení' bönachi tsahui', en ilácagaquié' ca gubidza ga ní' rinná bē'è Dios yehua' yubá. Nu zoa nagui, en riyöni ral-la' uzé nagui.

Rucúdzu'è didza' Jesús que tu yöl-la' tsahui' nagachi'

⁴⁴ Lësca' caní bucúdzu'è didza' Jesús, rnné':

—Le rinná bē'è Dios yehua' yubá naca ca tu yöl-la' tsahui' nagachi' tu la' yëla. Cate' bidžöliné' tu bönni' le, bucáchë'è le leyüböló ga na' bigachi', ate' lu yöl-la' rudzeja queé' guyijé', yöjéti'è yúgu'të le dë queé' ate' gú'ué' la' yëla na' para gata' yöl-la' tsahui' na' queé'.

Rucúdzu'è didza' Jesús que tu bugá le nazáca'da'

⁴⁵ Gunné' ca' Jesús:

—Ca ral-la' sè ládxi'li' le rinná bē'è Dios yehua' yubá naca ca bené' tu bönni' rá'ué', en ruíti'è, en riguiljé' bugá nazáca'gaca.

⁴⁶ Cate' bidžöliné' tu bugá le nazáca'da', guyijé', yöjéti'è yúgu'të le dë queé', ate' gú'ué' bugá na'.

Rucúdzu'è didza' Jesús que tu yöxaj böla

⁴⁷ Lësca' caní gunné' Jesús:

—Ca gaca ga ridxin le rinná bē'è Dios yehua' yubá, gaca ca run tu yöxaj böla le ta'chiljé' bönni' lu nísado', le röjxi' zían böla izá'a.

⁴⁸ Cate' chibidzá' yöxaj na', bulu'béajé' le luyú bidxi ra' nísado' na', ate' gula'bö'è ní', en gula'gu'ë-ba' yugu' böla dxi'a tu lu ga'böra, pero gula'ró'uné'-ba' yugu' böla cá asó.

⁴⁹ Lësca' caní gaca cate' údxi que yödžólió ni. Ila'rúajé' gubáz lá'ayi queé' Dios, ate' ulu'béajé' quez yugu' bönachi tsahui', ate' ulu'cuítié' légaquié' ladaj bönachi tuá' dö'.

⁵⁰ Ní'iró ila'gu'è bönachi tuá' dö' na' lu guí' gabila. Ni' ila'bödxé', en ulu'tíl-la láyé'è.

Yöl-la' tsahui' le naca gula, en le naca cubi

⁵¹ Ní'iró Jesús gunábiné' yugu' bönni' usëda queé', rnné':

—¿Ba réajni'ili' yúgu'të lë ní'?

Bulu'bi'è didza', té' Lè':

—Ön, Xan.

⁵² Jesús gudxé' légaquié':

—Cate' tu bönni' yudo' usedi chinazí' lu në'è le rinná bē'è Dios yehua' yubá, náquié' ca tu bönni' xan yu'u, rubéajé' ladaj yöl-la' tsahui' queé' le naca cubi, en le naca gula, le nácacaca tsahui' le ruzi'è xibé.

Le bené' Jesús lu yödžö Nazaret

(Mr. 6:1-6; Lc. 4:16-30)

⁵³ Cate' budxi bucúdzu'è Jesús yugu' didza' ni, buzé'è ní'.

⁵⁴ Cate' budxiné' ladzë', busédiné' bönachi nacua' lu yu'u ga tu'dubé' bönni' judío, en tu'sédë' queé' Dios, ate' bulu'bánninë, ta'nné':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni?

⁵⁵ Náquië' bönni' ni zxf'inë' bönni' gubëdxi yaga, ate' xinë'ë lënu María. Náquië' böchi'gaquië' Jacobo, en José, en Simón, en Judas.

⁵⁶ Lësca' nigula zanë' nacuá'lennu rë'u ni. ¿Gazxi caz guzëdë' yúgu'të lë ni?

⁵⁷ Que lë ni na' gulaca chopa ládxi'gaquië', ate' bulu'cá'anë' Lë'. Ní'irö Jesús gudxë' légaquië':

—Yúgu'të bönachi tun bal tu bönni' ru'ë didza' uláz queë' Dios, pero bönachi uláz queë', en bönachi nacuá' lidxë' biti' tun lë' bal.

⁵⁸ Que lë ni na' biti' benë' Jesús zían yöl-la' huáca ni', tu' cabi ta'yéajlë'ë Lë'.

14

Ca bëtgaquië' Juan, bönni' buquilë' bönachi nisa

(Mr. 6:14-29; Lc. 9:7-9)

¹ Lu dza ni', biyönnë' Herodes, bönni' rinná bë'ë luyú Galilea, ca nácagaca yugu' yöl-la' huáca runë' Jesús.

² Herodes na' gudxë' yugu' ni'a në'ë, rnnë':

—Bönni' na' Juan, bönni' buquilë' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxon na'.

³ Caní gunnë' Herodes tu' gusöl-lë'ë lë cazë' bönni' gula'zönë' Juan, en gulúgui'ë lë' du guië, ate' gula'gu'ë lë' lidxi guië' tu' gú'uninu Herodías ilunë' caní. Herodías na' gúcanu nigula queë' Felipe, böchë'ë Herodes na'.

⁴ Caní benë' Herodes, tu' gudxë' Juan na' lë': "Biti' ral-la' sóalenu'-nu."

⁵ Que lë ni na' gú'unnë' Herodes gútië' Juan, pero gúdxinë' ila'dá'baga' bönachi lu yödzo ni' lë', tu' téquiquequi bönachi náquië' Juan na' tu' bönni' ru'ë didza' uláz queë' Dios.

⁶ Ní'irö cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacuá' laní na', ate' guyaza ládxi'ë Herodes le benbi'.

⁷ Guzxí' lu në'ë Herodes, en benë' tsutsu xtídzë'ë unödzejë' queëbi' bíti'tës bi inábibi' lë'.

⁸ Tu' chibusédinu-bi' zí'aló xiná'abi', gúdxibi' lë':

—Benna quia' na'a icjë' Juan, bönni' buquilë' bönachi nisa. Gulú'u le tu lu zxiga' zxon.

⁹ Ní'irö buf'innë' Herodes, pero tu' chibenë' tsutsu xtídzë'ë, en tu' bila'yöni nupa te'aj tágulen lë', que lë ni na' gunná bé'enë' nu tsöjñodzaj icjë' Juan na' queëbi'.

¹⁰ Caní guca, gusöl-lë'ë nu tsöjrxíu yenë' Juan ga ni' yu'ë lidxi guië.

¹¹ Bönni' na' nasöl-lë'ë bu'ë icjë' Juan na', zxo lu zxiga' zxon, ate' bunödzejë' le queëbi' bi'i nigula na', ate' lëbi' buá'abi' le queënu xiná'abi'.

¹² Ní'irö bila'dxinë' bönni' gula'dë'ë Juan na', ate' bulu'ú'ë lë', en bulu'cáché'ë lë'. Gudödi ni', yöjtíxjöi'iguequinë' Jesús ca gulaca lë ni.

Jesús rugahuë' zíanrö ca chi-un gayuá' bönachi

(Mr. 6:30-44; Lc. 9:10-17; Jn. 6:1-14)

¹³ Cate' réquibe'enë' Jesús lë ni, buzë'ë ni', ate' gurenë' tu lë'e bárcodo', en sa'yéajë' la' queëzë' tu lataj cá'asö. Cate' bila'yöni bönachi zéajë' ni', bila'rúaj yugu' yödzo ni', en yöjaca ga ni' idxinë' Jesús, ta'zë'ë ní'aguequi.

¹⁴ Cate' burúajë' Jesús lë'e barco, bilé'enë' nacuá' bönachi zían ni', ate' buéchi' ládxi'ë léguéqui, en bunë' nupa te'e, nútsa'gaca ládjaguequi.

15 Cate' chiridzö' dza na', bila'dxinë' yugu' bönni' usëda queë' Jesús ga zoë', en të' Lë':

—Chiridzö' na'a, ate' cá'asö naca lataj ni. Busöl-la' bönachi ni para tsöjaca gapa dë yödzödo' para gá'ugaca bi ilagu.

16 Ní'irö Jesús gudxë' légaquië':

—Biti' run bayudxi tsöjáquië'. Buli'nödzej libi'ili' le ilahuë'.

17 Ní'irö të' Lë':

—Gáyu'sö yöta xtila dë, en chópasöba' böla dëba' queëtu' ni.

18 Jesús rë' légaquië':

—Buli'dödi le lu na'a.

19 Ní'irö Jesús gunná bé'enë' bönachi na' ila'bö' ga yu'u daca'. Gudödi na' gadelë'ë gayu' yöta xtila na', en chópaba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu'." Ní'irö buzxuzxjë' yöta xtila na', en budödë' le lu ná'agaquië' bönni' usëda queë', ate' légaquië' gula'guisië' le lógaca bönachi zián na'.

20 Gulahuë' yúgu'tëgaquië', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra.

21 Bönni' ni' gulahuë' guláquië' idú chi-un gáyu'ë, pero cuntu nu bulaba yugu' nigula, en bí'ido'.

Jesús rizë'e ni'ë lu nísado'

(Mr. 6:45-52; Jn. 6:16-21)

22 Ní'irö la' bentë' Jesús ga gula'benë' bönni' usëda queë' lë'e bárcodo', en tsöjáquië', ila'nöruë' lahuë' Lë', para ila'dödë' ia'tsólá'a nísado' ni', tsanni na' uzenë' Lë' bönachi nacua' ni' didza'.

23 Cate' chibusöl-lë'ë Jesús bönachi na', gurenë' tu lu guí'ado' ga ni' yöjsóë' tuzë'. Ni' bulidzë' Dios. Cate' chigul-la, tuzë' zoë' ni'.

24 Bárcodo' ga na' nacu'ë bönni' usëda queë' ridödi gatsaj láchui'lö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'.

25 Gudödi guluhuëla, gubí'gui'ë Jesús gala' ga na' nacu'ë, rizë'e ni'ë lu nísado'.

26 Cate' yugu' bönni' usëda queë' bila'lë'enë' Lë', rizë'e ni'ë lu nísado', gula'bö'dë'ë böniga tu' tádxinë'. Gula'bödxí'ë, ta'nnë':

—Tu' ridasö na'.

27 Ní'irö Jesús la' bulidztë' légaquië', rnnë':

—Buli'zxöni ládxi'li'. Neda' ni. Biti' gádxili'.

28 Ní'irö bubí'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

29 Jesús gudxë' lë':

—Gudá.

Ní'irö hötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús.

30 Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusi lahuë' rötjë' lu nisa, ate' gurödxí'ë. Bulidzë' Jesús, rnnë':

—Xan, busölá neda'.

31 Jesús la' bulitë në'ë. Buguélë'ë lë', en rë' lë':

—Láti'sö réajlë'u neda'. ¿Bizx que guca chopa ládxi'u?

32 Cate' bulu'benë' lë'e bárcodo' na', gurö'ö dxi bö' na' recja.

33 Ní'irö bönni' nacu'ë lë'e bárcodo' na' gula'yéaj ládxi'gaquië' Jesús, ta'nnë':

—Le nácatë, Zxf'inë' Dios nacu'.

Jesús ruínë' yugu' bönni' huë' nacu' ë yödzö Genesaret
(Mr. 6:53-56)

³⁴ Cate' chigula'dödë' ia'tsölá'a nísado' na', la' bila'dxintë' lu xiyú yödzö Genesaret.

³⁵ Cate' bulu' únbë'ë bönni' yödzö ni' Jesús, gula'sól-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús.

³⁶ Guláta'yuë' lahuë' Jesús gu'ë légaquië' lataj ila'gansë' ru'í lari' nácuë', ate' la' bulu'huóacaté yúgu'të nupa na' bila'gán lari' na'.

15

Le tun ga biti' nácaru' tsahui' lahuë' Dios
(Mr. 7:1-23)

¹ Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' të' Lë':

² —¿Bizx que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guíbi në'ë ca naca que yudo' cate' si' ilahuë'.

³ Bubi'ë didza' Jesús, en gunábinë' légaquië', rnnë':

—¿Bizx que libí'ili' ca' rucá'anali' cá'asö xibá queë' Dios para gunli' le nulaga loli' runli'?

⁴ Caní' raca, tu' gunná bé'enë' Dios libí'ili', gunnë': "Ben bal xuz xino'o", en gunnë' ca': "Nu innë' zi' que xuz xinë'e, tsaz xati nu na'."

⁵ Pero libí'ili' rnnali': "Channö nu guíë xuz ginë'e: Biti' bi gaca gunna' quiu' tu' chiguzxi' lu na'a gunna' yúgu'të queë' Dios,

⁶ bíti'rö bi run bayudxi gun nu na' que xuz xinë'e." Caní' runli', rucá'anali' cá'asö le gunná bë'ë Dios, para gunli' le nulaga loli' runli'.

⁷ Libí'ili', bönni' rulu'isö tsahui' cuinli', idú ca nácali' gudí'xjö'ë Isaías, bönni' bë'ë didza' uláz queë' Dios, gunnë':

⁸ Bönni' ni, len rú'agacsë' tunë' neda' bal, en calëga idú ládxi'gaquië'.

⁹ Nítisö naca le ta'yéaj ládxi'gaquië' neda', tu' tu'sédinë' yugu' le gula'nná bë' bönachi.

¹⁰ Ní'irö bulidzë' Jesús bönachi nacua' ni', en rë' léguequi:

—Buli'zé nágali' le guía' libí'ili', en guli'tséajni'i.

¹¹ Calëga le riyaza ru'ë nu bönni' run ga biti' náquië' tsahui' lahuë' Dios, pero le rirúaj ru'ë, lë ni run ga biti' náquië' tsahui' lahuë' Dios.

¹² Ní'irö yugu' bönni' usëda queë' Jesús gula'bígüi'ë ga zoë', en të' Lë':

—¿Naru' nöztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

¹³ Ní'irö bubí'ë didza' Jesús, en rë' légaquië':

—Yúgu'të le nadúz, le cabí' guzë' Xuza' zoë' yehua' yubá, huadúl'jagaca idú luí.

¹⁴ Buli'cá'ana légaquië'. Chinachúl-la lógaquië', en ta'chë'ë nupa nachul-la lógaca. Channö tu bönni' lo chul-la ichë'ë ia'túë' bönni' lo chul-la, iropë' ila'bixë' tu lu yeru.

¹⁵ Ní'irö bubí'ë didza' Pedro, en rë' Jesús:

—Buzéajni'i netu' lë ni rucúdz'u didza'.

¹⁶ Jesús rë' légaquië':

—¿Naru' cabí' réajni'itseli' ca' libí'ili'?

17 ¿Naru' cabí réajni'itseli' riyaza lé'ëru' yúgu'tè le riyaza ruá'aru', ate' rurúaj lé'ëru'?

18 Na'a, le rirúaj rúa'ali', lu icja ládxi'do'oli' za', ate' lé ni run ga biti' nácali' tshai' lahuë Dios.

19 Caní raca, tu' ta'lén lu icja ládxi'do'oli' yugu' le rizá' ládxi'li' le ruá' dō', le ilún ga gútili' bōnachi, en le ilún ga quítsjali' xibá que yōl-la' nutsaga na', en le ruá' dō' runli', en yugu' le rizé ládxi'li' cuanli', en yugu' le rinneli' que luzá'ali' le cabi nácate, en yugu' le rinné xihui'li'.

20 Yugu' le caní tun ga biti' náquië' tu bōnni' tshai' lahuë Dios, pero channō cabi' nayari nē'ë ca naca que yudo' cate' bi gahuë', biti' gun ga biti' náquië' tshai' lahuë' Dios.

Tu nigula izá'a réajlë'ënu Jesús

(Mr. 7:24-30)

21 Ní'irō buzé'ë Jesús ni', en guyéajë' lu xiyú yōdzō Tiro, en yōdzō Sidón.

22 Tu nigula nabábanu luyú Canaán birúajnu yōdzō ni', ate' bē'ënu zidzaj didza', rēnu Jesús:

—Xan, xzí'ini xi'sóë' David, buéchi' ladxí' neda'. Bi'i nigúlado' quia' riguí'i rizáca'da'abi' tu' yu'u bō' xihui' lēbi'.

23 Biti' bi didza' bubi'ë Jesús. Ní'irō gula'bígui'ë bōnni' usēda queë' ga zoë', ate' gulé' Lē', ta'nnē':

—Busól-la'-nu, tu' zá'anu cúdzu'ru' ribōdxi'anu.

24 Ní'irō bubi'ë didza' Jesús, ate' rē'ë-nu:

—Dios nasól-lē'ë neda' gácalena' bōnachi Israel, nupa nácacagaca ca bō'cu' xzíla'do' nanítigacaba'.

25 Ní'irō gubíga'nu nigula na' ga zoë' Jesús, en guyéaj ládxi'nu Lē', ate' rēnu Lē':

—Xan, gúcalen neda'.

26 Bubi'ë didza' Jesús, rnnē':

—Biti' naca dxi'a ugúaru' yōta quégacabi' bí'ido', en chú'unaru' le lógacaba' bō'cu'do'.

27 Ní'irō nigula na' rēnu Jesús, rnnanu:

—Ōn, Xan, pero táguba' bō'cu'do' na' le bizxaj tu'huōxaj ga tagu xángacaba'.

28 Ní'irō bubi'ë didza' Jesús, rnnē':

—Nigúlado'. Idú naca ca réajlë'u neda'. Gaca quiu' ca rē'ënnu'.

La' ní'isó bōácatebi' bi'i nigúlado' queénu.

Jesús ruínë' zían nupa te'e

29 Ní'irō buzé'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurō'ë ni'.

30 Bōnachi zían dujuá'gaquië' nupa biti' guca ila'zá', en nupa nachul-la guiōj lógaca, en nupa biti' guca ila'nnë', en nupa narugu ni'a nē'eguequi, en ia'zica'rō zían nupa te'e, ate' gula'guíxaj léguequi xini'ë Jesús, ate' Lē' bunë' léguequi.

31 Bulu'bani bōnachi ni' ca naca le benë' Jesús, tu' bila'lé'e tu'nnë nupa biti' guca ila'nnë', ate' nuhuōácagaca nupa gurugu ni'a nē'eguequi, ate' tu'zá' nupa biti' guca ila'zá', ate' tu'lé'e nupa guchul-la lógaca. Que lé ni na' gula'gu'ë yōl-la' ba Dios quégaca bōnachi Israel.

Jesús rugahuë' zíanrō ca choá' gayuá' bōnachi

(Mr. 8:1-10)

32 Ní'irō Jesús bulidzë' yugu' bōnni' usēda queë', en rē' légaquië':

—Ruhuechi' láchxa'a bönachi zían ni, tu' chiguca tsonna dza zá'lenguequi neda', en biti' bi dë le ilagu. Biti' ré'enda' usól-la'gaca'-në' tsøjhuóajgaquië' lídxigaquië' ta'dunsë' ca', nadxi ca' udú láchxi'gaquië' la' nöza.

³³ Ní'irö yugu' bönni' usëda queë' tē' Lē', ta'nnë':

—¿Gaxzi caz idzölitu' yöta xtila zían lu lataj cá'asö ni, le ugágu' bönachi zían ni?

³⁴ Gunábinë' Jesús légaquië', rnnë':

—¿Bal-laxi yöta xtila dë queëli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queëtu' ni.

³⁵ Ní'irö Jesús gunná bé'enë' bönachi zían na' ila'bö' lu yu.

³⁶ Gudélé'ë gaxdi yöta xtila na', en yugu' böla na', ate' gudxë' Dios: "Xclenu'." Ní'irö buzxuzjé' iroptë na', en bunödzejé' quégaquië' bönni' usëda queë', ate' légaquië' gula'guisië' le lógaca bönachi zían na'.

³⁷ Gulahuë' yúgu'té', en bulu'huóljanë'. Gudödi ni' bulu'tubë' le bizxaj nagá'anagaca, ate' bulu'lié' gadxi ga'böra.

³⁸ Yugu' bönni' na' gulahuë' nácagaquië' choá' gáyu'ë, pero cuntú nu bulaba yugu' nigula, en bí'ido'.

³⁹ Ní'irö busöl-lë'ë Jesús bönachi na' tsøjhuóajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzo Magdala.

16

Ta'nábinë' Jesús gunë' tu le gaca bë' nuzxi náquië'

(Mr. 8:11-13; Lc. 12:54-56)

¹ Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zi' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'.

² Bubi'ë didza' Jesús, en rë' légaquië':

—Cate' ridzö', rnnali' caní: "Gun dxi'a cuxö, tu' rö'ö böaj xiná lúxhiba."

³ Cate' naca zílado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúxhiba." Libí'ili', bönni' rulu'isö tsahui' cuinli'. Raca innë ya'ali' naca gun lúxhiba, pero biti' gaca tséajni'ili' le tu'sedi le taca dza ni zóaru' na'a.

⁴ Yugu' bönachi tuá' dö' ni, en biti' zoa idú láchxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús bucá'anë' légaquië', söhuójë'.

Le tu'sédinë' bönni' yudo' naca ca cúa zi que yöta xtila

(Mr. 8:14-21)

⁵ Cate' bila'dxinë' ia'tsölá'a nísado' ni', guléquibe'enë' bönni' usëda queë' Jesús gulál-la láchxi'gaquië' ilu'ë le ilahuë'.

⁶ Ní'irö Jesús gudxë' légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

⁷ Ní'irö la' légasacé' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

⁸ Réquibe'enë' Jesús lë ni, ate' rë' légaquië':

—¿Bizx que run xtídza'li' la' libí'sili' tu' cabí nuá'ali' yöta xtila? Láti'do'os réajlë'ëli' neda'.

⁹ ¿Naru' cabí réajni'itseli', en biti' röjnétseli' ca guca quégaca gayu' yöta xtila ni', lè na' gulahuë' chi-un gáyú'ë bönni', ate' tsca xö ga'böra butúbili'?

¹⁰ ¿Naru' cabí röjnétseli' ca' ca guca quégaca gadxi yöta xtila ni', lè na' gulahuë' choá' gáyú'ë bönni', ate' tsca xö ga'böra butúbili'?

¹¹ ¿Naru' cabí réajni'ili'? Biti' bē'a didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

¹² Ní'irö gula'yéajni'inë' biti' gudxë' Jesús légaquië' ilún chi'i cuíngaquië' que cúa zi que yöta xtila, pero ral-la' ilún chi'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

Pedro rnnë' Jesús náquië' Cristo

(Mr. 8:27-30; Lc. 9:18-21)

¹³ Cate' bidxinë' Jesús lu xiyú yödzo Cesarea, ga na' rinná bē'ë Filipo, gunábinë' yugu' bönni' usëda queë', rnnë':

—¿Bizxi ta'nná bönnachi nu naca' neda', Bönni' Guljë' Bönachi'?

¹⁴ Bulu'bi'ë didza', ta'nnë':

—Bal-lë' ta'nnë': "Juan nacu', bönni' ni' buquilë' bönachi nisa." Ia'zica'rë' ta'nnë': "Elías nacu', bönni' ni' bē'ë didza' uláz queë' Dios dza ni'te." Ia'zica'rë' ta'nnë': "Jeremías nacu', o ia'túë' bönni' bē'ë didza' uláz queë' Dios."

¹⁵ Ní'irö Jesús gudxë' légaquië':

—Naru' libí'ili', ¿nuzxi rnnali' naca' neda'?

¹⁶ Bubi'ë didza' Simón Pedro, en rë' Lë':

—Li' nacu' Cristo, Zxi'inë' Dios ban.

¹⁷ Bubi'ë didza' Jesús, rë' lë':

—Bica' xibó' li', Simón, zxi'inë' Jonás, tu' cabí buluf'inë' nu bönni' li' lè ni. Xuza' zoë' yehua' yubá buluf'inë' li' lè ni.

¹⁸ Neda' rea' li', li' nacu' Pedro, ate' lu guiöj ni ucuá'a nupa ulu'dubi quia', ate' yöl-la' unná bē' que tu' xihui' biti' sequi' uzaga' xinözgaquië'.

¹⁹ Gunna' quiu' yugu' zxi'ini guië' que lataj ga rinná bē' Nu zoa yehua' yubá. Le inná bē'u luyú ni, chigunná bē' ca' Nu na' zoa yehua' yubá, ate' le gu'u lataj gaca luyú ni, chibë' lataj gaca lè na' Nu na' zoa yehua' yubá ni'.

²⁰ Ní'irö Jesús gunná bé'enë' yugu' bönni' usëda queë' cuntú nu ilë'ë náquië' Lë' Cristo.

Jesús rigúxjö'ë ca si' ilütië' Lë'

(Mr. 8:31-9:1; Lc. 9:22-27)

²¹ La' dza ní'isö gusí lahuë' Jesús rigúxjö'i'inë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bē' en bönni' gula tu'yéajni'inë', en bönni' yudo' tu'sédinë' ulu'saca' zi'ë Lë', ate' ní'irö ilütië' Lë', pero cate' gaca tsonna dza ubanë' lu yöl-la' guti.

²² Ní'irö Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, biti' gu'ë Dios lataj. Biti' ca' gaca quiu' ca rnno'.

²³ Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopá ládx'a tu' cabí naca le rizá' ládxu'u li' ca rizá' ládxë'ë Dios, pero ca ta'za'sö ládx'i'gaca bönachi.

²⁴ Ní'irö Jesús gudxë' yugu' bönni' usëda queë', rnnë':

—Channö zoë' tu bönni' rë'ënë' tē'ë neda', ral-la' uzöë' tsölá'alö yugu' le rë'ëni quézinë', en gáquië' ca tu bönni' sa'yéajë' zeajtë'ë lë'e yaga cruz, ate' ní'irö gaca tē'ë neda'.

25 Nu bönni' guë'ënnë' gun chi'ë yöl-la' na'bán queë', unítië' le, pero bönni' unítië' yöl-la' na'bán queë' tu' dë'ë neda', gata' yöl-la' na'bán idú queë'.

26 ¿Naru' uzi'tsë' xibé tu bönni' channö utubë' yúgu'tè le dë yödölíó ni pero unítië' yöl-la' na'bán idú queë'? Biti' bi gaca unödzejë' tu bönni' para gata' yöl-la' na'bán idú queë'.

27 Caní rnniá', tu' huóda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsca naca le núngaca.

28 Le nácatë rea' libí'ili': "Biti' ca' ilátigaca bal-la nupa nacué' ni cate' ila'lé'erö idinná bë'a neda', Bönni' Guljë' Bönachi."

17

Ridzá' ca nalá' lahuë' Jesús

(Mr. 9:2-13; Lc. 9:28-36)

1 Gudödi xopa dza, Jesús gudélë'ë Pedro len Jacobo, en Juan, böchë'ë Jacobo na', en guchë'ë légaquië', ate' yójáquië' quez tu lu gu'a sibi.

2 Ní' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzení' gubidza, ate' lari' nácuë' böáca chiguichido'os ca bení'.

3 Ní'irö bila'lé'enë' bönni' usëda queë' buluí'i lógaquië' Moisés, en Elías, ate' tuí'ilenë' Jesús didza'.

4 Ní'irö Pedro rë' Jesús:

—Xan, naca dxi'a zóaru' ni. Channö rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

5 Tsanni ní' ru'ë Pedro didza' ni, la' gurö'ötë tu böaj bení' le guzxóa légaquië', ate' lu böaj na' biyón chi'i nu rnna:

—Bönni' ni Zxí'ini caza'. Nadxí'ida'-në', en raza ládxa'a Lë'. Buli'zë nágali' didza' gu'ë.

6 Cate' bila'yönnë' bönni' usëda queë' chi'i na', gula'dzö'ë gusurú'alö, en guladxi bila'dzöbinë'.

7 Ní'irö gubíguï'ë Jesús ga na' nacué', ate' gudanë' légaquië', rnnë':

—Gulí'chasa. Biti' gádxili'.

8 Cate' gula'chisa lógaquië', en bulu'yúë', cünturö nu bila'lé'enë', pero tuzë' Jesús.

9 Cate' ní' tu'dínnië' lu gu'a na', Jesús gunná bé'enë' légaquië', rnnë':

—Cuntu nu guiëli' ca guca lë ni bilé'eli' cate' ubanra' lu yöl-la' guti neda', Bönni' Guljë' Bönachi.

10 Ní'irö yugu' bönni' usëda queë' gula'nábinë' Lë', ta'nnë':

—¿Bixz que ta'nnë' bönni' yudo' usëdi run bayudxi uluí'i lahuë' Elías zí'alö ca uluí'i lahuë' Cristo?

11 Bubi'ë didza' Jesús, rë' légaquië':

—Le nácatë uluí'i lo cazë' zí'alö Elías, en ucá'anë' tsahui' yúgu'të.

12 Neda' rea' libí'ili': "Chibuluf'i lahuë' Elías na', pero bití' bulu'únbë'ë lë', ate' yúgu'të ca rnna'sö quégaquië' gulunë' queë'." Lësca' caní ilunë' quia' neda', Bönni' Guljë' Bönachi, ulu'saca' zì'ë neda'.

13 Ní'irö gula'yéajni'inë' bönni' usëda queë', bë'lenë' Jesús légaquië' didza' ca guca queë' Juan, bönni' na' buquülë' bönachi nisa.

Ruúnë'-bi' Jesús tubi' bi'i bönni' ré'ebi' xjote'

(Mr. 9:14-29; Lc. 9:37-43)

14 Cate' bila'dxinë' ga na' nacua' bönachi zían, gubígui'è tu bönni' ga zoë' Jesús, ate' buzóa zxibë' lahuë' Lë',

15 en rë' Lë':

—Xan, buéchi' ladxi'-bi' bi'i bönni'do' quia', tu' ré'ebi' xjote', en riguí'i rizáca'da'abi', ate' zían luzuí ridzö'öbi' lu guí' o lu nisa.

16 Chidiguá'a-bi' lógaquië' bönni' usëda quiu' pero biti' guca ulu'únë'-bi'.

17 Bubi'ë didza' Jesús, rnnë':

—Libi'ili', bönachi cabí réajlë'ëli', en biti' nácali' tsahui'. ¿Gáca'xte caz ral-la' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queéli'? Gulí'diguá'-bi' quia' ni.

18 Ní'irö Jesús buzenë' le bach bö' xihui' na' yu'u lébi', ate' la' burúajtë lébi', ate' la' ná'asö böacatëbi' bi'i bönni'do' na'.

19 Ní'irö, yugu' bönni' usëda queë' Jesús gula'biguë'ë quez ga zoë', ate' gula'nábinë' Lë', ta'nnë':

—¿Bixz que na' biti' guca ubéajtu' netu' bö' xihui' na'?

20 Jesús rë' légaquië':

—Biti' guzxéqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuídi'sö naca yöl-la' réajlë' queéli' Dios, nácatë ca tu xisedo' mostaza, huáca guiéli' guí'ado' ni: “Gucuíta ni, en yöjsóa ní'ilö”, ate' la' icuítatë guí'ado' na'. Biti' bi' zoa le cabí gaca gunlí' channó réajlë'ëli' Dios idú ládxi'li'.

21 Tu bö' xihui' caní gácasö ubéajli' channö ulídzali'-në' Dios, en gunlí' gubasa.

Rigúxjö'ë Jesús leyúbölö ca si' ilútië' Lë'

(Mr. 9:30-32; Lc. 9:43-45)

22 Tsanni ni' ta'dë' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljë' Bönachi, lu ná'agaca bönachi.

23 Ilútië' neda', pero cate' gaca tsonna dza Dios usubanë' neda'.

Ní'irö bulu'huí'innë' bönni' usëda queë'.

Jesús riguíxaj lazë' que yudo'

24 Cate' bulu'dxinë' Jesús, en yugu' bönni' usëda queë' lu yödzö Capernaum, bila'dxinë' yugu' bönni' tu'quixxjë' bönachi lázagaca que yudo' ga zoë' Pedro, ate' të' lë':

—¿Naru' cabí quixxaj lazë' que yudo' bönni' rusédinë' libí'ili'?

25 Bubi'ë didza' Pedro, rnnë':

—Ön, huaguixxjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bë'ë luyú ni, ¿nupxi tu'quixxjë' le riguíxaj laz, en laxxaj que yu? ¿Naru' tu'quixxjë' bönachi uládz quegaquië' o bönachi izá'a?

26 Bubi'ë didza' Pedro, rë' Lë':

—Bönachi izá'a tu'quixxjë'.

Ní'irö Jesús rë' lë':

—Que lë ni na', biti' run bayudxi quixxaj laza' que yudo' tu' naca' Zxí'inë' Dios ca na' biti' bi ta'guíxaj nupa nácacaca bönachi uládz queë' bönni' na' ruquíxjë'.

27 Na'a, para cuntú nu gun leru', guyéaj ra' nísado', yöjzalaj lu nisa le rizóninu'-ba' böla, ate' böla cueju'-ba' zí'alö, guzxí'i-ba'. Cate' isalju' ruá'aba', ní' idzölinu' tu dumí lásido'. Guzxí'i le, ate' gudíxaj laza', en lazu'.

18

¿Núzxilö gaca lo?

(Mr. 9:33-37; Lc. 9:46-48)

1 La' dza ní'isö bila'dxinë' bönni' usëda queë' Jesús ga zoë', ate' gula'nábinë' Lë', ta'nnë':

–¿Núzxilë' bönni' ni gáquië' lo ga rinná bë'ë Dios yehua' yubá?

2 Bulidzë'-bi' Jesús tubi' bi'i bönni'do', ate' buzóë'-bi' gatsaj láhui'lö ga na' nacué.

3 Ní'irö rë' légaquië':

–Le nácatë rea' libí'ili', channö cabí huóacali' ca zeaj nácabi' bí'ido', biti' ca' tsú'uli' ga ni' rinná bë'ë Dios yehua' yubá.

4 Que lë ni na', nütí'tës nu gaca nõxaj ladxi', en huóaca ca nácabi' bí'ido' ni, nu ni gaca lo ga ni' rinná bë'ë Dios yehua' yubá.

5 Nütí'tës nu gun bal tubi' bí'ido' caní tu' néquibi' quia', neda' caz gun bal.

Le tun ga nu gun dul-la'

(Mr. 9:42-48; Lc. 17:1-2)

6 Gunnë' ca' Jesús:

–Nu gun ga gunbi' dul-la' tubi' bí'ido' caní réajlë'ëbi' quia', gácarö dxi'a queë' bönni' na' la'tu' ugalë'ë guiöj riyëtuni yaga yenë', ate' tsójsuladzu' cuinë' lu nísado'.

7 Bica' bayechi' bönachi yödzülió ni tun ga gun dul-la' luzë'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

8 'Que lë ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsójsásziu' ga su' ibanu' biti' rizó'o o narugu ni'a no'o, en calëga nacua' chopa no'o, en chopa ni'u ate' tsójsásziu' lu guí' gabila le catu caz ulu.

9 Channö gun guiöj lo' ga gunu' dul-la', gulëaj le, en gurú'una le. Gácarö dxi'a quiu' tsójsásziu' ga su' ibanu', zoa tuz guiöj lo', en calëga nacua' chopa guiöj lo', ate' tsójsásziu' lu guí' gabila.

Jesús rucúdzü'ë didza' que tu bö'cu' zxila' nanítiba'

(Lc. 15:3-7)

10 Gunnë' ca' Jesús:

–Guli'gún chi'i cuinli' para cabí uzóali'-bi' tsölá'alö tubi' bí'ido' caní. Neda' rea' libí'ili', gubáz lá'ayi tapa chi'ë légacabi' nacua'tica'së' lahuë' Xuza' zoë' yehua' yubá.

11 Bida' ni neda', Bönni' Guljë' Bönachi, para usölá' nu ni naniti.

12 '¿Nacxi rusáca'li' queëli'? Tu bönni', nacua'aba' tu gayuá' bö'cu' zxila' queë', channö nítiba'tuba', ¿naru' cabí ucá'anë'-ba' tápalalaj yu' chënnaba' na', ate' tsejë' gapa naca lu guí'a, para tsójtijë'-ba' bö'cu' zxíla'do' na' nanítiba'?

13 Channö udzölinë'-ba', le nácatë rea' libí'ili', udzéjarönë' ni'a queëba' bö'cu' zxíla'do' na' ca gunë' quégacaba' ia'tápalalaj yu' chënnaba' ni' biti' gula'nítiba'.

14 Lëasca' caní, Xúziru' Dios, zoë' yehua' yubá, biti' rë'ënë' nítibi' tubi' bí'ido' caní.

Ca ral-la' uniti loru' böchi' luzá'aru'

(Lc. 17:3)

15 Gunnë' ca' Jesús:

—Channö böchi' luzó'o guá' dö' quiu', gúyèajtsöca', en yöjca'analenë' tsahui' la' lib'isili'. Channö uzé náguië' li', chibuguélu'u böchi' luzó'o.

¹⁶ Channö cabí uzé náguië' xtídzu'u, guchë'ë ia'tuë' o ia'chopë' bönni' para urúaj li xtídzu'u lógaquië' chopa tsonné' bönni', nupa gaca ilún ba nalí que xtídza'li'.

¹⁷ Channö cabí uzé náguië' xtídza'gaquië', gudxi ca' bönachi tu'dubi tu'sëdi queë' Dios, en channö cabí uzé náguië' xtídza'gaca bönachi na', ní'irö bönni' na' gáquië' quiu' ca tu bönni' bití' réajlë'ë Dios, en ca tu bönni' ruquíxjé' uláz que yödzö zí'tu'.

¹⁸ 'Le nácatë rea' lib'ili', yúgu'të le inná bé'ëli' lu yödzölió ni, naca le chigunná bé'ë Dios yehua' yubá, ate' yúgu'të le güf'ili' lataj lu yödzölió ni, naca le chibë'ë lataj Dios yehua' yubá.

¹⁹ 'Lësca' caní rea' lib'ili', channö chópasili' gun tuz xtídza'li' lu yödzölió ni ca naca tu le inábili'-né' Dios, gunë' Xuz caza' Dios, zoë' yehua' yubá, lë na' rinábili'-né'.

²⁰ Ga nacua' chopa tsonna nupa ni nudúbigaca quia' neda', zoa caza' neda' gatsaj láhui'lö ga na' nacu'ë.

²¹ Ní'irö gubígui'ë Pedro ga zoë' Jesús, en gunábinë' Lë', rnnë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

²² Jesús rë' lë':

—Neda' rea' li', calégasö gadxi luzuí, pero idú tsónnalalaj yu' chi cuía le naca gadxi luzuí.

Jesús rucúdzu'ë didza' que tu bönni' huen dxin bití' buniti lahuë' luzë'ë

²³ Gunnë' ca' Jesús:

—Ia'stú, ca gun Nu na' rinná bé' yehua' yubá naca ca benë' tu bönni' rinná bé'ë. Gú'unnë' uca'analenë' tsahui' yugu' bönni' huen dxin queë'.

²⁴ Cate' gúsí lahuë' rucá'analenë' légaquië' tsahui', dujuá'gaquië' ga zoë' tu bönni' ral-lë'ë queë' zían gayuá' dumí.

²⁵ Tu' cabí guca quíxjé', gunná bé'ë xané' idó'ogaquië' lë', en nigula queë', en yugu' bi'i queë', en yúgu'të le dë queë', ate' ní'irö gazzaj le ral-lë'ë queë' xané' na'.

²⁶ Ní'irö bönni' huen dxin na' buzóa zxi bé' lahuë' xané', en gunábinë' lë', rnnë': "Xan, ben zxon ládxi'u neda'. Huaguíxjaj caza' li' idutë'."

²⁷ Ní'irö xané' na' buéchi' ládxi'ë bönni' huen dxin queë' na', en buniti lahuë' lë' lë' na' ral-lë'ë queë', ate' busané' lë'.

²⁸ Cate' burúajë' bönni' huen dxin na', la' yöjtsáгатë' tu bönni' rúnlenë' lë' tsözxön dxin, ate' bönni' na' ral-lë'ë queë' láti'do'os dumí. Ní'irö guzxönë' lë', en guxínnajë' yenë', ate' rë' lë': "Gudíxjatë lë' na' ral-lu'u quia'."

²⁹ Ní'irö luzë'ë na' buzóa zxi bé' lahuë', en gunaba yechë'ë lahuë', rnnë': "Ben zxon ládxi'u neda'. Huaguíxjaj caza' li' idutë'."

³⁰ Bití' gú'unnë' bönni' huen dxin na', ate' yöjlu'ë lë' lidxi guíë dza quíxjarë' lë' na' ral-lë'ë queë'.

³¹ Cate' bila'lë'enë' lë' ni ia'zica'rë' huen dxin, bulu'huf'inide'enë' ni'a queë', ate' yöjtíxjöi'iguequinë' xángaquië' yúgu'të lë' na' guca.

³² Ní'irö xángaquië' bulidzë' bönni' huen dxin na', ate' rë' lë': "Li', huen dxin catsahui'. Yúgu'të dumí na' gúl-lu'u quia' buniti lahua' li'. Busúlua' lë' na' gúl-lu'u quia' tu' gunaba yechu'u lahua'."

³³ ¿Naru' cabí ral-la' huéchi' ládxa'u ca' luzó'o ca na' bena' neda', buéchi' ládxa'a li'?"

³⁴ Ní'irō guléde'enē' xanē', en budödē' lē' lu ná'agaca nupa ulu'saca' zi' lē' dza quízxjarē' idútē le ral-lē'ē queē'.

³⁵ Ní'irō rnnē' Jesús:

—Lēzca' caní gunē' Xuz'a zoē' yehua' yubá queēli' channō cabí uniti loli' idú ládxi'li' yugu' bōchi' luzá'ali'.

19

Nupa tu'lá'a yōl-la' nutsaga na'

(Mr. 10:1-12; Lc. 16:18)

¹ Cate' budxi bē'ē Jesús yugu' didza' ni, buzē'ē luyú Galilea, ate' bidxinē' luyú Judea le dē ia'tsölá'a yegu Jordán saca' ga rilén gubidza.

² Bónachi zián sōjácalen Jesús, ate' bunē' léguequi ni'.

³ Ní'irō bila'dxinē' bal-lē' bōnni' yudo' fariseo ga zoē' Jesús para ila'zi' bē'ē Lē', ate' gula'nábinē' Lē', ta'nnē':

—¿Naru' dē lataj bōnni' nutsaga nē'ē usanē' nigula queē' tu' nōzi bítí'tēs bi raca?

⁴ Bubi'ē didza' Jesús, rē' légaquiē':

—¿Naru' cabí nulábanili' le nazúaj lu guichi lá'ayi ca benē' Dios bōnachi cate' si' benē' yōdzōlió? Bōnni', en nigula benē' légaquiē'.

⁵ Caní gunnē' Dios: “Que lē ni na', ral-la' usanē' tu bōnni' xuz xinē'ē, ate' tsaz tsójsóalenē'-nu nigula queē', ate' iropē' na' ulu'huóáquiē' tuz bōnachi.”

⁶ Caní naca, bítí'rō nácagaquiē' chopē' pero tuz bōnachi chinuhuóáquiē'. Que lē ni na', bití' ral-la' ulu'lē'ē bōnni' nupa na' benē' Dios tuz.

⁷ Ní'irō bōnni' yudo' na' gula'nábinē' Jesús, ta'nnē':

—¿Bizx que na' gunná bé'enē' Moisés légaquiē' le ruí'lataj nu bōnni' unōdzjē' tu guichi queēnu nigula queē' le rnna nulá'a yōl-la' nutsaga na', ate' usanē'-nu nigula queē' na'?

⁸ Jesús rē' légaquiē':

—Caní benē' Moisés tu' nazidi icja ládxi'do'oli'. Bennē' libí'ili' lataj usanli'-nu nigula queēli', pero cate' gusí lo guta' gurō'ō yōdzōlió, bití' guca caní.

⁹ Neda' rea' libí'ili', channō tu bōnni' usanē'-nu nigula queē', en bití' gudálennu bōnni' yúbölō, ate' utsaga ná'alenē'-nu nigula yúbölō, gunē' dul-la' le riguitsaj xibá que yōl-la' nutsaga na'. Lēzca' caní, channō nu bōnni' utsaga ná'alenē'-nu nigula na', nusanē'-nu bōnni' queēnu, gunē' dul-la' le riguitsaj xibá que yōl-la' nutsaga na'.

¹⁰ Ní'irō yugu' bōnni' usēda queē' Jesús gulē' Lē', ta'nnē':

—Channō caní naca queē' tu bōnni' zóalenē'-nu nigula queē', gácarō dxi'a queē' la'tu' cabí utsaga caz nē'ē, ugá'anē' tuzē'.

¹¹ Bubi'ē didza' Jesús, rē' légaquiē':

—Bití' gaca ila'zi' lu ná'agaca yúgu'tē bōnachi didza' ni, pero núpasō na' Dios ruzéajni'inē' léguequi.

¹² Nacu'ē bōnni' bití' tu'tsaga ná'alengaquiē' nigula tu' cabí nácagaquiē' idú bōnni' biguiú', tu' gualajē' ca', ate' ia'zica'rē' bōnni' bití' tu'tsaga ná'alengaquiē' nigula tu' bulu'zaga' bōnachi xinózgaquiē', ate' ia'zica'rē' bōnni' bití' tu'tsaga ná'alengaquiē' nigula para gaca ilunē' xichinē' Dios, Nu rinná bē' yehua' yubá. Nu sequi' si' lu nē'e didza' ni ral-la' si' lu nē'e le.

Jesús rulidza tsáhuë'ë-bi' yugu' bí'ido'

(Mr. 10:13-16; Lc. 18:15-17)

¹³ Ní'irō yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa nē'ë lé'gacabi', en ulidzë' Dios ni'a que'gacabi', ate' bönni' usëda queë' bulu'zágui'ë xinó'zgaquië'.

¹⁴ Ní'irō Jesús rë' lé'gaquië', rnnë':

—Guli'gú'i-bi' yugu' bí'ido' lataj ila'dxinbi' ga zoa', en biti' uzá'ga'li' xinó'z'gacabi', tu' ila'z'i' lataj nupa ná'cagaca ca yugu' bí'ido' caní ga ni' rinná bē'ë Dios yehua' yubá.

¹⁵ Jesús guxóa nē'ë lé'gacabi', ate' ní'irō buzë'ë ni'.

Tu bönni' unná bē' cuidi' dë' yöl-la' tsahui' queë'

(Mr. 10:17-31; Lc. 18:18-30)

¹⁶ Tu bönni' ni zoë' iz cuidi' queë' buduyúë' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

¹⁷ Bubi'ë didza' Jesús, rë' lë':

—¿Naru' nōztsenu' lë na' rno' quia', rno' naca' idú tsahui'? Cuntu nu bönni' náquië' idú tsahui'. Tuzë' Dios náquië' idú tsahui'. Channō rë'ënu' gata' yöl-la' na'bán idú quiu', ben ca rinná bē' xibá queë' Dios.

¹⁸ Ní'irō bönni' na' rë' Jesús, rnnë':

—¿Bízxilō xibá na'?

Jesús rë' lë':

—Xibá na' gunná bē'ë Moisés:

Biti' gútiu' bōnachi.

Biti' gunu' dul-la' le riguitsaj xibá que yöl-la' nutsaga na'.

Biti' cuanu'.

Biti' innió' que böchi' luzó'o le cabí nácate.

¹⁹ Ben bal xuz xinó'o.

Bidxí'i böchi' luzó'o ca nadxí'i cuinu'.

²⁰ Bönni' na' ni zoë' iz cuidi' queë' gudxë' Jesús, rnnë':

—Yúgu'të lë ni runa' ga gudela' naca' bí'ido'. ¿Naru' zoa ia'tú le ral-la' guna'?

²¹ Jesús rë' lë':

—Channō rë'ënu' gacu' tsahui', guyéaj, yōjēti' le dë quiu', ate' dumí na' si'u, bunōdzaj que'gaca bōnachi yechi'. Caní gata' yöl-la' tsahui' quiu' ni' yehua' yubá. Ní'irō gudá, gudá' neda'.

²² Cate' bönni' na' ni zoë' iz cuidi' queë' biyōnnë' didza' ni, söhuōjē' ruhu'innë' tu' dëda' yöl-la' tsahui' queë'.

²³ Ní'irō Jesús gudxë' yugu' bönni' usëda queë', rnnë':

—Le nácatë rea' libí'ili', bōniga naca tsázië' nu bönni' dë yöl-la' tsahui' queë' ga rinná bē'ë Dios yehua' yubá.

²⁴ Ia'stú rea' libí'ili', nácarō bōniga tsázië' tu bönni' dë yöl-la' tsahui' queë' ga ni' rinná bē'ë Dios ca tōdiba' bōa' lu nagui yōtsi'.

²⁵ Cate' bila'yōnnë' yugu' bönni' usëda queë' didza' ni, bulu'bánninë, ta'nnë':

—¿Nuzxi caz gaca ulá, channō?

²⁶ Jesús buyúë' lé'gaquië', en rë' lé'gaquië':

—Biti' gaca ilún bōnachi lë ni, pero Dios huáca gunë' yúgu'të.

²⁷ Ní'irō bubí'ë didza' Pedro, en rë' Jesús:

—Buyútsōca', netu' chibucá'anatu' yúgu'të, en zá'lentu' Li'. ¿Bízxi' gata' queë'tu'?

28 Jesús rē' légaquiē':

—Le nácatē rea' libí'ili, dza ni' cate' ucubi yōdzōlió, ate' cō'a inná bē'a neda', Bōnni' Guljē' Bōnachi, ga ni' gácatēra' lo, lēasca' libí'ili' zá'lenli' neda' na'a, cō'ōli' chinnu lataj ga inná bē'ēli', en uchi'a usōrōli' quégaca idxinnu cō'tē yōdzō quégaca zxi'ini xi'sóé' Israel.

29 Nu bōnni' rucá'anē' lidxē', o yugu' bōchē'ē, o yugu' zanē', o xuzē', o xinē'ē, o nigula queē', o yugu' zxi'inē', o yugu' xiyúē', para gunē' xichina', bōnni' ni si'ē ia'tú gáyua'tērō ca' queē', en gata' ca' yōl-la' na'bán idú queē'.

30 Zián nupa náca'gaca lo na'a, ulu'gá'ana cá'asō, ate' nupa nagá'anagaca cá'asō na'a, hualá'cagaca lo.

20

Rucúdzu'ē didza' Jesús ca tunē' bōnni' huen dxin

1 Gunnē' ca' Jesús:

—Ca gun Bōnni' na' rinná bē'ē yehua' yubá naca ca benē' tu bōnni' xan yu'u. Bírúajē' zílado', yōjdiljē' yugu' bōnni' ilunē' dxin ga naca lu xiyúē' ga na' nadúz'gaca lúbá uva.

2 Cate' chibugá'analenē' tsahui' yugu' bōnni' huen dxin na', quizzjē' légaquiē' tu dumí lazxaj que tu dza, gusól-lē'ē légaquiē' ilunē' dxin ga naca lu xiyúē'.

3 Cate' burúajē' idú xsila, bilé'enē' ia'zica'rē' bōnni' nacua'asē' ca' ga naca lu yē'ēyi.

4 Rē' légaquiē': "Guli'tséaj ca' libí'ili' ga naca lu xiyú'a, ate' quizzja' libí'ili' le naca tsahui'." La' yōjácate' ca' légaquiē'.

5 Burúajē' bōnni' xan yu'u na' leyúbōlō idú huagubidza, enca' idú xihuó udzō', en la' tuz ca benē', gusól-lē'ē yugu' bōnni' yōjxáquiē' lu xiyúē'.

6 Burúajē' ca' cate' ni' zoa ia'látí'do'os gubidza, en yōjxáquiē' ia'zica'rē' bōnni' nacua'asē' ca' ni', ate' rē' légaquiē': "¿Bizx que zóatsali' ni cá'asō idú dza, biti' bi dxin runli'?"

7 Yugu' bōnni' na' tē' lē', ta'nnē': "Cuntu nu benna xichintu'." Ní'irō rē' légaquiē': "Guli'tséaj ca' libí'ili' ga naca lu xiyú'a, ate' quizzja' libí'ili' le naca tsahui'."

8 Cate' chizóa gal-la, bōnni' xan yu na' rē' bōnni' yu'u lu nē'ē yugu' huen dxin na', rnnē': "Bulidza yugu' bōnni' huen dxin na', ate' gu'u láxjagaquiē'. Quizzju' zí'aló yugu' bōnni' na' bila'dxinē' yōjsetē. Udxí na' quizzju' yugu' bōnni' na' bila'dxinē' zí'atēlō."

9 Ní'irō bila'dxinē' bōnni' yōjéngaquiē' dxin cate' ni' zoa ia'látí'do'os gubidza, en gula'zi'ē tu tuhuéajē' dumí lazxaj que tu dza.

10 Cate' bila'dxinē' bōnni' yōjéngaquiē' dxin zí'atēlō, guléquinē' huazí'gaquiē' ia'látí, pero lēasca' gula'zi'ē tu tuhuéajē' dumí lazxaj que tu dza.

11 Cate' gula'zi'ē le, gula'nnédē'ē queē' bōnni' xan yu'u na',

12 ta'nnē': "Yugu' bōnni' ni bila'dxinē' ga yōjsetē, tu chí'isō gulunē' dxin, en tuz ca gudíxjatso' légaquiē' ca netu', ate' netu' ni bentu' dxin idú dza, en gúgu'atu' gubidza."

13 Bubi'ē didza' xan yu na', en rē' tuē': "Bōcha'a, biti' bi runa' quiu' le cabí naca tsahui'. ¿Naru' cabí bugá'ana tsáhu'ru' si'u tu dumí lazxaj que tu dza?"

14 Guzxí' lazxju', en bōaj lidxu'. Neda' rē'ēnda' quizzja' bōnni' ni yōjenē' dxin ga yōjsetē la' leze ca na' riguíxja' li'.

15 ¿Naru' cabí dē lu na'a guna' ca rē'ēnda' len le nequi quia'? ¿Naru' ruzxé'etsenu'-nē' luzó'o tu' rúnada'a queē'?"

16 Caní naca, bal-lē' bōnni', tu'cá'ana bōnachi légaquiē' cá'asō, ilácagaquiē' lo, ate' ia'zica'rē' bōnni', nácagaquiē' lo na'a, ulu'gá'anē' cá'asō. Zían nupa nulidza', pero nabábasō nupa narōgaca.

Rigu'xjö'ē Jesús leyúbölō ca si' ilútiē' Lē'

(Mr. 10:32-34; Lc. 18:31-34)

17 Cate' nī' yu'ē Jesús nōza, sa'yéajē' Jerusalén, guchē'ē quez idxínmutē' bōnni' usēda queē', en rē' légaquiē':

18 —Buli'yútsōca', ribenru' zéajru' Jerusalén, ate' nī' soa nu udōdi neda', Bōnni' Guljē' Bōnachi, lu ná'agaquiē' bixúz unná bē', en lu ná'agaquiē' bōnni' yudo' usēdi, ate' ila'chúguiē' quia' gátia'.

19 Ulu'dōdē' neda' lu ná'agaquiē' bōnni' zi'tu' para ulu'titjē' neda'. Ila'guinē' neda', en ulu'dē'ē neda' lē'e yaga cruz, pero cate' gaca tsonna dza, Dios usubanē' neda' lu yōl-la' guti.

Le gunábanu xiná'agaquiē' Jacobo, en Juan

(Mr. 10:35-45)

20 Nī'irō bidxinnu xiná'agaquiē' Jacobo, en Juan, yugu' zxi'inē' Zebedeo, ga zoē' Jesús, dzágagaquiē'-nu chopē' ni, ate' buzóa zxibinu lahuē' Jesús, en gunábinu Lē' tu le uzá' ládxē'ē queēnu.

21 Jesús gunábinē'-nu, rnnē':

—¿Bizxi rē'ēnu'?

Rēnu Lē':

—Gunná bē' cō'ōbi' tubi' zxi'ina' ni cuita lē'u ibēla, en ia'tubi' cō'ōbi' cuita lē'u yōgōla ga nī' inná bē'u.

22 Bubi'ē didza' Jesús, rē' légaquiē':

—Biti' nōzili' le rinábali'. ¿Naru' huáca guá' ilenli' le qui' saca' neda', en idílali' nisa ca idila' neda' nisa, gátia'?

Tē' Lē':

—Huácatu'.

23 Nī'irō Jesús rē' légaquiē':

—Le nácate' le ral-la' qui' saca'a neda', gaca ca' queēli', en le ral-la' idila' neda' nisa, gátia', idílali' ca' nisa libí'ili', pero que cō'ōli' cuita lē'a ibēla o cuita lē'a yōgōla, biti' dē lu na'a nu gu'a que, pero gata' quégaca nupa nī' chinupē'ē Xuza' quéguéqui.

24 Cate' ia'chiē' bōnni' usēda queē' Jesús bila'yōnnē' lē ni, gula'lenē'.

25 Nī'irō Jesús bulidzē' légaquiē', rnnē':

—Nōzquezili' ca tunē' yugu' bōnni' ta'nná bé'enē' bōnachi izá'a, ridōditē bē' ta'nná bé'enē' légaquiē', ate' nupa nī' nácagacarō lo ta'nná bé'e la' luzē'eguequisō.

26 Biti' gaca caní queēli'. Núti'tēsłōli' libí'ili' nu rē'ēni gaca zxōn ga zóali', nu nī' ral-la' gun dxin que ia'zica'rōli'.

27 Lē'sca' caní, núti'tēsłōli' libí'ili' nu guē'ēni gaca lo, ral-la' gaca ca tu bōnni' nadó'o que ia'zica'rōli'.

28 Lē'sca' neda', Bōnni' Guljē' Bōnachi, bida' nī, calēga para nu gun xichina', pero para guna' xichingaca bōnachi, en udōda' yōl-la' na'bán quia', le quízxjada' nī'a quégaca bōnachi zían para ulu'lágaca.

Ruínē' Jesús chopē' bōnni' nachul-la lógaquiē'

(Mr. 10:46-52; Lc. 18:35-43)

²⁹ Cate' ni' tu'ruájë' yödzö Jericó, bönachi zián sôjácálen Jesús.

³⁰ Nacu'ë chopë' bönni' nachul-la lógaquië' ni', ró'gaquië' ra' nôza. Cate' bila'yönnë' ridödë' Jesús ni', gulu'ë zidzaj didza', ta'nnë':

—Xan, xzí'ini xí'sóë' David, buéchi' ladxi' netu'.

³¹ Bönachi zián nacuá' ni' gulë légaquië' ila'cu'ë dxisö, pero zídzejrö gulu'ë didza', ta'nnë':

—Xan, xzí'ini xí'sóë' David, buéchi' ladxi' netu'.

³² Ní'irö guzë' ribözë' Jesús, en bulidzë' légaquië', ate' gunábinë' légaquië', rnnë':

—¿Bizxi ré'ënili' guna' queëli'?

³³ Të' Jesús:

—Xan, ré'ënitú' gunu' ga huóálaj guió'j lotu'.

³⁴ Ní'irö Jesús buéchi' ládxë'ë légaquië', ate' gudanë' guió'j lógaquië'. La' böálatëgaca guió'j lógaquië', ate' yöjácálenë' Jesús.

21

*Ridxinë' Jesús yödzö Jerusalén len yöl-la' ba xzön
(Mr. 11:1-11; Lc. 19:28-40; Jn. 12:12-19)*

¹ Cate' bila'dxíngalë' yödzö Jerusalén, en ni' nacu'ë ga dë yödzö Betfagé ga na' zoa Guí'a Yaga Olivo, ní'irö gusöl-lë'ë Jesús chopë' bönni' usëda queë',

² ate' ré' légaquië':

—Guli'tséajtsöca' yödzödo' ni' ca dödilö ga ni zóaru', ate' la' tsöjxáca'tëli'-ba' tuba' burro guná' nága'ba', ate' dzaga léba' tuba' burro biguiú'do'. Guli'tsöjsexdi-ba', en ichë'ëli'-ba' quia' ni.

³ Channö nu bi guíë libí'ili', guli'guíë nu na': "Xanru' riquinnë'-ba'." Ní'irö isöl-lë'ë légacaba' quia'.

⁴ Caní guca para gaca lë na' buzúajë' lu guichi bönni' bë'ë didza' uláz queë' Dios, gunné':

⁵ Guli'guíë nupa nacuá' yödzö Sión,

Buli'yútsöca', zë'ë Bönni' inná bé'enë' libí'ili'.

Lu yöl-la' nöxaj ladxi' queë' dxíë'-ba' tuba' burro.

Dxié' cúdzu'ba' búrrodo' nácaba' xzí'iniba' böa' ruá'aba' yua'.

⁶ Ní'irö bönni' usëda queë' yöjáquië' ni', ate' gulunë' ca na' gunná bé'enë' Jesús légaquië'.

⁷ Gula'chë'ë-ba' burro guná' na', en burro biguiú'do' na', ate' bulu'dxié' cúdzu'gacaba' yugu' lari' guitsa' quégaquië', ate' gudxié' Jesús lahui' lari' na'.

⁸ Nacuá' ca' bönachi zián ni', ate' gula'chilaj yugu' lari' ta'xóca cúdzu'guequi la' nôza. Ia'zica'rë' bulu'chibë' zin le bulu'xzóë' ga naca la' nôza.

⁹ Guluf'i zidzaj didza' bönachi na' nanörugaca, en nupa na' sôjácálen Jesús, ta'nná:

—¡Yöl-la' ba Lë', xzí'ini xí'sóë' David! ¡Bica' ba nu yi za' ni'a que Lë' Xanru'! ¡Yöl-la' ba Dios!

¹⁰ Cate' guyázië' Jesús yödzö Jerusalén, bulu'dzatsa yúgu'të bönachi lu yödzö na', ate' zián nupa gulë luzë'eguequi, ta'nná:

—¿Nuzxi caz bönni' ní'?

¹¹ Ia'bal-la bönachi ní' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

*Jesús rulatjē' lō'a yudo'**(Mr. 11:15-19; Lc. 19:45-48; Jn. 2:13-22)*

12 Cate' guyáziē' Jesús lō'a yudo' queē' Dios, bulágui'ē ni' ilō yúgu'tē nupa tuti' to'o ga naca lō'a yudo' na'. Burixē' ca' yugu' blaga quégaquiē' bōnni' tu'tsē'ē dumí yōdzō zi'tu', en yugu' le ta'bō'i nupa tuti' gu'dōdo'.

13 Rē' légaquiē':

—Nazúaj lu guichi lá'ayi le rnna: “Lidxa' si'i le, yu'u ga nu ulidza Dios”, pero libí'ili' chinunli' lataj ni ca naca yu'u lídxigaca gubán.

14 Cate' ni' zoē' Jesús chila yudo', bal-lē' bōnni' nachul-la lógaquiē', en bōnni' biti' raca ila zē'ē bila'dxinē' ga na' zoē', ate' Lē' bunē' légaquiē'.

15 Gula'lenē' yugu' bixúz unná bē', en bōnni' yudo' tu'sédinē' cate' bila'lé'enē' yugu' yōl-la' huáca ni runē' Jesús, en bila'yōnnē' tu'íbi' bí'ido' zídza' didza' ga naca chila yudo', ta'nnabi':

—¡Bica' ba Lē', zxf'ini xi'sóē' David!

16 Ní'irō tē' Jesús:

—¿Naru' cabí riyōnnu' ca ta'nnabi' bi'i ni?

Bubi'ē didza' Jesús, rnnē':

—Ōn, riyōnda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: “Li' benu' ga yugu' bi'i cuidi', en yugu' bí'ido' ni' tádx'i'bí' gulúl-labi' yōl-la' ba le naca idú.”

17 Ní'irō Jesús bucá'anē' légaquiē', ate' burúajē' Jerusalén. Guyijē' yōdzō Betania ga ni' bugá'anē' idú yēla.

*Jesús ruidza zi'ē yaga higo**(Mr. 11:12-14, 20-26)*

18 Cate' za' rení', ate' ni' sōhuōjē' Jesús Jerusalén, ridunē'.

19 Bilé'enē' tu yaga higo rō' gal-la' cuite nōza, ate' gubígui'ē ga na' rō', pero biti' bi bidzōlinē' lu yaga na'. Xilágui'sō dxía. Ní'irō Jesús gudxē' le:

—Bíti'rō cuía le ribía quiu'.

La' gubídxitē yaga higo na'.

20 Cate' bila'lé'enē' bōnni' usēda queē' lē ni, bulu'bánninē', ate' gula'nábinē' Jesús, ta'nnē':

—¿Nacxi caz guca, gubídxitē yaga ni?

21 Bubi'ē didza' Jesús, rē' légaquiē':

—Le nácatē rea' libí'ili', channō tséajlē'ēli' Dios, en biti' gaca chopa lādxi'li', calégasō huáca gunli' ca na' bena' que yaga ni, pero channō guiēli' gu'a ni: Gucuía, en yōjsōa lu nísado', gaca ca na' innali'.

22 Lē'sca' caní, yúgu'tē le inábali' cate' ulídzali'-nē' Dios, channō huayéjlē'ēli' gunnē' Dios queēli', huazí'ili' lē na' inábali'.

*Yōl-la' unná bē' dē lu nē'ē Jesús**(Mr. 11:27-33; Lc. 20:1-8)*

23 Ní'irō guyáziē' Jesús chila yudo', ate' tsanni ni' rusédinē' bōnachi nacuá' ni', bila'dxinē' yugu' bixúz unná bē' len bōnni' gula tu'z'éajni'inē' ga zoē', ate' gula'nábinē' Jesús, ta'nnē':

—¿Bixxi yōl-la' unná bē' dē lu no'o, runtso' yugu' lē ni? ¿Nuzxi budōdi lu no'o yōl-la' unná bē' ni?

24 Bubi'ē didza' Jesús, rē' légaquiē':

—Lē'sca' neda' inábatsōqui'da' libí'ili' tu didza'. Channō quíxjōi'ili' neda' ca naca, neda' ca' guía' libí'ili' bixxi yōl-la' unná bē' dē lu na'a runa' caní.

²⁵ ¿Nuzxi caz gusöl-la' Juan para buquile' bönachi nisa? ¿Naru' Dios gusöl-lë'ë lë', o gula'söl-lë'ë yugu' bönni' lë'?

Ní'irö gula'sí lógaquie' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guiëtë' rë'u: “¿Bizx que biti' guyéajlë'ëli' lë'?”

²⁶ Na'a, channö innaru': Gula'söl-lë'ë yugu' bönni' lë', rádxiru' le ilún bönachi lu yödzo tu' ta'yéajlë'ë yúgu'të' Juan na' bë'ë didza' uláz queë' Dios.

²⁷ Que lë ni na' bulu'bi'ë didza', të' Jesús:

—Biti' nōztu'.

Jesús rë' légaquie':

—Neda' ca', biti' guia' libí'ili' bizxi yöl-la' unná bë' dë lu na'a runa' lë ni.

Rucúdu'ë didza' Jesús ca gulunbi' chópabi' xzí'inë' tu bönni'

²⁸ Ní'irö Jesús gudxë' yugu' bönni' yudo' na':

—¿Nacxi rusáca'li' queëli'? Guzöë' tu bönni' nacua'abi' chópabi' bi'i bönni' queë', ate' yöjōdxë'-bi' tubi' bi'i queë' na', gunnë': “Zxí'ina', guyéaj na'a tsōjenu' dxin ga naca luyú quia' ga ró'gaca lubá uva.”

²⁹ Bubí'ibi' didza' bi'i na', gúdxibi'-në': “Biti' rë'ënda' tseja'.” Gudödi ni' bubí'i lādxi'bi', ate' yōjenbi' dxin.

³⁰ Ní'irö bönni' na' yöjōdxë'-bi' ia'tubi' bi'i queë' na', en la' tuz ca gunnë', ate' bubí'ibi' didza' bi'i ni, gúdxibi'-në': “Huaca, Dad. Uyéaja'.” Biti' guyéajbi' bi'i ni.

³¹ ¿Núzxilōbi' bi'i chopa ni benbi' le guyaza lādxe'ë xúzibi'?

Bulu'bi'ë didza', të' Jesús:

—Bi'i zí'aló na'.

Ní'irö Jesús rë' légaquie':

—Le nácatë rea' libí'ili', ila'nōruë' bönni' uquízxaj tuá' dö', en yugu' nigula udá dzaga ca libí'ili', ate' ila'yázië' ga ni' rinná bë'ë Dios.

³² Caní gaca, tu' bidë' Juan, bönni' buquile' bönachi nisa, ga zóali', en busédinë' libí'ili' le naca tsahui' ca ral-la' gunli', ate' libí'ili' biti' guyéajlë'ëli' lë', pero yugu' bönni' uquízxaj, en yugu' nigula udá dzaga gula'yéajlë'ë lë'. Sal-la' bilé'eli' lë ni, biti' bubí'i lādxi'li' para tséajlë'ëli' lë'.

Rucúdu'ë didza' Jesús ca béngaquie' bönni' huen dxin biti' nácaquie' tsahui' (Mr. 12:1-12; Lc. 20:9-19)

³³ Gunnë' ca' Jesús:

—Buli'zé nágali' ia'tú le ucúdu'a didza'. Guzöë' tu bönni' xan yu'u, ate' bönni' ni budë'ë yugu' lubá uva luyú queë'. Guléquie' lë'aj que, en guchō'ōnë' tu lueri guiōj ga isíë' xisi uva na'. Benë' ca' tu yu'u xitsá' ga gaca nu uyú idútë luyú queë'. Ní'irö budōdë' luyú na' lu ná'agaquie' bönni' huen dxin, para ila'zi'ë' quégaquie' gatsaj huéaj, ate' sa'yéajë' yōdzō zí'tu'.

³⁴ 'Cate' chibidxín dza ulu'chibë' yugu' lubá uva na', gusöl-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquie' uláz queë'.

³⁵ Ní'irö gula'zōnë' bönni' huen dxin na' yugu' ni'a në'ë na'. Gulunë' huë' tuë', en ia'tuë' bë'tigaquie' lë', en ia'tuë' bulu'lādxe' lë' guiōj.

³⁶ Leyúbōlō bönni' xan luyú na' gusöl-lë'ë ca' ia'zica'rë' ni'a në'ë, ate' guláquie' ziantërë' ca nupa na' gusöl-lë'ë zí'aló, ate' la' tuz ca gulunë' bönni' huen dxin ni' quégaquie'.

³⁷ 'Ga yōjsete, gusöl-lë'ë ca' xzí'inë' ga na' nacu'ë. Guzá' lādxe'ë, rnnë': Hualunë' bal bi'i quia'.

³⁸ Cate' yugu' bönni' huen dxin na' bila'lé'ené'-bi' zxf'iné', la' gula'nnaté' la' légacasé': "Bi'i ni guequi queébi' luyú ni. Guli'dá, gútiru'-bi', ate' le ral-la' guequi queébi' guequi queéru'."

³⁹ Ní'irö gula'zöné'-bi', ate' bulu'béajé'-bi' ní'ilö luyú ga na' rō'gaca lubá uva, ate' bétigaquié'-bi' ni'.

⁴⁰ Ní'irö Jesús gunábiné' légaquié', gunné':

—Cate' udxiné' bönni' xan luyú na', ¿nacxi guné' quégaquié' bönni' huen dxin ni'?

⁴¹ Bulu'bi'ë didza' bönni' yudo' na', tē' Jesús:

—Usunítié' bönni' tuá' dō' na', ate' luyú queé' na' udödē' lu ná'agaquié' ia'zica'rē' bönni' huen dxin, bönni' ilu'ë lē' uláz queé' cate' idxín dza ulu'chibē' le.

⁴² Ní'irö Jesús gudxē' légaquié':

—¿Naru' catu caz nulábanili' lē' na' nazúaj lu guichi lá'ayi ca naca lē' ni? Caní rna:

Guiōj na' gula'rú'unē' bönni' tu'cu'ë zō'ō,

la' guiōj ná'asō chinaca guiōj len zō'ō.

Lē' cazē' Xanru' benē' ga naca caní,

ate' naca tu le run ga rubániru'.

⁴³ 'Que lē' ni na' rea' libí'ili', xilátjali' ga na' rinná bē'ë Dios idúa queéli', en gata' quégaca bōnachi ilún ca ral-la' gun nu nadeli' lataj ni'.

⁴⁴ Nu tsōjchegu' lu guiōj ni, la' cuinsi quitsaj, ate' channō guiōj ni tseajbaga' bönni' na', uzxuzxaj lē'.

⁴⁵ Cate' yugu' bixúz unná bē', en yugu' bönni' yudo' fariseo bila'yōnnē' lē' na' bucúdzu'ë didza' Jesús, téquibe'enē' bē'ë Jesús didza' ca naca quégaquié'.

⁴⁶ Gula'zóa gula'bō'ë ila'zönē' Jesús, pero guládxiné' bi ilún bōnachi zían nacué' ni' tu' ta'yéajlē' náquié' Jesús bönni' ru'ë didza' uláz queé' Dios.

22

Rucúdzu'ë didza' Jesús ca naca que laní que yöl-la' rutsaga na'

¹ Jesús bé'lenē' légaquié' didza' leyúbölö, ate' bucúdzu'ë didza', rnnē':

² —Ca gaca quégaca nupa ila'yaza ga rinná bē'ë Dios yehua' yubá naca ca guca quégaca nupa bulidzē' tu bönni' rinná bē'ë cate' benē' laní que dza utsaga ná'abi' bi'i bönni' queé'.

³ Gusól-lē'ë ni'a nē'ë tsōjxí'gaquié' yugu' bönni' chinulidzē' para guídagaquié' laní queébi', pero bití' gulē'ënē' guídagaquié'.

⁴ Ní'irö gusól-lē'ë ia'zica'rē' ni'a nē'ë, en gudxē' légaquié': "Guli'tsōjōdxitsōca' nupa na' chinulidza', na' guiéli' légaquié': Buli'yútsōca', chinupá'a la' huagu. Chibétia'-ba' yugu' xpédxa', en yugu' bōa' bēdxi renni' quia'. Yúgu'tē chinupá'a. Guli'dá, sóaru' laní queébi' bi'i bönni' quia' utsaga ná'abi'."

⁵ Yugu' bönni' na' yōjlídzagaquié' bití' gulunē' légaquié' bal, ate' yōjáquié' que quégaquié'. Tuē' yōjenē' dxin, en ia'tuē' guyijē' tsōjō' u tsōjéti'ë.

⁶ Ia'zica'rē' gula'zönē' yugu' ni'a nē'ë na', ate' gulu'ë dō' quégaquié', en bétigaquié' légaquié'.

⁷ Cate' bönni' na' rinná bē'ë biyōnnē' lē' ni, gulénē', en gusól-lē'ë yugu' bönni' queé' rōjáquié' gudil-la, ate' bétigaquié' yugu' bönni' hueti bōnachi na', en bulu'quélē'ë guí ládzaquié'.

8 Ní'irō bōnni' na' rinná bē'ē gudxē' yugu' ni'a nē'ē, gunnē': "Le nácatē chinupá'a que laní na', pero yugu' bōnni' bulidza' bití guláquiē' lesaca' guidagaquiē' laní quia'.

9 Guli'tsəajtsöca' gapa naca la' nōza, en buli'lidza yúgu'tē nupa tsöjxáca'li' ni' para guidagaca laní queēbi' bi'i bōnni' quia' utsaga ná'abi'."

10 Ní'irō bila'rúajē' ni'a nē'ē na', sōjáquiē' gapa naca la' nōza, ate' bulu'tubē' yúgu'tē nupa yöjxáca'gaquiē', yugu' bōnni' dxi'a, en yugu' bōnni' tuá' dō', ate' ga na' raca laní bilíró bōnachi.

11 'Cate' guyáziē' bōnni' na' rinná bē'ē para uyúē' nupa ni' nudúbigaca, bilé'enē' tu bōnni' bití' nácuē' lari' tsahui' le bunödzejē' queégaquiē' bōnni' nacué' laní na'.

12 Ní'irō gudxē' bōnni' na': "Bōnni'do', ¿zóatso' ni, en bití' nacu' lari' tsahui' bunödzejá' quegaca nupa nacué' laní?" Bōnni' na' busayaj ru'ē.

13 Ní'irō bōnni' na' rinná bē'ē gudxē' nupa na' tun xichiné', gunnē': "Guli'guga' ni'a nē'ē bōnni' ni. Guli'tsójchú'un-nē' ní'ilo ga na' rō'ō chul-la. Ní' cōdxē', en util-la láyē'ē, lu yöl-la' ruhu'ini queē'."

14 Ní'irō Jesús gudxē' légaquiē':

—Zian nupa nulidza', pero nabábasō nupa ila'rōgaca.

Jesús ru'ē didza' ca naca le riguízxaj lázaru'

(Mr. 12:13-17; Lc. 20:20-26)

15 Ní'irō yugu' bōnni' yudo' fariseo na' bulu'zē'ē ni', ate' gulún xtídza'gaquiē' ilunē' ga bi innē' Jesús para gaca ulu'zéguiē' Lē' didza'.

16 Para ilunē' caní, gula'sól-lē'ē bal-lē' bōnni' dá'gaquiē' légaquiē', len bōnni' dá'gaquiē' Herodes, ga zoē' Jesús, nupa na' gulē' Jesús:

—Bōnni' Usedi, nōztu' Li' ru'u didza' cātēze naca, en naca idútē li ca rusédinu' ca naca queē' Dios, en bití' ru'í' lādxi'u le ta'nná quiu' bōnachi, tu' cabí ruchi'a rusórou' bōnachi ca naca le ta'nnasō bōnachi na'.

17 Gudíxjoi' netu'. ¿Nacxi runi li'? ¿Naru' run bayudxi, o bití' run bayudxi quízxaj laztu' queē' César, bōnni' yōdzō zì'tu' na' rinná bé'enē' rē'u?

18 Réquibe'enē' Jesús té'ennē' ulu'béajē' Lē' didza', ate' gudxē' légaquiē':

—Libi'ili', bōnni' rulu'isō tsahui' cuinli', ¿bizx que ru'ili' didza' le ruzóa neda' ra' guí'a?

19 Buli'lu'í' neda' dumí le riguízxaj lázali'.

Ní'irō bulu'lu'ínē' Lē' tu dumí que yōdzō Roma.

20 Jesús gunábinē' légaquiē', rnnē':

—¿Nuzxi lahui da' ni, en nuzxi le nazúaj lē'e dumí ni?

21 Tē' Lē':

—Queē' César na'.

Ní'irō Jesús gudxē' légaquiē':

—Guli'guízxiē' César le nequi queē' César, ate' Dios le nequi queē' Dios.

22 Cate' bila'yōnnē' lē' ni, bulu'bábinē' ca naca didza' tsahui' bubí'ē Jesús, ate' bulu'cá'anē' Lē', sōhuóajtégaquiē'.

Ta'nabi yúdxiné' Jesús ca ulu'bán nupa chinátigaca

(Mr. 12:18-27; Lc. 20:27-40)

23 La' dza ná'asō yugu' bōnni' yudo' saduceo, bōnni' na' ta'nnē' bití' ulu'bán nupa chinátigaca, bila'dxinē' ga zoē' Jesús, ate' gula'nábinē' Lē',

24 ta'nnē':

—Bōnni' Usedi, Moisés gunnē': "Channō gátie' tu bōnni' zóanu nigula queē', en cuntu nu bi'i zóabi' queē', ní'irō bi'i bōché'ē bōnni' na' ral-la' utsaga

ná'alenbi'-nu nigula uzëbi queë', para cabí initi di'a dza queë' bönni' böchi'bi' na'."

²⁵ Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'alö na' butsaga ná'alenbi'-nu nigula, ate' gútitébi'. Tu' cuntu nu bi'i queëbi' zóabi', bi'i buropi na' butsaga ná'alenbi'-nu nigula uzëbi queëbi' bi'i böchi'bi' na'.

²⁶ Lësca' caní guca queëbi' bi'i buropi na', enca' queëbi' bi'i bunní, en la' tuz ca guca quégacabi' igádxitébi', gulátibi' yúgu'tëbi'.

²⁷ Ga búdxité gútinu ca' nigula na'.

²⁸ Cate' idxín dza ulu'bán nupa chinátigaca, ¿núzxilögacabi' bi'i gadxi ni' guéquinu nigula na' queëbi', tu' bulu'tsaga ná'alenbi'-nu yúgu'tëbi' nigula na'?

²⁹ Ní'irö bubí'ë didza' Jesús, ate' rë' légaquië':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbë'ëli' yöl-la' huáca queë' Dios.

³⁰ Cate' idxín dza ulu'bán nupa chinátigaca, bití'rö gaca yöl-la' rizóalen nigula, en bití' ulu'tsaga ná'agaquië', pero gácagaquië' ca nácagaquië' gubáz lá'ayi queë' Dios nacu'ë yehua' yubá.

³¹ Ca na' ral-la' ulu'bán nupa chinátigaca, ¿naru' cabí nulábanili' lë na' gudxi cazë' Dios libí'ili'?

³² Caní gunnë': "Neda' naca' Dios queë' Abraham, en Dios queë' Isaac, en Dios queë' Jacob." Dios na' bití' náquië' Dios quégaca nupa nátigaca tsaz, pero náquië' Dios quégaquië' bönni' ni nabángaquië' sal-la' gulatië'.

³³ Cate' bila'yöni bönachi nacuá' ni' didza' ni, bulu'bani ca naca lë na' rusédinë' Jesús léguequi.

Xibá queë' Dios le naca lo

(Mr. 12:28-34)

³⁴ Cate' guléquibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'të'.

³⁵ Tuë' bönni' nütse'ë ládjagaquië', en nazëdë' xibá queë' Moisés, gú'unnë' si' bë'ë Jesús.

³⁶ Que lë ni na' gunábinë' Jesús, rnnë':

—Bönni' Usedi, ¿bízxilö xibá queë' Dios naca lo?

³⁷ Jesús rë' lë':

—Idxi'inu' Xanu' Dios idú ládxi'u, en idú icja ládxi'do'o, enca' len idú yöl-la' réajni'i quiu'.

³⁸ Xibá ni naca lo, en nazáca'tërö.

³⁹ Xibá na' naca buropi, la' ca nácatë, en caní rna: "Idxi'inu' böchi' luzó'o ca nadxí'i cuinu'."

⁴⁰ Chopa xibá ni nácagaca ga röjlöz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

¿Nuzxi xí'ini náquië' Cristo?

(Mr. 12:35-37; Lc. 20:41-44)

⁴¹ Tsanni ni' nacu'ë tsözxön bönni' yudo' fariseo na', Jesús gunábinë' légaquië',

⁴² rnnë':

—¿Nacxi rusáca'li' queëli' queë' Bönni' na' lë' Cristo? ¿Nuzxi xí'ini náquië'?

Bulu'bi'ë didza', ta'nnë':

—Zxi'ini xi'sóë' David náquië'.

⁴³ Ní'irö Jesús rë' légaquië':

—¿Bixz que na' lë cazë' David bulidzë' Lë', gunnë': "Xana"? Caní gunnë' cate' ni' bë'ë didza' uláz queë' Dios Bó' Lá'ayi, gunnë':

⁴⁴ Xanru' Dios gudxë' Xana':

"Gur'ö ö cuita lë'a ibëla,

cate' gunra' ga ulu'zechu zxíbigaca Lo' nupa tequi Li' zi'."

⁴⁵ Channö David na' gunnë' queë' náquië' Xanë', ¿nacxi caz naca, rnnali' náquië' xxi'ini xi'sóë' David na'?

⁴⁶ Cuntu nu guca ubi'i didza', ate' ga gusi lo dza na', cúnturö nu burugui bi inábini Lë'.

23

Jesús ruzéqui'ë yugu' bönni' yudo' didza'

(Mr. 12:38-40; Lc. 11:37-54; 20:45-47)

¹ Ní'irö Jesús bë'lenë' bönachi nacua' ni' len yugu' bönni' usëdi queë' didza'.

² Rë' légaquië':

—Yugu' bönni' yudo' fariseo, en yugu' bönni' yudo' usedi nuhuöázagaquië' xilatjë' Moisés, en tu'sédinë' bönachi.

³ Que lë ni na', guli'gún yúgu'të le ilë' libí'ili', pero biti' gunli' libí'ili' ca na' tunë' légaquië', tu' tu le ta'nnë', en ia'tú le tunë'.

⁴ Le ta'nná bé'enë' bönachi naca ca tu yua' zi'i le cabí sequi' nu guá', ate' tu'gu'ë le ya'zxícjagaca bönachi, pero légaquië' biti' té'ënnë' ulu'tenë' le, calëga len tuze xibón ná'agaquië'.

⁵ Yúgu'të le tunë', tunë' para ila'lé'e bönachi légaquië', tu' tunë' zxön le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi lari' nácugaquië'.

⁶ Té'ënnë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sëdë' queë' Dios.

⁷ Lëasca' caní, té'ënnë' ulu'gapa bönachi légaquië' didza' ba zxön gapa naca lógaca bönachi, en té'ënnë' ilë' bönachi légaquië': "Padiux, bönni' usëdi."

⁸ Pero libí'ili', biti' ral-la' gunli' ga nu guië' libí'ili': Bönni' Usëdi, tu' zoa tuz Nu naca Bönni' Usëdi queë'li', neda', Cristo, ate' yúgu'tëli' nácali' böchi'li' tuli' ia'tuli'.

⁹ Cuntu nu guië'li' luyú ni, biti' innali': Xuz, tu' zoa tuz Nu naca Xúzili', zoë' yehua' yubá.

¹⁰ Biti' gunli' ga nu guië' libí'ili': Xan, tu' zoa tuz Nu naca Xanli', neda', Cristo.

¹¹ Nu nutsa' ladjali' nu run xichinli' ia'zica'röli', nu ni na' gácarö lo ga zóali'.

¹² Channö nu uzóa cuini lataj lo, cá'asö ugá'ana nu na', pero nu naca nòxaj ladxi', gaca lo.

¹³ 'Bica' bayechi' libí'ili', bönni' yudo' usëdi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nöza sójacalen bönachi para ila'dxín ga ni' rinná bë'ë Dios yehua' yubá. La' libí'isili' biti' sequi' tsú'uli', en biti' ru'ili' lataj ila'yú'u nupa té'ëni ila'yú'u.

¹⁴ 'Bica' bayechi' libí'ili', bönni' yudo' usëdi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lídxicaganu nigula uzëbido', en para ulu'isö tsahui' cuinli', xidzé rufídzali'-në' Dios. Que lë ni na', zí'tërö irugu queë'li' qui'i sáca'li'.

¹⁵ 'Bica' bayechi' libí'ili', bönni' yudo' usëdi, enca' libí'ili', bönni' yudo' fariseo, bönni' rulu'isö tsahui' cuinli'. Ridödili' idú lu nísado', en idú yödzölió ni para gunli' ga tseaj láchë'ë tu bönni' Dios tsózxön len libí'ili', en cate'

chiguzxéqui'li-nè', runli' ga nabága'rè' xíguia' ca libí'ili', ate' tsòjtsu'è lu guí' gabila.

16 'Bica' bayechi' libí'ili'. Nachul-la loli', ate' rë'ënili' ulu'í'ili' nõza bõnachi. Caní naca queëli' tu' rnnali': "Channõ bi rizí' lu nè'è tu bõnni' ni'a que yudo', biti' run bayudxi, pero channõ runè' le ni'a que oro dzõ'õ yudo', bayudxi gun."

17 Libí'ili', bõnni' lo chul-la, en tu' caréajni'i. ¿Bízxilõ nácarõ lo? ¿Naru' oro na', o yudo' le run lá'ayi oro na'?

18 Lësca' caní rnnali': "Channõ nu bõnni' gunè' le ni'a que bucugu lá'ayi, biti' gun bayudxi, pero channõ gunè' le ni'a que gun zxoa lãhui, bayudxi gun."

19 Libí'ili', nazídili', en nachul-la loli'. ¿Bízxilõ nácarõ lo? ¿Naru' gun zxoa lãhuisõ, o bucugu lá'ayi na' run lá'ayi gun na'?

20 Que lè ni na', channõ nu bõnni' runè' le ni'a que bucugu lá'ayi, runè' le ni'a que le, enca' ni'a que yúgu'tè le zxõagaca lãhuisõ.

21 Lësca' caní, channõ nu bõnni' runè' le ni'a que yudo', runè' le ni'a que le, enca' ni'a queë' Dios, nun cazè' xilatjè' ni'.

22 Lësca' caní, channõ nu bõnni' runè' le ni'a que yehua' yubá, runè' le ni'a que lataj ga rõ'è rinná bè'è Dios, enca' ni'a que Lè cazè' Dios rõ'è ni'.

23 'Bica' bayechi' libí'ili', bõnni' yudo' usedi, enca' libí'ili', bõnni' yudo' fariseo, bõnni' rulu'ísõ tsahui' cuinli'. Caní naca queëli' tu' riguízxjali' que yudo' tu cõ' huéaj tu' chi cõ' le rizí'ili' que xõhuéaj, en que guixi' anís, en que comino la' huagu, pero rucá'anali' le nácarõ lo le rinná bè' xibá queë' Dios, tu' cabí runli' le naca tsahui', en biti' ruhuéchi' lãdxi'li' luzá'ali', en biti' réajlè'ëli'-nè' Dios. Yugu' lè ni run bayudxi gunli', en lès biti' ucá'anali' ia'zica'rõ lè na' runli', le riguízxjali' que yudo'.

24 Libí'ili', nachul-la loli', en rë'ënili' ulu'í'ili' nõza bõnachi. Ca na' runli' naca ca rudõdili' bõdzádzado' le ré'jali', rubéajgacali'-ba' bõ'iyudo', pero ré'jali'-ba' bõa' ta'biè'-ba' bõnni'.

25 'Bica' bayechi' libí'ili', bõnni' yudo' usedi, enca' libí'ili', bõnni' yudo' fariseo, bõnni' rulu'ísõ tsahui' cuinli'. Nácali' ca zxíga'do' ré'jali', en yõ'õna ráhuili'. Riguíbili' le nuá' cuita lè'e, pero lu icja lãdxi'do'oli' nalí yugu' le ribanli', en yugu' le ruá' dõ' runli'.

26 Libí'ili', bõnni' yudo' fariseo lo chul-la. Zí'alõ guli'quibi le nuá' lu zxíga'do', en lu yõ'õna, lè na' sa'yéaj gácali' tsahui' lu icja lãdxi'do'oli', para gácali' ca' tsahui' cuita lè'ëli'.

27 'Bica' bayechi' libí'ili', bõnni' yudo' usedi, enca' libí'ili', bõnni' yudo' fariseo, bõnni' rulu'ísõ tsahui' cuinli'. Caní naca queëli' tu' nácali' ca yugu' yeru ba quégaca nupa chinátigaca, le nácagaca chiguíchido'os cuita lè'e, en le nácatè lachi nalá'gaca, pero nalí'gaca dxita quégaca nupa chinátigaca, enca' yúgu'tè le siguti.

28 Lësca' caní nácali' libí'ili'. Le nácatè lãhuisõ rulu'í' cuinli' tsahui' lógaca bõnachi, pero lu icja lãdxi'do'oli' nalili' yugu' le rulu'ísõ tsahui' cuini, en le ruá' dõ' runli'.

29 'Bica' bayechi' libí'ili', bõnni' yudo' usedi, enca' libí'ili', bõnni' yudo' fariseo, bõnni' rulu'ísõ tsahui' cuinli'. Ruchísali' biquitaj que ba gapa nagáchi'gaquiè' bõnni' gulu'è didza' uláz queë' Dios, en ru'í'ili' biquitaj gapa nagáchi'gaca bõnachi tsahui'.

³⁰ Lësca' caní rnnali': "La'tu' zóatu' dza ni'te cate' gula'cu'ë xuz xtó'otu', bití' guntu' légaquië' tsözxön cate' gulútië' yugu' bönni' gulu'ë didza' uláz queë' Dios."

³¹ Tu' rnnali' caní, la' libí'isili' runli' ba nali' nácali' zxi'ini xi'sóagaca nupa ni' bëtigaca yugu' bönni' gulu'ë didza' uláz queë' Dios.

³² Caní naca, rusubaga' cuinli' xíguia' na' gula'báguië' xuz xtó'oli'.

³³ Libí'ili' na', nácali' ca yugu' bëla sínia', en di'a dza quegacaba' bëla sínia'.
¿Nacxi caz uláli' lu le usaca' zi' libí'ili' lu guí' gabila?

³⁴ Que lë ni na', neda' isöl-la'a queëli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë' gútili'-në', en ia'zíca'rë' udá'ali' lë'e yaga cruz, en ia'zíca'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzo.

³⁵ Caní gaca, ibága'li' libí'ili' xíguia' que idútë rön quegaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bëtigaca Zacarías, zxi'inë' Berequías, bönni' na' bëtili'-në' gatsaj láchui'lö ga dë yudo', en ga dë bucugu lá'ayi ga na' tu'zégui'ë' böa' bëdxido' lahuë' Dios.

³⁶ Le nácatë rea' libí'ili', yúgu'të lë ni ila'bagá' bönachi nacua' dza ni zóaru' na'a.

Jesús ribödxë' ni'a que yödzo Jerusalén
(Lc. 13:34-35)

³⁷ Lësca' caní gunné' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxigacali' guiöj nupa nasöl-lë'ë Dios. Zían luzuí' gú'unida' utuba' libí'ili' quia', ca runba' yöjede, rutúbiba' bórado' queëba' zxan xíliba', pero bití' gú'unili'.

³⁸ Bulí'yútsöca', cá'asö ugá'ana yu'u lídxili'.

³⁹ Caní gaca, tu' rea' libí'ili', na'a isí lo bití' ulé'eli' neda' cate' innárolí':
"Lá'ayi náquië' Bönni' na' zë'ë uláz queë' Xanru'."

24

Rigúxjö'ë Jesús ca si' ulu'quínnajë' yudo'
(Mr. 13:1-2; Lc. 21:5-6)

¹ Birúajë' Jesús chila yudo', en tsanni ni' rizë'ë ni', gula'bígui'ë bönni' usëda queë' ga na' zoë', ate' bulu'lu'inë' Lë' ca nácgaca zö'ö nagú'ugaca lë'a yudo'.

² Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', bití' ca' ugá'ana guiöj nabaga' luzë'e ni, le cabí' iguínnaj.

Le ilaca bë' chizóa idxin dza údxi que yödzoilió
(Mr. 13:3-23; Lc. 21:7-24; 17:22-24)

³ Cate' ni' rö'ë Jesús ga naca lu Guí'a Yaga Olivo, bila'dxinë' bönni' usëda queë' ga na' zoë' queëzë', en të' Lë':

—Gudíxjöi' netu', ¿bátaxi ilaca lë ni, en bizxi gaca bë' dza huödu', en dza údxi que yödzoilió ni?

⁴ Ní'irö bubi'ë didza' Jesús, ate' rë' légaquië':

—Bulí'yú para cabí' nu si' ye'e libí'ili',

⁵ tu' zá'gaquië' zían bönni' légaquië' ca lea' neda'. Ila'nnë' nácgacachië' Cristo, en ila'z' yé'enë' bönachi zían.

⁶ Huayönili' raca gudil-la, en le ru'í didza' que gudil-la, pero biti' cõ'õli' bõniga, tu' ral-la' ilaca yúgu'tè lè ni, pero cabí ridxini dza údxi cate' ilácarõ lè ni.

⁷ Til-la tu yõdzõ len ia'tú yõdzõ, ate' tu ga nu rinná bẽ' len ia'tú ga nu rinná bẽ'. Ilatsaj yõdzõhuẽ' zxõn, en gaca gubín, ate' zían lataj tõi budó' zxu'.

⁸ Yúgu'tè lè ni nácgaca le isi lógaca yugu' le ila'gu'í ila'zaca' bõnachi.

⁹ 'Ní'irõ ulu'dõdi bõnachi libí'ili' lu na' nu usaca' zí' libí'ili'. Yúgu'tè bõnachi ulu'dí'i libí'ili' tu' dá'ali' neda', en ilútiẽ' bál-lali' libí'ili'.

¹⁰ Cate' gaca caní, gaca chopa ládxi'gaca zían bõnachi, en ulu'cá'ana neda', ate' udõdi tu ia'tú luzé'e, en tu ia'tú udí'i luzé'e.

¹¹ 'Ní'irõ ulu'lú'i lógaquiẽ' zían bõnni' ta'z'í yẽ'ẽ. Ulu'lú'i cuíngaquiẽ' ca yugu' bõnni' tu'ẽ didza' uláz queẽ' Dios, en ila'z'í yé'enẽ' bõnachi zían.

¹² Iluá'ada' dõ' bõnachi, ate' que lè ni na' bítirõ ila'dx'i' bõchi' luzé'eguequi.

¹³ Nu guequi tsaz queẽ' Dios ga idxintè dza údxi, nu ni ulá.

¹⁴ Idú yõdzõlió gaca libán que didza' dxi'a ca rinná bẽ'ẽ Dios para gaca banalí que lógaca yúgu'tè bõnachi izá'a, ate' ní'irõ idxín dza údxi.

¹⁵⁻¹⁶ 'Nu ulaba lè ni ral-la' uzéajni'í ladxi'. Gunnẽ' Daniel, bõnni' bẽ'ẽ didza' uláz queẽ' Dios, gunnẽ': "Tsaza le rudí'inẽ' Dios lataj lá'ayi queẽ' Dios, lè na' rusuniti." Cate' ilé'eli' gaca caní, ní'irõ nuli' zóali' luyú Judea ral-la' tsõjxúnajli' saca' gu'ado'.

¹⁷ Nu dxía ícjo'olõ biti' gal-la' huõtaj tsõjzxí' bi dẽ que lu yu'u, pero ral-la' izxúnajtẽ.

¹⁸ Nu zoa la' guixi', biti' gal-la' huõaj tsõjzxí' lari' que.

¹⁹ Bica' bayechí' yugu' nigula si' ulu'zõanu bí'ido' quégacanu, enca' nigula ni' tu'gádx'i'nu-bí' bí'ido' quégacanu cate' idxín dza ni'.

²⁰ Buli'lidzẽ' Dios inábili'-nẽ' cabí idxín dza ni' izxúnajli' cate' raca beo' ziaga o cate' naca dza lá'ayi,

²¹ tu' ila'gu'í ila'zaca'tërõ bõnachi dza ni' ca gula'gu'í gula'zaca' bõnachi dza ni'te cate' si' guta' gurõ õ yõdzõlió, ga ridxintè na'a dza, en calẽga dza zá'gaca biti' ila'gu'í ila'zaca' caní.

²² Cate' idxín dza ni', channõ Dios biti' cuéqui lahuẽ' quégaquiẽ', cuntu nu ulá, pero cuéqui lahuẽ' quégaquiẽ' dza ni', en gácalenẽ' nupa gurõ cazẽ' Lẽ'.

²³ 'Ní'irõ biti' tséajl'ẽli' channõ nu idxín queẽli', en guíẽ libí'ili': "Buli'yútsõca', ni zoẽ' Cristo", o inná: "Ní' zoẽ'."

²⁴ Ulu'lú'i lógaquiẽ' zían bõnni' ta'z'í yẽ'ẽ, en ila'nnẽ' nácgacaquiẽ' Cristo, o ila'nnẽ' tu'ẽ didza' uláz queẽ' Dios. Ilunẽ' le ilaca bẽ', en le ilún ga ulu'bani bõnachi, ate' ila'z'í yé'enẽ' nupa gurõ cazẽ' Dios channõ huala'zéquínẽ'.

²⁵ Buli'yútsõca', chigudxi' caza' libí'ili' yúgu'tè lè ni z'í'atèlõ ca si' ilaca.

²⁶ Que lè ni na', biti' irúajli' channõ ila'dxín queẽli' nupa ilẽ libí'ili': "Buli'yútsõca', ni' zoẽ' Cristo lu lataj cá'asõ." Lẽsca' caní, biti' tséajl'ẽli' channõ ila'nná: "Buli'yútsõca', lu yu'u zoẽ'."

²⁷ Ca na' raca cate' rëpi yõsa ga rilén gubidza, en ruzení' ga ribía gubidza, lẽsca' caní gaca cate' huõda' neda', Bõnni' Guljẽ' Bõnachi.

²⁸ Ilácatè caní, ca na' ta'nná bõnachi: "Gátit'ès ga dẽ tu le nati, ni' ulu'dubi cázaba' bíchulab."

Ca gaca cate' huõdẽ' Bõnni' Guljẽ' Bõnachi
(Mr. 13:24-37; Lc. 21:25-33; 17:26-30, 34-36)

²⁹ Gunnẽ' ca' Jesús:

—Tödi yugu' dza ni' cate' ila'guí' ila'zaca' bönachi caní, ichul-la gubidza, ate' beo' bití' gunna bení' que. Ila'guínnajba' bôlaj lúzxiba, ate' ila'zxízi le nalá'gaca naca tsutsu lúzxiba.

³⁰ Ní'irö ilá' lahui lúzxiba le gaca bē' huöda' neda', Bönni' Guljē' Bönachi, ate' ila'bödxí yechí' yúgu'tē bönachi yödžölió ni, cate' ila'lé'e neda', Bönni' Guljē' Bönachi, suzá'a lu bôaj lúzxiba, dē lu na'a yöl-la' unná' bē', en yöl-la' huáca zXôn.

³¹ Ní'irö isöl-la'gaca-nē' gubáz lá'ayi quia'. Ulu'cödxē' zidzaj lúzuba' böa' guixí', ate' ulu'tubē' nupa nabóa' quia', nacua' idapa la'atē yödžölió, en yúgu'tē lataj zXan lúzxiba.

³² Buli'zéajni'í ládxi'li' le rusedi libí'ili' le raca que yaga higo. Cate' ta'lén ni'a nē'e yúludo', en chirubía xilagui' yúludo', inözili' chizóa idxín cusubá.

³³ Lēscá' caní, cate' ilé'eli' taca yúgu'tē lē ni, inözili' chizóa idxín dza údxi na', en chiridzaga lahui.

³⁴ Le nácatē rea' libí'ili', yúgu'tē lē ni ilaca zí'atēlō ca ilátigaca bönachi nacua' dza ni'.

³⁵ Huadödi quégaca lúzxiba, en luyú ni, pero yugu' xtídza'a bití' ila'dödi cá'asö.

³⁶ 'Cate' idxín dza ni' cuntu nu nözi. Bití' nözguequinē' gubáz lá'ayi queē' Dios nacué' yehua' yubá, en bití' nözda' neda', Zxí'inē' Dios, pero tuzē' Dios Xuz nözinē'.

³⁷ 'Ca na' guca dza cate' ni' zoē' Noé, lēscá' caní gaca cate' huöda' neda', Bönni' Guljē' Bönachi.

³⁸ Yugu' dza ni' zí'atēlō ca si' idxín nisa guiöj le busuniti yödžölió, gulē'aj gu-lahuē', bulu'tsaga na'agaquiē', en bulu'dödē' zXí'inigaquiē' lu yöl-la' rutsaga na' ga bidxintē dza guyáziē' Noé lē'e barco zXôn ni' benē',

³⁹ en bití' guléquite'enē' cate' bidxintē nisa guiöj le busuniti yödžölió, ate' gula'nítíē' yúgu'tē'. Lēscá' caní gaca cate' si' huöda' neda', Bönni' Guljē' Bönachi, cuntu nu guéquite'e.

⁴⁰ Dza huöda' ila'cu'ē chopē' bönni' la' guixí'. Tuē' uchē'a-nē' quia', ate' ia'túē' ucá'ana-nē'.

⁴¹ Ila'cuá'anu chópanu nigula nacua'anu huētu. Tunu uchē'a-nu quia', ate' ia'tunu ucá'ana'-nu.

⁴² Buli'subán ládxi'li' tu' cabí nözili' bizxi dza huöda' neda', Xanli'.

⁴³ Na'a, guli'tséajni'í lē ni. La'tu' nözinē' xan yu'u bizxi dza guidē' gubán, huanē'ē yēla, en bití' gu'ē lataj nu quidaj zö'ö para cuan le dzö'ö lidxē'.

⁴⁴ Que lē ni na', buli'subán ládxi'li' ca' libí'ili', tu' huöda' neda', Bönni' Guljē' Bönachi, tu dza bití' nuzóa icjali'.

Bönni' huen dxin tsahui', en bönni' huen dxin bití' náquiē' tsahui'

(Lc. 12:41-48)

⁴⁵ Gunnē' ca' Jesús:

—¿Nuzxi caz bönni' huen dxin náquiē' tsahui', en réajni'inē', bönni' huen dxin na', xanē' cu'ē lu nē'ē bönachi nacua' lidxē' para gu'ē le ilágugaca cate' idxín dza?

⁴⁶ Bica' ba bönni' huen dxin na' náquiē' tsahui', bönni' na', cate' udxinē' xanē', uduxáquiē' lē' caní runē' le nudödē' xanē' lu nē'ē.

⁴⁷ Le nácatē rea' libí'ili', yúgu'tē le dē queē' xanē', udödē' lu nē'ē bönni' huen dxin na' runē' caní.

⁴⁸ Channö huóáquiē' bönni' huen dxin queē' huiá' dö', en sa' ládxi'ē, innē': "Huadzenē' xana', en bití' huódatiē'",

49 en channò isí lahuë' gundë' zi' bönni' túnlenë' lë' tsözxön dxin, en isí lahuë' ca' gu'aj gágulenë' nupa ta'zudxi,

50 ní'irò huödë' xanë' bönni' huen dxin na' tu dza cate' biti' zoë' ribözë', o tu yëla biti' réquinë'.

51 Ní'irò xanë' na' usaca' zí'dë' bönni' huen dxin na', en gunë' ga gaca queë' ca na' ral-la' gaca quégaca nupa tu'lu'isò tsahui' cuínguequi. Ní'irò cödxí yechë'ë, en gagu zxea láyë'ë.

25

Rucúdzü'ë didza' Jesús ca naca quégacabi' chibi' bi'i nigula ra'bando'

1 Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuá'gaca gu' quégacabi', ate' bila'rúajbi' tsójságagacabi' bönni' utsaga në'ë.

2 Gáyu'bi' nácagacabi' bi'i biti' ta'yéajni'ibi' ate' ia'gáyu'bi' nasína'gacabi'.

3 Yugu' bi'i nigula biti' ta'yéajni'ibi' na' gula'zí'ibi' le nuá'gaca gu' quégacabi' pero biti' guluá'abi' ia'lati' za régui.

4 Yugu' bi'i sina' na' guluá'abi' za régui lu böga'do' quégacabi' len le nuá'gaca gu' quégacabi'.

5 Tu' gudzenë' bönni' utsaga në'ë, gudödi yëla lógacabi', en gulásitëbi'.

6 Cate' bidxín idú guluhuëla, biyön chí'i nu rinnë zidzaj, rnna: “¡Chizë'ë bönni' utsaga në'ë! ¡Guli'rúaj tsójságali'-në'!”

7 Ní'irò gula'yásabi' yúgu'tëbi' bi'i nigula na', ate' bulu'pá'abi' le nuá'gaca gu' quégacabi'.

8 Gulu'ibi' didza' bi'i biti' ta'yéajni'ibi' na', en gulëbi' yugu' bi'i sina' na': “Guli'gunna queëtu' láti'do' za régui queëli' tu' tu'úlu le nuá'gaca gu' queëtu' ni.”

9 Bulu'bí'ibi' didza' bi'i sina' na', gula'nnabi': “Biti' gaca, tu' cabí bi uga'ana queëtu', en queëli'. Guli'tséajtsöca' ga ridó'o za régui, tsójó'uli' queëli'.”

10 Tsanni ni' sójacabi' sójxí'gacabi' le, bidxinë' bönni' utsaga në'ë. Yugu' bi'i na' nacuá'abi' sina', en ta'bözabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u.

11 Gudödi ni' ia'zícá'röbi' bi'i nigula ra'bando' na' bila'dxinbi' ni', ate' bulu'lidzabi'-në', en gula'nnabi': “Xan, Xan, gusalaj queëtu'.”

12 Lé' bubi'ë didza', rnnë': “Le nácátë rea' libí'ili', biti' nözda' gazzi libí'ili'.”

13 Ní'irò Jesús gudxë' légaquië':

—Buli'subán lãdxi'li', tu' cabí nözili' bizxi dza o bizxi yëla huöda' neda', Bönni' Guljë' Bönachi.

Rucúdzü'ë didza' Jesús ca naca que dumí zaca'

14 Gunnë' ca' Jesús:

—Ca gun Nu na' rinná bë' yehua' yubá naca ca benë' tu bönni', chizóa tsejé' zi'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

15 Tuë' bönni' huen dxin na', gulu'ë gayu' dumí nazaca' lu në'ë, ate' ia'tué' gulu'ë chopa dumí nazaca' lu në'ë. Ia'tué' gulu'ë tu dumí nazaca' lu në'ë. Tu tuë' gulu'ë lu në'ë tsa huéaj le ila'zéqui'në'. Ní'irò la' guzá'atë' ga naca zi'tu'.

16 Guyijë' bönni' huen dxin na' guzxi'ë gayu' dumí nazaca' na', en yójtíljalenë' le ia'gayu' dumí nazaca'.

17 Lësca caní, bönni' na' guzxi'ë chopa dumí na', yöjtíljalenë' le ia'chopa ca'.

18 Bönni' na' guzxi'ë tu dumí guyijë', en yöjchö'önë' lu yu, ate' bucáchë'ë dumí queë' xanë' lu yu ni'.

19 'Cate' chigudzé, budxinë' xángaquië' bönni' huen dxin na', ate' bucá'analënë' légaquië' tsahui'.

20 Ga gusí lo bidxintë' bönni' na' guzxi'ë gayu' dumí nazaca' na', en sunu'ë ia'gayu' dumí ca', ate' rë' xanë': "Xan, gayu' dumí gulú'u lu na'a. Ni dë ia'gayu' dumí ca' yöjtíljalena' le."

21 Xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a yënni'tërö cu'a lu no'o. Guyaza ga zoa', udzéjalenu' neda'."

22 Gudödi ni' bidxinë' ca' bönni' huen dxin na' guzxi'ë chopa dumí nazaca', ate' rnnë': "Xan, chopa dumí gulú'u lu na'a. Ni dë ia'chopa dumí ca' yöjtíljalena' le."

23 Ní'irö xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a, yënni'tërö cu'a lu no'o. Guyaza ga zoa', udzéjalenu' neda'."

24 Ní'irö cate' bidxinë' bönni' huen dxin na' guzxi'ë tu dumí nazaca' na', rnnë': "Xan, nözda' nacu' bönni' bizxaj, tu' rulapu' ga bití' guzu', en rutubu' ga bití' guchilju'.

25 Que lë ni na' gúdxida' li', ate' guyija', yöjchácha'a dumí quiu' lu yu. Ni dë na'a le nequi quiu'."

26 Ní'irö bubí'ë didza' xanë', en rë' lë': "Nacu' huen dxin bití' naca tsahui', en xöhuëdi. Nöz quezinu' rulapa' ga bití' guza', en rutuba' ga bití' guchilja'.

27 Que lë ni na', gácarö dxi'a quiu' la'tu' bunödzu' dumí quia' lu ná'agaquië' bönni' ulu'gunë' le dxin, ila'guljalënë' le ia'lati', para cate' huöda' neda', uzi'a le nequi quia' len icja ca'."

28 Ní'irö xanë' na' gudxë' nupa nacuá' ni': "Guli'cúa dumí na' dë lu në'ë bönni' ni, en guli'cu'u le lu në'ë bönni' na' dë queë' chi dumí."

29 Núti'tës nu rugún tsahui' dxin le dë queë', zoa nu unödzej queë' ia'lati', ate' gáta'da' queë', pero nu na' bití' rugún tsahui' dxin le dë lu në'ë, la's dui le dë queë' idúa.

30 Na'a, bönni' huen dxin bití' naca tsahui' ni, guli'tsöjchú'una-në' ní'ilö ga naca chul-la. Ni' cödxí yéché'ë, en gagu zxea láyë'ë.

Cristo uchi'a usöröë' quegaca bönachi

31 Gunnë' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö cö'a lataj tsahui' quia', ga na' uchi'a usöröa' quegaca bönachi.

32 Ulu'dubi dërö lahua' neda' bönachi yödzüliö ni, ate' ucu'a léguequi tsölá'a huéaj ca runë' bönni' uyú bö'cu' zxila', rucu'ë-ba' tsölá'a huéajba' yugu' chivo, en yugu' bö'cu' zxila'.

33 Yugu' bö'cu' zxila' na' ucu'ë-ba' cuita lë'ë ibëla, ate' yugu' chivo na' ucu'ë-ba' cuita lë'ë yögöla.

34 Ní'irö, neda', bönni' unná bë', guía' nupa nacuá' cuita lë'a ibëla, innía': "Guli'dá ga zoa', libí'ili' bubéajë' Xuza' libí'ili' quez queë'. Nequi queëli' lataj ga na' rinná bë'ë, lë na' bupë'ë queëli' dza ni'te cate' ni' benë' yödzüliö.

35 Caní nequi queëli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zí'tu', ate' gulú'uli' neda' lídxili'.

³⁶ Biyadzaj le gácu'a, ate' bugáculi' neda' le ráculi'. Gúf'ida', ate' buduyúli' neda'. Guyu'a lidxi guíë, ate' buduyúli' neda'."

³⁷ Ní'irö ulu'bi'ë didza' bönni' tsahui' na', ilë' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u?"

³⁸ ¿Bátaxi bilé'etu' Li' gudó' zitu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'?"

³⁹ ¿Bátaxi bilé'etu' Li' gúf'ínu', o guyu'u lidxi guíë, ate' buduyútu' Li'?"

⁴⁰ Ubi'a didza' neda', bönni' unná bē', ate' guía' légaquië: "Le nácatē rea' libí'ili', tu' benli' caní queé' nu bönni' böcha'ado' ni, sal-la' náquië' bönni' cá'asō, quia' neda' caz benli' ca'."

⁴¹ Ní'irö guía' nupa nacua' cuita lē'a yögōla, innía': "Guli'cuíta ga zoa', libí'ili' na' nabága'li' xíguia', tsöjtsázali' lu guí' na' biti' ulu, lē na' bupē'ē Dios ní'a que tu' xihui', en quéguequi gubáz dá'gaca le."

⁴² Caní gaca queéli' tu' guduna', ate' biti' bénnali' le gahua'. Gubidxa' nisa, ate' biti' bénnali' le guí'ja'.

⁴³ Guca' ca bönni' ridē' zitu', ate' biti' gulú'uli' neda' lídxili'. Biyadzaj le gácu'a, ate' biti' bugáculi' neda' le ráculi'. Gúf'ida', enca' guyu'a lidxi guíë, ate' biti' buduyúli' neda'."

⁴⁴ Ní'irö ila'nná ca' nupa na', ilë' neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridē' zitu', o biyadzaj le gacu', o gúf'ínu', o guyu'u lidxi guíë, ate' biti' gúcalentu' Li'?"

⁴⁵ Ní'irö ubi'a didza' neda', bönni' unná bē', guía' légaquië: "Le nácatē rea' libí'ili', tu' cabí bi benli' que tu nu nutsa' ladaj nupa nacua' ni, sal-la' naca cá'asō nu na', biti' bi benli' quia' neda'."

⁴⁶ Ní'irö bönachi tuá' dō' na' la' tsöjtsázagacatē ga ni' ila'guí'i ila'záca'tica'sō, pero bönachi tsahui' ni' gata' yöl-la' na'bán idú quéguequi.

26

*Tun xtídza'gaquië' bönni' yudo' ila'zönë' Jesús
(Mr. 14:1-2; Lc. 22:1-2; Jn. 11:45-53)*

¹ Cate' budxi bē'ë Jesús yugu' didza' ni, gudxë' yugu' bönni' usēda queë',

² rnnë':

—Nöz' quézili' ia'chopa dza idxín Laní Pascua, ate' dza na' neda', Bönni' Guljē' Bönachi, ulu'dödē' neda' lu ná'agaca nupa ulu'dá' neda' lē'e yaga cruz.

³ Ní'irö bila'dxinē' yugu' bixúz unná bē' len yugu' bönni' yudo' usedi, en bönni' gula tu'zējani'inē' bönachi judío, ate' bulu'dubē' ga naca lö'a lidxi bixúz lo, lē' Caifás.

⁴ Ní' gulún xtídza'gaquië' ila'zönë' Jesús, lu yöl-la' rizí' yē' quégaquië', para ilútië' Lē'.

⁵ Ta'nnë':

—Biti' gunru' lē ni dza laní, para cabí ila'dzatsa bönachi.

*Tu nigula rigú'unu le rilá' zxixi icjē' Jesús
(Mr. 14:3-9; Jn. 12:1-8)*

⁶ Cate' ni' zoë' Jesús lu yödzō Betania lu yu'u lidxë' Simón, bönni' na' gúf'inē' huë' nudzu' ruzōdi,

⁷ bidxinnu' cúdzulē' Jesús tu nigula, nuá'anu tu böga'do' néquini guiöj nazaca', en yudzu tu le rilá' zxixi le nazáca'da', ate' gulú'unu le icjē' Jesús cate' ni' rō'ë rahuë'.

⁸ Cate' bila'lé'enē' bönni' usēda queë' Jesús lē ni, gula'lenē', ta'nnë':

—¿Bizx que réqui ditaj lè ni?

⁹ Guca nu guti' lè ni, en si' dumí zían para gácalenru' yugu' bönachi yechi'.

¹⁰ Cate' biyönnè' Jesús lè ni, rè' légaquiè':

—¿Bizx que rnnèli' queënu nigula ni? Tsahui' naca le bennu quia'.

¹¹ Yugu' bönachi yechi' ila'cuá'lentica'sö libí'ili', pero neda' biti' ugá'analentica'sa' libí'ili'.

¹² Le bennu nigula ni, gulú'unu neda' le rilá' zixi ni, naca le rupá'anu neda' para dza igácha'a yeru ba.

¹³ Le nácatè rea' libí'ili', gátitès luyú yödzölió ga gaca libán que didza' dxi'a ni, lésca' ila'guixjö' bönachi le bennu nigula ni quia' para nu tsöjnè lènu.

Rizí' lu nè'è Judas udödè' Jesús lu ná'agaquiè' bönni' unná bè'

(Mr. 14:10-11; Lc. 22:3-6)

¹⁴ Ní'irö guyijè' Judas Iscariote ga na' nacué'è bixúz unná bè'. Náquiè' bönni' dzáguie' chínnuè' na' dá'gaquiè' Jesús,

¹⁵ ate' gudxè' légaquiè':

—¿Bizxi gúnнали' quia' channö neda' udöda'-nè' Jesús lu ná'ali'?

Bulu'gá'analenè' lè' tsahui' ilu'è lè' chi uruá' dumí plata.

¹⁶ Ní'irö gusí lahuè' Judas na' risí ribö'è udödè' Jesús lu ná'agaquiè'.

Le ráguru' le rusá' ládxi'ru' ca gútiè' Xanru'

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Cate' naca dza risí lo laní queégaquiè' bönni' judío cate' tahuè' yöta xtila le cabí nazí'i' cúa zi que, gula'bíguiè' bönni' usèda queè' Jesús ga zoè', en tè' Lè':

—¿Gazxi rè'ènu' tsöjpá'atu' queèru' para gáguru'-ba' bö'cu' zxíla'do' dzö' Laní Pascua?

¹⁸ Jesús rè' légaquiè':

—Gulí'tséajtsöca' yödzö ni' ga na' zoè' tu bönni', en guli'guie': "Bönni' rusédinè' netu' rnnè': Chizá' gala' dza quia'. Lu yu'u lidxu' gágulengaca'-nè' bönni' usèda quia' bö'cu' zxíla'do' dzö' Laní Pascua."

¹⁹ Ní'irö gulunè' bönni' usèda queè' ca na' gunná bé'enè' Jesús légaquiè', ate' bulu'pé'è le ilahuè' dzö' Laní Pascua.

²⁰ Cate' chigudzö' dza na', Jesús guró'lenè' idxínnutè' bönni' usèda queè' tahuè'.

²¹ Tsanni ni' tahuè', Jesús rè' légaquiè':

—Le nácatè rea' libí'ili', tu nu nutsa' ládjali' ni udödi neda'.

²² Ní'irö bulu'huí'ini ládxi'gaquiè', en gula'nábinè' Jesús tu tuè', ta'nnè':

—Xan, ¿naru' neda'?

²³ Bubi'è didza' Jesús, rnnè':

—Bönni' ni runé' nè'è tsözxón len na'a lu yö'öna, bönni' ni udödè' neda'.

²⁴ Le nácatè neda', Bönni' Guljè' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queè' bönni' na' la' cabí guljè'.

²⁵ Ní'irö bubi'è didza' Judas, bönni' na' udödè' Jesús, rnnè':

—Bönni' Usedi, ¿naru' neda'?

Jesús rè' lè':

—Ön, lí' na'.

²⁶ Tsanni ni' tahuè', gudélè'è Jesús yöta xtila, en gudxè' Dios: "Xclenu'." Ní'irö buzzuxjè' le, en bunödzejè' queégaquiè' bönni' usèda queè', rnnè':

—Gulí'sí', guli'gagu. Lè ni le naca caza'. Ca bena' que yöta xtila ni rulu'i' ca gaca que le naca caza'.

²⁷ Gudélé'ë ca' tu xzíga'do', en gudxë' Dios: "Xclenu'." Ní'irö bunödzejë' ca' quégaquië', rnnë':

–Guli'gui'aj yúgu'téli'.

²⁸ Lë ni ruluf'i ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zían para gaca uniti lahuë' Dios yugu' dul-la' nabága'gaquië'.

²⁹ Rea' ca' libí'ili', bíti'rö guf'ja' xisi le ribía lubá uva ni cate' idxinrö dza ni' guí'jalena' libí'ili' tu le cubi ga ni' rinná bē'ë Xuza'.

Jesús rnnë' innë' Pedro bití' núnbë'ë Lë'
(Mr. 14:26-31; Lc. 22:31-34; Jn. 13:36-38)

³⁰ Cate' budxi gulúl-lë' yöl-la' ba queë' Dios, yójáquië' lu Guí'a Yaga Olivo.

³¹ Ní'irö Jesús rë' légaquië':

–Yúgu'téli' gaca chopá ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: "Guna' ga gátie' Bönni' Uyú Bö'cu' Zxila', ate' ilásilasiba' bö'cu' zxila' na'."

³² Cate' ubana' lu yöl-la' guti, ní'irö tséaja' tsöjnörúa' loli' saca' luyú Galilea.

³³ Ní'irö bubi'ë didza' Pedro, en rë' Jesús:

–Sala' ilaca chopá ládxi'gaquië', en ulu'cá'anë' yúgu'të' Li', neda' bití' gaca chopá ládxa'a, bití' ucá'ana' Li'.

³⁴ Jesús gudxë' lë':

–Le nácatë rea' li', na'a dzö' ni, cate' si' cödxilöba' böra, li' innó' tsonna luzuí bití' núnbë'u neda'.

³⁵ Ní'irö Pedro gudxë' Jesús:

–Sal-la' gátilentea' Li', bití' ca' innía' bití' núnbë'a Li'.

Lësca' caní gula'nnë' yúgu'të bönni' uséda queë'.

Jesús rulidzë' Dios la' yëla Getsemani'
(Mr. 14:32-42; Lc. 22:39-46)

³⁶ Ní'irö Jesús bidxínlenë' légaquië' la' yëla Getsemani', ate' gudxë' yugu' bönni' uséda queë' na', rnnë':

–Guli'cö'tsóca' ni tsanni tséaja' ia'lati' ní'ilö, tsöjlidza'-në' Dios.

³⁷ Jesús guchë'ë Pedro len iropë' xzí'inë' Zebedeo, ate' gusi lahuë' ruhuí'innë', en risëbi ládxi'ë.

³⁸ Ní'irö Jesús gudxë' légaquië':

–Ruhuí'ini ládxa'a, en huáti caza' lu yöl-la' risëbi ládxi'. Guli'gá'ana ni, en guli'ná' yëla tsózxön len neda'.

³⁹ Gudödë' Jesús ia'láti'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunné':

–Xuza', channö huáca, ben ga bití' gun bayudxi qui'i saca'a lë ni, calëga ca rë'ënda' neda', pero ca rë'ënu' Li' gunu'.

⁴⁰ Cate' budxinë' Jesús ga na' nacu'ë bönni' uséda queë', yójáquië' légaquië' tasië', ate' rë' Pedro:

–¿Naru' cabí gúcatsö iná'alenu' neda' tsózxön yëla tu chí'ido'?

⁴¹ Guli'ná' yëla, en buli'lidzë' Dios inábili'-në' gácalenë' libí'ili', para cabí gü'ili' Satanäs tu' xihui' lataj si' bē' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queë'li' nacuí'di'li'.

⁴² Ní'irö guyijë' Jesús le buropi luzuí, en bulidzë' Dios, rnnë':

–Xuz, channö cabí gaca gunu' ga bití' qui'i saca'a lë ni, ben ca raza ládxi'u Li'.

⁴³ Cate' böajë', leyúbölö buduxaquië' légaquië' tasië' tu' nadödirö yëla guiöj lógaquië'.

⁴⁴ Ní'irö bucá'anë' Jesús légaquië', ate' guyijë' leyúbölö, en bulidzë' Dios le bunny luzuí, ate' tuz ca gunné' zí'alö rnnë'.

⁴⁵ Leyúbölö böajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsö ládxi'li? Buli'yútsöca', chibudzaga lo. Neda', Bönni' Guljë' Bönachi, chinadóda' lu ná'agaquië' bönni' dul-la'.

⁴⁶ ¡Guli'chasa, uyéajru! Buli'yútsöca', bönni' na' rudödë' neda' chibidxinë' ni.

Ta'chë'ë Jesús nadzunë'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxínutë' na', la' bidxintë' ni, ate' dzágagaquië' bönni' zían lë', nu'agaquië' guië tuchi', en yugu' yágado'. Yugu' bixúz unná bë', en bönni' gula tu'zéajni'inë' bönachi judío nasöl-la'gaquië' légaquië'.

⁴⁸ Judas, bönni' na' rudödë' Jesús, chibuluf'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. Guli'sönë'.

⁴⁹ Ní'irö gubíguië' Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'.

⁵⁰ Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús.

⁵¹ Tuë' bönni' dzáguië' Jesús gulecjë' guië tuchi' queë', en benë' huë', guchúguië' guídi náguië' bönni' huen dxin queë' bixúz lo.

⁵² Jesús gudxë' lë':

—Bugú' guië tuchi' quiu' lidxi. Yúgu'të nupa tu'dí'ini guië tuchi', lu guië tuchi' ilátigaca.

⁵³ ¿Naru' cabí nõzinu' huáca ulidza' Xuza', ate' Lë' la' isöl-la'të' zióntërö ca chinnu cö' gubáz lá'ayi le naca zían gáyu'ë tu cö' huéaj?

⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' guië tuchi', en yágado' para sönlí' neda' ca runlí' rizönlí'-në' gubán? Yugu' dza gurö'a loli' ga naca lu chila yudo', en busédigacada' bönachi, pero biti' guzxönlí' neda'.

⁵⁶ Raca caní yúgu'të lë' ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zúnajë' ni'.

Ridxinë' Jesús lógaquië' bönni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ní'irö yugu' bönni' na' zöngaquië' Jesús gula'chë'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'inë'.

⁵⁸ Pedro söjnhuë' Jesús zi'tu' zí'tu'sö, en bidxinë' ga naca lö'a lidxi bixúz lo na', para ilé'enë' nacxi utságuië' Jesús.

⁵⁹ Yugu' bixúz unná bé' len bönni' gula tu' zéajni' iné', en bönni' yudo' tu' chi'a tu' söröé', bulu' guiljé' nu uzegui Jesús didza' sal-la' si' yé' é bönni' na', para gaca ila' chúguié' queé' gátié'.

⁶⁰ Cuntu nu bila' dzöliné' sal-la' bila' dxiné' bönni' zían, en gula' nné' queé' le cabí nácáté. Ga búdxitè bila' dxiné' chopè bönni', ate' lu yöl-la' rizi' yé' quégaquié' gula' nné' queé',

⁶¹ ta' nné':

—Bönni' ni gunné': "Huaca uquínnaja' yudo' queé' Dios, ate' uchisa' le ia' tsonna dzasö."

⁶² Ní'irö guzuíné' bixúz lo na', en rë' Jesús:

—¿Naru' cabí rubí'itso' didza'? ¿Bizxi caz lë ni ta' nné' bönni' ni quiu'?

⁶³ Jesús biti' bi gunné'. Ní'irö bixúz lo gudxé' Lë':

—Ní'a queé' Xanru' Dios ban rinná bé'eda' Li' quíxjö'u le nácáté. Gudíxjö'i' netu' channö nacu' Li' Cristo, Zxi'iné' Dios.

⁶⁴ Jesús rë' lë':

—Ca na' rno' naca'. Le nácáté rea' libí'ili', ilé'eli' neda', Bönni' Guljé' Bönachi, rö'a cuita lë' é ibëla Dios, ga ni' dë lu na' a yöl-la' unná bé', ate' guída' lu böaj lúxiba, en idxina' ga zóali'.

⁶⁵ Ní'irö lu yöl-la' rilé queé' guchözé' bixúz lo lari' nácué', rnné':

—¿Gunné' zi' é bönni' ni queé' Dios! ¿Núzxirö naquíniru' nu inné queé' bönni' ni? Chibiyön quézili' didza' zi' bé' é queé' Dios.

⁶⁶ ¿Nacxi rusáca' li' queéli'?

Bulu' bi' é didza', gula' nné':

—Nabágué' é xíguia' gátié'.

⁶⁷ Ní'irö bulu' chejé' zxöna' lahué' Jesús, en gulu' é dö' queé'. Gula' gápé' é ru' é Jesús ia' zíca' rë',

⁶⁸ en tē' Lë':

—¿Nácátso' Li' Cristo? Gunnéya' atsöca' na'a, ¿nuzxi na' gudapa' Li'?

Pedro rnné': "Biti' núnbé'a-né' Jesús"

(Mr. 14:66-72; Lc. 22:56-62; Jn. 18:15-18, 25-27)

⁶⁹ Tsanni ni' gulaca lë na', rö' é Pedro lö'alö, ate' bidxinnu tunu nigula huen dxin ga na' zoé', ate' rnnanu:

—Lësca' li' gudálenü' Jesús, bönni' Galilea na'.

⁷⁰ Gudá' baguë' é Pedro lógaca bönachi nacua' ni', rnné':

—Biti' nözda' nuzxi que na' ru' u didza'.

⁷¹ Cate' birúajé' Pedro ga nu riyaza lö'a, bilé'enu-né' ia'tunu nigula, ate' gúdxinu nupa nacua' ni':

—Bönni' ni gudálené' ca' Jesús, bönni' Nazaret na'.

⁷² Leyúbölö gudá' baguë' é Pedro, en buzötjé' Dios, rnné':

—Biti' ca' núnbé'a-né' bönni' ni.

⁷³ Ía' láti' do' os gudzé, gula' biga' nupa nacua' ni' ga na' zoé' Pedro, en tē' lë':

—Le nácáté li' nunu' ca' tsözxón légaquié' tu' naca bé' u yöl-la' ru' isö quiu' didza'.

⁷⁴ Ní'irö gusí lahué' Pedro rudxía dö' cuiné', en ruzötjé' Dios, rnné':

—Biti' ca' núnbé'a-né' bönni' ni.

La' ná' asö gurödxitëba' böra.

⁷⁵ Ní'irö yöjnené' Pedro didza' gudxé' Jesús lë', gunné': Cate' si' códxilöba' böra, tsonna luzuí chigunno' biti' núnbé' u neda', ate' burúajé' Pedro ni', en gurödxí yéchi' dë' é.

27

*Tu'dödë' Jesús lu në'ë Pilato**(Mr. 15:1; Lc. 23:1-2; Jn. 18:28-32)*

1 Cate' za' rení' dza na', gulún xtídza'gaquië' yúgu'të bixúz unná bë' len bönni' gula tu'zéajni'inë' bönni' judío para ilútië' Jesús.

2 Gula'chë'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzo Roma.

Ratië' Judas

3 Cate' chinözinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', buí'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'.

4 Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö të' lë':

—Biti' gun lë ni ga cö'ötu' böniga. Le ben cazu' li' na'.

5 Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsí yenë'.

6 Bulu'zi'ë bixúz unná bë' yugu' dumí plata na', ta'nnë':

—Biti' sa'yéaj cú'uru' dumí ni ga rigú'uru' dumí que yudo', tu' naca lazjxë' tu bönni' ratië' bönachi.

7 Ní'irö gulún xtídza'gaquië', ate' gulá'uinë' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zi'tu'.

8 Que lë ni na', ga ridxintë na'a dza nazí'i le lataj na', La' Yëla Rön.

9 Caní guca ca na' gunné' Jeremías, bönni' bë'ë didza' uláz queë' Dios, gunné': "Gula'gué'lë'ë chi uruá' dumí plata na', tsca le gula'zéqui'në' bönni' Israel Lë',

10 ate' dumí na' gulá'uinë' la' yëla queë' tu bönni' huen rö'ö. Lë ni buluf'inë' Xana' neda'."

*Ridxinë' Jesús lahuë' Pilato**(Mr. 15:2-5; Lc. 23:3-5; Jn. 18:33-38)*

11 Cate' bulu'sudxinë' Jesús lahuë' Pilato, bönni' na' rinná bë'ë uláz que yödz Roma, bönni' ni gunábinë' Jesús, rë' Lë':

—¿Nacu' Li' Bönni' inná bé'enë' bönachi judío?

Jesús rë' lë':

—Ca nácasó rño'.

12 Cate' yugu' bixúz unná bë' len bönni' gula tu'zéajni'inë' bulu'zégui'ë Jesús didza', biti' bi didza' bubi'ë Jesús.

13 Ní'irö Pilato rë' Jesús:

—¿Naru' cabí riyöntsenu' cate' xö le ta'nnë' quiu'?

14 Jesús biti' bi didza' bubi'ë. Caní guca, bubábinë' bönni' unná bë' na'.

*Rirugu queë' Jesús gátië'**(Mr. 15:6-20; Lc. 23:13-25; Jn. 18:38-19:16)*

15 Cate' naca dza Laní Pascua na', dë caz tu le runë' Pilato, bönni' unná bë' na', ca ta'naba bönachi rusanë' tuë' bönni' yu'ë lidxi guíë, núti'tës nu tē'ëni usané'.

16 Dza na' tu bönni' nabáguë'ë xíguia', lë' Barrabás, yu'ë lidxi guíë ni'.

17 Cate' bulu'dubi bönachi zían ni', Pilato gunábinë' légaquië', rnnë': —¿Nuzxi rë'ënilí' usana' queëli'? ¿Naru' Barrabás o Jesús, Bönni' na' lë' Cristo?

18 Caní gunnë' Pilato tu' réquibe'enë' bulu'dödë' bönni' yudo' Jesús lu në'ë tu' tu'zxé'enë' Lë'.

19 Tsanni ni' rö'ë Pilato ga na' ruchi'a rusöröë', nigula queë' gusöl-la'nu nu tsöjödxi lë', rnna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla bëchigal tu' nözinë' Lë'.

20 Yugu' bixúz unná bë' len bönni' gula tu'zéajni'inë' gula'gú'u yöl-lë'ë bönnachi zían na' para ila'nabi Pilato usanë' Barrabás na', ate' gútië' Jesús.

21 Leyúbölö bë'ë didza' bönni' unná bë' na', rë' légaquië':

—¿Núzxilë' chopë' ni rë'ënili' usana'-në' queëli'?

Gula'nnë':

—Barrabás.

22 Ní'irö Pilato gunábinë' légaquië', rnnë':

—¿Nacxi guna' queë' Jesús, bönni' na' lë' Cristo?

Yúgu'të' ta'nnë':

—jBudë'ë lë'e yaga cruz!

23 Ní'irö bönni' unná bë' na' rë' légaquië':

—¿Bizxi dö' benë'?

Zídzajrö gulu'ë didza', ta'nnë':

—jBudë'ë lë'e yaga cruz!

24 Cate' réquibe'enë' Pilato biti' birúaj xtídzë'ë, pero gula'dzásarö bönnachi, ní'irö gudélé'ë nisa, en gudibi në'ë légaquië', rnnë':

—Biti' bi xigua' nabága'a neda' tu' nözi yöl-la' guti queë' bönni' tsahui' ni. Le gun cázali' libí'ili' lë ni.

25 Bulu'bí'i didza' yúgu'të bönnachi ni', ta'nná:

—jYöl-la' guti queë' bönni' ni ibága'tu' netu', en ila'baga' ca' zxf'initu'!

26 Ca' guca, Pilato busanë' Barrabás na' lu ná'agaquië'. Ní'irö gunná bë'enë' bönni' rójáquië' gudil-la ila'guinë' Jesús, ate' gudödi ni' budödë' Lë' lu ná'agaquië' para ulu'dë'ë Lë' lë'e yaga cruz.

27 Yugu' bönni' rójáquië' gudil-la nacu'ë lu në'ë bönni' unná bë' na' gula'chë'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' rójáquië' gudil-la nacu'ë ni' ga na' zoë' Jesús.

28 Ní'irö gula'lecjë' lari' nácuë' Jesús, en bulu'gácuë' Lë' tu lari' xiná chul-la, ca rácgagaca nupa ta'nná bë'.

29 Bulu'dxië' icjë' tu le néquini ni'a në'e yaga yötsi' le naca ca le dxia icjë' bönni' rinná bë'ë, en bulu'zóë' tu guido' lu në'ë ibëla le ruluí' ca tu yaga que bönni' yúlahui'. Ní'irö bulu'zóa zxibë' lahuë', en bulu'titjë' Lë', ta'nnë':

—jBica' ba Li', rinná bë'enu' bönnachi judío!

30 Ní'irö bulu'chejë' Lë' zxöna', ate' bulu'guélë'ë gui na', en gula'guinë' icjë'.

31 Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ní'irö gula'chë'ë Lë' para tsöjda'agaquië' Lë' lë'e yaga cruz.

Tu'dë'ë Jesús lë'e yaga cruz

(Mr. 15:21-32; Lc. 23:26-43; Jn. 19:17-27)

32 Cate' ni' bila'rúajë' bönni' na', yöjxáca'gaquië' Simón, tu bönni' Cirene, ate' gulunë' ga bi'ë yaga cruz queë' Jesús.

33 Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru',

34 bulu'guijë' Jesús nupi zi nutsí'i zxícala'aba' böa' guixi'. Cate' buxí'i ru'ë Jesús, biti' gú'unnë' guíjë'.

35 Cate' chinudá'agaquië' Lë' lë'e yaga cruz, gula'guisië' lari' nácuaë, en bulu'quitjë' lahui le gaca bë' núzxilë' guequi queë'. Caní guca, budxín lë na' gunnë' bönni' bë'ë didza' uláz queë' Dios, gunnë': "Gula'guisië' lari' nácua', en bulu'quitjë' lahui le gaca bë'."

36 Ní'irö gula'bö'ë ni', tu'yúë' Jesús.

37 Lë'sca' bulu'zóë' lë'e yaga cruz ícjälë' Jesús tu didza' le riguixjö' le nabáguë'ë le rnna caní: "Bönni' ni Jesús, Bönni' rinná bé'enë' bönachi judío."

38 Ga ni' dë'ë Jesús, bulu'dë'ë ca' lë'egaca yaga cruz chopë' bönni' gubán. Tuë' bulu'dë'ë cuita lë'ë ibëla, en ia'túë' na' cuita lë'ë yögöla.

39 Gula'dödë' ni' yugu' bönni' bulu'lidza zi'ë Jesús, en bulu'tá ícjagaquië', tu'titjë' Lë',

40 ta'nnë':

—¡Ön, Li' na' uquínaju' yudo', ate' tsonna dzasö ca' uchísatso' le! ¡Busölá cuinu' na'a channö nacu' Li' Zxí'inë' Dios! ¡Bötjatsöca' lë'e yaga cruz na'!

41 Lë'sca' caní bulu'titjë' Lë' yugu' bixúz unná bë' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inë', ta'nnë':

42 —Yugu' nu yúbölö busölë' bönni' ni, pero biti' gaca usölá cuinë'. Channö náquië' Bönni' inná bé'enë' bönachi Israel, huötjatsöquië' na'a lë'e yaga cruz, ate' tséajlë'ëru' Lë'.

43 Lë' buzxöni ládxë'ë Dios. Dios usölá cazë' Lë' na'a channö raza ládxë'ë Lë', tu' gunnë': "Zxí'inë' Dios naca'."

44 Lë'sca' caní yugu' bönni' gubán na' dá'gaquië' lë'egaca yaga cruz ga ni' dë'ë Jesús bulu'lidza zi'ë Lë'.

Ratië' Jesús

(Mr. 15:33-41; Lc. 23:44-49; Jn. 19:28-30)

45 Cate' bidxín huagubidza, guchul-la idútë yödzüliö ga bidxintë idú ridödi xihuó.

46 Idú ridödi xihuó na', bë'ë zidzaj didza' Jesús, rnnë':

—Elí, Elí, ¿lama sabactani?

Didza' ni rnna lu didza' xidza': "Dios quia', Dios quia', ¿bixz que nubéaj ládxu'u neda'?"

47 Cate' nupa nacua' ni' bila'yöni didza' ni, ta'nná:

—Bönni' ni rulidzë' Elías, bönni' ni' bë'ë didza' uláz queë' Dios.

48 La' guxiti'të tuë' bönni' nútsë'ë ladjagaquië', en gudëlë'ë tu le bululu rixxupi nisa, ate' buxúpinë' le nupi zi, en buzöë' le tu lu gui, ate' butsåguië' le ru'ë Jesús para xupë'.

49 Ní'irö ia'zica'rë' bönni' ni' ta'nnë':

—¡Gulözagarö! ¡Uyútsöca'ru' channö huidë' Elías usölë' Lë'!

50 Leyúbölö gurödxí'ë zidzaj Jesús, ate' burúajtë bö' naca cazë', gútitë'.

51 La' ná'asö biröza'të lari' nal-la' lu yudo', birúaj choplö, le gudela' icjlö ga bidxintë xiní'i. Ní'irö gudödi budó' zxu', en gula'lá'a guiöj.

52 Gula'yalaj yeru ba quégaca nupa chinátigaca, nupa ni' gula'yéajlë' Dios, ate' bulu'bán bönachi na'.

53 Gudödi bubanë' Jesús, bulu'rúajë' bönni' na' yeru ba quégaquië', en gula'yázië' yödzo lá'ayí Jerusalén, ga ni' bila'lë'e bönachi zían légaquië'.

54 Ní'irö gúdxinë' bönni' na' rinná bé'enë' bönni' röjáquië' gudil-la, enca' yugu' bönni' röjáquië' gudil-la nacua'lenë' lë' tu'yúë' Jesús, ate' gunnë':

—Le nácatë bönni' ni' gúquië' Zxí'inë' Dios.

⁵⁵ Zí'tu'sö gula'cuá'anu nigula zián tu'yunu Jesús, nigula na' gula'dálennu Jesús cate' ni' buzě'ë luyú Galilea, ate' gulunnu xichině', gula'gú'unu le gulahuě'.

⁵⁶ Lěsca' María Magdalena, en María, xiná'agaquiě' Jacobo, en José, nůtsa'gacanu lądjagacanu, ate' zóanu ca' ni' xiná'agaquiě' yugu' xzí'ině' Zebedeo.

Ta'gu'ě Jesús yeru ba le nadaj lě'e gu'á guiöj
(Mr. 15:42-47; Lc. 23:50-56; Jn. 19:38-42)

⁵⁷ Cate' chiridzö' dza na', bidxině' José, bönni' Arimatea, tu bönni' rilé'eně' yöl-la' tsahui' queě', en dě'ě ca' Jesús.

⁵⁸ Bönni' ni yöjyúě' Pilato, en gunabě' lataj u'ě Jesús. Ní'irö Pilato gunná bě'ě ulu'nödzejě' queě' Jesús.

⁵⁹ Guzxí'ě José Lě', en buchölině' Lě' tu lari' nazaca'.

⁶⁰ Ní'irö gulu'ě Lě' lu yeru ba cubi queě' le naguidjě' lě'e gu'á guiöj. Budě'ě tu guiöj blaga xzön ga nu riyaza yeru ba na', ate' söhuöjě'.

⁶¹ Gula'cuá'anu María Magdalena, en ia'tunu María ni', rő'gacanu ra' yeru ba na'.

Yugu' bönni' rőjáquiě' gudil-la tapa chi'ě ba queě' Jesús

⁶² Cate' za' rení' ia'tú dza, gudödi bulu'pě'ě que dza lá'ayi quégaquiě' bönni' judío, bulu'dubě' yugu' bixúz unná bě', en yugu' bönni' yudo' fariseo ga zoě' Pilato.

⁶³ Tě' Pilato:

—Bönni', rőjnetu' bi gunně' bönni' rizí' yě'ě na', cate' ni' zoě' nabaně', gunně': "Cate' gaca tsonna dza ubana' lu yöl-la' guti."

⁶⁴ Que lě' ni na' gunná bě'e nupa ilún chi'i ba ni' ga idxintě' dza bunny, para cabí ídigaquiě' bönni' usěda queě' chi'i dzö'ölö, en ulu'béajě' Lě'. Ní'irö ilě' bönachi: "Bubaně' Jesús lu yöl-la' guti." Channö caní gaca, didza' cabí nácatě ni ilu'ě gúntěro huiá' dö' ca ben didza' cabí nácatě na' gulu'ě zí'alö.

⁶⁵ Pilato gudxě' lěgaquiě':

—Ni nacu'ě bönni' rőjáquiě' gudil-la. Guli'chě'ě queěli'. Guli'tséaj, guli'gún chi'i yeru ba na' tsca séqui'li' gunli'.

⁶⁶ Ní'irö yöjáquiě' ni', en bulu'sayjě' dxi'a yeru ba na', en bulu'dě'ě lě'e guiöj na' tu le gaca bě' channö isalaj, ate' bulu'cá'aně' ni' bönni' rőjáquiě' gudil-la ilún chi'ě le.

28

Rubaně' Jesús lu yöl-la' guti
(Mr. 16:1-8; Lc. 24:1-12; Jn. 20:1-10)

¹ Cate' chigudödi dza lá'ayi quégaquiě' bönni' judío, en chizá' rení' dza domingo, yöjyúgacanu María Magdalena en ia'tunu María na' yeru ba queě' Jesús.

² Tsálido'os gudödi budó' zxu'. Caní guca, tu' bötjě' tuě' gubáz lá'ayi queě' Xanru narúajě' yehua' yubá. Bidxině' ra' yeru ba na', ate' gudúě' guiöj blaga xzön na', en gurö'ě lu guiöj na'.

³ Nalá' lahui gubáz lá'ayi na' ca yösa bení', ate' xzıla'do'os naca lari' nácuě'.

⁴ Cate' yugu' bönni' na' rőjáquiě' gudil-la tapa chi'ě yeru ba na' bila'lé'eně' lě', guládxině', en gula'zxíziě'. Gula'dzö'ě lu yu, en guláquiě' ca bönni' nati caz.

⁵ Ní'irö gubáz lá'ayi na' gudxě' yugu' nigula na', rnně':

—Biti' gádxili'. Nözda' rugu'ljali'-ně' Jesús, bönni' na' bulu'dě'ě lě'e yaga cruz.

⁶ Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'.

⁷ Guli'tséaj na'a, guli'tsöjödxi yugu' bönni' usëda queë' chibubanë' Jesús lu yöl-la' guti, ate' na'a Lë cazë' inöruë' loli' saca' luyú Galilea. Ni' ulé'eli'-në'. Chigudxa' libí'ili' le gulu'ë Dios lu na'a.

⁸ Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelô söjácanu söjtíxjöi'iguequinu yugu' bönni' usëda queë'.

⁹ Tsanni ni' söjácanu, Jesús yöjtságuie' légacanu, ate' rë' légacanu:

—Padiux.

Ní'irö gula'bíga'nu ga zoë' Jesús, en bulu'nída'nu ni'ë. Gula'yéaj ládxi'gacanu Lë'.

¹⁰ Ní'irö Jesús rë' légacanu:

—Biti' gádxili'. Guli'tséaj, guli'tsöjtíxjöi' yugu' böcha'a tsöjáquie' saca' luyú Galilea, ate' ni' ulu'lé'enë' neda'.

Le gula'guíxjö'ë yugu' bönni' röjáquie' gudil-la

¹¹ Tsanni ni' söjácanu nigula na', yugu' bönni' na' röjáquie' gudil-la gulún chi'ë yeru ba na' bulu'dxinë' lu yödzö ni', ate' gula'guíxjöi'inë' yugu' bixúz unná bë' yúgu'të lë na' gulaca.

¹² Cate' chibulu'tubë' yugu' bönni' gula tu'zéajni'inë', gulún xtídzagaquie'. Ní'irö bulu'nödzjé' dumí zían quégaquie' bönni' na' röjáquie' gudil-la.

¹³ Të' légaquie':

—Caní innali': "Bila'dxinë' bönni' usëda queë' chi' dzö'ölö, en bulu'béajë' Lë' tsanni ni' rásitu'."

¹⁴ Channö huayönnë' bönni' rinná bë'ë lë ni, netu' uzéajni'itu' lë', en guntu' ga biti' bi gunë' queéli'.

¹⁵ Ní'irö yugu' bönni' röjáquie' gudil-la na' gula'zi'ë dumí na' ate' yöjéngaquie' ca na' chinazédagaquie'. Caní guca, tu'zë' bönni' judío didza' ni ga ridxintë na'a dza.

Jesús risöl-lë'ë yugu' bönni' gubáz queë'

(Mr. 16:14-18; Lc. 24:36-49; Jn. 20:19-23)

¹⁶ Ní'irö idxinéajtë' bönni' usëda queë' Jesús yöjáquie' luyú Galilea, ate' bila'dxinë' lu guí'ado' na' chibulu'finë' Jesús légaquie'.

¹⁷ Cate' bulu'lé'enë' Jesús, gula'yéaj ládxi'gaquie' Lë', pero bal-lë' gulaca chopa ládxi'gaquie'.

¹⁸ Ní'irö gubígui'ë Jesús ga na' nacu'ë, en rë' légaquie':

—Dios chinudödë' lu na'a yúgu'të yöl-la' unná bë' yehua' yubá, en luyú ni.

¹⁹ Que lë ni na', guli'tséaj, guli'tsöjsëdi yúgu'të bönachi idütë yödzölió. Buli'quíla légaquie' nisa, ugunli' dxin Lë' Dios Xuz, en Lë' Dios Zxí'ini, en Lë' Dios Bö' Lá'ayi.

²⁰ Guli'sëdi légaquie' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.

DIDZA' DXI'A BUZÚAJĚ' MARCOS

Libán beně Juan, bōnni' buquilě' bōnachi nisa
(Mt. 3:1-12; Lc. 3:1-9, 15-17; Jn. 1:19-28)

¹ Caní gusí lo didza' dxi'a ca guca queě' Jesucristo, Zxí'ině' Dios.

² Budxín lě na' buzúajě' lu guichi Isafás, bōnni' bě'ě didza' uláz queě' Dios, le gunně' Dios:

Buyútsóca', risól-la'a bōnni' gubáz quia', inōruě' Lo'.
Lě' upě'ě nōza ga tōdu'.

³ Yōn chi'ě tu bōnni' ulidzě' zidzaj lu lataj cá'asō, inně':

"Buli'pá'a nōza para idxín Xanru' yichaj lázxdo'oli'.

Buli'béaj li yugu' nōza lasi ga tōdě'."

⁴ Caní budxín, tu' ruquilě' Juan bōnachi nisa lu lataj cá'asō, en runě' libán para ila'dila bōnachi nisa, bōnni' na' bulu'bí'i láchxi'gaquiě' para uniti lahuě' Dios dul-la' nabága'gaquiě'.

⁵ Bila'rúaj bōnachi zían yúgu'tě yōdzō luyú Judea, enca' yōdzō Jerusalén, en yōjáquiě' ga na' zoě' Juan, ate' Juan na' buquilě' légaquiě' nisa lu yegu Jordán, bōnni' na' gula'xóalěpě' dul-la' nabága'gaquiě'.

⁶ Nácuě' Juan lari' néquini lítsa'ba' bōa', en núguě'ě lě'ě tu guídi. Rahuě'-ba' bōchi'zu, en re'jě' le zxixi que buzdo'.

⁷ Runě' Juan libán, rnně':

—Si' zě'ě bōnni' tōdi na'a, náparě' yōl-la' unná bě' ca neda'. Biti' naca' neda' lesaca' yéchua', para ilecja' xiráchuě' nudě'ě.

⁸ Neda' ruquila' libí'ili' nisa, pero Lě' guně' le rulu'isō yōl-la' ridila nisa ni, uchíziě' libí'ili' Dios Bō' Lá'ayi.

Ridilě' Jesús nisa
(Mt. 3:13-17; Lc. 3:21-22)

⁹ Tu dza ni' birúajě' Jesús yōdzō Nazaret luyú Galilea, ate' Juan na' buquilě' Lě' nisa lu yegu Jordán.

¹⁰ Cate' burúajě' Jesús lu nisa, la' ná'asō bilé'eně' guyalaj lúzxiba, en ruhuōtjě' Dios Bō' Lá'ayi, rulu'í cuině' ca tuba' gu'dódo', en bidisóaleně' Lě'.

¹¹ Biyōn chi'i nu ru'í didza' yehua' yubá, rna:

—Li' nacu' Zxí'ina'. Nadxí'ida' Li', en raza láchxa'a Li'.

Rě'ěni tu' xihui' gun ga ibáguě'ě Jesús dul-la'
(Mt. 4:1-11; Lc. 4:1-13)

¹² Ní'irō Dios Bō' Lá'ayi guchě'ě Jesús bayudxi lu lataj cá'asō.

¹³ Guzōě' Jesús lataj cá'asō na' idú choá' dza, ate' gu'uni Satanás tu' xihui' gun ga ibáguě'ě Jesús dul-la'. Guzóě' Jesús ga ni' ta'daba' bōa' guixi' dzō'ōba' guí'ado'. Yugu' gubáz lá'ayi queě' Dios gulácaleně' Jesús, en gula'gu'ě le gudahuě'.

Rusédině' Jesús bōnachi luyú Galilea
(Mt. 4:12-17; Lc. 4:14-15)

¹⁴ Gudōdi gula'gu'ě Juan na' lidxi guíě, sa'yéajě' Jesús luyú Galilea. Runě' libán ni' que didza' dxi'a ca rinná bě'ě Dios.

¹⁵ Caní rnně':

—Chibidxín dza. Chizóa idinná bē'ē Dios. Buli'bf'i ládxi'li, en guli'tséajlě didza' dxi'a ni.

Rulidzē' Jesús tapē' bönni' uzxön böla

(Mt. 4:18-22; Lc. 5:1-11)

¹⁶ Tsanni ni' ridě' Jesús ra' nísado' luyú Galilea, bilé'eně' Simón len Andrés, bönni' böchě'ē Simón na'. Nácagaquiē' uzxön böla, en ta'chiljě' yōxaj böla quégaquiē' lu nisa na'.

¹⁷ Jesús gudxě' légaquiē', rnně':

—Guli'dutá' neda', ate' guna' ga ichě'ēli' bönachi quia' neda', gunli' ca runli' rizönlí'-ba' böla.

¹⁸ La' bulu'cá' anatē' yōxaj quégaquiē', en sōjácaleně' Jesús.

¹⁹ Gudödě' Jesús ia' láti'do' ní'ilō, ate' bilé'eně' Jacobo, en Juan, yugu' xzí'ině' Zebedeo, nacu'ē lě'e bárcodo' quégaquiē', tu'úně' yōxaj böla quégaquiē'.

²⁰ Jesús la' bulidztě' légaquiē', ate' bulu'cá'aně' xúzgaquiē' Zebedeo, dzáguiē' yugu' huen dxin queē' lě'e bárcodo' na', ate' sōjácaleně' Jesús.

Tu bönni' yu'u lě' bö' xihui'

(Lc. 4:31-37)

²¹ Bila'dxině' Jesús, en yugu' bönni' dá'gaquiē' Lě' lu yödžö Capernaum. Cate' ni' naca dza lá'ayi quégaquiē' bönni' judío, guyáziē' Jesús yu'u ga tu'dubě' bönni' judío, en tu'sédě' queē' Dios, ate' gusi'lahuē' rusédině' nupa nudúbigaca ni'.

²² Bulu'bánině' ca na' rusédině' Jesús, tu' rusédině' ca runě' tu bönni' dē lu nē'ē, en calěga ca tuně' bönni' yudo' usédi.

²³ Zóatě' ca' tu bönni' yu'u lě' bö' xihui' lu yu'u ga na' tu'dubě' tu'sédě' queē' Dios, ate' gurödxi'ē bönni' na', rnně':

²⁴ —¿Bizxi rál-la'tu' quiu', Jesús, bönni' Nazaret? ¿Za'tsu' usunítu' netu'? Núnbē'a Li', nacu' Bönni' Lá'ayi queē' Dios.

²⁵ Jesús buzeně' le bach, rnně':

—Busayaj ru'u, en burúaj lu bönni' ni.

²⁶ Ní'irō bö' xihui' na' buxízida' bönni' na' yu'u lě', ate' gurödxi'a zidzaj, en la' burúajtě.

²⁷ Bulu'bánině' yúgu'tě bönni' nacu'ē ni', ate' gula'nabi luzě'egaquiē', ta'nně':

—¿Bizxi caz lě ni? ¿Naru' nácatsō xibá cubi? ¡Len yöl-la' unná bē' rinná bé'eně' yugu' bö' xihui', ate' tun ca rnně'!

²⁸ La' guzětě didza' que yöl-la' huáca queē' Jesús, ate' bila'yöni bönachi idútě luyú Galilea na'.

Ruúně' Jesús xiná'anu nigula queē' Pedro

(Mt. 8:14-15; Lc. 4:38-39)

²⁹ Ní'irō burúajě' Jesús lu yu'u ga na' tu'dubě' tu'sédě' queē' Dios, en la' guyéajlentě' Jacobo, en Juan, ate' bila'dxině' lídxigaquiē' Simón, en Andrés.

³⁰ Ni' dēnu xiná'anu nigula queē' Pedro, yú'unu tu xilá. La' gula'guíxjoi'iteně' Jesús ca raca queēnu.

³¹ Ní'irō gubígui'ē Jesús, ate' gudélě'ē ná'anu, en guchisě'-nu. La' burúajtě tu xilá na' yú'unu, ate' bupá'anu le gulahuē'.

Ruúně' Jesús zían nupa te'e

(Mt. 8:16-17; Lc. 4:40-41)

³² Cate' chiridžö', ca gudxía gubidza, la' dujuá'gacaté' yúgu'tě nupa te'e, en yugu' bönni' yu'u légaquiē' bö' xihui' ga zoě' Jesús.

³³ Yúgu'tè bònachi lu yödzo bila'guirò ga nu riyaza yu'u ga na' zoè' Jesús.

³⁴ Jesús bunè' zían nupa te'e, naca zían yödzöhuè' té'enè'. Bubéajè' ca' zían bö' xihui' yú'ugaca bònachi na'. Biti' bē'è lataj ila'nnè bö' xihui' na' tu núnbè'gaca Lè' Nu náquiè'.

Runè' libán Jesús luyú Galilea

(Lc. 4:42-44)

³⁵ Zí'acado' guyasè' Jesús, ni' naca chul-la. Burúajè' yödzo na', en sa'yéajè' tu lataj cá'asò, ate' ni' bulidzè' Dios.

³⁶ Simón, en nupa nacuá'len lè' sòjdíljagaquiè' Jesús.

³⁷ Cate' yójxáca'gaquiè' Lè', tè' Lè':

—Yúgu'tè bònachi tu'guilaj Li'.

³⁸ Ní'irò Jesús gudxè' légaquiè', rnnè':

—Uyéajru' yugu' dzaga yödzo, para guna' ca' libán ni'. Que lè ni na' birúaja'.

³⁹ Caní guca, gudodè' Jesús idú luyú Galilea, runè' libán lu yu'u gapa tu'dubè' bõnni' judío, tu'sédiné' queè' Dios, ate' rubéajè' bö' xihui' yú'ugaca bònachi.

Tu bõnni' ré'enè' huè' nudzu' ruzödi

(Mt. 8:1-4; Lc. 5:12-16)

⁴⁰ Tu bõnni' ré'enè' huè' nudzu' ruzödi bidxinè' ga zoè' Jesús. Buzóa zxibè', en gúta'yuè' lahuè', rnnè':

—Channö ré'ènu', huáca unu' neda'.

⁴¹ Jesús buéchi' ládxè'è lè'. Buli nē'è, gudanè' lè', en gudxè' lè':

—Rè'ènda'. Chinuhuóácu'.

⁴² Ca gunné' ca', la' bunítitè huè' ré'enè', en bõaquiè' dxí'ado'.

⁴³ Ní'irò Jesús buzenè' bach bõnni' na', en la' busól-la'tè' lè'.

⁴⁴ Caní gudxè' lè':

—Cuntu nu guío' ca bena' quiu', pero guyéaj, yójlu'i' cuinu' lahuè' bixúz, en yõjnödzej para le bõácanu' li' que yudo' ca na' gunná bē'è Moisés, lè na' uluí' bõnachi chinuhuóácu'.

⁴⁵ Burúajè' bõnni' ni, en gusí lahuè' riguixjõi'inè' bõnachi zían ca guca queè'. Tu' buzè' didza' ni, biti'rò guca tsáziè' Jesús yálajdo' tu lu yödzo, pero guzóasè' ní'ilò gapa naca lu lataj cá'asò. Bònachi yúgu'tè yödzo bila'dxin ga na' zoè' Jesús.

2

Bõnni' ré'enè' huè' nacú'uniè' bin

(Mt. 9:1-8; Lc. 5:17-26)

¹ Cate' chigudödi chopa tsonna dza, buáziè' Jesús yödzo Capernaum, ate' guzè' didza' zoè' yu'u.

² La' bulu'dúbitè bònachi zían ga na' zoè' Jesús, ga bidxintè bití'rò guzxéqui' ila'cuá' ni, ni ra' yu'u, ate' Jesús benè' libán que xtídzè'è lógaquiè'.

³ Ní'irò bila'dxinè' ga na' zoè' Jesús tapè' bõnni', nuá'agaquiè' tu bõnni' huè' nacú'uniè' bin.

⁴ Biti' guca ila'dxinè' lahuè' Jesús tu' nacuá' bònachi zían ni'. Que lè ni na' gula'saljè' ícjo'olò ca dódilò ga zoè' Jesús. Cate' budxi bulu'dxiè' yeru na', ni' bulu'zõtjè' le denè' bõnni' huè' na'.

⁵ Cate' gúquibe'enè' Jesús ca na' ta'yéajlè'è Lè', gudxè' bõnni' huè' na':

—Zxi'ina', chibunít lahua' li' ca naca dul-la' nabágu'u.

⁶ Rõ'õgaquiè' bal-lè' bõnni' yudo' usedi ni'. Ta'zá' ládxí'gaquiè', ta'nnè':

⁷ ¿Bizx que ru'ë caní didza' bönni' ni? Rucá'anë' cá'asö Dios. Cuntu nu bönni' gaca unifi lahuë' dul-la'. Tuzë' Dios gaca gunë' lë ni.

⁸ La' gúquibe'etenë' Jesús le ta'zá' láchí'gaquië', ate' gudxë' légaquië':

—¿Bizx que rizá' láchí'li' caní?

⁹ Biti' naca böniga nu guiësö bönni' huë' ni chibuníti lo dul-la' nabáguë'e, pero naca böniga nu gun ga huóasë', en u'ë le denë', en uzë'e ni'ë.

¹⁰ Guna' le gaca bë' neda', Bönni' Guljë' Bönachi, dë lu na'a luyú ni unifi lahua' dul-la' nabága'gaca bönachi.

Ní'irö Jesús gudxë' bönni' huë' na':

¹¹ —Li' rea': Guyasa. Buá' le denu', en böaj lidxu'.

¹² La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacua' ni'. Bulu'báninë' yúgu'të', en gula'gu'ë Dios yöl-la' ba, ta'nnë':

—Catu caz rilë'tu' le caní.

Jesús rulidzë' Leví

(Mt. 9:9-13; Lc. 5:27-32)

¹³ Burúajë' Jesús yödzo Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'.

¹⁴ Cate' ridödë' Jesús ni', bilë'enë' Leví, zxi'inë' Alfeo, rö'ë ga ruquízxjë' uláz que yödzo zi'tu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

¹⁵ Gudödi guca lë ni, rö'ë Jesús rahuë' lu yu'u lidxë' Leví na', ate' zían bönni' uquízxaj, en ia'bal-lë' bönni' cá'asö rö'ölengaquië' tsözxón Jesús, en yugu' bönni' usëda queë'. Caní guca, tu' rójaca bönachi zían len Jesús.

¹⁶ Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rö'ë rágulenë' tsözxón yugu' bönni' uquízxaj, en ia'bal-lë' bönni' cá'asö, gulë' yugu' bönni' usëda queë' Jesús, ta'nnë':

—¿Bizxi caz runtsë'? ¡Rë'aj rágulentsë' yugu' bönni' uquízxaj, en ia'bal-lë' bönni' dul-la'!

¹⁷ Biyönnë' Jesús didza' ni tu'ë, en gudxë' légaquië':

—Nupa nacua' dxi'a bití' naquíniguequi nu un bönachi, pero nupa te'e naquíniguequi nu un bönachi. Za'a neda', calëga dulídzagaca' bönachi tsahui', pero rulídzagaca' bönachi dul-la' para ulu'bí'i láchí'gaca.

Ru'ë Jesús didza' que yöl-la' run gubasa

(Mt. 9:14-17; Lc. 5:33-39)

¹⁸ Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nnä':

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' bití' tunë' gubasa?

¹⁹ Bubi'ë didza' Jesús, rë' légaquië':

—¿Naru' réquitseli' ilún gubasa nupa nacua' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', bití' gaca ilunë' gubasa.

²⁰ Idxín dza cate' udúë' bönni' na' rutsaga në'ë, en bíti'rö sóalenë' légaquië', ate' dza ní'irö ilunë' gubasa.

²¹ 'Cuntu nu bönni' udë'ë tu lari' cúbido' lu lari' chinatëbi, tu' utsupí' lari' cubi na', en huachöza' lari' tëbi na', ate' huaröza'rö lari' tëbi na'.

²² Lësca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate'

ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

Bönni' dá'gaquië Jesús ta'lecjë do dza lá'ayi
(Mt. 12:1-8; Lc. 6:1-5)

²³ Tu dza lá'ayi quégaquië bönni' judío, gudödë Jesús gapa dë yöla zxoá' xtila, ate' bönni' usëda queë gula'sí lógaquië ta'lecjë' do ga dxía zxoá' xtila.

²⁴ Ní'irö bönni' yudo' fariseo gulë' Jesús, ta'nnë':

—Buyütsöca'. ¿Bizx que tunë' bönni' dá'gaquië Li' le cabí ral-la' gunru' dza lá'ayi?

²⁵ Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacua'len lë'

²⁶ ate' guyázië' lu yu'u queë Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' bití' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacua'lenë' lë'.

²⁷ Ní'irö Jesús gudxë' légaquië':

—Dios benë' dza lá'ayi le ulu'z'í xibë bönnachi, calëga benë' bönnachi para ilún chí'i dza lá'ayi.

²⁸ Que lë ni na', neda', Bönni' Guljë' Bönnachi, naca' Xani dza lá'ayi.

3

Ruínë' Jesús tu bönni' narequi' në'ë
(Mt. 12:9-14; Lc. 6:6-11)

¹ Leyúbölo guyu'ë Jesús tu lu yu'u ga tu'dubë' tu'sëdë' bönni' judío queë Dios, ate' zoë' ca' ni' tu bönni' narequi' në'ë.

² Bönni' yudo' nacua'ë ni' tu'yúë' Jesús channö ünë' bönni' na' dza lá'ayi, tu' tē'ennë' ulu'zégui'ë Lë' didza'.

³ Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönnachi ni.

⁴ Jesús gunábinë' bönnachi ni', rnnë':

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönnachi yöl-la' na'bán o usunítiru' le?

Gula'cuá' dxisö bönnachi ni'.

⁵ Ní'irö len yöl-la' rilé queë', buyüë' Jesús bönnachi na' nacua' gásibi'ilë'. Ruhuf'innë' tu' nácagaquië' zidi ladxí'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' böácate' dxi'ado' në'ë.

⁶ Ní'irö bulu'ruájë' bönni' yudo' fariseo, ate' la' guluntë' tsözxön didza' len bönni' dá'gaquië' Herodes bi ilunë' queë' Jesús, para ilútië' Lë'.

Tu'dubi bönnachi zían ra' nísado'

⁷ Buzë'ë Jesús ni' tsözxön len bönni' dá'gaquië' Lë', en bidxinë' ra' nísado', ate' söjácalen Lë' bönnachi zían narúajgaca luyú Galilea, en luyú Judea.

⁸ Bönnachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacua' idú gásibi'ilö ga nacua' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxön runë' Jesús.

⁹ Que lë ni na' Jesús gunná bé'enë' bönni' dá'gaquië' Lë' ulu'cöztica'së' tu bárcodo' ga gaca cuenë', para cabí ulu'quí bönnachi zían na' Lë'.

10 Caní guca tu' chibunë' zían nupa te'e, ate' bila'guírö bönachi zían na' ga zoë' para ila'gán Lë'.

11 Cate' bö' xihui' yú'ugaca bönachi bila'lë'e Jesús, bulu'dxiga' bönachi na' yú'ugaca xini'ë Jesús, ate' gula'bödxí'a, ta'nná:

—Nacu' Li' Zxí'inë' Dios.

12 Jesús buzenë' le bach bö' xihui' na', cabí ila'guixjö' nu náquië' Lë'.

Riböë Jesús chinnu bönni' ilácagaquië' gubáz queë'

(Mt. 10:1-4; Lc. 6:12-16)

13 Ní'irö gurenë' Jesús tu lu guí'ado', ga ni' bulidzë' nupa rë'ënë'. Gula'biguë'ë bönni' ni gásibi'ilë'.

14 Jesús bucu'ë chinuë' bönni' ni, para ila'cuá'lenë' Lë', en para isöl-lë'ë légaquië' tsöjéngaquië' libán.

15 Budödë' lu ná'agaquië' yöl-la' huáca ulu'unë' nupa te'e, en ulu'béajë' bö' xihui' yú'ugaca bönachi.

16 Caní nácagaca lágaquië':

Simón, (buzöë' Jesús ia'tú lë', Pedro),

17 Jacobo,

Juan, (bönni' böchë'ë Jacobo, ate' nácagaquië' zxi'inë' Zebedeo. Chopë' ni, Jesús buzöë' ia'tú lágaquië', Boanerges, le rnna lu didza' xidza': Bönni' sínia' ca guziú'),

18 Andrés, Felipe, Bartolomé, Mateo, Tomás,

Jacobo, (zxi'inë' Alfeo),

Tadeo,

Simón, (bönni' ruí'i ládxë'ë yödzo queë'),

19 Judas Iscariote, (bönni' udödë' Jesús lu ná'agaquië' bönni' ilútië' Lë').

Yugu' bönni' yudo' ta'nnë': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u.

20 Leyúbölö bila'guírö bönachi zían ga zoë' Jesús, ate' bití'rö guta' lataj bi ilahuë' Jesús, en bönni' na' dá'gaquië' Lë'.

21 Cate' dí'a dza queë' Jesús bila'yönnë' ca raca queë', bila'dxinë' ni' para ulu'ché'ë Lë', ta'nnë': Richixi icjë'.

22 Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

23 Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'?

24 Channö ila' rúaj choplö bönachi tu yödzo, en ila'díl-lalen luzë'eguequi, bití' gaca idía' yödzo na'.

25 Lësca' caní channö ila' rúaj choplö bönachi nacué' tu yu'u, en ila'díl-lalen luzë'eguequi, bití' gaca ila'día' bönachi nacué' yu'u na'.

26 Que lë' ni na', channö Satanás tu' xihui' tá'baga' luzë'e, narúajgaca choplö bö' xihui'. Bití' gaca idía' yöl-la' unná bë' que, pero chizóa údxi que.

27 Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequí' cuéaj le dzö'ö lidxë'.

28 'Le nácatë' rea' libí'ili': Dios gaca uniti lahuë' bönachi ca naca yúgu'të dul-la' nabága'gaca, en ca naca yúgu'të didza' schanní' ta'nná,

²⁹ pero núti'tës nu innë schanni' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

³⁰ Caní gunnë' Jesús tu' ta'nnë' queë' bönni' yudo' usedi na', ta'nnë':
—Tu' xihui' dzaga Lë'.

Nu naca xinë'ë Jesús, en bönni' böchë'ë

(Mt. 12:46-50; Lc. 8:19-21)

³¹ Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lö'alö, en gula'söl-lë'ë nu tsöjlidza Jesús.

³² Bönachi zián na' rö'gaca cuitë' Jesús gulë Lë', ta'nná:

—Yugu' bönni' böchu'u, enca' xinó'o nacu'ë lö'alö, tu'lidzë' Li'.

³³ Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

³⁴ Ní'irö buyüë' nupa na' rö'gaca gásibi'ilë', rnnë':

—Buli'yútsöca'. Nupa ni nácgaca ca xiná'a, en yugu' bönni' böcha'a.

³⁵ Nu run ca rë'enë' Dios, nu ni naca ca bi'i böcha'a, en bi'i zana' enca' xiná'a.

4

Rucúdzu'ë didza' Jesús ca naca queë' bönni' guz

(Mt. 13:1-9; Lc. 8:4-8)

¹ Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zián ga zoë', ate' gurenë' Jesús tu lë'e bárcodo' zxoá lu nisa na', en gurö'ë ní', ate' yúgu'të bönachi na' gula'cuá' luyú ra' nisa na'.

² Zián le busédinë' Jesús légaquië', bucúdzu'ë didza'. Tsanni ni' rusédinë' légaquië', rnnë':

³ —Gulí'zë nágali' didza' ni. Birúajë' tu bönni' guz, sòjësië' xisedo'.

⁴ Tsanni ni' rúsië', gulasi bal-la xisedo' na' ra' nöza, ate' bila'dxinba' biguínido', gulë'ajba' le.

⁵ Gulasi ia'bal-la xisedo' na' ga rö'ö guiöj ga biti' rö'ö yenni' yu. Bayön gula'lén xisedo' na' tu' cabí rö'ö yenni' yu.

⁶ Ní'irö cate' gulén gubidza, buquexu' le, ate' gubidxi, tu' cabí nun luí ga rë'.

⁷ Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' biti' bi bunödzej.

⁸ Gulasi ia'bal-la xisedo' na' ga naca luyú bëbu, ate' gula'zxön, en xitsá' ra' gula'bö'. Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia' tú bunödzej ia'tsónnalalaj ca', ate' ia'tú na' bunödzej ia'tú gayuá' ca'.

⁹ Ní'irö Jesús gudxë' légaquië', rnnë':

—Nu zoa nagui, en riyöni ral-la' uzé nagui.

Rigúxjö'ë Jesús bizx que rucúdzu'ë didza'

(Mt. 13:10-17; Lc. 8:9-10)

¹⁰ Cate' chibugá'anë' tuzë Jesús, bila'dxín nupa dá'gaca Lë' ga zoë', núngaca tsözxön idxinnutë' bönni' uséda queë', ate' gula'nábinë' Lë' bi sa'yéaj lë na' bucúdzu'ë didza'.

¹¹ Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bë'ë Dios, pero nupa na' biti' nácgaca tuz len rë'u, ru'ílena' légaquië' didza' yugu' le rucúdzu'a didza'.

¹² Caní runa' para gaca lë na' nazúaj lu guichi lá'ayi, rnna:
Ulu'yüë', en biti' ila'lë'enë'.

Ulu'zè nágagaquiè, en biti' ila'yéajni'inè'.

Biti' ulu'bí'i ládxi'gaquiè' para gaca uniti lahua' légaquiè' ca naca dul-la' nabága'gaquiè'.

Rigu'xjö'ë Jesús le bucúdu'ë didza'

(Mt. 13:18-23; Lc. 8:11-15)

¹³ Jesús gudxè' ca' yugu' bönni' dá'gaquiè' Lè', rnnè':

—¿Naru' cabi réajni'itseli' lè na' bucúdu'a didza'? ¿Nacxi caz gaca tséajni'ili' ia'zica'rö le ucúdu'a didza'?

¹⁴ Bönni' guz na' náquiè' nu ruzè xtídzè'è Dios.

¹⁵ 'Nácagaca bal-la bönachi ca xisedo' na' gulasi ra' nöza. Ta'yönnè' xtídzè'è Dios, en ca ta'yönisinè' ca', la' za'tè Satanás tu' xihui', en rigúa didza' na' bidxín lu icja ládxi'do'gaquiè'.

¹⁶ 'Nácagaca ia'bal-la bönachi ca xisedo' na' gulasi ga rö'ö guiöj. Ta'yönnè' didza' na', ate' len yöl-la' rudzeja quégaquiè' ta'zi'è le.

¹⁷ Biti' riyaza icja ládxi'do'gaquiè', ate' tu chí'isö ta'dè'è le. Cate' bi raca quégaquiè', o zoa nu ribía ladxi' légaquiè' tu' ta'dè'è didza' na', la' tu'huöatè ládxi'gaquiè'.

¹⁸ 'Nácagaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnè' didza' na',

¹⁹ pero tuí'i ládxi'gaquiè' le nácagaca que yödzülió ni. Nazí' yé'eguequinè' tu' nadxi'iguequinè' yugu' yöl-la' tsahui', en ta'zè ládxi'gaquiè' yugu' le dè. Ta'yaza icja ládxi'do'gaquiè' yúgu'tè lè ni, en tu'suniti didza' na', para cabí gun dxin lu icja ládxi'do'gaquiè'.

²⁰ 'Nácagaca ia'bal-la bönachi ca xisedo' na' gulasi ga naca luyú bëbu. Ta'yönnè' didza' na', en ta'zi' lu ná'agaquiè' le, ate' run dxin lu icja ládxi'do'gaquiè'. Nácagaca bal-la bönachi caní ca xisedo' na' bulu'nödzej ia'chí uruá huéaj. Nácagaca ia'bal-lè' ca xisedo' na' bulu'nödzej ia'tsónnalalaj ca', ate' nácagaca ia'bal-la bönachi ca xisedo' na' bulu'nödzej ia'tú gayuá' ca'.

Rucúdu'ë didza' Jesús que tu le rigú'u bení'

(Lc. 8:16-18)

²¹ Jesús gudxè' ca' bönni' dá'gaquiè' Lè', rnnè':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'.

²² Yúgu'tè le nagachi' ilá' lahui, ate' yúgu'tè le raca balándo'os ila'rúaj ga liná'.

²³ Nu zoa nagui, en riyöni ral-la' uzé nagui.

²⁴ Gudxè' ca' légaquiè':

—Guli'güi' ládxi'li' le riyönili'. Ca naca le ruríxili', la' leze urixè' Dios queéli', ate' gunnè' queéli' ia'latí'.

²⁵ Nu nazí' i le za' que, gu'è que ia'lati', pero nu biti' nazí' i le, la's dui le dè que, udúa.

Rucúdu'ë didza' Jesús ca rizxön zxoá' xtila

²⁶ Gunnè' ca' Jesús:

—Ca raca ni le rinná bë'è Dios naca ca raca cate' ruchejè' tu bönni' zxoá' xtila lu yu.

²⁷ Chí'i dzö'ölö rásiè', en riyasè' cate' za' rení'. Ta'lén zxoá' xtila na', en ta'zxön, pero biti' nözinè' lè' nacxi raca ta'zxön.

²⁸ La' cuinsi luyú na' ruxõn le nadúzgaca luyú na', zí'alõ xiyazi, ní'irõ za' do que, en tõi na' cuía xui'i nál-la lu do que.

²⁹ Cate' chinal-la xui'i na', la' tséajtë' tsõjchibë' do na' tu' chibidxín dza uzi'ë xui'i.

Rucúdzu'ë didza' Jesús ca raza que xisé mostaza
(Mt. 13:31-32; Lc. 13:18-19)

³⁰ Gunnë' ca' Jesús:

—¿Bizxi caz innaru' ca raza ni le rinná bë'ë Dios? ¿Bizxi ucúdzu'ru' didza' ca raza?

³¹ Raca ca raza que tu xisedo' mostaza. Cate' riyaza luyú naca tu xisedo' nácatëro cuidi' ca yúgu'të xisedo' dzõ'õ luyú,

³² pero cate' chinadúz, rilén, en rixzõntëro ca yúgu'të guixi' cuan rõ'gaca luyú. Tsca run yana' ni'a nè'e, gaca ila'dxinba' biguímido', en ulu'dxiaba' xicá'agacaba' lu zxul-la que.

Ca rugunë' dxin Jesús le rucúdzu'ë didza'
(Mt. 13:34-35)

³³ Caní guca, busédinë' Jesús légaquië', en zíanrõ ca' le bucúdzu'ë didza' tsca guca ila'yéajni'inë'.

³⁴ Yúgu'të didza' bé'lenë' bõnachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bõnni' usëda queë'.

Jesús ribequi dxíë' bö' budunu'
(Mt. 8:23-27; Lc. 8:22-25)

³⁵ La' dza ná'asõ, cate' ridzõ', Jesús gudxë' yugu' bõnni' dá'gaquië' Lë', rnnë':
—Tõditsõca'ru' ia'tsólá'a nísado' ni.

³⁶ Ní'irõ bulu'lá'alenë' bõnachi zían nacua' ni', ate' bulu'së'ë bárcodo' ga na' chizóasë' Jesús. Gula'cuá' ca' ni' ia'zica'rõ bárcodo' sõjácálen légaquië'.

³⁷ Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'.

³⁸ Dë' rásie' Jesús lu xicügüë' ga naca xitsá'alõ lë'e bárcodo' na', ate' bulu'subanë' Lë'. Të' Lë':

—¡Bõnni' Usedi! ¿Naru' cabí ruí'i lãdxi'tso' netu'? ¡Huáti caztu' lu nisa ni!

³⁹ Ní'irõ guyasë' Jesús, en gunná bé'enë' bö' na' recja, gunnë':

—Gurõ'õ dxi.

Gudxë' ca' nisa na', gunnë':

—Dxisõ guzóa.

Gurõ'õ dxi bö' na' guyecja, en guzóa dxi lu nísado' na'.

⁴⁰ Ní'irõ Jesús gudxë' yugu' bõnni' dá'gaquië' Lë', rnnë':

—¿Bizx que radxi ridzõbili' caní? ¿Naru' cabí réajlë'ëli' Dios?

⁴¹ Ní' tádxinë' gulë luzë'ë tuë' ia'tuë':

—¿Nuzxi caz bõnni' ni? ¡Tun bö' recja, en nísado' ca rnna xtídzë'ë!

5

Bõnni' Gadara yu'u bö' xihui' lë'
(Mt. 8:28-34; Lc. 8:26-39)

¹ Ní'irõ bila'dxinë' Jesús, en yugu' bõnni' dá'gaquië' Lë' ia'tsólá'a nísado' ga naca lu xiyúgaca bõnachi Gadara.

² Cate' burúajë' Jesús lë'e bárcodo' na', tu bõnni' rirúajë' zcan bulóaj ga nacua' yeru ba la' dutsáatë' Lë'. Bõnni' ni yu'u bö' xihui' lë',

3 ate' nun xilatjè' ga na' nacuá' yeru ba. Cuntu nu guca guga' bönni' na', calèga len du guiè.

4 Zián luzuí bulu'zòè' bregui' guiè yen nē'è, en ni'è, en gulúgui'è lè' du guiè. Yugu' du guiè na' bulé'è, ate' bregui' guiè na' guditsjè'. Biti' rizéqui'nè' nu bönni' inná bé'enè' lè'.

5 Ridática'sè' ribòdxi'è rēla, en tē dza ga na' nacuá' yeru ba, en gapa naca lu gu'ado', run huè' cuinè' yugu' lu guiój dzō'ō ni'.

6 Cate' bilé'enè' zē'è zi'tu' Jesús, guxíti'è guyijè' ga na' zē'è, ate' buzóa zxibè' lahuè' Lè'.

7 Bē'è zidzaj didza', rē' Jesús:

—¿Bizxi ral-la'a quiu' Jesús, Zxi'inè' Dios nayépisètèrè'? Ni'a queè' Xanru' Dios ráta'yua' lo', bití' usaca' zi'u neda'.

8 Caní gunnè' bönni' na' tu' chigudxè' Jesús bö' xihui' na':

—Li', bö' xihui', burúaj lu bönni' ni'.

9 Jesús gunábinè' le, rnnè':

—¿Bi leu'?

Bubí'i didza' le, gudxi Lè':

—Lea': Le Zián, tu' rō'ō ziantu'.

10 Gula'nabi yechi' yugu' bö' xihui' na' Jesús para cabí isól-lè'è léguequi zi'tu' luyú ni'.

11 Nacuá'aba' cuchi zián lu gu'ado' ní'isō, ta'daba' táguba' ni'.

12 Gula'nabi yechi' bö' xihui' na' Jesús, ta'nná:

—Gusól-la' netu' ga ni' dzō'ōba' cuchi zián. Bē' netu' lataj tsójtúsú'ugacatu'-ba'.

13 La' bē'tè' Jesús léguequi lataj, ate' bila'rúaj bö' xihui' na', en yójtúsú'ugaca cuchi zián na', ate' gula'xíti'ba' cuchi zián na', yöjbíxigacaba' ga naca ra' gu'a, yöjcházagacaba' nísado'. Lu nísado' na' gula'yépiba' nisa, gulátiba', en nácacacaba' ca galaj gayuá'aba'.

14 Ní'irō bulu'zxunnaj nupa ni' gulún chi'i cuchi zián na'. Yójtíxjö'i'iguequinè' bönachi lu yódzō ni', enca' bönachi nacuá' la' guixi' ni'. Bila'rúaj bönachi lu yódzō, söjyúgaquiè' bizxi na' guca ni'.

15 Cate' bila'dxinè' ga ni' zoè' Jesús, bila'lé'enè' bönni' na' zí'alō yú'ugaca bö' xihui' lè'. Bönni' ni rō'è ni', nácuè' lari', en zoè' dxí'ado', ate' guladxí bönachi na'.

16 Nupa na' bila'lé'e le benè' Jesús gula'guíxjö'i' bönachi na' bila'rúaj lu yódzō ca na' guca queè' bönni' na' zí'alō yú'ugaca bö' xihui' lè', enca' ca guca qué'gacaba' cuchi na'.

17 Ní'irō gula'sí lógaca bönachi zián na' ta'ta'yu lahuè' Jesús urúajè' lu xiyú'guequi.

18 Cate' bubenè' Jesús lè'e bárcodo', bönni' na' zí'alō yú'ugaca bö' xihui' zián lè', gúta'yue' lahuè' Jesús gu'è lè' lataj tséajlenè' Lè'.

19 Jesús bití' bē'è lè' lataj, pero gudxè' lè':

—Bōaj lidxu'. Yójtíxjö'i' di'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a lí'.

20 Söhuójè' bönni' na', en ruzè' didza' yugu' yódzō Decápolis ca nácacaca le zxön benè' Jesús queè', ate' bulu'bani yúgu'tè bönachi nacuá' yugu' yódzō ni'.

*Bi'i nigula queè' Jairo, en nigula na' gudannu lari' nácuè' Jesús
(Mt. 9:18-26; Lc. 8:40-56)*

21 Cate' budxinè' Jesús ia'tsolá'a nísado' na', ní'irō bulu'dubi bönachi zián ga na' zoè' ra' nísado'.

22 Bönni' lë' Jairo, bönni' rinná bē'ē lu yu'u ga tu'dubē' bönni' judío, en nazedē' queē' Dios, bidē' ga zoē' Jesús. Cate' bilé'enē' Jesús, buzóa zxibē' lahuē',

23 en gúta'yuē' lahuē', rnnē':

—Chiraquí gátibi' bi'i nigúlado' quia'. Gudá ixóa no'o lēbi' para huóacabi', en biti' gátibi'.

24 Sa'yéajlenē' Jesús lë', ate' bönachi zían sōjácalen Jesús, tu'quirō Lē'.

25 Tu nigula, chinaca chinnu iz ré'enu, zóanu ca' ni'. Biti' ruhuí'i rōn queēnu que huē' quégaca cázanu nigula.

26 Yenni' chigudí'i guxzáca'nu lu ná'agaquiē' zían bönni' tu'únē' bönachi. Nítisō chibutōnu dēra le dē queēnu, tu' cabí bi gúcalen lēnu, pero riyali' queēnu.

27 Cate' biyōninu tuf'i didza' bönachi ca naca queē' Jesús, gudōdinu ládjalō bönachi zían na', en bidxinu zaca' cúdzu'lē' Jesús, en gudannu lari' nácuē'.

28 Caní bennu tu' rnnanu: “Channō cansa' le nácuē', huóaca'.”

29 La' buí'tē rōn queēnu, ate' réquibe'enu chibōácanu que le guca queēnu.

30 La' gúquibe'etenē' Jesús ben dxin yōl-la' huáca queē', ate' buécjē', ruyúē' bönachi zían na'. Rnnē':

—¿Nuzxi na' gudán neda'?

31 Ní'irō bönni' dá'gaquiē' Lē' tē' Lē', ta'nnē':

—Rilé'e quezínu' bönachi zían ni tu'quirō Li', en rnnatso': “¿Nuzxi na' gudán neda'?”

32 Ruyúē' Jesús gásibi'ilē' para ilé'enē' nuzxi na' gudán Lē'.

33 Ní'irō nigula na' gubíga'nu lahuē'. Rádxinu, en rizxízinu tu' chinōzínu bi na' guca queēnu, ate' buzóa zxíbinu lahuē' Jesús, en gúdxinu Lē' idútē le nácatē.

34 Jesús rē'ē-nu:

—Nigúlado'. Chibōácu' tu' réajlē'u neda'. Bōaj lidxu' idú ládxi'u. Tsaz nuhuóácu' que le guca quiu'.

35 Tsanni ni' ru'ē caní didza' Jesús, bönni' narúajgaquiē' lidxē' bönni' na' rinná bē'ē lu yu'u ga tu'dubē' tu'sedē' queē' Dios bila'dxnē' ni', en tē' bönni' na':

—Chigútibi' bi'i nigúlado' quiu'. Bítirō upízxjanu' Bönni' Usedi.

36 Biti' bē' ládxiē' Jesús lē na' ta'nnē', ate' gudxē' bönni' unná bē' na', rnnē':

—Biti' gádxinu'. Guyéajlē'ēsē' Dios.

37 Biti' bē'ē lataj Jesús tsōjácalen Lē' ia'zíca'rō bönachi, pero légacasē' Pedro, en Jacobo, en Juan, bōché'ē Jacobo na'.

38 Cate' bidxinē' lidxē' bönni' na' rinná bē'ē ga tu'dubē' tu'sedē' queē' Dios, bilé'enē' raca dzatsa, enca' nupa ni' ta'bōdxi, en nupa ta'bōdxi yechi'.

39 Guyáziē' Jesús, en gudxē' légaquiē':

—¿Bízx que rutsátsali', en ribōdxili' caní? Biti' nátibi' bi'i nigúlado' ni. Rásisibi' na'.

40 Ní'irō bulu'titjē' Jesús, pero Lē' bubéajē' yúgu'tē bönachi na' ní'ilō, ate' guchē'ē xuz xiná'abi' bi'i nigúlado' na', enca' nupa nacué'len Lē', ate' guyáziē' ga na' dēbi'.

41 Gudélē'ē ná'abi' bi'i nigúlado' na', en gudxē'-bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa.

42 La' guyásatēbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacué' ni'.

43 Ní'irö Jesús gunná bé'enë légaquië' cuntu nu ulu'siyönnë' lë na' guca. Gudxë légaquië':

—Guli'güi' le gágubi' bi'i nigúlado' ni.

6

Ridxinë' Jesús Nazaret, le naca ladzë'

(Mt. 13:53-58; Lc. 4:16-30)

1 Buzë'ë Jesús ni', budxinë' ladzë', ate' yugu' bönni' dá'gaquië' Lë' sôjácalenë' Lë'.

2 Cate' bidxín dza lá'ayi quégaquië' bönni' judío, gusí lahuë' Jesús rusédinë' bönachi ga na' tu'dubë' tu'sedë' queë' Dios. Gula'cuá' bönachi zían ni' ta'yöni Lë'. Bulu'bani, ta'nná:

—¿Gazxi caz bizédë' bönni' ni yugu' lë ni? ¿Bizxi caz yöl-la' réajni' ni nadéli'në'? ¿Nacxi caz runë' le nácagaca bë' na' zá'gaca yehua' yubá?

3 Náquië' bönni' ni gubëdxi yaga na', en zxi'ininu María. Náquië' böchi'gaquië' Jacobo, en José, en Judas, en Simón. Nigula zanë' nacua'lennu ca' rë'u.

Que lë ni na' bulu'cá'anë' Lë' cá'asö.

4 Ní'irö Jesús gudxë' légaquië', rnnë':

—Gátitës tunë' bal nu bönni' ru'ë didza' uláz queë' Dios, pero bönachi uládz queë', en bönachi dí'a dza queë', en bönachi nacua' lidxë' biti' tun lë' bal.

5 Que lë ni na' biti' guca gunë' Jesús nitú yöl-la' huáca zxon ni'. Bunsë' nababasö bönachi te'e cate' guxóa në'ë léguequi.

6 Bubáninë' Jesús tu' cabí ta'yéajlë' Lë'. Gudödi na' gudödë' yugu' yödzödo' nacua' gásibi'ilö, rusédinë' bönachi ni'.

Risöl-lë'ë Jesús bönni' dá'gaquië' Lë' tsöjéngaquië' libán

(Mt. 10:5-15; Lc. 9:1-6)

7 Ní'irö bulidzë' Jesús idxínnutë' bönni' dá'gaquië' Lë', en gusí lahuë' risöl-lë'ë légaquië' chopa huéajgaquië'. Budödë' lu ná'agaquië' yöl-la' unná bë' ulu'béajë' yugu' bö' xihui' yú'ugaca bönachi.

8 Gunná bé'enë' légaquië' biti' bi ilu'ë la' nöza, calëga yöxaj, calëga yöta, en calëga dumí biti' ila'gu'ë lu buzudi quégaquië', pero iluá'asë' xiyágado'.

9 Ral-la' ulu'dë'ë xiráchugaquië', pero calëga chopa lari' ulu'xóa yéngaquië'.

10 Gudxë' ca' légaquië':

—Gátitës ga tsú'uli' tu yu'u, guli'sóa yu'u na' cate' uzá'aröli' yödzö na'.

11 Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zé nágagaquië' xtídza'li', buli'rúaj ni', en buli'quinnaj bëchtö da' lë'e lábali'. Lë ni gaca bë' nabága'gaquië' xíguia'. Le nácate' rea' libí'ili', cate' idxín dza ichúguië' Dios quégaca bönachi, ila'gu'i ila'záca'rö bönachi lu yödzö na' ca ila'gu'i ila'zaca' bönachi Sodoma, en Gomorra, yugu' yödzö na' busunitië' Dios.

12 Ní'irö bila'rúajë' bönni' dá'gaquië' Lë', yöjéngaquië' libán ca ral-la' ulu'bí'i ládxi'gaca bönachi.

13 Bulu'béajë' zían bö' xihui' yú'ugaca bönachi. Gula'gu'ë le za zían nupa te'e, ate' bulu'huóáquië'.

Ca bëtigaquië' Juan, bönni' buquilë' bönachi nisa

(Mt. 14:1-12; Lc. 9:7-9)

14 Biyönnë' Herodes, bönni' unná bë', ca naca le runë' Jesús, tu' rizë didza' gátitës que yöl-la' huáca queë'. Bal-la bönachi ta'nná:

—Chibubanë' Juan, bönni' ni' buquilé' bönachi nisa, lu yöl-la' guti. Que lë ni na' napë' yöl-la' huáca runë' yugu' lë ni.

¹⁵ Ia'bal-la bönachi ta'nná:

—Naquië' Elías, bönni' bë'ë didza' uláz queë' Dios dza ni'te.

Ia'bal-la bönachi ta'nná:

—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

¹⁶ Cate' biyönnë' Herodes yugu' lë ni, gunné':

—Naquië' Juan, bönni' na' burixa' yenë'. Chibubanë' lu yöl-la' guti.

¹⁷ Caní gunné' Herodes tu' gusöl-lë'ë lë cazë' bönni' yöjxöngaqüë' Juan na', ate' gulúgui'ë lë' du guié lu yu'u lidxi guié. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, böché'ë Herodes na'. Herodes gudüë'-nu Herodías na', en butsga ná'alenë'-nu.

¹⁸ Juan na' gudxë' Herodes:

—Biti' ral-la' sóalenu'-nu nigula queë' böchu'u.

¹⁹ Que lë ni na' gusí guró'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guzxéqui'nu

²⁰ tu' rádxinë' Herodes Juan. Nözinë' náquië' Juan na' tsahui', en lá'ayi. Que lë ni na' gudapa chi'ë lë', en buzë náguie' lë' idú ládxë'ë sal-la' lë na' rnnë' Juan ben ga guró'ë böniga Herodes na'.

²¹ Ní'irö bidxín tu dza guzxéqui'nu Herodías na', le naca dza runë' Herodes laní que dza guyë'enë' iz. Bupë'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' röjáquië' gudil-la, enca' bönni' nácaquië' lo luyú Galilea.

²² Guyázabi' bi'i nigula queënu Herodías ga na' t'ë'aj tahuë', en buyá'abi' lógaquië'. Guyaza ládxë'ë Herodes ca runbi', en gula'yaza ládxig'aca ca' nupa t'ë'aj tágulen lë'. Ní'irö Herodes gudxë'-bi' bi'i nigula na', gunné':

—Gunaba bi rë'ënu' gunna' quiu', ate' guna' ca'.

²³ Benë' tsutsu xtídzë'ë, gudxë'-bi':

—Ní'a queë' Xanru' Dios gunna' quiu' bití'tës bi inabu' ga idxintë gatsaj ga rinná bë'a.

²⁴ Burúajbi' lëbi', ate' gunábabi' xiná'abi':

—¿Bizxi inábatsa'?

Lënu gúdxinu-bi':

—Icjë' Juan, bönni' buquilé' bönachi nisa, inabu'.

²⁵ La' buázatëbi' ga na' zoë' Herodes, en rëbi'-në':

—Rë'ënda' ixü' quia' na'a lu zxiga' zxön icjë' Juan, bönni' na' buquilé' bönachi nisa.

²⁶ Ní'irö bu'innë' Herodes, pero tu' buzötjë' Dios, en tu' bila'yöni ca' nupa tágulen lë', bití' gú'unnë' initi xtídzë'ë na' guzxf' lu në'ë queëbi'.

²⁷ Herodes la' gusöl-la'të' tu bönni' rejë' gudil-la zoë' rapa chi'ë, ate' gunná bé'enë' lë' tsöjxi'ë icjë' Juan.

²⁸ Bönni' na' rejë' gudil-la guyijë' lidxi guié, yöjrixë' yen Juan na', ate' bu'ë icjë', nuxóë' le lu zxiga' zxön. Budödë' le lu ná'abi' bi'i nigula na', ate' lëbi' bunödzejabi' le queënu xiná'abi'.

²⁹ Cate' bönni' dá'gaquië' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yöjcáchi'gaquië' lë' yeru ba.

Rugahuë' Jesús zianró ca chi-un gayuá' bönachi
(Mt. 14:13-21; Lc. 9:10-17; Jn. 6:1-14)

³⁰ Gudödi ni' bulu'dubë' bönni' gubáz queë' Jesús ga zoë', en gula'guíxjöi'inë' Lë' yúgu'të le gulunë', en yugu' le bulu'sédinë' bönachi.

³¹ Nacuá' bönachi zían ni', nupa zá'gaca, en nupa sòjaca, ga bidxintë bítirò dë lataj ilahuë' Jesús, en yugu' bönni' dá'gaquië' Lë'. Que lë ni na' Jesús gudxë' légaquië', rnnë':

—Gulídá. Uyéaj cázaru' ga naca lataj cá'asö, en uzí' ládxi'ru' tu chí'i.

³² La' légacasë' yójáquië' tu lë'e bárcodo', ate' bila'dxinë' tu lataj cá'asö.

³³ Bila'lë'e bönachi zían légaquië' sòjáquië' ni', en núnbë'gaca Jesús. Que lë ni na' bönni' yúgu'të yödzo ni' carelö yójáquië' ni'. Gula'zë'e ní'agaquië', ate' bila'dxinë' ni' zí'atëlö ca Jesús, en yugu' bönni' dá'gaquië' Lë'.

³⁴ Cate' burúajë' Jesús lë'e bárcodo' na', bilé'enë' bönachi zían na', ate' buéchi' ládxi'ë légaquië' tu' nácagaquië' ca bö'cu' xzila'do' bití' zoa nu gapa chí'i légacaba'. Gusí lahuë' rusédinë' légaquië' le zían.

³⁵ Cate' chiridzö' dza na', yugu' bönni' dá'gaquië' Jesús bila'dxinë' ga zoë', en të' Lë':

—Chiridzö', ate' lataj cá'asö naca ni.

³⁶ Busöl-la' bönachi zían ni para tsòjaca yugu' yú'udo', en yugu' yödzödo' nacuá' gásibi'ilö, tsòjögaca yöta, tu' cabí bi dë ni le ilagu.

³⁷ Bubi'ë didza' Jesús, gudxë' légaquië':

—Gulí'gü' libí'i cázali' le ilahuë'.

Gulë' Lë':

—¿Naru' tsòjögutsatu' yöta xtila len lászjatu' que idú xunu' beo', ate' gü'itu' le ilahuë'?

³⁸ Jesús gudxë' légaquië':

—¿Bal-laxi yöta xtila dë queëli'? Guli'tsòjyútsöca'.

Cate' chinóziguequinë', të' Lë':

—Gáyu'sö yöta xtila dë, en chópasöba' böla dëba'.

³⁹ Ní'irö gunná bë'ë Jesús ilunë' ga ila'bö' bönachi zían na', ila'cuá' tu cö' huéajguequi ga naca lachi' lu daca'.

⁴⁰ Gula'cu'ë tu cö' huéajgaquië', tu gayuá' huéajgaquië', en chi-un huéajgaquië'.

⁴¹ Ní'irö gudélë'ë Jesús igáyu'të yöta xtila na', en irópaba' böla na'. Buyüë' zaca' lúxziba, en gudxë' Dios: "Xclenu'." Ní'irö buzxuzxjë' yöta xtila na', en bë'ë quégaquië' bönni' usëda queë' para ila'guisië' quégaca bönachi zían na'. Gudísië' ca' irópatëba' böla na' quégaca yúgu'të bönachi na'.

⁴² Gulahuë' yúgu'të', en bulu'huóljanë'.

⁴³ Ní'irö bulu'tubë' le bizxaj que yöta xtila na', en quégacaba' böla, ate' chinnu ga'böra bulu'lié'.

⁴⁴ Guláquië' ca chi-un gáyu'ë bönni' na' gulahuë'.

Rizë'e ni'ë Jesús lu nísado'
(Mt. 14:22-27; Jn. 6:16-21)

⁴⁵ La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nöruë' lahuë', ila'dödë' lu nísado' na', para ila'dxinë' lu yödzö Bet-saida, tsanni ni' Lë' rusöl-lë' bönachi zían na' lídxiguequi.

⁴⁶ Cate' chibudxi busöl-lë' légaquië', guyijë' tu lu guí'ado', ate' ni' rufílenë' Dios didza'.

⁴⁷ Cate' chizá' ral-la, zeaj bárcodo' na' gatsaj láchui'lö nísado', ate' zoë' Jesús tuzë' luyú bidxi na'.

48 Bilé'enē' Jesús légaquiē', böniga tu'sē'ē bārcodo' na' tu' recja bō' za' ga na' ta'dödē'. Gudödi guluhuēla bidxinē' Jesús ga na' nacu'ē, rizē'e ni'ē lu nísado' na', ate' gú'unnē' tōdisē' ga na' nacu'ē.

49 Cate' bila'lé'enē' Lē' rizē'e ni'ē lu nísado', guléquinē' bixín na', ate' gula'bōdxi'ē

50 tu' bila'lé'enē' yúgu'tē' Lē', en guladxi gula'dzōbinē'. Ní'irō la' bulidztē' Jesús légaquiē', rnnē':

—Buli'tipa lādxi'li'. Neda' caz. Biti' gádxili'.

51 Gurenē' Jesús lē'e bārcodo' ga na' nacu'ē, ate' gurō'ō dxi bō' na' recja, ate' légaquiē' gula'niti gula'tíqui'sinē' bulu'bāninē'.

52 Biti' ta'yéajni'ininē' le rulu'i lē na' benē' Jesús que yōta xtila na'. Ni' naca zidi icja lādxi'do'gaquiē'.

Ruúnē' Jesús nupa te'e lu yōdzō Genesaret

(Mt. 14:34-36)

53 Gula'dödē' Jesús, en yugu' bōnni' dá'gaquiē' Lē' ia'tsōl'á'a nísado', ate' bila'dxinē' ga naca lu xiyúgaca bōnachi Genesaret. Bulu'dxiguē'ē bārcodo' luyú bidxi ni'.

54 Cate' bulu'rúajē' lē'e bārcodo' na', la' bulu'únbē'tē bōnachi ni' Jesús.

55 Gula'xiti' bōnachi na', yōjaca yúgu'tē yōdzōdo' idú gásibi'ilō, en gula'sí lógaquiē' dujuá'agaquiē' yúgu'tē nupa te'e ga zoē' Jesús, zxōagaca yugu' le déguequini, ate' bila'dxinē' gáti'tēs ta'yōnnē' zoē' Jesús.

56 Gáti'tēs ga ridödē' Jesús, yugu' lu yōdzōdo', en yugu' yōdzō zxōn, en yugu' yú'udo', tu'cu'ē nupa te'e quégaquiē' gapa naca la' nōza, en gapa naca lu yē'ēyi, en ta'tá'yuē' lahuē' Jesús gu'ē légaquiē' lataj ila'gansē' luzxi lari' nácuē'. Yúgu'tē nupa na' bila'gán lari' nácuē' bulu'huōacatē dxí'ado'.

7

Le tun ga biti' nácagaca bōnachi tshui' lahuē' Dios

(Mt. 15:1-20)

1 Ní'irō bal-lē' bōnni' yudo' fariseo len bal-lē' bōnni' yudo' usedi narúajgaquiē' Jerusalén, bulu'dubē' ga zoē' Jesús.

2 Bōnni' yudo' ni bila'lé'enē' bōnni' usēda queē' Jesús tahuē' yōta, biti' nuchí'agaquiē' ná'agaquiē', lē na' rnna: Biti' nayárigaca ca nalébiguequinē' tunē' bōnni' yudo' na'. Que lē ni na' gula'nnē' quégaquiē'.

3 Yugu' bōnni' yudo' fariseo na', en ia'zica'rō bōnachi judío tunē' ca gulébiguequinē' gulunē' xuz xtó'ogaquiē', ate' channō cabí ta'guíbi ná'agaquiē' zían luzuí ca na' nalébiguequinē' tunē', biti' ca' tahuē'.

4 Cate' tu'dxinē' rōjō'ugaquiē' lu yē'ēyi, channō cabí ta'guibē' lē na' ca nalébiguequinē' tunē', biti' ca' tahuē'. Zíanrō ca' tunē', yugu' le nalébiguequinē' tunē'. Caní ta'guibē' zxiga' yō'ōna, en yugu' zxiga' guié, en yugu' le tati'nē'.

5 Que lē ni na' yugu' bōnni' yudo' fariseo, en yugu' bōnni' yudo' usedi gula'nábinē' Jesús, ta'nnē':

—¿Naru' cabí tunē' yugu' bōnni' usēda quiu' ca gulébiguequinē' gulunē' xuz xtó'oru', pero tahuē' yōta biti' nuchí'agaquiē' ná'agaquiē'?

6 Bubi'ē didza' Jesús, rē' légaquiē':

—Libi'ili', bōnni' rulu'isō tshui' cuinli'. Nácatē le gudíxjö'ē Isafías, bōnni' ni' bē'ē didza' uláz queē' Dios, ca naca queéli'. Buzúajē' lu guichi, gunné': Yugu' bōnni' ni, len rú'agacasē' tunē' neda' bal,

calëga idú ládxi'gaquië'.

⁷ Ní'ti'sò naca yöl-la' ba ta'gu'ë neda'
tu' tu'sédinë' le ta'nná bë' bönachi,
calëga xibá quia'.

⁸ Caní naca, tu' rucá'anali' le gunná bë'ë Dios, ate' runli' yugu' le nazí' láchuili' lu ná'agaca bönachi.

⁹ Gudxë' ca' légaquië':

—Idú ládxi'li' rucá'anali' cá'asò le gunná bë'ë Dios para gunli' ca naca le nulaga loli' runli'.

¹⁰ Moisés gunné' caní: “Ben bal xuz xinó'o.” Gunnë' ca': “Nu ulidza zi' xuzi o xinë'e, guli'gútité nu na'.”

¹¹⁻¹² Libí'ili' rnnali' caní: “Channö nu bönni' guié' xuzë' o xinë'ë: Biti' gaca bi gunna' queëli', tu' naca Corbán.” (Didza' ni rna lu didza' xidza': Tu' nuzóa' quez queë' Dios yúgu'të.) Ní'irö rnnali': “Biti' run bayudxi bi gunë' bönni' na' quégaquië' xuz xinë'ë.”

¹³ Caní naca, rucá'anali' cá'asò xtídzë'ë Dios para gunli' le nulaga loli' runli', yugu' le rudódi' lu ná'agaca xzí'ini xi'sóali'. Zíánró ca' le caní runli'.

¹⁴ Ní'irö Jesús bulidzë' bönni' zían na' nacu'ë ni', en rë' légaquië':

—Guli'zë nágali' didza' gu'a, yúgu'tëli', en guli'tséajni'li'.

¹⁵ Biti' bi dë le riyaza nu bönni' le gaca gun ga biti' náquië' tsahui' lahuë' Dios, pero le rirúaj lë', lë ni gaca gun ga biti' náquië' tsahui' lahuë' Dios.

¹⁶ Channö zoa nágali', en riyónili', buli'zë nágali'.

¹⁷ Cate' Jesús bulá'alenë' bönachi zían na', guyu'ë tu'yu'u, ate' yugu' bönni' usëda queë' gula'nábinë' Lë' ca naca lë na' bucúdzu'ë didza'.

¹⁸ Jesús gudxë' légaquië':

—¿Riyádzjatsò ca' queëli' yöl-la' réajni'i? ¿Naru' cabí réajni'ili', yúgu'të le riyaza nu bönni', biti' gaca gun ga biti' náquië' tsahui' lahuë' Dios?

¹⁹ Naca caní tu' cabí riyaza icja ládxi'da'ahuë', pero lë'ësë' riyaza, ate' rurúaj lë'ë.

Tu' gunné' caní Jesús, buluí'inë' rë'u naca dxi'a yúgu'të le rë'aj ráguru'.

²⁰ Gunnë' ca' Jesús:

—Le rirúaj lu bönni' run ga biti' náquië' tsahui' lahuë' Dios.

²¹ Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjë' xibá que yöl-la' nutsaga na', en yugu' le ruá' dö'. Tun ga tútië' bönachi,

²² en ta'banë', en ta'zë ládxi'gaquië' le dë que luzá'agaquië', en tu'ë dö', en ta'zí' yë'ë, en tu'zxë'ë, en ta'nná zi'ë que luzá'agaquië', en tun ba zxön cuíngaqië', en tunë' le canóz.

²³ Yúgu'të le xihui' caní ta'rúaj icja ládxi'da'ahuë' nu bönni', en tun ga biti' náquië' tsahui' lahuë' Dios.

Tu nigula izá'a réajlë'ënu Jesús

(Mt. 15:21-28)

²⁴ Buzë'ë Jesús ni', ate' bidxinë' gala' ga nacuá' yödzö Tiro, en yödzö Sidón. Guyazië' tu'yu'u ni', en gú'unnë' cuntu nu inözi, pero biti' ca' guca ucachi' cuinë'.

²⁵ Tu nigula zóabi' bi'i nigúlado' queënu, yu'u bö' xihui' lëbi', biyóninu didza' rizë ca naca queë' Jesús, ate' la' bídatënu ga zoë' Jesús, en buzóa' zxfínu xini'ë.

²⁶ Nigula ni biti' nácanu judío, pero nabábanu bönachi Sirofenicia. Gúta'yunu lahuë' Jesús ubéajë' bö' xihui' na' yu'u-bi' bi'i nigúlado' queënu.

²⁷ Ní'irö Jesús gudxë'-nu, rnnë':

—Bë' lataj ulu'huöläj zí'alö nupa nácgaca ca xzí'ini xan yu'u, tu' cabí naca dxí'a ugáru' yöta quegacabi' bi'i na', en chü'unaru' le lógacaba' bö'cu'do'.

²⁸ Bubí'inu didza' nigula na', gúdxinu Jesús:

—Ön, Xan, pero yugu' bö'cu'do' nacua'aba' zxani ga tágubi', táguba' le bizxaj tu'huöxaj ga na' tágubi'.

²⁹ Ní'irö Jesús gudxë'-nu, rnnë':

—Tu' gunnó' caní, huáca huöaju'. Chiburúaj bö' xihui' na' guyú'u-bi' bi'i nigúlado' quiu'.

³⁰ Cate' budxinnu lídxinu, bilé'enu-bi' bi'i nigúlado' queénu na', dëbi' lu da'a, en chinurúaj bö' xihui' na' guyú'u lébi'.

Jesús ruünë' tu bönni' nacödzue', en biti' gaca innë'

³¹ Burúajë' Jesús lataj na' nababa yödzö Tiro, ate' gudödë' gapa dë yödzö Sidón, en yugu' yödzö Decápolis, ate' bidxinë' ra' nísado' lu xiyú Galilea.

³² Bönachi ni' dujuá'gaca tuë' bönni' nacödzue', en biti' raca innë' ga zoë' Jesús, ate' ta'ta'yu lahuë' Jesús ixóa në'ë lé'.

³³ Jesús bubéajë' lë' tsóla'alö ládjagaca bönachi na', ate' bunë'ë xibón në'ë yeru náguië' bönni' na'. Gurú'unë' zxóna'do', en gudanë' lúdxë'ë.

³⁴ Ní'irö buyúë' lúzxibálö, en gunné lúdxë'ë, rnnë':

—Efata.

Didza' hebreo ni rnna lu didza' xidza': Guyalaj.

³⁵ La' böáljatë náguië', en la' bugújtjatë lúdxë'ë, en gunnë'të' dxí'ado'.

³⁶ Jesús gunná bé'enë' légaquië' cuntu nu ilé' ca', pero tsca gunná bé'enë' légaquië', bulu'zëtërë' ca' didza' que lë na' benë'.

³⁷ Bulu'bánninë, ta'nnë':

—Tsáhuí'do' runë' yúgu'të. Runë' ga tu'yöni nupa gulaca cödzu, en ga tuí'i didza' nupa biti' guca ila'nnë.

8

Rugahuë' Jesús zianró ca choá' gayuá' bönachi (Mt. 15:32-39)

¹ Yugu' dza na' bulu'dubi bönachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bé'lenë' légaquië' didza'.

² Gudxë' légaquië':

—Ruhuechi' ládxa'a bönachi zían ni tu' chinaca tsonna dza nacua'len neda' ni, en biti' dë le ilágugaca.

³ Channö usól-la'a léguequi lídxigaca ta'dunsö ca', huala'cuídi' la' nöza, tu' zá'gaca zí'tu' bál-lagaca.

⁴ Bulu'bi'ë didza' bönni' usëda queë', të' Lë':

—¿Bizxi ugágutsaru' bönachi guizxi yu ni, ga ni naca lataj cá'asö?

⁵ Gunábinë' Jesús légaquië', rnnë':

—¿Bál-laxi yöta xtila dë queéli'?

Të' Lë':

—Gádxisö.

⁶ Ní'irö Jesús gunná bé'enë' bönachi zían na' ila'bö' lu yu. Gudélé'ë gadxi yöta xtila na', ate' gudxë' Dios: "Xclenu'." Ní'irö buzxuzxjë' léguequi, en bë'ë quegaquië' bönni' usëda queë' para ila'guisië' lógaca bönachi zían na'.

⁷ Guta' ca' quegaquië' tu chópaba' böla cuidi'. Jesús gudxë' Dios: "Xclenu'", ate' gunná bé'enë' légaquië' ila'guisië' ca' légcaba' lógaca bönachi.

8 Gulagu yúgu'tè bönachi na', en bulu'huöläj. Ní'irö bulu'tubè' le bizxaj nagá'anagaca, ate' gula'lí idú gadxi ga'böra.

9 Bönachi na' gulagu gulaca idú ca choá' gayuá'gaca. Jesús busöl-lè' léguequi lidxigaca,

10 ate' gurenè' lè'e bárcodo' tsözxön len yugu' bönni' usèda queè', ate' bila'dxinè' lu xiyúgaca bönachi Dalmanuta.

Ta'nábinè' Jesús gunè' tu le gaca bè' nuzxi náquiè'

(Mt. 16:1-4; Lc. 12:54-56)

11 Ní'irö bila'dxinè' bönni' yudo' fariseo ga zoè' Jesús, en gula'sí lógaquiè' ta'díl-lalenè' Lè' didza'. Gulé'ennè' ila'zì' bè'è Jesús. Que lè ni na' gula'nábinè' Lè' gunè' tu le naca bè' za' yehua' yubá.

12 Gunnèda' lãdxè'è Jesús, rnnè':

—¿Bizx que ta'nábitsö bönachi ni neda' guna' tu le naca bè' za' yehua' yubá? Le nácatè rea' libí'ili', bitì' ca' ilé'eli' tu le naca bè' za' yehua' yubá.

13 Ní'irö bulá'alenè' légaquiè'. Bubenè' lè'e bárcodo', en sa'yéajè' ia'tsölá'a nísado'.

Le tu'sèdinè' bönni' yudo' naca ca cúa zi que yöta xtila

(Mt. 16:5-12)

14 Gulal-la lãdxi'gaquiè' bönni' usèda queè' Jesús ilu'è bi ilahuè', ate' tuz yöta xtila dè lè'e bárcodo' na'.

15 Ní'irö Jesús buzéajni'inè' légaquiè', rnnè':

—Bulí'yútsöca' queéli'. Guli'gún chí'i cuinli' para cabí sí'ili' le naca ca cúa zi que yöta xtila quégaquiè' bönni' yudo' fariseo, en queè' Herodes.

16 Gula'sí lógaquiè' tu'è didza' bönni' usèda queè' la' légacasé', ta'nnè':

—Gunnè' caní tu' cabí dè yöta xtila gáguru'.

17 Réquibe'enè' Jesús le ta'nnè', ate' rè' légaquiè':

—¿Bizx que ru'ili' caní didza' tu' cabí dè yöta xtila gáguru'? ¿Naru' cabí réajni'itseli', en bitì' réquibe'itseli'? ¿Ni nácatsö zidi icja lãdxi'do'oli'?

18 ¿Zóatsö guiöj loli', en bitì' rilé'eli', en zóatsö guidi nágalí', en bitì' riyönili'? ¿Naru' cabí röjnètseli'?

19 Cate' ni' buzzuxxa' gayu' yöta xtila, ate' gulahuè' chi-un gáyü'è bönni', ¿bál-laxi ga'böra bulilí' le bizxaj butúbili'?

Gula'nnè':

—Chinnu.

20 Gunnè' ca' Jesús:

—Cate' ni' buzzuxxa' gadxi yöta xtila, ate' gulagu choá' gayuá' bönachi, ¿bál-laxi ga'böra bulilí' le bizxaj butúbili'?

Gula'nnè':

—Gadxi.

21 Ní'irö Jesús gudxè' légaquiè':

—¿Naru' cabí réajni'itseli' na'a, bè'a didza' que le tu'sèdinè' bönni' na'?

Jesús ruínè' bönni' Betsaida nachul-la lahuè'

22 Cate' Jesús, en bönni' dá'gaquiè' Lè' bila'dxinè' yödzö Betsaida, bila'dxín ga zoè' Jesús nupa dujuá'gaquiè' queè' tu bönni' nachul-la lahuè'. Ta'tá'yue' lahuè' canè' bönni' na'.

23 Jesús gudéle'è nè'è bönni' na' nachul-la lahuè', ate' guchè'è lè' ní'ilo ra' yödzö. Ní' budxié' zxöna' guiöj lahuè', en guxóa nè'è lè'. Ní'irö gunábinè' lè', rnnè':

—¿Ba rilé'enu' lati'?

24 Buyüë' bönni' na' nachul-la lahuë', rnnë':

—Rilé'egacada' bönachi, nalá'gaca ca yugu' yaga, pero ta'dá bönachi na'.

25 Leyúbölö guxóa në'ë Jesús guiöj lahuë', ate' buyüde'ë bönni' na' nachul-la lahuë', ate' böacaté dxi'ado' guiöj lahuë'. Na'a rilé'enë' dxi'ado' yúgu'të.

26 Ní'irö Jesús gusöl-lë'ë lë' lidxë', rnnë':

—Biti' tsöjdödu' lahui' yödzo, en cuntu nu guío' le bena' nu zoa lu yödzo ni.

Rnnë' Pedro: "Jesús náquië' Cristo"

(Mt. 16:13-20; Lc. 9:18-21)

27 Gudödi na', bulu'zë'ë Jesús, en yugu' bönni' usëda queë' ni', ate' gula'dödë' yugu' yödzödo' nabábagaca Cesarea, ga na' rinná bë'ë Filipo. Tsanni ni' yú'ugaquië' nöza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

28 Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná ia'bal-la nacu' bönni' yúbölö bë'ë didza' uláz queë' Dios dza ni'te.

29 Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ë didza' Pedro, rnnë':

—Lí' nacu' Cristo.

30 Ní'irö Jesús gunná bé'enë' légaquië' cuntu nu ulu'siyönnë' Nu náquië'.

Rigúxjö'ë Jesús ca si' ilútië' Lë'

(Mt. 16:21-28; Lc. 9:22-27)

31 Ní'irö gusí lahuë' Jesús rusëdinë' bönni' dá'gaquië' Lë', rnnë':

—Run bayudxi qui' saca'a neda', Bönni' Guljë' Bönachi. Bönni' gula tu'zëjini'inë', en yugu' bixúz unná bë', en bönni' yudo' tu'sëdinë' ulu'zöë' neda' tsölá'alö. Ilútië' neda', pero cate' gaca tsonna dza ubana'.

32 Yálajsö bë'lenë' légaquië' didza' ni. Ní'irö Pedro guchë'ë Jesús tsölá'alö, en gusí lahuë' ridil-lë' lë' didza'.

33 Buécjë' Jesús, en buyüë' ia'zica'rë' bönni' usëda queë', ate' buzenë' bach Pedro, rnnë':

—Gucuíta ga zoa'. Nacu' ca Satanás, tu' xihui'. Le rizá' ládxi'u bití' za' lu në'ë Dios, pero ca ta'zá' ládxi'gaca bönachi naca.

34 Ní'irö Jesús bulidzë' yugu' bönni' usëda queë', enca' bönachi nacua' ni', en gudxë' légaquië':

—Channö ré'ënë' nu bönni' të'ë neda', ral-la' uzóë' tsölá'alö le ré'ëni queézinë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö huáca të'ë neda'.

35 Nu bönni' ru'ida' ládxië'ë yöl-la' na'bán queë', unítië' le, pero nu bönni' unítië' yöl-la' na'bán queë' tu' dë'ë neda', o tu' dë'ë didza' dxi'a quia', udéli'në' bönni' ni yöl-la' na'bán queë'.

36 ¿Naru' uzi'tsë' xibé tu bönni' channö utubë' yúgu'të le dë yödzölió ni, pero uniti cuinë'?

37 Biti' bi gaca unödzejë' tu bönni' le huóá'ui cuinë'.

38 Channö zoë' nu bönni' rutuí'inë' quia' neda', en que xtídza'a lógaca bönachi ni nucá'anagaca Dios, en tun dul-la', lësca' caní neda', Bönni' Guljë' Bönachi, utuí'ida' queë' bönni' na' cate' guídalena' yöl-la' huáca zxon queë' Xuza', ate' dzágagaquië' gubáz lá'ayi neda'.

9

1 Jesús gudxë' ca' légaquië', rnnë':

—Le nácatë rea' libí'ili', nacuá' ni nupa bití' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxon queë'.

Ridzá'a ca riná' lahuë' Jesús
(Mt. 17:1-13; Lc. 9:28-36)

2 Cate' chigudödi xopa dza, Jesús guchë'ë Pedro, en Jacobo, en Juan, ate' légacasë' yójáquië' tu lu guí'a sibi. Ní' bidzá'a ca riná' lahuë' Jesús lógaquië' yonnë' na'.

3 Guyëpi yösa bení' lari' nácuë' Jesús, ate' guca chiguíchido'os. Zxíla'do'os guca, le cuntú nu ra' lari' yödžölió ni gaca gun chiguíchido'os ca guca lari' na'.

4 Bulu'lui' i lógaquië' Elías, en Moisés, tu' ílenë' Jesús didza'.

5 Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

6 Caní' gunnë' Pedro tu' cabí' nözinë' bi na' rnnë', tu' tádxinë' bönni' usëda queë' Jesús na'.

7 Ní'irö gurö'ö böaj le gulú'u zxul-la légaquië', ate' biyön chi'i nu ruí'i didza' lu böaj na', rna:

—Bönni' ni Zxí'ina'. Nadxí'ida' Lë'. Buli'zë nágali' Lë'.

8 La' bulu'yutë' pero cünturö nu ta'lé'enë'. Tuzë' Jesús zóalenë' légaquië'.

9 Tsanni ni' yú' ugaquië' nöza, tu' dínnië' lu guí'a sibi na', Jesús gunná bé'enë' légaquië' cuntú nu ulu'siyönnë' ca', lë na' bila'lé'enë', cate' ubanrë' lu yöl-la' guti Lë', Bönni' Guljë' Bönachi.

10 Que lë ni na' gula'gú'usë' ícjagaquië' didza' ni bë'ë, ate' la' légacasë' ta'nabi yúdxinë' luzá'agaquië' bizxi sa'yéaj didza' na' bë'ë, gunnë' ubanë' lu yöl-la' guti.

11 Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guidë' Elías zí'alö ca guidë' Cristo?

12 Bubi'ë didza' Jesús, rnnë':

—Le nácatë guidë' Elías zí'alö, en ucu'ë yúgu'të ca ral-la' gaca. Na'a, ¿bizxi sa'yéaj le nazúaj lu guichi rna run bayudxi qui'i sáquë'ë Bönni' Guljë' Bönachi, ate' cá'asö ulu' cá'ana bönachi Lë'?

13 Rea' libí'ili': Chibidë' Elías, ate' gulunë' queë' tsca gulë'ënnë', tsca nazúaj lu guichi lá'ayi ca ral-la' gaca queë'.

Jesús ruinë'-bi' bi'i bönni' yu'u lëbi' bö' xihui'
(Mt. 17:14-21; Lc. 9:37-43)

14 Cate' ni' bulu'dxinë' Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enë' nacuá' bönachi zían ni', ate' bönni' yudo' tu'sëdinë' ta'díl-lalenë' yugu' bönni' usëda queë' na' didza'.

15 Cate' bönachi zían na' bila'lé'e Jesús, bulu'bani, en carelö zá'gaca ga na' zë'ë, dijödxi gaca Lë': "Padiux."

16 Ní'irö Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli' légaquië'?

17 Bubi'ë didza' tu bönni' nútsë'ë ladaj bönachi zían na', rnnë':

—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga bití' raca innëbi'.

18 Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada-në' bönni' usëda quiu' ulu'béajë' bö' xihui' na', pero biti' gula'zéqui'në'.

19 Bubi'ë didza' Jesús, rnnë':

—Libi'ili', bönni' cabí ta'yéajlë'ë. ¿Gáca'xte caz ral-la' sóalena' libí'ili'? ¿Gáca'xte caz ral-la' guá' ilena' queëli'? Gulí'diguá'-bi' quia' ni.

20 Dujuá'agaquië'-bi' ga na' zoë' Jesús. Cate' bö' xihui' na' bilé'e Lë', la' buxizité lëbi'. Gudzö'öbi' lu yu, ate' burixi butula lëbi', ate' bidxía bidxina' zidi' ruá'abi'.

21 Ní'irö Jesús gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ni' nácatëbi' bí'ido ré'ebi' caní.

22 Zían luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxi' netu', gácalenu' netu'.

23 Jesús gudxë' lë':

—Channö huáca tséajlë'u, yúgu'të huáca channö tséajlë'u Dios.

24 La' bë'të' zidzaj didza' xúzibi' bi'i na', rnnë':

—¡Réajlë'a! ¡Gúcalen neda' para tséajlë'ëra' Lë'!

25 Cate' bilé'enë' Jesús zá'gaca bönachi zían, tu'quí Lë', buzenë' bach bö' xihui' na', rë' le:

—Li', bö' xihui' runu' ga biti' raca inná, en biti' raca yöni bönachi, rinná bé'eda' li' uruju' lu bi'i ni, en bí'ti'rö tsu'u lëbi'.

26 Gurödxí'a bö' xihui' na', en burixi butúlada' bi'i na'. Ní'irö burúajtë, en bucá'ana bi'i na' ca bi'i nati cázabi'. Ca' naca, guluí' didza' bönachi zían ni', ta'nná:

—Chinátibi'.

27 Ní'irö Jesús gudélë'ë ná'abi', en buchisë'-bi', ate' guzuíbi' bi'i na'.

28 Ní'irö guyázië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

29 Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-në' Dios, en gunlí' gubasa.

Jesús riguáxjö'ë leyúbölö ca si' ilútië' Lë'

(Mt. 17:22-23; Lc. 9:43-45)

30 Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' rë'ënë' Jesús nu inözi ga na' zoë'

31 tu' rusëdinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

32 Biti' gula'yéajni'inë' didza' ni rë' légaquië', ate' tu' tádxinë', biti' bi gula'nábinë' Lë'.

Nu naca lo

(Mt. 18:1-5; Lc. 9:46-48)

33 Ní'irö Jesús, en bönni' dá'gaquië' Lë' bila'dxinë' yödzö Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

34 Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo.

35 Ní'irö gurö'ë Jesús, en bulidzë' idxímutë' bönni' usëda queë'. Rë' légaquië':

—Nu rë'ëni gaca lo ral-la' gaca ca tu bönni' cu'di'sö, enca' ca ni'a ná'ali' yúgu'tëli'.

36 Ní'irö Jesús gudëlë'ë-bi' tubi' bí'ido', en buzöë'-bi' gatsaj láchui'lö ga na' nacu'ë. Ní' runidë'-bi', rë' légaquië':

37 —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sö si' lu në'ë, pero si' lu në'ë ca' Zuza', Bönni' na' nasöl-lë'ë neda'.

Nu biti' ridá'baga' rë'u, rácalen rë'u

(Mt. 10:42; Lc. 9:49-50)

38 Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná bé'etu' lë' bí'ti'rö gunë' ca', tu' cabí dë'ë rë'u.

39 Ní'irö Jesús gudxë' lë':

—Biti' inná bé'ëli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', biti' ca' gaca bönni' na' innë' zì'ë quia'.

40 Caní naca, nu biti' ridá'baga' rë'u, rácalen nu na' rë'u.

41 Nú'ti'tës nu gunna queë'li' tu zxi'ga'do' nisa guí'jali' tu' dá'ali' neda', Cristo, si' i caz nu na' le ral-la' gata' que.

Zoa bönadxi queëru' gunru' ga nu gun dul-la'

(Mt. 18:6-9; Lc. 17:1-2)

42 Gunnë' ca' Jesús:

—Nú'ti'tës nu gun ga gunbi' dul-la' tubi' bí'ido' caní réajlë'ëbi' neda', gácarö dxi'a ugal-la' nu na' guíchi riyëtu yaga yeni, en tsöjchú'una cuini lu nísado'.

43 Channö tu no'o gun ga gunu' dul-la', guchugu le. Dxi'arö gaca quiu' tsöjtsáziu' ga su' ibanu' zoa tuz no'o, calëga zoa chopa no'o, ate' tsöjtsáziu' lu guí' gabila, ga ni' biti' ulu guí' que.

44 Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

45 Lë'sca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, calëga zoa chopa ni'u, ate' tsöjtsáziu' lu guí' gabila, ga ni' biti' ulu guí' que.

46 Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

47 Lë'sca' caní, channö tu guiöj lo' gun ga gunu' dul-la', gulëaj le. Gácarö dxi'a quiu' tsöjtsáziu' ga rinná bé'ë Dios zoa tuz guiöj lo', calëga zoa chopa guiöj lo', ate' tsöjtsáziu' lu guí' gabila.

48 Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

49 'Ruxi'iru' bëla' zödi', en rugála'ru' le ra' guí', para cabí gaca ditaj. Lë ni rusedi rë'u ca ulu'huóaca dxi'a yúgu'të bö'nachi. Lë'sca' caní, rë'ënë' Dios izxi'i zödi' yúgu'të böa' bëdxido' tu' zéguí'gaquië'-ba' lu bucugu lá'ayi queë'.

50 Dxi'a naca zödi', pero channö initi yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxi'a, sóali' dxi'ado' tuli' len ia'tuli'.

10

Rusëdinë Jesús que nu rulá' yöl-la' nutsaga na'
(Mt. 19:1-12; Lc. 16:18)

¹ Buzë'ë Jesús yödzö Capernaum, ate' gуйijë' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busëdinë' légaquië' ca run cazë'.

² Ní'irö bila'dxinë' bönni' yudo' fariseo ga zoë' Jesús, ate' t'ë'ennë' ilunë' ga bi innë' Jesús para gaca ulu'zéguië' Lë' didza'. Gula'nábinë' Lë', ta'nnë':

—¿Dë lataj bönni' nutsaga në'ë usanë'-nu nigula queë'?

³ Bubi'ë didza' Jesús, rnnë':

—¿Bizxi gunná bé'enë' Moisés libí'ili'?

⁴ Gula'nnë':

—Moisés bë'ë lataj nu bönni' uzúajë' lu guichi le rnna rulá'alenë'-nu nigula queë' na', ate' ní'irö usanë'-nu.

⁵ Bubi'ë didza' Jesús, rnnë':

—Gunná bé'enë' Moisés libí'ili' caní tu' naca zidi icja ládxi'do'oli',

⁶ pero cate' gusi lo rata' yödzölió, Dios benë' légaquië' bönni', en nigula.

⁷ Gunnë': "Que lë ni na' ucá'anë' bönni' xuz xinë'ë, en tsöjsóalenë'-nu nigula queë',

⁸ ate' chopë' ni ulu'huóáquië' ca tuz bönachi." Que lë ni na' bití'rö nácagaquië' chopë' pero tuz chinácagaquië'.

⁹ Que lë ni na' ca', nu naca bönachi bití' ral-la' ulá'a nupa na' chinutságuië' Dios.

¹⁰ Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë.

¹¹ Jesús gudxë' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'ë-nu dul-la' nigula na' guzóalenë'-nu zí'aló.

¹² Lësca' caní channö tu nigula nutsaga ná'lennu bönni' usannu-në', en sí'inu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

Jesús rulidza tsáhuë'ë-bi' yugu' bí'ido'
(Mt. 19:13-15; Lc. 18:15-17)

¹³ Ní'irö bila'dxin bönachi ga zoë' Jesús dujuá'gaquië' bí'ido' quéguequi. Të'ëni ixóa në'ë légacabi', ate' gula'sí lógaquië' bönni' usëda queë' Jesús ta'dil-la dídza'gaquië' nupa na' dujuá'agaca légacabi'.

¹⁴ Cate' bilë'enë' Jesús lë ni, gulënë' légaquië', en gunnë':

—Gulí'guí'gácabi' bí'ido' lataj ila'dxinbi' quia'. Bití' uzága'gacali'-bi', tu' gata' quégaca nupa nácagaca ca bí'ido' ni, lataj ga rinná bë'ë Dios.

¹⁵ Le nácate' rea' libí'ili': Nu cabí si' lu në'e le rinná bë'ë Dios ca runbi' tu bí'ido', bití' ca' tsaza ga ní' rinná bë'ë.

¹⁶ Ní'irö Jesús bunidë'-bi' yugu' bí'ido' na'. Guxóa në'ë légacabi', en bulidza tsáhuë'ë-bi'.

Bönni' cuidí' napë' yöl-la' tsahui'
(Mt. 19:16-30; Lc. 18:18-30)

¹⁷ Cate' bu'ë Jesús nöza, carelö bidë' tu bönni', en buzóa xzibë' lahuë' Jesús, en gunábinë' Lë', rnnë':

—Bönni' Usedi idú dxí'a, ¿nacxi guna' para idéli'da' yöl-la' na'bán idú?

18 Jesús gudxë' lë':

—¿Bix que ru'u neda' didza', rno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a.

19 Chinöz quézinu' yugu' le gunná bë'ë Dios, gunnë':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatë.

Biti' ucáchi'lanu'.

Ben bal xuz xinó'o.

20 Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' b'í'ido'.

21 Len yöl-la' dxi'i ladxi' queë', Jesús buyüë' lë', rnnë':

—Tu le riyadzaj quiu'. Guyéaj, yöjieti' yúgu'të le dë quiu', en bunödzej quegaca bönachi yechi' lë na' si'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjtë'ë lë'e yaga cruz, ate' to'o neda'.

22 Cate' biyönnë' didza' ni, bui'innë', ate' söhuöjë' risëbi ládxe'ë tu' dëda' yöl-la' tsahui' queë'.

23 Ní'irö buyüë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lé'e yöl-la' tsahui' ga rinná bë'ë Dios.

24 Bulu'báninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libi'ili', xzi'ina'do', böniga naca ila'yázië' bönni' tu'xzöni ládxi'gaquië' yöl-la' tsahui' quégaquië' ga rinná bë'ë Dios.

25 Nácarö böniga tsázië' nu bönni' rilé'enë' yöl-la' tsahui' ga rinná bë'ë Dios, ca tödiba' böa' ta'bía-ba' bönachi lu nagu yötsi'.

26 Cate' bila'yönnë' didza' ni, bulu'bánitëronë' ca'. Ta'nnë' la' légacasë':

—¿Nuzxi caz gaca ulá, channö?

27 Buyüë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

28 Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

29 Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' xzi'inë', o xiyüë', tu' runë' xichina' o tu' runë' libán que didza' dxi'a quia'.

30 Bönni' ni huazi' queë' ia'tú gayuá'tërö ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' xzi'inë', en yugu' xiyüë', enca' yugu' le ila'bía ládxi'gaca bönachi lë', ate' lu yödzölió si' za', gata' yöl-la' na'bán idú queë'.

31 Zián nupa nácgaca lo na'a, ilaca cuídi'sö ni', ate' nupa nácgaca cuídi'sö na'a, ilaca lo ni'.

Leyúbölö rigúxjö'ë Jesús ca si' ilútië' Lë'

(Mt. 20:17-19; Lc. 18:31-34)

32 Cate' ni' yú'ugaquië' nöza, ta'benë' söjáquië' Jerusalén, nanóruë' Jesús lógaquië' bönni' usëda queë'. Nanítiguequinë', en lu yöl-la' rádxisö söjácalenë' Lë'. Leyúbölö Jesús guchë'ë quez idxinnuté' na'. Gusílahuë' ruí'ilenë' légaquië' didza' ca naca le ral-la' gaca queë'.

³³ Rnnë':

—Rilé'e quézili' ribenru' zéajru' Jerusalén ga ni' zoa nu udödi neda', Bönni' Guljè' Bönachi, lu ná'agaquiè' bixúz unná bè', en lu ná'agaquiè' bönni' yudo' usedi, ate' chúguiè' quia' gátia', en ulu'dödè' neda' lu ná'agaquiè' bönni' zi'tu'.

³⁴ Bönni' na' ulu'titjè' neda', en ilúndè'è neda' zi'. Ulu'chejë' neda' zxóna'. Ní'irö ilútiè' neda', pero cate' gaca tsonna dza ubana' lu yöl-la' guti.

Jacobo en Juan ta'nábinè' Jesús bi gunè' quégaquiè'

(Mt. 20:20-28)

³⁵ Ní'irö gula'biguè'è Jacobo, en Juan, xzí'inè' Zebedeo, lahuè' Jesús, en të' Lè':

—Bönni' Usedi, rë'ënitú' gunu' queëtu' le inábatu'.

³⁶ Jesús gudxè' légaquiè':

—¿Bizxi rë'ënilí' guna' queéli'?

³⁷ Gulé' Lè':

—Cate' idxín dza cö'u ga inná bè'u, ben ga cö'ötu' tutu' cuitu' ibëla, en ia'tutu' cuitu' yögöla.

³⁸ Ní'irö Jesús gudxè' légaquiè':

—Biti' nózili' bi rinábali'. ¿Naru' huáca sí'ili' le ral-la' si'a neda', le naca le qui'í saca'a? ¿Naru' huáca idílali' nisa ca idila' neda' nisa, gátia'?

³⁹ Bulu'bi'è didza', ta'nnè':

—Huácatu'.

Jesús gudxè' légaquiè':

—Le nácatè, le qui'í saca'a neda', sí'ili' ca' libí'ili', en ca idila' neda' nisa, idílali' ca' nisa,

⁴⁰ pero biti' dè lu na'a cöa' nu cuía cuita' ibëla, en nu cuía cuita' yögöla. Dios unödzejè' quégaquiè' bönni' chinupé'è quégaquiè' yugu' lataj na'.

⁴¹ Cate' bila'yönnè' ia'chié' bönni' uséda queé' Jesús didza' ni, gula'lenè' Jacobo, en Juan na'.

⁴² Ní'irö Jesús bulidzè' légaquiè', rnnè':

—Nöz quézili' ca tun nupa ta'nná be'e yugu' yödzö, tu'zenè' bach bönachi, ate' nupa nácatéca lo ládjagaquiè' ta'nná be'e luzé' eguequi.

⁴³ Biti' gaca caní queéli', pero nu guë'ëni gaca zxön ga zóali', ral-la' gun xichinlí' ia'zíca rölí',

⁴⁴ ate' núti'tésölöli' nu guë'ëni gaca lo ral-la' gaca ca bönni' huen dxin tsaz queéli' yúgu'téli'.

⁴⁵ Caní ral-la' gunlí' tu' bida' ni neda', Bönni' Guljè' Bönachi, caléga para nu gun xichina', pero para guna' xichíngaca bönachi, en udöda' yöl-la' na'bán quia' le huóá'uida' bönachi zían.

Jesús ruúnè' Bartimeo, bönni' lo chul-la

(Mt. 20:29-34; Lc. 18:35-43)

⁴⁶ Ní'irö bila'dxinè' Jesús, en yugu' bönni' dá'gaquiè' Lè' yödzö Jericó. Cate' ni' rurujë' Jesús yödzö ni, dzágagaquiè' Lè' yugu' bönni' uséda queé', enca' bönachi zían. Ra' nóza ni' rö'è tu bönni' ralchul-la lahué', lè' Bartimeo, xzí'inè' Timeo. Rinabè' nu bi gúnnašö queé'.

⁴⁷ Cate' biyönnè' Bartimeo ridödè' Jesús, bönni' Nazaret, ni', gusí lahuè' ru'è zidzaj didza', rnnè':

—¡Jesús, xzí'ini xi'sóè' David! ¡Buéchi' ladxi' neda'!

⁴⁸ Nupa ta'dödi ni' gula'dil-la lè' didza'. Tè lè':

—Busayaj ru'u.

Ní'irö zídzejrö bulidzè', rnnè':

—¡Zxi'ini xi'sóe' David! ¡Buéchi' ladxi' neda'!

49 Ní'irò guzóe' dxisò Jesús, ribözè', ate' rē' légaquiè':

—Buli'lidzè'.

Bulu'lidzè' bōnni' na' nachul-la lahuè'. Tē' lē':

—¡Butipa lādxi'u! ¡Guyaschi! ¡Rulidzè' li'!

50 Ní'irò gurú'unē' tsölá'alò lari' naxóa yenē'. La' guyásatē', en bidē' ga na' zoē' Jesús.

51 Jesús gunábinē' lē', rnnē':

—¿Bizxi rē'ēnu' guna' quiu'?

Bubi'ē didza' bōnni' na' nachul-la lahuè', rnnē':

—Bōnni' Usedi, rē'ēnda' gunu' ga huóalaj guió'j lahua'.

52 Jesús gudxē' lē':

—Bōaj lidxu'. Chinuhuóacu' tu' réajlē'u neda'.

La' bōáljatē' guió'j lahuè', ate' sa'yéajlenē' Jesús.

11

Riyaziē' Jesús yōdzō Jerusalén

(Mt. 21:1-11; Lc. 19:28-40; Jn. 12:12-19)

1 Bila'dxinē' Jesús, en yugu' bōnni' dá'gaquiē' Lē' gala' ga dē Jerusalén, ga na' nacua' yōdzō Betfagé, en yōdzō Betania, en ga na' dē ca' Gu'ía Yaga Olivo. Ní'irò Jesús gusól-lē'ē chopē' bōnni' usēda queē',

2 en rē' légaquiē':

—Guli'tséaj lu yōdzōdo' dē loru' ni', en cate' tsú'uli' ni', tsójxáca'li'-ba' tuba' búrrodo' nága'ba' ni', en cuntu nu ribíani lēba'. Guli'sedxi-ba', en guli'chē'-ba' quia' ni.

3 Channō nu bi guiē libí'ili' tu' runli' lē ni, guli'guiē nu na': "Xanru' riquinnē'-ba', ate' la' usól-la'tē'-ba' quiu'."

4 Ní'irò yōjáquiē', en yójxáca'gaquiē'-ba' búrrodo' na', nága'ba' ra' nōza ga nu riyaza lō'a, ate' gula'sedxē'-ba'.

5 Nupa nacua' ni' tē' légaquiē':

—¿Bizxi ni runli'? ¿Bizx que risédxili'-ba' búrrodo' na'?

6 Bulu'bi'ē didza' bōnni' usēda queē' Jesús, gulē' légaquiē' ca na' chigudxi cazē' Jesús légaquiē', ate' gulu'ē légaquiē' lataj.

7 Ní'irò gula'chē'ē-ba' búrrodo' na' ga na' zoē' Jesús. Gula'xóe' lari' quégaquiē' cúdzu'ba', ate' Jesús gudxiē'-ba'.

8 Zían bōnni' nacu'ē ni' gula'chiljē' lari' quégaquiē' gapa naca la' nōza. Ia' bal-la bōnachi ni' gula'guítsaj zin le bulu'zxóa la' nōza.

9 Gula'sí lo nupa nanórugaca lahuē' Jesús, en nupa na' zá'gaca cúdzu'lē' tuí' i zidzaj didza', ta'nnē':

—¡Yól-la' ba! ¡Xanru' Dios gun lá'ayē' Bōnni' zē'ē ni, nasól-lē'ē Dios Lē'!

10 ¡Dios gun lá'ayē' Bōnni' ni sí' inná bē'ē, ca na' gunná bē'ē xuz xtó'oru' David! ¡Yól-la' ba Dios!

11 Caní guca, bidxinē' Jesús Jerusalén, ate' guyáziē' lō'a yudo'. Cate' budxi buyúē' yúgu'tē le nacua' idú gásibi'ilō ni', burúajē' zaca' yōdzō Betania tu' chiridzō', ate' dzágagaquiē' Lē' yugu' bōnni' usēda queē'.

Jesús rulidza zi'ē tu yaga higo

(Mt. 21:18-19)

12 Cate' za' reni' ia'tú dza, ate' tu'rúajē' Jesús, en yugu' bōnni' dá'gaquiē' Lē' yōdzō Betania, ridunē' Jesús.

13 Zi'tu' bilé'ené' tu yaga higo dxía xilagui'. Gubígui'ë ga na' zoa yaga na' channö utsöjxaquié' lati' le ribía. Cate' bidxiné' ni' biti' bi yöjxáquié' le ribía. Xilágui'sö dxía tu' cabí ridxini dza cuía.

14 Ní'irö Jesús bulidzé' yaga na', rnné':

—Bíti'rö nu gagu le ribía quiu'.

Yugu' bönni' uséda queé' bila'yönné' didza' ni.

Jesús rulatjé' lö'a yudo'

(Mt. 21:12-17; Lc. 19:45-48; Jn. 2:13-22)

15 Cate' bila'dxiné' Jesús, en yugu' bönni' dá'gaquié' Lè', yödzö Jerusalén, guyázié' Jesús lö'a yudo', en gusi lahué' rubéajé' ní' ilö nupa tuti', en nupa to'o lu lö'a yudo'. Burixé' yugu' blaga quégaca nupa tu'tsá' dumí izá'a, enca' yugu' ga ta'bö' nupa tuti' yugu' gu'dödo'.

16 Biti' ca' bē'ë lataj nu bi guá', uzóa nöza ga naca lö'a yudo'.

17 Busédiné' nupa nacua' ni', rnné':

—Nazúaj lu guichi lá'ayi, rna: “Lidxa' si' i le, yu'u ga bönachi idüté yödzölió lu lidza Dios.” Libí'ili' chinunli' le ca naca lídxigaca gubán.

18 Cate' yugu' bixúz unná bē', en yugu' bönni' yudo' usedi bila'yönné' didza' ni, gula'sí lógaquié' tu'guiljé' nacxi ilútié' Jesús, pero tu' tádxiné' le ilún bönachi, biti' bi guluné' queé', tu' tu'bani yúgu'té bönachi ca naca le rusédiné' Jesús.

19 Cate' chiridzó' burúajé' Jesús lu yödzö na'.

Ribidxi yaga higo bulidza zi'ë Jesús

(Mt. 21:20-22)

20 Cate' za' rení' ia'tú dza, gula'dödē' Jesús, en yugu' bönni' dá'gaquié' Lè' ga zoa yaga higo na' bulidza zi'ë Jesús, en bila'lé'ené' le, chinabidxi idú luí.

21 Ní'irö yöjnené' Pedro bi guca, ate' gudxé' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

22 Bubi'ë didza' Jesús, rē' légaquié':

—Guli'tseajlè' Dios.

23 Le nácaté rea' libí'ili', channö nu bönni' guíé' guí'ado' ni: “Gucuíta ni, yöjsóa lu nísado'”, en biti' gaca chopa ládxé'ë bönni' na', pero idú ládxé'ë tseajlè'ë guné' Dios ca na' rnné', ca' gaca.

24 Que lē ni na' rea' libí'ili': Yúgu'té le inábali' cate' ulídzali'-né' Dios, guli'tseajlè' chibenné' Dios queéli' lē na' rinábali', ate' gunné' queéli'.

25 Cate' ni' rulídzali'-né' Dios, channö zoa nu rileli' nu bi ben queéli', buli'niti lo nu na', para uniti lahué' ca' libí'ili' Xúzili' na' zoé' yehua' yubá ca naca dul-la' nabága'li'.

26 Channö cabí uniti loli' bönachi, biti' uniti lahué' Xúzili' zoé' yehua' yubá libí'ili' dul-la' nabága'li'.

Yöl-la' unná bē' dē lu nē'ë Jesús

(Mt. 21:23-27; Lc. 20:1-8)

27 Ní'irö Jesús, en yugu' bönni' dá'gaquié' Lè' yöjhuöjgaquié' Jerusalén. Cate' ni' ridé' Jesús ga naca chila yudo', bila'dxiné' yugu' bixúz unná bē', en yugu' bönni' yudo' usedi, en bönni' gula tu'zéajni'iné', ga zoé'.

28 Gula'nábiné' Jesús, ta'nné':

—¿Bizxi yöl-la' unná bē' dē lu no'o runu' yugu' lē ni? ¿Nuzxi caz budödi lu no'o yöl-la' unná bē' gunu' caní?

29 Bubi'ë didza' Jesús, rē' légaquié':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bē' rúnida' yugu' lē ni.

³⁰ ¿Nuzxi budödi lu nē'ē Juan uquilē' bönachi nisa? ¿Naru' Dios o bönachi? Guli'nnátsöca'.

³¹ Gula'sí lógaquiē' tun xtídza'gaquiē' la' lé'gcasē', ta'nnē':

—Channö innaru' Dios gusöl-lē'ē lē', guiē' rē'u: “¿Bizx que biti' guyéajlē'ēli' lē'?”

³² ¿Naru' guiétsaru'-nē': Gula'söl-lē'ē bönni' lē'?

Caní ta'zá' ládxi'gaquiē' tu' tádxinē' le ilún bönachi zían nacuá' ni' tu' téquiguequi yúgu'tē bönachi na' bē'ē didza' Juan na' uláz queē' Dios.

³³ Que lē ni na' gulē' Jesús:

—Biti' nöztu'.

Ní'irö Jesús gudxē' légaquiē':

—Neda' ca' biti' quíxjöi'ida' libí'ili' bi yöl-la' unná bē' dē lu na'a rúnida' yugu' lē ni.

12

Rucúdzu'ē didza' Jesús ca gaca quégaca huen dxin biti' nácagaca tsahui'
(Mt. 21:33-46; Lc. 20:9-19)

¹ Ní'irö gusí lahuē' Jesús ruí'ilenē' yugu' bönni' dá'gaquiē' Lē' didza' yugu' le rucúdzu'ē didza', rnnē':

—Guzóē' tu bönni', budē'ē lubá uva zían ga naca lu xiyué'. Guléquiē' lē'a que, en guchō'önē' tu röga' guióǵ ga isíē' xisi uva na'. Budxíē' tu yu'u gupa ga naca xitsá' ga nu uyú xiyué' na'.

'Ní'irö budödē' xiyué' na' lu ná'agaquiē' huen dxin, ila'zi'ē gatsaj huéaj le unödzej, ate' guyijē' yödzo'zi tu'.

² Cate' bidxin dza ulu'chibē' le ribía, gusöl-lē'ē-bi' bi'i huen dxin tsójxi'ibi' lu ná'agaquiē' huen dxin na' le ral-la' si'ē xanbi' que le gula'bía lubá uva na'.

³ Ní'irö yugu' huen dxin na' gula'guélé'ē-bi' bi'i na', en gulundē'-bi' zi', ate' bulu'söl-lē'ē-bi' cá'asöbi'.

⁴ Ní'irö bönni' xan luyú na' gusöl-lē'ē-bi' ia'tubi' bi'i huen dxin queē', ate' bi' i ni bulu'ladxē'-bi' guióǵ. Bulu'lē'ē ícjabi'. Gulu'ē dō' queēbi'.

⁵ Ní'irö bönni' xan luyú na' gusöl-lē'ē-bi' ca' ia'tubi' bi'i huen dxin queē', ate' bi' i ni gulútiē'-bi'. Gusöl-lē'ē-bi' ca' zíanröbi', ate' bál-labi' gulúngacadē'-bi' zi', en ia'bál-labi' gulútigaquiē'-bi'.

⁶ Cúnturö nu nagá'ana queē' xan luyú na'. Nagá'anasibi' zxi'inē', ate' nadxí'ide'enē'-bi'. Ga yójsetē, gusöl-lē'ē-bi' zxi'inē', rnnē': “Ilunē' bal zxi'ina'.”

⁷ Ní'irö yugu' bönni' huen dxin na' gula'nnē' la' lé'gcasē', ta'nnē': “Bi' i ni ral-la' guequi queēbi' luyú ni. Guli'dá, gútiru'-bi', ate' guequi queēru' luyú ni.”

⁸ Que lē ni na' gula'zönē'-bi', en gulútiē'-bi'. Gula'ru'unē'-bi' ní'ilö ga dá'gaca lubá uva na'.

⁹ Ní'irö Jesús gunábinē' bönni' nacu'ē ni', rnnē':

—¿Nacxi gunē' bönni' xan luyú na', channö? Huidē', en gútigaquiē' bönni' huen dxin na', ate' udödē' luyú na' lu ná'agaquiē' bönni' yúbölö.

¹⁰ ¿Naru' cabí nulábanili' lē na' nazúaj lu guichi lá'ayi? Caní rnna:

Guióǵ na' gula'ru'unē' bönni' tu'cu'ē zö'ö, na'a naca guióǵ len, squin zö'ö.

¹¹ Xanru' Dios benē' ga naca caní ate' rubániru' ca naca lē ni rilé'eru'.

¹² Ní'irö ta'zóa ta'bö'ē ila'zönē' Jesús tu' téquibe'enē' bucúdzu'ē didza' ca naca quégaquiē', pero tádxinē' le ilún bönachi zían nacuá' ni', en que lē ni na' bulu'cá'anē' Lē', söhuóǵgaquiē'.

*Ca naca le ta'guíxaj lázagaca bönachi**(Mt. 22:15-22; Lc. 20:20-26)*

13 Gudödi lê ni yugu' bönni' yudo' unná bê' na' gula'söl-lê'ê bal-lê' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu'zéguië' Lê' didza'.

14 Bila'dxinë' bönni' ni ga na' zoë' Jesús, en tē' Lê':

—Bönni' Usedi, nözitu' ru'u didza' iduté li. Biti' ru'i ládxu'u bi ta'nnasö bönachi, tu' cabí ruyusu' le tu'luf'isö cuínguequi bönachi, pero rusëdinu' ca nácatë le rê'enë' Dios ilün bönachi. ¿Ru'i netu' lataj xibá queë' Moisés quíxaj laztu' le tu'quíxjê' uláz queë' César? ¿Naru' uguíxajtu' o biti' quíxajtu'?

15 Réquibe'enë' Jesús tu'ë didza' lu yöl-la' riguílaj ladxi' quégaquië', ate' rê' légaquië':

—¿Bíx que rubéajli' neda' didza'? Guli'diguá'tsöca' tu dumí ridá para ilé'eda' le.

16 Diguá'agaquië' le, ate' Jesús gunábinë' légaquië', rnnë':

—¿Nuzxi lahui da' lê'e ni, en nuzxi lê ni?

Bulu'bí'ë didza', ta'nñë':

—Queë' César na'.

17 Ní'irö Jesús gudxë' légaquië', rnnë':

—Buli'nödzej queë' César le nequi queë' César, ate' queë' Dios le nequi queë' Dios.

Bulu'bánnë' ca naca didza' bubi'ë Jesús.

*Ca naca que yöl-la' rubán lu yöl-la' guti**(Mt. 22:23-33; Lc. 20:27-40)*

18 Ní'irö bila'dxinë' bal-lê' bönni' yudo' saduceo ga zoë' Jesús. Bönni' ni ta'nñë' biti' ulu'bán nupa chinátigaca. Que lê ni na' gulë' Jesús, ta'nñë':

19 —Bönni' Usedi, Moisés nuzúajë' queëru' lu guichi channö gátie' tu bönni' biti' zoa bí'i queë', ate' ugá'ananu nígula queë', bí'i böchë'ê bönni' na' ral-la' utsaga ná'alénbi'-nu, en uzóabi' bí'ido' gácabi' bí'i queébi' böchi'bi'.

20 Gula'cuá'abi' gádxibi' bí'i nácacacabi' böchi'gacabi'. Bí'i huáca na' butsga ná'alénbi'-nu nígula, ate' gútibi', cuntú nu zoa bí'ido' queébi'.

21 Bí'i buropi na' butsga ná'alénbi'-nu nígula uzëbi' na', ate' gútibi' ca', cuntú nu zoa bí'ido' queébi'. Lësca' caní guca queébi' bí'i bunny.

22 Caní guca, bulu'tsaga ná'alénbi'-nu yúgu'tëbi', cuntú nu zoa bí'ido' quégacabi'. Ga yöjsetë, gútinu' ca' nígula na'.

23 Na'a, cate' ulu'bán nupa chinátigaca, ¿núzxilöbi' guéquinu nígula na' queébi', tu' bulu'tsaga ná'alénbi'-nu igádxitëbi'?

24 Bubi'ë didza' Jesús, rê' légaquië':

—Richíxili' tu' cabí núnbë'ëli' le nazúaj lu guichi lá'ayi, en biti' nözili' ca naca yöl-la' huáca queë' Dios.

25 Cate' ulu'bán nupa chinátigaca, biti' ca' ulu'tsaga ná'agaquië', ate' yugu' bönni' biti' ila'cuá'lenë' nígula, pero ilácagaquië' ca nácacagaquië' gubáz lá'ayi queë' Dios, nacu'ë yehua' yubá.

26 Na'a, ca naca quégaca nupa chinátigaca channö ulu'bán, ¿naru' cabí nulábanili' le buzúajë' lu guichi Moisés? Ru'i didza' ca na' bulidzë' Dios lê' lu yaga yötsi'do' régui. Gudxë' lê': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunné' caní quégaquië', naca bê' nabángaquië' sal-la' gulatië' zí'alö.

²⁷ Dios náquië' Dios quégaca nupa nabángaca, calëga quégaca nupa nátigaca tsaz. Richíxiteröli'.

Le naca lo le gunná bë'ë Dios
(Mt. 22:34-40)

²⁸ Bidë' ca' tu bönni' yudo' usedi ga zoë' Jesús. Biyönnë' ca na' gulu'ilenë' Jesús didza', en nözinë' dxí'ado' bubí'ë Jesús didza'. Que lë ni na' gunábinë' Jesús, rnnë':

—¿Bízxilö le gunná bë'ë Dios nácatërö lo ca yúgu'të le gunná bë'ë?

²⁹ Bubi'ë didza' Jesús, rë' lë':

—Le gunná bë'ë le nácatërö lo ca yúgu'të naca lë na' rnna: “Guli'yöni bönachi Israel. Xanru' Dios, tuzë' Lë' náquië' Xanru'.

³⁰ Ral-la' idxí'ínu' Xanu' Dios idú ládxi'u, en lu idú icja ládxi'do'o, en lu idú yöl-la' réajni' quiu', en lu idú yöl-la' huáca quiu'.” Lë ni naca le gunná bë'ë le nácatërö lo.

³¹ Le gunná bë'ë le naca buropi, lëbisö ca naca. Caní rnna: “Ral-la' idxí'ínu' luzó'o ca nadxí'i cuinu'.” Biti' ca' zoa ia'tú le gunná bë'ë le nácarö lo ca chopa ni gunná bë'ë.

³² Ní'irö bönni' yudo' usedi na' gudxë' Jesús, rnnë':

—Dxí'ado' gunnó', Bönni' Usedi. Le nácatë rnno'. Tuzë' náquië' Dios, en cünturö nu zoa naca Dios.

³³ Para idxí'iru'-në' Dios idú ládxi'ru', en lu idú yöl-la' réajni' queëru', en lu idú icja ládxi'do'oru', en lu idú yöl-la' huáca queëru', en para idxí'iru' luzá'aru' ca nadxí'i cuinru', nácarö lesaca' ca yúgu'të böa' bédxido' rütigacaru'-ba' lu bucugu lá'ayi queë' Dios, enca' ca yúgu'të böa' bédxido' ruzéguí'gacaru'-ba' lu bucugu na'.

³⁴ Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnnë':

—Ia'látisö riyadzaj quiu' gúnbë'u le rinná bë'ë Dios.

Cünturö nu burugui bi inábini Jesús.

¿Nuzxi xzí'ini náquië' Cristo?
(Mt. 22:41-46; Lc. 20:41-44)

³⁵ Cate' ni' rusëdinë' Jesús bönachi ga naca chila yudo', rnnë':

—¿Bízx que ta'nnë' bönni' yudo' usedi náquië' Cristo xzí'ini xisóë' David?

³⁶ Lë cazë' David na' bë'ë didza', zóalenë' Dios Bö' Lá'ayi lë', gunné':

Xanru' Dios gudxë' Xana':

“Gurö'ö cuita lë'a ibëla

cate' gunra' ga ulu'zóa zxíbigaca lo'

nupa bití' ta'lé'e Li' dxí'a.”

³⁷ ¿Naru' nácatsë' Cristo xzí'ini xisóë' David channö lë cazë' David na' rnnë' queë' náquië' Xanë'?

Bönachi zían nacua' ni' tu'zë nágagaca Lë' gula'yaza ládxi'gaca didza' ni.

Jesús ruzéguí'ë didza' bönni' yudo' tu'sëdinë'
(Mt. 23:1-36; Lc. 11:37-54; 20:45-47)

³⁸ Ní' rusëdinë' Jesús yugu' bönni' dá'gaquië' Lë', rë' légaquië':

—Guli'gún chí'i cuinli' quégaquië' bönni' yudo' tu'sëdinë'. Ta'yaza ládxi'gaquië' ta'dë' nilö na'lö, nácuagaquië' lari' tunna. Ta'yaza ládxi'gaquië' ca' tu'lidza tsahui' bönachi légaquië' gapa naca lu yë'ëyi.

³⁹ Ta'bö'ë yugu' lataj lo lu yu'u ga tu'dubë' tu'sëdë' queë' Dios, enca' gapa tu'dubë' të'aj tahuë'.

⁴⁰ Rugúagaquië' lédxigacanu nigula uzëbi, en para ulu'lu'isö tsahui' cuíngaquië', xidzé tu'lidzë' Dios. Bönni' ni, gúnda'rë' Dios légaquië' xiguaia'.

Le bunödjanu tu nigula uzëbido' queë' Dios
(Lc. 21:1-4)

⁴¹ Tsanni ni' rë'ë Jesús chila yudo' ga zoa guí'ina ga ta'gú'u bönachi dumí que yudó', ruyüë' ca tun bönachi ta'gú'u dumí lu guí'ina. Dumí zían ta'gu'ë bönni' dë yöl-la' tsahui' queégaquië'.

⁴² Ní'irö bidxinnu tu nigula yechi' uzëbido' ni', ate' gulú'unu chopa dumí lásido', le nazáca'gaca láti'do'os.

⁴³ Ní'irö bulidzë' Jesús yugu' bönni' usëda queë', en rë' légaquië':

—Le nácatë rea' libí'ili', nigula yechi' uzëbido' ni' gulú'urönu ca yúgu'të nupa bi ta'gú'u lu guí'ina que yudo'.

⁴⁴ Yúgu'të bönni' ni' ta'gu'ë que le nagá'anasö queégaquië', pero nigula ni, lu yöl-la' yéchi'do' queënu gulú'unu idütë la's dui tsca le dësö queënu, le ral-la' gáhuinu.

13

Rigúxjö'ë Jesús ca si' ulu'quínnajë' yudo'
(Mt. 24:1-2; Lc. 21:5-6)

¹ Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë'e zö'ö queéqueui.

² Bubi'ë didza' Jesús, rë' lë':

—Rilë'enu' yugu' yu'u zxön ni, pero biti' ca' ugá'ana guiöj lahui luzë'e ni, tu' ulu'quínnaj bönachi léguequi.

Le ilaca bë' cate' si' údxi que yödzülió
(Mt. 24:3-28; Lc. 21:7-24; 17:22-24)

³ Ní'irö yöjáquië' Jesús, en yugu' bönni' dá'gaquië' Lë' lu Guí'a Yaga Olivo, guí'a na' dë ca dödilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulë' Lë', ta'nnë':

⁴ —Gudíxjö'i' netu' bátaxi ilaca lë ni. ¿Bizxi gaca bë' chizóa ilaca yúgu'të lë ni?

⁵ Bubi'ë didza' Jesús, rusëdinë' légaquië', rnnë':

—Gulí'gún chí'i cuinli' para cabí nu si' ye'e libí'ili'.

⁶ Ila'la' lahuë' zían bönni' si' lágaquië' ca lea' neda', ila'nnë' nácagaquië' Cristo. Caní ila'zí' yé'enë' bönachi zían.

⁷ Ní'irö cate' yönilí' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi.

⁸ Tu yödzo' tül-lalen ia'tú yödzo', en tu ga nu rinná bë' tsöjtíl-lalen ia'tú ga nu rinná bë'. Zían lataj tödi budó' zxu', en tsu'u gubín. Ila'tsatsa bönachi. Yugu' lë ni ilaca le isí lo ila'gu'í ila'zaca' bönachi dza ni'.

⁹ Ní'irö guli'gún chí'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sëdë' queë' Dios bönni' judío. Idxinli' lógaquië' bönni' ta'nná bé'enë' libí'ili', en lógaquië' bönni' ta'nná bé'enë' yödzo' zí'tu'. Ilunë' caní queëli' tu' dá'ali' neda', pero gunli' ba nalí quia' neda' ní'.

¹⁰ Zí'alö ca idxín dza údxi, run bayudxi gaca libán que didza' dxi'a quia' lógaca bönachi idütë yödzülió.

¹¹ Cate' ni' ila' chë'ë libí'ili', en ulu'dödë' libí'ili' lu ná'agaquië' bönni' yúlahui', bití' gü'i ládxi'li' bizxi innali'. La' dza ní'isö Dios gunné' queéli' didza' gü'ili', ate' lë ni innali'. Cate' ni' gü'ili' didza', calëga libí'isili' na' innali', pero Dios Bö' Lá'ayi innë'.

¹² Ulu'dödi bönachi la' böchi'gacasö lu ná'agaquië' bönni' ilútië' légaquië'. Yugu' bönni' nacua'abi' bi' quégaquië' ulu'dödë' la' zxi'inigaca cazë' ca', ate' zxi'inigaquië' na' ulu'dödibi' la' xuz xiná'agaca cázabi' lu ná'agaquië' bönni' ilútië' légaquië'.

¹³ Yúgu'të bönachi ulu'zóa libí'ili' tsölá'alö tu' dá'ali' neda', pero núlöli' guá' ilenli' lë na' ga idxinrö dza údxi, uláli'.

¹⁴ 'Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní: "Tsz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacua' luyú Judea, en tsójaca gapa naca lu guá'ado'.

¹⁵ Nu zoa ícjo'olö dza ni' ral-la' izxúnnajtë, en bití' huötaj zxan yu'u para tsöjzxi' bi dë que lu yu'u.

¹⁶ Nu zoa la' guixi' ral-la' izxúnnajtë, en bití' huöaj tsöjzxi' lari' rixóa yení.

¹⁷ Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxí'nu-bi' bí'ido'.

¹⁸ Bulí'lidzë' Dios inábili'-në' cabí gun bayudxi izxúnnajli' cate' raca beo' ziaga ca'.

¹⁹ Yugu' dza ni' ila'guí' ila'zaca'rö bönachi ca le guca zí'atëlö cate' si' guta' yödzülió le benë' Dios ga ridxintë na'a dza, ate' dza zá'gaca bití' gaca caní.

²⁰ La'tu' cabí nunë' Dios ga ulu'huóaca nabábasö yugu' dza ni', cuntu nu ulá, pero tu' nadxí'inë' nupa chigurö cazë', chinunë' queë' gunë' ga ulu'huóaca nabábasö yugu' dza ni'.

²¹ 'Na'a, channö nu guíë libí'ili': "Bulí'yútsöca', ni zoë' Cristo", o inná: "Bulí'yútsöca', ni' zoë'", bití' ca' tséajlë'ëli' nu na'.

²² Ila'lá' lahuë' zían bönni' ila'zí' yé'enë' bönachi. Ila'nnë' nácaagaquië' Cristo, en ila'nnë' nácaagaquië' bönni' tu'ë didza' uláz queë' Dios. Ulu'lu'i'inë' le ilaca bë', en ilunë' yugu' yöl-la' huáca zxön. Huala'zì' yé'enë' ca' nupa gurö cazë' Dios channö ila'zëqui'në'.

²³ Ní'irö libí'ili', guli'sóa ban ladxí'. Yúgu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi
(Mt. 24:29-35, 42-44; Lc. 21:25-36)

²⁴ Gunnë' ca' Jesüs:

—Yugu' dza ni', tödi gaca dza na' ila'guí' ila'zaca' caní bönachi, ichul-la gubidza, en bití' cu'u bení' beo'.

²⁵ Ila'guínnaj bölj lúzxiba, en ila'zxizi le nál-lagaca nalá'gaca lúzxiba na'.

²⁶ Ní'irö ila'lé'eni neda', Bönni' Guljë' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'.

²⁷ Isól-la'gaca'-në' gubáz lá'ayi quia', ate' ulu'tubë' bönachi gurö caza' quia' nacua' idapa la'a yödzülió, ga naguéla'të luyú bidxi, ga ridxintë ga naguéla' lúzxiba.

²⁸ Guli'tséajni' le rusedi yaga higo ni'. Cate' ta'lén ni'a në'e huë'enido', en rubía xilagui' yulu, nözili' chizóa idxín beo' cusubá.

²⁹ Lëasca' caní, cate' ilé'eli' taca lë ni, inözili' chizóa idxín dza údxi na', en chiridzaga lo.

³⁰ Le nácatë rea' libí'ili', yúgu'të lë ni ilaca zí'atëlò ca ilátigaca nupa nacua' dza na'.

³¹ Huadödi que lúzxiba, en que luyú ni, pero xtídz'a catu caz tódi que.

³² 'Cate' idxín dza ni' o rëla ni', cuntu nu nözi. Biti' nözguequinë' gubáz lá'ayi nacu'ë yehua' yubá, en bití' nözda' neda', Zxí'inë' Dios. Tuzë' Dios Xuz nöziné'.

³³ Que lë ni na', buli'subán ládxi'li'. Guli'sóa sina', en buli'lidzë' Dios tu' cabí nözili' bizxi dza gaca lë ni.

³⁴ Gaca ca raca cate' sa'yéajë' zi'tu' tu bönni'. Cate' chizóa uzë'ë lidxë', udödë' lu ná'agaquië' huen dxin queë' yugu' le dë queë'. Que queëgaquië' gu'ë xichíngaquië', en inná bë'ë soa ban ladxi' nu zoa huen chi'i ga nu riyaza.

³⁵ Guli'sóa libí'ili' ban ladxi' tu' cabí nözili' bátaxi huödë' xan yu'u, cate' chiridzö', o gatsaj lahui' yëla, o cate' ribödxiba' böra, o zílado'.

³⁶ Guli'gún caní, para cabí idixáquië' libí'ili' rásili' channö huödë' tsárido'os.

³⁷ Lë ni rea' libí'ili', rea' ca' yúgu'të bönnachi: Guli'sóa ban ladxi'.

14

Tun xtídz'a'gaquië' bönni' yudo' ila'zönë' Jesús
(Mt. 26:1-5; Lc. 22:1-2; Jn. 11:45-53)

¹ Ia'chopa dza ca' gaca Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yöta xtila bití' nazí' cúa zi que. Ta'zóa ta'bö'ë yugu' bixúz unná bë', en bönni' yudo' tu'sëdinë' ila'zönë' Jesús bagáchi'sö para ilútië' Lë'.

² Ta'nnë':

—Biti' gaca sönru'-në' dza laní tu' ila'tsatsa bönnachi.

Nigula rigú'unu le rilá' zxixi icjë' Jesús
(Mt. 26:6-13; Jn. 12:1-8)

³ Zoë' Jesús yödzo Betania, lu yu'u lidxë' Simón, bönni' güf'inë' huë' nudzu' ruzödi. Tsanni ni' rö'ë rahuë' Jesús, guyázanu tu nigula, nuá'anu tu böga'do' néquini guiöj zaca', yudzu le rilá' zxixi que yöj susén lasi idú, le nazaca' yenni'. Gulá'anu böga'do' na', en gulú'unu le rilá' zxixi na' icjë' Jesús.

⁴ Gula'lélanë' bal-lë' bönni' nacu'ë ni'. Ta'nnë' la' légcasë':

—¿Bixz que guca ditaj le zxixi na'?

⁵ La'tu' nu guti' lë na', huazi' que ia'lati' ca lászjaru' que tu iz para nu quisi le quegaca bönnachi yechi'.

Gula'nnëdë'ë queënu.

⁶ Ní'irö Jesús bë'ë didza', rnnë':

—Guli'gü'i-nu lataj. ¿Bixz que rinnë zí'ili' queënu? Naca dxi'a le bennu quia'.

⁷ Nacuá'lentica'sö bönnachi yechi' libí'ili', en bátati'tës guë'ënili', huáca gunlí' dxi'a quegaquië', pero neda' bití' sóatica'sa' ga zóali'.

⁸ Tsca le guzxequi' nu bennu nigula ni. Cate' gulú'unu le rilá' zxixi ni neda', bupá'anu neda' zí'atëlò ca igácha'a yeru ba.

⁹ Le nácatë rea' libí'ili', gáti'tës ga gaca libán que didza' dxi'a quia' idú yödzólió, soa nu quixjö' ca' lë ni bennu nigula ni quia'. Caní gaca para nu tsöjnë lënu.

Rizí' lu në'ë Judas udödë' Jesús
(Mt. 26:14-16; Lc. 22:3-6)

¹⁰ Ní'irō birúajè' Judas Iscariote, bōnni' nabábalenè' chínnuè' na' dá'gaquiè' Jesús. Guyijè' ga nacu'è bixúz unná bè' para udödè' Jesús lu ná'agaquiè'.

¹¹ Cate' bila'yōmnè' xtídzè'è Judas na', bulu'dzèjanè', ate' gula'zì' lu ná'agaquiè' ilu'è lè' dumí. Ní'irō gusí lahuè' Judas rizóa ribò'è udödè' Jesús lu ná'agaquiè'.

Le rē'aj ráguru' rusubanru' ca gútiè' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Naca dza risí lo laní cate' tahuè' yōta xtila bití' nazí'í cúa zi que, dza na' tutiè'-ba' bō'cu' zxíla'do' tahuè'-ba' dzó' Laní Pascua na', cate' tu'subanè' ca benè' Dios busólè' bōnachi judío luyú Egipto. Ní'irō bōnni' usèda queè' Jesús gula'nábinè' Lè', ta'nnè':

—¿Gaxzi rē'ēnu' tséajtu' tsōjpá'atu' le gáguru' xtsó' que Laní Pascua?

¹³ Ní'irō Jesús gusól-lè'è chopè' bōnni' usèda queè', en rē' légaquiè':

—Gulí'tséaj lu yōdzó. Ní' huadzágali' tu bōnni' nu'è tu rō'ō nisa.

Gulí'tséajlenè'.

¹⁴ Ga na' tsáziè', gulí'guíè' xan yu'u na': “Rnnè' Bōnni' Usedi: ¿Gaxzi zoa yu'u ga na' gágulengaca'-nè' bōnni' usèda quia' xtsó' que Laní Pascua?”

¹⁵ Ní'irō uluf'inè' libí'ili' tu yu'u zxōn ga naca buropi cuía ga chinabá'a. Bulí'pá'a le gáguru' ní'.

¹⁶ Bila'ruájè' bōnni' usèda queè' na', en bila'dxinè' lu yōdzó, ate' yōjxáca'gaquiè' yúgu'tè' ca na' chigudxè' légaquiè' Jesús. Bulu'pè'è le ilahuè' ní' que Laní Pascua.

¹⁷ Cate' chizá' ral-la, bidxinè' Jesús ní', dzágagaquiè' idxínnutè' bōnni' usèda queè' Lè'.

¹⁸ Tsanni ní' rō'ōgaquiè' tahuè', bè'è didza' Jesús, rnnè':

—Le nácatè' rea' libí'ili', zoa nu dzaga libí'ili', nu rágulen neda' tsōzxōn, nu udōdi neda' lu ná'agaca bōnachi.

¹⁹ Ní'irō bulu'hui'innè', en gula'sí lógaquiè' tu tuè' tè' Lè':

—¿Naru' neda'?

Ia'túè' ca' gunnè':

—¿Naru' neda'?

²⁰ Bubi'è didza' Jesús, rē' légaquiè':

—Naca tu nu nutsa'ladaj chínnuli' ní, bōnni' na' nunè'è nè'è tsōzxōn len na'a lu yō'ōna.

²¹ Tseja' ga gátia' neda', Bōnni' Guljè' Bōnachi, ca na' nazúaj lu guichi lá'ayi ca gaca quia', pero bica' bayechi' bōnni' na' udödè' neda' lu ná'agaquiè' bōnni' ilútiè' neda'. Gácarō dxi'a queè' bōnni' na' la'tu' cabí guljè'.

²² Tsanni ní' tahuè', gudélè'è Jesús yōta xtila. Gudxè' Dios: “Xclenu'.” Buzxuzxjè' le, en bè'è quégaquiè', rnnè':

—Gulí'gagu. Lè ni naca bèla' rōn quia'.

²³ Gudélè'è ca' tu zxíga'do', en gudxè' Dios: “Xclenu'.” Ní'irō bè'è quégaquiè', ate' yúgu'tè' gulè'ajè' le.

²⁴ Jesús rē' légaquiè':

—Lè ni xichōna' le run tsutsu didza' cubi rucá'ana tsahui', le núnlenè' Dios bōnachi. Rōn ni ilalaj ní'a quégaca bōnachi zían.

²⁵ Le nácatè' rea' libí'ili', bíti'rō guí'ja' xisi uva ga idxinrō dza guí'ja' le cubi ga ní' rinná bè'è Dios.

Jesús rnnè' innè' Pedro bití' núnbè'è Lè'

(Mt. 26:30-35; Lc. 22:31-34; Jn. 13:36-38)

²⁶ Gudödi gulúl-lë' yöl-la' ba, bila' rúajë' sôjâquië' Gu'fa Yaga Olivo.

²⁷ Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzò', tu' nazúaj lu guichi lá'ayi, rnna: “Gutia'-në' uyú bö'cu' zxila', ate' ilásilasiba' bö'cu' zxila' na'.”

²⁸ Tödi ubana' lu yöl-la' guti, tseja' luyú Galilea zí'alò ca libí'ili'.

²⁹ Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

³⁰ Jesús gudxë' lë', rnnë':

—Le nácatë rea' li', la' dzò' nisö, si' cödxilöba' böra le buropi luzuí, tsonna luzuí innó' biti' núnbë'u neda'.

³¹ Ní'irö Pedro buzötjë' Dios, rnnë':

—Sal-la' gátilentea' Li' tsözxön, biti' ca' inná' biti' núnbë'a Li'.

Lësca' caní gula'nnë' yúgu'të'.

Jesús rulidzë' Dios la' yëla Getsemani

(Mt. 26:36-46; Lc. 22:39-46)

³² Ní'irö Jesús, en bönni' dá'gaquië' Lë' bila'dxinë' la' yëla Getsemani, ate' Jesús gudxë' légaquië', rnnë':

—Guli'cò' ni, tsanni tseja' neda', tsöjlidza'-në' Dios.

³³ Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxe'ë.

³⁴ Gudxë' légaquië', rnnë':

—Huati caza' lu yöl-la' risëbi ladxi'. Guli'cöz ni, en guli'ná' yëla.

³⁵ Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i saqué'ë dza na'.

³⁶ Ní' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

³⁷ Ní'irö böajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitsö'? ¿Naru' cabí rubéajtso' yëla lo' tu chí'ido'?

³⁸ Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queë'li' ricuídí'li'.

³⁹ Ní'irö sa'yéajë' Jesús leyúbölö, rulidzë' Dios, en la' tuz ca gunnë'.

⁴⁰ Cate' böajë' leyúbölö ga na' nacu'ë, yöjxáquië' légaquië' tasië' tu' nadöditë yëla légaquië'. Biti' nözguequinë' bizxi didza' ulu'bi'ë, le ilë' Lë'.

⁴¹ Cate' böajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? ¡Tsa'ti' gaz! ¡Chibidxín dza! ¡Buli'yútsöca', Neda', Bönni' Guljë' Bönachi, chinadöda' lu ná'agaca bönachi dul-la'!

⁴² ¡Guli'chasa, uyéajru'! ¡Buli'yútsöca', chizë'ë bönni' na' udödë' neda' lu ná'agaca bönachil!

Ta'zönë' Jesús

(Mt. 26:47-56; Lc. 22:47-53; Jn. 18:2-11)

⁴³ Ní' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' guié tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë' nasöl-la'gaquië' légaquië'.

44 Judas, bönni' na' rudödë' Jesús lu ná'agaquië' chinuluí'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. ¡Guli'sönë', en guli'chë'ë! ¡Guli'yútsöquië'!

45 Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús.

46 Ní'irö gula'zönë' Jesús, en gula'chë'ë Lë' nadzunë'.

47 Ní'irö tuë' bönni' ni' dé'ë Jesús guléajë' guíë tuchi', en benë'-bi' huë' bi' huen dxin queë' bixúz lo. Guchúguië' guídi nágabi'.

48 Jesús gudxë' bönachi na', rnnë':

—¿Narúajtsali' nuá'ali' guíë tuchi', en yaga para sönli' neda', runli' ca runli' cate' rizönli'-në' gubán?

49 Yugu' dza guzóalena' libí'ili' rusédigacada' bönachi ga naca chila yudo', ate' bití' guzxónli' neda', pero raca caní para gaca le nazúaj lu guichi lá'ayi.

50 Ní'irö yúgu'të bönni' usëda queë' Jesús bulu'cá'anë' Le', ta'zxúnajë'.

Rizxúnajbi' tubi' bi'i ra'bán

51 Zóabi' ca' ni' tubi' bi'i ra'bán söjnobi' Jesús, nuxóasö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi'

52 pero busanbi' lari' na', en xigúidisöbi' buzxúnajbi'.

Ridxinë' Jesús lógaquië' bönni' yúlahui' lo

(Mt. 26:57-68; Lc. 22:54-55, 63-71; Jn. 18:12-14, 19-24)

53 Gula'chë'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi.

54 Pedro yöjnahue' Jesús zí'tu' zí'tu'sö, en guyazië' lö'a lidxi bixúz lo na', en gurö'ölenë' tsözxön yugu' ni'a në'ë bixúz lo na', rutsë'e cuinë' ra' guí'.

55 Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguië' Jesús para gaca ila'chúguië' queë' gátie' pero bití' bi bulu'dzölinë'.

56 Bönni' zían gula'nnë' queë' Jesús le cabí nácate', pero bití' yöjlözagaca le gula'nnë' queë'.

57 Ní'irö gula'zuinë' yugu' bönni' gula'nnë' queë' Jesús le cabí nácate', ta'nnë':

58 —Netu' biyönitu' didza' bë'ë bönni' ni, gunné': “Uquínaja' yudo' ni, lë ni nequi lu ni'a lu na' bönachi, ate' tsonna dzasö uchisa' ia'tú le cabí nequi lu ni'a lu na' bönachi.”

59 Lësca' lë ni, bití' yöjlözagaca xtídza'gaquië'.

60 Ní'irö guyasë' bixúz lo na' gatsaj láhui'lö bönachi nacuá' ni', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nnë' quiu' bönni' ni?

61 Jesús, dxisö zoë'. Bití' bi didza' rubi'ë. Gunábinë' Lë' leyúbölö bixúz lo na', rnnë':

—¿Naru' nacu' Li' Cristo, Zxí'inë' Dios Lá'ayi?

62 Bubi'ë didza' Jesús, rnnë':

—Naca'. Ilé'eli' neda', Bönni' Guljë' Bönachi, soa' cö'a cuitë' ibëla Dios napa cazë' yöl-la' huáca cate' ni' huöda' lu böaj lúxiba.

63 Ní'irö bixúz lo na', lu yöl-la' rilé queë' guchözë' lari' nácuë', rnnë':

—¿Núzxirö naquíniru' nu quixjö'?

64 ¿Riyõn quezili' rucá'anè' Dios cá'asò len didza' ru'è! ¿Nacxi rusáca'li' queëli'?

Yúgu'tè' gula'chúguiè' queë' gátiè'.

65 Ní'irò gula'sí lógaquiè' bal-lè' tu'chejè' Jesús zxõna'. Bulu'sayjè' lahuè', en gulundè' Lè' zi', ta'nnè':

—Gunnè' yá'atsõca' nuzxi na' bè' Li'.

Yugu' bõnni' ni'a nè'è bixúz lo gula'gápè'è ru'è Jesús.

Rnnè' Pedro biti' núnbè'è Jesús

(Mt. 26:69-75; Lc. 22:56-62; Jn. 18:15-18, 25-29)

66 Cate' ni' zoè' Pedro lõ'a zxan yu'u, bidxinbi' tubi' bi'i nigula huen dxin queë' bixúz lo na' ga na' zoè'.

67 Cate' bilé'ebi' Pedro, rø'è rutsè'e cuinë' ra' guí, buyubi' lè', rnnabi':

—Do'o ca' li' Jesús, bõnni' Nazaret na'.

68 Gudá'baguiè' Pedro, rnnè':

—Biti' núnbè'a-nè', en biti' nõzda' bizxi na' rno'.

Burúajè' Pedro yõsõé' ga nu riyaza lõ'a. Ní'irò gurõdxiba' bõra.

69 Buyubi' lè' leyúbölö bi'i nigula huen dxin na', en gusí lobi' rëbi' nupa nacua' ni':

—Bõnni' ni dzáguiè' légaquiè'.

70 Leyúbölö gudá'baguiè' Pedro. Ia'lati' gudzè' nupa nacua' ni' tè Pedro, ta'nná:

—Le nácatè dzagu' légaquiè', tu' nacu' bõnni' Galilea. Yöl-la' ru'isõ quiu' didza' naca bè'u, tu' tuz ca ru'ili' didza'.

71 Gusí lahuè' Pedro rudxia dõ' cuinë', en ruzõtjè' Dios, rnnè':

—Biti' ca' núnbè'a-nè' bõnni' na' ru'ili' didza' ca naca queë'.

72 La' gurõdxitèba' bõra le buropi luzuí. Ní'irò yõjnenè' Pedro didza' na' bè'è Jesús, gudxè' lè': “Zi'alò cõdxiba' bõra le buropi luzuí, tsonna luzuí innó' biti' núnbè'u neda'.” Cate' yõjnenè' didza' ni, gusí lahuè' ribõdxidè'.

15

Ridxinè' Jesús lahuè' Pilato, bõnni' rinná bè'è

(Mt. 27:1-2, 11-14; Lc. 23:1-5; Jn. 18:28-38)

1 Ní' naca zílado', yugu' bixúz unná bè' len bõnni' gula tu' zéajni'inè', en yugu' bõnni' yudo' usedi, en yúgu'tè bõnni' yúlahui' lo gulún xtídzagaquiè'. Ní'irò gula'chè'è Jesús nágu'è, en bulu'dödè' Lè' lu nè'è Pilato, bõnni' rinná bè'è uláz que yõdz Roma.

2 Pilato gunábinè' Jesús, rnnè':

—¿Naru' nacu' Li' Bõnni' inná bé'enè' bõnachi judío?

Bubi'è didza' Jesús, rnnè':

—Ca nácatè rno'.

3 Yugu' bixúz unná bè' bulu'zéguiè' Jesús didza' le zían.

4 Ní'irò Pilato gunábinè' Lè' leyúbölö, rnnè':

—¿Naru' cabí rubi'itso' didza'? Buzètsõca' nagu' cate' xõ zían le ta'nnè' quiu'.

5 Biti' bi didza' bubí'è Jesús. Ca' guca, bubáninè' Pilato.

Ta'chúguiè' queë' Jesús gátiè'

(Mt. 27:15-31; Lc. 23:13-25; Jn. 18:38-19:16)

6 Dè tu le runè' Pilato cate' raca laní na', rusanè' lu ná'agaca bõnachi tu bõnni' nadzunè' lidxi guiè, núti'tès nu ta'naba.

7 Nadzunë' tu bönni' lë' Barrabás lidxi guîë, ate' dzágagaquië' lë' ia'bal-lë' luzë'ë, yugu' bönni' gulútië' bönachi cate' gula'dá'báguie' yúlahui'.

8 Cate' bila'dxín bönachi zián ni', gula'sí lógaquië' ta'nabë' lahuë' Pilato gunë' quégaquië' ca run cazë'.

9 Bubi'ë didza' Pilato, rnnë':

—¿Rë'ënili' usana'-në' queëli' Bönni' Inná Bé'enë' Bönachi Judío?

10 Caní gunnë' Pilato tu' réquibe'enë' bulu'dödë' yugu' bixúz unná bë' Jesús lu në'ë tu' tu'zxé'enë' Lë'.

11 Yugu' bixúz unná bë' na' gula'gu'ë xilá ládxi'gaca bönachi zián na', para ila'nabë' lahuë' Pilato usanë' lu ná'agaquië' Barrabás.

12 Ní'irö Pilato gunábinë' légaquië' leyúbölö, rnnë':

—¿Bizxi ré'ënili' guna' queë' bönni' na' ru'íli' lë', Bönni' Inná Bé'enë' Bönachi Judío?

13 Gulu'ë zidzaj didza', ta'nnë':

—¡Budë'ë lë'e yaga cruz!

14 Gunábinë' Pilato légaquië', rnnë':

—¿Bizxi caz dö' nu'ë?

Leyúbölö tu'ë zidzaj didza', ta'nnë':

—¡Budë'ë lë'e yaga cruz!

15 Tu' gú'unnë' Pilato gunë' ga ila'yaza ládxi'gaca bönachi zián na', busanë' Barrabás lu ná'agaquië'. Ní'irö gunná bé'enë' nu quin Jesús, ate' budödë' Lë' lu ná'agaquië' bönni' ulu'dë'ë Lë' lë'e yaga cruz.

16 Ní'irö yugu' bönni' rójáquië' gudil-la gula'chë'ë Jesús lö'a yúlahui', ate' bulu'tubë' luzá'agaquië' ní'.

17 Bulu'gácuë' Jesús tu lari' xiná gul-la, en gulunë' tu bregui' ni'a në'e yötsi', le bulu'dxië' icjë'.

18 Ní'irö gula'sí lógaquië' tu'lidzë' Jesús, ta'nnë':

—¡Yöl-la' ba li', rinná bé'enu' bönachi judío!

19 Gula'guinë' gui icjë', en bulu'chejë' Lë' zxóna'. Bulu'zóa zxíbigaquië' lahuë', en lu yöl-la' rutitaj gulunë' Lë' bal.

20 Cate' budxi bulu'titjë' Lë', bulu'gúë' lari' xiná chul-la na' nácuë' ate' bulu'gácuë' Lë' lari' que cazë'. Ní'irö gula'chë'ë Lë' ní'ilö yúlahui' na' para tsóda'gaquië' Lë' lë'e yaga cruz.

Tu'dë'ë Jesús lë'e yaga cruz

(Mt. 27:32-44; Lc. 23:26-43; Jn. 19:17-27)

21 Gulunë' ga bi'ë tu bönni' Cirene yaga cruz queë' Jesús, ridódisë' ni' suzë'ë la' guixi'. Lë' Simón, xúzgacabi' Alejandro, en Rufo.

22 Gula'chë'ë Jesús lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'.

23 Gulu'ë le gu'jë' Jesús xisi uva nutsi' nöri silá' que yaga mirra, pero Lë' biti' gu'ë le.

24 Ní'irö bulu'dë'ë Jesús lë'e yaga cruz, ate' gula'guísië' lari' nácuë', le gula'zí' que queëgaquië' bönni' na' rójáquië' gudil-la. Bulu'béajë' le gaca bë' para ila'nözinë' bízxilö idela' que queëgaquië'.

25 Naca idú xsila cate' bulu'dë'ë Lë' lë'e yaga cruz.

26 Didza' na' bulu'zóë' lë'e yaga cruz ícjalë' Jesús ca naca le tu'quië' Lë' rnna caní: "Bönni' Rinná Bé'enë' Bönachi Judío."

27 Bulu'dá'lenë' Jesús tsözxón lë'egaca yaga cruz chopë' gubán, tuë' cuita lë'ë ibëla, en ia'túë' cuita lë'ë yögöla.

28 Caní guca lë na' nazúaj lu guichi lá'ayi, rnna: Gubábalenë' bönni' tuá' dö'.

29 Yugu' bönni' ta'dödë' ni' tu'lidza zi'ë Jesús, en tu'tá ícjagaquië', ta'nnë':

—¡Önl! ¿Naru' uquínajts'o' yudo' queë' Dios, ate' tsonna dzasö uchísatsu' le?

30 ¡Busólá cuinu' na'a, en bötaj lë'e yaga cruz na'!

31 Lësca' caní yugu' bixúz unná bë', en yugu' bönni' yudo' usedi tu'titjë' Lë'.
Të' luzá'agaquië' tuë' ia'túé':

—Bönachi yúbölö busölë', pero biti' gaca usólá cuinë'.

32 Ta'nnë' ca':

—¡Önl! ¿Nácatsu' Cristo, Bönni' Inná Bé'enë' Bönachi Israel? ¡Bötjatsöca' na'a lë'e yaga cruz para ilé'etu', ate' tséajlë'ëtu' Li'!

Yugu' bönni' na' dá'gaquië' tsözxön len Lë' lë'egaca yaga cruz bulu'lidza zi'ë ca' Lë'.

Le guca cate' gútië' Jesús

(Mt. 27:45-56; Lc. 23:44-49; Jn. 19:28-30)

33 Cate' bidxín idú huagubidza, guchul-la iduté yödzülió. Guca caní ga bidxintë idú ridödi xihuó.

34 Idú ridödi xihuó na' bë'ë Jesús zidzaj didza', rnnë':

—Eloi, Eloi, ¿lama sabactani?

Didza' hebreo ni rnna lu didza' xidza': Dios quia', Dios quia', ¿bixz que nubéaj ládxa'u neda'?

35 Yugu' bönni' nacu'ë ni' bila'yönnë' didza' ni, ate' ta'nnë':

—Buli'zëtsöca' nágali'. Elías rulidzë'.

36 Ní'irö guxíti'ë tu bönni' nútsë'ë ládjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—Cöztsöca'ru', uyuru' channö huidë' Elías uzötjë' Lë'.

37 Gurödxí'ë zidzaj Jesús, en la' gútitë'.

38 Biröza' lari' yödx nala' lu yudo'. Birúaj choplö, gudela' icjlö, en birúajtë zxánilö.

39 Bönni' na' rinná bé'enë' bönni' röjáquië' gudil-la zuinë' lahuë' Jesús, en bilé'enë' ca na' guca gurödxí'ë Jesús, en la' gútitë', ate' gunné':

—Le nácatë bönni' ni gúquië' Zxí'inë' Dios.

40 Nacuá'anu ca' ni' nigula, zí'tu'sö tu'yunu. Nútsa'gacanu ládjagacanu María Magdalena, en Salomé, en María, xiná'agacabi' Jacobo cuidi', en José.

41 Nigula ni yójacalenu Jesús cate' ni' gudë' luyú Galilea, en gulácalenu Lë', gula'gú'unu le gulahuë'. Nacuá'anu ca' ni' ia'bál-lanu nigula zían gula'zá'lenu Lë' lu yödzo Jerusalén.

Ta'gu'ë Jesús yeru ba

(Mt. 27:57-61; Lc. 23:50-56; Jn. 19:38-42)

42 Chizá' ral-la, en naca dza tu'pë'ë, dza si' idxín dza lá'ayi quégaquië' bönni' judío.

43 Que lë ni na' bidë' José, bönni' yödzo Arimatea, bönni' lo ládjagaquië' bönni' yúlalui' lo. Ribözë' ca' dza idinná bë'ë Dios. Idú ládxe'ë guyazië' ga na' zoë' Pilato, en gunábinë' lë' gu'ë lë' lataj u'ë Jesús.

44 Bubáninë' Pilato tu' gunné' chigútië' Jesús, ate' bulidzë' bönni' na' rinná bé'enë' bönni' röjáquië' gudil-la para inábinë' lë' channö chinátië' Jesús.

45 Cate' biyönnë' ca na' gunné' bönni' na' rinná bé'enë' bönni' röjáquië' gudil-la, bë'ë José lataj u'ë Jesús.

46 Ní'irö José na' gú'uë' tu lari' xtila dxí'ado', ate' buzötjê' Jesús lë'e yaga cruz, en buchölinë' Lë' lari' na'. Ní'irö gulu'ë Lë' yeru ba nadaj lë'e gu'a guiöj. Budë'ë tu guiöj blaga zxön ga nu riyaza ba na'.

47 María Magdalena, en María, xinë'ë José tu'yunu ga na' ta'gu'ë Jesús.

16

Rubanë' Jesús lu yöl-la' guti
(Mt. 28:1-10; Lc. 24:1-12; Jn. 20:1-10)

1 Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinë'ë Jacobo, ta'z'ínu yugu' le rilá' zxixi para tsöjlú'ugacanu Jesús.

2 Ni' naca zílado' dza risí lo, yöjácanu ra' yeru ba queë'. Bila'dxinnu ni' cate' si' gulënu bidza.

3 Gula'nábinu luzá'agacanu:

—¿Nuzxi cúatsö queëru' guiöj na' da' ga nu riyaza ba queë'?

4 Cate' bila'dxinnu ni', bulu'yunu, en bila'lé'enu chinadúa guiöj na', ate' guiöj zxön naca.

5 Gula'yú'unu yeru ba lë'e gu'a guiöj na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rõ'öbi' tsólá'a ibëla lu yeru ba na', nácabi' lari' tunna chiguichido'os. Guláxdide'enu.

6 Ní'irö bi'i na' gúdxibi' légacanu, rnnabi':

—Bíti'rö gádxili'. Ruguílajli' Jesús, Bönni' Nazaret, Bönni' na' gudë'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'.

7 Guli'tséaj na'a, guli'tsöjtíxjöi' ca' yugu' bönni' usëda queë', enca' Pedro. Guiëli' légaquië': "Tsejê' Jesús luyú Galilea zí'aló ca libí'ili'. Ni' ulé'eli-në' ca na' chigudxi cazë' libí'ili'."

8 Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

Rulu'i lahuë' Jesús lonu María Magdalena
(Jn. 20:11-18)

9 Cate' bubanë' Jesús zílado' dza na', bulu'i lahuë' zí'aló lonu María Magdalena, nigula na' bubéajë' gadxi bö' xihui' gula'yú'u lënu.

10 Guyéajnu yöjtíxjöi'ínu nupa na' gula'dalen Jesús. Nupa ni ta'sëbi ládxi'gaca, en ta'bödxí yechi'.

11 Cate' bila'yöni didza' ru'ínu, zoë' nabanë' Jesús, ate' bilé'e quézinu Lë', biti' gula'yéajlë' lënu.

Chopë' bönni' usëda queë' Jesús tu'lé'enë' Lë'
(Lc. 24:13-35)

12 Gudödi na', nadzá'aló bulu'i lahuë' Jesús lógaquië' chopë' bönni' usëda queë' yú'ugaquië' nöza, sôjáquië' ga naca ladaj guixi'.

13 Ní'irö bulu'dxinë', dutíxjöi'iguequinë' ia' zica'rë', ate' ni xtídza'gaquië' biti' gula'yéajlë'ë.

Le rigu'ë Jesús lu ná'agaquië' bönni' gubáz queë'
(Mt. 28:16-20; Lc. 24:36-49; Jn. 20:19-23)

14 Ga yöjsetë, bulu'i lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'.

¹⁵ Ní'irö gudxë' légaquië', rnnë':

–Guli'tséaj idütë yödzo'lió tsöjenli' libán que didza' dxi'a lógaca yúgu'të bönachi.

¹⁶ Nu tséajlë' neda', en idila nisa, ulá nu na', pero nu biti' tséajlë', irugu que gati nu na'.

¹⁷ Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a.

¹⁸ Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, biti' bi gun quégaquië'. Ila'xóa në'ë nupa te'e, ate' ulu'huóácatë.

Ruhuëpë' Jesús yehua' yubá

(Lc. 24:50-53; Hc. 1:6-11)

¹⁹ Cate' Xanru' budxi bë'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'.

²⁰ Bila'rúajë' légaquië', yöjéngaquië' libán yúgu'të yödzo. Gúcalenë' Xanru' légaquië', en benë' ga gulunë' le ná'agaca bë' naca idütë li didza' tu'ë. Ca' naca.

DIDZA' DXI'A BUZÚAJĚ' LUCAS

Didza' rigu'ë Lucas lu në'ë Teófilo

¹ Zían nupa chigulún bayudxi ulu' zúaj lu guichi idútë le nácatë, le guca ga zóaru',

² ca na' bila' lé'e nupa ni' dza ni'te, ate' bulu'lu'í rë'u, en bulu'zë didza' que.

³ Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te.

⁴ Ruzúaja' quiu' lu guichi ni para inözinu' naca idútë li lë na' chinazëdu'.

Rulu'ínë' gubáz lá'ayi queë' Dios ca si' gálajbi' Juan, bönni' uquilë' bönachi nisa

⁵ Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí' le Cö' Queë' Abías. Elisabet, nigula queë' Zacarías na' nácanu ca' zxi'ini xisóë' Aarón, bönni' gúquië' bixúz lo dza ni'te.

⁶ Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rnna xtídzë'ë Dios, en le rinná bë' xibá queë'. Caní guca, cuntú nu guca bi innë' queégaquië'.

⁷ Cuntú nu zoa bi'i queégaquië', tu' nácanu Elisabet nigula huödx, ate' chinagúлагаquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz queégaquië'.

⁹ Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios.

¹⁰ Tsanni ni' ruzégui'ë Zacarías na' yalaj, gula'cuá' yúgu'të bönachi ní'ilo, tu'lidza Dios.

¹¹ La' ná'asö' bulu'í lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölá'a ibëla bucugu lá'ayi ga na' régui yalaj.

¹² Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'.

¹³ Ní'irö' gubáz lá'ayi na' gudxë' lë', gunné':

—Zacarías, bití' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan.

¹⁴ Gata' quiu' le uzi'u xibë, en udzëjanu', ate' zían nupa ulu'dzeja ládxi'gaca cate' gálajbi' bí'ido' na',

¹⁵ tu' gácatëbi' zxön lahuë' Dios. Biti' gu'ájbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'.

¹⁶ Gunë' Juan ni ga ulu'huóaca zían bönachi Israel queë' Xanru'.

¹⁷ Inöruë' lë' ca Xanru', ate' ila'cuá'alen lë' Bö' na', en yöl-la' huáca na' gula'cuá'alen Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácagaca xuz len zxi'ínigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'zí' lu në'eguequi Xanru'.

¹⁸ Zacarías gunábinë' gubáz lá'ayi na', rnnë':

—¿Bixi gaca bë' para inözda' ilaca lë ni? Chinagúla' neda', en chinagúlanu ca' nigula quia'.

¹⁹ Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusöl-lë'ë neda' para gü'ïlena' li' didza', en usiyönda' li' didza' dxi'a ni.

²⁰ Na'a, tu' cabí guyéajlë' u xtídz'a'a, icódzu', en bíti'rö gaca innó' cate' gácarö lë ni. Yúgu'të lë ni udxín cate' idxín dza que.

²¹ Tsanni ni' raca lë ni, nacua' bönachi ni'ïlö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi.

²² Cate' burúajë' Zacarías, bití' guca gü'ïlenë' légaquië' didza', ate' guléquiibe'enë' bilé'enë' tu le buluí'inë' Dios lé' lu lataj lá'ayi. Bulá'a buluí'isë' Zacarías, buzéajni'inë' légaquië', tu' cabí raca innë'.

²³ Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'.

²⁴ Gudödi yugu' dza na' Elisabet, nigula queë' Zacarías na', biá'anu-bi' lë'ënu bí'ido', ate' idú gayu' beo' bugá'anasinu ga zoa lídxigaquië'. Guzá' ládxí'nu, rnnanu:

²⁵ "Caní runë' Xanru' quia'. Ruzá' ládxë'ë quia' bí'ido', en runë' ga bíti'rö utuí'ida' lógaca bönachi."

Rigúxjö'ë gubáz lá'ayi ca si' gálajbi' Jesús

²⁶ Cate' chiguca xopa beo', buluí'i lahuë' gubáz lá'ayi na', tu' gusöl-lë'ë Dios lë cazë' Gabriel, tsejë' Nazaret, tu yödzö luyá Galilea.

²⁷ Dios gusöl-lë'ë lé' ni' tsöjyüë'-bi' tubi' bi'i nigula ra'bando' lëbi' María. Chinazí' lu ná'abi' María utsaga ná'alenbi'-në' bönni' lé' José. Nababë' José dí'a dza queë' David, bönni' gunná bé'enë' bönachi Israel dza ni'te.

²⁸ Cate' guyázië' Gabriel na' ga zóabi' María, gudxë'-bi':

—Padiux. Dios ruzá' ládxë'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

²⁹ Cate' bilé'ebi' María gubáz lá'ayi na', gurö'öbi' böniga tu' nōzi didza' na' bë'ë, en rubani ládxí'bi' nacxi sa'yéaj didza' na' bulidzë'-bi' gubáz lá'ayi na'.

³⁰ Ní'irö gubáz lá'ayi na' gudxë'-bi', rnnë':

—María, bití' gádxinu', tu' chibidéli'nu' le ruzá' ládxë'ë Dios quiu'.

³¹ Na'a, tsú'ubi' tubi' bí'ido' lë'u, ate' uzú'-bi' tubi' bi'i bönni'do', ate' gu'u labi' Jesús.

³² Jesús ni tsëpisëtë'rë', en si' Lë' Xzí'inë' Dios, Nu nayëpisëtë'rö. Xanru' Dios gunë' ga inná bë'ë ca na' gunná bë'ë David, xuz gula gudödi queë'.

³³ Jesús na' inná bé'etica'sinë' bönachi Israel, ate' le inná bë'ë Lë' catu caz tödi que.

³⁴ Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

³⁵ Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayëpisëtë'rö, sóalen li', le gaca ca tu zzul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' sí' labi' Xzí'inë' Dios.

³⁶ Cá'anqueze Elisabet, nigula dí'a dza quiu', chinuá'anu-bi' lë'ënu tubi' bi'i bönni'do' sal-la' chinagúlanu. Gula'nnë' queënu: "Nácanu nigula huödx", pero chizéaj xopa beo' nuá'anu-bi' lë'ënu bí'ido' na'.

³⁷ Bití' bi' zoa le cabí séqui'në' Dios.

³⁸ Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'. Ní'irö la' buza'të' gubáz lá'ayi na' ga zóabi' María.

María sōjyubi'-nu Elisabet

39 La' dza ní'sō guyú'ubi' nōza María, ate' carelō sa'yéajbi' ga naca gu'ado', en bidxinbi' tu yōdzō luyú Judea.

40 Ní' guyázabi' lidxë Zacarías, en gúdxibi'-nu Elisabet:
—Padiux.

41 Cate' biyōninu Elisabet didza' na' bē'ēbi' María, la' butátē cuinbi' bi'i huē'ēnido' na' yú'ubi' lē'ēnu, ate' bidisóalenē'-nu Dios Bō' Lá'ayi.

42 Ní'irō bē'ēnu Elisabet zidzaj didza', rnanu:

—¡Chinunē' Dios ga nácaru' li' bica' ba ca yúgu'tē nigula, en chinunē' ca' ga nácabi' bica' ba bí'ido' na' yú'ubi' lē'u!

43 ¿Núzxitē neda', zá'anu xinē'ē Xana' quia'?

44 Cate' biyōnda' didza' bē'u, bulidzu' neda', lu yōl-la' rudzeja queēbi' la' butátē cuinbi' bi'i huē'ēnido' ni yú'ubi' lē'a.

45 ¡Bica' ba li' tu' guyéajlē'u xtídzē'ē gubáz lá'ayi, ate' udxín caz lē na' gudxē' li' uláz queē' Xanru'!

46 Ní'irō gunabi' María:

¡dútē le naca' rigú'u Xanru' yōl-la' ba,

47 en rudzeja ládxi'lēna'-nē' Dios, Nu rusólá neda'!

48 ¡Dios caz buzá' ládxē'ē quia' neda'!

Yu'a lu nē'ē, en tsaz naca' huen dxin queē'.

Na'a isí lo, ca naca quia' ila'nná:

Bica' ba nigula na'.

49 ¡Zxōntērō naca le benē' Dios unná bē' quia'!

¡Lá'ayi naca Lē'!

50 Lē' ruhuéchi' ládxi'tica'sē' bōnachi tadxi Lē'
na'a dza, en dza zá'gaca.

51 Yugu' yōl-la' huáca zxōn chibenē' Lē'.

Buzōtjē' nupa gulún zxōn yōl-la' réajni' quéguequi.

52 Bugúē' yōl-la' unná bē' quégaca nupa gulaca lo,
en benē' ga gulaca lo nupa gulaca nōxaj ladxi'.

53 Benē' ga bulu'huōlaj bulu'dzē'e nupa gula'dún,
en bucá'anē' cá'asō nupa bila'lé'e yōl-la' tsahui'.

54 Gúcalenē' bōnachi Israel, nupa na' tun xichinē',

tu' yōjnenē' légaquiē', en buéchi' ládxē'ē légaquiē'.

55 Benē' ca guzxi' lu nē'ē gunē' quégauquiē' xuz xtó'oru'

enca' queē' Abraham, en quégaca dí'a dza queē'.

56 María bugá'analenbi'-nu Elisabet idú ca tsonna beo', ate' gudōdi ni' bōajbi' lidxibi'.

Le guca cate' gúlajbe' Juan, bōnni' uquilē' bōnachi nisa

57 Cate' bidxín dza ral-la' sóabi' bí'ido' queēnu Elisabet, buzóanu-bi' tubi' bi'i bōnni'do'.

58 Bila'yōni dzaga yu'u queēnu, en yugu' di'a dza queēnu ca na' guca, buéchi' ládxē'ē-nu Dios, ate' bulu'dzéjalen lēnu.

59 Cate' chiguca xunu' dza zóabi' bí'ido' na', bila'dxinē' di'a dza queēnu para ila'chúguiē' lu xipēla'bi' bi'i bōnni'do' na' lē na' gaca bē' néquibi' queē' Dios, ate' té'ēnnē' ilu'ē labi' Zacarías ca na' lē' xúzibi'.

60 Ní'irō bubí'inu didza' Elisabet, xiná'abi', rnanu:

—Calēga. Juan si' labi'.

61 Gula'nábinē'-nu, ta'nnē':

—¿Bixx que? Cuntu nu di'a dza quiu' lë' Juan.

⁶² Ní'irö bulu'lá' bulu'luf'isinë', gula'nábinë' xúzibi' nacxi rë'ënë' gu'ë labi'.

⁶³ Zacarías na' gunabë' tu blágado', ate' buzúajë' lahui caní: Juan lëbi'. Bulu'bábinë' yúgu'të'.

⁶⁴ La' ní'sö böáljatë ru'ë Zacarías na', en bugúitjatë lúdxë'ë, ate' bë'ë didza' le gulu'ë Dios yöl-la' ba.

⁶⁵ Ní'irö guládxinë', en bulu'bábinë' yúgu'të dzaga yu'u quegaquië', ate' yúgu'të yódzódo' nacuá' lu guí'ado' luyú Judea, guzé didza' ca guca lë ni.

⁶⁶ Gula'zá' ládxi'gaca yúgu'të nupa bila'yöni ca na' guca, ta'nná: “¿Nacxi caz gácabi' bi'i bönni'do' ni? Le nácatë Xanru' zóalenë'-bi'.”

Didza' bë'ë Zacarías uláz queë' Dios

⁶⁷ Ní'irö Dios Bö' Lá'ayi bidisóalenë' Zacarías, xúzibi' Juan, ate' bë'ë didza' uláz queë' Dios, rnnë':

⁶⁸ ¡Yöl-la' ba Dios, Xángaca bönachi Israel tu' buduyüë' rë'u, bönachi queë', en böá'uë' rë'u!

⁶⁹ ¡Gusöl-lë'ë queëru' Bönni' usölë' rë'u, len yöl-la' huáca zxön queë'!

Bönni' ni guljë' ládajgaca di'a dza queë' David, huen dxin queë' Dios.

⁷⁰ ¡Dza ni'te guzxí' lu në'ë gunë' ga gaca caní!

Raca ca na' gunnë' lu ruá'agaquië' bönni' gulu'ë didza' uláz queë'.

⁷¹ Guzxí' lu në'ë usölë' rë'u

lu ná'agaca nupa tequi rë'u zi', enca' lu ná'agaca nupa biti' ta'lé'e rë'u dxi'a.

⁷² Guzxí' lu në'ë huéchi' ládxi'ë xuz gudödi queëru', en tsöjnenë' le guzxí' lu në'ë le naca lá'ayi.

⁷³ Lë ni benë' tsutsu xtídzë'ë, en guzxí' lu në'ë, le gunë' queë' Abraham, xuz gudödi queëru', le naca tu le ral-la' gunë' queëru' rë'u.

⁷⁴ Guzxí' lu në'ë usölë' rë'u

lu ná'agaca nupa biti' ta'lé'e rë'u dxi'a

para cabirö gádxiru' gunru' xichinë' Lë',

⁷⁵ en para gácaru' ba'a ladxi', en idú dxi'a

lahuë' Lë' yúgu'të dza sóaru' ibanru'.

⁷⁶ Li, xzí'ina'do', si' lo' bönni' ru'ë didza' uláz queë' Dios unná bë' tu' tsöjnöru' ca Xanru' caz, en upó'o nōza ga tōdë'.

⁷⁷ Gunu' ga ila'nözi bönachi queë' ca gaca ulu'lágaca, en ca na' uniti lahuë' Dios dul-la' nabága'gaca.

⁷⁸ Caní gaca, tu' ruhuéchi'da' ládxi'ë Dios rë'u, en runë' ga tsení' queëru' Bönni' na' náquië' bení idú.

⁷⁹ Lë' uzení'ë quégaca nupa nacuá' gapa naca chul-la, en gapa nacuá' nupa chizóa ilátigaca

para ugú'ë rë'u nōza ga cō'ö dxi ládxi'do'oru'.

⁸⁰ Guzxönbi' bi'i bönni'do' na', en bidipa ládxi'bi'. Guzóasibi' gapa naca lu lataj cá'asó cate' bidxinrö dza bulu'í lobi' lógaca bönachi Israel.

2

*Le guca cate' gúlajbi' Jesús**(Mt. 1:18-25)*

1 Lu dza na' gunná bē'è Augusto César, bōnni' Roma, ila'yaza lu guichi yúgu'tē bōnachi nacuá' yōdzōlió.

2 Cate' gusi lo ta'yaza lu guichi caní, rinná bē'è bōnni' lē' Cirenio luyú Siria.

3 Yúgu'tē bōnachi yōjaca yōdzō que queéguequi ga na' zeaj nababa para ila'yaza lu guichi.

4 Guzē'è José yōdzō Nazaret luyú Galilea, sa'yéajē' luyú Judea, en bidxinē' yōdzō Belén, ga ni' guljē' David, tu' guljē' José ládajgaca di'a dza queē' David na'.

5 Guyijē' José ni' para tsáziē' lu guichi, ate' dzágabi'-nē' María, bi'i nigula nazi' lu ná'abi' utsaga ná'alēnbi' lē', en chizóa sóabi' bí'ido' queēbi'.

6 Cate' ni' nacu'è lu yōdzō Belén, bidxín dza sóabi' bí'ido' queēbi'.

7 Buzóanu-bi' tubi' bi'i bōnni'do', bi'i huáca queēnu. Buchólinu-bi' yugu' lári'do', ate' gudíxjanu-bi' tu lu yú'udo' ga tun chi'i le táguba' bōa' quégaca bōnachi yú'ugaca nōza. Caní guca, tu' cabí bidzōli lataj ila'cu'è lu yu'u ga ni' ta'dxín bōnachi yú'ugaca nōza.

Tu'lu'i lahuē' gubáz lá'ayi queē' Dios ga nacu'è bōnni' tu'yúe'-ba' bō'cu' zxila'

8 Gala' ra' yōdzō Belén nacu'è bōnni' tu'yúgaquiē'-ba' bō'cu' zxila' la' guixi', tapa chí'igaquiē'-ba' chí'i dzō'ölō.

9 La' bulu'itē lahuē' gubáz lá'ayi queē' Xanru' ga na' nacu'è. Yól-la' bení' queē' Xanru' buzení' ga na' nacu'è, ate' guládxinē'.

10 Ní'irō gubáz lá'ayi na' gudxē' légaquiē', rnnē':

—Biti' gádxili'. Na'a rusiyōnda' libí'ili' didza' le gun ga udzējade'eli', le ulu'zí' ca' xibé yúgu'tē bōnachi.

11 Na'a chigúlajbi' lu ladzē' David Nu usólá libí'ili'. Nu ni naca Cristo, Xanru'.

12 Lē ni gaca bē'ēbi'. Udzólili'-bi' Bí'ido' na', narólibi' yugu' lári'do', en dēbi' tu lu yú'udo' ga tun chi'i le táguba' bōa' quégaca bōnachi yú'ugaca nōza.

13 Ga na' zoē' gubáz lá'ayi na', tsárido'os bulu'lu'i lógaquiē' zianrō ca' gubáz lá'ayi queē' Dios, narúajgaquiē' yehua' yubá, en ta'gu'è Dios yól-la' ba, ta'nnē':

14 Yól-la' ba Dios zoē' xitsá',
ate' luyú gaca le cuéqui dxi ládxi'do'gaquiē'
bōnni' raza ládxi'è Dios légaquiē'!

15 Cate' bulu'zē'è gubáz lá'ayi na' ga ni' nacu'è, sōjhuōjgaquiē' yehua' yubá, ní'irō gulé luzé'è tuē' ia'tuē' bōnni' uyú bō'cu' zxila' na', ta'nnē':

—Uyéajtsōca'ru' Belén para ilé'eru' lē ni chiguca ca na' chibusiyōnnē' Xanru' rē'u.

16 La' yōjácatiē', ate' yōjxáca'gaquiē' María len José, enca' bí'ido' na', dēbi' tu lu yú'udo' ga tun chi'i le táguba' bōa' quégaca bōnachi yú'ugaca nōza.

17 Cate' bila'lé'enē' lēbi', gula'guíxjō'è lē na' si' busiyōnnē' gubáz lá'ayi na' légaquiē' ca naca queēbi' bí'ido' na'.

18 Bulu'bani yúgu'tē nupa bila'yōni didza' gulu'è bōnni' tu'yúe' bō'cu' zxila' na'.

19 María gulú'usó icja náganu didza' ni, ate' guzá' ládxi'nu ca naca que.

20 Sōjhuōjgaquiē' bōnni' na' tu'yúe'-ba' bō'cu' zxila', tunē' zxōn Dios, en ta'gu'è Lē' yól-la' ba ni'a que yúgu'tē lē na' bila'yōnnē', en bila'lé'enē', le guca ca na' busiyōnnē' gubáz lá'ayi na' légaquiē'.

Ta'gu'ë-bi' bí'ido' Jesús lu në'ë Dios

²¹ Cate' chiguca xunu' dza zóabi' bí'ido' na', gula'chúguië' lu xipéla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' zí'aló cate' si' tsú'ubi' lë'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'chë'ë-bi' bí'ido' Jesús yödzo Jerusalén para ila'gu'ë-bi' lu në'ë Xanru' Dios.

²³ Caní gulunë', tu' nazúaj lu guichi lu xibá queë' Xanru' le rnna: "Yúgu'tëbi' bi'i bönni'do' nácagacabi' bi'i zí'aló queënu xiná'agacabi', ulu'béajë'-bi' quez queë' Xanru' Dios."

²⁴ Que lë ni na' yójáquië' ni' para ilútië'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

²⁵ Dza ní'isö zoë' tu bönni' lë' Simeón lu yödzo Jerusalén. Bönni' ni náquië' tshuü', en reaj ládxë'ë Dios. Ribözë' Bönni' na' isöl-lë'ë Dios, Bönni' na' gácalenë' bönachi Israel. Dios Bö' Lá'ayi zóalenë' Simeón na',

²⁶ en chibulu'inë' lë' biti' gátie' cate' ilé'erönë' Cristo, Bönni' na' isöl-lë'ë Xanru' Dios.

²⁷ Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'chë'ë-bi' bí'ido' Jesús chila yudo' para ilunë' queëbi' ca rinná bë' xibá na',

²⁸ ní'irö bunidë'-bi' Simeón na', en guyéaj ládxë'ë Dios, rnnë':

²⁹ Xana', na'a huáca gunnu' neda' lataj gátia', soa dxi ládxa' tu' chiguca le gudxu' neda', huen dxin quiu'.

³⁰ Chibilé'eda' Nu na' buzóa cazu', Nu usólá bönachi,

³¹ Nu na' ulú'u lahui lógaca yúgu'të bönachi.

³² Lëbi' nácabi' bení' le uzén' bönachi izá'a, en nácabi' ca' bení' quégaca bönachi Israel quiu'.

³³ Bulu'báninë' José, en María, xiná'abi' bí'ido' Jesús, ca naca lë na' gunnë' Simeón ca naca queëbi' Jesús.

³⁴ Simeón na' gunábinë' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzöë'-bi' Dios para gunbi' ga ila'chixi bönachi zían, ate' ulu'huóasa bönachi zían ladaj bönachi Israel. Gácabi' tu le naca bë', ate' ila'nnë' bönachi queëbi'.

³⁵ Gaca caní para ila'lá' lahui le ta'zá' ládxi'gaca bönachi zían. Yugu' lë ni ilaca quiu' ca tu guié tuchi' le tsaza ládxi'do'o.

³⁶ Ana, nigula ru'ínu didza' uláz queë' Dios, zóanu ca' ni'. Nácanu xzí'inë' Fanuel, bönni' nababë' dí'a dza queë' Aser. Chinagúlada'anu Ana na', tu' gúzóalennu bönni' queënu idú gadxi iz gudödi gúcanu ra'bando',

³⁷ ate' bugá'ananu tuzi cate' bidxintë dza chiyú'unu idú ca tápalalaj yu' tapa iz. Biti' ca' rubi' i ruzá'anu ga naca chila yudo'. Réla, en te dza reaj ládxi'nu-në' Dios, runnu gubasa, en rulídzanu-në' Dios.

³⁸ La' ná'asö bidxintënu ni', rënu-në' Dios: "Xclenu'." Gudíxjö'ínu yúgu'të bönachi ca naca queëbi' bí'ido' Jesús, bönachi na' nacuá' Jerusalén, nupa ta'böza dza idxín Nu na' isöl-lë'ë Dios para gácalen bönachi.

Søjhuøjgaquië' José, en María yödzo Nazaret

³⁹ Gudödi gulunë' José, en María yúgu'të le rinná bë' xibá queë' Xanru' Dios, yójhuøjgaquië' ládzagaquië' Nazaret luyú Galilea.

⁴⁰ Guzxönbí' bí'ido' Jesús, en bidipa ládxi'bí'. Guta' queébi' yöl-la' réajni'i, ate' xzön naca le ruzá' ládxi'ë queébi' Dios.

Rudxinbí' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto.

⁴² Cate' chiyú'ubi' chinnu iz bí'i Jesús, yójáquië' Jerusalén ca tun cazë' cate' raca laní na'.

⁴³ Cate' gudödi laní, söjhuöjgaquië', ate' bugá'anabi' bí'ido' Jesús Jerusalén, pero bití' téquibe'enë' José, en María, xiná'abi' Jesús.

⁴⁴ Tu' téquinë' nútsa'bí' ladaj bönnachi zían yú'ulengaca légaquië' nöza, tu dza nayá' gula'zë'ë. Ní'irö cate' bulu'guiljé'-bí' gapa nacua' dí'a dza quégaquië', en gapa nacua' nupa núnbë'gaquië'

⁴⁵ bití' bulu'dzölinë'-bí'. Que lë ni na' yöjhuöjgaquië' Jerusalén, söjdíljagaquië'-bí'.

⁴⁶ Cate' chigua dza bunny, bulu'dzölinë'-bí' ga naca chila yudo', rö'öbi' gatsaj láchu'lé' bönni' yudo' tu'sédinë'. Ruzé nágabi' didza' tu'ë, en rinaba yúdxibi' légaquië'.

⁴⁷ Bulu'bani yúgu'të nupa bila'yöni didza' bë'ëbi' ca naca yöl-la' réajni'i queébi', en ca nácgaca didza' bubí'ibi'.

⁴⁸ Cate' bila'lé'enë'-bí' xuz xiná'abi', bulu'bánninë', ate' gúdxinu-bí' xiná'abi', rnnanu:

—Zxi'ina', ¿bixz que benu' caní queétu'? Buyútsöca, len yöl-la' ruúbi ruguí' neda', en xuzu' buguúljatu' lí'.

⁴⁹ Ní'irö gúdxibi' Jesús légaquië', rnnabi':

—¿Bixz que buguúljali' neda'? ¿Naru' cabí nözili' run bayudxi guna' xichinë' Xuza'?

⁵⁰ Bití' gula'yéajni'inë' xuz xiná'abi' didza' na' gúdxibi' légaquië'.

⁵¹ Jesús böajlenbí' légaquië', budxinbí' Nazaret, ate' benbí' ca rna xtídza'gaquië' xuz xiná'abi'. María, xiná'abi' Jesús, gulú'usönu icja ládxi'do'onu yúgu'të lë ni.

⁵² Ráta'rö yöl-la' réajni'i queébi' bí'i Jesús, en rizxönbí'. Burúajbí' dxi'a lahuë' Dios, en lógaca bönnachi.

3

Libán runë' Juan, bönni' ruquilë' bönnachi nisa
(Mt. 3:1-12; Mr. 1:1-8; Jn. 1:19-28)

¹ Cate' chigua chinu iz rinná bé'enë' Tiberio César idütë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë'ë Herodes na', rinná bë'ë luyú Iturea, en luyú Traconite, ate' Lisancias rinná bë'ë luyú Abilinia.

² Yugu' dza na' nácgagaquië' bixúz lo Anás, en Caifás, ate' la' ná'asö Dios bë'lenë' Juan, xzí'inë' Zacarías, didza' cate' ní' zoë' Juan lu lataj cá'asö.

³ Ridë' Juan ni yúgu'të lataj nacua' ra' yegu Jordán, runë' libán ca ral-la' ila'dila nisa nupa tu'bí'i ládxi'gaca para uniti lahuë' Dios dul-la' nabága'gaca.

⁴ Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rna:

Riyön chí'ë bönni' rulidzë' lu lataj cá'asö, rnnë':

“Bulí'pá'a nöza lu icja ládxi'do'oli' para idxín Xanru' queëli'.

Bulí'béaj li yugu' nöza lasi ga tödé'.

⁵ Ral-la' ulígaca yúgu'të gapa naca rōga,
en ulu'huōáca lachi' yúgu'të guí'a sibi, en guí'ado'.
Ral-la' ulu'rúaj li nōza nayecja nabí'igaca,
ate' ulu'huōáca dxi'a nōza guiōj.

⁶ Ila'lé'eni yúgu'të bōnachi Bōnni' na' isōl-lë'ë Dios,
Nu usōlá bōnachi."

⁷ Cate' bila'rúaj bōnachi zián para ila'dila nisa lu në'ë Juan, lë' gudxë'
légaquië':

—Libi'ili', di'a dza quégacaba' bēla sínia'. ¿Zoa nu buluf'i libí'ili' ral-la'
ixzúnna'jli' yōl-la' rusiúdxí si' gaca quégaca bōnachi'?

⁸ Na'a, guli'gún le ilaca bē' chibubí'i lādxi'li', en bití' sa' lādxi'li', bití' innali':
"Nácatu' tsahui' tu' nácatu' di'a dza queē' Abraham", tu' rea' libí'ili', huáca
quélé'ë Dios yugu' guiōj ni, en gunē' ga ulu'huōáca di'a dza queē' Abraham.

⁹ Nácali' ca yugu' yaga. Chizóa ribōza guí'ë huága para ichugu yugu' yaga.
Yúgu'të yaga bití' ta'bía le naca dxi'a, ila'chúguië' yaga na', en ila'gu'ë léguequi
lu guí'.

¹⁰ Ní'irō bōnachi nacua' ni' gula'nabi lë', ta'nná:

—¿Nacxi gúntsatu'?

¹¹ Bubi'ë didza' Juan, rē' légaquië':

—Nu dē chopa cō' zxe ral-la' unōdzaj que nu bití' dē que, ate' nu dē le gagu,
lēsca' caní ral-la' quisi quégaca nupa bití' dē le ilágugaca.

¹² Bal-lë' bōnni' tu' quíxjē' lázagaca bōnachi uláz que yōdzō zi'tu' bila'dxinē'
ca' ni' para ila'dilē' nisa, ate' gula'nábinē' lë', ta'nné':

—Bōnni' usēdi, ¿nacxi gúntsatu' netu'?

¹³ Juan gudxë' légaquië':

—Bití' uquíxjarōli' tsa le chigunnē' bōnni' yú'uli' lu në'ë.

¹⁴ Bal-lë' bōnni' rōjáquië' gudil-la gula'nábinē' ca' lë', ta'nné':

—¿Nazxi netu', nacxi guntu'?

Juan gudxë' légaquië':

—Bíti'rō gun gádxili' bōnachi para cúali' le dē quéguequi. Bíti'rō innēli'
quégaca bōnachi le cabí nácatē para gunli' ga ila'guíxaj libí'ili', pero guli'tsaza
lādxi'li' tsa ráxjali'.

¹⁵ Ta'zá' lādxi'gaca bōnachi na' ta'bōza Bōnni' na' ral-la' isōl-lë'ë Dios, channō
náquië' Juan na' Bōnni' lë' Cristo.

¹⁶ Bubi'ë didza' Juan, gudxë' yúgu'të', rnnē':

—Le nácatē neda' ruquila' libí'ili' nisa, pero zē'ë Bōnni' gunē' le rulu'isō yōl-
la' ridila nisa ni, ichíziē' libí'ili' Dios Bō' Lá'ayi, en le naca guí' queē'. Bōnni' ni
náparē' yōl-la' unná bē' ca neda', ate' neda' bití' naca' lesaca' ilecja' le nudē'ë
ní'ë.

¹⁷ Zōnē' lu në'ë bōcō' queē', ate' ulubē' ga rilubi xzoa' xtila queē', lē ni rulu'í'
le gaca quégaca bōnachi. Utubē' xzoa' xtila, en cu'ë le xilataj, pero bēbu que
uzégui'ë lu guí' le catu caz ulu.

¹⁸ Ca náagaca didza' ni, en ia'zica'rō zián didza' le guchíziē' icja náagaca
bōnachi, benē' libán Juan lōgaquië' que didza' dxi'a.

¹⁹ Juan na' buzégui'ë didza' Herodes, bōnni' rinná bē'ë, tu' zóalenē'-nu
Herodías, nigula queē' Felipe, bōnni' bōché'ë, enca' tu' runē' zián le ruá' dō'.

²⁰ Ní'irō benē' Herodes tu le nácarō huiá' dō', gulu'ë Juan na' lidxi guí'ë.

Ridíle' Jesús nisa
(Mt. 3:13-17; Mr. 1:9-11)

21 Dza na' cate' cabí nadzunë' Juan lidxi guïë, cate' ni' ruquilë' bönachi nisa, bidilë' ca' Jesús nisa. Cate' ni' ruldzë' Dios, guyalaj lúzxiba,

22 ate' bõtjë' Dios Bò' Lá'ayi, bidxinë' ga na' zoë' Jesús. Buluf'i lahuë', rinë'ë ca riná' tuba' gu'dodo', ate' biyön chi'i Nu ruf'i didza' yehua' yubá, rnna: –Li' nacu' Zxi'ina'. Nadxi'ida' Li', en raza ládxa'a Li'.

Yugu' xuz xin'e gudödi queë' Jesús

(Mt. 1:1-17)

23 Cate' gusi lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxi'inë' José. Jesús náquië' zxi'ini xi'sóë' Elí, nu na' náquië' xúzinu María, nigula queë' José na'.

24 Elí na' gúquië' zxi'inë' Matat,
nu ni guca zxi'inë' Leví,
nu ni guca zxi'inë' Melqui,
nu ni guca zxi'inë' Jana,
nu ni guca zxi'inë' ia'tué' José.

25 José ni gúquië' zxi'inë' Matatías,
nu ni guca zxi'inë' Amós,
nu ni guca zxi'inë' Nahum,
nu ni guca zxi'inë' Eslí,
nu ni guca zxi'inë' Nagai.

26 Nagai na' gúquië' zxi'inë' Mat,
nu ni guca zxi'inë' ia'tué' Matatías,
nu ni guca zxi'inë' Semei,
nu ni guca zxi'inë' ia'tué' José,
nu ni guca zxi'inë' Judá.

27 Judá na' gúquië' zxi'inë' Joana,
nu ni guca zxi'inë' Resa,
nu ni guca zxi'inë' Zorobabel,
nu ni guca zxi'inë' Salatiel,
nu ni guca zxi'inë' Neri.

28 Neri na' gúquië' zxi'inë' ia'tué' Melqui,
nu ni guca zxi'inë' Adi,
nu ni guca zxi'inë' Cosam,
nu ni guca zxi'inë' Elmodam,
nu ni guca zxi'inë' Er.

29 Er na' gúquië' zxi'inë' Josué,
nu ni guca zxi'inë' Eliezer,
nu ni guca zxi'inë' Jorim,
nu ni guca zxi'inë' ia'tué' Matat.

30 Matat na' gúquië' zxi'inë' Leví,
nu ni guca zxi'inë' Simeón,
nu ni guca zxi'inë' Judá,
nu ni guca zxi'inë' ia'tué' José,
nu ni guca zxi'inë' Jonán,
nu ni guca zxi'inë' Eliaquim.

31 Eliaquim na' gúquië' zxi'inë' Melea,
nu ni guca zxi'inë' Mainán,
nu ni guca zxi'inë' Matata,
nu ni guca zxi'inë' Natán.

32 Natán na' gúquië' zxi'inë' David,
 nu ni guca zxi'inë' Isai,
 nu ni guca zxi'inë' Obed,
 nu ni guca zxi'inë' Booz,
 nu ni guca zxi'inë' Salmón,
 nu ni guca zxi'inë' Naasón.

33 Naasón na' gúquië' zxi'inë' Aminadab,
 nu ni guca zxi'inë' Aram,
 nu ni guca zxi'inë' Esrom,
 nu ni guca zxi'inë' Fares,
 nu ni guca zxi'inë' ia'túë' Judá.

34 Judá na' gúquië' zxi'inë' Jacob,
 nu ni guca zxi'inë' Isaac,
 nu ni guca zxi'inë' Abraham,
 nu ni guca zxi'inë' Taré,
 nu ni guca zxi'inë' Nacor.

35 Nacor na' gúquië' zxi'inë' Serug,
 nu ni guca zxi'inë' Ragau,
 nu ni guca zxi'inë' Peleg,
 nu ni guca zxi'inë' Heber,
 nu ni guca zxi'inë' Sala.

36 Sala na' gúquië' zxi'inë' Cainán,
 nu ni guca zxi'inë' Arfaxad,
 nu ni guca zxi'inë' Sem,
 nu ni guca zxi'inë' Noé,
 nu ni guca zxi'inë' Lamec.

37 Lamec na' gúquië' zxi'inë' Matusalén,
 nu ni guca zxi'inë' Enoc,
 nu ni guca zxi'inë' Jared,
 nu ni guca zxi'inë' Mahalalel,
 nu ni guca zxi'inë' ia'túë' Cainán.

38 Cainán na' gúquië' zxi'inë' Enós,
 nu ni guca zxi'inë' Set,
 nu ni guca zxi'inë' Adán,
 nu ni guca ca zxi'ini cazë' Dios.

4

Satanás tu' xihui' rë'ëni usubaga' Jesús dul-la'

(Mt. 4:1-11; Mr. 1:12-13)

1 Buzë'ë Jesús ra' yegu Jordán, zóalenë' Dios Bö' Lá'ayi Lë', ate' Dios Bö' Lá'ayi na' guchë'ë Jesús lu lataj cá'asò.

2 Guzóë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudödi ni' ridunë'.

3 Ní'irö tu' xihui' na' gudxi Jesús, rnna:

—Channö naca cazu' Li' Zxi'inë' Dios, gunnátsöca' ulu'huóaca guiöj ni yöta xtila.

4 Bubi'ë didza' Jesús, rë' le:

—Nazúaj lu guichi, rnna: “Calégasö yöta xtila nabánigaca bönachi, pero nabánigaca ca' yúgu'të xtídzë'ë Dios.”

⁵ Ní'irō guchě' tu' xihui' na' Jesús ga naca tu lu guí'a sibi ate' tu chí'ido'osō bulu'i Lě' yúgu'tě xilátjagaca nupa ta'nná bě' yōdzólió.

⁶ Tu' xihui' na' rě Jesús, rnna:

—Gunna' quiu' yúgu'tě xilátjagaca nupa ta'nná bě' ni, en yōl-la' tsahui' queguequi, tu' nadódi lu na'a yúgu'tě lě ni, ate' nu rě'ēnisida' ruá'a que.

⁷ Channō Li' uzóa zxiibu' lahua', en gunu' neda' zxon, yúgu'tě lě ni guequi quiu'.

⁸ Bubi'ě didza' Jesús, rě' le:

—Gucuíta ga zoa', Satanás, tu' nazúaj lu guichi lá'ayi le rě netu', rnna: "Xanu' Dios tseaj lădxu'u-ně', en tuzě' Lě' gunu' xichině'."

⁹ Ní'irō tu' xihui' na' guchě' Jesús Jerusalén, ate' budxía Lě' lu zō'ō ícjo'olō yudo', en rě Lě':

—Channō nacu' Zxi'ině' Dios, busulădzu'tsōca' cuinu' ni

¹⁰ tu' nazúaj lu guichi lá'ayi, rnna:

Dios isōl-lě'ě gubáz lá'ayi queě', ilăcaleně' Li'.

¹¹ Lu ná'agaquiě' ulu'chisě' Li' para cabi tsójchėgu'u guióđ, en biti' gunu' zi' ni'u.

¹² Bubi'ě didza' Jesús, rě' le:

—Nazúaj lu guichi lá'ayi le rě netu': "Biti' si' bě'u Xanu' Dios."

¹³ Cate' biti' budzōli tu' xihui' na' ia'tú le si' bě' Jesús, buzá' ga zoě' tu chí'ido'.

Risí lahuě' Jesús runě' xichině' luyú Galilea

(Mt. 4:12-17; Mr. 1:14-15)

¹⁴ Bőajě' Jesús luyú Galilea, dē lu nē'ě yōl-la' huáca queě' Dios Bō' Lá'ayi. Guzě' didza' ca naca queě', ate' bila'yōni bōnachi nacuá' yúgu'tě yōdzō idú gásibi'ilō.

¹⁵ Busedíně' Jesús bōnachi gapa naca lu yu'u ga tu'dubě' tu'sedě' bōnni' judío queě' Dios, ate' yúgu'tě bōnachi gulún Lě' zxon.

Le beně' Jesús yōdzō Nazaret, ga naca ladzě'

(Mt. 13:53-58; Mr. 6:1-6)

¹⁶ Ní'irō budxině' Jesús yōdzō Nazaret ga ni' guzxōně'. Cate' bidxín dza lá'ayi quegaquiě' bōnni' judío, ca run cazě' Jesús, guyaziě' lu yu'u ga tu'dubě' tu'sedě' bōnni' judío queě' Dios, ate' guzuíně' para ulabě' tu le nazúaj lu guichi lá'ayi.

¹⁷ Bulu'dōdē' lu nē'ě Jesús guichi ga na' nazúaj didza' bě'ě Isaiás, bōnni' bě'ě didza' uláz queě' Dios. Cate' gusaljě' guichi na', budzōlině' ga nazúaj lu guichi le rnna:

¹⁸ Zóaleně' Bō' Lá'ayi queě' Xanru' neda'

tu' nubėjě' neda' quez queě'

para usiyōnda' bōnachi yechi' didza' dxi'a.

Gusōl-lě'ě neda' para una' nupa raca zi' lădxi'do'guequi,

en usiyōnda' nupa nadzúngaca, ca gaca ulu'lăgaca,

en úna' bōnachi nachul-la lóguequi,

en usōlá' bōnachi zoa nu run lėguequi zi',

¹⁹ en guna' libán que dza ruzá' lădxě'ě Xanru' Dios quégaca bōnachi.

²⁰ Ní'irō butubě' Jesús guichi na', en bugu'ě le lu nē'ě bōnni' rapa chí'ě yugu' guichi lá'ayi, ate' gurō'ě. Ní'irō yúgu'tě nupa nudúbigaca lu yu'u na' gula'ná' Jesús.

²¹ Gusí lahuě' Jesús rě' lėgaquiě':

—Na'a dza ni zóali' libí'ili', rudxín caz le nazúaj lu guichi ni.

²² Yúgu'tè' gula'nnè' dxi'a queè', en bulu'bánninè' ca naca didza' dxi'a ru'è, ate' ta'nnè':

—¿Naru' calèga bönni' ni xzí'inè' José?

²³ Jesús rē' légaquiè', rnnè':

—Nadxi huéli' neda' lè ni ta'nná bönachi, le rna: “Li', bönni' ruún bönachi, bun cuinu'.” Lësca' caní huéli' neda': “Yugu' le biyónitu' benu' Capernaum, ben ca' ga ni naca ladzu'.”

²⁴ Gunné' ca' Jesús:

—Le nácatè rea' libí'ili', channō zoè' nu bönni' ru'è didza' uláz queè' Dios, bití' tun bönachi uládz queè' lè' bal.

²⁵ Le nácatè rea' libí'ili', gula'cuá'anu zían nigula uzèbi luyú Israel yugu' dza ni' zoè' Elías, bönni' bē'è didza' uláz queè' Dios, cate' ni' bití' gulaj guió'j idú ca tsonna iz yu' xopa beo', ate' guca gubín luyú na',

²⁶ pero Dios bití' gusól-lè'è Elías na' ga nacuá'anu nigula uzèbi nabábagacanu Israel, pero gusól-lè'è lè' ga na' zóanu tu nigula uzèbi lu yōdzō Sarepta, le nababa yōdzō Sidón.

²⁷ Lësca' caní, gula'cuá' zían nupa te'e huè' nudzu' ruzōdi luyú Israel dza ni' zoè' Eliseo, bönni' bē'è didza' uláz queè' Dios, pero bití' böáquiè' nu bönni' nùtsè'è ladaj bönachi Israel na', pero böáquiè' tuzè' Naamán, bönni' nababé' luyú Siria.

²⁸ Cate' bila'yōmnè' didza' ni, gula'lenè' yúgu'tè bönni' nacu'è lu yu'u ga na' tu'dubè' tu'sèdè' queè' Dios.

²⁹ Ní'irō gula'yasè', en bulu'béajè' Jesús ní'ilō ra' yōdzō. Gula'ch'è'è Lè' ga naca lè'e guí'a guió'j ga na' dè ládzagaquiè' para ulu'suládzuè' Lè' ga naca lè'e guí'a guió'j na'.

³⁰ Ní'irō gudödè' Jesús gatsaj láchui'lō ga na' nacu'è, sōhuóajtè'.

Tu bönni' yu'u lè' bō' xihui'

(Mr. 1:21-28)

³¹ Ní'irō guyijè' Jesús yōdzō Capernaum luyú Galilea, ate' busedinè' bönachi yugu' dza lá'ayi quegaquiè' bönni' judío.

³² Bulu'bánninè' ca naca le rusédinè' Jesús légaquiè', tu' bē'è didza' ca tu bönni' dè lu nē'è yōl-la' unná bē'.

³³ Zóatè' ca' tu bönni' yu'u lè' bō' xihui' lu yu'u ga na' tu'dubè' tu'sèdè' queè' Dios, ate' bē'è zidzaj didza',

³⁴ rnnè':

—¡Busán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'? Núnb'é a Li' Nu nacu'. Bönni' Lá'ayi queè' Dios nacu'.

³⁵ Jesús buzenè' le bach bō' xihui' na', en rē' le:

—Busayaj ru'u, en burúaj lu bönni' ni.

Ní'irō bō' xihui' na' gurú'una bönni' na' lu yu lógaca bönachi nacuá' ni'. Burúajtè lu bönni' na', en bí'tí'rō bi ben queè'.

³⁶ Bulu'bánninè' yúgu'tè', en gulu'è didza' tuè' len ia'túè', ta'nnè':

—¿Bizxi didza' ni ru'è? Len yōl-la' unná bē', en yōl-la' huáca zxōn rinná bé'enè' yugu' bō' xihui', ate' tu'rúajtè bō' xihui' na'.

³⁷ Guzè didza' ca naca queè' Jesús, ate' bila'yōni bönachi yúgu'tè yōdzō idú gásibi'ilō.

Ruúnè' Jesús xíná'anu nigula queè' Pedro

(Mt. 8:14-15; Mr. 1:29-31)

³⁸ Ní'irö guyasë' Jesús, en burúajë' lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta'yue' lahuë' Jesús únë'-nu.

³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

Ruúnë' Jesús zían nupa te'e

(Mt. 8:16-17; Mr. 1:32-34)

⁴⁰ Cate' chiribía gubidza, yúgu'të nupa nacua'len léguequi nupa na' te'e que queéguéqui yödzhue' bila'dxín ni', ate' dujuá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi.

⁴¹ Bulu'rúaj ca' zíanbö' xihui' yú'ugaca bönachi te'e na'. Ta'bödxi'a bö' xihui' na', ta'nná:

—Li' nacu' xzí'inë' Dios.

Ní'irö Jesús buzenë' le bach yugu' bö' xihui' na', en biti' bë'ë lataj ila'nná, tu' nöziguequi náquië' Cristo.

Runë' Jesús libán luyú Galilea

(Mr. 1:35-39)

⁴² Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxín bönachi zían ni', tu'guílaj Jesús. Cate' bila'dxinë' ga na' zoë', gulë'éniguequinë' ulu'tsenë' Lë', para cabí uzë'ë ga na' nacu'ë.

⁴³ Ní'irö Jesús gudxë' légaquië', rnnë':

—Run bayudxi tseja' gapa nacua' ia'zica'rö yödzo, tsöjena' ca' libán ni' que didza' dxi'a ca rinná bë'ë Dios. Que lë ni na' gusöl-lë'ë neda' ni.

⁴⁴ Caní guca, benë' libán yugu' yödzo luyú Galilea gapa naca lu yu'u ga tu'dubë' bönni' judío, en tu'sëdë' queë' Dios.

5

Ta'dzunba' böla zían

(Mt. 4:18-22; Mr. 1:16-20)

¹ Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quida' bönachi zían Lë' para ila'yöni xtídzë'ë Dios.

² Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzxön böla lë'egaca bárcodo' na', en ta'guibë' yöxaj böla queégaquië'.

³ Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'láti'do' zítu' ga naca ra' yu bidxi na'. Ní'irö gurö'ë Jesús lë'e bárcodo' na', en rö'ösë' ca' ni' rusédinë' bönachi zían nacua' lu yu bidxi na'.

⁴ Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rö'ö zila, ate' ni' guli'zalaj yöxaj böla queëli' para sönli'-ba' böla.

⁵ Bubi'ë didza' Simón, rë' Jesús:

—Bönni' Usëdi, idú yëla chibentü' dxin, en biti' bi böla nazónitu'-ba', pero didza' quiu' izáljagara' yöxaj.

⁶ Cate' chigula'zaljë' le, gula'zönë' zíanteröba' böla, ate' réquitiqui' iröza' yöxaj böla na'.

⁷ Ní'irö bulu'lá'a bulu'luf'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë' bárcodo' na', ate' chirequi ulu'huötaj bárcodo' na' lu nisa.

8 Cate' bilé'ené' Simón Pedro lè ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

9 Caní gunné' tu' radxi ridzöbinë' Pedro ni'a quégacaba' böla zían na' gula'zongaquië'-ba', en lësca' caní guca quégaca nupa nacua'len lé'.

10 Guladxi gula'dzöbinë' ca' Jacobo, en Juan, yugu' xzí'inë' Zebedeo, nupa ni nácacaga luzë'ë Simón Pedro na'. Ní'irö Jesús ré' Simón na', rnnë':

—Bití' gádxinu'. Na'a isí'lo' ichë'u quia' bönachi ca runu' rizönu'-ba' böla.

11 Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' sôjácalenë' Jesús.

Ruúnë' Jesús tu bönni' ré'enë' huë' nudzu' ruzödi

(Mt. 8:1-4; Mr. 1:40-45)

12 Cate' zoë' Jesús tu lu yödzo ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'ené' Jesús, busudxín lahuë' lu yu, en gúta'yuë' lahuë', rnnë':

—Xan, channö rë'ënu', huáca unu' neda'.

13 Ní'irö bulí në'ë Jesús, en gudanë' lé'. Rë' lé':

—Rë'ënda'. Gacu' dxi'a.

La' gubídxitë huë' nudzu' queë' bönni' na'.

14 Ní'irö Jesús gunná bé'enë' lé' cunttu nu guíë' ca'. Gudxë' lé':

—Guyéaj, yöjlu'i' cuinu' lahuë' bixúz, ate' yöjnödzej que yudo' le rulu'i' nuhuóacu' dxi'a ca gunná bë'ë Moisés, lé' na' uluí'i légaquië' chibóacu'.

15 Guzëtë-rö didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtídzë'ë, en para únë' léguequi, ugúë' yödzöhuë' té'eguequi.

16 Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

Ruúnë' Jesús tu bönni' huë' nacú'unië' bin

(Mt. 9:1-8; Mr. 2:1-12)

17 Ia'tú dza, cate' ni' rusédinë' Jesús bönachi, rö'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacua' ni'.

18 Ní'irö bönni' nu'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' naxci ilunë' para ila'gu'ë lé' lu yu'u para ila'guixjë' lé' lahuë' Jesús.

19 Cate' bití' gula'dzölinë' naxci ilunë', tu' nacua' bönachi zían ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zöjtjë' le denë' bönni' huë' na', ate' gula'guixjë' lé' gatsaj láchui'lö bönachi ni' lahuë' Jesús.

20 Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

21 Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': "¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzë' Dios runiti lahuë' dul-la'."

22 Réquibe'enë' Jesús le ta'zá' ládxi'gaquië', ate' rë' légaquië':

—¿Bixz que rizá' ládxi'li' caní?

23 Bití' naca böniga nu guië'sö bönni' ni: "Yugu' dul-la' nabágu'u chibuníti lahua'", pero naca böniga nu gun ga chasë', en së'e ni'ë.

24 Guna' ga inözili' dë lu na'a neda', Bönni' Guljë' Bönachi, yöl-la' unná bë' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

–Li' rea', guyasa. Buá' le denu', en böaj lidxu'.

²⁵ La' guyásatë bönni' huë' na' lógaquië', ate' bu'ë lë na' gúti'në', en söhuöjë' lidxë', rigu'ë Dios yöl-la' ba.

²⁶ Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

–Na'a bilé'eru' le run ga rubániru'.

Jesús rulidzë' Leví

(Mt. 9:9-13; Mr. 2:13-17)

²⁷ Gudödi gulaca yugu' lë ni burúajë' Jesús ni', ate' bilé'enë' tu bönni' uquízaxaj lázagaca bönnachi, lë' Leví, rö'ë ga na' ruquízaxjë', ate' Jesús rë' lë':

–Gudá' neda'.

²⁸ La' guyásatë' Leví, ate' bucá'anë' yúgu'të', en sa'yéajlenë' Jesús.

²⁹ Gudödi ni' benë' Leví na' tu güi' huagu queë' Jesús ga naca lu yu'u lidxë', ate' gula'cu'ë zían bönni' uquízaxaj ni' len ia'bal-lë' bönni' ta'bó'lenë' légaquië' tahuë'.

³⁰ Ní'irö bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' usëda queë' Jesús, ta'nnë':

–¿Bizx que rë'aj rágulenli' yugu' bönni' uquízaxaj, en ia'zica'rë' bönni' dul-la'?

³¹ Bubi'ë didza' Jesús, rë' légaquië':

–Yugu' bönni' nacu'ë dxi'a bití' naquíniguequinë' nu un bönnachi, pero bönni' té'enë' naquíniguequinë' nu un bönnachi.

³² Za'a, calëga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i ládxi'gaquië'.

Ta'nábinë' Jesús ca naca que yöl-la' run gubasa

(Mt. 9:14-17; Mr. 2:18-22)

³³ Ní'irö bönni' yudo' na' gula'nábinë' Jesús, ta'nnë':

–¿Bizx que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' té'aj tahuë'?

³⁴ Jesús rë' légaquië':

–Naru' huácatsö gunli' ga ilunë' gubasa bönni' nacu'ë lani que yöl-la' rutsaga na' tsanni ni' bönni' rutsaga në'ë zóalenë' légaquië'?

³⁵ Huadxín dza cate' udúë' bönni' rutsaga në'ë ga nacu'ë. Dza ní'irö ilunë' gubasa.

³⁶ Ní'irö bucúdzu'ë didza' Jesús ca naca lë ni, ate' rë' légaquië':

–Cuntu nu bönni' ichúguië' tu lari' cubi chinadí, en cuejë' tsötaca' le udë'ë lë'e lari' tēbi. Channö gunë' caní, calëgasö gaca ditaj lari' cubi na', pero lári'do' na' birúaj lë'e lari' cubi na' bití' tsöjlóza lari' tēbi na'.

³⁷ Lësca' caní, cuntu nu bönni' riguë'ë xisi uva cubi lu buzudi guídi gula. Channö nu gun caní, xisi uva cubi na' uchóza' buzudi guídi gula, ate' ilalaj xisi uva na', ate' gaca ditaj buzudi guídi gula na'.

³⁸ Que lë ni na' ral-la' cá'aru' xisi uva cubi lu buzudi guídi cubi, ate' irópatë' ilaca chí'i.

³⁹ Channö zoa nu rë'aj xisi uva gula, bití' guë'ënitë' gu'aj xisi uva cubi, tu' rna: “Nácarö sizxi' xisi uva gula na'.”

6

Bönni' usëda queë' Jesús ta'lecjë' do xzoa' xtila dza lá'ayi
(Mt. 12:1-8; Mr. 2:23-28)

¹ Cate' naca tu dza lá'ayi quégaquië' bönni' judío, ridödë' Jesús gapa dë yöla xzoa' xtila, ate' bönni' usëda queë' ta'lecjë' do ga dxía xzoa' xtila. Ta'zxúbi'ni ná'agaquië' le, en tahuë'.

² Ní'irö gula'nábinë' bönni' yudo' fariseo légaquië', ta'nnë':

—¿Bixz que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanilí' ca benë' David cate' gudunë', ate' gula'dún ca' nupa nacuá'len lë'?

⁴ Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

⁵ Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

Tu bönni' narequi' në'ë

(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sédë' queë' Dios, en busédinë' nupa nacuá'ni'. Zoë' ca' tu bönni' ní' narequi' në'ë ibëla.

⁷ Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'.

⁸ Réquibe'enë' Jesús le ta'zá' lách'gaquië', ate' gudxë' bönni' na' narequi' në'ë, rnnë':

—Guyasa. Guzuí gatsaj láchui'lö ni.

La' guyásatë' bönni' na', guzuínë'.

⁹ Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxí'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

¹⁰ Ní'irö buyüë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí në'ë bönni' na', ate' la' böácátë në'ë na'.

¹¹ Ní'irö gula'lenë' bönni' yudo' na', ate' gulún xtídza'gaquië' la' légasasë' nacxi bi ilunë' queë' Jesús.

Riböë' Jesús chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

¹² Dza ni' guyijë' Jesús ga naca tu lu guí'ado'. Bulidzë' Dios ni', ate' idú yöla bë'lenë' Dios didza'.

¹³ Cate' za' rení', bulidzë' yugu' bönni' dá'gaquië' Lë', ate' guröë' chínnuë' para iláquië' gubáz queë'.

¹⁴ Bulidzë':

Simón, (lë' ca' Pedro),

Andrés, (böchë'ë Pedro),

Jacobo, en Juan, en Felipe, en Bartolomé,

¹⁵ Mateo, en Tomás,

Jacobo, (zxí'inë' Alfeo),

Simón, (bönni' ruí'i láchxë'ë yödzö queë'),

¹⁶ Judas, (böchë'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

*Ruúnë' Jesús bönachi zían**(Mt. 4:23-25)*

¹⁷ Jesús bötjalenë' yugu' bönni' gubáz queë' na' lu gu'ado' na', ate' bila'dxinë' tu ga naca lachi', ga ni' nacu'ë zíanrö ca' bönni' usëda queë', ate' nacuá'len légaquië' bönachi zían narúajgaca yúgu'të yödzo luyú Judea, en yödzo Jerusalén, en yugu' yödzo'do' dégaca ra' nisado' ga na' nacuá' yödzo Tiro, en yödzo Sidón. Bila'dxin bönachi ni ga ni' para ulu'zë nágagaca xtídzë'ë Jesús, en ulu'huóaca lu yödzo'huë' té'eguequi.

¹⁸ Bulu'huóaquie' ca' bönni' ni' ta'gu'i ta'záquie' lu ná'agaca bö' xihui'.

¹⁹ Yúgu'të bönachi zían na' tu'i ládi'gaca ila'gán Jesús tu' ruúnë' léguequi len yöl-la' huáca queë'.

*Nupa nácagaca bica' ba, en nupa nácagaca bica' bayechi'**(Mt. 5:1-12)*

²⁰ Ní'irö buyúë' Jesús yugu' bönni' usëda queë' nacu'ë ni', en gudxë' légaquië': —Bica' ba libí'ili', réquibe'eli' riyadzjali' le naca queë' Dios, tu' gata' queëli' lataj ga rinná bë'ë Dios.

²¹ 'Bica' ba libí'ili' ridunli' le gunnë' Dios queëli', tu' huöljali'.

'Bica' ba libí'ili' ribödxili' tu' bi nadéli'li' le naca tsahui', tu' huadxín dza uzzídxili'.

²² 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacuá', en ila'nnë' zí' queëli', en ulu'cá'ana cá'asö le nazí' lali' ca tu le naca xihui' tu' dá'ali' neda', Bönni' Guljé' Bönachi.

²³ Buli'sí' xibé dza na', en buli'dzeja, tu' naca xön le guequi queëli' yehua' yubá. Lësca' caní'gunnë' xuz xtó'ogaca bönachi ni quégaquië' bönni' gulu'ë didza' uláz queë' Dios.

²⁴ 'Bica' bayechi' libí'ili', dë yöl-la' tsahui' queëli', tu' chidë le ruzí'ili' xibé.

²⁵ 'Bica' bayechi' libí'ili' nuhuöljaj nudzé'eli' na'a, tu' huadunli'.

'Bica' bayechi' libí'ili' ruzxídxili' na'a, tu' hu'inili', en cödxí yéchi'li'.

²⁶ 'Bica' bayechi' libí'ili' ta'nnë' yúgu'të bönachi dxi'a queëli'. Lësca' caní'gulunë' xuz xtó'oli', gula'nnë' dxi'a quégaquië' bönni' gula'z' yë'ë, gula'nnë' nácagaquië' bönni' tu'ë didza' uláz queë' Dios.

*Ral-la' idxí'iru' nupa biti' ta'lé'e rë'u dxi'a**(Mt. 5:38-48; 7:12)*

²⁷ Gunnë' ca' Jesús:

—Libí'ili' zóali' ni, en riyónili' xtídzá'a, rea' libí'ili': Guli'dxí'iru' nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'ili' libí'ili'.

²⁸ Guli'nabi Dios gaca dxi'a quégaca nupa tua' dö' queëli', en buli'lidzë' Dios inábili'-në' gácalenë' nupa ta'nnë' zí' queëli'.

²⁹ Channö nu capa' tsólá'a xagu', buzë ia'tsólá'a ca' xagu'. Channö nu cúa lari' naxóa cúdz'u, bë' lataj cúa ca' xzo'.

³⁰ Núti'tës nu bi inaba le dë quiu', bunödzej que, ate' nu cúa le nequi quiu', biti' unabu' le.

³¹ Ca rë'ënilí' ilún bönachi queëli', lësca' caní'guli'gún quéguequi.

³² 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní'tunë' bönni' dul-la', ta'dxí'inë' nupa nadxí'iguequi légaquië'.

³³ Channö runli' le naca dxi'a quégacasö nupa tun dxi'a queëli', ¿bizxi yöl-la' ba idéli'li'? Lësca' caní'tunë' bönni' dul-la'.

³⁴ Channö runödzejali' quegaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tunë' bönni' dul-la', tu'nödzejë' quegaca nupa tun dul-la', tu' tunë' löza ulu'bí'i quegaquië' lë na' bulu'nödzejë'.

³⁵ Neda' rea' libí'ili': Guli'dxi'i nupa biti' ta'lé'e libí'ili' dxi'a, en guli'gún le naca dxi'a. Buli'nödzej quegaca bönachi sal-la' biti' runli' löza nu ubí'i queéli'. Channö caní gunli', zxon naca le gata' queéli', ate' gácali' zxi'ini cazë' Dios, Nu nácatëro lo, tu' runë' Lë' le naca dxi'a quegaca bönachi biti' ta'yaza ládxi'gaca, en quegaca bönachi tuá' dö'.

³⁶ Buli'huéchi' ládxi'li' bönachi ca na' runë' Xúzili' Dios, ruhuéchi' ládxe'ë yúgu'të bönachi.

Biti' ral-la' ichugu bë'ëru' que luzá'aru'
(Mt. 7:1-5)

³⁷ Gunnë' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queéli'. Biti' cuéaj bë'ëli' que luzá'ali', ate' cuntu nu cuéaj bë' queéli'. Buli'niti lo luzá'ali', ate' Dios uniti lahuë' ca' libí'ili'.

³⁸ Buli'nödzej que luzá'ali', ate' Dios gunnë' queéli'. Ulu'nödzejë' queéli' le ulu'rixë' len tu guí'ina ribixi le naca idú, le naguirö, en naguí gate ga rë', en zóatica' gubá. Ca naca le ruríxili', la' cá'asö urixë' Dios ca' queéli'.

³⁹ Bucúdzu'ë didza' Jesús, rë' légaquië':

—¿Naru' huácatsö nu bönni' lo chul-la ichë'ë ia'túë' bönni' lo chul-la? Biti' ca' gaca, tu' ila'bixë' iropë' tu lu yeru.

⁴⁰ Biti' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

⁴¹ ¿Bizx que ruyú' bëbudo' yu'u guiöj lahuë' böchi' luzó'o, en biti' rilé'enu' le zxön yu'u guiöj lo cazu'?

⁴² ¿Naru' huácatsö guío'-në' böchi' luzó'o: “Böcha'a, benna lataj cueja' bëbudo' yu'u guiöj lo”, en biti' rilé'enu' le zxön yu'u guiöj lo cazu'? Li', bönni' rulu'isö tsahui' cuinu', guléaj zí'alö le zxön yu'u guiöj lo cazu', ate' ní'irö ilé'enu' dxi'a para cueju' bëbudo' yu'u guiöj lahuë' böchi' luzó'o.

Le runru' naca bë' le nácaru'
(Mt. 7:17-20; 12:34-35)

⁴³ Gunnë' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga guí'a biti' gaca cuía le naca dxi'a.

⁴⁴ Caní naca, le ribía tu yaga naca bë' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva.

⁴⁵ Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinnë ruá'aru' ca naca le yu'u icja ládxi'do'oru'.

Chopa ca gaca cuéquiru' xilibi yu'u
(Mt. 7:24-27)

⁴⁶ Gunnë' ca' Jesús:

—¿Bizx que rulídzali' neda', rnnali': “Xantu', Xantu'”, pero biti' runli' ca rinná bë'eda' libí'ili'?

⁴⁷ Ulu'ida' libí'ili' ca naca nu na' za' quia', en riyöni xtídza'a, en run ca rnna xtídza'a.

48 Nu ni naca ca tu bönni', cate' benë' lidxë', guchö'önë' ga rë', en guléquië' xilibi yu'u ga naca lu guiöj. Cate' bötaj yegu gubó'o, guchö'öna cuita yu'u na', pero bití' guca uquínnaj le, tu' nulibi ga naca lu guiöj.

49 Na'a, nu riyöni xtídz'a, en bití' run ca rnna, nu ni naca ca tu bönni' benë' lidxë' ga naca lu yu cá'asö. Bití' benë' xilibi. Cate' guchö'öna yegu gubó'o cuita yu'u na', la' biguínnajtë, ate' gubixi dëro zö'ö que.

7

Jesús ruínë'-bi' bi'i huen dxin queë' tu bönni' unná bë' (Mt. 8:5-13)

1 Cate' Jesús budxi bé'lenë' légaquië' didza' ni, guyázië' yödzö Capernaum.

2 Lu yödzö ni' zoë' tu bönni' Roma rinná bé'enë' bönni' röjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'.

3 Cate' biyönnë' bönni' ni didza' tu'ë bönachi ca naca queë' Jesús, la' gusól-la'të' bal-lë' bönni' gula tu'zéajni'inë' bönni' judío ga na' zoë' Jesús, tsöjötá'yugaquië' lahuë' Lë' guídë' uduhuénë'-bi' bi'i huen dxin queë' na' ré'ebi'.

4 Bönni' gula tu'zéajni'inë' na' bila'dxinë' ga zoë' Jesús, ate' guláta'yue' lahuë' idú ládxí'gaquië', ta'nnë':

—Náquië' lesaca' bönni' na' gunu' queë' lë ni,

5 tu' runë' bal bönachi uládz queëru', en benë' tu yu'u queëru' ga rudúbiru' rusédaru' queë' Dios.

6 Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusól-lë'ë bal-lë' böchi' luzë'ë ga zë'ë Jesús, ate' të' Lë':

—Xan, rnnë' bönni' na': "Bití' uguí'ínu', tu' cabí naca' lesaca' tsáziu' lidxa',

7 en bití' naca' lesaca' guída' ga zu'. Que lë ni na' bití' burúguida' guída' ga zu'. Bë'ësö didza', ate' huóacatëbi' bi'i huen dxin quia'.

8 Neda' ca', zoa nu rinná be'e neda', ate' nacu'ë ca' bönni' röjáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'tué': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

9 Cate' biyönnë' Jesús didza' ni, bubáninë' queë' bönni' na', ate' buécjë', en gudxë' bönachi na' zá'gaca cúdzu'lë', rnnë':

—Le nácatë rea' libí'ili', cuntu nu bönni' Israel bití' röjxáqui'da'-në' réajlë'ë quia' ca réajlë'ë quia' bönni' ni.

10 Cate' bulu'dxinë' bönni' na' gusól-lë'ë bönni' rinná bé'enë' bönni' röjáquië' gudil-la, gula'yázië' ga naca lu yu'u lidxë', en bila'lé'enë' chibóacabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

11 Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len bönachi zían.

12 Cate' bidxinë' gala' ra' yödzö na', bilé'enë' yugu' bönni' nuá'agaquië'-bi' tubi' bi'i bönni' nati. Söjcáchi'gaquië'-bi'. Bi'i nati na' nácabi' la's dui bi'i queënu tu nigula uzëbido'. Zían bönachi uladza queënu nigula uzëbi na' söjácalen-nu.

13 Cate' Xanru' bilé'enë'-nu, buéchi' ládxë'ë-nu, ate' gudxë'-nu:

—Bíti'rö cödxu'.

14 Ní'rō gubígui'ē Jesús, en gudanē' da'a yaga ga na' dēbi' bi'i nati na'. Gula'bōzē' bōnni' na' nuá'agaquiē'-bi', ate' Jesús gunné':

—Bi'ido', lí' rea', guyasa.

15 Ní'rō hubanbi'. Gurō'ōbi' bi'i na' zí'alō nátibi', ate' gusí'lobi' ruf'íbi' didza'. Jesús budōdē'-bi' lu ná'anu xiná'abi'.

16 Cate' bōnni' ni' bila'lé'enē' lē'ni, guládxinē' yúgu'tē', ate' gula'gu'ē' Dios yōl-la' ba, ta'nnē':

—Bidxin' queeru' tu bōnni' lo, ru'ē' didza' uláz' queē' Dios. Dios caz rácalenē' bōnachi queē'.

17 Guzē' didza' ca naca yōl-la' huáca queē' Jesús, ate' bila'yōni bōnachi yúgu'tē' yōdzō luyú Judea, en yúgu'tē' yōdzō idú gásibi'ilō.

Le rinabē' Juan, bōnni' buquilē' bōnachi nisa

(Mt. 11:2-19)

18 Bōnni' dá'gaquiē' Juan gula'guíxjōi'inē' lē' yúgu'tē' lē'ni runē' Jesús. Ni' yu'ē' Juan lidxi guíē', bulidzē' chopē' bōnni' na' dá'gaquiē' lē',

19 ate' gusól-lē'ē' légaquiē' ga na' zoē' Jesús para ila'nábinē' Lē', ila'nnē': “¿Nacu' Lí' Cristo, bōnni' ral-la' guídē', o naru' ral-la' cōztu'-nē' bōnni' yúbōlō?”

20 Cate' bila'dxinē' bōnni' na' nasól-lē'ē' Juan ga na' zoē' Jesús, tē' Lē':

—Juan, bōnni' buquilē' bōnachi nisa, nasól-lē'ē' netu' para inábitu' Lí', inatu': “¿Nacu' Lí' Cristo, bōnni' na' ral-la' guídē', o naru' ral-la' cōztu'-nē' bōnni' yúbōlō?”

21 La' ná'asō ruúnē' Jesús zían nupa te'e, yugu' bōnni' huē', en bōnni' yú'ugaca légaquiē' bō' xihui', ate' zían bōnni' lo chul-la busaljē' guiōj lógaquiē'.

22 Bubi'ē' didza' Jesús, rē' chopē' bōnni' na' nasól-lē'ē' Juan, rnnē':

—Guli'tséaj, guli'tsōjtíxjōi'-nē' Juan ca naca le bilé'eli', en le biyōnili'. Tu'lé'enē' bōnni' guchul-la lógaquiē'. Tu'zē'ē' bōnni' gulatsjē'. Nuhuóacagaquiē' bōnni' gü'iguequinē' huē' nudzu' ruzōdi. Tu'yōnnē' bōnni' gula'cōdzuē'. Nubángaqiē' bōnni' gulatiē'. Ta'yōnnē' bōnni' yechi' didza' dxi'a.

23 Bica' ba nu biti' gaca chopa ladxi', ate' za'len neda' sal-la' biti' runa' ca réqui nu na' ral-la' guna'.

24 Cate' bōnni' na' gusól-lē'ē' Juan bulu'zē'ē' ni', gusí'lahuē' Jesús rulu'ínē' bōnachi ni' ca naca queē' Juan na', rnnē':

—¿Bizxi birúajli' yōjyuli' lu lataj cá'asō? ¿Naru' birúajli' yōjyuli' tu gui rutá bō' reja le?

25 ¿Bizxi caz birúajli' yōjyuli'? ¿Naru' birúajli' yōjyuli'-nē' tu bōnni' nácuē' lari' nazáca'de'e? Nōz quézili' nupa nácu'gaca lari' nazáca'de'e, en tu'z' xibē' yōl-la' tsahui', nacua' lídxigaquiē' bōnni' ta'nná' bē'ē'.

26 ¿Bizxi caz birúajli' yōjyuli'? ¿Naru' birúajli' yōjyuli'-nē' tu bōnni' ru'ē' didza' uláz' queē' Dios? Ōn, rea' lib'í'ili', ate' nayēpisētērē' ca nu ruf'i didza' uláz' queē' Dios.

27 Náquiē' Juan bōnni' na' nazúaj lu guichi lá'ayi ca naca queē', rna:

Buyútsóca', risól-la'a-nē' gubáz quia', inōruē' ca Lí'.

Bōnni' ni' uchi'ē' nōza ga tōdu'.

28 'Neda' rea' lib'í'ili': Gapa nacua' bōnachi, channō zoē' nu bōnni' ru'ē' didza' uláz' queē' Dios, biti' nácarē' lo ca Juan, bōnni' na' buquilē' bōnachi nisa, pero nu nácatērō cuíd'i'sō ga rinná' bē'ē' Dios nayēpisētērō ca Juan na'.

29 Cate' bōnachi ni', en bōnni' tu'quixjē' lázagaca bōnachi bila'yōnnē' didza' ni' bē'ē' Juan, guléqui'be'enē' le naca tsahui' lahuē' Dios, en bila'dilē' nisa lu nē'ē' Juan,

³⁰ pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

³¹ Gunnë' ca' Xanru':

—¿Nacxi uséqui'tseda' bönachi nacua' dza ni zóaru' na'a? ¿Nacxi caz nácaqaquië'?

³² Nácaqaquië' ca bí'do' ta'guítjabi'. Ta'bõ'öbi' lu yé'ëyi, en ta'bõdxi'abi'. Ta'nnabi' tubi' ia'tubi': “Rucódxitu' queëli' gui, pero biti' ruyá'ali'. Rul-la yéchi'tu', pero biti' ribõdxi'.”

³³ Caní nácali' tu' bidë' Juan, bönni' buquilë' bönachi nisa, en biti' gudahuë' yöta xtila, en biti' gu'ë xisi uva, ate' rnnali' queë': “Tu' xihui' dzaga lé'.”

³⁴ Cate' bida' neda', Bönni' Guljë' Bönachi, en rë'aj rahua', rnnali' quia': “Bönni' ni náquië' bönni' huágulë'ë, en bönni' re'jé'. Náquië' luzá'agaquië' bönni' tu'quizxjë', en ia'zica'rë' bönni' dul-la'.”

³⁵ Rea' lib'ili': Naca bë' nupa nápagaca yöl-la' réajni'i queë' Dios ni'a que le túngaca.

Le benë' Jesús lidxë' tu bönni' yudo' fariseo

³⁶ Tu bönni' yudo' fariseo bulidzë' Jesús gágulenë' lé' tsözxön, ate' guyázië' Jesús lidxë' bönni' na', en gurõ'ë rahuë'.

³⁷ Zóanu lu yödzo na' tu nigula udá dzaga, en cate' nõzinu rõ'ë rahuë' Jesús lidxë' bönni' yudo' fariseo na', ní'irõ bidxinnu ni' nuá'anu tu böga'do' néquini guiój nazaca' le yudzu tu le rilá' zxixi.

³⁸ Cate' bidxinnu zaca' cúdzu'lë' Jesús, gurõ'önu xini'ë ribõdxi'nu. Ní'irõ gusi lonu rigú'unu nisa ribõdxi'nu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lé na' rilá' zxixi.

³⁹ Cate' bönni' yudo' fariseo na' nulidzë' Jesús bilé'enë' lé ni, guzá lãdxë'ë, rnnë': “La'tu' náquië' bönni' ni bönni' ru'ë didza' uláz queë' Dios, huéquibe'enë' nuzxi na', en nacxi nácanu nigula ni rigannu Lé', tu' nácanu nigula udá dzaga.”

⁴⁰ Ní'irõ Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

⁴¹ Jesús rë' lé':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxjë' que chopa iz, ate' ia'tuë' na' ral-lë'ë queë' lazxjë' que chopa beo'.

⁴² Tu' cabí dë quégaquië' dumí ulu'guízxjë' lé na' tál-lë'ë queë', que lé ni na' buniti lahuë' iropë' lé na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

⁴³ Bubi'ë didza' Simón na', rnnë':

—Réquida' neda', bönni' na' rala'rë' queë' dumí, lé na' buniti lahuë'.

Jesús gudxë' lé':

—Le nácasõ rno'.

⁴⁴ Ní'irõ buécjë' Jesús, ate' ni' ruyüë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quí'bida' ni'a, pero nigula ni gulú'unu ni'a nisa ribõdxi'nu, en buzxinu ni'a len guitsa' ícjanu.

⁴⁵ Biti' butsaga lo' neda', pero cate' bidxíntea' lidxu', biti' ruzóa dxinu nigula ni, rutsaga lonu ni'a.

⁴⁶ Biti' gulú'u icja' le za, pero nigula ni gulú'unu ni'a lë na' rilá' zxixi.

⁴⁷ Que lë ni na' rea' li', dul-la' zián gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

⁴⁸ Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

⁴⁹ Yugu' bönni' na' ta'bó'lenë' Jesús tahuë' gula'sí'lógaquië' tè' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

⁵⁰ Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Bôaj lidxu', zoa dxi ládXu'u.

8

Yugu' nigula tácalennu Jesús, ta'gú'unu le tahuë'

¹ Gudödi gulaca lë ni, gudë' Jesús gapa nacua' zián yödzo zxon, en yugu' yödzo'nte, ate' benë' libán ni', en bënë' didza' que didza' dxi'a ca rinná bënë' Dios, ate' idxínnutë' bönni' usëda queë' dzágagaquië' Lë'.

² Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugúë' yugu' yödzo'huë' güi'iguequinu. Nútsa'nu ladjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu.

³ Juana, nigula queë' Chuza, bönni' yu'u lu nëë' le dë lidxë' Herodes, nútsa'nu ca' ladjagacanu, ate' cá'unqueze Susana nútsa'nu ca' légacanu. Ta'gú'unu nigula ni, en ziánrönu ca', le tahuë' Jesús, en yugu' bönni' usëda queë'. Tu'nódzjanu le dë quégacanu.

Rucúdzu'ë didza' Jesús ca naca queë' bönni' guz

(Mt. 13:1-9; Mr. 4:1-9)

⁴ Bila'rúaj bönnachi zián yugu' yödzo ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

⁵ —Birúajë' bönni' guz, søjësië' xisedo'. Cate' ni' søjësië', bulu'huöxaj bal-la xisedo' na' ga naca la' nöza, ate' bulu'libi bönnachi léguequi. Bila'dxinba' ca' biguínido', en gulë'ajba' xisedo' na' dzö'ö la' nöza.

⁶ Bulu'huöxaj ia'bal-la xisedo' na' lu yu ga rö'ö guiöj. Cate' gula'lén xisedo' na', la' gula'bídxitë' tu' cabí nalupa' yu na'.

⁷ Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxön lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi.

⁸ Bulu'huöxaj ia'bal-la xisedo' na' ga naca luyú bëbu. Cate' chigula'zxön, bulu'nódzaj. Tu dxi'gu' na' bunódzaj ia'tú gayuá'tërö xisedo' ca'.

Cate' budxi gnnë' caní Jesús, bënë' zidzaj didza', rnnë':

—¿Nu zoa nagui, en riyöni ral-la' uzë nagui!

Bizx que rucúdzu'ë Jesús didza'

(Mt. 13:10-17; Mr. 4:10-12)

⁹ Ní'irö yugu' bönni' usëda queë' Jesús gula'nábinë' Lë', ta'nnë':

—¿Bizxi sa'yéaj lë na' bucúdzu'u didza'?

¹⁰ Jesús gudxë' légaquië':

—Dios ruzéajni'inë' libí'ili' le nagachi' ca rinná bënë' Lë', pero ia'zica'rö bönnachi ni, ruí'ilena' léguequi didza' le rucúdzu'a didza' para cate' ulu'yüé', bití' ila'lé'enë', en cate' ila'yönnë', bití' ila'yéajni'inë'.

*Rigúxjö'ë Jesús le rulu'i le bucúdu'ë didza'**(Mt. 13:18-23; Mr. 4:13-20)*

11 Gunnë' ca' Jesús:

—Caní naca le rulu'i lë na' bucúdu'a didza'. Xisedo' na' naca xtídzë'ë Dios.

12 Xisedo' na' bulu'huöxaj la' nõza tu'lu'i ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë'ë, en cabí ulu'lë'.

13 Xisedo' na' bulu'huöxaj lu yu ga rō'ö guiöj tu'lu'i ca raca quégaquië' bönni' ta'yönnë' didza' na', en tu'dzëjanë' ta'zi'ë le, pero nácagaquië' ca xisedo' na' biti' ben lui. Tu chí'isö ta'yéajlë'ë, tu' ridxín le rizi' bë' légaquië', ate' la' tu'huöatë ládxi'gaquië'.

14 Xisedo' na' bulu'huöxaj ga bulu'lén lubá yötsi' tu'lu'i ca raca quégaquië' bönni' ta'yönnë' didza' na', en cate' chibila'yönnë', yugu' le tuf'i ládxi'gaquië' yödzülió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' biti' run dxin didza' na' lu icja ládxi'do'gaquië'.

15 Xisedo' na' bulu'huöxaj ga naca luyú bëbu tu'lu'i ca raca quégaquië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxön ladxi' tunë' ca rnna didza' na'.

*Rucúdu'ë didza' Jesús que le rigú'u bení' lídxiru'**(Mt. 4:21-25)*

16 Gunnë' ca' Jesús:

—Cuntu nu bönni' ruquélë'ë guí', ate' la' rudúsi'të' le guí'ina, en biti' rigú'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zi' xibë guí' na'.

17 Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

18 'Que lë ni na', buli'zé nágali', tu' huadéli'në' ia'lati' bönni' ruzóë' tsutsu icja ládxi'da'ahuë' didza' riyönnë', en huazi'rë' xtídzë'ë Dios, pero bönni' biti' ruzóë' tsutsu icja ládxi'da'ahuë' didza' riyönnë', huadúa didza' na' biyönnë'.

*Xinë'ë Jesús, en yugu' bönni' böchë'ë**(Mt. 12:46-50; Mr. 3:31-35)*

19 Ní'irö bila'dxinë' xinë'ë Jesús, en yugu' bönni' böchë'ë ga na' zoë', pero biti' guca ila'bigüë'ë gala' ga zoë' tu' nacua' bönachi zían ni'.

20 Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Të'ënnë' ilu'ilenë' Li' didza'.

21 Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xiná' caza', en yugu' bönni' böchi' caza'.

*Jesús ribequi dxíë' bö' budunu'**(Mt. 8:23-27; Mr. 4:35-41)*

22 Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udöditsöca'ru' ia'tsölá'a nísado' ni.

Ní'irö sójacatë'.

23 Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zxan nisa, en zoa bönadxi quégaquië'.

24 Ní'irö gula'bigüë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxiáda', ate' guzóa dxi bö' na' recja, en guró'ö dxi lu nísado' na'.

²⁵ Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'báininë'. Gulë luzá'agaquië' tuë' ia'túë':

—¿Nuzxi caz bönni' ni? Rinná bé'enë' bö' recja, en nísado', ate' tun ca rnna xtídzë'ë.

Tu bönni' yödzo Gadara yu'u lé' bö' xihui'

(Mt. 8:28-34; Mr. 5:1-20)

²⁶ Ní'irö bila'dxinë' lu xiyúgaquië' bönni' Gadara, le dë ia'tsólá'a nísado' ca dódilö ga dë luyú Galilea.

²⁷ Cate' birúajë' Jesús lë'e bárcodo' na' ga naca lu yu na', dutságuië' tu bönni' yödzo na' Lé'. Chigudze yu'u bö' xihui' lé', ate' bíti'rö rácuë' lari', en bíti'rö rizóë' lu yu'u, pero nun xilatjë' lu xzan bulóaj ga nádjagaca yeru ba.

²⁸ Cate' bönni' na' yu'u bö' xihui' lé' bilé'enë' Jesús, guródxí'ë zidzaj, ate' buzóa zxibë' lahuë' Jesús, en bé'ë zidzaj didza', rnnë':

—¿Bizxi ral-la'a quiu', Jesús, Zxí'inë' Dios nayëpisëtë'rë'? Ráta'yua' lo' cabí usaca' zí'u neda'.

²⁹ Caní gunné' tu' chigunná bé'enë' Jesús bö' xihui' na' urúaj lu bönni' na'. Zían luzuí zí'atëlö burixi butúluda' bö' xihui' na' bönni' na', ate' yugu' bönni' yödzo ni' gulúgui'ë lé' du guíë, en bulu'xéjanë' bregui' guíë ni'a në'ë, pero blë'ë yugu' du guíë na', ate' bö' xihui' na' yu'u lé' guchë' lé' lu lataj cá'asó.

³⁰ Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lé':

—Le Zían lea'.

Caní gunná tu' yú'ugaca bö' xihui' zían bönni' na'.

³¹ Ní'irö yugu' bö' xihui' na' guláta'yugaca lahuë' Jesús cabí isól-lë'ë léguequi lataj chul-la quégaca nupa nátigaca.

³² Nacuá'aba' ca' tu cö'öba' cuchi zían ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsójt'sú'ugaca cuchi zían na'. Jesús bé'ë léguequi lataj.

³³ Bulu'rúaj yugu' bö' xihui' lu bönni' na', en yójt'sú'ugaca cuchi zían na', ate' yójacaba' cuchi zían na' ga naca tu lé'e guiöj. Yójbíxigacaba' lu nísado', ate' ni' gula'yëpiba' nisa, gulátiba'.

³⁴ Cate' bila'lé'enë' bönni' tu'yúgaquië'-ba' cuchi zían na' ca na' guca quégacaba', guladxi gula'dzöbinë'. Bulu'zxúnnajë' ni', ate' yójhüöjgaquië' yójt'xjöi'iguequinë' nupa nacua' yödzo na', en nupa nacua' la' guixi' ni'.

³⁵ Ní'irö bila'rúajë' bönni' yödzo na', yójyúgaquië' lé' na' guca. Cate' bila'dxinë' ga na' zoë' Jesús, bila'lé'enë' bönni' na' gula'yú'u bö' xihui' lé', rö'ë xini'ë Jesús. Nácuë' lari', en dxí'ado' chizóë', ate' guládxinë'.

³⁶ Nupa na' bila'lé'e lé' na' guca gula'guíxjöi'i légaquië' ca guca, böáquië' bönni' na' gula'yú'u bö' xihui' lé'.

³⁷ Ní'irö yúgu'të bönachi zían na' quégaca yödzo nabábagaca Gadara na' guláta'yu lahuë' Jesús urúajë' lu xiyúguequi, tu' tádxinë'. Bubenë' Jesús lë'e bárcodo' na', en söhuöjë'.

³⁸ Bönni' na' bulu'rúaj bö' xihui' na' lé' gúta'yuë' lahuë' Jesús gu'ë lé' lataj tséajlenë' Lé' tsózxön. Gunná bé'enë' Jesús lé' ugá'anë' ni', rnnë':

³⁹ —Böaj lidxu'. Yójt'xjöi'i bönachi uládz quiu' yugu' le zxön benë' Dios quiu'.

Böajë' bönni' na' lidxë', ate' buzë' didza' idú lu yödzö ni' ca naca le zxön benë' Jesús queë'.

Jesús ruinë'-bi' bi'i nigula queë' Jairo enca' nigula na' gudannu lari' nácuë'
(Mt. 9:18-26; Mr. 5:21-43)

⁴⁰ Cate' budxinë' Jesús ia' tsólá'a nísado' na', bulu'dzeja bönachi zían nacua' ni' n'a queë' Lë', tu' ta'böza Lë'.

⁴¹ Ní'irö bidxinë' Jairo ga zoë' Jesús. Náquië' bönni' lo que yu'u ga tu'dubë' bönni' judío, en tu'sédë' queë' Dios. Biyéchuë' xini'ë Jesús, en gúta'yuë' lahuë' tsejë' lidxë'.

⁴² Cani benë' tu' zóabi' tubi' bi'i nigula queë', chirequi gátibi'. Nácabi' bi'i la's dui queë', en yú'ubi' ca chinnu iz. Tsanni ni' sa'yéajë' Jesús, sönógaca tu'quirö bönachi zían Lë'.

⁴³ Nútsa'nu tu' nigula ladaj bönachi zían na', chiguca chinnu iz riguí' rizáca'nu. Biti' ruhuí' rön queënu que huë' quégaca cázanu nigula, ate' chibutönu dëra le dë queënu, riguízjanu nupa tu'ún bönachi, pero bití' guca nu bönni' únë'-nu.

⁴⁴ Gubí'ga'nu zaca' cúdzulë' Jesús, en gudannu ruí' lari' nácuë', ate' la' bu'itë huë' rön queënu.

⁴⁵ Ní'irö Jesús gunábinë' nupa nacua' ni', rnnë':

—¿Nuzxi na' gudán neda'?

Gula'dá'bagui'ë yúgu'të'. Ní'irö Pedro, en nupa nacua'len lë' gulë' Lë', ta'nnë':

—Bönni' Usedi, nacua' bönachi zían ni, tu'quirö Li', en tu'dxiga' Li', ate' ¿rnatso': "¿Nuzxi na' gudán neda'?"

⁴⁶ Ní'irö Jesús gunnë':

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

⁴⁷ Cate' réquibe'enu nigula na' nözinë' Jesús le bennu, ní'irö guzxízinu. Biyéchunu xini'ë Jesús, en gudáxjöi'ínu Lë' lógaca bönachi zían na' bizx que na' gudannu lari' nácuë', en ca na' guca, la' böócatënu.

⁴⁸ Ní'irö Jesús gudxë'-nu:

—Nigúlado', tu' réajlë'u neda' chibóacu'. Böaj lidxu', zoa dxi ládxu'u.

⁴⁹ Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sédë' queë' Dios, ate' gudxë' bönni' lo na':

—Chigútibí' bi'i nigúlado' quiu'. Bítí'rö upízjanu'-në' Bönni' Usedi.

⁵⁰ Cate' biyönnë' Jesús lë ni, bubí'ë didza', rë' bönni' lo na':

—Bití' gádxinu'. Guyéajlë'ësö Dios. Huóacabi' bi'i nigúlado' quiu'.

⁵¹ Cate' guyázië' Jesús yu'u na', bití' bë'ë lataj nu tsázalen Lë', pero légacasë' Pedro, en Jacobo, en Juan, enca' xuz xiná'abi' nigúlado' na'.

⁵² Ta'bödxi nupa nacua' ni'. Ta'bödxi yechë'ë ni'a queë'bi' bi'i nigúlado' na', ate' Jesús rë' légaquië', rnnë':

—Bítí'rö cödxili'. Bítí' nátibi' nigúlado' ni. Rásisibi'.

⁵³ Bulu'titjë' Lë' tu' nözguequinë' chinátibi'.

⁵⁴ Ní'irö gudélë'ë Jesús ná'abi', en bë'ë zidzaj didza', rnnë':

—Bi'i nigúlado', guyaschi.

⁵⁵ Ní'irö bu'u bö' naca cázabi', bubanbi', ate' la' guyásatëbi'. Jesús gunná bé'enë' légaquië' ilu'ë le gágubi'.

⁵⁶ Bulu'báninë' xuz xiná'abi', pero Jesús gunná bé'enë' légaquië' cuntu nu ilë' ca na' guca.

9

Risöl-lë'ë Jesús bönni' usëda queë' tsöjéngaquië' libán

(Mt. 10:5-15; Mr. 6:7-13)

¹ Ní'irö butubë' Jesús idxímmutë' bönni' usëda queë', ate' budödë' lu ná'agaquië' yöl-la' huáca, en yöl-la' unná bë' para ulu'bëajë' bö' xihui' yú'ugaca bönachi, en ulu'ünë' nupa te'e.

² Gusöl-lë'ë légaquië' tsöjéngaquië' libán ca rinná bë'ë Dios, en tsöjhuéngaquië' nupa te'e.

³ Jesús gudxë' légaquië':

—Biti' bi guá'ali' para la' nöza, calëga xiyágado', en calëga yöxaj, en calëga yöta, en calëga dumí, en biti' ixóya yenlí' chopa lari'.

⁴ Bítí'tës yu'u ga tsú'uli', guli'sóa ni' cate' uzá'aróli' yödzö na'.

⁵ Gátí'tës ga bití' ilún bönachi libí'ili' bal, buli'rúaj yödzö na', en guli'cuíbi bëchtö da' lë'e lábali', le ulufi' légaquië' nagá'ana xíguia' nabága'gaquië'.

⁶ Ní'irö bila'rúajë' bönni' usëda queë' na'. Gula'dödë' yúgu'të yödzödo', tunë' libán que didza' dxi'a, en tu'ünë' nupa te'e yúgu'të lu yödzö na'.

Ca gútië' Juan, bönni' buquilë' bönachi nisa

(Mt. 14:1-12; Mr. 6:14-29)

⁷ Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böniga, tu' ta'nná bönachi:

—Juan na' chibubanë' lu yöl-la' guti.

⁸ Ia'bal-lë' ta'nnë':

—Chibulë'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítse'ë yugu' bönni' gulu'ë didza' uláz queë' Dios dza ni'te.

⁹ Herodes na' gunnë':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

Rugahuë' Jesús chi-un gayuá' bönachi

(Mt. 14:13-21; Mr. 6:30-44; Jn. 6:1-14)

¹⁰ Cate' bulu'dxinë' bönni' gubáz nasöl-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yójáquië' tu lataj cá'asö lu xiyú yödzö Betsaida.

¹¹ Cate' chinöziguequi bönachi lë ni, yöjnóguequi Lë', ate' Jesús benë' léguequi bal, en bé'lenë' léguequi didza' ca rinná bë'ë Dios, ate' bunë' nupa te'e.

¹² Cate' chizá' ral-la dza na', idxímmutë' bönni' gubáz queë' Jesús gula'bíguë'ë ga zoë', en të' Lë':

—Busöl-la' bönachi ni tsöjaca gapa dë yödzödo', en gapa dë yú'udo' idú gásibi'ilö para tsöjötíljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

¹³ Ní'irö Jesús rë' légaquië':

—Guli'gu'ë libí'ili' le ilahuë'.

Të' Lë':

—Gáyu'sö yöta xtílado' dë, en chópasöba' böla dëba' queëtu', o ¿naru' huayéajtsatu' tsöjö'öutu' le ilágugaca bönachi zían ni?

¹⁴ Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

¹⁵ Caní gulunë', ate' gula'bö'ë yúgu'të'.

¹⁶ Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzxiba, en ré' Dios: "Xclenu'." Ní'irö buzxuzxjé' léguequi, en bé'ë quégaquië' bönni' usëda queë' para ulu'cu'ë lógaca bönachi na'.

¹⁷ Gulahuë' yúgu'të', en bulu'huöljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'böra.

Rnnë' Pedro Jesús náquië' Cristo

(Mt. 16:13-19; Mr. 8:27-29)

¹⁸ Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

¹⁹ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bitsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

²⁰ Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasöl-lë'ë Dios.

Rigúxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

²¹ Ní'irö Jesús gúdxidë'ë légaquië', en gunná bé'enë' légaquië' cuntu nu ilë' Nu náquië' Lë'.

²² Ní'irö ré' légaquië':

—Run bayudxi qui'i saca'a neda', Bönni' Guljë' Bönachi, zían le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bé', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

²³ Gudxë' ca' yúgu'të':

—Channö ré'enë' nu bönni' tē'ë neda', ral-la' uzöë' tsölá'alö le dë queë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö gaca tē'ë neda'.

²⁴ Núti'tës bönni' ruí'i lúdxë'ë gun chi'ë yöl-la' na'bán queë', unítië' le, pero channö unítië' yöl-la' na'bán queë' tu' dë'ë neda', bönni' ni gata' yöl-la' na'bán idú queë'.

²⁵ Biti' bi uzi'ë xibé tu bönni' channö utubë' queë' yúgu'të le dë yödzólió ni, pero unítië' tsaz yöl-la' na'bán queë'.

²⁶ Nu bönni' rutuf'inë' neda', en rutuf'inë' ca' xtídz'a, lë'sca' neda', Bönni' Guljë' Bönachi, utuí'ida' bönni' na' cate' huöda' idinná bé'a, dzágagaca neda' yöl-la' zxön queë' Xuza', en yöl-la' zxön quégaquië' gubáz lá'ayi queë' Dios.

²⁷ Le nácatë' rea' libí'ili', nacua' bal-lë' bönni' ni bití' ilátië' cate' ila'lé'erönë' dza idinná bé'ë Dios.

Ridzá' ca riná' lahuë' Jesús

(Mt. 17:1-8; Mr. 9:2-8)

²⁸ Cate' bizá'a xunu' gubidza gudödi bé'ë Jesús yugu' didza' ni, ní'irö guchë'ë Pedro, en Juan, en Jacobo, ate' gurenë' tu lu guí'ado', ga na' bulidzë' Dios.

²⁹ Tsanni ni' ruí'ilenë' Dios didza', bidzá' ca riná' lahuë', ate' böáca chiguíchido'os lari' nácuë', en guyëpi yösa bení'.

³⁰ Ní'irō bulu'lu'í lógaquiē' chopē' bōnni' ga zoē' Lē' tu'ilenē' Lē' didza'. Nácagaquiē' Moisés, en Elías.

³¹ Chopē' nī gula'yēpē' yōsa bení', ate' tu'ilenē' Jesús didza' ca si' uzē'ē yōdzōlió nī, gátie' lu yōdzō Jerusalén.

³² Sal-la' chirácada' ilásiē' Pedro, en nupa nacua'len lē', bayudxi gula'ná'asē', ate' bila'lé'enē' yōl-la' bení' queē' Jesús, en chopē' na' nacua'lenē' Lē'.

³³ Cate' bulu'zē'ē chopē' na' ga na' zoē' Jesús, ní'irō Pedro gudxē' Lē':
—Bōnni' Usedi, dxi'a naca zōaru' nī. Gúntsōca'tu' tsonna yu'u lága'do', tu quiu', ia'tú queē' Moisés, en ia'tú queē' Elías.

Biti' réquibe'enē' Pedro bi na' rnnē'.

³⁴ Tsanni nī' ru'ē didza' nī, la' gurō'ōtē bōaj le bugacu légaquiē', ate' guládxinē' tu' nacu'ē lu bōaj na'.

³⁵ Ní'irō biyōn chi'i Nu ru'í didza' lu bōaj na', ranna:

—Bōnni' nī náquiē' Zxí'ina'. Nadxí'ida' Lē'. Buli'zē' nágali' didza' gu'ē.

³⁶ Cate' budxi bē' didza' chi'i na', tuzē' Jesús nagá'analenē' légaquiē'. Ta'cuá' dxiē' bōnni' usēda queē', ate' dza na' cuntu nu gulé' ca naca le bila'lé'enē'.

Ruúnē' Jesús bi'i bōnni' yu'u bō' xihui' lēbi'

(Mt. 17:14-21; Mr. 9:14-29)

³⁷ Cate' za' rení' ia'tú dza bulu'huōtjē' Jesús, en bōnni' na' dzágagaquiē' Lē' lu gu'ado' na', ate' bila'rúaj bōnachi zían dutságagaca Jesús.

³⁸ Ní'irō bē'ē zidzaj didza' tu bōnni' nūtsē'ē ladaj bōnachi zían na'. Bulidzē' Jesús, rnnē':

—Bōnni' Usedi, ráta'yua' lo' duyú'-bi' bi'i bōnni' quia' tu' nácabi' bi'i la's dui quia'.

³⁹ Yu'u bō' xihui' lēbi' le run ga ribōdxi'abi', en ruxízida' lēbi'. Run ga ribía bidxina' zxōna' ruá'abi', en rurixi rutúluda' lēbi', ate' catu caz rusán lēbi'.

⁴⁰ Gúta'yua' lógaquiē' bōnni' usēda quiu' ulu'béajē' le, pero bití' gula'zéqui'nē'.

⁴¹ Bubi'ē didza' Jesús, rnnē':

—Libi'ili', bití' réajlē'ēli', en nachixi ícjali'. ¿Gáca'xte ral-la' sóalena' libi'ili', en guá' ilena' queēli'? Dijuá'a-bi' bi'i bōnni' quiu' nī.

⁴² Cate' nī' zá'abi' ribíga'bi' ga na' zoē' Jesús, burixi butúluda' bō' xihui' na' lēbi'. Jesús gudil-lē' bō' xihui' na', en bunē'-bi' bi'i bōnni' na'. Ní'irō bugu'ē-bi' lu nē'ē xúzibi'.

⁴³ Bulu'bani yúgu'tē bōnachi nī' ca naca yōl-la' huáca zxōn queē' Dios.

Jesús ru'ē didza' leyúbōlō ca si' ila'zōnē' Lē'

(Mt. 17:22-23; Mr. 9:30-32)

Tsanni nī' tu'bani yúgu'tē bōnachi ca naca le zxōn runē' Jesús, Lē' gudxē' yugu' bōnni' usēda queē',

⁴⁴ rnnē':

—Guli'cú'u icja nágali' didza' nī, tu' si' ulu'dōdē' neda', Bōnni' Guljē' Bōnachi, lu ná'agaca bōnachi.

⁴⁵ Biti' gula'yéajni'inē' bōnni' usēda queē' didza' nī, tu' cabí ru'inē' Dios légaquiē' lataj ila'yéajni'inē', pero bití' bulu'rúguinē' ila'nábinē' Jesús ca naca didza' nī.

Nu naca lo

(Mt. 18:1-5; Mr. 9:33-37)

46 Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'túë' núzxilë' gáquië' lo.

47 Réquibe'enë' Jesús le ta'zá' ládxi'gaquië', ate' gudélë'ë-bi' tubi' bí'ido', en buzóë'-bí' cuitë'.

48 Ní'irö rë' légaquië':

—Núti'tës bönni' gunë' bal tu bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasöl-lë'ë neda'. Que lë ni na' bönni' nútsë'ë ládjali' nácarë' nōxaj ladxi', bönni' ni náquië' lo.

Nu biti' ridá'baga' rë'u, rácalen rë'u

(Mr. 9:38-40)

49 Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

50 Jesús rë' lë':

—Biti' inná bé'eli'-në', tu' rácalen rë'u nu biti' ridá'baga' rë'u.

Jesús ridil-lë' Jacobo, en Juan

51 Cate' chizá' gal-la' dza ral-la' gátië' Jesús, en huëpë' yehua' yubá, benë' bayudxi tsejë' Jerusalén.

52 Gusöl-lë'ë yugu' bönni' gubáz queë' ila'nōruë' ca Lë', ate' yōjáquië' tu yōdzōdo' quégaca bōnachi Samaria para tsōjpá'agaquië' ga ugá'anë' Jesús tu yëla.

53 Yugu' bönni' yōdzō na' biti' gulunë' Jesús bal tu' chinaca queë' sa'yéajë' Jerusalén.

54 Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, ¿naru' inábatsōca'tu' huōtaj gu' le za' yehua' yubá, en usuniti légaquië', guntu' ca na' benë' Elías?

55 Buécjë' Jesús, en gudil-lë' légaquië', rnnë':

—Biti' nōzili' bizxi bö' dzágui libí'ili'.

56 Bida' ni neda', Bönni' Guljë' Bōnachi, calëga para usunitía' yōl-la' na'bán quégaca bōnachi, pero bida' dusölá' bōnachi.

Ní'irö yōjáquië' yōdzō yúbölö.

Nupa tš'ëni tsōjácálen Jesús

(Mt. 8:19-22)

57 Tsanni ni' yú'ugaquië' nōza Jesús, en yugu' bönni' dá'gaquië' Lë', bidxinë' tu bönni' yōdzō Jerusalén, en rë' Jesús:

—Xan, rë'ënda' sá'lëna' Li' gáti'tës ga tseju'.

58 Jesús rë' lë':

—Yúgu' bōza', nacuá' zxan bulóaj quégacaba', ate' biguínido', dxíagaca xcá'agacaba', pero neda', Bönni' Guljë' Bōnachi, biti' dë quia' ga gáta'a uzí ládxa'a.

59 Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni gudxë' Lë':

—Xan, benna neda' lataj huōja' lidxa' ga idxinrö dza chibucácha'a-në' xuzá'.

60 Jesús gudxë' lë':

—Bë' lataj bönni' chizóa ilátië' ulu'cáché'ë nupa chinati quégaquië', pero li', guyéaj, yōjén libán ca inná bë'ë Dios.

61 Ní'irö bidxinë' ia'túë' ca', en rë' Jesús:

—Xan, rě'enda' sá'lena' Li', pero benna neda' lataj tseja' tsőjzégacada'-ně' didza' di'a dza quia'.

⁶² Jesús gudxě' lě':

—Núti'tės bönni' ru'fi lădxě'ē le raca yődzölió náquiē' ca tu bönni' rugá'anē'-ba' bēdxi, en ruyuē' zaca' cūdzulē'. Nu run caní bití' naca lesaca' tsaza ga rinná bē'ē Dios.

10

Risöl-lě'ē Jesús tsónnalalaj yu' chiē' bönni' tsőjéngaqüē' libán

¹ Gudödi gulaca yugu' lě ni, guröē' Xanru' ia'tsónnalalaj yu' chiē' bönni' usēda queē', ate' gusöl-lě'ē légaquię' chopa huéajgaquię' para ilá'nöruē' ca Lě', en tsőjăquię' yūgu'tē yődzö, en yődzödo' gapa chizóa tōdē' Lě'.

² Gudxě' légaquię':

—Le nácatē, dēda' dxin quia', le naca ca tu la' yēla zxön ga nu tsőjlapa', pero nabábasö huen dxin quia' nacuá'. Que lě ni na', guli'gáta'yu lahuē' Dios, náquiē' Xan la' yēla na', isöl-lě'ē yugu' huen dxin ga naca la' yēla queē'.

³ Guli'tséaj na'a. Buli'yútsöca', neda' risöl-la'a libí'ili', nácali' ca yugu' bö'cu' zxila' sőjăcaba' lădjagacaba' bö'cu' gu'á sínia'.

⁴ Bití' guá'ali' yőxaj dumí, en caléga buzudi yōta, en bití' guá'ali' ia'tú cō xiráchuli', en bití' tselí' para gúf'ilenli' bönachi didza' gapa naca la' nōza.

⁵ Gátí'tės yu'u ga tsú'uli', innali': "Le ribequi dxi ladxi' gaca quégaca bönachi nacuá' yu'u ni."

⁶ Channö zoa ni' nu bönni' si'ē yöl-la' ribequi dxi ladxi', ugá'analen lě' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábali'.

⁷ Guli'gá'ana yu'u ga na' tsú'uli', en guli'gu'aj guli'gagu bi ilunnē' queēli', tu' udzöli' quézinē' bönni' huen dxin le gahuē'. Bití' tődili' yu'u yu'u.

⁸ Gátí'tės yődzö ga tsú'uli', ate' ilún libí'ili' bal, guli'gagu le ulu'cu'ē loli'.

⁹ Buli'ún nupa te'e nacuá' yődzö na', en guli'guíē' léguequi: "Chibidxín le rinná bē'ē Dios ga zóali'."

¹⁰ Gátí'tės yődzö ga tsú'uli', channö cabí ilún libí'ili' bal, guli'rúaj, tsőjsóali' la' nōza que yődzö na', en innali':

¹¹ "Běchtö que lădzali' le da' lě'ē lăbatu' ruquínajtu', le rulufí' nabága'li' xíguia', pero ral-la' inözili' lě ni, chibidxín le rinná bē'ē Dios ga zóali'."

¹² Neda' rea' libí'ili', cate' idxín dza ichúguię' Dios quégaca bönachi, ila'gu'í' ila'zaca'rö bönachi yődzö ni' ca ila'gu'í' ila'zaca' bönachi yődzö Sodoma, nupa ni' busunítiē' Dios.

Le gaca quégaca nupa bití' ulu'bí'i lădxi' gaca

(Mt. 11:20-24)

¹³ Gunné' ca' Jesús:

—Bica' bayechi' libí'ili', bönachi yődzö Corazín. Bica' bayechi' libí'ili', bönachi yődzö Betsaida. La'tu' gulaca lu yődzö Tiro, en lu yődzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i lădxi'gaquię' bönni' ni', ate' ilăcuē' lari' cá'asö, en ila'gu'ē dō icjagaquię', le ulufígaca chibulu'bí'i lădxi'gaquię'.

¹⁴ Que lě ni na', cate' idxín dza ichúguię' Dios quégaca bönachi, quí' i sáca'röli' ca ila'gu'í' ila'záquię' bönni' yődz Tiro, en yődz Sidón.

15 Libí'ili', bönachi Capernaum. Réquili' tsázali' yehua' yubá. Huójtjali' tsójtászali' lataj chul-la quégaca nupa nátigaca.

16 Ní'irö Jesús gudxë' yugu' bönni' usëda queë', rnnë':

—Nu ruzë nagui libí'ili', ruzë nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasöl-lë'ë neda'.

Bönni' yöjéngaquië' libán tu' dxinë' ga zoë' Jesús

17 Cate' tsónnalalaj yu' chië' bönni' na' gusöl-lë'ë Jesús bulu'dxinë' ga zoë' Lë', bönni' na' yöjéngaquië' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

18 Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú.

19 Buli'yútsöca', neda' nudöda' lu ná'ali' yöl-la' unná bë' para gaca sóngacali'-ba' bëla sínia', en xöjnö', en biti' bi gaca queëli', ate' ucúl-lali' yöl-la' unná bë' que tu' xihui', nu biti' rilé'e rë'u dxi'a.

20 Na'a, buli'dzeja, calégasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

Rudzéjanë' Jesús

(Mt. 11:25-27; 13:16-17)

21 La' ní'isö rudzéjanë' Jesús, dzáguië' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë', pero buluí'guequinu'-bi bí'ido' ca naca. ¡Ca' gaca, Xuza', tu' caní guyaza ládxu'!

22 Ní'irö gunnë':

—Yúgu'të budödë' Xuza' lu na'a. Cuntu nu bönni' nözinë' Nu náquië' Xzí'inë' Dios, pero tuzë' Dios Xuz nözinë', ate' cuntu nu nözi Nu náquië' Dios Xuz, pero tuzë' Xzí'inë' nözinë', ate' inözigaca ca' nupa na' Xzí'inë' ré'ënë' uluí'inë' léguequi Xuzë'.

23 Ní'irö Jesús buyüë' yugu' bönni' usëda queë', en rë' légaquië':

—Bica' bágaca nupa ta'lé'e le rilé'eli' libí'ili',

24 tu' rea' libí'ili': Zían bönni' gulu'ë didza' uláz queë' Dios, enca' bönni' gula'nná bë'ë, gulé'ënnë' ila'lé'enë' le rilé'eli', pero biti' bila'lé'enë' le. Gulé'ënnë' ila'yönnë' le riyónili', pero biti' bila'yönnë' le.

Tu bönni' Samaria, bönni' tsahui'

25 Ní'irö guyasë' tu bönni' yudo' usedi, en para si' bë'ë Jesús, gunábinë' Lë', rnnë':

—Bönni' Usedi, ¿bizxi ral-la' guna' para idéli'da' yöl-la' na'bán idú?

26 Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë na' rulabu'?

27 Bubi'ë didza' bönni' na', rnnë':

—Caní rnna: "Idxi'inu' Xanu' Dios idú ládxu'u, en len idú icja ládxi'do'o, en len idú yöl-la' run quiu', en len idú yöl-la' réajni'i quiu', ate' idxi'inu' bönni' luzó'o ca nadxí'i cuinu'."

28 Jesús rë' lë':

—Dxi'ado' bubi'u didza'. Ben caní, ate' gata' quiu' yöl-la' na'bán na'.

29 Tu' gu'unnë' bönni' na' ubéaj dxi'a cuinë', rë' Jesús:

—¿Nuzxi na' bönni' luzá'a?

³⁰ Bubi'ë didza' Jesús, rë' lë':

—Buzé'ë tu bönni' Jerusalén, rudínnië, sa'yéajë' yödzo Jericó. La' nöza ni' gula'zönë' gubán lë'. Gula'güé' lari' nácuë', en gulunë' lë' huë'. Ní'irö bulu'zë'ë ni', en nucá'anagaquië' lë', chirati cazë'.

³¹ Ní'irö gudödë' tu bixúz la' nöza ni'. Cate' bilé'enë' bönni' huë' na', tsölá'alö gudödë'.

³² Gudödë' ca' ni' tu bönni' nababë' xzí'ini xi'sóë' Leví, yugu' bönni' na' tunë' dxin que yudo'. Cate' bilé'enë' lë', tsölá'alö ca' gudödë'.

³³ Lë'sca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxe'ë lë'.

³⁴ Gubíguí'ë ga na' dë', ate' gulu'ë le za, en xisi uva nál-la lu huë' queë', ate' buchölinë' le lari'. Ní'irö budxíë' lë' cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'.

³⁵ Cate' za' rení' ia'tú dza, en chizóa uzë'ë bönni' Samaria na', guléajë' lázxjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utóu' ia'lati' dumí, ubí'a neda' quiu' cate' huóda'."

³⁶ Na'a, ¿nacxi runi li'? ¿Núzxilë' bönni' yonna ni gúquië' bönni' luzë'ë bönni' na' gulu'ë dö' bönni' gubán queë'?

³⁷ Bubi'ë didza' bönni' yudo' usedi na', rë' Jesús:

—Bönni' na' buéchi' ládxe'ë lë'.

Ní'irö Jesús gudxë' lë':

—Guyéaj na'a, yójén ca' li'.

Le benë' Jesús lídxigacanu Marta, en María

³⁸ Ní'irö bu'ë nöza Jesús, ate' bidxinë' tu yödzödo' ga ni' tu nigula lënu Marta guchë'ënu Lë' lídxinu.

³⁹ Marta ni zóanu nigula zxilanu lënu María, ate' María na' gurö'ötënu ga naca xini'ë Jesús, en ruzë' náganu xtídzë'ë.

⁴⁰ Marta na' bubi buguí'ínu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'i ládxi'tso' neda' tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rë'ë-nu:

—Marta, Marta, ruúbí ruguí'ide'enu', en zían le ruí'i ládxi'u' runu'.

⁴² Tuz le run bayudxi nu gun, ate' María ni guröbi' lë na' nácatërö dxi'a, ate' lë na' guröbi' bití' udúa queëbi'.

11

Ca ral-la' ulídzaru'-në' Dios

(Mt. 6:9-15; 7:7-11)

¹ Tu dza ni' Jesús rulidzë' Dios. Cate' budxi bë'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios gü'ílenlu'-në' didza', ca benë' Juan, busëdinë' bönni' dá'gaquië' lë'.

² Ní'irö Jesús rë' légaquië':

—Cate' ulídzali'-në' Dios gü'ílenli'-në' didza', guli'ná:

Xuztu', zu' yehua' yubá, gá'ana zxon Lo'.

Gudá inná bë'u.

Gaca ca raza ládxi'u Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu'

ca netu' ca' runiti lotu' nupa tua' dö' queëtu'.

Biti' gu'u lataj si' bë' tu' xihui' netu',

pero busölä netu' lu na' nu ruá' dö'.

⁵ Jesús rë' ca' légaquië':

—Channö zoë' nu bönni' ládjali', en zoë' böchi' luzë'ë, en channö huidë' ga na' zoë' guluhuëla, ate' ulidzë' lë', innë': "Böcha'a, benna quia' tsonna yöta xtila

⁶ tu' si' bidxinë' quia' böchi' luzá'a, zë'ë zi'tu', pero biti' bi dë le gu'a-në' gahuë'."

⁷ ¿Naru' ubi'ë didza' caní bönni' na' zoë' yu'u, guië' lë': "Biti' utsó'o neda' tu' chinayayaj yu'u, en chidélengacabi' bi'i quia' neda', ate' biti' gaca chasa' bi gunna' quiu'?"

⁸ Neda' rea' libí'ili': Sal-la' biti' chasë' bi unödzjë' queë' tu' náquië' böchi' luzë'ë, pero chasë', en unödzjë' queë' idutë' le riquinnë' para cabirö upíxjanë' lë'.

⁹ Que lë ni na' rea' libí'ili': Guli'naba, ate' Dios gunnë' queëli'. Guli'quilaj, ate' idzöli queëli'. Buli'lidza ra' yu'u, ate' tsalaj queëli'.

¹⁰ Nu rinaba, rizi' que, ate' nu riguilaj, ridzöli que, ate' nu rulidza ra' yu'u, ralaj que.

¹¹ Channö zoë' nu bönni' ládjali', en náquië' xuz, ate' channö xzí'inë' inábibi' lë' yöta xtila, ¿naru' unödzjatsë' queëbi' guiöj? Channö inábibi' lë' tuba' böla, ¿naru' unödzjatsë' queëbi' bëla?

¹² Channö inábibi' lë' dxita que böra, ¿naru' unödzjatsë' queëbi' xöjnö'?

¹³ Caní naca, nácali' libí'ili' huiá' dö', pero nözili' unödzjali' quegacabi' xzí'inili' le naca dxí'a. Nácatërö löza Xúzili' zoë' yehua' yubá gunnë' queëli' Dios Bö' Lá'ayi, núlöli' inábili' Lë'.

Ta'nnë' runë' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

¹⁴ Tu dza bubéajë' Jesús bö' xihui' yu'u tu bönni', le run ga biti' raza innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani bönachi nacua' ni'.

¹⁵ Bal-la bönachi nacua' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

¹⁶ Ia'bal-la bönachi na' gulë'ëni ila'zì' bë' Jesús, ate' gula'nabi Lë' gunë' tu le gaca bë' le za' yehua' yubá.

¹⁷ Réquibe'enë' Jesús le ta'zá' ládxi'gaquië', ate' rë' légaquië':

—Gátitës ga ta'nná be'e bönachi luzë'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacua' tu yu'u, údxi queguequi.

¹⁸ Lë'sca' caní raza que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'?

¹⁹ Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quegaca nupa dá'gaca libí'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'.

²⁰ Channö neda', len yöl-la' huáca queë' Dios rubéajgaca' bö' xihui', le nácaté chibidxín le rinná bē'ē Dios ga zóali'.

²¹ 'Cate' tu bönni' nál-la dē lu nē'ē le rudí'inē', en rapa chí'ē lidxē', naca chí'i dērō le dē queë'.

²² Na'a, channö zē'ē ia'tué' bönni' nál-latērē' ca lē', en ucul-lē' lē', ní'irō cuē' yúgu'tē le rudí'inē', lē na' ruzxōni lādxi'ē, ate' quisiē' le dē queë' bönni' na'.

²³ 'Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

Ca naca que bö' xihui' ruxín xilataj

(Mt. 12:43-45)

²⁴ Gunnē' ca' Jesús:

—Cate' rirúaj bö' xihui' lu bönni', ridá gapa nabídx, riguilaj ga uzí' ladxi'. Channö cabí idzōli que, inná: “Huója' xilatja' ga ní' birúaja'.”

²⁵ Cate' ruxín ní', rōjxaca' bönni' na', náquiē' ca tu yu'u chinulúa, en chinabá'a para nu tsōjsóa ní'.

²⁶ Ní'irō reaj, en rōjxí' ia'gadxi bö' xihui', nácacatērō xihui' ca le, ate' ta'yú'u bönni' na'. Na'a, le raca queë' bönni' na' nayáli'tērō ca le guca queë' zí'alō.

Le naca bica' ba le naca idú

²⁷ Tsanni ní' ru'ē Jesús didza' ní, tu nigula nútsa'nu ladaj bōnachi zían na' bē'ēnu zidzaj didza', rnnanu:

—Bica' ba nigula na' biá'anu Li' lē'ēnu, en bica' ba ca' luchú'unu ga na' gúdxu'u.

²⁸ Bubi'ē didza' Jesús, gunnē':

—Nácacatērō bica' ba nupa ta'yōni xtídzē'ē Dios, en tun ca rnna.

Ta'nábinē' Jesús gunē' le gaca bē' nuzxi náquiē'

(Mt. 12:38-42; Mr. 8:12)

²⁹ Tsanni ní' ta'biga' bōnachi zían ga zoē' Jesús, gusí lahuē' ru'ē didza', rnnē': —Ta'nába bōnachi tuá' dō' ní guna' le gaca bē' ga za' yöl-la' huáca quia', pero biti' bi le gaca bē' ila'lé'enē'. Tuz le gaca bē' ca na' guca queë' Jonás ila'lé'enē'.

³⁰ Ca na' guca queë' Jonás, gúquiē' tu le naca bē' lógaca bōnachi yōdzō Nínive, lē'sca' caní gaca quia' neda', Bönni' Guljē' Bōnachi, gaca' tu le gaca bē' lógaca bōnachi dza ni zóaru' na'a.

³¹ Cate' idxín dza ichúguiē' Dios quégaca bōnachi ila'guí'i ila'zaca', en uchi'a usōrōē' bōnachi dza ni zóaru' na'a, Dios uchisē'-nu nigula gunná bē'enu bōnachi dza ní'te luyú ní' dē tsólá'a ga ridōdi gubidza beo' ziaga, ate' le bennu uluí'i nabága'gaca bōnachi ní xíguia', tu' bídanu lēnu, birúajnu ga naca zítu' para uduzē naganu didza' réajni' bē'ē Salomón, bönni' gunná bē'enē' bōnachi Israel, pero na'a, zoa' neda' ní, en nayēpisētēra' ca Salomón na'.

³² Lē'sca' caní, Dios uchisē' bönni' gula'cu'ē yōdzō Nínive cate' idxín dza ichugu bē'ē quégaca bōnachi, en uchi'a usōrōē' bōnachi dza ni zóaru' na'a, ate' le gulunē' uluí'i nabága'gaca bōnachi ní xíguia', tu' bulu'bí'i lādxi'gaquiē' bönni' Nínive cate' bila'yōnnē' libán benē' Jonás, ate' na'a zoa' neda' ní, en nayēpisētēra' ca Jonás na'.

Le rigú'u bení' lu icja lādxi'do'oru'

(Mt. 5:15; 6:22-23)

³³ Gunnē' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xítsá' ga liná', para uzení' quégaca nupa ta'yú'u yu'u na'.

³⁴ Guiöj loru' naca ca tu le rigú'u bení' lu icja ládxi'do'oru'. Channö guiöj lo' naca dxi'a, idúteo' yudzu le naca bení', pero channö naca xihui' guiöj lo', idúteo' yudzu le naca chul-la.

³⁵ Ben chi'i cuinu' na'a, para cabí huóáca chul-la lè na' rigú'u bení' lu icja ládxi'do'o.

³⁶ Caní naca, channö idúteo' nálisinu' le naca bení', en biti' bi zóalen lí' le chul-la, yúgu'tè ilé'enu' dxi'a ca raca cate' ruzení' quíu' guí'.

Jesús ruzéqui'ë yugu' bönni' yudo' didza'

(Mt. 23:1-36; Mr. 12:38-40; Lc. 20:45-47)

³⁷ Cate' budxi bē'ë didza' ni Jesús, tu bönni' yudo' fariseo bulidzē' Lē' para tsöjtágulenē' lē'. Cate' guyáziē' Jesús lidxē' bönni' yudo' na', gurō'ë rahuē'.

³⁸ Cate' bönni' yudo' fariseo na' bilé'enē' Lē', bubáninē' tu' cabí gudibi nē'ë Jesús cate' si' gahuē'.

³⁹ Xanru' rē' lē':

—Libí'ili', bönni' yudo' fariseo, riguibi cuinli' ca riguíbili' láhuilögaca le rē'aji ráhuili', pero lu icja ládxi'do'oli' ruhuídi'li', en rizá' ládxi'li' le ruá' dō'.

⁴⁰ Libí'ili', bönni' biti' réajni'ili'. ¿Naru' cabí nözili', Nu ben le zoa láhuisō ben ca' le yu'u lē'elō'?

⁴¹ Na'a, guli'gún gun le dē queēli', ate' ní'irō huóáca dxi'a yúgu'tè le dē queēli'.

⁴² 'Bica' bayechi' libí'ili', bönni' yudo' fariseo. Riguíxzjali' que yudo' tu cō' huéaj tu' chi cō' le rizi'ili' que xōhuéaj, en que guixi' ruda, en quégaca guixi' cuando', pero rudōdisili' le naca tsahui', en yōl-la' nadxi'i queēli' Dios. Yugu' lē' ni run bayudxi gunli', en biti' ucá'anali' ia'zica' lē' na' runli'.

⁴³ 'Bica' bayechi' libí'ili', bönni' yudo' fariseo. Rē'ënili' cō'oli' gapa naca lo lu yu'u ga rudúbili' rusédali' queē' Dios, en rē'ënili' ulu'lidza bōnachi libí'ili' ba xzōn gapa naca láhuilöguequi bōnachi.

⁴⁴ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isō tsahui' cuinli', tu' nácali' ca nacagaca yeru ba quégaca nupa nátigaca le cabí nalá'gaca, ate' ta'dá bōnachi láhuigaca yeru ba na', en biti' téquibe'e.

⁴⁵ Ní'irō bubí'ë didza' tu bönni' yudo' usedi raquiē' xibá queē' Moisés. Rē' Jesús:

—Bönni' Usedi, cate' rnno' caní, netu' ca' runu' zi'.

⁴⁶ Jesús rē' lē':

—Bica' bayechi' ca' libí'ili', bönni' yudo' usedi rácali' xibá queē' Moisés, tu' rusubága'gacali' bōnachi tu yua' zi' le cabí gaca nu guá', pero libí'ili' calēga láti'do'os biti' ruláhuili' le len ná'ali'.

⁴⁷ 'Bica' bayechi' libí'ili', tu' richísali' biquitaj quégaca ba ga nagáchi'gaquiē' bönni' gulu'ë didza' uláz queē' Dios, ate' gulútiē' xuz xtó'oli' légaquiē'.

⁴⁸ Caní naca, runli' ba nalí runli' tuz le gulunē' xuz xtó'oli' tu' gulútiē' xuz xtó'oli' na' légaquiē', ate' libí'ili' richísali' biquitaj quégaca ba ga nagáchi'gaquiē'.

⁴⁹ 'Que lē' ni na', lu yōl-la' réajni'i queē', Dios gunnē' caní: "Isōl-la'a queēli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lē' gútali', en ia'bal-lē' cuia na'li' légaquiē'."

⁵⁰ Caní gunē' Dios tu' uchi'a usörōē' quégaca bōnachi dza ni zóaru' na'a, ni'a que rōn quégaca yúgu'tè bönni' gulu'ë didza' uláz queē', bönni' ni' bētigaca bōnachi légaquiē' cate' gusí lo rata' yōdzölió,

⁵¹ ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhui'lö ga dë bucugu lá'ayi ga na' tu'zégui'gaquië'-ba' böa' bédxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

⁵² 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' xzí'ini guié' que lataj ga ta'dzöli bönachi yöl-la' réajni'i. Libí'ili' biti' riyázali', ate' ruzága'li' xinözigaca nupa tē'ëni ila'yaza.

⁵³ Cate' Jesús budxi bë'lenë' légaquië' didza' ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'si lógaquië' ta'naba yúdxide'enë' Lë' ca naca zían le taca,

⁵⁴ en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

12

Rusédinë' Jesús ca naca yöl-la' rulu'isö tsahui' cuini

¹ La' dza na' bulu'dubi zían gayuá' bönachi ga zoë' Jesús ga bidxintë ta'rölisö luzë'eguequi bönachi na'. Ní'irö gusí lahuë' Jesús rë' yugu' bönni' usëda queë' cazë', rnnë':

—Guli'gún chí'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'isö tsahui' cuini quégaquië'.

² Biti' bi dë le naca balándo'os le cabí ilá' lahui, en biti' bi dë le nagachi' le cabí gaca bë'.

³ Que lë ni na', yúgu'të le chigunnáli' ga naca chul-la, ila'yöni bönachi ga naca lu bení, ate' didza' bë'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

Nu ral-la' gádxiru' (Mt. 10:28-31)

⁴ Gunnë' ca' Jesús:

—Böcha'ado', rea' libí'ili': Biti' gádxili' bönni' tütigaquië' bönachi, ate' tödi na' bití'rö bi gaca ilunë' quéguequi.

⁵ Ulu'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queéli', en tödi na' dë lu në'ë yöl-la' unná bë' chú'unë' libí'ili' lu guí gabila. Ön, rea' libí'ili', guli'gadxi Nu na'.

⁶ 'Túti'gaquië'-ba' gáyu'ba' biguínido' len chopá dumí lásido'. Biti' ral-la ládxe'ë-ba' Dios tu biguínido' na'.

⁷ Lësca' caná, yúgu'të guitsa' ícjali' nabábagaca lahuë' Dios. Que lë ni na', biti' gádxili'. Nazáca'tëröli' libí'ili' ca zianba' biguínido'.

Nupa ta'nнасö néquiquequi queë' Jesús (Mt. 10:32-33; 12:32; 10:19-20)

⁸ Gunnë' ca' Jesús:

—Rea' libí'ili': Yúgu'të bönni' ta'nnë' néquiquequinë' quia' neda' lógaca bönachi, lësca' neda', Bönni' Guljë' Bönachi, innía' néquiquequinë' quia' lógaquië' gubáz lá'ayi queë' Dios,

⁹ ate' bönni' ta'dá'baguë'ë néquiquequinë' quia' lógaca bönachi, lësca' neda' tá'baga'a néquiquequinë' quia' lógaquië' gubáz lá'ayi queë' Dios.

¹⁰ 'Yúgu'të nupa bi ila'nnë' quia' neda', Bönni' Guljë' Bönachi, gaca uniti lahuë' Dios léguequi, pero nu innë' zì' queë' Dios Bö' Lá'ayi, biti' uniti lahuë' Dios nu na'.

11 'Cate' ila'chë'ë libí'ili' gapa naca lu yu'u ga tu'dubë' bönni' judío, en tu'sedë' queë' Dios, en lógaquië' bönni' ulu'chi'a ulu'söröë' libí'ili', en lógaquië' bönni' dë lu ná'agaquië', bití' ubi uguí'ili' nacxi gunli' o bizxi didza' ubí'ili', o bizxi innali'.

12 La' dza ná'asö usédinë' Dios Bō Lá'ayi libí'ili' le ral-la' innali'.

Huáca gun yöl-la' tsahui' queëru' ga gal-la ládxi'ru'-në' Dios

13 Tu bönni' nütse'ë ladaj bönachi zían na' rë' Jesús, rnnë':

—Bönni' Usedi, gudxë' böcha'a gunné' uláz quia' le guta' queë' xuztu'.

14 Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queëli'?

15 Ní'irö Jesús gudxë' bönachi nacua' ni', rnnë':

—Bulí'yútsöca'. Guli'gún chí'i cuinli' para cabí uhuídli'. Le uzi'ë xibé nu bönni' bití' nácasö le zían le dë queë'.

16 Ní'irö Jesús bë'lenë' légaquië' didza', bucúdzu'ë didza', rnnë':

—Zoë' tu bönni' rilé'enë' yöl-la' tsahui' queë', ate' runödzejada' gulapa lu xiyüë'.

17 Ní'irö guzá' ládxe'ë bönni' na', rnnë': “¿Nacxi guntsa'? Bití' dë ga gapa chí'a le rulá' quia'.”

18 Ní'irö rnnë': “Caní guna'. Uquínajgaca' yu'u ga rapa chí'a le rulá' quia', ate' guna' yugu' yu'u zxóntërö ca', ate' gapa chí'a le rulá' quia' ni', len yugu' le dë quia'.

19 Ní'irö gaca gufë cuina': Chidéda' quia' zían le chinutuba', le gáhuida' zían iz. Uzi' ládxa'a. Guí'aj gahua', en udzëjada'.”

20 Ní'irö Dios rë' lë': “Li', bönni' bití' bi nözinë'. Na'a dzö' gátiau'. Na'a, ¿nuzxi caz guequi que, lë na' chinutubu'?”

21 Caní raca queë' bönni' rutubë' la' queëzë' yöl-la' tsahui', en bití' runë' le naca ca yöl-la' tsahui' lahuë' Dios.

Dios run chí'ë yugu' bönachi queë'

(Mt. 6:25-34)

22 Gudödi ni' Jesús gudxë' yugu' bönni' uséda queë', rnnë':

—Que lë ni na' rea' libí'ili': Bití' ubi uguí'ili' ní'a que le guí'aj gáguli', lë na' nabánili', o ní'a que lari' gáculi'.

23 Nácarö lesaca' yöl-la' na'bán queëli' ca le ráguli', ate' nácarö lesaca' idú le nácali' ca lari' ráculi'.

24 Bulí'yutëz ca raca quegacaba' boíquaij. Bití' tázaba', en bití' ta'lápaba', en bití' nacua' quegacaba' ga ilún chí'iba' le rulá' quegacaba', pero Dios rugahuë' légacaba'. ¿Naru' cabí nazáca'tëröli' libí'ili' ca yugu' biguinnido'?

25 ¿Nuzxi caz bönni' ládjali' gaca gunë' ga soë' ibanë' ia'tú chí'ido'os tu' ruúbi ruguí' ládxi'da'ahuë'?

26 Que lë ni na', channö cabí gaca gunli' lë ni naca cuídísö, ¿bizx que ruúbi ruguí'ili' ní'a que le naca zxóntërö'?

27 Bulí'yutëz ca ta'zxön yöjdo'. Bití' tun du lari', en bití' taba lari', pero rea' libí'ili', bití' gúcarö lachi le gúcuë' Salomón ca nácgaca yöjdo' ni, sal-la' gúta'da' yöl-la' tsahui' queë'.

28 Channö Dios runë' lachi yöj guíxi'do' rö'gaca na'a la' guixi', ate' cuxö huidzaj ila'gu'ë léguequi lu guí', ¿naru' cabí gunë' le nácarö dxi'a queëli', libí'ili' na' bití' réajlë'ëli' Dios idú ládxi'li'?

²⁹ Que lë ni na', bití' gúf'i ládxi'li' le ral-la' gáguli', en le ral-la' gu'jali', en bití' ubi ugu'f'i ládxi'do'oli'.

³⁰ Yúgu'të lë ni ta'guilaj bönachi yödžölió ni, pero chinöz quezinë' Xúzili' Dios le riquinili'.

³¹ Guli'gü' ládxi'li' tsú'uli' ga rinná bë'ë Dios, ate' yúgu'të lë ni cu'ë xinöza queëli'.

Yöl-la' tsahui' rigú'uru' yehua' yubá

(Mt. 6:19-21)

³² Gunnë' ca' Jesús:

—Bití' gádxili', libí'ili' na' nácali' bö'cu' zxlá'do' quia'. Nabábasili' zóali', pero raza ládxe'ë Xúzili' Dios gunnë' queëli' lataj tsú'uli' ga ni' rinná bë'ë Lë'.

³³ Guli'guti' le dë queëli', en buli'nödzej quegaca bönachi yechi'. Caní gaca, gunli' queëli' yöxaj dumí le cabí gaca ditaj, en cú'uli' yöl-la' tsahui' na' yehua' yubá le bití' ubidxi udú, ga ni' bití' idxinë' bönni' gubán, en bití' usunitiba' böa'do' le.

³⁴ Ga ni' dë yöl-la' tsahui' queëli', ni' gúf'i ládxi'li' idxinli'.

Ral-la' sóaru' ban ladxí'

³⁵ Gunnë' ca' Jesús:

—Guli'sóa sina', en guli'quela' gu' le uzení' queëli'.

³⁶ Guli'gaca ca bönni' huen dxin ta'bözë' dza huödë' xángaquië', bönni' sa'yéajë' laní que yöl-la' rutsaga na', para cate' udxinë', en ulidzë', la' ila'sáljatë' queë' tsu'ë.

³⁷ Bica' bágaca huen dxin na' ila'cu'ë ban ladxí' cate' huödë' xángaquië'. Le nácatë rea' libí'ili', upá'a cuinë' xángaquië' na', ate' gunë' ga ila'bö'ë ga ilahuë', ate' cu'ë le ilahuë'.

³⁸ Sal-la' huödë' cate' chiral-la o idú guluhuëla, channö idixáquië' légaquië' nacu'ë ban ladxí', bica' bágaca huen dxin na'.

³⁹ Lë ni ral-la' inözili'. La'tu' nözinë' xan yu'u bizxi dza huadxinë' bönni' gubán, usubán ládxe'ë, en bití' gu'ë lataj bönni' na' udxíë' yeru lidxë', para cabí cuanë' le dzö'ö lidxë'.

⁴⁰ Que lë ni na', guli'sóa ban ladxí' ca' libí'ili', tu' huöda' neda', Bönni' Guljë' Bönachi, tu dza bití' ribözali' neda'.

Bönni' huen dxin tsahui', en bönni' huen dxin bití' náquië' tsahui'

(Mt. 24:45-51)

⁴¹ Ní'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdz'u didza, o reo' ca' caní yúgu'të bönachi?

⁴² Ré' Xanru' lë':

—¿Nuzxi na' bönni' huen dxin tsahui', en réajni'inë', dë lu në'ë uláz queë' xanë'? Bönni' ni, xanë' udödë' lu në'ë lidxë' para cate' gála'rö ilahuë' bönni' nacu'ë lidxë', gu'ë que queégaquië' le ilahuë'.

⁴³ Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë.

⁴⁴ Le nácatë rea' libí'ili', udödë' xanë' lu në'ë bönni' huen dxin tsahui' na' idutë le dë queë'.

⁴⁵ Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dó' queégaquië' ia'zica'rë' huen dxin, bönni' en nigula, en isí lahuë' gu'aj gahuë', en súdxinë',

46 ní'irō huödē' xanē' bönni' huen dxin na' cate' biti' ribözē' lē', en cate' biti' réquibe'enē', ate' usaca' zī'ē bönni' huen dxin biti' náquiē' tsahui' na', en ichúguiē' queē' qui'i sáquiē' ca narugu quégaquiē' bönni' biti' ta'yéajlē'.

47 'Bönni' huen dxin na' nōzinē' le rē'ēnē' xanē', en biti' zoē' sina', en biti' runē' ca rnnē' xanē', bönni' nī, quínitērē' xanē' lē'.

48 Channō cabí nōzinē' tu bönni' huen dxin le rē'ēnē' xanē', en gunē' le gun ga ibáguē'ē le quinē' xanē' lē', bönni' nī quinē' lē' látido'os. Tu bönni' yu'u lu nē'ē yenni', yenni' unabē' xanē' lu nē'ē, ate' bönni' na' xanē' nuzxōni lādxē'ē lē' le zxōn, le zxōntērō ca' unabē' xanē' lu nē'ē bönni' huen dxin na'.

Le náquiē' Jesús gun ga ila'rúaj choplō bönachi

(Mt. 10:34-36)

49 Gunnē' ca' Jesús:

—Bida' neda' dujéna' ga tsegui gu' yōdzōlió nī, en caba lādxā'a chinaguéla' guí' na'.

50 Na'a, dē tu le ral-la' qui'i saca'a le naca ca tu le idílida' nisa, ate' rō'a bōniga ga idxintē' gaca caní quia'.

51 ¿Naru' réquili' bida' dulequi dxía' le raca yōdzōlió nī? Rea' libí'ili': ¡Caléga! Bida' duléquia' le gun ga ila'rúaj choplō bönachi.

52 Na'a isí lo ulu'lá'alen luzē'eguequi gayu' bönachi nacua' tu yu'u. Tsonnē' ila'dá'baguē'ē chopē' nazí'igaquiē' xtídzā'a, ate' chopē' na' ila'dá'baguē'ē tsonnē' na'.

53 Nu bönni' zóabi' bi'i bönni' queē' tá'baguē'ē xzí'inē' na', ate' bi'i bönni' na' tá'baga'bi' xúzibi'. Nígula zóabi' bi'i nígula queēnu tá'baga'nu xzí'ininu na', ate' bi'i nígula na' tá'baga'bi' xiná'abi'. Nígula zóanu nígula xzoa' lídxinu tá'baga'nu xzoa' lídxinu na', ate' nígula xzoa' lídxinu na' tá'baga'nu xto' xzí'ininu.

Le nácagaca bē' le taca na'a dza

(Mt. 16:1-4; Mr. 8:11-13)

54 Jesús gudxē' ca' bönachi zían nacua' nī, rnnē':

—Cate' rilé'eli' za' bōaj saca' ga ribía' gubidza, la' rnnátēli': “Hualaj guiōj”, ate' caní raca.

55 Cate' recja bö' za' saca' ga ridōdi gubidza beo' ziaga, rnnali': “Udzá'a na'a”, ate' caní raca.

56 Libí'ili', bönni' ruluí'isō tsahui' cuinli'. Nōzili' le ruluí' i le raca lúzxiba, en le raca luyú nī, pero biti' réquibe'eli' le ruluí' i le nácagaca bē' taca dza nī zóaru' na'a.

Ral-la' ugá'analenru' tsahui' nu rilé'rē'u

(Mt. 5:25-26)

57 Gunnē' ca' Jesús:

—¿Bizx que biti' ruchi'a rusöröli' la' libí'isili' ca naca le naca tsahui'?

58 Channō zoa nu bi unabi yudxi lí', ate' zéajli' idxinli' yúlahui', bē' ladxi' ugá'analenu' tsahui' nu na' tsanni' nī yú'uli' nōza, para cabí uzegui lí' lahuē' bönni' uchi'a usöröē' libí'ili', ate' bönni' uchi'a usöröē' na' udödē' lí' lu nē'ē bönni' rusayjē' lidxi guíē', ate' bönni' na' rusayjē' lidxi guíē' cu'ē lí' lidxi guíē' na'.

59 Rea' lí', biti' uruju' nī' cate' údxirō quizxju' yúgu'tē dumí lásido' ral-lu'u que nu na'.

¹ La' dza n'í'sö bila'dxinë' bönni' ta'guíxjöi'inë' Jesús ca benë' Pilato, bëtië' bal-lë' bönni' Galilea, en guzxi'ë rön quégaquië', le bugútsi'në' xichóngacaba' böa' bëdxi chigulútië' léga'caba' para ila'gu'ë xichóngacaba' na' lahuë' Dios.

² Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'z'ica'rë' bönni' Galilea, tu' gula'gu'i' gula'zaquië' caní?

³ Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'.

⁴ Lësca' caní guca quégaquië' chixxunë' bönni' ni', yöjbaga' yu' u' sibi na' nazí'i le Siloé légaquië', ate' gulátië'. ¿Naru' réquili' gula'bága'tërë' légaquië' xíguia' ca ia'z'ica'rö bönachi nacua' Jerusalén?

⁵ Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'.

Rucúdzu'ë didza' Jesús que yaga higo biti' bi ribía

⁶ Ní'irö bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Röjtijë' le ribía yaga na', pero biti' bi ridzölinë'.

⁷ Ní'irö gudxë' bönni' runë' dxin lu xiyúë' na', rnnë': “Chiguca tsonna iz rida' rududilja' le cuía yaga higo ni, en biti' bi ridzö'lida'. Guchugu le. ¿Bizx que run nigui luyú ni?”

⁸ Ní'irö bubi'ë didza' bönni' huen dxin na', rë' lë': “Xan, bucá'anagarö le ia'tú izatëz, ate' uzatsa' yu zxani, en cu'a bëbu zxani.

⁹ Channö cuía yaga ni, gaca dxi'a, pero channö cabí bi cuía, ní'irö ichugu' le.”

Ruünë' Jesús tu nigula ré'enu cate' naca dza lá'ayi

¹⁰ Tu dza rusédinë' Jesús bönachi nacua' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquië'.

¹¹ Zóanu tu nigula ni' chiguca chixxunu' iz ré'enu, tu' yu'u lënu bö' xihui' run ga te'e bönachi, ate' nayéchutica'sinu ridanu, en biti' ca' raca ulí cuinnu.

¹² Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzöhuë' quiu'.

¹³ Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yö'l-la' ba.

¹⁴ Ní'irö gulënë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacua' ni', rnnë':

—Xopa dza nacua' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

¹⁵ Ní'irö bubi'ë didza' Xanru', rnnë':

—Libí'ili', bönni' ruluf'isö tsahui' cuinli', ¿naru' cabí rusédxigacali'-ba' böa' bëdxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa?

¹⁶ Nácanu nigula ni xzi'ini xi'sóë' Abraham, ate' idú chixxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

¹⁷ Cate' bë'ë didza' ni Jesús, bulu'tu'ínë' yúgu'të bönni' nacu'ë ni' ta'lenë' Lë', pero bulu'dzeja ia'z'ica'rö bönachi, yúgu'të nupa nacua' ni', tu' ta'lé'enë' yugu' le zxön runë' Jesús.

*Rucúdzu'ë didza' Jesús que xisedo' mostaza
(Mt. 13:31-32; Mr. 4:30-32)*

18 Ní'irō rnnē' Jesús:

—¿Nacxi caz raca rixxōn le rinná bē'ē Dios, o bizxi uséqui'tseru' le?

19 Raca ca raca que xisedo' mostaza, le guzxi'ē tu bönni', ate' guzē' le ga naca lu xiyúē'. Guzxōn yaga mostaza na', en guca ca tu yaga zxōn, ate' bila'dxinba' biguinnido', gulunba' xcá'agacaba' lu ni'a nē'e yaga mostaza na'.

Rucúdu'ē didza' Jesús que cúa zi que yōta xtila
(Mt. 13:33)

20 Lēasca' caní rnnē' Jesús:

—¿Bizxi caz uséqui'tseda' le rinná bē'ē Dios?

21 Naca ca cúa zi que yōta xtila, le guzxi'inu tu nigula, en bugútsi'nu tsonna cō' cúa yōta xtila, ate' guyazxaj idútē cúa na'.

Tu ga tōdiru' le naca guído'
(Mt. 7:13-14, 21-23)

22 Tsanni ni' yu'ē nōza Jesús, sa'yéajē' Jerusalén, ridōdē' yugu' yōdzō zxōn, en yugu' yōdzōdo', ate' rusédinē' bōnachi nacua' gapa na'.

23 Tu bönni' zoē' ni' gunábinē' Jesús, rnnē':

—Xan, ¿naru' nabábasō nupa ulu'lágaca?

Jesús rē' nupa nacua' ni', rnnē':

24 —Guli'gü'i lādxi'li' tsú'uli' saca' ga nu ridōdi le naca guído', tu' rea' lib'ili': Zían nupa ilē'ēni ila'yaza ni', pero bití' ila'zéqui'nē'.

25 Tōdi chasē' Xan yu'u, en usayjē' yu'u, isí loli' lib'ili' na' zóali' ní' ilō ulídzali'-nē' ra' yu'u na', ate' guié'li'-nē': "Xan, Xan, gusalaj queétu'." Ní'irō ubi'ē didza' Lē, en guíē' lib'ili': "Biti' nōzda' nuzxi lib'ili'."

26 Ní'irō isí loli' innali': "Gü'i gudágulentu' Li', ate' busédinu' gapa naca lu yē'yi queétu'."

27 Ní'irō guíē' lib'ili': "Rea' lib'ili', biti' nōzda' gazxi bōnachi lib'ili'. Guli'cuíta ga zoa', yúgu'téli' ruá'ali' dō'."

28 Ní'irō cōdxi yéchi'li', en gagu zxea láya'li' cate' ilé'egacali'-nē' Abraham, en Isaac, en Jacob, en yúgu'tē bönni' gulu'ē didza' uláz queē' Dios, nacu'ē ga ní' rinná bē'ē Dios, pero lib'ili' sóali' ní' ilō.

29 Ila'dxín bōnachi ila'ruáj saca' ga rilén gubidza, en saca' ga ribía gubidza, en saca' ga za' bō' ziaga, en saca' ga ridōdi gubidza beo' ziaga, ate' ila'bō'ē ilahuē' ga ní' rinná bē'ē Dios.

30 Ní'irō ilaca lo bal-la bōnachi náca'gaca cá'asō na'a, ate' ulu'gá'ana cá'asō bal-la nupa náca'gaca lo na'a.

Ribōdxi yechē'ē Jesús ni'a quégaca bōnachi Jerusalén
(Mt. 23:37-39)

31 La' dza ní'isō bila'dxinē' bal-la bönni' yudo' fariseo ga zoē' Jesús en tē' Lē:

—¡Burúaj! ¡Buzxunnaj ni! ¡Rē'ēnē' Herodes gútiē' Li'!

32 Jesús rē' légaquiē':

—Guli'tséaj, guli'tsōjōdxē' bönni' na' náquiē' ca tuba' bōza', innali': "Buyútsōca', rubéajgaca' bō' xihui', en ruúna' bōnachi na'a, en cuxō, en cate' gaca lidzaj, údxi guna' dxin quia'."

33 Run bayudxi tséajlensa' ca' nōza na'a, en cuxō, en huidzaj, ate' idxina' Jerusalén, tu' tútigaquiē' bönni' tu'ē didza' uláz queē' Dios ni'.

34 'Lib'ili', zóali' Jerusalén. Rútigacali'-nē' bönni' tu'ē didza' uláz queē' Dios, en ruládxi'gacali'-nē' guiōj bönni' gubáz risōl-lē'ē Dios ga zóali'. Cate' xō zían

luzuí gú'unida' utuba' libí'ili' quia' ca runba' yějede, rutúbiba' bōrado' queēba' zxan xíliba', pero bití' gú'unili'.

³⁵ Bulí'yútsōca', cá'asō ugá'ana lídxili', ate' rea' libí'ili', bíti'rō ilé'eli' neda' cate' idxinrō dza innali': "Bica' ba Nu na' za' uláz queē' Xanru'."

14

Ruúnē' Jesús tu bōnni' ré'enē' huē' gui

¹ Cate' naca dza lá'ayi quégaquiē' bōnni' judío, guyu'ē Jesús lidxē' tu bōnni' unná bē', bōnni' yudo' fariseo. Rō'ē Jesús rahuē', ate' nacu'ē bōnni' yudo' fariseo ni' ta'nē'ē Lē'.

² Zoē' ca' tu bōnni' ré'enē' huē' gui ga na' zoē' Jesús.

³ Ní'irō Jesús gunábinē' bōnni' yudo' usedi táquiē' xibá queē' Moisés, en yugu' bōnni' yudo' fariseo, rnnē':

—¿Naru' dē lataj unru' nu re'e cate' naca dza lá'ayi?

⁴ Légaquiē' bulu'sayaj ruá'agaquiē'. Ní'irō Jesús gudél'ē bōnni' huē' na', en bunē' lē', ate' la' busól-la'tē' lē'.

⁵ Ní'irō Jesús rē' yugu' bōnni' yudo' na', rnnē':

—Channō nu bōnni' ládjali' nacuá'aba' queē' bōa' bēdxi, ate' ibíxiba' tuba' lu yeru, ¿naru' cabí tsójléajtē'-ba', sal-la' naca dza lá'ayi?

⁶ Bití' bi didza' guca ulu'bi'ē ca naca lē ni.

Nu cō' lataj lo

⁷ Cate' bilé'enē' Jesús ca tunē' bōnni' yudo' fariseo na', ta'bō'ē lataj lo ga na' ta'bō'ē tahuē', ní'irō bucúdzu'ē didza', ate' rē' légaquiē':

⁸ —Cate' nu bōnni' ulidzē' li' guídu' ga raca laní que yōl-la' rutsaga na', bití' cō'u lataj lo. Nadxi ca' nulidzē' ca' tu bōnni' nácatērē' lo ca li'.

⁹ Ní'irō bōnni' na' bulidzē' li' huidē' ga zu', en guíē' li': "Bē' lataj bōnni' ni cō'ē ga zu'", ate' ní'irō lu yōl-la' rutu'í quiu' tsőjchō'u zxánitēlō.

¹⁰ Que lē ni na', cate' nu bōnni' ulidzē' li', guyéaj yőjchō' zxánitēlō, para cate' idxinē' bōnni' na' bulidzē' li', huē' li': "Bōcha'a, gudōdi ia'lati' nilō." Ní'irō gácaru' li' lo lógaca nupa ta'bō'len li' tsőzxōn.

¹¹ Nu run ba zxōn cuini, ilunē' ga huōta' huōxaj, pero nu zoa nōxaj ladxi', ilunē' ga gácarō lo nu na'.

¹² Jesús rē' ca' bōnni' na' bulidzē' Lē', rnnē':

—Cati' gunu' tu gü'í huagu o tu lanído', bití' ulídzagacu'-nē' yugu' bōchi' luzó'o, en yugu' bōnni' bōchu'u, en yugu' di'a dza quiu', en dzaga yu'u quiu' ta'lé'enē' yōl-la' tsahui' quégaquiē', tu' ulu'lidzē' ca' li', ate' caní gaca, ubí'í quiu'.

¹³ Cate' gunu' tu gü'í huagu, bulidza yugu' bōnachi yechí', en nupa nabixi ní'a ná'agaca, en nupa bití' raca sá'gaca, en yugu' bōnni' lo chul-la.

¹⁴ Ní'irō gacu' bica' ba, tu' cabí gaca bi ulu'bi'ē bōnni' caní quiu', pero ubí'í quiu' cate' idxin dza ulu'bán nupa gulún le naca tsahui', en gulátigaca.

Rucúdzu'ē didza' Jesús que tu laní zxōn

¹⁵ Cate' tu bōnni' rō'ē rágulenē' Jesús biyōnnē' didza' ni, rē' Lē':

—Bica' ba nu gagu ga ni' rinná bē'ē Dios.

¹⁶ Jesús rē' lē':

—Zoē' tu bōnni' benē' laní zxōn, ate' zían nupa bulidzē'.

¹⁷ Cate' chinabá'a la' huagu, gusól-lē'ē bōnni' huen dxin queē' tsőjōdxē' nupa na' chinulidzē', gunnē': "¡Guli'dá! ¡Yúgu'tē chinabá'a!"

18 Gula sí lógaquië' yúgu'të' ta'nabë' lataj cabí tsöjäquië'. Bönni' zí'alö na' rnnë': "Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj."

19 Ia'tué' rnnë': "Si' guzxi'a gayu' nözaba' bëdxi, ate' tsöjzxi' bë'a légacaba' ugúngaca'-ba' dxin. Ráta'yua' lo' gunnu' neda' lataj."

20 Ia'tué' rnnë': "Si' butsaga na'a, en que lë ni na' bití' gaca guía'."

21 Cate' böajë' bönni' huen dxin na', yöjtíxjöi'inë' xanë' yúgu'të lë ni. Ní'irö gülënë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yë'ëyi, en gapa naca la' nöza que yödzö ni, ate' ichë'u yugu' bönachi yechi' ni, en nupa nabixi ni'a ná'agaca, en nupa bití' raca sá'gaca, en yugu' bönni' lo chul-la."

22 Cate' chinunë' bönni' huen dxin na' caní, rnnë': "Xan, chibena' ca na' gunná bé'enu' neda', ate' ni dë lataj."

23 Ní'irö xanë' gudxë' bönni' huen dxin na', rnnë': "Guyéaj gapa naca la' nöza, en gapa naca nöza lasi, ate' ben bayudxi guídígaca nupa nacuá' ni' para ilí lidxa'."

24 tu' rea' libí'ili': Bití' gahuë' que laní quia' nitué' bönni' ni' bulidza' zí'alö."

Le sáca'ru' cate' zéajlenru'-në' Cristo

25 Yugu' dza ni' röjácalen Jesús bönachi zían, ate' buécjé' Jesús, en rë' légaquië':

26 —Channö guídalenë' neda' tu bönni', en bití' idxi'irönë' neda' ca nadxi'inë' xuz xinë'ë, en nigula queë', en yugu' zxi'inë', en yugu' bi'i böchë'ë, en yugu' bi'i zanë', en yöl-la' na'bán queë', bití' gaca gáquië' bönni' usëda quia'.

27 Nu bönni' bití' gáquië' ca tu bönni' sa'yéajë' söjtë'ë lë'e yaga cruz, ate' të'ë neda', bití' gaca gáquië' bönni' usëda quia'.

28 Channö zoë' nu bönni' ladaj libí'ili' guë'ënnë' gunë' tu yu'u zían cuía, ¿naru' cabí cö'ë zí'alö ulabë' gáca'xi dumí ral-la' utöë' para inözinë' channö dë queë' tsa le riquinnë' para údxi gunë' yu'u na'?

29 Channö cabí gunë' caní, en isí lahuë' cuéquië' xilibi yu'u na', ate' bití' gaca údxi gunë' yu'u na', ní'irö ila'sí lógaca yúgu'të nupa ila'lé'e le ulu'titaj lë',

30 ila'nná: "Bönni' ni' gusí lahuë' runë' yu'u, pero bití' guca údxi gunë' le."

31 Lë'sca' caní, channö zoë' nu bönni' rinná bë'ë, en ral-la' tsejë' gudil-la tsöjtíl-lalenë' ia'tué' bönni' rinná bë'ë, ¿naru' cabí cö'ë zí'alö, en cuéqui icjë' channö séqui'në' tsöjtíl-lalenë' bönni' ni' nachë'ë galaj milë' bönni', ate' lë' chi mllsë' bönni' nachë'ë?

32 Channö cabí séqui'në', cate' ni' zoë' zí'tu' ia'tué' bönni' na' rinná bë'ë, isöl-lë'ë bönni' gubáz queë', ate' inábinë' lë' nacxi ral-la' gunë' para ulu'dzáquië' dxi'a.

33 Caní naca, channö zoë' nu bönni' ladaj libí'ili' bití' ucá'anë' yúgu'të le dë queë', bití' gaca gáquië' bönni' usëda quia'.

Zödi' le naniti yöl-la' siná'a que (Mt. 5:13; Mr. 9:50)

34 Gunnë' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a?

35 Bití'rö nazaca' zödi' na', calëga para luyú, en calëga para ga rirú'uniru' bëbu, pero chú'unaru' le ní'ilö. Nu zoa nagui, en riyöni, ral-la' uzë nagui nu na'.

15

Rucúdzu'ë didza' Jesús ca naca queëba' bö'cu' zxila' gunítiba'
(Mt. 18:10-14)

1 Bulu'dubë' yúgu'të bönni' tu'quíxjë' lázagaca bönachi, en yugu' bönni' cá'asö ga zoë' Jesús para ulu'zë náguië' Lé'.

2 Que lê ni na' yugu' bönni' yudo' fariseo, en yugu' bönni' yudo' usedi gula'nnë' queë' Jesús, ta'nnë':

—Bönni' ni runë' bal yugu' bönni' dul-la', en rágulenë' légaquië'.

3 Ní'irö bucúdzu'ë didza' Jesús, rë' légaquië':

4—Channö zoë' tu bönni' ladaj libí'ili', nacua'aba' queë' tu gayua'aba' bö'cu' zxila', en channö nítiba' tuba', çnaru' cabí uca'anë' ia'zica'röba' tápalalaj yu' chënnaba' na' ga naca lu lataj cá'asö, ate' tsejë' tsöjdiljë'-ba' bö'cu' zxila' na' nanítiba', cate' udzölrönë'-ba'?

5 Cate' udzölinë'-ba', lu yöl-la' rudzeja queë' ixöë'-ba' ya' zxicjë',

6 en cate' udxinë' lidxë' utubë' yugu' böchi' luzë'ë, en yugu' dzaga yu'u queë', ate' guië' légaquië': "Buli'dzéjalen neda', tu' chibudzöllda'-ba' bö'cu' zxila' quia' gunítiba'."

7 Rea' libí'ili': Lësca' caní gácaterö yöl-la' rudzeja yehua' yubá ni'a queë' tuë' bönni' dul-la' ubí'i ládxë'ë ca gaca queégaquië' tápalalaj yu' chënnë' bönni' tsahui', bönni' téquinë' bití' naquiniguequinë' ulu'bí'i ládxí'gaquië'.

Rucúdzu'ë didza' Jesús que tu dumí guniti

8 Rnnë' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', çnaru' cabí uquéla'nu guí, ate' ulúanu yu'u, uguilaj yúdxinu le cate' udzölrönu le?

9 Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guiënu légacanu: "Buli'dzéjalen neda', tu' chibudzöllda' dumí plata na' guniti."

10 Rea' libí'ili': Lësca' caní, ulu'dzéjade'erönë' gubáz lá'ayi queë' Dios ni'a queë' tuë' bönni' dul-la' ubí'i ládxë'ë.

Rucúdzu'ë didza' Jesús queëbi' tu bi'i gunítibi'

11 Rnnë' ca' Jesús:

—Zoë' tu bönni' nacua'abi' chópabi' bi'i bönni' queë'.

12 Bi'i cuidi' na' rëbi'-në' xúzibi': "Dad, benna quia' le dë quiu' le ral-la' guequi quia'." Ní'irö xúzibi' na' gudísië' queéacabi' le dë queë'.

13 Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzo zi'tu', ate' ni' butöbi' dërö le dë queëbi'. Le rua' dö' benbi'.

14 Cate' chibutöbi' dërö le dë queëbi', guca gubín lu yödzo ga na' zóabi', ate' biyadzaj queëbi'.

15 Ní'irö guyéajbi' yöjsóabi' huen dxin queë' tu bönni' lu yödzo ni', ate' bönni' na' gusöl-lë'-bi' ga dë xiyüë' tsöjgágubi'-ba' yugu' cuchi queë'.

16 Guca ládxí'bi' gágubi' guixí' cá'asö na' táguba' cuchi, pero cuntu nu bi bë' le gágubi'.

17 Ní'irö bubí'i ládxí'bi', rnnabi': "Cate' xö bönni' huen dxin nacu'ë lidxë' xuzá', en dëda' le tahuë', pero neda' ni huátí caza' yöl-la' ridún.

18 Uzá'a ni, huöja' ga zoë' xuzá', en tsöjödxa'-në': Dad, bena' dul-la' lahuë' Dios, zoë' yehua' yubá, en lo' li'.

19 Bítirō naca' neda' lesaca' gaca' zxi'inu'. Ben neda' ca bönni' huen dxin quiu'."

20 Ní'irō guyú'ubi' nōza, söhuðajbi' ga zoë' xúzibi'.

'Cate' ni' zóabi' zítu' suzá'abi', bilé'ené'-bi' xúzibi', en buéchi' ládxë'ë-bi'. Carelō yōjxí'galé'-bi' xúzibi', en yōjnidé' yenbi', gudahué'-bi' zxixi.

21 Ní'irō zxi'iné' na' rēbi'-nē': "Dad, bena' dul-la' lahuë' Dios, zoë' yehua' yubá, en lo' li'. Bítirō naca' neda' lesaca' gaca' zxi'inu'."

22 Ní'irō xúzibi' rē' yugu' bönni' huen dxin queë', rnnē': "Guli'tsöjléajtē lari' nazaca'tērō, en guli'gacu-bi'. Guli'cú'u le nazaca' xibón ná'abi', en buli'dá' huarache ní'abi'.

23 Guli'tsöjxí'i-ba' bēdxi renni', ate' guli'guti-ba'. Gáguru'-ba', en gunru' laní,

24 tu' guca bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a." Ní'irō gula'si lógaquië' tu'dzéjanë'.

25 'Tsanni ni' raca lē ni, zóabi' bi'i bönni' zí'alō queë' bönni' na' la' guixi'. Cate' suzá'abi' rudxinbi' gala' ra' yu'u, riyōnibi' raca huila, en raca huō'a lu yu'u na'.

26 Ní'irō bulídzabi'-nē' tuë' bönni' huen dxin zoë' ni', en gunábibi' lē' bizxi na' raca.

27 Bönni' huen dxin na' rē'ë-bi': "Bi'i bōchu'u na' budxinbi', ate' gunná' bē'ë xuzu' gulútië'-ba' bēdxi renni', tu' budxinbi' lu nē'ë dxi'a tsáhuí'do'."

28 Ní'irō gulébi' bi'i zí'alō na', en bití' gú'unibi' tsú'ubi' yu'u. Ní'irō birúajé' xúzibi', en gúta'yué' lobi' tsú'ubi'.

29 Bubí'ibi' didza' bi'i zí'alō na', rēbi'-nē' xúzibi': "Nöz quézinu' cate' xō iz bena' dxin lo', en catu caz gudá'bagá'a lí', pero catu caz bennu' quia' tuba' bō'cu' xzila'do' para gú'ílena' xibé yugu' luzá'a.

30 Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bēdxi renni' ni'a queëbi'."

31 Ní'irō xúzibi' rē'ë-bi', rnnē': "Zxi'ina', li' zóalen casu' neda' ate' yúgu'tē le dē quia', quiu' nequi.

32 Ben bayudxi gunru' laní, en udzéjaru', tu' gúcabi' bi'i bōchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

16

Rucúdu'ë didza' Jesús queë' bönni' huen dxin bití' náquië' tsahui'

1 Jesús rē' ca' yugu' bönni' dá'gaquië' Lē', rnnē':

—Zoë' tu bönni' dē yōl-la' tsahui' queë', en zoë' ca' queë' tuë' bönni' huen dxin dē lu nē'ë uláz queë'. Bila'dxinë' yugu' bönni' tu'zéguië' bönni' huen dxin na' lahuë' xané', ta'nnē' queë' rutösë' le dē queë' xané' na'.

2 Ní'irō xan yu'u na' bulidzë' bönni' huen dxin na', en rē' lē': "¿Bizxi didza' ni riyōnda' quiu'? Buluí'i neda' le naca' bē' dxin nunu', tu' cabirō gata' lu no'o uláz quia'."

3 Ní'irō guzá' ládxë'ë bönni' huen dxin na', rnnē': ¿Nacxi guntsa'? Rubéajé' xana' neda' lataj lo ga runa' dxin. Bití' séqui'da' guna' dxin gú'una, en utuí'ida' inaba' nu bi' gúnnasō quia'.

4 Na'a nōzda' naca guna' para cate' ubéajë' neda' lataj lo ni, ila'cuá' nupa ulu'z'í neda' lídxiguequi.

5 Ní'irō bönni' huen dxin na' bulidzë' yugu' bönni' bi' tál-lē'ë queë' xané', ate' rē' bönni' zí'alō: "¿Gáca'xi ral-lu'u queë' xana'?"

⁶ Lë' rnnë': "Tu gayuá' rō'ō chugu le za ral-la'a." Bōnni' huen dxin lo na' rē' lē', rnnë': "Ni dē guichi ga nazúaj le ral-lu'u. Gurō'ōtē ni, en buzúaj ia'tú lu guichi le inná chi-un rō'ō chugu ral-lu'u."

⁷ Gudōdi ni' gunábinē' ia'túē', rnnë': "Nazzi li', ¿gáca'xi ral-lu'u?" Lë' rnnë': "Tu gayuá' da'a xzoa' xtila." Ní'irō bōnni' huen dxin lo na' rē' lē', rnnë': "Ni dē guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u."

⁸ Réquibe'enē' xanē' na' sína'tē benē' bōnni' huen dxin biti' náquiē' tsahui' na'. Caní naca, nácacarē' sina' bōnni' yōdzōlió ni lu le tunē' la' légcasē', ca nácacaca bōnachi ta'dalen Dios lu bení' queē'.

⁹ Neda' rea' libí'ili': Guli'cōzalen bōnachi dxi'a, ugunli' dxin yōl-la' tsahui' dē queēli' yōdzōlió ni, para cate' idxín dza ucá'anali' yugu' lē ni, ilunē' libí'ili' bal'ataj ni' zóatica'sō.

¹⁰ Nu rugún dxi'a dxin tu le cuídí'sō dē lu nē'e, lē'sca' ugún dxi'a dxin tu le zxōn gata' lu nē'e. Nu biti' rugún dxi'a dxin tu le cuídí'sō dē lu nē'e, biti' ugún dxi'a dxin tu le zxōn gata' lu nē'e.

¹¹ Que lē ni na', channō cabí rugunli' dxi'a dxin yōl-la' tsahui' dē queēli' yōdzōlió ni, ¿nuzxi' caz udōdi lu ná'ali' yōl-la' tsahui' le naca idú?

¹² Channō cabí rugunli' dxi'a dxin le dē lu ná'ali' le nequi que nu yúbōlō, ¿nuzxi' caz udōdi lu ná'ali' le ral-la' guequi que quézili'?

¹³ 'Biti' gaca nitúē' bōnni' huen dxin gunē' xichíngaca chopa xanē', tu' udí'inē' tuē', en idxí'inē' ia'túē', o gunē' bal tuē', en uzōē' tsólá'alō ia'túē' na'. Biti' gaca gunli' xichinē' Dios, en gunli' ca' dxin para uzí'ili' xibé yōl-la' tsahui' que yōdzōlió.

¹⁴ Bila'yōnnē' bōnni' yudo' fariseo didza' ni, ate' tu' nadxí'iguequinē' yōl-la' tsahui' quégaquiē', que lē ni na' bulu'titjē' Jesús.

¹⁵ Ní'irō Jesús rē' légaquiē':

—Libí'ili' rubéaj dxi'a cuinli' lógaca bōnachi, pero nōzinē' Dios le yu'u icja lādxi'do'olí', tu' naca lē na' tun zxōn bōnachi tu le ruzōē' Dios tsólá'alō.

Xibá queē' Moisés, en le rinná bē'ē Dios

¹⁶ Gunnē' ca' Jesús:

—Ga bidxintē dza zoē' Juan, ben dxin le rinná bē' xibá queē' Moisés, en le bulu'zúajē' lu guichi yugu' bōnni' gulu'ē didza' uláz queē' Dios. Ní'irō cate' bidxinē' Juan na', gusí lo raca libán ca gaca nu tsaza ga rinná bē'ē Dios, ate' tun bayudxi yúgu'tē bōnachi ila'yaza ni'.

¹⁷ 'Sal-la' raca caní, gácarō ila'dōdi que lúzxiba, en que luyú ni ca initi tu dídza'sō nazúaj lu guichi lu xibá queē' Dios.

Le rulá'yōl-la' nutsaga na'

(Mt. 19:1-12; Mr. 10:1-12)

¹⁸ Gunnē' ca' Jesús:

—Channō tu bōnni' ulá'alenē' nigula queē', ate' utsaga ná'alenē'-nu nigula yúbōlō, gunē' dul-la' le riguitsaj xibá que yōl-la' nutsaga na', ate' nu utsaga ná'alenē' nigula na' nusanē'-nu bōnni' queēnu, gun ca' dul-la' le riguitsaj xibá que yōl-la' nutsaga na'.

Bōnni' dē yōl-la' tsahui' queē', en Lázaro

¹⁹ Ní'irō bucúdzu'ē didza' Jesús, rnnë':

—Zoē' tu bōnni' rilé'enē' yōl-la' tsahui' queē'. Rácuē' lari' xiná, en lari' nazáca'da', ate' yugu' dza rúntica'sē' laní, ate' tē'aj tahuē' le banéquiní.

²⁰ Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queë', ate' huë'tézë' rō'ë ra' yu'u queë' bönni' na' rilé'enë' yöl-la' tsahui'.

²¹ Raca lãdxë'ë bönni' yéchi'do' na' gahuë' le bizxaj tu'huõxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lë'ëba' lu huë' queë' bönni' yéchi'do' na'.

²² Bidxin dza gütie' bönni' yéchi'do' na', ate' gubáz lá'ayi queë' Dios gula'chë'ë lë' tsójóalenë' Abraham ga naca lataj lachi queë' Dios. Gütie' ca' bönni' na' bilé'enë' yöl-la' tsahui', ate' bulu'cáché'ë lë' yeru ba.

²³ Cate' ni' riguí' rizáque'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zitu', en dzáguië' Lázaro na' lë'.

²⁴ Ní'irō bē'ë zidzaj didza', rnnë': "Xuza', Abraham, buéchi' ladxi' neda'. Gusól-la' Lázaro quia' para usubisë' xibõn nē'ë, en udusuhoálë' lúdxá'a, tu' riguí' rizáca'a lu guí' ni'."

²⁵ Abraham rē' lē', rnnë': "Zxí'ina', busá' lãdxu'u ca guca quiu', buzi'u xibë' yöl-la' tsahui' tsanni ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxonë' Lázaro ni, pero lí' riguí' rizácu'u."

²⁶ Ia'stú, tu ra' guí'a sibi rō', le zoa gatsaj lãhuí'lō ga ni' zóali' libí'ili', en ga ni zóatu' netu'. Que lë' ni na' nupa nacua' ni, en ilë'ëni ila'dōdi ga zóali' libí'ili', bití' ca' gaca ilunë' quia', en bití' gaca ilida ni nupa nacua' ni'."

²⁷ Ní'irō bönni' na' bilé'enë' yöl-la' tsahui' rē' lē', rnnë': "Xuza' Abraham, ráta'yua' lo' isól-lu'u-në' Lázaro tsejē' lidxë' xuza',

²⁸ tu' nacu'ë gáyu'ë bönni' böcha'a ni'. Gusól-lë'ë tsōjenë' liná' lo que le raca ni, para cabí guidigaquië' ca' lataj ga ni riguí' rizáca'a."

²⁹ Ní'irō Abraham rē' lē', rnnë': "Dë quégaquië' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégaquië' na' ral-la' ulu'zë náguië'."

³⁰ Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, bití' gaca caní, pero channō ubanë' tu bönni' lu yöl-la' guti, en tsejē' ga na' nacu'ë, ulu'bí'i lãdxí'gaquië'."

³¹ Abraham rē' lē', rnnë': "Channō cabí tu'zë náguië' didza' bē'ë Moisés, en le gula'nnë' bönni' gulu'ë didza' uláz queë' Dios, bití' ila'yéajlë'ë sal-la' nu ubán lu yöl-la' guti."

17

Run bõnadxi queëru' gunru' ga nu gun dul-la'
(Mt. 18:6-7, 21-22; Mr. 9:42)

¹ Jesús rē' yugu' bönni' dá'gaquië' Lë', rnnë':

—Nacuá'tica'sō le tun ga ilún bõnachi dul-la', pero bica' bayechi' bönni' na' runë' ga nu gun dul-la'.

² Dxí'arō gaca queë' bönni' na' runë' caní, nu ugal-la' tu guiõj riyëtu yaga yenë', en tsójchú'una lë' lu nísado', cáte'lō gunë' ga gun dul-la' nu bi'í néquibi' quia'.

³ Guli'gún chí'i cuinlí'. Channō böchi' luzó'o gu'ë dö' quiu', buzéajni'i-në', en channō ubí'i lãdxë'ë, buniti lo lë'.

⁴ Sal-la' gadxi luzuí tu dza gu'ë dö' quiu', en gadxi luzuí ca' guidë' ga zu', en guië' lí': "Rubí'i lãdxá'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'irō yugu' bōnni' gubáz queë' Xanru' tē' Lē', ta'nnē':

—Ben ga tséajlē'ērōtu'-nē' Dios.

⁶ Xanru' rē' légaquiē', rnnē':

—La'tu' naca cuidi' sō yōl-la' réajlē' queēli' Dios, nácasō ca tu xisedo' mostaza, huáca guiēli' yaga zxōn ni: “Gucuíta ni, en yōjsóa lu nísado”, ate' gun yaga na' ca rnnali'.

Le ral-la' gun nu naca huen dxin

⁷ Gunnē' ca' Jesús:

—Channō zoē' tuē' bōnni' ladaj libí'ili', en zoē' queē' tuē' bōnni' nadó'o rugá'anē'-ba' bēdxi o rulapē', cate' údxi gunē' xichinē' xanē', ¿naru' huētsē' xanē' lē', innē': “Gudá, gurō'ō gagu”?

⁸ ¡Calēga! Caní guiē' lē': “Bupá'a le gahua'. Guzóa sina' cu'u le gu'aj gahua', ate' tōdirō na' huáca gu'aj gagu' li'.”

⁹ ¿Naru' huētsē' bōnni' nadó'o queē' na': “Xclenu”, tu' benē' ca gunná bé'enē' lē'? Runi neda', bití' gunē' caní.

¹⁰ Lē'sca' caní gaca queēli'. Cate' chinunli' yúgu'tē le gunná bé'enē' Dios libí'ili', ral-la' innali': “Nácatu' huen dxin cabi nácatu' lesaca', tu' bénsōtu' le run bayudxi guntu'.”

Chiē' bōnni' té'enē' huē' nudzu' ruzōdi

¹¹ Tsanni ni' yu'ē Jesús nōza, sa'yéajē' Jerusalén, ridōdē' gapa dē yōdzōdo' nabábagaca luyú Samaria, en luyú Galilea.

¹² Cate' guyaziē' tu yōdzōdo', bila' ruájē' dutságagaquiē' Lē' chiē' bōnni' té'enē' huē' nudzu' ruzōdi, ate' gula'cu'ē zí'tu'sō,

¹³ en tu'ē zidzaj didza', ta'nnē':

—¡Jesús, Bōnni' Usedi! ¡Buéchi' ladxi' netu'!

¹⁴ Cate' bilé'enē' Jesús légaquiē', rē' légaquiē':

—Guli'tséaj, guli'tsōjlu'i' cuinli' lógaca bixúz.

Tsanni ni' sōjáquiē', bulu'huóáquiē' dxi'a.

¹⁵ Ní'irō tuē' bōnni' nūtsē'ē ládjagaquiē', cate' réquibe'enē' chinuhuóáquiē' dxi'a, bōajē' ga na' zoē' Jesús, ru'ítica'sē' zidzaj didza', rigu'ē Dios yōl-la' ba.

¹⁶ Biyéchuē', en busudxín lahuē' lu yu lahuē' Jesús, en rē' Lē': “¡Xclenu'!”

Bōnni' ni nababē' Samaria.

¹⁷ Ní'irō Jesús rē' lē':

—¿Naru' cabi bulu'huóáquiē' dxi'a chiē' bōnni'? ¿Gazxi nacua'tsē' ia'zica'rē' bōnni' na'?

¹⁸ ¿Naru' cabi zoa nu huōda cu'u Dios yōl-la' ba, pero tuzē' bōnni' zi'tu' ni?

¹⁹ Ní'irō Jesús gudxē' bōnni' na', rnnē':

—¡Guyasa, en bōaj lidxu'! ¡Chibōácu' dxi'a tu' réajlē'u neda'!

Ca idxín le rinná bē'ē Dios

(Mt. 24:23-28, 36-41)

²⁰ Cate' yugu' bōnni' yudo' fariseo ta'nábinē' Jesús bátaxi ral-la' idxín le rinná bē'ē Dios, Lē' bubí'ē didza', rē' légaquiē':

—Ca idxín le rinná bē'ē Dios, bití' naca le ilé'eli'.

²¹ Cuntu nu gaca inná: “¡Ni' bidxín!”, o inná: “¡Ni' bidxín!” ¡Buli'yútsōca'! ¡Rinná bē'ē Dios lu icja ládxi'do'gaca bōnachi!

²² Ní'irō Jesús gudxē' yugu' bōnni' usēda queē', rnnē':

—Huadxín dza cate' guē'ēnili' ilé'eli' dza huōda neda', Bōnni' Guljē' Bōnachi, pero bití' ilé'eli' le.

²³ Ila'cuá' nupa ilé libí'ili': "¡Ni zoé'!", o ila'nná: "¡Ni' zoé'!" Biti' tséajli' ni', en biti' tséajlenli' légaquié'.

²⁴ Ca raca cate' rēpi yōsa, ruzení' idá'alō lúzxiba, lēscá' caní gaca cate' idxín dza huōda' neda', Bōnni' Guljē' Bōnachi.

²⁵ Zí'alō ca gaca lé ni, run bayudxi quí'i sáca'da', ate' bōnachi dza ni zóaru' na'a ulu'cá'ana neda' cá'asō.

²⁶ Ca na' guca dza ni' zoé' Noé, lēscá' caní gaca cate' idxín dza huōda' neda', Bōnni' Guljē' Bōnachi.

²⁷ Dza ni'te na' gulē'aj gulahué'. Bulu'tsaga ná'agaquié', en bulu'dōdē' zxi'inigaquié' lu yōl-la' rutsaga na' ga bidxintē dza guyázié' Noé lē'e barco zōn na' nazí'i le arca, ate' bidxintē nisa guiōj usuniti yōdzōlió le busuniti yúgu'tē'.

²⁸ Lēscá' caní guca dza ni' zoé' Lot. Gulē'aj gulahué'. Gulá'ué', en gulúti'ē. Gulazē' xiyúgaquié', en gulunē' yugu' yu'u quégaquié'.

²⁹ Cate' bidxín dza na' burúajē' Lot lu yōdzō Sodoma, bōxaj guí' ca tu nisa guiōj, enca' le ruzéguida' nazí'i le azufre, ate' bulu'suniti yúgu'tē'.

³⁰ Lēscá' caní gaca cate' idxín dza ulu'í lahua' neda', Bōnni' Guljē' Bōnachi.

³¹ 'Cate' idxín dza na', channō zoé' tu bōnni' ícjo'olō, en dzō'ō le dē queé' lu yu'u na', bití' ral-la' huōtjē' tsōjzxi'ē le dē queé', ate' nu zoa la' guixi', lēscá' caní, bití' ral-la' huōjē' lidxē'.

³² Guli'sá' lādxi'li' ca guca queēnu nigula queé' Lot.

³³ Nu bōnni' rē'ēnē' gun chí'ē yōl-la' na'bán queé', unítiē' le, pero bōnni' udōdē' yōl-la' na'bán queé' ni'a quia', udélé'ē le.

³⁴ 'Rea' libí'ili': Cate' idxín rēla na', ila'cu'ē chopē' bōnni' tsōzxōn ga tasiē', ate' tuē' uduzxi'a-nē', en ia'tuē' ucá'ana' lē'.

³⁵ Ila'cuá'anu huētu tsōzxōn chópanu nigula, ate' tunu uduzxi'a-nu, en ia'tunu ucá'ana'-nu.

³⁶ Ila'cu'ē chopē' bōnni' la' guixi', ate' tuē' uduzxi'a-nē', en ia'tuē' ucá'ana' lē'.

³⁷ Cate' bila'yōnnē' lē ni bōnni' usēda queé' Jesús, gula'nábinē' Lē', ta'nnē':

—Xan, ¿gazxi gaca lé ni?

Jesús rē' légaquié':

—Ga dē tu le nati, ni' ulu'dubi quéziba' bíchulab.

18

Tu nigula uzēbi, en bōnni' ruchi'a rusōrōē'

¹ Ní'irō bucúdzu'ē didza' Jesús, rē' légaquié' ca run bayudxi ulídzatica'siru'nē' Dios, en bití' gaca chopá lādxi'ru'.

² Rnnē':

—Zoé' tu bōnni' ruchi'a rusōrōē' tu yōdzō, bōnni' bití' rádxi'nē' Dios, en bití' runē' nu bōnni' bal.

³ La' yōdzō ná'asō zóanu tu nigula uzēbi, ate' bidxinnu nigula ni ga zoé' bōnni' ruchi'a rusōrōē' na', rnnanu: "Buchí'a busōrō le run quia' nu ruá' dō' quia'."

⁴ Xidzé bití' gú'unnē' bi gunē' queēnu, pero gudōdi ni' guzá' lādxi'ē, rnnē': "Bití' rádxi'da'-nē' Dios, en bití' runa' nu bōnni' bal,

⁵ pero tu' rupí'zjanu nigula uzēbi ni neda', que lē ni na' uchi'a usōrōa'-nu, para cabí guídati'ca'sinu ni, en para cabí tōdi bē' upí'zjanu neda'."

⁶ Ní'irō Xanru' rē' légaquié', rnnē':

—Guli'zë nágali' ca na' gunné' bönni' ruchi'a rusöröë' na', bönni' biti' náquië' tsahui'.

⁷ ¿Naru' cabí uchi'a usöröë' Dios bönachi gurö cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'?

⁸ Rea' libí'ili': La' uchi'a usörötenë' légaquië'. Cate' huöda' neda', Bönni' Guljé' Bönachi, ¿naru' idzólida' nupa ta'yéajlé' neda' luyú ni?

Tu bönni' yudo' fariseo, en tu bönni' uquízxaj

⁹ Bucúdzu'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zica'rö bönachi.

¹⁰ Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'túë' na' náquië' bönni' ruquíxjé' lázagaca bönachi.

¹¹ Guzuínë' bönni' yudo' fariseo na', en caní bulidzë' Dios, rnnë': "Dios, rea' Li': Xclenu', tu' cabí naca' ca nácagaquië' ia'zica'rë' bönni', nácagaquië' gubán, en biti' nácagaquië' tsahui'. Ta'guitsjé' xibá que yöl-la' nutsaga na'. Lësca' biti' naca' ca bönni' uquízxaj ni.

¹² Neda' runa' gubasa chopa luzuí tu' xunu' dza huéaj, en runödza' que yudo' tu' cö' huéaj tu' chi cö' que yúgu'të le rata' quia'."

¹³ Guzóazë' zì'tu' bönni' uquízxaj na', en biti' böázxjanë' ichisa lahuë' uyúë' lúxhiba, pero gudapë' luchu'ë, rnnë': "Dios, buéchi'laxi' neda', bönni' dul-la'."

¹⁴ Neda' rea' libí'ili': Böajë' lidxë' bönni' uquízxaj na', nuhuöáquië' tsahui' lahuë' Dios, calëga ia'túë' bönni' ni'. Núti'tës bönni' run ba zxön cuinë', gunë' Dios ga huöta' igulé', pero nu bönni' rizóë' nöxaj ladxí', gunë' Dios ga gácarë' lo.

Jesús rulidza tsáhuë'ë-bi' yugu' bí'ido'
(Mt. 19:13-15; Mr. 10:13-16)

¹⁵ Ní'irö bila'dxinë' yugu' bönni', en nigula ga zoë' Jesús, nachë'gaquië'-bi' yugu' bí'ido' quégaquië' para ixóa në'ë Jesús légacabi'. Cate' bila'lé'enë' yugu' bönni' usëda queë' Jesús lë ni, gula'dil-lë' légaquië'.

¹⁶ Ní'irö Jesús bulidzë' yugu' bönni' dá'gaquië' Lë', rnnë':

—Guli'gü'i-bi' lataj ila'dxinbi' bí'ido' ni ga zoa'. Biti' uzága'li' xinözagacabi', tu' gata' quégaca nupa nácagaca ca bi'i caní lataj ga rinná bë'ë Dios.

¹⁷ Le nácaté' rea' libí'ili': Nu cabí si' lu në'e le rinná bë'ë Dios, ca runbi' tubi' bí'ido', biti' ca' tsaza ga ni' rinná bë'ë Lë'.

Tu bönni' rilé'enë' yöl-la' tsahui'
(Mt. 19:16-30; Mr. 10:17-31)

¹⁸ Tu bönni' unná bë' gunábinë' Jesús, rnnë':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

¹⁹ Jesús rë' lë':

—¿Bizx que rë'u neda': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a.

²⁰ Nöz quézinu' yugu' le gunná bë'ë Dios:

Biti' gunu' dul-la' le riguitsaj xibá que yöl-la' nutsaga na'.

Biti' gútigacu' bönachi.

Biti' cuanu'.

Biti' innió' que luzó'o le cabí nácaté'.

Ben bal xuz xinó'o.

²¹ Bönni' na' rë' Jesús, rnnë':

—Yúgu'tè lè ni runa' ga gudela' naca' bí'ido'.

²² Cate' biyönnè Jesús didza' ni, rë' lè':

—Ia'tú le riyadzaj quiu' gunu'. Bèti' yúgu'tè le dè quiu', ate' lè na' si'u bunödzej quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

²³ Cate' bönni' na' biyönnè' didza' ni, ruhuí'innè', tu' dèda' yöl-la' tsahui' queè'.

²⁴ Cate' bilé'enè' Jesús ca na' ruhuí'innè' bönni' na', rnnè':

—¡Bica' böniga gaca, ila'yaza nupa ta'lé'e yöl-la' tsahui' ga rinná bē'è Dios!

²⁵ Gácarö tódiba' bóa' nagui yötsi', ca tsáziè' tu bönni' rilé'enè' yöl-la' tsahui' ga rinná bē'è Dios.

²⁶ Ní'irö nupa bila'yöni didza' ni gula'nná:

—¿Nuzxi caz gaca ulá, channö?

²⁷ Jesús gudxè' légaquiè':

—Le biti' gaca ilunè' bönni', huáca gunè' Dios.

²⁸ Ní'irö Pedro rë' Jesús:

—Buyútsöca', netu' nucá'anatu' yúgu'tè le dè queétu', en dá'atu' Li'.

²⁹ Ní'irö Jesús rë' légaquiè':

—Le nácatè rea' libí'ili', nu bönni' ucá'anè' lidxè', o xuz xin'é, o yugu' böchi' zaná, o nigula queè', o yugu' xzí'inè', tu' ruí'i ládxè'è inná bē'è Dios,

³⁰ bönni' ni huazí'irè' dza ni zóaru' na'a, ate' dza si' za' idéli'nè' yöl-la' na'bán idú.

Jesús rigúxjö'è leyúbölö ca si' ilútiè' Lè'

(Mt. 20:17-19; Mr. 10:32-34)

³¹ Jesús guchè'è quez queè' idxínnutè' bönni' usèda queè', en rë' légaquiè':

—Buli'yútsöca', ribenru' zéajru' Jerusalén, ga ni' ilaca yúgu'tè le nazúajgaca lu guichi ca gula'nnè' bönni' gulu'è didza' uláz queè' Dios ca ral-la' gaca quia' neda', Bönni' Guljè' Bönachi.

³² Yugu' bönni' Jerusalén ulu'dödè' neda' lu ná'agaquiè' bönni' zi'tu', ate' ulu'titjè' neda', en ulu'lidza zi'è neda', en ulu'chejè' neda' zxöna'.

³³ Ila'guiné' neda', ate' tódirö ni' ilútiè' neda', pero cate' gaca tsonna dza ubana'.

³⁴ Biti' gula'yéajni'inè' bönni' usèda queè' didza' ni, en biti' guléquibe'enè' ca sa'yéaj le ruí'ilenè' légaquiè' didza' que, tu' naca le cabí sequi' ila'yéajni'inè'.

Jesús ruínè' tu bönni' yödzö Jericó nachul-la lahuè'

(Mt. 20:29-34; Mr. 10:46-52)

³⁵ Cate' chizóa idxiné' Jesús yödzö Jericó, zoè' tu bönni' ni' nachul-la lahuè'. Rö'è ra' nóza rinabè' nu bi' gúnnasó queè'.

³⁶ Bönni' ni' biyönnè' ta'dödi bönachi zían ni', ate' gunabè' bizxi na' raca.

³⁷ Bönachi ni' tē lè':

—Jesús, bönni' Nazaret, ridödè' ni.

³⁸ Ní'irö bönni' na' nachul-la lahuè' bē'è zidzaj didza', rnnè':

—¡Jesús, xzí'ini xi'sóè' David, buéchi' ladxi' neda'!

³⁹ Yugu' bönni' nanórugaquiè' lahuè' Jesús gula'dil-lè' bönni' na' nachul-la lahuè' para usayaj ru'è, pero lè' zídzajrö bē'è didza', rnnè':

—¡Xzí'ini xi'sóè' David, buéchi' ladxi' neda'!

⁴⁰ Ní'irö guzè' dxiz Jesús ribözè', ate' gunná bé'enè' nu tsöjlidza lè' para idxiné' lahuè'. Cate' bönni' na' nachul-la lahuè' bidxinè' lahuè' Jesús, gunábinè' Jesús lè', rnnè':

41 —¿Bizxi rē'ēnu' guna' quiu'?
 Bōnni' na' nachul-la lahuē' rnnē':
 —Rē'ēnida' huōálaj guiōj lahua'.

42 Jesús rē' lē':
 —Chibōálaj guiōj lo'. Chibōácu' tu' réajlē'u neda'.

43 La' ní'sō bul'étenē', ate' sa'yéajlenē' Jesús, rigu'è Dios yōl-la' ba. Lēscá' yúgu'tē bōnachi nacua' ni', en bila'lé'e lē na' guca gula'gú'u Dios yōl-la' ba.

19

Jesús, en Zaqueo

1 Ní'irō guyáziē' Jesús yōdzō Jericó, en ridōdē' lu yōdzō na'.

2 Zoē' tu bōnni' lē' Zaqueo ni', bōnni' lo ládjagaquiē' bōnni' uquízxaj, ate' dē yōl-la' tsahui' queē'.

3 Ruí'i ládixē'ē bōnni' ni ilé'enē' Jesús, pero biti' guca queē' tu' nacua' bōnachi zían ni', en náquiē' bōnni' ga rē'edo'.

4 Ní'irō carelō yōjnōruē' lógaca bōnachi zían na', ate' yōjchenē' tu lu yaga para gaca ilé'enē' Jesús, tu' ral-la' tōdē' ni'.

5 Cate' bidxinē' Jesús ni', guchisa lahuē' ruyúē' ga na' dxíē' Zaqueo na', en rē' lē':

—Zaqueo, bōtjatē lu yaga na', tu' run bayudxi tsōjgá'ana' lidxu' na'a.

6 Ní'irō la' bōtjatē' Zaqueo lu yaga, ate' lu yōl-la' rudzeja queē' guchē'ē Jesús lidxē'.

7 Cate' bila'lé'e bōnachi nacua' ni' lē ni, gula'sí lógaquiē' yúgu'tē ta'nnē' queē', ta'nnē':

—Guyáziē' Jesús ugá'analenē' bōnni' dul-la'.

8 Ní'irō guzuinē' Zaqueo, en rē' Xanru':

—Xan, buyútsōca'. Gatsaj le dē quia' gu'a quégaca bōnachi yechi', en channō bi gudōdi bē' buquízxja' bōnachi, ubi'a quégaca bōnachi na' tapa cō'tēlō ca'.

9 Jesús rē' lē':

—Na'a dza ni bidxín yōl-la' rusólá quégaca nupa nacua' yu'u ni, tu' nababē' bōnni' ni di'a dza queē' Abraham.

10 Bida' neda', Bōnni' Guljē' Bōnachi, ududilja', en udusólá' nupa nanítigaca.

Rucúdzu'ē didza' Jesús que chi cō' dumí

11 Tsanni ni' ta'yōnnē' didza' ni ru'ē Jesús, rē' légaquiē' le rucúdzu'ē didza', tu' chizóa ila'dxinē' yōdzō Jerusalén, ate' téquinē' chizóatē ilá' lahui le rinná bē'ē Dios.

12 Cani rnnē' Jesús:

—Zoē' tu bōnni' lo, sa'yéajē' tu yōdzō zī'tu' para si' lu nē'ē yōl-la' unná bē', ate' ní'irō huōdē'.

13 Cate' chizóa tsejē' ni' bulidzē' chiē' bōnni' huen dxin queē', en bē'ē que queēgaquiē' tu cō' huéaj dumí, ate' rē' légaquiē': "Gulí'guílajlen dumí ni tsanni huōda'."

14 Yugu' bōnni' uládz queē' biti' ta'lé'enē' lē' dxi'a, ate' gula'sól-lē'ē yugu' gubáz quégaquiē' ga ni' tsejē', ila'nnē': "Biti' rē'ēnitu' inná bē'enē' bōnni' ni netu'."

15 Ní'irō guzxi' lu nē'ē yōl-la' unná bē', ate' budxinē' ladzē'. Cate' bidxinē' ni' gunná bē'enē' nu tsōjlidza yugu' bōnni' huen dxin na' budōdē' lu ná'agaquiē' dumí na', para inōzinē' gáca'xi bulu'guílajlenē' le tu tuē'.

16 Cate' bōnni' zí'alō na' bidxinē' lahuē', rnnē': "Xan, tu cō' dumí quiu' na' chibén icja ia'chí cō' ca'."

17 Xanë' na' rë' lë': "Tshui' benu'. Nacu' huen dxin tshui'. Tu' dxí'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzo'."

18 Ní'irö bidxinë' ia'túë' bönni' huen dxin na' lahuë' lë', rnnë': "Xan, tu cö dumí quiu' na' chibén icja ia'gayu' cö' ca'."

19 Xanë' na' rë' ca' lë': "Inná bé'enu' gayu' yödzo'."

20 Ní'irö bidxinë' ia'túë' lahuë' lë', rnnë': "Xan, ni dë tu cö' dumí quiu' na'. Ben chi'a le, butúlida' le lari'."

21 Caní'bena' tu' rádxida' lí', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'."

22 Ní'irö xanë' na' rë' lë': "Nacu' huen dxin biti' naca tshui'. Ní'a que didza' bë'u uchi'a usörö'a lí'. ¿Réquibe'enu' naca' bönni' bizxaj: Ruzi'a le cabí buzó'a, en rulapa' ga biti' guza'?"

23 Na'a, ¿bizx que biti' yöjlú'u dumí quia' na' ga gun icja, para cate' huöda', uzi'a le idú len icja na'?"

24 Ní'irö rë' nupa nacua' ni': "Guli'cúa lu në'e dumí na', ate' guli'güf'i queë' bönni' na' dë queë' chi cö' dumí."

25 Légaquië' të' lë': "Xan, chidë queë' chi cö' dumí."

26 Ní'irö bubí'ë didza' xángaquië', rnnë': "Rea' libí'ili': Nu rugún dxi'a dxin le do' dë lu në'e, ulu'zxöni ládxi'gaca lë' ia'late', pero nu biti' rugún dxi'a dxin le do' dë lu në'e, ulu'béaj lu në'e lë na' guta' lu në'e."

27 Ca naca quégaquië' bönni' ni' biti' ta'lé'enë' neda' dxi'a, en biti' gulé'ënnë' inná bé'eda' légaquië', guli'tsöjzxi' légaquië' para ídigaquië' ni, ate' guli'guti légaquië'."

Len yöl-la' ba zxön razië' Jesús yödzo' Jerusalén

(Mt. 21:1-11; Mr. 11:1-11; Jn. 12:12-19)

28 Cate' budxi gunné' caní Jesús, buguelë'ë xinözë', sa'yéajë' zaca' yödzo' Jerusalén.

29 Cate' bila'dxinë' gala' ga nacua' yödzo' Betfagé, en yödzo' Betania, ga naca ra' guí'ado' nazí'i le Gu'a Yaga Olivo, gusól-lë'ë Jesús chopë' bönni' usëda queë',

30 ate' rë' légaquië':

—Guli'tséaj yödzo'do' ni' ca dödilö ga zóaru', en cate' idxinli' ni', tsöjxáca'li'-ba' tuba' búrrodo' nága'ba' ni', búrrodo' na' cuntu nu ribiani lëba'. Guli'sedxi'-ba', en guli'duchë'-ba' quia' ni.

31 Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnë'-ba'."

32 Söjajúë' bönni' usëda queë' na' nasól-lë'ë, ate' yöjxáca'gaquië'-ba' ca na' chigudxë' Jesús légaquië'.

33 Cate' gula'sedxë'-ba' búrrodo' na', yugu' bönni' xanba' të' légaquië':

—¿Bizx que risédxili'-ba' búrrodo' na'?"

34 Bulu'bi'ë didza', ta'nnë':

—Xanru' riquinnë'-ba'.

35 Gula'ché'ë-ba' ga na' zoë' Jesús. Cate' chigula'xóë' yugu' lari' tsólá'a quégaquië' cúdzu'ba' búrrodo' na', bulu'dxië' Jesús cúdzu'ba' lahui lari' na'.

36 Gapa ral-la' tödë' Jesús, gula'chiljë' lari' quégaquië' la' nöza.

37 Cate' chibila'dxinë' gala' ga zoa lidinni que Gu'a Yaga Olivo, lu yöl-la' rudzeja quégaquië' gula'sí lógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'enë' benë' Jesús.

³⁸ Ta'nné:

—¡Yöl-la' ba bönni' unná bē' ni zē'ē uláz queē' Xanru' Dios! ¡Yehua' yubá za' le ribequi dxi ládxi'ru'! ¡Yöl-la' ba Dios!

³⁹ Ní'irō yugu' bönni' yudo' fariseo nútsa'gaquiē' ladaj bönachi zían ni' tē' Jesús, ta'nné:

—¡Bönni' Usedi, gudil-la yugu' bönni' usēda quiu'!

⁴⁰ Bubi'ē didza' Jesús, rē' légaquiē':

—Rea' libí'ili': Channō ila'cuá' dxiē' bönni' ni, yugu' guiōj hualu'í caz zidzaj didza'.

⁴¹ Cate' bidxinē' Jesús gala' ra' yōdzō na', en rilé'enē' le, ní'irō ribōdxē' que, ⁴² rnnē':

—Raca ládxa'a huanōzili' na'a dza le gaca gun ga cuéqui dxi ládxi'li' lahuē' Dios, pero na'a chinagachi' queéli', para cabí ilé'eli' le.

⁴³ Huala'dxín queéli' dza cate' nupa bití' ta'lé'e libí'ili' dxi'a ila'bequi zō'ō idú gásibi'lō ga zóali', en ila'gú'u libí'ili' lé'alō, ate' yúgu'tē lataj idú gásibi'lō ilúnlenē' libí'ili' gudil-la.

⁴⁴ Ulu'quínnajē' zō'ō run chí'i yōdzō queéli', en ilútiē' nupa nacué' lu yōdzō ni. Bití' ugá'ana guiōj lahui luzé'e. Yúgu'tē lē ni gaca queéli' tu' cabí gúquibe'eli' dza bidē' Dios buduyiē' libí'ili'.

Rulatjē' Jesús lō'a yudo'

(Mt. 21:12-17; Mr. 11:15-19; Jn. 2:13-22)

⁴⁵ Ní'irō guyáziē' Jesús lō'a yudo', en gusi lahuē' rubéajē' ní'lō yúgu'tē nupa tutí', en nupa to'o ga naca lō'a yudo'.

⁴⁶ Rē' légaquiē':

—Nazúaj lu guichi lá'ayi, ranna: “Lidxa' naca yu'u ga ulu'lidza bönachi Dios”, pero libí'ili' chinunli' le ca tu lídxi'gaca bönni' gubán.

⁴⁷ Yugu' dza rusédinē' Jesús bönachi ga naca chila yudo', ate' gula'zóa gula'bō'ē bixúz unná bē', len bönni' yudo' tu'sédinē', en yugu' bönni' lo que lu yōdzō ilútiē' Lē'.

⁴⁸ Bití' bulu'dzölinē' nacxi ilútiē' Lē', tu' idú ládxi'gaca tu'zē nágagaca yúgu'tē bönachi xtídzē'ē.

20

Yöl-la' unná bē' dē lu nē'ē Jesús

(Mt. 21:23-27; Mr. 11:27-33)

¹ Tu dza, cate' ni' rusédinē' Jesús bönachi ga naca chila yudo', en riguíxjō'ē didza' dxi'a, bila'dxinē' yugu' bixúz unná bē', en bönni' yudo' tu'sédinē', len bönni' gula tu'zéajni'inē', ga na' zoē',

² ate' tē' Jesús:

—Gudixjō'i' netu'. ¿Bizxi yöl-la' unná bē' dē lu no'o runu' caní? ¿Nuzxi caz budōdi lu no'o yöl-la' unná bē' ní?

³ Bubi'ē didza' Jesús, rē' légaquiē':

—Inávida' ca' libí'ili' tu didza', ate' ubí'ili' innali'.

⁴ ¿Nuzxi gusöl-la' Juan ruquilē' bönachi nisa? ¿Naru' Dios, o bönachi?

⁵ Gulún xtídzá'gaquiē' la' légacase' bönni' yudo' na', ta'nné':

—Channō innaru': Gusöl-lē'ē Dios lē', guié' rē'u: “¿Bizx que bití' guyéajlē'ēli-nē'?”

⁶ Channō guiéru'-nē': Gula'söl-lē'ē yugu' bönni' lē', bönachi lu yōdzō ni ulu'ládxi' rē'u guiōj, tu' nōziguequi bē'ē didza' Juan na' uláz queē' Dios.

7 Ní'irō bulu'bi'ë didza', ta'nnë':

—Biti' nōztu' nuzxi na' gusól-la' Juan.

8 Ní'irō Jesús rë' légaquië':

—Neda' ca' biti' guía' libí'ili' bi yöl-la' unná bë' rúnida' caní.

Yugu' bönni' huen dxin biti' nácagaquië' tsahui'

(Mt. 21:33-44; Mr. 12:1-11)

9 Ní'irō la' gusi lotë' Jesús ru'ilenë' bönachi nacua' ni' didza'. Rucúdu'ë didza', rnnë':

—Zoë' tu bönni' budë'ë yugu' lubá uva lu xiyüë', ate' budödë' luyú na' lu ná'agaquië' bönni' huen dxin para ilún gatsjë' len lë' le ulu'zi'ë, ate' guyjë' zi'tu' ga ni' bugá'anë' xidzé.

10 Cate' bidxín dza ulu'chibë' uva luyú na', gusól-lë'ë tuë' bönni' gubáz queë' ga na' nacu'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'sól-lë'ë lë' cá'asö.

11 Leyúbölö gusól-lë'ë ia'tué' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'sól-lë'ë lë' cá'asö.

12 Leyúbölö gusól-lë'ë quégaquië' bönni' bunni gubáz queë', ate' bulu'dxië' ca' lë' huë', en bulu'béajë' lë' ní'ilö luyú na'.

13 Ní'irō guzá' ládxë'ë xani luyú na', gunné': “¿Nacxi guntsa'? Isól-la'a xzi'ini caza' nadxi'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal.”

14 Ní'irō, cate' yugu' bönni' huen dxin na' bila'lé'enë'-bi', gulún xtídzagaquië' la' légacasë', ta'nnë': “Bi'i ni guequi queë'bi' luyú ni. Gulí'dá, gútiru'-bi', para guequi queëru' le ral-la' guequi queë'bi'.”

15 Bulu'béajë'-bi' ní'ilö luyú na', en gulútië'-bi'.

16 Na'a, ¿nacxi caz gunë' xani luyú na' quégaquië'?

16 Guidé', en guitië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacua' ni' bila'yöni lë ni, gula'nnë':

—¡Inná Dios biti' gaca caní!

17 Ní'irō buyüë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rna:

Guiój na' gula'ru'unë' bönni' huen zö'ö, guiój ni chinaca guiójlen squin zö'ö?

18 Núti'tës nu ibixi lahui guiój ni, quitsaj nu na', ate' nu bönni' tsöjbága' guiój ni lë', uzzuxaj lë'.

Ca naca dumí ta'guizxaj lázagaca bönachi

(Mt. 21:45-46; 22:15-22; Mr. 12:12-17)

19 La' dza ní'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdu'ë didza', pero guládxinë' bi ilún bönachi zían nacua' ni'.

20 Ní'irō bulu'yúyenië' Jesús, en gula'sól-lë'ë yugu' bönni' para ulu'béajë' Lë' didza', bönni' ulu'luí'i cúngaquië' ca bönni' tsahui', para ilunë' ga bi innë' Jesús, para gaca ulu'dödë' Lë' lu në'ë bönni' rinná bé'enë' uláz queë' César.

21 Para ilunë' caní, gula'nábinë' Jesús, ta'nnë':

—Bönni' Usedi, nōztu' rno' le nácatë, en rusédinu' le nácatë, en biti' ruchi'a rusóröu' ca naca le tu'luí'isö lahui bönachi, pero idütë li naca ca rusédinu' xibá queë' Dios.

22 Gudíxjöi' netu'. ¿Naru' run bayudxi quizxaj laztu' queë' César, bönni' Roma rinná bë'ë, o cabí?

23 Réquibe'enë Jesús le té'ennë ilunë' queë', ate' rë' légaquië':

—¿Bizx que rizi' bë'ëli' neda'?

24 Buli'luf'itsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nnë':

—Queë' César na'.

25 Ní'irö Jesús rë' légaquië':

—Buli'nödzej queë' César le nequi queë' César, ate' queë' Dios le nequi queë' Dios.

26 Biti' guca ilunë' ga bi innë' Jesús para gaca ulu'zéguië' Lë' didza' lógaca bönachi zían na', pero bulu'báinë' ca naca didza' bubí'ë, ate' bulu'sayaj ruá'agaquië'.

Ca gaca quégaca nupa ulu'bán lu yöl-la' guti

(Mt. 22:23-33; Mr. 12:18-27)

27 Ní'irö yugu' bönni' yudo' saduceo, nupa na' ta'nná bití' ulu'bán nupa chinátigaca, bila'dxinë' ni', ate' gula'nábinë' Jesús, ta'nnë':

28 —Bönni' Usedi, Moisés buzúajë' queëru' lu guichi, le rnna: “Channö gátië' nu bönni', ate' ugá'anau nigula queë', en channö cuntu nu zoa bi'i queë', ní'irö bi'i böchi'bi' ral-la' sí'ibi'-nu nigula queë' na', para uzóabi' bi'i queëbi' böchi'bi' na' gútibi'.”

29 Gula'cuá'abi' gadxi bi'i bönni' nácacacabi' böchi'bi', ate' bi'i zí'alö na' butsaga ná'alénbi' bi'i nigula, en gútibi', bití' zóabi' bi'i queëbi'.

30 Ní'irö bi'i buropi na' butsaga ná'alénbi'-nu nigula na', ate' gútibi' ca' bi'i ni, bití' zóabi' bi'i queëbi'.

31 Butsaga ná'alénbi'-nu bi'i bunni na', ate' la' tuz ca gulunbi' igádxitëbi', ate' gulátibi', bití' zóabi' bi'i quégacabi'.

32 Ga búdxitë, gútinu ca' nigula na'.

33 Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alénbi'-nu igádxitëbi'?

34 Ní'irö bubí'ë didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzejë'-bi' zxi'ínigaquië' para ulu'tsaga ná'agacabi'.

35 Na'a, nupa nácacaga lesaca' ulu'bán lu yöl-la' guti, en tsöjcuá' yödzölió sí' gata', bití' ilún yöl-la' rizóalen nigula, en bití' ulu'tsaga ná'agaca.

36 Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácacaguië' gubáz lá'ayi queë' Dios, en ilácagaca zxi'ini cazë' Dios.

37 Ca na' ral-la' ulu'bán nupa chinátigaca, rulu'ínë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob.

38 Dios náquië' Dios, caléga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gualati luyú ni.

39 Ní'irö bulu'bi'ë didza' bal'lë' bönni' yudo' usedi, ta'nnë':

—Bönni' Usedi, dxí'ado' gunnó'.

40 Bití'rö bulu'rúguinë' ila'nábinë' Lë' didza'.

¿Nuzxi zxi'ini náquië' Cristo?

(Mt. 22:41-46; Mr. 12:35-37)

41 Ní'irö Jesús rë' légaquië':

—¿Nacxi caz na' ta'nnë': “Cristo náquië' zxi'inë' David”?

⁴² David caz bē'ē didza' le nazúaj lu guichi lá'ayi ga nazúajgaca salmo, le rna:

Xanru' Dios gudxē' Xana':

“Gurō'i cuita lē'a ibēla

⁴³ cate' gunra' ga ulu'zechu zxíbigaca lo' nupa ta'dá'baga' Li'.”

⁴⁴ David caz na' gunnē' queē' náquiē' Xanē'. ¿Nacxi caz naca, rnnali' libí'ili' náquiē' xzí'inē'?

Jesús ruzéqui'ē diza' bōnni' yudo' tu'sédinē'

(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yúgu'tē bōnachi nacuá' ni' tu'zē nágagaca Jesús, rē' yugu' bōnni' usēda queē':

⁴⁶ —Gulí'gún chí'i cuinli' quégaquiē' bōnni' yudo' tu'sédinē', tu' ta'yaza lādxi'gaquiē' ta'dē' nácugaquiē' lari' tunna, en tē'ennē' ulu'lidza bōnachi légaquiē' zxōn gapa naca lu yē'ēyi, en ta'yaza lādxi'gaquiē' ca' ta'bō'ē lataj lo gapa tu'dubē' tu'sédē' queē' Dios, en gapa ta'bō'ē tahuē'.

⁴⁷ Ta'gúē' lídxi'gacanu nigula uzēbido', ate' para ulu'luí'i tsahui' cuíngaquiē', xidzé tu'lidzé' Dios. Yugu' bōnni' ni, yēnni'tērō gunē' Dios ga ila'guí'i ila'záquiē'.

21

Gun le gulú'unu tu nigula yechi' lahuē' Dios

(Mr. 12:41-44)

¹ Ga na' zoē' Jesús chila yudo', guchisa lahuē', en rilé'enē' yugu' bōnni' dē yōl-la' tsahui' quégaquiē', ta'gu'ē dumí lu guí'ina que dumí gun que yudo'.

² Bilé'enē' ca' tu nigula yechi' uzēbido', rigú'unu chopa dumí lásido', le nazáca'gaca láti'do'os.

³ Rnnē' Jesús:

—Le nácatē rea' libí'ili', tu le zxōntērō gulú'unu nigula yechi' uzēbido' ni ca ia'zica'rō bōnachi na' ta'gu'ē dumí.

⁴ Yúgu'tē', tsca le nadōdi bē' dē quégaquiē', gula'gu'ē dumí que yudo', pero nigula ni, lu yōl-la' yechi' queēnu gulú'unu idútē le dē queēnu, le ral-la' gáhuinu.

Rigú'xjö'ē Jesús ca ulu'sunitiē' yudo'

(Mt. 24:1-2; Mr. 13:1-2)

⁵ Nacuá' ni' nupa tufí' didza' ca naca que yudo' na', ca na' nazí'i biquitaj que, yugu' guiōj nazácalē'egaca, en yugu' gundo' nácagaca lachi, ate' Jesús rē' légaquiē', rnnē':

⁶ —Yúgu'tē lē ni rilé'eli', huadxín dza cate' bíti'rō ugá'ana guiōj lahui luzē'e ni, tu' ulu'suniti bōnachi yudo' ni.

Le ilaca bē' cate' si' idxín dza údxi

(Mt. 24:3-28; Mr. 13:2-23)

⁷ Ní'irō gula'nábinē' Jesús, ta'nnē':

—Bōnni' Usedi, ¿bátaxi gaca lē ni? ¿Bizxi gaca bē' chizóa gaca caní?

⁸ Bubi'ē didza' Jesús, rnnē':

—Gulí'gún chí'i cuinli', para cabí nu si' ye'e libí'ili', tu' ila'lá'gaquiē' bōnni' zían, en ila'zí'i légaquiē' ca lea' neda', ila'nnē' nácagaquiē' Cristo, en ila'nnē': “Chizá' gala' dza údxi.” Neda' rea' libí'ili': Biti' tséajlenlí' légaquiē'.

⁹ Cate' yõnili' raca gudil-la, en ta'dá'baga' bõnachi yúlahui', biti' gadxi idzõbili', tu' run bayudxi ilaca le caní, pero biti' zuftëni dza údxi.

¹⁰ Ní'irõ rë' ca' légaquië':

—Til-la tu yõdzõ len ia'tú yõdzõ, ate' bõnachi tu ga nu rinná bë' ila'díl-lalen bõnachi ia'tú ga nu rinná bë'.

¹¹ Tõdigaca budó' zxu', ate' zían lataj gaca gubín, en ilatsaj yõdzõhuë' zxõn. Ila'lá' lahui lúzxiba le ilún gadxi bõnachi, en le ilaca bë'.

¹² Zí'atëlõ cate' si' ilaca lë ni, ila'zõn bõnachi libí'ili', en ila'bía ládxi'gaca libí'ili'. Ila'chë'ë libí'ili' gapa tu'dubë' tu'sëdë' queë' Dios para ilútië' libí'ili', en ila'gu'ë libí'ili' lidxi gufé. Ila'chë'ë libí'ili' lógaquië' bõnni' ta'nná bë'ë, en lógaquië' bõnni' lo, tu' dá'ali' neda'.

¹³ Gaca caní queëli' para séqui'li' gunli' ba nalí quia' neda'.

¹⁴ Tsutsu guli'gún ládxi'li', para cabí cuéqui ícjali' zí'alõ nacxi innali' uláz queëli',

¹⁵ tu' gunna' queëli' didza' ubí'ili', en yõl-la' réajni'i, para cabí gaca ulu'cul-lë libí'ili', en para cabí gaca bi ila'nnë' que xtídza'li' bõnni' ni' biti' ila'lé'enë' libí'ili' dxi'a.

¹⁶ Ní'irõ xuz quézili' ulu'dödë' libí'ili', en cá'anqueze yugu' bõnni' bõchi' quézili', en yugu' di'a dza que quézili', en yugu' bõchi' luzé'e quézili', ate' ilútië' bál-lali'.

¹⁷ Yúgu'të bõnachi ulu'zóa libí'ili' tsõlá'alõ tu' dá'ali' neda',

¹⁸ pero biti' initi nitú guitsa' ícjali'.

¹⁹ Channõ ugá'anali' tsutsu, idéli'li' yõl-la' na'bán idú.

²⁰ Cate' ilé'eli' bõnni' rójáquië' gudil-la nagú'ugaquië' lë'a Jerusalén, inõzili' chibidxín dza initi yõdzõ ni.

²¹ Ní'irõ nupa nacua' luyú Judea ral-la' ila'zxunnaj ni, en tsõjaca gapa naca guí'ado', ate' nupa nacua' lu yõdzõ ni ral-la' ila'rúaj ni, ate' nupa nacua' la' guixi', biti' ral-la' ulu'dxín lu yõdzõ ni.

²² Yugu' dza ni' Dios gunë' xíguia' nupa nacua' yõdzõ ni para gaca yúgu'të le nazúaj lu guichi lá'ayi ca ral-la' gaca quégaquië'.

²³ Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádxí'nu-bi' bí'ido', tu' ila'gu'i ila'záca'da' bõnachi nacua' ni', ate' Dios gúndë'ë bõnachi ni' xíguia'.

²⁴ Ilátië' zíanë' lu gudil-la na', ate' ila'chë'ë ia'bal-lë' nadzúngaquië' ga ila'dxinë' idútë yõdzõlió, ate' yõdzõ Jerusalén ni, ulu'léaj ulu'libë' le bõnni' zi'tu', cate' izá'arõ dza quégaquië'.

Le ilaca bë' si' huödë' Bõnni' Guljë' Bõnachi

(Mt. 24:29-35, 42-44; Mr. 13:24-37)

²⁵ Gunnë' ca' Jesús:

—Ní'irõ ila'cuá' le ilaca bë' lu gubidza, en lu beo', en yugu' lu bõlaj lúzxiba, ate' luyú ni ulu'chixi bõnachi, en iládxiguequi, tu' yõn chi'i guziú' yu que nísado', en que le riyasa ridxía nisa na'.

²⁶ Ulu'dú ládxi'gaca lu yõl-la' radxi quéguequi tu' ila'zá' ládxi'gaca quégaca le ral-la' ilaca lu yõdzõlió, en ila'zxizi le nalá'gaca lúzxiba.

²⁷ Ní'irõ ila'lé'enë' neda', Bõnni' Guljë' Bõnachi, guída' lu bõaj lúzxiba, dë lu na'a yõl-la' unná bë', ate' ilá' lahui yõl-la' zxõn quia'.

²⁸ Cate' isí lo ilaca lë ni, buli'tipa ládxi'li', en guli'chisa loli', tu' chizóa udxina' neda', para huó'ua' libí'ili'.

²⁹ Jesús gudxë' ca' légaquië' tu le bucúduzë didza', rnnë':

—Buli'yútsöca' ca raca que yaga higo, en que bití'tës yaga yúbölö.

³⁰ Cate' rilé'eli' ta'lén ni'a nē'e huē'énido', nöz quézili' chizá' gala' cusu ba.

³¹ Lē'sca' caní, cate' ilé'eli' chitaca yugu' lē ni, inözili' chizá' gala' dza idinná bē'ë Dios luyú ni.

³² 'Le nácatē rea' libí'ili', bití' ilátigaca bönachi ila'cuá' dza ni' cate' ilaca yúgu'tē lē ni.

³³ Ila'dödi que lúzxiba, en que luyú ni, pero xtídza'a, bití' tōdi cá'asō, tu' idxín caz ca rnna.

³⁴ 'Gulí'gún chí'i cuinli' para cabí gü'ili' lataj tsaza icja ládxi'do'oli' le gun ditaj libí'ili', lē na' naca yöl-la' rágulē'e, en yöl-la' rizudxi, en yöl-la' ruúbi ruguí', para cate' idxín dza ni', cabí sóali' niti ladxi',

³⁵ en para cabí gaca queéli' ca tu le rizón bönachi, ca naca le gaca quégaca yúgu'tē bönachi nacua' idútē yödzülió.

³⁶ Que lē ni na', guli'sóa ban ladxi', en buli'lídatica'sē' Dios, para gaca uláli' lu lē na' ral-la' ilaca, en para cabí utuí'ili' cate' idxinli' lahua' neda', Bönni' Guljē' Bönachi.

³⁷ Lahui' dza rizóé' Jesús chila yudo', rusédinē' bönachi, ate' chí'i dzó'ölö rirúajē' ni', en rejē' lu gu'ado' nazí'i le Gu'a Yaga Olivo.

³⁸ Yugu' zila bila'dxín yúgu'tē bönachi ga zoē' Jesús chila yudo' para ulu'zē nágagaca xtídze'ë.

22

Tun xtídza'gaquiē' ilútiē' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Cate' chizóa idxín laní cate' tahuē' yōta xtila cabí nazí'i cúa zi que, nazí'i le Pascua laní na',

² bulu'dubē' yugu' bixúz unná bē' len bönni' yudo' tu'sédinē'. Ta'zóa ta'bō'ë ilútiē' Jesús, pero bití' gula'zéqui'nē' tu' tádxinē' bi ilún bönachi.

³ Ni'irō Satanás tu' xihui' yōjtsaga Judas. Judas lē' ca' Iscariote, en nababē' idxinnutē' gubáz nasöl-lē'ë Cristo.

⁴ Guyijē' Judas na', yōj'lenē' didza' yugu' bixúz unná bē', en bönni' dē lu ná'agaquiē' que yudo', naxi gunē' para udödē' Jesús lu ná'agaquiē'.

⁵ Bulu'dzéjanē' bönni' yudo' na', en gula'z' lu ná'agaquiē' ulu'nödzejē' queē' dumí.

⁶ Raza ládxē'ë Judas lē ni, ate' rizóa ribō'ë udödē' Jesús lu ná'agaquiē' bagáchi'sō.

Le ráguru' le rusá' ládxi'ru' ca gútiē' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidxín dza na' tahuē' yōta xtila cabí nazí'i cúa zi que, cate' ral-la' ilútiē'-ba' bō'cu' zxila' le tahuē' dzō' Laní Pascua.

⁸ Jesús gusöl-lē'ë Pedro, en Juan, rnnē':

—Gulí'tséaj, guli'tsöjpá'a queēru' le gáguru' dzō' Laní Pascua.

⁹ Tē' Lē':

—¿Gazxi rē'ēnu' tsöjpá'atu' queēru'?

¹⁰ Jesús rē' légaquiē', rnnē':

—Buli'yútsöca', cate' tsú'uli' lu yödzo ni, irúajē' tu bönni' dutságuiē' libí'ili', söjnu'ë tu rō'ö nisa. Gulí'tséajlenē' ga idxintēli' yu'u ga tsáziē'.

¹¹ Gulí'guié' xan yu'u na': "Bönni' Usedi rē' li': ¿Gazxi zoa yu'u laní ga gágulena' yugu' bönni' usēda quia' dzō' Laní Pascua?"

12 Ní'irō ulu'ínè' libí'ili' tu yu'u zxōn xitsá' ga ni' chinabá'a. Buli'pá'a ni' le gáguru'.

13 Ní'irō yōjáquiè', en yōjxáca'gaquiè' ca na' chigudxè' Jesús légaquiè', ate' bulu'pè'è ni' le ilahuè' dzō' Laní Pascua.

14 Cate' bidxín dzō' na', gurō'è Jesús ga ilahuè', ate' bōnni' gubáz queè' na' gula'bō'lenè' Lè' tsōzxōn.

15 Ní'irō Jesús rē' légaquiè':

—Gúcada' ládxa'a gágulena' libí'ili' tsōzxōn xtsō' ni zí'atēlō cate' si' qui'i saca'a, en gátia'.

16 Rea' libí'ili': Bítirō gahua' lè ni cate' idxinrō dza gaca le rulu'isō xtsō' ni ga ni' rinná bē'è Dios.

17 Gudélè'è Jesús tu zxíga'do', en gudxè' Dios: "Xclenu'." Ní'irō rē' légaquiè':

—Guli'sí' lè ni, en guli'gu'aj lati' huéaj,

18 tu' rea' libí'ili': Bítirō guí'ja' xisi uva cate' idxinrō le rinná bē'è Dios.

19 Ní'irō gudélè'è yōta xtila, en gudxè' Dios: "Xclenu'." Gudōdi ni' buzuxzjè' le, en bē'è que queégaquiè', rnnè':

—Lè ni naca idútè le naca' le rudōda' uláz queéli'. Guli'gún caní para usá' ládxi'li' neda'.

20 Cate' budxi gulahuè', lésca' caní bē'è didza' que zxíga'do' na', rnnè':

—Zxíga'do' ni rulu'i ca naca didza' cubi rucá'ana tsahui', ate' rōn quia' run tsutsu le, rōn na' ilalaj ni'a queéli'.

21 Na'a, bōnni' na' udōdè' neda' lu ná'agaca bōnachi rō'è rágulenè' neda' tsōzxōn.

22 Le nácatè huayija' ga ilútiè' neda', Bōnni' Guljè' Bōnachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bōnni' na' udōdè' neda'.

23 Ní'irō gula'sí lógaquiè' ta'nábinè' Lè' tu tuè', ta'nnè':

—¿Núzxilōtu' nu gun caní?

Tu'i xtídzagaquiè' núzxilōgaquiè' gáquiè' lo

24 Ní'irō gulu'è didza' la' légacasè' núzxilōgaquiè' idéli'nè' lataj lo.

25 Jesús gudxè' légaquiè':

—Yugu' bōnni' unná bē' tu'gunè' dxin yōl-la' unná bē' queégaquiè', ta'nná bé'enè' bōnachi, ate' nupa ni dè lu ná'agaca yōl-la' unná bē', légaquiè' bōnni' tácalen.

26 Libí'ili' bití' ral-la' gunli' caní, pero nu naca lo ládjali' ral-la' gaca ca nu naca cuíd'tērō, ate' nu rinná bē' ral-la' gaca ca nu run dxin quéguéqui luzé'e.

27 ¿Núzxilō na' nácáro lo, nu na' rō'ō ragu, o nu rupá' la' huagu? ¿Naru' calèga nu na' rō'ō ragu nácáro lo? Neda' zóalena' libí'ili' ca nu rupá' la' huagu.

28 Libí'ili' ni guzóaleni' neda' cate' ni' bi guca quia', yugu' le gula'zí' bē' neda'.

29 Que lè ni na' udōda' lu ná'ali' tu ga inná bē'èli', ca na' benè' Xuza', budōdè' lu na' a ga inná bē'a neda'.

30 Caní guna' para gaca cō'ōli', en guí'aj gágulenli' neda' ga ni' inná bē'a, ate' cō'ōli' xilataj cázali' ga uchi'a usōrōli' idxinnu cō' xzí'ini xi'sóe' Israel.

Rnnè' Jesús innè' Pedro bití' núnbè'è Lè'
(Mt. 26:31-35; Mr. 14:27-31; Jn. 13:36-38)

31 Gunnè' ca' caní Xanru':

—Simón, Simón. Buyútsōca'. Chigunaba Satanás tu' xihui' libí'ili', para urixi udōdi libí'ili' ca nu rurixi rudōdi zxo'a' xtila,

³² pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huóácu' quia', butipa ládxi'gaquië' böchi' luzó'o.

³³ Pedro rë' Lë':

—Xan, chizó'a' sá'lena' Li', calégasö tseja' lidxi guié, pero lësca' gátilena' Li'.

³⁴ Jesús rë' lë':

—Pedro, rea' li': Zí'alö cödhiba' böra na'a, chigudá'bagu'u tsonna luzuí, innó' cabí núnbë'u neda'.

Le benë' Jesús cate' chizó'a ilútië' Lë'

³⁵ Jesús gunábinë' légaquië', rnnë':

—Cati' gusól-la'a libí'ili' cabí nu'ali' yöxaj yöta, en calëga buzudi dumí, en calëga chopa cö' xiráchuli', ¿naru' bi biyadzaj queëli'?

Légaquië' ta'nnë':

—Biti' bi.

³⁶ Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu bití' dë que guié tuchi' ral-la' guti' lari' rixó'a yeni, en si' tu guié tuchi'.

³⁷ Rea' libí'ili': Run bayudxi gaca quia' lë na' nazúaj lu guichi lá'ayi, rna: "Gulunë' queë' ca tunë' quegaca nupa tua' dö", ate' ilaca yúgu'të le nazúajgaca lu guichi ca ral-la' gaca quia'.

³⁸ Ní'irö légaquië' ta'nnë':

—Xan, ni dë chopa guié tuchi'.

Lë' rë' légaquië':

—Chinaca.

Jesús rulidzë' Dios la' yëla Getsemani

(Mt. 26:36-46; Mr. 14:32-42)

³⁹ Ní'irö birúajë' Jesús, en ca run cazë' sa'yéajë' lu Guí'a Yaga Olivo, ate' yugu' bönni' usëda queë' söjácalenë' Lë'.

⁴⁰ Cate' bila'dxinë' ni', Jesús rë' légaquië', rnnë':

—Buli'lidzë' Dios, inábili'-në' cabí gata' lataj si' bë' tu' xihui' libí'ili'.

⁴¹ Ní'irö Jesús guzë'ë ga na' nacu'ë, en gudödë' ia'lati' tscá ga ridxín tu guiöj rirú'uniru', ate' ni' buzó'a zxibë', en rulidzë' Dios.

⁴² Rnnë':

—Xúz, channö rë'ënu', bucuása ga zoa' lë na' ral-la' quí'i saca'a, pero calëga ca rë'ënda' neda', pero ca rë'ënu' Li' gunu'.

⁴³ Ní'irö buluí'i lahuë' gubáz lá'ayi queë' Dios, zë'ë yehua' yubá, ate' butipë' ládxë'ë Jesús.

⁴⁴ Lu yöl-la' risëbi ladxi' queë', idú ládxë'ë Jesús bulidzë' Dios, ate' nisa yösa queë' guca ca rön raba' luyú.

⁴⁵ Cate' budxi bulidzë' Dios, guyasë', en böajë' ga na' nacu'ë bönni' usëda queë', ate' duxáquië' légaquië' tásië' tu' tu'huí'inigaquië'.

⁴⁶ Ní'irö Jesús rë' légaquië':

—¿Rásitsali'? ¡Guli'chasa, en buli'lidzë' Dios! Inábili'-në' cabí gata' lataj si' bë' tu' xihui' libí'ili'.

Ta'zönë' Jesús

(Mt. 26:47-56; Mr. 14:43-50; Jn. 18:2-11)

⁴⁷ Tsanni ni' ru'ë didza' Jesús, la' bila'dxintë' bönni' zían ni', ate' Judas, bönni' na' nababë' idxínnuë' bönni' usëda queë' Jesús dzáguie' légaquie', ate' nanöruë' lógaquie' bönni' zían na'. Gubíguie' ga zoë' Jesús para utsaga lahuë' Lë'.

⁴⁸ Ní'irö Jesús rë' lë':

—Judas, ¿naru' rudóditso' caní neda', Bönni' Guljë' Bönachi, rutsaga lo' neda'?

⁴⁹ Cate' yugu' bönni' na' nacuá'lenë' Jesús bila'lé'enë' ca na' raca queë' Lë', të' Lë':

—Xan, ¿naru' gü'itu' légaquie' guie' tuchi'?

⁵⁰ Tuë' bönni' usëda queë' Jesús benë' huë' guídi náguie' bönni' huen dxin queë' bixúz lo. Burixë' guídi náguie' ibëla.

⁵¹ Jesús rnnë':

—Chinaca na'a. Tsca' gaz.

Gudanë' Jesús guídi náguie' bönni' huen dxin na', en bunë' le.

⁵² Ní'irö rë' yugu' bixúz unná bë', en bönni' dë lu ná'agaquie' que yudo', en bönni' gula tu'zëjani'inë', bönni' na' bití' ta'lé'enë' Lë' dxí'a, rnnë':

—¿Narúajtsali' nuá'ali' guie' tuchi', en yaga para sönli' neda' ca runli' rizönli'-në' gubán?

⁵³ Yugu' dza guzóalen caza' libí'ili' chila yudo', ate' bití' bi benli' quia', pero na'a chibidxín dza queë'li', le naca dza dë lu në'e nu na' zoa lataj chul-la.

Rnnë' Pedro: "Bití' núnbë'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irö gula'zönë' Jesús, en gula'ché'ë Lë' ga na' bulu'sudxinë' Lë' lidxë' bixúz lo. Pedro yöjnahue' Jesús zí'tu' zí'tu'sö.

⁵⁵ Cate' ni'a në'ë bixúz lo chigula'béquie' guí lö'a lidxë' bixúz lo na', gula'bö'ë idú gásibi'ilo' ra' guí' na', ate' Pedro guró'lenë' légaquie' tsözxön.

⁵⁶ Cate' tubí' bi'í nigula huen dxin bilé'ebi'-në' Pedro, ni' rő'ösë' ra' guí', buyubi' lë', en rnnabi':

—Bönni' ni dë'ë ca' Jesús.

⁵⁷ Gudá'baguie' Pedro, rnnë':

—Nigúla, bití' ca' núnbë'a-në' bönni' na'.

⁵⁸ Ia'látí' gudzé ia'túë' bönni' bilé'enë' Pedro, ate' rnnë':

—Lí' do'ca' légaquie'.

Pedro gunné':

—Bönni', calëga neda'.

⁵⁹ Ia'látí'sö gudzé, gunné' ia'túë' bönni':

—Le nácatë bönni' ni dë'ë Jesús, tu' náquie' bönni' Galilea.

⁶⁰ Ní'irö Pedro gunné':

—Bönni', bití' nözda' bizxi na' ru'u didza' que.

Tsanni ni' ru'ë didza' ni, la' gurödxitëba' böra.

⁶¹ Ní'irö bué'cjë' Xanru', en ruyúë' Pedro, ate' yöjnenë' Pedro xtídzë'ë Xanru', ca na' gudxë' lë': "Zí'aló cödxiba' böra na'a, lí' chigudá'bagu'u tsonna luzuí, innó' bití' núnbë'u neda'."

⁶² Burúajë' Pedro ní'ilo', ate' rön caz gurödxë'.

Tu'titjë' Jesús

(Mt. 26:67-68; Mr. 14:65)

⁶³ Yugu' bönni' na' nazón'gaquie' Jesús bulu'titjë' Lë', ate' gula'guinë' Lë'.

⁶⁴ Ní'irö bulu'sayjë' lahuë' Jesús, ate' gula'gápë'ë lahuë', en gula'nábinë' Lë', ta'nnë':

—¿Gunnëya'atsöca! ¿Nuzxi na' gudapa' Li'?

⁶⁵ Ziánrö ca' gula'nnë' queë' le gulu'ë dö' queë'.

Ridxinë' Jesús lógaquië' bönni' yudo' tu'chi'a tu'söröë'
(Mt. 26:59-66; Mr. 14:55-64; Jn. 18:19-24)

⁶⁶ Cate' chizá' rení' dza na', bulu'dubë' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sédinë', ate' gula'chë'ë Jesús lógaquië' bönni' yudo' tu'chi'a tu'söröë', ate' gula'nábinë' Lë',

⁶⁷ ta'nnë':

—Gudíxjöi'netu'. ¿Naru' nactso' Li' Cristo?

Jesús rë' légaquië':

—Channö guía' libí'ili' naca' Cristo, biti' tséajlë'ëli' neda',

⁶⁸ en channö inábida' libí'ili' tu didza', biti' ubí'ili' didza', en biti' usanli' neda'.

⁶⁹ Na'a isí lo, neda', Bönni' Guljë' Bönachi, cö'a cuita lë'ë ibëla Dios, nápatëré' yöl-la' unná bë'.

⁷⁰ Gula'nábinë' Lë' yúgu'të', ta'nnë':

—¿Naru' nactso' Li' Zxí'inë' Dios?

Lë' gudxë' légaquië':

—Le nácasö rnnali'.

⁷¹ Ní'irö ta'nnë':

—¿Núzxirö naquíniru' nu gun ba nali' queë'? La' rë'usö chibiyöniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queë' César
(Mt. 27:1-2, 11-14; Mr. 15:1-5; Jn. 18:28-38)

¹ Ní'irö gulazuinë' yúgu'të bönni' zián ni', ate' gula'chë'ë Jesús lahuë' Pilato,

² ga ni' gula'sí lógaquië' tu'zéguië' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinözigaca nupa ta'guíxaj laz ruquíxjé' César, en rnnë' lë' cazë' náquië' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnnö'.

⁴ Ní'irö Pilato gudxë' yugu' bixúz unná bë', en bönachi nacua' ni', rnnë':

—Biti' bi rudzölidera' le naca xíguia' nunë' bönni' ni.

⁵ Ní'irö gulunrë' tsutsu xtídzagaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

Ridxinë' Jesús lahuë' Herodes, bönni' rinná bë'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea.

⁷ Cate' gunözinë' nababë' Jesús ga ni' rinná bë'ë Herodes, gusöl-lë'ë Lë' lahuë' Herodes na', tu' zoë' ca' Herodes Jerusalén yugu' dza na'.

⁸ Cate' Herodes na' bilé'enë' Jesús, budzéjanë', tu' chiguca xidzé rë'enë' ilé'enë' Lë' tu' chibiyönnë' le zián ca naca queë' Jesús, en runë' löza ilé'enë' tu' yöl-la' huáca gunë'.

⁹ Ní'irö Herodes gunábinë' Jesús le zián, pero Jesús biti' bi didza' bubi'ë.

10 Nacu'ë ca' ni' yugu' bixúz unná bē', len bönni' yudo' tu'sédinē', ate' bulu'zéguidē'ë Jesús didza'.

11 Ní'irō Herodes, en bönni' queē' rōjáquiē' gudil-la bulu'cá'anē' Jesús cá'asō, en para ulu'titjē' Lē', bulu'gácuē' Lē' tu lari' nazaca' ca rácuē' tu bönni' unná bē', ate' leyúbölō bulu'sudxinē' Lē' lahuē' Pilato.

12 Dza na' bulu'dzáguiē' dxi'a Pilato, en Herodes, tu' zí'alō gula'lé luzē'ë tuē' ia'tuē'.

Ta'chúquiē' queē' Jesús gátiē'

(Mt. 27:15-26; Mr. 15:6-15; Jn. 18:39-19:16)

13 Ní'irō butubē' Pilato yugu' bixúz unná bē', en bönni' dē lu ná'agaquiē', en bönachi lu yōdzō,

14 ate' rē' légaquiē':

—Dujuá'ali'-nē' bönni' ni lahua' neda', rnnali' queē' runē' ga tu'tsatsa bönachi, pero cate' gunabi yúdxida'-nē', ate' zóatēli' ca' ni, biti' bi budzólida' le naca xíguia' nabáguē'ë, yugu' lē na' ruzéguili'-nē' didza'.

15 Cate' gusól-la'a libí'ili' lahuē' Herodes, biti' bi budzölinē' le benē' bönni' ni le naca xíguia' nabáguē'ë para nu ichugu queē' gátiē'.

16 Na'a usaca' zi'a-nē', ate' tōdi na' usana'-nē'.

17 Run bayudxi tu le gunē' Pilato, usané' lu ná'agaca bönachi tuē' bönni' nadzunē' cate' raca laní na', ca na' run cazē'.

18 Ní'irō gulu'ë zidzaj didza' yúgu'tē bönni' nacu'ë ni', ta'nnē':

—Bētiē' bönni' ni, en busané' queētu' Barrabás.

19 Nadzunē' Barrabás na' lidxi guié' tu' gudíl-lalenē' yúlahui' lu yōdzō na', en tu' bētiē' bönachi.

20 Bulidzē' Pilato légaquiē' leyúbölō, tu' rē'ënē' usané' Jesús.

21 Leyúbölō gulu'ë zidzaj didza', ta'nnē':

—¡Budē'ë lē'e yaga cruz! ¡Budē'ë lē'e yaga cruz!

22 Ní'irō Pilato gudxē' légaquiē' le bunny luzuí, rnnē':

—¿Bizxi caz le ruá' dö' benē' bönni' ni? Biti' bi budzólida' nunē' le run ga nabáguē'ë xíguia' gátiē'. Usaca' zi'a-nē', ate' ní'irō usana'-nē'.

23 Zidzajrō gulu'ë didza', ta'nabē' tē'ë Jesús lē'e yaga cruz. Tu' gula'bödxí'ë yenni' yugu' bönni' na', en yugu' bixúz unná bē', gula'déli'nē' gaca ca na' té'ënnē'.

24 Ní'irō Pilato guchúguiē' queē' Jesús, para gaca queē' ca na' ta'nabē'.

25 Busané' quégaquiē' bönni' na' nadzunē' lidxi guié' tu' gudíl-lalenē' yúlahui', en bētiē' bönachi, bönni' na' chigula'nabē', ate' budödē' Jesús para gaca queē' ca na' té'ënnē'.

Dē'ë Jesús lē'e yaga cruz

(Mt. 27:32-44; Mr. 15:21-32; Jn. 19:17-27)

26 Cate' ni' ta'chē'ë Jesús tsōjdá'gaquiē' Lē' lē'e yaga cruz, gula'zōnē' Simón, bönni' yōdzō Cirene, suz'é'ë la' guixi', ate' gula'xóē' yen zxicjē' yaga cruz na' para gu'ë le, en tsejē' cúdzu'lē' Jesús.

27 Bönachi zían, enca' yugu' nigula sōjnógaca Jesús, ta'bödxinu nigula na', en ta'bödxí yéchi'nu queē' Lē'.

28 Ní'irō buécjē' Jesús, en ruyúē' légacanu, ate' rē' légacanu:

—Libí'ili' nigula Jerusalén. Biti' cōdxili' quia' neda', pero guli'cōdxí que quézili', en quégacabi' zxi'inili'

29 tu' huadxín dza ila'nná: “Bica' bágaca yugu' nigula huödx, en nigula biti' guluá'anu-bi' bí'ido', en biti' bulu'gádxí'nu-bi' bí'ido'.”

³⁰ Ní'irö ila'sí lógaca ila'nná bönachi, ilé' yugu' guí'a sibi: "Guli'dubága' netu'", en ilé' ca' yugu' guí'ado': "Guli'cachi' netu'."

³¹ Channö caní tunè' quia' neda', naca' ca tu yaga ya'a, ¿naru' cabí ilúntèrè' ca' queéli', nácali' ca yaga bidxi?

³² Gula'chë'è ca' chopè' bönni' tuá' dö', para ilútiè' légaquiè' tsözxön len Jesús.

³³ Cate' bila'dxinè' lataj nazí'i le Calavera, le rnna len didza' xidza' Lataj Que Böga' Ícjaru', bulu'dé'è Jesús lè'e yaga cruz. Bulu'dé'è ca' lè'egaca yaga cruz chopè' bönni' tuá' dö'. Tuè' bulu'dé'è cuita lè'è ibèla Jesús, en ia'tué' bulu'dé'è cuita lè'è yögöla.

³⁴ Ní'irö Jesús rnnè':

—Xuz, buniti lo légaquiè', tu' cabí nözguequinè' bi tunè'.

Bönni' rójáquiè' gudil-la nacu'è ni' bulu'lè'è que queégaquiè' le nácuè' Jesús, en bulu'quitjè' le gaca bè' lahui.

³⁵ Bönachi nacua' ni' tu'yú, en yugu' bönni' dè lu ná'agaquiè' bulu'titjè' Jesús, ta'nnè':

—Yugu' nu yúbölö busölè' bönni' ni. Na'a ral-la' usölá cuinè' channö náquiè' Cristo, bönni' gurö cazè' Dios.

³⁶ Yugu' bönni' na' rójáquiè' gudil-la bulu'titjè' ca' Jesús. Gula'biguè'è ga na' zoè', en bulu'gui'jè' Lè' nupi zi,

³⁷ ta'nnè':

—Channö nacu' Li' bönni' inná bé'enè' bönachi judío, busölá cuinu'.

³⁸ Da' ca' lè'e yaga cruz icjlè' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: "Bönni' Rinná Bé'enè' Bönachi Judío."

³⁹ Tuè' bönni' huiá' dö' na' dè'è lè'e yaga cruz bulidza zi'è Jesús, rnnè':

—Channö nacu' Li' Cristo, busölá cuinu', enca' netu'.

⁴⁰ Bubi'è didza' ia'tué' bönni' huiá' dö' na', en gudil-lé' luzè'è na', rnnè':

—Naru' cabí rádxinu'-nè' Dios? Lè'sca' li' narugu quiu' gátíu'.

⁴¹ Le nácatè rë'u, le rál-la'sö gaca queèru' riguí'i rizáca'ru', ca na' sa'yéaj dö' biá'aru', pero Bönni' ni, bití' bi dö' nu'è.

⁴² Ní'irö bönni' ni rë' Jesús:

—Yöjné neda' cate' idxinu' ga ni' inná bè'u.

⁴³ Jesús rë' lè':

—Le nácatè rea' li', na'a dza ni sóalenu' neda' lataj lachi quia'.

Ratiè' Jesús

(Mt. 27:45-56; Mr. 15:33-41; Jn. 19:28-30)

⁴⁴ Cate' bidxín idú huagubidza, guchul-la iduté yödzülió ga bidxinrö idú ridödi xihuó.

⁴⁵ Guchul-la gubidza, ate' lari' nal-la' lu yudo' biröza' chopa dí'ilö.

⁴⁶ Ní'irö bè'è zidzaj didza' Jesús, rnnè':

—Xuz, rigu'a lu no'ó bö' naca caza'.

Cate' budxi gunné' caní, birúajtè bö' naca cazè', gútiè'.

⁴⁷ Cate' bönni' rinná bé'enè' bönni' rójáquiè' gudil-la bilé'enè' ca na' guca, gulu'è Dios yöl-la' ba, rnnè':

—Le nácatè bönni' ni gúquiè' bönni' tsahui'.

⁴⁸ Cate' yúgu'tè bönni' nacu'è ni' tu'yúè' bila'lé'enè' lè na' guca, yöjhüjgaquiè' yödzü, ta'gapa' luchú'ugaquiè' tu' tu'bánnè'.

⁴⁹ Zí'tu'sö bulu'gá'ana yúgu'tè nupa ni' núnbè'gaca Jesús, en yugu' nigula na' yöjácalennu Lè' cate' ni' gudé' luyú Galilea, ate' tu'yúè' lè ni raca.

*Rigáchë'ë Jesús yeru ba**(Mt. 27:57-61; Mr. 15:42-47; Jn. 19:38-42)*

⁵⁰ Zoë' ca' ni' tu bönni' yödzö Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu' chi'a tu'söröë'.

⁵¹ Biti' benë' tuz nupa na' gula'chugu queë' Jesús gátië', tu' ribözë' ca' José ni le rinná bë'ë Dios.

⁵² Ní'irö guyijë' José na' lahuë' Pilato, en gunabë' lataj u'ë Jesús.

⁵³ Cate' chinuzötjé' Lë', buchölinë' Lë' lari', ate' gulu'ë Jesús yeru ba, le nadaj lë'e gu'a guiój, ate' lu ba na', cuntu nu nagü'iguequinë'.

⁵⁴ Dza na' naca dza tu'pë'ë que dza lá'ayi quégaquië' bönni' judío, tu' si' idxín dza na'.

⁵⁵ Yöjácánu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lé'enu yeru ba na', en ca na guca, gula'gu'ë Lë' ni'.

⁵⁶ Cate' yöjhuöjgácanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'zi' ládxi'gácanu dza lá'ayi na' quégaquië' bönni' judío ca na' rinná bë' xibá queë' Dios.

24*Rubanë' Jesús lu yöl-la' guti**(Mt. 28:1-10; Mr. 16:1-8; Jn. 20:1-10)*

¹ Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gácanu yugu' le rilá' zxixi, lë na' chinupá'agácanu, ate' dzágagácanu légácanu ia' bál-lanu nigula.

² Cate' bila'dxinnu ni', bila'lé'enu chinadúa guiój na' gudá' ga nu riyaza yeru ba queë'.

³ Cate' gula'yázanu yeru ba na', bití' bulu'dzölinu zoa Xanru' Jesús ni'.

⁴ Cate' ni' ta'bö'önu böniga ni'a que lë ni, chopë' bönni' nácugaquië' lari' rëpi yösa bení' la' bila'dxintë' ni', en gula'zuinë' ga na' nacuá'anu.

⁵ Ní'irö guládxinu, en bulu'zötaj ícagácanu, tu'yunu lu yu, ate' chopë' gubáz lá'ayi na' të' légácanu, ta'nnë'.

—¿Bizx que ruguílajli' nu zoa nabán xilataj nu nati?

⁶ Bití' zoë' ni, tu' chibubanë'. Guli'tsöjné lë na' chigudxi cazë' libí'ili' cate' ni' zoë' luyú Galilea.

⁷ Gunnë': "Run bayudxi nu udödi neda', Bönni' Guljë' Bónachi, lu ná'agaquië' bönni' dul-la', ate' ulu'dé'ë neda' lë'e yaga cruz, ate' ubana' cate' gaca tsónna dza."

⁸ Ní'irö yöjnégácanu didza' na' bë'ë Jesús,

⁹ ate' bulu'zá'anu ra' yeru ba na', yöjtíxjöi'iguequinu idxinéajtë' bönni' gubáz queë' Cristo, en ia'zica'rë' ca', ca naca lë na' guca.

¹⁰ Nigula na' yöjtíxjöi'iguequinu bönni' gubáz na' yugu' lë ni, nácagácanu María Magdalena, en Juana, en María, xinë'ë Jacobo, en ia' bál-lanu nigula na' dzágagácanu légácanu.

¹¹ Guléquinë' bönni' gubáz na' tu'ínu didza' chixi, en bití' gula'yéajlë' légácanu.

¹² Ní'irö guyasë' Pedro, en carelô sa'yéajë' ra' yeru ba na'. Cate' buyúë' lu ba na', bilë'enë' yugu' lári'sö nacuá' ni', ate' ní'irö böajë' lidxë', rubáninë' ca naca lë na' guca.

*Le guca la' nöza ridxintë' Emaús**(Mr. 16:12-13)*

13 La' dza ná'asö sôjáquië' chopë', yú'ugaquië' nôza le ridxintë Emaús, le r'ö ò ca chopa hora rizá'aru' Jerusalén.

14 Yú'ugacasë' ca' nôza, tu'ë didza' ca naca yúgu'të lë na' guca.

15 Tsanni ni' yú'ugaquië' nôza, tu'ë didza' la' légacasë', gubígui'ë gala' Lë cazë' Jesús, ate' gudálenë' légaquië' tsözxón.

16 Biti' bulu'únbë'ë Lë' tu' naca ca tu le nabaga' guió'j lógaquië'.

17 Ní'irö Jesús gunábinë' légaquië', rnnë':

—¿Bizxi didza' na' ru'í'ili' la' libí'isili' yú'uli' nôza? ¿Bizx que na' ruhu'í'inili'?

18 Bubi'ë didza' bönni' na' lë' Cleofas, rë' Lë':

—¿Nácatso' bönni' zi'tu' lu yödzo Jerusalén, en tuzu' li' bití' nözínu' lë na' guca néaje nasi ni'?

19 Ní'irö Jesús rë' légaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxon benë' dxin, en bë'ë didza' lahuë' Dios, en lógaca yúgu'të bönachi.

20 Yugu' bixúz unná bë', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátie', ate' bulu'dë'ë Lë' lë'e yaga cruz.

21 Netu' bentu' löza gúquië' Lë' bönni' na' ral-la' huóá'uë' bönachi Israel, pero na' a chiguca tsonna dza cate' gulaca lë ni.

22 Ia'stú, bál-lanu nigula nútsa'gacanu netu' gulunnu ga gurö'ötu' böniga. Yó'jácanu ra' yeru ba queë' cate' si' gulén gubidza na'a dza,

23 en cate' bití' bulu'dzölinu Lë', buduhuó'gacanu, en gulënu netu' bila'lé'enu yugu' gubáz lá'ayi queë' Dios, nupa ni' gulë légacanu zoë' nabanë' Jesús.

24 Ní'irö bal-lë' bönni' luzá'atu' yó'jáquië' ra' yeru ba na', en bila'lé'enë' naca ca na' gula'nnanu nigula na', pero bití' bila'lé'enë' Jesús.

25 Ní'irö Jesús gudxë' légaquië':

—Libí'ili', bönni' bití' réajni'ininë'. Nazidi icja ládxi'do'oli' para cabí tséajlë'ëli' yúgu'të le gula'nnë' bönni' gulu'ë didza' uláz queë' Dios.

26 ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisëtërë'?

27 Ní'irö gusi lahuë' Jesús rigu'xjöi'inë' légaquië' yúgu'të le ru'í' didza' ca naca queë' le nazúajgaca lu guichi lá'ayi, ca na' gusi lo bë'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

28 Cate' bila'dxinë' yödzo'do' ga na' sôjáquië', benë' Jesús ca tu bönni' zéajtërë' zi'tu'.

29 Gulunë' bayudxi ugá'analenë' légaquië', ta'nnë':

—Bugá'analen netu', tu' chiridzö' na'a, en chizóa gal-la.

Ní'irö guyázië' Jesús yu'u, en bugá'analenë' légaquië'.

30 Cate' ni' Jesús rö'ë rágulenë' légaquië', gudélé'ë yöta xtila, en gudxë' Dios: "Xclenu'." Ní'irö buzxuzxjë' le, en bë'ë quégaquië'.

31 La' ní'isö bidúa lë na' gubaga' guió'j lógaquië', ate' bulu'únbë'ë Jesús, ate' Lë' buniti cuinë' lógaquië'.

32 Ní'irö gulë luzë'ë tuë' ia'tué':

—¿Naru' cabí böála'tica' ládxi'do'oru' tsanni ni' ru'í'ilenë' rë'u didza' la' nôza, en cate' ni' ruchila lá'anië' le nazúaj lu guichi lá'ayi?

³³ La' ní'sisö gula'zuínë' yõjhuõjgaquië' Jerusalén, ate' yõjxáca'gaquië' nudúbigaquië' idxinéajtë' bönni' gubáz queë' Jesús, en nupa nacuá'len légaquië'.

³⁴ Ní'irö yugu' bönni' na' nacu'ë ni' gulë' chopë' na':

—Chibubán cazë' Xanru', en bulu'í lahuë', ate' bilé'enë' Simón Lë'.

³⁵ Ní'irö chopë' na' gula'guíxjö'ë ca na' guca quégaquië' la' nõza, en ca na' bulu'ünbë'ë Jesús cate' ni' buzxuzxjë' yõta xtila na'.

Bönni' usëda queë' Jesús tu'lé'enë' Lë'

(Mt. 28:16-20; Mr. 16:14-18; Jn. 20:19-23)

³⁶ Tsanni ni' tu'ë didza' ca nácagaca lë ni, la' yõjsóatë' Jesús gatsaj láhui'lö ga na' nacu'ë, ate' rë' légaquië':

—Guli'sóa dxi ládxi'li'.

³⁷ Ní'irö guladxi gula'dzöbinë' tu' téquinë' bixín ta'lé'enë'.

³⁸ Jesús rë' légaquië':

—¿Bixz que ró'öli' böniga? ¿Bixz que rizá' ládxi'li' yugu' lë ni?

³⁹ Buli'yútsöca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

⁴⁰ Ní' ruf'isë' ca' didza' ni, buluf'inë' légaquië' në'ë, en ni'ë.

⁴¹ Tu' tu'dzéjaguequinë' biti' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queëli' ni le gahua'?

⁴² Ní'irö bulu'nödzejë' queë' láti'do'oba' böla chinégui'ba', en tu quízxi'ba' buz.

⁴³ Guzxi'ë Jesús le, en gudahuë' lógaquië'.

⁴⁴ Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunniá': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

⁴⁵ Ní'irö buzéajni'inë' légaquië' lë na' nazúajgaca lu guichi lá'ayi.

⁴⁶ Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza,

⁴⁷ ate' idütë yödzo'lió ral-la' gaca libán ca naca quia' neda' para ulu'bí'i ládxi'gaca bönnachi para uniti lahuë' Dios dul-la' nabága'gaquië'. Lu yödzo' Jerusalén isí lo gaca libán na'

⁴⁸ ate' libí'i cázali' na' bilé'eli' yugu' lë ni ral-la' gunli' ba nalí que.

⁴⁹ Buli'yútsöca', isö-la'a queëli' le guzxi' lu në'ë Xuza' gunnë' queëli', pero buli'gá'anasö Jerusalén cate' idxinrö queëli' yöl-la' huáca na' za' yehua' yubá.

Ruhuëpë' Jesús yehua' yubá

(Mr. 16:19-20)

⁵⁰ Ní'irö Jesús guchë'ë yugu' bönni' dá'gaquië' Lë', söjáquië' yödzo' Betania, ate' ni' guchisa në'ë, en bulidza tsáhuë'ë légaquië'.

⁵¹ Tsanni ni' rulidza tsáhui'së' ca' légaquië', buzá'atë' ga na' nacu'ë, buëpë' yehua' yubá.

⁵² Gudödi gula'yéaj ládxi'gaquië' Lë', lu yöl-la' rudzeja quégaquië' yõjhuõjgaquië' Jerusalén.

⁵³ Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca'naca!

DIDZA' DXI'A BUZÚAJĚ' JUAN

Bönni' na' naz'i lë' Didza' gúlajë' bönachi

¹ Cate' gusi lo, zí'atëlö cate' si' gata' yödölió, ni' zoa cazë Bönni' lë' Didza', ate' Bönni' na' náquië' Didza' zóalenë' Dios, ate' Didza' na' naca caz Dios.

² Bönni' na' náquië' Didza' zóalenë' Dios cate' ni' gusi lo si' rata' yödölió.

³ Lu në'ë Bönni' ni, Dios benë' yúgu'të le dë, en biti' bi dë le nunë' Dios le cabí benë' lu në'ë Bönni' na'.

⁴ Dë caz queë' yöl-la' na'bán, ate' yöl-la' na'bán na' naca ca tu bení' le ruzení' lu icja ládxi'do'gaca bönachi.

⁵ Ruzení' bení' na' ga naca chul-la que dul-la', pero biti' ca' sequi' le chul-la na' usulu bení' na'.

⁶ Dios gusöl-lë'ë ni tu bönni' lë' Juan.

⁷ Bidë' bönni' ni para gáquië' nu gun ba nalí. Bidë' para gunë' ba nalí queë' Bönni' na' náquië' bení', para tséjlë'gaca yúgu'të bönachi Dios ni'a que lë na' runë' ba nalí.

⁸ Biti' náquië' Juan bení' na', pero bidë' para gunë' ba nalí queë' Bönni' na' náquië' bení'.

⁹ Bönni' na' náquië' bení' le naca idú ni' razie' yödölió ni, ate' ruzeni'ë lu icja ládxi'do'gaca yúgu'të bönachi.

¹⁰ Bönni' na' náquië' bení' bidxinë' yödölió ni, ate' lu në'ë Lë' Dios benë' yödölió ni, pero bönachi yödölió biti' bulu'únbë'ë Lë'.

¹¹ Bidxinë' ga nequi queë', pero biti' ca' gula'zí' lu ná'agaquië' Lë' bönni' nabábalenë'.

¹² Yúgu'të bönni' gula'zí' lu ná'agaquië' Lë', bönni' ni' gula'yéajlë'ë Jesús, Lë' benë' ga dë lu ná'agaquië' ilácagaquië' xzí'inë' Dios.

¹³ Bönni' ni ná'agaquië' xzí'inë' Dios, calëga tu' ná'agaquië' xzí'inë' nu bönni', en calëga tu' nálajgaquië' ni'a que le rizë ládxe'ë nu bönni', o ni'a que tu le rë'ëne' nu bönni', pero ná'agaquië' caní tu' naca le rë'ëni quëzinë' Dios.

¹⁴ Bönni' na' náquië' Didza' guljë' bönachi, en tu chí'sö guzóalenë' rë'u, idú dzágagaca Lë' le ruzá' ládxe'ë Dios queëru', en le naca idútë li. Bilé'etu' yöl-la' zxön queë', ate' yöl-la' zxön queë' na' naca le ru'i queëbi' bi'i la's dui que, Nu na' naca Xúzibi'.

¹⁵ Juan na' benë' ba nalí queë' Bönni' na', en bë'ë zidzaj didza', rnnë':

—Bönni' ni náquië' Nu na' gudixjõ'a que, gunniá: Bönni' si' zá'tëlë' ca neda' nayëpisëtërë' ca neda', tu' zoa cazë' Lë' zí'aló ca neda'.

¹⁶ Le naca idú queë' buzí'iru' xibé yúgu'tëru', lë na' buzá' ládxe'ë queëru' Dios, en zíanrö ca' le ruzá' ládxe'ë queëru'.

¹⁷ Bidxín queëru' xibá queë' Dios lu në'ë Moisés, pero le ruzá' ládxe'ë queëru' Dios, en le naca idútë li bila'dxín queëru' lu në'ë Jesucristo.

¹⁸ Catu caz nu bilé'e Dios, pero Lë', la's dui Xzí'inë' Dios, Bönni' na' nadxí'ide'enë' Dios Xuz, Bönni' ni na' benë' ga núnbë'ëru'-në' Dios.

Le benë' ba nalí Juan, bönni' buquilë' bönachi nisa, ca náquië' Jesús

(Mt. 3:1-12; Mr. 1:7-8; Lc. 3:1-17)

¹⁹ Lë' ni naca le benë' ba nalí Juan, cate' ni' bönni' judío unná bë' nacu'ë Jerusalén gula'söl-lë'ë yugu' bixúz, en bönni' nabábagaquië' Leví, nupa ni ná'agaca ni'a ná'agaquië' bixúz, para ila'nábinë' Juan na', ila'nnë':

—¿Nuzxi bönni' li'?

²⁰ Yálajdo' bē'ē didza' Juan, en biti' gudá'baguiē', pero gudíxjö'ē catēz naca, rnnē':

—Biti' naca' Cristo, Bönni' na' guzxi' lu nē'ē Dios isól-lē'ē queēru'.

²¹ Ní'irō gula'nábinē' lē' leyúbölö, tē' lē':

—¿Nuzxi caz li'? ¿Naru' nacu' li' Elías, bönni' bē'ē didza' uláz queē' Dios dza nitē'?

Gunnē' Juan:

—Biti' naca'.

Ní'irō tē' lē':

—¿Naru' nacu' li' bönni' na' ral-la' guídē' gu'ē didza' uláz queē' Dios?

Bubi'ē didza' Juan, rnnē':

—Calēga neda'.

²² Ní'irō tē' lē':

—¿Nuzxi caz nacu'? Gudíxjö'i netu' para gaca usiyöntu' nupa gula'sól-la' netu'. ¿Bizxi rnnö' li' nuzxi nacu'?

²³ Bubi'ē didza' Juan, rē' légaquiē':

—Neda' naca' bönni' na', nazúaj lu guichi lá'ayi ca naca queē', rRNA: Riyón chi' nu rulidza lu lataj cá'asó, rRNA: Buli'béaj li nōza para ídxin Xanru' queēli'. Caní gunnē' Isaías, bönni' na' bē'ē didza' uláz queē' Dios.

²⁴ Yugu' bönni' ni nácaquiē' bönni' yudo' fariseo nasól-la'gaquiē' bönni' judío unná bē'.

²⁵ Gula'nábinē' Juan, tē' lē':

—¿Bizx que ruquilu' bönachi nisa channö cabí nacu' li' Cristo, en biti' nacu' Elías, en calēga bönni' na' ral-la' guídē' gu'ē didza' uláz queē' Dios?

²⁶ Bubi'ē didza' Juan na', rē' légaquiē':

—Neda' ruquila' bönachi nisa lu nisa, pero gatsaj láhui'lö ga zóali' zoē' tu bönni' biti' núnbē'ēli'-nē'.

²⁷ Bönni' ni náquiē' Bönni' na' si' zá'tèlē' ca neda', en nayēpisētērē' ca neda', ate' biti' naca' neda' lesaca' ulecja' xiráchuē' nudžē'.

²⁸ Yúgu'tē lē ni guca lu xiyú yödzö Betábara, ga naca ia'tsölá'a yegu Jordán, zaca' ga rilén gubidza, ga ni' buquilē' Juan bönachi nisa.

Jesús náquiē' ca bö'cu' zxlá'do' tutiē'-ba' lahuē' Dios tu' nōzi dul-la'

²⁹ Dza buropi ni' Juan bilé'enē' Jesús, zē'ē ga zoē', ate' rnnē':

—Buli'yútsöca'. Bönni' ni náquiē' bö'cu' zxlá'do' queē' Dios, gátiē' para ugüē' dul-la' nabága'gaca bönachi yödzölió.

³⁰ Lē' náquiē' bönni' na' gunniá' queē': “Si' zá'tèlē' ca neda' tu bönni', nayēpisētērē' ca neda', tu' zoa cazē' zí'alö ca neda'.”

³¹ Neda' biti' bēnbē'a-nē' zí'alö, pero bida', ruquila' bönachi nisa para ilúnbē'e bönachi Israel Lē'.

³² Benē' ba nalí Juan ca naca queē' Jesús, rnnē':

—Bilé'eda'-nē' Dios Bö' Lá'ayi, bötjē' birúajē' yehua' yubá, gunē'ē ca riná'aba' gu'dödo', ate' bidxinē' ga zoē' Jesús, en bugá'analenē' Lē'.

³³ Biti' bēnbē'eda' Lē' zí'alö. Gudxi neda' Nu na' gusól-la' neda' para uquila' bönachi nisa, gunnē': “Cate' ilé'enu'-nē' huötjē' Dios Bö' Lá'ayi, tsójsóalenē' Bönni' na', en ugá'analenē' Lē', Bönni' ni gunē' le rulu'ísö yöl-la' ridila nisa ni, uchiziē' bönachi Dios Bö' Lá'ayi.”

³⁴ Na'a, chibilé'eda' lē na', en runa' ba nalí queē' Bönni' ni, náquiē' Zxí'inē' Dios.

Yugu' bõnni' usëda zí'alò queë' Jesús

³⁵ Ia'tú dza ca', leyúbölö zoë' Juan ni', ate' nacuá'lenë' lë' chopë' bõnni' dá'gaquië' lë'.

³⁶ Cate' Juan na' bilé'enë' Jesús, ridödë' ni', ní'irö gudxë' bõnni' na' dá'gaquië' lë', rnnë':

—Buli'yutsóca'. Ní' zoë' bõnni' na' náquië' bö'cu' zxíla'do' queë' Dios, gatië' uláz quegaca bõnachi dul-la'.

³⁷ Chopë' bõnni' na' dá'gaquië' Juan bila'yönnë' didza' ni' bë'ë lë', ate' yöjnógaquië' Jesús.

³⁸ Ní'irö buécjë' Jesús, en buyúë' chopë' ni' söjnógaquië' Lë', ate' rë' légaquië':

—¿Bizxi riguíljali'?

Të' Lë':

—Bõnni' Usedi, ¿gazxi zu'?

³⁹ Bubi'ë didza' Jesús, rë' légaquië':

—Guli'dá, uyuli'.

Ní'irö yöjácalenë' Lë', en bila'lé'enë' ga na' zoë', ate' bulu'gá'analenë' Lë' dza na', tu' chizá' ra-la.

⁴⁰ Andrés, böchë'ë Simón Pedro, náquië' tuë' bõnni' chopë' ni' bila'yönnë' didza' bë'ë Juan, en yöjnógaquië' Jesús.

⁴¹ Andrés na', zí'alò yöjdiljë' bõnni' böchë'ë, lë' Simón, ate' rë' lë':

—Chibidzölitu'-në' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bõnni' nasöl-lë'ë Dios.

⁴² Ní'irö Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':

—Li' nacu' Simón, xzí'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guiöj.

Jesús rulidzë' Felipe, en Natanael

⁴³ Cate' za' rení' ia'tú dza, gú'unnë' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

⁴⁴ Náquië' Felipe bõnni' yödzö Betsaida, le naca lászagaquië' Andrés, en Pedro.

⁴⁵ Felipe budzölinë' Natanael, en rë' lë':

—Chibidzölitu'-në' bõnni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bõnni' gulu'ë didza' uláz queë' Dios. Bõnni' ni' Jesús, xzí'inë' José, bõnni' yödzö Nazaret.

⁴⁶ Natanael rë' lë':

—¿Naru' huala'tsö Nazaret tu le naca dxi'a'?

Felipe rë' lë':

—Gudá uyú'.

⁴⁷ Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bõnni' náquië' idú bõnni' Israel, en bití' rnnasë' ca' bõnni' ni.

⁴⁸ Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatë're' Felipe li', cate' ni' zu' zcan yaga higo, bilé'eda' li'.

⁴⁹ Ní'irö bubi'ë didza' Natanael, rë' Lë':

—Bõnni' Usedi, Li' nacu' Xzí'inë' Dios. Li' nacu' Nu inná be'e bõnachi Israel.

⁵⁰ Bubi'ë didza' Jesús, rë' lë':

—¿Réajlé' tso' tu' gudxa' li': Bilé'eda' li' zxan yaga higo? Yugu' le zxöntërö ca lë ni hualé'enu'.

⁵¹ Lësca' caní rë' Jesús légaquië', rnnë':

—Le nácatë rea' libí'ili, ilé'eli' nayalaj lúzxiba, en ta'benë', en tu'huötjé' gubáz lá'ayi queë' Dios ga zoa' neda', Bönni' Guljé' Bönachi.

2

Laní que yöl-la' rutsaga na' le guca lu yödzo Caná

¹ Cate' chiguca tsonna dza, guca laní que yöl-la' rutsaga na' lu yödzo Caná luyú Galilea, ate' zóanu xiné'ë Jesús ni'.

² Lësca' zoa nu bulidza Jesús, en yugu' bönni' usëda queë' dijáquië' laní na'.

³ Cate' biyadzaj xisi uva ilé'ajé', ní'irö xiné'ë Jesús gúdxinu Lë', rnnanu:

—Biti'rö dë xisi uva ilé'ajé'.

⁴ Bubi'ë didza' Jesús, rë'ë-nu:

—Nigúlado'. ¿Bizx que rulidzu' neda'? Biti' ca' ridxini dza ulu'a lahui yöl-la' huáca quia'.

⁵ Ní'irö xiné'ë Jesús gúdxinu bönni' huen dxin ta'gu'ë le tahuë', rnnanu:

—Gulí'gún yúgu'të le guíë' libí'ili'.

⁶ Nacuá' ní' xopa yusu' guiöj tu'gunë' dxin bönni' judío cate' tu'pá'a cuíngaquië' ca nalébiguequinë' tunë', en rúdzugaca chopá tsonna rö'ö nisa tu tu yusu' na'.

⁷ Jesús gudxë' yugu' bönni' huen dxin na', rnnë':

—Buli'li' yugu' yusu' ni nisa.

Bulu'lië' yugu' yusu' na' nisa.

⁸ Ní'irö Jesús rë' légaquië':

—Gulí'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'.

⁹ Buyüë' bönni' na' zoë' ra' yusu' channö nazxí'i nisa na' nuhuóáca xisi uva, pero bití' réquibe'ené' gazxi za'. Nöziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë,

¹⁰ en rë' lë':

—Zí'alö tu'nödzejë' yúgu'të bönni' xisi uva nácarö sizxí'i, en cate' chigulë'ajé' yenni', ní'irö tu'nödzejë' le cabí nazxí'i. Li', ga bidxintë na'a ben chí'u xisi uva nácarö sizxí'i.

¹¹ Yöl-la' huáca naca bë' ni benë' Jesús lu yödzo Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxon queë', ate' gula'yéajlé'ë Lë' bönni' usëda queë'.

¹² Gudödi na' guyijë' Jesús yödzo Capernaum, ate' dzágagaquië' xiné'ë, en yugu' bönni' böchë'ë, en yugu' bönni' usëda queë' Lë', ate' zían dza gula'cu'ë Capernaum na'.

Rulajtjë Jesús lö'a yudo', rubéajë' nupa tun le cabí ral-la' ilún ni'

(Mt. 21:12-13; Mr. 11:15-18; Lc. 19:45-46)

¹³ Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yödzo Jerusalén.

¹⁴ Lu yödzo na' yöjxáquië' Jesús nacu'ë bönni' lö'a yudo' ga na' túti'ë-ba' yugu' bëdxi, en yugu' bö'cu' zxila', en yugu' gu'dödo', böa' bëdxi na' tútigaquië'-ba' lahuë' Dios. Rö'ögaquië' ca' ni' bönni' tu'tsé'ë dumí za' iduté yödzo lió.

15 Cate' bilé'enë' Jesús lë ni, buzalë' yugu' du lasi le quindë' bönachi na', ate' bulágui'ë yúgu'të' ní'ilö lö'a yudo', en bulágui'ë-ba' ca' ní'ilö yugu' bö'cu' zxila', en yugu' bëdxi. Bësië' dumí quégaquië' bönni' na' tu'tsé'ë dumí lu yu, en burixë' yugu' blaga quégaquië'.

16 Ní'irö Jesús gudxë' bönni' na' túti'ë-ba' yugu' gu'dödo', rnnë':

—Guli'cúa yugu' lë ni. Biti' únili' lidxë' Xuza' tu yë'ëyi.

17 Ní'irö yöjnéguëquinë' bönni' usëda queë' Jesús le nazúaj lu guichi lá'ayi, rna: Tu' ruí'ida' ládxa'a lidxu', régui rilá ládxi'da'ahua'.

18 Ní'irö bulu'bi'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca uluf'inu' netu' le gaca bë' dë lu no'o runu' yugu' lë ni?

19 Bubi'ë didza' Jesús, rë' légaquië':

—Guli'quinnaj yudo' ni, ate' tsonna dzasö uchisa' le.

20 Ní'irö të' Lë' bönni' judío, ta'nnë':

—Idú xopa-un iz guyá' yudo' ni, ate' Li', ¿tsonna dzasö uchísatso' le?

21 Yudo' na' bë'ë didza' que Jesús naca la' cuin cazë'.

22 Que lë ni na', cate' bubanë' Jesús lu yöl-la' guti, yöjnéguëquinë' bönni' usëda queë' Jesús ca na' gunnë', ate' gula'yéajlë' le nazúaj lu guichi lá'ayi, enca' yugu' didza' bë'ë Jesús.

Jesús núnbë'ë yúgu'të bönachi

23 Cate' ni' zoë' Jesús Jerusalén, cate' raca Laní Pascua na', gula'yéajlë' bönachi zian Lë', tu' bila'lé'enë' yugu' yöl-la' huáca runë'.

24 Biti' buzxöni ládxe'ë Jesús légaquië', tu' nunbë' cazë' yúgu'të bönachi.

25 Biti' naquinnë' Jesús nu quíxjöi' i Lë' ca nácgaca bönachi, tu' nöz quézinë' Lë' le yu'u icja ládxi'do'gaca bönachi.

3

Jesús, en Nicodemo

1 Nicodemo, tu bönni' yudo' fariseo, nabábalenë' yugu' bönni' judío unná bë'.

2 Bidë' bönni' ni ga zoë' Jesús chi'i dzö'ölö, en rë' Lë':

—Bönni' Usedi. Réquibe'etu' nasöl-lë'ë Dios Li' para usédinu' netu'. Biti' séqui'në' tu bönni' gunë' yugu' yöl-la' huáca nácgaca bë' ca nácgaca le caní runu' Li' channö cabí zóalenë' Dios lë'.

3 Bubi'ë didza' Jesús, rë' lë':

—Le nácatë rea' li', nu cabí galaj leyúbölö, bití' ca' il'é lataj ga ni' rinná bë'ë Dios.

4 Nicodemo gunábinë' Lë', rnnë':

—¿Nacxi caz séqui'në' tu bönni' galjë' leyúbölö cate' chináquië' bönni' gula? ¿Naru' huácatsö tsu'ë leyúbölö lë'ënu xinë'ë, ate' galjë' ia'tú?

5 Bubi'ë didza' Jesús, rë' lë':

—Le nácatë rea' li'. Nu bönni' cabí galjë' ni'a que nisa, en ni'a queë' Dios Bö' Lá'ayi, bití' gaca tsazië' ga rinná bë'ë Dios.

6 Nu na' nalaj lu ni'a lu na' bönachi, bönáchisö naca, pero nu nalaj ni'a queë' Dios Bö' Lá'ayi, Bö' Lá'ayi nabani nu na'.

7 Biti' ubábinu' tu' rea' li', run bayudxi galju' leyúbölö.

8 Gátitës recja bö', ate' riyönnu' rnnë' bö' na', pero bití' nözinu' gazxi za', o gazxi zeaj. Lë'sca' caní raca quégaca nupa náljagaca ni'a queë' Dios Bö' Lá'ayi.

9 Ní'irö Nicodemo gunábinë' Jesús, rnnë':

—¿Nacxi caz gaca lë ni'?

10 Bubi'ë didza' Jesús, rë' lë':

—¿Ruséditsenu' li' bönachi Israel, en bití' nōzinu' yugu' lë ni?

11 Le nácatë rea' li', le nōztu' ru'ítu' didza' que, en le bilé'etu' runtu' ba nalí que, pero bití' rizí' lu ná'ali' lë na' runtu' ba nalí.

12 Channö cabí réajlë'ëli' neda' cate' ru'ílena' libí'ili' didza' ca naca le raca yödžölió ni, ¿nacxi caz gaca tséajlë'ëli' channö guía' libí'ili' le raca yehua' yubá?

13 'Catu caz gurenë' nu bönni' yehua' yubá, pero tuza' neda', Bönni' Guljë' Bönachi, bötja' birúaja' yehua' yubá, ate' zoa caza' ni' yehua' yubá.

14 Ca na' benë' Moisés lu lataj cá'asö, buchisë'-ba' bëla néquiniba' guié, budë'ë-ba' lë'e yaga, lësca' caní run bayudxi gaca quia' neda', Bönni' Guljë' Bönachi, ulu'chisë' neda' xitsá'.

15 Caní gaca quia', para cabí ila'niti yúgu'të nupa ila'yéajlë' neda', pero gata' quéguequi yöl-la' na'bán idú.

Dios nadxi'ide'enë' bönachi yödžölió

16 Tu' bidxi'ide'enë' Dios bönachi yödžölió, buzá' ládxe'ë quéguequi Zxí'inë' la' buduínë', para cabí ila'niti yúgu'të nupa ila'yéajlë' Lë', pero gata' yöl-la' na'bán idú quéguequi.

17 Dios gusöl-lë'ë Zxí'inë' yödžölió ni, calëga para ichúguië' quégaca bönachi yödžölió ni gátigaca, pero para ulu'lágaca bönachi yödžölió ni ni'a queë' Lë'.

18 Nu bönni' réajlë'ë Zxí'inë' Dios, bití' ca' narugu queë' inítië', pero bönni' na' bití' réajlë'ë Lë', chinarugu queë' gátie', tu' cabí réajlë'ë Zxí'inë' Dios la' buduínë'.

19 Que lë ni na' chinarugu quégaca bönachi gátigaca, tu' bidxinë' Bönni' na' náquië' bení' yödžölió ni, però gulunrö zxön bönachi ni le naca chul-la que dul-la' ca gulunë' zxön Bönni' na' náquië' bení', tu' nacagaca xihui' le tunë'.

20 Yúgu'të bönni' tu'ë dö' bití' raza ládxi'gaquië' bení', en bití' rídigaquië' lu bení', para cabí ilá' lahui le tunë'.

21 Nu run le naca idútë li ridxín lu bení' para gaca bë' núngaca ni'a queë' Dios le run nu na'.

Juan, bönni' ruquilë' bönachi nisa, ru'ë didza' ca naca queë' Jesús

22 Gudödi na', Jesús guyéajlenë' bönni' dá'gaquië' Lë', ate' bila'dxinë' luyú Judea, en guzóalenë' légaquië' ni', ga na' tu'quilë' bönachi nisa.

23 Lësca' ruquilë' Juan bönachi nisa ga nazí' le Enón, gala' ga dë yödžö Salim, tu' dë nisa zila lataj na', ate' ta'dxín bönachi ni', en ta'dila nisa.

24 Naca caní zí'atëlö cate' bití' idzunë' Juan na' lidxi guié.

25 Ní'irö gula'sí lógaquië' bal-lë' bönni' dá'gaquië' Juan ta'díl-lalenë' yugu' bönni' judío didza' ca naca que yöl-la' ruchi'a cuini que yudo'.

26 Bila'dxinë' ga zoë' Juan, en të' lë':

—Bönni' usedi. Buyútsöca'. Bönni' na' guzóalenë' li' ia'tsólá'a yegu Jordán, bönni' na' benu' ba nalí queë', ruquilë' bönachi nisa, ate' ta'dxín yúgu'të bönachi ga zoë'.

27 Ní'irö hubi'ë didza' Juan, rë' légaquië':

—Bití' bi dë lu në'ë nu bönni', channö cabí nudödë' Dios le lu në'ë.

28 Biyön quézili' lë na' bena' ba nalí, gunnía': "Bití' naca' neda' Cristo", però Dios nasöl-lë'ë neda' para guía' bönachi si' zë'ë Lë'.

29 Bönni' na' rizi'ë-bi' bi'i nigula rutsaga ná'abi' náquië' bönni' rutsaga në'ë, però böchi' luzë'ë bönni' rutsaga në'ë, en dzáguië' lë', ruzë náguië' didza'

ru'ë, en rudzéjanë' tu' riyönnë' didza' ru'ë bönni' rutsaga në'ë. Lësca' caní, rudzéjade'eda' neda' tu' raca lë ni caní.

³⁰Run bayudxi gácarë' zxon Cristo, pero neda', run bayudxi gácara' cuídi'sö.

Nu za' zaca' yehua' yubálö

³¹Gunnë' ca' Juan:

—Bönni' na' zë'ë zaca' xitsá'alö nayëpisëtërë' ca yúgu'të bönachi. Nu bönni' náquië' bönachi yödzölió ni, que yödzölió ni náquië', en ru'ë didza' que le raca yödzölió ni, pero Bönni' na' zë'ë zaca' yehua' yubálö nácatërë' lo ca yúgu'të bönachi.

³²Bönni' na' runë' ba nalí que le bilé'enë', en le biyönnë', pero cuntu nu rizí' lu në'e le runë' ba nalí.

³³Núti'tës bönni' rizí' lu në'ë lë na' runë' ba nalí, bönni' ni rulu'ë lahui réajlë'ë naca idútë li didza' ru'ë Dios.

³⁴Bönni' na' nasöl-lë'ë Dios, didza' queë' Dios ru'ë, tu' nuzóadërë' Dios Bö' Lá'ayi queë' lu Bönni' na'.

³⁵Dios Xuz nadxí'inë' Zxí'inë', ate' yúgu'të le dë chinudödë' lu në'ë Zxí'inë' na'.

³⁶Nu bönni' réajlë'ë Dios Zxí'ini, dë yöl-la' na'bán idú queë', pero bönni' na' biti' réajlë'ë Dios Zxí'ini, biti' idéli'në' yöl-la' na'bán na', pero nabáguë'ë xíguia' lahuë' Dios.

4

Jesús ru'ílenë'-nu didza' tu nigula Samaria

¹Bila'yönnë' bönni' yudo' fariseo ca na' dá'gaca Jesús zíanrö bönachi ca dá'gaca Juan, ate' ruquilë' ca' nisa zíanrö bönachi ca ruquilë' nisa Juan.

²Calëga Jesús caz ruquilë' bönachi nisa, pero bönni' usëda queë' tu'quilë' bönachi nisa.

³Cate' gúquibe'enë' Jesús lë ni, buzë'ë luyú Judea, ate' sa'yéajë' leyúbölö luyú Galilea.

⁴Ga ni' sa'yéajë', run bayudxi tödë' luyú Samaria.

⁵Caní guca, bidxinë' Jesús tu yödzödo' luyú Samaria, nazí'i le Sicar, gala' ga dë yu na' bunödzjë' Jacob queëbi' José, zxí'inë' Jacob na', dza ni'te.

⁶Lataj na' zoa tu yeru nisa nachö'önë' Jacobo na' ga rë'. Cate' bidxinë' Jesús ni', gurö'ë ra' yeru nisa na' tu' yöjxéqui'në' yu'ë nöza. Guca idú huagubidza.

⁷Ní'irö bidxinnu tu nigula Samaria ni' para sí'inu nisa. Jesús rë'ë-nu:

—Benna le guí'ja'.

⁸Tuzë' zoë' Jesús tu' chisöjáquië' bönni' usëda queë' lu yödzö söjxí'gaquië' le ilahuë'.

⁹Ní'irö nigula Samaria na' rënu Jesús, rnnanu:

—¿Rinábítsenu' neda' le guí'ju', en nacu' bönni' judío? Neda' ni naca' nigula Samaria.

Caní gunnánu tu' cabí ta'dzaga dxi'a bönachi Samaria len bönachi judío.

¹⁰Bubi'ë didza' Jesús, rë'ë-nu:

—La'tu' núnbë'u le runödzjë' Dios, en Nuzxi na' rë li': “Benna le guí'ja'”, li' inabu', ate' Lë' gunnë' quiu' nisa runna yöl-la' na'bán.

¹¹Ní'irö nigula na' rënu Lë', rnnanu:

—Bönni', biti' nu'u le cuéaju' nisa, ate' yeru nisa ni, dxí'tërö rö'. ¿Gazxi dë nisa na' runna yöl-la' na'bán?

12 ¿Naru' nácaterötso' Li' zxön ca xúziru' gudödi Jacob, bönni' ni' bennë' queëtu' yeru nisa ni, ga ni guzxi'ë nisa gu'ë, en gulë'ajbi' ca' zxi'inë', en gulë'ajba' ca' böa' bëdxi queë'?

13 Bubi'ë didza' Jesús, rë'ë-nu:

—Núti'tës nu guí'aj nisa ni, leyúbölö ubidxi nisa,

14 pero nu guí'aj nisa na' unödza' neda', biti'rö ubidxi icja ládxi'da'ahuë', tu' unödza' queë' nisa na' gaca lu icja ládxi'da'ahuë' ca tu ga ralaj nisa, le guí'i yöl-la' na'bán idú queë'.

15 Ní'irö nigula na' rënu Lë', rnnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

16 Jesús rë'ë-nu:

—Guyéaj, yöjlidzë' bönni' quiu', ate' huödu' ni.

17 Bubi'ínu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácate' rno': "Cuntu nu zoa bönni' quia",

18 tu' chiguzóalenu' gayu' bönni', ate' bönni' na' zóalenu'-në' na'a, bití' náquië' bönni' quiu'. Didza' ni ru'u, ca nácate' rno'.

19 Ní'irö nigula na' rënu Lë', rnnanu:

—Bönni', runi neda' nacu' bönni' ru'ë didza' uláz queë' Dios.

20 Xuz xtó'oru' guléquinë' Dios le bach lu guí'a ni, pero rnnali' libí'ili' Jerusalén naca ga ral-la' ilequi bönachi Dios le bach.

21 Jesús rë'ë-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-la' bití' idisóali' guí'ado' ni, en bití' tsójsóali' Jerusalén.

22 Libí'ili' reaj ládxi'li' Nu bití' núnbë'ëli', pero netu' núnbë'ëtu' Nu na' reaj ládxi'tu', tu' benë' queë' Dios ilá' lahui yöl-la' rusölá ni'a quégaquië' bönni' judío.

23 Na'a, za' dza, en chiridxín dza na', cate' nupa le nácate' ta'yéaj ládxi'gaca Dios, ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë' li, tu' rë'ënë' Dios Xuz ilácagaquië' queë' bönni' ila'yéaj ládxi'gaquië' Lë' caní.

24 Dios náquië' Bö', ate' nupa ta'yéaj ládxi'gaca Lë', run bayudxi ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë' li.

25 Ní'irö nigula na' rënu Lë', rnnanu:

—Nözda' ral-la' guidë' Mesías, Bönni' na' lë' Cristo. Cate' guídirë' Lë' quíxjöi'inë' rë'u yúgu'të.

26 Jesús rë'ë-nu:

—Lë' cazë' ruí'ilenë' li' didza'.

27 La' náasö bulu'dxinë' bönni' usëda queë' Jesús, ate' bulu'bábinë' tu' ruí'ilenë'-nu nigula didza', pero bití' burúguinë' nitúë' inábinë' Lë', cabí innë': "¿Bizxi rinábinu' lënu?" o: "¿Bizxi didza' ruí'ilenü'-nu?"

28 Ní'irö nigula na' bucá'anau xichö'önu ní', ate' böajnu la' yödzö, söjödxi nu nupa nacuá' ni', rnnanu:

29 —¡Guli'dá, ilé'eli'-në' tu bönni' gudxë' neda' yúgu'të le chinuna'! ¿Naru' cabí nácatsë' Lë' Cristo?

30 Ní'irö bila'ruáj bönachi yödzö na', en bila'dxín ga zoë' Jesús.

31 Tsanni ni' söhuöajnu nigula na', bönni' usëda queë' Jesús gulunë' bayudxi, të' Lë':

—Bönni' Usedi, gudagu.

32 Jesús rē' légaquiē':

—Dē tu le rahua', le cabí réquibe'eli'.

33 Ní'irō gula'nabi luzá'agaquiē' bōnni' usēda queē' tuē' ia'tuē', ta'nnē':

—¿Zoa nu chidiguá'tsō le gudahuē'?

34 Ní'irō Jesús rē' légaquiē':

—Le nabánida' naca guna' ca rē'ēnē' Xuza' nasōl-lē'ē neda', en údxi guna' xichinē'.

35 Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Guli'chisa loli' uyuli' bōnachi nácagaca ca gapa nadúzgaca, le chin-abídxigaca para tsōjláparu'.

36 Bōnni' na' rulapē' rizi'ē lazxjē', ate' lē na' rulapē' bōnni' na', naca para gata' yōl-la' na'bán idú quégaca bōnachi, para gaca ulu'dzeja tsōzxōn nu raza, en nu rulapa.

37 Naca idútē li lē na' rnna caní: Tu nu raza, ate' ia'tú nu rulapa.

38 Neda' gusōl-la'a libí'ili' tsōjlápali' ga bití' gúzali'. Gulún bōnachi yúbōlō dxin guláz, ate' libí'ili' ruzi'ili' xibé dxin na' nūngaquiē'.

39 Zían bōnachi Samaria nacuá' yōdzō Sicar na' gula'yéajlē'ē Jesús ni'a que xtídza'nu nigula na' bennu ba nalí queē', gunnānu: "Gudxē' neda' yúgu'tē le chinuna'."

40 Cate' bila'dxinē' bōnni' Samaria ga ni' zoē' Jesús, guláta'yuē' lahuē' ugá'analenē' légaquiē'. Jesús bugá'anē' ni' ia'chopa dza.

41 Caní guca, ziantērē' ca' bōnni' ni' gula'yéajlē'ē Jesús ni'a que didza' bē'ē.

42 Ní'irō bōnni' ni' gulē'-nu nigula na', ta'nnē':

—Na'a réajlē'ētu' Lē', calégasō ni'a que didza' bē'u li', pero lēasca' tu' biyōnitu' netu' Lē', en nōztu' le nácatē bōnni' ni náquiē' Cristo, Nu rusólá bōnachi yōdzōlió.

Ruúnē' Jesús zxi'inē' tuē' bōnni' dē lu nē'ē

43 Ia'chopa dza ca', buzē'ē Jesús luyú Samaria, en sa'yéajē' luyú Galilea.

44 Caní benē', tu' gudíxjō'ē Lē cazē' Jesús, gunnē': "Bōnachi uláz queē' nu bōnni' ru'ē didza' uláz queē' Dios bití' tun lē' bal."

45 Cate' bidxinē' Jesús luyú Galilea, gulunē' bōnni' Galilea na' Lē' bal tu' yōjáquiē' ca' Jerusalén cate' guca Laní Pascua, en bila'lé'enē' le benē' Jesús ni'.

46 Ní'irō bōajē' Jesús yōdzō Caná luyú Galilea, ga ni' benē' ga bōáca nisa xisi uva. Lu yōdzō Capernaum na' zoē' tu bōnni' dē lu nē'ē uláz queē' bōnni' rinná bē'ē, ate' ré'ebi' bi'i bōnni' queē' bōnni' na' dē lu nē'ē.

47 Cate' biyōnnē' bōnni' ni' chibuzē'ē Jesús luyú Judea, en budxinē' luyú Galilea na', ní'irō guyijē' ga na' zoē' Jesús, en gúta'yuē' lahuē' guídē' lidxē', para uduhuénē'-bi' bi'i bōnni' queē' na', tu' chirequi gátibi'.

48 Ní'irō Jesús rē' lē':

—Bití' ca' tséajlē'ēli' channō cabí ilé'eli' le nácagaca bē', en yugu' yōl-la' huáca guna'.

49 Ní'irō bōnni' na' dē lu nē'ē uláz queē' bōnni' rinná bē'ē gudxē' Jesús, rnnē':

—Bōnni', gudía'tē para cabí gátibi' bi'i quia'.

50 Ní'irō Jesús rē' lē':

—Bōaj lidxu'. Nabanbi' bi'i quiu'.

Bōnni' ni' guyéajlē'ē didza' bē'ē Jesús, ate' sōhuōjē'.

51 Tsanni ni' yu'ē nōza sōhuōjē', duzxi'gala'gaquiē' lē' bōnni' huen dxin queē' ate' gula'guixjō'inē' lē', ta'nnē':

—Nabanbi' bi'i quiu'.

⁵² Gunábinë' légaquië' bátaxi gusi lo ruhuóáca ládxi'bi'. Të' lë':

—Ba'ayi, idú huagubidza, burúaj xilá yú'ubi'.

⁵³ Ní'irò gúquibe'enë' xúzibi' bi'i na', bôácabi' cate' ni' b'é'lenë' Jesús lë' didza', en gudxë' lë': "Nabanbi' bi'i quiu'." Que lë' ni na' guyéajlë'ë Jesús, ate' gula'yéajlë' ca' Lë' bônachi nacua' lidxë'.

⁵⁴ Yöl-la' huáca ni naca le buropi benë' Jesús cate' ni' zoë' luyú Galilea, gudödi buzë'ë luyú Judea.

5

Ruúnë' Jesús tu bönni' nacú'unië' bin ga nazí' i le Betesda

¹ Gudödi guca lë' ni, guca laní quégaquië' bönni' judío, ate' guyijë' Jesús Jerusalén.

² Lu yödzo na', gala' ga tu'ú'uba' bö'cu' xzila', dë' tu le zxön yudzu nisa, nazí' i le Betesda lu didza' hebreo, en nacua' gayu' chila don que.

³ Yugu' lu chila na' dégaquië' zían bönni' té'enë', bönni' nachul-la lógaquië', en bönni' biti' gaca sá'gaquië', en bönni' nacú'unigaquië' bin. Ta'bözë' bata utá cuini nisa na'.

⁴ Caní raca, tu' ruhuötjë' tu gubáz lá'ayi queë' Dios tu chi'i huéaj, en röjtsu'ë lu nisa na', en rutë' nisa na'. Huóacaté' nu bönni' tsöjtsú'utië' lu nisa na' cate' rutá cuini ca naca bití'tës yödzo'huë' raca queë'.

⁵ Zoë' tu bönni' ni', chiguca chixxunu' uruá' iz ré'enë'.

⁶ Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba ré'ënu' huóácu'?

⁷ Bubi'ë didza' bönni' huë' na', ré' Jesús:

—Bönni', cuntu nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yúbölö zí'alö ca neda'.

⁸ Jesús ré' lë':

—Guyaschi. Buá' le denu', en guzë'e.

⁹ La' bôacaté' bönni' na', ate' bu'ë le gúti'në', en guzë'ë. Dza na' raca caní naca dza lá'ayi quégaquië' bönni' judío.

¹⁰ Ní'irò bönni' judío unná bë' gulë' bönni' na' nuhuóáquië', ta'nnë':

—Dza lá'ayi naca na'a. Biti' ral-la' u'u le ráti'nu'.

¹¹ Bubi'ë didza' bönni' na', ré' légaquië':

—Bönni' na' bunë' neda' gudxi cazë' neda', gunnë': "Buá' le denu', en guzë'e." Bönni' na' bunë' neda'.

¹² Ní'irò gula'nábinë' lë', ta'nnë':

—¿Nuzxi na' gudxi caní li': "Buá' le denu', en guzë'e"?

¹³ Biti' nözinë' bönni' na' nuhuóáquië' nuzxi na', tu' chibuzë'ë Jesús lataj ni' tu' nacua' bônachi zían ni'.

¹⁴ Gudödi guca lë' ni, Jesús yöjxáquië' bönni' na' ga naca chila yudo', ate' ré' lë':

—Buyútsöca'. Chibóacu'. Biti'rö gunu' dul-la', para cabí gaca quiu' tu le nácarö zí' ca lë' na' guca quiu'.

¹⁵ Guyijë' bönni' na', yöjtáxjöi'inë' yugu' bönni' judío unná bë' Jesús na' bunë' lë'.

¹⁶ Que lë' ni na' bönni' judío unná bë' gula'bía ládxi'gaquië' Jesús, en gulë'ënnë' ilútië' Lë', tu' runë' yugu' lë' ni cate' naca dza lá'ayi quégaquië'.

17 Bubi'ë didza' Jesús, rë' légaquië':

—Xuzá' ná'atë runë' dxin, ate' neda' ca' runa' dxin.

18 Que lë ni na' gulë'ënirönë' bönni' judío unná' bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunné' Dios caz náquië' Xuzë', ate' caní naca nun cuinë' ca náquië' Dios.

Yöl-la' unná' bë' dë lu në'ë Zxí'inë' Dios

19 Ní'irö bubi'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxí'inë' Dios, rácasö quia', pero tuz lë na' rilé'eda' runë' Dios Xuz. Yúgu'të le runë' Dios Xuz, lësca' caní runa' neda', Zxí'inë'.

20 Dios Xuz nadxí'inë' neda', Zxí'inë', en ruluí'inë' neda' yúgu'të le runë', ate' yugu' le zxöntërö ca lë ni uluí'inë' neda', le ilún ga ubánili' libí'ili'.

21 Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, lësca' caní runa' neda', Zxí'inë', runödza' quégaca bönachi yöl-la' na'bán ca rë'ëni quézida'.

22 Cuntu nu ruchi'a rusöröë' Dios Xuz, pero chinudödë' lu na'a neda', Zxí'inë', yúgu'të yöl-la' unná' bë' para uchi'a usöröa' bönachi.

23 Caní naca para ilún bal yúgu'të bönachi neda', Zxí'inë', ca na' tun bal Dios Xuz. Nu bití' run bal neda', Zxí'inë', bití' run bal Dios Xuz, nasöl-lë'ë neda', Zxí'inë' na'.

24 Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasöl-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidë yöl-la' na'bán idú queë'.

25 Le nácatë rea' libí'ili', za' dza, en chiridxín dza na', cate' ila'yöni nupa chinátigaca chí'a neda', Zxí'inë' Dios, ate' nupa ila'yöni xtídza'a, en ilún ca rna, huóata' yöl-la' na'bán quéguequi.

26 Ca na' dë lu në'ë Dios Xuz unödzejë' yöl-la' na'bán quégaca bönachi, lësca' caní benë' ga dë lu na'a neda', Zxí'inë', unödza' yöl-la' na'bán quégaca bönachi.

27 Lësca' caní budödë' lu na'a yöl-la' unná' bë' uchi'a usöröa' bönachi, tu' naca' Bönni' Guljë' Bönachi.

28 Bití' ubánili' ca naca lë ni, tu' huadxín dza cate' yúgu'të nupa chinátigaca ila'yöni chí'a,

29 en ulu'rúaj yeru ba. Ulu'bán nupa na' gulún le naca tsahui', en huóata' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

Le naca bë' le náquië' Jesús

30 Gunnë' ca' Jesús:

—Bití' bi gaca guna' la' néda'sö. Ca naca le riyönda' rë' Xuzá' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca rë'ënisida' neda', pero ca rë'ëni quézinë' Xuzá' nasöl-lë'ë neda', runa'.

31 Channö neda' runa' ba nalí que la' cuin caza', bití' naca lesaca' lë na' runa' ba nalí.

32 Zoa Nu yúbölö Nu run ba nalí quia' neda', Lë' Xuzá', ate' nözda' naca lesaca' le runë' ba nalí quia'.

33 Libí'ili' gusól-la'li' bönni' yöjnábiguequinë' Juan, ate' lë na' benë' ba nalí quia' naca idútë li.

34 Neda' bití' naquinda' nu bönni' gunë' ba nalí quia', pero ruá'a didza' caní para uláli'.

³⁵ Didza' bē'ē Juan na' gulaca ca tu guí' yōri, le guyegui, en buzení', ate' libí'ili', tu chí'isō guyaza ládxí'li' uzí'ili' xibé bení' queē'.

³⁶ Na'a, zoa le run ba nalí quia' neda' le nácarō idú li ladxe' ca lē na' benē' ba nalí quia' Juan. Yugu' le budödē' Dios Xuz lu na'a guna', la' leze na' runa', ate' yugu' lē na' runa', tun ba nalí quia', en náca'gaca bē' gusöl-lē'ē Dios Xuz neda'.

³⁷ Lē'sca' Dios Xuz nasöl-lē'ē neda' runē' ba nalí quia'. Catu caz biyōnili' chí'ē, en catu caz bilé'eli' lahuē'.

³⁸ en cabí nazi' lu ná'ali' xtídzē'ē, tu' cabí réajlē'ēli' neda', Nu na' gusöl-lē'ē.

³⁹ Rusédali' le nazúaj lu guichi lá'ayi, tu' réquili' huáta' yöl-la' na'bán idú queēli' ní'a que lē na' nazúaj lu guichi lá'ayi, ate' lē na' nazúaj lu guichi run ba nalí quia' neda'.

⁴⁰ Biti' rē'enili' guídali' quia' neda' para gata' yöl-la' na'bán queēli'.

⁴¹ 'Biti' riguilja' yöl-la' ba le ila'gú'u bönachi neda'.

⁴² Neda' nún'bē'a libí'ili', en nōzda' bití' nadxí'ili'-nē' Dios.

⁴³ Bidxina' ni uláz queē' Dios Xuz, ate' libí'ili' bití' rizí' lu ná'ali' neda', pero channō huadxín nu yúbölō nu guídí rácasō que, si' lu ná'ali' nu na'.

⁴⁴ ¿Nacxi caz gaca tséajlē'ēli' Dios channō rizí'ili' yöl-la' run zxön que luzá'ali' tuli' ia'tuli', en bití' riguiljalí' yöl-la' run zxön na' za' lu nē'ē la's dui Dios?

⁴⁵ Biti' uzóa ícjali' uzéguia' libí'ili' didza' lahuē' Xuza'. Nu na' uzegui libí'ili' didza' naca lē cazē' Moisés, bōnni' na' ruzxōni ládxí'li'-nē', sal-la' gútiē' dza ní'te.

⁴⁶ La'tu' réajlē'ēli'-nē' Moisés, tséajlē'ēli' ca' neda', tu' buzúajē' Moisés lu guichi ca naca quia' neda'.

⁴⁷ Na'a, ¿nacxi caz gaca tséajlē'ēli' didza' ruá'a neda' channō cabí réajlē'ēli' yugu' le buzúajē' Moisés lu guichi?

6

Rugahuē' Jesús zianrō ca chi-un gayuá' bönachi
(Mt. 14:13-21; Mr. 6:30-44; Lc. 9:10-17)

¹ Gudōdi guca lē ni, guyijē' Jesús ia'tsólá'a Nísado' Que Galilea, nazí'i le ca' Nísado' Queē' Tiberias.

² Bönachi zían yōjnógaca Jesús tu' bila'lé'e yugu' yöl-la' huáca benē', cate' bunē' bōnni' té'enē'.

³ Ní'irō gurenē' Jesús, guyijē' ga naca tu lu guí'ado', ga ní' gurō'ōlenē' yugu' bōnni' usēda queē'.

⁴ Chizóa idxín Laní Pascua cate' tu'subanē' bōnni' judío ca benē' Dios, bubéajē' xuz xtó'ogaquiē' luyú Egipto.

⁵ Cate' guchisa lahuē' Jesús, en bilé'enē' bönachi zían zá'gaca ga zoē', ní'irō rē' Felipe:

—¿Gazxi tsōjō'uru' yōta xtila le ilágugaca bönachi zían ní'?

⁶ Caní gunnē' Jesús para si' bē'ē Felipe na', tu' chinōzinē' Lē' naca gunē'.

⁷ Bubi'ē didza' Felipe, rnnē':

—La'tu' sí'iru' yōta xtila len láxjaru' que idú xunu' beo', bití' guequi láti'do' huéaj le ilágugaca bönachi zían ní'.

⁸ Ní'irō tu bōnni' usēda queē' Jesús, lē' Andrés, bōchē'ē Simón Pedro, rē' Lē', rnnē':

⁹ —Ni zóabi' tubi' bí'i bōnni', nuá'abi' gayu' yōta xtila néquiguequini zxoa' cebada, en chópaba' böla cuídí'do'. ¿Naru' huéqui'tse ugagu le do' ni cate' xō bönachi?

10 Ní'irö Jesús rë' légaquië':

—Guli'gún ga ila'bõ' bõnachi zían ni lu yu.

Lataj na', rö'õda' daca', ate' gula'bõ'ë idú ca chi-un gáyu'ë bõnni' ni'.

11 Ní'irö gudélë'ë Jesús yugu' yõta xtila na'. Cate' chigudxë' Dios: "Xclenu", gudisië' le quegaquië' bõnni' usëda queë', ate' légaquië' gula'guisië' le quegaca yúgu'të nupa na' rö'gaca lu daca' ni'. Lësa' caní gulunë' quegacaba' bõla cuídi'do' na', ate' gulahuë' tsca gulë'ënnë' ilahuë'.

12 Cate' chibulu'huõljanë', Jesús gudxë' yugu' bõnni' usëda queë', gunnë':

—Buli'túbi le bizxaj nagá'anagaca, para cabí ilaca ditaj.

13 Bulu'tubë' ca', ate' bulu'lié' chinnu ga'bõrado' yugu' le bizxaj quegaca gayu' yõta xtila néquiguequini zxoa' cebada na', le bulu'gá'ana quegaquië' bõnni' na' gulahuë'.

14 Cate' bila'lé'enë' bõnni' ni' yõl-la' huáca na' benë' Jesús, ta'nnë':

—Le nácatë bõnni' ni náquië' bõnni' na' ru'ë didza' uláz queë' Dios, bõnni' na' ral-la' guidë' yõdzõliõ ni.

15 Tu' réquibe'enë' Jesús té'ënnë' ila'chë'ë Lë' bayudxi para ilunë' ga inná bé'enë' légaquië', que lë ni na' buzë'ë ni', sa'yéajë' tuzë' tu lu gu'á.

Rizë'e ni'ë Jesús lu nísado'

(Mt. 14:22-27; Mr. 6:45-52)

16 Cate' chizá' ral-la, yõjáquië' bõnni' usëda queë' Jesús, ate' bila'dxinë' ra' nísado'.

17 Gula'benë' tu lë'e bárcodo' ni', en sõjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë.

18 Gusí lo recja bõ' budunu' lu nísado' na', ate' riyasa ridxía nisa na'.

19 Cate' chibulu'së'ë bárcodo' na', le guzá' le naca tsca rizá'aru' tu hõrasõ, ní'irõ bila'lé'enë' Jesús rizë'e ni'ë lu nísado' na', en zë'ë ribíguë'ë ga na' zeaj barco na', ate' guladxi gula'dzõbinë'.

20 Ní'irö Jesús rë' légaquië':

—Neda' caz ni. Biti' gádxili'.

21 Ní'irö len yõl-la' rudzeja quegaquië' bulu'guélë'ë Lë' lë'e bárcodo' na', ate' la' bidxintë bárcodo' na' lu yu bidxi ga ni' sõjáquië'.

Bõnachi zían tu'gulaj Jesús

22 Dza buropi ni', gulë'quibe'e bõnachi zían na' nagá'anagaca ia'tsõlá'a nísado' bidxín tuz bárcodo' ni', ate' Jesús biti' gurénlenë' yugu' bõnni' usëda queë' lë'e bárcodo' na', pero légacasë' na' yõjáquië'.

23 Ní'irõ bila'rúaj ia'bal-la bárcodo' lu yõdzõ Tiberias, ate' bila'dxín tu lataj le dë gála'sõ ga ni' gulahuë' yõta xtila cate' ni' Xanru' Jesús gudxë' Dios: "Xclenu" que.

24 Tu' bila'lé'enë' bití'rõ zoë' Jesús ni', en biti' nacu'ë bõnni' usëda queë' ni', que lë ni na' gula'benë' lë'egaca bárcodo' na', ate' yõjáquië' Capernaum, tu'guljë' Jesús.

Náquië' Jesús yõta xtila nabánigaca tsaz bõnachi

25 Cate' bila'dxín bõnachi zían na' ia'tsõlá'a nísado' na', yõjácá'gaquië' Jesús, en të' Lë':

—Bõnni' Usedi, ¿bátaxi bidxinu' ni'?

26 Bubi'ë didza' Jesús, rë' légaquië':

—Le nácatë rea' libí'ili': Ruguilajli' neda', calëga tu' bilé'eli' yugu' yõl-la' huáca bena', pero tu' gudáguli' yõta xtila ni', en bõljali'.

²⁷ Guli'gún dxin, calëga para sí'ili' la' huagu ridödi que, pero para sí'ili' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljé' Bönachi, gunna' queëli', tu' bulu'ë lahui Xuza' Dios naca' Zxi'iné'.

²⁸ Ní'irö gula'nábinë' Lë', ta'nné':

—¿Bizxi run bayudxi guntu' para guntu' le raza ládxë'ë Dios?

²⁹ Bubi'ë didza' Jesús, rë' légaquië':

—Lë ni le raza ládxë'ë Dios, tséajlë'ëli' neda', naca' nu gusöl-lë'ë Lë'.

³⁰ Ní'irö gula'nábinë' Lë', ta'nné':

—¿Bizxi le naca bë' runu', le ilé'etu' para tséajlë'ëtu' Li'? ¿Bizxi yöl-la' huáca runu'?

³¹ Gulahuë' xuz gudödi queëru' yöta xtila nazí'i le maná lu lataj cá'asö, ca nazúaj lu guichi lá'ayi, rnna: "Yöta xtila que yehua' yubá Moisés bë'ë quégaquië', gulahuë'."

³² Bubi'ë didza' Jesús, rë' légaquië':

—Le nácatë rea' libí'ili': Calëga Moisés na' bennë' queëli' yöta xtila que yehua' yubá, pero Xuza' Dios runnë' queëli' yöta xtila le naca idú que yehua' yubá.

³³ Yöta xtila na' runnë' Dios quégaca bönachi naca' neda', lë na' birúaj yehua' yubá, en runödzej yöl-la' na'bán quégaca bönachi yödziöli ni.

³⁴ Ní'irö të' Lë':

—Xan, bénnatica'sö queëtu' yöta xtila na'.

³⁵ Jesús rë' légaquië':

—Neda' caz naca' yöta xtila nabánigaca tsaz bönachi. Nu za'len neda', huölaj udzë' tsaz nu na' le naca queë' Dios, ate' nu tséajlë' neda', chinë'aj tsaz le naca queë' Dios.

³⁶ Naca ca na' chigudxi caza' libí'ili': "Sal-la' rilé'eli' neda', biti' ca' réajlë'ëli' neda'."

³⁷ Yúgu'të nupa na' runnë' Xuza' quia', ídigaca quia', ate' nupa na' zaca quia', biti' usá'gaca'-né'.

³⁸ Caní naca, tu' bötja' birúaja' yehua' yubá, calëga para guna' ca rë'ënda' neda' caz, pero para guna' ca rë'ënë' Dios Xuz, nasöl-lë'ë neda'.

³⁹ Lë ni le rë'ënë' Xuza' nasöl-lë'ë neda', rë'ënë' cabí unítia' nitú nupa na' bennë' quia', pero usubana' léguequi dza údxi.

⁴⁰ Lë ni le rë'ënë' Dios Xuz nasöl-lë'ë neda', rë'ënë' gata' yöl-la' na'bán quéguequi, yúgu'të nupa na' ila'l'é'e neda', Zxi'iné', en ila'yéajlë' neda', ate' neda' usubana' léguequi dza údxi na'.

⁴¹ Ní'irö gula'nnë' queë' Jesús bönni' judío unná bë' tu' gunné': "Neda' caz naca' yöta xtila na' bötja', birúaj yehua' yubá."

⁴² Que lë ni na' ta'nné':

—¿Naru' cabí bönni' ni Jesús, zxi'iné' José? Nunbë' cazaru' xuz xinë'ë. ¿Nacxi caz naca na', rnnë' bönni' ni: "Bötja' birúaja' yehua' yubá"?

⁴³ Ní'irö hubi'ë didza' Jesús, rë' légaquië':

—Biti' innëli' quia' la' libí'isili'.

⁴⁴ Biti' séqui'në' nitúë' bönni' guidé' quia' channö cabí idigu'ë quia' Xuza' nasöl-lë'ë neda' nu na', ate' neda' usubana' nu na' dza údxi.

⁴⁵ Nazúaj lu guichi lá'ayi ca gula'nnë' bönni' gulu'ë didza' uláz queë' Dios, le rnna caní: Dios usédinë' yúgu'të bönachi. Que lë ni na', yúgu'të bönni' ta'yönnë' chi'ë Xuza', en nazédagaquië' lu në'ë Lë' zá'gaquië' quia'.

46 'Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quezinë' Dios Xuz.

47 Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'.

48 Neda' caz naca' yöta xtila nabánigaca tsaz bönachi.

49 Gulahuë' xuz xtó'oli' yöta xtila na' nazí'i le maná lu lataj cá'asö, en cate' bizá'a dza quegaquië' gulatië'.

50 Neda' naca' yöta xtila ruhuötaj rirúaj yehua' yubá, ate' núti'tës bönni' gahuë' le, bití' ca' gátië' bönni' na'.

51 Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö núti'tës bönni' gahuë' yöta xtila na', gaca bántica'së' bönni' na'. Yöta xtila na' runödza' neda' naca xipéla'a, le runödza' para gata' yöl-la' na'bán quegaca bönachi yödölió.

52 Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunnë' queëru' xipélë'ë le gáguru'?

53 Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipéla'a neda', Bönni' Guljë' Bönachi, en channö cabí gu'jali' xichöna', bití' ca' zóalen libí'ili' yöl-la' na'bán na'.

54 Núti'tës nu gagu xipéla'a, en gu'aj xichöna', dë que yöl-la' na'bán idú, ate' neda' usubana' nu na' dza údxi.

55 Caní gaca, tu' naca xipéla'a la' huagu idú, ate' xichöna' naca tu le naca idú para nu gu'aj le.

56 Núti'tës bönni' gahuë' xipéla'a, en gu'jë' xichöna', sóalentic'a'së' bönni' na' neda', ate' neda' sóalentic'a'sa' lë'.

57 Ca na' zoë' nabanë' Dios Xuz nasól-lë'ë neda', ate' neda' nabánida' Lë', lësca' caní ibáninë' neda' núti'tës bönni' gahuë' neda'.

58 Lë ni yöta xtila bötaj birúaj yehua' yubá, en bití' naca ca yöta xtila na' nazí'i le maná, lë na' gulahuë' xuz xtó'oli', en cate' bizá'a dza quegaquië', gulatië'. Núti'tës bönni' gahuë' yöta xtila ni sóatic'a'së' ibanë'.

59 Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca lë ni tsanni ni' rusédinë' bönachi Capernaum.

Didza' rúnagaca queëru' yöl-la' na'bán idú

60 Cate' bila'yönnë' didza' ni, zían bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca si' lu në'e le?

61 Réquibe'enë' Jesús ta'nnë' bönni' usëda queë' que xtídzë'ë, ate' gunábinë' légaquië', rnnë':

—¿Naru' run didza' ni libí'ili' zí'?

62 ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'aló?

63 Le naca queë' Dios Bö' Lá'ayi naca le runna yöl-la' na'bán queëli'. Le naca béla'sö cuntu nu uzí' xibé. Didza' na' bé'léna' libí'ili' nácagaca queë' Dios Bö' Lá'ayi, en rúnagaca yöl-la' na'bán quegaca bönachi.

64 Na'a, bál-lali' bití' réajlë'ëli'.

Gunnë' caní Jesús tu' nözinë' dza ni'te nupa na' bití' ta'yéajlë', enca' nu na' udödi Lë' lu ná'agaquië' bönni' ilútië' Lë'.

65 Que lë ni na' gunnë':

—Que lè ni na' chigudxi caza' libí'ili: Biti' séqui'nè' nitué' bönni' t'è'è neda' channö Dios Xuz cabí gu'è lè' lataj.

⁶⁶ Dza na' gulaca chopa ládxi'gaquiè' zían bönni' usèda queè', en biti'rö gula'dálenè' Lè'.

⁶⁷ Ní'irö Jesús gunábinè' idxínnutè' bönni' usèda queè' na', rè' légaquiè':

—¿Naru' ubíga'tsali' ca' libí'ili'?

⁶⁸ Bubi'è didza' Pedro, rè' Lè':

—Xan, ¿nuzxi que tséajtu'? Li' napu' didza' rúnnagaca queétu' yöl-la' na'bán idú.

⁶⁹ Netu' réajlè'ètu' Li', en núnbè'ètu' Li', nacu' Cristo na' nasöl-lè'è Dios, en nacu' ca' Zxí'inè' Dios ban.

⁷⁰ Bubi'è didza' Jesús, rè' légaquiè':

—Gurö caza' libí'ili' chínnuli' ni, pero tuè' bönni' ládajli' libí'ili' dzaga tu' xihui' lè'.

⁷¹ Didza' ni b'è'è Jesús ca naca queè' Judas Iscariote, zxi'inè' tu bönni' lè' Simón, tu' náquiè' Judas bönni' na' udödè' Jesús lu ná'agaquiè' bönni' ilútiè' Lè', en nabábalenè' ia' chinéajè' bönni' usèda queè' Jesús.

7

Bönni' böchi' cazè' Jesús biti' ta'yéajlè'è Lè'

¹ Gudödi guca lè ni ridè' Jesús luyú Galilea. Biti' gú'unnè' tsejè' luyú Judea tu' t'è'ennè' bönni' judío unná bè' nacu'è ni' ilútiè' Lè'.

² Dza ni' chizóa idxín laní quégaquiè' bönni' judío cate' tu'subanè' ca gula'cu'è xuz xtó'ogaquiè' zxan libín lága'do'.

³ Que lè ni na' yugu' bönni' böchè'è Jesús gulè' Lè', ta'nnè':

—Birúaj ni, en guyéaj luyú Judea para ila'lé'enè' ca' bönni' usèda quiu' nacu'è ni' yugu' yöl-la' huáca runu'.

⁴ Channö r'è'è'nè' nu bönni' ilúnbè'e bönachi lè', biti' runè' bagáchi'sö le runè'. Tu' runu' yugu' yöl-la' huáca caní, buluí'i cuinu' lógaca yúgu'tè bönachi.

⁵ Caní gula'nnè', tu' cabí ta'yéajlè'è bönni' böchè'è Jesús Lè'.

⁶ Ní'irö Jesús rè' légaquiè':

—Biti' ridxini dza quia' para uluf'i lahua' lógaca bönachi, pero dza queéli' tséajli' ni' chizóa caz.

⁷ Bönachi yödzülió ni biti' tu'zóa libí'ili' tsólá'aló, pero tu'zóa neda' tsólá'aló tu' runa' ba nalí quégaquiè', rnnía' naca xihui' le tunè'.

⁸ Gulí'tséaj libí'ili' laní na'. Biti' tseja' laní na' na'a tu' bití' ridxini dza quia'.

⁹ Cate' chigudxè' légaquiè' lè ni, bugá'anè' luyú Galilea.

Sa'yéajè' Jesús laní quégaca bönachi judío

¹⁰ Gudödi söjáquiè' bönni' böchè'è Jesús laní na', ní'irö sa'yéajè' ca' Lè', calèga yálajdo', pero bagáchi'sö sa'yéajè'.

¹¹ Ga na' raca laní na', bulu'guiljè' bönni' judío unná bè' Jesús, ta'nnè':

—¿Gazxi zoè' bönni' na'?

¹² Bönachi zían ni' gulu'ida' didza' ca naca queè' Jesús. Bal-lè' ta'nnè':

—Náquiè' dxi'a.

Ia'bal-lè' ta'nnè':

—Biti' náquiè' dxi'a tu' rizi' yé'enè' bönachi.

¹³ Biti' b'è'è nitué' bönni' didza' yálajdo' ca naca queè' Jesús, tu' tadxi bönachi zían na' le ilunè' yugu' bönni' judío unná bè'.

14 Cate' chibidxín gatsaj laní na', blé'è Jesús ra' yudo', en busédiné' bönachi nacuá' ni'.

15 Bulu'bánninē' bönni' judío, ta'nnē':

—¿Nacxi caz naca, rácadē'è bönni' ni, en biti' ca' nazēdē' que yudo'?

16 Bubi'è didza' Jesús, rē' légaquiē':

—Le rusédida' neda', calēga quia' naca, pero queē' Dios Xuz na' nasól-lē'è neda'.

17 Channō rē'ènē' nu bönni' gunē' ca rē'ènē' Dios, huéquiibe'enē' bönni' na' channō nequi queē' Dios le rusédida' bönachi o channō rácasō quia' ruá'a didza'.

18 Nu bönni' ru'è didza' rácasō queē', runē' caní para ilún bal bönachi lē', pero Bönni' na' rē'ènē' ilún bönachi bal Nu nasól-la' lē', Bönni' ni ru'è didza' iduté li, en biti' ca' rizí' yē'è.

19 'Moisés bennē' queéli' xibá queē' Dios, pero biti' runli' ca rinná bē' xibá na'. ¿Bizx que rizóa ribō'ōli' gútili' neda'?

20 Bulu'bí'i didza' bönachi zían na', tē' Lē':

—Tu' xihui' dzaga lí'. ¿Nuzxi caz rizóa ribō'ō guti lí'?

21 Bubi'è didza' Jesús, rē' légaquiē':

—Tu yöl-la' huáca bena', ate' rubánili' yúgu'téli'.

22 Le nácatē Moisés bennē' queéli' lē' na' narugu lu xipéla'li' le naca bē', pero calēga Moisés caz bennē' queéli' lē' na', pero guzxi'è le lu ná'agaquiē' xuz xtá'ahuē'. Na'a, sal-la' naca dza lá'ayi, richúguli' lu xipéla'gacabi' bí'i bönni'do' lē' na' naca bē' néquiquequibi' queē' Dios.

23 Channō ta'z'í'ibi' lu xipéla'gacabi' lē' na' naca bē' cate' naca dza lá'ayi, para cabí quítsjali' xibá queē' Moisés, ¿naru' rilétseli' neda' tu' buna'-nē' tu bönni', ate' bōáquiē' dxí'ado' cate' naca dza lá'ayi?

24 Biti' ral-la' uchi'a usōrō lízili' ca', pero buli'chi'a buli'sōrō ca naca le naca iduté li.

Rigúxjō'è Jesús ga narúajē'

25 Ní'irō gulu'è didza' bal-lē' bönni' nacu'è Jerusalén, ta'nnē':

—¿Naru' calēga bönni' ni Nu na' tu'guiljē' bönni' judío unná bē' para ilútiē' Lē'?

26 Buli'yútsöca', yálajdo' ru'è didza', en biti' bi tē' Lē'. ¿Naru' téquibe'enē' bönni' ta'nná bé'enē' rē'u, le nácatē bönni' ni náquiē' Cristo, Nu na' ral-la' inná be'è rē'u?

27 Bönni' ni, nöz quéziru' gazxi bönni' Lē'. Cate' guidē' Cristo, cuntu nu inōzi gazxi bönni' Lē'.

28 Ní' zoē' Jesús rusédinē' bönachi chila yudo', en cate' biyömmē' didza' ni, ní'irō bē'è zidzaj didza', rnnē':

—¿Naru' núnbe'etseli' neda', en nözitseli' gazxi bönni' neda'? Bida' ni, calēga rácasō quia', pero Dios caz nasól-lē'è neda', ate' Lē', biti' núnbē'ēli'-nē' libí'ili'.

29 Neda' núnbe'eda'-nē', tu' za'a queē' Lē', ate' Lē' cazē' nasól-lē'è neda'.

30 Ní'irō gulunē' bayudxi ila'zönē' Lē', pero cuntu nu guzxón Lē', tu' cabí ridxini dza queē' tsu'è lu ná'agaquiē'.

31 Gula'yéajlē' zían bönachi ní' Lē', ta'nná:

—Cate' guidē' Cristo, ¿naru' gunē' zíanrō yöl-la' huáca ca le runē' bönni' ni?

Bönni' yudo' ta'sól-lē'è nupa ila'zön Jesús

³² Bila'yönnë' bönni' yudo' fariseo yugu' didza' ni tuf'i bönnachi ca naca queë' Jesús, ate' yugu' bixúz unná bë', en yugu' bönni' yudo' fariseo na' gula'söl-lë'ë ni'a ná'agaquië' para tsöjxöngaqüë' Lë'.

³³ Ní'irö Jesús gunné':

—Ia'tú chí'isö sóalena' libí'ili', ate' ní'irö huöja' ga zoë' Xuza' nasöl-lë'ë neda'.

³⁴ Uguíljali' neda', pero biti' udzöllili' neda'. Ga ni' tsöjsóa' neda' biti' gaca guídali' libí'ili'.

³⁵ Ní'irö të' luzá'agaquië' bönni' judío, ta'nnë':

—¿Gazxi tséajtsë' bönni' ni, ga ni' biti' udzölliru'-në'? ¿Naru' huayéajtsë' ga nacu'ë bönni' judío násilasigaquië' idútë yödzölió, en usédinë' yugu' bönni' zì'tu' ni'?

³⁶ ¿Bizxi rë'ëni inná didza' na' bë'ë: “Uguíljali' neda', pero biti' udzöllili' neda'”, enca: “Ga ni' tsöjsóa' neda' biti' gaca guídali' libí'ili'”?

Nisa yegu le runna yöl-la' na'bán queëru'

³⁷ Cate' ni' naca dza údxi que laní na', dza na' naca lu, guzuínë' Jesús, en bë'ë zidaj didza', rnnë':

—Channö zoë' nu bönni' ribidxi icja ládxi'da'ahuë', ral-la' guídë' bönni' na' ga zoa', en guí'jë'.

³⁸ Nu bönni' réajlë'ë neda', gaca queë' ca na' nazúaj lu guichi lá'ayi, rnna: Lu icja ládxi'da'ahuë' bönni' na' ilén le naca ca nisa yegu, lë na' ulu'zì' xibë bönnachi, gata' yöl-la' na'bán queguequi.

³⁹ Didza' ni bë'ë Jesús ca naca queë' Dios Bö' Lá'ayi, Nu ral-la' idisóalen bönni' na' ila'yéajlë'ë Jesús. Caní gunné' Jesús tu' cabí ridxíninë' Dios Bö' Lá'ayi, tu' cabí ruhuëpinë' Jesús ga tsépisëtërë'.

Ta'rúaj choplö bönnachi

⁴⁰ Cate' bila'yöni didza' ni, gula'nná bal-la bönnachi zían na', ta'nná:

—Le nácatë Bönni' ni náquië' Bönni' na' ru'ë didza' uláz queë' Dios, Bönni' na' guzxi' lu në'ë Dios isöl-lë'ë queëru'.

⁴¹ Ta'nnë' ia'bal-lë':

—Bönni' ni náquië' Cristo.

Ta'nná bal-la bönnachi:

—¿Naru' irúajtsë' Cristo luyú Galilea?

⁴² Nazúaj lu guichi lá'ayi le rnna: “Cristo galjë' ladaj di'a dza queë' David, en gáquië' ca' bönni' Belén le guca ladzë' David na'.”

⁴³ Caní guca, bila'rúaj bönnachi na' choplö tu' nözinë' Jesús.

⁴⁴ Të'ënnë' bal-lë' ila'zönë' Jesús, pero cuntú nu bi ben queë'.

Biti' ta'yéajlë'ë Jesús bönni' unná bë'

⁴⁵ Ní'irö bulu'dxinë' ni'a ná'agaquië' yugu' bixúz unná bë', en yugu' bönni' yudo' fariseo ga na' nacu'ë bönni' yudo' na', ate' légaquië' gulë' ni'a ná'agaquië' na', ta'nnë':

—¿Bizx que biti' dichë'ëli'-në'?

⁴⁶ Bulu'bi'ë didza' ni'a ná'agaquië', ta'nnë':

—Cuntu nu bönni' ru'ë didza' ca ru'ë didza' Bönni' ni.

⁴⁷ Ní'irö bulu'bi'ë didza' bönni' yudo' fariseo na', ta'nnë':

—¿Naru' bë'tsali' lataj guzxi' yé'enë' ca' libí'ili'?

⁴⁸ ¿Naru' guyéajlë'tsë' Lë' nu bönni' unná bë' o nu bönni' yudo' fariseo?

⁴⁹ Libí'ili' dxíali' dö' tu' cabí rácali' xibá queë' Dios.

⁵⁰ Zoë' ca' Nicodemo ni', bönni' na' bidxinë' ga zoë' Jesús chi'i dzö'ölö, tu' náquië' ca' bönni' yudo' fariseo, ate' rë' légaquië':

⁵¹ —¿Naru' richúguru' queë' tu bönni' gátië' lu xibá queëru' channö cabí yöniru' lë' zí'alö para inöziru' bi benë'?

⁵² Ní'irö bulu'bi'ë didza' ia'zica'rë' na', të' lë':

—¿Nácatso' ca' li' bönni' Galilea? Bulaba le nazúaj lu guichi lá'ayi, ate' uyú' catu caz birúaj nitúë' bönni' ru'ë didza' uláz queë' Dios luyú Galilea.

⁵³ Ní'irö yójhüöjgaquië' lidxi que queëgaquië'.

8

¹ Guyijë' Jesús ga naca lu Gu' a Yaga Olivo.

Nigula nagútsjanu xibá que yöl-la' nutsaga na'

² Cate' za' rení' budxinë' Jesús ra' yudo', ate' bila'dxín yúgu'të bönachi ga zoë'. Gurö'ë Jesús, rusédinë' légaquië'.

³ Ní'irö yugu' bönni' yudo' usedi, en yugu' bönni' yudo' fariseo duchë'ëgaquië'-nu tu nigula ga zoë' Jesús, tu' gula'dzölinë'-nu ni' rigútsjanu xibá que yöl-la' nutsaga na'. Bulu'sudxinë'-nu lógaca bönachi na' tu'zë nágagaca Jesús,

⁴ ate' të' Lë':

—Bönni' Usedi, nigula ni guzxöntu'-nu ni' runnu dul-la' rigútsjanu xibá que yöl-la' nutsaga na'.

⁵ Lu xibá queë' Moisés, gunná bé'enë' netu' uládxí'tu'-nu guiöj nu nigula runnu caní, para gátinu. ¿Názxiga Li', nacxi rno'?

⁶ Caní gula'nnë' para ila'zí' b'ë'ë Jesús para ila'zéquí'në' ulu'zéguië' Lë' didza'. Ní'irö biyéchuë' Jesús, ruyúë' lu yu, en ruzúajë' lu yu na' len xibön në'ë.

⁷ Cate' gula'nábide'enë' Lë', ní'irö buzuínë' Jesús, en rë' légaquië':

—Núli' cabí nunlí' dul-la' isí loli' uládxí'li'-nu guiöj.

⁸ Leyúbölö biyéchuë' Jesús, ruyúë' lu yu, en bugué'lë'ë ruzúajë' leyúbölö lu yu na'.

⁹ Cate' bila'yönnë' didza' ni, bulu'xösa ládxí'do'gaquië' légaquië', ate' bila'rúajë' tu tuë'. Gula'sí lógachië' bönni' gularö ga bidxintë bönni' cuidí'. Nagá'anë' Jesús ni', dzáganu nigula na' Lë' gatsaj láhui'lö nupa na' tu'zë nágagaca Lë'.

¹⁰ Ní'irö buzuínë' Jesús leyúbölö, en cuntu nu bilé'enë' nu ruzegui lënu didza', pero túzinu nigula na', ate' rë'ë-nu:

—Nígúla, ¿gazxi nacua' nupa na' bulu'zegui li' didza'? ¿Naru' cabí zoa nu bönni' richúguië' quiu'?

¹¹ Lënu rnnanu:

—Cuntu nu caz, Xan.

Ní'irö Jesús rë'ë-nu:

—Lëzca' neda', bití' richuga' quiu'. Böaj lidxu', en bití'rö gunu' dul-la'.

Náquië' Jesús bení' quégaca bönachi yödzölió

¹² Leyúbölö Jesús bé'lenë' bönachi didza', rnnë':

—Neda' naca' bení' quégaca bönachi yödzölió. Nu bönni' zá'lenë' neda', bití' të' ga naca chul-la que dul-la', pero tu bení' sóalen bönni' na' le uluí'i lë' naca gata' yöl-la' na' bán idú queë'.

¹³ Ní'irö të' Lë' bönni' yudo' fariseo, ta'nnë':

—Li' runu' ba nalí que la' cuinsu'. Bití' naca lesaca' le runu' ba nalí. Nítisö naca.

14 Bubi'ë didza' Jesús, rë' légaquië':

—Sal-la' runa' ba nali que la' cuinsa', idütë li naca le runa' ba nali, tu' nözda' ga birüaja', en ga tseja', pero libí'ili' biti' nözili' gazxi za'a, en calëga gazxi tseja'.

15 Libí'ili' ruchi'a rusöröli' ca nácagaca le taca yödzölió ni, pero neda', rácasö quia' cuntú nu bönni' ruchi'a rusöröa' queë'.

16 La'tu' uchi'a usöröa', ca nácate' uchi'a usöröa', tu' calëga néda'sö uchi'a usöröa', pero Xuza' nasöl-lë'ë neda' gunë' neda' tsözxön.

17 Lë'sca' caní lu xibá queë' Moisés nazúaj lu guichi le rnna: Le tunë' ba nali chopë' bönni', idütë li naca.

18 Neda' runa' ba nali que la' cuinsa', ate' Xuza' nasöl-lë'ë neda', runë' ca' ba nali quia'.

19 Ní'irö bönni' yudo' fariseo na' gula'nábinë' Lë', ta'nnë':

—¿Gazxi zóatsë' Xuzu'?

Bubi'ë didza' Jesús, rë' légaquië':

—Biti' núnbë'ëli' neda', en biti' núnbë'ëli'-në' Xuza'. La'tu' núnbë'ëli' neda', lë'sca' Xuza' gúnbë'ëli'-në'.

20 Yugu' didza' ni bë'ë Jesús cate' ni' zoë' rusédinë' bönachi lu chila yudo', ga na' nacua' guí'ina gapa ta'gu'ë gun que yudo', pero cuntú nu guzxon Lë', tu' cabí ridxini dza queë' tsu'ë lu ná'agaquië'.

Rnnë' Jesús: "Ga tseja' neda', biti' gaca guídali"

21 Leyúbölö Jesús rë' légaquië', rnnë':

—Uzá'a yödzölió ni, ate' uguí'jali' nu usölá libí'ili', pero ugá'ana dul-la' nabága'li', en gátili'. Ga tseja' neda', biti' gaca guídali'.

22 Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' biti' gaca guídali'."

23 Jesús rë' légaquië':

—Libí'ili' nácali' que luyú dë cadxí'ilo ni, pero neda' za'a yehua' yubá xitsá'. Libí'ili' nácali' bönachi yödzölió ni, pero neda' biti' naca' bönni' yödzölió ni.

24 Que lë ni na' gudxa' libí'ili': Ugá'ana dul-la' nabága'li', en gátili'. Channö cabí tséajlë'ëli' naca caza' Nu usölá, ugá'ana dul-la' nabága'li', en gátili'.

25 Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te.

26 Zián le ral-la' guía' libí'ili', en uchi'a usöröa' le naca queëli'. Didza' idütë li ru'ë Xuza' nasöl-lë'ë neda', ate' didza' riyönda' ru'ë Lë', ru'í'lena' bönachi yödzölió ni.

27 Biti' gula'yéajni'inë' ru'í'lenë' légaquië' didza' ca naca queë' Dios Xuz.

28 Que lë ni na' Jesús rë' légaquië':

—Cate' idxín dza uchísali' neda', Bönni' Guljë' Bönachi, gútili' neda', ní'irö guéquibe'ëli' naca caza' Nu rusölá, en biti' bi runa' rácasö quia', pero ca na' ruluí'inë' Xuza' neda', ca' ruá'a didza'.

29 Xuza' nasöl-lë'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxë'ë Lë'.

30 Cate' bë'ë Jesús didza' ni, bönni' zián gula'yéajlë'ë Lë'.

Nupa nácagaca xzí'inë' Dios, en nupa nadzúngaca lu na' dul-la'

31 Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rnna xtí'dza'a, gácali' idú bönni' usëda quia'.

³² Gúnbē'ēli' le naca idútē li, ate' le naca idútē li na' usölá libí'ili'.

³³ Bulu'bi'ē didza', tē' Lē':

—Abraham naquiē' xuz gudōdi queētū, en cuntū nu ben netu' bōnni' nadó'ogaca. ¿Rnna'tso: "Usölá libí'ili'?"

³⁴ Jesús rē' légaquiē':

—Le nácatē rea' libí'ili': Yúgu'tē nupa tun dul-la', nadzúngaca lu na' dul-la'.

³⁵ Nu naca bōnni' nadó'o bití' ugá'anatica'sö lidxē' xan yu'u, pero nu naca xzí'inē' xan yu'u na' rugá'anatica'sö lidxi nu na' naca xan yu'u.

³⁶ Caní naca, channö Nu na' naca Xzí'inē' Dios usölá libí'ili', le nácatē uláli'.

³⁷ Nōzda' naquiē' Abraham xuz gudōdi queēli', pero rizóa ribō'ōli' gútili' neda', tu' cabí nazi' lu ná'alí' xtídza'a.

³⁸ Neda' ruá'a didza' ca naca le bilé'eda' ga na' zoē' Xuza', pero libí'ili' runli' le biyōnili' ga zoa xuz quézili'.

³⁹ Bulu'bi'ē didza', tē' Lē':

—Abraham náquiē' xuztu'.

Ní'irō Jesús rē' légaquiē':

—La'tu' nácali' idú xzí'ini xí'sóē' Abraham, gunli' ca na' benē' Abraham.

⁴⁰ Na'a, rizóa ribō'ōli' gútili' neda', sal-la' ru'ílēna' libí'ili' didza' idútē li, didza' na' biyōnda' bē'ē Dios. Bití' benē' Abraham caní.

⁴¹ Libí'ili' runli' ca run xuz quézili'.

Ní'irō tē' Lē':

—Netu' bití' ca' nácatu' bi'i lando'. Tuzē' Dios náquiē' Xuztu'.

⁴² Ní'irō Jesús rē' légaquiē':

—La'tu' náquiē' Dios idú Xúzili', huadxí'ili' neda', tu' birúaja' neda' ga zoē' Dios, en bida' luyú ni, ate' calēga rácasö quia' bida', pero Dios caz gúsól-lē'ē neda'.

⁴³ ¿Bix que bití' gaca tséajni'ili' didza' ruá'a? Naca tu' cabí rē'ēnili' uzē' nágali' xtídza'a.

⁴⁴ Xuz quézili' naca tu' xihui'. Néquili' que tu' xihui', en rē'ēnili' gunli' le rizē' ladxi' xúzili' na'. Dza ni'te naca tu' xihui' nu guti bōnachi, en cabí nazi' lu nē'e le naca idútē li, tu' cabí ru'í didza' idútē li. Cate' rizi' yē' tu' xihui', ca naca caz ru'í didza', tu' naca nu rizi' yē', en naca ca xúzgaca caz nupa ta'zí yē'.

⁴⁵ Tu' ruá'a neda' didza' idútē li bití' réajlē'ēli' neda'.

⁴⁶ ¿Núzxilōli' gaca usubága'li' neda' dul-la'? Channö ruá'a didza' idútē li, ¿bix que bití' réajlē'ēli' neda'?

⁴⁷ Nu naca queē' Dios, ruzē' nagui xtídzē'ē Dios, pero libí'ili', tu' cabí nácali' queē' Dios, bití' ruzē' nágali' xtídzē'ē.

Cristo zoa cazē' zí'atēlö ca Abraham

⁴⁸ Ní'irō bulu'bi'ē didza' yugu' bōnni' judío, tē' Jesús:

—Catēz gunnatu' cate' gunnatu' nacu' bōnni' Samaria, ate' dzaga tu' xihui' Li'.

⁴⁹ Bubi'ē didza' Jesús, rē' légaquiē':

—Bití' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsölá'aló.

⁵⁰ Bití' runa' zxōn cuina'. Zoa Nu run zxōn neda', ate' Lē' ruchi'a rusörōē' rē'u.

⁵¹ Le nácatē rea' libí'ili': Nu bōnni' si' lu nē'ē xtídza'a, bití' ca' gátiē' bōnni' na'.

⁵² Ní'irō yugu' bōnni' judío na' tē' Lē', ta'nnē':

—Na'a réquibe'etu' dzaga tu' xihui' Li'. Abraham gútië', ate' gulátië' ca' bönni' gulu'ë didza' uláz queë' Dios, pero Li' rno: "Nu bönni' si' lu në'ë xtídz'a, biti' ca' gátië' bönni' na'."

⁵³ ¿Naru' nácatërötso' Li' xzön ca xúziru' Abraham? Gútië' lë', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

⁵⁴ Bubi'ë didza' Jesús, rë' légaquië':

—Channö neda' guna' xzön cuina', yöl-la' xzön na' biti' bi gaca. Xuza' runë' neda' xzön, ate' libí'ili' rnnali' náquië' Dios queëli'.

⁵⁵ Libí'ili' biti' núnbë'ëli'-në' Dios Xuz, pero neda' núnbë'a-në'. La'tu' innía': Biti' núnbë'a-në', gaca' nu rizi' yë' ca na' nácali' libí'ili', rizi' yë'ëli'. Na'a, le nácatë núnbë'a-në', en nazí' lu na'a xtídzë'ë.

⁵⁶ Xúzili' Abraham budzéjanë' tu' ral-la' ilé'enë' dza soa' yödzülió ni, en sala' gútië' dza ni'te, bilé'enë' le, en budzéjade'enë'.

⁵⁷ Ní'irö yugu' bönni' judío na' të' Jesús, ta'nnë':

—Biti' yu'ínu' chi-un iz. ¿Naru' bilé'etsenu' Abraham?

⁵⁸ Jesús rë' légaquië':

—Le nácatë rea' libí'ili': Zí'atëlö ca soë' Abraham, neda' zoa caza'.

⁵⁹ Ní'irö gula'guélé'ë guió'j para ulu'ladxë' Jesús, pero Lë' bunítitë' cuinë', en burúajë' lö'a yudo' na'. Gudödë' gatsaj láhui'lö ga na' nacu'ë, ate' söhuó'jë'.

9

Ruúnë' Jesús tu bönni' guljë' nachúl-latë lahuë'

¹ Cate' gudödë' Jesús tu lataj, bilé'enë' tu bönni' ni' guljë' nachúl-latë lahuë'.

² Gula'nábinë' Jesús bönni' usëda queë', ta'nnë':

—Bönni' Usedi, ¿nuzxi ben dul-la'? ¿Naru' bönni' ni o xuz xinë'ë tu' guljë' nachúl-latë lahuë'?

³ Bubi'ë didza' Jesús, rë' légaquië':

—Biti' naca tu' benë' dul-la' bönni' ni, en calëga tu' gulunë' dul-la' xuz xinë'ë, pero naca para ilá' lahui yöl-la' huáca queë' Dios ni'a queë' bönni' ni.

⁴ Run bayudxi gunru' xichinë' Xuza' nasól-lë'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cuntu nu gaca gun dxin.

⁵ Tsanni ni zoa' yödzülió ni, naca' bení' quégaca bönachi yödzülió.

⁶ Cate' Jesús budxi bë'ë didza' ni, gurú'unë' xzöna' lu yu, en benë' gúna'do' len xzöna' na', ate' bugu'ë guna' na' guió'j lahuë' bönni' na' nachul-la lahuë'.

⁷ Ní'irö rë' lë':

—Guyéaj yójtibi lo' lu beaj nisa nazí'i le Siloé.

Siloé naca tu' didza' hebreo le rna: Nasól-la'.

Ní'irö bönni' na' nachul-la lahuë' guyijë' ni', yójtibi lahuë'. Cate' buzë'ë ni' chirilé'enë'.

⁸ Ní'irö bulu'bani bönachi dzaga yu'u queë', en nupa ni' bila'lé'e lë' zí'atëlö cate' ni' nachul-la lahuë', ta'nnä:

—¿Naru' calëga bönni' ni bönni' na' ribö'ë rinabë' nu bi unödzej queë'?

⁹ Bal-lë' ta'nnë':

—Lë' na'.

Ia'bal-lë' ta'nnë':

—Calëga lë', pero ca rna' lahuë' bönni' na', rna' lahuë' ca' bönni' ni.

Lë' rnnë':

—Neda' na'.

¹⁰ Ní'irö gula'nábinë' lë', ta'nnë':

—¿Nacxi caz guca, guyalaj guiöj lo'?

11 Bubi'ë didza', rë' légaquië':

—Bönni' na' lë' Jesús benë' gúna'do', ate' gudëbë' gúna'do' na' guiöj lahua', en gudxë' neda': "Guyéaj ra' beaj nisa nazí'i le Siloé, yöjtibi lo'." Guyija' ni', yöjtibi lahua', ate' guyalajtë' guiöj lahua'.

12 Ní'irö gula'nábinë' lë', ta'nnë':

—¿Gazxi zoë' bönni' na'?

Lë' rë' légaquië':

—Biti' nözda'.

Yugu' bönni' yudo' ta'náb yúdxinë' bönni' na' guyalaj guiöj lahuë'

13 Ní'irö gula'chë'ë bönni' na' zí'alö nachul-la lahuë', en bulu'sudxinë' lë' lögaquië' bönni' yudo' fariseo.

14 Tu' naca dza lá'ayi quégaquië' cate' benë' Jesús gúna'do' na', en gusaljë' guiöj lahuë' bönni' na' zí'alö nachul-la lahuë',

15 que lë' ni na' yugu' bönni' yudo' fariseo na' gula'nábinë' lë' leyúbölö nacxi guca guyalaj guiöj lahuë'. Lë' gudxë' légaquië':

—Budxië' gúna'do' guiöj lahua', ate' yöjtiba' le, en rilé'eda'.

16 Ní'irö gulu'ë didza' bal-lë' bönni' yudo' fariseo na', ta'nnë':

—Biti' nasöl-lë' Dios bönni' na', tu' cabí rapa chi'ë dza lá'ayi.

Ia'bal-lë' ta'nnë':

—¿Naru' huácatsö tu bönni' dul-la' gunë' yugu' yöl-la' huáca runë' bönni' na'? Caní guca, bila'rúajë' choplö.

17 Leyúbölö gula'nábinë' bönni' na' zí'alö nachul-la lahuë', ta'nnë':

—¿Bizxi ranno' li' queë' bönni' na', gusaljë' guiöj lo'?

Lë' rnnë':

—Náquië' bönni' ru'ë didza' uláz queë' Dios.

18 Biti' gula'yéajlë'ë bönni' judío unná bë' na' guljë' nachúl-latë lahuë' bönni' na', en guyalaj guiöj lahuë', cate' bulu'lidzarë' xuz xinë'ë bönni' na' guyalaj guiöj lahuë',

19 ate' gula'nábinë' légaquië', ta'nnë':

—¿Naru' náquië' bönni' ni zxf'inili', rnnali' guljë' nachúl-latë lahuë'? ¿Nacxi caz naca rilé'enë' na'a?

20 Bulu'bi'ë didza' xuz xinë'ë na', të' légaquië':

—Nóztu' bönni' ni náquië' zxi'initu', en guljë' nachúl-latë lahuë',

21 pero nacxi guca, rilé'enë' na'a, bití' nöztu', en nuzxi na' gusalaj guiöj lahuë', bití' nöztu'. Guli'nabi-në' lë', tu' chináquië' bönni' chinaca. Lë' cazë' quíxjö'ë.

22 Caní gula'nnë' xuz xinë'ë bönni' na' zí'alö nachul-la lahuë', tu' tádxinë' yugu' bönni' judío unná bë', tu' chigulún xtídza'gaquië' bönni' judío na' channö nu bönni' sí' lu në'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judío, en tu'sëdë' queë' Dios.

23 Que lë' ni na' gula'nnë' xuz xinë'ë: "Guli'nabi-në' lë', tu' chináquië' bönni' chinaca."

24 Ní'irö yugu' bönni' judío unná bë' bulu'lidzë' leyúbölö bönni' na' zí'alö nachul-la lahuë', ate' të' lë':

—Ni'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

25 Ní'irö bubi'ë didza', rnnë':

—Channö náquië' bönni' dul-la' bití' nözda'. Tu le nözda'. Zí'alö nachul-la lahua', ate' na'a rilé'eda'.

26 Gula'nábinë' lë' leyúbölö, ta'nnë':

—¿Bizxi benë' quiu'? ¿Nacxi benë' gusaljë' guiöj lo'?

27 Bubi'ë didza', rë' légaquië':

—Chigúdxí caza' libí'ili', pero bití' gú'unili' sí' lu ná'ali' xtídza'a. ¿Bizx que na' zé'ënili' yónili' leyúbölö? ¿Naru' rë'ënili' tá'ali' ca' Lë'?

28 Ní'irö bulu'lidza zi'ë lë', ta'nnë':

—Lí' do'o Lë', pero netu' dá'atu' Moisés.

29 Netu' nöztu' Dios bé'lenë' Moisés didza', pero ca naca queë' bönni' ni, bití' nöztu' nuzxi caz gusöl-la' Lë'.

30 Ní'irö bubi'ë didza' bönni' na', rë' légaquië':

—Lë' ni run ga rubánida'. Libí'ili' bití' nözili' nuzxi gusöl-la' bönni' ni, ate' Lë' gusaljë' guiöj lahua'.

31 Nöziru' bití' riyönnë' Dios yugu' bönni' dul-la', pero channö reaj ládxë'ë tu bönni' Dios, en runë' ca rë'ënë' Lë', Dios riyönnë' bönni' ni.

32 Dza ni'te bití' riyön nu gunná channö nu bönni' gusaljë' guiöj lahuë' tu bönni' guljë' nachúl-latë lahuë'.

33 La'tu' cabí náquië' bönni' ni queë' Dios, bití' bi gaca gunë'.

34 Ní'irö bulu'bi'ë didza', të' lë':

—Ca gulju' naca bé' nabágu'u dul-la'. ¿Naru' lí' ruséditsenu' netu'?

Ní'irö bulu'béajë' lë' ní'ilö.

Nupa nácacaga chul-la niti

35 Biyönnë' Jesús ca gulunë' bönni' judío unná bé', bulu'béajë' bönni' na' zí'alö nachul-la lahuë'. Cate' budzáguë' lë', gudxë' lë':

—¿Ba réajlë'u Zxí'inë' Dios?

36 Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

37 Jesús rë' lë':

—Chibilé'enu' Lë', ate' neda' ni ru'ílena' lí' didza', naca' Zxí'inë' Dios.

38 Ní'irö bönni' na', gualaj guiöj lahuë', guyéaj ládxë'ë Jesús, en rë' Lë':

—Xan, réajlë'a Lí'.

39 Jesús rnnë':

—Para uchi'a usöröa' bönachi bida' yödzo'lió ni, para ulu'lé'e nupa nachul-la nanítigaca, en ilaca ca nu nachul-la lahui nupa téquigueueq ta'lé'e.

40 Cate' yugu' bönni' yudo' fariseo na' nacua'lenë' Jesús bila'yönnë' didza' ni, ní'irö të' Lë':

—¿Naru' nachul-la nanítitsatu'?

41 Bubi'ë didza' Jesús, rë' légaquië':

—La'náru' nachúl-lasö' guiöj loli', bití' ibága'li' dul-la'. Na'a rnnali': "Rilé'tu'." Que lë' ni na' nabága'li' dul-la'.

10

Rucúdzü'ë didza' Jesús que lë'a quégacaba' bö'cu' zxila'

1 Gunnë' ca' Jesús:

—Le nácatë rea' libí'ili': Nu bönni' bití' razië' saca' ga nu riyaza lë'a quégacaba' bö'cu' zxila', pero tsázië' saca' ga yúbölö, bönni' ni náquië' gubán, en ribán cazë'.

2 Nu bönni' razië' saca' ga nu riyaza náquië' bönni' run chí'i cazë' bö'cu' zxila' na'.

³ Para tsázië' bönni' ni, risalaj nu zoa run chi'i ga nu riyaza, ate' ta'yõniba' bö'cu' zxila' na' chi'ë, en tu'únbë'ëba'-në'. Lë' rulidzë'-ba' que queëba' ca légacaba', en rubéajë' yugu' bö'cu' zxila' na'.

⁴ Cate' chinubéajë'-ba' yúgu'tëba' bö'cu' zxila' néquigacaba' queë', röjnõruë' lógacaba', ate' bö'cu' zxila' na' röjnógacaba' lë', tu' tu'únbë'ëba' chi'ë.

⁵ Bönni' yúbölö bití' tsõjnógacaba' lë', pero ulu'zëxúnajba' queë', tu' cabí núnbë'gacaba' chí'igaquië' bönni' yúbölö.

⁶ Le rucudzu' didza' ni gudxë' Jesús légaquië', pero bití' gula'yéajni'inë' lë na' rë' légaquië'.

Náquië' Jesús ca bönni' rapa chi'ë-ba' bö'cu' zxila'

⁷ Ní'irö Jesús rë' légaquië' leyúbölö, rnnë':

—Le nácatë rea' libí'ili': Neda' naca' ca tu ga ta'yázaba' bö'cu' zxila'.

⁸ Chigula'lë'ë zían bönni' gula'nnë' nácaquië' Cristo, pero yúgu'të bönni' na' bila'dxinë' zí'alö ca neda', nácaquië' gubán, en ta'bán cazë', ate' bití' bulu'zë nágaba' bö'cu' zxila' na' légaquië'.

⁹ Neda' naca' ca tu ga nu riyaza. Núti'tës bönni' tsázalenë' neda', ulë' bönni' na', en gáquië' ca tuba' bö'cu' zxila' rázaba', en rurúajba', en ridzõliba' le ráguba'.

¹⁰ 'Za'zë' bönni' gubán para cuanë'-ba', en gútië'-ba', en usunítië'-ba'. Neda' bida' para gata' yöl-la' na'bán idú quégaca bõnachi náca gaca ca bö'cu' zxila' quia'. Le nácatë gata' quégaquië' yöl-la' na'bán idú na'.

¹¹ Neda' run chí'igaca' bõnachi quia' ca runë' bönni' na', lu yöl-la' dxi'i ladxi' queë' rapa chi'ë yugu' bö'cu' zxila'. Bönni' na' rapa chi'ë-ba' bö'cu' zxila' caní zoa cazë' udödë' yöl-la' na'bán queë' ni'a quégacaba' bö'cu' zxila' queë'.

¹² Tu bönni' nazxjë' rapa chi'ë-ba' bö'cu' zxila', cate' rilë'enë' zá'aba' bö'cu' guí'a sínia', rucá'anë'-ba' bö'cu' zxila' na', en ruzxúnajë', ate' bö'cu' guí'a sínia' na' ráguya'aba' yugu' bö'cu' zxila' na', en rusilásiba' légacaba'. Caní runë' bönni' na' rapa chi'ë-ba' bö'cu' zxila' tu' cabí náquië' idú nu run chi'i-ba' bö'cu' zxila', ate' bití' néquigacaba' que cazë' bö'cu' zxila' na'.

¹³ Ruzxúnajë' bönni' nazxjë' na' tu' rapa chi'ë-ba' bö'cu' zxila' na' para sí'isë' dumí, en bití' ruí'i ládxi'ë-ba' bö'cu' zxila' na'.

¹⁴⁻¹⁵ 'Neda' naca' bönni', lu yöl-la' dxi'i ladxi' quia' run chí'igaca'-ba' bö'cu' zxila'. Ca na' núnbë'ë Xuza' neda', ate' neda' núnbë'a-në' Xuza', lë'sca' caní núnbë'egacada' bõnachi quia' náca gaca ca bö'cu' zxila' quia', en rudöda' yöl-la' na'bán quia' ni'a quégacaba' bö'cu' zxila' na', ate' bö'cu' zxila' na' néquiguequiba' quia' núnbë'gacaba' neda'.

¹⁶ Lë'sca' nacua'aba' ia'zica'röba' bö'cu' zxila' quia' bití' nabábagacaba' ni. Lë'sca' légacaba' ral-la' tsõjxi'gaca'-ba'. Légacaba' ulu'zë nágaba' chí'a, en ilácaba' tuz len ia'zica'röba' bö'cu' zxila' quia', ate' neda' caz gun chí'igaca'-ba'.

¹⁷ 'Que lë ni na' nadxí'inë' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti.

¹⁸ Cuntu nu bönni' séqui'në' gútië' neda', pero neda' rudödi caza' yöl-la' na'bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bé'enë' Xuza' neda'.

¹⁹ Cate' yugu' bönni' judío bila'yõnnë' didza' ni, leyúbölö bila'rúajë' choplö ca téquinë' queë'.

²⁰ Zíanë' ta'nnë':

—Yu'u bö' xihuí' Lë', en nachixi icjë'. ¿Bizx que ruzë nágali' Lë'?

21 Ia bal-lë' ta'nnë':

—Biti' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guiöj lógaquië' bönni' nachul-la lógaquië'?

Yugu' bönni' judío unná bë' tu'zöë Jesús tsölá'aló

22 Raca beo' ziaga, en naca dza na' tunë' laní yödzo Jerusalén, tu'subanë' ca gula'gu'ë yudo' quégaquië' lu në'ë Dios.

23 Ridë' Jesús ra' yudo' ga naca chila que, nazí'i le Chila Queë' Salomón.

24 Yugu' bönni' judío unná bë' gula'gu'ë Jesús lë'aló, en të' Lë':

—¿Bátaxi caz usanu' runu' ga rō'otu' bōniga? Channō nacu' li' Cristo, ca nácate gudíxjöi' netu'.

25 Jesús rë' légaquië':

—Chigudxi caza' libí'ili', pero biti' réajlë'ëli' neda'. Yugu' dxin runa' tu' dë lu na'a uláz queë' Xuza' nácagaca bë' Nu naca'.

26 Libí'ili' biti' réajlë'ëli' neda', tu' cabí nabábaleni' nupa nácagaca bö'cu' zxila' quia', ca na' chigudxi caza' libí'ili'.

27 Ta'yōniba' bö'cu' zxila' quia' ch'ia, en tu'únbe'eba' neda', ate' neda' núnbe'egacada'-ba', ate' ridijácalenba' neda'.

28 Neda' runödzia' yöl-la' na'bán idú quégacaba', ate' biti' ca' ila'nítiba', ate' cuntu nu sequí' ubéaj légacaba' lu na'a neda'.

29 Xuza' Dios bennë' quia' légacaba', ate' Lë' nápatërë' yöl-la' huáca ca yúgu'të bōnachi, ate' cuntu nu sequí' ubéaj légacaba' lu në'ë Xuza'.

30 Neda', en Dios Xuz, tuz nácatu'.

31 Leyúbölö yugu' bönni' judío unná bë' na' bulu'guélé'ë guiöj ulu'ladxë' Jesús.

32 Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ni'a que bízxilö dxin dxi'a ni uládx'i'li' neda' guiöj?

33 Bulu'bi'ë didza' bönni' judío unná bë' na', të' Lë':

—Ni'a que dxin dxi'a biti' uládx'i'tu' li' guiöj, pero tu' cabí rnnío' dxi'a queë' Dios, tu' nacu' li' bōnáchisö, en run cuinu' Dios.

34 Bubi'ë didza' Jesús, rë' légaquië':

—¿Naru' cabí nazúaj lu guichi lu xibá queë'li' ca gunné' Dios, rnna: “Neda' rnnía': Nácali' yugu' dios”?

35 Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ruí'i lógaquië' dios, bönni' ni' Dios bë'lenë' légaquië' didza'.

36 Dios bubéajë' neda' quez queë', en gusöl-lë'ë neda' yödzo'lió ni. ¿Naru' rnnátsali' quia': “Li' biti' rnnío' dxi'a queë' Dios”, tu' gunnía': Zxí'inë' Dios naca'?

37 Channō cabí runa' dxin budödë' Xuza' Dios lu na'a, biti' ral-la' tséajlë'ëli' neda'.

38 Channō runa' dxin budödë' Dios lu na'a, sal-la' biti' réajlë'ëli' neda' caz, guli'tséajlë' le nácagaca bë' dxin na' runa', para guéquibe'eli' náquië' Dios Xuz tuz len neda', ate' neda' ca' naca' tuz len Xuza'.

39 Leyúbölö gula'zóa gula'bö'ë ila'zōnë' Jesús, pero Lë' bulë' lu ná'agaquië'.

40 Ní'irö guyijë' Jesús leyúbölö ia'tsölá'a yegu Jordán, ga ni' buquülë' Juan bōnachi nisa zí'atëlö, ate' bugá'anë' Jesús ni'.

41 Bila'dxín bōnachi zían ga zoë' Jesús, ta'nná:

—Le nácate biti' benë' Juan nitú yöl-la' huáca zxōn, pero yúgu'të le gunné' Juan na' ca ral-la' gaca queë' bönni' ni, idütë li zeaj naca.

42 Que lë ni na' gula'yéajlë'ë bönni' zían Jesús ga na' zoë'.

11

Le guca cate' gútië' Lázaro

1 Dza ni' ré'enë' Lázaro, bönni' Betania, le naca ládzagacanu María, en Marta. Nácanu Marta na' zxílanu María na'.

2 Nácanu María na' nigula zanë' Lázaro, bönni' na' ré'enë', en nácanu ca' nigula na' gulú'unu le rilá' zxixi ni'ë Xanru', en buzzinu ni'ë len guitsa' ícjanu.

3 Gula'söl-la' nu nigula zanë' Lázaro na' nu yöjódx Jesús, gunná:

—Xan, buyútsöca', ré'enë' Lázaro, bönni' na' nadxí'inu'-në'.

4 Cate' biyönnë' Jesús didza' ni, gudxë' nupa nacua' ni', rnnë':

—Yödzhüë' ni bití' naca le guti lë' tsaz, pero naca para ilá' lahui yöl-la' zxön queë' Dios, ate' ni'a que yödzhüë' ni ilá' lahui ca' yöl-la' zxön quia' neda', Zxí'inë' Dios.

5 Jesús nadxí'inë' Marta, en nigula zxílanu Marta na', en Lázaro na'.

6 Sal-la' nadxí'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'.

7 Cate' bizá'a chopa dza na', Jesús gudxë' yugu' bönni' usëda queë', rnnë':

—Uyéajru' leyúbölö luyú Judea.

8 Ní'irö yugu' bönni' usëda queë' të' Lë', ta'nnë':

—Bönni' Usedi, si' gula'zóa gula'bö'ë bönni' judío unná bë' ni' ulu'ladxë' Li' guiöj. ¿Naru' uyéajtso' leyúbölö ni'?

9 Bubi'ë didza' Jesús, rë' légaquië':

—Nacua' caz chinnu hora lahui' dza. Nu bönni' ridë' lahui' dza, bití' tsöjchégu'ë, tu' rilë'enë', tu' zóalen lë' bení' zóa yödzhölió ni.

10 Channö ridë' bönni' na' chi' i' dzö'ölö, röjchégu'ë, tu' cabí' zóalen bení' lë'.

11 Cate' budxi bë'ë Jesús didza' ni, ní'irö gudxë' légaquië':

—Rásië' Lázaro, böchi' luzá'aru', ate' tseja' neda', en usubana'-në'.

12 Ní'irö yugu' bönni' usëda queë' të' Lë', ta'nnë':

—Xan, channö rásië', huöáquië'.

13 Gunnë' caní Jesús tu' chigútië' Lázaro, pero légaquië' téquinë' gunnë': Rásisë' Lázaro.

14 Ní'irö Jesús gudxë' légaquië' yálajdo', gunnë':

—Chigútië' Lázaro.

15 Rudzëjada' tu' cabí' zóa' ni', tu' gaca na'a tu le uzí'ili' xibé, le gun ga tséajlë'ëli' neda'. Uyéajru' na'a ga na' dë' Lázaro.

16 Ní'irö Tomás, bönni' na' tu'ë lë', Bönni' Bilidi' gudxë' ia'zíca'rë' bönni' usëda queë' Jesús, rnnë':

—Uyéajru' ca' rë'u, en gátilenru'-në'.

Náquië' Jesús Nu rusubán nupa chinátigaca, enca' Nu nabániru'

17-19 Dë yödzhö Betania gála'sö ga dë Jerusalén na', le naca ca rizá'aru' tu hórátëz. Que lë ni na' chibila'dxinë' zían bönni' judío ga na' nacua'anu Marta, en María, en tu'huë tsáhuë'ë légacanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yeru ba.

20 Cate' biyönninu Marta didza' zë'ë Jesús, ní'irö birúajnu yu'u, yöjtságanu Lë', pero María bugá'ananu yu'u na'.

21 Marta na' rënu Jesús:

—Xan, la'tu' zu' ni, bití' gátië' bönni' zana'.

22 Lësca' na'a, nözda' yúgu'të le inábinu' Dios, Lë' gunnë' quiu'.

23 Jesús rë'ë-nu:

—Übanë' bönni' zanu'.

24 Marta rënu Lë':

—Nözda' übanë' cate' idxín dza údxi cate' ulu'bán nupa chinátigaca.

25 Ní'irö Jesús rë'ë-nu:

—Naca caza' neda' Nu rusubán nupa chinátigaca, enca' Nu nabánigaca bönachi. Nu tséajlë' neda', sal-la' gati nu na', ubán caz,

26 ate' yúgu'të bönni' nabángaquië', en ta'yéajlë'ë neda', biti' ca' ilátië' tsaz. ¿Réajlë'u lë ni?

27 Marta rënu Lë':

—Ön, Xan. Réajlë'a nacu' Li' Cristo, Zxí'inë' Dios, Bönni' na' guzxi' lu në'ë Dios isól-lë'ë yödzölió ni.

Ribödxë' Jesús tu' ru'i ládxë'ë nigula zanë' Lázaro

28 Cate' budxi bë'ënu Marta na' didza' ni, böajnu yu'u, yöjlídzanu María, xzilánu, ate' bagáchi'sö rënu lënu:

—Bönni' Usedi zoë' ni, rulidzë' li'.

29 Cate' biyönninu María didza' ni, la' guyástënu, zéajnu ga na' zoë' Jesús.

30 Biti' rázinë' Jesús la' yödzödo' na', pero zóasë' ga na' yöjtságanu Marta Lë'.

31 Cate' yugu' bönni' judío na' nacuá'lenë' María na', en tu'hué tsáhuë'ë-nu bila'lé'enë'-nu guyásanu, en birúajnu carelô ga naca lu yu'u, ní'irö yöjnógaquië'-nu, ta'nnë':

—Uyéajnu ra' yeru ba tsöjchödxinu ni'.

32 Ní'irö bidxinnu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátië' bönni' zana'.

33 Cate' bilé'enë' Jesús ribödxinu, en ta'bödxë' ca' bönni' judío na' dzágaquië'-nu, ní'irö buí'innë', en gunnëda' ládxë'ë.

34 Rnnë':

—¿Gazxi bucáchi'li'-në'?

Të' Lë':

—Gudá uyú'.

35 Gurödxë' Jesús.

36 Ní'irö gula'nnë' bönni' judío na', ta'nnë':

—Buli'yútsöca' ca nadxfí'ide'enë' lë'.

37 Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsó gunë' ga biti' gátië' Lázaro?

Rubanë' Lázaro lu yöl-la' guti

38 Leyúbölö gunnëda' ládxë'ë Jesús, ate' bidxinë' ra' yeru ba na'. Ba na' naca tu yeru nadaj lé'e guí'a guióǵ, ate' da' tu guióǵta'a le nusayaj ga nu riyaza le.

39 Jesús gudxë' nupa nacuá' ni', rnnë':

—Guli'cúa guióǵ ni.

Ní'irö Marta, nigula zanë' bönni' nati na', rënu Lë':

—Xan, chirilë'ë siguti tu' chiguca tapa dza nátië'.

40 Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' zxön queë' Dios?

41 Ní'irö gula'güé' guiöjta'a na' nusayaj ga nu riyaza yeru ba ga na' yu'ë bönni' nati na'. Buyúé' Jesús zaca' lúxibalö, rnné':

—Xuza', rea' Li', xclenu' tu' riyönnu' neda'.

42 Neda' nözda' riyöntiqui'sinu' neda', pero ruá'a didza' ni para ulu'zì' xibé bönnachi zían ni, en ila'yéajlë' Li' na' nasól-lu'u neda'.

43 Cate' budxi bë'ë Jesús didza' ni, zidzaj bulidzë', rnné':

—Lázaro, burúaj nilö.

44 Burúajé' bönni' na' gúquié' bönni' nati lu yeru ba, naröligacarö ni'a në'ë yugu' lári'do', en nagachi' ca' lahué' ia'tú lári'do'. Ní'irö Jesús rë' légaquié':

—Buli'li lari' na' naröli ni'a në'ë, en guli'gu'ë lataj së'ë.

Tun xtídzë'ë yugu' bönni' judío unná bë' ilútié' Jesús

(Mt. 26:1-5; Mr. 14:1-2; Lc. 22:1-2)

45 Ní'irö zían bönni' judío na' gula'yéajlë'ë Jesús, bönni' na' yöjácalené' tsözxön María, en bila'lé'ené' lë na' benë' Lë'.

46 Bal-lë' yöjáquié' ga nacu'ë bönni' yudo' fariseo, en bulu'siyönnë' légaquié' ca na' benë' Jesús.

47 Ní'irö bönni' yudo' fariseo na' bulu'dúbilené' tsözxön bönni' yudo' tu'chì'a tu'söröë', en yugu' bixúz unná bë', ta'nnë':

—¿Nacxi caz gunru'? Runé' bönni' ni zían yöl-la' huáca zxön.

48 Channö güi'isiru'-në' lataj guné' ca ni run cazë', ila'yéajlë' yúgu'të bönnachi Lë', ate' idijáquié' bönni' Roma ni, duquínnaajgaquié' yudo' lá'ayi queëru', en yödzo queëru'.

49 Ní'irö bë'ë didza' Caifás, bixúz lo iz na', en dzágüië' légaquié', rë' légaquié':

—Libí'ili' biti' bi nözili',

50 en biti' réquibe'eli' run bayudxi gátié' tué' bönni' ni'a quegaca bönnachi, para cabi initi idú yödzo.

51 Calëga rácasö queé' bë'ë didza' ni, pero tu' náquié' bixúz lo iz na', que lë ni na' bë'ë didza' uláz queé' Dios ca ral-la' gátié' Jesús ni'a quegaca bönnachi yödzo ná'.

52 Gátié' Jesús, calëgasö ni'a que yödzo na', pero gátié' ca' para utubë' yugu' xzí'iné' Dios násilasigaquié', para ilácagaquié' tuz.

53 Caní guca, la' dza ná'asö gulún xtídzá'gaquié' ilútié' Jesús.

54 Que lë ni na' bíti'rö gudé' Jesús yálajdo' gapa nacuá' bönnachi judío, pero buzë'ë ni', sa'yéajé' tu lataj gala' ga naca lataj cá'asö, ate' bidxinë' yödzo Efraín, ga ni' bugá'ané', ate' dzágagaquié' bönni' usëda queé' Lë'.

55 Dza na' chizá' gala' Laní Pascua queégaquié' bönni' judío cate' tu'subanë' ca benë' Dios, bubéajé' bönnachi queé' luyú Egipto. Bila'rúaj bönnachi zían yugu' yödzo ni', ate' gula'benë', söjáquié' Jerusalén cate' si' idxín laní na' para tsöj pá'a cuíngaquié' ca naca que yudo'.

56 Yugu' bönni' na' nacu'ë Jerusalén tu'guiljé' Jesús, en cate' ni' nacu'ë chila yudo', gula'nabi luzá'agaquié' tué' ia'túé', ta'nnë':

—¿Bizxi rusáca'li'? ¿Huídatsë' laní, o biti' guidé'?

57 Chigula'nná bë'ë yugu' bixúz unná bë', en yugu' bönni' yudo' fariseo channö nu nözi ga zoë' Jesús, ral-la' ududíxjöi' légaquié' para gaca tsöjxöngaqüië' Lë'.

12

María rigú'unu le rilá' zxixi ni'ë Jesús

(Mt. 26:6-13; Mr. 14:3-9)

¹ Cate' ni' nagá'anagaca ia'xopa dza cate' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto, ní'irö bidxinë' Jesús lu yödzo Betania, ga na' zoë' Lázaro, bönni' na' gútië', en bubanë' lu yöl-la' guti.

² Gula'gu'ë tu gú'i huagu ni' le gahuë' Jesús. Gulú'unu María le ilahuë', ate' nútsë'ë Lázaro ladaj bönni' rö'ölangaquië' Jesús ga na' tahuë'.

³ Ní'irö gudéla'nu María ca tu guíë le rilá' zxixi que yöj susén lasi idú, le nazaca'da', en gulú'unu le ni'ë Jesús. Buzzinu ni'ë len guitsa' ícanu. Idútë lu yu'u na' guzé bö' zxixi.

⁴ Ní'irö bë'ë didza' tu bönni' usëda queë' Jesús, lë' Judas Iscariote, zxf'inë' tu bönni' lë' Simón, en náquië' bönni' na' udödë' Jesús lu ná'agaquië' yugu' bönni' yudo', rnnë':

⁵ —¿Bizx que biti' gudó'o le rilá' zxixi na', le nazaca' lázxjaru' que tu iz, ate' huáca nu quisi dumí na' quégaca bönachi yechi'?

⁶ Gunnë' caní, calëga tu' ruí'i lãdxë'ë bönachi yechi', pero tu' náquië' gubán, en lë cazë' nu'ë buzudi dumí quégaquië', en rubéajlanë' dumí na' tu'chejë' lu buzudi na'.

⁷ Ní'irö Jesús rë' lë':

—Bë'ë-nu lataj, tu' naca lë ni bennu tu le nabá'a para dza igácha'a.

⁸ Yugu' bönachi yechi' ila'cuá'lentica'sö libí'ili', pero neda' biti' ugá'anatica'sa' ga zóali'.

Tun xtídza'gaquië' bönni' judío unná bë' ilútië' Lázaro

⁹ Cate' bila'yönnë' bönni' judío zoë' Jesús yödz Betania, bila'dxinë' zíanë' ni', calëgasö tu' zoë' Jesús ni', pero lësca' tu' té'ënnë' ila'lé'enë' Lázaro, bönni' na' busubanë' Jesús lu yöl-la' guti.

¹⁰ Ní'irö gulún xtídza'gaquië' yugu' bixúz unná bë', ilútië' ca' Lázaro,

¹¹ tu' ta'yéajlë'ë zían bönni' judío Jesús ni'a queë' Lázaro na', en chin-lá'alengaquië' yugu' bixúz unná bë' na'.

*Len yöl-la' ba zxön razië' Jesús Jerusalén
(Mt. 21:1-11; Mr. 11:1-11; Lc. 19:28-40)*

¹² Bönachi zían bila'dxín Jerusalén dza Laní Pascua, ate' dza buropi na' ta'yöni zë'ë Jesús ni'.

¹³ Ní'irö gula'guítsjë' zin, en bila'rúajë' söjxi'gala'gaquië' Jesús, ate' gulu'ë zidzaj didza', ta'nnë':

—¡Yöl-la' ba Dios! ¡Yöl-la' ba Bönni' ni zë'ë uláz queë' Xanru', para inná bé'enë' bönachi Israel!

¹⁴ Budzölinë' Jesús tuba' búrrodo', ate' gudxíë'-ba' ca na' nazúaj lu guichi lá'ayi, rnna:

¹⁵ ¡Biti' gádxili', libí'ili', zóali' yödzo Sión!

¡Buli'yútsöca', zë'ë Bönni' inná bé'enë' libí'ili'!

¡Dxíë'-ba' tuba' búrrodo'!

¹⁶ Cate' ni' si' guca lë ni, biti' gula'yéajni'inë' bönni' usëda queë' Jesús, pero gudödi ni', cate' bubanë' Jesús lu yöl-la' guti, en buëpë' yehua' yubá queë', ní'irö yöjnéguequinë' lë ni nazúaj lu guichi lá'ayi ca ral-la' gaca queë', ate' guca queë' caní.

¹⁷ Lësca' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yeru ba, en busubanë' lë' lu yöl-la' guti, gulunë' ba nalí queë'.

¹⁸ Que lë ni na' ca' bila'rúajë' bönni' yöjxi'gala'gaquië' Jesús, tu' bila'yönnë' ca naca yöl-la' huáca ni benë' Lë'.

19 Ní'irö gula'nně' la' légacasě' bönni' yudo' fariseo, ta'nně':

—Chinaca bě' biti' bi séqui'ru' gunru'. Buli'yú ca dá'gaca yúgu'tě bönachi Lě'.

Yugu' bönni' zi'tu' tu'guiljě' Jesús

20 Bal-lě' bönni' zi'tu' dzágagaquiě' nupa na' bila'dxín Jerusalén dza Laní Pascua na' para ila'yéaj ládxi'gaquiě' Dios.

21 Yugu' bönni' zi'tu' na' bila'dxině' ga zoě' Felipe, bönni' Betsaida que luyú Galilea, ate' guláta'yue' lahuě', ta'nně':

—Bönni', rě'ěnitú' ilé'etu'-ně' Jesús.

22 Guyijě' Felipe na', en yöjōdxě' ca' Andrés. Ní'irö Andrés, en Felipe na' gulě' ca' Jesús.

23 Bubi'ě didza' Jesús, rě' légaquiě':

—Chizóa idxín dza gátia' neda', Bönni' Guljě' Bönachi, huöja' xilatja' yehua' yubá.

24 Le nácate' rea' libí'ili': Ugá'ana cá'asó tu xisedo' channó cabí'igachi' luyú, en údxi que. Channó údxi que xisedo' na', ate' ilén, yenni'tě'ró unōdzaj.

25 Nu bönni' ruí'i ládxi'dě'ě yöl-la' na'bán queě', unítie' le, tu' gátie' tsaz bönni' na'. Nu bönni' biti' ruí'i ládxi'ě yöl-la' na'bán dē queě' yōdzōlió ni gun chí'ě le ga idxinrō dza gata' yöl-la' na'bán idú queě'.

26 Channó rě'ěně' nu bönni' guně' xichina', ral-la' tě'ě neda' bönni' na', ate' ga ni' tsōjsó'a neda', ni' tsōjsó'ě ca' bönni' na' runě' xichina'. Channó runě' xichina' nu bönni', Xuza' Dios guně' bal bönni' na'.

Rigúxjō'ě Jesús ca si' ilútiě' Lě'

27 Gunně' ca' Jesús:

—Na'a rō'a böniga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lě ni na' bida', para guá' ilena' le ral-la' gaca quia' na'a.

28 Xuza', ben ga ilá' lahui yöl-la' zxōn quiu'.

Ní'irö biyōn chí'i Nu ruí'i didza' yehua' yubá, rnna:

—Chiběna' ga nalá' lahui yöl-la' zxōn quia', ate' leyúbōlō guna' ga ilá' lahui yöl-la' zxōn quia' na'.

29 Bila'yōni bönachi zían nacuá' ni' chí'i ni, ate' ta'nná:

—Guziú' na' gunně.

Ia'bal-la bönachi na' ta'nná:

—Tu gubáz lá'ayi queě' Dios bě'leně' Lě' didza'.

30 Ní'irö bubí'ě didza' Jesús, rě' légaquiě':

—Biyōn chí'i ni, calěga para uzi'a xibé neda', pero para uzi'ili' xibé libí'ili'.

31 Chibidxín dza uchi'a usōrōě' Dios bönachi yōdzōlió ni. Na'a chú'uně' Dios tu' xihui' ní'ilō, nu na' rinná be'ě bönachi yōdzōlió ni.

32 Na'a, channó ilútiě' bönni' neda', en ulu'chisě' neda' xitsá', guna' ga ulu'dubi yúgu'tě bönachi ga zoa'.

33 Didza' ni bě'ě Jesús naca bě' ca gátie'.

34 Bönachi zían na' tě Jesús, ta'nná:

—Netu' biyōnitu' nupa bulu'laba le rnna xibá queě' Dios, lě na' rnna: Sóatica'sě' Cristo. ¿Nacxi caz naca, rnno' Li': "Run bayudxi Bönni' Guljě' Bönachi, ulu'chisě' Lě' xitsá'?" ¿Nuzxi na' Bönni' Guljě' Bönachi?

35 Ní'irö Jesús rě' légaquiě':

—Ja'tú chí'ido'osö sóalena' neda' libí'ili', en naca' bení' queéli'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítili'. Nu bönni' ridë' ga chul-la niti bití' nõzinë' gazzi sa'yéajë'.

³⁶ Tsanni ni zóalena' libí'ili', naca' bení' queéli'. Guli'tséajlë' neda' naca' bení' queéli' para ilé'eli' bení' na' naca idú.

Cate' Jesús budxi bë'ë didza' ni, yõjhuõjë' yõjcachi' lahuë' lógaquië'.

Le run nigui bõnachi judío, para cabí ila'yéajlë' Jesús

³⁷ Sal-la' benë' Jesús zían yõl-la' huáca lógaquië', bití' gula'yéajlë'ë Lë'.

³⁸ Caní guca lë na' buzúajë' Isaías lu guichi, bönni' na' bë'ë didza' uláz queë'

Dios, gunnë':

Xan, ¿nuzxi caz guyéajlë' didza' bë'ëtu'?

¿Nuzxi caz buluí'inë' Xanru' yõl-la' huáca queë'?

³⁹ Caní guca, bití' guca ila'yéajlë'ë Jesús. Guca ca na' gunnë' ca' Isaías:

⁴⁰ Dios benë' ga gula'chul-la gula'nítië',

ate' guca zidi ládxi'do'gaquië'

para cabí ila'lé'enë' len guiõj lógaquië',

en cabí ila'yéajni'inë' lu icja ládxi'do'gaquië'.

Bití' ulu'huõáquië' quia' para úngaca'-në'.

⁴¹ Bë'ë Isaías didza' ni tu' bilé'enë' yõl-la' zxõn queë' Cristo, en bë'ë didza' ca naca queë' Lë'.

⁴² Sal-la' raca caní, gula'yéajlë' bõnachi zían Jesús, ga bidxintë gula'yéajlë'ë bal-lë' bönni' unná bë' Lë', pero tu' tádxinë' yugu' bönni' yudo' fariseo, bití' gulunë' ba nalí queë' yálajdo', para cabí ulu'béajë' légaquië' tsaz ga na' tu'dubë' tu'sëdë' queë' Dios.

⁴³ Caní gulunë' tu' tunrë' zxõn le tun bõnachi légaquië' bal ca le runë' Dios légaquië' bal.

Ilún didza' bë'ë Jesús ga irugu quégaca bõnachi ilátigaca

⁴⁴ Bë'ë zidzaj didza' Jesús, rnnë':

—Nu bönni' réajlë'ë neda', calëga neda'sõ réajlë'ë, pero réajlë'ë ca' Xuza' nasól-lë'ë neda'.

⁴⁵ Lësca' caní, nu bönni' rilé'enë' neda', rilé'enë' ca' Xuza' nasól-lë'ë neda'.

⁴⁶ Neda' naca' bení', en bida' yõdzõlió ni, para cabí ulu'gá'anë' ga chul-la yúgu'të bönni' ila'yéajlë'ë neda'.

⁴⁷ Channõ riyõnnë' nu bönni' xtídza'a, en bití' runë' le bal, calëga neda' ichuga' queë' bönni' na' gátie', tu' bida' ni, calëga para ichuga' quégaca bõnachi yõdzõlió ni, pero para usólá' bõnachi yõdzõlió ni.

⁴⁸ Nu bönni' ruzóë' neda' tsólá'alõ, en bití' rizí' lu në'ë xtídza'a, chizóa le ichugu queë' bönni' na'. Didza' na' chibé'lëna' libí'ili' naca tu le ichugu queë' bönni' na' dza údxi.

⁴⁹ Caní naca, ruá'a didza', calëga rácasõ quia', pero Xuza' nasól-lë'ë neda' gudxë' neda' le ral-la' innía', enca' ca ral-la' gu'a didza'.

⁵⁰ Nõzda' gunná bë'ë Dios caní para gata' yõl-la' na' bán idú quégaca bõnachi. Caní naca, didza' na' ruá'a, ruá'a didza' ca na' Xuza' chigudxi cazë' neda'.

13

Jesús riguibë' ní'agaquië' bönni' usëda queë'

¹ Ní' naca dza si' idxín Laní Pascua cate' tu'subanë' bönni' judío ca benë' Dios, bubéajë' bõnachi queë' luyó Egipto. Nõzinë' Jesús chibidxín dza queë'

gátië', cate' ral-la' uzë'ë yödzölió ni, en huöjë' ga zoë' Xuzë'. Ca na' nadxí'inë' bônachi queë' nacuá' yödzölió ni, na'a nadxí'inë' légaquië' ga idxintë gátië' uláz queégaquië'.

² Satanás tu' xihui' chinagú'u yöl-la' Judas Iscariote, zxi'inë' tu bönni' lë' Simón, para udödë' Jesús lu ná'agaca nupa iluti Lë'.

³ Nözinë' Jesús ca naca, birujáë' ga zoë' Dios, en huöjë' ca' ga na' zoë' Dios, ate' Dios Xuzë' chinudödë' lu në'ë Lë' iduté yöl-la' unná bë' queë'.

⁴ Que lë ni na', cate' ni' tahuë', guzuinë' Jesús, en gudúë' lari' rixóa yenë'. Gudélë'ë tu lari' ruzxini ná'aru' le budë'ë lë'ë.

⁵ Ní'irö gudë'ë nisa tu lu zxiga' guíë, ate' gusí lahuë' riguibë' ní'agaquië' bönni' usëda queë', en ruzxinë' ní'agaquië' len lari' na' da' lë'ë.

⁶ Cate' bidxinë' ga rö'ë Simón Pedro, Pedro na' rë' Lë':

—Xan, ¿naru' Li' quíbitso' ni'a?

⁷ Bubi'ë didza' Jesús, rë' lë':

—Lë ni runa', biti' réajni'ininu' na'a, pero huadzë tséajni'inu'.

⁸ Ní'irö Pedro rë' Lë':

—Biti' ca' quíbi cazu' Li' ni'a.

Jesús rë' lë':

—Channö neda' biti' quiba' li', biti' ca' séqui'nu' gunu' neda' tsözxön.

⁹ Ní'irö Simón Pedro rë' Lë':

—Xan, calégasö ni'a quibu', pero quibu' ca' na'a, en icja'.

¹⁰ Jesús rë' lë':

—Nu nayari, ni'asö run bayudxi tsari, tu' naca cazë' dxi'a iduté, ate' libí'ili' nácali' dxi'a, pero calëga yúgu'tëli'.

¹¹ Gunnë' caní Jesús: “Calëga yúgu'tëli' nácali' dxi'a”, tu' nözinë' núlögaquië' na' udödi Lë'.

¹² Gudödi gudibë' Jesús ní'agaquië', buguelë'ë lari' na' buxóa yenë'. Bubö'ë ga tahuë', ate' rë' légaquië':

—¿Réajni'ili' lë na' si' bena' queëli'?

¹³ Libí'ili' ruí'ili' La': Bönni' Usedi enca': Xan. Dxi'a naca ca rnnali', tu' caní naca'.

¹⁴ Na'a, channö neda' naca' Xanli', en Bönni' Usedi queëli', ate' gudiba' ní'ali', lësca' caní ral-la' gunli' libí'ili', quíbili' ni'a luzá'ali' tuli' ia'tuli'.

¹⁵ Tu le buluf'ida' libí'ili' para gunli' libí'ili' ca na' bena' neda'.

¹⁶ Le nácatë rea' libí'ili': Biti' nayëpisëtëre' tu bönni' huen dxin ca xanë', ate' bönni' gubáz biti' nayëpisëtëre' ca nu nasöl-la' lë'.

¹⁷ Channö réajni'ili' yúgu'të lë ni, bica' ba libí'ili' channö gunli' caní.

¹⁸ Didza' ni ruá'a biti' rea' yúgu'tëli'. Nöz quézida' nupa gurö caza' neda', pero run bayudxi gaca lë na' nazúaj lu guichi lá'ayi, le rnna: “Nu rágulen neda' tsözxön, nu ni tá'baga' neda'.”

¹⁹ Na'a riguíxjöi'ida' libí'ili' zí'aló ca gaca, para cate' gaca caní, tséajlë'ëli' zoa caza' neda'.

²⁰ Le nácatë rea' libí'ili': Nu bönni' gunë' bal gubáz isöl-la'a neda', neda' ca' gunë' bal, ate' nu bönni' gunë' neda' bal, gunë' ca' bal Xuzá', nasöl-lë'ë neda'.

Riguíxjö'ë Jesús ca gunë' Judas, udödë' Lë'
(Mt. 26:20-25; Mr. 14:17-21; Lc. 22:21-23)

²¹ Cate' Jesús budxi bë'ë didza' ni, buí'innë', ate' yálajdo' gunnë':

—Le nácatë rea' libí'ili': Tu bönni' nütse'ë ladjali' udödë' neda'.

22 Ní'irō bulu'yú lo luzá'agaquië' tuë' ia'tué' bōnni' usēda queë', en gula'cu'ë bōniga, ate' ta'naba lādxi'gaquië' nuzxi que na' gunnë' Jesús caní.

23 Tuë' bōnni' usēda queë' Jesús, bōnni' na' Jesús nadxí'inë' lë', zoë' cuita lë'ë.

24 Simón Pedro bulá'a buluf'isë' bōnni' ni para inábinë' Jesús nuzxi que na' gunnë' caní.

25 Ní'irō bōnni' na' zoë' cuita lë'ë Jesús rë' Lë':

—Xan, ¿nuzxi na' ru'u didza' que?

26 Bubi'ë didza' Jesús, rë' lë':

—Náquië' bōnni' na' gu'a-në' yōta xtila nabisa.

Ní'irō busubisië' yōta xtila na', en bë'ë queë' Judas Iscariote, zxf'inë' tu bōnni' lë' Simón.

27 Gudōdi gudahuë' Judas yōta xtila na', guyaza Satanás tu' xihui' icja lādxi'da'ahuë'. Ní'irō Jesús rë' lë':

—Lë na' gunu', yōjentë na'a.

28 Biti' ta'yéajni'inë' ia'zica'rë' bōnni' usēda queë' rō'ōgaquië' tahuë' bizx que na' Jesús gudxë' lë' caní.

29 Tu' nu'ë Judas buzudi dumí quégaquië', téquinë' bal-lë' Jesús gudxë' lë': Yōxi' le gáguru' laní, o gunnë': Bë' lati' quégaca bōnachi yechi'.

30 Cate' budxi gudahuë' Judas yōta xtila na', en ni' naca chi'i dzō'ölö, la birúajtë'.

Tu xibá cubi

31 Cate' chibirúajë' Judas na', ní'irō gunnë' Jesús:

—Na'a chizóa ilá' lahui yöl-la' zxon quia' neda', Bōnni' Guljë' Bōnachi, en ilá' lahui ca' yöl-la' zxon queë' Dios.

32 Channö ilá' lahui yöl-la' zxon queë' Dios ni'a quia' neda', Zxf'inë', lësca' Lë cazë' Dios gunë' ga ilá' lahui yöl-la' zxon quia' neda', Zxf'inë', en la' guntë' caní.

33 Libí'ili', zxf'ina'do', ia'tú chí'isö zóalena' libí'ili'. Uguíjali' neda', ate' ca na' chigúdxigaca-në' bōnni' judío, lësca' rea' libí'ili' na'a: Ga na' tseja' neda', biti' gaca guídali' rácasö queé'li'.

34 Rea' libí'ili' tu xibá cubi le rnna caní: Guli'dxí'i luzá'ali' tuli' ia'tuli'. Ca na' neda' nadxí'ida' libí'ili', lësca' caní ral-la' idxí'ili' luzá'ali' tuli' ia'tuli'.

35 Channö huadxí'i luzá'ali' tuli' ia'tuli', iléquite'e yúgu'të bōnachi dá'ali' neda'.

Rnnë' Jesús innë' Pedro biti' núnbë'ë Lë'

(Mt. 26:31-35; Mr. 14:27-31; Lc. 22:31-34)

36 Ní'irō Simón Pedro gunábinë' Jesús, rnnë':

—Xan, ¿gazxi caz tseju'?

Bubi'ë didza' Jesús, rnnë':

—Ga na' tseja' neda', biti' gaca sá'lenu' neda' na'a, pero huadzé guídu' ga tseja' neda'.

37 Pedro rë' Lë':

—Xan, ¿bizx que biti' gaca sá'lenu' Li' na'a? Chizóa' udōda' yöl-la' na'bán quia', gátia' tu' nadxí'ida' Li'.

38 Bubi'ë didza' Jesús, rë' lë':

—¿Naru' udōdu' yöl-la' na'bán quiu' tu' nadxí'inu' neda'? Le nácatë rea' li', zí'alö ca cōdxiba' böra, li' tá'bágu'u tsonna luzuí, innó' biti' núnbë'u neda'.

14

Náquië Jesús nõza tséajlenru' para idxinru' ga zoë Dios Xuz

1 Rnnë' Jesús:

—Biti' cõ'li' baniga lu icja lãdxi'do'oli'. Guli'tséajlë' Dios, en guli'tséajlë' ca' neda'.

2 Lu yu'u lidxë' Xuza' lataj zían nacaá'. La'tu' cabí naca caní, neda' chigudxi caza' libí'ili'. Tseja' na'a, tsõjpa'a lataj queëli' ga tsõjsóali'.

3 Channõ huayéaja', en tsõjpa'a lataj queëli' ga tsõjsóali', huõda' leyúbölö, ate' uchë'a libí'ili' lataj quia', para ga na' tsõjsóa' neda', tsõjsóali' ca' libí'ili'.

4 Nöz quézili' ga ni' tseja', en núnbë'ëli' ca' nõza.

5 Tomás rë' Lë':

—Xan, bití' nõztu' gazxi na' tseju'. ¿Nacxi caz gaca gúnbë'ëtu' nõza?

6 Bubi'ë didza' Jesús, rë' lë':

—Neda' naca caza' nõza, en naca' ca' le naca idütë li, en naca' ca' Nu nabánigaca bõnachi. Ni'a quia' neda'sõ gaca nu idxin ga zoë Dios Xuz.

7 La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibilé'ëli'-në'.

8 Ní'irõ Felipe rë' Lë':

—Xan, buluí'i netu' Xuzu', ate' nácatë queëtu'.

9 Bubi'ë didza' Jesús, rë' lë':

—Felipe, xidzë chiguca zóalena' libí'ili'. ¿Naru' cabí núnbë'ëtso' neda'? Nu bõnni' rilé'enë' neda', rilé'enë' ca' Xuza'. ¿Rnnatso': "Buluí'i netu' Xuzu'?"

10 ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu' didza' ni ruí'lena' libí'ili', calëga rácasõ quia' ruá'a didza' ni, pero Xuza' zóalen cazë' neda', Lë cazë' runë' dxin ni.

11 Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channõ cabí gaca gunlí' caní, guli'tséajlë' neda' ni'a quégaca dxin ni runa'.

12 Le nácatë rea' libí'ili': Yugu' dxin ni runa' neda', lësca' gunë' bõnni' na' réajlë'ë neda', ate' le zxõntërõ ca' gunë' bõnni' na' tu' huõja' ga zoë Dios Xuz.

13 Yúgu'të le inábali' Dios Xuz, en ugunlí' dxin La' neda', neda' guna' lë na' inábali', para ulu'a lahui neda', Zxí'inë', yöl-la' zxõn queë' Dios Xuz.

14 Biti'tës bi inábali', en ugunlí' dxin La' neda', neda' guna' le.

Jesús isõl-lë'ë Dios Bõ' Lá'ayi, para idisóalenë' bõnachi queë'

15 Rnnë' ca' Jesús:

—Channõ nadxí'ili' neda', guli'gún le rea' libí'ili',

16 ate' neda' gáta'yua' lahuë' Dios Xuz, ate' Lë' isõl-lë'ë queëli' Nu yúbölö Nu gácalen libí'ili', Nu utipa lãdxi'li', en sóalenticasõ libí'ili'. Nu ni naca Dios Bõ' Lá'ayi, Nu ruí'i didza' idütë li.

17 Biti' gaca ulu'zì' bõnachi yõdzõlió ni xibë' Lë', tu' cabí gaca ila'lé'e Lë', en bitti' gaca ilúnbe'e Lë'. Zóalen cazë' libí'ili', ate' soë' lu icja lãdxi'do'oli'.

18 Biti' ucá'ana' libí'ili' ca' yugu' bi'i uzëbido'. Huõda' udusóalena' libí'ili'.

19 Ia'tú chí'ido'osõ bítirõ ila'lé'e bõnachi yõdzõlió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'.

20 Dza ní'irõ cate' Dios Bõ' Lá'ayi na' idisóalenë' libí'ili', inõz quézili' zóalen caza'-në' Xuza' Dios, ate' libí'ili' zóalenli' neda', ate' neda' ca' zóalen caza' libí'ili'.

21 Nu bõnni' rizí' lu në'ë xtídza'a, en runë' ca' rruna, naca bë' nadxí'inë' neda'. Xuza' Dios idxí'inë' bõnni' na' nadxí'inë' neda', ate' neda' idxí'ida'-në' bõnni' na', en uluí' lahua' lahuë'.

22 Judas rē' lē', pero calēga Judas Iscariote, rnnē':

—Xan, ζnacxi caz gaca ulu'í lo' lotu' netu', en biti' ulu'í lo' lógaca bönachi yödžölió?

23 Bubi'ē didza' Jesús, rē' lē':

—Nu bönni' nadxí'inē' neda' gunē' ca rnna xtídza'a, ate' Xuza' Dios idxí'inē' bönni' na', ate' guídatu' idisóalentu'-nē' bönni' na' lu icja ládxi'da'ahuē'.

24 Bönni' na' biti' nadxí'inē' neda' biti' runē' ca rnna xtídza'a. Didza' na' biyönili' bē'a neda', calēgasó quia' na', pero naca queē' Dios Xuz nasól-lē'ē neda'.

25 Rē caza' libí'ili' yugu' lē ni tsanni ni zóalena' libí'ili',

26 pero Dios Bö' Lá'ayi gácalenē' libí'ili', en utipē' ládxi'li'. Xuza' Dios isól-lē'ē Lē' queéli' tu' ugunli' dxin La' neda'. Usédinē' libí'ili' yúgu'tē, en usē'ē ládxi'li' ca naca yúgu'tē didza' na' chigudxa' libí'ili'.

27 Rucá'ana' queéli' le cuéqui dxi ládxi'li'. Runna' queéli' yöl-la' rō'ö dxi ladxi' quia'. Yöl-la' rō'ö dxi ladxi' na' runna' queéli' biti' naca ca le tunna queéli' bönachi yödžölió ni. Biti' ichixi icja ládxi'do'oli', en biti' gadxi idžöbili'.

28 Chibiyönili' ca na' chigudxa' libí'ili': Huöja', ate' huöda' udusóalena' libí'ili'. La'tu' nadxí'ili' neda', udžéjali' cate' ni' gudxa' libí'ili' huöja' ga zoē' Dios Xuz, tu' nayépisētē'rē' Dios Xuz ca neda'.

29 Na'a, chigudxa' libí'ili' zí'aló ca sí' gaca, para cate' gaca caní, tséajlē'ēli' neda'.

30-31 'Bíti'rō' gú'ílena' libí'ili' didza' zían, tu' za' tu' xihui', nu rinná be'e bönachi yödžölió ni. Sal-la' biti' bi dē lu nē'e bi gun quia' neda', ral-la' gaca caní para iléquibe'e bönachi yödžölió ni nadxí'ida'-nē' Dios Xuz, en runa' ca na' chigudxē' neda' guna'. Guli'chasa, uzá'aru' ni.

15

Ca naca que lubá uva, en ni'a nē'e lubá na'

1 Lē'sca' caní Jesús gudxē' légaquiē':

—Naca' neda' ca tu lubá uva le naca idú dxi'a, ate' Xuza' náquiē' ca bönni' guz gú'una rapa chí'ē lubá na'.

2 Ugúē' yúgu'tē ni'a nē'e lubá na' naca' neda', le cabí bi ta'bía, ate' uchi'ē yúgu'tē ni'a nē'e na' ta'bía, para ila'bía ia'lati'.

3 Libí'ili' chinácali' dxi'a ni'a que didza' na' chibē'lēna' libí'ili'.

4 Guli'dá'tica'só neda', ca na' neda' dá'tica'sa' ca' libí'ili'. Ca naca que ni'a nē'e lubá na', biti' gaca bi cuía rásasó que, channö cabí dá'tica'só lubá na', lē'sca' caní naca queéli', biti' bi gaca gunli' channö cabí tá'tica'sili' neda'.

5 'Naca' neda' ca lubá na', ate' libí'ili' nácali' ca ni'a nē'e. Nu bönni' dá'tica'sē' neda', ca na' neda' dá'tica'sa' lē', bönni' ni náquiē' ca ni'a nē'e lubá na' ribía yenni', tu' channö nulá'alenli' neda', biti' bi gaca gunli'.

6 Nu bönni' biti' dá'tica'sē' neda', gaca queē' ca raca quégaca ni'a nē'e lubá na' biti' nácagaca dxi'a, ta'rú'unē' ni'a nē'e na', ate' ila'bidxi. Cate' chinábídxigaca ni'a nē'e na', ulu'tubē' léguequi, en ila'gu'ē léguequi lu guí, ate' tséguigaca.

7 'Channö tá'tica'sili' neda', en gunli' ca rnna xtídza'a, huáca inábali' bi guē'ēnili', ate' neda' guna' lē na' inábali'.

8 Gunli' bal Xuza' Dios cate' gunli' xichinē', ate' gácali' ca ni'a nē'e lubá na' ta'bía, en caní gaca bē' nácali' idú bönni' ta'dē'ē neda'.

9 Ca na' nadxí'inè' Dios Xuz neda', lësca' caní nadxí'ida' libí'ili'. Guli'gúntica'sò ca ral-la' gunè' bõnni' nadxí'ida'-nè'.

10 Channõ gunli' ca rea' libí'ili', gunli' ca ral-la' gunè' bõnni' nadxí'ida'-nè', ca na' neda' ca' runa' ca chigudxè' Xuza' Dios neda' guna', en rúntica'sa' le raza lãdxè'è Lè', Bõnni' na' nadxí'inè' neda'.

11 Yugu' didza' ni rea' libí'ili' para udzè'jalenli' tsõzxõn neda', en gaca idú ca na' udzè'jali'.

12 Lè ni naca le rea' libí'ili' gunli': Guli'dxí'i luzá'ali' tuli' ia'tuli', ca na' neda' ca' nadxí'ida' libí'ili'.

13 Biti' gaca idxí'irõnè' nu bõnni' luzè'è ca nu bõnni' udödè' yõl-la' na'bán queè', gátiè' para gácalenè' yugu' bõchi' luzè'è tu' nadxí'inè' légaquiè'.

14 Libí'ili' nácali' bõchi' luzá'a channõ gunli' ca na' chigudxa' libí'ili' gunli'.

15 Biti'rõ innía' queéli' nácali' huen dxin quia', tu' cabí nõzinè' bõnni' huen dxin naca gunè' xanè'. Neda' chigunnía' queéli' nácali' bõchi' luzá'a, tu' chibena' ga nõzili' yúgu'tè le chigudxè' Xuza' neda' guna'.

16 Calèga libí'ili' gurõli' neda', pero neda' gurõ caza' libí'ili', en buzóa' libí'ili' para tséajli' bi tsõjenli', ca na' tun ni'a nè'e lubá na' ta'bía yenni', ate' ugá'anatica'sò lè na' gunli'. Caní gaca, Xuza' Dios gunnè' queéli' yúgu'tè le inábili' Lè', en ugunli' dxin La' neda'.

17 Lè ni naca le rea' libí'ili' gunli': Guli'dxí'i luzá'ali' tuli' ia'tuli'.

Bõnachi yõdzõlió tu'zóa tsõlá'alõ Jesús, en nupa dá'gaca Lè'

18 Gunnè' ca' Jesús:

—Channõ bõnachi yõdzõlió ni tu'zóa libí'ili' tsõlá'alõ, nõzili' chibulu'zõé' neda' tsõlá'alõ zí'alõ ca tu'zõé' libí'ili' tsõlá'alõ na'.

19 La'tu' nácali' tuz len bõnachi yõdzõlió ni, huala'dxí'i bõnachi yõdzõlió ni libí'ili' ca na' ta'dxí'i luzè'eguequi, pero tu'zóa bõnachi yõdzõlió ni libí'ili' tsõlá'alõ tu' cabí nácali' tuz len léguequi, tu' gurõ caza' neda' libí'ili', en gulèaja' libí'ili' ladaj bõnachi yõdzõlió ni.

20 Guli'tsõjnë didza' na' chigudxa' libí'ili', gunnía': Biti' nayèpisètèrè' nu bõnni' huen dxin ca xanè'. Channõ gula'bía lãdxí'gaca bõnachi neda', ila'bía lãdxí'gaca ca' libí'ili'. Channõ nacua' nupa tun ca rnna xtídza'a, ilún ca' ca rnna xtídza'li' libí'ili'.

21 Yúgu'tè lè ni ilún bõnachi queéli' tu' dá'ali' neda', tu' cabí núnbè'gaca Dios Xuz nasõl-lè'è neda'.

22 'La'tu' cabí bida', en la'tu' cabí bè'lèna' légaquiè' didza', biti' ila'báguè'è dul-la', pero na'tu' bida' ni, biti' bi gaca ila'nnè' que dul-la' nabága'gaquiè' le ubèaj légaquiè' dxí'a.

23 Nu bõnni' ruzõé' neda' tsõlá'alõ, ruzõé' ca' Xuza' Dios tsõlá'alõ.

24 La'tu' cabí bena' yugu' yõl-la' huáca ga nacu'è, yugu' le cuntú nu ben ca gulaca, biti' ila'báguè'è dul-la'. Na'a, bila'lé'enè' yugu' lè na' bena', ate' tu'zõé' neda' tsõlá'alõ, en tu'zõé' ca' Xuza' tsõlá'alõ.

25 Caní raca, para gaca ca rnna xtídzè'è Dios, le nazí lu ná'agaquiè', le rnna: Tu'zõé' neda' tsõlá'alõ, en biti' zoa bizx que.

26 'Cate' idxinè' Dios Bõ' Lá'ayi, Bõnni' ru'è didza' idútè'li, en gácalenè' libí'ili', utipè' lãdxí'li'. Isõl-la'a Bõnni' na' queéli' uláz queè' Dios Xuz, ate' gunè' ba nalí quia' neda'.

27 Libí'ili' ca' gunli' ba nalí quia', tu' zóalen cázali' neda' tsõzxõn dza ni'te.

16

1 Gunnë' ca' Jesús:

—Yugu' didza' ni chigudxa' libí'ili', para cabí gaca chopa ládxi'li'.

2 Yugu' bönni' judío ulu'béajë' libí'ili' tsaz ga tu' dubë' tu' sädë' queë' Dios, ate' idxín dza cate' nu bönni' gútië' libí'ili' guéquinë' dxin queë' Dios runë'.

3 Caní ilunë', tu' cabí núnbë'gaquië' Dios Xuz, en cabí núnbë'gaquië' neda'.

4 Rea' libí'ili' yugu' didza' ni, para cate' idxín dza na', tsöjnéli' didza' ni chigudxi caza' libí'ili'.

Le gunë' Dios Bö' Lá'ayi

Gunnë' ca' Jesús:

—Yugu' didza' ni bití' gudxa' libí'ili' dza ni'te, tu' ni' zóalen caza' libí'ili'.

5 Na'a huöja', tsöjsóalena'-në' Dios Xuz, nasól-lë'ë neda'. Bití' inábili' neda' nitulí' libí'ili', bití' innalí': ¿Gazxi tseju'?

6 Na'a, tu' rea' libí'ili' yugu' didza' ni, risëbi ládxi'li'.

7 Neda' rea' libí'ili' le naca idútë li. Gácarö dxi'a queëli' huöja', tu' channö cabí huöja', bití' idisóalënë' Dios Bö' Lá'ayi libí'ili', Bönni' na' gácalenë' libí'ili', en utipë' ládxi'li', pero channö huöja', isól-la'a-në', na' idisóalënë' libí'ili'.

8 Cate' guidë' Lë', gunë' ga iléquibe'e bönachi yödözlió ni nabága'gaca dul-la', en bití' núnbë'gaca le naca tsahui', ate' ichúguië' Dios quéguequi ilátigaca.

9 Nabága'gaquië' dul-la' tu' cabí ta'yéajlë'ë neda'.

10 Bití' núnbë'gaquië' le naca tsahui' tu' ilútië' neda', ate' huöja' ga zoë' Dios Xuz, Bönni' na' náquië' tsahui', ate' bití'rö ila'le'enë' neda'.

11 Ichúguië' Dios quégaquië' ilátië' tu' chiguchúguië' que tu' xihui' nu rinná be'e bönachi yödözlió ni.

12 'Ia'zica' zían didza' rë'ënda' gü'ilena' libí'ili', pero bití' gaca tséajni'ili' na'a.

13 Cate' guidë' Dios Bö' Lá'ayi, Bönni' na' ru'ë didza' idútë li, Lë' usedinë' libí'ili' yúgu'të le naca idútë li na', tu' cabí gu'ë didza' rácasö queë', pero gu'ë yúgu'të didza' na' yönnë' ru'ë Xuza', en gunë' ga inözili' yúgu'të le ral-la' gaca.

14 Lë' gunë' neda' bal, tu' si'ë le nequi quia', en gunë' ga inözili' le.

15 Yúgu'të le nequi queë' Dios Xuz nequi quia'. Que lë ni na' gunniá' si'ë le nequi quia', en gunë' ga inözili' le.

Yöl-la' risëbi ladxí' queëli' huóaca yöl-la' rudzeja

16 Gunnë' ca' Jesús:

—Yetú chí'ido'osö, en bití'rö ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoë' Dios Xuz.

17 Ní'irö bönni' usëda queë' gulë luzá'agaquië' tuë' ia'tué', ta'nnë':

—¿Bizxi rna didza' ni rë' rë'u? Rnnë': "Ia'tú chí'ido'osö, en bití'rö ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoë' Dios Xuz."

18 Ní'irö gula'nnë':

—¿Bizxi caz rë'ëni inná didza' ni, gunnë': "Ia'tú chí'ido'osö"? Bití' réajni'itu' didza' ni ru'ë.

19 Réquibe'enë' Jesús tüz'ënnë' ila'nábinë' Lë', ate' rë' légaquië':

—¿Naru' rinábítsö luzá'ali' ca naca que didza' na' bë'a, gunniá': Ia'tú chí'ido'osö, en bití'rö ilé'eli' neda', ate' ia'tú chí'ido'osö ca' ulé'eli' neda'?

20 Le nácatë rea' libí'ili': Cödxili', en isëbi ládxi'li', pero bönachi yödözlió ni ulu'dzeja cate' iluti neda'. Ní'irö sal-la' isëbi ládxi'li', yöl-la' risëbi ladxí' queëli' huóaca yöl-la' rudzeja cate' ulé'eli' neda'.

21 Tu nigula cate' chizóa gáljabi' bí'ido' queënu, riguí'i rizáca'nu, tu' chibidxín dza queënu, pero cate' chizóabi' tubi' bi'i bönni'do' queënu, bí'ti'rö røjnenu lè na' butságanu, tu' rudzéjanu tu' chigúlajbi' tubi' bi'i bönni'do' yödžölió ni.

22 Lësca' caní raca queëli', risëbi ládxi'li' na'a, pero huöda' uduyúa' libí'ili', ate' ní'irö udzeja ládxi'li', ate' bití' séqui'në' nu bönni' ugüë' yöl-la' rudzeja queëli' na'.

23 'Dza ní'irö bití' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunli' dxin La' neda', Lë' gunnë' queëli'.

24 Ga ridxintë na'a dza bití' rugunli' dxin La' neda' cate' bi rinábili'-në' Dios Xuz. Guli'naba caní, ate' idéli'li' lè na' inábali', para gaca idú yöl-la' rudzeja queëli'.

Ridéli'në' Jesucristo lu le raca yödžölió ni

25 Gunnë' ca' Jesús:

—Yugu' lè na' chibé'lena' libí'ili' didza' bucúdu'a didza'. Huadxín dza cate' bí'ti'rö güi'ílena' libí'ili' didza' le rucúdu'a didza', pero yálajdo' güi'ílena' libí'ili' didza' ca naca queë' Dios Xuz.

26-27 Dza na' inábili'-në' Dios, en ugunli' dxin La' neda', ate' rea' libí'ili', bití' gun bayudxi gáta'yua' lahuë' Dios Xuz uláz queëli', tu' nadxí'inë' Lë' cazë' Dios Xuz libí'ili'. Nadxí'inë' libí'ili' tu' nadxí'ili' neda', en réajlë'ëli' birúaja' ga zoë' Dios.

28 Birúaja' ga zoë' Dios Xuz, en bidxina' yödžölió ni. Ia'tú ca', ucá'ana' yödžölió ni, ate' huöja' ga zoë' Dios Xuz.

29 Ní'irö yugu' bönni' usëda queë' gulë' Lë', ta'nnë':

—Na'a ru'u didza' yálajdo', en bí'ti'rö rucúdu'u didza'.

30 Na'a réquibe'etu' nöz quézinu' Li' yúgu'të, en bití' run bayudxi nu bi inabi yudxi Li', tu' riguíxjói'inu' netu' le si' inábatu'. Que lè ni na' réajlë'ëtu' birúaju' ga zoë' Dios.

31 Bubi'ë didza' Jesús, rë' légaquië':

—¿Naru' réajlë'tsali' neda' na'a?

32 Buli'yú, huadxín dza, en chiridxín dza na', cate' gásilasili' que queëli', en ucá'anali' neda' tuza', pero bití' soa' tuza', tu' zóalen cazë' Dios Xuz neda'.

33 Yugu' didza' ni chigudxa' libí'ili' para cuéqui dxi ládxi'li', tu' nácali' quia' neda'. Lu yödžölió ni gaca queëli' le usaca' zi' libí'ili', pero buli'tipa ládxi'li'. Neda' chibidéli'da' lu le raca yödžölió ni.

17

Jesús rinábinë' Dios gácalenë' nupa dá'gaca Lë'

1 Cate' budxi bë'ë Jesús yugu' didza' ni, guchisa lahuë', ruyúë' yehua' yubálö, ate' rnnë':

—Dios Xuz, chibidxín dza. Ben ga ilá' lahui yöl-la' zxön quia' neda', Zxí'inu', para gaca guna' ga ilá' lahui yöl-la' zxön quiu' Li'.

2 Ben caní tu' chinüdüu' lu na'a yöl-la' unná bë' para inná bé'eda' yúgu'të bönachi, en gu'a yöl-la' na'bán idú quégaca yúgu'të nupa na' chibennu' quia'.

3 Lë' ni naca yöl-la' na'bán idú na', tu' núnbë'gaquië' Li', nacu' la's du' Dios idú, en tu' núnbë'gaquië' ca' neda', Jesucristo, ate' Li' nasöl-lu'u neda'.

4 'Neda' chibena' ga nalá' lahui yöl-la' zxön quiu' yödžölió ni, en chibudxi bena' dxin na' budödu' lu na'a.

5 Na'a, Xuz, ben ga ilá' lahui yöl-la' zxön napa' tsözxön len Li', para gaca quia' yöl-la' zxön guta' quia' tsözxön len Li' dza ni'te quez cate' si' gata' yödzölió.

6 Chibulu'a lahui le nacu' Li' lógaquië' bönni' ni bennu' quia', nupa na' guró cazu' Li' ladaj bönnachi yödzölió. Guléquinë' bönni' ni quiu', ate' bénngacu'-në' quia', ate' tunë' ca rnaa xtídz'u.

7 Na'a nözguequinë' yúgu'të lë na' bennu' quia' zá'gaca lu no'o Li',

8 tu' chibudöda' lu ná'agaquië' didza' na' budödu' Li' lu na'a neda', ate' légaquië' nazí' lu ná'agaquië' le, en téquibe'enë' birúaja' ga zu' Li', ate' ta'yéajlë'ë Li' nasöl-lu'u neda'.

9 'Neda' ráta'yua' Lo' gácalenu' légaquië'. Ráta'yua' Lo', calëga gácalenu' yúgu'të bönnachi yödzölió, pero gácalengacu'-në' bönni' ni chibénngacu'-në' quia', tu' néquiguequinë' quiu'.

10 Yúgu'të nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca náacagaca nupa na' rulu'i lahui yöl-la' zxön quia'.

11 'Na'a, bití'rö ugá'ana' yödzölió ni, pero yugu' bönni' ni ulu'gá'anë' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chi'i nupa ni chibennu' quia', para ilácagaca tuz, ca na' nácaru' rë'u tuz.

12 Cate' ni' guzóalena' légaquië' yödzölió ni, ben chí'igaca'-në', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-në', ate' nitüë' bití' bunítia'-në', pero tuzë' bönni' na' náquië' ca xzí'ini tu' xihui', en narugu queë' gátíë' tsaz. Caní' raca ca nazúaj lu guichi lá'ayi.

13 'Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégaquië' ca na' raca quia' neda' yöl-la' rudzeja.

14 Neda' chibudöda' lu ná'agaquië' xtídz'u, ate' bönnachi yödzölió ni tu'zóa légaquië' tsóla'aló tu' cabí náacagaquië' tuz len léguequi, ca na' naca quia' neda', bití' naca' tuz len bönnachi yödzölió ni.

15 Ráta'yua' Lo', calëga cúagacu'-në' yödzölió ni, pero gun chí'igacu'-në', para cabí ila'dzunë' lu na' tu' xihui'.

16 Bití' náacagaquië' tuz len bönnachi yödzölió ni ca na' naca quia' neda', bití' naca' tuz len bönnachi yödzölió.

17 Guléaj quez quiu' légaquië', ugunu' dxin le naca idútë li. Le naca idútë li na' naca xtídz'u.

18 Ca na' benu' Li', gusöl-lu'u neda' ladaj bönnachi yödzölió ni, lësca' caní' runa' neda', risöl-la'gaca'-në' ladaj bönnachi yödzölió.

19 Tu' nadxí'igacada'-në' rudödi cuína' quiu', para ulu'rúajë' ca' légaquië' quez quiu' tu' nazí' lu ná'agaquië' le naca idútë li.

20 'Ráta'yua' Lo', calëga quégacasë' bönni' ni, pero lësca' quégaquië' bönni' ni ila'yéajlë'ë neda' ni'a que didza' ilu'ë bönni' ni.

21 Ráta'yua' Lo' gunu' ga ilácagaquië' tuz yúgu'të, en ilácagaquië' ca' tuz len rë'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní' ral-la' ilácagaquië' para ila'yéajlë' ia'zíca'rö bönnachi yödzölió ni, Li' caz gusöl-lu'u neda'.

22 Yöl-la' zxön na' bennu' quia', neda' bë'a ca' quégaquië', para ilácagaquië' tuz, ca na' nácaru' tuz rë'u.

23 Li' nacu' tuz len neda', ate' neda' naca' tuz len légaquië', para gaca idú ca náacagaquië' tuz, en caní' iléquibe'e ia'zíca'rö bönnachi yödzölió ni, Li' caz gusöl-lu'u neda', ate' nadxí'igacanu'-në' ca na' nadxí'inu' neda'.

²⁴ 'Xúza'do', rě'enda' ila'cuá'leně' neda' bönni' ni bėnnagacu'-nė' quia' ga na' tsőjsóa', para ila'lé'eně' yöl-la' zxön na' bennu' quia' dza ni'te cate' si' gunu' yödžölió tu' nadxí'inu' neda'.

²⁵ Xuza' tsahui', bönachi yödžölió ni biti' núnbė'gaca Li', pero neda' nunbė' caza' Li', ate' yugu' bönni' ni chinžiguequině' Li' caz gusól-lu'u neda'.

²⁶ Bena' ga nőziguequině' le nacu' Li', en gunra' ca' ga ila'nőzině' lė ni para ca na' nadxí'inu' Li' neda', lėasca' caní ila'dxí'i luzá'agaquiě', ate' gaca caza' tuz len légaquiě'.

18

Ta'zöně' Jesús

(Mt. 26:47-56; Mr. 14:43-50; Lc. 22:47-53)

¹ Cate' budxi bė'ě Jesús yugu' didza' ni, birúajě' ni', ate' sa'yéajleně' yugu' bönni' usėda queě'. Gudödě' ia'tsölá'a yegu Cedrón, en bidxině' ga ni' nacuá' yaga olivo ca', ate' lataj ni guyázaleně' yugu' bönni' usėda queě'.

² Lėasca' Judas, bönni' na' udödě' Jesús, núnbė'ě la' yėla na', tu' butubě' Jesús yugu' bönni' usėda queě' ni' zían luzuí.

³ Ní'irő guchě'ě Judas tu cő' bönni' rőjáquiě' gudil-la, en yugu' bönni' ni'a ná'agaquiě' bixúz unná bė', en ni'a ná'agaquiě' yugu' bönni' yudo' fariseo, ate' yőjáquiě' ga ni' zoě' Jesús, nuá'agaquiě' yugu' guí' yöri, en yugu' le tu'dí'ině'.

⁴ Ní'irő, tu' nőzině' Jesús yúgu'tě le ral-la' gaca queě', birúajě' ga ni' zoě', en rě' légaquiě':

—¿Nuzxi riguíljali'?

⁵ Bulu'bi'ě didza', tě' Lě':

—Jesús, bönni' Nazaret, riguíljatu'-nė'.

Jesús rě' légaquiě':

—Neda' caz.

Judas, bönni' na' rudödě' Jesús lu ná'agaquiě', zóaleně' légaquiě'.

⁶ Cate' Jesús gudxě' légaquiě': "Neda' caz", ní'irő bulu'bíguě'ě cusi zxanlö, en gula'dzö'ě lu yu.

⁷ Jesús gunábině' légaquiě' leyúbölö, rnně':

—¿Nuzxi riguíljali'?

Tě' Lě':

—Jesús, bönni' Nazaret, riguíljatu'-nė'.

⁸ Ní'irő bubí'ě didza' Jesús, rnně':

—Chígúdxá' libí'ili': Neda' caz. Channő riguíljali' neda', guli'gúí'-gáquiě' lataj tsőjhuőjgaquiě' bönni' ni.

⁹ Caní gunně' Jesús para idxín didza' na' bė'ě, gunně': "Nupa ni bennu' quia', nitüě' biti' bunítia'-nė'."

¹⁰ Ní'irő, tu' nu'ě Simón Pedro tu guíě tuchi', gulecjě' le, en bentě' huě' Malco, tu bönni' huen dxin queě' bixúz lo, guchúguiě' guídi náguiě' ibėla bönni' ná'.

¹¹ Ní'irő Jesús rě' Pedro na':

—Bugú'u guíě tuchi' quiu' lidxi. ¿Naru' cabí ral-la' quí'i saca'a lė na' chinuně' Xuza' ca gaca quia'?

Ridxině' Jesús lahuě' bixúz lo

(Mt. 26:57-58; Mr. 14:53-54; Lc. 22:54)

¹² Yugu' bönni' na' rőjáquiě' gudil-la, en bönni' na' nacu'ě lu nė'ě, enca' yugu' bönni' ni'a ná'agaquiě' bönni' judío unná bė' gula'zöně' Jesús, en gulúgui'ě Lě'.

13 Ní'irō gula'ch'ë Lë' z'älö lahuë' Anás, tu' náquië' xto' zxf'inë' Caifás, bönni' náquië' bixúz lo iz na'.

14 Náquië' Caifás bönni' na' buzéajni'inë' yugu' bönni' judío unná bë', bu-lu'inë' légaquië' dx'arō gaca gátië' tuzë' bönni', en calëga initi idütë yōdzō quégaquië'.

Rnnë' Pedro: "Biti' núnbë'a-në' Jesús"

(Mt. 26:69-70; Mr. 14:66-68; Lc. 22:55-57)

15 Simón Pedro, en ia'tuë' bönni' usëda queë' Jesús yōjáquië' cúdzu'lë' Lë', sōjnōgaquië' Lë'. Bönni' usëda ni guyázalenë' Jesús lö'a que lidxi bixúz lo, tu' núnbë'ë bixúz lo na' lë'.

16 Bugá'anë' Pedro ní'ilō ga nu riyaza lö'a na'. Que lë ni na' burúajë' bönni' usëda na' núnbë'ë bixúz lo lë', ate' bé'lenë'-nu didza' nigula na' run chí'inu ga nu riyaza lö'a na', ate' benë' ga guyázië' Pedro lö'a.

17 Ní'irō nigula na' run chí'inu ga nu riyaza lö'a rënu Pedro, rnnanu:

—¿Naru' cabí do'o ca' li' bönni' ni?

Bubi'ë didza' Pedro, rnnë':

—Calëga neda'.

18 Tu' run ziaga, yugu' bönni' huen dxin, en yugu' bönni' ni'a ná'agaca bōnachi yudo' nabéquiagaquië' guí, ate' zuíguequinë' ra' guí na', en tu'tsë'e cuíngaqië'. Lë'sca' Pedro zuílenë' légaquië', rutsë'e cuinë'.

Bixúz lo rinabi yúdxinë' Jesús

(Mt. 26:59-66; Mr. 14:55-64; Lc. 22:66-71)

19 Ní'irō gunabi yúdxinë' bixúz lo Jesús para inōzinë' nupxi dá'gaca Lë', en naxi naca le rusedinë' Jesús bōnachi.

20 Bubi'ë didza' Jesús, rë' lë':

—Lahuí lo bé'lëna' yúgu'të bōnachi didza'. Buseditiqui'sida' légaquië' gapa naca lu yu'u ga tu'dubë' tu'sédë' queë' Dios, enca' chilá yudo', ga ni' tu'dubë' yúgu'të bönni' judío, en bití' bi didza' bë'a bagáchi'sō.

21 ¿Bixz que rinabi yúdxinu' neda'? Gunabi yudxi nupa ni' bila'yōni didza' bé'lëna' léguequi. Nōzguequi quézinë' bönni' na' didza' na' bé'lëna' légaquië'.

22 Cate' budxi bë'ë Jesús didza' ni, tu bönni' ni'a ná'agaca bōnachi yudo' gudápë'ë ru'ë Jesús, rnnë':

—¿Naru' caní rubí'tso' didza' lahuë' bixúz lo?

23 Bubi'ë didza' Jesús, rë' lë':

—Channō bití' gunniá' dxi'a, gudixjö' bízxilō didza' bë'a bití' naca dxi'a, en channō guca dxi'a didza' bë'a, ¿bixz que na' gudápu'u neda'?

24 Ní'irō Anás na' gusōl-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

Leyúbölō rnnë' Pedro: "Biti' núnbë'a-në' Jesús"

(Mt. 26:71-75; Mr. 14:69-72; Lc. 22:58-62)

25 Cate' ni' zuinë' Pedro ra' guí rutsë'e cuinë', yugu' bönni' nacu'ë ni' gulë' lë', ta'nnë':

—¿Naru' cabí do'o ca' li' Jesús na'?

Gudá'baguië' Pedro, rnnë':

—Calëga neda'.

26 Zoë' ni' tu bönni' huen dxin queë' bixúz lo, náquië' di'a dza queë' bönni' na' Pedro guchúguië' guídi náguië', ate' bönni' huen dxin na' rë' Pedro:

—¿Naru' cabí bilé'e quézida' li' la' yëla ni', dzagu'-në' Jesús?

27 Leyúbölō gudá'baguië' Pedro, ate' la' gurōdxitëba' bōra.

*Ridxinë' Jesús lahuë Pilato**(Mt. 27:1-2, 11-14; Mr. 15:1-5; Lc. 23:1-5)*

28 Ní'irō gula'chë'ë Jesús, en bulu'zë'ë lidxë' Caifás na', ate' bila'dxinë' yúlahui' queë' bōnni' yu'u lu nē'ë uláz que yōdz Roma, le nazí'i le Pretorio. Chizá' rení' dza na', ate' biti' gula'yázië' yugu' bōnni' judío yúlahui' na', tu' téquinë' ila'báguë'ë xíguia' channō ila'yázië' ni', le gun ga biti' gaca ilahuë' xtsō' Laní Pascua, laní na' tu'subanë' ca benë' Dios, bubéajë' bōnachi Israel luyú Egipto.

29 Ní'irō birúajë' Pilato, bōnni' na' yu'u lu nē'ë, en bidxinë' ga na' nacu'ë, ate' rë' légaquië':

—¿Bizxi ruzégui'li'-në' bōnni' ni didza'?

30 Bulu'bi'ë didza', tē' lë':

—La'tu' cabí nu'ë bōnni' ni dō', biti' udōditu'-në' lo'.

31 Ní'irō Pilato rë' légaquië', rnnë':

—Lib'i cázali' guli'chë'ë, en buli'chi'a buli'sörö Lë' ca rinná bē' xibá queéli'. Yugu' bōnni' judío tē' lë', ta'nnë':

—Biti' dē lu na'tu' nu gútitu'.

32 Caní guca para idxín xtídzë'ë Jesús, le bē'ë naca ral-la' gátie'.

33 Ní'irō buázië' Pilato yúlahui' na', ate' bulidzë' Jesús, en rë' Lë':

—¿Nacu' Li' Bōnni' Rinná Bé'enë' Bōnachi Judío?

34 Bubi'ë didza' Jesús, rë' lë':

—¿Naru' rácasō quiu' rno' caní, o gulë' bōnachi li' caní ca naca quia'?

35 Pilato rë' Lë':

—¿Naru' réquitsenu' naca' judío? Yugu' bōnni' uládz quiu', en yugu' bixúz unná bē' bulu'dödë' Li' lu na'a. ¿Bizxi caz benu'?

36 Ní'irō bubí'ë didza' Jesús, rë' lë':

—Rinná bē'a neda', pero calëga ca ta'nná bē' bōnachi yōdzölió ni. La'tu' rinná bē'a ca ta'nná bē' bōnachi yōdzölió, ila'dil-lë' bōnni' dágaquië' neda', para cabí ilu'ë lataj nu udōdi neda' lu ná'agaquië' bōnni' judío. Ca rinná bē'a neda' biti' naca ca ta'nná bē' bōnachi yōdzölió ni.

37 Ní'irō Pilato rë' Lë':

—¿Nácatso' bōnni' rinná bē'ë?

Bubi'ë didza' Jesús, rë' lë':

—Naca' ca na' rno'. Que lë ni na' bida' ga gulja' yōdzölió ni, para guna' ba nalí que le naca idútë li. Yúgu'të nupa ni tun le naca idútë li tu'zë nágagaca didza' ruá'a.

38 Pilato rë' Lë':

—¿Bizxi na' le naca idútë li?

*Ta'chúquië' queë' Jesús gátie'**(Mt. 27:15-31; Mr. 15:6-20; Lc. 23:13-25)*

Cate' budxi gunnë' Pilato caní, burúajë' leyúbölö ga na' nacu'ë bōnni' judío unná bē' na', en rë' légaquië':

—Biti' bi dō' ridzólida' nu'ë bōnni' ni.

39 Libí'ili' dē tu le nulaga loli' runli' cate' raca Laní Pascua ni, rinábili' neda' usana'-në' queéli' tuë' bōnni' nadzunë'. ¿Rë'ënili' usana'-në' queéli' Bōnni' Rinná Bé'enë' Bōnachi Judío?

40 Ní'irō yúgu'të' gulu'ë zidzaj didza' leyúbölö, ta'nnë':

—¿Calëga bōnni' ni, pero Barrabás usanu'-në' queétu'!

Barrabás na' náquië' gubán.

19

1 Ní'irō Pilato guchě'ē Jesús, en beně' ga gula'guíně' yugu' bōnni' rōjáquiē' gudil-la Lě'.

2 Bōnni' rōjáquiē' gudil-la na' guluně' tu bregui' ni'a nē'e yōtsi', ate' bulu'dxiē' le icjě' Jesús, en bulu'gácuē' Lě' tu lari' tunna xiná chul-la ca naca le tácuē' bōnni' ta'nná bē'ē.

3 Ní'irō gula'biguē'ē lahuē' Jesús, en tē' Lě':

—¡Bica' bo' Li', Bōnni' Rinná Bé'enē' Bōnachi Judío!

Ní'irō gula'gápě'ē lahuē'.

4 Ní'irō burúajě' Pilato, en rē' yugu' bōnni' judío unná bē', rnně':

—Buli'yú, rubéaja'-nē' loli' ni para inózili' biti' bi rudzōlida' le naca dō' nu'ē bōnni' ni.

5 Ní'irō birúajě' Jesús, dxía icjě' bregui' ni'a nē'e yōtsi' na', en nácuē' lari' tunna xiná chul-la na'. Pilato rē' légaquiē':

—Ni zoě' bōnni' ni.

6 Cate' yugu' bixúz unná bē', en yugu' bōnni' ni'a ná'agaquiē' bila'lé'enē' Jesús, zidzaj gulu'ē didza', ta'nně':

—¡Budě'ē lě'e yaga cruz! ¡Budě'ē lě'e yaga cruz!

Pilato rē' légaquiē':

—Libí'i cázali' guli'chě'ē, en guli'tsōjdě'ē lě'e yaga cruz. Neda' biti' bi dō' budzōlida' nu'ē bōnni' ni.

7 Ní'irō bōnni' judío na' tē' lě':

—Dě queētu' tu xibá, ate' rinná bē' xibá queētu' na' ral-la' gátie' bōnni' ni tu' gunně' náquiē' Zxf'ině' Dios.

8 Cate' biyōnně' Pilato didza' ni, gúdxirōnē'.

9 Leyúbōlō buáziē' yúlahui' na', en rē' Jesús:

—¿Gázxité bōnni' Li'?

Biti' bi didza' bubi'ē Jesús.

10 Ní'irō Pilato rē' Lě':

—Naru' cabí ubí'tso' didza', quíxjōi'inu' neda'? ¿Naru' cabí nōzinu' dē lu na'a udá'a Li' lě'e yaga cruz, en dē lu na'a usana' Li'?

11 Bubi'ē didza' Jesús, rē' lě':

—Biti' bi dē lu no'o gunu' quia' la'tu' cabí nudōdē' Dios yōl-la' unná bē' na' lu no'o. Que lě' ni na', bōnni' na' budōdē' neda' lu no'o nabága'rē' xíguia' ca li'.

12 La' ní'isō rizóa ribō'ē Pilato usanē' Jesús, pero gulu'ē zidzaj didza' bōnni' judío unná bē', ta'nně':

—Channō usanu'-nē' bōnni' ni, biti' ridzagu'-nē' dxi'a César, bōnni' rinná bé'enē' idúté yōdzōlió. Nu bōnni' run cuiné' bōnni' rinná bē'ē, ridá'báguē'ē César na'.

13 Cate' biyōnně' Pilato didza' ni, gunná bé'enē' nupa diguá'gaca Jesús, ate' gurō'ē xilatjě' ga ruchi'a rusōrōē', lataj na' nazí'i le Lō'a Ga Zxóagaca Guiójt'a, en ca naca didza' hebreo nazí'i le Gabata.

14 La' dza ná'asō naca dza si' idxín Laní Pascua, en naca idú hua gubidza. Ní'irō Pilato gudxē' yugu' bōnni' judío unná bē' na', rnně':

—Ni zoě' bōnni' rinná bé'enē' libí'ili'.

15 Gulu'ē zidzaj didza', ta'nně':

—¡Bétiē'! ¡Bétiē'! ¡Budě'ē lě'e yaga cruz!

Pilato rē' légaquiē':

—¿Rinábitseli' neda' udá'a-nē' lě'e yaga cruz bōnni' rinná bé'enē' libí'ili'?

Bulu'bi'ē didza' bixúz unná bē', ta'nně':

—Cúnturö nu zoa rinná be'e netu'. Tuzë' César rinná bé'enë' netu'.

¹⁶ Que lë ni na' Pilato budödë' Jesús lu ná'agaquië', para tsöjdá'agaquië' Lë' lë'e yaga cruz. Ní'irö gula'guélé'ë Jesús, en gula'chë'ë Lë' ní'ilö.

Tu'dë'ë Jesús lë'e yaga cruz

(Mt. 27:32-44; Mr. 15:21-32; Lc. 23:26-43)

¹⁷ Birúajë' Jesús ni', nu'ë yaga cruz queë', sa'yéajë' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota.

¹⁸ Bulu'dë'ë Jesús lë'e yaga cruz ni', ate' bulu'dá'lenë' Lë' tsözxön lë'egaca yaga cruz ia'chopë' bönni'. Tsölá'a huéaj ta'dë'ë, ate' Jesús dë'ë gatsaj láhui'lö chopë' bönni' na'.

¹⁹ Gusól-lë'ë Pilato tu bönni' nu'ë le buzúajë' lu guichi le buzóë' lë'e yaga cruz icjlë' Jesús, le rnna caní: "Jesús, Bönni' Nazaret, Bönni' Rinná Bé'enë' Bönni' Judío."

²⁰ Bulu'labë' zían bönni' judío didza' ni, tu' zoa ga na' bulu'dë'ë Jesús lë'e yaga cruz gala'sö ra' yödzo, ate' didza' na' nuzúajë' len didza' hebreo, en len didza' griego, en len didza' latín.

²¹ Yugu' bixúz unná bë' queégaquië' bönni' judío të' Pilato, ta'nnë':

—Biti' uzúaju', "Bönni' Rinná Bé'enë' Bönni' Judío." Buzúaj caní: "Bönni' ni gunné': Inná bé'eda' bönni' judío."

²² Bubi'ë didza' Pilato, rë' légaquië':

—Le chinuzúaja', tsaz chinuzúaja'.

²³ Cate' yugu' bönni' na' rójáquië' gudil-la budxi bulu'dë'ë Jesús lë'e yaga cruz, gula'guélé'ë lari' gúcuë'. Gula'béajë' tápalö, tu cö' huéaj guta' que queégaquië'. Gula'guélé'ë ca' lari' guxóa yenë' Jesús, ate' lari' na' bití' nadía, pero naduba tuz ca naduba.

²⁴ Ní'irö yugu' bönni' na' rójáquië' gudil-la gulë luzá'agaquië' tuë' ia'túë', ta'nnë':

—Biti' ichúguru' le, pero dxí'arö gaca uyuru' le gaca bë' para inöziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guisië' que queégaquië' lari' nacuá', en que lari' quia' bulu'yúë' le naca bë'.

Caní gulunë' bönni' na' rójáquië' gudil-la.

²⁵ Xinë'ë Jesús, en nigula zxílanu xinë'ë, en María, nigula queë' Cleofas, en María Magdalena gula'cuá'anu gala' ga na' dë'ë Jesús lë'e yaga cruz.

²⁶ Cate' Jesús bilé'enë'-nu xinë'ë, en bilé'enë' ca' zoë' ni' bönni' usëda queë' na' nadxí'inë', gudxë'-nu xinë'ë:

—Na'a, na' zoë' zxi'inu'.

²⁷ Ní'irö gudxë' bönni' usëda queë' na':

—Na' zóanu xinó'o.

Bönni' usëda na' benë' ga yösóanu lidxë' la' dza ní'isö.

Le guca cate' gutië' Jesús

(Mt. 27:45-56; Mr. 15:33-41; Lc. 23:44-49)

²⁸ Gudödi ni, tu' nözinë' Jesús yúgu'të chiböa budzaga lahui, en para udxín le nazúaj lu guichi lá'ayi, gunné':

—Ribidxa' nisa.

²⁹ Dë ni' tu' zxiga' yudzu nupi zi. Ní'irö yugu' bönni' na' rójáquië' gudil-la bulu'gui'jë' nupi zi na' tu le bululu rixxupi nisa, ate' bulu'zöë' le tu lahui gui, en bulu'dë'ë le ru'ë Jesús para xupë'.

30 Budxi gu'ë Jesús nupi zi na', gunnë':

—Chinácatë.

Ní'irö buzötaj icjë'. Burúajtë bö' naca cazë', gútië'.

Tu bönni' reajë' gudil-la runë'ë yaga tuchi' cuita lë'ë Jesús

31 Ní'irö, tu' naca dza si' idxín Laní Pascua na', en tu' cabí ral-la' ulu'gá'ana nupa nátagaca lë'egaca yaga cruz cate' naca dza lá'ayi quégaquië', le naca tu dza lá'ayi zxöntë, que lë ni na' yugu' bönni' judío gulá'tayuë' lahuë' Pilato guié' bönni' rójáquië' gudil-la tsójtítsjagaquië' xiguichjagaquië' bönni' dá'gaquië' lë'egaca yaga cruz, en ulu'zótjë' légaquië' lë'egaca yaga cruz na'.

32 Que lë ni na' gula'biguë'ë bönni' rójáquië' gudil-la, ate' gula'guítsjë' xiguichjë' bönni' zí'alö, en lësca' caní gulunë' queë' ia'túë' bönni' na' dá'lenë' Jesús lë'e yaga cruz.

33 Cate' bila'dxinë' ga na' dë'ë Jesús, en bila'lé'enë' chinátië', bití' gula'guítsjë' xiguichjë'.

34 Ní'irö tuë' bönni' na' reajë' gudil-la bunë'ë yaga tuchi' cuita lë'ë Jesús, ate' la' birúajtë rön, en nisa.

35 Neda', Juan, bilé'eda' lë ni, en runa' ba nalí que, ate' le runa' ba nalí naca idütë li. Nöz quézida' ruá'a didza' idütë li, para tséajlë'ëli' ca' libí'ili' ca naca queë' Jesús.

36 Gulaca yugu' lë ni para budxín le nazúaj lu guichi lá'ayi, le rnna: "Bití' gatsaj nitú dxita yu'ë."

37 Ia'tú le nazúaj ca' lu guichi rnna caní: "Ulu'yúë' bönni' na' bulu'në'ë lë' yaga tuchi'."

Tu'cáché'ë Jesús

(Mt. 27:57-61; Mr. 15:42-47; Lc. 23:50-56)

38 Gudödi guca yúgu'të lë ni, guyijë' José, bönni' yödö Arimatea, bönni' dë'ë Jesús, pero bagáchi'sö tu' rádxinë' yugu' bönni' judío unná bë', ate' gunábinë' Pilato gu'ë lë' lataj u'ë Jesús. Pilato bë'ë lë' lataj. Ní'irö bidxinë' José ga na' dë'ë Jesús lë'e yaga cruz, ate' bu'ë Lë'.

39 Lësca' bidxinë' Nicodemo ni', bönni' na' guyijë' zí'alö yöjyúë' Jesús chi'i dzö'ölö, nu'ë tu le nutsí'i nöri silá' que mirra, en tu le rilá' zxixi, le naca ca tu gayuá' guié'.

40 Ní'irö José, en Nicodemo na' gula'guélë'ë Jesús, en bulu'chölinë' Lë' yugu' lári'do', ate' gula'gu'ë láhuilö lë na' nutsí'i nöri silá' que mirra, en le rilá' zxixi. Gulunë' ca nalëbiguequinë' tunë' bönni' judío cate' tu'cáché'ë tu bönni' nati.

41 Gala' ga na' bulu'dë'ë Jesús lë'e yaga cruz dë tu luyú ga zeaj da' yaga olivo, ate' gatsaj láhui'lö lataj na' zoa tu yeru ba cubi le nadaj lë'e guí'a guío'j, yeru ba na' cuntu nu ta'gúí'inë'.

42 Lu yeru ba na' gula'gu'ë Jesús tu' dë gála'sö yeru ba na', en tu' naca dza tu'pë'ë bönni' judío que Laní Pascua.

20

Rubanë' Jesús lu yöl-la' guti

(Mt. 28:1-10; Mr. 16:1-8; Lc. 24:1-12)

1 Cate' chinaca zilado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guío'jta'a na' busayaj ga nu riyaza yeru ba na'.

² Ní'irō bōajnu carelō ga zoë' Simón Pedro, dzáguie' lē' ia'tué' bōnni' usēda, bōnni' na' Jesús nadxí'inē' lē', ate' rēnu légaquie':

—Bulu'béajē' Xanru' yeru ba ni', en biti' nōztu' gazxi gula'gu'ē Lē'.

³ Ní'irō bila'rúajē' Pedro, en ia'tué' bōnni' usēda na', sōjáquie' ra' yeru ba na'.

⁴ Tsōzxōn ta'xítie' iropē', pero ia'tué' bōnni' usēda na' guxítirē' carelō ca Pedro, ate' zí'alō lē' bidxinē' ra' yeru ba na'.

⁵ Biyéchuē', en buyuē' lu yeru ba na', ate' bilé'enē' yugu' lári'do' na' bila'rōlinē' Jesús, nacuá' ni', pero biti' guyáziē' yeru ba na'.

⁶ Ní'irō bidxinē' Simón Pedro cúdzu'lē' ia'tué' bōnni' usēda na', ate' guyáziē' lē' yeru ba na', en bilé'enē' lári'do' na' nacuá' ni'.

⁷ Lē'sca' bilé'enē' lári'do' na' gula'xóē' icjē' Jesús, biti' dēlen ia'zíca'rō lári'do' na', pero tsólá'alō nudubi quez.

⁸ Ní'irō guyáziē' ca' ia'tué' bōnni' usēda na' bidxinē' zí'alō ra' yeru ba na', en bilé'enē' ca' na' naca, ate' guyéajlē' didza' bē'ē Jesús.

⁹ Caní guca, tu' cabí ta'yéajni'ininē' le nazúaj lu guichi lá'ayi ca run bayudxi gaca queē' Jesús, ate' ubanē' lu yōl-la' guti.

¹⁰ Ní'irō iropē' bōnni' usēda na' yōjhuōjgaquie' lídxigaquie'.

Rulu'i lahuē' Jesús lonu María Magdalena

(Mr. 16:9-11)

¹¹ Bugá'ananu María ní'ilō ra' yeru ba na', ribōdxinu. Tsanni ni' ribōdxinu, biyéchunu, buyunu lu yeru ba na'.

¹² Bilé'enu chopē' gubáz lá'ayi queē' Dios ni', nácugaquie' lari' chiguichi. Rō'ōgaquie' ni', tuē' ícalō ba na', en ia'tué' xiní'alō ba na' ga ni' gula'gu'ē Jesús.

¹³ Yugu' gubáz lá'ayi na' tē' lēnu, ta'nnē':

—Nigúlado', ¿bizx que ribōdxu'?

Rēnu légaquie':

—Tu' bulu'ú'ē Xana', en biti' nōzda' gazxi gula'gu'ē Lē'.

¹⁴ Cate' budxi gunnānu caní, buécjanu, en bilé'enu-nē' Jesús, zoē' ni', pero biti' réquibe'enu Jesús na'.

¹⁵ Ní'irō Jesús gudxē'-nu:

—Nigúlado', ¿bizx que ribōdxu'? ¿Nuzxi ruguilju'?

Tu' réquinu náquie' Lē' bōnni' rapa chi'ē latja na', rēnu Lē':

—Bōnni', channō li' bu'u-nē', gudíxjōi' neda' gazxi gulú'u-nē', ate' neda' u'a-nē'.

¹⁶ Ní'irō Jesús gudxē'-nu:

—María.

Ní'irō buécjanu, en lu didza' hebreo rēnu Lē':

—Raboni.

Didza' ni rnna: Bōnni' Usedi quia'.

¹⁷ Jesús rē'ē-nu:

—Biti' canu' neda', tu' cabí ruhépinida' ga zoē' Xuza'. Na'a, guyéaj ga nacu'ē bōchi' luzá'a, ate' yōjōdxí-gáquie': "Caní rnnē' Jesús: Huēpa' ga zoē' Xuza', náquie' ca' Xúzili'. Náquie' Dios quia', en Dios queēli'."

¹⁸ Ní'irō guyéajnu María Magdalena na', yōjtíxjōi' inu yugu' bōnni' usēda queē' Jesús chibilé'enu-nē' Xanru', en ca naca didza' na' gudxē'-nu.

Rulu'i lahuē' Jesús lógaquie' bōnni' usēda queē'

(Mt. 28:16-20; Mr. 16:14-18; Lc. 24:36-49)

¹⁹ Cate' chigul-la la' dza ná'asō, le naca dza risí lo gadxi dza, nudúbigaquie' bōnni' usēda queē' Jesús, ate' nayayaj yu'u ga na' nacu'ē tu' tádxinē' bōnni'

judío unná bē'. Ní'irō buluf'i lahuē' Jesús gatsaj láchui'lō ga na' nacu'ē, en rē légaquiē':

—Gulí'zóa dxi ládxi'li'.

²⁰ Cate' budxi gudxē' légaquiē' didza' ni, buluf'inē' légaquiē' nē'ē, en cuita lē'ē. Ní'irō tu'dzéjanē' yugu' bōnni' usēda na' tu' tu'lé'enē' Xanru'.

²¹ Ní'irō Jesús rē' légaquiē' leyúbölō, rnnē':

—Gulí'zóa dxi ládxi'li'. Ca benē' Xuza', gusöl-lē'ē neda', lē'sca' caní risöl-la-la' libí'li' tsōjenli' xichina'.

²² Cate' budxi gunnē' caní, bulubē' lógaquiē', en rē' légaquiē':

—Gulí'sí' Dios Bō' Lá'ayl'.

²³ Núti'tēs nu uniti loli', nu na' ben dul-la', chiyú'u yöl-la' runiti lo que, ate' núti'tēs nu bití' uniti loli' le, ugá'ana dul-la' que nu na' nun dul-la'.

Bití' réajlē'ē Tomás

²⁴ Tomás bití' zóalenē' légaquiē' cate' Jesús buduyúē' légaquiē'. Náquiē' Tomás tu'ē bōnni' chínnuē' ni', en tu'ē ca' lē' Bōnni' Bilidí'.

²⁵ Gudōdi ní' ia'zica'rē' bōnni' usēda na' gulē' Tomás, ta'nnē':

—Chibilé'etu'-nē' Xanru'.

Tomás rē' légaquiē':

—Channō cabí ilé'eda' nē'ē ga gunnē' bididaj, en unē'a xibōn na'a ga na' gunē'gaca bididaj na', en unē'a na'a cuita lē'ē ga na' gunnē' yaga tuchi', bití' ca' tséajlē'a.

²⁶ Cate' chigudōdi ia'xunu' dza, nudúbigaquiē' bōnni' usēda na' leyúbölō lu yu'u, ate' Tomás na' zóalenē' légaquiē'. Sal-la' nayayaj yu'u ga na' nacu'ē, buluf'i lahuē' Jesús gatsaj láchui'lō ga na' nacu'ē, en rē' légaquiē':

—Gulí'zóa dxi ládxi'li'.

²⁷ Ní'irō Jesús rē' Tomás na':

—Bunē' xibōn no'o ni, en buyú na'a ni. Bunē' no'o cuita lē'a ni, en bití'rō gaca chopa ládxi'u, pero guyéajlē' neda'.

²⁸ Ní'irō bubí'ē didza' Tomás, rē' Lē':

—Xána'do', en Dios quia'.

²⁹ Jesús rē' lē':

—Tomás, tu' bulé'enu' neda', réajlē'u. Bica' ba nupa ní' ila'yéajlē' neda' sal-la' bití' ila'lé'eni neda'.

Le rē'ēni gun didza' nazúaj lu guichi ni

³⁰ Benē' Jesús zíanrō ca' yöl-la' huáca lógaquiē' bōnni' usēda queē', le cabí nazúajgaca lu guichi ni.

³¹ Yugu' lē' ni nuzúaja' lu guichi para tséajlē'ēli' náquiē' Jesús Bōnni' na' ru'ē Dios lē' Cristo, Zxí'inē' Dios, en cate' tséajlē'ēli', gata' queéli' yöl-la' na' bán idú tu' réajlē'ēli'-nē'.

21

Ruluf'i lahuē' Jesús lógaquiē' gadxē' bōnni' usēda queē'

¹ Gudōdi guca lē' ni, leyúbölō buluf'i lahuē' Jesús lógaquiē' bōnni' usēda queē' ga naca ra' nísado' que Tiberias, ate' caní guca ca na' buluf'i lahuē' lógaquiē'.

² Nudúbigaquiē' Simón Pedro, en Tomás, bōnni' na' tu'ē ca' lē' Bōnni' Bilidí', en Natanael, bōnni' yödzo Caná que luyú Galilea, en chopē' bōnni' zxí'inē' Zebedeo, en ia' chopē' ca' bōnni' usēda queē' Jesús.

³ Simón Pedro rē' légaquiē':

–Tseaja' tsöjxöna'-ba' böla.

Të' lë' ia'zica'rë', ta'nne':

–Guntu' li' tsözxön.

Ní'irö yöjáquië', en gula'benë' tu lë'e bárcodo', ate' rëla ni' nituba' böla biti' gula'zönë'-ba'.

⁴ Cate' chizá' rení', yöjsóë' Jesús luyú ra' nisa na', pero biti' téquibe'enë' bönni' usëda queë' Jesús Lë' na'.

⁵ Ní'irö Jesús rë' légaquië':

–Zxí'ina'do', ¿naru' cabí deba' lati' böla queëli'?

Bulu'bi'ë didza', të' Lë':

–Nituba'.

⁶ Ní'irö Jesús rë' légaquië':

–Guli'chílaj yöxaj böla queëli' tsölá'a ibëla barco, ate' sòngacali'-ba'.

Ní'irö gula'chiljë' le, ate' bitirö guca ulu'béajë' le, tu' naguíraba' böla lë'e yöxaj böla na'.

⁷ Ní'irö bönni' usëda na' nadxí'inë' Jesús lë' rë' Pedro, rnnë':

–jXanru' na'!

Cate' biyönnë' Simón Pedro, “Xanru' na'”, böácüë' lari' gúcüë', tu' nagúë' le zí'aló, ate' guyázië' lu nisa.

⁸ Bila'dxinë' ia'zica'rë' bönni' usëda na', tu'së'ë barco na', suná'ayöjgaquië' yöxaj ga na' dzö'öba' böla, tu' cabí naca zítu' ga dë luyú bidxi. Nácatë ca tu gayuá' löga' ní'aru'.

⁹ Cate' bila'dxinë' luyú bidxi na', bila'lé'enë' rö'ö tu guí' bo' yalaj ni', en xzóaba' tuba' böla láhuiló, en dë ca' yöta ni'.

¹⁰ Jesús rë' légaquië':

–Guli'diguá'a-ba' ni böla na' si' guzxöngacali'-ba'.

¹¹ Gurenë' Pedro lë'e barco na', ate' gú'uyöjë' yöxaj na' zaca' luyú bidxi, nalirö-ba' böla zxön, idú tu gayuá' yu' chí'inu-unba'. Sal-la' nácagacaba' böla zían, biti' biröza' yöxaj na'.

¹² Ní'irö Jesús rë' légaquië':

–Guli'dá gáguli'.

Biti' burúguinë' nitúë' bönni' usëda queë' na' inábinë' Lë', innë': “¿Nuzxi Li'?” Nözguequi quézinë' náquië' Xanru'.

¹³ Ní'irö gubíguí'ë Jesús, en gudélë'ë yöta na', enca' böla na', ate' bë'ë quégaquië'.

¹⁴ Lë' ni naca le bunny luzuí buluí'i lahuë' Jesús lógaquië' bönni' usëda queë' gudödi bubanë' lu yöl-la' guti.

Jesús ru'ílenë' Simón Pedro didza'

¹⁵ Cate' budxi gulahuë', Jesús rë' Simón Pedro:

–Simón, zxi'inë' Jonás, ¿naru' nadxí'irönu' neda' ca nadxí'iguequinë' bönni' ni neda'?

Bubi'ë didza' Pedro, rë' Lë':

–Ön, Xan. Li' nöz quézinu' raza ládxa'a Li'.

Jesús rë' lë':

–Bugagu yugu' bö'cu' zxíla'do' quia'.

¹⁶ Jesús rë' lë' le buropi luzuí, rnnë':

–Simón, zxi'inë' Jonás, ¿naru' nadxí'inu' neda'?

Bubi'ë didza' Pedro, rë' Lë':

–Ön, Xan. Li' nöz quézinu' raza ládxa'a Li'.

Jesús rē' lē':

—Bugagu yugu' bö'cu' zxila' quia'.

¹⁷ Jesús rē' lē' le bunni luzuí:

—Simón, zxf'inē' Jonás, ¿raza ládXu'u neda'?

Buí'innē' Pedro tu' le chibunni luzuí rinabi yúdxinē' lē', gunnē': “¿Raza ládXu'u neda'?” Bubi'ē' didza' Pedro, rē' Lē':

—Xan, yúgu'tē' nōz quézinu' Li'. Nōzinu' raza ládxa'a Li'.

Jesús rē' lē':

—Bugagu yugu' bö'cu' zxila' quia'.

¹⁸ Le nácatē' rea' li', cate' ni' nacu' ra'bando', rácasō quiu' bugacu cuinu', en ca gunnásō quiu' gudó'. Cate' igulu', ulí no'o, ate' nu yúbólō ugacu li' lari', en ichē' li' ga ni' bití' guē'ēmmu' tseaju'.

¹⁹ Yugu' didza' ni bē'ē' Jesús naca bē' naca gátíē' Pedro, tsōjtē'ē' lē'e yaga cruz, para gaca yól-la' ba queē' Dios. Cate' budxi gunnē' caní Jesús, gunnē' ca' ia'tú:

—Gudá' neda'.

Ru'ē' didza' Jesús ca gaca queē' bönni' usēda na' nadxí'inē'

²⁰ Buécjē' Pedro, en bilé'enē' sōjnáhuē' légaquiē' bönni' usēda na' Jesús nadxí'inē' lē'. Náquiē' bönni' usēda na' gurō'ē' cuita lē'ē' Jesús cate' ni' gulahuē', en gudxē' Jesús: “Xan, ¿nuzxi na' udōdi Li'?”

²¹ Cate' Pedro bilé'enē' lē', rē' Jesús:

—Xan, ¿bizxi gunē' bönni' ni?

²² Jesús rē' lē':

—Channō rē'ēnda' ugá'anē' bönni' ni ga idxinrō dza huōda', bití' ral-la' cō'u bōniga. Gudá'a neda' li'.

²³ Guzē' didza' ni ga nacu'ē' böchi'ru' ta'yéajlē'ē' Cristo. Téquinē' bití' gátíē' bönni' usēda na'. Jesús bití' gudxē' lē' bití' gátíē', pero caní gunnē': “Channō rē'ēnda' ugá'anē' bönni' ni ga idxinrō dza huōda', bití' ral-la' cō'u bōniga.”

²⁴ Bönni' usēda ni naca' neda', Juan. Runa' ba nalí quéguequi lē' ni, en nuzúaja' yugu' lē' ni lu guichi, ate' nōzili' naca idútē' li le runa' ba nalí.

²⁵ Ziánrō ca' le benē' Jesús. Channō nu uzúaj léguequi lu guichi tu tu, rusaca' quia' bití' guequi yödzólió ni ila'cuá' guichi na' ral-la' nu uzúaj. Ca' caz.

LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

Le guzxi' lu nē'ē Dios, isöl-lē'ē Dios Bö' Lá'ayi

¹ Cate' buzúaja' lu guichi zí'alō, quiu' li', Teófilo, neda', Lucas, buzúaja' yúgu'tē le gusí lahuē' runē' Jesús, en rusédinē'

² ga bidxintē dza buēpē' yehua' yubá. Cate' si' huēpē' Jesús yehua' yubá, dzáguie' Dios Bö' Lá'ayi Lē', gunná bē'ē ca ral-la' ilunē' gubáz queē', yugu' bönni' na' gurō cazē'.

³ Gudōdi gud'i guzxaqué'ē Jesús, gútiē'. Ní'irō bubanē', en bulu'í lahuē' lógaquiē' gubáz queē' na'. Bulu'ínē' légaquiē' zían le gulaca bē' zoē' nabanē', le cabí gaca nu tá'baga'. Zían luzuí bulu'í lahuē' lógaquiē' idú ca choá' dza, en bē'lenē' légaquiē' didza' ca rinná bē'ē Dios.

⁴ Cate' ni' nacu'ē tsōzxōn, gunná bé'enē' légaquiē' cabí ulu'z'ē' Jerusalén. Jesús gudxē' légaquiē', rnnē':

—Guli'cōz ni' le guzxi' lu nē'ē Xuza' isöl-lē'ē queēli' ca na' chibusiyōn quezida' libí'ili'.

⁵ Gunnē' ca':

—Le nácatē Juan buquilē' bōnachi nisa lu nisa. Na'a bití' tse xidzé gaca queēli' le rulu'í yōl-la' ridila nisa ni, idisóalenē' Dios Bö' Lá'ayi libí'ili'.

Ruhuēpē' Jesús yehua' yubá

⁶ Ní'irō yugu' bönni' ta'yéajlē'ē Jesús, nudúbigaquiē' ni', gula'nábinē' Lē', ta'nnē':

—Xan, çnaru' gunu' ga ila'nná bē' bōnachi Israel leyúbölō dza ni zóaru' na'a?

⁷ Jesús gudxē' légaquiē':

—Bití' nequi queēli' inózili' bizxi dza o bizxi dzō' gunē' Dios Xuz le nuzóē' lu na' cazē'.

⁸ Sí'ili' yōl-la' huáca cate' guidē' Dios Bö' Lá'ayi idisóalenē' libí'ili'. Ní'irō gunli' ba nalí quia' neda' lu yōdzō Jerusalén, en idú luyú Judea, en luyú Samaria, en ga ídxintēli' idútē yōdzōlió.

⁹ Cate' budxi bē'lenē' légaquiē' didza' ni, tsanni ni' tu'yusē' ca' Lē', la' buēpitē' xitsá' ga rō'ō tu bōaj le bucache' Lē', ate' bití'rō bila'lé'enē' Lē'.

¹⁰ Tsanni ni' tu'yúē' lúzxibalō cate' ni' buēpē' Jesús, bulu'lu'í lógaquiē' chopē' gubáz lá'ayi ga na' nacu'ē, nácuqaquiē' lari' chiguíchido'os.

¹¹ Chopē' ni' gulē' légaquiē', ta'nnē':

—Bōnni' Galilea, çbizx que ruyuli' lúzxibalō? Lē' cazē' Jesús ni' si' guzē'ē ga zóali', buēpē' yehua' yubá, lē'sca' caní huōdē' leyúbölō ca na' chibilé'eli'-né' sōhuójē' yehua' yubá.

Ta'bōē' Matías para tsáziē' xilatjē' Judas

¹² Ní'irō gula'z'ē' ga na' rō'ō gu'ado' na' nazí' le Gu'ía Yaga Olivo, ate' yōjhuójgaquiē' Jerusalén. Gu'ado' ni' dē' gála'sō ga dē' Jerusalén, tsca nazí'gaquiē' lataj ta'z'ē' dza lá'ayi quégaquiē'.

¹³ Cate' bulu'dxinē' yōdzō ni', gula'benē' ga naca buropi cuía lu yu'u, ga ni' ta'cu'ē Pedro, en Jacobo, en Juan, en Andrés, en Felipe en Tomás, en

Bartolomé, en Mateo, en Jacobo, xzí'inè' Alfeo, en Simón, bönni' na' ruí' ládxe'è ladzè', en Judas, böchë'è Jacobo.

¹⁴ Yúgu'tè bönni' ni tu'lidzè' Dios tsözxón, ate' yugu' böchë'è Jesús, en María, xinë'è Jesús, en ia'zica'rönu nigula ca' núngaquiè' légaquiè' tsözxón.

¹⁵ La' dza ná'asö guzuínè' Pedro gatsaj láhui'lö ga nacu'è böchi' luzá'aru' na' ta'yéajlè'è Cristo. Gulaca idú ca xópalalaj bönachi nupa nudúbigaca ni'.

¹⁶ Pedro guxè' légaquiè', rnnè':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunné' Dios Bö' Lá'ayi dza ni'tè, le buzúajè' David lu guichi, ca guca queè' Judas, bönni' na' guchë'è nupa ni' gula'zön Jesús.

¹⁷ Judas na' gubábalenè' rè'u, en bénlenè' rè'u tsözxón dxin ni.

¹⁸ Gula'zí'inè' tu la' yèla lazxaj que dö' na' bi'è bönni' ni. Judas ni gubixè', en biröza' lè'è, ate' bila'rúaj yúgu'tè le dzö'ö lè'è.

¹⁹ Cate' bila'yöni bönachi nacuá' Jerusalén lè ni, gulu'è le la' yèla na' Acéldama, tu didza' hebreo le rnnu lu didza' xidza': La' Yèla Rön.

²⁰ Caní guca queè' Judas, ca na' nazúaj lu guichi lá'ayi nazí'i le Salmos, le rnnu:

Ugá'ana cá'asö lidxè',

en biti' idzöli nu soa yu'u na'.

Rnna ca':

Nu yúbölö tsaza xilatjè'.

²¹⁻²² 'Run bayudxi na'a cöru'-nè' tu bönni' gunè' rè'u tsözxón para gunè' ba nalí queè' Jesús, ca guca, bubanè' lu yöl-la' guti. Ral-la' gáquiè' bönni' nabábalenè' bönni' ni' gula'cuá'lenè' rè'u dza ni'te cate' ni' Xanru' Jesús gudálenè' rè'u. Gula'sí lógaquiè' nacuá'lenè' rè'u cate' ni' buquilè' Juan bönachi nisa, ga bidxintè dza buépè' Jesús yehua' yubá, cate' buzè'è ga zóaru'.

²³ Ní'irö bulu'lu'è chopè', José, en Matías. José na' lè' ca' Barsabás, en zoa ia'tú lè' Justo.

²⁴ Ní'irö bulu'lidzè' Dios, ta'nnè':

—Xantu' Dios, nunbè' cazu' icja ládxi'do'gaca yúgu'tè bönachi. Bulu'í netu' nulè' chopè' ni chiguró cazu' Li'

²⁵ para tsáziè' lu dxin ni para gáquiè' gubáz quiu'. Tsáziè' xilatjè' Judas, bönni' ni' bunitiè' xilatjè' tu' benè' dul-la', ate' guyijè' xilataj cazè' lataj chul-la.

²⁶ Ní'irö bulu'zúajè' yugu' lu guichi lágaquiè', tu queè' José, en ia'tú queè' Matías. Bulu'gútsi'nè' luzé'eguequi, en bulu'béajè' tu, ate' birúaj le nazúaj lè' Matías. Caní guca, Matías na' gubábalenè' ia'chinéajè' gubáz queè' Cristo.

2

Dios Bö' Lá'ayi ridisóalenè' légaquiè'

¹ Cate' chibidxín dza Pentecostés, nudúbigaquiè' tsözxón yúgu'tè bönni' ta'yéajlè'è Cristo.

² Tsáldo'os biyön bö le birúaj lúzxiba, le biyön ca riyön cate' recja bö budunu', ate' biyön idútè lu yu'u ga na' rö'ogaquiè'.

³ Bulu'lu'í lahui yugu' bululu guí'do' lu bö'ös lógaquiè', ate' gula'guísi que queégaquiè'. Bidisóalengaca tu tuè'.

⁴ Caní guca, Dios Bö' Lá'ayi bidisóalenè' yúgu'tè', ate' gula'sí lógaquiè' tu'è didza' yúbölö, tsca naca le bē'è Dios Bö' Lá'ayi que queè' gu'è didza' yúbölö na'.

⁵ Nacu'ë zían bönni' judío yödzo Jerusalén dza na', nácagaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzo idútë yödzölió ni.

⁶ Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo.

⁷ Gula'ná' badxë' yúgu'të', en bulu'bánninë, ta'nnë':

—Buli'yútsóca'. ¿Naru' calëga bönni' Galilea yúgu'të bönni' ni tu'ë didza'?

⁸ ¿Nacxi caz naca riyöniru' tu'ë xtídza'ru' ca naca didza' ru'iru' tu turu'?

⁹ Rë'u ni nácaru' bönni' zían yödzo, bönni' narúajgaquië'

luyú Partia, en luyú Media, en luyú Elam,

en luyú Mesopotamia, en luyú Judea, en luyú Capadocia,

en luyú Ponto, en luyú Asia,

¹⁰ en luyú Frigia, en luyú Panfilia, en luyú Egipto,

en luyú Africa, ga nácarö zì'tu' ga dë luyú Cirene.

'Lësca' nacu'ë bönni' yödzo Roma ni. Bal-lë' nácagaquië' bönni' judío, en ia'bal-lë' nazí' lu ná'agaquië' le ta'yéajlë'ë bönni' judío Dios.

¹¹ Lësca' nacu'ë ni yugu' bönni' narúajgaquië' Creta, en luyú Arabia. Riyöniru' tu'ë didza' ru'iru' que queëru', ate' ta'guíxjö'ë yugu' le zxön benë' Dios, le tun ga rubánu'.

¹² Caní guca, bulu'bánninë yúgu'të', en gula'bö'ë böniga. Gulë luzá'agaquië' tu'ë ia'tué', ta'nnë':

—¿Bizxi caz lë ni?

¹³ Bulu'titjë' bal-lë', ta'nnë':

—¡Ta'zúdxinë'!

Líban benë' Pedro lógaca bönachi zían

¹⁴ Ní'irö Pedro guzuúlenë' ia'chinéajë' gubáz na' nasöl-lë'ë Cristo, ate' gusi lahuë' ru'ë zidzaj didza', rë' légaquië':

—¡Libí'ili', bönni' Judea, en yúgu'tëli' nacuá'ali' yödzo Jerusalén! ¡Lë ni ral-la' inözili'! ¡Buli'zë nágali' le guía' libí'ili'!

¹⁵ Netu' ni bití' rizúdxitu' ca na' réquili' libí'ili', tu' ni zóaru' si' gala' xsila, ate' cuntú nu rizudxi hora caní.

¹⁶ Lë ni naca le gunné' Joel, bönni' bë'ë didza' uláz queë' Dios, gunné':

¹⁷ Caní rnnë' Dios: Lë ni le gaca dza tsöjsétëgaca.

Isöl-la'a Bö' Lá'ayi quia', tsöjsóalenë' yúgu'të bönachi.

Zxí'inili', bönni', en nigula, ilu'ibi' didza' uláz quia' neda'.

Yugu' bi'i ra'bán ila'lé'ebi' le ulu'a lahui,

ate' yugu' bönni' gula ila'nenë' yëla.

¹⁸ Cate' idxín dza ni' quisia' Bö' Lá'ayi quia',

tsöjsóalenë' huen dxin quia', bönni', en nigula,

ate' ilu'ë didza' uláz quia' neda'.

¹⁹ Ulu'a lahui lúxiba xitsá' le ilún ga ulu'bani bönachi,

ate' yödzölió ulu'a lahui le ilaca bë',

rön, en guí', en dzön ca böaj.

²⁰ Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilé'ëru'.

²¹ Ulu'lágaca yúgu'të nupa ni' ulu'lidza Lë' Xanru',

lu yöl-la' réajlë' quegüequi Lë'.

22 'Buli'zè nágali' lè ni guía' libí'ili', bönachi Israel. Dios caz benè' bal Jesús, bönni' Nazaret ga zóali'. Dios bè'è Lè' lataj benè' le tun ga rubániru', yugu' yöl-la' huáca, en le taca bè'. Yúgu'tè lè na' benè' Dios lu nè'è Jesús, ca na' chinóz quézili'.

23 Lësca' caní, Dios bè'è lataj nu budödi Jesús lu ná'ali'. Caní guca, ca na' chigunná ládxè'è Dios gunè', en ca naca le chibucözè' dza ni'te. Libí'i cázali' guzxönli'-nè' Jesús, en bétili'-nè' lu ná'agaquiè' yugu' bönni' tuá' dö', bönni' gulútiè' Lè' cate' ni' bulu'dá'gaquiè' Lè' lè'e yaga cruz.

24 Ní'irö Dios caz busubanè' Jesús na'. Bubéajè' Lè' lu yöl-la' guti, tu' cabí guca ugá'anè' tsaz lu yöl-la' guti na'.

25 Ca naca lè ni, bè'è didza' David uláz queè' Dios ca naca queè' Jesús, gunnè':

Bilé'etiqui'sida'-nè' Xanru', zoè' lahua'.
Lè' zoè' cuita lè'a ibèla, rizönè' neda',
para cabí gaca nu bi gun quía'.

26 Que lè ni na' budzeja ládxa'a,
ate' lu yöl-la' rudzeja quía' bil-la'.

Que lè ni na' guna' löza Lè'
cate' idxín dza gátia'.

27 Xantu' Dios, nõzda' biti' ucá'anú' neda'
lataj chul-la ga nacuá' nupa nátigaca.

Biti' gu'u lataj iníti idútè le naca'.
Naca' bönni' nadxí'i quézinu' Li'.

28 Buzéajni'inu' neda' ca ral-la' guna'
para idéli'da' yöl-la' na'bán idú.

Gunu' ga udzédada' tu' zóalen cazu' neda'.

29 Na'a, libí'ili', böcha'a. Naca bè' gútiè' xuz xtó'oru' David, en bigáchè'è yeru ba, ate' ba queè' na' dè ga zóaru' ga ridxintè na'a dza.

30 David na' bè'è didza' uláz queè' Dios, en gunözinè' benè' tsutsu Dios didza' le guzxí' lu nè'è queè', gunè' ga galjè' Cristo ladaj di'a dza queè' si' zá'gaca, ate' Cristo na' inná bè'è xilatjè' David na'.

31 Tu' bilé'enè' David lè ni zí'alö, bè'è didza' ca guca, busubanè' Cristo, en ca guca, biti' bugá'anè' lataj chul-la ga nacuá' nupa nátigaca, en biti' guniti le naca cazè'.

32 Dios busubanè' Jesús lu yöl-la' guti, ate' ca guca lè ni yúgu'tètu' runtu' ba nali' que.

33 Caní guca, len yöl-la' huáca queè', Dios buchisè' Lè' xitsá' ga ni' nácatèrè' zxon. Na'a, Cristo chigusöl-lè'è Dios Bõ' Lá'ayi ni, ate' raca ca na' guzxí' lu nè'è Dios gunè' lu nè'è Cristo, ate' Dios Bõ' Lá'ayi na' runè' yugu' lè ni rilé'eli', en riyönli'.

34 Biti' buèpè' David na' yehua' yubá, pero lè cazè' David na' gunnè':
Xanru' Dios gudxè' Xana':

Gurö'i cuita lè'a ibèla ga naca lo

35 cate' gunra' ga ulu'zachu zxíbigaca nupa ta'dá'baga' Li' lo' Li'.

36 Na'a, bönachi Israel, ral-la' inözili' le nácatè. Dios benè' ga náquiè' Lè' cazè' Jesús ni Xanru', en Bönni' Rusóla, bönni' na' budá'ali'-nè' lè'e yaga cruz.

37 Cate' yugu' bönni' ni' bila'yönnè' lè ni, gula'bõ'è böniga, ate' gulè' Pedro, en ia'zica'rè' bönni' gubáz queè' Cristo, ta'nnè':

—Böchi'ru', ¿nacxi gúntsatu'?

38 Ní'irö Pedro gudxè' légaquiè':

—Buli'bí'i ládxi'li', en guli'dila nisa tu tuli' lu Lë' Jesucristo para uniti lahuë' Dios dul-la' nabága'li', ate' Dios Bö' Lá'ayi idisóalenë' libí'ili', Nu na' isól-lë'ë Dios.

³⁹ Queëli' nequi le guzxi' lu në'ë Dios, en quégaca zxi'inili', enca' quégaca yúgu'të bönachi iza'a, yúgu'të bönni' ni' ulidzë' Xanru' Dios légaquië'.

⁴⁰ Yugu' didza' ni, en ia'bal-la zían didza' benë' ba nalí Pedro, le guchizië' icja nágagaquië', gunnë':

—Guli'gún ga uláli', irúajli' ládjegaca bönachi tuá' dö' nacuá' dza ni zóaru' na'a.

⁴¹ Caní guca, gula'dila nisa nupa ni' gula'zi' lu në'eguequi didza' na' bë'ë Pedro. Dza na' ca chi uruá' gayuá' bönachi gulún légaquië' tuz.

⁴² Gulunë' yúgu'të idútë le bulu'sédinë' gubáz nasól-lë'ë Cristo légaquië'. Guláquië' tuz tuë' len ia'túë', en gulahuë' tsózxón le rusá' ládxi'ru' ca gútië' Jesús, ate' gulunë' tsózxón, bulu'lidzë' Dios.

Ca tun bönachi queë' Cristo

⁴³ Gulunë' gubáz queë' Cristo zían le run ga rubániru', en zían le taca bë', pero guladxi gula'dzöbi ia'zica'rö bönachi.

⁴⁴ Yúgu'të nupa na' ta'yéajlë' Cristo gulaca tuz, ate' bulu'ún tuz yúgu'të le dë quéguequi.

⁴⁵ Cate' bila'lé'enë' ta'yadzaj nupa nútsa'gaca ládjagaquië', ní'irö yugu' bönni' bi dë quégaquië' gulúti'ë le, ate' gula'guisië' dumí na' que queégaca nupa ni' bi ta'yadzaj.

⁴⁶ Bulu'dubë' tsózxón chila yudo' yugu' dza, ate' gulahuë' le rusá' ládxi'ru' ca gútië' Xanru'. Caní gulunë' gapa naca lu yu'u lidxigaquië'. Gulahuë' tsózxón, ate' bulu'dzéjanë', en gulaca idú ládxi'gaquië'.

⁴⁷ Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

3

Ruhuóaqië' tu bönni' biti' raca së'ë

¹ Tu dza ni' gula'benë' Pedro, en Juan, söjáquië' tsózxón lu chila yudo', cate' tu'dubi bönachi tu'lidza Dios ni', le naca idú ridödi xihuö.

² Ga ni' ta'dödë' zoë' tu bönni' biti' raca së'ë dza ni'te ni' náquië' bí'ido'. Yugu' dza röjuá'gaquië' lé' ni', en ta'béquië' lé' ra' yudo' ga nazí'i le Ra' Yu'u Lachi, para inábinë' nu bi unödztasö queë' ladaj nupa ni' ta'yaza lö'a yudo'.

³ Bönni' ni, cate' bilé'enë' Pedro, en Juan, söjáquië' ta'yázië' lö'a yudo', gúta'yuë' lógaquië' bi ulu'nödztasë' queë'.

⁴ Ní'irö bulu'yüë' Pedro, en Juan lé', ate' Pedro gudxë' lé':

—Buyú netu'.

⁵ Ní'irö bönni' na' buzëda' náguië' légaquië' tu' runë' löza bi ulu'nödztasë' queë'.

⁶ Pedro gudxë' lé':

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesucristo, bönni' Nazaret, guyasa, en guzë'e.

⁷ Ní'irö gudelé'ë Pedro në'ë ibëla bönni' huë' na', en buchisë' lé', ate' la' böacaté ni'ë, en buguítaj bëchaj ni'ë bönni' na'.

⁸ Ní'irö guzuínë' bönni' na', ate' guxíti'ë, en guzë'ë. Guyázaalenë' tsózxón Pedro, en Juan, lö'a yudo', rizë'e ni'ë, en rixíti'ë, en rigu'ë Dios yöl-la' ba.

⁹ Yúgu'të bönachi nacuá' ni' ta'lé'e lé' rizë'e ni'ë, en rigu'ë Dios yöl-la' ba.

10 Caní guca, guládxinē, en bulu'báxinē ca naca lē na' guca, tu' bulu'únbē'ē lē, náquiē' bōnni' na' ribō'ē ra' yudo' ga nazí'i le Ra' Yu'u Lachi, rinabē' nu bi unódzjasó queē'.

Didza' bē'ē Pedro chila yudo'

11 Tsanni ni' bōnni' na' bití' guca sē'ē, ate' bōáquiē', zōnē' ná'agaquiē' Pedro, en Juan, bulu'dubi yúgu'tē bōnachi ga na' nacu'ē chila yudo' nazí'i le: Chila Queē' Salomón, ate' gula'ná' badxē'.

12 Cate' bilé'enē' Pedro lē ni, gudxē' bōnachi na':

—Libí'ili', bōnni' Israel, ¿bizx que rubánili' ca naca lē ni? ¿Bizx que ruyuli' netu', en réquitseli' nétu'só buntu'-nē' bōnni' ni, en bentu' ga rizé'e ni'ē len yól-la' huáca queéztu', o ni'a que le reaj ládxi'tu'-nē' Dios?

13 Naca lē ni le benē' Dios. Náquiē' Dios quégaquiē' xuz gudōdi queēru' Abraham, en Isaac, en Jacob. Lē cazē' bēntērē' bal Jesús, Zxí'inē'. Jesús ni, libí'i cázali' bētili'-nē' lu ná'agaquiē' bōnni' ta'nná bé'enē' libí'ili'. Cate' gu'unnē' Pilato usané' Jesús, gudá'baga'li'-nē'.

14 Buzóali' tsólá'alō Bōnni' Tshahi', en Lá'ayi, ate' gunábili'-nē' Pilato usané' queéli' tu bōnni' rútiē' bōnachi.

15 Caní guca, bētili'-nē' Bōnni' runna cazē' yól-la' na'bán idú queēru'. Ní'irō Dios busubanē' Lē' lu yól-la' guti, ate' ca naca lē ni runtu' ba nalí que.

16 Tu' guyéajlē'ē bōnni' ni Jesús, bōáca ni'ē. Rilé'eli'-nē', en núnbē'ēli'-nē'. Tu' réajlē'ē Jesús, Lē' bunē' dxí'ado' bōnni' ni, ate' rilé'eli' yúgu'tēli' le nácatē na'.

17 Na'a, bōcha'a, nōzda' benlí' caní, bētili'-nē' Jesús tu' cabí guyéajni'ili', en bití' gula'yéajni'inē' bōnni' ta'nná bé'enē' libí'ili'.

18 Caní busudxinē' Dios didza' na' bē'ē zí'alō, le gula'nnē' bōnni' gulu'ē didza' uláz queē' ca ral-la' quí'i sáquē'ē Cristo.

19 Que lē ni na', buli'bí'i ládxi'li', en buli'huóaca queē' Dios, para ugúē' dul-la' nabága'li', en gunē' ga huóaca ládxi'li'.

20 Ní'irō isól-lē'ē leyúbölō Jesús, Bōnni' na' buzóē' dza ni'te para gáquiē' Cristo, Bōnni' Rō queē', Bōnni' na' inná bé'enē' libí'ili'.

21 Na'a, run bayudxi ugá'anē' yehua' yubá ni' cate' idxinrō dza uduhuénē' tshahi' yúgu'tē le raca, en gaca ca na' chigunná cazē' Dios, lē na' gula'nnē' bōnni' gulu'ē didza' uláz queē', bōnni' ni' gula'cu'ē dza ni'te.

22 Lē'sca caní Moisés gudxē' xuz xtó'oru', gunné': "Xanru' Dios isól-lē'ē queéli' tu bōnni' galjē' ládjagaca dí'a dza queéli'. Gáquiē' bōnni' gu'ē didza' uláz queē' Dios. Isól-lē'ē Lē' queéli' ca na' gusól-lē'ē neda'. Run bayudxi uzē' nágali'-nē' ca naca yúgu'tē le guiē' libí'ili'.

23 Yúgu'tē nupa bití' ulu'zē' nágagaca bōnni' ni' gu'ē didza' uláz queē' Dios ila'niti, en ulu'lá'alen bōnachi queē' Dios."

24 Ca naca dza ni zóaru' na'a, gula'guíxjō'ē yúgu'tē bōnni' gulu'ē didza' uláz queē' Dios ga gudéla'tē zoē' Samuel, en gudōdi ni'.

25 Libí'ili' nácali' zxfí'ini xí'sóagaquiē' bōnni' gulu'ē didza' uláz queē' Dios, ate' nequi queéli' didza' rucá'ana tshahi', le bēnlenē' Dios xuz xtó'oru', cate' ni' gudxē' Abraham: "Ní'a que le gunē' zxfí'ini xí'sú' ilaca bica' ba yúgu'tē bōnachi yódzólió."

26 Cate' Dios busubanē' Zxfí'inē' lu yól-la' guti, gusól-lē'ē Lē' zí'alō queéli' para gunē' ga gácali' bica' ba, en ucá'anali' le cabí naca dxí'a runlí'.

4

Ta'dxinë Pedro, en Juan lógaquië' bönni' yudo' tu'chi'a tu'söröë'

1 Tsanni ni' bönachi na' tu'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsálido'os ga na' nacu'ë.

2 Gula'lenë' bönni' ni tu' tu'sédinë' Pedro, en Juan, bönachi, en të' léguequi ulu'bán nupa chinátigaca tu' bubanë' Jesús.

3 Ní'irö gula'zönë' Pedro, en Juan, ate' gula'gu'ë légaquië' lidxi guië ga idxinrö dza yúbölö tu' chiridzö' dza na'.

4 Zián nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' biguiú'sö ta'yéajlë'ë Cristo nácaqaquië' idú chi-un gáyu'ë.

5 Dza buropi ni', yugu' bönni' unná bë', en bönni' gula tu'zéajni'inë' bönachi judío, en yugu' bönni' yudo' usëdi, bulu'dubë' lu yödzö Jerusalén.

6 Lësca' Anás, bixúz lo, en Caifás, en Juan, en Alejandro, enca' yúgu'të bönni' di'a dza quégaquië' bixúz lo bulu'dubë' ni'.

7 Ní'irö duchë'gaquië' Pedro, en Juan, ate' bulu'sudxinë' légaquië' gatsaj láhu'lö ga na' nacu'ë, en gula'nábinë' légaquië', ta'nnë':

—¿Bizxi yöl-la' unná bë' dë lu ná'ali' runli' lë ni? ¿Nuzxi budödi lu ná'ali' yöl-la' unná bë' ni?

8 Ní'irö Pedro gudxë' légaquië', zóalenë' Dios Bö' Lá'ayi lë', rnnë':

—Libi'ili', núlöli' rinná bé'eli' netu', bönachi Israel, en libi'ili', bönni' gula.

9 Na'a, ¿rinábitseli' netu' ca naca dxin dxi'a bentu' queë' bönni' huë' ni, en nacxi guca, böáquië' bönni' ni?

10 Riguíxjö'itu' libi'ili' para ila'nözi yúgu'të bönachi Israel. Zoë' bönni' ni loli', nuhuöáquië' tu' ben dxin yöl-la' huáca queë' Jesucristo, bönni' Nazaret, Bönni' ni' budá'ali'-në' lë'e yaga cruz, pero Dios busubanë' Lë' lu yöl-la' guti.

11 Dios bë'ë didza' ca naca queë' Jesús ni, cate' ni' gunné': "Libi'ili', bönni' rucua'ali' zö'ö, gurú'unali' guiöj na', pero gurö caza' neda' guiöj na' para gaca guiöjlen zö'ö."

12 Cúnturö nu zoa nu gaca usölá bönachi, tu' cabí zoa yödzöliö ni ia'tué' bönni' nuzöë' Dios, nu gaca usölá rë'u.

13 Cate' bila'lé'enë' nácaqaquië' rugu ladxi' Pedro, en Juan, en guléquibe'enë' biti' nazédagaquië' que yudo', en nácaqaquië' bönni' cá'asö, bulu'báininë', ate' yöjnéguequinë' Pedro, en Juan na', gula'cuá'lenë' Jesús.

14 Lësca' bila'lé'enë' bönni' na' böáquië', zuínë' lógaquië', ate' biti' guca bi ila'nnë' quégaquië'.

15 Ní'irö gula'nná bé'enë' nupa ulu'béaj légaquië' lö'alö yu'u ga na' nudúbigaquië', ate' gulún xtidzë'ë la' légacasë'.

16 Gula'nnë':

—¿Nacxi gúntsaru' quégaquië' bönni' ni? Le nácatë gulunë' tu le run ga tu'bani bönachi, ate' nözigaca yúgu'të bönachi nacua' Jerusalén lë ni. Biti' gaca tá'baga'ru' le.

17 Na'a, para cabí sërö didza', en ila'yöni ziánrö ca' bönachi, uzeru' bach légaquië' para cabí iluf'ilenrë' bönachi didza' ca naca queë' Jesús na'.

18 Ní'irö bulu'lidzë' Pedro, en Juan, ate' bulu'zenë' bach légaquië' para cabí iluf'ilenrë' bönachi didza', en para cabí ulu'sédinë' légaquië' ca naca queë' Jesús.

19 Ní'irö bulu'bi'ë didza' Pedro, en Juan. Gulë' légaquië':

—Buli'chi'a buli'sörö libí'ili' channö naca tsahui' lahuë' Dios uzërö nágatu' xtídzá'li' libí'ili' ca xtídzë'ë Dios.

²⁰ ¡Biti' gaca soa dxitu'! ¡Run bayudxi gü'itu' didza' que le bilé'etu', en le biyönitu'!

²¹ Ní'irö yugu' bönni' yudo' tu'chi'a tu'söröë bulu'zenë' bach légaquië', pero bulu'sanë' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzö ni', tu' ta'gú'u Dios yöl-la' ba ni'a que lë na' guca.

²² Bönni' na' böáquië', en guca queë' lë na' run ga rubániru', chiyú'urë' ca choá' iz.

Ta'nábinë' Dios gunë' ga ilácagaquië' rugu ladxi'

²³ Cate' bönni' yudo' bulu'sanë' Pedro, en Juan, böajgaquië' ga na' nacu'ë luzá'agaquië', ate' bulu'siyönnë' légaquië' yúgu'të lë na' gula'nnë' yugu' bixúz unná bë', en bönni' gula tu'zéajni'inë' bönachi judío.

²⁴ Cate' bila'yönnë' lë ni, bulu'lidzë' Dios tsözxön, gula'nnë':

—Xantu' Dios, ¡zxöntërö nacu' Li'! ¡Li' nacu' Dios! ¡Benu' lúzxiba! ¡Benu' luyú! ¡Benu' nísado! ¡Benu' yúgu'të le nacua' tu tu lataj na'!

²⁵ Uláz quiu' Li' bë'ë didza' David, bönni' huen dxin quiu', ni' zóalenë' Dios Bö' Lá'ayi lë', gunnë':

¿Bixz que tun dzatsa bönachi, en ta'zá' ládxi'gaca le ruá' dö'?

²⁶ Yugu' bönni' ta'nná bë'ë yödzölió ni gulún dzatsë', ate' guláquië' tuz bönni' unná bë'.

Gula'dá'báguë'ë Xanru' Dios, enca' Cristo, bönni' gurö cazë' Lë'.

²⁷ Le nácatë guláquië' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzö ni. Gula'dá'báguë'ë Jesús, Zxí'inu' lá'ayi, Bönni' na' buzú' queétu'.

²⁸ Gulunë' yúgu'të le bucözu' zí'atëlö, en guzxf' lu no'o, ate' guca ca na' benu' tsutsu xtídzu'u ca ral-la' gaca.

²⁹ Na'a, Xantu', buyú le tu'zenë' bach netu', en ben ga gácatu' rugu ladxi', para gü'itu' xtídzu'u, netu' bönni' huen dxin quiu'.

³⁰ Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bë'. Gaca caní tu' zóalenë' Jesús, Zxí'inu' lá'ayi, netu'. ¡Ca' gaca!

³¹ Cate' budxi bulu'lidzë' Dios, guzxizi lataj ga na' nacu'ë, ate' Dios Bö' Lá'ayi guzóalenë' yúgu'të', ate' len yöl-la' rugu ladxi' quégaquië' gulu'ë xtídzë'ë Dios.

Tu'únë' tuz le dë quégaquië'

³² Bönachi zían na' ta'yéajlë' Cristo, tuz ca ta'zá' ládxi'guequi, en tuz ca gulúngaca. Biti' gunnë' nu bönni' nútsë'ë ládjagaquië' nequi queézë' le dë queë', pero bulu'únë' tuz le dë quégaquië'.

³³ Len yöl-la' huáca zxön gula'guíxjö'ë gubáz na' nasöl-lë'ë Xanru' Jesús ca bubanë' Lë', ate' le buzá' lédxë'ë Dios quégaquië' gúcalen yúgu'të'.

³⁴ Cuntu nu bi biyadzaj nu nutsa' ládjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulúti'ë le, ate' dumí que na' yöjuá'gaquië',

³⁵ en bulu'dödë' le lu ná'agaquië' gubáz na' nasöl-lë'ë Cristo, ate' légaquië' gula'guisië' le que queëgaca nupa bi biyadzaj queëguequi.

³⁶ Zoë' José ni', bönni' bulu'zöë' gubáz na' nasöl-lë'ë Cristo ia'tú lë' Bernabé, le rnna lu didza' xidza', Bönni' Ruhué Tsáhuë'ë. Nabábalenë' xzí'ini xi'sóë' Leví, en guljé' luyú Chipre.

³⁷ Bëti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasöl-lë'ë Cristo.

5

Dul-la' gulunë' Ananías, en Safira

¹ Tu bönni' yúbölö lë' Ananías, bëti'ë tu cö' xiyúë'. Safira, nigula queë', bennu tsözxön lë'.

² Ananías na' bucachi' lanë' late' dumí que yu na', ate' nözinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasöl-lë'ë Cristo. Rnnë':

—Tsca nisö guzxi'a.

³ Pedro gudxë' lë':

—Ananías, ¿naru' guyázatsö Satanás tu' xihui' lu icja ládxi'do'o, en ben ga rizí' yé'enu' Dios Bö' Lá'ayi, ate' bucachi' lanu' late' dumí que xiyú' na'?

⁴ Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë caz lu no'o dumí que na'? ¿Bízx que gurö'ö icju' gunu' caní? Dios caz guzxi' yé'enu', calëgasö bönnachi.

⁵⁻⁶ Cate' biyönnë' Ananías didza' ni, gudzö'ë, en gütitë'. Ní'irö gula'bíga'tëbi' bi'i ra'bán, ate' bulu'chölibi' lë' lari', en guluá'abi' lë', en yöjcáchi'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

⁷ Ca tsonna hora gudödi ni', bidxinnu nigula queë' Ananías na' ni', en bití' nözinu lë na' guca queë' bönni' queënu.

⁸ Ní'irö Pedro gudxë'-nu:

—Gudíxjöi'i neda'. ¿Naru' guzxi'ili' tsca nisö xiyuli' na'?

Gunnánu:

—Ön, tsca nisö guzxi'itu'.

⁹ Ní'irö Pedro gudxë'-nu:

—¿Bízx que ben tuz xtídza'li' guzxi' bë' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'-në' bönni' quiu', ate' ulu'béajbi' ca' li'.

¹⁰ Ní'irö la' gudzö'tënu xini'ë Pedro, en gütitënu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjcáchi'gacabi'-nu cuíta lë'ë bönni' queënu.

¹¹ Que lë ni na' guladxi gula'dzöbi yúgu'të bönnachi queë' Dios, ate' guladxi ca' yúgu'të nupa bila'yöni ca guca lë ni.

Tunë' bönni' gubáz nasöl-lë'ë Cristo le taca bë'

¹² Gulunë' bönni' gubáz na' nasöl-lë'ë Cristo zían le taca bë', en zían yöl-la' huáca zxön lógaca bönnachi lu yödzö. Yúgu'të' bulu'dubë' tsözxön ga naca chila yudö' nazí'i le Chila Queë' Salomón.

¹³ Ladaj nupa ni' bití' ta'yéajlé' Cristo, cunttu nu burugui tsöjtá' légaquië', ate' bönnachi lu yödzö ni' gulún légaquië' bal.

¹⁴ Ní'irö ia'bal-la bönnachi zían ca' gula'yéajlé' Cristo, bönni', en nigula.

¹⁵ Cate' bila'lé'e bönnachi yugu' le tunë' bönni' ni' ta'yéajlé'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu da'a

yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zxul-la bal-la bönachi huë' na', para ulu'huóaca.

¹⁶ Lësca' bila'rúaj bönachi yugu' dzaga yödzö, en bila'dxín Jerusalén, nuá'agaca nupa te'e, en nupa ta'gu'i ta'zaca' tu' yú'ugaca bö' xihui' léguequi, ate' bulu'huóaca yúgu'tëguequi.

Bönni' yudo' ta'bia ládi' gaquië' bönni' gubáz nasöl-lë'ë Cristo

¹⁷ Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro.

¹⁸ Ní'irö bixúz lo na', en bönni' na' dá'gaquië' lë' gula'zönë' gubáz na' nasöl-lë'ë Cristo, ate' gula'gu'ë légaquië' lidxi guié'.

¹⁹ Ní'irö bidxinë' gubáz lá'ayi queë' Xanru' chi'i dzö'ölö, ate' gusaljë' lidxi guié na', en bubéajë' légaquië'.

²⁰ Gubáz lá'ayi na' gudxë' légaquië', rnnë':

—Guli'tséaj, guli'tsójsöa chila yudo', en guli'tsöjë'len bönachi ni' didza', quíxjö'ili' légaquië' ca naca yöl-la' na'bán idú ni, en ca gaca ila'déli'në' le.

²¹ Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' reni' zílado', en bulu'sédinë' bönachi.

La' ní'isö bulu'dubë' bixúz lo, en nupa nacua'len lë' tsözxön, len bönni' yudo' tu'chi'a tu'söröë', en bönni' gula tu'zéajni'inë' bönachi Israel, ate' gula'söl-lë'ë nupa tsöjaca lidxi guié para tsöjxi'gaquië' yugu' gubáz na' nasöl-lë'ë Cristo, tu' téquinë' ni' nacu'ë lidxi guié na'.

²² Cate' ni'a ná'agaquië' bönni' yudo' na' bila'dxinë' ni', biti' yöjxáca'gaquië' légaquië' lu yu'u lidxi guié na', ate' ní'irö bulu'huóajë' tsöjtxjö'gaquië' ca'.

²³ Gulë' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guié, ate' nacua' nupa tun chi'i ra' lidxi guié na', pero cate' gusalajtu', cuntu nu yöjxáca'tu' lu yu'u na'.

²⁴ Cate' bixúz lo, en yugu' bixúz unná bë', en bönni' nacua' lu në'ë ni'a ná'agaca bönachi yudo', bila'yönnë' didza' ni, gula'bö'dë'ë böniga tu' cabi nöziguequinë' bizxi guntë lë na' raca.

²⁵ Ní'irö bidxinë' tu bönni' ni', en gudíxjö'i'inë' légaquië', rnnë':

—Buli'yútsöca'. Yugu' bönni' na' gulú'ugacali-në' lidxi guié nacu'ë chila yudo' tu'sédinë' bönachi.

²⁶ Ní'irö guyijë' bönni' na' rinná bé'enë' ni'a ná'agaca bönachi yudo', dzágagaquië' lë' ni'a ná'agaquië' na', ate' gula'chë'ë yugu' gubáz na' nasöl-lë'ë Cristo, pero biti' bi gulunë' quégaquië', tu' guládxinë' ulu'laxi' bönachi nacua' ni' légaquië' guiöj.

²⁷ Cate' chinachë'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

²⁸ —¿Naru' cabi gudíxidi'atu' libí'ili' biti' usédili' bönachi ca naca queë' bönni' na'? Na'a, chigudísili' xibá ni idütë yödzö Jerusalén, en rë'ënili' usubága'li' netu' xigua' tu' nözi yöl-la' guti queë' bönni' na'.

²⁹ Ní'irö bulu'bi'ë didza' Pedro, en ia'zica'rë' gubáz na' nasöl-lë'ë Cristo, ta'nnë':

—Run bayudxi uzëro nágatu' xtídzë'ë Dios ca xtídzaz'gaca bönachi.

³⁰ Libí'ili' bétili-në' Jesús cate' ni' budá'ali-në' lë'e yaga cruz, pero Dios quégaquië' xuz xtó'oru' busubanë' Lë'.

³¹ Jesús ni, Dios buzóa cazë' Lë' ga nayépisëtëre' cuita lë'ë ibëla, para gáquië' Bönni' Lo, en Bönni' Rusólá, en gunë' ga ulu'bí'i ládi'gaca bönachi Israel, para gaca uniti lahuë' dul-la' nabága'gaquië'.

³² Ca naca lë ni, runtu' netu' ba nali que, ate' lëasca' runë' Dios Bö' Lá'ayi ba nali que, Bö' na' risöl-lë'ë Dios quégaca nupa tun ca rnna xtídzë'ë.

³³ Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulë'ënnë' ilútië' légaquië'.

³⁴ Ní'irö guzuinë' tu bönni' yudo' ruchi'a rusöröë' lógaquië', lë' Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'bëaj yugu' gubáz na' nasöl-lë'ë Cristo ló'alö tu chí'ido'.

³⁵ Ní'irö gudxë' bönni' yudo' tu'chi'a tu'söröë' na', gunnë':

—Libi'ili', bönni' Israel, buli'yutëz queëli' ca naca le rë'ënni' gunli' quégaquië' bönni' ni.

³⁶ Ral-la' tsöjnëli' ca guca zí'atëlö cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayëpisëtë'rë'. Guláquië' bönni' yöjtá'gaquië' lë' idú tapa gáyu'ë bönni'. Yugu' bönni' röjáquië' gudil-la gulútië' lë', ate' gulásilasi yúgu'të nupa ni' yöjtá'gaca lë', ate' gunítisö ca' yúgu'të le benë' bönni' na'.

³⁷ Gudödi guca lë ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guízaj lázagaquië', ate' yöjtá'gaca bönachi zían lë'. Lëasca' gulútië' bönni' ni, ate' gulásilasi yúgu'të nupa ni' yöjtá'gaca lë'.

³⁸ Que lë ni na' rea' libi'ili': Guli'sán-gaquië' bönni' ni, en biti' bi gunli' quégaquië'. Channö naca quégacasö bönachi lë ni ta'nnë' o lë ni tunë', initi caz,

³⁹ pero channö naca queë' Dios, biti' gaca usunítli' le. ¡Buli'yú cuinli' cabí tíl-lalenli'-në' Dios!

⁴⁰ Ní'irö gulunë' tuz didza' len lë'. Bulu'lidzë' yugu' gubáz na' nasöl-lë'ë Cristo, ate' gula'guinë' légaquië', en bulu'zenë' légaquië' bach para cabirö ilu'ilenë' bönachi didza' ca naca queë' Jesús. Ní'irö bulu'sanë' légaquië'.

⁴¹ Bila'rúajë' gubáz na' nasöl-lë'ë Cristo lógaquië' bönni' yudo' tu'chi'a tu'söröë' na'. Tu'dzéjanë' tu' bë'ë Dios légaquië' lataj gula'gu'i gula'záquë'ë tu' dá'gaquië' Jesús.

⁴² Yugu' dza bulu'séditiqui'sinë' bönachi, en gulunë' libán queë' Jesucristo lu chila yudo', en gapa naca lu yu'u lídxigaca bönachi.

6

Ta'böë' gadxi bönni' para ilácalenë' bönachi queë' Cristo

¹ Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nōzi le raca cate' ta'guisië' le ilágunu nigula uzëbi, tu' cuntu nu ruf'i le ilágunu nigula uzëbi quégaquië' bönni' ni' tu'ë didza' griego.

² Ní'irö idxínnutë' bönni' gubáz na' nasöl-lë'ë Cristo bulu'tubë' yúgu'të bönachi ni' ta'yéajlë' Cristo, ate' të' légaquië':

—Biti' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönachi.

³ Que lë ni na', böchi' luzá'atu', guli'cö gadxë' bönni' ládjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácaagaquië' bönni' ta'yéajni'i, en naca bë' Dios Bö' Lá'ayi zóalenë' légaquië'.

⁴ Netu' ni ulídzatica'stu'-në' Dios, en uséditu' bönachi xtídzë'ë Dios.

⁵ Yúgu'të' gula'yaza ládxi'gaquië' didza' ni, ate' gula'böë' Esteban, tu bönni' réajlë'ë Cristo idú ládxe'ë, en zóalenë' Dios Bö' Lá'ayi lë'. Lëasca' gula'böë'

Felipe, en Prócoro, en Nicanor, en Timón, en Parmenas, en Nicolás, bönni' yödzo Antioquia, bönni' zí'aló butsé'ë ca runé' para tseaj ládxé'ë Dios ca tuné' yugu' bönni' judío.

⁶ Ní'iró bulu'sudxiné' bönni' na' gula'böë' lógaquié' gubáz na' nasöl-lé'ë Cristo. Yugu' bönni' gubáz na' gula'xóa ná'agaquié' légaquié', ni' tu'lidzé' Dios.

⁷ Guzerò xtídzé'ë Xanru', ate' gula'yanda' bönachi ta'yéajlé' Cristo nacua' Jerusalén. Lésca' zían bixúz judío gula'zí' lu ná'agaquié' le réajlé'ëru' Cristo.

Ta'zöné' Esteban

⁸ Esteban na' bené' le tun ga rubániru', en yugu' le taca bè' lógaca bönachi lu yödzo, zóalen yöl-la' huáca queé' Dios lé' le buzá' ládxé'ë queé'.

⁹ Ní'iró gula'yasé' bal-lé' bönni' nabábagaquié' yu'u ga tu'dubé' bönni' judío, en tu'sedé' queé' Dios, nazí'i le Yu'u Quégaquié' Bönni' Nadzángaqüé'. Bönni' narúajgaquié' yödzö Cirene, en yödzö Alejandría, en luyú Cilicia, en luyú Asia, guluné' légaquié' tsözxön. Bönni' ni gula'díl-lalené' Esteban didza'.

¹⁰ Biti' guca tá'baga'gaquié' didza' ru'ë Esteban na', tu' bē'ë didza' len yöl-la' réajni'í, tu' zóalené' Dios Bō' Lá'ayi lé'.

¹¹ Ní'iró gula'guíxjé' bönni' ila'zí' yé'ë, ila'nné': "Netu' biyönitu' didza' ru'ë Esteban ni, rnné' zí'ë queé' Moisés, en queé' Dios."

¹² Caní guca, bönni' ni gula'gu'ë xilá ládxí'gaca bönachi, tsözxön len bönni' gula tu'zéajni'iné', en yugu' bönni' yudo' usédi. Yúgu'té bönni' ni gula'bía di'ë Esteban na'. Gula'zöné' lé', en gula'ché'ë lé' lógaquié' bönni' yudo' tu'chi'a tu'söröë'.

¹³ Lésca' bulu'cu'ë lógaquié' nupa gula'guíxjö' le cabí nácaté, bönni' na' gula'nné':

—Biti' zoé' dxisó bönni' ni rnné' zí'ë que yudo' lá'ayi ni, en que xibá queé' Dios.

¹⁴ Biyönitu' didza' bë'ë bönni' ni ca guné' Jesús, bönni' Nazaret, rnné' usunítie' yudo' ni, en utsé'ë yugu' le nalébiru' runru', yugu' lé na' gunná bé'ené' Moisés ré'u.

¹⁵ Ní'iró bönni' yudo' tu'chi'a tu'söröë', en yúgu'té nupa rō'gaca ni' bulu'yúé' Esteban, ate' bila'lé'ené' lahué', rna' ca rna' lahué' tu gubáz lá'ayi queé' Dios.

7

Didza' bë'ë Esteban, le gunné' uláz queé'

¹ Ní'iró bixúz lo gunábiné' Esteban na', rnné':

—¿Naru' nácaté caní?

² Bubi'ë didza' Esteban, rnné':

—Libí'ili', bönni' gula, en libí'ili', böcha'a. Buli'zé nágali' le guía' libí'ili'. Dios, Bönni' nayépisetère', buluí' lahué' ga zoé' Abraham, xúziru' gudödi, cate' ni' zoé' luyú Mesopotamia, cate' si' tsöjsóé' yödzö Harán.

³ Dios gudxé' lé': "Birúaj ladzu', en bulá'alén di'a dza quiu', ate' guyéaj luyú ni' uluf'ida' lí'."

⁴ Ní'iró birúajé' Abraham luyú Mesopotamia le naca xiyúgaca bönachi Caldea, ate' yöjsóé' yödzö Harán. Lu yödzö ni' gútié' xuzé' Abraham na', ate' lé' buzé'ë ni', ate' Dios guché'ë lé' luyú ga ni zóaru' na'a.

⁵ Dios biti' bë'ë lé' lataj guequi queé' luyú ni. Caléga láti'sö bunödzejé' queé' ga soé' luyú ni, pero guzxi' lu në'ë Dios unödzejé' queé' luyú ni, ate' tōdi gátie' Abraham guequi luyú ni quégaca xzí'ini xi'sóé', sal-la' biti' nacuí'inibi' bi'í queé'.

6 Lësca' caní Dios gudxë' Abraham: "Tsöjáquië' xzí'ini xi'sú' lu xiyúgaca bönachi izá'a, ate' ni' ilácagaquië' ca bönachi zí'tu'. Ilunë' bönni' luyú ni' ga ilácagaquië' xzí'ini xi'sú' bönni' nadó'ogaquië'. Ulu'saca' zi'ë légaquië' idú ca tapa gayuá' iz."

7 Lësca' Dios gudxë' lë': "Neda' uzötja' bönachi luyú ni', ga ni' ilácagaquië' xzí'ini xi'sú' bönni' nadó'ogaquië', ate' tódi ni' ulu'rúajë' ni', ate' ilunë' xichina' luyú ni'."

8 Dios bénlenë' Abraham tu didza' rucá'ana tsahui', en gunná bé'enë' lë' ichúguië' lu xipëla'gaquië' bönni' biguiú' nacu'ë lidxë' tu le gaca bë' nazí' lu ná'agaquië' didza' na' rucá'ana tsahui'. Gudödi ni' gúquië' Abraham xúzibi' bi'i Isaac, en cate' chigúqui'bi' xunu' gubidza, guchúguië' lu xipëla'bi' lë na' naca bë'. Isaac na', lësca' caní benë' queëbi' bi'i Jacob, xzí'inë', en caní benë' ca' Jacob quegaca idxínnutëbi' bi'i bönni' queë, nupa ni' gulaca xuz xtó'ogaca idxínnu cö' bönachi Israel.

9 'Yugu' xuz xtó'oru' na', lu yöl-la' ruzxé'e quegaquië', gulúti'ë-bi' bi'i José, böchi'gaquië', lu ná'agaquië' bönni' ni' gulúti'gaquië'-bi' luyú Egipto. Dios guzóalenë'-bi' bi'i José na'

10 en busölë'-bi' lu le gulaca queëbi'. Dios bë'ë-bi' yöl-la' réajni'i, le ben ga guyaza ládxë'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abi' bi'i José yöl-la' unná bë' para gunná bé'ebi' bönachi luyú Egipto, en yúgu'të bönachi nacuá' lidxë' Faraón na'.

11 Ní'irö' gúcada' gubín idú luyú Egipto, en luyú Canaán ni, ate' gula'guí'i gula'zaca' yúgu'të bönachi dza ni'. Biti' bidzöli le ilahuë' xuz xtó'oru'.

12 Cate' biyönnë' Jacob dë xzoa' xtila luyú Egipto, gusöl-lë'ë yugu' xzí'inë', bönni' ni' nácagaquië' xuz xtó'oru', luyú ni'. Caní guca le zí'aló luzuí yöjáquië' ni'.

13 Cate' le buropi luzuí yöjáquië' luyú Egipto, benë' José ga bulu'únbë'ë böchë'ë lë'. Caní guca, gunözinë' Faraón nupa nácagaca di'a dza queë' José.

14 Ní'irö' gusöl-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalay yu' chinu bönachi.

15 Caní guca, bidxinë' Jacob luyú Egipto, ga ni' gútië' lë', ate' gulátië' ca' xuz xtó'oru' luyú ni' cate' bizá'a dza que queëgaquië'.

16 Cate' gulátië' tu tu xuz xtó'oru', xzí'ini xi'sóagaquië' yöjuá'agaquië' légaquië' luyú Siquem, ate' ni' bulu'cáché'ë légaquië' yeru ba lu zxan bulóaj na' gú'uë' Abraham lu ná'agaca xzí'inë' Hemor, bönni' Siquem na'.

17 'Gudödi zían iz, cate' bidxín dza ral-la' gaca le guxzí' lu në'ë Dios, lë na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto.

18 Ní'irö' guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto.

19 Bönni' unná bë' na' bi'ë dö' quegaca bönachi uládz queëru'. Busaca' zi'ë yugu' xuz xtó'oru' na', en benë' ga bulu'sanë'-bi' bi'i bönni' huë'ënidö' que queëgaquië', para ilátibi'.

20 La' dza ní'sö' gúljabí' ca' bí'ido' Moisés, ate' Dios guyaza ládxë'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'.

21 Cate' bidxín dza ulu'sanë'-bi' xuz xiná'abi' para gátibi' bí'ido' Moisés na', bidxínnu nigula xzí'inë' Faraón ga ni' bulu'cá'anë'-bi', ate' yöjxzí'inu-bi', en buscúlunu-bi' ca bi'i que cázanu.

22 Caní guca, bizēdabi' bi'i Moisés yúgu'tē le táquiē' bōnni' Egipto, en gúcatērobi' z'xōn ca naca didza' bē'ēbi', en ca nácagaca le benbi'.

23 'Cate' Moisés na' chiyú'ubi' choá' iz, gunná lādxi'bi' tsójyubi' bōnachi uládz queēbi', bōnachi Israel.

24 Cate' bidxinbi' ga na' nacu'ē, bilé'ebi'-nē' tu bōnni' Egipto, rusaca' zi'ē tu bōnni' uládz queēbi'. Ní'irō gúcalenbi'-nē' bōnni' uládz queēbi' na', en bētibi'-nē' bōnni' Egipto na'. Caní guca, buzí' labi' bi'i Moisés bōnni' na' uláz queē' bōnni' uládz queēbi'.

25 Gúquibi' Moisés huala'yéajni'inē' bōnni' bōchi'bi' gunē' Dios ga usōlábi' lē cázabi' légaquiē', pero légaquiē' biti' gula'yéajni'inē'.

26 Ia'tú dza ca' yōj'áca'bi' ia' chopē' bōnni' Israel, ta'dil-lē', ate' gú'unibi' cuéqui dxibi' légaquiē', en gúdxibi' légaquiē': "Lib'i'ili', bōchi'li' naca. ¿Bizx que ru'á'ali' luzá'ali' dō'?"

27 Ní'irō bōnni' na' ru'ē dō' que luzē'ē budxiguē'ē-bi' bi'i Moisés, gunné': "¿Núzxitē buzōa li' para inná bé'enu' netu', en uchi'a usōróu' le runtu'?"

28 ¿Naru' rē'ēnitsenu' gútiu' ca' neda' ca benu' néaje, bētiu'-nē' bōnni' Egipto na'?"

29 Cate' Moisés biyōnibi' didza' ni, buzxúnna'bi' ni', en yōjsóabi' luyú Madián ga ni' guzóabi' ca tu bōnni' zi'tu'. Luyú Madián na' butsaga ná'alenbi'-nu nigula lu yōdzō ni', ate' gúl'jagacabi' chópabi' bi'i bōnni' queē'.

30 'Cate' chigudōdi choá' iz zoē' ni', buluí'i lahuē' tu gubáz lá'ayi queē' Dios ga zoē' lu guí' que yaga yōtsi'do' régui, ga ni' naca lu lataj cá'asō, le rō'ō ra' guí'a nazí'i le Sinaí.

31 Cate' Moisés bilé'enē' guí' na', bubáninē', ate' gubí'gui'ē gala' para ilé'enē' dxi'a, ate' biyōnnē' chi'ē Xanru'.

32 Caní gudxē' Xanru' lē': "Neda' naca' Dios quégaquiē' xuz xto'o. Naca' Dios queē' Abraham, en Dios queē' Isaac, en Dios queē' Jacob." Ní'irō lu yōl-la' radxi queē', guzxízidē'ē Moisés, en bítirō burúguinē' uyúē'.

33 Xanru' gudxē' lē': "Guléaj xirachu' nudó'o, tu' naca lá'ayi ga ni zu' tu' zoa caza' neda', Dios, ni.

34 Le nácate' chibilé'eda' le ta'guí'i ta'zaca' bōnachi quia' nacuá' luyú Egipto, en chibiyōnda' ta'bōdxi yeche'. Bōtja', zoa' ni para usōlá' légaquiē'. Gudá na'a, isōl-la'a li' luyú Egipto."

35 'Sal-la' bōnni' uládz queē' Moisés, bulu'cá'anē' lē' cá'asō, gula'nnē': "¿Núzxitē buzōa li' para inná bé'enu' netu', en uchi'a usōróu' le runtu'?" Dios gusōl-lē'ē lē' para gáquiē' bōnni' unná bē', en bōnni' rusólá, ca na' gubáz lá'ayi na' queē' Dios gudxē' Moisés, cate' buluí'i lahuē' lu yaga yōtsi'do' régui ga na' zoē'.

36 Moisés ni bubéajē' bōnni' uládz queēru' luyú Egipto. Guca caní gudōdi benē' le gulún ga bulu'bani bōnachi ni', en le taca bē' benē' luyú ni'. Lē'sca' caní benē' lu nísado' nazí'i le Nísado' Xiná. Caní benē' lógaquiē' idú ca choá' iz lu lataj cá'asō.

37 Lē' cazē' Moisés na' gudxē' bōnachi Israel ni', gunné': "Xanru' Dios isōl-lē'ē queēli' tu bōnni' galjē' ladaj di'a dza queēli', ate' gáquiē' bōnni' gu'ē didza' uláz queē' Dios. Isōl-lē'ē lē' queēli' ca na' gusōl-lē'ē neda'. Lē' cazē' run bayudxi uzē' nágali'-nē'."

38 Lē'sca' lē' cazē' Moisés na' guzóalenē' bōnachi nudúbigaca queē' Dios lu lataj cá'asō, ate' gudzáguiē' gubáz lá'ayi queē' Dios lē', Nu na' bē'len lē' didza' lu guí'a Sinaí na'. Moisés na' guzóalenē' xuz xtó'oru', ate' Dios budōdē' lu nē'ē

xibá lá'ayi queë', le ru'í didza' ca gaca ila'deli' bönachi yöl-la' na'bán, ate' budödë' Moisés xibá ni lu ná'agaca xzí'ini xi'sóagaquië' ga ridxintë queëru' rë'u.

³⁹ Biti' gulë'ënnë' xuz xtó'oru' ilunë' ca rnna xtídzë'ë Moisés, pero bulu'zóë' lë' tsolá'aló, en gulë'ënnë' tsöjhuójgaquië' luyú Egipto.

⁴⁰ Cate' ni' zoë' Moisés na' lu guí'a Sinaí na', légaquië' gulë' Aarón, böchë'ë Moisés na', gula'nnë': "Rë'ënitú' gunu' yugu' dios queëtu', tu budó' guíë, para tsöjnörugaca lotu'. Biti' nöztu' bi guca queë' Moisés, bönni' na' nubéajë' netu' luyú Egipto."

⁴¹ Ní'irö gulunë' tu budó' oro le naca ca tu bëdxido', ate' gulútië'-ba' bö'cu' xzila'do', en gulú'ugaquië'-ba' lo budó' oro na', ate' gulunë' laní lo budó' na' núngaquië'.

⁴² Que lë ni na' Dios bucá'anë' légaquië', en guléaj ládxe'ë légaquië'. Ní'irö gula'yéaj ládxi'gaquië' yugu' le ta'yëpi lúzxiba. Ca naca lë ni nazúaj lu guichi le gula'nnë' bönni' gulu'ë didza' uláz queë' Dios, le rnna:

Libí'ili', bönachi Israel,

¿Naru' gulú'ugacatsali'-ba' quia' neda' böa' bëdxi ni' bëtigacali'-ba', en buzégui'gacali'-ba', lë na' benli' lu lataj cá'asó idú ca choá' iz?

⁴³ Biti' gulú'ugacali'-ba' quia' neda', pero biá'ali' le nequi que Moloc, budó' guiöj queëli'.

Biá'ali' ca' tu le naca ca bölj lúzxiba nazí'i le Refán, lë na' buzóali' ca dios queëli'.

Yugu' budó' guiöj budó' yaga ni,

la' libí'isili' benli' para guyéaj ládxi'li' léguequi.

Que lë ni na', ubéaja' libí'ili' lu xiyuli',

en ichë'a libí'ili' zí'tu'rö ga dë luyú Babilonia.

⁴⁴ 'Cate' ni' gula'cu'ë xuz xtó'oru' lu lataj cá'asó, guta' quégaquië' yu'u lari' na' ga gulún chi'ë xibá queë' Dios, lë na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lë na' bilé'enë', le buluf'inë' Dios lë' lu guí'a ni'.

⁴⁵ Lësca' bulu'dödë' yu'u lari' na' lu ná'agaquië' xzí'inigaquië' ga bidxintë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'gúë' xiyúgaca bönachi izá'a, nupa ni' buláguië' Dios lógaquië' xuz xtó'oru'. Caní gulunë' zían iz ga bidxintë dza zoë' David.

⁴⁶ Dios guyaza ládxe'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob.

⁴⁷ Biti' bë'ë Dios lë' lataj, ate' Salomón, xzí'inë' David na' benë' yu'u queë' Dios.

⁴⁸ Caní benë' sal-la' bití' zoë' Dios, Nu nácatërö lo, tu lu yudo' núngaca bönachi. Ca naca lë ni gunné' tu bönni' bë'ë didza' uláz queë' Dios, gunné':

⁴⁹ Yehua' yubá naca ga rō'a rinná bē'a,

ate' yōdzōlió naca xilibi ni'a.

Rnnë' Xanru': "¿Naru' gúntsali' tu yu'u ga soa'?"

¿Naru' zóatsó tu lataj ga ral-la' uzí ládxa'a?

⁵⁰ ¿Naru' cabí len na'a caza' bena' yúgu'të lë ni?"

⁵¹ Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, biti' bi raza icja nágali'. Nazidi icja ládxi'do'oli' ca raca quegaca bönachi biti' núnbé'gaquié' Dios. Ridá'baga'tica'sili'-né' Dios Bö' Lá'ayi. Ca na' guluné' xuz xtó'oli', runli' ca' libí'ili'.

⁵² Gula'bía ládxi'gaquié' xuz xtó'oli' na' yúgu'té bönni' ni' gulu'é didza' uláz queé' Dios. Lësca' gulútié' bönni' ni' gula'guíxjô'é zí'aló ca ral-la' guídé' Cristo, Bönni' Tshui', até' na'a, cate' ni' bidxiné' Bönni' Tshui' na', libí'i cázali' bétili'-né' lu ná'agaquié' bönni' gulútié' Lè'.

⁵³ Libí'i cázali' dé lu ná'ali' xibá queé' Dios, lè na' gubáz lá'ayi queé' Dios bulu'dödé' lu ná'agaquié' xuz xtó'oli', pero biti' runli' ca rna.

Tútié' Esteban

⁵⁴ Cate' bönni' yudo' tu'chi'a tu'söröé' na' bila'yönné' didza' ni, gula'léde'ené' Esteban, até' lu yöl-la' rilé quegaquié' lè' gulagu zxéatica' láyë'é.

⁵⁵ Ní'irö buyüé' Esteban na' lúzxibaló, até' zóalené' Dios Bö' Lá'ayi lè', bilé'ené' lataj beni' ga zoé' Dios, enca' Jesús, zuiné' cuita lè'é ibèla Dios ga nayëpisëtë'é.

⁵⁶ Ní'irö gunné':

—Bulí'yútsöca'. Rilé'eda' nayalaj lúzxiba, até' zuiné' Bönni' Guljé' Bönachi cuita lè'é ibèla Dios.

⁵⁷ Ní'irö bönni' yudo' tu'chi'a tu'söröé' na' bulu'sayaj nágagaquié'. Gula'bödxí'é zidzaj, en tsözxön gula'bía dí'é Esteban na'.

⁵⁸ Bulu'béajé' lè' ní'ilo ra' yödzo na', ga ni' bulu'ladxé' lè' guiój. Yugu' bönni' ni' tuné' ba nalí le tu'zéguié' Esteban didza' bulu'cu'é lari' ta'xóa yéngaquié' xini'é tu bönni' lè' Saulo cate' ni' bulu'ladxé' Esteban guiój.

⁵⁹ Cate' ni' tu'ladxé' Esteban guiój, lè' bulidzé' Dios, gunné':

—Xána' Jesús. Buzí' bö' naca caza'.

⁶⁰ Ní'irö biyéchué', buzóa zxibé', en bē'é zidzaj didza', gunné':

—jXan! jBiti' usubágu'u légaquié' dul-la' ni!

Cate' budxi bē'é didza' ni, gútié'.

8

Saulo ribía ládxé'é bönachi queé' Cristo

¹⁻³ Saulo bené' tsözxön yugu' bönni' ni' gulútié' Esteban.

La' ní'isö yugu' bönni' ta'yéaj ládxi'gaquié' Dios guluá'agaquié' Esteban, até' yöjcháchi'gaquié' lè'. Gula'bödxidé'é ni'a queé'.

Dza na' yugu' bönni' judío cabí ta'yéajlè'é Cristo gula'bía ládxi'da'gaquié' bönachi queé' Cristo nacua' Jerusalén. Lësca' Saulo gudxiá ládxé'é bönachi queé' Cristo. Guyázié' gapa naca lu yu'u quegaquié', até' guzxöné' yugu' bönni', en nigula, até' gulu'é légaquié' lidxi guié'.

Ní'irö gulásilasi ia'látí'sö cabí bidáchigaca yúgu'té bönachi queé' Cristo idú luyú Judea, en luyú Samaria, até' légacasé' gubáz na' nasöl-lè'é Cristo bulu'gá'ané' Jerusalén.

Raca libán que didza' dxi'a luyú Samaria

⁴ Yugu' bönni' na' gulásilasié' yöjáquié' yúgu'té lataj, até' guluné' libán que didza' dxi'a.

⁵ Ní'irö Felipe, tu bönni' dzáguié' nupa na' gulásilasi, guyijé' luyú Samaria, até' bené' libán ni' ca naca queé' Cristo.

⁶ Bulu'dubé' yugu' bönni' ni', até' idú ládxi'gaquié' bulu'zé nágagaquié' didza' ru'é Felipe na', tu' bila'yönné' xtídzé'é, en bila'lé'ené' yugu' le taca bē' runé'.

7 Caní guca, tu' benë' ga bulu'ruáj zían bö' xihui' yú'ugaca bönachi, ta'bödxi'a zidzaj, ate' bulu'huóaca zían nupa te'e huë' nacú'uni bin, en nupa bití' guca sá'gaca.

8 Caní guca, bulu'dzeja bönachi yödzo ni'.

9 Zoë' Simón, tu bönni' zí'aló gúquië' bönni' udzá' uné ya'a lu yödzo na', bönni' guzxi' yé'enë' bönachi Samaria na', gunné' lë cazë' náquië' bönni' nayëpisetërë'.

10 Yúgu'të bönachi bulu'zëda' nágagaca bönni' ni, ga riguela' yugu' bönni' cá'asó ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zxön queë' Dios."

11 Caní guca, gulunë' lë' bal, tu' xidzé nazí' yé'enë' légaquië' len yöl-la' gudzá' uné ya'a queë'.

12 Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'iró gula'dilë' nisa, bönni', en nigula.

13 Ní'iró guyéajlë'ë ca' Simón na', en bidilë' nisa, ate' gudá'entica'së' tsözxön Felipe na'. Cate' bilë'enë' yugu' yöl-la' huáca zxön, en yugu' le taca bë' runë' Felipe, bubá'ni' Simón na'.

14 Cate' yugu' gubáz na' nasöl-lë'ë Cristo nacué' Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'iró gula'sól-lë'ë Pedro, en Juan ni'.

15 Cate' Pedro, en Juan na' bila'dxinë' ni', bulu'lidzë' Dios uláz qué'gaca bönachi ni' ta'yéajlë' Cristo para idisóalenë' Dios Bö' Lá'ayi lé'guequi.

16 Ga bidxintë dza na', bití' ridxininë' Dios Bö' Lá'ayi qué'gaquië'. Nadí'lagacasë' nisa para ilácagaquië' tuz len Xanru' Jesús.

17 Ní'iró Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi lé'gaquië'.

18 Cate' bilë'enë' Simón, bönni' udzá' na', le guca cate' gubáz na' nasöl-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi lé'gaquië', gú'unnë' quizzjé' lé'gaquië' dumí,

19 ate' rë' lé'gaquië':

—Benna ca' yöl-la' huáca ni quia', para cate' ixóa na'a nütí'tës bönachi, idisóalenë' Dios Bö' Lá'ayi nu na'.

20 Ní'iró Pedro gudxë' lë', rnnë':

—Initi dumí quiu' tsözxön len lí', tu' ré'quinu' len dumí idéli'nu' yöl-la' huáca queë' Dios.

21 Bití' nacú' bachi gútsu'u lë ni, tu' dxía le naca ruá' dö' icja ládxi'do'o lahuë' Dios.

22 Bubí'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' lí' ca naca lë ni rizá' ládxi'u.

23 Ré'quibe'eda' nabágu'u xíguia', en nadzunu' lu yalaj que tu' xihui'.

24 Ní'iró bubí'ë didza' Simón na', rë' lé'gaquië':

—Bulí'lidzë' Dios, gáta'yulí' lahuë' Xanru' ni'a quia' neda' para cabí' gaca quia' nitú' lë na' chigunnáli'.

25 Cate' Pedro, en Juan na' budxi gulunë' ba nalí' queë' Cristo lu yödzo ni', en bulu'siyönnë' lé'gaquië' xtídzë'ë Dios, gulunë' ca' libán que didza' dxi'a yugu' lu ládza'gaquië' bönni' Samaria, ate' gudódi ni' yójhuó'jgaquië' Jerusalén.

Felipe, en tu bönni' Etiopia

26 Ní'iró tu gubáz lá'ayi queë' Xanru' bé'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzo Gaza, nöza na' ridödi lu lataj cá'asö.

²⁷ Ní'irö guyu'ë nöza Felipe na', sa'yéajë'. La' nöza ni' yöjtságuie' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzö'ö lídxinu. Guyijë' Jerusalén bönni' ni para guyéaj ládxë'ë Dios.

²⁸ Na'a, söhuöjë' ladzë', rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios.

²⁹ Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

³⁰ Cate' chigubíguë'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajni'inu' lë na' rulabu'?

³¹ Bubi'ë didza' bönni' Etiopía na', gunné':

—¿Nacxi gaca tséajni'ida' channö cuntu nu zoa uzéajni'i neda'?

Ní'irö gúta'yüë' lahuë' Felipe cuenë', en cö'lenë' lë' tsözxön lu carreta na'.

³² Lë na' nazúaj lu guichi rulabë', rna caní:

Ca bö'cu' zxíla'do',
gula'chë'ë Lë' para ilútië' Lë',
en ca bö'cu' zxíla'do',
biti' rnnëba' cate' nu richugu lítsa'ba',
ca' benë' Lë', biti' gusalaj ru'ë bi innë'.

³³ Bulu'cá'anë' Lë' cá'asö,
en biti' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacasë' gulútië' Lë'.

³⁴ Bönni' huödx na' gunábinë' Felipe, rë' lë':

—Ráta'yua' lo' quíxjöi'inu' neda'. ¿Nuzxi que gunné' caní bönni' na' bë'ë didza' uláz queë' Dios? ¿Naru' queë' cazë', o que nu yúbölö?

³⁵ Ní'irö la' didza' nisö buguelë'ë Felipe, en busiyönnë' lë' didza' dxi'a ca naca queë' Jesús.

³⁶ Cate' ni' yú'ugaquië' nöza söjáquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ní dë nisa. ¿Naru' huácatsö idila' nisa?

³⁷ Felipe gudxë' lë':

—Channö réajlë'u idú ládxu'u, huáca idilu' nisa.

Lë' bubi'ë didza', rnnë':

—Réajlë'a Jesucristo, náquië' Zxí'inë' Dios.

³⁸ Ní'irö benë' ga guzóa dxisö carreta queë' na', ate' bulu'huötjë' irópatë', yöjtsázagaquië' lu nisa. Ní'irö Felipe buquilé' bönni' huödx na' nisa.

³⁹ Cate' bulu'rúajë' lu nisa, Dios Bö' Lá'ayi buchë'ë Felipe, ate' bönni' huödx na' biti'rö bilé'enë' lë'. Ní'irö buguelë'ë xinözë', söhuöjë' rudzéjanë'.

⁴⁰ Cate' chiréquibe'enë' Felipe, zoë' lu yödzo Azoto. Gudödë' yúgu'të yödzo ni', ate' benë' libán que didza' dxi'a, ga bídxintë' yödzo Cesarea.

1 Ni' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo,

2 en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sëdë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë' Jesús ni', gaca ichë'ë légaquië' nadzúngaquië' lu yödzö Jerusalen.

3 Tsanni ni' yú'ugaquië' nöza Saulo, en nupa nacua'len lë', söjáquië', en cate' chizóa ila'dxinë' Damasco, tsárido'os buzeni'da' tu bení' za' lúzxiba, le buzení' ga ni' söjáquië'.

4 Ní'irö gudzö'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ládXu'u neda'?

5 Saulo gunábinë' Lë', gunné':

—¿Nuzxi li', Xan?

Lë' gunné':

—Neda' Jesús, Nu ribía ládXu'u. Run zi' cuinu', ridá'bagu'u neda'. Raca quiu' ca na' raca queéba' bëdxi, run zi' cuinba' richégu'ba' yaga tuchi' túndë'ë-ba' zi'.

6 Ní'irö Saulo guzxízidë'ë, gúdxinë', en gunné':

—Xan, ¿bizxi ré'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isöl-la'a quiu' nu guíë li' le ral-la' gunu'.

7 Guládxinë' yugu' bönni' na' söjácalenë' Saulo, tu' bila'yönnë' chi'i na', sal-la' cuntu nu bila'lé'enë'.

8 Ní'irö böasë' Saulo luyú, en cate' guxá' guiöj lahuë', biti' ca' rilé'enë'. Que lë ni na' gula'guélé'ë në'ë, en gula'ché'ë lë' Damasco.

9 Guzóë' ni' tsonna dza nachul-la lahuë', en biti' bi gü'i gudahuë'.

10 Zoë' ca' Ananías, bönni' réajlë'ë Cristo, yödzö Damasco, ate' Xanru' buluí'i lahuë' ga zoë' ca tu lu yëla béchigal, en gudxë' lë':

—Ananías.

Lë' bubí'ë didza', gunné':

—Ni zoa', Xan.

11 Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios.

12 Chibilé'enë' tu bönni' ca tu lu yëla béchigal zë'ë tsázië' ga zoë', lë' Ananías, en ixóa në'ë lë' para huóalaj guiöj lahuë'.

13 Ní'irö bubí'ë didza' Ananías, rë' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' quégaca bönachi ta'yéajlë' Li', nacua' Jerusalén.

14 Zë'ë ca' ni, dë lu në'ë uláz quégaquië' bixúz unná bë' sönë' yúgu'të nupa tu'lidza Dios len Lo' Li'.

15 Ní'irö Xanru' rë' Ananías na', rnnë':

—Guyéaj, tu' gurö caza' neda' bönni' ni para gunë' libán ca naca quia' lógaca bönachi izá'a, en lógaquië' bönni' ta'nná bé'enë' légaquië', enca' lógaca bönachi Israel.

16 Uluí'ida' lë' le zían le qui'i sáquë'ë uláz quia' neda', gunë' xichina'.

17 Ní'irö guyijë' Ananías ni', ate' guyázië' yu'u, en guxóa në'ë Saulo, ate' rë' lë':

—Böcha'a Saulo, Xanru' Jesús, Nu na' buluí'i lahui la' nöza ga ni' zo'o, gusöl-lë'ë neda' para huóalaj guiöj lo', en idisóalenë' Dios Bö' Lá'ayi li'.

18 La' n'isö gula'guínnaj le naca ca xilácuba' böla lu guiöj lahué', ate' la' böáljaté guiöj lahué'. Ní'irö guyasé' Saulo, en bidilé' nisa.

19 Gudödi ni' gudahué', en böáca láchxé'ë. Ca chopa tsonna dza guzóalené' yugu' bönni' ta'yéajlé'ë Cristo nacu'ë Damasco.

Runé' libán Saulo lu yödzö Damasco

20 La' gusi loté' Saulo runé' libán queé' Cristo gapa naca lu yu'u ga tu'dubé' bönni' judío, en tu'sédé' queé' Dios, rnné':

—Jesús náquié' Zxí'ini cazé' Dios.

21 Bulu'bánniné' yúgu'té bönni' ni' ta'yönné' lé', ta'nné':

—¿Naru' caléga bönni' ni bönni' na' busunítie' nupa nacua' Jerusalén, en tu'lidza Dios lu Lé' Jesús? Para guné' caní bidé' ca' ni para iché'ë légaquié' nadzúngaquié' lógaquié' bixúz unná bé'.

22 Bidiparö láchxé'ë Saulo, en bené' ga gula'bö'ë böniga bönni' judío nacu'ë Damasco, tu' buluf'iné' légaquié' Jesús naca cazé' Cristo, bönni' na' tuné' löza idinná bé'ené' légaquié'.

Rulé' Saulo lu ná'agaquié' bönni' judío

23 Cate' chigudödi zían dza, gulún xtídza'gaquié' bönni' judío nacu'ë ni' ilútié' Saulo.

24 Réla, en té dza gula'bö' nísie' yugu' bönni' judío ga nu ridödi lu zö'ö run chi'i yödzö na' para ilútié' lé', pero gúquibe'ené' Saulo le té'ënné' iluné' queé'.

25 Ní'irö yugu' bönni' ta'yéajlé'ë Cristo gula'guélé'ë Saulo chi'i dzö'ölö, ate' gula'gu'ë lé' tu lu ga böra zxön naga' du, en bulu'zötjé' lé' ní'ilö lu zö'ö run chi'i yödzö na'.

Rudxiné' Saulo Jerusalén

26 Cate' budxiné' Saulo Jerusalén, gú'unné' tsöjené' tsözxön bönni' ni' ta'yéajlé'ë Cristo, pero yúgu'té' guládxiné' lé', tu' cabí téquiné' réajlé'ë Saulo na' Cristo.

27 Ní'irö bönni' na' lé' Bernabé gudélé'ë Saulo, en guché'ë lé' ga na' nacu'ë bönni' gubáz nasöl-lé'ë Cristo. Busiyönné' légaquié' ca na' guca queé' Saulo, bilé'ené' Xanru' la' nöza, ate' Xanru' caz bé'lené' lé' didza', en ca na' bené' Saulo lu yödzö Damasco, len yöl-la' rugu ladxi' bené' libán ca naca queé' Jesús.

28 Ní'irö Saulo guzóalené' légaquié' lu yödzö Jerusalén, ate' gudálené' légaquié' tsözxön.

29 Lu yöl-la' rugu ladxi' bené' libán Saulo ca naca queé' Xanru', en gudí-lalené' didza' bönni' judío tu'ë didza' griego, ate' légaquié' gula'zóa gula'bö'ë ilútié' lé'.

30 Cate' guléquibe'ené' böchi'ru' ta'yéajlé'ë Cristo lé' ni, gula'ché'ë Saulo lu yödzö Cesarea, ate' gula'söl-lé'ë lé' yödzö Tarso, le naca ladzé' Saulo.

31 Ní'irö guca tsahui' quégaca yúgu'té cö' bönachi queé' Cristo, nacua' idú luyú Judea, en luyú Galilea, en luyú Samaria, ate' bila'dipa láchxi'gaquié'. Gula'cu'ë lu yöl-la' radxi quégaquié' Xanru', ate' gula'yané' tu' gúcalené' Dios Bö' Lá'ayi légaquié'.

Pedro ruiné' tu bönni' lé' Eneas

32 Ia'tú le guca, cate' Pedro yöjyúé' yugu' böchi'ru', bidxiné' ga nacu'ë bönni' ta'yéajlé'ë Jesús lu yödzö Lida.

33 Yöjxáquié' tu bönni' ni' lé' Eneas, chiguca xunu' iz dè' ré'ené', nacú'unié' bin.

34 Pedro gudxé' lé':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'.

³⁵ Yúgu'të nupa nacuá' yödzo Lida, en yödzo Sarón bila'lé'e lë', ate' bulu'huóaca queë' Xanru', tu' chita'yéajlë' Lë'.

Rátinu Dorcas, en rubannu

³⁶ Ia'stu le guca, lu yödzo Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Benu nigula ni zían le nácagaca dxi'a le tácalen bönachi yechi'.

³⁷ Le guca dza ni', gü'ínu Dorcas na', en gútinu. Gudödi gula'gu'binu lënu, gula'gu'xjé'-nu tu lu yu'u ga naca buropi cuia.

³⁸ Tu' dë yödzo Lida gála'sö ga na' dë yödzo Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë ni na' gula'sól-lë'ë chopë' bönni' ga na' zoë', ate' guláta'yuë' lahuë', të' lë':

—Biti' tsenu' guidu' queëtu'.

³⁹ Ní'irö la' guyásatë' Pedro, sa'yéajlë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bódxinu, en tu'lu'ínu lë' lari' quégaquië' bönni', en nigula, yugu' le benu Dorcas cate' ni' zóalenu légacanu.

⁴⁰ Ní'irö Pedro bubéajë' ní'ilö yúgu'të nupa nacuá' ni', ate' buzóa zxibë', rulidzë' Dios. Ní'irö buécjé' ga dënu Dorcas na', gunné':

—Tabita, guyasa.

La' buxa'të guiöj lonu Dorcas. Cate' bilé'enu-në' Pedro, la' guyástënu, gurö'önu.

⁴¹ Gudélé'ë Pedro ná'anu, en buchisé'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu.

⁴² Ca guca lë ni guzë didza' idú lu yödzo Jope, ate' gula'yéajlë' bönachi zían Xanru' Jesús.

⁴³ Bugá'anë' Pedro yödzo Jope na' zían dza lu yu'u lidxë' Simón, bönni' runë' tsahui' guídi zxa bëdxi.

10

Le benë' Pedro lidxë' Cornelio

¹ Zoë' yödzo Cesarea tu bönni' lë' Cornelio, bönni' rinná bé'enë' tu gáyu'ë bönni' rójáquië' gudil-la, nazí'i lágáquië' Bönni' Italia Rójáquië' Gudil-la.

² Cornelio na' reaj ládxë'ë Dios, en rádxinë' Lë', ate' yúgu'të bönachi nacua' lidxë' núngaca lë' tsözxön. Runödzjé' Cornelio dumí zían le rácalen bönachi yechi', en rulídzatica'së' Dios.

³ Tu dza idú ridödi xihuó bilé'enë' Cornelio ca tu lu yëla bëchigal, razië' tu gubáz lá'ayi queë' Dios ga na' zoë', en rë' lë':

—Cornelio.

⁴ Gúdxinë' Cornelio. Buyúë' gubáz lá'ayi na', en gudxë' lë':

—¿Bizxi rño', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nözinë' ca runu', rácalenu' bönachi yechi'.

⁵ Na'a, gusól-la' yugu' bönni' tsójáquië' yödzo Jope tsöjlídzagaquië' bönni' na' lë' Simón, zoa ia'tú lë' Pedro.

⁶ Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca' lë' Simón, ate' zoa lidxë' ra' nísado'. Pedro na' guíë' li' le ral-la' gunu'.

7 Cate' chibuzë'e gubáz lá'ayi na' bé'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la reaj lãdxë'ë Dios, en dzãguië' bönachi nacua' lidxë' Cornelio.

8 Cate' budxi busiyönnë' légaquië' yúgu'të le guca, gusól-lë'ë légaquië' yödzö Jope.

9 Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'sö gurenë' Pedro ícjo'olö yu'u para ulidzë' Dios, ni' naca idú huagubidza.

10 La' ná'asö ridunë' Pedro, en gú'unnë' gahuë', ate' tsanni ni' tu'pë'ë queë', bilé'enë' le naca ca tu lu yëla bëchigal.

11 Bilé'enë' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a.

12 Lahui lari' na' dxíagacaba' yugu' böa' guixi' izá'a nacua' tapa ni'a ná'agacaba', en yugu' böa' tá'ayöj lë'egacaba' lu yu, en yugu' böa' zoa xíligacaba'.

13 Ní'irö biyönnë' chi'i nu rë lë':

—Pedro, guyasa. Bëti-gacaba', en gudagu.

14 Bubi'ë didza' Pedro, rnnë':

—¡Calëga, Xan! Catu caz gadahua' le cabí ral-la' gágutu', o le cabí naca dxi'a.

15 Le buropi luzuí biyönnë' chi'i nu na' gudxi lë':

—Le nunë' Dios dxi'a, biti' innó' que: "Biti' naca dxi'a."

16 Tsonna luzuí guca caní, ate' ní'irö la' buëpitë lari' zxön na' lúzxiba.

17 Tsanni ni' rë'ë böniga Pedro, rizá' lãdxë'ë bizzi sa'yéaj lë na' bilé'enë' ca tu lu yëla bëchigal, bila'dxinë' bönni' na' nasól-lë'ë Cornelio légaquië' ra' yu'u, ta'nabë' gazxi zoa lidxë' Simón na'.

18 Cate' bila'dxinë' ni', bulu'lidzë' nupa nacua' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro.

19 Tsanni ni' rizá' lãdxë'ë Pedro ca naca lë na' bilé'enë', Dios Bö' Lá'ayi gudxë' lë', rnnë':

—Buyútsöca'. Chibila'dxinë' tsonnë' bönni' ni, tu'guiljë' li'.

20 Guyaschi na'a, en bötaj zzan yu'u. Biti' gaca chopa lãdxu'u tséajlenu' légaquië', tu' nasól-la'a neda' yugu' bönni' ni.

21 Ní'irö bötjë' Pedro zzan yu'u ga na' nacué bönni' na' nasól-lë'ë Cornelio, en gudxë' légaquië':

—Neda' bönni' ruguíajli'. ¿Bizxi huen zá'ali' ni?

22 Bulu'bi'ë didza', të' lë':

—Cornelio, tu bönni' rinná bé'enë' bönni' rójáquië' gudil-la, nasól-lë'ë netu'. Náquië' bönni' tsahui', en rádxinë' Dios. Yúgu'të bönni' judio tunë' bal bönni' ni, en nadxí'iguequinë' lë'. Ia'tú le guca, tu gubáz lá'ayi queë' Dios bé'lenë' lë' didza', en gudxë' lë' isól-lë'ë nu udulídza li' guidu' lidxë' para yönnë' didza' gu'u.

23 Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' reni' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacué Jope na' gulunë' lë' tsözxön.

24 Dza bunny ni', bila'dxinë' Cesarea. Chizóë' Cornelio ribözë' légaquië', ate' chinutubë' yugu' di'a dza queë', en yugu' böchi' luzë'ë nadxí'irönë' lidxë'.

25 Cate' guyázië' Pedro lö'a, birúajë' Cornelio yu'u, yöjtsáquië' lë'. Biyéchuë' xini'ë Pedro, en guyéaj lãdxë'ë lë' ca runru' queë' Dios caz.

26 Pedro buchisé' lë', en gudxë' lë':

—Guyasa. Lësca' bönachi yödzölió naca' ca nacué li'.

27 Ni' tu'is'e' ca' didza', guyázate' Pedro yu'u, en yójxáquié' nudúbigaca bönachi zían ni'.

28 Ní'irö Pedro gudxë' légaquié', rnnë':

—Libí'ili' nöz quézili' ca rinná bë' xibá queé' Moisés, rna bití' ral-la' gunë' tu bönni' judío tsözzön o tsázalenë' nu bönni' izá'a. Na'a, Dios buluí'inë' neda' bití' ral-la' inní'a' queé' nitüé' bönni' náquié' cá'asó o bití' náquié' dxi'a.

29 Que lë ni na' cate' bulídzali' neda', la' bídatea', en bití' guca chopá ládxa'a. Rinaba' na'a, ¿bizx que na' bulídzali' neda'?

30 Ní'irö bubí'ë didza' Cornelio, gunné':

—Chiguca tapa dza ca zóaru' na'a, idú ridödi xihuó, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rëpi yösa bení', duluí'i lobi' neda'.

31 Caní gúdxibi' neda': "Cornelio. Dios riyönnë' le rulidzu'-në', en nözinë' ca runu', rácalenu' yugu' bönachi yechi'.

32 Na'a, isöl-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoé' lidxë' tu bönni' runë' tsahui' guídi zxa bëdxi, en lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a."

33 Caní guca, la' gusöl-la'tea' nu tsöjlidza' li', ate' tsahui'do' benu' bidu' ga zóatu' ni. Que lë ni na' zóatu' ni yúgu'tëtu', nudúbitu' lahuë' Dios para uzé' nágatu' le inná bé'enë' Dios li' innó'.

Didza' bë'ë Pedro lidxë' Cornelio

34 Ní'irö gusí lahuë' Pedro ru'ë didza', rnnë':

—Le nácatë réajni'ida' na'a, bití' ruyusë' Dios yöl-la' rinnësö quégaca bönachi, pero tuz ca rilé'enë' rë'u.

35 Dios raza ládxe'ë bönachi idütë yödzölió, nupa na' tadxi Lë', en tun le naca dxi'a.

36 Gusöl-lë'ë Dios xtídzë'ë ga naca' bönachi Israel, en gusöl-lë'ë nu ben libán que didza' dxi'a, le run ga raza dxi'a quégaca bönachi, lë na' bidxín queëru' lu në'ë Jesucristo. Lë cazë' náquié' Xanru' yúgu'tëru'.

37 Libí'ili' nöz quézili' lë na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa.

38 Nözili' ca benë' Dios le guca queé' Jesús, bönni' Nazaret. Gusöl-lë'ë Dios Bó' Lá'ayi, en yöl-la' huáca queé' para sóalengaca Lë'. Nözili' ca na' gudë' Jesús, runë' le naca tsahui', en ruünë' yúgu'të nupa gula'guí' gula'zaca' lu na' tu' xihui'. Caní benë', tu' guzóalenë' Dios Lë'.

39 Na'a, netu' runtu' ba nalí que yúgu'të lë na' benë' Jesús luyú Judea, en lu yödzö Jerusalén, en ca na' guca, gulütië' Jesús, cate' bulu'dë'ë Lë' lë'e yaga cruz.

40 Ní'irö Dios busubanë' Lë' cate' guca tsonna dza nátië', en benë' ga buluí'i lahuë' ga zóatu' netu'.

41 Bití' buluí'i lahuë' lógaca yúgu'të bönachi, pero lotu' netu' buluí'i lahuë'. Dios guröë' netu' dza ni'te para guntu' ba nalí queé' Jesús, ate' güfi' gudágulentu' Lë' tsözzön gudödi bubanë' lu yöl-la' guti.

42 Gunná bé'enë' Dios netu' guntu' libán lógaca bönachi, ate' runtu' ba nalí queé' Cristo, náquié' Nu buzóa cazë' Dios para uchi'a usöröë' nupa nabángaca, en nupa chinátigaca.

43 Lësca' yúgu'tè bönni' gulu'ë didza' uláz queë' Dios gulunë' ba nalí queë' Jesús, gula'nne': "Yúgu'tè nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

Dios Bö' Lá'ayi ridisóalenë' bönachi izá'a

44 Ni' ru'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'tè nupa ni' ta'yöni libán runë' lë'.

45 Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxón len Pedro, tu' bidë' Dios Bö' Lá'ayi, Nu na' nasöl-lë'ë Dios Xuz. Bidisóalenë' bönachi ni' bití' náca'gaca judío.

46 Caní gulunë' tu' bila'yönnë' tu'ë bönni' zi'tu' na' didza' yúbölö, en tunë' Dios zxön.

47 Ní'irö bë'ë didza' Pedro, gunnë':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

48 Gunná bë'ë Pedro ila'dilë' nisa tu' nazí lu ná'agaquië' Lë' Xanru' Jesús. Ní'irö yugu' bönni' ni' gulá'ta'yue' lahuë' Pedro ugá' analenë' légaquië' ca chopa tsonna dza.

11

Didza' bë'ë Pedro lógaca bönachi queë' Cristo nacua' Jerusalén

1 Bila'yönnë' gubáz nasöl-lë'ë Cristo, en böchi'ru' nacu'ë luyú Judea ca na' bönni' bití' náca'gaquië' judío gula'zì' lu ná'agaquië' xtídzë'ë Dios.

2 Cate' budxinë' Pedro Jerusalén, böchi'ru' judío gula'díl-lalenë' lë' didza'.

3 Gulë' Pedro:

—¿Bizx que yöjtú'sulenu' bönni' bití' náca'gaquië' judío, en gudágulenu' légaquië' tsözxón?

4 Ní'irö gusí lahuë' Pedro rusiyönnë' légaquië' idútë lë na' guca, rnnë':

5—Guzóa' lu yödzo Jope, en cate' ni' rulidza'-në' Dios, bilé'eda' ca tu lu yëla bëchigal tu le buluf'inë' Dios neda'. Bilé'eda' bötaj birúaj lúzxiba tu le naca ca tu larí' guitsa' zxön, naga' idapa la'a, ate' bidxín ga na' zoa'.

6 Cate' ni' ruyúa' le para ilé'eda' le dxía láchuilö, bilé'egacada'-ba' böa' guixi' nacua' tapa ní'agacaba', yugu' böa' guixi' sínia', en böa' tá'ayöj lë'egacaba' lu yu, en böa' zoa' xiligacaba'.

7 Biyönda' chi'i nu gudxi neda': "Pedro, guyasa. Bëti-ba', en gudagu."

8 Ní'irö gudxa'-në': "Bití' ca', Xan. Catu caz gudahua' tu le cabí ral-la' gágutu', o tu le cabí naca dxí'a."

9 Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxí'a, bití' inno' bití' naca dxí'a."

10 Tsonna luzuí guca caní, ate' ní'irö idútë lë na' bilé'eda' la' buëpitë lúzxiba.

11 La' ní'sö bila'dxintë' tsonnë' bönni' ra' yu'u ga na' zoa', narúajgaquië' yödzo Cesarea, nasöl-lë'ë légaquië' tu bönni' lë' Cornelio. Sududíl'jagaquië' neda'.

12 Dios Bö' Lá'ayi gudxë' neda': "Guyéajlen légaquië', en cabí gaca chopa ládxu'u." Lësca' izxópatë' böchi'ru' ni gula'zá'lenë' neda' tsözxón. Guyéajtu' Cesarea, ate' guyaztu' lidxë' tu bönni' zoë' ni'.

13 Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' lë': "Na' a isöl-la'gacu'-në' bönni' tsöjáquië' yödzo Jope, tsöjlídzagaquië' Simón, zoa ia'tú lë' Pedro.

14 Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacuá' lidxu'."

15 Cate' ni' gusi lahua' ru'ílena' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö.

16 Ní'irö yöjneda' didza' na' bë'ë Xanru', gunnë': "Le nácatë Juan buquilë' bönachi nisa lu nisa, pero libí'ili', gaca queé'li' le rulu'ísó yöl-la' ridila nisa na', idisóalenë' Dios Bö' Lá'ayi libí'ili'."

17 Que lë ni na', channö Dios gusól-lë'ë Dios Bö' Lá'ayi quégaquië', la' tuz ca benë' queëru' rë'u réajlë'ëru' Xanru' Jesucristo, çnúxité neda' inná bé'eda'në' Dios?

18 Ní'irö, cate' bila'yönnë' lë ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' bití' nácaquië' judío, tu'bí'í ládxi'gaquië' para ila'déli'në' yöl-la' na'bán idú.

Yugu' bönni' nacu'ë Antioquía ta'yéajlë'ë Cristo

19 Cate' ni' yugu' bönni' judío bití' ta'yéajlë'ë gulútië' Esteban, en gula'bía ládxi'gaquië' ia'zica'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzö luyú Fenicia, en luyú Chipre, en lu yödzö Antioquía. Gulunë' libán ni' que xtídzë'ë Dios, pero lógasö bönachi judío.

20 Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzö Antioquía, gulu'ílenë' ca' didza' yugu' bönni' izá'a. Gulunë' libán lógaquië' que didza' dxí'a ca naca queë' Xanru' Jesús.

21 Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

22 Cate' bidxin didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'sól-lë'ë Bernabé tséajjë' Antioquía na'.

23 Cate' Bernabé na' bidxinë' Antioquía, bilé'enë' le ruzá' ládxe'ë Dios quégaquië', en budzéjanë'. Guchízië' icja nágagaquië' para ila'día'tica'së' queë' Xanru' idú ládxi'gaquië'.

24 Náquië' Bernabé na' tsahui', en idú zóalenë' Dios Bö' Lá'ayi lë', en idú ládxe'ë réajlë'ë Cristo. Ni'a que libán benë' Bernabé na', bönachi zían lu yödzö na' gula'yéajlë' Xanru'.

25 Gudödi ni', guyijë' Bernabé na' yödzö Tarso, yöjdiljë' Saulo. Cate' budzölinë' lë', buchë'ë lë' Antioquía.

26 Idú ca tu iz gula'cu'ë ni', tunë' tsözön bönachi queë' Cristo, en tu'sëdinë' bönachi zían. Lu yödzö Antioquía na', gusi lo gula'zí' lágachië' cristiano le rnna len didza' xidza': Bönachi Queë' Cristo, nupa ni' ta'yéajlë' Lë'.

27 Dza ni' bila'rúajë' Jerusalén, en yöjáquië' Antioquía bal-lë' bönni' tu'ë didza' uláz queë' Dios.

28 Guzuínë' Agabo, bönni' dzáguië' yugu' bönni' na', en uláz queë' Dios Bö' Lá'ayi buzéajni'inë' légaquië', gunnë':

—Sí' gaca gubín idútë yödzölió.

Guca gubín na' cate' ni' rinná bë'ë Claudio, lu yödzö Roma.

29 Ní'irö gula'zí' lu ná'agaquië' bönni' ta'yéajlë'ë Cristo nacu'ë Antioquía, ila'sól-lë'ë tsa le dësö que queégaquië', le gácalen böchi'ru' nacu'ë luyú Judea.

30 Caní gulunë', ate' lë na' bulu'nödzjë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula' tapa chi'ë bönachi queë' Cristo nacu'ë Judea.

12

Tútië Jacobo, en ta'gu'ë Pedro lidxi guié

¹ Dza na' Herodes, bönni' unná bē', benē' ga gula'zōnē' bal-lē' bönni' queē' Cristo para ulu'saca' zi'ē légaquiē'.

² Gunná bé'enē' bönni' gulútiē' Jacobo, böchē'ē Juan. Gulu'ē lē' guié tuchi'.

³ Cate' gúquibe'enē' Herodes gula'yaza ládxi'gaquiē' bönni' judío lē ni, benē' ga gula'zōnē' ca' Pedro. Gulaca lē ni dza ni' raca laní cate' tahuē' yōta xtila bití' nazí'i cúa zi que.

⁴ Gadódi gula'zōnē' Pedro, gula'gu'ē lē' lidxi guié, en bulu'dödē' lē' lu ná'agaquiē' tapa cō' bönni' rōjáquiē' gudil-la, nacu'ē tapē' tu huéaj cō' na', para uyúgaquiē' lē'. Yu'u ládxē'ē Herodes ubéajē' Pedro lógaca bōnachi tōdi Laní Pascua, laní na' tu'subanē' ca benē' Dios, bubéajē' bōnachi judío luyú Egipto.

⁵ Caní guca, nun chí'igacrē' Pedro lu yu'u lidxi guié na', pero bōnachi queē' Cristo bulu'lídzatica'sō Dios, ta'nábini Dios gácalenē' Pedro.

Dios rubéajē' Pedro lidxi guié

⁶ Cate' si' idxín dza yu'u ládxē'ē Herodes ubéajē' Pedro lidxi guié na', la dzō' ní'isō dē' rásíē' Pedro, ate' nacu'ē chopē' bönni' rōjáquiē' gudil-la cuita lē'ē Pedro na', en núga'gaquiē' lē' chopa du guié. Rōja'cu'ē ia'bal-lē' bönni' rōjáquiē' gudil-la tapa chí'ē ga nu riyaza lidxi guié na'.

⁷ Tsárido'os buluí'i lahuē' tu gubáz lá'ayi queē' Xanru' ni', ate' buzení'da' bení' lidxi guié. Gudanē' gubáz lá'ayi na' cuita lē'ē Pedro, ate' busubanē' lē', en gudxē' lē':

—Guyaschi.

Ní'irō bulu'huédxi du guié na' naga' ni'a nē'ē Pedro.

⁸ Gubáz lá'ayi na' gudxē' lē', gunnē':

—Béga' lē'u, en gudá' xirachu'.

La' bentē' Pedro caní. Ní'irō gubáz lá'ayi na' gudxē' lē', rnnē':

—Guxóa lari' cúdzu'u, en gudá len neda'.

⁹ Burúajē' Pedro, sa'yéajlenē' gubáz lá'ayi na', pero bití' réquibe'enē' nácatē le runē' gubáz lá'ayi na'. Gúquinē' yélasō rinenē'.

¹⁰ Cate' chigula'dödē' ga nacu'ē bönni' zí'alō, en bönni' buropi cō', bönni' na' rōjáquiē' gudil-la tapa chí'ē, bila'dxinē' ga zoa le néquini guié le nusayaj ga nu riyaza lidxi guié na', ga nu rurúaj la' nōza que yōdzō. Ga nu riyaza na', rácasō que gualaj. Cate' bila'rúajē' ni', gula'zē'ē ga ridzaga ia'turō nōza, ate' ni' gubáz lá'ayi na' la' bulá'alentē' Pedro.

¹¹ Ní'irō réquibe'enē' Pedro, ate' lu icja ládxi'da'azē' gunnē':

—Na'a chinōzda' le nácatē gusól-lē'ē Xanru' gubáz lá'ayi queē', en busölē' neda' lu nē'ē Herodes, en lu yúgu'tē le gulē'ēnnē' bönni' judío ilunē' quia'.

¹² Tsanni ni' yu'ē nōza Pedro, rizá' ládxē'ē ca naca lē na' guca, ate' bidxinē' lídxinu María, xiná'abi' Juan, bi'i na' zoa ia'tú labi' Marcos. Lu yu'u na' nudúbigaca bōnachi zían ta'yéajlē' Cristo, en tu'lidza Dios.

¹³ Cate' bulidzē' Pedro ra' yu'u lö'a, birúajbi' bi'i nigula lēbi' Rode para inözibi' nuzxi na'.

¹⁴ Cate' bünbē'ēbi' bi'i nigula ni chí'ē Pedro, lu yöl-la' rudzeja queēbi' bití' gusaljbi' yu'u, pero carelō bōajbi' lu yu'u, yōjtíxjōi'ibi' nupa nacua' ni', rnnabi':

—Zoē' Pedro ra' yu'u.

¹⁵ Ní'irō gulē' lēbi':

—Nachixi icju'.

Lëbi' tsútsurö ben xtídza'bi' naca caní. Ní'irö gula'nnë':

—Calëga lë'. Bixin queë' na'.

¹⁶ Tsanni na' bití' zoa dxíë' Pedro rulidzë' nupa nacua' lu yu'u. Cate' gula'saljë' yu'u, gula'nítisinë' cate' bila'lé'enë' lë'.

¹⁷ Ní'irö guchisa në'ë Pedro para ila'cu'ë dxisö, ate' busiyönnë' légaquië' ca benë' Xanru', bubéajë' lë' lidxi guíë. Ní'irö gudxë' légaquië':

—Guli'siyönnë' ca' Jacobo, en yugu' böchi'ru' ca na' guca.

Ní'irö burúajë' Pedro, sa'yéajë' ga yúbölö.

¹⁸ Cate' za' rení' dza na', bönni' rójáquië' gudil-la gula'bö'ë böniga nacxi guca, bití'rö yu'ë Pedro lidxi guíë.

¹⁹ Ní'irö gusöl-lë'ë Herodes nupa tsöjxí'gaca Pedro. Cate' bití' bulu'dzölinë' lë', Herodes gunabi yúdxinë' yugu' bönni' na' rójáquië' gudil-la, bönni' gulún chi'ë Pedro. Gudödi ní' gunná bé'enë' nupa bëtigaca yugu' bönni' na' rójáquië' gudil-la. Ní'irö buzë'ë Herodes luyú Judea, sa'yéajë' Cesarea, ate' bugá'anë' ní'.

Ca gútië' Herodes

²⁰ Dza ní'isö rilenë' Herodes bönachi yödzo Tiro, en yödzo Sidón. Zí'alö bönachi lu xiyüë' Herodes na' gula'söl-la' le biyadzaj quégaca bönachi lu xiyúgaca yödzo Tiro, en Sidón na', pero tu' rilenë' Herodes légaquië', bití'rö bi ta'söl-lë'ë quégaquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto unë quégaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulë'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégaquië'.

²¹ Ní'irö budxië' bë' Herodes dza yönnë' légaquië', ate' dza na' gurö'ë xilatjë' ga ruchí'a rusörö'ë bi raca, nácuë' lari' nazaca', en benë' libán lógaquië'.

²² Ní'irö bulu'lidzë' zidzaj bönni' na', ta'nnë':

—¡Calëga bönni'sö ní! ¡Dios caz ní ru'ë didza'!

²³ La' ná'asö la' bë'të' gubáz lá'ayi queë' Xanru' lë' tu' buzi'ë lë cazë' yöl-la' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

²⁴ Ní'irö guca libán que xtídze'ë Xanru', ate' gula'yán nupa nazi' lu ná'agaca le.

Le zí'alö luzuí rójéngaquië' Bernabé, en Saulo libán

²⁵ Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacu'ë Jerusalén, bulu'zë'ë ní', yöjhuöjgaquië' yödzo Antioquía. Gula'ché'ë-bi' ca' bi'i Juan, zoa ia'tú labi' Marcos.

13

¹ Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönachi lu yödzo Antioquía, tunë' tu zxön bönachi queë' Cristo lu yödzo na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxönlënë' tsözxön Herodes, bönni' rinná bë'ë luyú Galilea).

² Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'béaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

³ Budxi gulunë' gubasa, en gulu'ilenë' Dios didza', ní'irö gula'xóa ná'agaquië' chopë' ni, en gula'söl-lë'ë légaquië'.

Yugu' gubáz nasöl-lë'ë Cristo tunë' libán luyú Chipre

⁴ Ní'irö yöjáquië' Bernabé, en Saulo yödzö Seleucia, tu' gusöl-lë'ë Dios Bö' Lá'ayi légaquië' ni', ate' ni' gula'benë' tu' lë'e barco le guchë' légaquië' ga naca tu luyú bidxi lu nísado', nazí'i le Chipre.

⁵ Cate' bila'dxinë' lu yödzö Salamina luyú na', gulu'ë xtídzë'ë Dios gapa naca lu yu'u ga tu'dubë' bönni' judío luyú na', en tu'sédë' queë' Dios. Nachë'gaquië'-bi' bi'i Juan para gunbi' légaquië' tu zxon.

⁶ Budxi gula'dödë' idú gapa dë yödzödo' luyú bidxi na' lu nisa zxon, ní'irö bila'dxinë' yödzö Pafos. Yöjxaca'gaquië' Barjesús, tu bönni' judío ni'. Náquië' bönni' udzá' rinnë' yë'ë, en rnnë' ru'ë didza' uláz queë' Dios.

⁷ Bönni' ni dzáquië' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' ré'ënë' yönnë' xtídzë'ë Dios.

⁸ Ní'irö bönni' udzá' na' gudá'baguë' Bernabé, en Saulo, tu' gú'unnë' gunë' ga biti' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídzá'gaca bönachi izá'a ga na'.

⁹ Ní'irö Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyúë' Elimas na'

¹⁰ en rë' lë':

—Li', bönni' rizí' yë', en bönni' huiá' dö', nacu' ca xzí'ini caz tu' xihui', en bönni' biti' rilé'enë' dxi'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu rë'ëni tséajlë' Lë'?

¹¹ Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudë' nilö ná'alö, riguiljë' nuzxi són në'ë para ichë' lë'.

¹² Cate' bilé'enë' bönni' unná bë' na' lë' na' guca, bubáninë' ca naca xtídzë'ë Xanru', ate' guyéajlë'ë Cristo.

Le gulunë' Pablo, en Bernabé lu yödzö Antioquía luyú Pisidia

¹³ Ní'irö buzë'ë Pablo lu yödzö Pafos na' len yugu' bönni' dzágagaquië' lë', nacu'ë tu lë'e barco, ate' bila'dxinë' yödzö Perge luyú Panfilia. Lu yödzö na' bi'i Juan bulá'alenbi' légaquië', en bójabi' Jerusalén.

¹⁴ Gudödi ni' bulu'zë'ë Perge na', en yöjáquië' yödzö Antioquía luyú Pisidia. Lu yödzö na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sédë' queë' Dios, ate' lu yu'u na' gula'bö'ë.

¹⁵ Ní'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'söl-lë'ë nu yöjódx Saulo, en Bernabé, gunné':

—Libi'ili', böchi'tu'. Channö nuá'ali' bi innali' le uzéajni'i netu', guli'nnë'.

¹⁶ Ní'irö guzuínë' Pablo, en guchisa në'ë para ila'cu'ë dxisó, gunné':

—Buli'zë nágali' le guía' libí'ili', bönni' Israel, en libí'ili', núlöli' rádxili'-në' Dios.

17 Xanru' Dios, Nu ta'yéaj ládxi'gaca bönachi Israel, gurö cazë' xuz xtó'oru', en benë' ga gula'yándë'ë cate' ni' nácagaquië' bönni' zi'tu luyú Egipto. Len yöl-la' huáca zxon queë' bubéajë' légaquië' luyú ni'.

18 Idú choá' iz Dios biá' gulënë' quégaquië' cate' ni' gula'dë' idú luyú bidxi lu lataj cá'asó.

19 Cate' budxi busunitië' gadxi cö' yödzö gula'cuá' luyú Canaán, bunödzejë' xiyúgaca bönachi ni' quégaquië' xuz xtó'oru'.

20 Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios.

21 Ní'irö gula'nábinë' Dios uzóë' tu bönni' unná bë' quégaquië'. Dios guröë' Saúl, xzí'inë' Cis, bönni' nababë' di'a dza queë' Benjamín. Idú ca choá' iz gunná bë'enë' Saúl na' légaquië'.

22 Gudödi ni' Dios gudüë' Saúl na', ate' buzóë' David quégaquië' para inná bë'ë. Dios benë' ba nalí queë' David ni, gunné': "Nözda' runë' David, xzí'inë' Isaí, le raza ládxa'a, en gunë' yúgu'të le ré'ënda' neda'."

23 Ladaj xzí'ini xi'sóë' David na' benë' Dios ga guljë' Jesús para gáquië' bönni' usölë' bönachi Israel, ca na' guzxi' lu në'ë Dios zí'atëlö gunë'.

24 Zí'alö cate' si' ilá' lahuë' Jesús, benë' Juan libán lógaca yúgu'të bönachi Israel para ulu'bí'i ládxi'gaca, en ila'dila nisa.

25 Cate' ni' chizó'a údxi gunë' libán Juan na', gunné': "¿Nuzxi réquili' naca' neda'? Biti' naca' Cristo, bönni' na' ral-la' guidé'. ¡Na'a, buli'yútsöca'! Chizóë' idxinë' bönni' na' ga zoa' ni, ate' neda' biti' naca' lesaca' ilecja' xiráchuë' nudë'ë."

26 Libí'ili', böcha'a, yugu' xzí'ini xi'sóë' Abraham, en núlöli' zóali' ni, en rádxili'-në' Dios. Dios caz gusöl-lë'ë queéli' didza' ni para uláli'.

27 Nupa nacué' Jerusalén, en bönni' ta'nná bë'enë' légaquië' biti' bulu'únbë'ë Jesús, en biti' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni'i quégaquië' gulunë' ga budxín ca rnna didza' ni cate' ni' gula'chúguië' queë' Jesús gátië'.

28 Sal-la' biti' budzöli le nabáguë'ë Jesús gátië', gula'nábinë' Pilato inná bë'enë' bönni' ilútië' Lë'.

29 Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zötjë' Lë' lë'e yaga cruz, en bulu'cáché'ë Lë' yeru ba.

30 ¡Ní'irö Dios busubanë' Lë' lu yöl-la' guti!

31 Zián dza bulu'i lahuë' Jesús lógaca nupa yöjácalen Lë' tsözxön cate' ni' buzë'ë luyú Galilea, en bidxinë' Jerusalén. Na'a, yugu' bönni' na' tunë' ba nalí queë' lógaca bönachi.

32 Caní naca, lësca' netu' ni rusiyöntu' libí'ili' didza' dxi'a ca naca lë na' guzxi' lu në'ë Dios gunë' quégaquië' xuz xtó'oru'.

33 Lë na' guzxi' lu në'ë Dios quégaquië', Lë cazë' benë' ga budxín queëru', nácaru' xzí'ini xi'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Xzí'iná'. Neda' buzóa caza' Li'."

34 Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunné' caní: "Gunna' quiu' le nácgaca bica' ba guzxi' lu na'a lahuë' David."

35 Que lë ni na' nazúaj ca' lu guichi, ga zoa ia'tú salmo, le rnna caní: "Biti' gu'u lataj ugá'anë' bönni' lá'ayi quiu' ga initi le naca cazë'."

36 Le guca queë' David naca bë'. Gudödi benë' dxin lógaca bönachi uládz queë', ca na' gunná bé'enë' Dios lë', ní'irö gútië', ate' gula'gu'ë lë' yeru ba ga nacu'ë xuz xtá'ahuë', ate' guniti le naca cazë'.

37 Na'a, ca naca queë' Jesús na', Dios busubanë' Lë', ate' bití' guniti le naca cazë' lu yeru ba.

38 Libí'ili', böcha'a, ral-la' inözili' lë ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni.

39 Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugúa xibá queë' Dios, le bë'ë Moisés.

40 Guli'gún chí'i cuinli' na'a para cabí gaca queëli' le nazúaj lu guichi le gula'nnë' bönni' gulu'ë didza' uládz queë' Dios, le rnna caní:

41 Buli'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlë' queëli' gátíli'.

Neda' guna' tu dxin dza ni zóali',

en sal-la' nu ulu'i' libí'ili' le rulu'i' dxin na', bití' ca' tséajlë'ëli'.

42 Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sédë' queë' Dios, ní'irö bönachi ni' guláta'yu lógaquië' ulu'sédinë' légaquië' ca naca lë ni cate' idxín ia'tú dza lá'ayi quégaquië'.

43 Cate' ni' bulu'rúajë' lu yu'u na' bönni' nudúbigaquië' ni', zían bönni' judío, en bönni' nuhuóacagaquië' judío, yugu' bönni' ta'yéaj ládxi'gaquië' Dios, gulunë' tsözxön Pablo, en Bernabé. Chopë' ni gulu'ilenë' légaquië' didza', en bulu'së'ë ládxi'gaquië' para ilácatica'së' tsutsu, ilunë' löza le ruzá' ládxe'ë Dios quégaquië'.

44 Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biqúi' yúgutë bönachi lu yödzö na' para ila'yönnë' xtídzë'ë Dios.

45 Ní'irö bulu'zxe'enë' bönni' judío bití' ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le.

46 Ní'irö lu yöl-la' rugu ladxí' quégaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queëli' bití' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacua' bönachi izá'a.

47 Lësca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rnna didza' na' bë'ë Dios ca naca queë' Cristo, gunné':

Nuzóa' Li' para gacu' bení' quégaca bönachi izá'a,

en gacu' Nu usólá bönachi idútë yödzölió.

48 Cate' bila'yöni bönachi izá'a nacua' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú.

49 Caní guca, guzë xtídzë'ë Xanru', ate' bila'yöni bönachi yúgu'të yödzö nacua' luyú ni'.

⁵⁰ Ní'irō bōnni' judío biti' ta'yéajlë'è na' gula'gú'u yöl-lë'è yugu' bōnni' lo que yödzo ni' para cabí ila'lé'enë' dxi'a Pablo, en Bernabé. Lësca' caní gula'gú'u yöl-lë'è nigula lo ta'yéaj ládxi'nu Dios. Caní guca, gulunë' ga gula'bía ládxi'gaquië' Pablo, en Bernabé, ate' bulu'láguë' chopë' ni ní'ilō lu xiyúgaquië'.

⁵¹ Ní'irō Pablo, en Bernabé bulu'quinnajë' yu bëchtō da' la' lábagaquië' le rulu'í nagá'ana xíguia' nabága'gaca bōnachi lu yödzo na', ate' yójáquië' lu yödzo Iconio.

⁵² Bulu'dzéjanë' bōnni' yödzo Antioquia na', bōnni' ta'yéajlë'è Xanru', ate' guzóalenë' Dios Bó' Lá'ayi légaquië'.

14

Le gulunë' Pablo, en Bernabé lu yödzo Iconio

¹ Cate' bila'dxinë' Pablo, en Bernabé yödzo Iconio, gula'yú'è tsözxón lu yu'u ga tu'dubë' bōnni' judío, en tu'sédë' queë' Dios, ate' gulu'è didza' ni'. Caní guca, zían bōnachi judío, enca' zían bōnachi izá'a gula'yéajlë' Cristo.

² Ní'irō bōnni' judío biti' ta'yéajlë'è gula'gú'u yöl-lë'è bal-lë' bōnni' izá'a, para cabí ila'lé'enë' dxi'a böchi'ru' ta'yéajlë'è Cristo.

³ Tu' gula'yéajlë' bōnachi zían na' Cristo, gula'cu'è Pablo, en Bernabé ni' zían dza, ate' lu yöl-la' rugu ladxí' gulu'è xtídzë'è Dios, tu' tu'zxóni ládxi'gaquië' Xanru'. Lë cazë' Xanru' bulu'è naca idütë li didza' tu'è ca naca le ruzá' ládxe'è Dios quégaca bōnachi, tu' bë'è légaquië' lataj gulunë' yugu' le taca bë', en le tun ga tu'bani bōnachi.

⁴ Ní'irō bōnachi lu yödzo na' bila'rúaj choplō. Bal-lë' gula'dë'è bōnni' judío biti' ta'yéajlë'è, ate' ia'bal-lë' gula'dë'è Bernabé, en Pablo, gubáz na' nasól-lë'è Cristo.

⁵ Ní'irō bōnni' judío biti' ta'yéajlë'è na', en yugu' bōnni' izá'a ni' gulunë' tuz bōnni' ta'nná bé'enë' légaquië', ate' bulu'dubë' para ilu'è dö' quégaquië' gubáz na' nasól-lë'è Cristo, en ulu'ladxë' légaquië' guiöj.

⁶ Cate' téquibe'enë' Pablo, en Bernabé lë ni, bulu'zaxúnajë' ni', yójáquië' yödzo Listra, en Derbe luyú Licaonia, ate' gula'dödë' yúgu'të yödzo'do' idú sibi'lō ni',

⁷ gapa ni' gulunë' libán que didza' dxi'a ca naca queë' Cristo.

Tu'ladxë' Pablo guiöj lu yödzo Listra

⁸ Zoë' tu bōnni' lu yödzo Listra biti' raca sé'ë. Ró'ösë' ni' tu' cabí rizë'è cate' ni' gultjë', en catu caz guzë'e ni'ë.

⁹ Bōnni' ni ruzë náquië' didza' ru'è Pablo. Pablo buyúë' lë', en gúquibe'enë' réajlë'è Cristo para huóáquië'.

¹⁰ Ní'irō Pablo bë'è zidzaj didza', en rë' lë':

—Guzuí.

La' guxítí'të' bōnni' na', en guzë'e ni'ë.

¹¹ Cate' yugu' bōnni' Listra bila'lé'enë' lë na' benë' Pablo, gula'sí lógaquië' tu'è zidzaj didza' lu didza' tu'è bōnni' Licaonia na', ta'nnë':

—¡Yugu' dios bōnni' ni! ¡Nuhuötjagaquië' ga zóaru', en tu'luf'í cúngaquië' ca nácagaquië' bōnni'!

¹² Gula'nnë' Bernabé na' náquië' Júpiter, ca lë' dios lo quégaquië', ate' gula'nnë' náquië' Pablo Mercurio, ia'tú dios quégaquië'. Caní gula'nnë' tu' ru'è didza' Pablo ca na' ta'nnë' runë' Mercurio na'.

¹³ Zoa yudo' que Júpiter ga ni' nacu'ë, cuita nōza ga ni' ta'yaza bōnachi lu yödzo na'. La' bidxintë' bixúz que Júpiter na', nachë'è-ba' yugu' bëdxi, en nu'ë

ca' yugu' bregui' yøj, ate' dzágagaca bönachi zían lë'. Gulë'ënnë' ilütië'-ba' bëdxi na' lógaquië' Pablo, en Bernabé para ila'yéaj ládxi'gaquië' légaquië' ca tunë' quégaca dios quégaquië'.

14 Cate' Bernabé, en Pablo, gubáz na' nasöl-lë'ë Cristo, gulë'quibe'enë' lë ni, gula'chözë' lari' nácugaquië'. Tu'hu'ininë' tu' tunë' bönni' ni le cabí ralla' ilunë', ate' gula'xíti'ë, en yøjcu'ë gatsaj láhui'lö bönachi zían na', en gulu'ë zidzaj didza', të' légaquië':

15 —¡Libí'ili' bönachi! ¿Bizx que runli' caní? Lësca' bönni' ca libí'ili' nácatu', en rigu'xjöi'itu' libí'ili' lë ni caz ral-la' ucá'anali', le cabí nácate', para guéquili' queë' Dios ban. Dios ni benë' lúzxiba, en yödzülió, en nísado', en yúgu'të le nacua' tu tu lataj na'.

16 Yugu' iz chigula'dödi, gulún yúgu'të bönachi ca rnnasö que queëguequi, ate' Dios biti' buzáguë'ë xinözguequi,

17 pero benë' ga gulaca le tun ba nali' queë', yugu' le nácagaca dxi'a benë' quégaquië'. Risöl-lë'ë queëru' nisa guió, en runë' ga ta'yán le rázaru'. Ruzölaj rudzé'enë' rë'u, en runë' ga rudzeja ládxi'ru'.

18 Sal-la' Bernabé, en Pablo gulë' légaquië' caní, cánnisö bila'déli'në' bulu'záguë'ë xinözguequi bönachi zían na', para cabí ilütië'-ba' bëdxi na' lógaquië'.

19 Ní'irö bal-lë' bönni' judío biti' ta'yéajlë'ë, narúajgaquië' Antioquia, en Iconio, bila'dxinë' ni', ate' gula'gú'u yöl-lë'ë bönachi zían na'. Ní'irö yúgu'të' bulu'ladxë' Pablo guió, en gula'ayöjë' lë' ní'ilö ra' yödzo na', tu' téquinë' chinátie'.

20 Ní'irö bulu'dubë' yugu' bönni' ta'yéajlë'ë Cristo idú gásibi'lö ga dë' Pablo. Guyasë' lë', en buázie' lu yödzo na'. Cate' za' reni' ia'tú dza, burúajlenë' Bernabé, yöjajúie' yödzo Derbe.

21 Lu yödzo ni' gulunë' libán que didza' dxi'a ca naca queë' Jesucristo, ate' bönachi zían ni' gula'yéajlë' Cristo. Gudödi ni' yøjhuójgaquië' Listra, en Iconio, en Antioquia.

22 Cate' gula'dödë' Bernabé, en Pablo yugu' yödzo na', bulu'tipë' ládxi'gaquië' bönni' ni' ta'yéajlë'ë Cristo, en bulu'së'ë ládxi'gaquië' ulu'gá'anë' tsutsu ca na' ta'yéajlë'ë Lë'. Gulë' légaquië':

—Rë'u tsaza cazaru' ga rinná bë'ë Dios, run bayudxi quí'i sáca'ru' zían le gaca queëru'.

23 Bulu'cu'ë yugu' bönni' gula ilún chi'ë bönachi queë' Cristo tu cö' huéaj bönachi ni' queë' Cristo. Cate' chigulu'ilenë' Dios didza', en gulunë' gubasa, ní'irö gula'gu'ë légaquië' lu në'ë Xanru', Nu na' ta'yéajlë'ë.

Pablo, en Bernabé tu'dxinë' Antioquia luyú Siria

24 Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia.

25 Budxi gulunë' libán que xtídzë'ë Cristo lu yödzo Perge, yöjajúie' yödzo Atalia.

26 Bulu'zë'ë ni', ate' gula'benë' tu lë'e barco, en bulu'dxinë' yödzo Antioquia, ga na' nacu'ë bönni' queë' Cristo, bönni' na' gula'söl-lë'ë légaquië' tsöjéngaquië' libán, cate' ni' gula'gu'ë légaquië' lu në'ë Dios, Nu na' ruzá' ládxi' quégaquië' ilunë' xichinë', dxin na' chibudxi gulunë'.

27 Cate' ni' bulu'dxinë' Antioquia, bulu'dubi bönachi queë' Cristo nacua' ni'. Ní'irö Pablo, en Bernabé bulu'siyönnë' légaquië' ca nácagaca le zxön benë' Dios

lu ná'agaquië', enca' ca benë' Dios, bē'ë yugu' bönachi izá'a lataj ta'yéajlë' ca' Lë'.

²⁸ Pablo, en Bernabé bulu'gá'analenë' bönachi ni' ta'yéajlë' Cristo zían dza.

15

Tu'dubë' huen dxin queë' Cristo lu yödzo Jerusalén

¹ Ní'irö bal-lë' bönni' narúajgaquië' luyú Judea bila'dxinë' yödzo Antioquia, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipëla'li' ca nalëbitu' runtu' ca na' gunná bē'ë Moisés, biti' gaca uláli'.

² Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' böchi'ru' ni', para tsójáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para ilu'ilenë' légaquië' didza' ca naca lë ni raca, tu'sédinë' bönni' na' bönachi le nachixi.

³ Ní'irö yugu' bönni' queë' Cristo nacu'ë Antioquia bulu'gu'ë légaquië' nöza, ate' gula'dödë' lu xiyú yödzo Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huöáquië' bönni' izá'a queë' Cristo. Lë ni ben ga bulu'dzéjanë' yúgu'të böchi' luzá'aru' ni'.

⁴ Cate' bila'dxinë' Pablo, en Bernabé lu yödzo Jerusalén, yugu' bönni' queë' Cristo nacu'ë ni', enca' yugu' gubáz nasöl-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'.

⁵ Ní'irö gula'zuinë' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipëla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rnaa bē' xibá queë' Moisés.

⁶ Ní'irö bulu'dubë' gubáz nasöl-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca.

⁷ Gudödi gulu'ë zían didza', guzuinë' Pedro, en gudxë' légaquië':

—Libi'ili', böcha'a. Nöz quézili' ca guca dza ni'te, Dios gurö cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo.

⁸ Dios, Nu nunbë' caz le yu'u icja ládxi'do'gaca bönachi, buzóë' le naca bē' runë' légaquië' bal, gusöl-lë'ë Dios Bö' Lá'ayi quégaquië', ca na' gusöl-lë'ë Lë' queëru'.

⁹ Biti' butsé'ë ca benë' quégaquië', en queëru', en lësca' bunë' dxi'a icja ládxi'do'gaquië' tu' ta'yéajlë'ë Cristo.

¹⁰ Na'a, ¿bizx que run leli'-në' Dios, rusbága'li' yua' xiyéngaca böchi' luzá'aru'? Yua' ni, le naca le ta'nná bē' xibá queë' Moisés, biti' guca guá'aru' rë'u, en biti' guca ilu'ë xuz xtó'oru' le.

¹¹ Rë'u ni, réajlë'ëru' nuláru' ni'a que le buzá' ládxi'ë Xanru' Jesús queëru', en ca na' nuláru' rë'u, ulu'lë' ca' légaquië'.

¹² Cate' budxi bē'ë Pedro didza' ni, yúgu'të' gula'cu'ë dxisö, ate' bulu'zë' nágagaquië' didza' gulu'ë Bernabé, en Pablo. Bulu'siyönnë' légaquië' yugu' le taca bē', en le tun ga tu'bani bönachi, yugu' le benë' Dios lu ná'agaquië' ga naca' bönachi izá'a.

¹³ Cate' Bernabé, en Pablo budxi gulu'ë didza' ni, ubi'ë didza' Jacobo, gunné':

—Libi'ili', böcha'a. Buli'zë' nágali' le guía' libi'ili'.

14 Simón Pedro chigudíxjöi' i quézinë' rë'u ca benë' Dios, bulu'e lahui yöl-la' huáca queë' le zí'alö luzuí lógaca yugu' bönachi izá'a para bubéajë' quez queë' bönachi nútsa' gaca ládjagaquië'.

15 Ca naca lë ni röjlözgaca xtídza' gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rnna:

16 Dza tödi lë ni huóda', en uchisa' Nu inná bë', bönni' na' tsázië' xilatjë' David.

Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bë'ë David

17 para ulu'guilaj ia'zica' rö bönachi Xanru'.

Ulu'guilaj bönachi izá'a Lë',

ate' si' láguequi: Bönachi Queë' Dios.

18 Caní rnnë' Xanru',

Nu na' dza ni'te ben ga naca bë' yúgu'të lë ni.

19 'Que lë ni na' runi neda' biti' ral-la' gun níguiru' bönachi izá'a, nupa tu'huóaca queë' Dios.

20 Ral-la' uzúajru' lu guichi quégaquië' ulu'cá'anë' yugu' le biti' ral-la' ilahuë', le nadödi lógaca budó' guiöj budó' yaga, en cabí ilunë' le ruá' dö', en cabí ilahuë' xipéla'gacaba' böa' guixi' biti' narúaj-gácaba' rön, en cabí ilahuë' xichönba' biti'tës böa' guixi'.

21 Dza ni'te nacuá' yúgu'të yödzo nupa tun libán lu yu'u gapa tu'dubë' bönni' judío, en tu'sedë' queë' Dios. Tunë' libán ni' que le buzúajë' lu guichi Moisés. Tu'laba cazë' le yugu' dza lá'ayi.

22 Ní'rö' gula'yaza ládxi'gaquië' gubáz nasól-lë'ë Cristo, en bönni' gula tapa chi'ë, en yúgu'të bönachi queë' Cristo, ila'böë' bal-lë' bönni' ládjagaquië', en ila'sól-lë'ë légaquië' Antioquía. Tsöjácalenë' Pablo, en Bernabé. Chopë' na' gula'böë', légaquië' Judas, zoa ia'tú lë' Barsabás, enca' Silas. Nácagaquië' bönni' lo ládjagaquië' böchi'ru' ni'.

23 Bulu'zúajë' lu guichi le bulu'dödë' lu ná'agaquië' ilu'ë, le rnna caní:

"Netu', gubáz nasól-lë'ë Cristo, en bönni' gula tun chi'ë, en yugu' böchi'ru', rugápatu' libí'ili' Dios, böchi'tu', nácali' bönachi izá'a zóali' Antioquía, en yugu' yödzo luyú Siria, en Cilicia.

24 Biyónitu' ca tun bal-la bönachi bila'rúaj ga zóatu', nupa na' biti' nasól-la'tu'. Dutsá'agaquië' libí'ili' len le ta'nnë', en tu'bequi böniga icja ládxi'do'oli', tu' ta'nná bë'ë irugu lu xipéla'li', en gunli' ca rinná bë' xibá queë' Moisés.

25 Que lë ni na' guyaza ládxi'tu' cate' chibén tuz xtídza'tu', gurötu' chopë' bönni', nupa isól-la'tu' para uduyúgaquië' libí'ili'. Guídlengaquië' Bernabé, en Pablo, nupa na' nadxi'iru'.

26 Chiyöjáquië' Bernabé, en Pablo gapa guzóa bönadxi ilátië' tu' nadxi'iguequinë' Xanru' Jesucristo.

27 Caní naca, risól-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni.

28 Dios Bö' Lá'ayi bulu'inë' netu' le raza ládxi'ë, en lësca' caní raza ládxi'tu' netu', biti' usubága'rötu' libí'ili' yua', le naca le rinná bë' xibá queë' Moisés, pero yugu' lë niso' run bayudxi gunli':

29 Biti' gáguli' le nadödi lógaca budó' guiöj budó' yaga.

Biti' gáguli' rön.

Biti' gáguli' xipéla'gacaba' böa' guixi' biti' narúaj-gácaba' rön.
 Biti' gunli' le ruá' dö'.

Channö gun chi'i cuinli' para gunli' ca rnna yugu' lê ni, gunli' dxi'a."

³⁰ Caní guca, yugu' bönni' na' nasól-la'gaquië' bila'dxinë' Antioquía. Bulu'tubë' bönachi queë' Cristo nacua' ni', ate' gula'gu'e' guichi na' lu ná'agaquië'.

³¹ Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhuë tsahui' légaquië'.

³² Tu' nácagaquië' Judas, en Silas bönni' tu'ë didza' uláz queë' Dios bulu'huë tsáhuë'ë légaquië', en bulu'tipë' ládxi'gaquië' böchi'ru' ni', bulu'gunë' dxin didza' zían le gulu'ilenë' légaquië'.

³³ Gudödi bulu'dzënë' Judas, en Silas ni' nababa dza, ní'irö böchi'ru' ni' bulu'zenë' légaquië' dxi'a didza' para tsöjhuöajgaquië' Jerusalén ga nacu'ë bönni' gula'sól-lë'ë légaquië'.

³⁴ Guyaza ládxë'ë Silas bugá'anë' Antioquía.

³⁵ Bulu'gá'anë' ca' Pablo, en Bernabé Antioquía na', ate' bulu'sedinë' bönachi, en gulunë' libán que xtídzë'ë Xanru'. Lësca' caní gulún zíanrö ca' bönachi.

Risí lahuë' Pablo röjenë' libán le buropi luzuí

³⁶ Gudödi nababa dza Pablo gudxë' Bernabé:

—Uyéajru' leyúbölö tsöjyúgaru'-në' böchi'ru' nacu'ë yúgu'të yödzo gapa chiyöjenru' libán que xtídzë'ë Xanru', para ilé'eru' nacxi raca quégaquië'.

³⁷ Gú'unnë' Bernabé ila'chë'ë-bi' bi'i Juan Marcos, tséajlenbi' légaquië',

³⁸ pero biti' guyaza ládxë'ë Pablo ila'chë'ë-bi' tséajlenbi' légaquië' tu' bulá'aleni' légaquië' luyú Panfilia, en bitirö yöjénlenbi' légaquië' dxin queë' Xanru'.

³⁹ Biti' guca tuz xtídzza'gaquië' Bernabé, en Pablo ga bidxintë bulu'lá'alenë' tuë' ia'tué'. Bernabé guchë'ë-bi' bi'i Marcos, ate' gula'benë' tu lë'e barco, yöjáquië' luyú Chipre.

⁴⁰ Pablo guröë' Silas para tséajlenë' lë'. Ní'irö yugu' böchi'ru' gula'gu'ë légaquië' lu në'ë Xanru', en gula'nábinë' Lë' uzá' ládxë'ë quégaquië', ate' bulu'zë'ë Pablo, en Silas ni'.

⁴¹ Gula'dödë' yugu' yödzo luyú Siria, en Cilicia, ate' bulu'tipë' ládxi'gaca bönachi queë' Cristo nacua' ni'.

16

Bi'i Timoteo runbi' tsözxön Pablo, en Silas

¹ Gudödi ni' bila'dxinë' Pablo, en Silas yödzo Derbe, en yödzo Listra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' xzí'ininu tu nigula judío réajlë'ënu Cristo, pero xúzibi' biti' náquië' judío.

² Yugu' böchi'ru' nacu'ë Listra, en Iconio tunë' ba nalí queëbi', ta'nnë' runbi' le naca dxi'a.

³ Gú'unnë' Pablo tséajlenbi' bi'i ni lë', ate' gudélë'ë-bi', en guchúguië' lu xipéla'bi' ca tun bönachi judío. Caní benë' para cabí ila'nnë' queëbi' bönni' judío nacu'ë yugu' yödzo ni', tu' nöziguequinë' yúgu'të' xúzibi' biti' náquië' judío.

⁴ Cate' Pablo, en nupa dzágagaca lë' gula'dödë' gapa nacua' yödzo ni', tu tu yödzo na' bulu'dödë' lu ná'agaquië' yugu' böchi'ru' nacu'ë gapa ni' yugu' xibá na' gulunë' gubáz nasól-lë'ë Cristo, en bönni' gula' tapa chi'ë bönachi queë',

nacu'ë Jerusalén. Bulu'dödë' yugu' xibá ni lu ná'agaquië' para ilunë' ca rinná bë' xibá na'.

⁵ Caní guca, bönachi yúgu'të cö' bönachi queë' Cristo bila'dipa ládx'i'gaca ca naca le réajlë'ëru' Cristo, ate' gula'yán tu tu dza.

Tu bönni' Macedonia ruldzë' Pablo lu yëla bëchigal

⁶ Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzágüë'ë Dios Bö' Lá'ayi xinözgaquië', para cabí ilunë' libán que xtídzë'ë Xanru' luyú Asia.

⁷ Cate' bila'dxinë' luyú Misia, gulë'ënnë' tsöjäquië' luyú Bitinia, pero Dios Bö' Lá'ayi, Nu risöl-lë'ë Jesús queëru', biti' bë'ë légaquië' lataj.

⁸ Ní'irö gula'dödë' gala' ga dë Misia, ate' yöjäquië' lu yödzö Troas. Neda' Lucas, ruzúaja' lu guichi lë ni, guzöa' Troas na', ate' yöjsóalena'-në' Pablo.

⁹ Lu yödzö ní' Dios buluf'inë' Pablo tu le bilé'enë' lu yëla bëchigal. Tu bönni' Macedonia buluf'i lahuë' lë', zuinë', en ráta'yue' lahuë' Pablo, rnnë': "Gudödi ladztu', lu xiyú Macedonia, en gúcalen netu'."

¹⁰ Cate' bilé'enë' Pablo lë ni, lë na' buluf'i lahui lë', la' bë' ládx'i'tëtu' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lógaca bönachi luyú ni'.

Le gulunë' Pablo, en Silas lu yödzö Filipos

¹¹ Ní'irö gurentu' lë'e barco, en buzá'atu' Troas. Gudöditu' lirá ga bidxintu' yödzö Samotracia, ate' gudödi ia'tú dza bidxintu' yödzö Neápolis.

¹² Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsölá'a ni' luyú Macedonia. Lu yödzö ni' yugu' bönni' Roma nucu'agaquië' bönachi uládz queégaquië'. Lu yödzö nisö guzóatu' nababa dza.

¹³ Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Dios. Gurö'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'.

¹⁴ Nútsa'nu ladjagacanu Lídia, tu nigula Tiatíra. Nácanu nigula rúti'nu lari' xiná chul-la le nazáca'da'. Reaj ládx'i'nu Dios, ate' buzë náganu didza' ru'ë Pablo, ate' Xanru' gúcalenë'-nu para guzxi' lu ná'anu didza' na' bë'ë.

¹⁵ Ní'irö bidílanu lënu nisa, ate' gula'dila ca' nisa bönachi nacua' lídxinu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

¹⁶ Ia'tú le guca tu dza tsanni ni' zéajtu' ga na' ruldztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinnë yá'abi'. Len yöla' rinnë ya'a queëbi' runbi' ga ta'zídë'ë dumí yugu' bönni' xanbi'.

¹⁷ Bi'i nigula ni sudunóbi'-në' Pablo, en netu', ru'i'ibi' zidzaj didza', rnnabi': —¡Yugu' bönni' ni tunë' xichinë' Dios nayëpisëtërë'! ¡Tu'siyönnë' libí'ili' naca gaca uláli'!

¹⁸ Caní benbi' zían dza. Cate' bíti'rö guyaza ládxë'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. ¡Burúaj icja ládx'i'do'obi' bi'i nigula ni!

La' ní'isö burúajtë bö' na'.

¹⁹ Cate' bila'lé'enë' xanbi' chiburúaj bö' na' run ga rinnë yá'abi', en bíti'rö naca löza ila'zi'ë dumí ni'a queëbi', que lë ni na' gula'zönë' Pablo, en Silas, ate' gula'chë'ë légaquië' lógaquië' bönni' yúlalui', nudúbigaquië' ga naca lu yë'ëyi.

20 Bulu'cu'ë légaquië' lógaquië' bönni' yúlahui' na', ta'nnë':

—Yugu' bönni' ni nácaqaquië' judío, en tunë' ga tu'tsatsa bönachi yödö ni.

21 Tu'sédinë' le cabí ral-la' si' lu ná'aru', en biti' ral-la' gunru', tu' nabábaru' Roma.

22 Ní'irö bönachi zían ni' gula'dá'baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácuqaquië' Pablo, en Silas, ate' gula'guinë' légaquië' gubá'ayi.

23 Gudödi gula'guinë'ë légaquië', gula'gu'ë légaquië' lidxi guié. Gula'nná bé'enë' bönni' rusayjë' lidxi guié na' gun chí'idë'ë légaquië'.

24 Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guié na', en gulu'ë ní'agaquië' yeru yaga ta'zön ní'agaquië'.

25 Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guié na'.

26 Ní'irö tsárido'os gudödi budó' zxu' bach. Caní guca ga bidxintë guzxizi xilibi zö'ö lidxi guié na', ate' la' gula'yálatë yúgu'të gapa nu riyaza, ate' bulu'huédxi ca' yugu' du guié nága'gaca bönni' nadzúngaquië' ni'.

27 Bubané' bönni' na' rusayjë' lidxi guié. Cate' bilé'enë' nayálgagaca gapa nu riyaza lidxi guié na', gulecjë' guié tuchi' queë' para guti cuinë', tu' réquinë' chibulu'zxúnnajë' bönni' nadzúngaquië' lidxi guié na'.

28 Ní'irö Pablo zidzaj bulidzë' lë', gunnë':

—¡Biti' bi gúni cuinu', tu' zóatu' ni yúgu'tëtu'!

29 Ní'irö bönni' na' gunabë' guí, ate' gudá'atë' lu yu'u lidxi guié na'. Guzxízidë' lu yöl-la' radxi, ate' biyéchuë' xiní'agaquië' Pablo, en Silas.

30 Cate' chinubéajë' légaquië' lidxi guié na', gudxë' légaquië':

—Libi'ili', bönni', ¿bizxi ral-la' guna' para ulá'?

31 Légaquië' të' lë':

—Guyéajlë'ë Xanru' Jesucristo, ate' uló' li', en lësca caní ulu'lágaca bönachi nacua' lidxu'.

32 Gulu'ílenë' lë' didza' ca naca xtídzë'ë Xanru', dzágagaca lë' yúgu'të bönachi nacua' lidxë'.

33 La' ná'asö, ni' naca chi'i dzó'ölö la' guchë'të' légaquië', ate' yójtibë' légaquië' ga dxíagaquië' huë'. Gudödi ni', la' bidílatë' nisa, ate' gula'dila ca' nisa yúgu'të bönachi nacua' lidxë'.

34 Ní'irö guchë'ë légaquië' lidxë', en bë'ë le gulahuë'. Rudzëjanë' lë', en tu'dzeja ca' yúgu'të bönachi nacua' lidxë' tu' ta'yéajlë'ë Dios.

35 Cate' za' rení' dza na', yugu' bönni' yúlahui' gula'sól-lë'ë ni'a ná'agaquië', ate' gulë' bönni' na' rusayjë' lidxi guié:

—Busán-gáquië' bönni' na'.

36 Ní'irö bönni' na' rusayjë' lidxi guié gudíxjöi'inë' Pablo didza' ni, gunnë':

—Gula'sól-lë'ë bönni' yúlahui' didza' usana' libí'ili'. Na'a, guli'rúaj, en buli'huóaj dxí'ado' ga rizóali'.

37 Ní'irö birúajë' Pablo, en gudxë' yugu' ni'a ná'agaquië' bönni' yúlahui' na', gunnë':

—Chigula'guinë' netu' lógaca bönachi sal-la' biti' narúguini queëtu' ca rinná bë' xibá, en gula'gu'ë netu' lidxi guié, ate' netu' ni nabábatu' Roma. ¿Naru' tu'santsë' netu' bagáchi'sö? ¡Biti' ca' gaca! ¡llídigarë' légaquië' udusángaqië' netu'!

³⁸ Yöjhuöjgaquië' ni'a ná'agaquië' bönni' yúlalui' na', en bulu'siyönnë' yugu' bönni' yúlalui' didza' ni, ate' légaquië' guládxinë' cate' bila'yönnë' nabábagaquië' Pablo, en Silas Roma.

³⁹ Cate' bila'dxinë' lidxi guié ni', gulá'tyuë' lógaquië' Pablo, en Silas cabi ulu'subáguë' légaquië' xíguia'. Ní'irö gula'béajë' légaquië' lidxi guié na', en gulá'tyuë' lógaquië' ulu'rúajë' yödzö na'.

⁴⁰ Ní'irö bila'rúajë' Pablo, en Silas lidxi guié na', ate' gula'yázië' lídxinu Lidia. Cate' chibila'lé'enë' böchi'ru' nacu'ë ni', bulu'chízië' didza' icja nágagaquië', en la' bulu'zá'atë' ni'.

17

Yugu' bönachi Tesalónica tunë' dzatsa

¹ Gula'dödë' Pablo, en Silas lu yödzö Anfípolis, en lu yödzö Apolonia, ate' bila'dxinë' lu yödzö Tesalónica, ga ni' zoa tu yu'u ga tu'dubë' bönni' judío, en tu'sédë' queë' Dios.

² Bugá'anë' Pablo ni' idú galaj dza, ate' ca run cazë', guyijë' ga zoa yu'u na' cate' naca dza lá'ayi quégaquië' bönni' judío, ate' bé'lenë' légaquië' didza'.

³ Buchila lá'anë', en buluí'inë' légaquië' rusëdi le nazúaj lu guichi lá'ayi run bayudxi qui'i sáquë'ë Cristo, Bönni' na' tunë' löza bönni' judío udusölë' légaquië', ate' tödi gátie' ubanë' lu yöl-la' guti. Ní'irö Pablo gudxë' légaquië':

—¡Caní guca queë' bönni' na' lë' Jesús, runa' libán queë' ga ni zóali! ¡Bönni' ni náquië' Cristo!

⁴ Ní'irö bal-lë' gula'yéajlë'ë Cristo, ate' gulunë' tsözxón Pablo, en Silas. Lësca' caní zían bönni' izá'a, bönni' ta'yéaj ládxi'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo.

⁵ Ní'irö yugu' bönni' judío biti' ta'yéajlë'ë, lu yöl-la' ruzxë'e quégaquië' Pablo, bulu'tubë' yugu' bönni' biti' nácagaquië' tsahui', bönni' ta'dasë' ca'. Cate' chibulu'tubë' bönachi zían, gulunë' ga gulún dzatsa idú lu yödzö na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa.

⁶ Cate' biti' bulu'dzölinë' Pablo, en Silas, gula'béajë' Jasón, en ia'zica'rë' böchi'ru' nacu'ë ni', ate' gula'ché'ë légaquië' lógaquië' bönni' yúlalui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi iduté yödzölió chibila'dxinë' ca' ni.

⁷ Jasón ni gulu'ë légaquië' lidxë'. Yúgu'të bönni' ni ta'dá'baguë'ë xibá queë' César, bönni' rinná bé'enë' rë'u, ta'nnë': “Zoë' ia'túë' bönni' rinná bé'ë, lë' Jesús.”

⁸ Cate' bila'yönnë' yugu' bönni' lu yödzö, en yugu' bönni' yúlalui' na' lë ni, gula'bö'ë böniga.

⁹ Ní'irö, gudödi gula'zi'ë bönni' yúlalui' dumí le bulu'cá'anagarë' Jasón, en ia'zica'rë' bönni' na', bulu'sanë' légaquië'.

Le gulunë' Pablo, en Silas lu yödzö Berea

¹⁰ Ní'irö yugu' böchi'ru' ni' la' gula'söl-la'të' Pablo, en Silas, ni' naca chi'i dzö'ölö, ate' sójáquië' yödzö Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sédë' queë' Dios.

¹¹ Gulácarë' tsahui' bönni' ni ca bönni' nacu'ë Tesalónica, tu' gula'zif lu ná'agaquië' xtídzë'ë Xanru' idú ládxi'gaquië'. Yugu' dza bulu'labë' dxi'a le nazúaj lu guichi lá'ayi, para iléquibe'enë' channö nácatë lë na' rnnë' Pablo.

12 Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo.

13 Ní'irö cate' guléquibe'enë' bönni' judío nacu'ë Tesalónica, lësca' riguixjö'ë Pablo xtídzë'ë Dios lu yödzo Berea, yójáquië' ni', en gulunë' ca' ni' ga gulún dzatsa bönachi zían.

14 Ní'irö yugu' böchi'ru' ni' la' gula'söl-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzo Berea.

15 Yugu' bönni' Berea na' gula'chë'ë Pablo lu yödzo Atenas. Ní'irö la' yøjhuójpgacatë' lu yödzo Berea, tu'ú'ë xtídzë'ë Pablo, para ilë' Silas, en bi'i Timoteo, tsójacatë' ga ni' zoë' Pablo.

Le benë' Pablo lu yödzo Atenas

16 Tsanni ni' zoë' Pablo ribözë' Silas, en bi'i Timoteo, lu yödzo Atenas, ruhu'ini ládxë'ë tu' rilë'enë' ta'yéaj ládxiga'gaca yúgu'të bönachi yödzo na' yugu' budó' guiöj budó' yaga.

17 Que lë ni na' bé'lenë' bönni' judío, en bönni' ta'yéaj ládxiga'gacüë' Dios didza' ga naca lu yu'u ga tu'dubë' tu'sëdë' queë' Dios. Yugu' dza bé'lenë' nupa ta'dá lu yë'eyi didza' ca naca xtídzë'ë Cristo.

18 Bal-lë' bönni' dá'gacüë' le tu'sëdinë' bönni' epicúreo, en le tu'sëdinë' bönni' estoico gulu'ilenë' Pablo didza'. Bal-lë' gula'nnë':

—¿Bizxi ré'ënitënë' innë' bönni' huë' didza' ni'?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán.

19 Ní'irö gula'guélë'ë në'ë Pablo, en gula'chë'ë lë' lu gu'a ga tu'dubë' tu'ë didza', nazí'i le Areópago, ta'nnë':

—¿Naru' huácatsö yönitu' didza' cubi ni rusiyönnu' netu'?

20 Rusiyönnu' netu' le tun ga rubánitu'. Ré'ënitü' inözitu' bizxi rna didza' ni ru'u.

21 Biti'rö ta'yaza ládxiga'gacüë' ilunë' bönni' Atenas na', en bönni' izá'a nacu'ë ni', pero ila'yónisinë', en iluf'isë' didza' tu le cubi.

22 Ní'irö guzuinë' Pablo gatsaj láchui'lö lö'a Areópago na', gunnë':

—Bönni' Atenas, yúgu'të le rilé'eda' naca bë' reaj ládxida'ali' yugu' dios queëli'.

23 Cate' gudöda' lu yödzo, en buyúgaca' yugu' le reaj ládxili', yójxáca'a ca' tu nichu ga ni' nazúaj le rna caní: “Tu Dios, Cuntu Nu Nunbë' Lë'.” Dios na' reaj ládxili'-në' sal-la' biti' núnbë'ëli'-në', Dios ni rna' libán queë' loli'.

24 ¡Dios ni benë' yödzölió, en yúgu'të le nacua' yödzölió ni! ¡Náquië' Xani yehua' yubá, en Xani luyú ni, en biti' ca' zoë' tu yudo' núngaca bönachi!

25 Biti' bi riyadzaj queë' le gaca ulu'nödzej bönachi, tu' runödzej' Lë cazë' quégaca yúgu'të bönachi yöl-la' na'bán, en yúgu'të le riquíniru'.

26 Lë' benë' tuzë' bönni' ga zá'gaca yúgu'të bönachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'.

27 Dios bucu'ë légaquië' para ulu'guiljë' Lë', channó nácati'tës ila'dzölinë' Lë' sal-la' ila'gán ila'zönsë'. Caní raca sal-la' biti' zoë' zi'tu' ga zóaru' tu turu'.

28 Lë cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' bönni' nútsa'gacüë' libi'ili', nupa bulu'zúaj le do' rúl-lali', le ta'nná: “Di'a dza queë' Dios nácaru'.”

²⁹ Na'a, channö nácaru' di'a dza queé' Dios, biti' ral-la' innaru' náquié' Dios ca tu budó' guiöj budó' yaga, o tu le néquini oro, o plata, o guiöj, le núngaca bönachi ca naca tu le ta guínnajsö Ícaguequi.

³⁰ Dios budödë' cá'asó yugu' le gulunë' lu yöl-la' biti' réajni' i quégaquié' yugu' iz chigula' dödi, pero na'a rinná bé'enë' yúgu'të bönachi idütë yödzólió ulu'bí' i ládxí'gaca.

³¹ Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquié' lu në'ë Jesús, bönni' na' buzóa cazë Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

³² Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nnë':

—Yönniguetu' ia'tú lë ni ru'u didza' que.

³³ Ní'irö burúajë' Pablo gatsaj láhui'ló ga na' nacu'ë, söhuöjë'.

³⁴ Bal-lë' gula'yéajlë'ë Cristo, en gulunë' tsözxön Pablo. Nútsë'ë Dionisio, bönni' areópago, ladjagaquié', ate' nútsa'nu ca' ladjagaquié' nigula na' lënu Dámaris. Ia'bal-lë' na' gula'yéajlë'ë ca' Cristo.

18

Le benë' Pablo lu yödzö Corinto

¹ Gudödi guca lë ni, buzë'ë Pablo yödzö Atenas na', ate' guyijë' yödzö Corinto.

² Yöjxáquié' Aquilo, tu bönni' judío ni'. Guljë' bönni' ni luyú Ponto, en si' bidxíngazë' yödzö Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödzö Roma. Guyijë' Pablo ga nacu'ë Aquilo, en Priscila na'

³ tu' naca tuz dxin tunë' Aquilo, en Pablo. Bugá'analenë' légaquié', ate' tsözxön gulunë' dxin, tunë' yugu' yu'u guídido'.

⁴ Cate' nácagaca dza lá'ayi quégaquié' bönni' judío, razië' Pablo lu yu'u ga tu'dubë' tu'sédë' queë' Dios, ga ni' bë'lenë' légaquié' didza'. Gú'unnë' ulu'ínë' yugu' bönni' judío, en yugu' bönni' izá'a nacu'ë ni', naca idütë li le riguixjö'ë ca naca queë' Jesucristo.

⁵ Cate' bila'dxinë' Silas, en bí'i Timoteo ni', nuzá'agaquié' luyú Macedonia, nugui'ide'enë' Pablo, runë' libán que xtídzë'ë Dios, en runë' ba nali lógaquié' bönni' judío, rnnë':

—Jesús náquié' Cristo, Nu na' tunë' löza yugu' bönni' judío udusölë' légaquié'.

⁶ Cate' bönni' judío nacu'ë ni' gula'dá'báguë'ë xtídzë'ë, en gula'nnë' zi'ë que, ní'irö Pablo gudxibë' lari' nácuë' para ulu'ínë' légaquié' bí'ti'rö nabáguë'ë lë' ni'a quégaquié', ate' gudxë' légaquié':

—La' cuínsili' nabága'li' xíguia' que yöl-la' guti queéli', calëga neda' nabága'a le. Na'a, uyija' ga nacuá' bönachi izá'a.

⁷ Ní'irö burúajë' Pablo ni', en guyijë' lidxë' Justo, bönni' reaj ládxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sédë' queë' Dios.

⁸ Crispo, bönni' lo que yu'u ga na' tu'dubë' tu'sédë' queë' Dios guyéajlë'ë Xanru' Jesús, ate' dzágagaca lë' yúgu'të bönachi nacuá' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa.

⁹ Ní'irö Lë cazë' Xanru' gudxë' Pablo lu yëla bëchigal, gunnë':

—Biti' gádxinu', en biti' su' dxisö, quíxjö' u xtídz'a,

¹⁰ tu' zóalen caza' neda' li', ate' cuntu nu uzapa' në'e li' para guá' dö' quiu', tu' néquiquequi quia' bönachi zían lu yödzö ni.

11 Bugá'anë' Pablo ni' idú ca tu iz yu' gatsaj, ate' busédinë' légaquië' xtídzë'ë Dios.

12 Cate' bidxín dza rinná bè'ë Galión luyú Acaya, guláquië' tuz bönni' judío biti' ta'yéajlë', ate' gula'dá báguë'ë Pablo, en gula'chë'ë lë' ga rō'ë ruchi'a rusōrōë' Galión na'.

13 Gulë' Galión na':

—Bönni' ni rigú'u yōl-lë'ë bōnachi para ilunë' bal Dios, ca ridá'baga' xibá queëtu'.

14 Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzë naga' xtídzá'li' ca ral-la' guna',

15 pero channō naca didza' bizzaj que didza'sō, o que lágaca bōnachi, en ca naca xibá queëzili', guli'cá'ana tsahui' libí'isili', tu' cabí rē'ēnda' neda' gaca' nu uchi'a usōrō yugu' le caní.

16 Ní'irō Galión bulágu'ë légaquië' lu yu'u yúlahui'.

17 Ní'irō yúgu'të bönni' uládz na' gula'guélë'ë Sóstenes, bönni' lo que yu'u ga tu'dubë' bönni' judío, en tu'sédë' queë' Dios, ate' gula'guínë' lë' lō'a yúlahui', pero biti' bë' ládxe'ë Galión lë na' raca.

18 Pablo bugá'anë' lu yōdzō na' zían dza, ate' gudōdi busiyōnnë' bōchi'ru' nacu'ë ni' didza', guyijë' yōdzō Cencrea, ga ni' benë' yútusō icjë', tu' dë tu le nazí' lu nē'ë lahuë' Dios gunë'. Ní'irō gurenë' tu lë'e barco, para tsejë' luyú Siria, dzágagaquië' lë' Priscila, en Aquilo.

19 Cate' bila'dxinë' yōdzō Éfeso, Pablo bulá'alenë' légaquië' ni'. Guyázië' lu yu'u ga tu'dubë' bönni' judío, en tu'sédë' queë' Dios, ate' bë'lenë' nupa nacuá' ni' didza'.

20 Yugu' bönni' ni' guláta'yuë' lahuë' Pablo ugá'analënë' légaquië' ia'lati' xidzé, pero lë' biti' gu'unnë'.

21 Bë'lenë' légaquië' didza', gunnë':

—Run bayudxi soa' gapa' laní si' gaca Jerusalén, ate' leyúbölō huōda' ga ni zōali', channō guë'ēnnë' Dios.

Ní'irō gurenë' Pablo tu lë'e barco, en buzë'ë Éfeso na'.

Ridxinë' Pablo Antioquía, ate' risí lahuë' rōjenë' libán le bunní luzuí

22 Gudōdi bidxinë' Pablo yōdzō Cesarea, gurenë' guyijë' Jerusalén, ga ni' yōjyüë' bōnachi queë' Cristo, ate' ní'irō buzë'ë ni', en guyijë' Antioquía.

23 Gudōdi zoë' ni' nababa dza, buzë'ë ni', sa'yéajë' tu tu yōdzō luyú Galacia, en Frigia. Benë' tsutsu bōchi'ru' nacu'ë ni' ca naca le ta'yéajlë'ë Cristo.

Runë' libán Apolos lu yōdzō Éfeso

24 Tu dza ni' bidxinë' Apolos, tu bönni' judío lu yōdzō Éfeso. Guljë' bönni' ni lu yōdzō Alejandria, en nabé'ede'enë' ru'ë didza', en nazédadë'ë le nazúaj lu guichi lá'ayi.

25 Chinazëdë' bönni' ni ca naca le réajlë'ëru' Xanru'. Idú ládxe'ë bë'ë didza', en ca nácatë busédinë' bōnachi ca naca queë' Jesús, sal-la' núnbë'ë tuz le ruquíla bōnachi nisa ca benë' Juan.

26 Gusí lahuë' Apolos ru'ë didza' idú ládxe'ë ga naca lu yu'u ga tu'dubë' bönni' judío, en tu'sédë' queë' Dios. Cate' Priscila, en Aquilo bila'yōnnë' didza' ru'ë Apolos na', gula'chë'ë lë' quez, en bulu'zéajni'irōnë' lë' xibá queë' Dios.

27 Cate' gu'unnë' Apolos tōdë' luyú Acaya, bulu'tipë' ládxe'ë, ate' bulu'zúajë' tu lu guichi le tsōjuá'gaquië' quégaquië' bönni' teaj ládxe'ë Cristo luyú Acaya

na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zídë'ë xibé didza' ru'ë Apolos na', tu' ruzá' ládxë'ë Dios quégaquië'.

²⁸ Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guíchi lá'ayi, en bulu'e bönni' na' Jesús naca cazë' Cristo.

19

Le benë' Pablo lu yödzo Éfeso

¹ Tsanni ni' zoë' Apolos lu yödzo Corinto, gudödë' Pablo gapa nacuá' yödzo ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'.

² Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo?

Gulë' lë':

—Biti' nayónitu' channö zoë' Dios Bö' Lá'ayi.

³ Ní'irö Pablo gunábinë' légaquië', rnnë':

—¿Nacxi guca le bidí'ali' nisa?

Ta'nnë':

—Ca buquílë' Juan bönachi nisa.

⁴ Pablo gunné':

—Buquílë' Juan bönachi nisa, nupa ni' bulu'bí'i ládxi'guequi, ate' Juan caz gudxë' léguequi ral-la' ila'yéajlë' Bönni' na' si' zá'tëlë' ca lë', ate' Bönni' ni naquië' Jesús, Lë' Cristo.

⁵ Cate' yugu' bönni' na' bila'yönnë' didza' ni ru'ë Pablo, bila'dilë' nisa tu' chita'yéajlë'ë Xanru' Jesús.

⁶ Cate' guxóa në'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios.

⁷ Guláquië' bönni' ni idú chínnuë'.

⁸ Guzóë' Pablo idú ca tsonna beo' ni', ate' guyazië' lu yu'u ga tu'dubë' bönni' judío, en tu'sédë' queë' Dios, ate' lu yöl-la' rugu ladxí' benë' libán lógaquië'. Bë'lenë' légaquië' didza', en gú'unnë' ulu'ínë' légaquië' nácatë le riguixjö'ë ca rinná bë'ë Dios.

⁹ Ní'irö bizidi icja ládxi'do'gaquië' bal-lë', en biti' gula'yéajlë'ë Cristo, ate' gula'nnë' zi'ë que xtídzë'ë Xanru' ga nacuá' bönachi zían na'. Ní'irö Pablo bulá'alenë' légaquië', ate' bubéajë' quez nupa ta'yéajlë' Cristo. Bë'lenë' bönachi ni ta'yéajlë' Cristo didza' yugu' dza ga na' tu'dubë' lu yu'u ga rusédinë' Tiranno bönachi.

¹⁰ Caní béntica'së' Pablo idú ca chopa iz, ate' caní guca, bila'yöni yúgu'të bönachi didza' ca naca queë' Xanru' Jesús, bönachi nacu'ë yugu' yödzo luyú Asia, bönachi judío, en bönachi izá'a.

¹¹ Dios benë' yugu' yöl-la' huáca zxon lu në'ë Pablo.

¹² Caní guca, bal-lë' bönni' gula'zi'ë yugu' lári'do' béguë'ë icjë' Pablo, en yugu' lari' tsólá'a bugalë' lë'ë, ate' yöjuá'gaquië' léguequi gapa nacuá' nupa te'e, ate' bulu'huóáquië' ca naca yödzöhuë' que queégaquië', en bulu'rúaj bö' xihui' yú'ugaca bönachi na'.

¹³ Ní'irö bal-lë' bönni' judío udá dzaga tu'béajë' bö' xihui' gulë'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nnë':

—Ni'a que Lë' Jesús, Nu na' runë' libán que Pablo, rinná bé'etu' libí'ili' urúajli'.

14 Caní gulunë' gadxi bönni' xzí'inë' Esceva, tu bönni' judío náquië' bönni' lo ládjagaquië' bixúz unná bë'.

15 Bubí'i didza' bö' xihui' na', gunná:

—Núnbë'a-në' Jesús, en núnbe'eda' bönni' lë' Pablo, pero libí'ili', çnúzxitë libí'ili'?

16 Ní'irö guxítí'ë bönni' na' yu'u lë' bö' xihui', yöjenë' légaquië' zi', en bucul-lë' yúgu'të, tu' guzxëqui'rönë' ca légaquië'. Caní guca, xiguidigacasë', en huë'gacatzë' bulu'zxúnnajë' gadxë' bönni' na' lu yu'u ni'.

17 Guzë didza' ca guca lë ni, ate' bila'yöni yúgu'të nupa nacua' lu yödzö Éfeso, bönachi judío, en bönachi izá'a, ate' yúgu'të guládxinë' Dios. Que lë ni na' gulunë' zxön Lë' Xanru' Jesús.

18 Lësca' bila'dxinë' zían bönni' ta'yéajlë'ë Cristo, en gula'xóalëpë' dul-la' nabága'gaquië', en gula'guíxjö'ë le chigulunë'.

19 Lësca' caní gulunë' zían bönni', zí'alö gulunë' yöl-la' udzá'. Dujuá'agaquië' yugu' guichi udzá' quégaquië', ate' bulu'zégui'ë léguequi lógaca yúgu'të bönachi. Bulu'labë' tsca nazáca gaca guichi na', le guca idú chi un mil dumí plata.

20 Caní guca, guzëda' xtídzë'ë Xanru', en bidéli'da' bönachi zían. Idú ládxi'gaquië' gula'yéajlë'ë Cristo.

21 Gudödi gulaca lë ni, benë' queë' Pablo tsejë' Jerusalén, pero zí'alö ral-la' tödë' yugu' yödzö luyú Macedonia, en luyú Acaya, ate' gunné':

—Tödi tseja' Jerusalén, run bayudxi tseja' ca' Roma.

22 Ní'irö gosöl-lë'ë-bi' chópabi' bí'i bönni' tácalenbi' lë', légcabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

Tu'tsatsa bönachi lu yödzö Éfeso

23 Bulu'tsatsa bönachi Éfeso dza ni', ate' gula'dá'baguë'ë xtídzë'ë Xanru'.

24 Benë' Demetrio, bönni' gubëdxi guië plata ga bulu'tsatsë'. Run cazë' yugu' lidxi budó' guiöj budó' yaga néquiguequini plata que dios quégaquië', lënu Diana. Gula'zi'ë bönni' tunë' dxin ni dumí bach.

25 Butubë' Demetrio na' ia'zícá'rë' bönni' tunë' la' dxin nisö, ate' gudxë' légaquië':

—Böcha'a, nöz quézili' ca naca dxin runru', runna dumí queëru'.

26 Rilé'eli', en riyönili' ca runë' Pablo na'. Calégasö Éfeso ni, pero idú luyú Asia chibidéli'në' bönachi zían, ate' chibutsë'ë ca tunë', tu' rë' légaquië': "Yúgu le núngaca bönachi biti' náçagaca dios."

27 Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lënu Diana. Caní gaca, ugá'ana cá'asö yöl-la' zxön queënu, dios ni ta'yéaj ládxi'gaca-nu bönachi iduté luyú Asia, enca' iduté yödzölió.

28 Cate' yugu' bönni' na' bila'yönnë' didza' ni, gula'léde'enë', ate' gulu'ë zidzaj didza', ta'nnë':

—Nácatërönu zxön Diana, dios queëru' rë'u, bönachi Éfeso.

29 Caní guca, bulu'tsatsa bönachi iduté lu yödzö na', ate' guláquië' tuz, en carelö yöjáquië' lö'a yúlahui'. Gulá'ayöjé' Gayo, en Aristarco, bönni' Macedonia túngaquië' Pablo tsözxön, ga ni'.

30 Cate' gú'unnë' Pablo tsázië' ga nacua' bönachi zían na', biti' ca' gulu'ë lë' lataj bönni' ta'yéajlë'ë Cristo.

³¹ Lēasca' caní gulunē' bal-lē' bōnni' yúlahui' que luyú Asia, bōnni' ta'lé'enē' Pablo dxi'a. Gula'sōl-lē'ē queē' nupa guláta'yu lahuē' bití' tsaziē' lō'a yúlahui' na'.

³² Ga ni' tu'tsatsē', en ta'bōdxi'ē, tu le ta'nnē' bal-lē', en ia'tú le ta'nnē' ia'zica'rē', tu' rō'ogacasē' barōli bōnni' zían na' tu'tsatsē', en lá'tu'biqui' yúgu'tēgaquiē' bití' nōzguequinē' bizx que na' nudúbagaquiē' ni'.

³³ Ní'irō yugu' bōnni' judío gula'béajē' Alejandro ladaj bōnachi zían na', ate' bulu'dxiguē'ē lē' lógaca bōnachi zían na'. Bulu'e Alejandro na' len nē'ē para ila'bō' dxisō, tu' gú'unnē' gu'ē didza' le gácalen yugu' bōnni' judío na' lógaca yúgu'tēguequi.

³⁴ Cate' gulēquibe'enē' náquiē' judío, yúgu'tē' gulu'ē tsōzxōn zidzaj didza' idú ca chopa hora, ta'nnē':

—¡Nácatērōnu zxōn Diana, dios queēru' rē'u bōnachi Éfeso!

³⁵ Ní'irō bōnni' uzúaj que yúlahui' benē' ga gula'bō' dxisō bōnachi zían na', gunnē':

—Bōnni' Éfeso, nōzigaca yúgu'tē bōnachi zoa yudo' queēnu Diana, dios zxōn, ni. Rē'u ni, bōnachi Éfeso, run chí'iru' yudo' na', enca' budó' na' bōxaj ga zóaru', le birúaj lúzxiba.

³⁶ Cuntu nu' gaca tá'baga' lē ni. Que lē ni na' run bayudxi sóali' dxisō, en bití' bi' gúntēzili'.

³⁷ Naché'gacali'-nē' bōnni' ni, en bití' ta'banē' le dzō'ō yudo', en bití' ta'nnē' xihuē'ē queēnu dios queēli'.

³⁸ Que lē ni na', channō zoa didza' bizxaj quēgaquiē' Demetrio, en yugu' bōnni' gubēdxi guíē plata nacua'lenē' lē', len nútí'tēs bōnni', dē lataj ga nu uzē' nagui légaquiē', en zoa nu uchi'a usōrō légaquiē'. Ní' huáca ulu'zegui luzá'agaquiē' didza' tuē' ia'tuē'.

³⁹ Na'a, channō dē ia'tú le inábali', huáca ucá'anaru' tsahui' le cate' ulu'dubi bōnni' yúlahui' ca na' rinná bē' yúlahui'.

⁴⁰ Zoa bōnadxi nu uzegui rē'u didza' ni'a que dzatsa ni guca na'a, inná ridá'baga'ru' yúlahui'. Bití' bi' gaca innaru' bizx que guca dzatsa ni.

⁴¹ Cate' budxi bē'ē didza' ni, busōl-lē'ē bōnachi zían na' nudúbigaca ni' tsōhuōjgaca lídxiuequi.

20

Sa'yéajē' Pablo luyú Macedonia, en luyú Grecia

¹ Cate' gurō'ō dxi dzatsa na' guca lu yōdzō Éfeso, bulidzē' Pablo yugu' bōnni' ta'yéajlē'ē Cristo, ate' guchiziē' icja nágagaquiē' didza'. Gudōdi ni' bunidē' légaquiē', en la' bulá'alentē' légaquiē'. Birúajē' ni', ate' sa'yéajē' luyú Macedonia.

² Gudōdē' yugu' yōdzō luyú ni', ruzéajni'ide'enē' bōchi'ru' nacu'ē ni', ate' gudōdi ni' bidxinē' luyú Acaya.

³ Guzōē' Pablo ni' idú ca tsonna beo'. Cate' chizōa cuenē' tu lē'e barco para tsejē' luyú Siria, gúquibe'enē' ta'bō' nísiē' bōnni' judío lē' para ila'zōnē' lē'. Que lē ni na' buguélē'ē nōza sōhuōjē' luyú Macedonia, ate' bidxinē' yōdzō Filipos.

⁴ Sópater, xzí'inē' Pirro, bōnni' Berea, en Aristarco, en Segundo, yugu' bōnni' Tesalónica, en Gayo, bōnni' Derbe, enca' bi'i Timoteo, en Tíquico, en Trófimo, yugu' bōnni' Asia, sōjácalenē' tsōzxōn lē'.

⁵ Ní'irō yugu' bōnni' ni yōjnōrugaquiē' lahuē' Pablo, yōjáquiē' yōdzō Troas, ga ni' gula'bōzē' lē'.

⁶ Lu yödzo Filipos na', neda', Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila biti' nazí'i cúa zi que, gurentu' tu lë'e barco, en buzá'atu' Filipos na'. Gudödi gayu' dza budzágatu' bönni' ni' yöjnörugaquië' lahuë' Pablo, yöjáquië' Troas, ate' ni' bugá'anatu' gadxi dza.

Le benë' Pablo lu yödzo Troas

⁷ Dza risílo le gadxi dza bulu'dubë' bönni' ta'yéajlë'ë Cristo para ilahuë' yöta xtila le rusá' ládxi'ru' ca gútië' Jesucristo. Ni' rusédinë' Pablo légaquië', en tu' ral-la' uzë'ë ni' cate' za' rení' dza na', xidzé bë'ë didza', ga bidxintë gudödi guluhuëla.

⁸ Ga ni' nudúbigaquië' naca lu yu'u xitsá', ate' nacuá' zían le ta'gú'u beni' ga na'.

⁹ Zóabi' bi'i Eutico ni', rő'öbi' ga ra'a lení' que yu'u na', ate' nadödirö yëla lobí' tu' ritunna libán runë' Pablo. Ga ni' rő'öbi' rásibi' bi'i na' naca ga bunni cuía lu yu'u, ate' rásisibi' ca' gubíxitebi', bőxjabi' ga bidxintëbi' zxan yu'u. Nátitëbi' bulu'lisë'-bi'.

¹⁰ Bötjë' Pablo zxan yu'u na', ate' yöjxóë' lëbi', en bunidë'-bi'. Ní'irö gudxë' nupa nacuá' ni':

—Biti' gadxi idzöbili'. Nabanbi'.

¹¹ Cate' chibubenë' Pablo xitsá', gudélë'ë yöta xtila, gudahuë'. Ní'irö Pablo bë'lenë' légaquië' didza' ga bidxintë zila baló. Gudödi ni' burúajë' ni'.

¹² Bi'i bönni' ra'bán na' gubíxibi', bulu'chë'ë-bi' nabanbi', en bulu'zí' zxöndë'ë.

Ca guca bidxintu' Mileto

¹³ Gunörutu' lahuë' Pablo, en yöjchentu' tu lë'e barco, ate' gudödítu' ga bidxintu' yödzo Asón para tsöjtságatu'-në' Pablo ni', para gaca ca na' chibén xtídza'tu', tu' gú'unnë' Pablo tsejë' ni' së'esi ni'ë.

¹⁴ Cate' chibudzágatu'-në' lu yödzo Asón na', gurénlenë' netu' lë'e barco, ate' guyéajtu' yödzo Mitilene.

¹⁵ Buzá' barco ni', ate' dza buropi bidxintu' tódi li ga zoa luyú bidxi nazí'i le Quío, ate' ia'tú dza ca' gudödítu' tódi li ga dë yödzo Samos, en bidxintu' yödzo Trogilio ga ni' guzóatu' tu chí'i. Ia'tú dza ca' bidxintu' yödzo Mileto.

¹⁶ Caní bentu' tu' chibenë' queë' Pablo tódisë' yödzo Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channó séqui'në'.

Didza' bë'ë Pablo lu yödzo Mileto

¹⁷ Cate' ni' zoë' Pablo lu yödzo Mileto, gusól-lë'ë nu yöjlidza bönni' gula tapa chí'ë bönachi queë' Cristo nacu'ë Éfeso.

¹⁸ Cate' bila'dxinë' ga zoë' Pablo, lë' gudxë' légaquië':

—Libí'ili' chinöz quezili' ca béntica'sa' ga zóali' ga gudela' bidxina' luyú Asia.

¹⁹ Yugu' dza bena' xichinë' Xanru' lu yöl-la' nöxaj ladxi', ga bidxintë gurödxá' ni'a queëli', ate' zían le guca quia' le guzxi' bë' neda' ni'a que le ruá' dö' gulunë' quia' bönachi judío biti' ta'yéajlë' Cristo.

²⁰ Béntica'sa' libán ga zóali' que yúgu'të le ruzí'ili' xibé, en busédida' libí'ili' yálajdo' ga nudúbili', en gapa naca lu yu'u lídxili'.

²¹ Bena' ba nalí lógaca bönachi judío, en lógaca bönachi izá'a para ulu'bí'i ládxi'gaca, en ulu'huóaca queë' Dios, en ila'yéajlë' Xanru' Jesucristo.

²² Na'a, Dios Bö' Lá'ayi chinunë' quia' tseja' Jerusalén, en biti' nözda' bizxi gaca quia' ni'.

²³ Yúgu'të yödzö ga ridá', riguixjöi'inë' Dios Bô' Lá'ayi neda', rë' neda' ila'gu'ë neda' lidxi guié bönni' judío biti' ta'yéajlé', en ulu'saca' zi'ë neda'.

²⁴ Biti' bi runi neda' que lë na' gaca, sal-la' gátia' o cabí gátia', pero ruí'i ládxi'sida' údxi guna' le chigudéla'a runa', para guna' dxin na' budödë' Xanru' Jesús lu na'a, le naca guna' libán que didza' dxi'a ca naca le ruzá' ládxe'ë Dios queëru'. Caní guna' len yöl-la' rudzeja.

²⁵ 'Na'a, yúgu'tëli' na' chibena' libán loli' ca rinná' bë'ë Dios, nõzda' bíti'rö ulé'eli' neda'.

²⁶ Que lë ni na', le nácatë rea' libí'ili' na'a dza. Biti' nabága'a neda' queëli' nituli' libí'ili'.

²⁷ Biti' bi bucháchi'da' libí'ili', pero gudíxjöi'ida' libí'ili' yúgu'të le rnnë' Dios.

²⁸ Que lë ni na', guli'gún chí'i cuinli', en guli'gún chí'i yúgu'të bönachi queë' Cristo, tu' nuzóë' Dios Bô' Lá'ayi libí'ili' para gácalenli' légaquië', en gun chí'ili' bönachi queë' Xanru', Bönni' na' gútië' uláz queégaquië', bulaljë' xichönë' le böá'uinë' légaquië'.

²⁹ Chinözda', tödi uzá'a ga zóali', ila'yaza nupa ilé'ëni ulu'suniti bönachi queë' Cristo ga zóali', ilunë' ca tunba' bö'cu' guí'a sínia', tu'sunítiba' yugu' bö'cu' zxila'.

³⁰ Ila'rúajë' bönni' nútsa'gaquië' ládjali', ate' ilu'ë didza' biti' nácatë para ulu'béajë' quégacasë' nupa ta'yéajlé' Cristo nútsa'gaca ládjali'.

³¹ Que lë ni na', guli'sóa ban ladxi', en guli'tsöjné' ca bena' neda' idú ca tsonna iz, rëla, en të dza buchízia' icja nágali' tu tuli' ga bidxintë gurödxá' queëli'.

³² 'Na'a, böchi' luzá'ado', rigu'a libí'ili' lu në'ë Dios. Rinábida' Lë' uzá' ládxe'ë queëli', en gunë' ca rna xtídzë'ë. Dios gunë' libí'ili' tsutsu, en gunë' ga idéli'li' gunli' tsözxön yugu' bönni' rö queë'.

³³ Catu caz guzë ládxa'a le nequi queégaquië' böchi' luzá'a. Biti' guzë ládxa'a dumí, o lari' queégaquië'.

³⁴ Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'.

³⁵ Ca naca yúgu'të le bena', buluf'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunné': "Uz'irö xibé nu bi runödzej ca nu bi rizí'."

³⁶ Cate' budxi bë'ë Pablo didza' ni, buzóa zxibë', ate' benë' tsözxön yúgu'të', bulu'lidzë' Dios.

³⁷ Ní'irö gula'bödxë' yúgu'të'. Bulu'nidë' yenë' Pablo, en bulu'tsaga lahuë' lë'.

³⁸ Caní gulunë' tu' bulu'huf'innë' ni'a que didza' na' bë'ë Pablo, gunné': "Bíti'rö ulé'eli' neda'." Yöjácalenë' tsözxön lë' ga na' gurenë' lu barco.

21

Sa'yéajë' Pablo Jerusalén

¹ Gudödi bulá'alentu' légaquië', guyú'utë nõza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudöditu' ia'tú lataj nazí'i le Rodas, ate' buzá'atu' ni', en bidxintu' yödzö Pátara.

² Yöjácá'tu' tu barco yúbölö ni' le zeaj luyú Fenicia. Gurentu' lë'e barco na', ate' guyú'utë nõza.

³ Gudöditu' ga nalá' Chipre, le guta' tsölá'a yögöla, ate' guyéajtu' luyú Siria, ga ni' guyaza barco na' lu yödzo Tiro, tu' ral-la' tsöjca'ana yua' ni' le dzö'ö lè'e barco na'.

⁴ Lu yödzo Tiro na' yöjxáca'tu' tu bönni' réajlè'è Cristo, ate' bugá'analentu' lè', en yugu' böchi'ru' ni' idú gadxi dza. Tu' chibulu'inè' Dios Bö' Lá'ayi légaquiè' le ral-la' gaca queè' Pablo, gulé' lè' biti' tsejè' Jerusalén.

⁵ Cate' chibizá'a dza na', burúajtu' ni', ate' gula'zá'lenè' netu' tsözxön yúgu'tè' len nigula que queégaquiè', en yugu' bi'i queégaquiè', ga bidxintètu' ní' ilö ra' yödzo na'. Ra' nísado' ní' buzóa zxi'bitu', en bulidztu'-nè' Dios.

⁶ Budxi bunida' luzá'atu' tutu' ia'tutu', bubentu' lè'e barco, ate' légaquiè' yöjhuöjgaquiè' lidxigaquiè'.

⁷ Buzá'atè' barco na' lu yödzo Tiro, ate' ga yöjsé bidxín lu yödzo Tolemaida. Burúajtu' lè'e barco na' ni'. Bugápatu' Dios böchi'ru' nacu'è ni', ate' bugá'analentu' légaquiè' tu dza.

⁸ Cate' za' rení' ia'tú dza, burúajè' Pablo ni', ate' dzáagatu'-nè' netu' guyéajtu' yödzo Cesarea. Ni' guyú'utu' lu yu'u lidxè' Felipe, ate' bugá'analentu' lè'. Runè' Felipe na' libán que didza' dxi'a. Bitsè'è gadxè' bönni' ni' bulu'cu'è dza ni'te para ilácalenè' bönachi queè' Cristo.

⁹ Nacuá'abi' tapa bi'i nigula ra'bán queè' Felipe na', tu'i'ibi' didza' uláz queè' Dios.

¹⁰ Gudödi gudzetu' chopa tsonna dza ni', ní'irö bidxinè' Agabo ni', bönni' ru'è didza' uláz queè' Dios, narúajè' luyú Judea.

¹¹ Bönni' ni buduyúè' netu', ate' gudélè'è pan le néquini guídi queè' Pablo. Béguè'è ni'a na' cuinè', en gunnè':

—Caní rnnè' Dios Bö' Lá'ayi: “Caní ilunè' bönni' judío nacu'è Jerusalén. Ilúguiè' bönni' ni nequi queè' pan guídi ni, ate' ulu'dödè' lè' lu ná'agaca bönachi izá'a.”

¹² Cate' biyönitu' didza' ni, gúta'yutu' lahuè' Pablo, netu', en nupa nacua' ni', para cabí tsejè' Jerusalén.

¹³ Bubi'è didza' Pablo, gunnè':

—¿Bizxi ni runli', ribödxili', en rusuhuí'inili' neda'? Neda' chizóa caza' sina', calégasö ilúguiè' neda', pero gátia' ca' lu yödzo Jerusalén ni'a queè' Xanru' Jesús.

¹⁴ Tu' cabí guzxequi'tu'-nè' didza', bití'rö bi gúdxitu'-nè', ate' gunnatu':

—Gaca ca raza ládxè'è Xanru'.

¹⁵ Cate' chigula'dödi dza na', bupa'atu' queétu', ate' guyéajtu' Jerusalén.

¹⁶ Gula'zá'lenè' netu' bal-lè' bönni' ta'yéajlè'è Cristo, nacu'è Cesarea, ate' dzáguiè' Mnasón, tu bönni' Chipre, légaquiè'. Réajlè'è Cristo dza ni'te, ate' ral-la' tsöjgá'anatu' lidxè' bönni' ni.

Pablo röjyüè' Jacobo

¹⁷ Cate' bidxintu' Jerusalén, len yöl-la' rudzeja queégaquiè' böchi'ru' ni' ta'yéajlè'è Cristo gulunè' netu' bal.

¹⁸ Dza buropi na' Pablo guyázalenè' netu' lu yu'u, yöjyutu'-nè' Jacobo, ate' nudúbigaquiè' ni' yúgu'tè bönni' gula tapa chi'è bönachi queè' Cristo nacu'è Jerusalén.

¹⁹ Cate' Pablo chibugapè' légaquiè' Dios, busiyönnè' légaquiè' yúgu'tè le benè' Dios lu nè'è lè' ga nacua' bönachi izá'a.

²⁰ Cate' bila'yönnè' lè ni, gula'gu'è Dios yöl-la' ba. Ní'irö gulé' Pablo:

—Nöz queézinu', böchi'tu', cate' xö zían gáyu'ë bönni' judío ta'yéajlë'ë Cristo, ate' yúgu'të' túndë'ë bal xibá queé' Moisés.

21 Chibila'yönnë' yugu' le tuí' didza' bönachi le ta'nnë quiu', ta'nná rigú'u yól-lu'u yúgu'të bönni' judío nútsa'gaquië' ladaj bönachi izá'a, para ulu'cá'anë' le gunná bë'ë Moisés, en rinná bé'enu' légaquië' biti' ila'chúguië' lu xpéla'gacabi' bi'i bönni'do' queégaquië', en biti' ilunë' bal yugu' le nalëbiru' runru' rë'u, bönachi judío.

22 ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni.

23 Na'a, ben lë ni rëtu' li'. Nacuá'lenë' netu' ni tapë' bönni', chinazí' lu ná'agaquië' lahuë' Dios tu le ilunë'.

24 Guchë'ë yugu' bönni' ni, en ben légaquië' tsözxön gun dxi'a cuinli' ca naca que yudo', en gudixxaj li' le ral-la' ila'guixxjë' para ilún yútusö' ícjagaquië'. Ní'irö ila'nöziné' yúgu'të bönni' judío biti' nácatë'lë na' ta'nnë' quiu', pero lësca' li' runu' le naca dxi'a, en runu' ca rinná bë' xibá queé' Moisés.

25 Ca naca queé'gaca bönachi izá'a, nupa ni' chita'yéajlë' Cristo, chibén xtídzá'tu', en buzúajtu' lu guichi ca ral-la' ilunë'. Biti' run bayudxi ilún chi'ë yugu' lë ni tunë' bönni' judío, pero tuz:

Biti' ilahuë' le ta'gú'u bönachi lógaca budó' guiöj budó' yaga.

Biti' ilahuë' rön.

Biti' ilahuë' xipéla'gacaba' böa' guixi' biti' narúaj-gácaba' rön.

Biti' ilunë' le ruá' dö'.

Ta'zönë' Pablo lö'a yudo'

26 Ní'irö Pablo guchë'ë queé' tapë' bönni' na', ate' dza buropi ni' ben dxi'a cuinë' tsözxön len légaquië' ca naca que yudo'. Ní'irö guyázië' lö'a yudo', para gaca bë' bizzi dza údxi ilunë' le tu'un dxi'a cuíngaquië', dza ni' ral-la' tsöjuá'agaquië' le ila'gu'ë lahuë' Dios que queégaquië'.

27 Cate' chizó'a izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönachi zían, ate' gula'zönë' Pablo.

28 Gulu'ë zidzaj didza', ta'nnë':

—¡Guli'gácalen netu', bönni' Israel! Bönni' ni rusédinë' yúgu'të bönachi yúgu'të lataj ulu'cá'ana cá'asö yödzö queëru', en xibá queé' Moisés, en yudo' queëru' ni. Na'a, chigulu'ë yugu' bönni' izá'a lu yudo' ni. Caní runë', run díjanë' lataj lá'ayi ni.

29 Caní gula'nnë' tu' bila'lé'enë' Pablo zí'alö lu yödzö dzáguië' Trófimo, bönni' Éfeso, en téquinë' gulu'ë bönni' ni lu yudo'.

30 Caní guca, bulu'dubi yúgu'të bönachi yödzö, ate' bila'guirë' ni'. Ní'irö gula'zönë' Pablo, en gulá'ayöjë' lë', bulu'bëajë' lë' lö'a yudo', ate' la' bulu'sáyjatë' ga nu riyaza lö'a yudo' na'.

31 Cate' chitequi queézinë' ilútië' Pablo, bidxín didza' lahuë' bönni' lo rinná bé'enë' bönni' rójáquië' gudil-la. Biyönnë' tun dzatsa yúgu'të bönachi Jerusalén.

32 Bönni' lo ni la' butúbitë' bönni' rójáquië' gudil-la, len bönni' ta'nná bé'enë' légaquië', ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enë' bönni' rójáquië' gudil-la, en bönni' na' rójáquië' gudil-la, bulu'sané' ta'guinë' Pablo.

³³ Ní'irö gubígui'ë bönni' lo na', en guzxönë' Pablo, ate' gunná bé'enë' bönni' rōjáquië' gudil-la ilúguië' lë' len chopa du guíë. Gudödi ni' gunábinë' bönachi zián ni', rnnë':

—¿Nuzxi caz bönni' ni, en bizxi benë'?

³⁴ Ta'bödxi'a bönachi zián na', que queégaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönachi na', ate' gunná bé'enë' bönni' rōjáquië' gudil-la ila'chë'ë Pablo lu yu'u zxön ga nagá'anagaquië' bönni' na' rōjáquië' gudil-la.

³⁵ Cate' bila'dxinë' ga naca ni'yëpi' que yu'u zxön na', bönni' na' rōjáquië' gudil-la guluí'inë' Pablo, tu' dxíadi'ígaca bönachi zián légaquië',

³⁶ en zá'gaca cúdzu'lōgaquië', ta'bödxi'a, ta'nná:

—Gulí'gútië'.

Didza' bë'ë Pablo uláz queë' lógaca bönachi

³⁷ Cate' ni' gula'sí'lōgaquië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' rōjáquië' gudil-la, gunnë':

—¿Naru' gunnu' neda' lataj guía' li' tu didza'?

Bönni' lo na' gudxë' Pablo:

—¿Rácatsö' didza' griego?

³⁸ ¿Naru' caléga li' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asö'?

³⁹ Ní'irö Pablo gudxë' lë', gunnë':

—Le nácatë naca' neda' bönni' judío. Gulja' Tarso, tu yödzo lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

⁴⁰ Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönachi zián ni'. Cate' chigula'cu'ë dxisö, Pablo bë'lenë' légaquië' didza' lu didza' hebreo.

22

¹ Caní gunnë' Pablo:

—Libí'ili', bönni' gula, en libí'ili' böcha'a. Buli'zé nágali' le guía' libí'ili' ca naca le runa'.

² Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

³ —Naca caza' neda' bönni' judío. Gulja' lu yödzo Tarso luyú Cilicia, pero guzxöna' lu yödzo ni, ate' busédinë' Gamaliel neda' idú ca naca xibá'quégaquië' xuz xtó'oru'. Bë'tica'só ládxa'a guyéaj ládxa'a Dios ca runli' libí'ili' na'a.

⁴ Zí'aló gudxía ládxi'gaca'-në' bönni' nazí' lu ná'agaquië' xtídzë'ë Cristo, en guchë'gaca'-në' ga ilátië'. Guzxóngaca'-në', en gulu'ugaca'-në' lidxi guíë, yugu' bönni', en nigula.

⁵ Lë'sca' huáca ilunë' ba nalí yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë böchi'ru' judío lu yödzo Damasco. Guyija' ni' para tsöjxóngaca' nupa ni' ta'yéajlë' Cristo, para idichë'gaca'-në' nága'gaquië' Jerusalén ni, para ilácagaquië' xíguía'.

Rigúxjö'ë Pablo ca böáquië' queë' Cristo

⁶ Ní'irö gunnë' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagu-bidza, tsárido'os guyépi yösa bení' le za' lúzxiba, le buzení' ga na' sa'yéaja'.

7 La' yjöta'tea' lu yu, en biyönda' chi'i Nu gudxi neda': "Saulo, Saulo, ¿bixz que ribía ládXu'u neda'?"

8 Ní'irö gunábida' lë', gunná': "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládXu'u."

9 Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chi'i Nu na' bulidza neda'.

10 Ní'irö gudxa'-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guié' li' ca naca yúgu'të le ral-la' gunu'."

11 Tu' cabirö rilé'eda' tu' budí'i yösa bení' na' guyéaida' lahua', que lë' ni na' yugu' bönni' dzágagaquië' neda' gula'guélé'ë na'a, ate' gula'chë'ë neda' ga bidxíntea' Damasco.

12 'Zoë' Ananías ni', tu bönni' runë' idütë ca rinná' bë' xibá queë' Dios, ate' yugu' bönni' judío nacu'ë Damasco tunë' lë' bal.

13 Bidxinë' Ananías na' ga zoa', en gudxë' neda': "Saulo, böcha'a, huöálaj guiöj lo'." La' ní'isö böálaj guiöj lahua', ate' bilé'eda' lë'.

14 Lë' gudxë' neda': "Dios quégaquië' xuz xtó'oru', dza ni'te gurö cazë' li' para inözinu' le rë'ëni quézinë' Lë', en ilé'enu'-në' Bönni' Tshui', Lë' cazë' Zxi'inë', en yönnu' le guié' Lë' cazë' li'.

15 Caní' gaca, tu' ral-la' gunu' ba nalí queë' Lë' lógaca yúgu'të bönachi, usiyönnu' légaquië' ca naca le chibilé'enu', en le chibiyóninu'.

16 Na'a, ¿bixz que ridzenu'? ¡Guyasa, en bidila nisa! Bulidzë' Xanru' para ünë' li' dxi'a, en ugië' dul-la' nabágu'u."

Cristo gusöl-lë'ë Pablo para gunë' libán lógaca bönachi izá'a

17 Gunnë' ca' Pablo:

—Gudödi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla béchigal.

18 Bilé'eda'-në' Xanru', ate' gudxë' neda': "¡Guyéaj carelö! ¡Burúajtë Jerusalén ni, tu' cabí ilunë' bal bönni' ni le gunu' ba nalí quia'!"

19 Neda' gudxa'-në': "Xan, nözgica quézinë' ca bena' neda'. Guyázia' gapa naca lu yu'u ga tu'dubë' tu'sedë' bönni' judío queë' Dios. Gudina' nupa ni' ta'yéajlë' Li', en gulú'ugaca'-në' lidxi guié'.

20 Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu' ben chi'a lari' nácugaquië' bönni' na' bulu'ladxë' lë' guiöj."

21 Ní'irö Xanru' gudxë' neda': "Guyéaj, tu' risól-la'a li' lógaca bönachi izá'a."

Pablo ru'ilenë' bönni' lo didza', bönni' rinná' bé'enë' bönni' röjáquië' gudil-la

22 Nisö ze lo yugu' bönni' judío bulu'zë nágagaquië' didza' bë'ë Pablo, ate' ní'irö gula'bödxí'ë. Gulu'ë zidzaj didza', ta'nnë':

—¡Gulí'gútië' bönni' ni! ¡Bíti'rö ral-la' soë' ibanë'!

23 Ní'irö tu' ta'bödxí'ë, en ta'chözë' le nácugaquië' lu yöl-la' rilé' quégaquië', en tu'chejë' béchtö yu lu bö'ös,

24 bönni' lo na' rinná' bé'enë' bönni' röjáquië' gudil-la gunná' bë'ë ulu'gu'ë Pablo lu yu'u zxon na'. Lësca' gunná' bé'enë' légaquië' ila'guinë' Pablo para quíxjö'ë le nácatë, para ila'nözinë' bixz que na' ta'bödxí'ë bönni' judío caní queë' Pablo.

25 Cate' gulúgu'i'ë lë' du guídi para ila'guinë' lë', Pablo gudxë' tu bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dè lataj quínili' neda'? Nababa' Roma, ate' cuntú nu buchi'a busörö neda' channö nabága'a xíguia'.

²⁶ Cate' bönni' na' biyönnè' lè ni, guyijè' yöjtíxjöi'inè' bönni' lo na' rinná bé'enè' bönni' rójáquiè' gudil-la. Rè' lè':

—¿Bizxi caz ni runru'? ¡Bönni' ni nababè' Roma!

²⁷ Ní'irö bidè' bönni' lo na' ga zoè' Pablo, en gudxè' lè':

—¡Gudixjö'! ¿Naru' nababu' lí' Roma?

Pablo gudxè' lè':

—Ön, nababa'.

²⁸ Bubi'è didza' bönni' lo na', gunnè':

—Neda' ni, dumí zían gudixxa' para ibaba' Roma.

Ní'irö Pablo gudxè' lè':

—Neda' gubaba' Roma cate' ni' gulja' tu' nabábagaquiè' xuz xiná'a Roma.

²⁹ Cate' bönni' na' chizóa ila'guinë' lè' bila'yönnè' lè' ni, la' bulu'bíga'tè' ga zoè' Pablo. Lësca' gúdxinë' bönni' lo na' cate' gunözinè' nababè' Pablo Roma, tu' chigunná bè'è ilúguiè' lè'.

Ridxinë' Pablo lógaquiè' bönni' yudo' tu'chi'a tu'söröè'

³⁰ Dza buropi ni', gú'unnè' bönni' lo na' inözinè' gazxi ga rè' bizxi na' yugu' bönni' judío tu'zéguiè' Pablo didza'. Gunná bè'è bulu'sedxè' du guíè na' náguè'è Pablo, ate' gunná bè'è ulu'dubè' bixúz unná bè' judío, en yúgu'tè bönni' yudo' tu'chi'a tu'söröè'. Ní'irö bubéajè' Pablo ga na' nagú'ugaquiè' lè', ate' buzóè' lè' lógaquiè'.

23

¹ Ní'irö buyúdè'è Pablo lógaquiè' bönni' yudo' tu'chi'a tu'söröè' na', en gunnè':

—Libí'ili', böcha'a. Ga ridxintè na'a riböza' dxí'ado'. Caní naca, biti' zoa le ruxösa ládxi'da'ahua' neda' lahuè' Dios.

² Ní'irö Ananías, bixúz lo, gunná bé'enè' nupa nacua' cuita lè'è Pablo ila'gápè'è ru'è.

³ Pablo gudxè' lè':

—Lèzca' caní Dios ubi'è quiu', li', rulu'isö tsahui' cuinu'. ¿Naru' rö'ö cazu' ruchi'a rusöröu' neda' ca rinná bè' xibá, pero ridödi bè'tso' ca rinná bè' xibá na', na' rinná bé'enu' ila'gápè'è neda'?

⁴ Nupa nacua' ni' tè Pablo:

—¿Naru' rulidza zi'tso'-nè' bixúz lo queè' Dios?

⁵ Pablo gudxè' lègaquiè':

—Libí'ili', böcha'a. Nazúaj lu guichi, rnna: “Biti' ulidza zi'u nu rinná be'è bönachi uládz quiu'”, pero neda' biti' gúquibe'eda' náquiè' bixúz lo.

⁶ Ní'irö gúquibe'enè' Pablo bal-lè' nácagaquiè' bönni' yudo' saduceo, ate' ia'bal-lè' bönni' yudo' fariseo. Ní'irö bè'è zidzaj didza' lógaquiè' bönni' yudo' tu'chi'a tu'söröè' na', gunnè':

—¡Libí'ili', böcha'a! ¡Naca' bönni' fariseo, en naca' xzí'inè' tu bönni' fariseo! ¡Na'a ruchi'a rusöröli' neda' tu' runa' löza ulu'bán nupa chinátigaca!

⁷ Cate' bè'è Pablo didza' ni, bila'rúajè' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídzè'è la' lé'gacase'.

⁸ Caní gulunè' tu' ta'nnè' bönni' saduceo na' biti' ulu'bán nupa chinátigaca, en biti' nacu'è gubáz lá'ayi, en biti' nacua' bö' nácagaca caz bönachi, pero ta'yéajlè'è bönni' yudo' fariseo nácagaca yúgu'tè lè ni.

⁹ Que lè ni na' gula'bödxi'ë. Ní'irö gula'yasë bönni' nazédagaquië' xibá queë' Dios, yugu' bönni' yudo' fariseo, en gula'dil-la dídzë'ë, ta'nnë':

—Rusáca'tu' queëtu' biti' bi dó' nu'ë bönni' ni. Channö tu bö' naca caz bönachi bé'len lé' didza', o channö tu gubáz lá'ayi queë' Dios bé'lenë' lé' didza', biti' ral-la' tá'baga'ru'-në' Dios.

¹⁰ Cate' chita'díl-lada' dídzë'ë bönni' judío na', gúdxinë' bönni' lo na' rinná bé'enë' bönni' rójáquië' gudil-la, tu' réquinë' ulu'zxuzxaj ulu'quínajë' Pablo. Ní'irö gunná bé'enë' bönni' rójáquië' gudil-la tsöjléajgaquië' Pablo ladaj bönni' judío na', en ulu'chë'ë lé' lu yu'u zxön ga na' nagá'anagaquië' bönni' na' rójáquië' gudil-la.

¹¹ Cate' chinaca chi'i dzö'ölö la' dza ná'asö, buluí'i lahuë' Xanru' ga zoë' Pablo, en gudxë' lé':

—Butipa ládxu'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzö Roma.

Tun xtídza'gaquië' ilútië' Pablo

¹² Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xíguia' channö cabí ilunë' lé' na' gulún xtídza'gaquië', gula'nnë' biti' ca' ilë'aj ilahuë' ga idxinrö chigulútië' Pablo.

¹³ Nayanrö ca choá'gaquië' bönni' na' gulún tsutsu xtídza'gaquië' caní.

¹⁴ Yöjáquië' bönni' ni ga nacu'ë yugu' bixúz unná bé', en bönni' gula tu'zéajni'inë' bönachi judío, ate' gula'nnë':

—Chiben tsutsu xtídza'tu', gunnatu' gunë' Dios netu' xíguia' channö cabí guntu' caní. Biti' gu'aj gágutu' ga gútirötu'-në' Pablo.

¹⁵ Na'a, libí'ili', en bönni' yudo' tu'chi'a tu'söröë', guli'guié' bönni' lo rinná bé'enë' bönni' rójáquië' gudil-la idichë'ë Pablo cuxö para idxinë' ga nudúbili', innalí' ré'ënilí' inábili'-në' Pablo tu didza' gate ga rë'. Netu' cö'ö nistu'-në' la nöza, ate' gútitu'-në' zí'alö ca idxinë' ni.

¹⁶ Biyönibi' bi'i bönni' queënu nigula zanë' Pablo ca na' ila'bö' nísie' Pablo, ate' guyéajbi', en guyú'ubi' yu'u zxön na', ate' yöjtíxjö'ibi'-në' Pablo.

¹⁷ Pablo bulidzë' tuë' bönni' nacu'ë lu në'ë bönni' rójáquië' gudil-la en gudxë' lé':

—Guchë'ë-bi' bi'i ni lahuë' bönni' lo, tu' nuá'abi' didza' guiëbi'-në'.

¹⁸ Ní'irö bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lé':

—Bulídzë' Pablo, bönni' na' yu'ë lidxi guié, neda', en gúta'yuë' lahua' idigu'a-bi' bi'i ni lo', tu' ré'ënilí' gú'ílenbi' lí' didza'.

¹⁹ Bönni' lo na' gudélë'ë ná'abi', en guchë'ë-bi' quez, ate' gunábinë'-bi', rnnë':
—¿Bizxi na' ral-la' guío' neda'?

²⁰ Lëbi' gúdxibi'-në':

—Chinúngaquië' didza' bönni' judío iláta'yuë' lo' ichë'u-në' Pablo cuxö, para idxinë' lógaquië' bönni' yudo' tu'chi'a tu'söröë'. Ilë' lí' té'ënnë' ila'nábinë' lé' tu didza' gate ga rë',

²¹ pero biti' tséajlë'u le ila'nnë' tu' nadödi choá'gaquië' ila'bö' nísie' Pablo. Chigulún tsutsu xtídze'ë gula'nnë' gunë' Dios légaquië' xíguia' channö cabí ilútië' lé'. Biti' bi ilë'aj ilahuë' ga idxinrö ilútië' lé'. Chizóagaquië' ta'bözë' sí' lu no'o gunu' le ila'nábinë' lí'.

²² Ní'irö bönni' lo na' rinná bé'enë' bönni' rójáquië' gudil-la gunná bé'enë'-bi' cuntu nu guiëbi' lé' na' chigúdxibi' lé', ate' ní'irö busól-lë'ë-bi' bi'i ni.

Ridxinë' Pablo lahuë' Félix, bönni' rinná bē'ë luyú na'

²³ Ní'irö bönni' lo na' bulidzë' chopë' bönni' nacu'ë tu gáyu'ë bönni' rōjáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' rōjáquië' gudil-la ta'zë'e ní'agaquië', en tsónnalalay yu' chië' bönni' rōjáquië' gudil-la dxíagaquië' böa', en chopa gáyu'ë bönni' rōjáquië' gudil-la ilu'ë yaga tuchi' para tsōjáquië' yōdzō Cesarea idú ridōdi xtsō'.

²⁴ Lésca' gunná bé'enë' légaquië' ulu'cözë'-ba' tu böa' cuíë'-ba' Pablo, ate' ila'chë'ë lë' dxí'ado', cabí bi gaca queë', para idxinë' lahuë' Félix, bönni' lo rinná bē'ë uláz que Roma.

²⁵ Gusöl-lë'ë ca' tu guichi le rnna caní:

²⁶ "Neda', Claudio Lisias, ruzúaja' quiu' lu guichi, bönni' lo unná bē', Félix. Rugapa' Dios li'.

²⁷ 'Bönni' ni risöl-la'a-në' quiu', gula'zönë' bönni' judío lë', en gulë'ënnë' ilútië' lë'. Cate' gúquibe'eda' nababë' Roma, guchë'gaca'-në' bönni' rōjáquië' gudil-la, en busölá'-në' lu ná'agaquië' judío na'.

²⁸ Gú'unida' inōzda' bizxi benë', lë na' tu'zéguië' lë' didza' bönni' judío, ate' guchë'a-në' légaquië' bönni' yudo' tu'chi'a tu'söröë' légaquië'.

²⁹ Cate' buédxí didza', gunōzda' tu'zéguië' lë' didza' ca naca le rinná bē' xibá quegaquië', en biti' bi nabáguë'ë bönni' ni para nu guti lë', o nu cu'u lë' lidxi guíë'.

³⁰ Ní'irö cate' bidxín nu gudíxjōi' neda' ta'bō' nísíë' yugu' bönni' judío lë', la' gusöl-la'tea' lë' ga zu', ate' gunná bé'egacada'-në' bönni' ni tu'zéguië' lë' didza' ila'dxinë' lo' li', para ila'guíxjōi'inë' li' bi didza' nápaqaquië' lë'. ¡Dios gun tsáhuë'ë li'!"

³¹ Ní'irö bönni' na' rōjáquië' gudil-la gula'guélë'ë Pablo, en gulunë' ca na' chigunná bé'enë' légaquië', ate' gula'chë'ë lë' yōdzō Antipatris, ni' naca chi'í dzō'ölö.

³² Cate' za' rení' ia'tú dza bönni' rōjáquië' gudil-la ta'zë'e ní'agaquië' yōjhu'ōjgaquië' Jerusalén, ate' bönni' rōjáquië' gudil-la dxíagaquië' böa' bulu'ú'ë nōza, dzágagaquië' Pablo.

³³ Cate' bönni' na' rōjáquië' gudil-la nachë'gaquië' Pablo bila'dxinë' Cesarea, bulu'nōdzjë' guichi na' lu nē'ë bönni' rinná bē'ë uláz que Roma, en bulu'sudxinë' Pablo lahuë'.

³⁴ Gudōdi bulabë' bönni' unná bē' guichi na', gunábinë' Pablo gazxi bönni' lë'. Cate' gúquibe'enë' nababë' luyú Cilicia,

³⁵ gudxë' lë':

—Yónida' le innó' cate' ila'dxín ni nupa tu'zegui li' didza'.

Ní'irö gunná bé'enë' ilún chi'ë lë' lu yu'u yúlalui' ga ribō'ë Herodes, bönni' rinná bē'ë, para uchi'a usöröë' bönachi.

24*Pablo ru'ë didza' uláz queë' lahuë' Félix*

¹ Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zējajni'inë', en Tértulo, tu bönni' nazë'ede'enë' didza'. Bila'dxinë' lahuë' bönni' unná bē', ate' gula'nnë' queë' Pablo.

² Cate' chibulu'lidzë' Pablo, ate' bidxinë' ni', gusí lahuë' Tértulo ruzégui'ë lë' didza', rnnë':

—Bönni' lo unná bē', Félix. Ni'a quiu' li' ruzi'tu' xibë le run tsahui' netu', ate' lu yöl-la' réajni' i quiu' rinná bé'enu' dxi'a bönachi uládz queëtu'.

3 Yúgu'tè lè ni ruzi'tica'stu' xibé gáti'tës, ate' idú ládxi'tu' rëtu' li': "Xclenu'."

4 Na'a, para cabí upízxjarötu' li', ráta'yua' lo' gun zxon ládxi'u, yönnu' tu le do' guíëtu' li'.

5 Gúquibe'etu' bönni' ni rigú'u yöl-lë'ë bönachi, en runë' ga ta'dá'baguë'ë yúlahui' yugu' bönni' judío nacu'ë idütë yödölió, en náquië' bönni' lo quegaquië' bönni' dá'gaquië' bönni' Nazaret na'.

6 Lësca' gú'unnë' gun dí'tjanë' yudo' queëtu'. Que lè ni na' guzxöntu'-në', en gú'unitu' uchi'a usörötu' lë' ca naca xibá queëtu'.

7 Ní'irö Lisias, bönni' lo rinná bé'enë' bönni' röjáquië' gudil-la bidxinë' ga zóatu', en lu yöl-la' sñia' zxon bugüë' bönni' ni lu na'tu'.

8 Ní'irö gunná bé'enë' Lisias na' ídigaca nupa tu'zegui lë' didza' lo' li'. Na'a, li' caz, cate' rinabi yúdxinu'-në' Pablo ni, huáca inözinu' gate ga rë' yúgu'tè lè ni ruzéguitu' lë' didza'.

9 Lësca' caní gula'nnë' yugu' bönni' judío ni', gula'nnë' naca caz caní.

10 Ní'irö butásö në'ë bönni' rinná bë'ë uláz que Roma na' para gu'ë didza' Pablo, ate' lë' bubí'ë didza', gunné':

—Idú ládxa'a quíxjö'a ca naca le runa', tu' chinaca zían iz ruchi'a rusöröu' le raca quegaca bönachi ladztu'.

11 Le bena' huáca inabu'. Biti' réquini chinnu dza bidxina' Jerusalén para tseaj ládxa'a-në' Dios.

12 Biti' yöjxáca'gaquië' neda' nu ridíl-lalena' didza', en bití' bena' ga ulu'tsatsa bönachi ga naca chila yudo', en cabí lu yu'u ga tu'dubë' tu'sédë' queë' Dios, en cabí lu yödzo.

13 Biti' ca' gaca ulu'béaj lië' yugu' lè ni tu'zéguië' neda' didza'.

14 Lè ni rixóalëpa' lo'. Ca runa' xichinë' Dios quegaquië' xuz xtó'otu' nalëbi ca le tu'sëdinë' légaquië', pero bönni' judío ni tu'ë le: Le ridá'baga' Dios, tu' réajlé'a yúgu'tè le rinná bé' xibá queë' Dios, enca' yúgu'tè le bulu'zúajë' bönni' gulu'ë didza' uláz queë' Dios.

15 Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, bönachi tsahui', en bönachi bití' náca'gaca tsahui'.

16 Que lè ni na' ruí'i ládxi'tica'sa' cabí ibága'a le gun ga uxós ládxi'da'ahua' neda' lahuë' Dios o lógaca bönachi.

17 'Gudödi zoa' ga yúbölö idú chopa tsonna iz, budxina' ga nacuá' bönachi uládz quia' para unöd'zja' dumí le gácalen bönachi yechí', en unöd'zja' le rigú'a lahuë' Dios.

18 Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuína' ca naca que yudo', en cabí nutuba' bönachi zían, en cabí nuna' ga ulu'tsatsa bönachi.

19 Yugu' bönni' judío ni' ral-la' ila'dxinë' lo' li', en ulu'zéguië' neda' didza' channö nápa'gaquië' neda' didza'.

20 Ila'nnátsöquië' bönni' judío ni channö bulu'dzölinë' bi le cabí naca dxi'a bena' cate' ni' bidxina' lógachië' bönni' yudo' tu'chi'a tu'söröë' légaquië'.

21 Tuz cate' ni' zoa' lógachië', bë'a zidzaj didza', gunniá': "Ruchi'a rusöröli' neda' na' a tu' runa' löza ulu'bán nupa chinátigaca."

22 Cate' biyönnë' Félix didza' ni, en dxí'ado' chinözinë' ca naca que lè na' rusëdinë' Pablo, buzë lálhui'së' ca' didza' bizxaj ni, gunné':

—Cati' idxinë' Lisias, bönni' lo rinná bé'enë' bönni' röjáquië' gudil-la, údxi yönida' ca naca didza' bizxaj queëli'.

²³ Ní'irö Félix gunná bé'ené' tu bönni' nacu'ë lu në'ë bönni' röjáquié' gudil-la zoé' ni', gun chí'ë Pablo, pero gu'ë lë' lataj tē' lö'a, en bití' uzáguë'ë xinözgaquié' böchi' luzé'ë duyúgaquié' lë' bi dxin iluné' queé'.

²⁴ Chopa tsonna dza gudzé, bidé' leyúbölö Félix na'. Drusila, nigula queé' dzáganu lë'. Nácanu nigula judío. Félix bulidzē' Pablo, ate' buzē' náguié' xtídzē'ë ca naca le réajlë'ëru' Jesucristo.

²⁵ Cate' bē'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröë' Dios rē'u dza si' za', ní'irö gudxi bidzöbinē' Félix, en gudxē' Pablo:

—Guyéaj na'a. Cate' gapa' lataj ulidza' li'.

²⁶ Lē'sca' gú'unnē' Félix si'ë dumí le unödzejē' Pablo lē' para usanē' lē', ate' que lē' ni na', zían luzuí bulidzē' Pablo, en bē'lenē' lē' didza'.

²⁷ Cate' bizá'a chopa iz guyáziē' Porcio Festo xilatjē' Félix, ate' tu' gú'unnē' Félix gunē' le tsaza ládxí'gaquié' bönni' judío, bucá'anē' Pablo nadzunē' lidxi guíé'.

25

Rídxinē' Pablo lahuē' Festo, bönni' unná bē'

¹ Bidxinē' Festo yödzö Cesarea para tsáziē' xilatjē', gáquié' bönni' unná bē' ulaz que Roma. Cate' bizá'a tsonna dza buzē'ë yödzö na', sa'yéajē' Jerusalén.

² Cate' bidxinē' Festo ní' yugu' bixúz unná bē', en yugu' bönni' lo quégaca bönachi judío bila'dxinē' lahuē' para ila'nnē' queé' Pablo, ate' gulá'tayuē' lahuē' Festo

³ bi uzá' ládxē'ë quégaquié', isöl-lē'ë nupa tsöjxí'gaca Pablo, para udxinē' Jerusalén. Gulē'ennē' ila'bó' nísíē' lē' la' nöza para ilútiē' lē'.

⁴ Bubi'ë didza' Festo, gudxē' légaquié':

—Lu yödzö Cesarea nadzunē' Pablo, ate' ral-la' tseja' ní' cuxö huidzaj nisö.

⁵ Que lē' ni na', nútí'tëslöli' dē lu ná'ali', ral-la' sá'lenli' neda', en channö nabáguē'ë bönni' ní' xíguia', huáca uzéguili'-nē' didza' ní'.

⁶ Gudzenē' Festo Jerusalén idú ca xunu' gubidza, ate' ní'irö böajē' Cesarea. Cate' guzá' rení' ia'tú dza gurö'ë ga ruchi'a rusöröë', en gunná bé'ené' nupa tsöjxí'gaca Pablo.

⁷ Cate' chibidxinē' Pablo ní', yugu' bönni' judío narúajgaquié' Jerusalén gula'gu'ë lē' lē'alö, en zían le gula'nnē' queé'. Bulu'zéguié' lē' le tu'subáguē'ë lē' xíguia', pero bití' guca ulu'béaj liē' yugu' lē' na' gula'nnē' queé'.

⁸ Ní'irö bē'ë didza' Pablo uláz queé', gunné':

—Bití' bi le ruá' dö' bena' que xibá quégaquié' bönni' judío, en cabí que yudo' quégaquié', en cabí queé' César, bönni' Roma, rinná bé'ené' rē'u.

⁹ Gú'unnē' Festo gunē' le ila'yaza ládxí'gaquié' bönni' judío, ate' bubi'ë didza', gudxē' Pablo:

—¿Rē'ënu' so'o Jerusalén, ga na' soa nu uchi'a usörö li' ca nácagaca lē' ni ta'nnē' quiu'?

¹⁰ Bubi'ë didza' Pablo, gudxē' lē':

—Zoa caza' ga rö'ö nu ruchi'a rusörö uláz queé' César, ga na' ral-la' uchi'a usöröu' neda'. Bití' bi huiá' dö' nuna' quégaquié' bönni' judío, ate' chinöz quézinu' lē' ni.

¹¹ La'tu' nuna' tu le ruá' dö', o bítí'tës le run ga ibága'a xíguia' gátia', bití' tá'baga'a gátia'. Na'a, channö cabí nuna' ca ta'nnē' quia' bönni' ni, cuntu caz

nu dë lu n'ë e udödi neda' lu ná'agaquië'. Rinaba' tseja' lahuë' César ga udxí'a urö quia'.

12 Cate' Festo chibë'lenë' yugu' bönni' yúlahui' didza', bubí'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

Ru'ë didza' Pablo lahuë' Agripa, bönni' unná bë'

13 Gudödi chopa tsonna dza, bidxinë' Agripa, bönni' rinná bë'ë lu yödzö Cesarea, dzáganu Berenice lë', duyúgaquië' Festo.

14 Cate' chigula'cu'ë ní' zían dza, Festo buluí'inë' Agripa, bönni' rinná bë'ë, ca naca queë' Pablo. Gudxë' lë':

—Zoë' tu bönni' ni buca'anë' Félix lë' lidxi guíë.

15 Cate' guzóa' Jerusalén, yugu' bixúz unná bë', en bönni' gula tu'zéajni'inë', bila'dxinë' lahua', ate' gula'nnë' queë' bönni' ni. Gula'nábinë' neda' ichuga' queë' gátíë'.

16 Neda' bubí'a didza', gudxa' légaquië' bití' nalëbiguequinë' bönni' Roma ila'chúguië' queë' tu bönni' gátíë' channö cabí ila'dxini lahuë' nupa tu'zegui lë' didza', para gaca ubi'ë didza' ca naca lë' na' ta'nnë' queë'.

17 Que lë' ni na', cate' bila'dxinë' légaquië' ní, bití' ca' gudzeda', pero cate' guzá' guyeaní' ia'tú dza gurö'a ga ruchí'a rusöröa', ate' gunná bé'eda' nupa yöjxí'gaca bönni' ni.

18 Cate' gula'cu'ë ní bönni' na' tu'zéguië' lë' didza', bití' bi gula'nnë' queë' ca busaca' quia' ila'nnë'.

19 Gula'nnë' queë' bal-la didza' bizxaj ca naca le ta'yéajlë'ë Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'ë rnnë' ni zoë' nabanë' leyúbölö.

20 Tu' buchíxida' ca nácagaca lë' ni, gunábida'-në' Pablo channö rë'ënë' tsejë' Jerusalén, ga ní' soa nu uchi'a usörö lë' ca nácagaca lë' ni.

21 Ní'irö cate' gunabë' Pablo tsejë' lahuë' Augusto César para uchi'a usöröë' lë' ní', gunná bé'eda' bönni' rójáquië' gudil-la ilún chí'igarë' lë' cate' gála'rö dza isöl-la'a-në' lahuë' César.

22 Ní'irö Agripa gudxë' Festo na':

—Lëzca' neda' rë'ënda' yönida' le innë' bönni' na'.

Festo gudxë' lë':

—Cuxó yönnu' le innë'.

23 Cate' za' rení' ia'tú dza, len ba zxon bila'dxinë' Agripa, en Berenice ní'. Gula'yázië' ga ral-la' ilu'ë didza', dzágagaquië' légaquië' bönni' unná bë', ate' gula'sól-lë'ë nupa tsöjxí'gaca Pablo.

24 Ní'irö Festo gudxë' Agripa, bönni' unná bë':

—Bönni' unná bë', Agripa, en yúgu'téli' zóali' ní tsözxón len netu'. Ni zoë' rilë'eli'-në' bönni' na', ta'nnë' queë' yúgu'të bönni' judío nacu'ë Jerusalén, enca' nupa naca' ni, të' neda' ral-la' gátíë'.

25 Runi neda' bití' bi benë' le nabáguë'ë xíguia' gátíë', pero tu' gunabë' lë' cazë' tsejë' ga uchi'a usöröë' Augusto César lë', que lë' ní na' chinuna' quia' isöl-la'a-në' lahuë' Augusto.

26 Tu' cabí nözda' bi ral-la' uzúaja' lu guichi le uzegui bönni' ni didza' para isöl-la'a lu nëë César, xana', que lë' ní na' nachë'a-në' loli', en le nácarö lo, nachë'a-në' lo' li', Agripa, bönni' unná bë', para cate' údxí rinábini yudxu'-në', ní'irö inözda' bi ral-la' uzúaja' lu guichi ca naca queë' bönni' ni.

²⁷ Réquida' biti' naca dxi'a isöl-la'a-në' nu bönni' náguë'ë ni' channö cabí gaca ulu'a le nabáguë'ë.

26

Didza' bë'ë Pablo uláz queë' lahuë' Agripa, bönni' unná bë'

¹ Ní'irö Agripa gudxë' Pablo:

—Dë lataj gu'u didza' uláz quiu'.

Buchila në'ë Pablo lahuë' Agripa, ate' gusí lahuë' ru'ë didza', rnnë':

² —Bönni' unná bë', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'të le tu'zéguië' bönni' judío neda' didza'.

³ Raza ládxi'ra' tu' núnbë'u yúgu'të le nalëbiguequinë' tunë' bönni' judío, enca' yugu' lë ni ridíl-latu' didza'.

Yugu' le benë' Pablo zí'atëlö

⁴ Gunnë' ca' Pablo:

—Nözguequi quézinë' yúgu'të bönni' judío ca na' bena' ga gudéla'të cuídia' ga nacua' bönachi uláz quia', enca' lu yödzö Jerusalén.

⁵ Nözguequi quézinë' ca', en huáca íla guíxjö'ë ca na' bena' dza ni'te. Guca' bönni' fariseo. Yugu' bönni' fariseo tu'i ládxi'gacarë' íla'yéaj ládxi'gaquië' Dios ca tunë' ía'zícá'rë' bönni' judío.

⁶ Na'a, zoa' ni loli' para nu uchi'a usörö neda' tu' runa' löza Dios, usubanë' bönni' nati, en gunë' ca na' guzxi' lu në'ë lógaquië' xuz xtó'otu'.

⁷ Tunë' löza yugu' bönni' ídxinnu có' di'a dza queëtu' íla'déli'në' lë na' guzxi' lu në'ë Dios. Que lë ni na' ta'yéaj ládxi'gaquië' Dios, en tunë' xichinë' rëla, en tē dza. Tu' runa' löza lë ni, nuzéguigaquië' bönni' judío neda'. Caní naca, bönni' unná bë', Agripa.

⁸ Na'a, ¿naru' réquitseli' libí'ili' biti' naca le tséajlë'ëru', usubanë' Dios bönni' nati?

Pablo gudxía ládxe'ë bönachi queë' Cristo

⁹ Gunnë' ca' Pablo:

—Lëzca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret.

¹⁰ Caní bena' lu yödzö Jerusalén. Gulu'a zían bönachi ta'yéajlë' Jesús lidxi guíë, tu' bulu'dödë' yugu' bixúz unná bë' lu na'a yöl-la' unná bë'. Cate' gulútië' bönachi ni', bënlena' légaquië' tuz didza'.

¹¹ Zían luzuí busaca' zí'a yugu' bönni' ni' para ulu'sán ládxi'gaquië' ca ta'yéajlë'ë Cristo. Caní bena' gapa naca lu yu'u ga tu'dubë' bönni' judío, en tu'sédë' queë' Dios. Guléde'eda' légaquië', ate' gudxía ládxa'a légaquië' ga bidxintë guyija' gapa nacua' yödzö zí'tu' para tsöjxóngaca'-në'.

Ríguíxjö'ë Pablo ca böáquië' queë' Cristo

¹² Gunnë' ca' Pablo:

—Para guna' caní guyija' yödzö Damasco, ate' bixúz unná bë' nasöl-la'gaquië' neda' nudödigaquië' lu na'a yöl-la' unná bë'.

¹³ Caní guca, bönni' unná bë', Agripa. Cate' ni' sa'yija' la' nöza, ni' naca idú huagubidza, bilé'eda' tu' bení' lúzxi'ba le buzení'rö ca gubidza. Buzení' ga na' zoa', en ga nacua' nupa söjácálen neda'.

¹⁴ Ní'irö yúgu'tëtu' gudzö'ötu' lu yu, ate' biyönda' chí'i nu bulidza neda'. Bë'ë didza' hebreo, gunnë': “Saulo, Saulo, ¿bixz que ribía ládxi'u neda'? Run zí'

cuinu', ridá'bagu'u neda'. Raca quiu' ca raca queéba' bēdxī, run zi' cuinba', richégu'ba' yaga tuchi' le túndē'ē-ba' zi'."

¹⁵ Ní'irō gudxa'-nē': "¿Nuzxi li', Xanru?" Xanru' gudxē' neda': "Neda' ni Jesús, Nu na' ribía lādxi'u."

¹⁶ Na'a, guyasa, en guzui', tu' buluf'i lahua' li' na'a, para uzóa' li' gunu' xichina', en gunu' ba nalí que lē ni chibilē'enu', enca' quégaca le uluf'ida' li', uluf'i lahua' ga zu'.

¹⁷ Usólá' li' lu ná'agaquiē' bōnni' uládz quiu', en lu ná'agaquiē' bōnni' izá'a, lógaca nupa ni' risól-la'a li' na'a.

¹⁸ Risól-la'a li' ga na' nacué para gunu' ga ulu'huóalaj guiōj lógaquiē', en ulu'huóáquiē' queē' Dios, en ulu'cá'anē' le naca chul-la que dul-la', en ila'dxinē' lu bení'. Ulu'rúajē' lu na' Satanás tu' xihui', en ila'yáziē' lu nē'ē Dios. Channō ila'yéajlē'ē neda', Dios uniti lahuē' légaquiē', en ugúē' dul-la' nabága'gaquiē', ate' ila'déli'nē' ila'bábalenē' bōnachi chinubéajē' Dios quez queē'."

Benē' Pablo ca naca le buluf'inē' Xanru' lē'

¹⁹ Gunnē' ca' Pablo:

—Qui lē ni na', bōnni' unná bē', Agripa, bití' gudá'baga'a guna' le buluf'inē' Dios, zoē' yehua' yubá, neda'.

²⁰ Buzéajni'ida' nupa nacué' yōdzō Damasco, en gudōdi ni' nupa nacué' Jerusalén, en nupa nacué' luyú Judea, en bōnachi yugu' yōdzō zi'tu' para ulu'bf'i lādxi'gaca, en ulu'huóáca queē' Dios, en ilún le ilaca bē' chibulu'bf'i lādxi'gaca.

²¹ Tu' bena' caní, yugu' bōnni' judío gula'zōnē' neda' cate' ni' zoa' lō'a yudo', en gulē'ennē' ilútiē' neda'.

²² Ní'irō gúcalenē' Dios neda', ate' ga ridxintē na'a dza zoa' idú lādxa'a, runa' ba nalí lógaquiē' bōnni' cá'asō, en lógaquiē' bōnni' lo. Bití' ruá'a didza' yúbölō, pero ca gula'nnasē' zí'alō bōnni' gulu'ē didza' uláz queē' Dios, enca' ca gunnē' Moisés ca ral-la' gaca.

²³ Gula'nnē': "Qui'í sáquē'ē Cristo, en tōdi gátíē', gáquiē' nu isí lo ubán tsaz lu yól-la' guti, para ulu'ē lahui naca lōza ila'dxín bōnachi lataj bení', en gaca libán que lē ni lógaca bōnachi uládz queétu', enca' lógaca bōnachi izá'a."

Pablo ruzéajni'inē' Agripa para tséajlē'ē Cristo

²⁴ Cate' chibē'ē Pablo yugu' didza' ni, le bē'ē uláz queē', ní'irō bē'ē zidzaj didza' Festo, gunnē':

—¡Nachixi icju', Pablo! ¡Tu' nazédado'o, chiguchixi icju'!

²⁵ Ní'irō Pablo gudxē' lē':

—Bití' nachixi icja', rea' li', Festo, ate' didza' ni ruá'a naca idútē li, en naca lesaca'.

²⁶ Lē cazē' Agripa, bōnni' ni rinná bē'ē, nōzinē' yugu' lē ni, en que lē ni na', idú lādxa'a ruá'a didza' lahuē' lē'. Nōzinē' yugu' lē ni, tu' cabí guca bagáchi'sō lē na' guca.

²⁷ Bōnni' unná bē', Agripa. ¿Naru' réajlē'u le gula'nnē' bōnni' gulu'ē didza' uláz queē' Dios? Nōzda' réajlē'u lē ni.

²⁸ Ní'irō Agripa gudxē' Pablo:

—Ia'látí'sō la' réquinu' idéli'nu' neda' para gaca' queē' Cristo.

²⁹ Pablo gudxē' lē':

—Ni'a quee' Xanru' Dios rë'ënda', sal-la' ia'láti'sò o yenni', calégasò li', pero lësca' yúgu'të nupa ni ta'yöni neda', gácali' idú ca naca' neda', néquida' quee' Cristo, pero caléga gága'li' du gufë ca ni nága'a neda'.

³⁰ Cate' budxi bë'ë Pablo didza' ni, guzuínë' bönni' lo unná bë' na', ate' gulu'zúinë' ca' bönni' rinná bë'ë, en Berenice, en nupa rò'lengaca légaquië'.

³¹ Cate' bila'rúajë' quez, gulu'í xtídza'gaquië', ta'nnë':

—Biti' bi nunë' bönni' ni le nabáguë'ë xíguia' gátie', en caléga tsázië' lidxi guíë.

³² Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

27

Ta'söl-lë'ë Pablo yödzo Roma

¹ Cate' chigulunë' quegaquië' ila'söl-lë'ë netu' lë'e barco para tséajtu' yödzo Roma, luyú Italia, gula'guélë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bé'enë' tu cò' bönni' rójáquië' gudil-la nazí'i le: Bönni' Quee' Augusto Rójáquië' Gudil-la.

² Gurentu' tu lë'e barco que luyú Adramitio, le ral-la' tódi yugu' yödzo gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzo Cesarea. Aristarco, tu bönni' yödz Tesalónica, le nababa luyú Macedonia dzáquië' netu'.

³ Cate' za' rení ia'tú dza, bidxintu' yödzo Sidón, ate' ni' Julio, bönni' na' rinná bé'enë' bönni' rójáquië' gudil-la, lu yöl-la' dxi'i ladxi' quee', bë'ë Pablo lataj tsejë' ga nacu'ë böchi' luzë'ë para ilácalenë' lë' bi riyadzaj quee'.

⁴ Gudödi ni', bubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga röö dxi bö' na' recja, tu' za' saca' lotu' bö' recja lu nísado' na'.

⁵ Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzo nababa luyú Licia.

⁶ Bönni' na' rinná bé'enë' bönni' rójáquië' gudil-la, en nachë'ë netu', yöjxáquië' tu barco ni' narúaj yödzo Alejandría que luyú Egipto, barco na' zeaj luyú Italia ga röö yödzo Roma. Gulu'ë netu' lë'e barco na'.

⁷ Guzá' barco na' tsahui' ládxi'do' zían dza, ate' len yöl-la' rizáca'sò bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga röö dxi bö' na' recja, en bidxintu' ga nalá' yödzo Salmón luyú Creta na'.

⁸ Lu yöl-la' rizáca'sò gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzo Lasea.

⁹ Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni'inë' légaquië',

¹⁰ rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queëru' gátiru'.

¹¹ Bönni' na', rinná bé'enë' bönni' rójáquië' gudil-la, gunyéjlë'ërë' le gula'nnë' bönni' na' dë lu në'ë barco, en bönni' xan caz, ca le gunnë' Pablo.

¹² Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni na' la'tu' biqui' yúgu'të bönni'

nacu'ë lë'e barco na' gulún tuz xtída'gaquië' ulu'zë'ë ni', channö huáca ila'dxinë' ga ta'dxín barco lu yödzo Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulë'ënnë' ulu'gá'anë' ni' yugu' beo' ziaga.

Recja bö' budunu' lu nísado'

¹³Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca' té'ënnë', ate' bulu'lisë' guié' zi'i naga' du guié' le ruzóa dxisö barco, ate' gudödi barco na' gala' ra' luyú bidxi na' nazí'i le Creta.

¹⁴Ia' tú chí'isö ca', guyecja tu bö' budunu' za' lotu', nazí'i le Euroclidón.

¹⁵Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bé'ëtu' lataj bö' na' buzéaj barco na' ga rë'ëni.

¹⁶Cate' gudödi barco na' ga bidxintu' tsölá'a tu luyú bídxido' nazí'i le Cauda, tsölá'a ni' ga bití' récjada' bö', lu yöl-la' rizáca'sö buchísatu' bárcodo' ná'ayöj barco zxön na' yú'utu'.

¹⁷Gudödi burentu' le lahui barco zxön na', ní'irö béga'ratu' barco zxön na'. Zxante barco na' buchölitu' du, para cabí ilá'a lu le ridxía nisa na'. Tu' gúdxitu' tódi barco na', en inídxí' lu yuzxi lu nísado' na', buzötjatu' lari' que, le rutubi bö' rusá' barco na'. Canisö bé'ëtu' lataj bö' na' recja buzéaj barco.

¹⁸Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'.

¹⁹Dza bunny, len na' cuintu' gurú'unatu' le tun dxin que barco na' lu nísado'.

²⁰Cate' chiguca zían dza bití' rilé'etu' gubidza, en nitú bölaj, en tu' récjada' bö' na' ruzéaj barco na' yú'utu', bití'rö runtu' löza ulatu'.

²¹Tu' chiguca zían dza bití' nágutu', guzuínë' Pablo gatsaj láhui'lö légaquië', en gudxë' légaquië':

–Libí'ili', bönni', dxí'arö guca la'tu' uzë' nágali' neda', en cabí uzá'aru' luyú Creta, en cabí udutságaru' lë' ni riguí' rizáca'ru', en yugu' lë' ni raca ditaj que barco ni.

²²Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili' tscali' zóali' ni, sal-la' gaca ditaj barco ni.

²³Caní gaca tu' budulu'i' lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'.

²⁴Gubáz lá'ayi na' gudxë' neda', gunné': "Pablo, bití' gádxinu'. Run bayudxi idxinu' lahuë' César. Tu' nadxí'inë' Dios lí', usölë' yúgu'të bönachi nacué'len lí' lë'e barco ni."

²⁵Que lë' ni na', tsutsu guli'gún ládxi'li', tu' ruzxöni ládxa'a-në' Dios, gaca ca na' chigudxë' gubáz lá'ayi queë' neda'.

²⁶Caní gaca sal-la' run bayudxi gaca ditaj barco ni tu luyú bídxido', ga ni' tsöjca'ana rë'u.

²⁷Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxí' yëla guléquinë' bönni' tunë' dxin lu barco na' chizóa idxín barco gala' tu luyú bidxi.

²⁸Gula'ru'unë' du lu nísado' na', ate' gula'nözinë' galaj ösa naca ga bidxintë ga rë' lu nisa. Cate' gudödi barco na' ia'láti'do', gula'ru'unë' du na' leyúbölo, en gula'nözinë' chinaca chinu ösa.

²⁹Tu' guládxinë' tsöjdín barco na' lu guiöj, que lë' ni na', tsölá'a láhuilö que barco gula'ru'unë' lu nísado' tapa guié' zi'i nága'gaca du guié' le tu'zóa dxisö barco lu nisa. Lu yöl-la' ruúbi ruguí'isö ládxi'do'gaquië' gula'bözë' tsení'.

³⁰ Ní'irö gulë'ënnë' bönni' tunë' dxin lu barco ulu'zxúnnajë' lë'e barco na'. Bulu'zötjë' bárcodo' na' dë lahui barco zxön na' lu nísado'. Gulunë' ca të'ënnë' ilu'ë ia'lati' zi'tu' guifë zi'i na' naga' du guifë le ruzóa dxisö barco na', le zoa saca' tsölá'a láhuilö.

³¹ Ní'irö Pablo gudxë' bönni' na' rinná bé'enë' bönni' röjáquië' gudil-la, tsözxön len bönni' na' röjáquië' gudil-la, gunnë':

—Channö cabí ulu'gá'anë' bönni' ni lë'e barco ni, biti' gaca uláli'.

³² Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

³³ Cate' chizá' rení', Pablo gúta'yue' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, biti' bi náguli'.

³⁴ Que lë ni na', ráta'yua' loli' gáguli' para huóaca ládxi'li', tu' cabí gátili' nituli' libí'ili'.

³⁵ Cate' Pablo budxi bë'ë didza' ni, gudélé'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzuzxjë' yöta xtila na', en gusi lahuë' rahuë'.

³⁶ Ní'irö bila'dipa ládxi'gaquië' yúgu'të', en gulahuë'.

³⁷ Tscatu' zóatu' lë'e barco na', gúcatu' idú chopa gayuá' yu' tsónmalalay yu' chizxópatu'.

³⁸ Gudödi gulahuë', en bulu'huöljanë', ní'irö gula'rú'unë' zxoaxtila dë lë'e barco na' lu nisa, para ulu'lahuë' yua' dzö'ö lë'e barco na'.

Raca ditaj barco lu nísado'

³⁹ Cate' chiguca lahui' dza, yugu' bönni' tunë' dxin lu barco na' biti' bulu'únbë'ë luyú na'. Bila'lë'enë' ga röjrö' nisa zxön na' gatsaj láhui'lö luyú bidxi na', en dë lataj ni' ga naca lachi' ra' nísado'. Gulë'ënnë' ilunë' ga tsaza barco na' ga ni'.

⁴⁰ Ní'irö bulu'sedxë' yugu' du guifë nága'gaca yugu' guifë zi'i tu'zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxi' barco. Ní'irö bulu'chisë' lari' que le rutubi bö', le zoa tsölá'a láhuilö barco na', ate' ní'irö gusi lö ridödi barco saca' ga röjrö' nísado' gatsaj láhui'lö luyú bidxi na'.

⁴¹ Cate' bidxin barco na' tu lataj ga ridzaga chopa nisa, ni' binidxi' tsölá'a láhuilö barco na' lu yuzxi lu nísado' na', ate' bugá'anasö barco na' ga ni'. Bítirö guca bi utá le, ate' tsölá'a cúdzi'lö barco na', gusi lö riguitsaj nísado' na' le, len yöl-la' rizá' que.

⁴² Ní'irö bönni' röjáquië' gudil-la gulë'ënnë' ilütië' bönni' nadzúngaquië', para cabí ila'zxúnnajë', ila'zxóë' lu nisa na'.

⁴³ Bönni' na' rinná bé'enë' bönni' na' röjáquië' gudil-la gú'unnë' usölë' Pablo, ate' gunná bé'enë' bönni' na' röjáquië' gudil-la cabí ilunë' ca na' të'ënnë'. Ní'irö gunná bé'enë' bönni' taca ila'zxóë' lu nisa, zí'alö légaquië' ila'yázië' lu nisa para ila'dxinë' luyú bidxi.

⁴⁴ Gunná bé'enë' ca' yugu' bönni' nagá'anagaquië' ila'zxóë' lu yaga dzö'ö láhuilö barco, en ia'bal-lë' láhuigaca yágado' que barco na'. Caní guca, bulu'lë' yúgu'të'. Canísö bila'dxinë' luyú bidxi na'.

¹ Cate' chibulatu' yúgu'tétu', gunöztu' luyú bidxi ga na' zóatu' nazí'i le Malta.
² Bönni' xidza' nacu'è luyú bidxi na' lu yöl-la' dxi'i ladxi' quégaquiè' gulunè' netu' bal. Gula'béquiè' guí', ate' bulu'lidzè' netu' yúgu'tétu' idítsè'e cuintu', tu' ralaj guiöj, en runda' ziaga.

³ Ní'irö Pablo gúchë'è tu' tsölén huága zxisi bídxido', en cate' gulu'è le lu guí', birúajba' tuba' bëla sínia' lè'e huágado', rizxúnajba' böchila que guí' na', ate' yójtí'iniba' yen nè'è Pablo.

⁴ Cate' bönni' xidza' na' bila'lé'enè' bëla na', nála'ba' yen nè'è Pablo, gulé' tuè' ia'túè':

—Le nácatè bönni' ni náquiè' nu ruti bönachi. Sal-la' bulé' lu nísado', dios queëru' lé' Tshui' bití' ru'è lé' lataj soè' ibanè'.

⁵ Gudxibi nè'è Pablo, en busládzu'è-ba' bëla sínia' na'. Yöjxóatëba' lu guí', ate' lé' bití' bí guca queè'.

⁶ Bönni' xidza' nacu'è ni' tu'yúè' Pablo, bátacaló cö'è gui, o tsö'ötè' gátie'. Ní'irö cate' chigudzé ta'bözè', en bila'lé'enè' bití' bi raca queè', ia'tú le guléquinè', ate' gula'nnè' naca cazè' tu dios.

⁷ Lataj ní'isö dë xiyúè' Publio, bönni' lo que luyú bidxi na', ate' bönni' ni benè' netu' bal. Lu yöl-la' dxi'i ladxi' queè' gulu'è netu' lidxè' idú tsonna dza.

⁸ Dza na' dè' ré'enè' xuzè' Publio na', yu'è xilá, en ré'enè' huè' rön. Guyáziè' Pablo söjyúè' lè', en gudödi bulidzè' Dios, ní'irö guxóa nè'è bönni' huè' na', en bunè' lè'.

⁹ Tu' benè' Pablo lè ni, lësca' bila'dxín nupa te'e ga zoè', nacuá' luyú bidxi ni', en bulu'huóáquiè'.

¹⁰ Yugu' bönni' ni gulunè' netu' bal, en zían le gulunè' queétu'. Cate' chizóa uzá'atu' luyú ni', bulu'nödzjè' yugu' le naquínitu' queétu'.

Ridxinè' Pablo lu yödzö Roma

¹¹ Cate' chiguca tsonna beo' zóatu' ni', ní'irö gurentu' tu lè'e barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsólá'a láchuilö budó' yaga léguequi Cástor, en Pólux, dios bilidí' quégaca bönachi Alejandría na'.

¹² Buzá'a barco na' ga ni', ate' bidxín yödzö Siracusa, ga ni' bugá'anatu' tsonna dza.

¹³ Buzá'atu' ni', ate' gudödítu' tsólá'alö luyú ni', en bidxintu' yödzö Regio. Cate' za' rení' ia'tú dza, tu' recja bö' za' saca' ga rididí' gubidza beo' ziaga, buzá'atu' ni', ate' dza buropi na' bidxíntétu' yödzö Puteoli luyú Italia.

¹⁴ Lu yödzö na' yöjxáca'tu' yugu' böchí'ru' ta'yéajlè'è Cristo, ate' guláta'yué' lotu' ugá'analentu' légaquiè' idú xunu' dza. Cate' bizá'a dza na' buzá'atu' ni' para tséajtu' yödzö Roma, rizè'e ní'atu'.

¹⁵ Chibila'yönnè' böchí'ru' nacu'è Roma chizóa idxintu' ni', ate' bila'rúajè' idixí'gala'gaquiè' netu'. Bila'dxinè' tu yödzödo' nazí'i le Yé'eyi Que Apio. Ia'bal-lè' bila'dxinè' tu lataj nazí'i le Tsonna Yu'u Quégaquiè' Bönni' Yú'ugaquiè' Nöza. Cate' Pablo bilé'enè' légaquiè', bidipa ládxè'è, en gudxè' Dios: "Xclenu'."

¹⁶ Cate' bidxintu' Roma, bönni' na' rinná bé'enè' bönni' röjáquiè' gudil-la, guchè'è bönni' na' nadzúngaquiè', ate' budödè' légaquiè' lu nè'è tu bönni' lo rinná bé'enè' bönni' röjáquiè' gudil-la, ate' bë'è Pablo lataj soè' queèzè', zóalenè' lè' tu bönni' rejè' gudil-la ruyúè' lè'.

Runè' Pablo libán lu yödzö Roma

17 Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', böcha'a, sal-la' biti' bi bena' quégaca bönachi ládzaru', en calëga que le nalëbiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guië'.

18 Ní'irö cate' chigula'nabi yúdxinë' neda' bönni' Roma, gulë'ënnë' ulu'sanë' neda', tu' gulë'quibe'enë' biti' nabá'ga'a xíguia' gátia'.

19 Yugu' bönni' judío ni' gula'dá'báguë'ë nupa na' gulë'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzë'guia' bönachi uládz queëru' didza'.

20 Que lë ni na' bulidza' libí'ili' para ilé'eda' libí'ili', en gü'ilená' libí'ili' didza', tu' ná'ga'a du guië' ni tu' runa' löza le runru' löza rë'u, bönachi Israel, gácatë lë na' guzxi' lu në'ë Dios gata' queëru'.

21 Ní'irö légaquië' gulë' Pablo:

—Biti' ridxini queëtu' guichi le za' luyú Judea ca naca lë na' raca quiu', en cuntu nu ridxini nu naca böchi'ru' judío, nu usiyöni netu' channö nu bi rnnë' quiu' le ruá' dö'.

22 Na'a, ré'ënitú' yönitu' xtídzú'u, lë na' riguinaj icju', tu' chinözitu' ta'nnë' bönachi yúgu'të lataj quégaca nupa nazi' lu në'eguequi xibá cubi ni.

23 Caní guca, bulu'dxië' bë' tu dza, ate' dza na' bila'dxinë' zianë' ga na' zoë' Pablo. Gusí lahuë' Pablo zílado', ate' ni' gúl-li'ni buzëajni'inë' légaquië', en buchila lá'anë' le rinná bë'ë Dios. Gú'unnë' ulu'f'inë' légaquië' naca idútë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

24 Bal-lë' gula'zì' lu ná'agaquië' didza' bë'ë Pablo, pero ia'bal-lë' biti' ca' gula'yéajlë'ë.

25 Tu' bila'ruájë' choplö, gula'sí lógaquië' tu'zë'ë ni', ate' Pablo gudxë' légaquië', rnnë':

—Didza' nácatë bë'ë Dios Bö' Lá'ayi, lë na' gunnë' Isaías, bönni' bë'ë didza' uláz queë' Dios, ca na' buzëajni'inë' xuz xtó'oru', gunnë':

26 Guyëaj lógaca bönachi ni', yöjödxi légaquië':

Yöni nágali', pero biti' tsëajni'ili'.

Uyuli' iná'ali', pero biti' ilé'eli'.

27 Yugu' bönni' ni chinazidi icja ládxi'do'gaquië',

en biti' bi riyaza icja nágagaquië'.

Gulunë' ca tun nupa nachul-la guiöj lóguequi

para cabí ila'lé'ë len guiöj lóguequi,

en cabí ila'yöni nágaguequi

para cabí ulu'zëajni' i ládxi'guequi,

en cabí ilë'ëni ulu'huöáca queë' Dios

para gaca una' lóguequi.

28 Na'a, ral-la' inözili' lë ni. Dios risöl-lë'ë netu' lógaca bönachi izá'a para ulu'lágaca, ate' légaquië' ila'yönnë'.

29 Cate' Pablo budxi bë'ë didza' ni, bila'ruájë' bönni' judío, ta'díl-lada' dídzë'ë la' légacasë'.

30 Idú chopa iz bugá'anë' Pablo ni', zoë' tu lu yu'u ga na' riguixzjë', ate' benë' bal yúgu'të nupa buduyúgaca Lë'.

³¹ Lu yöl-la' rugu ladxi' benë' libán ca rinná bë'ë Dios. Busédinë' bönachi ca naca queë' Xanru' Jesucristo, ate' cuntú nu buzaga' xinözë'. ¡Ca' naca!

DIDZA' GUSÖL-LË'Ë PABLO YÖDZÖ ROMA

Pablo rugapë' Dios bönachi queë' Cristo nacu'ë Roma

¹ Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxi'a queë'.

² Dza ni'te guzxi' lu në'ë Dios isól-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios.

³ Bulu'zúajë' lu guichi yúgu'të le ral-la' gunë' Zxi'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David,

⁴ pero ca naca bö' naca cazë', le naca lá'ayi, naca bë' náquië' Zxi'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti.

⁵ Ni'a que le benë' Jesucristo ruzí'iru' xibé le ruzá' ládxe'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idútë yödzülió Lë', en ilún ca rnna xtídzë'ë.

⁶ Bítsa'li' libí'ili' ládjagaca bönachi yödzülió na', pero na'a nulidzë' Dios libí'ili' para guéquili' queë' Jesucristo.

⁷ Rugapa' Dios libí'ili', yúgu'tëli' zóali' Roma. Dios nadxi'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queëli' le ruzá' ládxe'ë queëru', en le ribequi dxi ládxi'ru'.

Rë'ënë' Pablo tsöjyüë' bönachi queë' Cristo nacu'ë Roma

⁸ Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queëli' yúgu'tëli', ate' ta'guixjö' bönachi idútë yödzülió ca réajlë'ëli' Jesucristo.

⁹ Idú ládxa'a runa' xichinë' Dios, runa' libán que didza' dxi'a ca naca queë' Zxi'inë'. Nözinë' Dios rulídzatica'sa'-në', en rinábida'-në' gaca tsahui' queëli'.

¹⁰ Rinábitica'sida' Dios, channö naca le ré'ënë' Lë', gunnë' neda' lataj uduyúa' libí'ili'.

¹¹ Caní rinábida'-në' tu' raca ládxa'a ilé'eda' libí'ili' para gaca guna' ga gata' queëli' tu le unödzejë' Dios Bö' Lá'ayi queëli', le gun ga gácali' tsutsu.

¹² Lë na' ré'ënda' naca utipa ládxi'ru' turu' ia'turu', tu' réajlë'ëru' Jesucristo yúgu'tëru'.

¹³ Böchi' luzá'ado', ré'ënda' inözili' lë ni. Zián luzuí bë' ládxa'a guída' ga zóali', pero ga ridxintë na'a bití' runni quia'. Ré'ënda' guída' ga zóali' para guna' ga uzí'ili' xibé libán na' runa', ca na' tu'zí' xibé ia'bal-la bönachi yödzülió ni.

¹⁴ Dë le ral-la' guna' quégaca yúgu'të bönachi, quégaca bönachi nazëdagaca, en quégaca bönachi cabí nazëdagaca, quégaca bönachi ta'yéajni'i, en quégaca bönachi cabí ta'yéajni'i.

¹⁵ Que lë ni na', tsca gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

Yöl-la' huáca zxön que didza' dxi'a

¹⁶ Bití' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risí lo, ré'ënë' Dios ila'yönnë' bönni' judío le, ate' tödi na' ila'yöni ca' bönachi izá'a.

17 Didza' dxi'a ni rulu'i re'u gunë' Dios ga huóácaru' tsahui', channö uyéajlë'ëru' Lë', en biti' gaca chopa ládxi'ru'. Ca naca lë ni nazúaj ca' lu guichi lá'ayi, rrna: "Nu naca tsahui' tu' réajlë' Dios, gata' yöl-la' na'bán que nu na'."

Xíguia' nabága'gaca bönachi

18 Dios, Nu zoa yehua' yubá, bulu'e lahui biti' rilé'enë' dxi'a yúgu'të le ruá' dö', en le cabí naca tsahui' tun bönachi. Gunë' xíguia' yugu' bönni' na', lu yöl-la' biti' naca tsahui' quégaquië' ta'dá'baguë'ë le naca idútë li.

19 Caní gaca quégaquië' tu' nalá' lahui lógaca yúgu'të bönachi le naca bë' zoa cazë' Dios, tu' buluí' quézinë' Dios lë ni ga na' nacu'ë.

20 Dza ni'te cate' si' guta' yödzölió, ga ridxintë na'a dza, yugu' le nunë' Dios nácgaca bë' le cabí gaca ilé'eru' queë' Dios, ca naca yöl-la' huáca idú queë', en le naca cazë' Dios. Que lë ni na', biti' gaca ila'nnë' biti' nabága'gaquië' xíguia'.

21 Cate' ni' gulúnbë'ë Dios, biti' gula'yéaj ládxi'gaquië' Lë' ca ral-la' tseaj ládxi'ru'-në' Dios, en biti' gulë' Lë': "Xclenu'." Que lë ni na', cáasó böaca le gula'zá' ládxi'gaquië', ate' gula'chul-la gula'nítie' tu' nazidi icja ládxi'do'gaquië'.

22 Sal-la' guléquinë' ta'yéajni'inë' yenni', bulu'huóáquië' bönni' biti' bi nözguequinë'

23 tu' bulu'cá'anë' yöl-la' bení queë' Dios Nu zóatica'só, ate' gula'yéaj ládxi'gaquië' budó' guíoj budó' yaga, budó' na' nácgaca ca yugu' bönni' tati cazë', en ca yugu' böa'do' zoa xilíacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lë'ëba' lu yu ni.

24 Que lë ni na' Dios guléaj ládxë'ë légaquië' para ilunë' yugu' le ta'zë ládxi'gaquië' le ruá' dö', ate' caní guca, bulu'cá'ana cuíngaquië' lu yöl-la' stu' tuë' len ia'túë'.

25 Guca caní tu' bulu'cá'anë' xtídzë'ë Dios, le naca idútë li, ate' gula'zí' lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en caléga Lë cazë' Dios, Nu na' ral-la' gácatica'só queë' yöl-la' ba. ¡Ca' gaca!

26 Que lë ni na' Dios guléaj ládxë'ë légaquië' para ilunë' yugu' le ta'zë ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'.

27 Lë'sca' caní gulunë' yugu' bönni' biguiú', bulu'cá'anë' yöl-la' rizóalen nigula, ate' gula'zë ládxi'gaquië' le ruá' dö' túnlenë' tuë' ia'túë', en gulunë' le tun ga nu rutuí'i, tu' gula'cuá'lenë' la' luzá'a bönni'gacasë'. Que lë ni na' gula'gu'i gula'záquië' lu xipëla'gaquië' yugu' bönni' gulunë' caní tu' bubi'ë Dios quégaquië' ca sa'yéaj dul-la' na' gulunë' tu' nucá'anagaquië' Dios.

28 Tu' cabí gulë'ënnë' ilunë' Dios bal, que lë ni na' guléaj ládxë'ë Dios légaquië' para ila'zá' ládxi'gaquië' le biti' naca dxi'a, en ilunë' le cabí nazaca'.

29 Túntica'sé' yúgu'të le cabí naca tsahui', en yugu' le naca stu'. Tunë' le ruá' dö', en tu'huídí'në'.

Biti' ta'lé'enë' dxi'a luzá'agaquië', en tu'zxé'enë' luzá'agaquië'.

Tutië' luzá'agaquië', en ta'díl-lalenë' luzá'agaquië'.

Ta'zí' yé'enë' bönachi, en zi'të nácgacaquië' xihui'.

Ta'nnë' que luzá'agaquië'.

30 Ta'nnë' le cabí nácatë que luzá'agaquië'.

Biti' ta'lé'enë' Dios dxi'a, en nácgacaquië' bönni' bizxaj.

Tun cuíngaquië' lo, en tun ba zxön cuíngaquië'.

Ta'guiljë' le ruá' dö' ilunë', en ta'dá'baguë'ë xuz xiná'agaquië'.

³¹ Nácagaquië' bönni' biti' ta'yéajni'inë', en tun dítjagaquië' xtídza'gaquië'.

Biti' nácagaquië' dxi'i ladxi' ca ral-la' ilácagaquië'.

Biti' tu'niti lahuë' luzá'agaquië'.

Biti' tu'huechi' ládxi'gaquië' luzá'agaquië'.

³² Nözguequi quézinë' le nuzóë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nöziguequinë' lë ni, calégasö caní tunë', pero ta'yaza ládxi'gaquië' nupa tun ca' caní.

2

Naca tsahui' ichúguië' Dios quégaca bönachi gátigaca

¹ Que lë ni na', biti' gaca ubéaj tsahui' cuinu', núti'tës nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' li'.

² Nöz quéziru' ca ruchi'a rusöröë' Dios. Naca idütë li ca ruchi'a rusöröë' nupa tun le ruá' dö'.

³ Li' richugu bë'u nupa tun le ruá' dö', en tuz ca runu' li'. ¿Naru' réquitsenu' uló' li' cate' uchi'a usöröë' Dios?

⁴ ¿Naru' rucá'anatso' cá'asö yöl-la' dxi'i ladxi' idú queë' Dios, en yöl-la' riböza zxon ladxi' queë', en ca runë', ridzenë' para lenë' li'? ¿Naru' cabí nöz quézinu' ruzá' ládxi'ë' Dios quiu' yöl-la' dxi'i ladxi' queë' para gunë' ga ubí'i ládxi'u'?

⁵ Lu yöl-la' ládxi'do' zidi quiu' biti' rubí'i ládxi'u'. Que lë ni na' rusubaga' cuinu' xíguia' gunë' Dios li' cate' uchi'a usöröë' bönachi, ate' gaca bë' naca ca ral-la' gunë' Dios cate' ichúguië' quégaca bönachi ilátigaca.

⁶ La' dza n'isö ubí'i cazë' Dios que queë' bönni' tsca naca le gulunë' tu tuë'.

⁷ Unödziejë' yöl-la' na'bán idú quégaca nupa tüntica'sö le naca dxi'a, tu' tuí'i ládxi'gaquië' ulu'zi'ë' xibë' Dios, en ulu'rúajë' dxi'a lahuë' Lë', en ila'cuá'tica'së'.

⁸ Lu yöl-la' rilé queë', Dios gunë' xíguia' nupa ta'dá'bagá', en biti' tē'ëni ilún ca rnna le naca idütë li, pero tun ca rnna le cabí naca tsahui'.

⁹ Ila'gu'í ila'záquië', en huí'inida' ládxi'ë' yúgu'të bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a.

¹⁰ Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

¹¹ Caní uchi'a usöröë' Dios bönachi, ate' Lë' biti' runë' bal le ta'nnasö bönachi.

¹² Yúgu'të bönni' na' biti' bila'yönnë' le rinná bë' xibá queë' Dios, en gulunë' dul-la', lësca' ilátie', sal-la' biti' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'.

¹³ Caní gaca, tu' cabí nácagaquië' tsahui' lahuë' Dios yugu' bönni' ta'yónisë' xibá queë', pero ulu'huóaca tsahui' lahuë' Lë' yugu' bönni' tunë' ca rnna xibá queë'.

¹⁴ Bönni' na' biti' nácagaquië' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' biti' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'.

¹⁵ Nupa ni tu'luí'i lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'tüë'.

16 Caní ubi'ë Dios quégaquië' dza ni' uchi'a usöröë' lu na' Jesucristo yugu' le núngaquië', en le gula'zá' ládxi'gaquië' yúgu'të'. Caní rusëdi didza' dxi'a runa' libán que.

Yugu' bönni' judío, en xibá queë' Dios

17 Núlöli' rnnali' nácali' judío, en ruzxöni ládxi'li' xibá queë' Dios, en run ba xön cuinli' tu' núnbë'ëli'-në' Dios,

18 nöz quézili' le ré'ënë' Dios gunli', en le rusëdi libí'ili' xibá queë', en réquibe'eli' le nácatërö dxi'a.

19 Réquili' gaca ulu'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca.

20 Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönnachi ca naca yöl-la' réajni'i idú, en le naca idútë li.

21 Na'a, libí'ili' rusédili' ia'zíca'rö bönnachi. ¿Naru' cabí ral-la' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'?

22 Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guiój budó' yaga. ¿Naru' ribántsali' le dzö'ö lu yudo' quéguequi'?

23 Run ba xön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asö, en riguitsjali' xibá le gunná bë'ë Lë'?

24 Nazúaj lu guichi lá'ayi ca runli', rna: Ni'a que le runli' libí'ili' nupa biti' nácgaca judío ta'nnë'zi' queë' Dios.

25 Le nácatë ruzi'u xibé lë na' narugu lu xipélu'u le naca bë' nazí' lu ná'ali' xibá queë' Dios channö runu' ca rinná bë' xibá na' queë' Dios, pero channö riguitsju' xibá le gunná bë'ë Lë', nuhuóacu' ca tu bönni' biti' néquinë' queë' Dios.

26 Que lë ni na', channö zoë' tu bönni' biti' narugu lu xipélë'ë lë na' naca bë' nu nazí' xibá queë' Dios, pero runë' idútë ca rinná bë' xibá queë' Lë', bönni' ni náquië' lahuë' Dios ca tu bönni' narugu caz lu xipélë'ë lë na' naca bë' sal-la' biti' narugu lu xipëla' cazë'.

27 Bönni' na' biti' narugu lu xipélë'ë lë na' naca bë' nu nazí' xibá queë' Dios, pero runë' idú ca rinná bë' xibá na' queë' Dios, ca runë' bönni' ni ruluí' nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipëla' li' lë na' naca bë' nazí' lu ná'ali' xibá na' queë' Dios, pero biti' runli' ca rinná bë' xibá queë' na'.

28 Biti' náquië' idú bönni' judío tu bönni' nácasë' caní lu yöl-la' bönáchisö queë', ate' biti' naca idú lë na' naca bë' le narúgusö lu xipélë'ë nu bönni'.

29 Náquië' idú bönni' judío bönni' na' náquië' caní lu icja ládxi'da'ahuë', en le naca idú le narugu lu xipélë'ë nu bönni' le naca bë' nu nazí' xibá queë' Dios, naca tu le yu'u icja ládxi'do'gaca bönnachi. Naca que bö' naca cázaru', en calëga que yöl-la' bönáchisö queëru'. Nu bönni' náquië' caní, biti' tun bönnachi lë' bal, pero Dios caz gunë' lë' bal.

3

1 Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipélë'ë?

2 Yenni' ruzi'ë xibé, en zían ca ruzi'ë xibé. Le nácatërö lo, Dios gulu'ë lu ná'agaquië' yugu' bönni' judío didza' lá'ayi queë'.

³ Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rnna xtídzë'ë tu' cabí ta'yéajlë'ë Lë'?

⁴ ¡Biti' ca' gaca! Ral-la' guéquite' eru' rúntica'së' Dios ca rnna didza' bë'ë, sal-la' ta'zì' yë' yúgu'të bönachi. Ca naca queë' nazúaj lu guichi lá'ayi le rnna: Gaca bë' nacu' tsahui' ni'a que didza' ru'u, en uruju' tsahui' channö nu uchi'a usörö Lì'.

⁵ Cate' runru' le ruá' dö, Dios rnnë' biti' naca tsahui' le runru'. Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' biti' ral-la' gunë' rë'u xíguia'."

⁶ ¡Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröë' bönachi yödzülió ni'?

⁷ Cate' na rizi' yë', Dios rnnë' biti' ru'í didza' nu na' ca runë' Lë'. Lë ni naca bë' naca idútë' li didza' ru'ë Dios. Ta'nnë' bönni' le ta'zì' yë'ë légaquië' run ga gaca queë' Dios yöl-la' ba, ate' biti' ral-la' ichúguië' quégaquië', cabí innë' nácaquië' bönni' dul-la'.

⁸ ¿Naru' huannátsaru': "Guá'aru' dö' para gaca le naca dxi'a"? Nupa na' ta'nnë' zì' queëru' ta'nná rusédiru' caní, ate' tsahui' naca ichúguië' Dios quéguequi.

Yúgu'tëru' nabágaru' dul-la'

⁹ ¿Bizxi caz innaru' na'a? Ca naca queëtu' netu', bönni' judío, ¿nácarötu' tsahui' ca ia'zica'rö bönachi? ¡Biti' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi izá'a. ¡Yúgu'të nabága'gaquië' dul-la'!

¹⁰ Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

¹¹ Cuntu nu réajni'í.

Cuntu nu riguílaj Dios.

¹² Yúgu'të' ta'dé' ga yúbölö.

Yúgu'të' nanítigaquië'.

Cuntu nu run le naca dxi'a, cuntu nu caz.

¹³ Lubá'agaquië' náca'gaca ca yeru ba nayáljagaca.

Len yöl-la' rinnësö quégaquië' ta'zì' yé'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínia'.

¹⁴ Len yugu' didza' tu'ë, tu'didza' yúdxinë' bönachi,

en ta'nnë' zì'ë quégaca bönachi na'.

¹⁵ Nacu'ë sina' tútigaquië' bönachi.

¹⁶ Gátí'tës ga ta'dödë' tu'sunítie', en tu'saca' zì'ë luzá'agaquië'.

¹⁷ Biti' ta'zéqui'në' ila'bözë' dxi'ado'.

¹⁸ Biti' ca' tádxinë' Dios.

¹⁹ Nöziru' yúgu'të didza' ni bë'ë Dios, rë' yugu' bönni' na' dë lu ná'agaquië' xibá queë'. Que lë ni na' cuntu nu gaca inná biti' nabaga' dul-la', ate' yúgu'të bönachi idútë' yödzülió, uchi'a usöröë' Dios quéguequi.

²⁰ Tu'í ládxi'gaquië' yugu' bönni' judío ilunë' yugu' le rinná bë' xibá queë' Dios para ulu'huóáquië' tsahui', pero cuntu nu huóáca tsahui' caní, tu' nuzóë' Dios xibá queë' para guéquite' eru' nabágaru' dul-la'.

Uláru' tu' réajlë'ëru' Jesucristo

²¹ Na'a, chibulu'í lahui ca gaca huóácaru' tsahui' lahuë' Dios. Biti' gaca huóácaru' tsahui' tu' runru' ca rinná bë' xibá queë' Dios, sal-la' lu xibá queë'

na', en lu guichi lá'ayi ga nazúajgaca le gula'nnë' bönni' gulu'ë didza' uláz queë' Dios, ruí'í didza' ca gaca huóácaru' tsahui'.

²² Dios caz runë' ga huóácaru' tsahui' tu' réajlë'ëru' Jesucristo, ate' gunë' ga ulu'huóáca tsahui' yúgu'të nupa ila'yéajlë' Lë'. Tuz ca nácagaca yúgu'të bönachi

²³ tu' núngaquië' yúgu'të' dul-la', en biti' ca' nácagaquië' tsahui' ca na' náquië' Dios idú tsahui'.

²⁴ Dios ruzá' ládxe'ë queëru', en nunsë' rë'u tsahui' tu' böa'uë' Jesucristo rë'u.

²⁵ Dios budödë' Jesucristo uláz queëru'. Lë' bulaljë' xichönë', le rigúa dul-la', lë na' uzí'iru' xibë channö uyéajlë'ëru' Lë'. Caní benë' Dios para gaca bë' náquië' tsahui' Lë' sal-la' lu yöl-la' riböza zxön ladxí' queë' budödisë' cá'asö yugu' dul-la' benru' dza ni'te.

²⁶ Caní benë' Dios, buluí'í cuinë' tsahui' dza ni zóaru' na'a, ate' rugá'anë' tsahui' sal-la' rugüë' dul-la' nabága'gaca bönachi, runë' ga tu'huóáca tsahui' nupa ta'yéajlë' Cristo.

²⁷ ¿Naru' huácatsö gun ba zxön cuinru' ca naca queëru'? ¿Biti' ca' gácaru'! ¿Bizx que na'? Naca tu' nuláru', calëga tu' runru' ca rinná bë' xibá queë' Dios, pero tu' réajlë'ësi ru' Jesucristo.

²⁸ Na'a, rusáca'ru' queëru' nuhuóáquië' tsahui' tu' bönni' tu' réajlë'ë Jesucristo, en calëga tu' runë' ca rinná bë' xibá queë' Dios.

²⁹ Ca naca Dios, ¿náquië' Dios quégacasö bönachi judío? ¿Naru' cabí náquië' ca' Dios quégaca bönachi izá'a? Ön, náquië' ca' Dios quégaca bönachi izá'a na'

³⁰ tu' zoa Tuz Nu naca Dios. Dios ni gunë' ga ulu'huóáquië' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipëla'gaquië' lë na' naca bë' nu nequi queë' Dios, en lësca' caní gunë' ga ulu'huóáquië' tsahui' yugu' bönni' zi'tu' tu' ta'yéajlë'ë Jesucristo, en biti' narugu lu xipëla'gaquië' lë na' naca bë'.

³¹ Na'a, channö nuláru' tu' réajlë'ësi ru' Jesucristo, ¿ba nagá'ana cá'asö xibá queë' Dios? ¿Biti' ca' naca ca', pero nagá'anarö tsutsu xibá queë' na'!

4

Le benë' Abraham rusedi rë'u

¹ ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío?

² La'tu' böáquië' tsahui' Abraham tu' zoa le ben cazë' lë', gunna gun ba zxön cuinë', pero calëga lahuë' Dios.

³ Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'."

⁴ Channö zoa nu bönni' runë' xichinru', le riguízxjaru'-në' biti' naca tu le ruzá' ládxi'ru' queë', pero naca tu le ral-la'ru' queë' bönni' na'.

⁵ Lësca' caní channö tu bönni' réajlë'ë Dios, sal-la' biti' bi dxin benë' bönni' na', Dios, Nu run ga ulu'huóáca tsahui' bönachi biti' nácagaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'.

⁶ Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' biti' bi dxin nunë' bönni' na'.

⁷ Caní gunné' David:

¿Bica' ba bönni' na' Dios runiti lahuë' le biti' naca tsahui' nunë', en rugüë' yugu' dul-la' nabáguë'ë!

8 ꞑBica' ba bönni' na', Dios biti' rusubáguë'ë lë' xíguia' tu' nõzi dul-la' benë' bönni' na'!

9 ꞑNaru' nácacacsë' bica' ba bönni' narugu lu xipéla'gaquië' lë na' naca bë', o nácacaga ca' caní nupa na' cabí narugu lë na' lu xipéla'gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'.

10 ꞑBátaxi böáquië' tsahui' caní Abraham? ꞑNaru' guca cate' ni' chinarugu lu xipélë'ë lë na' naca bë', o guca zí'aló? Biti' guca cate' chinarugu lu xipélë'ë, pero zí'aló guca.

11 Abraham guyéajlë'ë Dios cate' ni' biti' narúguni lu xipélë'ë lë na' naca bë'. Gudödi na' gurugu lu xipélë'ë lë na' naca bë', le rulu'isö chinuhuöáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' biti' narugu lu xipéla'gaquië' lë na' naca bë'. Tu' ta'yéajlë'ë Dios, huáca innë' Dios nácacagaquië' tsahui' lahuë' Lë'.

12 Náquië' Abraham xuz xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipéla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipélë'ë lë na'.

Le guzxí' lu në'ë Dios gata' queëru' tu' réajlë'ëru' Lë'

13 Guzxí' lu në'ë Dios bi unödzjë' queë' Abraham, en quégaca zxí'ini xi'sóë', gata' quégaquië' la' yödzölió nisö. Gaca caní, caléga tu' tunë' ca rinná bë' xibá queë' Dios, pero tu' nuhuöácagaquië' tsahui' lahuë' Lë' tu' ta'yéajlë'ë Lë'.

14 La'tu' gata' yödzölió ni quégacasö nupa tun ca rinná bë' xibá queë' Dios, biti' gun bayudxi nu tséajlë' Lë', ate' nítisö gaca le guzxí' lu në'ë Dios.

15 Rulu'í xibá queë' Dios rë'u nabága'ru' xíguia', le run ga ichúguië' Dios queëru' gátiru'. Ga ni' biti' ridxini xibá queë' na', biti' gaca ila'dá'baga' bönachi le rinná bë' xibá na'.

16 Que lë ni na' uzí'iru' xibé le guzxí' lu në'ë Dios tu' réajlë'ëru' Lë', para gaca bë' naca tu' le ruzá' ládxë'ë queëru'. Caní naca, para gaca bë'da' gata' quéguequi yúgu'të zxí'ini xi'sóë' Abraham lë na' guzxí' lu në'ë Dios, calégasö quégaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios.

17 Caní náquië' ca na' nazúaj lu guichi lá'ayi, le rnna: "Nuzóa' li' ca xúzgaca bönachi idútë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ë didza' que nu biti' zuíni tscá chizóa caz nu na' biti' zuíni.

18 Caní naca tu' gudxë' Dios Abraham na': "Ziántëro ila'cuá' zxí'ini xi'sú'." Abraham guyéajlë'ë Dios, en benë' löza lë na' guzxí' lu në'ë Dios, sal-la' biti' guca ilé'enë' lë na' runë' löza, ate' caní guca, bidéli'në' náquië' xúzgaca bönachi idútë yödzölió.

19 Biti' guca Abraham chopá ládxë'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúlädë'ë, enca' ca naca queënu Sara queë', nácanu nigula huödx.

20 Biti' guca chopá ládxë'ë, en biti' gúquië' tu' caréajlë' ca naca le guzxí' lu në'ë Dios gunë' queë', pero bidipa ládxë'ë tu' guyéajlë'ë Dios, ate' gulu'ë Dios yöl-la' ba.

21 Idú ládxë'ë benë' löza Dios, napë' yöl-la' huáca gunë' idútë lë na' guzxí' lu në'ë.

²² Que lë ni na', tu' guyéajlë'ë Abraham Dios, Dios buzöë' queë' náquië' tsahui'.

²³ Nazúaj lu guichi lá' ayi le rnna: "Dios buzöë' queë' náquië' tsahui'." Nazúaj lu guichi caní, calégasö para uzi'ë xibé Abraham,

²⁴ pero para uzi'iru' xibé ca' rë'u. Rë'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti.

²⁵ Jesús na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

5

Le rata' queëru' tu' rnnë' Dios nuhuóácaru' tsahui'

¹ Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuóácaru' tuz len Lë'.

² Tu' réajlë'ëru' Jesucristo, ruzí'iru' xibé le ruzá' ládxë'ë Dios queëru', le rutipa ládxi'ru'. Rudzéjaru' tu' runru' löza uzi'iru' ca' xibé yöl-la' zxön queë' Dios.

³ Calégasö caní rudzéjaru', pero rudzéjaru' ca' cate' riguí'i rizáca'ru', tu' chinöziru' le riguí'i rizáca'ru' rusedi rë'u cózaru' zxön ladxi'.

⁴ Cate' ribózaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u.

⁵ Cate' runru' löza Lë', biti' ca' raca chopa ládxi'ru'. Caní naca, tu' nuhuólaj nudzë'e icja ládxi' do'oru' yöl-la' nadxí'i queë' Dios rë'u. Runë' Dios Bö' Lá' ayi, Bönni' gusöl-lë'ë Dios queëru' ga raca caní.

⁶ Cate' ni' biti' ca' guca uláru' rácasö queëru', cate' gúla'rö dza queë', Cristo gútië' uláz queëru', ni' nácaru' bönachi dul-la'.

⁷ Cuntu nu guë'ëni gati uláz queë' tu' bönni' tsahui'. Nadxi ca' nu urugui gati uláz queë' tu' bönni' náquië' idú dxi'a.

⁸ Dios rulu'ínë' rë'u ca nadxí'ide'enë' rë'u, tu' gútië' Cristo uláz queëru' cate' ni' nácaru' bönni' dul-la'.

⁹ Chinuhuóácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lë ni na' chinácada' löza usölë' Lë' rë'u lu dza ichúguië' Dios quégaca bönachi dul-la' gátigaca.

¹⁰ Cate' ni' biti' rilé'ëru'-në' Dios dxi'a, gútië' Zxí'inë' Dios uláz queëru' para huóácaru' tuz len Lë'. Na'a, tu' zoë' nabanë', en chinuhuóácaru' tuz len Lë', chinácada' löza uláru'.

¹¹ Rudzéjaru' lahuë' Dios ni'a que le benë' Xanru' Jesucristo, tu' nuhuóácaru' tuz len Dios ni'a que lë na' benë' Lë'.

Le benë' Adán, en le benë' Cristo

¹² Guyú'u dul-la' yödzölió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'.

¹³ Zí'atëlö ga bidxintë xibá queë' Dios, gulún bönachi yödzölió ni dul-la', pero biti' busubáguë'ë Dios bönachi na' xíguia' ca nupa ta'dá'baga' xibá queë' tu' nözi dul-la' na', tu' biti' ridxini xibá queë' quégaquië'.

¹⁴ Ga gudela' zoë' Adán ga bidxintë zoë' Moisés gupati yúgu'të bönachi tu' gula'baga' dul-la', sal-la' biti' gula'dá'baga' tu' le gunná bë'ë Dios ca benë' Adán. Náçagaca yúgu'të bönachi tuz len Adán tu' náçagaca zxi'ini xi'sóë'. Lë ni rulu'í rë'u ca ilaca tuz len Cristo yúgu'të nupa ila'yéajlë' Lë'.

15 Le rúnnasë' queëru' Dios biti' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxí'atëro naca le ruzá' ládxë'ë queëru' Dios, en le rúnnasë' queëru'. Ruzá' ládxë'ë queëru' lë ni ni'a que le benë' yetuzë' Bönni', Jesucristo.

16 Le rúnnasë' Dios queëru' biti' naca ca le guca queëru' tu' nözi dul-la' na' benë' tuzë' bönni' na'. Le guchúguië' Dios queë' Adán gátië' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnnasë' Dios queëru' naca para huóácaru' tsahui' lahuë' Lë' sal-la' nabágaru' dul-la' zían.

17 Guyú'u yöl-la' guti tu' nözi dul-la' benë' tuzë' bönni'. Nácatëro löza ila'deli' yöl-la' na'bán nupa ulu'huóáca tsahui' lahuë' Dios tu' zoa le ruzá' ládxë'ë queëru' Dios ni'a que le benë' yetuzë' Bönni', Jesucristo.

18 Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huóáca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégaquië'.

19 Bulu'huóáca huen dul-la' bönachi zían tu' cabí benë' tuzë' bönni' ca rnna xtídzë'ë Dios. Lësca' caní ulu'huóáca tsahui' bönachi tu' benë' yetuzë' Bönni' na' ca rnna xtídzë'ë Dios.

20 Guyú'u xibá queë' Dios yödzoíó ni para gaca bë'da' nabágaru' bönachi dul-la'. Tu' guca bë'rö nabágaru' gaca dul-la', guca bë'rö ca' zxöntëro naca le buzá' ládxë'ë Dios quégaca bönachi.

21 Guta' yöl-la' huáca unná bë' que dul-la' guti rë'u. Lësca' caní le ruzá' ládxë'ë Dios queëru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

6

Naca tsca chinátiru' para cabirö gunru' dul-la' tu' nabániru'-në' Jesucristo

1 ¿Bizxi caz innaru' na'a? ¿Naru' gúntsaru' dul-la' para gáta'rö queëru' le ruzá' ládxë'ë Dios queëru'?

2 ¡Biti' gun cázaru' ca'! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'?

3 ¿Naru' cabí nözili' ca na' naca queëru'? Channö bidílaru' nisa para huóácaru' tuz len Cristo, lë na' bidílaru' nisa rulu'i rë'u chigudódiru' lu yöl-la' guti tsözxön len Lë'.

4 Ca na' guca, gútilenru'-në' Cristo tsözxön, lësca' caní bigáchi'lenru'-në' tsözxön niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxön queë', lës caní ca' rë'u nubánlenru'-në' Jesús tsözxön para gácaru' bönachi iduté cubi queë'.

5 Channö nunru' Cristo tsözxön, gútiru' ca na' gútië' Lë', lësca' caní gunru'-në' tsözxön, ubanru' lu yöl-la' guti ca na' bubanë' Lë'.

6 Chinöz quéziru' lë ni, yöl-la' bönachi queëru' le guzóa zí'aló gudá'len Lë' tsözxön lë'e yaga cruz, para initi yöl-la' bönachi queëru' na' bënlenru' le dul-la', para cabirö inná be'e le naca dul-la' rë'u.

7 Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabágaru' dul-la' na', ate' bítirö yú'uru' lu na' dul-la'.

8 Na'a, channö nátilenru'-në' Cristo tsözxön, réajlë'ëru' ubánlenru'-në' ca' tsözxön,

9 tu' chinöziru' bubanë' Cristo lu yöl-la' guti, en bítirö gátië'. Que lë ni na' bítirö bi gaca gun yöl-la' guti na' queë' Lë'.

¹⁰ Ca na' guca, gútië' Lë', tu luzuísö gútië' tu' nözi dul-la' quegaca yúgu'të bönachi, pero ca na' naca, zoë' nabanë', nabánlenë' Dios.

¹¹ Lë'sca' caní ral-la' usáca'li' queëli' naca queëli' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

¹² Que lë ni na', biti' güi'ili' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizë ládxi'li' le ruá' dö', lu le naca cázali'.

¹³ Biti' udödi cuinli' lu dul-la', biti' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idútë le naca cázali' para ugúnlenë' le le naca dxi'a.

¹⁴ Biti' güi'ili' lataj le naca dul-la', para cabí gun ga gunli' dul-la', tu' nuzöë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá ládxi'ë queëru'.

Le rucudzu' didza' ca naca que nu bönni' nadó'o

¹⁵ ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá ládxi'ë Dios rë'u? ¡Biti' ca' gunru' caní!

¹⁶ Chinöz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lë'sca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huöácali' tsahui'.

¹⁷ Na'a, ¡xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxi'li' runli' ca rinná bë' xibá na' budödi cuinli' lu në'e.

¹⁸ Tu' chinulali' lu na' dul-la', nuhuöácali' ca yugu' bönni' nadó'ogaca lu na' le naca dxi'a.

¹⁹ (Ruí'ilena' libí'ili' didza' ca tuí'i didza' bönachi, tu' cabí réajni'ili' idútë lu yöl-la' bönachi queëli'.) Zí'alö budödi cuinli' len idútë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá' dö' na'. Na'a, guli'dödi idútë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

²⁰ Cate' ni' nácali' ca yugu' bönni' nadó'ogaca lu na' dul-la', biti' benli' xichini le naca tsahui'.

²¹ Na'a, ¿naru' buzí'itsali' xibé lë na' benli' zí'alö? Na'a lë na' benli' run ga rutuf'ili', en run ga nu gati tsaz.

²² Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili' xibé le run ga nácali' bönachi narúajgaca quez queë' Dios, en le run ga dë queëli' yöl-la' na'bán idú.

²³ Lazxaj nu run dul-la' naca yöl-la' guti, pero le rúnasë' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

7

Le rucudzu' didza' yöl-la' nutsaga na'

¹ Böcha'ado', núlöli' núnbë'ëli' xibá queë' Dios. Nöz quézili' rinná be'e xibá na' nu bönni' tsanni ni zoë' nabanë'.

² Naca queëli' ca naca que tu nigula nutsaga ná'lennu-në' bönni', yú'unu lu nëë bönni' queënu tsanni ni zoë' nabanë' ca rinná bë' xibá que yöl-la' nutsaga na', pero channö chinatië', nurúajnu lu na' xibá na'.

³ Caní naca, tsanni ni zoë' nabanë' bönni' queënu, channö utsaga ná'lennu-në' ia'túë' bönni', gunnu dul-la' le riguitsaj xibá que yöl-la' nutsaga na', pero channö chinatië' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

⁴ Lësca' caní raca queëli', böcha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza lãdxë'ë Dios.

⁵ Tsanni ni' guyú'uru' lu na' yöl-la' bönáchisö queëru', le rinná bë' xibá na' ben ga gulaca bë' le guzë lãdxi'ru' le ruá' dö', le gulún dxin lu idütë le naca cázaru' para ilún ga gátiru'.

⁶ Na'a nuláru' lu na' xibá na' tu' nati cázaru' tsca naca le rinná bë' xibá na' gunná be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runnë' queëru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¿Biti' ca' run caní! La'tu' cabí buzéajni'i le rinná bë' xibá na' neda', biti' gunözda' naca dul-la' le runa'. La'tu' cabí zoa lu xibá na' le runa: "Biti' së lãdxu'u le dë que luzó'o", biti' gunözda' naca dul-la' yöl-la' rizë lãdxi' le dë que luzá'a.

⁸ Cate' bidxín quia' xibá na', guca bë' le naca dul-la' na' run dxin lu idütë le naca', ate' ben ga gúquibe'eda' rizë lãdxa'a yúgu'të le ruá' dö'. Ga biti' ridxini xibá na', biti' naca bë' le naca dul-la'.

⁹ Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'.

¹⁰ Dios gunná bë'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'.

¹¹ Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

¹² Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë.

¹³ ¿Naru' bentsö lë na' naca dxi'a ga bidxín quia' yöl-la' guti? ¿Biti' ca' naca ca! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatërö xihui' yúgu'të le naca dul-la'.

¹⁴ Nöziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que.

¹⁵ Na'a, biti' réajni'ida' le runa'. Ré'enda' guna' ca rinná bë' xibá na', pero biti' runa' lë na' ré'enda' guna'. Le naca dul-la' le cabí rilé'eda' dxi'a, lë na' runa'.

¹⁶ Runa' dul-la' sal-la' biti' ré'enda' guna' dul-la' na'. Xibá na' rusëdi neda' naca dul-la' le cabí naca dxi'a. Que lë ni na' naca bë'da' naca dxi'a le rinná bë' xibá na'.

¹⁷ Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'.

¹⁸ Nözda' biti' zóalen neda' le naca dxi'a, o huáca innía', lë na' naca dxi'a biti' zóalen le naca yöl-la' bönáchisö quia'. Rë'ënda' guna' le naca dxi'a, pero la' neda'sö biti' gaca guna' lë na' naca dxi'a.

¹⁹ Biti' runa' le naca dxi'a le rë'ënda' guna', pero rúntica'sa' le biti' naca dxi'a le cabí rë'ënda' guna'.

²⁰ Que lë ni na', channö runa' dul-la' na' biti' rë'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

²¹ Caní naca le raca queëru' yúgu'tëru'. Cate' rë'ëni ru' gunru' le naca dxi'a, dzaga rë'u le run ga runru' le ruá' dö'.

²² Lu icja ládxi'da'ahua' raza ládxa'a xibá queë' Dios

²³ pero réquibe'eda' dzaga idútë le naca' le rinná be'e neda', ate' lë ni ridá'baga' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

²⁴ ¡Bica' bayechi' neda'! ¿Nuzxi caz gaca usölá neda' lu yöl-la' bönáchisö quia' le run ga runa' dul-la'?

²⁵ ¡Xclenë' Dios, chinularu' na'a ni'a que le benë' Xanru' Jesucristo! Que lë ni na', tsca naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga rë'ënda' guna' dul-la'.

8

Le runru' tu' zóalenë' Dios Bö' Lá'ayi rë'u

¹ Que lë ni na', bítirö bi xíguia' nabága'gaquië' yugu' bönni' néquiqueuinë' queë' Jesucristo, bönni' na' bítirö tunë' ca rë'ëni yöl-la' bönáchisö quégaquië', pero ca rë'ënë' Dios Bö' Lá'ayi tunë'.

² Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti.

³ Chinunë' Dios le cabí guca gun xibá na', tu' cabí bi guzxéqui' gun tu' nácaru' bönáchisö. Dios gusól-lë'ë Xzí'ini cazë', ate' guljë' bönachi ca nácaru' rë'u, nácaru' bönachi dul-la', pero biti' bi dul-la' benë' Lë'. Busubaga' cuinë' dul-la' nabága'ru' rë'u, ate' caní guca, guchúguië' que dul-la' runru' lu yöl-la' bönáchisö queëru'.

⁴ Caní benë' para gaca gunru' idútë le naca tsahui' le rinná bë' xibá queë', núlöru' na' bítirö runru' ca rë'ëni yöl-la' bönáchisö queëru', pero ca rë'ënë' Dios Bö' Lá'ayi runru'.

⁵ Bönni' tunë' ca rë'ëni yöl-la' bönáchisö quégaquië', tu'í ládxi'gaquië' le naca que yöl-la' bönáchisö quégaquië', pero bönni' tunë' ca rë'ënë' Dios Bö' Lá'ayi, tu'í ládxi'gaquië' le naca queë' Dios Bö' Lá'ayi.

⁶ Channö ru'í ládxi'siru' le naca que yöl-la' bönáchisö queëru', tsaz gátiru', pero channö ru'í ládxi'ru' le naca queë' Dios Bö' Lá'ayi, chidë yöl-la' na'bán idú queëru', en ribözaru' dxi ladxí'.

⁷ Núti'tës nu ru'í ládxi'sö le naca que yöl-la' bönáchisö que, biti' rilé'e Dios dxi'a, tu' cabí run nu na' ca rinná bë' xibá queë' Dios, en biti' ca' gaca gun caní.

⁸ Que lë ni na', bönni' na' tunë' ca rë'ëni yöl-la' bönáchisö quégaquië' biti' gaca ilunë' le raza ládxi'ë Dios.

⁹ Na'a, bítirö runli' ca rë'ëni yöl-la' bönáchisö queëli', pero runli' ca rë'ënë' Dios Bö' Lá'ayi tu' zóalen cazë' Lë' libí'ili'. Tu bönni' biti' zóalenë' Dios Bö' Lá'ayi lë', Nu na' risól-lë'ë Cristo queëru', biti' néquinë' queë' Cristo.

10 Tu' zóalenë' Cristo libí'ili', chinati caz idútë le guca cázali' tu' nōzi dul-la', ate' na'a nabánili'-në' Dios Bō' Lá'ayi tu' nunë' Dios libí'ili' tsahui'.

11 Bō' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesucristo lu yöl-la' guti, runë' ga nubanli' lu idútë le gúcali' le rati ca. Caní nunë' tu' zóalenë' Dios Bō' Lá'ayi libí'ili'.

12 Que lë ni na', libí'ili' bōcha'a, dë tu le ral-la'ru', pero calëga que yöl-la' bōnáchisō queëru', para cabirō gunru' ca rë'ëni yöl-la' bōnáchisō queëru' na'.

13 Channō runli' ca rë'ëni yöl-la' bōnáchisō queëli', gátili' tsaz, pero channō len yöl-la' huáca queë' Dios Bō' Lá'ayi runli' ga ila'niti le runli' lu yöl-la' bōnáchisō queëli', gata' yöl-la' na'bán idú queëli'.

14 Yúgu'të nupa tun ca rë'ënë' Dios Bō' Lá'ayi náca gaca zxi'inë' Dios.

15 Dios Bō' Lá'ayi na' zóalenë' libí'ili' bití' nuzóë' libí'ili' leyúbölö ca bönni' nadó'ogaca para gadxi idzóbili', pero chinunë' ga nácali' zxi'inë' Dios caz, en runë' ca' ga rulídzaru'-në' Dios, rnnaru': "Abba", le rna: Dad.

16 Lë cazë' Dios Bō' Lá'ayi ruzëajni'inë' bō' naca cázaru', en runë' ga nōziru' nácaru' zxi'inë' Dios.

17 Channō chinácaru' zxi'inë' Dios, gata' ca' queëru' tsōzxón len Cristo le nequi queë' Xúziru' Dios. Caní gaca queëru' channō riguí' rizáca'lenru'-në' tsōzxón Cristo para uzí'iru' xibé tsōzxón len Cristo yöl-la' zxón queë' Dios.

18 Runi nedá', yugu' lë ni riguí' rizáca'ru' na' naca tu le cuidí'do'os tsca naca yöl-la' zxón na' gata' queëru' dza si' za'.

19 Ta'bōza yúgu'të le nunë' Dios, en ta'zë ládxi'gaca idxintë dza na' ulu'ë lahui Dios yugu' bönni' náca gacaië' zxi'ini cazë'.

20 Yúgu'të lë na' nunë' Dios gula'dödi lu na' le run ga ila'niti, calëga tu' gulë'ëni caz gaca caní, pero tu' benë' Dios ga naca caní. Benë' ca' ga naca löza que idútë lë na' nunë',

21 ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zì' ca' xibé yöl-la' rusólá le nazáca'da' na' ulu'zi'ë xibé yugu' zxi'inë' Dios.

22 Nōziru' ta'guí' ta'zaca' yúgu'të le nunë' Dios ga ridxintë na'a dza, ca na' riguí' rizáca'nu tu nigula chizóa sóabi' bí'ido' queënu.

23 Riguí' rizáca'a, calëgasó yödzülió ni, pero riguí' rizáca'ru' ca' rë'u, sal-la' zóalenë' Dios Bō' Lá'ayi rë'u, Nu na' naca queëru' le ruluí' rë'u ca ral-la' gaca cázaru'. Riguí' rizáca'ru' tsanni ni ribōzaru' dza ni' ulu'ë lahui Dios nácaru' idú zxi'inë', dza ni' únë' ca' idútë le naca cázaru'.

24 Tu' runru' löza lë ni, nuláru' rë'u, pero channō gaca ilé'eru' lë na' runru' löza, bití' naca tu le ribōzaru'. Bití' ribōzaru' le chirilé'eru'.

25 Na'a, channō runru' löza tu le cabí gaca ilé'eru', lu yöl-la' ribōza zxón ladxì' ribōzaru' le.

26 Lësa' caní rácalenë' Dios Bō' Lá'ayi rë'u cate' rudú ládxi'ru', tu' cabí nōziru' bi ral-la' inábiru'-në' Dios, pero Lë cazë' Dios Bō' Lá'ayi rudödë' xtídza'ru' lahuë' Dios, ate' lu yöl-la' rinaba yudxi queë' rinnëda' ládxi'ë, tsca cabí gaca nu inná.

27 Dios ruyúë' le yu'u icja ládxi'do'gaca bōnachi, en nōzinë' le rë'ënë' innë' Dios Bō' Lá'ayi na', ate' Lë', ca rë'ëni quézinë' Dios, rudödë' xtídza'gaca nupa néquiquequi quez queë' Cristo lahuë' Dios.

Nadéli'tëröru' tu' zóalenë' Cristo rë'u

28 Nōziru' tu'zi'ë xibé bönni' yúgu'të le raca quégaquië', bönni' na' nadxi'iguequinë' Dios, ate' bulidzë' Dios légaquië' ca nuzóa cazë' gunë'.

29 Yugu' bõnni' na' gurõ cazë' queë' Dios zí'atëlõ, buzõë' ca' quégaquië' zí'atëlõ ilácagaquië' ca naca cazë' Zxí'inë', para gáquië' Zxí'inë' lo ladaj zían bõchë'ë.

30 Nupa na' buzõë' Dios quégaquië' zí'atëlõ ca ral-la' ilácagaquië', bulidzë' ca' légaquië', ate' yugu' bõnni' na' bulidzë', benë' légaquië' tsahui', ate' yugu' bõnni' na' benë' légaquië' tsahui', benë' ga tu'zi'ë ca' xibë yõl-la' zxõn queë'.

31 ¿Bixxi caz innaru' na'a ca nácagaca lë ni? Channõ rácalenë' Dios rë'u, biti' ral-la' gádxiru' sal-la' bi ilún bõnachi queëru'.

32 Dios, idú ládxe'ë bennë' queëru' Zxí'ini cazë'. Budõdë' lë' para gútië' uláz queëru'. Channõ caní benë' Dios, çnaru' cabí gúnnadë'ë queëru' tsõzxõn len Zxí'inë' yúgu'të le dë?

33 ¿Nuzxi caz gaca bi usubaga' nupa na' gurõ cazë' queë' Dios? ¡Cuntu nu gaca, tu' run cazë' Dios ga nuhuõácaru' tsahui'!

34 ¿Nuzxi caz gaca ichugu queëru' gátiru'? ¡Cuntu nu gaca, tu' guti cazë' Cristo uláz queëru', en le nácariõ lo, bubanë' lu yõl-la' guti, ate' na'a zoë' cuita lë'ë ibëla Dios ga nácaterë' zxõn, ate' rnnë' dxi'a uláz queëru' lahuë' Dios!

35 Sal-la' bi raca queëru', nõz quéziru' nadxí'inë' Cristo rë'u. Nõziru' nadxí'inë' rë'u:

sal-la' riguf'i rizáca'ru', o sal-la' risëbi ládxi'ru',
o sal-la' ta'bía ládxi'gaca bõnachi rë'u,
o sal-la' ridunru', o sal-la' riyadzaj le gácuru',
o sal-la' zoa bõnadxi queëru', o sal-la' ilútië' bõnni' rë'u.

36 Ca nácagaca lë ni nazúaj lu guichi lá'ayi, rna:
Tu' néquitu' quiu' Li', túntica'sõ bõnachi ga gátitu'.
Nácatu' ca yugu' bõ'cu' zxila',
nadõdigacaba' lu na' nu guti légacaba'.

37 Na'a, tu' zóalen rë'u Nu na' nadxí'i rë'u, nácaterõ lõza idéli'ru' lu le raca queëru'.

38-39 Que lë ni na' runi neda':

Biti' bi sequi' gun ga bítirõ idxí'inë' Dios rë'u.
Nadxí'inë' rë'u tu' néquiru' queë' Xanru' Jesucristo.
Biti' sequi' gun caní yõl-la' guti o yõl-la' na'bán,
o yugu' gubáz lá'ayi o nupa ta'nná bë',
o yugu' yõl-la' huáca que tu' xihui',
o bítitës bi zoa o bítitës bi si' za',
o tu le dë xitsá'alõ o tu le dë cadxí'ilõ,
o bítitës bi nunë' Dios.

9

Dios gurõ cazë' queë' bõnachi Israel

1 Ru'á a didza' idútë li tu' néquida' queë' Cristo, ate' røjlõz didza' ni le naca queë' Dios Bõ' Lá'ayi le yu'u icja ládxi'da'ahua'. ¡Biti' rizi' yë'a!

2 Ruhuí'inide'eda', en risëbitica'sõ ládxa'a

3 tu' raca ládxa'a guna' ga ulu'lë' bõchi' luzá'a, bõnni' uládz quia'. La'tu' huácalen légaquië', guë'ëni quézida' ubéaj ládxe'ë Dios neda', en ulá'alena' Cristo.

4 Yugu' bõnni' uládz quia' na' nácagaquië' zxí'ini xi'sóë' Israel, ate' Dios bë'ë légaquië' lataj ilácagaquië' zxí'ini cazë'. Yõl-la' zxõn queë' Dios guzóalen légaquië', ate' Dios budõdë' lu náagaquië' didza' rucá'ana tsahui', enca'

xibá queé'. Bulidzë' légaquië' para tseaj ládxi'gaquië' Lë', ate' budödë' lu ná'agaquië' yugu' le guzxi' lu në'ë gunë' le ilún tsahui' bönachi.

⁵ Nácagaquië' zxi'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' bönachi queë', guljë' Cristo, Nu naca caz Dios, en rinná bé'enë' yúgu'të. ¿Rácatica'só queë' yöl-la' ba! ¿Ca' gaca!

⁶ Sal-la' yúgu'të bönni' uládz quia' biti' nazí' lu ná'agaquië' Cristo, biti' ral-la' innaru': Nítisö böaca xtídzë'ë Dios. Calëga yúgu'të zxi'ini xi'sóë' Israel nácagaquië' idú bönachi Israel, nupa néquiquequi queë' Dios.

⁷ Sal-la' gúljagaquië' zían zxi'ini xi'sóë' Abraham, biti' guláquië' yúgu'të idú zxi'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' zxi'ini xi'sóë' Isaac ilaca idú zxi'ini xi'sú'."

⁸ Caní naca, nupa nácagaca zxi'inë' tu bönni' néquinë' queë' Dios, calëga yúgu'të' nácagaquië' zxi'inë' Dios. Lësca' caní, nácagaca idú zxi'ini xi'sóë' Abraham nupasö na' náljagaca ni'a que lë na' guzxi' lu në'ë Dios.

⁹ Lë na' guzxi' lu në'ë Dios unödzejë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

¹⁰ Calëgasö lë ni guca caní, pero lësca' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu',

¹¹⁻¹³ cate' ni' si' iláljabi', en biti' bi núnigacabi' le naca dxi'a o le ruá' dö', Dios gudxë'-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjlöz lë na' nazúaj lu guichi ca gunné' Dios, le rnna: "Bidxi'ida-në' Jacob, en calëga Esaú." Caní guca, bugá'ana tsutsu le buzóë' tsaz Dios ca naca lë na' chigurö cazë'. Que lë ni na' biti' raca caní ni'a que tu le gaca ilún bönachi, pero naca caní tu' ribö cazë' Dios nu rulidzë'.

¹⁴ ¿Bizxi caz innaru' na'a? ¿Naru' runtsë' Dios le cabí naca tsahui'? ¿Biti' ca' runë' caní!

¹⁵ Dios gudxë' Moisés, gunné': "Huéchi' ládxa'a nu rë'ënda' huéchi' ládxa'a, en gü'i ládxa'a nu rë'ënda' gü'i ládxa'a."

¹⁶ Que lë ni na', biti' raca caní ni'a que le té'ëni caz bönachi, o tu' runë' bayudxi nu bönni', pero naca tu' rë'ëni quézinë' Dios, ruhuéchi' ládxe'ë bönachi.

¹⁷ Ca naca lë ni nazúaj lu guichi lá'ayi ca na' Dios gudxë' Faraón, gunné': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' bönachi idútë yödzülió le naca neda'."

¹⁸ Caní naca, Dios ruhuéchi' ládxe'ë nu rë'ëni quézinë', en lësca' caní runë' zidzaj icja ládxi'da'ahuë' nu bönni' rë'ëne' gunë' zidzaj icja ládxi'da'ahuë' bönni' na', ca na' benë' queë' Faraón na'.

¹⁹ Na'a guiëli' neda': "Channö caní naca, ¿bizx que rsubáguë'ë Dios bönachi xíguia'? ¿Nuzxi caz gaca tá'baga' le rë'ëni quézinë' Dios gunë'?"

²⁰ ¿Biti' ca' naca caní! ¿Nuzxi caz li' rnnió' que Dios? ¿Naru' huácatsö tu yusu' néquini yu guië bönni' huen rö'ö, inná: "¿Bizx que benu' neda' caní?"

²¹ ¿Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga biti' naca liná'?

²² Rë'ëni quézinë' Dios ulu'ë lahui ca gunë' xíguia' nu ruá' dö' en gunë' ga gaca bë' yöl-la' huáca queë', pero lu yöl-la' riböza zxön ladxi' queë' biá' gulénë' yugu' bönni' ni' ral-la' ichúguie' quégaquië', yugu' bönni' na' nabága'gaquië' xíguia', en run bayudxi usunítie' légaquië'.

²³ Caní runë' Dios para gaca bë' nácatëro lesaca' yöl-la' ruzá' ladxi' queë', lë na' rulu'ë lahui lógaca nupa na' ruhuéchi' ládxë'ë, bönni' na' buzóë' quégaquië' zí'atëlö ulu'zi'ë xibë yöl-la' zxon queë'.

²⁴ Yugu' bönni' caní bulidzë' Dios. Calégasö bulidzë' netu', bönachi judío, pero lëasca' bulidzë' bönachi izá'a.

²⁵ Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunné':

Nupa biti' nácacaca bönachi quia',
gu'a láguequi: Bönachi quia',
ate' nupa na' biti' bidxí'ida',
gu'a láguequi: Nupa nadxí'ida'.

²⁶ La' ná'asö ga gunniá' quéguequi:

"Biti' nácali' bönachi quia'",
si' láguequi: "Yugu' zxi'inë' Dios ban."

²⁷ Na'a, ca naca quégaca zxi'ini xi'sóë' Israel, Isaías gunné':

Sal-la' ila'yanë' zxi'ini xi'sóë' Israel,
en iláquië' tsca naca yuzxi tu ra' yegu zxon,
ulu'lë' nabábasë'.

²⁸ Xanru' Dios la' guntë' ga gaca idútë
lë na' ichúguië' quégaca bönachi yödzölió ni.

²⁹ Lëasca' caní Isaías bë'ë didza' zí'atëlö, gunné':

Dios, Xanru' unná bë' idú,
la'tu' cabí buca'anë' queëru' yugu' zxi'ini xi'sóaru',
ugá'anaru' ca yödzö Sodoma, en yödzö Gomorra,
yugu' yödzö na' busunítie' Dios.

Bönachi Israel, en didza' dxi'a

³⁰ ¿Bizxi caz innaru' na'a? Yugu' bönni' biti' nabábagaquië' Israel chibila'déli'në' nuhuóacagaquië' tsahui' lahuë' Dios, en biti' gulunë' bayudxi ulu'huóacagaquië' tsahui' lahuë' Dios, pero nuhuóacagaquië' tsahui' tu' ta'yéajlë'ë Dios.

³¹ Na'a, sal-la' gulunë' bayudxi yugu' bönni' Israel ilunë' ca rinná bë' xibá queë' Dios, le ral-la' gun ga ilácagaquië' tsahui', biti' bila'déli'në' le ral-la' gata' quégaquië' tu' tunë' ca rinná bë' xibá na'.

³² ¿Bizx que na' guca caní? Caní guca, tu' cabí gulunë' caní lu yöl-la' réajlë' quégaquië' Dios, pero rácasö quégaquië' gulë'ënnë' ilunë' ca rinná bë' xibá na', ate' que lë ni na' gula'chíxinë', o huáca innaru': Yöjchégu'gaquië' lu lë na' nazí'i le: Guiöj Ga Nu Röjchegu'.

³³ Ca naca lë ni nazúaj lu guichi lá'ayi, rnna:

¡Buli'yú! Uzóa'-në' yödzö Siön bönni' na'
gáquië' ca tu guiöj ga nu tsöjchegu',
guiöj na' gun ga nu ichixi inigui.
Nu tséajlë' Lë', biti' ca' utuí' i nu na'.

10

¹ Libí'ili', böcha'ado', le rizë ládxa'a, en le rinábida'-në' Dios gunë' quégaca bönachi Israel naca gunë' ga ulu'lë'.

² Runa' ba nalí quégaquië', idú ládxi'gaquië' tuí'i ládxi'gaquië' Dios, pero calëga len yöl-la' réajni'í idú.

³ Biti' nõzguequinè' ca runè' Dios, runsè' ga nàcaru' tsahui', pero tè'ennè' ilún cuíngaquiè' tsahui' rácasò quégaquiè', en biti' ta'cu'è nõxaj ladxi' lahuè' Dios para gaca gunè' légaquiè' tsahui'.

⁴ Budxi benè' Cristo le rē'eni gun xibá queè' Moisés, benè' ga gaca ulu'huóaca tsahui' yúgu'tè nupa ila'yéajlè' Lè'.

⁵ Ca naca que nu huóaca tsahui' tu' run ca rinná bè' xibá queè' Dios, buzúajè' Moisés lu guichi le rna caní: "Bõnni' na' gunè' idútè ca rinná bè' xibá na', soè' ibanè' tu' gunè' caní."

⁶ Na'a, ca naca que nu huóaca tsahui' tu' réajlè' Dios, rna caní: "Biti' innó' lu icja ládxi'do'o, biti' innó': ¿Nuzxi caz cuen ni' yehua' yubá?" Lè ni naca, para gun nu na' ga huõtjè' Cristo,

⁷ en biti' innó': "¿Nuzxi caz huõtjaj ga dè lataj que nupa chinátigaca?" Lè ni naca, para gun nu na' ga cuenè' Cristo, urúajè' lu yól-la' guti.

⁸ Na'a, ¿bizxi caz rna? Caní rna: "Gala' ga zu' zoa caz xtídzè'è Dios. Lu ru'u, en lu icja ládxi'do'o zoa xtídzè'è na'." Lè ni naca didza' que le réajlè'èru' Dios runtu' libán que, rnatu':

⁹ "Channò didza' gu'u gaca bè' Jesús náquiè' Xanu', en uyéaj lè'u idú ládxi'u Dios busubanè' Lè' lu yól-la' guti, uló' li'."

¹⁰ Lu icja ládxi'do'oru' réajlè'èru' Jesús para gácaru' tsahui', ate' len didza' ru'iru', paru'iru' lahui le náquiè' Jesucristo para uláru'.

¹¹ Nazúaj lu guichi lá'ayi le rna: "Biti' ca' ulu'tuí'i yúgu'tè nupa ta'yéajlè' Lè'."

¹² Dios, la' tuz ca ru'í ládxi'è yugu' bõnni' judío, enca' yugu' bõnni' idútè yödzülió, tu' Lè cazè' Xanru' náquiè' Xángaqiè' yúgu'tè', en nápadè'è bi unödzejè' quégaca yúgu'tè nupa tu'lidza Lè'.

¹³ Ca naca lè ni nazúaj lu guichi lá'ayi, rna: "Ulu'lá yúgu'tè nupa ulu'lidza Lè' Xanru'."

¹⁴ ¿Nacxi gaca ulu'lidzè' Lè' channò cabí ta'yéajlè'è Lè'? ¿Nacxi gaca ila'yéajlè'è Lè' channò catu caz bila'yönnè' ca naca queè'? ¿Nacxi gaca ila'yönnè' channò cuntu nu zoa nu gun libán lógaquiè'?

¹⁵ ¿Nacxi caz gaca ilunè' libán channò cuntu nu isöl-la' légaquiè'? Ca naca lè ni nazúaj lu guichi, rna: "Bica' bágaca nupa na' ila'dxinè' ga nacua' bõnni' rójéngaqiè' libán que le ribequi dxi ládxi'ru', en tunè' libán que didza' dxi'a."

¹⁶ Na'a, calèga yúgu'tè' gula'zí' lu ná'agaquiè' didza' dxi'a. Ca naca lè ni, Isaías gunnè': "Xan, ¿nuzxi caz guyéajlè' le bentu' libán que?"

¹⁷ Caní naca, ila'yéajlè' Lè' nupa ila'yöni, ate' lè na' ral-la' ila'yöni naca didza' ru'è Cristo.

¹⁸ Na'a rnní'a: ¿Naru' cabí bila'yönnè'? Le nácatè bila'yönnè', ca na' nazúaj lu guichi lá'ayi, le rna:

Idútè yödzülió bila'yöni chí'igueti.

Yúgu'tè lataj bila'dxín xtídzaj'gueti.

¹⁹ Lè'sca' rnní'a: ¿Naru' cabí guléquibe'enè' bõnni' Israel lè ni? Le nácatè guléquibe'enè' le. Ga risí lo, bè'è didza' Moisés uláz queè' Dios, gunnè':

Gun caza' ga uzxé'eli',

tu' idxí'ida' bõnachi biti' nabábagaca lib'ili'.

Ni'a quégaca bõnachi cabí ta'yéajni'i guna' ga leli'.

²⁰ Gudödi ni' gúcadè'è rugu ladxi' Isaías na', en bè'è didza' uláz queè' Dios, gunnè':

Bila'dzüli neda' nupa biti' gula'guílaj neda'.

Bulu'í lahua' lógaquië' bönni' biti' bi gula'nábinë' neda'.

²¹ Na'a, ca naca quégaquië' bönni' Israel, Isaías na' bē'ë didza' uláz queë' Dios, gunné': "Idú dza bulí na'a, bulidza' bönachi biti' túngaca ca rnna xtídza'a, en ta'dá'bagá' neda'."

11

Nupa nulágaca ladaj bönachi Israel

¹ Na'a rnnía': ¿Naru' nusán nē'ë Dios bönachi Israel? ¡Biti' ca' naca caní! Neda' caz naca' bönni' Israel. Naca' xzí'ini xi'sóë' Abraham, en nababa' dí'a dza queë' Benjamín, xzí'ini cazë' Israel na'.

² Dios biti' nusán nē'ë bönachi queë', nupa na' gurö cazë' queë' dza ni'te. ¿Naru' cabí núnbë'ëli' lë na' nazúaj lu guichí lá'ayi ca na' benë' Elías? Bulidzë' Dios, en buzéguië' bönachi Israel didza', gunné':

³ "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguiacatu'-ba' bõa' bédxido' lo' Lí'. Tuza' neda' nagá'ana' quiu', ate' té'ënnë' ilútië' ca' neda'."

⁴ Na'a, ¿bizxi didza' bubi'ë Dios? Caní gunné': "Nun chí'igaca caza'-në' quia' tsónnalalaj yu' chi gáyu'ë bönni' biti' tu'zechu zxibigaquië' lo budó' guiöj na' nazí'í le Baal."

⁵ Léscá' caní naca dza ni zóaru' na'a, nagá'anagaca bal-la bönachi Israel, nupa na' gurö cazë' queë' Dios tu' ruzá' ládxë'ë caní quégaquië'.

⁶ Channö naca le ruzá' ládxë'ë caní quégaquië', biti' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxë'ë queëru' Dios bítí'rö gaca tu le ruzá' ládxë'ë queëru'.

⁷ ¿Bizxi caz innaru' na'a? Lë na' gula'guljë' bönni' Israel, biti' bila'déli'në', pero chibila'déli' le nupa ni' gurö cazë' queë' Dios, ate' ia'zica'rë' na', Dios benë' zidi icja ládxí'do'gaquië'.

⁸ Ca naca lë ni nazúaj lu guichí lá'ayi, rnna: "Dios benë' ga nácaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, biti' ca' ta'yéajni'inë'. Caní naca quégaquië' ga ridxintë dza ni zóaru' na'a.

⁹ Ca naca lë ni bē'ë ca' David didza', gunné':
Yugu' laní quégaquië' ulu'huóaca le ila'zón légaquië',
en ca tu yalaj ga ila'rölinë'.
Ilaca ca' le ilún ga ila'chíxinë',
en ca tu le uzí' lëbi légaquië'.

¹⁰ Ila'chul-la guiöj lógaquië', para cabí ila'lé'enë'.
Ila'yechu tsaz cúdzu'gaquië' tu' ilu'ë yua'.

Ca gaca ulu'lagaca bönachi biti' náca gaca judío

¹¹ Na'a rnnía': ¿Naru' gula'chíxinë' yugu' bönni' judío ga bidxintë gula'nítie' tsaz? ¡Biti' ca' guca ca'! Gula'dá'baguë'ë xtídzë'ë Dios, ate' na'a Dios ru'ë lataj ulu'lagaca nupa biti' náca gaca judío para gunë' ga ulu'zxé'enë' yugu' bönni' judío léguequi.

¹² Le gulunë' bönni' judío, gula'chíxinë', ben ga bidxín quégaca bönachi yödzoülió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa biti' náca gaca judío tu' gula'nítie' yugu' bönni' judío, zxöntë'rö gaca le gata' quéguequi cate' yugu' bönni' judío na' ulu'huóáquië' queë' Dios.

¹³ Na'a rea' libí'ili' biti' nácali' judío, rnnía': Tu' naca' gubáz nasól-lë'ë Dios lógaca nupa biti' náca gaca judío, runa' zxön lë na' dë lu na'a

14 para nadxi ca' huáca guna' ga ulu'zxé'ené' bönni' uládz quia' libí'ili', en caní guna' ga ulu'lé' bal-lé'.

15 Channö bulu'huóaca bönnachi nacua' idú yödzölió queë' Dios tu' bulu'nítië' yugu' bönni' judío xilátjagaquië', zxöntëro gaca le gata' quéguequi cate' ulu'huóazië' xilátjagaca cazë' na'. Gaca ca raca cate' tu'bángaca nupa chinátigaca.

16 Channö rigú'uru' quez queë' Dios cúa nílado' rubéajru' zí'aló, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

17 Nácagaquië' bal-lé' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yöjtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'.

18 Que lé ni na', biti' gun ba zxon cuinli', biti' uzóali' tsólá'aló nupa nácagaca ca ni'a në'e na' narúgugaca. Channö run ba zxon cuinli', ral-la' inözili' caléga libí'ili' rugáguli' luí yaga na', pero luí yaga na' rugagu libí'ili'.

19 Nadxi ca' innó: "Gula'rugú ni'a në'e yaga na' para gaca tsázia' neda' xilátjagaca."

20 Nácaté didza' ru'u, pero gula'rúguië' tu' cabí gula'yéajlë'ë, ate' yöjtó'o lí yaga na' tu' réajlë'u Dios. Que lé ni na', biti' ral-la' gun ba zxon cuinu', pero ral-la' gádxinu' Dios.

21 Channö benë' Dios léguequi xíguia', nupa na' nácagaca caz ni'a në'e yaga dxi'a na', çnaru' cabí gunë' xíguia' ca' lí'?

22 Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácaté rúndë'ë xíguia' nupa na' gula'chixi, pero náquië' dxi'i ladxi' len lí'. Que lé ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' lí' lu yaga queë' na'.

23 Lësca' caní gaca quégaquië' channö cabí ulu'gá'anë' lu yöl-la' cabí réajlë' quégaquië', tsöjtá'gaquië' leyúbölö lu yaga na', tu' napë' Dios yöl-la' huáca gunë' ga tsöjtá'gaquië' le leyúbölö.

24 Nacu' lí' ca tu ni'a në'e gurugu lu yaga olivo guí'a, en yöjtó'o yaga olivo dxi'a ga cuntú nu udá' tu ni'a në'e yaga guí'a. Yénni'tëro huáca quégaquië', nácagaca cazë' ni'a në'e yaga dxi'a na', huáca tsöjtá'gaquië' leyúbölö lu yaga quéguequi cazë' na'.

Ca gaca ulu'lágaca bönnachi Israel

25 Böcha'ado', ré'enda' inözili' lé ni bigachi', para cabí gun ba zxon cuinli' ca naca yöl-la' réajni' queéli'. Bulu'huóaca bal-la bönnachi Israel zidi ladxi', ate' caní iláquië' ga idxinrö dza chinayázgaca yúgu'të bönnachi biti' nácagaca judío ga rinná bë'ë Dios, nupa na' ral-la' ulu'lágaca.

26 Tödi na' gata' lataj ulu'lé' ca' yúgu'të bönni' Israel, ca na' nazúaj lu guichi lá'ayi, rnna:

Irúaj yödzö Sión Nu rusóla,

en ugúa le ruá' dö' nabága'gaca xzí'ini xi'sóé' Jacob.

27 Lé ni naca didza' dzaga gúnlena' légaquië'

cate' ugúa' dul-la' nabága'gaquië'.

28 Caní naca, gula'dá'baguë'ë didza' dxi'a, ate' Dios guléaj ládxe'ë légaquië' para gaca uláli' libí'ili', pero nadxi'inë' ca' légaquië', tu' guró cazë' queë' xuz xtó'ogaquië'.

²⁹ Tsaz runödzejë' Dios le runödzejë', en tsaz rulidzë' bönachi.

³⁰ Ca na' naca queéli', zí'atëlö biti' benli' ca rnna xtídzë'ë Dios, ate' na'a ruhuéchi' ládxë'ë Dios libí'ili' tu' cabí' gulunë' yugu' bönni' judío ca rnnë'.

³¹ Lësca' caní naca quégaquië' na'a, biti' tunë' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a.

³² Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

³³ Zxöntërö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzöë' Dios gunë', en biti' gaca nu inözi yugu' le runë' Dios.

³⁴ ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'?

³⁵ ¿Nuzxi caz bi bunödzej queë' Dios para gun bayudxi bi ubi'ë Dios que?

³⁶ Yúgu'të le dë narúajgaca lu në'ë Dios, en taca lu në'ë, en nácagaca para uzi'ë xibéguéqui. ¡Gácatíca'sö queë' Dios yöl-la' ba! ¡Ca' gaca!

12

Ral-la' udödi cuinru' quez queë' Dios

¹ ¡Böchi' luzá'ado'! ¡Ruhuéchi' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxí'ru'-në' Dios.

² Biti'rö gunli' la' lëbisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxí'do'oli'. Guli'gún caní para gaca inözili' le naca dxi'a ré'ënë' Dios gunli', lë na' raza ládxë'ë, en le naca idú.

³ Na'a, tu' zoa le buzá' ládxë'ë quia' Dios, rea' yúgu'tëli': Biti' gun ba zxön cuinli', le cabí ral-la' gunli', pero ral-la' gácali' nōxaj ladxi' ca ribequi ícjali', tsca naca yöl-la' réajlë' queéli' Dios le bennë' que queéli'.

⁴ Ca na' naca tuz idütë' le naca cázaru', sal-la' zían le nagudi' dzágalenru', en calëga tuz dxin tun yúgu'të le zían na' nagudi' dzágalenru',

⁵ lësca' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

⁶ Tu turu' dë lu ná'aru' tu le bennë' queëru' Dios, ate' nadzá'gaca tu tu tsca naca le buzá' ládxë'ë que queëru'.

Bönni' na' Dios bunödzejë' queë' gu'ë didza' uláz queë', tsca réajlë'ë Lë', ral-la' gu'ë didza' bönni' na'.

⁷ Bönni' na' Dios bunödzejë' queë' gunë' xichinë', dxí'ado' ral-la' gunë' dxin na'.

Bönni' na' Dios bunödzejë' queë' usédinë' bönachi, dxí'ado' ral-la' usédinë' bönachi.

⁸ Bönni' na' Dios bunödzejë' queë' uzéajni'inë' bönachi, dxí'ado' ral-la' uzéajni'inë' légaquië'.

Bönni' bi unödzejë' que nu yúbölö, idú ládxë'ë ral-la' unödzejë'.

Bönni' rinná bé'enë' bönachi, idú ládxë'ë ral-la' gunë' caní.

Bönni' rácalenë' luzë'ë, len yöl-la' rudzeja ral-la' gunë' caní.

Yugu' le ral-la' gun nu nequi queë' Cristo

⁹ Ral-la' idxi'ili' luzá'ali' idú ládxi'li'.

Buli'cá'ana le ruá' dō'.

Guli'gü' ládxi'li' gunli' le naca dxi'a.

¹⁰ Guli'dxi'i-guéquinë' luzá'ali'

ca nadxi'igüecli'-në' böchi' cázali'.

Ca runli'-në' bal luzá'ali'

ral-la' gunli' ga gácarë' lo ca nácali' la' cuínsili'.

¹¹ Buli'típatica'sō ládxi'li', en biti' gácali' xōhuëdi.

Guli'gún xichinë' Xanru' idú ládxi'li'.

¹² Buli'dzeja tu' zoa le runli' löza.

Guli'cöz zxōn ladxi' cate' bi riguí'i rizáca'li'.

Buli'lídzatica'së' Dios.

¹³ Buli'nōdzaj quégaca bōnachi queë' Cristo

tsca nayádzjaguequinë'.

Guli'gü' lataj ga ila'cuá' nupa ta'dxín queëli'.

¹⁴ Guli'nábinë' Dios gunë' dxi'a

quégaca nupa ta'bía ládxi'gaca libí'ili'.

Guli'naba gaca dxi'a quégaquië',

en biti' udxíali' légaquië' dō'.

¹⁵ Buli'dzējalen nupa tu'dzeja.

Guli'cōdxilen nupa ta'bōdxi.

¹⁶ Guli'gaca tuz len luzá'ali'.

Biti' gun ba zxōn cuinli',

pero guli'gún tsōzxōn yugu' bōnni' nōxaj ladxi'.

Biti' guéquili' chinadéli'li' idútë yōl-la' réajni'i.

¹⁷ Cuntu nu ubí'ili' que,

biti' guá'ali' dō' que nu ruá' dō' queëli'.

Guli'gún dxi'a quégaca yúgu'të bōnachi.

¹⁸ Channō huáca, tsca séqui'li', guli'cöz dxi'a

len yúgu'të bōnachi.

¹⁹ Böchi' luzá'ado', biti' uzí' lëbili' bōnachi la' libí'isili', pero guli'gü' lataj ubi'ë Dios quégaca bōnachi na', tu' nazúaj lu guichi lá'ayi le rnna:

Neda' caza' uzí' lëba'.

Neda' ubi'a quégaca bōnachi.

Caní gunné' Xanru' Dios.

²⁰ Lëasca' caní rnna:

Channō zoë' nu bōnni' biti' ridzáguië' li' dxi'a,

en ridunë', bë'ë le gahuë'.

Channō ribidxë' nisa, bë'ë le guí'jë'.

Cate' gunu' caní, gunu' ga utuí'inë' bōnni' na'.

²¹ Biti' gu'u lataj inná be'e le ruá' dō' li',

pero gunná be'e le ruá' dō' na',

ugunu' dxin le naca dxi'a.

13

¹ Yúgu'tëli' ral-la' gunli' ca ta'nne' bōnni' yúlahui'. Dios caz budödë' lu ná'agaquië' yōl-la' unná bë' ná'agaquië', en nucu'ë xilátjagaquië' bōnni' ni dë lu ná'agaquië' yōl-la' unná bë'.

² Que lë ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabága'gaca xiguaia'.

³ Nacu'ë bönni' yúlahui', calëga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö rë'ënu' gunu' ga biti' ulu'zenë' li' bach, ben le naca dxi'a, ate' uruju' dxi'a lógaquië'.

⁴ Náquië' bönni' yúlahui' ni'a në'ë Dios para gácalenë' li', pero channö runu' le ruá' dö', ral-la' gádxinu', tu' cabi nu'ë nítisö xiyaga yúlahui'. Náquië' ni'a në'ë Dios para uzí' lëbë', gunë' xiguaia' nu ruá' dö'.

⁵ Que lë ni na' run bayudxi gunli' ca rnnë' bönni' na' dë lu në'ë, calëgasö tu' budödë' Dios lu në'ë gunë' libí'ili' xiguaia', pero lësca' para soa dxi ládxi'do'oli' lahuë' Dios.

⁶ Que lë ni na' ca' riguíxaj lázali' que yúlahui', tu' nácaqaquië' bönni' yúlahui' ni'a në'ë Dios, en tunë' le nudödi cazë' lu ná'agaquië'.

⁷ Guli'guíxaj yúgu'të bönachi le rál-la'li' quëgaquië'. Guli'guíxaj lázali' lu na' nu ral-la' quíxaj lázali'. Guli'guíxaj dumí nu ral-la' quíxajali'. Guli'gadxi nu ral-la' gádxili', en guli'gún bal nu ral-la' gunli' bal.

⁸ Cuntu nu bi ral-la' gál-la'li' que, pero tuz ral-la' idxí'ili' luzá'ali', tu' chibén idú ca rinná bë' xibá queë' Dios nu nadxí'i luzë'e.

⁹ Caní ta'nná bë' xibá na':

Biti' gunu' dul-la' le riguíxaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácate.

Biti' së ládxi'u le dë que luzó'o.

Yugu' xibá ni, en yúgu'të xibá ia'zica'rö, údxi gun nu run ca rnna didza' rnna caní:

Bidxí'i luzó'o ca nadxí'i cuinu'.

¹⁰ Nu na' nadxí'i luzë'e biti' bi run que luzë'e le ruá' dö'. Caní naca, nu na' nadxí'i luzë'e run idú ca rinná bë' xibá queë' Dios.

¹¹ Guli'gún caní tu' nözili' ca raca dza ni zóaru' na'a, en nözili' ca' chibidxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusi'loru' réajlë'ëru' Cristo.

¹² Ga zóaru' na'a naca ca chi'i dzö'ölö, ate' chizóa tödi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la que dul-la'. Ca na' rugacu cuinë' tu bönni' rejë' gudil-la le run chi'i lë' lu gudil-la, ral-la' taru' lu bení' queë' Dios, le gun chí'i rë'u lu na' tu' xihui'.

¹³ Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulë'ëru'.

Biti' ral-la' gunru' le ruá' dö', en calëga le gun ditaj rë'u.

Biti' ral-la' tíl-lalenru' luzá'aru', en cabí uzxë'ëru' luzá'aru'.

¹⁴ Na'a, ral-la' un cuinli' lu icja ládxi'do'oli' ca náquië' Xanru' Jesucristo, en biti' gü'i ládxi'li' gunli' le rizë ládxi'li' lu yöl-la' bönáchisö queéli'.

14

Biti' ral-la' si' quídza'ru' böchi' luzá'aru'

¹ Guli'gü' lataj nu réajlë' Cristo gun libí'ili' tsözxön sal-la' biti' naca idú ca réajlë' nu na' Lë'. Biti' tíl-lalenli' nu na' ca nácaaca le runi nu na' huáca nu gun.

² Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'.

³ Na'a, bönni' na' rahuë' yúgu'të bití' ral-la' uzóë' tsólá'aló nu bönni' bití' rahuë' yúgu'të, en lësca' caní, bönni' na' bití' rahuë' yúgu'të bití' ral-la' sí' quídzë'ë bönni' na' rahuë' yúgu'të, tu' nazí' lu në'ë Dios iropë' bönni' na' ta'yéajlë'ë Cristo.

⁴ ¿Nuzxi caz lí, rizí' quídzú'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahui' o bití' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

⁵ Nadxi ca' zoë' nu bönni' runrë' bal tu dza ca runë' bal ia'zíca'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'.

⁶ Bönni' na' runë' bal tu dza, runë' le bal para tseaj ládxë'ë Xanru', ate' bönni' na' bití' runë' bal dza na', para tseaj ládxë'ë Xanru' bití' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxë'ë Xanru', en rë'ë Dios: "Xclenu'", ate' bönni' na' bití' rahuë' yúgu'të, bití' rahuë' le para tseaj ládxë'ë Xanru', en rë'ë ca' Dios: "Xclenu'."

⁷ Bití' zoë' nabanë' queëzë' nitúë' bönni' nabábalenë' rë'u, en bití' ratië' queëzë' nitúë' bönni'.

⁸ Channö zóaru' nabanru', para tseaj ládxi'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'.

⁹ Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

¹⁰ Na'a lí, ¿bixz que richugu bë'u böchi' luzó'o? ¿Bixz que ruzú' tsólá'aló böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u.

¹¹ Ca naca lë ni nazúaj lu guichi lá'ayi, rnna:

Rnnë' Xanru': "Ni'a quia' neda' caz, ulu'zechu zxíbigaca yúgu'të bönachi lahua' neda'. Ila'guixjö' yálajdo' naca' Dios."

¹² Caní naca, uchi'a usöröë' Dios yúgu'tëru'.

Bití' ral-la' gunru' ga ichixi iníquinë' böchi' luzá'aru'

¹³ Que lë ni na', bití'rö ral-la' ichugu bé'eru' luzá'aru', pero ral-la' gun yúdxiru' cabí gunru' ga ichixi iníquinë' böchi' luzá'aru', en para cabí gunru' ga gunë' dul-la'.

¹⁴ Nöz quézida' bití' bi dë le ráguru' le gaca gun ga bití'rö nácaru' tsahui' lahuë' Dios, ate' röjlöz lë ni didza' bë'ë Xanru' Jesús. Channö réquinë' tu bönni' zoa bi gaca gun ga bití'rö náquië' tsahui' lahuë' Dios, queë' bönni' ni, caní naca.

¹⁵ Channö rusuhuí'innu' böchi' luzó'o, tu' ragu' le runi lë' bití' ral-la' gáguru', bití' runu' ca ral-la' gun nu nadxí'i böchi' luzë'e. Bití' bi ral-la' gagu' le gun ga gaca chopá ládxë'ë bönni' na', gútië' Cristo uláz queë'.

¹⁶ Que lë ni na', bití' bi gunlí' le gun ga ila'nnë xihui' bönachi que le rusáca'li' queë'li' naca tsahui'.

¹⁷ Cate' rinná bé'enë' Dios rë'u, bití' ruí'i ládxi'ru' le guí'aj gáguru', pero ruí'i ládxi'ru' gácaru' tsahui', en sóaru' dxi ladxi', en udzéjaru', yugu' le gaca gunru' tu' zóalenë' Dios Bö' Lá'ayi rë'u.

18 Núti'tës nu run xichinë' Cristo ca náca gaca lë ni, run le raza ládxë'ë Dios, ate' urúaj dxi'a lógaca bönachi.

19 Que lë ni na' ral-la' gunru' le ilún ga gata' le ribequi dxi ládxi'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo.

20 Biti' bi ral-la' gagu' le gun ga gaca chopaladxi' nu na' nuzóë' Dios. Nácatë lë na' ta'nná bönachi: "Yúgu'të dë lataj gáguru'", pero gunru' le ruá' dō' channō gunru' ga ichixi iníguinë' luzá'aru' tu' nōzi lë na' rágu'ru'.

21 Gácarō dxi'a cabí gagu' bēla', en cabí guí'ju' xisi uva nal-la, en bití' bi gunu' le gun ga ichixi iníguinë' böchi' luzó'o, o le gun ga gaca chopaládxë'ë, o le gun ga huōaj ládxë'ë ca réajlë'ë Cristo.

22 Channō réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' bití' ruxósa ládxi'da'ahuë' lë' tu' nōzi lë na' runi lë' dë lataj gunë',

23 pero bönni' na' raca chopaládxë'ë tu' nōzi le lahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

15

Ral-la' gunru' le raza ládxë'ë böchi' luzá'aru'

1 Que lë ni na', channō nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxi'gaca ca ta'yéajlë' Cristo. Biti' ral-la' gunru' le raza ládxi'ru' la' cuínsiru'.

2 Yúgu'tëru' ral-la' gunru' le raza ládxë'ë böchi' luzá'aru' para gaca dxi'a queë', en idipa ládxë'ë ca réajlë'ë Cristo.

3 Caní ral-la' gunru', tu' cabí benë' Cristo le guyaza ládxë'ë la' cuínsë', pero guca queë' ca na' nazúaj lu guichi lá'ayi, le rna: "Budubága'gaca neda' yugu' didza' xihui' gulu'í nupa gula'nnë xihui' quiu' Li', Dios."

4 Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribózaru' zxón ladxi', en ruhuë' tsahui' rë'u. Que lë ni na' zoa le runru' löza.

5 Rinábida'-në' Dios, Nu run ga ribózaru' zxón ladxi', en Nu ruhuë' tsahui' rë'u, gunë' ga gunli' tuz ca rusáca'li' queëli', para gácali' ca na' rë'ënë' Jesucristo.

6 Caní ral-la' gunli' para gácali' tuz, cú'uli'-në' tsózxón yöl-la' ba Dios, Xuzë' Xanru' Jesucristo.

7 Que lë ni na', para gaca yöl-la' ba queë' Dios, guli'sí' lu ná'ali' tuli' ia'tuli' ca na' Cristo guzxí' lu në'ë ca' rë'u.

8 Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idútë li didza' ru'ë Dios, ate' benë' ga bulu'dxín le guzxí' lu në'ë Dios unödzejë' quegaquië' xuz xtó'otu'.

Yugu' bönachi izá'a ila'yöni didza' dxi'a

9 Bidë' ca' Cristo para benë' ga ila'gú'u Dios yöl-la' ba nupa bití' náca gaca judío tu' ruhuëchi' ládxë'ë Dios légaquië'. Ca naca lë ni nazúaj lu guichi lá'ayi le rna:

Que lë ni na', ulu'a lahui le nacu' Li' lógaca bönachi idútë yödzölió, en gul-la' quiu' yöl-la' ba.

10 Ga yúbölö nazúaj lu guichi lá'ayi le rna: Libí'ili', bönachi idútë yödzölió,

buli'dzéjalen bönachi queë' Dios.

11 Ga yúbölö nazúaj ca' lu guichi lá'ayi le rnna:

Guli'cu'ë Xanru' yöl-la' ba,

yúgu'tëli' biti' nácali' judío.

Guli'tséaj ladxi' Lë',

yúgu'tëli' zóali' idútë yödzülió.

12 Lësca' caní buzúajë' Isaías lu guichi le rnna:

Ilá' lahui Nu nababa di'a dza queë' Isaí.

Gaca lo Nu na' para inná be'e nupa biti' náca gaca judío.

Nupa ni ilún löza Lë'.

13 Rinábida'-në' Dios, Nu run ga runru' löza, gunë' ga udzëjade'eli', en ga soa dxi ládxi'li' tu' réajlë'ëli' Lë', en gunë' ga gaca idú ca runli' löza, tu' zóalen yöl-la' huáca queë' Dios Bö' Lá'ayi libí'ili'.

14 Böchi' luzá'ado'. Chinóz quézida' rúntica'sili' le naca dxi'a, en dëda' yöl-la' réajni'i queëli' para gaca uzéajni'ili' luzá'ali'.

15 Na'a naca' rugu ladxi', ruzúaja' queëli' lu guichi ni, böcha'a, en rusá'a ládxi'li' tu' zoa le buzá' ládxi'ë Dios quia' neda'.

16 Que lë ni na' runa' xichinë' Jesucristo lógaca bönachi biti' náca gaca judío, en runa' libán que didza' dxi'a queë' Dios, para gaca ugu'a bönachi biti' náca gaca judío lu nëë Dios, nupa na' guró cazë' Dios Bö' Lá'ayi queë' Lë'. Iláca gacuië' ca tu le rigú'uru' lu nëë Dios, le raza ládxi'ë Lë'.

17 Na'a, tu' rúnlena' tsózxön Jesucristo dxin, dë lu na'a tsaza ládxa'a ca naca le nuna' lu xichinë' Dios.

18 Lësca' rurúguida' innía' ca naca lë na' benë' Cristo lu na'a neda', benë' ga tun bönachi biti' náca gaca judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'.

19 Lu na'a neda' bugunë' dxin ca' le náca gaca bë' bulu'e lahui Lë', en yugu' yöl-la' huáca zxön benë', en yöl-la' huáca na' queë' Dios Bö' Lá'ayi le guzóalen neda'. Caní guca, gusí lahua' runa' libán lu yödzo Jerusalén, ate' idú gásibi'iló ga ridxintë luyú Ilírico, chinuna' libán que didza' dxi'a ca naca queë' Cristo.

20 Bë' ládxa'a bena' libán que didza' dxi'a ga biti' bila'yöni bönachi ca naca queë' Cristo. La' tu' guna' libán ga chibila'yöni bönachi, guna' neda' ca runë' tu bönni' ruguelë'ë lahui dxin zxön chinunë' bönni' yúbölö.

21 Ca bena' neda' naca ca na' nazúaj lu guichi lá'ayi le rnna:

Ila'lé'e nupa nacua' ga cuntu nu ben libán queë' Lë',

en ila'yéajni'i nupa catu caz bila'yöni ca naca queë'.

Rë'ënë' Pablo tsejë' yödzo Roma

22 Que lë ni na', sal-la' zían luzuí gú'unida' guída' ga zóali', biti' guca guída'.

23 Na'a, chibudxi bena' dxin quia' yugu' lataj ni, en chirë'ënda' zían iz guída' ga zóali'.

24 Que lë ni na', cate' tseja' luyú España, tóda' ga zóali' libí'ili', tu' runa' löza uduyúa' libí'ili', en udzëjalenda' libí'ili'. Tódi ni' huáca ugu'uli' neda' nöza.

25 Na'a ral-la' tseja' Jerusalén, tsöju'a tu le gácalen nupa ni' néquiquequi queë' Cristo.

26 Caní guna', le gula'yaza ládxi'gacuië' bönni' nacu'ë luyú Macedonia, en luyú Acaya, bulu'tubë' bi tu'nódzjë' quéguequi bönachi yechi' dzágagaca bönachi queë' Cristo, nacu'ë Jerusalén.

27 Gula'yaza ládxi'gacuië' bönni' biti' náca gacuië' judío gulunë' lë ni. Le nácatë naca tu le rál-la'gacuië' quégaca bönachi judío ni'. Channö bönni' biti'

nácagaquië' judío tu'zi'ë xibé le nácagaca queë' Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë quégaquië'.

²⁸ Que lë ni na', cate' údxi udóda' lu ná'agaca bönachi judío lë na' bulu'nódzjé' bönni' ni, ní'iró tóda' ga zóali' libí'ili' cate' tseja' luyú España.

²⁹ Cate' guída' ga zóali', runa' löza idxílnena' yúgu'të le ruzí'iru' xibé ni'a que didza' dxi'a queë' Cristo.

³⁰ Ni'a queë' Xanru' Jesucristo, en ni'a que yöl-la' nadxí'i ruchízië' Dios Bõ' Lá'ayi icja ládxi'do'oru', ráta'yua' loli', böcha'ado', ulídzali'-në' Dios tsózxön len neda', inábili'-në' gácalenë' neda'.

³¹ Guli'nabi-në' Dios gunë' ga ulá' neda' lu ná'agaquië' bönni' biti' ta'yéajlë'ë nacu'ë luyú Judea, en gunë' ga ila'yaza ládxi'gaquië' ila'zi'ë lë na' tsóju'a lu ná'agaquië' bönni' nácagaquië' queë' Cristo, nacu'ë Jerusalén.

³² Guli'nabi-në' ca', channó naca ca rë'ënë' Dios, gunnë' neda' lataj idxina' queë'li' len yöl-la' rudzeja quia', para uzí' ládxi'lëna' libí'ili'.

³³ Na'a rinábida'-në' Dios, Nu run ga zoa dxi ládxi'ru', sóalenë' yúgu'tëli'. ¡Ca' gaca!

16

Tu'gapa Dios luzë'eguequi bönachi queë' Cristo

¹ Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzáganu bönachi queë' Cristo nacuá' yódzó Cencrea.

² Uláz queë' Xanru' guli'si' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu, unódzjali' queënu bítí'tës bi riquínnu. Lë cázanu gúcalennu bönachi zían, en gúcalennu ca' neda'.

³ Guli'gapa Dios Priscila, en Aquilo, nupa na' gulunlen neda' tsózxön dxin queë' Jesucristo.

⁴ Chopë' ni gula'dödë' ga guzóa bönadxi ilátíë' para gulunë' ga cabí gátia' neda', ate' rea' légaquië': "Xclenli'", en calégasó neda', pero lësca' yúgu'të böchi' luzá'aru' nabábagaquië' gapa nacuá' bönachi queë' Cristo biti' nácagaca judío, të'ë légaquië': "Xclenli'."

⁵ Guli'gapa Dios bönachi queë' Cristo tu'dubë' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya.

⁶ Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'.

⁷ Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsózxön lidxi guíë, en nadéli'gaquië' lataj lo ladaj bönni' gubáz nasól-lë'ë Cristo. Lësca' gula'yéajlë'ë Cristo zí'aló ca neda'.

⁸ Guli'gapa Dios Amplias, bönni' na' nadxí'ida', en néquinë' queë' Xanru'.

⁹ Guli'gapa Dios Urbano, bönni' na' bënlenë' netu' tsózxön dxin queë' Jesucristo. Guli'gapa Dios Estaquis, bönni' na' nadxí'ida'.

¹⁰ Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacuá' lidxë' Aristóbulo.

¹¹ Guli'gapa Dios Herodión, bönni' uládz quia'. Guli'gapa Dios nupa nacuá' lidxë' Narciso, en ta'yéajlë'ë Xanru'.

¹² Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu.

¹³ Guli'gapa Dios Rufo, bönni' rö queë' Xanru'. Guli'gapa Dios xinë'ë Rufo na', nácanu ca' ca xiná' caza'.

¹⁴ Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacuá'lenë' légaquië'.

¹⁵ Guli'gapa Dios Filólogo, en Julia, en Nereo, en nigula zanë' Nereo na', enca' Olimpás, en yúgu'të böchi' luzá'aru' ta'yéajlë'ë Cristo, nacuá'lenë' légaquië'.

¹⁶ Guli'gapa Dios luzá'ali', unída'li' luzá'ali' lu yöl-la' nadxí'i queéli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacuá' bönachi queë' Cristo luyú ni.

¹⁷ Na'a, ráta'yua' loli', böcha'ado', guli'gún ga ilaca bë' nupa tun ga irúajli' choplō, en tun ga ichixi iníguili', tu' tu'sédinë' le cabí röjlöz le nazédali'. Guli'cuíta ga nacuá' bönachi caní

¹⁸ tu' cabí tun xichinë' Jesucristo. Tunë' dxin para bi gata' quégacasë', en ta'z'í' yé'enë' yugu' bönni' nōxaj ladxi', tu'gunë' dxin didza' nōxaj ladxi', en didza' tséajlë'ëru' le cabí nácatë'.

¹⁹ Rizë didza' ca na' runli' ca rnna xtídzë'ë Xanru', ate' ta'yōni yúgu'të bönachi. Que lë ni na' rudzējada' ni'a que le runli' libí'ili'. Na'a, ré'ënda' gácali' sina' gunli' le naca dxi'a, en calëga gunli' le ruá' dö'.

²⁰ Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' ládxë'ë queéli' le gácalen libí'ili'.

²¹ Bi'i Timoteo, bi'i na' rúnlenbi' neda' tsōzxon dxin, rugápabi' Dios libí'ili'. Lucio, en Jasón, en Sosípater, yugu' bönni' ulázq quia', tu'gapë' Dios libí'ili'.

²² Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguie' Xanru' neda'.

²³ Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yōdzō ni, rugapë' Dios libí'ili'. Böchi'ru'do' Cuarto rugapë' Dios libí'ili'.

²⁴ Rinábida'-në' Xanru' Jesucristo uzá' ládxë'ë queéli' yúgu'tëli' le gácalen libí'ili'. ¡Ca' gaca!

Yöl-la' ba Dios

²⁵ Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáché'ë Lé' dza ni'te ga bidxintë na'a dza.

²⁶ Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sō. Na'a raca libán que lógaca yúgu'të bönachi para gaca ila'yéajlë' Cristo, en ilún ca rnna xtídzë'ë.

²⁷ ¡Ni'a que le benë' Jesucristo, gácatca'sō yöl-la' ba queë' la's dui Dios, Nu rácatë'rō caz! ¡Ca' gaca!

DIDZA' ZÍ'ALÖ GUSÖL-LË'Ë PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Ca rë'ëni quézinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxön.

² Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxön len yúgu'të nupa nacua' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquie', enca' Xanru'.

³ Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Yugu' le ruzí'iru' xibë tu' néquiru' queë' Cristo

⁴ Rética'sa'-në' Dios: "Xclenu'" ca naca queëli', tu' zoa le buzá' ládxë'ë Dios queëli' tu' nácali' tuz len Jesucristo.

⁵ Tu' nácali' tuz len Cristo, Dios chinagú'udë'ë xinözili' yúgu'të le nequi queë'. Rácalenë' libí'ili' ca naca yúgu'të didza' ruí'ili', en runë' ga réajni'ili' yúgu'të.

⁶ Caní naca, tu' guzxi' lu ná'ali' idú ládxi'li' le runtu' liná' lo ca naca queë' Cristo.

⁷ Que lë ni na', bití' bi riyadzaj queëli' que le runnë' Dios Bó' Lá'ayi queëru', tsanni ni ribözali' dza na' ilá' lahuë' Xanru' Jesucristo.

⁸ Lë cazë' utipë' ládxi'li' para gaca guá' ilenli' yúgu'të ga idxintë dza údxi, para cabí gaca nu bi innë' queëli' dza ni' huödë' Xanru' Jesucristo.

⁹ Dios runë' ca rnnë', en Lë cazë' bulidzë' libí'ili' para gácali' tuz len Zxi'inë', Xanru' Jesucristo.

Narúajgaca choplö bönachi queë' Cristo nacu'ë Corinto

¹⁰ Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Bití' irúajli' choplö, pero guli' gaca tuz ca rizá' ládxi'li', en ca runi libí'ili'.

¹¹ Caní rea' libí'ili', böchi' luzá'ado', tu' gula'guíxjöi'inë' neda' bönni' nacu'ë lídxinu Cloé ca runli', ta'nnë' ridil-la dídza'li'.

¹² Lë ni rnniá': Nadzá'lö didza' ruí'ili' tu tuli'. Bál-lali' rnnali' dá'ali' Pablo. Ia bál-lali' rnnali' dá'ali' Apolos. Ia bál-lali' rnnali' dá'ali' Cefas, ate' ia bál-lali' rnnali' dá'ali' Cristo.

¹³ ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queëli'? ¿Naru' bidíatsali' nisa para gácali' tuz len neda'?

¹⁴ Rea'-në' Dios: "Xclenu'", tu' cabí buquila' nisa niturö libí'ili', pero chópasë' Crispo, en Gayo.

¹⁵ Que lë ni na' bití' gaca innali' bidíalali' nisa para gácali' tuz len neda'.

¹⁶ Lësca' buquila' nisa Estéfanos, en nupa nacua' lídxë'. Bití' röjneda' channö buquila' nisa nu yúbölö.

¹⁷ Gusöl-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

Cristo napa cazë' yöl-la' huáca, en yöl-la' réajni'i queë' Dios

18 Nupa nácgaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusólá rë'u.

19 Caní naca, tu' nazúaj lu guichi lá'ayi le rnna:

Guna' ga huóaca nítisö yöl-la' rácada'
quégaca nupa taca yenni'.

Tsölá'alö uca'ana' yöl-la' réajni'i
quégaca nupa ta'yéajni'i yenni'.

20 ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga bóaca cá'asö yöl-la' réajni'i quégaca bönachi yödzölió ni.

21 Dios, lu yöl-la' réajni'i queë', biti' bë'ë lataj ilünbe'e bönachi yödzölió ni Lë' ni'a que yöl-la' rácada' quégaquië'. Dios guyaza ládxë'ë busölë' nupa ta'yéajlë' Lë' ni'a que libán na' runru', sal-la' téquiguequi bönachi cá'asö naca.

22 Té'ënnë' yugu' bönni' judío ila'lé'enë' yöl-la' huáca nácgaca bë', ate' bönni' zi'tu' ta'guiljë' yöl-la' réajni'i.

23 Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zica'rö bönachi téquiguequi cá'asö naca.

24 Bönni' na' bulidzë' Dios légaquië', sal-la' nácgacaquië' bönni' judío o bönni' zi'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios.

25 Téquiguequi bönachi yödzölió ni le benë' Dios naca bë' biti' bi nözinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca quégaca bönachi.

26 Na'a, böchi' luzá'ado', guli'tsöjné ca gúcali' cate' bulidzë' Dios libí'ili'. Biti' gula'cu'ë ládjali' zían bönni' ta'yéajni'inë' lu yöl-la' bönáchisö quégaquië', en biti' gula'cu'ë ládjali' zían bönni' unná bë', en caléga zían bönni' nácgacaquië' lo.

27 Téquiguequi bönachi yödzölió ni yugu' bönni' na' guröë' Dios biti' bi nözguequinë'. Caní benë' Dios para gunë' ga ulu'tuí'i nupa ta'yéajni'i. Lësca' caní guröë' Dios nupa nacuídi'gaca yödzölió ni para gunë' ga ulu'tuí'i nupa nál-lagaca.

28 Lësca' caní, téquiguequi bönachi yödzölió ni nupa na' guröë' Dios nácgaca cá'asö, en biti' bi nácgaca, en nacuídi'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni.

29 Que lë ni na', cuntu nu gaca gun ba zxön cuini lahuë' Dios.

30 Dios caz benë' ga nácaru' tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuóacaru' tsahui', en néquiru' quez queë' Dios, en nuláru'.

31 Naca ca na' nazúaj lu guichi lá'ayi, le rnna: "Channö zoa nu bi rë'ëni gun zxön, ral-la' gun zxön Xanru'."

2

Libán runru' queë' Cristo, ca gudë'ë lë'e yaga cruz

¹ Caní guca, böchi' luzá'ado', cate' bidxina' queéli'. Bena' libán loli' que xtídzë'ë Dios, calëga len yöl-la' réajni' quia', en bití' bë'a didza' lu yöl-la' rácada' quia'.

² Cate' ni' guzóalena' libí'ili', bë' ládxa'a cabí gu'a didza' que le yúbölö, pero ca nácatë queë' Jesucristo bë'a didza', ca na' gudë'ë lë'e yaga cruz.

³ Guzóalena' libí'ili' lu yöl-la' ricuidi' quia', ate' lu yöl-la' radxi quia' guxzízida'a.

⁴ Bë'lena' libí'ili' didza', en bena' libán que xtídzë'ë Dios, calëga ca tuí' didza' bönachi lu yöl-la' rácada' quëguequisö, pero guzóalenë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idütë li didza' bë'a.

⁵ Caní bena' para gaca tséajlë'ëli' Dios, calëga tu' biyönilí' yöl-la' rácada' quëgaca bönachi, pero tu' bilé'eli' yöl-la' huáca queë' cazë' Dios.

Dios Bö' Lá'ayi runë' ga núnbë'ëru'-në' Dios

⁶ Ruí'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni bití' naca ca le nápagaca bönachi yödžlió ni, en bití' naca ca le nápagaquie' bönni' ta'nná bë'ë dza ni zóaru' na'a, nupa na' ta'niti caz.

⁷ Ruí'itu' didza' que yöl-la' rácada' nagachi', lë na' runödžjë' Dios, tu' bigachi' yöl-la' rácada' na' buzóë' Dios dza ni'te para uzí'iru' xibé.

⁸ Yugu' bönni' ta'nná bë'ë dza ni zóaru' na'a bití' gulúnbë'ë yöl-la' rácada' na'. La'tu' gulúnbë'ë le, bití' ulu'dë'ë Xanru' nayëpisëtërë' lë'e yaga cruz.

⁹ Naca ca na' nazúaj lu guichi lá'ayi le rnna:

Chinupë'ë Dios le ulu'zí' xibé nupa nadxí'iguequi Lë',

yugu' le cuntu nu ble'e, en bití' biyöni,

en bití' gula'zá' ládxi'gaca bönachi ca naca que.

¹⁰ Na'a, Dios nuzéajni'inë' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

¹¹ ¿Naru' gaca inözinë' nu bönni' le yu'u icja ládxi'da'ahuë' ia'tué' bönni'? Tuz bö' naca cazë' bönni' na' nözi lë na'. Lë'sca' caní, cuntu nu nözi le yu'u icja ládxi'da'ahuë' Dios. Tuzë' Dios Bö' Lá'ayi nözinë' lë ni.

¹² Rë'u ni, bití' nazí' lu ná'aru' tu bö' ridasö yödžlió ni, pero nazí' lu ná'aru' Dios Bö' Lá'ayi, Nu na' ruchizië' Dios rë'u para gaca gúnbë'ëru' yugu' le buzá ládxi'ë Dios queëru'.

¹³ Yugu' lë na' buzá ládxi'ë Dios queëru' ruí'iru' didza' que, calëga len didza' tu'sédinë' bönachi rë'u len yöl-la' rácada' quëguequi, pero len yugu' didza' rusédinë' Dios Bö' Lá'ayi rë'u. Caní naca, ruzéajni'iru' bönachi zóalenë' Dios Bö' Lá'ayi légaquie' ca naca le rusédinë' Dios Bö' Lá'ayi rë'u.

¹⁴ Tu bönni' bití' zóalenë' Dios Bö' Lá'ayi lë' bití' rizí' lu në'ë le rusédinë' Dios Bö' Lá'ayi rë'u, tu' réquinë' cá'asö naca. Bití' gaca tséajni'inë' bönni' na' lë ni, tu' gaca guëquibe'enë' tuzë' bönni' zóalenë' Dios Bö' Lá'ayi lë' le nazaca' lë ni.

¹⁵ Tu bönni' zóalenë' Dios Bö' Lá'ayi lë' gaca guëquibe'enë' le nazaca' yúgu'të, pero cuntu nu gaca guëquibe'e le nazaca' cazë' bönni' na'.

¹⁶ Nazúaj lu guichi lá'ayi le rnna:

¿Nuzxi caz nözi le rizá' ládxi'ë Xanru'?

¿Nuzxi caz gaca uzéajni'i Lë'?

Le rizá' ládxi'ë Cristo yu'u icja ládxi'do'oru' rë'u.

3

Nácaru' huen dxin tsözxön len Dios

¹ Que lè ni na', böchi' luzá'ado', biti' guca güi'lena' libí'ili' didza' ca ruí'lena'-nè' didza' tu bönni' nudödi cuinë' lu në'è Dios Bö' Lá'ayi, pero bë'lèna' libí'ili' didza' ca ruí'lena' nu naca bönáchisö didza', biti' zóalenè' Dios Bö' Lá'ayi nu na'. Nácali' ca yugu' bi'i huè'èni. Biti' nácali' tsutsu ca réajlè'èli'-nè' Cristo.

² Busédida' libí'ili' le cabí naca böniga, lè na' guca ca nidxi' güf'ili'. Biti' busédida' libí'ili' le naca böniga ca bëla' gáguli'. Biti' guca tséajni'ili' le naca ca bëla' gáguli', en biti' rácali' na'a.

³ Caní naca, tu' nácali' ca nu naca bönáchisö ga ridxintè na'a dza. Tsanni ni ruzxé'eli' luzá'ali', en ridil-la dídzali', en rirúajli' choplö, nácali' ca nu naca bönáchisö, en runli' tuz ca run bönachi yödžolió ni.

⁴ Cate' zóalen libí'ili' tu nna da' Pablo nu na', en ia'tú nu rnna da' Apolos, nácali' ca nu naca bönáchisö.

⁵ ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queè' Dios, ate' ni'a que le bentu' guyéajlè'èli' Cristo. Tu tutu' runtu' dxin na' bennè' Xanru' que queètu'.

⁶ Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'è nisa, pero Dios benè' ga gulén, en guzxön xisedo' na' nadúz icja ládxi'do'oli'.

⁷ Caní naca, láti'do'os nazáquiè' bönni' guz, en láti'do'os ca' bönni' rigu'è nisa, pero nazáca'dè'è Dios Nu run ga rilén, en rizzön xisedo' na'.

⁸ Tuz ca nácaqaquiè' bönni' razè', en bönni' rigu'è nisa. Dios ubi'è que queègaquiè' tsca naca dxin runè' tu tuè'.

⁹ Nácatu' huen dxin tsözxön len Dios, ate' libí'ili' nácali' ca la' yèla queè' Dios ga runtu' dxin.

Lësca' caní nácali' ca tu yu'u runè' Dios.

¹⁰ Ca naca le buzá' ládxe'è Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yübölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'.

¹¹ Dios chigulu'è tu xilibi zö'ö le naca Lè cazè' Jesucristo, ate' cunttu nu gaca cu'u ia'tú xilibi zö'ö caní.

¹² Dxin runru' queè' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiój nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö.

¹³ Gaca bë' ca naca dxin núngaca tu tu bönachi. Cate' idxín dza ichúguiè' Dios quégaca bönachi, ilá' lahui dxin nunru', tu' tódi dxin na' lu guf', ate' guf' na' si' bë' dxin núngaca tu tu bönachi.

¹⁴ Channö dxin nunè' tu bönni' urúaj dxi'a lu guf' na', le naca ca tu zö'ö guchisè', Dios ubi'è queè' ca sa'yéaj dxin nunè'.

¹⁵ Channö tsegui dxin nunè' tu bönni' le naca ca tu zö'ö guchisè', unítie' le rë'èné' ubi'è Dios queè', pero ulá cazè' lè', ate' gaca queè' ca raca que nu rulá tu lu guf'.

¹⁶ ¿Naru' cabí nózili' naca cázali' yudo' queè' Dios, ate' zoè' Dios Bö' Lá'ayi icja ládxi'do'oli'?

¹⁷ Channö nu usuniti yudo' queè' Dios, Dios usunítie' nu na', tu' naca lá'ayi yudo' queè' Dios, ate' libí'ili' naca cázali' yudo' na'.

¹⁸ Biti' si' ye'e cuinli'. Channö réqui nu nutsa' ladjali' rácada' ca tácada' bönachi yödžölió ni, ral-la' huóaca nu na' ca tu bönni' biti' bi nöžinè', para gata' que yöl-la' rácada' le naca idú.

¹⁹ Nu bönni' napžè' yöl-la' rácada' que yödžölió ni náquiè' tu bönni' biti' bi nöžinè' lahuè' Dios. Nazúaj lu guichi lá'ayi le rnna: "Dios runè' ga ila'chixi ila'nigü nupa tácada', rugunè' dxin yöl-la' rácada' quegüequi."

²⁰ Lésca' caní rnna: "Xanru' nöžinè' nítisö naca le ta'bequi ícğagaca bönachi tácada'."

²¹ Que lè ni na', biti' ral-la' gunli' zžön le gaca gunè' tu bönni'. Nequi queéli' yúgu'tè.

²² Néquigüequi queéli':

Pablo, en Apolos, en Cefas,

en yödžölió ni,

en yöl-la' na'bán, en yöl-la' guti,

en dza ni zóaru' na'a, en dza si' za'.

Yúgu'tè nequi queéli',

²³ ate' libí'ili' néquili' queè' Cristo,

ate' Cristo néquinè' queè' Dios.

4

Dxin tunè' bönni' gubáz nasöl-lè'è Cristo

¹ Que lè ni na', ral-la' guéquili' nácatu' netu' huen dxin queè' Cristo, en nazí' lu na'tu' le nagachi' queè' Dios.

² Yugu' bönni', Dios nudödè' lu ná'agaquiè' ulu'gunè' dxin le nequi queè', run bayudxi ilunè' idú dxi'a le tunè'.

³ Biti' bi ruí' ládxa'a channö uchi'a usöröli' neda', o channö ulu'chi'a ulu'sörö bönachi yödžölió ni neda'. Biti' ca' ruchi'a rusörö cuina'.

⁴ Biti' ruxös ládxi'da'ahua' neda'. Lè ni biti' naca bè' biti' nabága'a xíguia'. Xanru' náquiè' Nu ruchi'a rusöröè' neda'.

⁵ Que lè ni na', biti' ral-la' uchi'a usöröli' nu bönni' zí'aló ca idxín dza que. Gulí'cöz dza ni' huödè' Xanru', ate' Lè' ubéajè' ga liná' le nagachi' ga chul-la, en ulu'è lahui le yu'u icja ládxi'do'gaca yúgu'tè bönachi. Ní'irö Dios ubi'è que queégaca bönachi le gun bal léguequi ca ral-la' gaca quegüequi.

⁶ Na'a, böchi' luzá'ado', ca naca lè ni, bè'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en biti' gunli' zžön tuè' bönni', en biti' uzóali' tsólá'aló ia'tuè'.

⁷ ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennè' Dios quiu'? Channö Lè' bénnasè' quiu' lè na' dè lu no'o, ¿bizx que run ba zžön cuinu', réquinu' rásasö quíu' bidéli'nu' lè na'?

⁸ ¿Naru' réquitseli' nadéli'tèröli'? ¿Naru' réquitseli' rilé'eli' yöl-la' tsahui queéli'? ¿Naru' réquitseli' rinná bé'èli', sal-la' biti' rinná bé'ètu' netu'? Ní'a queè' Xanru' Dios ré'ènda' inná bé'èli' para gaca inná bé'lentu' libí'ili' tsöžžön.

⁹ Runi neda' naca queètu', bönni' gubáz queè' Dios, ca nuzóè' netu' zéajtu' xibánitè ca na' raca quegaquiè' bönni' chinarugu quegaquiè' ilatiè' lahui' lógaca bönachi. Nácatu' ca tu le tu'yuda' bönachi yödžölió ni, enca' ca tu le tu'yudè'è gubáz lá'ayi queè' Dios.

¹⁰ Tu' ré'ènitü' guntu' xichinè' Cristo, ru'itu' bönachi lataj téquigüequi nácatu' bönni' biti' bi nöžquequinè', pero libí'ili' réquili' rácada'ali' tu' nácali' queè' Cristo.

Libí'ili' réquili' chinál-lali',
pero téquiquequi bönachi nacuídi'tu' netu'.
Tu'zóa bönachi netu' tsólá'alö,
pero tun libí'ili' bal.

¹¹ Ga ridxintë na'a dza, riduntu', en ribídxitu' nisa.
Biti' dë lari' gácutu'.

Tun bönachi netu' zi', en biti' zoa lídxitu'.

¹² Rusaca' zi' cuintu', la' nétu'sö runtu' dxin.
Tu'lidza bönachi netu' zi',
pero netu' rinábatu' le gácalen léguequi.

Ta'bía ládxi'gaca bönachi netu',
pero ruá' rilentu' le.

¹³ Ta'nnë' queëtu',
pero lu yöl-la' nöxaj ladxi' ruí'ilentu' légaquië' didza'.
Ga ridxintë na'a dza nácatu' ca bëbu que yödzölió ni,
en ca tu le ta'ru'una yúgu'të bönachi.

¹⁴ Ruzúaja' queéli' caní lu guichi, calëga tu' rë'ënda' guna' ga utu'ili', pero
rë'ënda' uzéajni'ida' libí'ili', runa' ca runë' tu bönni' ruzéajni'inë' yugu' zxi'ini
cazë' tu' nadxi'inë' légacabi'.

¹⁵ Sal-la' gaca zían gáyu'ë bönni' ila'cuá'alen libí'ili', en ulu'sédinë' libí'ili' ca
naca queë' Cristo, tuz nu zoa naca ca xúzili', nu na' ben ga néquili' queë' Cristo.
Lu yöl-la' na'bán cubi le nápati' tu' dzágali' Cristo, neda' caz naca' ca xúzili' tu'
busiyönda' libí'ili' didza' dxi'a.

¹⁶ Que lë ni na', ráta'yua' loli' gü'i ládxi'li' gunli' ca runa' neda'.

¹⁷ Que lë ni na' ca' risól-la'a-bi' bi'i Timoteo ga zóali'. Tu' rúnlenbi' neda' dxin
queë' Xanru' nácabi' ca zxi'ini caza', en nácabi' idú ladxi', ate' nadxi'ida'-bi'.
Gunbi' Timoteo ga tsöjnéli' yugu' xibá rusédida' tu' néquida' queë' Cristo, yugu'
le rusédida' yúgu'të lataj lógaca yúgu'të cö' bönachi queë' Cristo.

¹⁸ Bál-lali' run ba zxön cuinli' tu' réquili' bití'rö udxina' ga zóali'.

¹⁹ Na'a, la' udxíntea' ga zóali' channö Xanru' gunnë' neda' lataj. Ní'irö
guéquibe'eda', calëgasó didza' tu'ë bönni' tun ba zxön cuíngaquië', pero
guéquibe'eda' channö zóalen yöl-la' huáca queë' Dios légaquië'.

²⁰ Channö nazí' lu ná'ali' rinná bé'enë' Dios libí'ili', biti' naca bë' naca caní
tu' rnnásili' ca'. Naca bë' naca caní channö zóalen libí'ili' yöl-la' huáca queë'
Dios.

²¹ ¿Bízxilö rë'ënili'? ¿Naru' rë'ënili' udxina' ga zóali' len gubá'ayi, para guna'
libí'ili' zi', o len yöl-la' nadxi'i, en lu yöl-la' nöxaj ladxi'?

5

Pablo ruchi'a rusöröë' tuë' bönni' runë' le ruá' dõ'

¹ Rizë didza' zóalenë' libí'ili' tuë' bönni' runë' le ruá' dõ', tu' zóalenë' nigula
queë' xuzë'. Le ruá' dõ' caní biti' ca' tun bönachi biti' núnbë'gaca Dios.

² Libí'ili' run ba zxön cuinli', pero ral-la' huí'inili', en ubéajli' nu na' run dul-
la' na' ga zóali'.

³ Sal-la' biti' zóalena' libí'ili' lu idütë le naca', le nácatë zóalena' libí'ili' lu bö'
naca caza'. Ca chizóalen caza' libí'ili' chibuchí'a busöröa' nu na' run dul-la'
na'.

⁴ Cate' udúbili' queë' Xanru' Jesucristo guna' libí'ili' tsözxön lu bö' naca
caza'. Ní'irö, len yöl-la' huáca queë' Xanru' Jesús

⁵ buli'dödë' bönni' na' lu na' Satanás tu' xihui' para initi idütë le naca cazë', pero ulá bö' naca cazë' dza ni' huödë' Xanru'.

⁶ Biti' naca dxi'a gun ba zxön cuinli' ca naca le runli'. ¿Naru' cabí nõzili' didza' na' rna: "Cua zido'os que yöta xtila gun ga chazxaj idütë cúa nazí'i le"?

⁷ Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazí'i cúa zi que, ca na' le nácatë chinácali'. Naca queëru' ca chizóaru' Laní Pascua cate' tahuë' yöta xtila bití' nazí' cúa zi que, en chigulútië'-ba' uláz queëru' bö'cu' zxila' que Laní Pascua na', bö'cu' zxila' na' náquië' Lë cazë' Cristo.

⁸ Que lë ni na' ral-la' gunru' laní na', calëga zóalen rë'u cúa zi gulás na' le rulu'í le ruá' dö', en le cabí nazaca', pero ral-la' ugunru' dxin yöta xtila na' bití' nazí'i cúa zi que, yöta xtila na' rulu'í le naca idú dxi'a, en le naca idütë li.

⁹ Cate' buzúaja' queëli' lu guichi zí'alö, gudxi caza' libí'ili' bití' gunli' tsözxön bönni' tunë' le ruá' dö'.

¹⁰ Gudxa' libí'ili' caní, calëga para ucuítali' tsaz ga nacuá' bönachi yödzölió ni, nupa tun le ruá' dö', en ga nacuá' bönachi ta'zë ládxi'gaca le dë que luzë'eguequi, en ga nacu'ë yugu' bönni' gubán, en bönachi ta'yéaj ládxi'gaca budó' guió'j budó' yaga. Para gunli' caní gun bayudxi irúajli' yödzölió ni.

¹¹ Le rë'ëni inná didza' na' buzúaja' queëli' zí'alö naca para cabí gunli' tu zxön tuë' bönni' rnnë' néquinë' queë' Cristo, pero runë' dul-la' le lë'e, o rizë ládxi'ë le dë que luzë'ë, o reaj ládxi'ë tu budó' néquini, o rinnë xihuë'ë, o rizúdxinë', o ribanë'. Bití' ca' gágulenli' tsözxön tuë' bönni' caní.

¹²⁻¹³ Bití' nequi quia' neda' uchi'a usöröa' nupa bití' nabábagaca rë'u. Dios uchi'a usöröë' léguequi. Libí'i cázali' ral-la' uchi'a usöröli' nupa nabábagaca libí'ili'. Que lë ni na', guli'cúë' ga zóali' bönni' xihui' na'.

6

Biti' ral-la' ichë'ëru' böchi' luzá'aru' lógaca bönachi yúlahuí'

¹ Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahuí' ga ulu'chi'a ulu'sörö nupa bití' ta'yéajlë' Cristo libí'ili'? Dxí'arö tséajli' lógaca bönachi queë' Cristo para ulu'chi'a ulu'sörö libí'ili'.

² ¿Naru' cabí nõzili' nupa néquiquequi queë' Cristo ral-la' ulu'chi'a ulu'sörö yúgu'të bönachi yödzölió? Channö libí'i cázali' uchi'a usöröli' bönachi yödzölió, ¿naru' cabí nápalí' yöl-la' réajni'í uchi'a usöröli' didza' bizxaj caní?

³ ¿Naru' cabí nõzili' ral-la' uchi'a usöröru' yugu' gubáz lá'ayi? Rúntërö bayudxi uchi'a usöröru' le taca yödzölió ga ni zóaru' na'a.

⁴ Na'a, channö raca tu le run bayudxi nu uchi'a usörö, lë na' raca yödzölió ni, ¿bizx que rucuá'ali' nupa ulu'chi'a ulu'sörö le, nupa na' bití' bi dë lu në'eguequi ladjagaca bönachi queë' Cristo?

⁵ Rnnía' caní para guna' ga utuf'ili'. ¿Naru' cabí zóalen libí'ili' nu raca lati' nu gaca uchi'a usörö le raca quégaquië' böchi' luzá'ali'?

⁶ ¿Nacxi caz gaca tu bönni' réajlë'ë Cristo ichë'ë böchi' luzë'ë yúlahuí' ga ulu'chi'a ulu'sörö bönachi bití' ta'yéajlë' Cristo légaquië'?

⁷ Le nácatë richixi riniguili' tu' ridil-la dídza'li'. ¿Bizx que bití' guá' ilenli' nu ruá' dö' queëli'? ¿Bizx que bití' guá' ilenli' nu rucáchi'lan le dë queëli'?

⁸ Libí'ili' ruá'ali' dö', en rucachi' lanli', ate' runli' caní quégaquië' böchi' luzá'ali' ta'yéajlë'ë Cristo.

9-10 ¿Naru' cabí nözili' bití' ila'yaza bönachi bití' nácagaca tsahui' ga rinná bē'ē Dios? ¡Bití' si' ye'e cuinli'!

Bití' ca' tsaz ga rinná bē'ē Dios nu run le ruá' dō':
Cuntu nu reaj ladxí' budó' guiöj budó' yaga,
en cuntu nu riguitsaj xibá que yöl-la' nutsaga na',
en cuntu nu bönni' run cuinë' ca nigula,
en cuntu nu bönni' zóalenē' la' luzē'e bönni'sē',
en cuntu nu bönni' gubán, en cuntu nu ruhuidí',
en cuntu nu rizudxi, en cuntu nu rinnē xihui',
en cuntu nu rucáchi'lan.

Bití' ca' tsaz nu run caní ga rinná bē'ē Dios.

11 Caní gúcali' bál-lali' libí'ili', pero na'a chinuhuóacali' dxi'a que dul-la' gubága'li', en chinéquili' quez queē' Dios, en chinuhuóacali' tsahui' ni'a que le benē Xanru' Jesús. Bö' Lá'ayi queē' Dios runē' ga raca caní.

Idútē le naca cázaru' nequi quez queē' Dios

12 Ta'nná bönachi: "Yúgu'tē dē lataj gunru'." Sal-la' nácate didza' ni, bití' ral-la' gunru' yúgu'tē. Sal-la' dē lataj guna' yúgu'tē, bití' gu'a lataj bi inná be'e neda'.

13 Ta'nná ca' bönachi: "La' huagu naca le tsaz lē'ëru', ate' lē'ëru' naca ga tsudzu la' huagu." Nácate didza' ni, pero idxín dza usunítíē' Dios la' huagu, enca' lē'ëru'. Dios benē idútē le naca cázaru', calēga para ugunru' le dxin gunru' le ruá' dō'. Naca para uzi'ë xibé Xanru', ate' Xanru' náquiē' para uzi' xibē idútē le naca cázaru'.

14 Dios busubanē' Xanru' Cristo lu yöl-la' guti. Lē'sca caní, len yöl-la' huáca queē' usubanē' rē'u.

15 ¿Naru' cabí nözili', idútē le nácali' naca tuz len le naca cazē' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¡Bití' ca' ral-la' gunli' caní!

16 ¿Naru' cabí nözili' channō tu bönni' zóalenē'-nu nigula udá dzaga, náquiē' tuz len lēnu? Ca naca lē ni nazúaj lu guichi lá'ayi le rnna: "Ilácagaquiē' ca tuz bönachi iropē' na'."

17 Na'a, nu bönni' náquiē' tuz len Xanru', náquiē' tuz len Lē' lu bö' naca cazē'.

18 Que lē ni na', bití' ca' gunli' le ruá' dō'. Bítí'tēs dul-la' yúbölō runē' tu bönni', ní'ilō lu le naca cazē' runē' dul-la' na'. Nu bönni' runē' dul-la' le lē'ë, runē' dul-la' le dzaga lē cazē'.

19 ¿Naru' cabí nözili' idútē le naca cázali' naca yudo' queē' Dios Bö' Lá'ayi? Dios caz nuchizē' Dios Bö' Lá'ayi na' libí'ili', ate' Lē' zoē' icja ladxí'do'oli'. Que lē ni na' bití' nequi queézili' idútē le naca cázali'. Na'a, nequi queē' Dios.

20 Dios gú'uē' libí'ili' len tu le zxon le gudixjē'. Guli'gún dxin idútē le nácali', enca' bö' naca cázali' para gaca queē' Dios yöl-la' ba, tu' néquiquequi queē' Dios idútē le naca cázali', enca' bö' naca cázali'.

7

Rusēdinē' Pablo ca naca que yöl-la' nutsaga na'

1 Na'a, ubi'a didza' yugu' le rinábili' neda', le buzúajli' quia' lu guichi. Gácarō dxi'a queē' nu bönni' channō cabí sóalenē'-nu nigula.

2 Tu' tunda' bönachi le ruá' dō' ga ni' zóali', yúgu'tē bönni' nabábagaquiē' libí'ili' ral-la' ila'cuá'lenē'-nu nigula que queégaquiē', ate' yúgu'tē nigula ral-la' ila'cuá'lennu-nē' bönni' que queégacanu.

3 Bönni' na' zóanu nigula queë' ral-la' gunë' queënu nigula queë' ca naca yöl-la' run que yöl-la' nutsaga na', en la' lëbisö ral-la' gunnu nigula len bönni' queënu.

4 Biti' dë lu ná'asönu nigula le naca cázanu, pero bönni' queënu dë lu në'ë ca' le. Lësca' caní, bití' dë lu ná'asë' bönni' le naca cazë', pero nigula queë' dë lu ná'anu ca' le.

5 Biti' ral-la' ila'dá'baguë'ë luzá'agaquië' bönni', en nigula na', nutsaga ná'agaquië'. Huácasö ca' channö ilunë' tuz didza' bití' ila'dzáguië' tu chí'isö para gaca ulu'lidzë' Dios idú ládxi'gaquië'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xihui' gun ga tsázaagaquië' nöza dul-la' tu' cabí gaca ila'nná be'e cuíngaquië'.

6 Lë ni rea' libí'ili' naca tu le runnë' Xanru' libí'ili' lataj. Biti' naca le gunná bë'ë.

7 Runi neda' gácarö dxi'a ulu'gá'anë' tuz yúgu'të bönni', ca na' zoa' tuza' neda'. Tu tuë' bönni' rizi'ë tsca le runödzjë' Dios queë' gunë'. Tuë' rizi'ë tu le runödzjë', ate' ia' tüë' rizi'ë ia'tú le runödzjë'.

8 Na'a, rea' nupa zóagaca tuz, enca' yugu' nigula uzëbi, gácarö dxi'a quéguequi ulu'gá'ana tuz ca na' zoa' tuz neda'.

9 Channö cabí gaca ila'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ila'zë ládxi'gaquië' le ruá' dö'.

10 Rinná bé'eda' nupa chinutsaga në'eguequi, en calëga neda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queënu."

11 Channö nu nigula ulá'alennu-në' bönni' queënu, ral-la' ugá'ananu túzinu, o huóacanu tuz len bönni' queënu na'. Lësca' caní tu bönni' bití' ral-la' ucá'anë'-nu nigula queë'.

12 Na'a, néda'sö rea' ia'zica'rö bönachi, en calëga rnnë' Xanru' caní, rnnía': Channö zoë' nu böchi' luzá'aru' réajlë'ë Cristo, ate' nigula queë' bití' réajlë'ënu Xanru', en channö rë'ëninu ugá'analennu lë', bití' ral-la' ulá'alenë'-nu.

13 Lësca' caní rnnía': Channö zóanu nu nigula zanru' réajlë'ënu Cristo, ate' bönni' queënu bití' réajlë'ë Xanru', en channö rë'ënnë' ugá'analenë'-nu, bití' ral-la' ulá'alennu lë'.

14 ¡Caní ral-la' ilunë'! Bönni' cabí réajlë'ë na', Dios rilé'enë' lë' ca tu bönni' néquinë' quez queë' tu' náquië' tuz len nigula queë' réajlë'ënu Cristo, ate' nigula caní, bití' réajlë'ënu, Dios rilé'enë'-nu ca tu nigula néquinu quez queë' tu' nácanu tuz len bönni' queënu náquië' böchi' luzá'aru' réajlë'ë Cristo. La'tu' cabí naca caní, ilácabi' zxi'inigaquië' ca yugu' bi'i lan lahuë' Dios. Na'a, nácagacabi' quez queë' Dios.

15 Nu bönni' o nigula nu cabí réajlë' Cristo, channö rë'ëni ulá'alen nu na' nut-saga ná'alen, huáca ca'. Biti' run bayudxi ugá'analen nu na' böchi' luzá'aru' o zanru' nu réajlë' Cristo, tu' bulidzë' Dios rë'u para cózaru' tsáhuí'do'.

16 ¡Caní ral-la' gaca! Nadxi ca' li', nigula, huáca gunu' ga ulë' bönni' quiu', ate' nadxi ca' li', bönni', huáca gunu' ga ulanu nigula quiu'.

17 Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzë' Dios rë'u para guéquiru' queë'. Rusédida' yúgu'të cö bönachi queë' Cristo xibá ni.

18 Channö Dios bulidzë' nu bönni' narugu lu xipélë'ë le naca bë' néquinë' queë' Dios, ral-la' ugá'anë' caní, zoa lu xipélë'ë lë' na' naca bë'. Lësca' caní, channö Dios bulidzë' nu bönni' bití' narugu lu xipélë'ë lë' na' naca bë', bití' ral-la' ichúguië' lë' na' lu xipélë'ë.

19 Biti' bi nazaca' lè na' narugu lu xipélè'è tu bönni', en channö bitì' narugu lu xipélè'è bönni' lè na' naca bè', bitì' bi nazaca'. Le nácada' lesaca' naca gunru' ca rinná bè' xibá queè' Dios.

20 Ral-la' ugá'anè' tu tuè' bönni' ca na' gúquiè' cate' ni' bulidzè' Dios lè'.

21 Channö bulidzè' li' cate' ni' nacu' bönni' nadó'o, bitì' cò'u böniga tu' nacu' caní, pero channö gata' quíu' lataj iruju' lu na' xanu', buzí' xibé lataj na' gata' quíu' iruju'.

22 Channö bulidzè' Xanru' nu bönni' cate' ni' nado'è, lahuè' Xanru' náquiè' ca nu bönni' narúajè' lu nè'è xanè' na', para gunè' xichinè' Xanru'. Lësca' caní, channö bulidzè' Xanru' nu bönni' cate' ni' narúajè' lu nè'è xanè' na', bönni' ni náquiè' ca tu bönni' nadó'o queè' Cristo.

23 Zxöntèrö le gudizxjè' Dios, gú'uè' libí'ili'. Que lè ni na' bitì' ral-la' guti' cuinli' lu ná'agaca bönachi.

24 Que lè ni na' ca', böchi' luzá'ado', ral-la' sóali' lahuè' Dios tsca guca queéli' tu tuli' cate' ni' bulidzè' Dios libí'ili'.

25 Ca naca quégaca nupa bitì' nutsaga ná'agaca, bitì' bi gunná bé'enè' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxi'è' Xanru' neda'.

26 Tu' taca zían le raca queëru' dza ni zóaru' na'a, runi neda' gácarö dxi'a channö ulu'gá'anè' yúgu'té bönni' ca nácagaquiè' na'a.

27 Channö nutsaga ná'lenu'-nu nigula, bitì' ulá'alenu'-nu. Lësca' caní, channö zu' tuzu', bitì' quilju' tu nigula para utsaga ná'lenu'-nu.

28 Na'a, channö utsaga ná'lenu'-nu nigula, bitì' gunu' dul-la', en channö tu bi'i nigula utsaga ná'aleni'-nè' bönni', bitì' gunbi' dul-la', pero ila'guí' ila'zaca' nupa nutsaga ná'agaca yödzölió ni, ate' ré'ènda' guna' ga uláli' lu yöi-la' riguí' rizaca' na'.

29 Na'a, rea' libí'ili' lè ni, böchi' luzá'ado'. ¡Chizóa idxín dza údx! Que lè ni na', yugu' bönni' nutsaga ná'lengaquiè'-nu nigula ral-la' iluí' ládxi'gaquiè' Dios, ca runè' nu bönni' bitì' nutsaga ná'aleni' nigula.

30 Lësca' caní, nupa ta'bödxi yechi' ral-la' ulu'dzeja lahuè' Dios ca run nu bitì' ribödxi, ate' nupa tu'dzeja ral-la' ila'cuá' nōxaj lahuè' Dios ca run nu bitì' rudzeja, ate' nupa to'o ral-la' ilaca ca nu bitì' bi dè que.

31 Nupa tu'gún dxin le dè yödzölió ni ral-la' ilaca ca nu bitì' ruí' i ladxí' le dè yödzölió ni, tu' udödi quégaca le rilé'eru' yödzölió ni.

32 Ré'ènda' bitì' ubi uguí'ili'. Tu bönni' bitì' zóanu nigula queè' ruí' i ládxi'è le nequi queè' Xanru', naca gunè' le raza ládxi'è Xanru'.

33 Tu bönni' nutsaga ná'lènè'-nu tu nigula ruí' i ládxi'è le raca yödzölió, naca gunè' le raza ládxi'nu nigula queè'.

34 Lësca' caní raca queënu tu nigula nutsaga ná'lennu-nè' bönni', en queënu nigula na' zóanu túzinu. Nigula na' zóanu túzinu ruí' i ládxi'nu le nequi queè' Xanru', naca sóanu quez queè' Dios lu le naca cázanu, en lu bö' naca cázanu. Nigula na' nutsaga ná'lennu-nè' tu bönni' ruí' i ládxi'nu le raca yödzölió ni, naca gunnu le raza ládxi'è bönni' queënu.

35 Yugu' lè ni rea' libí'ili' para uzí'ili' xibé lè ni, en calèga para uzá'ga'a xinözili'. Ré'ènda' gunli' le ral-la' gunli', para gunli' xichinè' Xanru' idú ládxi'li'.

36 Channö zoè' tu bönni' réquinè' bitì' naca dxi'a ugá'anabi' túzibi' bi' i nigula ra'bando' queè', en chizóa iz queè'bi', en ré'ènde'ebi' utsaga ná'aleni'-nè' bönni', huáca utsaga ná'aleni'-nè'. ¡Bitì' gunbi' dul-la'!

³⁷ Channö chinún tsutsu xtídzë'ë bönni' na', en biti' run bayudxi gunë' caní, en dë lu në'ë naca gunë', en chinún tsutsu xtídzë'ë ugá'anabi' túzibi', gunë' le naca dxi'a bönni' na'.

³⁸ Caní naca, nu ru'i lataj bi'i que utsaga ná'alenbi'-në' bönni', run le naca dxi'a, pero nu run ga ugá'anabi' túzibi' run le nácarö dxi'a.

³⁹ Nigula na' nutsaga ná'lennu-në' bönni', rinná be'e xibá que yöl-la' nut-saga na' lënu tsanni ni zoë' nabanë' bönni' queënu. Channö gátie' bönni' queënu, gata' lu ná'anu utsaga ná'lennu-në' nu bönni' rë'ëninu, channö réajlë'ë Xanru' bönni' na'.

⁴⁰ Runi neda' gácarönu bica' ba channö ugá'ananu túzinu, en réquida' Bö' Lá'ayi queë' Dios runë' neda' tzazxön.

8

Le ta'gú'u bönachi lógaca budó' guiöj budó' yaga

¹ Na'a, gu'a didza' ca naca que le rë'aj ráguru', lë na' gula'gú'u bönachi lógaca budó' guiöj budó' yaga. Ta'nná bönachi: "Yúgu'tëru' náparu' yöl-la' réajni'í." ¡Nácatë didza' ni! Yöl-la' réajni'í caní run ga run ba zxön cuinru', pero yöl-la' nadxi'í queëru' luzá'aru' run ga rácalenru' luzá'aru'.

² Channö zoë' nu bönni' réquinë' chiréajni'inë', biti' bi réajni'ininë' ca ral-la' tséajni'inë',

³ pero nu bönni' nadxi'inë' Dios, Dios caz zóalenë' bönni' na'.

⁴ Na'a, ca naca que le rë'aj ráguru', lë na' gula'gú'u bönachi lógaca budó' guiöj budó' yaga, nõziru' biti' bi nazáca'gaca budó' guiöj budó' yaga na' yödzölió ni, en cünturö nu zoa naca Dios.

⁵ Sal-la' nacua' le téquiguequi bönachi náca'gaca dios, le nacua' lúxiba, en le nacua' luyú, ate' zían le tu'lidza bönachi, en tu'í lágaca: dios, enca': xan,

⁶ pero queëru' rë'u:

Tuzë' náquië' Dios, Lë' Xuz.

Lë' benë' yúgu'të le rilé'eru',

ate' zóaru' nabanru' para tseaj ládxi'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'të le dë,

ate' nabániru' Lë'.

⁷ Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'alö gula'yéaj ládxi'gaca budó' guiöj budó' yaga, ga ridxintë na'a dza të'aj tahuë' le gula'gú'u bönachi lógaca budó' guiöj budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága'gaquië' xíguia' channö tahuë' lë na'.

⁸ Biti' gun le gu'aj gáguru' ga gunë' Dios rë'u bal. Channö gáguru' le, biti' gácaröru' dxi'a, en channö cabí gáguru' le, biti' gácaröru' cá'asö.

⁹ Dë lu ná'ali' gu'aj gáguli' bití'tës. Guli'gún chi'í cuinli' para cabí gunli' ga ila'chixi ila'nigui nupa biti' naca idú ca ta'yéajlë' Cristo.

¹⁰ Nadxi ca' li' réquinu' napu' yöl-la' réajni'í ca naca lë ni, en huáca gagu' bití'tës. Channö cö'u xilataj budó' guiöj budó' yaga, en gu'aj gagu' le gula'gú'u bönachi lo budó' guiöj budó' yaga na', ate' channö nu böchi' luzó'o biti' naca idú ládxi'ë ilé'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guiöj budó' yaga na'.

11 Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o bití' naca idú ládxë'ë. ¿Naru' guntso' caní queë' böchi' luzó'o, ni'a que nu na' gútië' Cristo?

12 Channö caní gunu', gunu' dul-la' tu' usubágu'u böchi' luzó'o xíguia', en gunu' ga ichixi iníguinë' tu' cabí naca idú ládxë'ë, en gunu' ca' dul-la' le ruzóa Cristo tsóla'aló.

13 Que lë ni na', channö le guí'aj gahua' gun ga ichixi iníguinë' böchi' luzá'a, bití'rö gahua' bëla' na', para cabí guna' ga gunë' böchi' luzá'a dul-la'.

9

Le dë lu në'ë nu bönni' gubáz nasöl-lë'ë Cristo

1 ¿Naru' cabí naca' gubáz nasöl-lë'ë Cristo? ¿Naru' cabí nadéli'da' yöl-la' rusóla? ¿Naru' cabí bilé'eda-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'?

2 Nadxi ca' téquiguequi ia'zica'rö bönachi bití' naca' gubáz nasöl-lë'ë Cristo. Libí'ili' run bayudxi guéquili' naca' gubáz queë' Cristo. Tu' nácali' queë' Xanru', le naca cázali' naca bë' naca' gubáz nasöl-lë'ë Xanru'.

3-4 Nacuá' nupa ta'zì' quidza' neda'. Caní rubi'a didza', rea' légaquië': Dë lu na'a inaba' le guí'aj gahua' tu' runa' dxin ni.

5 Lëasca' caní dë lu na'a utsaga ná'alena'-bi' tubi' bi'i nigula zanru' réajlë'ëbi' Cristo para gunbi' neda' tsözxón ga ridá', ca na' tunë' ia'zica'rë' gubáz nasöl-lë'ë Cristo, en yugu' bönni' böché'ë Xanru', enca' Pedro.

6 ¿Naru' réquili' tuza' neda', en Bernabé ral-la' guntu' dxin lahui' dza, para idzólitu' le gágutu'?

7 ¿Nuzxi caz bönni' rejë' gudil-la, ate' riguizxjë' la' cuinsë'? ¿Nuzxi caz bönni' rudë'ë tu la' yëla que lubá uva, en bití' rahuë' le ribía lubá na'? ¿Nuzxi caz bönni' rapa chí'ë-ba' bö'cu' zxila', en bití' re'jë' nidxi' quégacaba'?

8 Bití' guéquili' la' néda'sö ruá'a caní didza'. Lëasca' caní rnna le nazúaj lu guichi lu xibá queë' Moisés.

9 Lu xibá queë' Moisés nazúaj lu guichi le rnna: Bití' cu'u du rúa'aba' bëdxi cate' rulfibibá' xzoa' xtila. Bë'ë Dios didza' ni, calégasö tu' ruí'í ládxë'ë-ba' bëdxi,

10 pero para uzí'iru' ca' xibé rë'u. Que lë ni na' nazúaj lu guichi didza' na', ate' bönni' na' rugá'anë'-ba' bëdxi, enca' bönni' na' runë' ga tu' libiba' bëdxi xzoa' xtila, iropë' na' ral-la' ilunë' löza ila'zì'ë que le rulá' luyú na'.

11 Na'a, channö bentu' dxin ga zóali', le naca ca dxin guz gú'una, lë na' naca queë' Dios Bö' Lá'ayi, ¿naru' réquitseli' bití' ral-la' uzí'itu' xibé tu le do' dë queéli' ca na' ruzi'ë xibé bönni' guz gú'una le rupalë'?

12 Ia'zica'rö bönachi tu' zéajni'inë' libí'ili' tu'zì'ë xibé le dë queéli'. ¿Naru' cabí rála'tërö uzí'itu' xibé netu' le dë queéli'?

Catu caz buzi'tu' xibé lë ni dë lu na'tu', pero biá' gulentu' yúgu'të para gaca guntu' libán que didza' dxi'a ca naca queë' Cristo.

13 Nöz quezili' ca raca quégaca nupa tun dxin que yudo', tu'zì' xibé gun que yudo'. Lëasca' caní nupa ta'gú' u' rön quégacaba' böa' bëdxi lu bucugu lá'ayi queë' Dios, tahuë' bëla' quégacaba' böa' bëdxi na'.

14 Lëasca' caní nuzóë' Xanru' ca ral-la' gaca quégaquië' bönni' tunë' libán que didza' dxi'a. Nupa tu'zì' xibé libán na' tunë' ral-la' ulu'gagu légaquië'.

15 Neda' catu caz buzi'a xibé lë ni dë lu na'a, ate' lë ni ruzúaja' lu guichi ni bití' naca le rinábini nu bi gunna quia'. Run ba zxon' cuina' tu' cabí nazxja'

cate' runa' libán que didza' dxi'a. Guë'ënitëra' gátia' ca gu'a lataj nu innë runa' libán na' tu' nazxja'.

¹⁶ Biti' dë lu na'a gun ba zxôn cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channö cabí guna' libán que didza' dxi'a.

¹⁷ La'tu' runa' libán tu' rë'ëni quézida', huáca inaba' lazxja', pero run bayudxi guna' libán, tu' naca tu le busubáguë'ë Dios neda' guna'.

¹⁸ ¿Bizxi lazxja' uzi'tsa' xibé channö? Ruzi'a xibé le raza ládxa'a tu' cabí nazxja' cate' runa' libán que didza' dxi'a. Biti' ca' ruzi'a xibé lë na' dë lu na'a tu' runa' libán que didza' dxi'a.

¹⁹ Na'a, sal-la' cuntu nu yu'a lu në'e, chibén cuina' ca tu bönni' nadó'o quégaca yúgu'të bönnachi para gaca guna' ga ulu'lágaca zíanrö ca' bönnachi.

²⁰ Cate' runa' libán lógaca bönnachi judío, run cuina' ca tu bönni' judío para gaca guna' ga ulu'lágaca bönnachi judío na'. Bönnachi judío na' tun ca rinná bë' xibá queë' Moisés. Que lë ni na' run cuina' ca tu bönni' runë' ca rinná bë' xibá na' sal-la' bití' yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'.

²¹ Cate' runa' libán lógaca bönnachi izá'a, nupa bití' rinná be'e xibá queë' Moisés léguequi, run cuina' ca tu bönni' zi'tu' na', para gaca guna' ga ulu'lë'. Bití' rucá'ana' cá'asö xibá queë' Dios. Neda' runa' ca rinná bë' xibá queë' Cristo.

²² Run cuina' ca tu bönni' bití' naca idú ca réajlë'ë Cristo para gaca guna' ga ulu'lágaca nupa na' bití' naca idú ca ta'yéajlë' Lë'. Run cuina' ca nácgaca yúgu'të bönnachi para gaca guna' ga ulu'lágaca bal-la bönnachi na'.

²³ Lu yúgu'të lë ni runa', runa' ga ta'yöni bönnachi didza' dxi'a, para gaca uzi'a xibé tsözxön len libí'ili' didza' dxi'a na'.

²⁴ Chinöz quézili' ca tunë' bönni' nútsa'gaquië' lu huitaj. Ta'xítí'ë yúgu'të', pero tuzë' bönni' idéli'në' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nútsa'gaquië' lu huitaj, para idéli'li' uzi'ili' xibé le ubi'ë Dios queëli'.

²⁵ Yúgu'të bönni', cate' tu'pá'a cúngaquië' para gaca ila'yázië' lu huitaj, ta'nná be'e cúngaquië' lu yúgu'të le tunë'. Tunë' caní para ila'déli'në' tu bregui' zin le inítitë', pero idéli'ru' rë'u tu le uzí'tica'siru' xibé.

²⁶ Que lë ni na', naca' neda' ca tu bönni' idú ládxe'ë rixítí'ë. Naca' ca' ca tu bönni', idú ládxe'ë ridil-lë'. Bití' rucudxa' lu bö'ös.

²⁷ Ca runë' bönni' na' rulidzë' bönnachi para tsöjtsázagaca lu huitaj, runa' ca' neda', runa' libán para ulu'lágaca bönnachi. Bönni' na' nútsë'ë lu huitaj runë' ga gaca tsutsu idútë' le naca cazë', en rinná bé'enë' le. Lësca' caní runa' neda', para cabí unítia' xilatja' lu dxin queë' Dios.

10

Bití' ral-la' tseaj ládxi'ru' budó' guiöj budó' yaga

¹ Rë'ënda' uzéajni'ida' libí'ili', böchi' luzá'ado', ca guca quégaquië' xuz xtó'otu'. Dios benë' ga gulú'u zzul-la tu böaj yúgu'të'. Lësca' caní, gula'dödë' yúgu'të' gatsaj láchui'lö nísado'.

² Lu böaj ni', en lu nísado' ni', guca quégaquië' ca raza que nu ridila nisa. Lë na' guca quégaquië' guca bë' guláquië' tuz len Moisés.

³ Lësca' caní, gulahuë' yúgu'të' yöta xtildo' na' bunödzejë' Dios Bö' Lá'ayi quégaquië'.

⁴ Gulë'ajë' yúgu'të' nisa na' bunödzejë' Dios Bö' Lá'ayi quegaquië', tu' gulë'ajë' nisa birúaj lë'e guiøj na' bulu'e lahui Dios Bö' Lá'ayi, guiøj na' gula'báininë' légaquië'. Ca guca guiøj na' naca cazë' Cristo, nabániru' Lë'.

⁵ Sal-la' guca caní, bití' guyaza ládxë'ë Dios yúgu'të'. Que lë ni na' gulátie' lu lataj cá asò.

⁶ Yúgu'të lë ni naca tu le ruzéajni'i rë'u, para cabí së ládxí'ru' le ruá' dõ', ca na' gula'zë ládxí'gaquië' légaquië'.

⁷ Bití' ral-la' tseaj ládxí'ru' budó' guiøj budó' yaga, ca na' gulunë' bal-lë' légaquië'. Nazúaj lu guichi lá'ayi le rnna: "Gula'bõ'ë bönni' ni', en gulë'aj gulahuë', ate' gula'yasë', en gulunë' laní que budó' na'."

⁸ Bití' ral-la' gunru' le ruá' dõ', ca na' gulunë' bal-lë' légaquië' le ruá' dõ', ate' tu dzasò gulátie' idú ca tsonna-uruá' milë'.

⁹ Bití' ral-la' si' bë'eru' Xanru', ca na' gula'zí' bë'ë Lë' bal-lë' légaquië', ate' gulátie' tu' guláguya'aba' bëla sinia' légaquië'.

¹⁰ Lësca' caní, bití' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítie' légaquië'.

¹¹ Yúgu'të lë ni le gulaca quegaquië' xuz xtó'otu', tu'zëajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yödžölió ni.

¹² Que lë ni na', nu réqui chinal-la, ral-la' gun chí'i cuini, para cabí ichixi inigui.

¹³ Ca naca le ta'zí' bë' libí'ili' raca ca' queguequi yúgu'të bönachi. Dios runë' ca rnnë', en bití' gu'ë lataj bi si' bë' libí'ili' le cabí gaca guá' ilenli', pero cate' bi si' bë' libí'ili', uluí'inë' libí'ili' naca gaca irúajli' lu na' tu' xihui', para gaca guá' ilenli'.

¹⁴ Que lë ni na', böchi' luzá'ado', bití' tseaj ládxí'li' budó' guiøj budó' yaga.

¹⁵ Ru'ílena' libí'ili' didza' ca ru'ílena' didza' nupa ta'yéajni'i. Bulí'chi'a bulí'soró didza' ni gu'a.

¹⁶ Cate' inábiru-në' Dios gun lá'ayë' le rë'ajru' cate' rusubanru' ca gútië' Cristo, lë na' rë'ajru' ruluí'í nácaru' tuz len Cristo, en ruzí'iru' xibé le benë' Cristo cate' bulaljë' xichönë' cate' gútië' lë'e yaga cruz. Lësca' caní, yöta xtila na' ruzxúzjaru', en ráguru', ruluí'í dzágaru-në' Cristo, en ruzí'iru' xibé le benë' Cristo cate' budödë' idütë le naca cazë' uláz queëru'.

¹⁷ Sal-la' zianru' nácaru', yúgu'tëru' ráguru' tuz yöta xtila na', en que lë ni na' nácaru' ca tuz bönachi.

¹⁸ Bulí'yútsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', lë na' tahuë' ruluí'í dzágagaquië' Dios.

¹⁹ ¿Bizxi rnna didza' ni ruá'a? Bití' rnnía' napa budó' guiøj budó' yaga yöl-la' huáca, en le ta'gú'u bönachi lógaca budó' guiøj budó' yaga na' bití' napa yöl-la' huáca.

²⁰ Caní rnnía': Lë na' ta'gú'u bönachi bití' núnbë'gaquië' Dios lógaca budó' guiøj budó' yaga, ta'gú'u lógaca bö' xihui', en calëga lahuë' Dios. Ré'ënda' bití' idzágali' yugu' bö' xihui'.

²¹ Bití' gaca guí'jali' le ruluí'í nácaru' tuz len Xanru', enca' lë na' uluí'í nácali' tuz len yugu' bö' xihui'. Bití' gaca gáguli' le ruluí'í dzágaru-në' Xanru', enca' le uluí'í dzágali' yugu' bö' xihui'.

²² ¿Naru' gúntsaru' ga uzxé'enë' Xanru'? ¿Naru' réquitseli' nápatë'öli' yöl-la' huáca ca napë' Lë'?

Le dë lu ná'aru' gunru', en ca ral-la' idxí'igacru-në' böchi' luzá'aru'

²³ Naca idútë li didza' na' rnna: "Yúgu'të dë lu ná'aru' gunru'." Na'a, neda' rnníá: Calëga yúgu'të ral-la' gunru'. Yúgu'të dë lu ná'aru' gunru', pero calëga yúgu'të gun ga gácarö idú ca réajlë'ëru' Cristo.

²⁴ Ral-la' guí'i ládxi'ru' gunru' le gun ga gaca dxi'a quégaquië' böchi' luzá'aru', en calëgasö le gun ga gaca dxi'a que la' cuínsiru'.

²⁵ Bítí'tës bi tuti' bönachi lu yé'ëyi, huáca gáguli', en bití' bi ral-la' inábali' que, para cabí cuéqui böniga ládxi'do'oli'.

²⁶ Nazúaj lu guichi le rnna: "Queë' Xanru' nequi yödözölió ni, enca' yúgu'të le dë yödözölió ni."

²⁷ Channö ulidzë' tu bönni' bití' réajlë'ë Dios libí'ili' para guídali' lidxë', ate' guë'ënili' tséajli', guli' gagu yúgu'të le cu'ë loli', en bití' bi inábali' que, para cabí cuéqui böniga ládxi'do'oli'.

²⁸ Channö nútí'tës nu guíë libí'ili': "Lë ni gula'gu'ë lo budó' guiöj budó' yaga", bití' gáguli' lë na' para gaca dxi'a que nu na' gudíxjöi' caní libí'ili', en para cabí cuéqui böniga ládxi'da'ahuë'.

²⁹ Rnníá: Para cabí cuéqui böniga ládxi'da'ahuë' bönni' na' gudíxjöi'inë' caní libí'ili', en calëga para cabí cuéqui böniga ládxi'do'oli' libí'i cázali'.

Nadxi ca' nu inábini neda', inná: "¿Bízx que ral-la' uzó'a tsólá'aló le dë lu na'a guna' tu' ribequi böniga ládxi'da'ahuë' bönni' yúbölö?"

³⁰ Huáca inná ca' nu na': "Channö guíá-në' Dios: Xclenu', ni'a que lë na' rahua', ¿bízx que nu uzegui neda' didza' ni'a que lë na' rahua'?"

³¹ Channö bi gáguli' o bi guí'jali', o bití'tës bi gunlí', guli'gún yúgu'të para gaca queë' Dios yöl-la' ba.

³² Bití' bi gunlí' le gun ga ila'chixi ila'nigui bönachi judío, en bití' gunlí' le gun ga ila'chixi ila'nigui bönachi bití' nácagaca judío, en bití' gunlí' le gun ga ila'chixi ila'nigui bönachi queë' Dios.

³³ Guli'gún ca runa' neda'. Ruí'i ládxa'a guna' le ila'yaza ládxi'gaca yúgu'të bönachi, en bití' ruí'i ládxa'a guna' le uzi'a xibé la' néda'sö, pero le ulu'zì' xibé ia'zìca'rö bönachi para ulu'lágaca.

11

1 Guli'gún ca runa' neda', ca na' neda' ca' runa' ca benë' Cristo.

Le tunnu nigula lógaca bönachi queë' Cristo

² Runa' libí'ili' zxön, böchi' luzá'ado', tu' röjnética'sili' neda', en nazí' lu ná'ali' xibá budöda' lu ná'ali'.

³ Na'a, ré'ënda' tséajni'ili' rinná bé'enë' Cristo yúgu'të bönni', ate' bönni' rinná bé'enë'-nu nigula, ate' Dios rinná bé'enë' Zxí'inë', Bönni' na' náquië' Cristo.

⁴ Channö tu bönni' rulidzë' Dios, o ru'ë didza' uláz queë' Dios, en dxía icjë' xilu'ë, rucá'anë' Cristo cá'asö.

⁵ Na'a, channö tu nigula rulídzanu Dios, o ruí'inu didza' uláz queë' Dios, en bití' bi zxoa ícjanu, rucá'ananu bönni' queënu cá'asö, en naca queënu ca naca queënu tu nigula narugu guitsa' ícjanu.

⁶ Channö tu nigula cabí bi zxoa ícjanu, ral-la' irugu ca' guitsa' ícjanu. Channö gun ga utuí'inu nigula na' channö nu chugu guitsa' ícjanu, ral-la' bi íxóa ícjanu.

⁷ Tu bönni' bití' bi ral-la' udxía icjë' cate' ridxinë' lahuë' Dios, tu' náquië' ca naca cazë' Dios, ate' lë na' náquië' bönni' ruluf'i lahui yöl-la' zxön queë' Dios, pero le nácanu nigula na' ruluf'i lahui yöl-la' zxön queë' bönni' queënu.

⁸ Cate' benë' Dios bönachi, bití' bubéajë' bönni' na' lu nigula. Nigula na', lu bönni' na' bubéajë'-nu.

⁹ Lësca' caní, bití' benë' Dios bönni' para uzí'ínu xibë' nigula, pero benë' nigula para uzí'ë xibánu bönni'.

¹⁰ Que lë ni na', nigula na' ral-la' ixóa ícjanu le ruluí'i zoa nu rinná be'e lënu tu' tu'yúë' gubáz lá'ayi queë' Dios rë'u.

¹¹ Na'a, lahuë' Xanru', tu bönni' riquinnë'-nu nigula queë', ate' nigula na' riquíninu-në' bönni' queënu.

¹² Ca na' benë' Dios, bubéajë'-nu nigula lu bönni', lësca' caní na'a, yúgu'të bönni' náljlengaquië'-nu nigula, ate' yúgu'të ríru'aj lu në'ë Dios.

¹³ Bulí'chí'a bulí'sörö la' libí'ísili'. ¿Naru' ral-la' ulídzanu-në' Dios tu nigula bití' bi zxa ícjanu?

¹⁴ ¿Naru' cabí rusëdi libí'ili' yöl-la' nácatë quégaca bönachi, ral-la' utuí'inë' bönni' na' ru'ë lataj itunna guitsa' icjë'?

¹⁵ Na'a, channö natúnna guitsa' ícjanu tu nigula, naca yöl-la' lachi queënu, tu' bë'ë Dios queënu guitsa' ícjanu para usubín ícjanu.

¹⁶ Channö zoa nu guë'ëni tá'baga didza' ní, canisö nazí' lu na'tu' runtu', en lëbisö tun yugu' cö' bönachi queë' Dios.

Bönachi Corinto tu cá'ana cá'asö le rë'aj ráguru' para usubanru' ca gútië' Xanru'

¹⁷ Bití' runa' libí'ili' bal ca naca le uzéajni'ida' libí'ili' na'a. Le runli' bití' run ga raca dxi'a queëli' cate' rudúbili' queë' Cristo, pero run ga raca queëli' le cabí naca dxi'a.

¹⁸ Risí lahua' ruzéajni'ida' libí'ili' lë ni ta'guíxjöi'i bönachi neda', ta'nná: "Cate' rudúbili' queë' Cristo, narúajli' choplö", ate' réajlë'a nadxi ca' naca caní.

¹⁹ Run bayudxi ila'cuá'alen libí'ili' nupa tu'sedi le cabí nácatë para ilaca bë' nupa nácatë idú bönachi queë' Cristo.

²⁰ Que lë ni na', cate' rudúbili', lë na' ráguli' tsözxön bití' naca le rë'aj ráguru' para usubanru' ca gútië' Xanru'.

²¹ Caní naca, tu' runli' bayudxi tu tuli' ráguli' le nuá'ali' que queëli' cate' ráguli' tsözxön, ate' que lë ni na' ridunli' bál-lali', ate' ia'bál-lali' rë'aj ráguli' ga ridxintë rizúdxili'.

²² ¿Naru' cabí zoa lídxili' ga huáca guí'aj gáguli'? Ca na' runli', rucá'anali' bönachi queë' Dios cá'asö, en runli' ga tu'tuí'i nupa bití' bi dë quéguequi. ¿Bizxi caz guía' libí'ili'? ¿Naru' guntsa' libí'ili' bal? Bití' ca' runa' libí'ili' bal ca naca lë ni runli'.

Le rë'aj ráguru' para usubanru' ca gútië' Xanru'

²³ Xanru' caz budödë' lu na'a lë na' busédidá libí'ili', ca na' benë' Xanru' Jesús yëla ni' cate' nu budödi Lë' lu ná'agaquië' bönni' gulútië' Lë'. Gudélé'ë yöta xtila,

²⁴ en cate' budxi gudxë' Dios: "Xclenu", buzxuzxjë' le, en gunnë': "Gulí'gagu. Lë ni naca xipëla'a le nayuzxaj uláz queëli'. Gulí'gún caní, para usubanli' ca gaca quia' neda'."

²⁵ Lësca' caní, gudödi gulahuë', gudélé'ë tu zxíga'do', en gunnë': "Le yudzu zxíga'do' ni naca xichóna', le run tsutsu didza' cubi rucá'ana tsahui'. Gulí'gún caní yúgu'të luzuí guí'jali' le, para usubanli' ca gaca quia' neda'."

²⁶ Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxíga'do' caní, uluí'ili' lahui ca gútië' Xanru'.

Ca ral-la' gunru' cate' guí'aj gáguru' para usubanru' ca gútië' Xanru'

²⁷ Que lë ni na', nùti'tës nu gagu yöta xtila ni o gu'aj que le yudzu zxíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipëlë'ë Xanru', enca' xichönë' cá'asö.

²⁸ Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en gu'ajru' que le yudzu zxíga'do' ni.

²⁹ Nùti'tës nu rë'aj ragu lë ni, en biti' run le bal tu' cabí réquibe'e rulu'í le guca queë' Xanru', rusubaga' cuini dul-la' ni'a que lë na' rë'aj ragu.

³⁰ Que lë ni na' te'e zían nupa dzágagaca libí'ili', en ta'cuídi', ate' zianguequi chinátigaca.

³¹ La'tu' uchi'a usöröru' la' cuínsiru', biti' uchi'a usöröë' Xanru' rë'u.

³² Channö gun bayudxi uchi'a usöröë' Xanru' rë'u, usaca' zi'ë rë'u, para cabí irugu queëru' cate' ichúguie' queéquequi bönchui yödölió ilátigaca.

³³ Que lë ni na', böchi' luzá'ado', cate' udúbili' para gu'aj gáguli' para usubanli' ca gútië' Xanru', guli' cöza luzá'ali'.

³⁴ Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lë na' cate' uduyúa' libí'ili'.

12

Yugu' yöl-la' huáca runnë' queëru' Dios Bö' Lá'ayi

¹ Na'a, böchi' luzá'ado', rë'ënda' tséajni'ili' ca zeaj naca yöl-la' huáca runnë' queëru' Dios Bö' Lá'ayi.

² Nöz quézili' ca guca cate' ni' biti' réajlë'ënili' Cristo, bë'ëli' lataj gula'chë' bönachi libí'ili' ga yúbölö. Guyéaj ládxi'li' budó' guiój budó' yaga, le cabí ta'nnë.

³ Que lë ni na', ruzéajni'ida' libí'ili' caní, rnnia': Ladaj yúgu'të nupa tu'í didza' uláz queë' Bö' Lá'ayi queë' Dios, cuntu nu gaca innë xihui' queë' Jesús, en nitüë' gaca innë: "Jesús náquië' Xanru'", channö cabí zóalenë' Dios Bö' Lá'ayi nu na'.

⁴ Na'a, nadzá'gaca tu tu le runnë' Dios Bö' Lá'ayi queëru', pero tuzë' náquië' Bö' Lá'ayi na'.

⁵ Lësca' caní, nadzá'gaca tu tu dxin rigu'ë Xanru' lu ná'aru', pero tuzë' náquië' Xanru' na'.

⁶ Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'.

⁷ Dios runnë' que queëru' tu le naca bë' náparu' yöl-la' huáca queë' Dios Bö' Lá'ayi, lë na' ruzi'iru' xibé yúgu'tëru'.

⁸ Dios Bö' Lá'ayi runödzejë' queë' tu bönni' yöl-la' huáca ru'ë didza' len yöl-la' rácada', ate' ia'tüë' bönni', Lë cazë' Bö' Lá'ayi runödzejë' queë' yöl-la' huáca ru'ë didza' lu yöl-la' réajni'í.

⁹ Lësca' caní, Lë cazë' Dios Bö' Lá'ayi na' runödzejë' queë' ia'tüë' bönni' yöl-la' réajlë' Cristo bi gunë', ate' ia'tüë' bönni' runödzejë' queë' yöl-la' huáca ruünë' nupa te'e.

¹⁰ Ia'tüë' bönni' runödzejë' queë' yöl-la' huáca runë' yugu' yöl-la' huáca que yehua' yubá, ate' ia'tüë' bönni' ru'ë lë' lataj ru'ë didza' uláz queë' Dios, ate' ia'tüë' bönni' runödzejë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzejë' queë' ia'tüë' bönni' yöl-la' huáca ru'ë didza' yúbölö le cabí nazëdë', ate' queë' ia'tüë' bönni' yöl-la' huáca rudödë' didza' yúbölö na' biti' nazëdë'.

11 Yúgu'tè lè ni runè' Lè cazè' Dios Bò' Lá'ayi, tu' runödzejè' que tu tu bönachi tsca rë'eni quézinë'.

Yúgu'tèru' nácaru' ca tuz bönachi

12 Ca na' naca tuz idútè le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácacaga tuz idútè le naca cázaru', lësca' caní naca queë' Cristo.

13 Tu' zóalenè' Lè cazè' Dios Bò' Lá'ayi rë'u, lè ni naca queëru' ca tu le nadílaru' nisa, le naca bè' nácaru' ca tuz bönachi, sal-la' nácaru' yugu' bönni' judio, en yugu' bönni' zí'tu', enca' yugu' bönni' nadó'ogaquiè', en yugu' bönni' biti' nadó'ogaquiè'. Yúgu'tèru', Dios bè'è rë'u lataj sí'iru' le runödza cazè' Bò' Lá'ayi.

14 Na'a, lu idútè le naca cázaru', zían le nagudi' dzágalenru', en calëga tuz.

15 La'tu' huáca güi'i didza' ní'aru', huanná: "Tu' cabí naca' në'è bönni', biti' néquida' queë'", didza' ni biti' gun ga biti' nequi queë' bönni' na'.

16 La'tu' huáca güi'i didza' nágaru', huanná: "Tu' cabí naca' guiøj lahuè', biti' néquida' queë' bönni' ni", didza' ni biti' gun ga biti' nequi queë' bönni' na'.

17 La'tu' naca guiøj loru' idútè le naca cázaru', ¿nacxi gaca yöniru'? La'tu' naca nágaru' idútè, ¿nacxi gaca ilé'e zxína'ru'?

18 Na'a, Dios nucu'è yúgu'tè le nagudi' dzágalenru' ca gú'uni quézinë' Lè'.

19 La'tu' naca tuz le nagudi' dzágalenru', biti' rō soa idú ca naca cázaru'.

20 Na'a, ca nácaru', zían le nagudi' dzágalenru', pero tuz le nácaru'.

21 Que lè ni na', guiøj loru' biti' gaca guié ná'aru', inná: "Biti' riquinda' li'." Lësca' caní, ícjaru' biti' gaca guié ní'aru', inná: "Biti' riquinda' libí'ili'."

22 Na'a, yugu' le nagudi' dzágalenru', lè na' réquiru' nácacagarō cuídi'sō, lè ni naquínirōru'.

23 Lësca' caní, yugu' le nagudi' dzágalenru', le réquiru' nácacagarō cá'asō, lè ni rugácurōru' dxi'a, en yugu' le réquiru' biti' ral-la' ilá' lahui, rugácurōru' ca' dxi'a.

24 Biti' run bayudxi gunru' caní que le nácarō lachi que le néquiniru'. Dios benè' idútè le naca cázaru', en benè' ga nácarō lesaca' lè na' réquiru' rë'u nácarō cá'asō.

25 Caní benè', ate' biti' narúajgaca choplō le nagudi' dzágalenru', tu' tun chí'i luzè'eguequi tu ia'tú.

26 Channō gaca zí' tu le néquiniru', ilaca zí' tsōzxōn len le yúgu'tè le néquiniru' na', en channō tu le néquiniru' zoa bi ruzí' xibé, yúgu'tè le nagudi' dzágalenru' tu'zí xibé tsōzxōn le.

27 Na'a, libí'i cázali' dzágali' idútè le naca cazè' Cristo, ate' tu tuli' nácali' ca yugu' le nagudi' dzágalenè'.

28 Lësca' caní, ladaj bönachi queë' Cristo, Dios nucu'è nupa tun xichinë'.

Ga naca lo nucu'è yugu' bönni' gubáz queë' Cristo.

Ga naca buropi nucu'è yugu' bönni' tu'è didza' uláz queë'.

Ga bunní nucu'è yugu' bönni' tu'sédinè' luzá'aru'.

Ní'irō nucu'è nupa tun yugu' yöl-la' huáca que yehua' yubá.

Ní'irō nucu'è nupa tu'ún nupa te'e.

Ní'irō nucu'è nupa tácalen böchi' luzá'aru'.

Ní'irō nucu'è yugu' bönni' tu'lu'ínè' rë'u dxin gunru'.

Ní'irō nucu'è yugu' bönni' tu'è didza' yúbölō biti' nazédagaquiè'.

29 Calëga yúgu'tè' nácacagaquiè' gubáz queë' Cristo.

Calëga yúgu'tè' tu'è didza' uláz queë' Dios.

Calëga yúgu'tè' tu'sédinë' luzá'aru'.

Calëga yúgu'tè' tunë' yugu' yöl-la' huáca que yehua' yubá.

³⁰ Calëga yúgu'tè' dë lu ná'agaquië' ulu'únë' nupa te'e.

Calëga yúgu'tè' tu'ë didza' yúbölö bití' nazédagaquië'.

Calëga yúgu'tè' tu'dödë' didza' yúbölö bití' nazédagaquië'.

³¹ Gulí'guí' ládxi'li' cu'ë Dios lu ná'ali' yugu' yöl-la' huáca na' nácagacarö lesaca'. Na'a, uluí'ida' libí'ili' tu le nácáro lesaca' ca yúgu'tè' lë ni.

13

Yöl-la' nadxí'i

¹ Sal-la' gaca gu'a xtídza'gaca bönachi le cabí nazëda', enca' xtídza'gaquië' gubáz lá'ayi queë' Dios, pero channö cabí nadxí'ida' luzá'a, didza' gu'a bití' gácarö lesaca' ca bö le run gui rucódxiru' o guíë rutil-laru' luzë'e.

² Sal-la' nazí' lu na'a gu'a didza' uláz queë' Dios en tséajni'ida' yúgu'tè' le nagachi', en yúgu'tè' didza' réajni', en sal-la' naca idú ca réajlë'a Dios ga ridxintë huáca cúa' yugu' gu'a, pero channö cabí nadxí'ida' luzá'a, bití' bi nazáca'a.

³ Sal-la' quisia' idútë' le dë quia' para ugahua' yugu' bönachi yechi', en sal-la' udöda' idútë' le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, bití' ca' uzi'a xibé' lë na' runa'.

⁴ Nu bönni' nadxí'inë' luzë'ë, ribözë' zxon ladxí'.

Náquië' dxi'i ladxí', en bití' ruzxé'enë' luzë'ë.

Nadxí'inë' luzë'ë idú ladxë'ë.

Bití' run ba zxon cuinë', en bití' run cuinë' lo.

⁵ Bití' runë' le ruá' dö'.

Bití' rudúli'në' le dë queë'.

Bití' rilëtenë', en bití' röjnenë' dö' gulu'i bönachi queë'.

⁶ Bití' ca' rudzéjanë' cate' nu run le ruá' dö'.

Rudzéjanë' cate' nu run le naca idútë' li.

⁷ Ruá' rilënë' bíti'tës bi gun luzë'ë queë'.

Réajlë'tica'së' luzë'ë.

Rúntica'së' löza gun luzë'ë le naca dxi'a.

Ribözatica'së' zxon ladxí'.

⁸ Bití'rö tödi que yöl-la' nadxí'i. Huadödi que le dë lu ná'agaca bönachi iluí'i didza' uláz queë' Dios. Huadxín dza cate' bíti'rö gata' lu ná'agaca bönachi iluí'i didza' yúbölö le cabí nazédagaca, ate' huadödi que yöl-la' réajni'i quéguequi bönachi.

⁹ Láti'do'os réajni'iru' na'a, en láti'do'os ca' ruí'iru' didza' uláz queë' Dios.

¹⁰ Cate' idxín le naca idú, ní'irö údxi que lë na' naca láti'do'os.

¹¹ Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ládxa'a ca bí'ido'. Cate' bigula' bucá'ana' le nequi que bí'ida'ahua'.

¹² Na'a le rilë'eru' naca ca le rilë'eru' cate' ruyú cuinru' tu lu guíë dxí'ido'. Bití' rilë'eru' idú ca naca. Dza ní'irö ilë'eru' idú ca naca yúgu'tè'. Na'a núnbë'a láti'do'os. Dza ní'irö gúnbë'a yúgu'tè' ca na' Dios caz núnbë'ë neda'.

¹³ Na'a, nacuá'tica'sö yöl-la' réajlë' queëru' Dios, en yöl-la' run löza queëru' Dios, en yöl-la' nadxí'i queëru' luzá'aru'. Nacuá' yonna ni, pero le naca lo naca yöl-la' nadxí'i.

14

Yugu' yöl-la' huáca runnë' queëru' Dios Bö' Lá'ayi

¹ Guli'gún bayudxi idxí'ili' luzá'ali', en guli'güf' ládxi'li' sí'ili' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca güf'ili' didza' uláz queë' Dios.

² Nu ruí' didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntú nu zoa réajni'i didza' ruí' nu na'. Dios Bö' Lá'ayi ru'ë nu na' lataj ruí' didza' ca nácagaca le nagachi' queë' Dios.

³ Nu na' ruí' didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutipa ládxi'guequi, en ruhuë tsahui' léguequi.

⁴ Nu na' ruí' didza' yúbölö le cabí nazëda run tsutsu la' cuinsi, pero nu ruí' didza' uláz queë' Dios run tsutsu yúgu'të bönachi queë' Cristo.

⁵ Raca ládxa'a güf'ili' didza' yúbölö le cabí nazëdali' yúgu'tëli', pero le naca lo, ré'ënda' güf'ili' didza' uláz queë' Dios. Ruzí'iröru' xibé nu ruí' didza' uláz queë' Dios ca ruzí'iru' xibé nu ruí' didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo.

⁶ Que lë ni na', böchi' luzá'ado', cate' guía' ga zóali', channö güf'ilena' libí'ili' didza' yúbölö le cabí nazëda, bití' bi uzí'ili' xibé. Uzí'sili' xibé didza' na' güf'ilena' libí'ili' le nuluí'inë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

⁷ Lësca' caní raca que le ta'gú'u bö, yugu' le cabí nabángaca, ca naca gui rucödxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilö le tul-la na', lë na' rul-la gui na', o guitarra na'?

⁸ Channö cabí cödxí ca ral-la' gun lúzuba' böa' na' ulidza rë'u lu gudil-la, ¿nuzxi caz upá' cuini para tseaj lu gudil-la na'?

⁹ Lësca' caní raca queëli'. Channö len lúdxí'li' güf'ili' didza' le cabí taca bönachi, bití' ca' ila'yéajni'i didza' güf'ili'. Caní gaca, nítisö güf'ili' didza'.

¹⁰ Le nácate' nacua' zían didza' yúbölö tuí' zían cö' bönachi izá'a lu yödzöliö ni, ate' nacua' bönachi ta'yéajni'i tu tu didza' na'.

¹¹ Na'a, channö cabí réajni'ida' didza' ru'ë tu bönni', gaca' ca tu bönni' zítu' lahuë bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zítu'.

¹² Lësca' caní naca queëli'. Ruí'ida' ládxi'li' sí'ili' yugu' le runnë' queëru' Dios Bö' Lá'ayi. Que lë ni na', guli'güf' ládxi'li' sí'ili' le ilún ga ilácarö tsutsu bönachi queë' Cristo.

¹³ Que lë ni na' ca', nu ruí' didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le ré'ëni inná didza' na' ruí' nu na'.

¹⁴ Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni' quia' bití' ruzi'a xibé didza' na' ruá'a.

¹⁵ ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni' quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni' quia' gul-la' yöl-la' ba.

¹⁶ Channö lu bö' naca cazu' rulidza lá'ayu'-në' Dios, ate' zoa ni' nu riyönisö, channö cabí réajni' didza' ru'u, ¿nacxi caz gaca inná: "Ca' gaca", ni'a que didza' ru'u, rë'u-në' Dios: "Xclenu"?

¹⁷ Nadxi ca' dxí'ado' ru'u didza', rē'u-nē' Dios: "Xclenu'." Channō cabí reájni'i didza' ru'u, bití' bi uzí' xibé nu na' riyōni.

¹⁸ Rea-nē' Dios: "Xclenu'", tu' ruí'ira' didza' yúbölö le cabí nazēda' ca yúgu'téli'.

¹⁹ Lógaca bōnachi queē' Dios guē'ēnitērōda' gu'a gáyu'sō didza' le gaca ila'yéajni'i bōnachi ca zían gayuá' didza' yúbölö le cabí nazēda', ate' cuntu nu gaca tséajni'i. Gaca usédida' ia'zica'rō bōnachi tuzi channō ila'yéajni'i didza' gu'a.

²⁰ Bōchi' luzá'ado', bití' gácali' ca bí'ido' ca naca le rizá' lādxi'li'. Guli'gaca ca bí'ido' para cabí gunli' le ruá' dō', pero guli'gaca bōnni' chinácagaca ca naca le rizá' lādxi'li'.

²¹ Nazúaj lu guichi lá'ayi le rnna: "Len didza' yúbölö, en lu ruá'agaca bōnachi izá'a gú'ílena' bōnachi ni didza'. Sal-la' guna' caní, bití' ulu'zē nágagaca xtídza'a." ¡Caní rnnē' Xanru'!

²² Caní naca, Dios ru'ē rē'u lataj ruí'iru' didza' yúbölö le cabí nazēdaru' para gaca tu le naca bē' lógaca bōnachi bití' ta'yéajlē', en calēga lógaca nupa ta'yéajlē' Cristo. Ru'ē rē'u lataj ruí'iru' didza' uláz queē' Lē' le ulu'zí' xibé nupa ta'yéajlē' Cristo, en calēga bōnachi na' bití' ta'yéajlē'.

²³ Que lē ni na', cate' udúbili' tsōzxōn, yúgu'téli' na' néquili' queē' Cristo, channō gú'íli' didza' yúbölö le cabí nazēdali' yúgu'téli', ate' tsázagaca nupa nazēdagaca láti'do'os, o nupa bití' ta'yéajlē' Cristo, ¿naru' cabí ila'nná: "Nachixi ícjali'?"

²⁴ Na'a, channō yúgu'téli' gú'íli' didza' uláz queē' Dios, ate' tsaz nu cabí reájilē' Cristo o nu nazēda láti'do'os, guéquibe'e nu na' nabaga' xíguia', ate' Dios uchi'a usōrōē' lē'. Caní guéquibe'e nu na', tu' tseajni'i didza' gú'íli' yúgu'téli'.

²⁵ Guéquibe'e ca naca le rizá' lādxi' nu na', lē na' bigachi', ate' uzóa zxibi nu na', en tseaj lādxi' Dios, ate' inná: "Le nácatē Dios zóalenē' libí'ili'."

Ca ral-la' gunru' ga rudúbiru' queē' Cristo

²⁶ Que lē ni na', bōchi' luzá'ado', cate' rudúbili' queē' Cristo, rul-lē' tuē' bōnni' dzáguie' libí'ili' tu salmo, ate' rusédinē' ia'túē' tu xibá, ate' ia'túē' riguixjōi'inē' libí'ili' tu le buluí'inē' Dios lē', ate' ia'túē' ru'ē didza' yúbölö le cabí nazēdē', ate' ia'túē' rudōdē' didza' yúbölö na' le cabí nazēdē'. Yúgu'tē le gunli' ral-la' gaca le ulu'zí' xibé nupa tu'dubi queē' Cristo.

²⁷ Cate' nacuá' ni' nupa tuí'i didza' yúbölö le cabí nazēdagaca, bití' ral-la' gú'íli' didza' caní zíanró ca chopa tsónmasili'. Huáca gu'ē didza' tuzē' bōnni' na', ate' tōdi na' huáca gu'ē didza' ia'túē', pero run bayudxi soa nu udōdi didza' yúbölö na' le bití' nazēdali'.

²⁸ Channō cuntu nu zoa nu gaca udōdi didza' yúbölö na' le cabí nazēdali', nu na' ruí'i didza' yúbölö le cabí nazēda ral-la' soa dxisō ga na' nudúbili', ate' huáca gú'ílen Dios didza' na' lu icja lādxi'da'ahui.

²⁹ Lēscá caní, yugu' bōnni' tu'ē didza' uláz queē' Dios ral-la' ilu'ē didza' chopá tsónmasē', ate' ia'zica'rē' bōnni' na' tu'ē didza' uláz queē' Dios ral-la' ulu'chi'a ulu'sōrōē' didza' ru'ē bōnni' na'.

³⁰ Channō Dios uluí'inē' tu bōnni' rō'ē ni' le rē'ēni inná xtídzē'ē, ral-la' soa dxisō nu na' ruí'i didza'.

³¹ Yúgu'téli' huáca gú'íli' didza' uláz queē' Dios tu tuli' para izēdali' yúgu'téli', en idipa lādxi'li' ca' yúgu'téli'.

³² Yugu' bōnni' tu'ē didza' uláz queē' Dios huáca ila'nná be'e cuíngaquie', en ila'cu'ē dxisō.

³³ Calēga Dios nu run ga rutsátsaru, tu' rē'ēnē' Lē' gácaru' ba'a ladxi', ca na' runē' ga nacuá' yúgu'tē cō' bōnachi queē' Cristo.

³⁴ Ral-la' ila'cuá'anu dxisō nigula queēli' ga na' rudúbili'. Biti' dē lu ná'agacanu ilu'ínu didza' ni'. Ral-la' ila'cuá'anu nōxaj ca na' rinná' bē' xibá queē' Dios.

³⁵ Channō tē'ēninu ila'yéajni'ínu ia'lati', ral-la' ila'nábinu bōnni' que queēgacanu cate' ni' nacu'ē lédxigaquiē'. Biti' ral-la' ilu'ínu didza' yugu' nigula ga na' rudúbiru' queē' Dios.

³⁶ ¿Naru' réquitseli' bunōdzjē' Dios xtídzē'ē lu ruá'ali' libí'isili'? ¿Naru' réquitseli' bidxín xtídzē'ē Dios queēzili' libí'ili'?

³⁷ Channō nu bōnni' nūtsē'ē ládjali' réquinē' ru'ē didza' uláz queē' Dios, o réquinē' zóalenē' Dios Bō' Lá'ayi lē', bōnni' ni' ral-la' si' lu nē'ē naca xibá queē' Xanru' le ruzúaja' queēli' lu guichi ni.

³⁸ Na'a, channō cabi ru'í ládxi'ē didza' ni, biti' gūf'i ládxi'li'-nē' bōnni' na'.

³⁹ Que lē ni na', bōchi' luzá'ado', guli'gūf' ládxi'li' gūf'ili' didza' uláz queē' Dios, en biti' inná' bē'eli' nu ru'í didza' yúbölō le cabi nazēda.

⁴⁰ Ral-la' gunru' yúgu'tē ca sa'yéaj, en lu yöl-la' ba'a ladxi'.

15

Bubanē' Cristo lu yöl-la' guti

¹ Na'a, bōchi' luzá'ado', riguixjöi'ida' libí'ili' ca naca didza' dxi'a na' bena' libán que ga zóali', lē na' guzxi' lu ná'ali', ate' run ga nácáro idú ca réajlē'ēli' Cristo.

² Ni'a que didza' ni uláli', channō gunli' ca rna didza' dxi'a na' bena' libán que ga zóali', channō le nácatē guyéajlē'ēli'-nē' Cristo.

³ Ga gusí lo budōda' lu ná'ali' le budödē' Dios lu na'a neda'. Caní rna: "Gútiē' Cristo uláz queēru' tu' nabága'ru' dul-la'." Ca naca lē ni nazúaj lu guichi lá'ayi le rna ben bayudxi benē'.

⁴ Rna ca': "Bigachē'ē yeru ba, en cate' bizá'a tsonna dza, bubanē' lu yöl-la' guti", ca na' nazúaj ca' lu guichi lá'ayi le rna ben bayudxi guca queē'.

⁵ Gudōdi ni' buluf'i lahuē' Cristo, ate' bilé'enē' Pedro Lē', en gudōdi ni' idxínutē' gubáz queē' bila'lé'enē' Lē'.

⁶ Ní'irō buluf'i lahuē' lógaquiē' ziánrō ca gayu' gáyu'ē bōchi' luzá'aru' ta'yéajlē'ē Cristo, cate' ni' nudúbigaquiē' tsōzxōn. La'tu'biqiu' yúgu'tē' bōchi'ru' ni nacu'ē nabángaquiē' na'a, sal-la' bal-lē' chinátigaquiē'.

⁷ Ní'irō Jacobo bilé'enē' Lē', en gudōdi ni' buluf'i lahuē' lógaquiē' yúgu'tē' bōnni' gubáz queē'.

⁸ Ga yōjsetē' buluf'i lahuē' ca' lahua' neda'. Ca guca lē ni, naca' ca tu bí'ido' gúljabí' cate' chigudōdi dza ral-la' gáljabí'.

⁹ Caní naca, tu' nácara' neda' cá'asō ca yúgu'tē' bōnni' gubáz queē', en biti' naca' neda' lesaca' si' la' gubáz queē', tu' gudxía ládxa'a bōnachi queē' Dios.

¹⁰ Na'a, tu' buzá' ládxi'ē quia' Dios naca' le naca' na'a, en calēga nítisō buzá' ládxi'ē quia'. Béntēra' neda' xichinē' ca ia'zica'rē' gubáz queē', sal-la' calēga rácasō quia' bena' dxin na'. Dios caz, lu yöl-la' ruzá' ladxi' queē', bugunē' neda' dxin.

¹¹ Na'a, channō bena' libán neda' o channō gulunē' libán ia'zica'rē' bōnni', lē ni le runtu' libán que, en le guyéajlē'ēli' libí'ili'.

Ubanru' lu yöl-la' guti

12 Runtu' libán queë' Cristo ca na' bubanë' lu yöl-la' guti. Channö caní naca, ¿nacxi caz naca, rnnali' bál-lali': "Biti' ulu'bán nupa chinátigaca"?

13 La'tu' cabí ulu'bán nupa chinátigaca, bití' bubanë' Cristo,

14 en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queëli' Lë'.

15 Ia'stú, la'tu' cabí bubanë' Cristo, rizi' yë'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios bití' busubanë' Cristo.

16 La'tu' cabí ulu'bán nupa chinátigaca, bití' bubanë' Cristo,

17 en la'tu' cabí bubanë' Cristo, nítisö naca yöl-la' réajlë' queëli' Lë', ate' nagá'anagaca dul-la' nabága'li'.

18 Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'.

19 Channö tsánnisö ni zóaru' nabanru' huáca uzí'iru' xibë' Cristo, nácaröru' bayechi' ca yúgu'të bönachi.

20 Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti.

21 Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'tuë' bönni' guyú'u yöl-la' rubán quégaca nupa chinátigaca.

22 Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo.

23 Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiguequi queë' Cristo cate' huödë'.

24 Ní'irö idxín dza údxi cate' ugüë' Cristo idütë le dë lu në'e, en idütë yöl-la' unná bë', en idütë yöl-la' huáca que tu' xihui', ate' udödë' yöl-la' unná bë' queë' lu në'ë Dios Xuz.

25 Run bayudxi inná bë'ë Cristo ga idxinrö dza chibenë' Dios ga ulu'zechu zxíbigaca lahuë' Lë' yúgu'të nupa ta'dá'baga' Lë'.

26 Le ridá'baga' Lë' le usunítie' ga údxi naca yöl-la' guti.

27 Dios chinudödë' yúgu'të lu në'ë Zxí'inë' para inná bé'enë' le. Nazúaj lu guichi lá'ayi, rna: "Budödë' yúgu'të lu në'ë para inná bé'enë' le." Na'a, naca bë' bití' budödi cuinë' lu në'ë Zxí'inë', tu' naca cazë' Lë' Nu rudödi yúgu'të lu në'ë Zxí'inë'.

28 Cate' idxín dza ni' chinudödë' Dios lu në'ë Cristo yúgu'të para inná bé'enë' le, ní'irö Lë' cazë' Zxí'inë' udödi cuinë' lu në'ë Dios, Nu na' budödi lu në'ë Zxí'inë' yúgu'të, ate' ga údxi, Dios inná bé'enë' tsaz yúgu'të.

29 Bál-lali' ridí'ali' nisa uláz quégaca nupa chinátigaca. Channö réquili' bití' ulu'bán nupa na' chinátigaca, ¿bizx que ridí'ali' nisa uláz quégaca nupa chinátigaca?

30 Zoa bönadxi queëtu' gátitu' yúgu'të dza. ¿Bizx que ruí'itu' lataj gaca caní channö cabí ubanru' lu yöl-la' guti?

31 Yúgu'të dza zoa bönadxi gátia'. Riguíxjöi'ida' libí'ili' lë ni, böchi' luzá'ado', tu' rúza ládxa'a le bena'. Caní naca tu' bena' ga réajlë'ëli' Xanru' Jesucristo.

32 Channö tu' gú'unisida' gudí'lalena' böa' guixi' sínia' lu yödzö Éfeso, ¿bizxi caz uzí'a xibë? Channö cabí ulu'bán nupa chinátigaca, ral-la' gunru' ca ta'nná bönachi: "Gui'aj gáguru' tu' huátiru' cuxó huidzaj."

33 Bití' gü'ili' lataj nu si' ye'e libí'ili'. Channö si' lu ná'ali' láti'do'os le cabí nácatë, idütëli' huóacali' chul-la niti.

³⁴ Buli'bí'i ládxi'li', en biti' gunli' dul-la' tu' cabí núnbë'ëli'-në' Dios bál-lai' libí'ili'. Rnní'a caní para guna' ga utu'ili'.

Ca ilaca nupa ulu'bán lu yöl-la' guti

³⁵ Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácagaca cazë' cate' ulu'dxinë'?"

³⁶ Li', bönni' biti' bi nözinë'. Lë na' rázu' luyú biti' ilén channö cabí initi.

³⁷ Lë na' rázu' luyú naca tu xisédo'os, nadxi ca' que zxoá' xtla o que ia'tú guixi' cuando'. Lë na' rázu' biti' naca guixi' cuando' na' ral-la' ilén.

³⁸ Dios runë' ga gaca guixi' cuando' ca nun cazë' que. Ca naca tu tu xisédo' na' runë' ga gaca guixi' cuando' que.

³⁹ Lësca' caní, biti' naca lëbisö' bëla' que queégacaba' yúgu'tëba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguinni, en ia'tú ca naca bëla' quégacaba' böla.

⁴⁰ Lësca' caní nadzá' idú ca nácagaca caz nupa nacua' yehua' yubá ca naca idú ca nácagaca caz nupa nacua' luyú ni. Zoa tu yöl-la' lachi quégaca nupa nacua' yehua' yubá, en ia'tú ca naca yöl-la' lachi quégaca nupa nacua' luyú ni.

⁴¹ Zoa tu yöl-la' lachi que gubidza, en ia'tú que beo', en ia'tú quéguequi böljaj lúzxiba. Yöl-la' lachi que tu böljaj lúzxiba nadzá' ca naca yöl-la' lachi que ia'tú böljaj lúzxiba.

⁴² Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz.

⁴³ Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la.

⁴⁴ Cate' rigachi' lu yeru ba naca tu bëla' que yödzüliö ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzüliö ni, en ia'tú ca gaca le idzaga bö' naca cázaru'.

⁴⁵ Nazúaj lu guichi lá'ayi le rnna: "Bönni' na' gusí lahuë' zoë' luyú ni, lë' Adán, Dios benë' lë' bönni' ban", pero Bönni' na' guyázië' xilatjë' Adán, Lë' Cristo, Dios benë' ga náquië' Bö' nabániru'.

⁴⁶ Biti' blë'ë zí'alö Bönni' na' náquië' Bö'. Bla' zí'alö nu na' naca bönáchisö, ate' ní'irö blë'ë Bönni' na' náquië' Bö'.

⁴⁷ Bönni' ni' blë'ë zí'alö, gúquinë' yu. Bönni' na' blë'ë burópilö, Nu na' naca Xanru', birúajë' yehua' yubá.

⁴⁸ Nupa nacua' luyú ni nácagaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá.

⁴⁹ Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huéquiru' ca néquinë' Nu na' birúaj yehua' yubá.

⁵⁰ Caní rë'ëni inná lë ni rea' libí'ili', böchi' luzá'ado', rnní'a: Le néquini bëla', en rön biti' gaca tsaz ga ni rinná bë'ë Dios, en lësca' caní, lë na' initi biti' gaca ideli' lë na' soa tsaz.

⁵¹ Buli'yútsöca', rea' libí'ili' tu le bigachi': Biti' gátiru' yúgu'tëru', pero Dios utsë'ë ca nácaru' yúgu'tëru'.

⁵² Tsárido'os gaca, tsca naca tu le rutásö guiöj loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsë'ë le néquiniru' yúgu'tëru'.

⁵³ Lë na' nácaru' le riniti ral-la' huóaca le soa tsaz, ate' le néquiniru', lë na' ral-la' gati, huóaca tu le catu caz gati.

⁵⁴ Cate' lë na' riniti chinuhuöäca le soa tsaz, enca' lë na' ral-la' gati chinuhuöäca le catu caz gati, ní'irö idxín lë na' nazúaj lu guichi lá'ayi, le rnna: Nadúa tsaz yöl-la' guti.

Chibidéli'në' Cristo.

⁵⁵ Bítí'rö inná be'e yöl-la' guti rë'u.

Bítí'rö gaca yöl-la' guti bi gun queëru'.

⁵⁶ Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios.

⁵⁷ ¡Xclenë' Dios! ¡Lë cazë' runë' ga nuláru' lu yöl-la' guti ní'a que le benë' Xanru' Jesucristo!

⁵⁸ Que lë ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz quézili' bití' runli' nítisö xichinë' Xanru'.

16

Yugu' bönachi Corinto tu'nödzej quegaquië' böchi'gaca ta'yádzjanë'

¹ Na'a, ca naca que dumí na' unödzejali', le gácalen böchi'ru' ta'yéajlë'ë Cristo nacu'ë Jerusalén, guli'gún na'a ca na' gunná bé'eda' yugu' cö' bönachi queë' Cristo, nacuá' luyú Galacia.

² Yugu' dza domingo, tu tuli' ral-la' cú'uli' quez lati' dumí, tsca na' Dios runné' queéli'. Guli'gún chí'i le, para cabí gun bayudxi bi utúbili' cate' idxina' ga zóali'.

³ Cate' ni' idxina' ga zóali', isöl-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bé'gaquië', ate' ilu'ë dumí na' unödzejali'.

⁴ Channö ral-la' tseja' ca' neda', tsöjácalenë' neda'.

Le rë'ënë' gunë' Pablo

⁵ Guída' ga zóali' cate' údxi töda' yugu' yödzö luyú Macedonia, tu' run bayudxi töda' yugu' yödzö na'.

⁶ Réquida' ugá'analena' libí'ili' tu chí'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gáti'tës ga ral-la' tseja'.

⁷ Cate' guída' uduyúa' libí'ili' bití' rë'ënda' tödisa' ni'. Runa' löza sóalena' libí'ili' xidzé, channö gunné' Xanru' neda' lataj.

⁸ Ugá'ana' ni lu yödzö Éfeso ga idxinrö dza Pentecostés

⁹ tu' dë' lataj ni guna' tu dxin zxön queë' Xanru', sal-la' zían nupa ta'dá'baga' neda'.

¹⁰ Channö idxinbi' bi'i Timoteo ga na' zóali', guli'gü'i ládxi'li'-bi', para cabí ubi uguf'ibi' tsanni ni' sóalenbi' libí'ili', tu' runbi' xichinë' Xanru' ca na' runa' neda' xichinë'.

¹¹ Que lë ni na', cuntu nu ral-la' uzóa lëbi' tsölá'alö. Guli'gácalen-bi', ugú'uli'-bi' nöza idú tsáhui'do', para udxinbi' ga ni zoa' neda', tu' riböza'-bi' lëbi', enca' yugu' böchi'ru' túnlenë'-bi' tsözxön dxin.

¹² Ca naca queë' böchi'ru' Apolos, gúta'yua' lahuë' tsejë' tsöjyúë' libí'ili' tsözxön len yugu' böchi'ru', pero bití' rë'ënë' tsejë' na'a. Guidë' cate' séqui'në'.

Didza' ru'ë Pablo ga ruúdx

¹³ Bulí'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ladxí', en bulí'tipa ládxi'li'.

¹⁴ Len yöl-la' nadxí'i guli'gún bítí'tës bi gunli'.

¹⁵ Na'a, böchi' luzá'ado', chinöz quézili' ca naca queë' Estéfanos, enca' quégaca dí'a dza queë'. Nácagaca nupa gula'sí lógaca ta'yéajlë' Cristo ladaj

bönachi nacua' luyú Acaya. Bulu'dödi cuíngaquië' para ilunë' xichíngaca bönachi queë' Dios.

¹⁶ Ráta'yua' loli', böchi' luzá'ado', gunli' bal nupa náca gaca ca böchi'ru' na', enca' ca náca gaca nupa tunlen légaquië' tsözxón dxin, en tácalen légaquië'.

¹⁷ Rudzėjada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queéli'.

¹⁸ Bulu'huë tsáhuë'ë neda' ca na' bulu'huë tsáhuë'ë ca' libí'ili'. Guli'gún bal bönachi caní.

¹⁹ Yugu' cō' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigaquië' tu'gapë' Dios libí'ili'.

²⁰ Yúgu'të böchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

²¹ Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

²² Nu bití' nadxí'i Xanru' Jesucristo, chinabía dö' nu na'.

Gudá Xanru'.

²³ Rinábida'-në' Xanru' Jesucristo uzá' ládxë'ë queéli'.

²⁴ Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!

DIDZA' BUROPI GUSÖL-LĒ'Ē PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Neda', Pablo, naca' gubáz queë' Jesucristo tu' rë'ënë' caní Dios. Bi'i böchi'ru' Timoteo runbi' neda' tsözxön. Rugapa' Dios libí'ili', rudúbili' queë' Dios lu yödzö Corinto, enca' yúgu'tëli' néquili' quez queë' Dios luyú Acaya ga na' nababa Corinto.

² Rinábida'-në' Xúziru' Dios, en Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Yugu' le gudí'i guzxáque'ë Pablo

³ ÿöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhuë tsáhui'tica'sö rë'u!

⁴ Dios ruhuë tsáhue'ë rë'u cate' raca bíti'tës bi raca queëru', para gaca huë tsáhui'ru' ca' nupa bi raca queguequi. Ruhue tsáhui'ru' légaquië' ca na' Dios ruhuë tsáhue'ë rë'u.

⁵ Tsca ta'yán le riguí'i rizáca'ru', ca na' gudí'i guzxáque'ë Cristo, lësca' caní ta'yán le tu'huë tsahui' rë'u, tu' nácaru' tuz len Cristo.

⁶ Que lë ni na', channö bi riguí'i rizáca'tu', raca caní queëtu' para gaca huë tsáhui'tu' libí'ili', en guntu' ga uláli'. Channö Dios ruhuë tsáhue'ë netu', raca caní para gaca huë tsáhui'tu' libí'ili', ate' lu yöl-la' riböza zxön ladxi' queëli', gaca guá' ilenli' yugu' le quí'i sáca'li', ca na' raca ca' queëtu'.

⁷ Ruzxöni ládxi'tu'-në' Dios gúntica'së' ga gaca dxi'a queëli', tu' chinözitu' ca na' riguí'i rizáca'li' tsözxön len netu', lësca' caní ruzí'ili' xibë tsözxön len netu' le ruhuë tsáhue'ë Dios rë'u.

⁸ Ré'ënitü' inözili', böchi' luzá'ado', ca naca le zían le gulaca queëtu' luyú Asia. Gudödité bë' lë na' guca queëtu', ate' guca zítërö ca le guca guá' ilentu'. Ca' guca, bíti'rö bentu' löza sóatu' ibantu'.

⁹ Gúquitu' guca queëtu' ca raca quegaquië' bönni' chinarugu quegaquië' ilatië'. Guca caní queëtu' para cabí uzxöni ládxi'tu' la' cuínsitu', pero uzxöni ládxi'tu'-në' Dios, Nu rusbán nupa chinátigaca.

¹⁰ Dios busölë' netu' lu lë na' ben ga guzóa bönadxi gátitu', ate' rusölë' netu' yúgu'të dza. Runtu' löza usölë' Lë' netu' caní leyúbölö

¹¹ channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxön len bönachi zían, uzá' ládxë'ë queëtu', ate' ila'nná: "Xclenë' Dios" ni'a queëtu'.

Rigúxjö'ë Pablo bizx que ridzenë' idxinë' Corinto

¹² Lë ni le run ga rudzéjatu'. Bö' naca caztu' rulu'í netu', len yöl-la' ba'a ladxi' queëtu', en idú ládxi'tu' runtu' bi runtu' yödzölió ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë Dios queëtu', en calëga len yöl-la' réajni' queëztu' bentu' caní.

¹³ Ruzúajstöu' queëli' lu guichi le gaca ulábali', en le gaca tséajni'ili'. Raca ládxa'a tséajni'ili' idú

¹⁴ lë na' réajni'ili' lati'. Ní'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libí'ili' zxön.

15-16 Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopa luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'.

17 ¿Naru' réquitseli' guzxi' yë'a tu' butsa'a ca guna'? ¿Naru' réquitseli' lu yöl-la' bönáchisö quía' runa' le rizá'sö icja', en bé'ësa' ca' didza' cate' gunnía': "Caní guna'?"

18 Ni'a queë' Xanru' Dios, Nu run idütë ca rnna xtídzë'ë, biti' bé'ësa' ca' didza' cate' bé'lëna' libí'ili' xtídzë'ë Dios.

19 Jesucristo, Xzí'inë' Dios, Nu na' bentu' libán que ga zóali', neda' len Silvano, en Timoteo, biti' ru'isë' ca' didza'. Lë' ru'ë didza' idütë li.

20 Cristo caz runë' ga naca idütë löza yúgu'të le guzxi' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba.

21 Dios caz runë' ga runtu' löza tsözxön len libí'ili' néquiru' queë' Cristo, en budödë' lu na'tu' dxin queë' runtu'.

22 Bennë' queëru' le naca bé' néquiru' queë', tu' guchízië' icja ládxi'do'oru' Dios Bö' Lá'ayi, Nu naca queëru' le run ga naca löza yúgu'të le gunné' Dios queëru'.

23 Ni'a queë' Xanru' Dios, Nu nözi le rizá' ládxa'a, ruá'a didza' idütë li. Nözinë' Lë' biti' bida' ga zóali' lu yödzö Corinto, para cabí gun bayudxi guna' ga huí'inili'.

24 Biti' ré'ënitü' inná bé'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Ré'ënitü' guntu' le gun ga udzeja ládxi'li'.

2

1 Que lë ni na' bé' ládxa'a cabí guídatea' queëli' zí'alö, para cabí guna' ga huí'inili'.

2 Channö guna' neda' ga huí'inili', ¿nuzxi caz gun ga udzëjada' neda'? ¿Naru' guntsa' ga huí'ini nu ral-la' gun ga udzëjada' neda'?

3 Que lë ni na' buzúaja' queëli' lu guichi zí'alö. Biti' gú'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'i cázali' le gun ga udzëjada' neda'. Tu' ruzxöni ládxa'a libí'ili', nözda' udzëjali' yúgu'tëli' channö udzëjada' neda'.

4 Cate' ni' buzúaja' queëli' lu guichi lë na', gusëbide'e ládxa'a, en buí'inide'e ládxa'a ga bidxintë gurödxá'. Buzúaja' caní lu guichi, calëga para guna' ga huí'inili', pero para inözili' ca nadxi'ide'eda' libí'ili'.

Ral-la' uniti loru' nu ruá' dö' cate' rubí'i ladxí'

5 Channö zoë' tu bönni' ni', bönni' na' busuhuf'ininë' rë'u, calëga néda'sö busuhuf'ininë', pero huáca innaru' busuhuf'ininë' yúgu'tëli' libí'ili'. Rnnía': "Huaca innaru'", para cabí tödi bé' ichugu bé'a queë' bönni' na'.

6 Tscati' gaz xíguia' chibenli' látu'biqúi' yúgu'tëli' queë' bönni' na'.

7 Na'a, ral-la' uniti loli' bönni' na', en utípali' ládxe'ë, para cabí tödi bé' huí'ininë', en para cabí gaca tsaz chopa ládxe'ë.

8 Que lë ni na' ráta'yua' loli' gunli' le gaca bé' nadxi'ili'-në' idú ládxi'li'.

9 Que lë ni na' ca' buzúaja' queëli' lu guichi lë na'. Gú'unida' si' bé'a libí'ili' para inözda' channö rúntica'sili' ca rnna xtídzá'a.

10 Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzí'ili' xibé.

11 Caní runa', para cabí sequi' Satanás tu' xihui' ucúl-la rē'u, tu' chinōziru' yugu' le rē'eni gun queēru'.

Gurō'ē bōniga Pablo lu yōdzō Troas

12 Cate' bidxina' lu yōdzō Troas para guna' libán que didza' dxi'a queē' Cristo, bēnnadē'ē Xanru' neda' lataj guna' libán ni'.

13 Sal-la' guca caní, gurō'a bōniga tu' cabí yōjxáca'a-bi' bi'i bōchi'ru' Tito ni'. Que lē ni na' buzá'alena' bōnachi ni', ate' guyija' luyú Macedonia.

Idéli'ru' tu' zóalenē' Cristo rē'u

14 ¡Xclenē' Dios! Richē'tica'sē' rē'u ca tu le naca bē' bidéli'nē' Cristo yōl-la' rusólá queēru'. Dios rugunē' dxin rē'u para rulu'ē lahui ca gaca ilúnb'e bōnachi Cristo. Le nácaru' naca ca tu le rilá' zxixi, le riguisi gáti'tēs.

15 Nácaru' ca tu nōri rilá' zxixi, le ruzégui'ē Cristo lahuē' Dios, en le riguisiē' lógaca nupa nulágaca, en nupa nanítigaca.

16 Lógaca nupa na' nanítigaca nácaru' ca tu le rilá' siguti le naca bē' ilátiē'. Lógaca nupa na' nulágaca nácaru' ca tu le rilá' zxixi le naca bē' ibántica'siru'. ¿Nuzxi caz naca lesaca' gaca que caní?

17 Biti' runtu' ca tun zían bōnachi, nupa tu'gún dxin xtídzē'ē Dios ca tu le tuti', en to'o. Tu' nusól-lē'ē Dios netu', idú ládxi'tu' ruí'itu' didza' lahuē' Lē' tu' nácatu' tuz len Cristo.

3

Ca naca didza' le ruún rē'u tuz len Dios

1 ¿Naru' réquitseli' run ba zxon cuintu' cate' ruí'itu' caní didza'? ¿Naru' runtsō bayudxi ulu'itu' libí'ili' tu guichi le rulu'i le nácatu'? ¿Naru' ral-la' inábitu' libí'ili' gúnnali' queētu' tu guichi caní, ca na' tun bal-la' bōnachi?

2 Libí'ili' cázali' nácali' ca tu guichi le rulu'i le nácatu', le nazúaj lu icja ládxi'do'otu', ate' yúgu'tē bōnachi gaca ulu'laba le, en tséajni'iguequi le.

3 Le nácali' nalá' lahui ca tu guichi nuzúajē' Cristo, le gusól-lē'ē lu na'tu'. Biti' nazúaj tu lu guichi, pero Bō' Lá'ayi queē' Dios ban nuzúajē' le, calēga tu lu guiōjta'a, pero lu icja ládxi'do'oli' nuzúajē'.

4 Ruí'itu' caní didza' tu' ruzxōni ládxi'tu'-nē' Dios tu' zóalenē' Cristo rē'u.

5 Biti' réquitu' bi gaca guntu' rácasō queētu', pero Dios runnē' queētu' yōl-la' huáca bi guntu'.

6 Dios caz bennē' queētu' yōl-la' huáca guntu' xichinē' lu didza' cubi na', le ruún rē'u tuz len Dios. Didza' ni biti' naca tu xibá nazúaj lu guichi, pero naca tu le nusédinē' Dios Bō' Lá'ayi rē'u. Xibá na' nazúaj lu guichisō richugu queēru' gátiru', pero Dios Bō' Lá'ayi nabániru'.

7 Yugu' xibá queē' nazúajgaca lu guichi, Dios buzúajē' yugu' lu guiōjta'a, ate' bulu'e lahui yōl-la' bení' queē' cate' budōdē' le lu nē'ē' Moisés. Sal-la' gudōdi que, guyēpitērō yōsa bení' lahuē' Moisés. Caní guca, biti' guca ulu'yú bōnachi Israel lahuē' Moisés. Channō yōl-la' bení' caní yōjtsaga xibá na', ate' xibá na' richugu quégaca bōnachi ilátigaca,

8 zxōntērō naca yōl-la' bení' na' dzaga yugu' le runē' Dios Bō' Lá'ayi.

9 Yōjtsaga yōl-la' bení' lē na' ben ga narugu quégaca bōnachi ilátigaca. Zxōntērō naca yōl-la' bení' que lē na' run ga rnnē' Dios nácacaca tshui' bōnachi.

10 Tu' nácatērō lesaca' yōl-la' bení' na' nalá' lahui na'a, cuídi'sō nagá'ana yōl-la' bení' na' bilá' lahui cate' Dios bunōdzjē' xibá queē' quégaca bōnachi.

11 Channö guzóa yöl-la' bení' que lè na' guzóa tu chí'ido'osö, zxöntëro naca yöl-la' bení' que lè ni sóatica'sö.

12 Tu' zoa lè ni runru' löza, ru'itu' didza' lu yöl-la' rugu ladxi'.

13 Biti' runtu' ca benë' Moisés, bucache' lahuë' len tu lári'do', para cabí yú'bönachi Israel yöl-la' bení' na' zeaj riniti.

14 Gula'chul-la gula'nítië' yugu'bönni' ni'. Ga ridxintë na'a dza cate' tu'labë' guichi que didza' gula na' le ruún'bönachi tuz len Dios, naca tsca nagá'ana la' leze lári'do' na' lógaquië', lè na' gaca ugré' tuzë' Cristo.

15 Ga ridxintë na'a dza, cate' tu'labë' guichi ga na' nazúaj didza' queë' Moisés, zxo ca tu lári'do' guiöj lógaquië' le run ga nachul-la nanítigaquië'.

16 Cate' nu ruhuóaca queë' Xanru', rigúa lè na' run ga nachul-la naniti nu na'.

17 Cate' ni rnnatu': "Xanru'", ru'itu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ni' zoa caz yöl-la' nadzán.

18 Yúgu'tëru' rë'u bití' bi nusayaj loru'. Nácaru' ca tu guië' dxili ga nalá' yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquië' Cristo caz, en ráta'rö queëru' yöl-la' bení' queë'.

4

1 Dios buéchi' ládxë'ë netu', en budödë' lu na'tu' dxin ni runtu'. Que lè ni na' bití' raca chopa ládxí'tu'.

2 Chibucá'anatu' le tun bönachi bagáchi'sö, en le tun ga rutuí'iru'. Cuntu nu rizí'yé'etu', en bití' rutsá'atu' xtídzë'ë Dios. Tu' ru'itu' didza' que le naca idúte li, ru'í ládxí'tu' guntu' le iléguibe'e yúgu'të bönachi naca dxi'a lahuë' Dios.

3 Channö zoa nu bití' réajni'ini didza' dxi'a runtu' ba nalí que, nácacasö nupa nachul-la nanítigaca bití' ta'yéajni'i le.

4 Bití' ta'yéajlë' bönachi na'. Ben tu' xihui' ga naca caní, nu na' nun cuini ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz.

5 Bití' runtu' libán que la' cuínsitu', pero runtu' libán queë' Jesucristo, en rigú'jö'ötu' náquië' Xanru', ate' netu' ni nácatu' huen dxin queëli' tu' nadxí'itu'-në' Jesús.

6 Dios, Nu ben ga buzení' bení' ga ni' guca chul-la, náquië' Nu rigú'u bení' icja ládxí'do'oru', le ruzéajni' rë'u para gúnbë'ëru' yöl-la' bení' queë' Dios, lè na' ruzení' lahuë' Jesucristo.

Tu' réajlë'ëru' Dios runru' ca rë'ënë' Lë'

7 Yöl-la' tsahui' ni yu'u icja ládxí'do'oru' rë'u. Nácaru' ca yugu'yusu' yu, para gaca bë' nequi queë' Dios yöl-la' huáca zxön na', en calëga que cázaru'.

8 Tu'saca' zi' bönachi netu', pero bití' rudú ládxí'tu'.

Rö'ötu' böniga, pero bití' raca chopa ládxí'tu'.

9 Ta'bía ladxi' bönachi netu', pero bití' rubéaj ládxë'ë Dios netu'.

Ta'zé'ede'e netu' yu, pero bití' tu'suniti netu'.

10 Lu idú le naca caztu' rática'stu' tsözxön len Jesús, na' naca bë' lu le naca caztu' nabánitu' Lë'.

11 Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti.

¹² Caní naca, zoa bönadxi queëtu' gátitu', pero ni'a que lë ni rata' yöl-la' na'bán queëli'.

¹³ Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lësca' caní raca queëtu', réajlë'ëtu' Dios, en que lë ni na' ruí'itu' didza'.

¹⁴ Nöztu' ca gunë' Dios, Nu busubán Xanru' Jesús, usubanë' ca' netu' tsözxön len Jesús, en usudxinë' netu' tsözxön len libí'ili' lahuë' Lë'.

¹⁵ Raca caní yúgu'të lë ni para gaca bi uzí'ili' xibé. Channö ila'deli' zianrö ca' bönachi le ruzá' lãdxë'ë Dios queëru', ila'nnë': "Xclenë' Dios", ate' gaca yöl-la' ba queë' Dios.

¹⁶ Que lë ni na', biti' raca chopa lãdxi'tu'. Sal-la' riniti idú le naca caztu', yúgu'të dza rucubë' Dios le nácatu' lu icja lãdxi'do'otu'.

¹⁷ Le cuídí'sö riguí' rizáca'ru' ni tu chí'ido'osö run ga gata' queëru' le uzí'da'aru' xibé le sóatica'sö, en le nácatë'rö lesaca' ca gaca gúnbë'ëru'.

¹⁸ Biti' ruí' lãdxi'ru' le rilé'ëru' luyú ni, pero le biti' gaca ilé'ëru' ruí' lãdxi'ru'. Lë na' rilé'ëru', tu chí'ido'osö zoa, pero le cabí gaca ilé'ëru' sóatica'sö.

5

¹ Nöziru' cate' initi idütë le naca cázaru', le naca ca tu yu'u lári'do' yödzölió ni, Dios chinupë'ë tu le cubi queëru', le naca ca tu yu'u le zoa tsaz ni' yehua' yubá, lë na' nun cazë' Lë'.

² Que lë ni na' rinnë lãdxi'ru' tu' ré'ëni'ru' tsú'uru' le cubi ni', lë na' naca ca tu lidxiru' ni' yehua' yubá.

³ Tsú'uru' le cubi ni' ca na' rácuru' tu lari', para cabí sóaru' ga biti' zoa idütë le naca cázaru'.

⁴ Tsanni ni zóaru' lu idütë le naca cázaru', le naca ca tu yu'u lári'do', rinnë lãdxi'ru' lu yöl-la' risëbi lãdxi' queëru'. Biti' runru' caní tu' ré'ëni'ru' ucá'anaru' idütë le naca cázaru', pero ré'ëni'ru' tsú'uru' tsaz le cubi ni'. Caní gaca, ucá'anaru' idütë le naca cázaru' le riniti, ate' tsú'uru' lu yöl-la' na'bán idú.

⁵ Dios chinupë'ë yúgu'të lë ni queëru', ate' guchízië' rë'u Dios Bö' Lá'ayi, Nu naca queëru' le naca bë' naca löza sí'iru' lë na' nupë'ë queëru'.

⁶ Que lë ni na' nadipa lãdxi'ru'. Tsanni ni yú'uru' lu le naca cázaru', nöziru' zóaru' zi'tu' ga zoa lidxë' Xanru'.

⁷ Runru' ca runru' tu' réajlë'ëru'-në' Dios, en calëga tu' zoa bi rilé'ëru'.

⁸ Tu' runru' löza lë ni, ré'ëni'ru' ucá'anaru' le naca cázaru' ni para tsöjsóalenru'-në' Xanru'.

⁹ Que lë ni na' ruí' lãdxi'ru' gunru' le raza lãdxë'ë Xanru', channö ugá'anaru' lu idütë le naca cázaru' ni, o channö tsöjsóalenru'-në' Xanru' ni'.

¹⁰ Caní runru' tu' run bayudxi idxinru' yúgu'tëru' lahuë' Cristo ga ni' rö'ë ruchí'a rusöröë'. Ní'irö ubi'ë que queëru' tsca naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

Le ruín rë'u tuz len Dios

¹¹ Que lë ni na', tu' rádxitu'-në' Dios, ruí' lãdxi'tu' uzéajni'itu' bönachi. Nözinë' Dios ca naca le yu'u icja lãdxi'do'otu', ate' ruzxöni lãdxa'a nözili' dxi'a ca' libí'ili' lë na' yu'u icja lãdxi'do'otu'.

¹² Biti' rubéaj cuintu' dxi'a loli'. Ré'ëni'ru' gata' lataj queëli' gunli' netu' bal, para gaca ubí'ili' didza', bi guiëli' yugu' bönni' tun ba zxön cuíngaquië' ca na' tu'luf'isö lahui cuíngaquië', en calëga ca nácaquië' lu icja lãdxi'do'gaquië'.

¹³ Channö nachixi ícjatú, naca para gaca yöl-la' ba queë' Dios, en channö cabí nachixi ícjatú, naca para gaca bi uzí'ili' xibé.

14 Run bayudxi bi guntu' tu' nadxí'iné' Cristo rē'u, tu' chinōziru' tuz Nu guti uláz quegaca yúgu'tē bōnachi, en que lē ni na' naca quegaca yúgu'tē bōnachi tsca nátilengaca Lē' tsōzōn.

15 Lē' gútiē' uláz quegaca yúgu'tē bōnachi para cabirō ilunē' bōnni' nabāngaquiē' le nequi quegacasē', pero le nequi que Nu na' guti uláz quegaquiē', en bubán lu yōl-la' guti.

16 Que lē ni na', bítirō gúnbē'ētu' bōnachi tsca naca le nalá'gaca láhui'lō, en sal-la' canísō bēnbē'ētu'-nē' Cristo, biti' núnbē'ētu'-nē' caní na'a.

17 Channō nuhuōaca nūti'tēs bōnachi tuz len Cristo, chinaca bōnachi cubi nu na'. Chigudōdi que le gulaca zí'alō, ate' chinucúbigaca yúgu'tē.

18 Yúgu'tē lē ni nunē' Dios, Nu bun rē'u tuz len Lē' lu nē'ē Cristo, en budōdē' lu na'tu' guntu' libán ca gaca ulu'huōaca yúgu'tē bōnachi tuz len Lē'.

19 Libán runtu' rRNA caní: "Dios guzóalenē' Cristo, en benē' ga gaca ulu'huōaca bōnachi yōdzōlió ni tuz len Lē', en biti' rōjnenē' dul-la' gula'baga'." Budōdē' lu na'tu' didza' dxi'a ni, ca gaca ulu'huōaca bōnachi tuz len Dios.

20 Na'a, nácatu' gubáz queē' Cristo, en raca na'a ca Dios caz ráta'yue' loli' lu rú'atu' netu'. Que lē ni na' ráta'yutu' loli' uláz queē' Cristo, guli'huōaca tuz len Dios.

21 Cristo biti' bi dul-la' benē', pero Dios budōdē' Lē' ca tu bōnni' dul-la' uláz queēru', para gata' queēru' lataj gácaru' tsahui' ca náquiē' Dios caz tu' nácaru' tuz len Cristo.

6

1 Tu' runtu' dxin tsōzōn len Dios, ráta'yutu' loli', rnnatu': Biti' udōdili' cá'asō le ruzá' lādxē'ē Dios queēli'.

2 Nazúaj lu guichi lá'ayi ca gunnē' Dios le rRNA:

Tu dza buzá' lādxa'a quiu', biyōnda' li',
ate' dza bena' ga gaca uló', gúcalena' li'.

¡Buli'yútsōca! ¡Na'a naca dza ruzá' lādxē'ē queēru'! ¡Na'a naca dza gaca uláru'!

3 Biti' rē'ēnitu' bi guntu' le gun ga nu ichixi inigui, para cabí soa nu ucá'ana cá'asō dxin ni runtu'.

4 Ni'a que bítitēs bi runtu', ru'i lādxí'tu' gaca bē' nácatu' huen dxin queē' Dios. Que lē ni na', len yōl-la' ribōza zxōn ladxi' ruá' rilentu' yugu' le riguí' rizáca'tu', en yugu' le riyadzaj queētu', en yugu' le tun ga rō'ōtu' bōniga.

5 Caní bentu' sal-la' gula'zé'ede'e bōnachi netu' yu, en gula'gu'ē netu' lidxi guíē, en gula'bía di'i netu'. Gudōdi bē' bentu' dxin, en biti' guta' lataj queētu' gásitu' o bi gágutu'.

6 Bē' lādxí'tu' gaca bē' nácatu' huen dxin queē' Dios. Guca bē' lē ni:

Tu' nácatu' ba'a ladxi', en tu' nápatu' yōl-la' réajni'i,
en tu' ribōztu' zxōn ladxi', en tu' nácatu' dxi'i ladxi',
en tu' zóalenē' Dios Bō' Lá'ayi netu',
en tu' naca idú ca nadxí'itu' luzá'atu'.

7 Ruf'itu' didza' idútē li, ate' zóalen netu' yōl-la' huáca queē' Dios. Le naca tsahui' naca ca tu le rudí'initu' lu gudil-la, enca' le run chi'i netu' lu gudil-la na'.

8 Nacuá' nupa tun netu' bal, enca' nupa tu'zóa netu' tsólá'alō.

Nacuá' nupa tu'lidza ditaj netu', enca' nupa tu'lidza tsahui' netu'.

Sal-la' ta'nná bōnachi rizi' yē'ētu', ru'itu' didza' idútē li.

9 Sal-la' nacua' bōnachi bití' núnbē'gaquiē' netu',

nacuá' ca' nupa núnbë'gaca netu'.

Ridatu' ga zoa bönadxi gátitu', pero ni zóatu' nabantu'.

Tunë netu' xíguia', pero biti' tutië' netu'.

¹⁰ Tu'suhuí'ini netu', pero rudzëjatca'stu'.

Nácatu' bönni' yechi', pero runtu' ga rata' yöl-la' tsahui' idú quégaca bönachi zían.

Sal-la' biti' bi dë queëtu', nequi queëtu' yúgu'të le dë.

¹¹ Idú ládxi'tu' ruí'ilentu' libí'ili' didza', böchi' luzá'ado', zóali' Corinto. Buluí'itu' libí'ili' ca ruí' ládxi'da'tu' libí'ili'.

¹² Channö cabí nácaru' tuz biti' naca tu' cabí ruí' ládxi'tu' libí'ili', pero libí'i cázali' biti' ruí' ládxi'li' netu'.

¹³ Na'a, ruí'ílena' libí'ili' didza' ca runë' tu bönni' ruí'ílenë'-bi' zxi'inë' didza', rnní'a': Bulí'bí'i queëtu' ca rúnlentu' libí'ili'. Guli'güí' ládxi' netu'.

Nácaru' ca tu yudo' ga yu'ë Dios ban

¹⁴ Biti' gácali' tuz len bönachi biti' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

¹⁵ ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

¹⁶ ¿Nacxi gácatsö ilaca tuz yudo' queë' Dios, en budó' guióy budó' yaga?

Libí'i cázali' nácali' ca tu yudo' ga yu'ë Dios ban. Ca naca lë ni, Dios caz gunnë':

Sóalena' légaquië', en tálena' légaquië'.

Gaca' Dios quégaquië', ate' légaquië' iláquië' bönachi quia'.

¹⁷ Que lë ni na', gunnë' ca' caní:

Guli'rúaj ládjagaquië', en bulí'lá'alén légaquië'.

Rnnë' Xanru': "Biti' gútsa'li' le ruá' dö', ate' si' lu na'a libí'ili'.

¹⁸ Neda' gaca' xuz cázali', ate' libí'ili' gácali' zxi'ina', bönni', en nigula."

Caní rnnë' Xanru', Nu napa caz idútë yöl-la' huáca.

7

¹ Böchi' luzá'ado', néquiguequi queëru' yugu' lë ni guzxi' lu në'ë Dios. Que lë ni na' ral-la' un cuinru' dxi'a, en ubéajru' yúgu'të le rucá'ana cá'asö idútë le naca cázaru', en bö' naca cázaru'. Lu yöl-la' radxi queëru' Dios ral-la' guéquiru' quez queë' Lë'.

Ca bulu'bí'i ládxi'gaca nupa ta'yéajlë' Cristo

² Guli'sí' lu ná'ali' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guzxi' yé'etu'.

³ Ruá'a caní didza', calëga para usubága'a libí'ili' xíguia', pero naca ca na' chigunní'a' zí'alö, rnní'a': Zoa' sina' ibánlena' libí'ili' o gátilena' libí'ili' tu' ruí' ládxa'a libí'ili'.

⁴ Ruzxónida' ládxa'a libí'ili', en rúnda'a libí'ili' zxon. Sal-la' zían le riguí' rizáca'tu', nadípada' ládxa'a, en rudzëjade'e ládxa'a.

⁵ Cate' bidxintu' luyú Macedonia, ga ridxintë na'a dza, biti' rata' queëtu' lataj uzí' ládxi'tu', pero zían le taca queëtu'. Ta'díl-lalen bönachi netu', ate' lu icja ládxi'do'otu' yú'ugaca le tun ga rádxitu'.

⁶ Ní'irō Dios, Nu rutipa ladxi' nu chizóa gaca chopa ladxi', butipë' lādxi'tu' cate' budxinbi' bi'i Tito ga guzóatu'.

⁷ Biti' gúcasō tu' budxinbi' queētū, pero tu' gudíxjōi'ibi' ca' netu' ca na' libí'ili' butípali' lādxi'bi'. Gudíxjōi'ibi' netu' ca na' rē'ēnide'eli' ulé'eli' neda', en ca na' ruhu'ínili' ni'a que lē na' guca ni', enca' ca ru'í lādxi'li' neda'. Yúgu'tē lē ni ben ga rudzeja lādxa'a.

⁸ Sal-la' le buzúaja' queēli' lu guichi zí'alō ben ga bu'ínili', biti' ruhu'índa' na'a. Zí'alō bu'ínida' cate' gúquibe'eda' ben ga bu'ínili' libí'ili' tu ch'ído',

⁹ pero na'a rudzējada', calēga tu' bu'ínili', pero tu' ben yōl-la' ruhu'íni queēli' na' ga bubí'i lādxi'li'. Dios bugunē' dxin yōl-la' ruhu'íni queēli', para cabí ichixi iníguli' ni'a que le bentu' netu'.

¹⁰ Yōl-la' ruhu'íni na' rugunē' dxin Dios run ga nu ubí'i ladxi' para ulá nu na', ate' que lē ni na' biti' ral-la' hu'íniru' que. Yōl-la' ruhu'íni le naca que yōdzōlió ni run ga ilátigaca bōnachi.

¹¹ Buli'yútsōca' ca bugunē' Dios dxin yōl-la' ruhu'íni queēli' na'.

Ben ga ru'í lādxi'li'-nē' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxi'li'-nē' Dios.

Ben ga bē' lādxi'li' gunli' ca rnna xtídzē'ē Dios.

Ben ga nadxí'ili'-nē' Dios idú lādxi'li'.

Ben ga gú'unili' gunli' xíguia' nu na' ben dul-la'.

Benli' le naca bē' biti' bi dul-la' nabága'li' ni'a que lē na' guca.

¹² Que lē ni na', sal-la' buzúaja' caní lu guichi na', biti' guca ni'a que nu na' ben dul-la', en calēga ni'a que nu na' gudí' guxzaca', pero para gaca bē' lahuē' Dios le nácate ru'í lādxi'li' netu'.

¹³ ¡Lē ni butipa lādxi'tu'! Calēgasō bidipa lādxi'tu', pero rudzējade'e lādxi'tu' tu' rudzējabi' bi'i Tito ni'a que le benli' libí'ili', tu' butípali' lādxi'bi'.

¹⁴ Bena' libí'ili' zxōn lobi' Tito, ate' biti' benli' ga utu'ida'. Bē'lentica'stu' libí'ili' didza' idútē li, ate' lēsca' caní naca idútē li didza' bē'lentu'-bi' Tito cate' bentu' libí'ili' bal.

¹⁵ Zeaj rácarō idú ca nadxí'ibi' bi'i Tito libí'ili' cate' rōjnebi' ca na' benli' ca rnna xtídza'tu', en ca na' benli'-bi' bal lu yōl-la' radxi Dios queēli' en lu yōl-la' nōxaj ladxi' queēli'.

¹⁶ Rudzējade'eda' tu' gaca uzxōni lādxa'a libí'ili' idú lādxa'a.

8

Ca ral-la' unōdzaj nu réajlē' Cristo le dē que

¹ Na'a, bōchi' luzá'ado', rē'ēnitu' guíxjōi'itu' libí'ili' ca naca le buzá' lādxi'ē Dios quegaca yugu' cō' bōnachi queē' Cristo luyú Macedonia.

² Sal-la' yenni' gula'gu'í gula'záquiē' lu yugu' le guzxi' bē' légaquiē', bulu'dzējade'enē', en idú lādxi'gaquiē' bulu'nōdzjadē'ē sal-la' nácagaquiē' bōnachi yechi'.

³ Neda' runa' ba nalí quegaquiē', idú lādxi'gaquiē' bulu'nōdzjadē'ē tsca gula'zéqui'nē', en bulu'nōdzjarē' tsca gula'zéqui'nē'.

⁴ Gula'nábide'enē' netu', en guláta'yudē'ē lotu' gu'í'itu' légaquiē' lataj tsōzxōn len netu' ilácalenē' bōchi'ru' ta'yéajlē'ē Cristo.

⁵ Gulunrē' ca guqui ícjavu' ilunē'. Bulu'dōdi cuíngaquiē' zí'alō lu nē'ē Xanru', enca' lu na'tu' netu', le naca le raza lādxi'ē Dios.

⁶ Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runödzejali' lu yöl-la' dxi'i ladxi' queéli', ca na' gusí lobi' benbi' zí'alö.

⁷ Nácali' lo ca naca yúgu'të le runli',

ca réajlë'ëli' Cristo,

en ca réajni'ili',

en ca ruzéajni'ili' bönachi,

en ca ruí'i ládxi'li' luzá'ali',

enca' ca nadxi'ili' netu'.

Lësca' caní ral-la' gácali' lo ca gácalenli' luzá'ali', lu yöl-la' dxi'i ladxi' queéli' bi unödzejali' quégaquië'.

⁸ Biti' rinná bé'eda' libí'ili' gunli' caní. Ruá'a didza' ca tun ia'zica'rö bönachi, tu'nödzej idú ládxi'gaca, para guna' ga gunli' le gaca bë' naca idú ca nadxi'ili' luzá'ali'.

⁹ Nöz quézili' le buzá' ládxe'ë Xanru' Jesucristo queëru'.

Bilé'enë' yöl-la' tsahui'

pero para gácalenë' libí'ili'

böáquië' yechi'

para gata' queéli' yöl-la' tsahui',

tu' gúquië' Lë' yechi'.

¹⁰ Caní runi neda': Dxi'arö gaca queéli' údxi gunli' lë na' gusí loli' runli' chiguca tu iz. Gúcali' lo, calégasö ca bunödzejali', pero lësca' ca gú'unili' unödzejali'.

¹¹ Na'a, idú ládxi'li' buli'siyudxi gunli' lë na' gusí loli' runli', idú ládxi'li' bunödzejali'. Buli'nödzej na'a tsca séqui'li'.

¹² Channö rë'enili' bi unödzejali', Dios runë' bal le runödzejali' tsca naca le dësö queéli'. Biti' rinabë' unödzejari'li' tsca le dësö queéli'.

¹³ Biti' rë'enda' guna' ga unödzejali' le gácalen ia'zica'rö bönachi ga idxintë yadzaj queéli'.

¹⁴ Rë'enda' gaca tuz ca dë queéli', en quégaquië'. Na'a dëda' queéli' le gaca unödzejali' para bi gata' quégaca nupa ni' riyadzaj quégaqui. Ní'irö cate' bi yadzaj queéli', légaquië' huáca bi ulu'nödzejë' queéli' para caní gaca tuz ca dë queéli', en quégaquië' yúgu'tëli'.

¹⁵ Lësca' caní nazúaj lu guichi lá'ayi le rnna: "Nu na' butúbida', biti' bugá'ana que, ate' nu na' butubi láti'do'os, biti' biyadzaj que."

Ca runbi' bi'i Tito, enca' nupa dzágagaca lëbi'

¹⁶ ¡Xclenë' Dios, tu' benë' Lë' ga ruí'i ládxi'bi' bi'i Tito libí'ili', ca na' ruí'i ládxa'a neda' libí'ili'!

¹⁷ Calégasö runbi' ca rnna xtídza'a bi rinábida'-bi', pero tu' ruí'i ladxi' cázabi libí'ili', rácasö queëbi' gú'unibi' tsöyubi' libí'ili'.

¹⁸ Risöl-la'tu'-në' tsözxön len lëbi' böchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a.

¹⁹ Ia'stú, gula'bó yugu' cö' bönachi queë' Cristo bönni' ni, para tséajlenë' tsözxön netu' guá'atu' lë na' runödzejali', para gaca yöl-la' ba queë' Xanru', en gaca bë' ca' ruí'i ládxi'ru' luzá'aru' ta'yéajlë'ë Cristo.

²⁰ Caní gaca, gunë' netu' tsözxön para cuntú nu bi gaca innë queëtu', ca rúnlentu' dumí na' runödzejada'ali', le gácalen bönachi yechi'.

²¹ Ruí'i ládxi'tu' guntu' le naca dxi'a, calégasö lahuë' Xanru', pero lësca' lógaca bönachi.

²² Risól-la'tu'-në' ca' ia'túë' böchi'ru' tsözxön len légaquië', ate' zián luzuí guzxi' bë'ëtu' lë', ate' naca bë' rë'ënë' gácalenë' rë'u idú ládxë'ë. Ia'stú, tu' ruzxöni ládxë'ë libí'ili', rë'ënitë'rönë' ca' gácalenë' rë'u lu dxin ni.

²³ Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxön dxin para gácalentu' libí'ili'. Channö nu bi inaba ca nácagaquië' ia'zica'rë' böchi'ru' na', nasól-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo.

²⁴ Guli'gún ga gaca bë' nadxi'ili' légaquië' para iléquite'e yugu' cö' bönachi queë' Cristo runlí' caní, en ila'nözi naca iduté li didza' dxi'a ru'itu' ca naca queëli'.

9

Ca naca dumí rutúbiru' le gácalen yugu' böchi'ru'

¹ Ca naca le runödzejali' quégaquië' böchi'ru' ta'yéajlë'ë Cristo, biti' run bayudxi uzúaja' queëli' lu guichi ni.

² Chinözda' ca rë'ënili' gunlí' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runlí'. Riguíxjöi'ida' légaquië' ca naca queëli', zóali' luyú Acaya, chiguca tu iz chizóa gunlí' lë ni, ate' tu' ru'i ládxí'li' gunlí' lë ni, bidipa ládxí'gaca lá'tu'biqui' yúgu'të bönachi ni ta'yéajlë' Cristo.

³ Na'a, risól-la'a yugu' böchi'ru' ni queëli' para gaca bë' naca iduté li didza' ru'itu' ca naca queëli', ate' naca ca na' chigunnía' queëli', chizóa gunlí' lë na' gácalen yugu' luzá'aru'.

⁴ Channö ila'zá'alen bal-la bönachi Macedonia ta'yéajlë' Cristo neda' tsözxön, ate' gaca bë' biti' zuíni gunlí' lë na', ní'rö utuí'itu' tu' buzxöni ládxí'tu' libí'ili', ate' libí'i cázali' ca' ral-la' utuí'ili'.

⁵ Que lë ni na' gúquida' ral-la' isól-la'a yugu' böchi'ru' ni para ila'dxinë' ga zóali' zí'aló ca neda', ate' ilácalenë' libí'ili' para udxi utúbili' lë na' guzxi' lu ná'ali' unödzejali'. Caní gaca, údxi utúbili' dumí na' zí'aló ca idxina', ate' gaca bë' runödzejali' tu' rë'ëni cázali', en calëga tu' rinná bé'etu' libí'ili' bi unödzejali'.

⁶ Guli'tsöjné lë na' rnna:

Nu raza ruzóa láti'do'os, láti'do'os ca' uzí'.

Nu raza ruzóa sizxöni, sizxöni ca' uzí'.

⁷ Tu tuli' ral-la' unödzejali' tscá na' chinuzóali' icja ládxí'do'oli', en calëga lu yöl-la' ruhu'i'ini queëli' o tu' run bayudxi, tu' nadxi'inë' Dios nu runödzejali' idú ladxi'.

⁸ Dios gaca gúnnadë'ë queëli' ca riquínili' para gata' queëli' yúgu'të lë na' riquínili', ate' ugá'ana queëli' para gaca gácalenli' nu bi riyadzaj que.

⁹ Lësca' caní nazúaj lu guichi lá'ayi le rnna:

Idú ládxë'ë bunödzejë' quégaca bönachi yechi'.

Naca bë'tica'sö yöl-la' dxi'i ladxi' queë'.

¹⁰ Dios, Nu runna queëru' bi gaz uzóaru', enca' bi gu'aj gáguru', gunnë' ca' queëli' bi unödzejali', le naca ca lë na' nu raza ruzóa, en gunë' ca' ga ila'yán le ilápalí' le nácagaca yugu' le dxi'a runlí'.

¹¹ Dios gunë' ga gáta'da' queëli' yöl-la' tsahui' para gaca unödzejada'ali'. Caní gaca, yugu' le unödzejali', lë na' quísitu' uláz queëli', gun ga ila'nná bönachi zián: "Xclenë' Dios."

¹² Lë na' runödzejali' le gácalen yugu' böchi'ru', calëgasö gü'i quégaquië' le ta'yádzjanë', pero gun ga ila'nnë': "Xclenë' Dios."

13 Cate' gunli' caní, ila'gu'ë Dios yöl-la' ba tu' gaca bē' runli' ca rna didza' dxi'a queē' Cristo ca na' rnnali' runli'. Ila'gu'ë Lē' yöl-la' ba ca', tu' nácali' dxi'i ladxí', runödžali' queégaquiē', enca' queégaca ia' zíca'rō bōnachi.

14 Ulu'lidzē' Dios, en ila'nábinē' Lē' gácalenē' libí'ili' tu' nadxí'igüequinē' libí'ili' ni'a que le buzá' ladxí'dē'ë Dios queéli'.

15 ¡Xclenē' Dios, bennē' tu le nácada' lesaca' queéli'!

10

Yöl-la' unná bē' dē lu nē'ë Pablo

1 Ta'nná bōnachi naca' nōxaj ladxí' cate' zóalena' libí'ili', pero cate' zoa' zī'tu' ga zóali' naca' rugu ladxí' ca ruzúaja' lu guichi. Tu' náquiē' nōxaj ladxí', en dxi'i ladxí' Cristo, neda', Pablo, ráta'yua' lolí'

2 cabí gunli' ga gun bayudxi gaca' rugu ladxí' len libí'ili' cate' idxina' ga zóali'. Chizóa gaca' rugu ladxí' len nupa ni' ta'nná runtu' dxin ni lu yöl-la' bōnáchisō queétu'.

3 Le nácate' nácatu' bōnachi, pero calēga rásasō queétu' runtu' xichinē' Dios.

4 Yugu' le rudí'initu' lu gudil-la, biti' nácagaca ca le tu'dí'ini bōnachi yōdzōlió ni lu gudil-la, pero yugu' le rudí'initu' lu gudil-la nápagaca yöl-la' huáca queē' Dios, le ruguntu' dxin para usunítitu' le nál-lagaca que tu' xihui'.

5 Rusunítitu' yugu' didza' biti' nácate' le tu'zxōni ladxí'gaca bōnachi, en yúgu'tē le tun ga tun ba zxōn cuínguequi, en le tun ga cabí ilunbē' Dios. Runtu' ga gaca ila'nná bé'enē' yúgu'tē le ta'zá' ladxí'gaquiē', lē na' tun ga ta'dá'baguē'ë Dios, ate' runtu' ca' ga tunē' ca rnnē' Cristo.

6 Tōdi gunli' le gaca bē' naca idú ca runli' ca rna xtídzē'ë Cristo, sóatu' sina' guntu' xigüia' yúgu'tē nupa ni' ta'dá'baga' xtídzē'ë.

7 Ruyuli' le nalá' lálhuisō. Channō réquinē' nu bōnni' dzáguiē' libí'ili' néquinē' queē' Cristo, ral-la' guéqui'be'enē' ca' lē ni: Ca na' lē' néquinē' queē' Cristo, lē'sca' caní netu' néquitu' queē' Cristo.

8 Biti' ca' rutuí'ida' sal-la' gudōdi bē' ben ba zxōn cuina' ca naca yöl-la' unná bē' budōdē' Xanru' lu na'tu'. Lē na' dē lu na'tu' naca para guntu' ga gácarō idú ca réajlē'ëli' Cristo, en calēga para usunítitu' libí'ili'.

9 Biti' rē'ēnda' guéquili' rē'ēnda' gun gádxida' libí'ili' ni'a que le ruzúaja' queéli' lu guichi ni.

10 Nacuá' ni' nupa ila'nná: "Yugu' le ruzúajē' Pablo queēru' lu guichi, rulidza zi'ë rē'u, en ralē' didza', pero cate' zóalenē' rē'u runē' nōxaj ladxí', en didza' gúlado ru'ë."

11 Nu na' ruí' caní didza' ral-la' guéqui'be'e lē ni: Ca na' nácatu' cate' bi ruzúajtu' queéli' lu guichi tsanni ni zóatu' zī'tu' ga zóali', gácatu' ca' lu le guntu' cate' ni' sóalentu' libí'ili'.

12 Le nácate' biti' nácatu' rugu ladxí' para innatu' nácatu' lēbi ca nácagaca nupa ni' tun ba zxōn cuínguequi. Nácagaca nupa ni' yugu' bōnni' biti' bi nōzguequinē'. Lu le ta'za'sō ladxí'gaquiē' tu'zōē' ca ral-la' ilaca bōnachi, en tu'chí'a tu'sörōē' la' lēgacasē' tsca naca lē na' ta'za'sō ladxí'gaquiē'.

13 Netu' biti' gunrō ba zxōn cuintu' ca ral-la' guntu', pero ca nácate' dxin budōdē' Dios lu na'tu', ate' lu dxin ni, ral-la' guntu' le ga ni' zóali' libí'ili'.

14 Channō budōdē' Dios lu na'tu' dxin guntu' ga zóali', biti' ca' gudōdi bē'ëtu' ca bentu' cate' bidxintu' ga zóali', en bentu' libán que didza' dxi'a ga na' zóali'.

15 Biti' run ba zxōn cuintu' ca naca dxin nūngaca ia'zíca'rō bōnachi, pero ca nácasō dxin na' budōdē' Dios lu na'tu'. Runtu' lōza gácarō idú ca réajlē'ëli'

Cristo para gaca guntu' dxin ga zóali' le nácarö lesaca', tsca naca le budödë' Dios lu na'tu' guntu'.

¹⁶ Ní'irö gaca guntu' libán que didza' dxi'a ga nacua' yödzö dzö'ö zí'tu'rö ga zóali'. Caní gaca, bití' gun bayudxi gun ba zxön cuintu' ni'a que dxin núngaca ia'zica'rö bönachi, lë na' budödë' Dios lu në'eguequi.

¹⁷ Nazúaj lu guichi lá'ayi le rnna:

Nu rë'ëni bi gun zxön,
le ben cazë' Xanru' ral-la' gun zxön.

¹⁸ Nurúajë' dxi'a tu bönni' cate' rnnë' Xanru' nurúajë' dxi'a, en calëga cate' ru'ë caní didza' bönni' na' que la' cuinsë'.

11

Ca nácaqaquie' Pablo, en bönni' tun cuíngaquie' gubáz queë' Cristo

¹ Rë'ënda' guá' ilenli' neda' tsanni ni gu'a didza' lu yöl-la' bití' bi nözi quia'. Bulí'sá' láchxi'li' quia'.

² Ruí'i láchxa' a libí'ili' ca na' Dios caz ruí'i láchxë'ë libí'ili', tu' nácali' ca nácabí' tubí' bi'i nigula ra'bando', naca idú láchxi'bi', rusudxina'-bi' lahuë' Cristo para utsaga ná'aleni' Lë cazë'.

³ Rádxida' idxín queéli' nu si' ye'e libí'ili', en gun ga usanli' ca nadxi'ili'-në' Cristo idú láchxi'li', ca na' guca queënu Eva, nigula queë' Adán, cate' guzxi' ye'e Satanás tu' xihui' lënu lu yöl-la' sina' que.

⁴ Caní rnniá' tu' idú láchxi'li' ruí'ili' nu za' queéli' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizí' lu ná'ali' tu bö', en tu didza' dxi'a le nadzá'gaca ca náca'gaca Bö' Lá'ayi na', en didza' dxi'a na' guzxi' lu ná'ali' lu na'tu' netu'.

⁵ Réquida' bití' nácara' cuídi'sö ca nácaqaquie' bönni' ni' nácatërögaquie' lo, ate' réquili' nácaqaquie' gubáz queë' Cristo.

⁶ Nadxi ca' naca' cuídi'sö ca ruá'a didza', pero bití' naca' cuídi'sö ca naca yöl-la' réajni'i napa'. Zián luzuí, en zián ca buluí'itu' libí'ili' ca naca yöl-la' réajni'i nápatu'.

⁷ Nadxi ca' bití' naca dxi'a tu le bena', bití' bi buquizxja' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' zxön.

⁸ Buguna' dxin le nequi quéguequi ia'zica'rö cö' bönachi queë' Cristo, tu' guzxi'a dumí bulu'nödzjë' légaquie' quia' para guca bena' dxin ga zóali' libí'ili'.

⁹ Cate' guzóalena' libí'ili', en biyadzaj quia', bití' busaca' zi'a nituli' libí'ili', pero lë na' biyadzaj quia', gulunnë' quia' böchi'ru' bila'rúajë' luyú Macedonia, en bila'dxinë' ga zoa'. Catu caz busaca' zi'a libí'ili', ate' la' lébisö ca guna'.

¹⁰ Ní'a que le naca idütë' li queë' Cristo le zóalen neda', bití' soa' dxisö, gun ba zxön cuina' ca naca lë ni idú luyú Acaya.

¹¹ ¿Naru' réquitseli' rnniá' caní tu' cabí nadxi'ida' libí'ili'? Nözinë' Dios nadxi'ida' libí'ili'.

¹² Gúntica'sa' ca runa' na'a, para cabí gata' quégaquie' lataj ilún ba zxön cuíngaquie' bönni' ni' ta'nnasë' nácaqaquie' gubáz queë' Cristo, en ta'nnë' tunë' xichinë' Lë' ca runtu' netu'.

¹³ Bití' ca' nácaqaquie' gubáz nasöl-lë'ë Cristo. Ta'zí' yë'ë ca naca dxin tunë', en tun cuíngacasë' gubáz queë' Cristo.

¹⁴ Bití' ral-la' ubániru' ca tunë' bönni' na'. Lësca' Satanás caz, tu' xihui', ruluí' cuini ca tu gubáz lá'ayi queë' Dios, ridë' lu bení'.

¹⁵ Que lë ni na' bití' ral-la' ubániru' channö yugu' huen dxin que tu' xihui' na' tu' luí' i cuíngaquië' ca nupa tun xichini Nu na' naca tsahui'. Udxí quegaquië' ca sa'yéaj le tunë'.

Yugu' le gudí' i guzxaqué' ë Pablo

¹⁶ Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'gúí' neda' lataj gu'a didza' ca tu bönni' nachixi icjé', para gun ba zxon cuina' tu chí'ido'.

¹⁷ Didza' ni ruá'a bití' naca le rinná bë'ë Xanru', pero ruá'a didza' ca tu bönni' nachixi icjé', run ba zxon cuina'.

¹⁸ Nacu'ë zían bönni' tun ba zxon cuíngaquië' ca náca gaca le tunë' lu yöl-la' bönáchisö quegaquië'. Que lë ni na', neda' ca' gun ba zxon cuina'.

¹⁹ Tu' réquili' rácada'ali', idú ládxi'li' ruf'ili' lataj ilu'ë didza' yugu' bönni' nachixi ícjagaquië'.

²⁰ Ruí'ili' ca' lataj nu gun libí'ili' bönni' nadó'ogaca, o nu cúa le dë queéli', o nu inná be'e libí'ili', o nu ucá'ana libí'ili' cá'asö, o nu capa' rú'ali'.

²¹ Rutuí'ida' rnniá' lë ni: Biti' bentu' caní queéli' tu' gudödi bë' gúcatu' nöxaj ladxi'.

Channö zoa nu naca rugu ladxi' para gun ba zxon cuini, neda' ca' gaca' rugu ladxi', en gu'a didza' ca tu bönni' nachixi icjé'.

²² ¿Naru' náca gacaquië' bönni' hebreo?

Lësca' naca' neda'.

¿Naru' náca gacaquië' bönni' Israel?

Lësca' naca' neda'.

¿Naru' náca gacaquië' zxi'ini xi'sóe' Abraham?

Lësca' naca' neda'.

²³ ¿Naru' náca gacaquië' huen dxin queë' Cristo?

Lësca' nácatëra' neda'.

(Na'a ruá'a didza' ca tu bönni' nachixi icjé' cate' rnniá' caní.)

Béntëra' dxin ca gulunë' légaquië'.

Guyu'a lidxi guié zíanrö luzuí ca gula'yú'ë légaquië'.

Gula'zé'eda' neda' yu bönachi zíanrö luzuí ca guca quegaquië'.

Guzóa bönadxi gátia' zíanrö luzuí ca guzóa quegaquië'.

²⁴ Gayu' luzuí yugu' bönni' judío gula'guiné' neda' guídi.

Tu tu luzuí na' gula'guiné' neda' chënna uruá' luzuí.

²⁵ Tsonna luzuí gula'guiné' neda' gubá'ayi.

Tu luzuí bulu'ladxë' neda' guiöj.

Tsonna luzuí guzóa' tu lë'e barco le guca ditaj, en bötaj lu nísado'.

Tu luzuí guzóa' idú tu yëla, en tu dza lu nisa que nísado'.

²⁶ Zían luzuí cate' ni' yu'a nöza,

gudöda' gapa guzóa bönadxi quia' yugu' lu yegu,

en gapa guzóa bönadxi quia' lu ná'agaquië' gubán,

en gapa guzóa bönadxi quia' lu ná'agaquië' bönni' uládz quia',

en gapa guzóa bönadxi quia' lu ná'agaquië' bönni' zí'tu',

en gapa guzóa bönadxi quia' lu yödzö,

en gapa guzóa bönadxi quia' lu lataj cá'asö,

en gapa guzóa bönadxi quia' lu nísado',

en gapa guzóa bönadxi quia' lu ná'agaquië' bönni' ta'zí' yë'ë, ta'nnë' náca gacaquië'

bóchi'ru' ta'yéajlë'ë Cristo.

²⁷ Bena' dxin zí'i, en gudú ládxa'a.

Zián luzuí biti' guta' quia' lataj gásia'.
Guduna', en gubidxa' nisa.

Zián luzuí biti' guta' quia' bi gahua', o ga utsë'e cuina', o lari' gácua'.

²⁸ Ia'stú, yúgu'të dza ruúbi ruguf'ida' tu' ruí'ida' ládxa'a yúgu'të cö' bönachi queë' Cristo.

²⁹ Cate' nu ricuidi', neda' ca' ricuídi'da'. Cate' nu run ga ichixi iníguinë' tu böchi'ru', rileda' nu run caní.

³⁰ Channö run bayudxi gun ba zxön cuina', gun ba zxön cuina' ca naca le náacagaca bë' ricuídi'da'.

³¹ ¡Dios, Xuzë' Xanru' Jesucristo, gácativa'sö queë' yöl-la' ba! ¡Lë' nözinë' ruá'a didza' idütë li!

³² Cate' ni' guzóa' lu yödö Damasco, bönni' ni' guta' lu në'ë uláz queë' bönni' rinná bë'ë, lë' Aretas, bucu'ë yugu' bönni' gula'bö' nísie' para ila'zönë' neda',

³³ pero yugu' böchi'ru' ni' bulu'dödë' neda' tu ga ra'a bení' que yu'u, yu'a tu ga'böra zxön, en bulu'zötjë' neda' ní'lö lu zö'ö run chi'i yödö na'. Caní guca, bulá' lu ná'agaquië' bönni' ni' gula'bö' nísie' neda'.

12

Yugu' le buluí'inë' Dios Pablo

¹ Le nácatë biti' ral-la' gun ba zxön cuina'. Sal-la' caní naca, na'a gu'a didza' ca náacagaca le buluí'inë' Xanru' neda', en le buzëajni'inë' neda'.

² Núnbë'a-në' tu bönni' réajlë'ë Cristo, chiguca chidá' iz zoa nu guchë' lë' yehua' yubá. Biti' nözda' channö guyijë' ni' lu idütë le naca cazë', o lu bö' naca cazë'. Tuzë' Dios nözinë'.

³ Nözda' guyázië' lataj lachi queë' Dios, nazí'i le paraíso. Biti' nözda' channö guyijë' ni' lu idütë le naca cazë', o cabí. Tuzë' Dios nözinë'.

⁴ Tsanni ni' zoë' ga na', biyönnë' le tun ga nu rubani, yugu' le biti' dë' lataj nu gú'i didza' que.

⁵ Bönni' ni huáca guna' lë' zxön, pero biti' gun ba zxön cuina'. Tuz gun ba zxön cuina' tu' ricuídi'da'.

⁶ La'tu' guë'énida' gun ba zxön cuina', biti' gaca' bönni' biti' bi nözinë', channö innía' le naca idütë li. Na'a, biti' gun ba zxön cuina' tu' cabí rë'ënda' nu gunrö neda' bal tscá le bilé'e bena' neda', o tscá naca didza' biyöni bë'a neda'.

⁷ Ní'irö, para cabí tödi bë' gun ba zxön cuina' tu' bilé'eda' lë' na' tun ga nu rubani, Dios buzöë' tu huë' lu xipëla'a le riláda' ca rilá ga rinë' tu yötsi'. Huë' na' guca ca tu le bugún dxin tu' xihui', para busaca' zi' neda'. Caní guca quia' para cabí tödi bë' gun ba zxön cuina'.

⁸ Tsonna luzuí gúta' yua' lahuë' Xanru', en gunábida' Lë' ugúë' xihuë'a na'.

⁹ Xanru' gudxë' neda': "Nácatë quiu' le ruzá' ládxa'a quiu'. Uzí'tëru' xibé le ruzá' ládxa'a quiu' cate' ricuídi'nu." Que lë ni na', ruzdëjade'eda' tu' ricuídi'da'. Tu' raca caní quia', rácalentëro yöl-la' huáca queë' Cristo neda'.

¹⁰ Que lë ni na', tu' nadxí'ida'-në' Cristo, ruzdëjada' cate' ricuídi'da', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuídi'da', nápatëro caza' yöl-la' huáca queë' Lë'.

Pablo ruí'i ládxe'ë bönachi queë' Cristo nacué' Corinto

¹¹ Naca' tu bönni' biti' bi nözinë' tu' bë'a didza' ca naca le dxi'a bena' neda'. Libí'i cázali' benli' bayudxi bena' caní. Libí'ili' ral-la' gunli' neda' bal,

ate' sal-la' biti' bi naca' neda', biti' ca' nácara' cuidi' ca nácagaquië' bönni' ni nácada'gaquië' lo, ta'nñë' nácagaquië' gubáz queë' Cristo.

¹² Yugu' le bena' lu yöl-la' riböza zxön ladxí' quia' ga ni' zóali' nácagaca bë' naca' gubáz queë' Cristo. Bilé'eli' yugu' le bena', le nácagaca bë', en le tun ga nu rubani, en yugu' yöl-la' huáca zxön que yehua' yubá.

¹³ Tuz le cabí bena' ga zóali' le bena' ga nacua' ia'zíca'rö cö' bönnachi queë' Cristo. Biti' busaca' zi'a libí'ili' bi gúnnali' le gu'aj gahua'. Buli'niti lo neda' tu cabí bena' caní queëli'.

¹⁴ Chizóa guída' ga zóali' le bunni luzuí. Biti' bi inaba' gúnnali' quia'. Ré'ënda' gunna cuin cázali' quia', en calëga bi dë queëli'. Yugu' bi'i huë'ënido', biti' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' xzi'inigaquië'.

¹⁵ Idú ládxa'a utóa' yúgu'të le dë quia', en udödi cuina' ni'a queëli' para gaca bi uzi'ili' xibé, sal-la' réquida' cate' nadxí'iröda' libí'ili', zeaj ruhuéchi' yöl-la' nadxí'i queëli' neda'.

¹⁶ Nöz quézili' biti' busaca' zi'a libí'ili'. Na'a, bál-lali' innali' guca' sina', ate' len didza' biti' nácate' buzi'a xibali'.

¹⁷ ¿Naru' réquitseli' guzxi' yé'eda' libí'ili' cate' gusól-la'a yugu' gubáz quia' ga zóali'?

¹⁸ Gúta'yua' lobi' bi'i Tito tséajbi' ga zóali', ate' gusól-la'a-në' böchi'ru' na' tsözxön len lébi'. ¿Naru' réquitseli' buzí'ibi' xibali' bi'i Tito? ¿Naru' cabí bentu' la' lébisö ca runtu' bi'i Tito, en neda', enca' la' lébisö didza' bé'ëtu'?

¹⁹ ¿Naru' réquitseli' rubéaj cuintu' dxi'a loli' libí'ili'? Lahuë' Dios ru'itu' didza' uláz queë' Cristo, böchi' luzá'ado', ate' yúgu'të le runtu' nácagaca para gácarö idú yöl-la' réajlë' queëli' Cristo.

²⁰ Rádxida' biti' gácali' ca ré'ënda' gácali' cate' guída' ga zóali', ate' neda' biti' gaca' ca ré'ënili' libí'ili' gaca'. Rádxida' ridil-la' dídza'li', en ruzxé'eli' luzá'ali', en rileli' luzá'ali', en rulidza dítjali' luzá'ali', en rnnëli' que luzá'ali', en run ba zxön cuinli', en rutsátsali'.

²¹ Cate' guída' ga zóali', channö caní raca queëli', rádxida' gunë' Dios ga utuí'ida' ca naca queëli', ate' gun bayudxi cödx'a ni'a quégaca zían nupa ni' gulún dul-la', en biti' bulu'bí'i ládxi'gaca ca nácagaca le cabí naca tshui' gulungaca, en yugu' le gula'zé ládxi'guequi le cabí naca dxi'a.

13

Pablo ruzéajni'inë' bönnachi Corinto, en rugapë' Dios légaquië'

¹ Le bunni luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopa tsonna nupa ilún ba nalí channö nu bi uzegui luzé'e didza'."

² Chibuzéajni'ida' nupa gulún dul-la' cate' ni' guzóalena' libí'ili' le buropi luzuí, ate' na'a ruzéajni'ida' légaquië' leyúbölö, enca' yúgu'të nupa tun dul-la', sal-la' ni zoa' zi'tu', rnní'a: Channö guída' ga zóali' leyúbölö biti' gaca' nöxaj ladxí' para til-la' légaquië'.

³ Rinábali' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Biti' ca' ricuídi'në' Cristo cate' bi runë' queëli', pero lu yöl-la' huáca zxön queë' runë' bi runë' queëli'.

⁴ Le nácate' gudë'ë lë'e yaga cruz ca nu ricuídi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuídi'tu' tsözxön len Lë', pero tu' nácatu'

tuz len Lè' nabantu', ate' zóalen netu' yöl-la' huáca queë' Dios bi guntu' ga ni' zóali'.

⁵ Buli'yú cuinli' channö réajlè'èli' Cristo o cabí. Guli'sí' bē' la' cuínsili'. ¿Naru' cabí nözili' zóalenē Jesucristo libí'ili' channö le nácatē réajlè'èli' Lè'?

⁶ Runtu' löza chinöz quézili' le nácatē netu' réajlè'ètu' Cristo.

⁷ Rulídzatu'-nē' Dios rinábitu'-nē' gácalenē libí'ili', para cabí guá'ali' dö', calēga para urúajtu' dxi'a netu', pero para gunli' libí'ili' le naca tsahui' sal-la' guéquili' richixi riníguitu' netu'.

⁸ Biti' ca' gaca tá'baga'tu' le naca idútē li, pero gácasö guntu' ca sa'yéaj le naca idútē li.

⁹ Que lē ni na' rudzėjatu' cate' ricuídítu', ate' libí'ili' ridipa ládxi'li'. Rulídzatica'stu'-nē' Dios, rinábitu'-nē' gunē' ga gaca idú ca réajlè'èli' Cristo.

¹⁰ Que lē ni na' ruzúaja' queéli' lu guichi lē ni tsanni ni zoa' zi'tu' ga zóali'. Ní'irö cate' guída' ga zóali' bití' gun bayudxi usaca' zi'a libí'ili', pero uguna' dxin yöl-la' unná bē' nudödē' Xanru' lu na'a, le naca para utipa' ládxi'li', en calēga para usunítia' libí'ili'.

¹¹ Na'a, böchi' luzá'ado', dipa ládxi'li'.

Guli'güf' ládxi'li' gaca idú ca réajlè'èli' Cristo.

Guli'güf' ládxi'li' ca' lē ni rea' libí'ili'.

Guli'gaca tuz len luzá'ali', en guli'cöza dxi'ado'.

Rinábida'-nē' Dios sóalenē' libí'ili'.

Lē' nadxí'inē' rē'u, en runē' ga ribözaru' dxi'ado'.

¹² Guli'gapa Dios luzá'ali', tuli' ia'tuli', en unída'li' luzá'ali'.

¹³ Yúgu'tē böchi' luzá'aru' ni tu'gapē' Dios libí'ili'.

¹⁴ Rinábida'-nē' Dios gunē' ga gata' queéli' yúgu'tēli' le ruzá' ládxi'è' Xanru' Jesucristo queēru', en idxí'inē' ca' libí'ili', en gunē' ga gácali' tuz len Dios Bö' Lá'ayi. ¡Ca' gaca!

DIDZA' GUSÖL-LË'Ë PABLO LUYÚ GALACIA

Ruzúajë' Pablo quegaca bönachi luyú Galacia

¹ Neda', Pablo, naca' gubáz queë' Cristo. Biti' gula'söl-la' bönachi neda'. Jesucristo caz gusöl-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti.

² Ruzúaja' queëli' lu guichi ni, libí'ili', yugu' cö' bönachi tu'dubi queë' Cristo luyú Galacia. Núnagaquie' yugu' böchi'ru' ni tu zxön neda'.

³ Rinábida' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

⁴ Jesucristo caz budödi cuinë' lu yöl-la' guti tu' nözi dul-la' nabága'ru' para busölë' rë'u lu le naxihui' raca dza ni zóaru' na'a. Benë' caní tu' naca ca rë'ëni quézinë' Xúziru' Dios.

⁵ ¡Gácatica'sö queë' Dios yöl-la' ba! ¡Ca' caz!

Tuz naca le rinnë dxi'a queë' Jesucristo

⁶ Rubánide'eda' ca runli', rucá'anatëli' Dios. Lë' bulidzë' libí'ili' para guéquili' queë' tu' nözi le ruzá' ládxë'ë Jesucristo queëru', ate' na'a rë'ënilí' si' ládxi' ná'ali' tu le rinnë dxi'a izá'a.

⁷ Le nácatë bití' ca' zoa ia'tú le rinnë dxi'a pero ruá'a caní didza' tu' nacu'ë bönni' tu'tsë'ë libí'ili', en té'ënë' ulu'tsë'ë le rinnë dxi'a queë' Cristo.

⁸ Channö zoa nu gun ba nalí que tu le rinnë dxi'a le cabí naca tuz ca naca lë na' bentu' ba nalí que loli' libí'ili', rinábida'-në' Dios udxíë' dö' nu na' run caní. Ral-la' udxíë' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíë' ca' lë' dö'.

⁹ Chigunná caza' caní zí'alö, ate' na'a rnní'a' caní leyúbölö: Channö zoa nu gun ba nalí que tu le rinnë dxi'a le cabí naca tuz ca naca lë na' chiguzxí' ladxi' ná'ali', rinábida'-në' Dios udxíë' dö' nu na'.

¹⁰ ¿Réquitseli' rë'ënda' cú'uli' neda' yöl-la' zxön cate' ru'a caní didza'? ¡Biti' ca'! Rë'ënda' urúaja' tshahui' lahuë' Dios. ¿Réquili' rë'ënda' uzaca' baládxí'lengaca bönachi neda'? La'tu' rë'ënda' uzaca' baládxí'lengaca bönachi neda', bití' gaca' huen dxin queë' Cristo.

Naca böáquie' Pablo bönni' gubáz queë' Cristo

¹¹ Ral-la' inözili' lë ni, böchi' zána'do'. Le rinnë dxi'a na' runa' ba nalí que bití' gulén icja lo ládxi'da'ahuiguequi bönachi.

¹² Cuntu nu bönni' budödë' lu na'a le rinnë dxi'a na', en calëga nu bönni' busédimë' neda' le. Jesucristo caz buzéajni'inë' neda' ca naca le rinnë dxi'a queë'.

¹³ Chibiyön quézili' ca na' ben caza' neda' zí'atëlö cate' ni' nazí' lu na'a ca tequi le bach Dios bönni' judío. Nözili' ca bena', yenni' gudxía nahua' bönachi queë' Dios ta'yija ladxi' Cristo, en gú'unda' usulu usunítia' léguequi.

¹⁴ Lu le tequi le bach Dios bönni' judío, guyëpisëtëra' neda' ca lá'tu'biqui' yúgu'të luzá'a bönni' judío yú'ugaquie' iz ca yu'a neda', tu' guzxi'rö ladxi' na'a ca léguequi le bulu'dödë' xuz xtó'oru' loru' ca tun cazë'.

¹⁵ Caní bena' neda', pero tu' náquie' dxi'i ladxi' Dios, gurö cazë' neda' zí'atëlö ca gulja', ate' bulidzë' neda' para guna' xichinë'.

¹⁶ Ní'irö, cate' gú'uni quezínë' Dios, benë' ga núbë'a-në' xzí'inë', en gusöl-lë'ë neda' tsöjena' libán que le rinnë dxi'a ca naca queë' Lë' lógaca bönachi izá'a. Cate' benë' caní, bití' yödilja' nu naca bönachi nu usedi neda'.

¹⁷ Cabí guyija' yödzo Jerusalén para tsöyúa' nupa ni' nácagaca bönni' gubáz queë' Cristo zí'alö ca neda', pero guyija' luyú Arabia, ate' gudödi ni' böja' yödzo Damasco.

¹⁸ Caní guca, chigudödi tsonna iz cate' ni' guyija' yödzö Jerusalén, yöyúa'-në' Pedro, ate' bugá'analena' lë' idú ca chidá' gubidza.

¹⁹ Tsanni ni' zoa' ni' bití' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' böchë'ë Xanru' bilé'eda'.

²⁰ Didza' ni' ruzúaja' queëli' lu guichi nácatë. Ni'a queë' Dios bití' ca' rizí' yë'a.

²¹ Gudödi ni' guyija', gudöda' yugu' yödz luyú Siria, en luyú Cilicia.

²² Yugu' dza ni' bití' núbë'gaquië' neda' böchi'ru' tu'dubë' queë' Cristo gapa naca luyú Judea.

²³ Gula'nözisinë' lë na' gúla'guixjö' quia' ia'zíca'rö bönachi, gula'nná: "Bönni' na' gudxía nahuë' rë'u zí'alö, runë' libán na'a que le reja ládxi'ru', lë na' gú'unë' usulu usunítië'."

²⁴ Caní guca, gula'gu'ë yöl-la' ba Dios tu' nözda' neda'.

2

Bönni' gubáz queë' Cristo guxzí' lu ná'agaquië' Pablo

¹ Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bi' Tito, dzágabi' neda'.

² Guyija' ni', en bë'lëna' didza' tsólá'alö bönni' ni' yu'u lu ná'agaquië' dxin queë' Cristo, ate' gudíxjöi'ida' légaquië' ca naca libán runa' que le rinnë dxi'a lógaca bönachi izá'a. Caní bëna' tu' gú'unda' cabí ugá'ana nítisö dxin na' chibëna', enca' dxin ni' runa' na'a.

³ Sal-la' nácabi' Tito, bi'i luzá'a, bi'i griego, bití' gulunë' bönni' ni ga irugu lu xpëla'bi' lë na' naca bë' bönachi queë' Dios ca tun cazë' bönni' judío.

⁴ Le nácatë gula'cuá' bal-la bönachi ni', nupa ni' ta'zí' yë', ta'ná nácagaca böchi'ru', ate' gulë'ëni ilún ga irugu lu xpëla'bi' Tito lë na' naca bë'. Yugu' bönni' ni núnagaquië' tu xzön rë'u pero tu'yusë' ca runru' para iléquibe'enë' ca náláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulë'ënë' ilunë' ga huóácaru' leyübölö huen dxin tsaz lu xibá na'.

⁵ Bití' ca' bë'tu' légaquië' lataj. Caní bentu' para gun chí'itu' le nácatë que le rinnë dxi'a para gaca uzí'ili' xibé le rinnë dxi'a na'.

⁶ Yugu' bönni' ni' réquiru' yu'u lu ná'agaquië' dxin queë' Cristo bití' bi gula'nná be'e neda' le naca cubi, pero bití' ruí'i ládxa'a ca nácagaquië'. Dios bití' ruchi'a rusóroë' rë'u ca tu'chi'a tu'sörö bönachi rë'u.

⁷ Bití' bi gula'nná be'e neda' tu' guléquibe'enë' Dios nudödë' lu na'a dxin queë', para tsöjena' libán que le rinnë dxi'a lógaca bönachi izá'a, ca na' nudödë' lu në'ë Pedro dxin queë', para gunë' libán que le rinnë dxi'a lógaca bönachi judío.

⁸ Len yöl-la' huáca queë', Dios benë' neda' bönni' gubáz queë' para usédida' bönachi izá'a, ca na' benë' Pedro bönni' gubáz queë' para usédinë' bönachi judío.

⁹ Jacobo, en Pedro, en Juan, bönni' ni' réquiru' yu'u lu ná'agaquië' dxin queë' Cristo, guléquibe'enë' Dios nudödë' lu na'a dxin ni. Que lë ni na' guxzí' ladxi'

ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío.

¹⁰ Gulá'ta'yusë' lotu' tsönetu' gácalentu' bönachi yechi', ate' lë ni naca tu le ru'ítica'sö ládxa'a runa'.

Ca guca cate' Pablo gudíl-lalenë' Pedro lu yödzo Antioquia

¹¹ Cate' bidxinë' Pedro lu yödzo Antioquia, gudíl-lalena' lë' didza' tu' lë cazë' guchíxinë' ca benë'.

¹² Caní guca tu' zí'atëlö gudágulenë' tsözxön yugu' bönachi izá'a ni'. Benë' caní ga bila'dxinrë' bal-la bönni' dá'gaquië' Jacobo. Ní'irö gusi lahuë' rubíguie', en bítirö gudágulenë' tsözxön bönachi izá'a na' tu' gúdxinë' bi ilunë' bönni' na' nazi' lu ná'agaquië' ilunë' ga irugu lu xpëla'gaca bönachi izá'a ca rinná bë' xibá queë' Moisés.

¹³ Ní'irö ia'zica'rë' bönni' judío ni' ta'yija ládxe'ë Cristo gulunë' tu zxön Pedro ca runë' lu yöl-la' radxi queë', ate' caní guca ga bidxintë gulunë' ga gúdxinë' ca' Bernabé, ate' lë' benë' tu zxön légaquië'.

¹⁴ Cate' bilé'eda' bití' tunë' ca naca le nácatë le rusedi rë'u le rinnë dxi'a, gudxa'-në' Pedro lógaca yúgu'të nupa ni' nudúbigaca queë' Cristo, gunniá': "Li' nacu' bönni' judío, pero runu' li' ca túngaca bönachi izá'a, en calëga ca tunë' bönni' judío. ¿Bíx queë' rë'ënu' gunu' ga ilúngaca bönachi izá'a ca tunë' bönni' judío?"

Nulágaca bönachi judío ca na' nulágaca ca' bönachi izá'a

¹⁵ Gudxa' ca' Pedro: "Rë'u ni nácaru' bönni' judío tu' nácaquië' xuz xiná'aru' judío, en calëga bönachi izá'a, nupa cabí núnbë'gaca Dios.

¹⁶ Nöb quéziru' cantu nu huóaca tsahui' lahuë' Dios tu' run nu na' tsa rinná bë' xibá queë' Moisés, pero huóaca tsahui' tuzi nu na' reja ladxí' Jesucristo. Lës caní ca' rë'u reja ládxi'ru' Jesucristo para huóácaru' tsahui' lahuë' Dios, en calëga tu' runru' tsa rinná bë' xibá queë' Moisés. Cantu caz nu huóaca tsahui' lahuë' Dios tu' run tsa rinná bë' xibá queë' Moisés.

¹⁷ Na'a, réquiru' nuhuóácaru' tsahui' tu' reja ládxi'ru' Cristo, pero channö naca bë' nácaru' bönni' dul-la' ca náca gaca bönachi izá'a, ¿innátsaru' runë' Cristo ga runru' dul-la'?' jBiti' caz!

¹⁸ Channö ru'í ládxa'a uchisa' le chibuquinja', lë ni naca bë' riguitsja' xibá le gunná bë'ë Dios.

¹⁹ Tu' cabí guca uzó'a didza' xibá na' gunná bë'ë Moisés, guca quia' tsa chinátia'. Tu' caní naca, nulá' na'a lu xibá na' para soa' ibana', en guna' ca rë'ënë' Dios.

²⁰ Naca quia' ca chigútilena' tsözxön Cristo lë'e yaga cruz ga na' gútië' Lë'. Que lë ni na' calëga neda' ni zoa' nabana', pero Cristo zoë' nabanë' lu icja ládxi'da'ahua'. Tsa naca zoa' nabana' na'a, naca tu' reja ládxa'a Lë' zxi'inë' Dios, Bönni' na' bidxi'inë' neda', en budödi cuinë' lu yöl-la' guti uláz quia' neda'.

²¹ Biti' rë'ënda' uzó'a tsölá'alö le ruzá' ládxe'ë queëru' Dios. Channö huáca huóáquië' tsahui' tu bönni' lahuë' Dios tu' runë' tsa rinná bë' xibá queë' Moisés, ní'irö nítisö gútië' Cristo."

3

Le rinná bë' xibá queë' Moisés, en le reja ládxi'ru' Cristo

¹ Libí'ili', tu' canöz, libí'ili', bönni' Galacia. ¿Nuzxi gulú'utsö libí'ili' nēbi para cabirö uzóali' didza' le nácatē? Gate ga rē' bulu'itu' libí'ili' le sa'yéaj ca gútiē' Jesucristo lē'e yaga cruz.

² Gudíxjö'i' neda' lē ni. ¿Bidisóalenē' libí'ili' Dios Bō' lá'ayi tu' benli' ca rinná bē' xibá queē' Moisés o tu' guyija ládxi'li' le rinnē dxi'a biyönili'?

³ ¿Nacxi guca nácali' tu' canöz caní? Gusí loli' nácali' bönachi queē' Dios tu' zóalenē' libí'ili' Dios Bō' lá'ayi. ¿Réquitseli' huáca udxí gunli' ga guéquili' queē' Dios rásasö queēli'?

⁴ ¿Guca nítisö guca queēli' yúgu'tē lē na' guzxaca' gudí'ili'? ¡Biti' ca' guca caní!

⁵ Cate' Dios risöl-lē'ē queēli' Dios Bō' lá'ayi, en ru'ē libí'ili' lataj gunli' yugu' yöl-la' huáca que yehua' yubá, ¿runē' caní tu' runli' ca rinná bē' xibá queē' Moisés o tu' reja ládxi'li' le rinnē dxi'a na' biyönili'?

⁶ Lu guichi lá'ayi rnna: Abraham guyija ládxi'ē Dios, ate' Dios gunnē' náquiē' bönni' tsahui' tu' guyija ládxi'ē Lē'.

⁷ Que lē ni na' ral-la' inözili', nupa na' ta'yija ladxí' Dios nácgaca idú xzí'ini xí'sóē' Abraham.

⁸ Lu guichi lá'ayi ru'í' didza' zí'atēlō ca gunē' Dios, innē' nácgacquiē' tsahui' bönni' izá'a ila'yija ládxi'ē Lē'. Que lē ni na' Dios gudíxjö'i'nē' Abraham zí'atēlō ca naca le rinnē dxi'a, gunnē': "Lu nē'ē Xzí'ini xí'sú' guna' ga gaca dxi'a quégaca bönachi idutē yödzölió."

⁹ Caní naca, Abraham guyija ládxi'ē Dios, ate' Dios benē' ga guca dxi'a queē'. Lēs caní ca' na'a, Dios runē' ga raca dxi'a quégaca yúgu'tē nupa ta'yija ladxí' Lē'.

¹⁰ Nupa na' tu'zxöni ladxí' ulu'huóaca tsahui' tu' túngaca ca rinná bē' xibá queē' Moisés, nabága'gaca xíguia'. Caní naca tu' nazúaj lu guichi lá'ayi, le rnna: "Yúgu'tē nupa na' cabí túngaca idutē ca rinná bē' xibá na' nabága'gaca xíguia'."

¹¹ Na'a, naca bē' cuntu nu huóaca tsahui' lahuē' Dios tu' run nu na' le rinná bē' xibá na', tu' zoa lu guichi lá'ayi le rnna: "Nu na' nuhuóaca tsahui' lahuē' Dios soa ibán tu' reja ladxí' Lē'."

¹² Ca na' nuhuóaca tsahui' lahuē' Dios nu na' reja ladxí' Cristo nadzá' ca naca que nu na' ruzxöni ladxí' nuhuóaca tsahui' tu' run ca rinná bē' xibá queē' Moisés. Zoa lu guichi lá'ayi le rnna: "Nu na' run idutē ca rinná bē' xibá na' soa ibán tu' run caní."

¹³ Cristo busölē' rē'u lu le richugu queēru' le rinná bē' xibá na' tu' bē'ē latja nu guchugu queē' uláz queēru'. Caní naca tu' zoa lu guichi lá'ayi le rnna: "Narugu quégaca yúgu'tē nupa na' dá'gaca lē'e yaga."

¹⁴ Caní guca queē' Cristo para gaca gunē' Dios ca na' guxzí' lu nē'ē queē' Abraham, gunē' ga gaca dxi'a quégaca bönachi izá'a lu nē'ē Jesucristo, en para gaca gunē' ga idisóalenē' Dios Bō' lá'ayi rē'u channö uyija ládxi'ru' Lē', ca na' guxzí' lu nē'ē Dios gunē'.

Le rinná bē' xibá queē' Moisés, en le guxzí' lu nē'ē Dios gunē' queēru'

¹⁵ Na'a, böchi' zána'do', uzúaja' queēli' tu le rucduzu' didza', tu le raca queēru'. Cate' chopa bönni' chigulunē' tuz xtídza'gaquiē', en chigulunē' tsutsu didza' na', cuntu nu gaca utsá' didza' na', en cabí gaca nu bi udá' lē'e didza' na'.

¹⁶ Dios guxzí' lu nē'ē bi gunē' queē' Abraham, en que xzí'ini xí'sóē'. Ga zoa lu guichi lē ni, biti' rnna: "Quégaca xzí'ini xí'sú'", le ru'í' didza' que zían

bönachi, pero rnna: “Que xzí'ini xi'sú'.” Lë ni ruí'i didza' que tuz bönni', Lë Cristo.

¹⁷ Lë ni na' le rë'enda' innía': Dios benë' tuz didza' len Abraham, en guxzí' lu në'ë gunë' ca na' gunné'. Le nazúaj lu xibá queë' Dios, le benë' Dios tapa gayuá' yu' chi-uruá' iz gudödi ni' cate' gudxë' caní Abraham, bití' gaca ugúa lë na' guxzí' lu në'ë Dios gunë', en cabí gaca usulu le.

¹⁸ Na'a, channö ral-la' gunru' ca rinná bë' xibá na' para sí'iru' le guxzí' lu në'ë Dios gunsë', bíti'rö naca tu le guxzí' lu ná'asë' gunë'. Dios runsë' caní tu' caní guxzí' lu në'ë bi gunë' queë' Abraham.

¹⁹ Channö caní naca, ¿bizx queë' gunná bë'ë Dios xibá na' nazúajgaca lu didza' queë'? Dios gunná bë'ë caní para gaca bë' xíguia' nabága'ru', pero gúcasö caní ga bidxintë dza na' bilá' lahuë' xzí'ini xi'sóë' Abraham na', Bönni' na' guxzí' lu në'ë Dios gunë' queë' lë na'. Yugu' le gunná bë'ë Dios lu xibá queë', gusöl-lë'ë yödzölió ni lu ná'agaquië' gubáz lá'ayi queë', ate' Moisés budödë' didza' ca ná'cagaca xibá na'.

²⁰ Bití' naquín nu udödi didza' cate' naca tuz nu run tuz didza', ate' Dios, tuz náquië'.

Bizx queë' gunná bë'ë Dios le zóagaca lu xibá queë'

²¹ Le nazúajgaca lu xibá queë' Dios, ¿ta'dá'gaca lë na' guxzí' lu në'ë Dios gunë'? ¿Bití' ca! La'tu' gunná bë'ë Dios tu xibá le gaca gun ga sóaru' ibanru' tsaz, ní'irö huáca huóácaru' tsahui' lahuë' Dios channö gunru' ca na' rinná bë' xibá na'.

²² Tscá naca lë na' nazúaj lu guichi lá'ayi, yúgu'tëru' nabága'ru' dul-la'. Caní naca para gaca sí'iru' lë na' guxzí' lu në'ë Dios gata' queëru' cate' tseja ládxi'ru' Jesucristo.

²³ Zí'atëlö ga bidxín dza gaca tseja ládxi'ru' Cristo, le rnna xibá na' gunná be'e rë'u, ca na' zoa le rinná be'e tu bönni' yu'ë lidxi guié. Caní guca ga bidxintë dza bilá' lahui gaca huóácaru' tsahui' channö uyija ládxi'ru' Lë'.

²⁴ Caní naca, le nazúaj lu xibá queë' Dios gunná be'e rë'u, lë na' busedi rë'u ca tu bönni' usedi ga bidxintë dza bilá' lahuë' Jesucristo, para gaca huóácaru' tsahui' lahuë' Dios channö uyija ládxi'ru' Lë'.

²⁵ Na'a, tu' bidxín dza gaca huóácaru' tsahui' channö uyija ládxi'ru' Cristo, bíti'rö inná be'e rë'u lë na' busedi rë'u.

²⁶ Yúgu'tëli' nácali' bi'i queë' cazë' Dios tu reja ládxi'li'-në' Jesucristo, en chinácali' tuz len Lë'.

²⁷ Yúgu'të nupa nadílagaca nisa para huóacagaca tuz len Jesucristo, nuhuóacagaca ca náquië' Lë cazë'.

²⁸ Bíti'rö narúaj choplö bönni' judío, en bönni' izá'a, en cabí narúaj choplö bönni' náquië' tsaz huen dxin, en bönni' nazán, en cabí narúaj choplö bönni', en nigula, tu' cate' böácali' tuz len Jesucristo, yúgu'tëli' böácali' ca' tuz len luzá'ali' tuli' ia'tuli'.

²⁹ Na'a, channö néquili' queë' Cristo, nácali' ca' xzí'ini xi'sóë' Abraham, ate' nazí'ili' lë na' guxzí' lu në'ë Dios gunné' queë' Abraham.

4

¹ Lë ni le rë'enda' innía': Tsanni ni ribözabi' tu bi'i bönni'do' sí'ibi' bi ral-la' gunné' xúzibi' queëbi', ni' nácabi' bí'ido', en bití' nayëpisëtë'röbi' ca raca que tu nu naca tsaz huen dxin, sal-la' le nácatë nequi queëbi' yúgu'të.

² Tsanni ni' nácabi' bí'ido', nacuá' nupa tun chi'i'lëbi', en tu'gún dxin le nequi queëbi' ga idxintë dza chinuzöë' xúzibi' queëbi'.

³ Lës caní raca ca' queëru'. Tsanni ni' gúcaru' ca bí'ido', gunná be'e xibá na' rë'u ca raca quégaca bönachi yödzölió ni.

⁴ Cate' bizá'a dza, Dios gusöl-lë'ë xzí'ini cazë' ni. Gúquië' xzí'ininu tu nigula ca nácaru' rë'u, en gunná be'e le zoa lu xibá quégaca bönni' judío Lë'.

⁵ Caní guca queë' para guca busölë' nupa na' rinná be'e le zoa lu xibá léguequi, para gaca huóácaru' bi'i queë' Dios.

⁶ Para gaca bë' chinácali' bi'i queë cazë', Dios guchizë' Dios Bö' lá'ayi ládxi'do'oli', ate' Lë cazë' rulidzë' Dios uláz queëli', rnnë': "Xuza'."

⁷ Caní naca, chinácali' bi'i queë' Dios, en bití'rö nácali' ca yugu' bönni' tsaz nácagaquië' huen dxin. Na'a, tu' nácali' bi'i queë cazë' Dios, Lë cazë' nazí ladxi' në'ë guequi queëli' le nequi queë' tu' nácali' tuz len Cristo.

Pablo ru'í ládxë'ë bönni' Galacia ta'yija ládxë'ë Cristo

⁸ Cate' ni' bití' núnbë'ëli'-në' Dios, gúcali' ca yugu' bönni', tsaz nácagaquië' huen dxin, en benlí' dxin quégaca budó' néquini. Bití' ca' nácagaca budó' na' Dios.

⁹ Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', ¿bizx queë rë'ënilí' ubí'ili' yugu' lu xibá cané na' cabí nu uzí' xibé? ¿Rë'ënilí' huóácali' huen dxin tsaz, en gunlí' ca rinná bë' xibá na'?

¹⁰ Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz.

¹¹ Rádxida' bi gaca queëli'. ¿Naru' nuhuóáca nítisö dxin bena' para gúnbë'ëli' le nácatë'?

¹² Ráta'yuá' loli', böchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böáca' neda' ca gúcali' libí'ili'. Bití' bi le cabí naca dxi'a benlí' quia' neda'.

¹³ Chinöz quézili' bizx queë na' gusí lahua' runa' libán loli' que le rinnë dxi'a. Bena' libán ni' tu' gü'ida'.

¹⁴ Bití' bucá'anali' neda' cané, en cabí buzóali' neda' tsölá'alö sal-la' bigútili' ca guca yödzöhuë' quia' na'. Benlí' neda' bal, tuz ca gunlí' bal tu gubáz lá'ayi queë' Dios, o ca runlí' bal Jesucristo caz.

¹⁵ Budzéalë'ëli' dza ni'. ¿Bizxi guca queëli' tu' cabirö raca caní? Lë ni gaca inná' ca guca queëli': La'tu' huáca gunlí', bubéajli' guiöj lo quézili', le gúnnali' quia'.

¹⁶ Na'a, ¿réquili' nuhuóáca' tu nu riléde'e libí'ili' tu' gudxa' libí'ili' le nácatë'?

¹⁷ Bönni' ni' tu'tsë'ë libí'ili' tu'í' ládxë'ë libí'ili', pero calëga para gaca dxi'a queëli'. Të'ënë' ilunë' ga ucá'anali' netu' para gü'í' ládxi'li' légaquië'.

¹⁸ Na'a, naca dxi'a zoa nu ru'í' ladxi' libí'ili', pero tuz channö naca para gaca dxi'a queëli'. Caní ru'ítica'só ládxa'a libí'ili', en calëgasö cate' ni' zóalena' libí'ili'.

¹⁹ Libí'ili', xzí'ina'do'. Ca na' raca queënu nigula chizóa sóabi' bí'ido' queënu, riguí' rizáca'nu, lës caní riguí' rizáca'a neda' ni'a queëli' leyúbölo ga idxinrö dza gácali' idú ca náquië' Cristo.

²⁰ Nácaru la' zóalena' libí'ili' na'a para gaca gü'í'lena' libí'ili' didza' nadzá'alö, tu' ruúbi ruguí'lë'ëda' ni'a queëli'.

Le rucudzu' didza' ca guca quégacanu Agar en Sara

²¹ Na'a, libí'ili', nuli' rë'ënilí' uzóa cuinlí' lu xibá queë' Moisés, guli'ná'tsöca' didza' ni gu'a. ¿Catu caz buzë nágali' le rnna xibá na'?

²² Rnna xibá na' caní: gula'cuá'abi' chópabi' bi'i bönni'do' queë' Abraham. Tubi' gúcabi' xzí'ininu tu nigula tsaz nácanu huen dxin, ate' ia'tubi' gúcabi' xzí'ininu nigula nazannu.

²³ Xzí'ininu nigula huen dxin na' gúlajbi' lu ni'a lu na' tu bönni' tsca tálajbi' yúgu'të bí'ido', pero xzí'ininu nigula nazannu na' gúlajbi' tu' guzxi' lu në'ë Dios gunë' ga gálajbi'.

²⁴ Lë ni naca ca tu le rucudzu' didza'. Ca guca quégacanu chópanu nigula ni sa'yéaj ca naca chopu didza' Dios bénlenë' bönachi. Tu didza' na' naca le buzóë' Dios lu gu'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácagaca ca xzí'ininu Agar, en nácagaca ca huen dxin tsaz lu xibá na'.

²⁵ Le gúcanu Agar na' sa'yéaj ca' ca naca gu'a Sinaí na' le zoa luyú Arabia, en sa'yéaj ca' ca naca yödzo Jerusalén na'a dza, tu' naca yödzo na' ca tu bönni' tsaz náquië' huen dxin tsözxön len nupa nacua' lu yödzo na'.

²⁶ Jerusalén na' zoa yehua' yubá nazán, ate' rë'u ni nácaru' bönachi uládz que yödzo ni'.

²⁷ Nazúaj lu guichi lá'ayi le rnna:

Budzeja, nigula huödx, cabí nacua' xzí'inu'.

Lu yöl-la' rudzeja quiu' gurödxí'a,

sal-la' catu caz guca quiu' le riguí'i rizáca'nu nigula

chizóa sóabi' bí'ido' queënu.

Budzeja tu' sal-la' nusán në'eguequi bönachi lí,

gunë' Dios ga ila'yántëro xzí'inu'

ca bi'i queënu nigula zóalennu bönni' queënu.

²⁸ Libí'ili', böchi' zána'do', rë'u ni nácaru' ca gúcabi' Isaac, xzí'inë' Abraham. Nácaru' ca yugu' xzí'ini xi'sóë' Abraham, guzxi' lu në'ë Dios gata' queë'.

²⁹ Dza ni', bi'i na' gúlajbi' ca tálajbi' yúgu'të bí'ido', gudxia ná'abi' bi'i na' gúlajbi' tu' nözi yöl-la' huáca queë' Dios Bö' lá'ayi. Lës caní raca ca' queëru' na'a, ta'bía no bönachi yödzoilió ni rë'u.

³⁰ ¿Bixí' rnna le zoa lu guichi lá'ayi? Caní rnna: "Gurú'una-nu nigula na' tsaz nácanu huen dxin tsözxön len xzí'ininu, tu' biti' gaca xzí'ininu nigula na' sí'ibi' tsözxön xzí'ininu nigula nazannu le guzxi' lu në'ë Dios guequi queëbi' xzí'ininu nigula nazannu na'."

³¹ Caní naca, böchi' zána'do'. Biti' nácaru' ca nácabi' xzí'ininu nigula na', tsaz gúcanu huen dxin, pero nácaru' ca xzí'ininu nigula nazannu na'.

5

Gulí'gún chí'i cuinli', ugá'anali' lu yöl-la' nazán

¹ Chinazanru' tu' busanë' Cristo rë'u. Gulí'sóa tsutsu channö, ugá'anali' lu yöl-la' nazán na'. Biti' uzóa cuinli' leyúbölo lu xibá queë' Moisés para cabí gácali' ca tu bönni', tsaz náquië' huen dxin.

² Bulí'zé nágali' neda'. Neda', Pablo, rea' libí'ili', channö ru'í'ili' lataj nu ichugu lu xpéla'li' ca rinná bë' xibá na', biti' ca' uzí'ili' xibé le benë' Cristo.

³ Leyúbölo rë'ënda' guía' nütí'tës bönni' ru'ë' lataj nu ichugu lu xpélë'ë caní, run bayudxi gunë' idutë ca le rinná bë' xibá queë' Moisés.

⁴ Nulí' réquili' huóácali' tsahui' lahuë' Dios tu' runli' ca rinná bë' xibá na', chibulá'alenli'-në' Cristo. Chibusán ná'ali' le ruzá' ládxe'ë Dios queëru'.

⁵ Rë'u ni ruzxöni ládxi'ru' huóácaru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxi'ru' Cristo.

⁶ Channö nácaru' tuz len Jesucristo, bití' bi run channö narugu lu xpéla'ru' ca rinná' bē' xibá' na' o channö cabí narugu caní lu xpéla'ru'. Le run bayudxi naca tseja ládxi'ru' Cristo, le run ga idxi'iru' luzá'aru'.

⁷ Dxi'ado' guca ca gusí loli' runli' dza ni'. ¿Nuzxi ben ga buca'anali' le nácatē'?

⁸ Bití' benē' Dios, Bōnni' rulidzē' libí'ili', ga benli' caní.

⁹ Bití' gal-la ládxi'li' lē na' rRNA: "Látí'sō cúa zi que yōta xtila ruhuōáxx idutē cúa ga nayú'u cúa zi na'."

¹⁰ Tu' nácaru' tuz len Xanru', runa' lōza ca naca queēli', sa' ládxi'li' tuz ca rizá' ládxa'a neda', ate' Dios gun zi'ē bōnni' na' rutsē'ē libí'ili', núti'tēs nu naca bōnni' na'.

¹¹ Ca naca quia' neda', bōchi' zána'do', nacuá' nupa ta'nná rusédida' bōnachi ral-la' irugue lu xpéla'guequi ca rinná' bē' xibá' queē' Moisés. Channö runa' caní, ¿bizx queē ta'bía nahuē' bōnni' judío neda'? La'tu' rusédida' caní, cuntu nu ilé neda' tu' runa' libán ca gútiē' Cristo lē'e yaga cruz.

¹² Ca naca que nupa ni' tu'tsá' libí'ili', tē'ēni irugue lu xpéla'li' lē na', nácōru la' ila'chugu tsaz cuínguequi.

¹³ Ca naca queēli', bōchi' zána'do', Dios bulidzē' libí'ili' para gácali' bōnachi nazángaca. Bití' ugunli' dxin yōl-la' nazán na' para gunli' ca rizēsō ládxi'li', pero para gunli' dxin que luzá'ali', tuli' ia'tuli', tu' nadxi'ili' luzá'ali'.

¹⁴ Yúgu'tē le rinná' bē' xibá' queē' Dios rusudxín nu na' run ca rinná' bē' xibá' na' rRNA: "Ral-la' idxi'ínu' luzó'o ca nadxi'i cuinu'."

¹⁵ Channö rizí' quídza'li' luzá'ali' tuli' ia'tuli', runli' ca tunba'bōa' gu'á' sinia', táguya'aba', en táguba' luzá'aba'. Buli'yú tsate' usulu usunítili' luzá'ali' tuli' ia'tuli'.

Le runru' lu yōl-la' bōnáchisō queēru', en le runru' len yōl-la' huáca queē' Dios Bō' lá'ayi

¹⁶ Lē ni na' rea' libí'ili': Guli'gūi' latja inná' bé'enē' libí'ili' Dios Bō' lá'ayi, ate' ní'irō bití'rō gunli' ca rizēsō ládxi'ili' lu yōl-la' bōnáchisō queēli'.

¹⁷ Yugu' le rizē ládxi'ru gunru' lu yōl-la' bōnáchisō queēru' bití' rōjlōz le rē'ēnē' Dios Bō' lá'ayi gunru', ate' lē na' rē'ēnē' Dios Bō' lá'ayi bití' rōjlōz le rē'ēniru' gunru' lu yōl-la' bōnáchisō queēru'. Chopa ni, bití' rōjlōz gaca, en que lē ni na' bití' gaca gunli' ca rē'ēni quézili'.

¹⁸ Channö ru'í'ili' lataj inná' bé'enē' Dios Bō' lá'ayi libí'ili', bití'rō inná' be'e xibá' queē' Moisés libí'ili'.

¹⁹ Naca bē' le tun bōnachi lu yōl-la' bōnáchisō queéguqui.

Tun dul-la' le riguitsaj xibá' que yōl-la' nutsaga na', enca' dul-la' le lē'ē. Tun yugu' le naxihui', en yugu' le catsahui'.

²⁰ Téquiguequi le bach budó' néquiniguequi.

Tun yōl-la' gudzá'.

Tu'dí'i luzē'eguequi, en ta'díl-lalen léguqui.

Tu'zxē'e luzē'eguequi, en ta'lé nupa na', en tu'huídi'.

Ta'rúaj choplō, en tu'béaj tsólá'alō nupa dá'gaca léguqui.

²¹ Ta'zē ladxí' le dē que luzē'eguequi, en ta'guilaj xíguia'.

Ta'zudxi, en tagu lē'e.

Tu'dōdi bē' ca tūnguequi.

Le zían le caní tūnguequi. Neda' ruxōsa' ládxi'li' na'a para cabí gunli' caní ca na' buxōsa' ládxi'li' zí'alō, rRNA: Nupa tūngaca caní bití' ca' ila'deli' ila'yú'u ga na' rinná' bē'ē Dios.

²² Channö zóalen Dios Bō' lá'ayi rē'u runru' caní:

Nadxi'iru' luzá'aru'.
 Rudzeja ládxi'ru'.
 Zoa dxi ládxi'do'oru'.
 Ribózaru' zxön ladxí'.
 Ruí'i ládxi'ru' luzá'aru'.
 Nácaru' dxi'i ladxí'.
 Rusudxinru' xtídza'ru'.
 23 Nácaru' nõxaj ladxí'.
 Rinná be'e cuinru'.

Biti' ca' gunná bē'ē Moisés rē'u para cabí gunru' yugu' le caní.

24 Nupa néquiquequi queē' Cristo bítirō tun ca tē'ēni quez, en cabí tun le ta'zēsō ladxí' lu yōl-la' bōnáchisō queéquequi.

25 Dios Bō' lá'ayi runnē' yōl-la' na'bán queēru'. Lē' cazē' ral-la' inná bé'enē' rē'u ca naca yúgu'tē le runru'.

26 Biti' ral-la' gun ba zxön cuinru', en cabí utsá'aru' luzá'aru', en cabí uzxé'eru' luzá'aru' turu' ia'turu'.

6

Ral-la' gácalenru' luzá'aru' turu' ia'turu'

1 Na'a, bōchi' zána'do', channō ilé'eli' runē' dul-la' tu bōnni' bōchi'li', nuli' zóalenē' Dios Bō' lá'ayi libí'ili', ral-la' gunli' ga ubí'i ládxe'ē bōnni' na', pero run bayudxi gunli' caní lu yōl-la' nõxaj ladxí' queēli', en uyú cuinli' tsate' cu'u tu' xihui' libí'ili' nõza dul-la'.

2 Gulí'gácalen luzá'ali' tuli' ia'tuli' tsca naca yuá' nabága'li'. Channō gunli' caní uzóali' didza' le gunná bé'enē' Cristo rē'u.

3 Channō zoa nu réqui chinadeli' yōl-la' nayēpisē, en bití' bi nadeli' nu na', nu ni na' rizi' ye'e la' cuinsi.

4 Tuhuéaj tuhuéajē' bōnni' ral-la' uchi'a usōrōē' que le runē'. Ní'irō channō urúajē' dxi'a, huáca gun ba zxön cuinē' ni'a que le chinunē', en bití' gun bayudxi uyúē' ca nungaca ia'zica'rō bōnachi channō ba benrē' dxi'a o cabí.

5 Tuhuéaj tuhuéajē' bōnni' ral-la' gu'ē le nusubáguē'ē Dios lē'.

6 Channō zoa nu rusedi libí'ili' ca naca le rinnē' dxi'a, ral-la' unōdzjali' nu na' rusedi libí'ili' lati' que yúgu'tē le do' dē' queēli'.

7 Biti' si' ye'e cuinli' tu' cuntu nu gaca si' ye'e Dios. Ulápali' tsca naca le rázali'.

8 Channō le rázali' naca yugu' le runli' ca rizēsō ládxi'li' lu yōl-la' bōnáchisō queēli', le ulápali' gaca yōl-la' guti. Channō le rázali' naca yugu' le runli' ca raza ládxe'ē Dios Bō' Lá'ayi, ulápali' le gunnē' Dios Bō' lá'ayi queēli', le naca yōl-la' na'bán idú.

9 Caní naca, bití' ral-la' huōa ládxi'ru' gunru' le naca dxi'a, tu' channō cabí huōa ládxi'ru', idxín dza uláparu'.

10 Que lē ni na', bātati'tēs gata' queēru' lataj, ral-la' gunru' le naca dxi'a quégaca yúgu'tē bōnachi, en le naca lo, ral-la' gunru' caní quégaca bōchi' zanru' ta'yija ladxí' Cristo.

Le buzúajē' Pablo lu guichi ga ruúdx

11 Bulí'yú cate' bach didza' ni ruzúaja' lu guichi len na' cuina'.

12 Nupa na' tē'ēni ilún ga irugu lu xpēla'li' ca rinná bē' xibá queē' Moisés, túngaca caní para ulu'rúaj dxi'a lógaca bōnachi, en cabí bi ilún queéquequi tu' túngaca libán ca gútiē' Cristo lē'e yaga cruz.

¹³ Yugu' bönni' na' ta'zì lu ná'agaquiè' le narugu lu xpèla'gaquiè' ca rinná bè' xibá queè' Moisés, biti' tu'zòè' didza' idutè ca rnna xibá na'. Tè'è'nè' ilunè' ga irugu lu xpèla'li' para gaca ilún ba zxôn cuíngaquiè' tu' ta'nná bé'enè' libí'ili' para irugu lu xpèla'li' caní.

¹⁴ Ca naca quia' neda', cú'usa' yöl-la' ba le benè' Xanru' Jesucristo cate' gútiè' lè'e yaga cruz. Tu' nòzi le benè' Cristo lè'e yaga cruz, yugu' le dè yòdzòlió ni naca quia' ca tu le chinati, biti' ruí'i ládxa'a le, ate' neda' naca' quégaca bönachi yòdzòlió ni ca tu bönni' nati, biti' tuí'i ladxì' neda'.

¹⁵ Channö nácaru' tuz len Jesucristo, biti' bi run channö narugu lu xpèla'ru' ca rinná bè' xibá na' o channö cabí narugu lu xpèla'ru' caní. Le run bayudxi naca gácaru' bönachi cubi niu' lè'e ládxi'do'oru'.

¹⁶ Yúgu'tè bönni' na' tunè' ca rinná bè' xibá runa' ni, en yúgu'tè bönni' na' néquiqueuinè' queè' Dios, rinábida'-nè' Dios gunè' ga soa dxi ládxi'do'gaquiè', en huéchi' ládxe'è' légaquiè'.

¹⁷ Na'a zè lo, cuntu nu bönni' ral-la' utsé'è neda', tu' nácagaca bè' butsóa zóagaca lu xpèla'a naca' huen dxin queè' Xanru' Jesús.

¹⁸ Na'a, böchi' zána'do', rinábida'-nè' Xanru' Jesucristo uzá' ládxe'è' queè'li' yúgu'tèli'. Ca' caz.

DIDZA' GUSÖL-LË'Ë PABLO YÖDZÖ ÉFESO

Pablo rugapë' Dios bönachi queë' Cristo nacua' Éfeso

¹ Neda', Pablo, naca' gubáz nasöl-lë'ë Jesucristo tu' gú'uni quezinë' Dios gaca' caní. Rugapa' Dios libí'ili', zóali' Éfeso. Néquili' quez queë' Dios, en réajlë'ëli' Jesucristo.

² Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Le naca queë' Dios Bö' Lá'ayi rata' queëru'

³ ¡Ral-la' cú'uru'-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxë'ë queëru' yúgu'të le naca dxi'a que yehua' yubá, le runë' Dios Bö' Lá'ayi ga rata' queëru'.

⁴ Zí'atëlö ca benë' Dios yödzülió ni, gurö cazë' rë'u para guequiru' quez queë' tsözxön len Cristo, en gácaru' bönachi lá'ayi queë', en gácaru' idú dxi'a lahuë' Lë'.

⁵ Dios bucözë' zí'atëlö si' lu në'ë rë'u ca zxi'ini cazë' tsözxön len Jesucristo, tu' guyaza ládxë'ë gaca caní, en tu' naca le gú'uni quezinë' gunë'.

⁶ ¡Ral-la' cú'utica'siru'-në' Dios yöl-la' ba ni'a que le buzá' ládxë'ë queëru', yugu' le bénnasë' queëru' tu' nácaru' tuz len Zxi'inë', Nu na' nadxi'inë'!

⁷ ¡Cristo böá'uë' rë'u cate' ni' gútië' uláz queëru' para gaca uniti lahuë' Dios rë'u ca naca dul-la' nabága'ru'! ¡Zxöntëro naca le buzá' ládxë'ë Dios queëru',

⁸ lë na' rúnnadë'ë Lë' queëru'! ¡Lu yöl-la' rácada' queë', en lu yöl-la' réajni'i queë'

⁹ benë' Dios le bucözë' queëru', ate' buluí'inë' rë'u lë na' bigachi', le buzóa cazë' zí'atëlö usudxinë' lu në'ë Cristo!

¹⁰ Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të le dë, le nacua' yehua' yubá, en le nacua' yödzülió ni.

¹¹ Tu' nácaru' tuz len Cristo, Dios gurö cazë' rë'u zí'atëlö para guequi queëru' le nequi queë' Xúziru' Dios, lë na' bucözë' queëru' ca naca le gú'uni quezinë' Dios, Nu run yúgu'të ca ré'eni quezinë' Lë'.

¹² Caní benë' Dios para cú'uru'-në' yöl-la' ba ca naca yöl-la' zxön queë', rë'u ni ruzxóni ládxi'ru'-në' Cristo zí'atëlö ca ia'zica'rö bönachi.

¹³ Lësca' caní guca queëli'. Cate' biyönili' didza' idútë li, didza' dxi'a ca gaca uláru', guyéajlë'ëli' Cristo, ate' Dios buzóë' queëli' le naca bë' nácali' queë', tu' guchizië' icja ládxi'do'oli' Dios Bö' Lá'ayi, Nu na' guzxi' lu në'ë Dios isöl-lë'ë queëru'.

¹⁴ Tu' zóalenë' Dios Bö' Lá'ayi rë'u, naca löza guequi queëru' le nequi queë' Xúziru' Dios cate' údxi huóá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' zxön queë'.

Pablo rinábinë' Dios gunnë' queëru' yöl-la' réajni'i

¹⁵ Que lë ni na', cate' biyönda' ca réajlë'ëli'-në' Xanru' Jesús, en ca nadxi'ili' yúgu'të bönachi queë' Dios, ga ridxintë na'a dza

¹⁶ biti' ca' rusana' rea'-në' Dios: "Xclenu'", ca naca queëli'. Röjneda' libí'ili' cate' rulidza'-në' Dios.

17 Rinábida'-në' Dios queë' Xanru' Jesucristo, Dios na' náquië' Xúziru' nayëpisëtëre', rinábida'-në' isól-lë'ë Dios Bö' Lá'ayi queëli', Bö' na' runna yöl-la' réajni'i queëru', en rulu'f'i rë'u ca naca cazë' Dios, para gaca idú ca núnbë'ëru'-në'.

18 Rinábida'-në' Dios uzéajni'inë' libí'ili' lu icja ládxi'do'oli' para gaca inözili' ca naca le runru' löza, lë na' bulidzë' libí'ili' para uzí'ili' xibë, en para inözili' ca naca yöl-la' tsahui' que yehua' yubá, le guequi quegaca nupa néquiequi queë' Dios,

19 enca' para inözili' cate' xzön naca yöl-la' huáca queë', le rácalen rë'u ni réajlë'ëru' Lë'. Yöl-la' huáca xzön ni naca la' lëbisö na' bulu'e lahui Dios

20 cate' ni' busubanë' Cristo lu yöl-la' guti, en benë' ga gurö'ë cuita lë'ë Lë cazë' ga nayëpisëtëre' ni' yehua' yubá.

21 Rinná bé'enë' nupa ni' ta'nná bë', en nupa ni' dë lu në'eguequi, en nupa ni' nadéli'gaca yöl-la' huáca, en nupa ni' nácacaga xan. Cristo nayëpisëtëre' ca yúgu'të nupa nadéli'gaca yöl-la' unná bë' yödzölió ni, en lu yödzölió si' za'.

22 Dios budödë' lu në'ë Cristo yúgu'të le dë para inná bé'enë' le, en buzóë' Lë' quegaca bönachi queë' para gáquië' Xanru' lu yúgu'të le nequi queëru'.

23 Yugu' bönachi queë' Cristo nácacaga ca idútë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

2

Nuláru' tu' nadxi'inë' Dios rë'u

1 Dios chibennë' yöl-la' na'bán idú queëli', sal-la' gúcali' zí'atëlö ca bönni' nátigaca tu' nözi dul-la' nabága'li', en ni'a que dö' biá'ali'.

2 Dza ni' benli' lëbisö ca tun bönachi bití' nácacaga tsahui' nacua' yödzölió ni, en benli' ca gú'uni tu' xihui', nu rinná bë' lu bö'ös, en rugún dxin nupa bití' túngaca ca rnna xtídzë'ë Dios.

3 Lë'sca' caní gúcaru' yúgu'tëru' rë'u. Benru' ca guzësö ládxi'ru', en ca guyaza ládxi'ru' lu yöl-la' bönáchisö queëru'. Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' queguequi ia' zica'rö bönachi.

45 Ní'irö cate' ni' nácaru' ca bönni' nátigaca tu' nözi dul-la' gubága'ru', Dios busubanë' rë'u lu yöl-la' guti tsözxön len Cristo tu' buéchi' ládxe'ë rë'u, en bídxí'ide'enë' rë'u. Nuláli' tu' zoa le buzá' ládxe'ë Dios queëli'.

6 Dios busubanë' rë'u tsözxön len Cristo para gunë' ga có'öru' tsözxön len Lë' ga ni' rinná bë'ë yehua' yubá.

7 Caní benë' Dios, en bulu'í'inë' bönachi si' zá'gaca ca naca yöl-la' tsahui' que le buzá' ládxe'ë queëru', tu' budödë' Jesucristo ni'a queëru', le naca bë' ca nadxi'ide'enë' rë'u.

8 Nuláli' tu' zoa le buzá' ládxe'ë Dios queëli' tu' réajlë'ëli' Cristo. Busölë' libí'ili', calëga tu' nacua' le naca dxi'a benli' libí'ili', pero tu' naca le runsë' Dios.

9 Cuntu nu gaca gun ba xzön cuini tu' nulá, tu' cabí nulá nu na' tu' nacua' le naca dxi'a nun nu na'.

10 Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácacaga dxi'a, le bucözë' zí'atëlö gunru'.

Rö'ö dxi icja ládxi'do'oru' lahuë' Dios ni'a que le benë' Cristo

11 Guli'tsöjnë ca gúcali' zí'atëlö. Gúcali' bönachi izá'a, en que lë ni na' yugu' bönni' judío, bönni' na' ta'chúguië' lu xipéla'gaquië' le naca bë' dá'gaquië' Dios,

en nazi' lágaquië' bönni' narugu lu xipëla'gaquië', ta'nnë' nácali' libí'ili' bönni' bití' narugu lu xipëla'gaquië'.

¹² Dza ni' nubíga'li' ga zoë' Cristo. Gúcali' bönni' zi'tu' lógaca bönachi Israel, en bití' buzí'ili' xibé didza' benë' tsutsu Dios, en guzxi' lu në'ë bi gata' quegaca bönachi queë'. Guzóali' yödzólió ni, bití' zoa le runli' löza, en bití' núnbë'ënili'në' Dios.

¹³ ¡Na'a, nácali' tuz len Jesucristo! ¡Zí'atëlö nubíga'li' libí'ili' zi'tu' ga zoë' Dios, pero na'a nudxígu'ë Dios libí'ili' gála'sö tu' gútië' Cristo uláz queëru'!

¹⁴ Lë cazë' Cristo runë' ga rö'ö dxi icja ládxi'do'oru' lahuë' Dios. Lë' benë' ga yugu' bönni' judío, en yugu' bönni' zi'tu' bulu'huöáquië' tuz bönachi, en busuluë' yöl-la' rilé le guléaj légaquië' choplö ca tu zö'ö zxon.

¹⁵ Lë ni benë' Cristo cate' gútië' uláz queëru', en gudüë' yugu' xibá, en yugu' le rinná bë' nazúajgaca lu xibá queégaca bönachi judío, ate' chopa cö' bönachi na', bunë' tuz bönachi cubi, nupa nácgaca tuz len Lë cazë'. Caní benë', en gulequi dxíë' yöl-la' rilé na'.

¹⁶ Cate' gútië' Cristo lë'e yaga cruz, busuluë' yöl-la' rilé na', ate' chopa cö' bönachi na', bunë' légaquië' ca tuz bönachi, en gulequi dxíë' icja ládxi'do'gaquië' lahuë' Dios.

¹⁷ Caní guca, buluí'i lahuë' Cristo, en benë' libán que didza' dxi'a ca ribequi dxíë' yúgu'të bönachi, libí'ili' na' nácali' bönachi izá'a, en zóali' zi'tu' ga zoë' Dios, enca' bönachi judío nacúa' gála'sö.

¹⁸ Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalenë' Lë cazë' Dios Bö' Lá'ayi rë'u, sal-la' nácaru' bönachi judío o bönachi izá'a.

¹⁹ Que lë ni na', libí'ili', bönachi izá'a, bíti'rö nácali' ca bönachi zi'tu' zóali' tu luyú bití' nequi queëli', pero nabábalenli' bönachi queë' Dios. ¡Chinácali' ca bi'i queë cazë' Dios!

²⁰ Libí'ili' nácali' ca tu yu'u zoa tsaz. Nácali' ca yugu' guiöj zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guiöj lo que xilibi zö'ö na'.

²¹ Iduté yu'u na' le nácali' libí'i cázali' riyasa lahui xilibi zö'ö na' naca cazë' Cristo, en nacúa' tu' lapa yugu' guiöj que, para gaca tu yudo' lá'ayi le naca tuz len Xanru'.

²² Libí'i cázali' nácali' tuz len Cristo Nu buzóa libí'ili' para gácali' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

3

Náquië' Pablo huen libán que didza' dxi'a lógaca bönachi izá'a

¹ Que lë ni na', neda', Pablo, yu'a lidxi guíë tu' runa' libán queë' Jesucristo para uzí'ili' xibë', libí'ili', bönachi izá'a.

² Réquida' chinöz quézili' ca benë' Dios, budödë' lu na'a dxin runa' para uzí'ili' xibé le ruzá' ládxe'ë queëru'.

³ Dios bulu'e lahui le bigachi' queë', en buzéajni'inë' neda' ca naca. Ca naca lë ni chibuzúaja' láti'do' queëli' lu guichi.

⁴ Cate' ulábali' lë ni, gúnbë'ëli' le réajni'ida' ca naca le bigachi' ca naca queë' Cristo.

⁵ Dza ni'te cunttu nu buzéajni'inë' Dios ca naca le bigachi' na', pero na'a, lu në'ë Dios Bö' Lá'ayi, chibulu'ë lahui Dios ca naca, tu' bulu'inë' yugu' bönni' gubáz lá'ayi queë', en yugu' bönni' tu'ë didza' uláz queë'.

⁶ Caní rna læ na' bigachi': "Ni'a que didza' dxi'a ila'deli' bönachi izá'a tsözxön len bönachi judío le nequi queë' Dios, ate' ulu'huóáquië' ca tuz bönachi, en ulu'zi'ë xibë tsözxön len légaquië' le guzxi' lu në'ë Dios unödzejë' quégaquië' tu' dá'gaquië' Jesucristo."

⁷ Dios buzá' ládxë'ë quia' le bennë' quia'. Lu yöl-la' huáca zxön queë' benë' neda' huen libán que didza' dxi'a queë'.

⁸ Nacra' cá'asó ca yúgu'të bönachi queë' Dios, pero Lë' buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'.

⁹ Dios budödë' lu na'a guna' ga iléquibe'e yúgu'të bönachi ca naca le buzóa cazë' Dios dza ni'te, læ na' naca tu le bigachi' queë' Dios, Nu ben yúgu'të le rilë'eru'.

¹⁰ Caní guca, para iléquibe'e yúgu'të nupa ta'nná bë', en nupa dë lu në'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca náca gaca bönachi queë' Cristo.

¹¹ Dios benë' læ ni, busudxinë' læ na' buzóa cazë' dza ni'te, le benë' lu në'ë Xanru' Jesucristo.

¹² Tu' nácaru' tuz len Cristo, nazí'iru' lataj íbígá'ru' idú ladxi'ru' lahuë' Dios, tu' réajlë'ëru' Lë'.

¹³ Que læ ni na' ráta'yua' loli' biti' gaca chopa ládxí'li' tu' nözi le riguf'i rizáca' a neda' para gácalena' libí'ili', le naca tu le uzí'ili' xibé.

Ca naca yöl-la' nadxí'i queë' Cristo

¹⁴ ¡Que læ ni na', ruzechu zxiba' lahuë' Xuzë' Xanru' Jesucristo!

¹⁵ Ca læ', nazí' i ca' lágaca yúgu'të bönachi queë', nupa nacua' yehua' yubá, en nupa nacua' yödölíó ni.

¹⁶ Rinábida'-në' Xúziru' Dios, lu yöl-la' zxön queë', le nazáca'da', gunnë' queëli' yöl-la' huáca queë' Dios Bó' Lá'ayi, en gunë' ga gálali' lu icja ládxí'do'oli'.

¹⁷ Rinábida'-në' Cristo soë' icja ládxí'do'oli' tu' réajlë'ëli' Lë'. Rinábida'-në' gunë' ga sóali' tsaz lu yöl-la' nadxí'i queë', en biti' tséaj bó' icja ládxí'do'oli' ca nadxí'ili'-në',

¹⁸ para gaca tséajni'ili' tsözxön len yúgu'të bönachi queë' Cristo ca naca yöl-la' nadxí'i queë', tsca ga ridxín ní'iló, en ná'aló, en cadxí'iló, en xitsá'aló.

¹⁹ Rinábida'-në' Dios gunë' ga gúnbë'ëli' yöl-la' nadxí'i na', le cabí gaca gúnbë'ëru' idú ca naca, para sóalen libí'ili' idú le naca cazë' Dios.

²⁰ ¡Na'a, yöl-la' ba Dios, Nu gaca gúntërö ca gaca inábaru' o ca gaca sa' ládxí'ru', ugunë' dxin yöl-la' huáca queë' lu icja ládxí'do'oru'!

²¹ ¡Gácatíca'só queë' Dios yöl-la' ba lógaca bönachi queë' Cristo, en lahuë' Lë' cazë' Jesucristo, na'a dza, en yúgu'të dza zá'gaca! ¡Ca' gaca!

4

Dios Bó' Lá'ayi nunë' rë'u tuz

¹ Na'a, neda' ráta'yua' loli', yu'a lidxi guíë ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'.

² Guli' gaca nöxaj ladxi', en dxi'i ladxi'. Guli' cöz zxön ladxi'. Guli' güi' ladxi' luzá'ali' tuli' ia'tuli' lu yöl-la' nadxí'i queëli'.

³ Guli' güi' ladxi' gácatíca'sili' tuz ca na' chinunë' Dios Bó' Lá'ayi libí'ili', gunli' caní lu yöl-la' ribóza tsáhu'i'do' queëli' le rutsaga libí'ili'.

4 Tuz naca idútè le naca cazè' Cristo le nadzàgaru' rè'u.

Tuzè náquiè' Dios Bò' Lá'ayi dzáguiè' rè'u.

Tuz naca le runru' löza, lè na' bulidzè' rè'u Dios para uzí'iru' xibé.

5 Tuzè' náquiè' Xanru'.

Tuz le réajlè'èru'.

Tuz le bidílaru' nisa.

6 Tuzè' náquiè' Dios Nu naca Xúziru' yúgu'tèru'.

Lè' rinná bé'enè' yúgu'tèru'.

Rugunè' dxin yúgu'tèru'.

Ribòza cazè' Lè' lu icja ládxi'do'oru' yúgu'tèru'.

7 Tu turu' nazí'iru' tu yöl-la' huáca queè' Dios tsca naca le bennè' Cristo que queèru'.

8 Naca caní ca na' nazúaj lu guichi lá'ayi le rnna:

Buèpè' yehua' yubá, guchè'è zían bönachi gula'dzúngaca.

Gudísiè' quégaca bönachi le runódzjasè' quégaquiè'.

9 ¿Bizxi rè'èni inná lè na' rnna: buèpè'? Rusèdi rè'u bötjè' zí'alö, en bidxinè' yódzölió cadxí'lö ni.

10 Nu na' bötaj naca Bönni' na' buèpè' xitsá'tèrö ni' yehua' yubá para budzè'è yúgu'tè len le naca cazè' Lè'.

11 Cristo caz bennè' que queèru' yugu' yöl-la' huáca queè':

Bè' lataj bal-lè' bönni' iláquiè' gubáz queè'.

Benè' ga tu'è didza' uláz queè' Dios ia'bal-lè' bönni'.

Gusöl-lè'è ia'bal-lè' tsöjéngaquiè' libán que didza' dxi'a.

Bucu'è ia'bal-lè' para ilún chi'è bönachi queè'.

Bucu'è ia'bal-lè' para ulu'sédinè' bönachi queè'.

12 Cristo caz bupè'è bönachi queè' caní para gaca ilún xichinè', para ilún ga ilaca idú nupa nácacaca ca idútè le naca cazè' Lè'.

13 Caní gaca ga idxintè dza huóácaru' tuz yúgu'tèru' ca réajlè'èru' Cristo, en ca núnbè'èru'-nè' Zxí'inè' Dios. Gácaru' nál-la, en huóácaru' idú ca náquiè' Lè' cazè' Cristo.

14 Bítirö gácaru' ca yugu' bí'ido', ca nácacaca nupa na' tu'tsa'tè ca túngaca, en nácacaca ca tu le nachè' lu yegu, o ca tu le røjchè' bítitès bö' recja, tu' ta'zí' lu nè'eguequi bítitès didza' nu rusèdi léguequi, nu na' rizí' ye'e léguequi len yöl-la' sina' que, en run ga ta'chixi ta'nigui.

15 Na'a, rè'u ni, tu' nadxí'iru' luzá'aru', ral-la' güi'iru' didza' le naca idútè li para gaca huóácaru' idú ca náquiè' Cristo, en gácaru' tuz len Lè', Nu naca Xani idú le naca cazè', le nácaru' rè'u.

16 Cristo caz runè' ga rutsaga dxi'a idútè le naca cazè', le nácaru' rè'u, ate' idútè le naca cazè' na' naguela' tsözön ni'a que lè na' run tuz idútè le naca cazè'. Cate' tu turu' runru' xichinru', rè'u na' dzágaru' le naca cazè', idútè rixzön, en raca idú, ca na' zeaj rácarö idú ca nadxí'iru' luzá'aru'.

Yöl-la' na'bán cubi náparu' tu' nácaru' tuz len Cristo

17 Uláz queè' Xanru' rea' libí'ili' lè ni, en rigu'a le lu ná'ali', rnnía': Bítirö gunli' ca tun nupa bití' núnbè'gaquiè' Dios, nupa na' tun ca ta'za'sö ládxi'guequi,

18 en nuchun-la nanítigaca icja ládxi'do'guequi. Tu' cabí nõzguequinè' le nácatè, en nazídigaquiè', bití' nazí'gaquiè' yöl-la' na'bán na' runnè' Dios queèru'.

¹⁹ Biti' ca' tu' tuí' inē'. Nudödi cuíngaquiē' lu le ruá' dö'. Idú ládxi' gaquiē' tunē' yúgu' tē le cabí naca tsahui'.

²⁰ Nupa ni' bulu'sedi libí'ili' ca naca queē' Cristo, biti' ca' bulu'sedi libí'ili' gunli' ca tun bönachi caní.

²¹ Le naca idútē li biyónili' ca naca queē' Cristo, en le nácali' queē' tu'sedinē' libí'ili' le naca idútē li na' zóalen Jesús.

²² Guli' nná be'e yöl-la' bönáchisó queéli' le gúcali' zí' aló, lē na' riniti ni'a que yöl-la' rizé ladxí' queéli' le ruá' dö' le guzxi' ye'e libí'ili'.

²³ Ral-la' huóacali' cubi lu icja ládxi' do' oli', en lu bö' naca cázali'.

²⁴ Ral-la' sí'ili' yöl-la' bönachi cubi le nunē' Dios ca naca cazē' Lē', le ruluí' i cuini ni'a que le naca dxi'a, en le naca tsahui' runli', en run ga gaca gunli' caní.

²⁵ Que lē ni na', bití' rō si' yē' eli'. Yúgu' tēru' ral-la' güi'ilenru' luzá'aru' didza' le nácatē, tu' dzágaru' yúgu' tēru' idútē le naca cazē' Cristo.

²⁶ Channö hualéli', biti' ral-la' gunli' dul-la'. Biti' ileli' xidzé.

²⁷ Biti' bi gunli' le güi' i lataj tu' xihui' ucúl-la libí'ili'.

²⁸ Nu bönni' ribanē' ral-la' usanē' yöl-la' gubán queē', en tsáziē' huen dxin para gata' queē' bi unödzejē' quegaca nupa ta'yadza.

²⁹ Biti' güi'ili' didza' xihui', pero guli' güi' didza' dxi'a, yugu' le ilácalen nu yöni, en ilún ga gaca dxi'a que nu na'.

³⁰ Biti' usuhuí' inili' Dios Bö' Lá' ayi, tu' naca bē' néquili' queē' Dios tu' zóalenē' Dios Bö' Lá' ayi libí'ili', ate' idxín dza údxi usölē' libí'ili' lu dul-la'.

³¹ Guli' cúa ladaj libí'ili'

yöl-la' ruzxē' e, en yöl-la' ridzá' a,
en yöl-la' rilé, en yöl-la' ridil-la didza',
en yöl-la' rutsaga yudxi,
en yúgu' tē yöl-la' biti' rilé' e luzá' ali' dxi'a.

³² Ral-la' gácali' dxi' i ladxí',
en huéchi' ládxi' li' luzá' ali' tuli' ia' tuli',
en uniti loli' luzá' ali' tuli' ia' tuli',
ca na' benē' Dios, buniti lahuē' libí'ili' tu' nácali' tuz len Cristo.

5

Ca ral-la' ilaca nupa nácgaca ca bi' i queē' cazē' Dios

¹ Tu' nácali' ca bi' i queē' cazē' Dios, ate' nadxí' inē' libí'ili', guli' güi' ladxí' gácali' ca náquiē' Lē'.

² Ca naca yúgu' tē le runli':

Ral-la' idxí' ili' luzá' ali' ca na' benē' Cristo.

Bidxí' inē' rē' u, en budödi cuinē' lu yöl-la' guti uláz queēru'.

Ben cuinē' ca böa' bédxido' rúrtiru'-ba' lahuē' Dios tu' nōzi dul-la' nabága' ru'. Gúquiē' ca' ca tu le rilá' zxi xi le raza ládxi' ē' Dios le rigú' uru' lu bucugu lá' ayi queē'.

³ Tu' nácali' queē' Dios,
biti' ca' gunli' le ruá' dö',
en biti' gunli' le cabí ral-la' gunli',
en biti' uhufí' li'.

Ní' irö cuntu nu gaca bi innē' queéli'.

⁴ Biti' güi' ili' didza' xihui',
o didza' canöz, o didza' cá' asö,

yugu' le cabí ral-la' gunli',
pero nácarö dxi'a guiéli'-në' Dios: "Xclenu'."

⁵ Chinöz quezíli' nitüë' bönni' runë' le ruá' dö' biti' ca' tsázië' ga rinná bë'ë rihu to tsözxön len Dios, o nu bönni' runë' le cabí ral-la' gunë', o nu bönni' ruhuidi'në'. Nu na' ruhuidi' naca ca nu reaj ladxi' budó' guiöj budó' yaga.

⁶ Biti' güf'ili' lataj nu si' ye'e libí'ili' len didza' biti' nácatë. Tu' nözi dup-la' caní Dios gunë' xíguia' nupa biti' túngaca ca rnna xtídzë'ë.

⁷ Biti' ca' gunli' tuz bönachi caní.

⁸ Zí'atëlö guzóali' ga naca chul-la que dul-la', pero na'a zóali' lu bení', tu' nácali' tuz len Xanru'. Guli'gaca ca bönachi ta'dá lu bení',

⁹ tu' run bení' na' ga gácaru' dxi'i ladxi', en ga güf'iru' didza' le naca idütë li, en ga gácaru' tsahui'.

¹⁰ Guli'güf' ladxi' inözili' le raza ládxë'ë Xanru'.

¹¹ Biti' gütsa'li' nupa tun le ruá' dö', lë na' tunë' ga naca chul-la que dul-la', pero buli'béaj ga liná' yugu' lë na' tunë'.

¹² Utu'iru' güf'iru' didza' ca naca le tun bönachi na' bagáchi'sö.

¹³ Cate' bi ubéajru' ga liná', gaca bë' yúgu'të tsa nácacaga, tu' gun le naca bení' ga gaca bë' yúgu'të.

¹⁴ Que lë ni na' nazúaj lu guichi lë na' rnna:

Bubán, li' na' rasiu'.

Guyasa ladaj nupa nátigaca.

Cristo uzení'ë quiu'.

¹⁵ Buli'yú cuinli' ca runli'. Biti' gácali' nupa biti' ta'yéajni'ini, pero guli'gaca bönachi ta'yéajni'i.

¹⁶ Guli'sí xibë lataj dë queéli' tu' chizóaru' dza biti' raca dxi'a queëru'.

¹⁷ Biti' gácali' bönni' biti' bi nözguequinë'. Guli'güf' ladxi' tséajni'ili' le rë'ënë' Xanru' gunli'.

¹⁸ Biti' súdxili', tu' gun yöl-la' rizudxi ga nítili' tsaz.

Guli'güf'ida' lataj inná bé'enë' Dios Bö' Lá'ayi libí'ili'.

¹⁹ Guli'güf'ilen luzá'ali' didza' tuli' ia'tuli',

ugunli' dxin yugu' le rul-la légaca salmo,

en yugu' le rul-la yöl-la' ba Dios,

en yugu' le rul-la nagu'ë Dios Bö' Lá'ayi icja ládx'i'do'oru'.

Idú ládx'i'ru' ral-la' gúl-laru' queë',

le cú'uru'-në' Dios yöl-la' ba.

²⁰ Guli'gún dxin Lë' Xanru' Jesucristo,

en guli'guiética'së' Xúziru' Dios: "Xclenu'" ca naca yúgu'të.

Ca ral-la' gunru' quegaca di'a dza queëru'

²¹ Guli'gún ca rnna xtídz'a' luzá'ali' tuli' ia'tuli' para caní gunli'-në' Dios ZXÖN.

²² Libí'ili', yugu' nigula, guli'gún ca rnna xtídz'a'gaquië' bönni' que queéli', ca na' ral-la' gunli' ca rnna xtídzë'ë Xanru'.

²³ Caní ral-la' gunli', tu' rinná bé'enë' bönni' nigula queë' ca na' runë' Cristo, rinná bé'enë' bönachi queë'. Cristo náquië' ca' Nu rusólá bönachi queë', nupa na' dzágagaca le naca cazë' Lë'.

²⁴ Ca na' tun bönachi queë' Cristo ca rnna xtídzë'ë, lësca' caní ral-la' ilunnu nigula ca rnna xtídz'a'gaquië' bönni' que queégacanu ca naca yúgu'të le raca.

²⁵ Libí'ili', yugu' bönni', ral-la' idxf'ili'-nu nigula que queéli' ca na' Cristo nadxi'inë' bönachi queë', en budödi cuinë', gútië' uláz quegäquië'.

26 Gútië' Cristo para bubéajë' quez queë' Dios bônachi queë' na', ate' nayárigaca tu lu nisa le naca xtídzë'ë.

27 Gútië' uláz quégaquië' para gaca usudxinë' légaquië' lahuë' Dios, nácagaquië' ca tu lari' lachi, bití' nuá' bösaj le në'aj, en bití' naxú'una, en bití' zoa nitú le run ditaj le, pero runë' ga ilácagaquië' idú dxi'a, cuntú nu gaca bi innë' quégaquië'.

28 Ral-la' idxí'ili'-nu nigula que queë'li' ca na' nadxí'i cuinli'. Nu bönni' nadxí'inë'-nu nigula queë', nadxí'i cuinë'.

29 Cuntú nu bönni' runi zi' cuinë', pero rugahuë', en run chi'i cuinë', ca runë' ca' Cristo, ca rúnlenë' bônachi queë',

30 nupa dzágagaca idútë le naca cazë'.

¡Rë'u ni dzágaru' le naca cazë' Lë'!

¡Néquiniru' xipélë'ë, en dxita queë'!

31 Lësca' caní nazúaj lu guichi lá'ayi le rnna: "Que lë ni na' tu bönni' ral-la' ucá'anë' xuz xinë'ë para tsöjsóalenë'-nu nigula queë', ate' irópatë' ulu'huóáquië' tuz."

32 Lë na' nazúaj lu guichi ni ruluf'i lahui tu le naca idútë li, ate' neda' réquida' ruí'í didza' ca' ca naca queë' Cristo, en quégaca bônachi queë' na'.

33 Lësca' ruí'í didza' ca naca queë'li'. Yúgu'téli' libí'ili', bönni', ral-la' idxí'ili'-nu nigula que queë'li' ca na' nadxí'i cuinli', ate' yugu' nigula ral-la' ilunnu bal bönni' que quégacanu.

6

1 Libí'ili', yugu' bí'ido', ral-la' gunli' ca rnna xtídzagaquië' xuz xiná'ali' para caní gunli' ca rnna xtídzë'ë Xanru'. Ral-la' gunli' le naca tsaquí'.

2 Xibá zí'aló na' benë' Dios le nachë' tu le guzxi' lu në'ë gunë', naca lë na' rnna: "Ben bal xuz xinó'o,

3 ate' gaca dxi'a quiu', ate' xidzé su' ibanu' yödzölió ni."

4 Libí'ili', yugu' xuz, bití' gun leli' zxi'inili', pero buli'xón légacabi', en guli'sína' légacabi', en buli'sëdi légacabi' ca raza ládxe'ë Xanru'.

5 Libí'ili', núlöli' nácali' bönni' nadó'ogaca, guli'gún ca rnna xtídzagaquië' xanli' luyú ni idú ládxi'li', gunli' légaquië' bal lu yöl-la' radxi queë'li', en gunli' xichíngaquië' ca ral-la' gunli' xichinë' Cristo.

6 Guli'gún xichíngaquië', calégasö cate' ni' tu'yúë' libí'ili' para urúajli' dxi'a lógaquië', pero idú ládxi'li' guli'gún xichíngaquië' ca raza ládxe'ë Dios, ca na' ral-la' gunli' xichinë' Cristo.

7 Idú ládxi'li' guli'gún xichíngaquië', ate' caní gaca, gunli' xichinë' Xanru', en calégasö xichíngaca bônachi.

8 Nöz quézili' ca gunë' Xanru'. Ubi'ë que queëru' tsca naca le dxi'a runru' sal-la' nadzanru', o sal-la' nácaru' bönni' nadó'ogaquië'.

9 Libí'ili', nacuá' queë'li' bönni' nadó'ogaca, guli'gún dxi'a caní quégaca huen dxin queë'li' na', en bití' uzéli' ba nadx légaquië'. Guli'tsöjné ca naca queë'li', yú'uli' lu në'ë Xanru' zoë' yehua' yubá la' ca nácatë quégaquië', ate' Lë' bití' rutsë'ë ca runë' que que bônachi.

Dios runnë' queëru' le tun chi'i rë'u

10 Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'.

11 Guli'gún chi'i cuinli', ugunli' dxin yugu' le runnë' Dios queëru', le tun chi'i rë'u, para gaca sóali' tsutsu cate' guë'ëni si' bë' tu' xihui' libí'ili'.

¹² Biti' ridíl-lalenru' bönachi néquiquequini bëla', en dxita, pero ridíl-lalenru' yöl-la' unná bë' quégaca bö' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacuá' yödzölió ni ga naca chul-la que dul-la'.

¹³ Que lë ni na':

Guli'sí' yúgu'të le runnë' queëru' Dios le tun chi'i rë'u,
para cate' idxín queëru' dza ni' ilaca le ná'agaca xihui',
gaca guá' ilenli',
en cate' údxi gunli' caní, ugá'anali' tsutsu.

¹⁴ Guli'sóa tsutsu.

Guli'sí' le naca idútë li,
le gaca queëli' ca tu guídi guga' lë'ëli'.
Guli'gaca tsahui' tu' gun chi'i libí'ili' le naca tsahui'
ca run tu lari' yödx run chi'i luchu'ë bönni' rejë' gudil-la.

¹⁵ Guli'sóa sina' para gunli' libán que didza' dxi'a
le ribequi dxi icja ládxi'do'oru' lahuë' Dios,
ca na' ruzóa cuinë' sina',
en ridë'ë xiráchuë' tu bönni' rejë' gudil-la.

¹⁶ Le naca lo, yöl-la' réajlë' queëli' Cristo
gaca queëli' ca tu le naca tsutsu uzëli' loli',
para cabí gál-la' yugu' le usán tu' xihui' libí'ili',
le ná'agaca ca yaga túchi'do' zoa guí' láhuilöguequi.

¹⁷ Yöl-la' rusólá gaca queëli' ca tu lu'u guié le gun chi'i ícjali'.
Xtídzë'ë Dios gaca queëli' ca tu guié tuchi'
le runnë' Dios Bö' Lá'ayi queëru',
para utíl-lalenru' le naca xihui'.

¹⁸ Guli'gún yúgu'të lë ni,
en buli'lidzë' Dios inábili'-në' gácalenë' libí'ili'.
Buli'lidzatica'së' Dios zóalenë' Dios Bö' Lá'ayi libí'ili'.
Para gunli' caní ral-la' usubán ládxi'li' en cabí huőaj ládxi'li',
inábili'-në' Dios gácalenë' nupa néquiquequi queë'.

¹⁹ Buli'lidzë' Dios, inábili'-në' gácalenë' ca' neda', en gunnë' quia' didza'
cate' ral-la' gu'a didza', en gunë' ga gaca' rugu ladxí' cate' guna' libán para
uzéajni'ida' bönachi ca naca le bigachi' que didza' dxi'a.

²⁰ Dios budödë' lu na'a didza' dxi'a na' para guna' libán que, ate' tu' bena'
caní yu'a lidxi guié ni. Buli'lidzë' Dios channö, inábili'-në' gunë' ga gaca' rugu
ladxí' para guna' libán que didza' dxi'a ca ral-la' guna'.

Ruúdx didza' bë'ë Pablo

²¹ Tíquico, bóchi'ru' na' nadxí'iru'-në', en runë' xichinë' Xanru' idú ládxe'ë,
quíxjoi'inë' libí'ili' idú ca raca quia', en ca runa' neda' ni.

²² Que lë ni na', isöl-la'a-në' queëli', ate' ulu'i'inë' libí'ili' ca raca queëtu', ate'
caní utipë' ládxi'li'.

²³ Rinábida'-në' Xúziru' Dios, enca' Xanru' Jesucristo gunë' ga soa dxi icja
ládxi'do'oli', en gata' queëli' yöl-la' nadxí'i le dzaga yöl-la' réajlë' queëli' Cristo,
yúgu'tëli' na' néquili' queë'.

²⁴ Le ruzá' ládxe'ë Dios queëru' gaca queëli', yúgu'tëli' na' nadxí'ili'-në'
Xanru' Jesucristo, naca idú yöl-la' nadxí'i queëli' Lë'. ¡Ca' gaca!

DIDZA' GUSÖL-LË'Ë PABLO YÖDZÖ FILIPOS

Pablo rugapë' Dios bönachi queë' Cristo nacua' Filipos

¹ Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo.

² Rinábida'-në' Xúziru' Dios, enca' Xanru' Jesucristo gunnë' queëli' le ruzá' ládxë'ë queëru', en gunë' ga soa dxi icja ládxi'do'oli'.

Pablo rinábinë' Dios bi gunë' quegaca bönachi ta'yéajlë' Cristo

³ Rea'-në' Dios: "Xclenu", cate' rizá' ládxa'a queëli'.

⁴ Cate' rulidza'-në' Dios, en rinábida'-në' gácalenë' libí'ili', rudzeja ládxa'a

⁵ tu' røjneda' ca bënlenli' neda' tsözxön dxin que didza' dxi'a. Gusí' loli' runli' dxin na' dza ni' si' biyónili', en runli' le ga ridxintë na' a dza.

⁶ Dios gusí' lahuë' runë' tu le naca dxi'a lu icja ládxi'do'oli'. Ruzxöni ládxa'a Lë' gúntica'së' caní' ga idxintë dza huödë' Jesucristo.

⁷ Ca na' rizá' ládxa'a queëli' naca ca ral-la' guna' tu' nadxí'ide'eda' libí'ili'. Yúgu'tëli' ruzí'ili' xibë tsözxön len neda' le ruzá' ládxë'ë Dios queëru', tsanni ni' yu'a lidxi guié, en lësca' caní' benli' cate' ni' bë'a didza', cate' na' bena' libán que didza' dxi'a le bena' ga bidxín queëli' tsaz.

⁸ Nözinë' Dios ca nadxí'ide'eda' libí'ili'. Naca ca na' nadxí'ide'enë' Lë cazë' Jesucristo rë'u.

⁹ Rinábida'-në' Dios gunë' ga idxí'iröli' luzá'ali', en gáta'da' queëli' yöl-la' rácada', en yöl-la' réajni' i idú

¹⁰ para gaca cöli' le nácatërö dxi'a. Channö gaca caní' queëli', gácali' idú dxi'a, ate' cuntu nu gaca bi innë queëli' dza ni' huödë' Cristo.

¹¹ Le nácali' naca bë' le naca dxi'a runë' Cristo lu icja ládxi'do'oli' para ilá' lahui yöl-la' zxön queë' Dios, en gaca queë' yöl-la' ba.

Zóaru' nabanru' para gácaru' ca náquië' Cristo

¹² Böchi' luzá'ado', rë'ënda' inözili' lë ni: Yúgu'të le guca quia' gulácalen neda' para guzxéqui'röda' bena' libán que didza' dxi'a.

¹³ Caní' guca, yúgu'të ni' a ná'agaquië' bönni' yúlahui', en ia'zíca'rë' bönni' ni nözguequinë' yu'a lidxi guié ni tu' runa' xichinë' Cristo.

¹⁴ Tu' yu'a neda' lidxi guié ni ben ga látu'biqui' yúgu'të böchi'ru' nácagacaré' rugu ladxí', ate' tu'zxöni ládxi'gaquië' Xanru', en bití'rö tádxinë' tunë' libán que xtídzë'ë Dios.

¹⁵ Le nácatë bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládxi'gaquië'.

¹⁶ Yugu' bönni' tu'zxé'enë' na' tunë' libán queë' Cristo lu yöl-la' run ba zxön cuíngaquië', en calëga idú ládxi'gaquië'. Të'ënnë' ulu'saca' zi'ë neda' tsanni ni yu'a lidxi guié.

¹⁷ Yugu' bönni' idú ládxi'gaquië' na', lu yöl-la' nadxí'i queégaquië' tunë' libán queë', tu' nözguequinë' Dios caz budödë' lu na'a dxin runa', runa' libán que didza' dxi'a.

¹⁸ Bití' run lë na' ga rö'a böniga. Rudzëjada' tu' raca libán queë' Cristo nácati'tës, sal-la' tunë' libán idú ládxi'gaquië' o bití' tunë' le caní'.

Na'a, rudzéjaröda'

¹⁹tu' chinözida' ulá' lu le raca quia', yu'a lidxi guié ni, tu' rulídzali'-nē' Dios, en tu' rácalenē' Dios Bö' Lá'ayi neda'. Náquiē' Bö' risól-lē'ē' Jesucristo queēru'.

²⁰Caní rē'ēnda', en ruzxōni ládxa'a-nē' Dios, gunē' ga biti' utuí'ida', en gunē' ga gaca gu'a didza' lu yöl-la' rugu ladxi', ate' lu na'a neda' gácatca'sō yöl-la' ba queē' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'.

²¹Ca runi neda', channō zoa' nabana', naca para gaca' ca náquiē' Cristo, en channō gátia', naca tu le uzí'ira' xibé.

²²Channō huáca guna' dxin le gácalen didza' dxi'a queē' Cristo channō sóasa' ibana', biti' nōzda' bízxilō ral-la' cōa'.

²³Naca bōniga cōa'. Rē'ēnda' gátitea' para tsōjsóalentea'-nē' Cristo, tu' gácatērō dxi'a quia',

²⁴pero runrō bayudxi sóasa' ibana' para séqui'da' gácalena' libí'ili'.

²⁵Tu' chinözida' naca caní, nōzda' ca' ugá'analena' libí'ili' para gácalena' libí'ili' para gácarō idú ca réajlē'ēli' Cristo, ate' udzéjarōli' tu' réajlē'ēli' Lē'.

²⁶Caní naca, udusóalena' libí'ili' leyúbólō, le gun ga tsaz ládxi'li'-nē' Jesucristo ni'a que le gunē', gácalenē' neda'.

²⁷Guli'gúí'sō ladxi' gácali' ca sa'yéaj didza' dxi'a queē' Cristo. Caní gaca, channō uduyúa' libí'ili' o channō soa' zi'tu', huayōnida' nácali' tsutsu, en nácali' tuz, runli' tsōzxōn dxin que le réajlē'ēru' le za' queēru' ni'a que didza' dxi'a.

²⁸Biti' gúí'ili' nupa biti' ta'lé'e libí'ili' dxi'a lataj ilún gadxi libí'ili'. Lē ni uluí' légaquiē' ila'nítie', pero uláli' libí'ili', le gaca bē' rácalenē' Dios caz libí'ili'.

²⁹Dios ru'ē libí'ili' lataj gunli' xichinē' Cristo, calégasō ca réajlē'ēli' Lē', pero lēscá' ca riguí' rizáca'li' cate' runli' xichinē'.

³⁰Na'a, gaca gunli' neda' tsōzxōn gúí'li' ládxi'ru' gunru' libán que didza' dxi'a. Bilé'e quézili' ca gudí' guzácá'a cate' bena' caní zí'alō, ate' riyōnili' ca riguí' rizáca'a ca' na'a.

2

Gúquiē' Cristo nōxaj ladxi', ate' bidéli'nē' yöl-la' zxōn

¹Cristo runē' ga rutipa ládxi'li', en lu yöl-la' nadxí'i queē' ruhuéchi' ládxe'ē libí'ili', en runē' ga nácali' tuz len Dios Bö' Lá'ayi, en ga nadxí'ili' luzá'ali', en ga ruhuéchi' ládxi'li' luzá'ali' tuli' ia'tuli'.

²Na'a guli'gún ga udzéjarō ládxa'a. Para gunli' caní, ral-la' gácali' tuz len luzá'ali', en gaca lēbisō ca nadxí'ili' luzá'ali' tuli' ia'tuli'. Lēscá' caní ral-la' gácali' tuz lu bō' naca cázali', en ca rizá' ládxi'li'.

³Ca naca le runli', biti' bi ral-la' gunli' lu yöl-la' rudul-li' queēli', o para gun ba zxōn cuinli', pero dxí'ado' ral-la' gunli' yúgu'tē, en cabí guéquili' nadéli'rōli' libí'ili' ca luzá'ali'.

⁴Guli'gúí' ladxi' gaca dxi'a ca' que luzá'ali', en caléga queézili'.

⁵Ral-la' gácali' nōxaj ladxi' ca na' gúquiē' Jesucristo nōxaj ladxi'.

⁶Lē' naca cazē' lēbisō ca náquiē' Dios caz, pero biti' gúquinē' ral-la' gunē' bayudxi ugá'anē' lēbisō ca na' náquiē' Dios.

⁷Bucá'ana cazē' yúgu'tē le napē', en ben cuinē' ca tu bōnni' nadó'o. Guljē' ca talaj bōnachi, en gúquiē' idú bōnachi.

⁸ Cate' ni' náquië' bönni', gúquië' nõxaj ladxì, en benë' ca rnna xtídzë'ë Dios, en gútië'. Gudë'ë lë'e yaga cruz ca na' raca queë' nu bönni' nabáguë'ë dul-la'.

⁹ Que lë ni na' Dios buchisé' Lë', en benë' ga náquië' lo ni' yehua' yubá, en benë' ga lë' tu le nácatëro lo ca yúgu'të lágaca bõnachi.

¹⁰ Caní benë' Dios para cate' ila'yõni ca na' lë' Jesús, ulu'zechu zxíbigaca yúgu'të nupa nacua' yehua' yubá, en lu yõdzõlió, en lu lataj chul-la.

¹¹ Yúgu'të' ila'guáxjõ'ë yálajdo' Jesucristo náquië' Xanru' para gaca yõl-la' ba queë' Xúziru' Dios.

Ral-la' gácaru' ca tu le ta'gú'u bení' yõdzõlió ni

¹² Que lë ni na', böchi' luzá'ado', ca na' benli' ca rnna xtídzá'a cate' ni' zóalena' libí'ili', runrõ bayudxi gunli' ca rnna xtídzá'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintë dza údxi usõlë' libí'ili'. Guli'gún caní lu yõl-la' radxi queëli' Lë', en lu yõl-la' rizzizi.

¹³ Lë cazë' Dios runë' dxin lu icja ládxi'do'oli'. Runë' ga rë'ënili' gunli' le raza ládxe'ë Lë', en runë' ca' ga séqui'li' gunli' lë na'.

¹⁴ Guli'gún yúgu'të le ral-la' gunli', en biti' bi'innëli' que, en biti' til-la dídza'li'.

¹⁵ Caní ral-la' gunli', para cabí gaca nu bi innë queëli', pero caní gácali' ca zxí'ini cazë' Dios, nácali' idú dxi'a yõdzõlió ga ni zóali' ladaj bõnachi biti' náçagaca tsahui', en nucá'anagaca Dios. Libí'ili' rigú'uli' bení' ládjagaquië' ca na' ta'gú'u bení' bõlaj lúzxiba cate' ni naca chul-la,

¹⁶ cate' ruí'ili' lógaquië' didza' ibániguequinë'. Channõ caní gunli', huáca udzëjadë'eda' ni'a que le naca cázali' dza huõdë' Cristo, tu inõzda' biti' guca nítisõ guzõa bõnadxi gátia', en calëga nítisõ bena' dxin.

¹⁷ Yõl-la' réajlë' queëli' Cristo naca tu le raza ládxe'ë Dios. Sal-la' gun bayudxi gátia' para gaca idú yõl-la' réajlë' queëli' Lë', udzëjada', en uzí'lëna' xibë tsõzxõn yúgu'tëli'.

¹⁸ Lëscá' caní ral-la' udzëjali' libí'ili', en uzí'lëni' tsõzxõn neda' xibë.

Ca tunbì' bi'i Timoteo, en bi'i Epafrodito

¹⁹ Channõ caní rë'ënë' Xanru' Jesús, runa' lõza isõl-la'tea'-bi' bi'i Timoteo ga zóali', ate' nírõ udzëjada' cate' huõdabi' ududíxjõ'ibi' neda' catëze raca queëli'.

²⁰ Túzibi' lëbi' rizá' ládxi'bi' ca na' rizá' ládxa'a neda', en ruí'ida' ládxi'bi' libí'ili'.

²¹ Yúgu'të bönni' ia'zica'rõ, le naca quegacasë' tuí' ládxi'gaquië'. Biti' tuí' ládxi'gaquië' xichinë' Cristo.

²² Nõz quezili' ca benbi' bi'i Timoteo, ca na' burúajbi' dxi'a. Bénlenbi' neda' tsõzxõn dxin que didza' dxi'a, ate' nácabi' quia' ca tubi' bi'i bönni' rúnlenbi'-në' tsõzxõn xúzibi' dxin.

²³ Isõl-la'-a-bi' bi'i Timoteo ga zóali' cate' inõzda' nacxi gaca quia' ni

²⁴ sal-la' ruzxõni ládxa'a-në' Xanru' gunë' ga uduyútea' libí'ili'.

²⁵ Lëscá' réquida' run bayudxi isõl-la'-a-bi' bí'i böchi'ru' Epafrodito ga zóali'. Bi'i ni bénlenbi' neda' tsõzxõn dxin queë' Cristo, ate' gudí'lalentu' tu' xihuí'. Libí'i cázali' gusõl-la'li'-bi' ga zoa' para gácalenbi' neda'.

²⁶ Lë cázabi' rë'ënibi' uduyúbi' libí'ili', en ruí'ida' ládxi'bi' libí'ili' tu' biyõnili' ben bayá' queëbi'.

²⁷ Le nácatë gü'ibi', en guqui gátibi', pero buëchi' ládxe'ë-bi' Dios, en calëgasõ lëbi', pero buëchi' ládxe'ë ca' neda', para cabí isëbirõ ládxa'a ca na' risëbi ládxa'a na'a.

²⁸ Que lè ni na', gú'uniröda' isö-lá'a-bi' queéli' para gaca udzėjali' leyúbölö cate' ulé'eli'-bi', en bítirö isëbi ládxa'a neda'.

²⁹ Gulí'sí' lu ná'ali' lëbi' lu yöl-la' rudzeja queéli', tu' nácabi' bi'i böchi'ru' réajlë'ëbi' Cristo. Gulí'gún bal yúgu'të bönachi nácagaca ca nácabi' lëbi',

³⁰ tu' guzóa bönadxi queëbi' gátibi' tu' benbi' xichinë' Cristo, en tu' gúcalenbi' neda' uláz queéli'.

3

Le naca idú tsahui'

¹ ¡Na'a, böchi' luzá'ado', buli'dzeja tu' nácali' tuz len Xanru'! Biti' rupixzaj neda' uzúaja' queéli' leyúbölö lè na' buzúaja' queéli' zí'alö, tu' gácalen lè ni libí'ili'.

² Gulí'gún chi'i cuinli' lógaca nupa ni' tuá' dö'. Nácagaca ca yugu' bö'cu' sínia', nupa na' tun bayudxi irugu lu xipéla'gaquië' bönni' le naca bë' nazí' lu ná'gaquië' xtídzë'ë Dios.

³ Rë'u nadéli'ru' lè na' naca idütë li, le naca bë' nazí' lu ná'aru' le runnë' queëru' Dios. Tu' réajlë'ëru' Dios, zóalenë' Dios Bö' Lá'ayi rë'u, ate' rudzëjaru' tu' nácaru' tuz len Jesucristo. Biti' ca' ruzxöni ládxi'ru' tu' le runru' rácasö queëru'.

⁴ La'tu' ruzxöni ládxi'ru' lè ni, lësca' neda' chinadéli'da' bi' uzxöni ládxa'a. Channö zoë' nu bönni' réquinë' ulé' tu' nacua' le nunë', neda' nadéli'röda' ca bönni' na'.

⁵ Gurugu lu xipéla'a lè na' naca bë' cate' ni' gúquida' xunu' dza.

Gulja' ladaj di'a dza quegaca bönachi Israel.

Nababa' xzí'ini xi'sóë' Benjamín.

Xuz xiná'a nácagaquië' idú bönachi hebreo.

Guca' bönni' yudo' fariseo ca na' bena' ca rinná bë' xibá queë' Dios.

⁶ Bë'da' ládxa'a xibá na' ga bidxintë gudxia ládxa'a bönachi queë' Cristo.

Tsca gaca gáquië' tsahui' tu' bönni' tu' runë' ca rinná bë' xibá na', cuntu nu bi guca innë quia'.

⁷ Na'a, yúgu'të lè na' bena' zxön zí'alö, nuzóa' tsölá'alö tu' néquida' queë' Cristo.

⁸ Calégasö yugu' lè na', pero nuzóa' ca' tsölá'alö yúgu'të le dë, para gaca gúnbe'eda'-në' Xanru' Jesucristo, le nácaterö lesaca' ca yúgu'të lè na'. Para gúnbe'eda' Lë' gurú'una' ní'ilö yúgu'të, en réquida' naca ca bëbu, para uzi'a xibë' Cristo,

⁹ en para gaca' tuz len Lë'. Nuhuóaca' tsahui', calëga tu' runa' ca rinná bë' xibá na', pero Dios caz bunë' neda' tsahui' tu' réajlë'a Cristo, ca na' ruünë' tsahui' yúgu'të nupa ta'yéajlë' Lë'.

¹⁰ Rë'ënisida' gúnbë'a-në' Cristo, en sóalen yöl-la' huáca queë' Dios neda', lè na' busubán Cristo lu yöl-la' guti, ate' guna' Lë' tsözxön, qui'i saca'a ca na' gudí'i guzáquë'ë Lë', en soa' sina' gátia' ca gútië' Lë',

¹¹ tu' runa' löza Dios, usubanë' ca' neda' lu yöl-la' guti.

Le runru' para idxinru' xilátjaru'

¹² Biti' rnní'a' chinadéli'da' yúgu'të lè ni gunnë' quia', en bití' réquida' china'ca' idú tsahui'. Na'a, runa' bayudxi idéli'da' yúgu'të lè na', tu' chibidéli'në' Jesucristo neda'.

¹³ Böchi' luzá'ado', bití' ca' nadéli'da' yugu' lè ni, pero tuz le runa' bayudxi. Ruzál-la ládxa'a le chibidéli'da', ate' runa' bayudxi idéli'da' le za'.

14 Runa' ca runë' tu bönni' rixiti'dë'ë para idxinë' xilatjë' para idëli'në' tu le uzi'ë xibë. Cani runa' para idëli'da' lë na' bulidzë' Dios rë'u para gata' queëru' ni' yehua' yubá tu' nácaru' tuz len Jesucristo.

15 Cani ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida'-në' Dios uzéajni'inë' libí'ili'.

16 Na'a, ca naca lë na' bidëli'ru', ral-la' gúntica'siru' caní.

17 Böchi' luzá'ado', guli'gún ca na' runa' neda'. Chibulu'itu' libí'ili' ca ral-la' gunli'. Buli'yú ca tun nupa na' tun ca na' bentu' netu'.

18 Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxia quia', rnníá': Le tunë' zían bönni' run ga nácagaquië' ca nupa bití' ta'lé'e Cristo dxi'a, tu' tu'zöë' tsólá'alö le ben cazë' Lë' lë'e yaga cruz.

19 Yugu' bönni' tunë' caní, tsöjáciië' lu guí' gabila, tu' naca le ta'zësö ládxi'gaquië' dios queégaquië', ate' tun ba zxön cuíngaquië' ni'a que lë na' ral-la' gun ga ulu'tuí'inë'. Tuí'i ládxi'së le dë yödžölió ni,

20 pero rë'u ni ruí'i ládxi'ru' le dë yehua' yubá ga nabábaru', en ribözaru' dza huödë' Xanru' Jesucristo, Nu rusölá rë'u, urúajë' yehua' yubá na'.

21 Lë' utsë'ë idútë le naca cazaru', le riniti caz, en gunë' ga huóaca ca naca idútë le naca cazë' Lë', le sóatica'sö. Cani gunë' len yöl-la' huáca zxön queë' le ugunë' dxin para inná bé'enë' yúgu'të.

4

Ral-la' udzëjalentica'siru'-në' Xanru'

1 Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxi'ide'eda' libí'ili', en ré'ënda' uduyúa' libí'ili'. Runli' ga rudzëjada', en nácali' ca tu le ruzi'a xibë.

2 Libí'ili', Evodia, en Síntique, ráta'yua' loli' gácali' tuz ca ral-la' ilaca nupa néquiquequi queë' Xanru'.

3 Na'a, böcha'a idú, ré'ënda' gácalenu' irópanu ni, tu' gulúnlennu neda' dxin, cate' bentu' libán que didza' dxi'a. Lësca' bulu'dzáciië' Clemente, en ia'zíca'rë' luzá'a na' netu'. Chinazúajgaca lágaquië' yehua' yubá ga na' nazúajgaca lágaca nupa chinadëli'gaca yöl-la' na'bán idú.

4 ¡Buli'dzëjalentica'sö-në' Xanru'!

Leyúbölö, rnníá': ¡Buli'dzeja!

5 ¡Guli'gaca dxi'i ladxi' len yúgu'të bönachi!

¡Chizóa huödë' Xanru'!

6 Bití' ubi ugu'ili', pero guli'nabi-në' Dios le riquínili', en guli'guíë': "Xclenu'" ca naca yúgu'të lë na' rinábali'.

7 Dios gunë' ga gaca queëli' le cuéqui dxi icja ládxi'do'oli', lë na' nadödirö bë' ca le gaca ila'yéajni'i bönachi. Lë na' ribequi dxi icja ládxi'do'oru' gun chí'i icja ládxi'do'oli', en le rizá' ládxi'li' tu' nácali' tuz len Jesucristo.

Ral-la' sa' ládxi'ru' le nácagaca dxi'a

8 Ga ruúdxitë, böchi' luzá'ado', guli'sá' ládxi'li':

Yúgu'të le naca dxi'a, en le naca bica' ba,
en le naca idútë li, en le naca idú,
en le naca tsahui', en le naca ba'a,
en le naca lachi, en le ral-la' gunru' bal.

⁹ Guli'gún ca na' busédida' libí'ili', lë na' guzxi' lu ná'ali' tsca na' bë'lena' libí'ili' didza', en tsca na' bena' ga ni' zóali'. Dios, Nu runna queëru' le ribequi dxi icja lãdxi'do'oru' sóalenë' libí'ili'.

Le tsahui' gulunë' yugu' bönni' Filipos queë' Pablo

¹⁰ Rudzëjalenda'-në' Xanru' tu' ruí'i lãdxi'li' neda' leyúbölö. Biti' rnnía' gul-la lãdxi'li' neda', pero biti' guta' queëli' lataj gácalenli' neda' zí'alö.

¹¹ Lësca' caní, bití' rnnía' caní tu' zoa bi riyadzaj quia', tu' nazëda' tsaza lãdxa'a le dësö quia'.

¹² Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nóljada' o nabila riduna', en sal-la' dëda' quia' o zoa bi riyadzaj quia'.

¹³ Yúgu'të huazéqui'da' tu' rutipë' Cristo lãdxa'a.

¹⁴ Benli' dxi'a cate' ni' gúcalenli' neda', en butípali' lãdxa'a cate' gudí'i guzjáca'a.

¹⁵ Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yöjena' libán que didza' dxi'a. Tsca nacuá' bönachi queë' Cristo, cúnturö nu gúcalen neda', pero libí'isili' gúcalenli' neda'. Gusöl-la'li' quia' bi bunödzejali', tu' guzxi' lu ná'ali' libán bena' neda'.

¹⁶ Tsanni ni' guzóa' yödzö Tesalónica, tu' chopa luzuí gusöl-la'li' quia' le bunödzejali' cate' ni' biyadzaj quia'.

¹⁷ Biti' ruí'i lãdxa'a bi si'a, pero rë'ënda' gáta'rö queëli' le uzí'ili' xibé yehua' yubá.

¹⁸ Rea' libí'ili': Chiguzxi'a yúgu'të lë na' gusöl-la'li' quia', ate' gudödité bë' tsca le biyádzjada'. Ben ga naca caní lë na' gusöl-la'li' lu ná'abi' bi' i Epafrodito. Lë na' bunödzejali' naca ca tu le rilá' zxi'xi le ridxintë lahuë' Dios, en ca tu le rigú'uru' lahuë' Dios le raza lãdxë'ë.

¹⁹ Dios gunnë' queëli' yúgu'të le riyadzaj queëli', tsca naca yöl-la' tsahui' röö yehua' yubá, tu' nácali' tuz len Jesucristo.

²⁰ ¡Gácatca'sö queë' Xúziru' Dios yöl-la' ba! ¡Ca' gaca!

Yugu' bönachi queë' Cristo tu' gapa Dios luzë' equequi

²¹ Uláz quia' neda', guli'gapa Dios nupa ni' néquiguequi queë' Dios tu' nácagaca tuz len Jesucristo. Tu'gapë' Dios libí'ili' böchi' luzá'aru' núnquaqië' neda' tsözxön ni.

²² Lësca' caní, yugu' bönni' huen dxin nacu'ë lidxë' bönni' rinná bë'ë idú luyú Roma tu'gapë' Dios libí'ili'.

²³ Rinábida'-në' Xanru' Jesucristo uzá' lãdxë'ë queëli' yúgu'tëli'. ¡Ca' gaca!

DIDZA' GUSÖL-LĒ'Ē PABLO YÖDZÖ COLOSAS

Pablo rugapë Dios bönachi queë Cristo nacu'ë Colosas

¹ Neda', Pablo, naca' gubáz queë Jesucristo tu' rë'ënë' Dios caní, ate' dzágabi' bi'i böchi'ru' Timoteo neda'.

² Rugapa' Dios libí'ili', zóali' Colosas. Nácali' böchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queëli', en gunë' ga soa dxi icja ládxi'do'oli'.

Pablo rulidzë Dios, en rë Lë: "Xclenu"

³ Rética'stu'-në' Dios, Xuzë Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queëli'

⁴ tu' biyönitu' didza' ca réajlë'ëli' Jesucristo, en ca nadxí'ili' yúgu'të nupa néquiguequi quez queë' Dios.

⁵ Caní runli' tu' runli' löza le nuzóë' Xanru' queëli' ni' yehua' yubá, lë na' biyönili' que cate' bé'lentü' libí'ili' didza', le naca löza sí'ili' ni'a que didza' dxi'a.

⁶ Didza' dxi'a na' bidxín queëli' ca ridxín ca' iduté yödzülió. Run dxin, en raca libán que, iduté yödzülió, la' tuz ca raca ga zóali', dza ni'te ga ridxintë na'a dza, cate' ni' biyönili', en bënbe'ëli' iduté le ruzá' ládxë'ë queëru' Dios.

⁷ Epafras, bönni' nadxí'iru'-në', busëdinë' libí'ili' lë ni. Lë' rúnlenë' netu' tsözxón dxin, en rácalenë' libí'ili'. Náquië' huen dxin idú queë' Cristo.

⁸ Bönni' ni gudíxjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunli' caní.

⁹ Que lë ni na' netu' ca', dza ni'te ga ridxintë na'a dza, tu' réquibe'etu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbe'ëli' idú le rë'ëni quezinë' Lë', en gunnë' queëli' yúgu'të yöl-la' rácada', en yöl-la' réajni'i le rigu'ë Dios Bö' Lá'ayi rë'u.

¹⁰ Caní rinábitu'-në' para gaca gunli' ca ral-la' ilún nupa néquiguequi queë' Xanru', gunli' yúgu'të le raza ládxë'ë Lë', en séqui'li' gunli' yúgu'të le naca dxi'a, en gácarö idú ca núnbe'ëli'-në' Dios.

¹¹ Rinábitu'-në' utipë' ládxi'li', en gunnë' queëli' yöl-la' huáca idú queë', para gaca guá' ilenli' yúgu'të, en cözali' zxön ladxi', en udzeja ládxi'li'.

¹² Lu yöl-la' rudzeja queëli' guli'guië' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözxón nupa néquiguequi quez queë'.

¹³ Dios Xuz na' busölë' rë'u lu na' nu rinná bé' lataj chul-la, en budödë' rë'u ga na' rinná bé'ë Zxí'ini cazë', Nu nadxí'inë'.

¹⁴ Zxí'inë' na' böá'uë' rë'u, tu' gútië' uláz queëru', ate' buniti lahuë' rë'u ca naca dul-la' gubágaru'.

Nuhuócaru' tuz len Dios tu' gútië Cristo uláz queëru'

¹⁵ Cristo náquië' tuz ca náquië' Dios caz, Nu biti' gaca ilé'eru'. Zoa cazë' Lë' zí'atëlö ca yúgu'të le benë' Dios.

¹⁶ Lu në'ë Cristo benë' Dios yúgu'të le dë, le nacua' lúzxiba, en le nacua' luyú, yugu' le rilé'eru', en yugu' le cabí gaca ilé'eru', lë na' nácacaga lataj lo, en yugu' yöl-la' unná bé', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibé Lë'.

¹⁷ Cristo zoa cazë' zí'alö ca yúgu'të le dë, ate' yúgu'të nacuá'tica'sö ni'a queë' Lë'.

¹⁸ Cristo náquië' Xángaca bönachi queë', en runödzejë' quégaquië' yöl-la' na'bán. Náquië' ca' Nu gusi lo bubán tsaz lu yöl-la' guti. Zí'alö Lë' bubanë' tsaz lu yöl-la' guti para tsépisëtërë' ca yúgu'të le dë.

¹⁹ Caní guca, tu' guyaza ládxë'ë Dios Xuz sóalen Cristo idütë le naca cazë' Lë'.

²⁰ Ni'a que le benë' Cristo, Dios benë' ga gaca ulu'huóáca tuz len Lë' yúgu'të le dë, le nacuá' luyú, en le nacuá' lúzxiba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

²¹ Libí'ili', zí'atëlö nulá'alenlí'-në' Dios, en gúcali' ca yugu' bönni' biti' ta'lé'enë' Dios dxi'a lu icja ládxi'do'oli' ni'a que dö' biá'ali', pero na'a chibunë' libí'ili' tuz len Lë'.

²² Caní guca, tu' budödi cuinë' Cristo, en gútië' uláz queëli' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntu nu bi gaca innë queëli'.

²³ Caní gaca channö ugá'anali' tsutsu ca réajlë'ëli' Cristo. Gácali' ca tu yu'u zxoá ga rë' xilibi zö'ö que, en biti' tseaj bö' ládxi'do'oli' ca runlí' löza didza' dxi'a biyönili', lë na' raca libán que idütë yödzülió le benë' Dios zzan lúzxiba. Dios buzöë' neda', Pablo, para gaca' huen dxin que didza' dxi'a na'.

Dxin budödë' Dios lu në'ë Pablo

²⁴ Rudzëjada' na'a ca naca le riguí' rizáca'a para gácalena' libí'ili', en ruúdxí rizá'a lu idütë le naca' le riguí' rizáca' lena' tsözxön Cristo uláz que idú le naca cazë' Lë', le naca bönachi queë'.

²⁵ Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios.

²⁶ Ruzéajni'ida' bönachi le nagachi', lë na' bigachi' dza ni'te, ate' cuntu nu benbë' le, pero na'a Dios chibuluí'inë' bönachi néquiquequi quez queë' ca naca que.

²⁷ Dios gú'uni quézinë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yöni bönachi izá'a. Caní rruna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

²⁸ Runtu' libán queë' Cristo, en rusá'atu' ládxi'gaca yúgu'të bönachi, ate' ruséditu' léguequi idütë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' náçagaca tuz len Jesucristo.

²⁹ Para gaca caní runa' dxin, en ruí'i ládxa'a údxi guna' lë ni, rugúna' dxin yöl-la' huáca idú na' runnë' Cristo quia'.

2

¹ Ré'ënda' inözili' ruí'ida' ládxa'a runa' le gácalen libí'ili', enca' le gácalen bönachi yödzo Laodicea, en le gácalen ca' yúgu'të nupa biti' ila'lé'eni neda'.

² Runa' caní para ila'dipa ládxi'gaquië', en iláquië' tuz lu yöl-la' nadxi'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queëru'. Caní raca para ilúnbë'ë le bigachi' queë' Dios Xuz, lë na' naca cazë' Cristo.

³ Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i.

⁴ Lë ni rea' libí'ili', para cabí gaca nu si' ye'e libí'ili', nu gü'i didza' tséajlë'ëru' le cabí nácatë.

⁵ Sal-la' zoa' zi'tu' ga zóali' lu idútè le naca', lu bö' naca caza' zóalena' libí'ili', en rudzėjada' tu' rilé'eda' rö'ö xibá queéli', en nácali' tsutsu ca réajlè'èli' Cristo.

⁶ Que lè ni na', ca na' guzxi' lu ná'ali' Xanru' Jesucristo, lësca' caní ral-la' gunli' yúgu'tè le gunli', dzáguiè' Lè' libí'ili'.

⁷ Ca na' nun ga rè' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlè'èli' Lè', ca na' chinazédali'. Guli'guíética'sé' Dios: "Xclenu'."

Le cubi nácaru' tu' dzágaru'-nè' Cristo

⁸ Guli'gún chi'i cuinli' para cabí güf'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nnasé' nácagaca idútè li, ca naca le ta'lébi tun bönachi, en ca naca le tu'sedi bönachi le naca que yödzöliö ni, en caléga le naca xtídzè'è Cristo.

⁹ Idútè le naca cazè' Dios zóalen Cristo sal-la' böáquiè' bönachi,

¹⁰ ate' libí'ili' nápalí' idútè le náquiè' Dios tu' dzágali'-nè' Cristo, Nu rinná be'e yúgu'tè nupa ta'nná bè', en yugu' bönni' dè lu ná'agaquiè'.

¹¹ Narugu lu xipèla'gaquiè' bönni' judío le ruluí'í dá'gaquiè' Dios, pero libí'ili', tu' dzágali' Cristo, zóalen libí'ili' le ruluí'í néquili' queè' Dios, le cabí néquini lu ni'a lu ná'agaca bönachi. Yugu' bönni' judío tu' güé' tu' guídido', pero libí'ili', nadúa idútè yöl-la' bönachi queéli' le bénlenli' dul-la'. Caní naca queéli' tu' benli' tsözxón Cristo cate' gútiè' lè'e yaga cruz.

¹² Cate' bidílalí' nista guca ca bigáchi'lenli'-nè' Cristo tsözxón yeru ba, en bubánlenli'-nè' tsözxón tu' guyéajlè'èli' Dios, len yöl-la' huáca queè' busubanè' Cristo lu yöl-la' guti.

¹³ Zí'atèlö gúcalí' ca nupa chinátigaca tu' nözi dul-la' gubága'li', en bití' guzóalen libí'ili' le ruluí'í néquili' queè' Dios, pero na'a Dios nunè' ga nabánlenli'-nè' tsözxón Cristo, en buniti lahuè' libí'ili' ca naca yúgu'tè dul-la' gubága'li'.

¹⁴ Dios busuluè' yugu' le nabága'ru' le nazúajgaca lu xibá queè', lè na' tu'zegui rè'u didza'. Bugúè' lè na' nabága'ru', en budè'è le lè'e yaga cruz ca tu le nabáguè'è Cristo.

¹⁵ Cate' gútiè' Cristo lè'e yaga cruz, bugúè' yöl-la' huáca unná bè' quégaca bö' xihui' unná bè', en quégaca bö' xihui' dè lu nè'eguequi yöl-la' huáca, tu' bulu'e lahui le nácagaca bö' xihui' na', en bugúè' idutè le guta' lu nè'eguequi.

Ral-la' güf'í ládxi'ru' le naca que yehua' yubá

¹⁶ Que lè ni na', bití' güf'ili' lataj nu uzegui libí'ili' didza' ca naca le rë'aj ráguli', o tu' cabí runli' zxón yugu' dza laní, o tu' cabí runli' zxón beo' si' ruzé, o tu' cabí runli' zxón yugu' dza lá'ayi quégaca bönachi.

¹⁷ Yúgu'tè lè ni naca ca tu bixín que le ral-la' gaca, ate' le ruluí'í yúgu'tè lè ni náquiè' Cristo caz.

¹⁸ Bití' güf'ili' lataj nu gun ga unítíli' le ral-la' sí'ili', nu runda' bayudxi ga ilaca nóxaj ládxi'gaca bönachi, en ilún zxón yugu' gubáz lá'ayi. Tu'gutsa' cuíngaquiè' le cabí bila'lé'enè', en tun ba zxón cuíngaquiè' ca naca le dzö'ösö ícgaquiè' lu yöl-la' bönáchisö quégaquiè'.

¹⁹ Nu run caní bití' da' Cristo. Náquiè' Xanru', en ruzóé' tsutsu idútè le naca cazè', le nácaru' rë'u. Rugahuè' le, en runè' ga naca tuz ni'a que le zeaj lx dita lu bin, ate' rizzón idútè le naca cazè' ca rë'èné' Dios uxönè' le.

²⁰ Libí'ili' chinátilenli'-nè' Cristo para cabirö ila'nná be'e xibá que yödzülió libí'ili'. ¿Bizx que runli' tsca ni nácali' que yödzülió, en runli' ca ta'nná bē' xibá que?

²¹ Caní ta'nná yugu' xibá que yödzülió ni:

Biti' quítjanu' lē ni.

Biti' gagu' lē na'.

Biti' canu' ia'tú le dē.

²² Yúgu'tē lē ni ila'niti cate' chibugunru' léguequi dxin. Caní nácacaca le ta'nná bē' bōnachi, en yugu' xibá nazi' lu nē'eguequi.

²³ Le nácatē, yugu' xibá ni, téqui bōnachi nápagaca yöl-la' réajni'i. Tun ga tu'lu'i' cuínguequi ca bōnachi yudo', en ga tu'lu'i' cuínguequi nōxaj ladxi', en ga tu'saca' z'igaca idutē le zeaj naca caz, pero xibá ni bití' ca' tácalen rē'u para gaca inná bé'eru' yugu' le rizē lādxi'ru' lu yöl-la' bōnáchisö queēru'.

3

¹ Na'a, channö nubánlenli'-nè' Cristo, guli'güi' ladxi' le nácacaca que yehua' yubá ga ni' rō'è Cristo cuita lē'è ibēla Dios, ga náquiē' lo.

² Guli'sá' ladxi' le taca xitsá'aló, en calēga le taca luyú ni.

³ Naca queēli' tsca chinátili', ate' yöl-la' na'bán queēli' rapa chi'è Cristo ga ni' zoa cazē' Dios.

⁴ Cristo nabánili' libí'ili'. Cate' ulu'i' lahuē' Lē', ní'irö ulu'i' loli' ca' libí'ili' tsözxón len Lē' lu bení' queē'.

Yöl-la' na'bán gula, en yöl-la' na'bán cubi

⁵ Que lē ni na', guli'gún ga ila'niti le nacua'len libí'ili' que yödzülió ni:

Yugu' le ruá' dö', en le nácacaca xihui',

en yugu' le rizē lādxi'li' le ruá' dö',

en yugu' le rizē lādxi'li' le naca xihui',

en yöl-la' ruhuidi'.

Yöl-la' ruhuidi' naca lēbi ca nu reaj ladxi' budó' guiój budó' yaga, tu' cabí reaj ladxi' Dios nu ruhuidi'.

⁶ Tun bōnachi yugu' le caní, ate' gunē' Dios xíguia' yúgu'tē nupa bití' túngaca ca rnna xtídzē'è.

⁷ Yugu' dul-la' caní benli' ca' libí'ili' cate' ni' nadödili' lu nē'eguequi.

⁸ Na'a, bití'rö gunli' yugu' lē ni:

Bití'rö idzá'ali', en bití'rö leli'.

Bití'rö nu gunli' zi', en bití'rö innē xihui'li'.

Bití'rö innali' le ruá' dö'.

⁹ Biti' si' yé'eli' luzá'ali' tuli' ia'tuli' tu' chinucá'anali' le gúcali' zí'aló, en yugu' le benli' zí'aló.

¹⁰ Chinácali' bōnachi cubi, ate' tu tu dza ricúbili', ruhuóácaröli' ca naca Nu na' bun libí'ili', para gúnbē'èli' Lē' idú ca náquiē' Lē'.

¹¹ Tu' chidzágaru'-nè' Cristo:

Bití'rö nácaru' bōnni' zi'tu', en bōnni' judío.

Bití'rö nácaru' bōnni' narugu lu xipéla'gaquiē' le naca bē' nu da' Dios, en bōnni' bití' narugu lu xipéla'gaquiē' lē na' naca bē'.

Bití'rö nácaru' bōnni' ta'yéajni'inē', en bōnni' bití' ta'yéajni'inē'.

Bití'rö nácaru' bōnni' nadó'ogaquiē', en bōnni' bití' nadó'ogaquiē'.

Na'a, Cristo náquiē' yúgu'tē le nácacaca lesaca', en dzáguie' yúgu'tēru'.

¹² Dios nadxí'inē' libí'ili', en gurö'è libí'ili' para guéquili' quez queē'. Que lē ni na', ral-la':

Güf'i ládxi'li' luzá'ali', en gácali' dxi'i ladxi',
 en nöxaj ladxi', en cuidi' ladxi',
 en cözali' zxon ladxi'.

¹³ Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benë Cristo, buniti lahuë' libí'ili'.

¹⁴ Le nazáca'tërö ca yúgu'të lë ni, ral-la' idxí'ili' yúgu'të bönachi, tu' naca yöl-la' nadxi'i le run ga nácaru' tuz, en ga nácaru' idú.

¹⁵ Guli'güi' lataj le ribequi dxi icja ládxi'do'oru' inná bë' lu icja ládxi'do'oli', lë na' runné' Dios queëru'. Que lë ni na' bulidzë' libí'ili', para gácali' tuz lu idütë le naca cazë' Cristo. Guli'guië' Dios: "Xclenu'."

¹⁶ Guli'si' lu ná'ali' xtídzë'ë Cristo le gaca queëli' tu yöl-la' tsahui' zxon. Tu' zóalen libí'ili' yöl-la' réajni'i queë' Dios, buli'sedi, en buli'zëjni'i luzá'ali' tuli' ia'tuli'. Idú ládxi'li' guli'gul-la yugu' salmo queë' Dios, en yugu' le rul-la yöl-la' ba, en yugu' le rul-la lá'ayi, ate' guiëli'-në' Dios: "Xclenu'."

¹⁷ Yúgu'të le runli', le naca didza' ruí'ili' o le naca dxin runli', guli'gún yúgu'të lu Lë' Xanru' Jesús, en guiëli'-në' Dios Xuz: "Xclenu'", dzáguië' Cristo libí'ili'.

Le ral-la' gunru' que luzá'aru' tu' néquiru' queë' Cristo

¹⁸ Libí'ili', nigula nutsaga ná'aleni' bönni' queëli', guli'gún ca rnna xtídzaga'gaquië' bönni' que queëli' ca ral-la' gunli', tu' néquili' queë' Xanru'.

¹⁹ Libí'ili', bönni' nutsaga ná'aleni' nigula queëli', guli'dxi'i nigula que queëli', en bití' uzéli' bach légacanu.

²⁰ Libí'ili', bi'i ra'bán, guli'gún ca rnna yúgu'të xtídzaga'gaquië' xuz xiná'ali'. Lë ni raza ládxi'ë' Xanru'.

²¹ Libí'ili', núlöli' nácali' xúzgaca bí'ido', bití' tödi bë' usína'li' zxi'inili', para cabí huöaj ládxi'gacabi'.

²² Libí'ili', núlöli' nácali' bönni' nadó'ogaquië', guli'gún ca rnna yúgu'të xtídzaga'gaquië' xanli' luyú ni. Calégasö gunli' caní cate' tu'yúé' libí'ili' ca na' tun nupa tē'eni ilún ga ila'yaza ládxi'gaca bönachi, pero idú ládxi'li' guli'gún xichíngaquië' ca ral-la' ilún nupa tadxi Dios.

²³ Ca naca yúgu'të le runli', guli'gún idú ládxi'li', gaca ca runli' xichinë' Xanru', en calégasö ca runli' xichíngaca bönachi.

²⁴ Chinóz quézili' ubi'ë Xanru' queëli', gunné' queëli' le chinupé'ë Dios quégaca nupa nácgaca zxi'ini cazë'. Caní gaca, tu' runli' xichinë' Xanru' Jesucristo.

²⁵ Nu ruá' dö', ubi'ë Xanru' que nu na' ca naca dö' ruá' nu na', tu' cabí utsë'ë Dios ca ral-la' ubi'ë que queëgaca bönachi.

4

¹ Libí'ili', núlöli' nácali' xángaca bönachi, guli'gún le naca tsahui', en le naca dxi'a ca rugunli' dxin yugu' bönni' huen dxin queëli'.

Guli'tsöjné zoa ca' Xanli' yehua' yubá.

² Libí'ili', yúgu'téli',

buli'lídatica'sè' Dios.

Buli'subán ládxi'li' ulídzali'-nè' Dios,

en guli'guié': "Xclenu'."

³ La' ná'asö cate' rulídzali'-nè' Dios, guli'nabi-nè' ca' gácalenè' netu', en gunnè' netu' lataj quíxjö'ötu' xtídzè'è Xanru', para gaca uzéajni'itu' bönachi le bigachi' ca naca queé' Cristo. Tu' runa' caní nadzuna' lidxi guié' ni.

⁴ Guli'nabi-nè' ca' Dios, gunnè' neda' lataj usalaj lá'ana' le bigachi' na' ca ral-la' guna'.

⁵ Lu yöl-la' réajni'i queéli', guli'gún le runli' lógaca nupa biti' ta'yéajlè' Cristo. Guli'gunda' dxin yugu' dza uzá ládxi'è Dios queéli', gunli' xichiné'.

⁶ Ral-la' gü'ili' didza' ca raza ládxi'è Dios, en ca ral-la' gun nupa néquiquequi queé'. Ral-la' inözili' ca' naca ral-la' ubí'ili' didza', bi guié'li' tu tu bönachi.

Yugu' bönachi queé' Cristo tu'gapa Dios luzé'eguequi

⁷ Tíquico quíxjö'inè' libí'ili' le raca quia' ni. Náquiè' böchi'ru' nadxi'iru'-nè'. Náquiè' ca' huen dxin idú queé' Xanru', en rúnlenè' neda' tsözxón dxin queé' Xanru'.

⁸ Que lé ni na' risöl-la'a-nè' ga zóali', para uzéajni'inè' libí'ili' le raca quia', en utipè' ládxi'li'.

⁹ Onésimo, böchi'ru' na' nabábalenè' libí'ili' sa'yéajlenè' lè' tsözxón. Náquiè' ca' böchi'ru' nadxi'iru'-nè', en réajlè'è Xanru'. Chopè' ni ulu'siyönnè' libí'ili' yúgu'tè le raca ni.

¹⁰ Aristarco, bönni' na' yú'ulenè' neda' tsözxón lidxi guié' rugapè' Dios libí'ili'. Bi'i Marcos, bi'i bönni' queénu nigula zanè' Bernabé rugápabi' Dios ca' libí'ili'. Chigudxa' libí'ili' bi gunli' queébi' bi'i Marcos na'. Channö huídabi' ga zóali', guli'gún-bi' bal.

¹¹ Bönni' ni lè' Jesús, en zoa ia'tú lè' Justo lè'sca' rugapè' Dios libí'ili'. Nacuá' zían bönachi judío ta'yéajlè' Cristo, pero tsónnasè' ni ladaj bönachi judío tunè' dxin que le rinná bè'è Dios tsözxón len neda', en tu'huí' zxöndè'è neda'.

¹² Epafras, bönni' ni nababè' ca' libí'ili' rugapè' Dios libí'ili'. Náquiè' huen dxin queé' Cristo, en idú ládxi'è rulídzè' Dios, en ráta'yutica'sè' lahué' gácalenè' libí'ili' para gácali' idú ládxi', en sóali' ca' sina' gunli' yúgu'tè le ré'èni quézinè' Dios.

¹³ Runa' ba nali' queé' Epafras na', ru'ida' ládxi'è libí'ili' enca' nupa nacué' yödzö Laodicea, en nupa nacué' yödzö Hierápolis.

¹⁴ Demas, enca' Lucas tu'gapè' Dios libí'ili'. Náquiè' Lucas bönni' na' ruúnè' bönachi, ate' nadxi'iru'-nè'.

¹⁵ Guli'gapa Dios böchi'ru' nacu'è Laodicea, enca' Ninfas, en bönachi queé' Cristo nacué' lídxi'nu Ninfas na'.

¹⁶ Cate' údxi ulábali' guichi ni ga ni' zóali', guli'gún ga ulu'laba le bönachi queé' Cristo nacué' Laodicea. Buli'laba ca' libí'ili' guichi na' ila'söl-la' bönachi Laodicea na' queéli'.

¹⁷ Guli'guié' Arquipo: "Bè' ládxi'u gunu' dxin na' budödè' Xanru' lu no'o'."

¹⁸ Neda', Pablo, ruzúaj caza' lu guichi dídza'do' ni, rnnía': Rugapa' Dios libí'ili'. Guli'tsöjné ca raca quia' nadzuna' lidxi guié' ni. Rinábida'-nè' Dios uzá ládxi'è queéli' le naca dxi'a. ¡Ca' gaca!

DIDZA' ZÍ'ALÖ GUSÖL-LĚ'Ě PABLO YÖDZÖ TESALÓNICA

Pablo rugapë' Dios bönachi queë' Cristo nacua' Tesalónica

¹ Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxí'do'oli'.

Yugu' le taca bë' ta'yéajlë' bönachi Tesalónica Dios

² Rëtica'stu'-në' Dios: "Xclenu'" cate' röjnetu' ca naca queëli' yúgu'tëli'. Röjnética'stu' libí'ili', bi rinábitu'-në' Dios ni'a queëli' cate' rulidztu'-në'.

³ Röjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatíca'sili' tsutsu tu' runli' löza Xanru' Jesucristo.

⁴ Böchi' luzá'atu', Dios nadxí'inë' libí'ili', ate' nöztu' guró cazë' Lë' libí'ili'.

⁵ Caní naca, tu' bidxín queëli' didza' dxi'a runtu' libán que, calëga len didza'sö, pero lësca' len yöl-la' huáca bidxín queëli', ate' Dios Bö' Lá'ayi benë' tsutsu le, ate' idú ládxí'li' benli' löza le. Nöz quezili' ca gúcatu' ga zóali' tu' nadxí'itu' libí'ili'.

⁶ Libí'ili' butsá' cuinli', ate' runli' ca runtu' netu', enca' ca benë' Xanru', tu' guzxi' lu ná'ali' xtídzë'ë, ate' sal-la' gudí'i guzxacá'da'ali', budzëjali' tu' zóalenë' Dios Bö' Lá'ayi libí'ili'.

⁷ Caní naca, chinácali' tu le naca bë' lógaca yúgu'të bönachi ta'yéajlë' Cristo nacua' luyú Macedonia, en luyú Acaya.

⁸ Caní naca, tu' guzë xtídzë'ë Xanru' ni'a queëli'. Calëgasö luyú Macedonia, en luyú Acaya, pero lësca' yúgu'të lataj guzë didza' ca réajlë'ëli' Dios. Caní naca, biti' bi run bayudxi innatu',

⁹ tu' ta'guixjö' la' lëguequisö bönachi ni' queëtu' ca benli' netu' bal, en ca na' butsá' cuinli'. Bucá'anali' yugu' budó' guiöj budó' yaga, en böácali' queë' Dios para gunli' xichinë' Dios ban, Nu naca idú Dios.

¹⁰ Na'a, ribözali' dza huödë' Zxí'inë' Dios, irúajë' yehua' yubá. Dios busub-anë' Lë' lu yöl-la' guti. Nu ni naca Jesús, Nu rusólá rë'u lu dul-la', para cabí soa le gun ga ichúguie' Dios queëru' dza si' za'.

2

Xichinë' Dios benë' Pablo yödzö Tesalónica

¹ Böchi' luzá'atu', nöz quezili' biti' guca nítisö dxin queë' Dios bentu' cate' ni' bidxintu' ga zóali'.

² Nözili' ca guca queëtu' lu yödzö Filipos, ca na' gudí'i guzxacá'tu', ate' guluá' dö' bönachi ni' queëtu'. Ní'irö cate' bidxintu' ga zóali' gúcatu' rugu ladxí' tu' guzóalenë' Dios queëru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'bagá'da' bönachi ládzali' netu'.

³ Cate' ni' guchízatu' icja nágalí' xtídzë'ë Dios, bë'ëtu' didza', calëga tu' nazí'i ye'e netu', en calëga tu' bi guzë ládxí'tu' le dë queëli', en biti' guzxi' yé'etu' libí'ili'.

4 Tu' nuzxöni lãdxë'ë Dios netu', budödë' lu na'tu' guntu' libán que didza' dxi'a queë', ate' canísö ru'ítu' didza'.

5 Nöz quézili' catu caz bë'lentu' libí'ili' didza' le gun zxön libí'ili', en biti' guléaj tshui' cuintu' ca run nu bi rizë ladxi' le dë queëli'. Nöz quézinë' Dios naca caní.

6 Biti' gudíljatu' yöl-la' ba le naca que yödzóliö ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bé'etu' libí'ili' tu' nácatu' gubáz nasól-lë'ë Cristo

7 guzóalentu' libí'ili' dxi'i lãdxi'do', en bentu' ca runnu xiná'agacabi' bi'i huë'ënido', run chí'ínu légacabi' dxi'i lãdxi'do'.

8 Caní guca, bidxí'ide'etu' libí'ili', ga bidxintë gú'unitu' udödítu' lu ná'ali', calëgasö didza' dxi'a queë' Dios, pero lá'tu'biqui' udödi caztu' yöl-la' na'bán queëtu', tu' nadxí'ide'etu' libí'ili'.

9 Røjneli', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zi'i, ate' rëla, en të dza bentu' dxin para cabí usaca' zí'itu' nituli' libí'ili'.

10 Libí'ili' na' réajlë'ëli' Cristo, huáca gunli' ba nalí, ate' nözinë' Dios ca na' gudáľentu' libí'ili' idú ca raza lãdxë'ë Dios, en idú dxí'ado', en ca na' cuntú nu gaca bi innë que.

11 Lëzca' caní nözili' ca bentu' ca runë' tu bönni' quégacabi' zxi'inë', guchízatu' icja nágali', en butípatu' lãdxi'li' tu tulí'.

12 Busá'atu' lãdxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení' queë'.

13 Que lë ni na' ca', rética'stu'-në' Dios: "Xclenu'." Caní runtu' tu' guzxi' lu ná'ali' xtídzë'ë Dios le biyónili' bë'ëtu' didza', calëga ca xtídza' bönáchisö, pero ca le nácatë naca, xtídzë'ë Dios naca. Xtídzë'ë na' run dxin lu icja lãdxi'do'oli' libí'ili', réajlë'ëli' Cristo.

14 Böchi' luzá'atu', raca queëli' ca raca quégaca bönachi queë' Dios, nupa néquiquequi queë' Jesucristo luyú Judea. Caní naca tu' chigudí'i guz xáca'da'ali' lu ná'agaca bönachi uládz queëli', lëbisö ca na' gula'guí'i gula'záquië' légaquië' lu ná'agaca bönachi uládz quégaquië', nupa ni' nácgaca bönni' judío.

15 Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía lãdxi'gaquië', en bulu'láguë' ca' netu'. Biti' tunë' le raza lãdxë'ë Dios, tu' cabí ta'lé'enë' dxi'a yúgu'të bönachi izá'a.

16 Tu'záguë'ë ca' xinöztu', para cabí guntu' libán lógaca bönachi izá'a na' biti' nabábagaca légaquië', tu' ru'íľentu' léguequi didza' para ulu'lágaca. Caní raca, tu'zántica'së' dul-la' nabága'gaquië', en chinabága'gaquië' xíguia' le run ga ichúguië' Dios quégaquië'.

Pablo rë'në' tsöjyüë' böchi'ru' nacu'ë Tesalónica

17 Na'a, böchi' luzá'atu', ruhuí'ínitu' ca runë' tu bönni' uzëbi tu' nulá'alentu' libí'ili' tu chí'ido', pero sal-la' biti' rilé'etu' libí'ili', biti' nál-la lãdxi'tu' libí'ili'. Que lë ni na', ru'í lãdxi'rötu' ulé'etu' loli', tu' rizëda' lãdxi'tu' guntu' caní.

18 Que lë ni na' ca' gú'unitu' guídatu' ga zóali', ate' neda', Pablo, le nácatë bë' lãdxa'a guída' chopa tsonna luzuí, pero Satanás, tu' xihui', buzaga' xinöztu'.

19 ¿Bizxi caz naca le run ga runtu' löza, o le run ga rudzëjatu', o le ral-la' idéli'tu', le uzí'ítu' xibë lahuë' Xanru' Jesucristo cate' huödë'? ¿Naru' cabí libí'i cázali' na'?

20 Libí'i cázali' nácali' le run ga nácatu' bica' ba, en le run ga rudzëjatu'.

3

1 Que lë ni na', cate' bítirö guca guá' ilentu', ben xtídza'tu' ugá'anatu' chópatu' lu yödzö Atenas,

2 ate' gusöl-la'tu'-bi' bi'i böchi'ru', Timoteo ga zóali'. Nácabi' bi'i huen dxin queë' Dios, en rúnlenbi' neda' tsözxön libán que didza' dxi'a queë' Cristo. Gusöl-la'tu'-bi' ga zóali' para cuéquibi' libí'ili' tsutsu, en ichízabi' icja nágali' ca ral-la' tséajlë'ëli' Cristo,

3 para cabí soa nu gaca chopa ladxi' ni'a que le tu'saca' zi' bönachi ni netu'. Nöz quézili' zóaru' yödzölió ni para guá' ilenru' le caní.

4 Lësca' cate' ni' guzóalentu' libí'ili', busiyöntu' libí'ili' ca chizóa gaca le ulu'saca' zi' rë'u, le gaca ca na' chiguca queëtu', ate' nöz quézili' lë na'.

5 Que lë ni na', cate' bítirö guca guá' ilena', gusöl-la'a-bi' bi'i Timoteo ga zóali', para ududíxjö'ibi' neda' ca naca queëli' ca réajlë'ëli'-në' Cristo, en channö cabí gulú'u tu' xihui' libí'ili' nöza dul-la', nu na' rigú'u bönachi nöza dul-la', en channö cabí böáca nítisö dxin na' bentu' ga zóali'.

6 Cate' buzá'abi' bi'i Timoteo ga zóali', en budxinbi' ga zóatu', busiyönbi' netu' le naca dxi'a. Bé'ëbi' didza' ca na' réajlë'ëli' Cristo, en ca na' nadxí'igacali'-në' yugu' böchi' luzá'aru', en ca na', lu yöl-la' dxi'i ladxi' queëli' röjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'.

7 Que lë ni na', böchi' luzá'atu', cate' ni' gudí' guzáca'tu' yúgu'të lë ni, en zían le guca queëtu', bidxín didza' queëtu' le buí' zxön netu' cate' biyönitu' ca réajlë'ëli'-në' Cristo.

8 Na'a, nuhuóaca ládxi'tu' tu' riyönitu' rö'öli' tsutsu ca réajlë'ëli'-në' Xanru'.

9 ¿Nacxi caz gaca guétu'-në' Dios: "Xclenu'" ca ral-la' guntu' ni'a que yúgu'të le run ga rudzeja ládxi'tu' lahuë' Dios queëru' ni'a que le nácali' libí'ili'?

10 Bayudxi rulidztu'-në' Dios, en rinábitu'-në' rëla, en të dza para gaca ulé'etu' libí'ili', en usá'atu' le riyadzaj queëli' ca naca le réajlë'ëli'-në' Cristo.

11 Na'a rinábitu'-në' Xúziru' Dios, enca' Xanru' Jesucristo, cu'ë netu' nöza ga idxintu' ga zóali'.

12 Lësca' rinábitu'-në' Xanru' gunë' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'të bönachi, ca na' netu' nadxí'itu' ca' libí'ili'.

13 Rinábitu'-në' gunë' ga gaca tsutsu, en idú dxi'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágagaca bönachi lá'ayi queë' Lë'.

4

Le runru' le raza ládxë'ë Dios

1 Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágali' para gunli' ca naca le chinazëdali' lu na'tu' ca ral-la' gunli' le raza ládxë'ë Dios. Ca na' chirunli', ca' ral-la' gúntica'sili'.

2 Chinöz quézili' yugu' le gunná bé'etu' libí'ili' uláz queë' Xanru' Jesús.

3 Le ré'ënë' Dios naca gácali' idú dxi'a, en bítirö gunli' le cabí naca tsahui',

4 en inözili' tu' tuli' nacxi ral-la' sóaleni'-nu nigula que queëli' idú ca sa'yéaj le naca lá'ayi, en gunli' légacanu bal.

5 Biti' ral-la' sóaleni'-nu nigula queëli' lu yöl-la' rizë' ladxi' le ruá' dö', ca na' tun bönachi bití' nabábagaca Dios, en bití' núnbë'gaca Dios.

⁶ Ca nácgaca lë ni, cuntu nu ral-la' tödi bë', en cabí si' ye'e böchi' luzë'e bagáchi'sö, tu' ichúguie' Lë cazë' Xanru' quégaca yúgu'të nupa tun le caní, gunë' ca na' chigúdxitu' libí'ili', en bentu' ba nalí que loli'.

⁷ Dios bulidzë' rë'u, calëga para gunru' le ruá' dö', pero para gácaru' idú dxi'a.

⁸ Caní naca, nu ruzóa tsölá'alö lë ni, calëga bönáchisö ruzóa tsölá'alö, pero Dios caz ruzóa tsölá'alö, tu' gusöl-lë'ë Lë cazë' Dios Bö' Lá'ayi queëru', Nu ruí'i caní didza'.

⁹ Biti' run bayudxi uzúaja' queëli' lu guichi ca ral-la' idxí'igacali'-në' böchi' luzá'ali', tu' chinazédali' la' libí'sili' lu në'ë Dios idxí'ili' luzá'ali' tuli' ia'tuli'.

¹⁰ Le nácatë nadxi'igacali'-në' yúgu'të böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'të böchi' luzá'ali'.

¹¹ Ráta'yutu' loli' ca', güí'i ládxi'li' cözali' dxí'ado', en gunli' yugu' le dë lu ná'asili', en gunli' dxin len na'a cuinli' ca na' chigunná bé'etu' libí'ili'.

¹² Gunná bé'etu' libí'ili' caní para gaca gunli' le naca dxí'ado' lógaca nupa bití' nabábagaca libí'ili', en caní gaca, bití' bi yadzaj queëli'.

Ca gaca cate' huödë' Xanru' Jesucristo

¹³ Lësca', böchi' luzá'atu', rë'ënitü' inözili' ca raza quégaca nupa chinátigaca, para cabí huí'inili' ca tun ia'zica'rö bönachi bití' zoa le tun löza.

¹⁴ Channö réajlë'ëru' gütië' Jesús, en bubanë', lësca' caní ral-la' uzxöni ládxi'ru'-në' Dios gunë' ga huödalengaca tsözxön Jesús nupa ni' chigulati, en gula'yéajlë' Lë'.

¹⁵ Que lë ni na' riguíxjöi'itu' libí'ili' xtídzë'ë Xanru' le rnna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'alö ca nupa chigulati."

¹⁶ Caní gaca, tu' huötjë' Lë cazë' Xanru', en irúajë' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo.

¹⁷ Ní'irö rë'u ni zóaru' nabanru', en nagá'anaru' luyú ni, uchisé' rë'u tsözxön len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóalenticá'siru'-në' Xanru'.

¹⁸ Que lë ni na', guli'huí' zxön luzá'ali' tuli' ia'tuli' ca nácgaca didza' ni.

5

¹ Na'a, ca naca dza na', o rëla na' cate' ilaca lë ni, bití' run bayudxi uzúaja' queëli' lu guichi, böchi' luzá'atu'.

² Libí'ili' chinöz quézili' dxi'a ca gaca dza cate' huödë' Xanru'. Idxinë' tsárido'os ca ridxinë' gubán chi'i dzö'ölö.

³ Cate' ila'nná bönachi: "Raca dxi'a queëru', en bití' bi gaca queëru'", ní'irö la' idxintë le usuniti léguequi, lë na' idxín quéguequi ca na' ridxín le riguí'i rizáca'nu nigula na' chizóa sóabi' bí'ido' queënu, ate' cuntu nu nutsa' ladaj bönachi yödzölió ni nu ulá cate' gaca lë na' gaca dza na'.

⁴ Na'a, böchi' luzá'atu', bití' zóali' chul-la niti, en que lë ni na' bití' idxín dza ni' queëli' bagáchi'sö ca ridxinë' bönni' gubán.

⁵ Yúgu'tëli' nácali' bönachi que bení, en que lahuí' dza. Bití' nácaru' bönachi que chi'i dzö'ölö, en calëga que le naca chul-la.

⁶ Que lë ni na', bití' ral-la' tödi yëla loru' ca raza quégaca nupa bití' nabábagaca rë'u, pero ral-la' usubán ládxi'ru', en cözaru' ba'a ládxi'do'.

⁷ Nupa tasi, chi'i dzö'ölö tasi, en nupa ta'zudxi, chi'i dzö'ölö ca' ta'zudxi.

⁸ Na'a, rë'u ni, nácaru' que lahui' dza, en ral-la' cózaru' ba'a ládxi'do', tu' chinácuru' zxaru' le run chi'i rë'u, le naca yöl-la' réajlé' queëru' Dios, en yöl-la' nadxí'i, ate' le runru' löza uláru' naca ca tu lu'u guié le run chi'i ícjaru'.

⁹ Caní naca, tu' nuzóé' Dios rë'u ni, caléga para idxinru' ga ichúguié' queëru', pero para uláru' tu' ruzxöni ládxi'ru'-në' Xanru' Jesucristo,

¹⁰ tu' gútié' Jesús uláz queëru' para sóaru' ibanru' tsözxön len Lë' cate' huödë', sal-la' chinátiru' o sóaru' ibanru' dza ni'.

¹¹ Que lë ni na' ral-la' utípali' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

Pablo richízié' icja nágagaquié' böchi' luzé'ë ta'yéajlé'ë Cristo

¹² Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá' ládxi'li'.

¹³ Ráta'yutu' loli' ca', gunli' légaquié' bal lu yöl-la' nadxí'i queëli', tu' tunë' dxin na'. Guli'cöza dxí'ado' tuli' len ia'tuli'.

¹⁴ Lë'sca' caní richízatu' icja nágali', böchi' luzá'atu', para usá'ali' ládxi'gaca nupa bití' túngaca dxin, en utípali' ládxi'gaca nupa tu'huöaj ládxi'guequi, en gácalenli' nupa bití' naca tsutsu ca ta'yéajlé' Cristo, en gácali' nõxaj ladxí' lógaca yúgu'të bönachi.

¹⁵ Guli'gún chi'i cuinli' para cabí uzí' lëbi luzá'ali', en cabí guá'ali' dö' que nu ruá' dö' queëli', pero guli'güí ládxi'li' gúntica'sili' le naca dxi'a que luzá'ali' tuli' ia'tuli', en quegaca yúgu'të bönachi.

¹⁶ Bulí'dzéjatica'só,

¹⁷ en bulí'lidzatica'së' Dios,

¹⁸ en guli'guié' Lë: "Xclenu'."

Caní ral-la' gunli' ni'a que yúgu'të le raca queëli', tu' nácagaca lë ni le rë'ënë' Dios gunli' tu' nácali' queë' Jesucristo.

¹⁹ Bití' uzóa dxili' le rulídzatica'së' Dios Bö' Lá'ayi libí'ili'.

²⁰ Bití' uzóali' tsölá'alö xtídzë'ë bönni' ru'ë didza' uláz queë' Dios.

²¹ Guli'sí' bë' yúgu'të, en guli'sí' lu ná'ali' le naca dxi'a.

²² Bití' bi gútsa'li' le ruá' dö'.

²³ Lë cazë' Dios, Nu run ga zoa dxi icja ládxi'do'oru', gunë' ga gácali' idú dxi'a, en gun chi'ë bö' naca cázali', en icja ládxi'do'oli', en idütë le nácali', ate' cuntu nu gaca bi innë queëli' dza ni' huödë' Xanru' Jesucristo.

²⁴ Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

Pablo rigu'ë yugu' böchi' luzé'ë lu në'ë Dios

²⁵ Böchi' luzá'atu', bulí'lidzë' Dios, en inábili'-në' gácalenë' netu'.

²⁶ Bulí'gapa Dios yúgu'të böchi' luzá'aru', en unída'li' légaquié' lu yöl-la' nadxí'i queëli'.

²⁷ Ni'a queë' Xanru' Dios ruchi'a libí'ili' ulábali' guichi ni lógaca yúgu'të böchi' luzá'aru' nabábagaquié' Cristo.

²⁸ Rinábida'-në' Xanru' Jesucristo uzá' ládxi'ë queëli' le nácagaca dxi'a queë'. ¡Ca' gaca!

DIDZA' BUROPI GUSÖL-LË'Ë PABLO YÖDZÖ TESALÓNICA

Pablo rugapë' Dios bönachi queë' Cristo nacué' Tesalónica

¹ Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'.

² Rinábitu' Xúziru' Dios, en Xanru' Jesucristo, uzá' ládxë'ë queëli', en gunë' ga soa dxi icja ládxi'do'oli'.

Dios ichúguië' quégaca bönachi dul-la' ila'nítigaca cate' huödë' Cristo

³ Ral-la' guiëtica'stu'-në' Dios: "Xclenu'" ca naca queëli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxi'ili' luzá'ali' tuli' ia'tuli' zeaj rácarö idú.

⁴ Que lë ni na', len yöl-la' rudzeja rigúxjö'ötu' ca naca queëli' lógaca bönachi queë' Dios ni, tu' ribözali' zxön ladxí', en réajlë'ëli' Dios sal-la' ta'bíada' ládxi'gaca bönachi libí'ili', en riguí' rizáca'da'ali', pero ruá' rilenli' yúgu'të.

⁵ Yugu' lë ni taca bë' naca tsahui' ca ruchi'a rusórtë' Dios bönachi. Ru'ë lataj riguí' rizáca'li' na'a, para gácali' lesaca' tsázali' ga ni' rinná bë'ë Lë'.

⁶ Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'guí'i ila'zaca' nupa na'.

⁷ Ia'stú, libí'ili' riguí' rizáca'li' na'a, ate' ubi'ë Dios queëli', gunë' ga uzí' ládxi'li' tsözxön len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxön, en ulu'lu'ë lahui yöl-la' huáca zxön queë'.

⁸ Ilá' lahuë' Cristo dza ni' ca tu guí' zxön cate' ni' gunë' zi' nupa biti' núnbë'gaca Dios, en biti' túngaca ca rnna didza' dxi'a queë' Xanru' Jesucristo.

⁹ Yugu' bönni' caní, uzí' lëbë' légaquië', ate' tsaz tsójtásazagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxön queë', en yöl-la' huáca queë'.

¹⁰ Caní gaca dza ni' cate' huödë' para gaca queë' yöl-la' ba ni'a que le nácagaca bönachi lá'ayi queë', ate' ulu'bani ni'a que le benë' ga nácagaca yúgu'të nupa ta'yéajlë' Lë'. Caní gaca ca' queëli' tu' guyéajlë'ëli' le bentu' ba nalí que loli' ca naca queë' Jesús.

¹¹ Que lë ni na' ca', rulídzatica'stu'-në' Dios queëru', en rinábitu'-në' gácalenë' libí'ili', en gunë' ga gácali' lesaca' idéli'li' lë na' bulidzë' libí'ili' para uzí'ili' xibé. Lësca' rinábitu'-në' gunë' ga gaca idú yúgu'të le ruí'li' ládxi'li' gunli' le naca dxi'a, en yúgu'të dxin runli' lu yöl-la' réajlë' queëli' Lë'. Len yöl-la' huáca queë' Dios huáca gunli' lë ni.

¹² Caní gaca, gaca yöl-la' ba que Lë' Xanru' Jesucristo ni'a que le runli', ate' gácali' libí'ili' bica' ba ni'a que le gunë' Lë', gaca ca naca le buzá' ládxë'ë queëli' Dios queëru', enca' Xanru' Jesucristo.

2

Ulu'i lahuë' Bönni' Xihui'

¹ Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu',

² para cabí güf'ili' lataj nu gun chixi libí'ili' ca náca gaca le guzxi' lu ná'ali'. Biti' cuéqui böniga icja ládxi'do'oli' ni'a que bi ta'nné' bönni' ta'zi' yé'è, ta'nné' zóalené' Dios Bō' Lá'ayi légaquié', o ni'a que bi didza' tuí'i bönachi, o ni'a que bi nazúaj tu lu guichi ta'nné' netu' gusól-la'tu', le rnna: "Chigudödi dza huödé' Xanru'."

³ Biti' ca' güf'ili' lataj nu si' ye'e libí'ili', tu' cabí idxín dza ni' huödé' Jesús channö cabí ila'lá' lahui zí'aló zían nupa ila'dá'baga' Dios, ate' ilá' lahué' Bönni' Xihui', bönni' na' ral-la' tsázié' lu guí' gabila.

⁴ Bönni' ni uzágué'è, ate' lu yöl-la' run ba zxön cuiné' tá'baguè'è yúgu'tè le nequi queé' Dios, o le tun zxön bönachi lu yöl-la' run Dios bal quéguequi. Guné' bönni' na' caní ga idxinté' cō'è ca Dios caz lu yudo' ga naca xilatjé' Dios, en gun cuiné' ca Dios.

⁵ ¿Naru' cabí rōjneli' busiyōnda' libí'ili' yugu' lē ni cate' ni' zóalena' libí'ili'?

⁶ Na'a, núnbé'èli' Nu ruzaga' xinōzē' Bönni' Xihui' na', para cabí ilá' lahué' zí'aló ga idxinrō dza queé'.

⁷ Chirún dxin le nagachi' que le naca xihui', pero ná'atē zoa Nu ruzaga' xinōzē' Bönni' Xihui' na' ga idxinrō dza ucuíta cuini Nu na' ruzaga' xinōzē'.

⁸ Ní'irō ilá' lahué' Bönni' Xihui' na', ate' Xanru' Jesucristo ucul-lé' lé' len bō' irúaj ru'é, en usunítie' lé' len le tsēpi yōsa bení' que dza huödé'.

⁹ Cate' idxiné' Bönni' Xihui' na', len yöl-la' huáca que Satanás tu' xihui' ilá' lahué'. Len yöl-la' huáca que le cabí nácaté, guné' yúgu'tè yöl-la' huáca zxön, en yúgu'tè le ilaca bē', en yúgu'tè le ilún ga ulu' bani bönachi.

¹⁰ Len yöl-la' huáca que le cabí nácaté, guné' caní lógaca nupa ila'niti tu' cabí gula'zí' lu né'eguequi idú ládxi'guequi le naca iduté li, para ulu'láguequi.

¹¹ Que lē ni na' Dios gu'é lataj idxín quéguequi tu nu run yöl-la' huáca, nu si' ye'e léguequi para ila'yéajlè' le cabí nácaté.

¹² Caní gaca para ila'baga' xígua' yúgu'tè nupa bití' gula'yéajlè' le naca iduté li, pero gula'yaza ládxi'gaca le cabí naca tsahui'.

Nupa gurō cazē' Dios para ulu'lágaca

¹³ Böchi' luzá'atu', libí'ili' na' nadxí'iné' Xanru' libí'ili', ral-la' gufética'stu'-né' Dios: "Xclenu'" ni'a que le naca queéli', tu' chigurō cazē' Dios libí'ili' dza nī'te para uláli' ni'a que le runé' Dios Bō' Lá'ayi, para gácali' idú tsahui' tu' réajlè'èli' le naca iduté li.

¹⁴ Para gaca caní queéli', Dios caz bulidzē' libí'ili', para idéli'li' gunli' tsōzxön Xanru' Jesucristo lu bení' queé'. Caní gaca ni'a que didza' dxi'a runtu' libán que.

¹⁵ Que lē ni na', böchi' luzá'atu', guli'sóa tsutsu, en guli'gún chi'i didza' na' nazédali', le bē'lentú' libí'ili', en buzúajtu' queéli' lu guichi.

¹⁶⁻¹⁷ Rinábitu'-né' Xanru' Jesucristo, en Xúziru' Dios, utipé' ládxi'li', en guné' ga gácali' tsutsu ca naca yúgu'tè le naca tsahui' runlí', en yúgu'tè didza' dxi'a ruí'ili'. Lē cazē' nadxí'iné' rē'u, en benné' queéru' le ruhui' zxóntica'sō rē'u, en le naca dxi'a runru' lōza, yugu' lē na' buzá' ládxé'è Dios queéru'.

3

Le ral-la' inábiru'-né' Dios

¹ Ia'stú, böchi' luzá'atu', buli'lidzē' Dios, en inábili'-né' gácalené' netu', runtu' libán ni, para sē xtídzē'è Xanru', ate' ilún le bal bönachi, para gaca ni ca na' guca ga nī' zóali' libí'ili'.

² Inábili'-nè' ca' para ulatu' lu ná'agaquiè' bönni' xihui' tuá' dö', tu' cabí ta'yéajlè' yúgu'tè bönachi Dios.

³ Na'a, tu' runè' Xanru' ca rnnè', gunè' ga gácali' tsutsu, en gun chi'è libí'ili', para cabí idzunli' lu na' tu' xihui'.

⁴ Ruzxöni ládxi'tu'-nè' Xanru' ca naca queéli', gunli' yugu' lè ni si' gunábitu' libí'ili', ca na' chirunli'.

⁵ Rinábitu'-nè' Xanru' usé'è ládxi'li' para idxi'ili'-nè' Dios, en cözali' zxon ladxi' ca na' bené' Cristo.

Ca run bayudxi gunru' dxin

⁶ Ni'a que Lè' Xanru' Jesucristo ruchí'atu' libí'ili', böchi' luzá'atu', icuítali' ga nacu'è böchi' luzá'aru' ta'dasè' ca', en biti' tunè' ca naca xibá buséditu' libí'ili'.

⁷ Nöz quézili' ral-la' gunli' ca runtu' netu'. Biti' gudásitu' ca' netu' ga ni' zóali'.

⁸ Biti' gudágusötu' le bénnali' queétu', pero lu yöl-la' ruúbi ruguf'i, en lu yöl-la' ricuidi' bentu' dxin rëla, en te dza para cabí usaca' zí'itu' nituli' libí'ili'.

⁹ Caní bentu' para gácatu' loli' ca tu le rulu'i libí'ili' ca ral-la' gunli', sal-la' dè lu na'tu' inábatu' bi gunli' queétu'.

¹⁰ Lësca' cate' ni' guzóalentu' libí'ili', buchí'atu' libí'ili' caní, le rnna: "Channö cabí rë'èné' nu bönni' gunè' dxin, biti' gü'ili' le gahuè'."

¹¹ Canísö rnnatu' tu' riyönitu' nútsa'gaquiè' ládjali' yugu' bönni' ta'dasè' ca', biti' bi dxin tunè', pero ta'dasè' ca' bi tun bi ta'nnè'.

¹² Ni'a queè' Xanru' Jesucristo ruchí'atu' yugu' bönni' tunè' caní, en richízatu' icja nágagaquiè' ilunè' dxin lu yöl-la' riböza dxi'ado', para gaca ilahuè' le nequi quégacasè'.

¹³ Na'a, böchi' luzá'atu', biti' soa dxili', gúntica'sili' le naca dxi'a.

¹⁴ Channö núti'tès bönni' biti' gunè' ca rnna xtídza'tu', le ruzúajtu' lu guichi ni, guli' gún ga gaca bè'è bönni' na', en biti' gunli' tsözxon lè' para utuf'inè'.

¹⁵ Biti' ral-la' ilé'eli'-nè' ca tu bönni' biti' rilé'enè' libí'ili' dxi'a, pero guli'sá' ládxi'è ca böchi' cázali'.

Pablo rigu'è lu në'è Dios yugu' böchi'ru' nacu'è Tesalónica

¹⁶ Rinábitu'-nè' Xanru' gúntica'sè' ga cuía dxi icja ládxi'do'oli' ca naca yúgu'tè le runli', en sóalenè' yúgu'tèli'. Lè cazè' runè' ga rö'ö dxi icja ládxi'do'oru'.

¹⁷ Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bè' yúgu'tè guichi risól-la'a. Canísö ruzúaja' lu guichi.

¹⁸ ¡Le ruzá' ládxi'è Xanru' Jesucristo queèru' gaca queéli' yúgu'tèli'! ¡Ca' gaca!

DIDZA' ZÍ'ALÖ GUSÖL-LÈ'È PABLO QUEËBI' BI' TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasól-lè'è Jesucristo. Caní naca' tu' caní gunná bè'è Dios, Nu rusólá rè'u, enca' tu' gunná bè'è caní Xanru' Jesucristo, Nu na' runru' lōza.

² Rugapa' Dios li', böcha'ado' Timoteo. Nacu' ca zxi'ini caza' tu' benru' tsözxön xichinë' Dios. Rinábida'-nè' Xúziru' Dios, enca' Xanru' Jesucristo uzá' ládxë'è quiu', en huéchi' ládxë'è li', en gunë' ga soa dxi icja ládxi'do'o.

Pablo rusë'è ládxi'bi' Timoteo ca naca xibá cabí naca idú

³ Ráta'yua' lo' na'a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzo Éfeso, en inná bé'enu' bal-lè' bönni' ni' cabí ulu'sédinë' tu xibá yúbölö,

⁴ en cabí ilunë' zxön yugu' didza' ridasö, en lágaca ziántërö cö' xuz xtó'ogaca bönachi, yugu' le tun ga tu'i ládxi'gaca bönachi le nácgaca nítisö. Yugu' le caní bití' tun tsutsu bönachi queë' Dios ca naca le ta'yéajlë' Lè'.

⁵ Le rë'eni gun lë ni rea' li', naca para ila'dxi'i bönachi luzë'eguequi, naca idú ládxi'gaca, en gaca dxi'a le ta'zá' ládxi'gaca, en gaca idú le ta'yéajlë' Dios.

⁶ Ca nácgaca lë ni, bití' bulu'ruájë' bal-lè' bönni' dxi'a, pero gula'guélé'è tu nõza yúbölö, en tunë' bal yugu' le bití' nácatë.

⁷ Të'ennë' ulu'sédinë' bönachi ca naca le rinná bè' xibá queë' Dios, sal-la' bití' ta'yéajni'inë' lë na' tu'sédinë', en bití' ta'yéajni'inë' le ta'nnë' nácatë.

⁸ Rë'u nõziru' naca dxi'a xibá gunná bè'è Dios, channö nu rugún le dxin ca ral-la' gun.

⁹ Lë ni nõziru': Dios gudixjë' xibá queë', calëga para inná be'e bönachi tsahui', pero para inná be'e bönachi caní:

Nupa ta'dá'baga' le rinná bè' xibá na'.

Nupa bití' túngaca ca rinná bè' xibá na'.

Nupa tu'cá'ana Dios cá'asö.

Nupa tun le naca xihui'.

Nupa bití' túngaca Dios zxön.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti bönachi.

¹⁰ Nupa tun le ruá' dö'.

Yugu' bönni' nacuá'lenë' la' löjödxi bönni'gaquië'.

Nupa ta'bán yugu' bí'ido'.

Nupa ta'zí' yë'.

Nupa tun tsutsu xtídza'guequi, ta'nná le cabí nácatë.

Nupa ta'dá'baga' yugu' xibá tsahui'.

¹¹ Nõziru' naca caní tu' bidxín queëru' didza' dxi'a buzá' ládxë'è Dios queëru'. Lë' náquië' lá'ayi, en budödë' lu na'a didza' dxi'a na' runa' libán que.

Pablo rë' Cristo: "Xclenu'" tu' buéchi' ládxë'è lë'

¹² Rea'-nè' Xanru' Jesucristo, Nu rutipa ládxa'a, "Xclenu'" tu' buzxöni ládxë'è neda', en buzóë' neda' guna' xichinë'.

¹³ Caní benë' sal-la' zí'alò neda' gunnë' zi'a queë', en gudxía ládxa'a bönachi queë', en zían le bi'a dō' queguequi, pero Cristo buéchi' ládxe'ë neda', tu' bena' caní lu yöl-la' bití' réajni'i quia' cate' ni' bití' réajlë'ënida' Lë'.

¹⁴ Na'a, zxóntë'ō naca le buzá' ládxe'ë quia' Xanru' Jesucristo, lë na' run ga réajlë'ëru' Lë', enca' ga nadxí'iru'-në'.

¹⁵ Didza' iduté li lë ni, en le naca lesaca' ila'zí' lu ná'agaca yúgu'të bönachi, le rna: Lë cazë' Jesucristo bidë' yōdzōlió ni para busölë' bönachi dul-la', ate' busölë' neda' sal-la' nácara' bönni' dul-la' ca yúgu'të bönachi.

¹⁶ Que lë ni na' buéchi' ládxe'ë neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxon ladxí' idú queë', para gaca' tu le rulu'í lógaca nupa ila'yéajlë' Lë', en gata' queguequi yöl-la' na'bán idú.

¹⁷ Na'a rnnía': ¡Yöl-la' ba Dios, Nu rinná' bē'tica'sō, Nu catu caz údxi que, en Nu bití' gaca ilé'ëru', la's dui Dios Nu nōzi caz yúgu'të! ¡Queë' Lë' gácatica'sō yöl-la' run bal, en yöl-la' ba, na'a dza, en yúgu'të dza zá'gaca! ¡Ca' gaca!

¹⁸ Zxi'ina'do' Timoteo, rudōda' lu no'o xibá ni para gunu' xichinë' Dios ca runë' tu bönni' idú ládxe'ë rejë' gudil-la, en para uzi'u xibé yugu' le gula'guixjō' zí'alò nupa ni' guluf'i didza' uláz queë' Dios ca gaca quiu'.

¹⁹ Len yöl-la' réajlë' quiu' Cristo ral-la' gunu' caní, naca idú dxi'a icja ládxi'do'o. Chigula'chixi gula'nigui bal-la bönachi, nupa bulu'zóa tsólá'aló le réajlë'ëru' Cristo.

²⁰ Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabirō ila'nnë' zí'ë que le nequi queë' Dios.

2

Le rusedi rë'u ulídzaru'-në' Dios

¹ Que lë ni na' le naca lo le richízia' icja ná'agaca bönachi naca ca ral-la' ulídzaru'-në' Dios, en ca ral-la' gáta'yuru' lahuë', en ca ral-la' inábiru'-në' gunnë' bi riquíniru', en ca ral-la' guiëru'-në': "Xclenu'." Yugu' lë ni ral-la' gunru' uláz queguequi yúgu'të bönachi.

² Lë'sca' caní ral-la' gunru' uláz quegaca nupa ta'nná bë', en quegaca yúgu'të nupa ná'agaca lo. Caní ral-la' gunru' para gaca dxi'a queëru', en gata' queëru' yöl-la' ribōza tsáhui'do'. Ral-la' gunru' caní lu yöl-la' réajlë' queëru' Dios, en lu yöl-la' ba'a ladxí' queëru'.

³ Lë ni naca dxi'a, en le raza ládxe'ë Dios, Nu rusólá rë'u.

⁴ Dios caz rë'ënë' ulu'lágaca yúgu'të bönachi, en rë'ënë' ilünbë'e le naca iduté li.

⁵ Tuzë' náquië' Dios, en tuzë' bönni' ruúnë' dzaga Dios, en bönachi. Nu ni naca Jesucristo, Nu gulaj bönachi.

⁶ Lë cazë' budödi cuinë' lu yöl-la' guti, le benë' tu' nōzi dul-la' nabága'gaca yúgu'të bönachi. Dios benë' ba nalí queë' cate' bidxín dza queë' gútië'.

⁷ Ca naca lë ni, Dios buzóë' neda' para guna' libán que, en gaca' gubáz nasól-lë'ë Cristo, para usédigacada' bönachi izá'a ca naca le réajlë'ëru' Cristo, en ca naca le naca iduté li. Rilítëda', en bití' ca' rizí' yë'a.

⁸ Na'a, rë'ënda' ulu'lidzë' bönni' Dios, en iláta'yue' lahuë' gátí'tës, ná'cagaquië' idú dxi'a, en cabí ila'lenë' luzá'agaquië', en cabí ila'dil-la' didza'gaquië'.

⁹ Lë'sca' caní, rë'ënda' ilácunu nigula le naca ba'a. Le naca lachi le ral-la' ulu'lu'ínu lahui naca yöl-la' nōxaj ladxí', en le naca idú ladxí', en calëga le tu'pá'asinu icja lógacanu len oro, en yugu' bugá, en lari' nazáca'da'.

¹⁰ Yugu' le dxi'a tunnu ulu'luf'i lahui le nácagacanu ca na' run le tácunu le naca ba'a. Caní ral-la' ilunnu nigula núnbé'gacanu Dios.

¹¹ Ral-la' ila'cuá'anu yugu' nigula dxisō cate' nu rusedi légacanu, en ila'cuá'anu nōxaj.

¹² Biti' runna' yugu' nigula lataj ulu'sédinu, en calēga ila'nná bé'enu yugu' bōnni'. Ral-la' ila'cuá'anu dxisō ga nudúbigaca bōnachi queē' Cristo.

¹³ Caní ral-la' gaca, tu' buzōé' Dios zí'alō Adán, ate' gudōdi na' buzōé'-nu Eva.

¹⁴ Adán na', bití' guzxi' ye'e tu' xihui' lē', pero nigula queē', guzxi' ye'e lēnu. Caní guca, gudítsjanu xibá queē' Dios,

¹⁵ pero ulanu nu nigula ruzóanu-bi' bí'ido' channō gúntica'sinu ca rōjlōz le réajlē'ēru' Dios, en yōl-la' nadxí'i, en channō gácanu idú dxi'a, en idú ladxí'.

3

Ca ral-la' ilácagaquiē' bōnni' tapa chí'ē bōnachi queē' Cristo

¹ Didza' idútē li lē ni rnna: Channō ru'í ládxi'ē nu bōnni' gáquiē' nu gapa chí'i bōnachi queē' Cristo, dxin dxi'a rizé ládxi'ē.

² Nu bōnni' rapa chí'ē bōnachi queē' Cristo run bayudxi gáquiē': Tu bōnni' cuntu nu gaca bi inné queē'.

Zoa túzinu nigula queē'.

Ral-la' gáquiē' ban ladxí', en idú ladxí', en nōxaj ladxí'.

Ral-la' gu'ē ga ila'cu'ē bōchi'ru' ta'dxinē' lidxē'.

Ral-la' gáquiē' bōnni' nazéqui'de'enē' usédinē' bōnachi.

³ Biti' gáquiē' bōnni' re'jē', en calēga bōnni' sínia'.

Biti' gaquiē' bōnni' rizé ládxi'sē' si'ē dumí.

Ral-la' gáquiē' bōnni' dxi'i ladxí', en zxōn ladxí'.

Biti' gáquiē' bōnni' ruhuídi'nē'.

⁴ Ral-la' gáquiē' bōnni' rinná bé'enē' dxi'a bōnachi nacuá' lidxē'.

Ral-la' ilunbi' zxi'inē' ca rnna xtídzē'ē lu yōl-la' run bal xúzgcabi'.

⁵ ¿Naru' huácatsō tu bōnni' gapa chí'ē bōnachi queē' Dios channō cabí raca inná bé'enē' dxi'a bōnachi nacuá' lidxē'?

⁶ Biti' ral-la' gáquiē' tu bōnni' si' gusí lahuē' tē'ē Cristo, para cabí tōdi bē' gun ba zxōn cuinē', en bití' gaca queē' ca na' guca que tu' xihui', nu ben ba zxōn cuini, ate' Dios guchúguiē' que tsōjgá'ana lataj chul-la.

⁷ Lēscá' ral-la' gáquiē' bōnni' ta'nná dxi'a queē' nupa cabí nabábagaca bōnachi queē' Cristo, para cabí soa nu uzóa lē' tsólá'alō, en para cabí idzunē' lu yalaj que tu' xihui'.

Ca ral-la' iláquiē' bōnni' tácalenē' bōnachi queē' Cristo

⁸ Lēscá' caní ral-la' iláquiē' bōnni' tácalenē' bōnachi queē' Cristo:

Ral-la' iláquiē' bōnni' idú ládxi'gáquiē'.

Biti' iláquiē' bōnni' tu'rixē' didza'.

Biti' iláquiē' bōnni' té'ajē'.

Biti' iláquiē' bōnni' ta'zé ládxi'sē' dumí.

⁹ Ral-la' gaca ilapa chí'ē idútē le réajlē'ēru' Cristo.

Ral-la' ilaca idú dxi'a icja ládxi'do'gáquiē'.

¹⁰ Yugu' bōnni' ni ral-la' si' bé'ēli' légaquiē' zí'alō, ate' ní'irō gata' lu ná'agaquiē' ilácalenē' bōnachi queē' Cristo, channō cabí zoa nu gaca bi inné queégaquiē'.

¹¹ Lësca' caní, nigula que queëgaquië' ral-la' ila'cuá'anu idú ládxi'gacanu, en cabí ilácanu unné que luzé'e. Ral-la' ilácanu zxon ladxi', en ilácanu li ladxi' lu yúgu'tè le tunnu.

¹² Yugu' bõnni' ilácalenë' bõnachi queë' Cristo ral-la' soa túzinu nigula que queëgaquië'. Lësca' ral-la' ila'nná bé'enë' dxi'a zxi'inigaquië', enca' bõnachi ulidxi que queëgaquië'.

¹³ Run bayudxi gaca caní, tu' ta'déli'në' lataj ga ilún bal bõnachi xtídza'gaquië', channõ tunë' dxi'a dxin tunë' tácalenë' bõnachi queë' Cristo, ate' ilácarë' rugu ladxi' para ilu'è didza' ca naca le réajlë'ëru' Jesucristo.

Le bigachi' que le reaj ládxi'ru'-në' Dios

¹⁴ Yugu' didza' ni ruzúaja' quiu' lu guichi, sal-la' runa' löza uduyútea' li'.

¹⁵ Channõ huadzéda', ruzúaja' quiu' didza' ni para inõzinu' naca ral-la' gunu' lógaca bõnachi nacuá' lidxë' Dios, nupa nácgaca bõnachi queë' Dios ban, en nácgaca tsutsu, en ta'guíxjö' dxi'a le naca idütë li. Nácgaca ca yugu' ya'zxon, en le nunída'gaca zö'ö, le nácgaca tsutsu, en ta'zõn yu'u.

¹⁶ Le nácatë, zxõntëro' naca le bigachi' que le reaj ládxi'ru'-në' Dios, ca na' nazúaj lu guichi le rnaa:

Dios buluf'i lahuë', gúquië' bõnachi.

Guca bë' náquië' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bõnachi izá'a.

Gula'yéajlë' bõnachi yödzo'lió Lë'.

Dios buchisë' Lë' xitsá' ga nayëpisëtërë'.

4

Nupa ulu'huõaj ládxi'gaca ca naca le réajlë'ëru'-në' Cristo

¹ Yálajdo' riguíxjö'ë Dios Bö' Lá'ayi, rnnë': Dza tsõjsétëgaca, ila'dá'baga' bal-la bõnachi Cristo. Ulu'huõaj ládxi'gaquië' ca naca le réajlë'ëru' Cristo. Ulu'zë nágagaquië' xtídza'gaca bõnachi nacuá'len bö' ta'zì' yë' léguequi, ate' ulu'zë nágagaquië' yugu' xibá quéguequi bö' xihui'.

² Ulu'zë nágagaquië' xtídza'gaca bõnachi tu'lu'isõ tsahui' cuínguequi. Yugu' bõnachi na' tu'í didza' le cabí nácatë, en chinazidi ládxi'do'guequi, para cabí uxõsa léguequi.

³ Caní gaca, tu'záguë'ë xinõzguequi nupa tã'ëni ulu'tsaga ná'agaca, en ta'nná bé'enë' bõnachi para cabí ilágugaca le nagu'ë Dios para uzí'iru' xibé, lë na' huáca ilágugaca nupa ta'yéajlë' Dios, nupa na' chinúnbë'gaca le naca idütë li, en tã' Dios: "Xclenu'" cate' tahuë' le.

⁴ Dxi'a naca yúgu'tè le benë' Dios, en biti' bi ral-la' uzóaru' tsólá'alõ channõ rágu' le, en rëru'-në' Dios: "Xclenu'."

⁵ Rusedi xtídzë'ë Dios rë'u, Lë' únë' dxi'a yúgu'tè le gáguru' channõ ulídzaru'-në' Dios, en inábiru'-në' gun lá'ayë' lë na' gáguru'.

Ca rurúajë' dxi'a huen dxin queë' Jesucristo

⁶ Channõ usëdinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazëdu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u.

⁷ Gurú'una yugu' didza' ridasõ que yödzo'lió ca naca didza' tu'ínu yugu' nigula gula. Béntica'sõ le gun ga gacu' tsutsu para gunu' ca rë'ënë' Dios.

⁸ Láti'do'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca rě'ëně' Dios. Cate' runru' caní, lě ni run ga runru' löza sóaru' ibanru' yödzölió ni, enca' sóaru' ibanru' dza zá'gaca, tōdi uzá'aru' yödzölió ni.

⁹ Didza' idútě li lě ni, en le naca lesaca' ila'z'í' lu ná'agaca yúgu'tě bōnachi.

¹⁰ Que lě ni na', rusáca'da' zi' cuinru' runru' dxin, tu' runru' löza Dios ban. Cristo gútiě' para usólě' yúgu'tě bōnachi. Tu'z'í' xibé le beně' nupa na' ta'yéajlě' Lě'.

¹¹ Gunná be'e, en busedi bōnachi ilún yugu' lě ni.

¹² Cuntu nu ral-la' uzóa li' tsölá'alō tu' nacu' bi'i ra'bán, pero ral-la' gunu' le ulu'í' nupa ta'yéajlě' Dios ral-la' ilún ca runu' li'. Caní ulu'í'nu' légaquiě':

Len didza' ru'u, en len le runu'.

Ca nadxí'inu' luzó'o, en ca ru'u lataj zóaleně' Dios Bō' Lá'ayi li'.

Ca runu' ca rnno', en ca nacu' idú tsahui'.

¹³ Tsanni za'a idxina' quiu', bě'tica'sō ladxi' ulabu' guichi lá'ayi lógaca bōnachi nacua' ga ni' zu'. Guchiza icja nágagaquiě' lě ni, en busedi légaquiě'.

¹⁴ Biti' udōdu' cá'asó le buzá' ládxě'ě Dios quiu', lě na' benně' quiu' ca na' gula'nná nupa ni' gulu'í' didza' uláz queě' Dios, cate' ni' bōnni' gula tapa chi'ě bōnachi queě' Cristo gula'xóa ná'agaquiě' li', en bulu'lidzě' Dios.

¹⁵ Béntica'sō yugu' lě ni. Bě'tica'sō ládxu'u gunu' caní, para ila'lé'e yúgu'tě bōnachi ca na' zeaj ridéli'nu' le nequi queě' Cristo.

¹⁶ Gudapa chi'í' cuinu', en gudapa chi'í' xibá rusédiru'. Béntica'sō yugu' lě ni, ate' channō gunu' caní, uló' li', en ulu'lágaca ca' nupa ila'yōni li'.

5

Ca ral-la' gunbi' Timoteo ni'a quégaca bōnachi queě' Cristo

¹ Biti' uzenu' bach yugu' bōnni' gula, pero guchiza icja nágagaquiě' didza', tsca nágagaquiě' xuz casu'.

Guchiza icja nágagacabi' bi'í' bōnni' ra'bán didza', tsca nágagacabi' bi'í' bōchi' casu'.

² Guchiza icja nágagacanu nigula gula didza', tsca nágagacanu xiná' casu'.

Guchiza icja nágagacabi' bi'í' nigula ra'bán didza', tsca nágagacabi' bi'í' zan casu', ca na' rōjlōz le naca idú dxi'a.

³ Ben bal yugu' nigula ba guti bōnni' que queégacanu, nágagacanu túzinu.

⁴ Channō zóanu tu nigula caní nacua'abi' bi'í' queěnu o xz'í'ini xi'sóanu, ral-la' ila'zédabi' ilunbi' ca rě'ëně' Dios, para ilácalenbi' z'í'alō bōnachi nacua' lédxigacabi', en ulu'bí'ibi' quégaquiě' xuz xiná'agacabi'. Lě ni naca dxi'a, en le raza ládxě'ě Dios.

⁵ Na'a, nigula na' nagá'ananu túzinu, runnu löza Dios, ate' rěla, en te dza rinábatica'sinu lahuě' Dios, en rulídzanu Lě' ni'a quégaca bōnachi queě',

⁶ pero nigula túzinu na' runnu ca naca le rizě' ládxí'nu nácanu ca tu nigula chinátinu cate' ni zóanu nabannu.

⁷ Lěsca' caní, gunná be'e bōnachi nacua' ga ni' zu', para ilún ca sa'yéaj yugu' lě ni, para ilaca bōnachi cuntu nu gaca bi'inně' quéguequi.

⁸ Channō zoa nu bōnni' cabí rugahuě' yugu' di'a dza queě', en le nácarō lo, channō cabí rugahuě' bōnachi nacua' lidxě', chigudá'baguě'ě le réajlě'ěru' Cristo, en nácarě' xihui' ca nu cabí réajlě' Dios.

⁹ Túzinu nigula zoanu túzinu caní chiyú'urōnu ca tsónnalalaj iz huáca ibábanu nupa gácalenli', channō cabí bucá'ananu-ně' bōnni' queěnu para sóalennu-ně' ia'tuě' bōnni'.

¹⁰ Run bayudxi soa nu gun ba nalí' queěnu ca nágaca le dxi'a runnu.

Gácalenli'-nu channö buscúlunu-bi' yugu' bí'ido',
 en channö ruí'ínu ga ila'cuá' böchi'ru' zá'gaquië' yödzö zi'tu',
 en channö ruí'ínu le ilë'aj ilágugaca bönachi queë' Dios,
 en channö rácalennu nupa ta'guí'i ta'zaca',
 en channö rúntica'sinu yúgu'të le naca dxi'a.

¹¹ Yugu' nigula túzinu biti' yuí'igacanu tsónnalalaj iz, biti' ibábagacanu nupa gácalenli', tu' ilunnu ca ta'zësö ládxi'gacanu, en ila'dá'baga'nu Cristo, en ilë'ëninu ulu'tsaga ná'agacanu leyúbölö.

¹² Caní gaca, ila'bága'nu dul-la' tu' tu'zóanu tsölá'alö le gula'yéajlë'ënu Cristo zí'alö.

¹³ Lë'sca' ilácanu nigula xöhuëdi, en nigula ta'dasö ca', en calëgasö ilácanu xöhuëdi, pero lë'sca' ilácanu nigula unnë que luzë'e, en tsöjgútsa'gacanu ga yúbölö, en ila'nnanu le cabí nácatë.

¹⁴ Que lë ni na', rë'ënda' ulu'tsaga ná'gacanu leyúbölö nigula túzinu cani yú'ugacanu iz cuidi', en ulu'scúlanu-bi' yugu' bí'ido', en ila'nná bé'enu bi'i nacua'abi' yu'u que queëgacanu, para cabí ilu'ínu nu ridá'baga' rë'u lataj bi innë queëru', rë'u na' réajlë'ëru' Cristo.

¹⁵ Caní ral-la' gaca, tu' chibulu'bíga'nu bál-lagacacnu, ate' tunnu ca rë'ëni Satanás tu' xihui'.

¹⁶ Channö nútí'tës bönni' o nigula nu réajlë' Cristo, nacua'anu nigula túzinu lídxigaca nupa na', ral-la' ilácalen légacanu, para cabí ulu'saca' zí' bönachi queë' Cristo. Caní gaca, bönachi queë' Cristo na' gaca ilácalen yugu' nigula nagá'anagacanu túzinu.

¹⁷ Benrö bal yugu' bönni' gula tapa chi'ë bönachi queë' Cristo, yugu' bönni' na' ta'nná bë'ë dxi'a, en béntërö ca' bal yugu' bönni' gula na' tunë' dxin, tunë' libán, en tu'sédinë' bönachi.

¹⁸ Nazúaj lu guichi lá'ayi le rnna: "Biti' cu'u du ruá'aba' bëdxi na' rulíbiba' zxo'a' xtila." Rnna ca': "Náquië' lesaca' nu bönni' huen dxin si'ë lazxi'ë'."

¹⁹ Biti' si' lu no'o didza' ruí'i nu ruzegui didza' tu bönni' gula rapa chi'ë bönachi queë' Cristo, channö cabí nacua' chopá tsonna nupa tun ba nalí que le benë'.

²⁰ Nupa túntica'sö dul-la', busidxi léguequi lógaca yúgu'të bönachi queë' Cristo para iladxi ia'zica'rö bönachi ni' Dios.

²¹ Ni'a queë' Xanru' Dios, en Xanru' Jesucristo, en ni'a quégaquië' gubáz lá'ayi rö queë', rinná bé'eda' li' gunu' ca ta'nná didza' ni. Tuz ca ral-la' uchi'a usöröu' yúgu'të bönachi, en biti' gunu' bal tuzë' bönni'.

²² Cuntu nu bönni' ixóatë no'o, cabí gunu' ga gáquië' huen dxin queë' Cristo, para cabí ibágu'u le runë' channö gunë' bönni' na' dul-la'.

²³ Bítí'rö guí'ju' níasös. Tu' rúntica'sö bayá' lë'u ral-la' guí'ju' láti'do' xisi uva nal-la para cö' dxi'a lë'u.

²⁴ Yugu' dul-la' quéguequi bal-la bönachi ila'lá' lahui zí'alö cate' si' ila'dxin ga uchi'a usöröë' Dios léguequi, ate' tódi ni' ila'lá' lahui dul-la' nabága'gaca ia'zica'rö bönachi.

²⁵ Lë'sca' caní, ila'lá' lahui dxin dxi'a núngaca bönachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

6

¹ Yúgu'të bönni' nadó'ogaca ral-la' ilúndë'ë bal xángaquië', para cabí gaca nu innë zí' que La lá'ayi queë' Dios, en que xibá queë'.

² Nupa ni' nacu'ë xángaca ta'yéajlë'ë Cristo, biti' ral-la' ulu'cá'ana cá'asö légaquië' tu' nácagaquië' böchi'guequi. Ral-la' ilunrö dxi'a xichíngaqië' tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxi'inë' Lë cazë' légaquië'. Ca naca lë ni, busëdi bönachi nacua' ni', en guchiza le icja nágagaquië'.

Le reaj ládxi'ru'-në' Dios le ruzi'iru' xibé

³ Channö zoa nu bönni' rusëdinë' xibá yúbölö, en biti' rusëdinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca rë'ënë' Dios,

⁴ bönni' ni run ba zxön cuinë', en biti' bi nõzinë'. Didza' biti' naca dxi'a rizé ládxe'ë ca nácagaca didza' böniga, en didza' bizxaj, yugu' le tun ga tu'zxé'e bönachi luzé'eguequi, en ta'díl-lalen luzé'eguequi didza'. Lësca' tun didza' caní ga ta'nnë'zi' bönachi que luzé'eguequi, en ta'zá' ládxi'gaca que luzé'eguequi le cabí nácate.

⁵ Lësca' caní tun ga ta'díl-latica'së' didza' bönni' biti' ta'yéajni'inë', nupa biti' nazí lu né'eguequi le naca idütë li. Téquini huáca ila'zi' dumí zían channö ilúngaca tsözön nupa ta'yéaj ládxi'gaca Dios. Gucuíta ga nacua' bönachi caní.

⁶ Zxön naca le ruzi'iru' xibé cate' len yöl-la' riböza zxön ladxí' reaj ládxi'ru'-në' Dios.

⁷ Biti' bi nuá'aru' cate' ridxinru' yödzölió, en lësca' caní, biti' bi uá'aru' cate' uzá'aru' yödzölió ni.

⁸ Que lë ni na', channö dësö queëru' le gáguru', en le gácuru', ral-la' udzéjaru'.

⁹ Yugu' bönni' té'ënnë' gata' quégaquië' yöl-la' tsahui', gaca quégaquië' le si' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' biti' bi nõzi quégaquië' zían le ila'zë ládxi'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nítië' tsaz.

¹⁰ Tu' ta'zë ládxi'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zë ládxi'gaquië' le, bulu'cá'anë' le gula'yéajlë'ë Cristo, en chiraca quégaquië' zían le tu'saca' zi' légaquië'.

Nu run dxin queë' Cristo naca ca tu bönni' rejë' gudil-la

¹¹ Na'a, bönni' queë' Dios, gucuíta ga raca le caní.

Bé'tica'sö ládxi'u gunu' le naca tsahui', en le rë'ënë' Dios.

Guyéajlë'tica'së' Cristo, en bidxi'i yugu' luzó'o.

Bë' ladxí' gacu' zxön ladxí', en nõxaj ladxí'.

¹² Ca runë' tu bönni' idú ládxe'ë rejë' gudil-la,

ben dxin que le réajlë'ëru' Cristo, ate' beni' quiu' yöl-la' na'bán idú.

Para gaca caní bulidzë' Dios li'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nalí que didza' bë'u.

¹³⁻¹⁴ Ni'a queë' Xanru' Dios, Nu na' nabánigaca yúgu'të le nacua', enca' ni'a queë' Jesucristo, Nu ben ba nalí le naca dxi'a le gunnë' yálajdo' lahuë' Poncio Pilato, rinná bé'eda' li' gun chi'u yugu' lë na' gunná bé'enë' Cristo rë'u. Ral-la' gacu' idú tsahui', en biti' bi gunu' le gü'i lataj nu bi innë' quiu', ga idxintë dza ní' uluf'i lahuë' Xanru' Jesucristo.

¹⁵ Cate' idxín dza na' huödë' Jesús, Dios ulu'ë lahui Lë'.

¡Dios náquië' lá'ayi!

¡Tuzë' Lë' dë lu në'ë yöl-la' unná bë',

en rinná bé'enë' yúgu'të nupa ta'nná bë',

en náquië' ca' Xángaca yúgu'të nupa nácagaca xan!

¹⁶ ¡Tuzë' Lë' zóatica'së'!

¡Zoë' lu bení' ga bití' gaca nu idxín rácasö que!
 ¡Catu caz nu bilé'e Lë', en bití' gaca nu ilé'e Lë'!
 ¡Queë' Lë' gácatíca'sö le run Lë' bal, en yöl-la' unná bë'
 ¡Ca' gaca!

¹⁷ Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxon cuíngaquië', en para cabí ulu'zxöni ládxi'gaquië' yöl-la' tsahui' na' bití' naca löza. ¡Ral-la' ilunë' löza Dios ban, Nu rúnnada' queëru' yúgu'të le ruzí'iru' xibé!

¹⁸ Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzjë' quégaca bönachi yechi', en ilu'í ládxi'gaquië' léguequi.

¹⁹ Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

Le gulu'ë Pablo lu ná'abi' bi'i Timoteo

²⁰ Böcha'ado' Timoteo, ben chí'i le nadödi lu no'o. Gucuíta ga nacuá' nupa tuí'i didza' cá'asö, en yugu' didza' bití' nazaca', en yugu' didza' bizxaj, yugu' didza' na' tuí'i nupa ta'nnasö tácada', ate' nazí' yé'eguequi ca naca lë na' tun.

²¹ Bal-la bönachi gula'zí' lu në'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinábida'-në' Dios uzá' ládxe'ë quiu' le nácagaca dxi'a queë'.

¡Ca' gaca!

DIDZA' BUROPI GUSÖL-LË'Ë PABLO QUEËBI BI' TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasöl-lë'ë Cristo. Caní naca' tu' rë'ënë' Dios gaca' caní, para caní gaca le guzxi' lu në'ë, gunnë' queëru' yöl-la' na' bán idú, le ruzá' ládxë'ë Jesucristo queëru'.

² Rugapa' Dios li', böcha'ado' Timoteo. Nacu' ca xxi'ini caza' tu' benru' tu xzön xichinë' Cristo, ate' nadxf'ida' li'. Rinábida'-në' Xúziru' Dios, enca' Xanru' Jesucristo, uzá' ládxë'ë quiu', en huéchi' ládxë'ë li', en gunë' ga cö' dxi icja ládx'i'do'o.

Timoteo ral-la' gunbi' ba nalí queë' Jesucristo

³ Rea'-në' Dios: "Xclenu'" ca naca quiu' cate' rulidza'-në' Dios. Biti' rizóa dxía' rinaba' ni'a quiu' rëla, en te dza lahuë' Dios, Nu na' runa' xichinë' idú ládx'a' ca na' gulunë' xuz xtá'ahua'.

⁴ Cate' røjneda' ca na' gurödxu', rizë ládx'a' ulë'eda' li', para gaca udzëjada' idú ládx'a'.

⁵ Rea'-në' Dios: "Xclenu'" tu' zoa le run ga røjneda' ca réajlë'u Cristo idú ládxu'u. Lësca' caní, gula'yéajlë'ënu xinó'o gula Loida, enca' xinó'o Eunice Lë' zí'aló ca li', ate' runa' löza, lësca' caní réajlë'u Lë' na'a.

⁶ Tu' naca caní, rusá'a ládxu'u para usabanu' le bennë' Dios quiu', lë na' bidxín quiu' cate' ni' guxóa na'a li', en bulidza'-në' Dios.

⁷ Bö' na' bennë' Dios queëru' biti' naca tu bö' le gun ga gádxiru', pero bennë' queëru' Bö' Lá'ayi Nu run ga náparu' yöl-la' huáca, en run ga nadxf'iru' luzá'aru', en run ca' ga rinná be'e cuinru'.

⁸ Que lë ni na', biti' utuí'inu' gunu' ba nalí queë' Xanru', en biti' utuí'inu' ca raca quia' neda' ni, nadzuna' lidxi guíë tu' runa' xichinë', pero ben tsözxön nupa ta'guí'i ta'zaca' tu' tun libán que didza' dxi'a. Dios gunnë' yöl-la' huáca quiu' para gunu' caní.

⁹ Dios caz busölë' rë'u, en bulidzë' rë'u para gácaru' idú dxi'a. Biti' bulidzë' rë'u tu' zoa le dxi'a benru', pero bulidzë' rë'u tu' gú'uni quézinë' Lë', en tu' ruzá' ládxë'ë caní queëru'. Dza ni'te buzöë' caní queëru' zí'atëlö ca guta' yödžolió ni, tu' néquiru' queë' Jesucristo.

¹⁰ Na'a, chibuluf'i lahui le ruzá' ládxë'ë Dios queëru', tu' buluf'i lahuë' Jesucristo Nu rusólá rë'u. Bugúë' yöl-la' guti, en bulu'e lahui yöl-la' na' bán idú na', le cabí ca' initi. Caní naca ca rnna didza' dxi'a.

¹¹ Cristo buzöë' neda' para guna' libán que didza' dxi'a na', en para gaca' gubáz queë' para usëdigacada' bönachi izá'a.

¹² Que lë ni na' riguí'i rizáca'a ca' yugu' le raca quia' ni, pero biti' rutuí'ida', tu' núnbë'a Nu na' réajlë'a. Runa' löza Lë', napë' yöl-la' huáca gapa chí'ë le budöda' lu në'ë ga idxintë dza ni' huödë'.

¹³ Didza' dxi'a na' biyönnu' bena' libán que ral-la' gaca quiu' tu le rulu'fi ca ral-la' usëdinu' bönachi ca réajlë'ëru' Jesucristo, en ca nadxf'iru' Lë'.

¹⁴ Ben chí'i le naca dxi'a na' nadödi lu no'o, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

¹⁵ Chinöz queézinu' ca na' gulunë' zian bönni' ta'yéajlë'ë Cristo nacu'ë luyú Asia bulu'béaj ládxi'gaquië' neda'. Figelo, en Hermógenes nabábagaquië' bönni' ni.

¹⁶⁻¹⁷ Rinábida'-në' Xanru' Dios huéchi' ládxië'ë bönnachi nacua' lidxië' Onesiforo, tu' butipë' ládxa'a bönni' ni zían luzuí. Cate' bidxinë' Roma, idú ládxië'ë buguiljë' neda', ate' budzölinë' neda'. Biti' butuí'inë' ni'a quia' neda' tu' nadzuna' lidxi guié ni, nága'a du guié.

¹⁸ Rinábida'-në' Xanru' huéchi' ládxië'ë lë' dza ni' idxinë' lahuë' Dios. Chinöz queézinu' ca na' gúcalenë' bönni' ni rë'u, cate' ni' guzóaru' yödzo Efeso.

2

Ral-la' gácabi' Timoteo ca tu bönni' idú ládxië'ë rejë' gudil-la

¹ Na'a, xzí'ina'do', butipa ládxi'u ca naca le ruzá' ládxië'ë Jesucristo quiu'.

² Didza' biyönnu' bë'a lógaca zían nupa tun ba nalí que, didza' ni budödi lu ná'agaquië' bönni' tunë' ca ta'nnë', bönni' gaca ulu'sédinë' ca' ia'bal-la bönnachi.

³ Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú ládxië'ë rejë' gudil-la.

⁴ Nu bönni' rejë' gudil-la, biti' ca' gútsë'ë yugu' le tun bönnachi yödzólió ni, para tsaza ládxië'ë bönni' na' nuzóë' lë' gáquië' bönni' queë' rejë' gudil-la.

⁵ Lë'sca' caní, nu nutsa' lu huitaj, biti' bi ideli' channö cabí run ca ral-la' gun.

⁶ Nu bönni' gúz gú'una runë' dxin, zí'alö lë' uzi'ë xibé lë na' razë'.

⁷ Busá' ládxi'u lë ni rea' li', ate' Xanru' caz gunë' ga tséajni'ínu' yúgu'të.

⁸ Yöjné ca guca queë' Jesucristo. Guljë', en gúquië' xzí'ini xí'sóë' David, en gudödi gútië', bubanë' lu yöl-la' guti. Caní rna didza' dxi'a runa' libán que.

⁹ Tu' runa' libán que didza' dxi'a, riguí' rizáca'a le raca quia', ga ridxintë nága'a lidxi guié ni, ca raca queë' tu bönni' huia' dö', pero biti' ca' nága'të xtídzë'ë Dios.

¹⁰ Que lë ni na' ruá' riléna' yúgu'të lë ni tu' nadxí'ida' nupa guröë' Dios, para ulu'lë' ca' légaquië'. Jesucristo caz runë' ga ulu'lágaca bönnachi na' para ila'cuá' lu bení idú queë'.

¹¹ Catëz naca lë ni rna:

Channö nátlenru' Lë', sóalenru'-në' ca' ibanru'.

¹² Channö guá' ilenru' le quí'í sáca'ru', inná bë'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

¹³ Sal-la' biti' runru' ca rnnaru', Lë' rúntica'së' ca rnnë'.

Lë' biti' gaca tá'baguë'ë le náquië'.

Nu bönni' huen dxin queë' Cristo rurúajë' dxi'a

¹⁴ Busá' ládxi'gaca nupa nacua' ga ni' zu' ca naca lë ni, ate' ni'a queë' Xanru' Dios gunná be'ë légaquië' para cabí ila'dil-la dídzë'ë ca nácagaca didza' cabí nazáca'gaca. Yugu' didza' caní tun ga ila'niti nupa tu'zë nagui léguequi.

¹⁵ Bë'tica'sö ládxi'u urúaju' dxi'a lahuë' Dios para gacu' ca tu bönni' huen dxin biti' rutuí'inë' ca naca dxin nunë'. Dxi'ado' ral-la' ugunu' dxin didza' iduté li.

¹⁶ Na'a, gucuíta ga nacua' nupa tuí'í didza' biti' nazaca', en didza' cá'asö, tu' tun didza' caní ga ilunrë' le cabí rë'ënë' Dios.

¹⁷ Ila'zë didza' tu'ë ca rizxön huë' nudzu' le ridúdu' rilá. Himeneo, en Fileto nabábagaquië' nupa tuí'í didza' caní.

18 Iropë' ni gula'chixi gula'níguinë' ca naca le naca idútë li, tu' ta'nnë' chigudödi dza ral-la' ulu'bán nupa chinátigaca, ate' gula'béquië' baröli bal-la bönachi ga ridxintë bití'rö ta'yéajlé' Cristo.

19 Le benë' tsutsu Dios zóatica'sö, en dë tu le naca bë', le rnna: "Núnbë'ë Dios nupa néquiquequi queë'." Rnna ca': "Guli'cufta ga raca le ruá' dö', yúgu'téli' libí'ili' néquili' queë' Cristo."

20 Tu lu yu'u zxön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga bití' naca liná'.

21 Para gácaru' ca naca lë na' tu'gún bönachi dxin ga liná', en para gaca gunru' le naca dxi'a, en gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxi'a.

22 Gurú'una le tun ga nu së ladxi' le ruá' dö' ca raca quégaquië' bönni' ra'bando'. Bë' ladxi' gacu' tsahui'. Ben le run ga réajlé'u Cristo, en le run ga nadxí'inu' yugu' luzó'o, en le run ga ribözu' dxí'ado'. Ca nácgaca lë ni, ben tsözxön nupa tu'lidza Xanru', naca idú dxi'a icja ládxi'do'guequi.

23 Na'a, gurú'una yugu' didza' cá'asö, en didza' bití' nazaca', tu' chinöz quézinu' tun didza' caní ga ta'dil-la didza' bönachi.

24 Bönni' huen dxin queë' Xanru' bití' ral-la' tíl-lalenë' bönachi didza', pero ral-la' gáquië' nöxaj ladxi' lógaca yúgu'të bönachi. Ral-la' gaca usédinë' bönachi, en gáquië' ca' zxön ladxi'.

25 Lu yöl-la' nöxaj ladxi' ral-la' uzéajni'inë' nupa ta'dá'baga' le runë' libán que. Channö gunë' caní, nadxi ca' Dios gu'ë légaquië' lataj ulu'bí'i ládxi'gaquië' para ilúnbë'ë le naca idútë li.

26 Caní ulu'lë' lu yalaj que tu' xihui' ga nadzúngaquië', ate' ulu'huóáquië' tsahui' para ilunë' ca rë'ënë' Dios.

3

Ca ilaca bönachi dza tsöjsétëgaca

1 Lësca' ral-la' inözinu' lë ni: Dza tsöjsétëgaca ilaca dza ila'guí'i ila'zaca' bönachi.

2 Yugu' dza ni' ila'cu'ë bönni' ilácagaquië' caní:

Ila'dxí'i la' cuíngacasë', en ulu'huí'di'në'.

Ilún ba zxön cuíngaquië', en ulu'lú'i cuíngaquië' zxön.

Ila'nnë' zi'ë que le naca lá'ayi.

Ila'dá'baguë'ë xuz xiná'agaquië'.

Ilácagaquië' bönni' cabí ta'yaza ládxi'gaquië'.

Bití' ilunë' ca rë'ënë' Dios.

3 Bití' ila'dxí'inë' ca ral-la' ilunë'.

Ilácagaquië' zidzaj ladxi'.

Ila'nnë' que luzá'agaquië'.

Bití' ila'nná be'e cuíngaquië'.

Ilácagaquië' bönni' dza'a.

Bití' ila'lë'enë' dxi'a le naca dxi'a.

4 Ilácagaquië' hueti luzé'e, en bití' ila'dzáquië' dxi'a.

Ulu'lú'i cuíngaquië' ca bönni' nayépisëgaquië'.

Ila'dxí'inë' le ila'yázasö ládxi'gaquië', en calëga Dios.

5 Ulu'lú'i cuíngaquië' ca bönni' núnbë'gaquië' Dios.

Ila'dá'baguë'ë le ruzá' ládxe'ë Dios queëru'.

Gucuíta ga nacuá' bönachi caní.

⁶ Lësca' caní, lu yöl-la' banísa quégaquië' ila'yazë' gapa naca lu yu'u, en ila'zì' yé'enë' yugu' nigula bitì' bi nõzguequinu para ila'zì' lu ná'agacanu le ulu'sédinë'. Ila'bága'nu nigula na' dul-la' zían, en iluf'i ládxi'gacanu yugu' le ila'zësö ládxi'gacanu le cabí nazaca'.

⁷ Ila'yönitica'sinu nigula ni didza' ilún libán que bönachi, pero bitì' ca' ila'déli'nu ila'yéajni'ininu le naca idútë li.

⁸ Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxinë' ca naca le réajlë'ëru' Cristo.

⁹ Bitì' ila'déli'rönë', pero gaca bë' nácagaquië' bönni' bitì' bi nõzguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

Le rigu'ë Pablo lu ná'abi' bi'i Timoteo

¹⁰ Nöz quézinu' ca naca le rusédida' bönachi, en ca runa'. Nözinu' ca' le ruí'i ládxa'a guna', en ca réajlë'a Cristo, en ca naca' nõxaj ladxi', en ca nadxi'ida' luzá'a, en ca riböza' zxon ladxi'.

¹¹ Nözinu' ca' yugu' le gula'bía ládxi'gaca bönachi neda', en yugu' le gudí'i guzáca'a, le gulaca quia' lu yödzo Antioquia, en lu yödzo Iconio, enca' lu yödzo Listra. Yugu' le gula'bía ládxi'gaca bönachi ni' neda' biá' guléna', ate' Xanru' Jesús busölë' neda' lu yúgu'të lë na'.

¹² Yúgu'të nupa t'ëni ilaca idú dxi'a tu' néquiguequi queë' Jesucristo, lësca' ila'gu'i' ila'záquië' yugu' le ila'bía ládxi'gaca bönachi légaquië'.

¹³ Na'a, bönni' tuá' dö', en bönni' ta'zì' yë'ë ilácarë' xihui'. Ila'zì' yé'enë' bönachi, ate' ila'zì' ye'e bönachi ca' légaquië'.

¹⁴ Na'a, ben chí'i yugu' le buzëdu', en le guxzí' lu no'o, tu' nunbë' cazu' nupa bulu'sedi li'.

¹⁵ Ga gudela' nacu' bí'ido' núnbë'u le nazúajgaca lu guichi lá'ayi, le huáca ulu'zéajni'ide'e li' para uló' tu' réajlë'u Jesucristo.

¹⁶ Yúgu'të le nazúajgaca lu guichi lá'ayi guchízië' Dios icja ládxi'do'gaca bönachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nõza, en usedi rë'u para gácaru' tsahui'.

¹⁷ Caní run, para gaca sina' nu naca queë' Dios, en gácada' gun yúgu'të le naca dxi'a.

4

¹⁻² Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzë'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bë'ë. Bë' ladxi' gunu' lë ni channö raca dxi'a quiu' o bitì' raca dxi'a. Lu yöl-la' zxon ladxi', guléaj ga liná' le tun bönachi. Busá ládxi'gaquië', en guchiza icja nágagaquië' ca naca lë na' rusédiru'.

³ Caní ral-la' gunu' tu' idxín dza cate' bitì' ulu'zë' nágagaquië' xibá tsahui', pero ilë'ëninë' ila'yönnë' le ta'dánisinë'. Ca ta'zësö ládxi'gaquië' ulu'tubë' quégaquië' nupa ulu'sedi légaquië'.

⁴ Ulu'cá'anë' le naca idútë li, en ila'zì' lu ná'agaquië' yugu' didza' ridasö.

⁵ Na'a, ral-la' gacu' zxön ladxí' lu yúgu'tè le runu'. Biá' gulén le ulu'saca' lí' zi'. Ben libán que didza' dxi'a. Idú ládxi'u ben dxin le budödë' Cristo lu no'o gunu'.

⁶ Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzölió ni chizóa idxín.

⁷ Ca runë' tu bönni' idú ládxi'ë rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlé'ëru' Cristo.

⁸ Ia'stú, naca löza quia' idéli'da' le ral-la' ila'zí' nupa nácgaca tsahui', le gunné' Xanru' quia' dza ni', ate' tsahui' naca ca ruchi'a rusöröë' rë'u. Calégasö quia' neda' gunné' le, pero lësca' gunné' le quegaca yúgu'tè nupa ta'dxi'i Lë', en idú ládxi'guequi ta'böza dza huödë'.

Le buzúajë' lu guichi Pablo gunbi' Timoteo

⁹ Bë' ladxí' guídateo' ga ni zoa'

¹⁰ tu' guléaj ládxi'ë Demas neda', tu' nadxí'inë' le ruzi'ë xibé yödzölió ni, ate' guyijë' yödzö Tesalónica. Crescente guyijë' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'.

¹¹ Tuzë' Lucas zóalenë' neda'. Guchë'ë-bi' bi'i Marcos para guídalenbi' lí' tsözxön, tu' nácabi' gúnlenbi' neda' tsözxön xichinë' Cristo.

¹² Gusöl-la'a-bi' bi'i Tíquico lu yödzö Éfeso.

¹³ Cate' guídu', biá' quia' lari' guitsa' na' bucá'ana' lu yödzö Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

¹⁴ Alejandro, bönni' gubëdxi guié, zían le bi'ë dö' quia'. Lë cazë' Xanru' ubi'ë queë' ca nácgaca le benë' bönni' ni quia'.

¹⁵ Ben chi'i cuinu' queë' bönni' ni, tu' ridá'baga'dë'ë didza' runru' libán que.

¹⁶ Cate' le zí'alö luzuí bidxina' lógaquië' bönni' yúlahui', cuntú nu gúcalen neda', pero bulu'béaj ládxi'gaca yúgu'tè bönachi neda'. Biti' ré'ënda' uzí lëbë' Dios légaquië'.

¹⁷ Guzóalenë' Xanru' neda', en butipë' ládxi'a para údxi guna' libán que xtídzë'ë para ila'yöni yúgu'tè bönachi izá'a le. Caní guca, busölë' Xanru' neda', ate' guca quia' tsa burúaja' lu ruá'aba' bëdxi guixi'.

¹⁸ Lë cazë' Xanru' usölë' neda' lu yúgu'tè le cabí raca dxi'a, en gun chi'ë neda' ga idxíntea' ga rinná bë'ë Lë' ni' yehua' yubá. ¡Gácatca'sö queë' yöl-la' ba yúgu'tè dza zá'gaca! ¡Ca' gaca!

Pablo rugapë' Dios bönachi queë' Cristo

¹⁹ Bugapa Dios Priscila, en Aquilo, enca' bönachi nacué' lidxë' Onesíforo.

²⁰ Bugá'anë' Erasto lu yödzö Corinto, ate' bucá'ana'-në' Tróximo luyú Mileto tu' ré'enë'.

²¹ Bë' ladxí' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'tè böchi' luzá'aru' ni tu'gapë' Dios lí'.

²² Rinábida'-në' Xanru' Jesucristo sóalenë' lí'. ¡Gácalen lí' le ruzá' ládxi'ë Dios quíu'! ¡Ca' gaca!

DIDZA' GUSÖL-LĚ'Ě PABLO QUEĚBI' BI'I TITO

Pablo rugapë Dios bi'i Tito

¹ Neda', Pablo, naca' huen dxin queë' Dios, en gubáz nasöl-lě'ě Jesucristo. Gusöl-lě'ě neda' para guna' ga ila'yéajlě' bönachi chigurö cazë' Dios, para ulu'únbë' le naca idútë li ca ral-la' gun nu nunbë' Dios.

² Caní naca' tu' runa' löza uzi'a xibé yöl-la' na'bán idú le guzxi' lu në'ě Dios gunně' queëru' dza ni'te, cate' si' gusi lo rata' yúgu'të le dë, ate' run cazë' Lě' le nazí' lu në'ě gunë'.

³ Cate' bidxin dza que, Dios bulu'e lahui xtídzë'ě, le gulu'ë lu na'a guna' libán que. Caní gunná bé'enë' Dios, Nu busölá rë'u, neda'.

⁴ Rugapa' Dios li', böcha'ado' Tito. Nacu' idú zxi'ini caza' tu' naca lěbisö ca réajlě'ëru' Cristo. Rinábida'-në' Dios Xuz, en Xanru' Jesucristo Nu busölá rë'u, uzá lădxë'ë quiu', en huéchi' lădxë'ë li', en gunë' ga soa dxi icja lădxi'do'o.

Dxin queë' Cristo runbi' bi'i Tito luyú Creta

⁵ Que lě ni na' bucá'ana' li' luyú Creta, para usó'o le riyadzaj quégaca bönachi queë' Cristo nacua' ni', para ilácagaca idú bönachi queë' Cristo, en para ucú'u bönni' gula yúgu'të yödzo para ilún chi'ë bönachi queë' Cristo nacua' tu tu yödzo ni', ca na' chigunná bé'eda' li' gunu'.

⁶ Nu bönni' gula rapa chi'ë bönachi queë' Cristo ral-la' gáquië': Bönni' cuntu nu bi gaca innë queë'.

Zoa túzinu nígula queë'.

Yugu' zxi'inë' ral-la' ila'yéajlě'ëbi' Cristo.

Biti' soa nu gaca innë quégacabi' ta'dá dzágasibi' ca', o ta'dá'baga'bi' xuz xiná'agacabi'.

⁷ Nu bönni' rapa chi'ë bönachi queë' Cristo run bayudxi:

Biti' runë' le gúfi' lataj nu bi innë queë' ca runë' xichinë' Dios.

Biti' gáquië' bönni' zidi o bönni' icja dza'a,

o bönni' re'jë', o bönni' ribíxjanë',

o bönni' rizë lădxi'së' dumí.

⁸ Ral-la' gu'ë ga ila'cu'ë böchi'ru' ta'dxinë' lidxë'.

Ral-la' së lădxë'ë gunë' le naca dxi'a.

Ral-la' gáquië' bönni' réajni'i, en bönni' tsahui'.

Ral-la' gădxinë' Dios, en inná be'e cuinë'.

⁹ Ral-la' gun chi'ë didza' idútë li ca chinazëdë',

para gaca ichízië' icja nágagaca bönachi ca sa'yéaj xibá dxi'a,

en para gaca usayjë' rú'agaca bönachi ta'nnë que.

¹⁰ Caní ral-la' gáquië' tu' ta'dá'baguë'ě zían bönni', en tu'ë didza' bití nazaca', en ta'zí' yé'enë' bönachi. Zían bönni' tunë' caní nácagaquië' judío.

¹¹ Yugu' bönni' ni, run bayudxi gunu' ga tsayaj ruá'agaquië', tu' tunë' ga ta'chixi ta'nigui yúgu'të bönachi nacua' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zí'isë' dumí.

¹² Tuë' bönni' gubábë' bönachi Creta ga na' zu', bönni' na' bē'ě didza' uláz que yudo' quégaquië', gunně': "Ta'zí' yé'tica'së' bönni' Creta, en nácagaquië' ca böa' guí'a sínia'. Nácagaquië' bönni' huágulë'ě xöhuëdi."

13 Didza' ni benë' ba nali quégaquië' naca idútë li. Que lë ni na' gudil-la légaquië' para gaca idú ca ta'yéajlë'ë Cristo,

14 en para cabí ulu'zë nágagaquië' yugu' didza' ridasö quégaquië' bönni' judío, en biti' ilunë' ca ta'nná bë' bönachi nucá'anagaca le naca idútë li.

15 Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en biti' ta'yéajlë', biti' bi naca dxi'a, pero nácagaca xihui' ga ridxintë le ta'bequi ícaguequi, en le ta'zá' ládxi'gaca.

16 Ta'nnë' núnbë'gaquië' Dios, pero le túngaquië' biti' röjlöz le ta'nnë' tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en biti' ca' gaca ilunë' le naca dxi'a.

2

Xibá dxi'a le ral-la' usëdiru'

1 Na'a, ral-la' gu'u didza' le röjlöz xibá dxi'a.

2 Busedi yugu' bönni' gula:

Biti' ral-la' ilë'ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxi'inë' luzá'agaquië', en ila'bözë' zxön ladxi'.

3 Busedi yugu' nigula gula:

Ilunnu le raza ládxe'ë Dios.

Cabí ila'nnënu que luzá'agacanu, en cabí ilë'ajnu.

Ral-la' ulu'sédinu le naca dxi'a.

4 Ral-la' ulu'sédinu' nigula ni' yú'ugacanu iz cuidi' para ila'dxi'inu bönni' que queégacanu, enca' zxi'inigacanu.

5 Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dë lídxigacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le gü'i lataj nu innë' zì' que xtídzë'ë Dios.

6 Busedi yugu' bönni' ni' nacu'ë iz cuidi':

Ral-la' ilácagaquië' bönni' ta'yéajni'inë'.

7 Ral-la' gúntica'su' le naca dxi'a,

ulu'i'nu' bönachi caní ca ral-la' ilúngaca.

Ca rusédinu' ral-la' ulu'i' nacu' idú ladxi', en ba'a ladxi'.

8 Ral-la' usédinu' didza' dxi'a le cabí gaca nu bi innë' que.

Caní gunu' ga utuí'inë' bönni' ridá'baguë'ë,

en biti' gaca bi innë' queëli' runli' le ruá' dö'.

9 Busedi böchi'ru' ni' ta'yéajlë'ë Cristo, en nadó'ogaquië':

Ral-la' ila'cu'ë nōxaj lógaquië' xángaqië'.

Ral-la' ilunë' yúgu'të le ila'yaza ládxi'gaquië' xángaqië'.

Biti' ral-la' tá'bagagaquië' le ta'nná bë'ë.

10 Biti' bi ulu'cáchi'lanë'.

Ral-la' ulu'lufi' cuíngaquië' tsahui' ca naca yúgu'të le tunë'.

Caní ulu'i' lo naca dxi'a xibá queë' Dios, Nu busölá' rë'u.

11 Cristo, bönni' na' buzá' ládxe'ë Dios queëru' chibulufi' lahuë' lógaca yúgu'të bönachi para ulu'lágaca.

12 Lë' rusédinë' rë'u ucá'anaru' le cabí raza ládxe'ë Dios, en cabí së ládxi'ru' le naca que yödzölió ni, pero cōzaru' zxön ladxi', en gácaru' tsahui' dza ni zóaru' na'a, en gunru' ca rë'ëni quézinë' Dios.

¹³ Ral-la' cõzaru' le runru' lõza le gun ga gácaru' bica' ba, læ na' gaca dza ni' cate' uluí'i lahué' Jesucristo lu beni' idú queé'. Náquié' Dios zxõn, Nu rusólá rë'u.

¹⁴ Lë cazë' budõdi cuinë' uláz queëru', para boá'uë' rë'u lu yúgu'të le naca xihui', ate' ruúnë' rë'u tsahui' para gácaru' bõnachi queé', en gü'i ládxi'ru' gunru' le naca dxi'a.

¹⁵ Yugu' læ ni bë' didza', en guchiza icja nágagaca bõnachi ni', ate' len yõl-la' unná bë' gudil-la léguequi. Béntica'sõ caní, para cabí si' lataj nu ucá'ana cá'asõ xtídz'u.

3

Le ral-la' ilún bõnachi ta'yéajlë' Cristo

¹ Busá' ládxi'gaquié' bõchi'ru' ni' ilunë' ca ta'nnë' bõnni' dë lu ná'agaquié', en bõnni' yúlahui', para ilunë' ca rnna xtídz'a'gaquié'. Ral-la' ila'cu'ë sina' ilunë' le naca dxi'a.

² Biti' bi le ruá' dõ' ral-la' ila'nnë' que luzá'agaquié', en biti' ila'díl-lalenë' légaquié' didza', pero ral-la' ilácagaquié' nõxaj ladxi', en idú ladxi' lógaca yúgu'të bõnachi.

³ Lëscá' rë'u, zí'alõ gúcaru' yugu' bõnni' biti' ta'yéajni'inë', en gudá'baga'ru' Dios. Gudarú' nanítiru', en gúcaru' ca nupa nadó'ogaca, tu' benru' le guzë ládxi'ru' le ruá' dõ', en ia'bal-la le guyaza ládxi'ru'. Benru' ca' le ruá' dõ', en buzxé'ru' luzá'aru'. Biti' bila'lé'e bõnachi rë'u dxi'a, ate' rë'u biti' bilé'ru' dxi'a luzá'aru' turu' ia'turu'.

⁴ Ní'rõ bulu'e lahui Dios, Nu rusólá rë'u. Naca bë' náquié' idú dxi'a, en nadxí'inë' yúgu'të bõnachi,

⁵ tu' busólë' rë'u, calëga tu' zoa bi le naca dxi'a benru' rë'u, pero tu' buéchi' ládxe'ë rë'u. Bunë' rë'u dxi'a, en benë' ga nácaru' bõnachi cubi. Dios Bõ' Lá'ayi rucubë' rë'u.

⁶ Dios gusól-lë'ë Dios Bõ' Lá'ayi queëru' tu' néquiru' queé' Jesucristo, Nu rusólá rë'u.

⁷ Buzá' ládxe'ë queëru', en bunë' rë'u tsahui' para gata' yõl-la' na'bán idú queëru', le runru' lõza gunnë' queëru'.

⁸ Didza' idútë li lë ni nuzúaja' lu guichi. Rë'ënda' usédide'enu' yugu' bõnni' ni' yugu' læ ni para iluí'i ládxi'gaquié' ilúntica'së' le naca dxi'a tu' ta'yéajlë'ë Dios. Lë ni naca dxi'a, en nácada' lesaca' ila'z' lu ná'agaca yúgu'të bõnachi.

⁹ Na'a, biti' gu'u lataj nu gü'i didza' le cabí nazaca', o nu gü'i ladxi' ca nácagaca lágaca zióntëro cõ' xuz xtó'ogaca bõnachi, o nu tsõjgutsa' yugu' didza' bizxaj, en yugu' le ridil-la didza' ca naca que xibá queë' Moisés, tu' cabí bi nazáca'gaca le caní, ate' cuntú nu uzí' xibé didza' caní.

¹⁰ Channõ zoa nu bõnni' ni', rubéajë' choplõ bõnachi queé' Cristo, tõdi usó'o ládxe'ë tu ia'tú luzuí, bubéajë' bõnni' na'.

¹¹ Nõz quezínú' chibõáquié' caní nu bõnni' biti' náquié' tsahui', en runë' dul-la'. Chinabáguë'ë xíguia' ni'a que læ na' runë'.

Le buzúajë' Pablo lu guichi le gunbi' bi' Tito

¹² Cate' isól-la'a-në' Artemas o Tíquico ga zu', bë' ladxi' guídu' ga ni zoa' lu yõdzõ Nicópolis, tu' chinuna' quia' ugá'ana' ni yugu' beo' ziaga.

¹³ Zenas, bõnni' na' rudödë' didza' ca rinná bë' bõnachi yúlahui', enca' Apolos, ila'dxinë' ga ni' zóali'. Bugú'u légaquié' nõza lu yõl-la' rácalen, para cabí bi yadzaj quegaquié'.

¹⁴ Busedi yugu' böchi' luzá'aru' ilúntica'së' le naca dxi'a, en bi ulu'nödzjè' quégaca nupa bi riyadzaj quéguequi, para gaca bë' caní le nácagaquië' queë' Cristo.

Pablo rugapë' Dios bönachi queë' Cristo

¹⁵ Yúgu'të nupa nacua'len neda' tu'gapa Dios li'. Bugapa Dios nupa ni nadxí'igaca rë'u tu' ta'yéajlë' Dios. Le ruzá' ládxe'ë Dios queëru' gácalen yúgu'tëli'. ¡Ca' gaca!

DIDZA' GUSÖL-LË'Ë PABLO QUEË' FILEMÓN

Pablo rugapë' Dios Filemón

¹ Neda', Pablo, dzágabi' neda' bi'i böchi'ru' Timoteo. Nadzuna' lidxi guié tu' runa' xichinë' Jesucristo. Rugapa' Dios li', Filemón. Nacu' bönni' nadxí'itu', en runu' xichinë' Cristo ca runtu' netu'.

² Rugapa' Dios Apia, nigula quiu'. Nácanu zanru' réajlë'ënu Cristo. Rugapa' Dios ca' zxi'inu', Arquipo. Nácabi' queë' Jesucristo ca tu bönni' rejë' gudil-la, tu' runbi' xichinë' Lë' ca runtu' netu'. Lësca' rugapa' Dios bönachi queë' Cristo tu'dubë' lu yu'u lidxu'.

³ Rinábida'-në' Xúziru' Dios, enca' Xanru' Jesucristo, uzá' ládxë'ë queë'li, en gunë' ga soa dxi icja ládxí'do'oli'.

Ca runë' Filemón tu' réajlë'ë Cristo

⁴ Rética'sa'-në' Dios queëru' "Xclenu'", en röjnética'sida' li' cate' rulidza'-në'.

⁵ Caní runa' tu' ridxín quia' didza' ca nadxí'inu'-në' Xanru' Jesús, en réajlë'u Lë', en nadxí'inu' ca' yúgu'të bönachi rö queë'.

⁶ Rinábida'-në' Dios gunë' ga gunda' dxin libán runu' ca naca le réajlë'u Cristo, para ulu'z'í xibë nupa nacua' ni' yúgu'të le naca dxi'a, le ruzá' ládxë'ë Jesucristo queëru'.

⁷ Rudzëjada', en ruzí' zxöna' tu' nadxí'inu' yugu' böchi'ru', en benu' li', böcha'a, ga bulu'huöáca ládxí'gaca bönachi ta'yéajlë' Cristo.

Filemón ral-la' uniti lahuë'-bi' Onésimo, bi'i nadó'o queë'

⁸ Que lë ni na', sal-la' dë lu na'a tu' naca' gubáz nasöl-lë'ë Cristo inná bé'eda' li' ca ral-la' gunu',

⁹ ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guié tu' runa' xichinë' Jesucristo.

¹⁰ Ráta'yua' lo' uláz queëbi' Onésimo, bi'i na' bena' ga böácabi' queë' Cristo, en que lë ni na' nácabi' ca zxi'ini caza' ga ni nadzuna' lidxi guié.

¹¹ Bi'i ni, zí'aló biti' gúcabi' lesaca' quiu', pero na'a nácabi' lesaca' quiu' li', enca' quia' neda'.

¹² Bi'i ni rusöl-la'a-bi' ga zu'. Ben bal lëbi' ca neda' caz runu' bal, tu' nadxí'ida'-bi'.

¹³ Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guié tu' runa' libán que didza' dxi'a,

¹⁴ pero biti' bi rë'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' rë'ëni quézinu' ca'.

¹⁵ Nadxi ca' que lë ni na' buzá'abi' Onésimo ga zu' tu chí'ido' para udxinbi' tsaz ga zu'.

¹⁶ Na'a, bíti'rö gácabi' quiu' ca tu bi'i nadó'o, pero gácabi' quiu' ca bi'i böchi'cazu', tu' nácabi' bi'i böchi'ru' réajlë'ëbi' Cristo, en nadxí'iru'-bi'. Nácabi' caní quia' neda', ate' ral-la' gácaröbi' ca' caní quiu', calégasó ca böchi' luzó'o, pero lësca' ca bi'i böchu'u réajlë'ëbi' Xanru' Jesucristo.

¹⁷ Que lë ni na', channö nunu' neda' tuz, ben lëbi' bal ca neda' caz runu' bal.

¹⁸ Channö bi xíguia' benbi' quiu' o channö bi ral-la'bi' quiu', gunnátëz neda' ral-la'a.

¹⁹ Neda', Pablo, len na'a caza' ruzúaja' quiu' lu guichi lë ni: Neda' caz quixxa' bi rál-la'bi', en calëga guía' li': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú.

²⁰ Ca' gaca, bócha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' böchu'u réajlë'a Cristo, ate' caní gunu' ga huóáca ládxa'a.

²¹ Ruzúaja' quiu' lu guichi ni, tu' ruzxöni ládxa'a li', gunu' ca rnna xtídza'a, en nözda' gunu' ia'lati' ca lë na' chigúta'yua' lo'.

²² Lësca' rinaba' lo' upó'o quia' ga soa' lu yu'u lidxu', tu' runa' löza urúaja' lidxi guié ni, ate' guída' ga zóali' tu' rulídzali'-në' Dios, en rinábali' lahuë' ní'a quia' neda'.

Pablo ruzúajë' lu guichi le rugapa Dios Filemón

²³ Epafras, bönni' yú'ulenë' neda' tsözxön lidxi guié ni tu' runë' xichinë' Jesucristo, rugapë' Dios li'.

²⁴ Lësca' tu'gapë' Dios li' Marcos, en Aristarco, en Demas, en Lucas, yugu' bönni' ni túnlenë' neda' tsözxön dxin queë' Cristo.

²⁵ Rinábida'-në' Xanru' Jesucristo uzá' ládxe'ë queëli'. ¡Ca' gaca!

DIDZA' RUZÉAJNI'I YUGU' BÖNACHI HEBREO

Dios bë'lenë' rë'u didza' lu ru'ë Zxí'ini cazë'

¹ Zían luzuí, en zían ca benë' Dios, bë'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'.

² Na'a, ga ruúdxí xtídzë'ë, dza ni zóaru' na'a, Dios bë'lenë' rë'u didza' lu ru'ë Zxí'ini cazë'. Dios buzóë' Lë' para guequi queë' Zxí'inë' yúgu'të le nequi queë' Lë', ate' lu në'ë Zxí'inë' na', Dios benë' yödzölió ni.

³ Zxí'inë' na' náquië' ca tu le ruluí'í lahui yöl-la' zxon queë' Dios, en ca náquië' Zxí'inë' ruluí'í lahui idú le náquië' Dios caz. Run cazë' ga nacua'tica'sö yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rë'u dxí'a que le naca dul-la' nabága'ru', yöjchö'ë cuita lë'ë ibëla Dios, Nu rö'ö rinná bë' xitsá'tërö.

Zxí'inë' Dios nayëpisëtërë' ca yugu' gubáz lá'ayi

⁴ Zxí'inë' Dios nayëpisëtërë' ca yugu' gubáz lá'ayi queë' Dios, tu' nácatërö lo le lë', lë na' Dios gulu'ë Lë' tu' náquië' Zxí'ini cazë', ca lágaquië' gubáz lá'ayi queë' na'.

⁵ Dios catu caz gudxë' tuë' gubáz lá'ayi queë' ca na' gudxë' Zxí'inë'. Gunnë': Zxí'ina' nacu'. Buzóa' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxí'inë'. Gunnë':

Naca' Xuzë', ate' Lë' náquië' Zxí'ina'.

⁶ Lëasca' caní, cate' Dios buzóë' Bi'í que cazë' lu yödzölió ni, gunnë': Yúgu'të gubáz lá'ayi queë' Dios ila'yéaj ládxi'gaquië' Lë'.

⁷ Ca nácagaquië' gubáz lá'ayi queë', rna: Lë' runë' ga nácagaquië' gubáz lá'ayi queë' ca bö' recja, ate' gubáz lá'ayi huen dxin queë', runë' ga nácagaquië' ca guí'.

⁸ Na'a, ca naca cazë' Zxí'inë', rnnë': Ga rö'u rinná bë'u, inná bë'tica'su', Dios. Tsahuí' naca ca rinná bë'u.

⁹ Nadxí'inu' le naca tsahuí', en calëga le ruá' dö'. Que lë ni na' Dios budödë' lu no'ö yöl-la' unná bë', en benë' ga ruzí'tëru' Li' xibé yöl-la' unná bë' ca le tu'zí'í xibé luzó'o.

¹⁰ Lëasca' caní rnnë': Li', Xan, cate' gusí lo, benu' yödzölió, ate' len ná'asu' buzú' lúzxiba.

¹¹ Huadödi quëguequi, pero Li', tsaz idí'u.

Yúgu'të itëbigaca ca ritëbi lari',
¹² en ca lari' utubu' léguequi, en utsó'o léguequi, pero Li', catu caz utsá' cuinu' en catu caz igulu'.

¹³ Dios catu caz gudxë' tuë' gubáz lá'ayi queë' ca gudxë' Zxí'inë', gunnë': Gurö'ö cuita lë'a ibëla cate' gunra' ga ulu' zechu zxíbigaca lo' nupa bití' ta'lé'e Li' dxí'a.

¹⁴ Yúgu'të gubáz lá'ayi queë' Dios nácagaquië' bö' huen dxin queë' Dios, ate' nasól-lë'ë légaquië' para ilácalenë' nupa ni nulágaca.

2

Biti' ral-la' ucá'anaru' cá'asö yöl-la' rusölä

¹ Que lê ni na', ral-la' güf'i ládxi'röru' le chibiyöniru', para cabí gaca chopa ládxi'ru'.

² Guca bē' naca idütē li didza' na', le bidxín dza ni'te lu ná'agaquiē' gubáz lá'ayi queē' Dios, ate' yúgu'tē nupa gula'dödi bē' ca rnna didza' na', en biti' gulún ca rnna, Dios benē' léguequi xíguia' ca na' röjlöz le gulúngaca.

³ Lēasca' caní biti' ca' uláru' rē'u lu xíguia' na' channó ucá'anaru' cá'asö yöl-la' rusölá ni, le benē' Lē cazē' Xanru' libán que zí'alö, ate' nupa bila'yöni Lē' bulu'luí'i rē'u naca idütē li.

⁴ Lēasca' caní Dios caz benē' tsözxön légaquiē' ba nalí, tu' benē' le nácgaca bē', en le tun ga rubániru', en yugu' yöl-la' huáca zxön. Gudísiē' ca' yugu' le runödzjē' Dios Bö' Lá'ayi quégaquiē' tsa gú'uni quézinē' Dios.

Dios benē' ga böáquiē' Jesús idú ca nácaru' rē'u

⁵ Dios biti' budödē' yödzüliö si' za' lu ná'agaquiē' gubáz lá'ayi que yehua' yubá queē', lê na' ruí'iru' didza' que.

⁶ Na'a, ca naca lê ni, nazúaj lu guichi lá'ayi didza' bē' nu run ba nalí le rnna: Dios, rubánide'eda' tu' ruí'i ládxi'u bönachi. Rubánide'eda' tu' rácalenu' léguequi.

⁷ Ia'látí'sö cá'asö ca yugu' gubáz lá'ayi que yehua' yubá quiu' benu' bönachi. Buzú' quéguequi yöl-la' zxön, en yöl-la' run bal, en budödu' yúgu'tē le benu' Li' lu nē'eguequi.

⁸ Yúgu'tē budödu' lu nē'eguequi para ila'nná be'e le.

Nazúaj lu guichi lá'ayi lê na' rnna: "Budödu' lu nē'eguequi yúgu'tē." Biti' bi bucá'anē' le cabí budödē' lu nē'eguequi, pero ga ridxintē na'a dza, biti' rilé'eru' yu'u lu nē'eguequi yúgu'tē.

⁹ Réquibe'eru' le guca queē' Jesús. Tu chí'isö, Dios benē' ga böáquiē' ia'látí'sö cuidi' ca yugu' gubáz lá'ayi que yehua' yubá queē'. Guljē' bönachi para gütiē', ate' gudí' guzxáqué'ē Jesús lu yöl-la' guti uláz quégaca yúgu'tē bönachi, tu' buzá ládxi'ē Dios queēru' caní. Tu' benē' Jesús caní, Dios benē' ga rata' queēru' yöl-la' zxön, en yöl-la' run bal.

¹⁰ Dios benē' yúgu'tē le rilé'eru', en runē' ga nacua'tica'sö. Dios benē' ca ral-la' gunē' cate' benē' ga naca bē' náquiē' Cristo idú tsahui' ni'a que le gudí' guzxáqué'ē. Caní benē' Dios queē' Cristo, Nu bideli' yöl-la' rusölá para gaca ichē'ē bönachi zían yehua' yubá queē'.

¹¹ Cristo ruünē' tsahui' bönachi para ilequi quez queē' Dios. Tuzē' náquiē' Xúzguequi nupa na' ruünē' Cristo tsahui', en Xuz cazē'. Que lê ni na', biti' ca' rutuí'inē' Zxf'inē' Dios cate' rnnē' nácgasakiē' böchi' luzē'ē.

¹² Ca naca lê ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj láhui'lö bönachi tu'dubi quiu', gul-la' yöl-la' ba quiu'.

¹³ Lēasca' caní rnnē':

Uzxöni ládxa'a-nē' Dios.

Ga yúbölö nazúaj le rnnē':

¡Buli'yútsöca' neda', en yugu' zxf'inē', nupa na' Dios bennē' quia'!

¹⁴ Que lê ni na', tu' néquiqueuinē' bëla' en rön yugu' zxf'inē' na', lēasca' caní Cristo ben cuinē' ca nácgasakiē'. Guljē' bëla' en rön. Caní guljē' para guca

gútië', en caní guca busunítië' yöl-la' huáca unná bë' que tu' xihui', nu na' dë lu në'e guti bönachi.

¹⁵ Caní benë' Cristo para guca busanë' yúgu'të nupa gulaca ca bönni' nadó'ogaquíë' tsanni ni nacua' nabángaca, tu' guladxi yöl-la' guti.

¹⁶ Naca bë' biti' benë' caní para gácalenë' yugu' gubáz lá'ayi que yehua' yubá queë' Dios, pero para gúcalenë' yugu' xzí'ini xi'sóë' Abraham.

¹⁷ Que lë ni na', ben bayudxi böáquíë' Cristo idú ca nácagaquíë' böchi' luzë'è na', para gáquíë' lahuë' Dios tu bixúz lo, tu bixúzi runë' ca rnnë', en ruhuéchi' ládxë'ë bönachi, enca' para gunë' le gun ga gata' lu në'è ugüë' dul-la' nabága'gaca bönachi.

¹⁸ Na'a, tu' gudí'i guzxaqué'ë Lë cazë' Cristo, ate' guzxi' bë' tu' xihui' Lë', que lë ni na' napë' yöl-la' huáca gácalenë' nupa ni, rizi' bë' tu' xihui' léguequi.

3

Jesús nayëpisëtërë' ca Moisés

¹ Que lë ni na', böchi' luzá'ado', libí'ili' na' nácali' quez queë' Dios tu' bulidzë' Dios libí'ili', buli'yú dxi'a ca náquië' Jesucristo. Náquië' gubáz nasöl-lë'ë Dios, enca' bixúz lo que le nazí' lu ná'aru'.

² Jesús ni runë' ca rnna xtídzë'ë Dios, Nu na' buzóa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi queë' Dios.

³ Nayëpisëtërë' Jesús ca Moisés, para gaca queë' yöl-la' ba, ca na' nácaré' lo bönni' nequi queë' tu yu'u ca naca huen dxin zoë' lu yu'u na'.

⁴ Yúgu'të yu'u, zoa nu ben le, pero Dios náquië' Nu ben yúgu'të le rilé'eru'.

⁵ Le nácate Moisés benë' ca rnna xtídzë'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba nalí que didza' ral-la' gu'ë Dios,

⁶ pero Cristo runë' ca rnna xtídzë'ë Dios, en náquië' Xzí'ini cazë', ate' nacua' lu në'ë bönachi queë' Dios. Rë'u ni, nácaru' bönachi na' queë' Dios channó gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzëjalenru' lë na' runru' löza.

Dë lataj ga ulu'zí' ládxi'gaca bönachi queë' Dios

⁷ Que lë ni na', nazúaj lu guichi ca rnnë' Dios Bö' Lá'ayi le rnna: Na'a, channó riyónili' didza' ru'ë Dios,

⁸ biti' gácali' zidi lu icja ládxi'do'oli' ca na' gulaca nupa ni' gula'dá'baga' Dios cate' ni' gula'zí' bë' Lë' lu lataj cá'asó.

⁹ Gula'zí' bë'ë xuz xtó'oli' neda' ni' sal-la' bila'lé'enë' le bena' idú ca choá' iz.

¹⁰ Que lë ni na' guléda' bönachi dza ni', en gunniá':

“Ta'chíxítica'sinë' ca ta'zá' ládxi'gaquíë'.
Biti' të'ënnë' ila'nözínë' le rë'ënda' ilunë'.”

¹¹ Que lë ni na' guléda' légaquíë', en bena' tsutsu xtídzá'a, gunniá':
“Biti' ila'yázië' ga ulu'zí' ládxi'gaquíë' tsözxön len neda'.”

¹² Gulí'gún chí'i cuinli', böchi' luzá'ado', para cabí gácali' nitulí' libí'ili' tu bönni' xihui' cabí réajlë'ë, en para cabí usanli'-në' Dios ban.

¹³ Na'a, buli'zéajni'i tuli' ia'tuli' yúgu'të dza, tsanni ni naca dza ni zóaru' na'a, para cabí si' ye'e le naca xihui' libí'ili', en para cabí gácali' nitulí' libí'ili' zidi lu icja ládxi'do'oli'.

¹⁴ Yúgu'tëru' gunru' tsözxön Cristo channó gácaru' tsutsu ga idxinrö dza údxi, ca na' gusi lo ridipa ládxi'ru'.

¹⁵ Caní ral-la' gunru' tsanni ni rnna:

Na'a, channö riyónili' chi'ë Dios,
biti' gácali' zidi lu icja ládxi'do'oli',
ca na' gulaca nupa ni' gula'dá'baga' Dios.

¹⁶ ¿Nupxi na' bila'yóni xtídzë'ë Dios, en gula'dá'baga' Lë'? Gulún caní yúgu'të nupa ni' bubéajë' Moisés léguequi luyú Egipto.

¹⁷ ¿Nupxi na' gulënë' Dios idú ca choá' iz? Gulaca nupa ni' gulún dul-la', ate' gulati lu lataj cá'asò.

¹⁸ ¿Nupxi ni' benë' tsutsu xtídzë'ë Dios, gunnë' biti' ila'yaza ga ulu'zi' ládxi'guequi tsözxón len Lë'? Gulaca nupa ni' biti' gulún ca rnna xtídzë'ë Dios.

¹⁹ Na'a, réquibe'eru' biti' guca ila'yázië' tu' cabí gula'yéajlë'ë Dios.

4

¹ Na'a, tsanni ni nagá'ana le guzxi' lu në'ë Dios queëru' para gaca tsú'uru' lataj queë' ga uzí' ládxi'ru', ral-la' gádxiru' para cabí unítiru' lataj tsú'uru' ni'.

² Bìyönru' rë'u didza' dxi'a ca na' bila'yönnë' légaquië', pero légaquië' biti' bulu'zi'ë xibé didza' na' bila'yönnë', tu' cabí gula'yéajlë'ë Dios cate' bila'yönnë' le.

³ Rë'u ni réajlë'ëru' Dios, en tsú'uru' lataj queë' ga uzí' ládxi'ru'. Raca ca na' gunnë' Dios:

Que lë ni na' guléda' légaquië'

en bena' tsutsu xtídzá'a, gunnía':

Biti' tsú'ugaquië' ga ulu'zi' ládxi'lenë' neda'.

Dë lataj tsú'uru' rë'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë' yödzülió ni, en chiruzí' ládxi'ë.

⁴ Nazúaj lu guichi lá'ayi ga ru'í didza' ca naca que dza igadxi, le rnna: "Buzí' ládxi'ë Dios dza igadxi yugu' lu dxin benë'."

⁵ Ga yúbölö rnna: "Biti' tsú'ugaquië' ga ulu'zi' ládxi'lenë' neda'."

⁶ Nupa ni' bila'yóni zí'aló didza' dxi'a, biti' guyú'ugaca ni' tu' cabí gulún ca rnna xtídzë'ë Dios. Que lë ni na', ral-la' tsú'ugaca bönachi yúbölö ni'.

⁷ Que lë ni na' ca', Dios bulu'e tu dza yúbölö, gunnë': "Na'a dza." Caní naca, cate' chigudödi iz zían, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channö riyónili' didza' ru'ë Dios,

biti' gácali' zidi lu icja ládxi'do'oli'.

⁸ La'tu' benë' Josué ga bulu'zi' ládxi'gaquië' cate' gula'yu'ë lu xiyúgaquië', biti' bë'ë Dios didza' gudödi ni' que ia'turö dza cate' nu uzí' ládxi'len Lë'.

⁹ Que lë ni na', nagá'ana quegaca bönachi queë' Dios lataj ila'déli'në' ga ulu'zi' ládxi'gaquië'.

¹⁰ Nupa tsú'ugaca ga ulu'zi' ládxi'lengaca Dios, ulu'zi' ládxi'gaquië' lu dxin tunë', ca na' buzí' ládxi'ë Dios yugu' lu dxin benë' Lë'.

¹¹ Que lë ni na', ral-la' güí'i ládxi'ru' tsú'uru' ga ni' uzí' ládxi'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' biti' gula'yéajlë' Dios, en biti' gula'yu'ë ni'.

¹² Xtídzë'ë Dios naca ban caz, en napa caz yöl-la' huáca. Richúgurö ga rë' ca guíë tuchi' natuchi' iropa ru'í. Richugu ridxín ga ta'dzaga bö' naca cázaru', en le zoa lu icja ládxi'do'oru', enca' rōxaj ga ridxintë lu dxita lu bin. Run ga naca bë' le ribequi ícjaru', en le rizá' ládxi'ru'.

¹³ Biti' bi gaca ucáchi'ru' ga biti' gaca il'énené' Dios le. Yúgu'tè le nun cazè' Dios nalá' lahui, en narúaj ga liná' lahuè' Dios. Lahuè' Lè' run bayudxi quíxjō'ōru' le nunru'.

Jesús náquiè' bixúz lo, Nu nácatèrō zxōn

¹⁴ Zoa queèru' tu bixúz lo, nácatèrè' zxōn, Nu na' gudōdi ni' yehua' yubá, Jesús, Zxí'iné' Dios. Que lè ni na' ral-la' ugá'anaru' tsutsu ca naca le nazí' lu ná'aru'.

¹⁵ Zoa queèru' tu bixúz lo, Nu gaca huéchi' ladxí' rē'u ca nácgaca le raca queèru', tu' guzxi' bē' tu' xihui' Lè' cazè' idúté' ca na' rizí' bē' tu' xihui' na' rē'u, pero bití' bi dul-la' benè' Lè'.

¹⁶ Que lè ni na', idú ládxi'ru' ral-la' ibíga'ru' gala' ga rō'è rinná' bē'è Dios, Bōnni' ruzá' ladxē'è queèru', en inábaru' lahuè' huéchi' ládxe'è rē'u, en uzá' ládxe'è queèru', para gácalenè' rē'u cate' bi raca queèru'.

5

¹ Dios ribō' cazè' núti'tès bixúz lo ladaj bōnachi, en ruzó'è lè' para gunè' yugu' le runè' lahuè' Dios uláz quégaca bōnachi, en cu'è lahuè' Dios yugu' le tu'nōdzaj bōnachi, en yugu' bōa' bēdxi tútigaquiè'-ba' lu bucugu lá'ayi tu' nōzi dul-la' nabága'gaquiè'.

² Bixúz lo na', tu' raca queè' lēbisō' ca raca quégaca bōnachi, gaca gáquiè' zxōn ladxí' len nupa nácgaca yugu' bōnni' canóz, en nupa ta'chixi ta'nigui.

³ Que lè ni na', tu' náquiè' bixúz lo na' bōnáchisō, ral-la' cu'è lahuè' Dios bōa' bēdxi na' tútigaquiè'-ba' lu bucugu lá'ayi ni'a que dul-la' nabaga' cazè', ca na' runè' ca' ni'a que dul-la' nabága'gaca bōnachi.

⁴ Cuntu nu gaca gun cuini bixúz lo, pero Dios rulidzè' nu ral-la' gaca bixúz lo, ca na' bulidzè' Aarón.

⁵ Lēscá' caní guca queè' Cristo. Biti' ben cuinè' bixúz lo, pero Dios buzó'è Lè' ca bixúz lo. Ca naca lè ni, Dios gudxè' Lè':

Li' nacu' Zxí'ina'.

Buzóa' Li' na'a.

⁶ Lēscá' caní gudxè' Lè' le nazúaj ga yúbōlō, gunnè':

Li' nácatíca'su' bixúz,
ca na' gúquiè' Melquisedec bixúz.

⁷ Cristo, cate' ni' zoa cazè' yōdzōlió ni, bulidzè' Dios, en gúta'yuè' lahuè'. Gurōdxi'è, en gurōdxè' lahuè' Dios, Bōnni' guca usólé' Lè' lu yól-la' guti, ate' Dios biyōnnè' Lè' tu' gúdxinè' Lè' idú ládxe'è.

⁸ Sal-la' gúquiè' Zxí'iné' Dios, bizédè' gunè' ca rnna xtídzè'è Dios tu' gulaca queè' yugu' le gudfí' guzxaquè'è.

⁹ Cate' chigúquiè' Cristo idú ca ral-la' gáquiè' tu bixúz lo, Dios benè' Lè' Bōnni' rusólé' tsaz yúgu'tè nupa tun ca rnna xtídzè'è.

¹⁰ Ní'irō Dios buzó'è Lè' para gáquiè' bixúz lo ca na' gúquiè' Melquisedec na' bixúz lo.

Zoa bōnadxi queèru' huōaj ládxi'ru', en tá'baga'ru'-nè' Cristo

¹¹ Ca naca lè ni, zían le ral-la' gúf'ilentu' libí'ili' didza', le naca bōniga quíxjōi'itu' libí'ili', tu' cabí réajni'inili'.

¹² Chigudōdi dza ral-la' gaca usédili' bōnachi xtídzè'è Dios, tu' chibiyōnili' xidzè', pero riquínili' nu quíxjōi'i libí'ili' leyúbōlō yugu' le cabí naca bōniga nazí' lu nè'e nu si' réajlè'. Nagá'anali' ca yugu' bi'i huè'énido' ta'quínibi' nidxi', en calēga la' huaga tsutsu.

¹³ Yúgu'të bönni' naquíniguequinë' nu usedi légaquië' lë na' biti' naca böniga, nácagaquië' ca yugu' bí'ido' té'ajbi' nidxi'. Biti' nazédagaquië' ca sa'yéaj le naca tsahui'.

¹⁴ La' huagu tsutsu tu'zì' xibé nupa chinál-lágaca, nupa na' gaca iléquibe'e le naca dxi'a, en le cabí naca dxi'a, tu' nugúngaquië' dxin yöl-la' réajni'i quégaquië'.

6

¹ Que lë ni na', biti' ral-la' usédatica'siru' yugu' xibá buzédaru' cate' si' gusi lo riyöniru' ca naca queë' Cristo. Ral-la' tsöjnöröru' para gácaru' idú bönachi queë' Cristo. Biti' naquini usédaru' leyúbölö yugu' xibá biti' naca böniga:

ca ral-la' ubí'i ládxi'ru',
en ca bití'rö gunru' le ruá' dö',
en ca ral-la' tséajlë'ëru'-në' Dios,

² en ca naca xibá que le ridílaru' nisa,
en ca rixóa ná'aru' bönachi ta'yéajlë' Cristo,
en ca ral-la' ulu'bán nupa nátigaca,

en ca gunë' Dios, ichúguië' quégaca bönachi tuá' dö'.

³ Caní gunru' channö gunnë' Dios rë'u lataj.

⁴⁻⁶ ¿Naru' huácatsö gunru' ga ulu'bí'i ládxi'gaca leyúbölö nupa tu'huóaj ladxí', en ta'dá'baga' Dios? Channö bidxín quéquequi bení' queë' Dios, en bulu'zì' xibé le runödzejë' Dios zoë' yehua' yubá, en gulaca tuz len Dios Bó' Lá'ayi, en channö bulu'zì' xibé didza' dxi'a queë' Dios en yöl-la' huáca que dza si' za', en channö ní'rö tu'huóaj ladxí', en ta'dá'baga' Dios, biti' ca' gaca nu gun ga ulu'bí'i ládxi'gaca leyúbölö, tu' gaca tsca ulu'dá' leyúbölö Zxí'inë' Dios lë'e yaga cruz en ilún tsca ulu'titaj Lë' lahui' lógaca bönachi.

⁷ Nupa tun caní nácagaca ca yu na' ruzí' xibé nisa guiöj le ribixi láhuilö zían luzuí. Channö yu na' runödzej le tu'zì' xibé nupa tá'ana yu na', raza ládxe'ë Dios le,

⁸ pero channö ruzóasö yu na' lubá yötsi', en bësiga', naca ditaj, en nabía dö', en naca para nu uzegui le.

Le runru' löza le run ga nácaru' tsutsu

⁹ Sal-la' ruí'itu' caní didza', libí'ili' na' nadxí'itu', réquitu' ruzí'ili' xibé le nácagacarö dxi'a, le tu'zì' xibé nupa nulágaca.

¹⁰ Dios náquië' tsahui', en biti' gal-la ládxe'ë dxin tsahui' benli', en yugu' le benli' tu' nadxí'ili' Lë'. Gúcalenli' nupa néquiquequi quez queë' Dios, en runli' xichínguequi.

¹¹ Na'a, ré'ënitü' gü'i ládxi'li' luzá'ali' tu ia'tuli', en gunli' caní ga idxinrö dza údxi, para gata' idú queéli' lë na' runli' löza.

¹² Ré'ënitü' cabí gácali' xöhuëdi, pero gunli' ca tun nupa ta'yéajlë' Dios, en ta'böza zxön ladxí', para idéli'li' yugu' le guzxí' lu në'ë Dios gunnë' queëru'.

¹³ Caní gaca, tu' benë' tsutsu Dios xtídzë'ë cate' guzxí' lu në'ë bi gunnë' queë' Abraham. Tu' cabí zoa nu nácarö lo ca Dios, que lë ni na' buzetaj cuinë', cate' ni' benë' tsutsu xtídzë'ë.

¹⁴ Caní gunnë' Dios: "Le nácatë guna' ga gaca dxi'a quiu', en guna' ga ila'yánda'abi' zxi'ini xi'sú'."

¹⁵ Gulözë' Abraham zxön ladxí', ate' bidéli'në' le guzxí' lu në'ë Dios gunnë' queë'.

¹⁶ Cate' tu bönni' runë' tsutsu xtídzë'ë, ruzötjë' nu nácatërö lo ca lë', ate' lë ni ruzóa dxisö yúgu'të didza' bizxaj, tu' nunë' tsutsu xtídzë'ë.

¹⁷ Que lë ni na' Dios benë' tsutsu le guzxi' lu në'ë gunë', en buzötaj cuinë', tu' gú'unnë' uluf'inë' nupa ulu'z'í xibé le guzxi' lu në'ë unödzjë' quéguequi, nácada' löza, en tsaz naca le nuzóa lahuë' gunë'.

¹⁸ Le guzxi' lu në'ë Dios, en le benë' tsutsu, chopa ni catu caz idzá'gaca, en ca naca quégaca chopa ni, biti' gaca si' yë'ë Dios. Caní benë' Dios para gácada' löza queëru' tu le huë' tsahui' rë'u. Ruzxöni ládxi'ru' Lë' idéli'ru' lë na' runru' löza le gunnë' sí'iru'.

¹⁹ Lë na' runru' löza ruzóaticasö tsutsu icja ládxi'do'oru', en naca ca tu du guié ruzóa dxisö barco. Lë na' runru' löza run chi'ë Cristo ni'a queëru' ga ni' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu yudo' rö'ö yehua' yubá.

²⁰ Guyázië' Jesús uláz queëru' ca Nu röjnöru loru' ga ni' zoë' Dios, ate' Dios nuzóë' Lë' náquië' tsaz bixúz lo ca na' gúquië' Melquisedec bixúz lo.

7

Jesús náquië' bixúz lo ca gúquië' Melquisedec

¹ Melquisedec gúquië' bönni' na' gunná bë'ë lu yödzö Salem, enca' bixúz queë' Dios, nayëpisetërë'. Cate' suzë'ë Abraham, sóhuójë' gudödi guca gudil-la cate' bucul-lë' yugu' bönni' ta'nná bë'ë, birúajë' Melquisedec na', yöjtságuië' Abraham, en gunábinë' Dios gun lá'ayë' Abraham.

² Abraham bë'ë queë' tu cö' tu' chi cö' que yúgu'të le bidéli'në' lu gudil-la na'. Ca lë' Melquisedec na' rna lu didza' xidza': "Bönni' Unná Bë' Tsahui'", en náquië' ca' Bönni' unná bë' que yödzö Salem, le rna lu didza' xidza': "Bönni' Unná Bë' Ribequi Dxíë'."

³ Biti' zoa lu guichi le rna gula'cu'ë xuz xinë'ë, o xuz xtá'ahuë', en biti' nazúaj dza guljë' o dza gútië', pero náquië' ca náquië' Zxi'inë' Dios tu' náquië' tsaz bixúz lo.

⁴ Buli'yútsöca' na'a, ca na' gúquië' zxön Melquisedec na', tu' lë cazë' xúziru' Abraham bë'ë queë' tu cö' tu' chi cö' que lë na' guléajë' lu ná'agaquië' bönni' ta'nná bë'ë ni' bucul-lë' lu gudil-la.

⁵ Lu xibá queë' Moisés, Dios rinná bé'enë' yugu' zxi'ini xi'sóë' Leví, nupa nácacaga bixúz, ila'zi'ë tu cö' tu' chi cö' que le ta'zi' bönachi Israel, sal-la' nácacaga di'a dza quégaquië', tu' nácacagaquië' yúgu'të' zxi'ini xi'sóë' Abraham.

⁶ Melquisedec na' biti' náquië' di'a dza quégaquië', pero guzxi'ë tu cö' tu' chi cö' lu në'ë Abraham, nu na' bideli' yugu' le guzxi' lu në'ë Dios gunnë' queë'. Lësca' Melquisedec na' gunábinë' Dios gun lá'ayë' Abraham,

⁷ ate' cuntu nu gaca tá'baga' lë na' rna: Nu nadéli'rö lahuë' Dios rinábini Dios gun lá'ayë' nu nacuídi'rö.

⁸ Na'a, dza ni zóaru' na'a, nupa ta'zi' tu cö' tu' chi cö' lu ná'agaca bönachi nácacaga ca' bönachi tati caz, pero Melquisedec na', zoa le run ba nalí queë' le rna zoë' nabanë'.

⁹ Na'a, huáca innaru' queë' Leví, en quégaca zxi'ini xi'sóë', nupa na' ta'zi' tu cö' tu' chi cö' lu ná'agaca bönachi, lësca' gula'guíxjë' tu cö' tu' chi cö' cate' ni' Melquisedec na' guzxi'ë tu cö' tu' chi cö' lu në'ë Abraham, xuz gula gudödi quégaquië'.

¹⁰ Caní naca, tu' huáca innaru' Abraham ni' nu'ë lë'ë Leví, en yugu' zxi'ini xi'sóë' cate' ni' yöjtságuië' Melquisedec lë', tu' cabí náljaniguequinë'.

11 Ta'zi' bönachi Israel xibá gunná bē'ē Moisés lu ná'agaca bixúz, nupa nácagaca xzí'ini xí'sóē' Leví ga nababē' ca' Aarón, bixúz lo. Na'a, la'tu' guca ulu'huóáca bönachi idú tsahui' lahuē' Dios tu' tun ca rinná bē' xibá queē' Moisés, biti' ben bayudxi soa ia'tué' bixúz ca gúquiē' Melquisedec, en calēga ca gúquiē' Aarón.

12 Channō rutsē'ē Dios ca ral-la' gáquiē' bixúz, run bayudxi utsē'ē ca' ca naca xibá queē'.

13 Xanru', Nu na' nazúaj lu guichi ca naca queē' yugu' lē ni, nababē' ia'turō cō' xzí'ini xí'sóē' Israel ca le nababē' Leví na', ate' que cō' xzí'ini xí'sóē' ga nababē' Xanru', cuntu nu guca bixúz lahuē' Dios.

14 Naca caní tu' naca bē' guljē' Xanru' lu cō' di'a dza queē' Judá, ate' Moisés biti' bē'ē didza' queē' Judá na' cate' bē'ē didza' quégaca nupa ral-la' ilaca bixúz.

15 Nácaterō bē' lē ni n'a que le raca na'a. Ca na' gúquiē' Melquisedec bixúz, chibuluí' i lahuē' ia'turē' bixúz, Jesús.

16 Bönni' ni, biti' gúquiē' bixúz tu' rinná bē' xibá ca ral-la' ilaca di'a dza queē', pero náquiē' bixúz tu' napē' yöl-la' huáca que yöl-la' na'bán le catu caz údxi.

17 Nazúaj lu guichi lá'ayi le run ba nalí queē' le rnna:

Tsaz nacu' bixúz

ca na' gúquiē' Melquisedec bixúz.

18 Na'a, nadúa xibá gula ní, tu' cabí gudapa yöl-la' huáca unná bē', en biti' bi guca gun.

19 Xibá queē' Moisés na' biti' guca un bönachi idú tsahui'. Na'a, chiguyú'u tu le runru' löza le nácáro dxi'a, le run ga gaca ibíga'ru' gala' ga zoē' Dios.

20 Cate' benē' Dios ga náquiē' Jesús bixúz, benē' tsutsu xtídzē'ē.

21 Dios biti' benē' tsutsu xtídzē'ē cate' bucu'ē bönachi ní' ca bixúz, pero cate' benē' ga náquiē' Jesús bixúz, benē' tsutsu xtídzē'ē, gunné':

Bena' tsutsu xtídzá'a neda', Xanu', gunnía':

"Biti' utsá'a ca guna'.

Tsaz nacu' bixúz

ca na' gúquiē' Melquisedec bixúz."

22 Que lē ni na', Cristo náquiē' Nu run ga naca löza didza' rucá'ana tsahui' le nácáro dxi'a ca lē na' guca zí'alō.

23 Yugu' bixúz ní' guláquiē' bönni' zían, tu' cabí guca ulu'gá'anē' yödžolió ni tu' gulátiē',

24 pero tu' zóatica'sē' Jesús, tsaz náquiē' bixúz, en biti' gaca nu huóáza xilatjē' para gaca bixúz.

25 Que lē ni na', tsaz gaca usölē' nupa ta'biga' gala' ga zoē' Dios, nupa tu'gún dxin Lē', tu' zóatica'sē' nabanē', en rnnē' dxi'a uláz quégaquiē' lahuē' Dios.

26 Ben bayudxi soa tu bixúz lo caní queēru'. Náquiē' lá'ayi, en idú tsahui', en biti' náquiē' tsözxön bönachi dul-la', pero nayēpisetērē' ca yúgu'tē le nacua' ní' yehua' yubá.

27 Jesús ni, biti' náquiē' ca yugu' bixúz lo yödžolió ni, tu' ben bayudxi gula'gu'ē rön lahuē' Dios yugu' dza, ate' gulútiē'-ba' böa' bēdxi lahuē' Lē' tu' nözi dul-la' nabága'gaca cazē', ate' gudōdi ní' gulunē' caní tu' nözi dul-la' nabága'gaca bönachi. Na'a, Jesús, tsaz gulu'ē rön lahuē' Dios, cate' ní' budōdi cuinē' lahuē' Dios, en bulaljē' xichön cazē' tu' nözi dul-la' nabága'gaca yúgu'tē bönachi.

²⁸ Lu xibá queë' Moisés bönachi biti' nácagaca idú dxi'a nácagaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Zxí'ini cazë' bixúz lo, tu' náquië' idú tsahui' ca ral-la' gáquië' bixúz.

8

Jesús náquië' Bixúz Lo queëru'

¹ Na'a, ca rnna lë na' si' gunnía', naca caní: Zoa queëru' tu Bixúz Lo caní. Gurö'ë cuita lë'ë ibëla Dios, ate' rō'ë, rinná bē'ë yehua' yubá ni'.

² Lë' runë' dxin ca Bixúz Lo lu lataj nácaterö lá'ayi, le naca yudo' le naca idütë, lë na' buchisë' Xanru', en calëga bönachi.

³ Dios rucu'ë yúgu'të bixúz lo para ila'gu'ë yugu' le tu'nödzej bönachi, enca' xichöngacaba' böa' bëdxi lahuë' Dios. Que lë ni na' ben bayudxi soa bi gulu'ë Cristo lahuë' Dios.

⁴ La'tu' zoë' luyú ni, biti' ca' gáquië' bixúz, tu' nacu'á'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bē' xibá queë' Moisés.

⁵ Yugu' bixúz ni tunë' dxin que tu le rulu'ísö, en le naca ca tu bixín que lë na' rō'ö yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guídi, gunné': "Buyútsöca', ben yúgu'të idú ca naca lë na' buluí'ida' li' lu guí'a ni'."

⁶ Na'a, Bixúz Lo queëru' ni runë' dxin que le nácaterö lesaca', ate' ni'a que le benë' Lë' zoa tu didza' rucá'ana tsahui' queëru' le nácaterö lesaca', en le ruí'i didza' que le nácaterö lesaca' guzxi' lu nē'ë Dios gata' queëru'.

⁷ La'tu' gudapa didza' na' rucá'ana tsahui' le guzóa zí'aló idütë yöl-la' huáca, biti' ben bayudxi soa didza' buropi ni rucá'ana tsahui'.

⁸ Na'a, Dios rulu'ë biti' gulaca bönachi ni' idú dxi'a cate' bē'ë didza' ca na' nazúaj lu guichi lá'ayi, gunné':

Bulí'yútsöca', gunné' Xanru': Zá'gaca dza cate' uzóa' tu didza' cubi ucá'ana tsahui', le gúnlena' bönachi Israel, en bönachi Judá.

⁹ Biti' gaca ca guca didza' rucá'ana tsahui' na', lë na' bënlena' xuz xtó'ogaquië',

dza ni' gudéla'a ná'agaquië', en bubéaja' légaquië' luyú Egipto.

Tu' bulu'cá'anë' didza' quia' rucá'ana tsahui', neda' bucá'ana' légaquië', rnnë' Xanru'.

¹⁰ Que lë ni na', caní gaca didza' ucá'ana tsahui'

gúnlena' bönachi Israel tōdi yugu' dza ni', rnnë' Xanru'.

Uchízia' icja ládxi'do'gaquië' xibá quia' en uzúaja' le lu icja ládxi'do'gaquië'.

Ní'irö gaca' Dios quégaquië' ate' légaquië' iláquië' bönachi quia'.

¹¹ Biti' gun bayudxi nu usedi luzé'e, inná: Bënbë'ë Xanru', tu' ilünbë'ë yúgu'të' neda', ga isí lo nu naca cá'asö, ga idxintë nu naca lo.

¹² Huéchi' ládxa'a légaquië', en uniti lahua' le cabí naca tsahui' gulunë', en bítirö tsöjneda' dul-la' nabága'gaquië'.

¹³ Cate' ni' ru'ë Dios didza' que tu didza' cubi rucá'ana tsahui', naca tu' chibigula lë na' guzóa zí'alö, ate' chizóa idúa lë na' nagula, en chinaca gulasi.

9

Lataj lá'ayi dë luyú, en lataj lá'ayi dë yehua' yubá

¹ Na'a, didza' rucá'ana tsahui' na' guzóa zí'alö, dzágagaca xibá le ca ral-la' ila'yéaj ládxi'gaca bönachi Dios, en lataj lá'ayi bidzága le guca que luyú ni.

² Caní naca lataj lá'ayi na' néquini guídi. Lu lataj na' dë láhuilö, nazí'i le Lataj Lá'ayi, gula'cuá' le nuá' guí', en bucugu lá'ayi ga ni' gula'gu'ë yugu' yöta xtildo' lahuë' Dios.

³ Cúdzi'lö le buropi lari' nal-la' lu yu'u na' zoa lataj ni' nazí'i le, Lataj Idú Lá'ayi,

⁴ ate' lu lataj ni' gula'cuá' tu bucugu néquini oro ga na' bulu'zégui'ë nöri, enca' tu guí'ina ga yu'u didza' rucá'ana tsahui', en nacu guí'ina na' oro. Lu guí'ina na' gula'cuá' zxi'ga'do' na' néquini oro, le nadzá' yöta xtildo' na' nazí'i le maná, enca' xuyaga queë' Aarón, lë na' bubö' ni'a në'e, enca' yugu' guiöj blaga na', nazúaj láhuilöguequi didza' rucá'ana tsahui'.

⁵⁻⁶ Lahui guí'ina na' gula'cuá' chopa gubáz lá'ayi néquiquequini oro, lëgaca querubín que lataj ga bulu'i lahuë' Dios, ate' bulu'z'xóa xiliguequi láhuilö lataj ga ni' gulu'ë bixúz lo rön tu' nözi dul-la'. Caní bulu'cu'ë yugu' lë ni. Biti' dë lataj uzúaja' na'a iduté ca nácgaca lë ni.

Ta'yázatica'së' yugu' bixúz lu lataj zoa láhuilö, ga na' tunë' dxin quégaquië' que le ta'yéaj ládxi'gaquië' Dios.

⁷ Tuzë' bixúz lo guyázië' lu lataj buropi ni' tu luzuísö tu iz, en bi'ë rön le gulu'ë lahuë' Dios tu' nözi dul-la' nabaga' cazë', enca' tu' nözi dul-la' nabága'gaca bönachi, dul-la' gulunë' le cabí guléquibe'enë'.

⁸ Caní ruzéajni'inë' Dios Bö' Lá'ayi rë'u, bití' ca' guca idxinru' lahuë' Dios caz tsanni ni' tu'gunë' dxin lataj lá'ayi na' zoa láhuilö lu yu'u lá'ayi na' néquini guídi, lë na' bidzága didza' rucá'ana tsahui' le guzóa zí'alö.

⁹ Yugu' lë ni naca tu le rulu'ísö que le raca na'a dza. Yugu' le gula'gu'ë lahuë' Dios, en rön quégacaba' böa' bëdxi na' gulútië'-ba' lahuë' Dios bití' guca ulu'ún idú dxi'a icja ládxi'do'gaquië' bönni' ni' gula'yéaj ládxi'gaquië' Dios caní.

¹⁰ Yugu' lë ni buluf'i lahui quégacasö le gulë'aj gulahuë', en ca ral-la' ila'guíbi cuíngaquië', en quégaca xibá ca ral-la' gaca que idú ca zeaj naca cazë'. Yugu' lë ni buzóë' Dios quégaquië' ga bidxintë dza ral-la' utsë'ë yúgu'të.

¹¹ Na'a, chibudulu'i lahuë' Cristo, en náquië' Bixúz Lo que le naca idú dxi'a, le bilá' lahui ni'a que le benë' Lë'. Lataj lá'ayi ga na' guyázië' Lë' nácarö lo, en nácarö idú, en bití' néquini lu ni'a lu ná'agaca bönachi, en bití' naca que luyú ni.

¹² Na'a, chiguyázië' Cristo lu lataj lá'ayi na', calëga len xichöngacaba' bëdxido', en xichöngacaba' chivo, pero len rön queë' cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz.

¹³ Le nácatë xichöngacaba' bëdxi, en chivo, en dö queëba' bëdxido' bulu'zégui'ë-ba', yugu' le gula'gu'ë lu ícgagaca nupa nabága'gaca dul-la', guca ulu'gúa dul-la' na' nabága'gaca bönachi para ulu'ún légaquië' dxi'a idú ca zeaj naca cazë' ca naca que yöl-la' yudo' quégaquië'.

¹⁴ Na'a, gúntëro ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóatica'sö. Na'a, xichönë' Cristo

ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichinë' Dios ban.

¹⁵ Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugúë' dul-la' gula'baga' bönachi cate' ni' zoa didza' gula rucá'ana tsahui'. Gútië' ca' para gaca ila'zi'ë lë na' guzxi' lu në'ë Dios unödzejë' quégacquië' bönni' bulidzë', le zóatica'sö.

¹⁶ Cate' ratië' nu bönni', en nucá'anë' tu didza' ca ral-la' ila'guisië' le nequi queë', run bayudxi gaca bë' chinátië' bönni' na' para gaca ilunë' ca rnna didza' na' nucá'anë'.

¹⁷ Cate' chinátië' bönni' na', gaca ilunë' ca rnna didza' na', pero tsanni ni zoë' nabanë', biti' ca' gaca ilunë' ca rnna didza' na'.

¹⁸ Que lë ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le rulu'isö zoa nu guti.

¹⁹ Cate' ni' gudíxjoi'inë' Moisés bönachi ni' ca nácagaca yúgu'të xibá queë' Dios, gudélé'ë rön quégacaba' bëdxido', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bö'cu' xzila' le në'aj xiná, buchéajë' rön, en nisa na' lahui guichi ga na' nazúaj xibá na', enca' láhuigaca bönachi.

²⁰ Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bë'enë' Dios rë'u para gunru' ca rnna."

²¹ Lësca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxi'gaquië' Dios.

²² Ca na' rinná bë' xibá na', látu'biqúi' yúgu'të ral-la' un dxi'a rön léguequi, ate' channö cabí tu'laljë' rön, biti' udúa dul-la'.

Xichönë' Jesucristo rugúa dul-la'

²³ Caní naca, ben bayudxi guzóa le bun dxi'a yudo' luyú ni le naca tu le rulu'isö ca naca lë na' rö'ö yehua' yubá, pero ca naca lë na' rö'ö yehua' yubá, ben bayudxi soa le un dxi'a nupa ila'yaza le, le nácáro lesaca' ca xichóngacaba' bóa' bëdxido' caní.

²⁴ Biti' guyázië' Cristo lataj lá'ayi néquini lu ni'a lu ná'agaca bönachi, lë na' naca tu le rulu'isö ca naca le naca idú, pero guyázië' yehua' yubá caz para gaca ulu'i lahuë' na'a lahuë' Dios uláz queéru'.

²⁵ Bixúz lo zoë' luyú ni razië' lataj nácatë'rö lá'ayi tu tu iz len rön quégacaba' bóa' bëdxi, pero biti' run bayudxi tsázië' Cristo zían luzuí para udödi cuinë' lahuë' Dios.

²⁶ La'tu' guca caní, gun bayudxi qui'i sáquë'ë Cristo, en gátië' zían luzuí dza ni'te cate' guta' yödzóliö ga ridxintë na'a dza, pero na'a cate' naca dza údxi, tsaz bulu'i lahuë' tu luzuísö, en budödi cuinë' lahuë' Dios, cate' gútië' para bugúë' dul-la' nabága'ru'.

²⁷ Ca na' run bayudxi ilátigaca bönachi tu luzuísö ate' tödi ni' uchi'a usöröë' Dios léguequi,

²⁸ lësca' caní, gútië' Cristo tu luzuísö, cate' budödi cuinë' lahuë' Dios para bugúë' dul-la' nabága'gaca bönachi zían. Na'a, ulu'i lahuë' le buropi luzuí, calëga para ugúë' dul-la', pero para usölë' tsaz nupa ta'böza Lë'.

10

¹ Xibá na' gunná bë'ë Moisés guca tu le rulu'isö ca zeaj naca le tsahui' si' zá'gaca, en biti' guca idú ca nácagaca. Que lë ni na', xibá na' queë' Moisés biti' guca un idú tsahui' nupa ni' bila'dxín lahuë' Dios, en biá'gaca rön quégacaba' bóa' bëdxido', lë na' gula'gú'utica'së' lahuë' Dios yugu' iz.

² La'tu' guca un légaquië' idú tsahui', biti' gula'gú'utica'së' rön ni' lahuë' Dios, tu' cabirö iléquibe'enë' bönni' guca caní quégaquië' nabága'gaquië' dul-la' channö chibulu'huöáquië' idú tsahui'.

³ Rön ni' gula'gu'ë lahuë' Dios yugu' iz busá' ládxi'gaquië' nabága'gaquië' dul-la'.

⁴ Caní guca, tu' cabí guca xichõngacaba' bëdxi, en chivo ugúa dul-la'.

⁵ Que lë ni na', cate' bidxinë' Cristo yödzölió ni, gudxë' Dios ca na' nazúaj lu guichi lá'ayi le rnna:

Biti' rë'ënu' nu cu'u rön quégacaba' böa' bëdxi lo' pero benu' ga naca' bönáchisö.

⁶ Biti' raza ládxi'u nu uzegui'-ba' böa' bëdxi lo', o nu cu'u xichõngacaba' lo' tu' nözi dul-la'.

⁷ Ní'irö gunniá': Ni zoa' para guna' ca rë'ënu' Li', Dios.

Naca ca na' nazúaj lu guichi lá'ayi ca gaca quia'.

⁸ Lë na' nazúaj zí'alö rnna: "Biti' rë'ënë' Dios nu cu'u rön quégacaba' böa' bëdxi lahuë'." Didza' ni ruluí'i rë'u bití'rö raza ládxi'ë Dios lë ni sal-la' lu xibá queë' Moisés rinná bé'enë' Dios nu gun caní.

⁹ Gudödi ni' rnna: "Ni zoa' para guna' ca rë'ënu' Li', Dios." Didza' ni ruluí'i rë'u rugüë' Dios lë na' gula'gu'ë lahuë' zí'alö, en ruzóë' xilataj le gulu'ë Zxi'ini cazë' lahuë'.

¹⁰ Na'a, Dios ruúnë' rë'u idú tsahui' tu' benë' Cristo ca rë'ënë' Dios cate' ni' budödi cuinë' lahuë' Dios uláz queëru', en gútië' tu luzuísö.

¹¹ Le nácatë yúgu'të bixúz luyú ni zuíguequinë' yugu' dza, en tunë' xichíngaquië', en la' tuz ca tunë', ta'gu'ë lahuë' Dios zían luzuí xichõngacaba' böa' bëdxi, yugu' le cabí gaca ulu'gúa dul-la'.

¹² Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yöjchö'ë cuita lë'ë ibëla Dios.

¹³ Ribözë' ni' dza gunë' Dios ga ulu'zechu zxíbigaca lahuë' nupa biti' ta'lë'e Lë' dxi'a.

¹⁴ Ní'a que tuz le gulu'ë lahuë' Dios, tsaz benë' ga nácagaca idú tsahui' nupa na' bunë' dxi'a, en bubéajë' léguequi quez queë' Dios.

¹⁵ Lëscá caní Dios Bö' Lá'ayi runë' ba nalíloru', tu' gunnë' zí'alö lë na' nazúaj lu guichi le rnna:

¹⁶ Caní gaca didza' ucá'ana tsahui' gúnlena' légaquië' tödi yugu' dza ni', rnnë' Xanru'.

Uchízia' icja ládxi'do'gaquië' xibá quia', en uzúaja' le lu icja ládxi'do'gaquië'.

¹⁷ Gudödi na' gunnë':

Bití'rö tsöjnedá' dul-la' nabága'gaquië' en dö' biá'gaquië'.

¹⁸ Que lë ni na', channö chinadúa dul-la', bití'rö run bayudxi nu bi cu'u lahuë' Dios tu' nözi dul-la'.

Huáca ibíga'ru' gala' ga zoë' Dios

¹⁹ Na'a, yugu' böchi' luzá'ado', idú ládxi'ru' gaca idxinru' lahuë' Dios caz, ní'a que xichönë' Jesucristo.

²⁰ Tséajlenru' tu nöza cubi, en idú tsahui' le nuzóë' Cristo, le ridxín cúdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljë' Cristo ní'a queëru' tu' budödë' idútë' le naca cazë'.

21 Jesús náquië' queëru' tu bixúz nayëpisëtëre', en rinná bé'enë' bönachi queë' Dios.

22 Que lê ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queëru', tu réajlë'ëru' Cristo, tu' chibunë' dxi'a icja ládxi'do'oru', para cabí uxösa ládxi'do'oru' rë'u, atë' gudibë' idütë le naca cázaru' len le naca tu nîsa nácatëro idú.

23 Ral-la' gácaru' tsutsu, en cabí gaca chopá ládxi'ru' ca naca le runru' löza que le nazí lu ná'aru', le guzxi' lu në'ë Dios gunné' queëru', atë' Lë' runë' ca rnnë'.

24 Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnröru' ca' le naca tsahui'.

25 Bal-la bönachi bíti'rö tu' dubi len rë'u. Biti' ral-la' gunru' ca tun bönachi na', pero ral-la' utipa ládxi'ru' turu' ia'turu', en gúnröru' caní tu' rilë'ëru' chizóa idxín dza huödë' Xanru'.

26 Channö zéajlenru' runru' dul-la' tödi núnbë'ëru' le naca idütë li, bití' ca' nagá'ana bi gaca cú'uru' lahuë' Dios le ugúa dul-la'.

27 Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguië' Dios quégaquië' ila'yázië' lu guí' gabila, lê na' uzéguítica'sö nupa ta'dá'baga' Dios.

28 Cate' nu bönni' buzöë' xibá queë' Moisés tsölá'alö, gulútië' lë' channö chopá tsonna bönachi gulún ba nalí que le benë', atë' cuntú nu buéchi' ladxi' bönni' na'.

29 Na'a, nu bönni' uzöë' tsölá'alö Zxi'inë' Dios, en uzöë' tsölá'alö ca' xichönë' le run tsutsu didza' rucá'ana tsahui', le ruún rë'u dxi'a, ibága'rë' ca' xíguia'. Nu bönni' gunë' caní ucá'anë' cá'asö Dios Bö' Lá'ayi, Nu ruzá' ladxi' queëru' le riquíniru'.

30 Caní gaca, tu' núnbë'ëru'-në' Dios, Nu gunná: "Quia' neda' nequi yöl-la' ruzí' lëbi. Neda' ubi'a quégaca bönachi, rnnë' Xanru'." Lë'sca' caní gunné': "Xanru' uchi'a usöröë' bönachi queë'."

31 Ral-la' gadxi idzöbi nu ral-la' si' xíguia' lu në'ë Dios ban.

32 Guli'tsöjné yugu' dza chigula'dödi cate' ni' si' bidxín queëli' bení', atë' biá' gulenli' zían le bulu'saca' zi'ë libí'ili'.

33 Bulu'lidza ditaj bönachi libí'ili', en bulu'dxía libí'ili' dö' lahuí' lógaca bönachi, atë' benli' tsözxön ca' nupa gula'guí'i gula'zaca' caní.

34 Caní guca, tu' buéchi' ládxi'li' nupa nadzúngaca lidxi gufë, en lu yöl-la' rudzeja queëli' biá' gulenli' nupa gula'béaj lídxili' yugu' le guta' queëli'. Caní benli' tu' nözili' nequi queëli' le nácarö dxi'a, en le zóatica'sö ni' yehua' yubá.

35 Na'a, bití' ucá'anali' lê na' runli' löza, le nachë' tu le zxön ubi'ë Dios queëli'.

36 Run bayudxi cözali' zxön ladxi', para cate' chibenli' ca rë'ënë' Dios, sí'ili' le guzxi' lu në'ë gunné' queëli', ca na' nazúaj lu guichi lá'ayi, ca gunné' Dios le rna:

37 Ia'tú chí'ido'osö idxinë' Bönni' na' ral-la' guidë'.

Bití' ca' tsenë'.

38 Ní'irö nu naca tsahui' lahua' neda',

ulá nu na' tu' réajlë' neda'.

Channö huöaj ladxi', en tá'baga' neda',

bíti'rö tsaz ládxa'a nu na'.

39 Na'a, rë'u ni, bití' nácaru' ca nupa tu'huöaj ladxi', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusölä.

11

Ca naca yöl-la' réajlë' queëru' Dios

¹ Na'a, tu' réajlë'ëru' Dios, naca löza queëru' si'iru' le runru' löza, ate' naca bë' zoa le cabí gaca ilé'ëru'.

² Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégaquië' le rnna: Bulu'rúajë' tshaiu' lahuë' Dios.

³ Tu' réajlë'ëru' Dios, réquibe'ëru' benë' Lë' yödzülió ni len didza' bë'ësë'. Lësca' caní, cate' benë' Dios yúgu'të le rilé'ëru', bugunë' dxin le cabí nalá'.

⁴ Tu' guyéajlë'ë Abel Dios, gulu'ë rön queëba' böa' bëdxido' lahuë' Dios, tu le nácatëro lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunné' náquië' tshaiu', en benë' bal lë na' gulu'ë lahuë'. Sal-la' chinátië' Abel na', ga ridxintë na'a dza, naca tsca ru'ë didza', tu' guyéajlë'ë Dios.

⁵ Tu' guyéajlë'ë Enoc Dios, gudödë' ni' yehua' yubá, en biti' ca' gútië', ate' biti'rö nu budzüli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'aló ca buchë'ë Dios lë', benë' Enoc le raza ládxë'ë Dios."

⁶ Na'a, channö cabí réajlë'ëru' Dios, biti' gaca gunru' le raza ládxë'ë Lë', ate' para ibíga'ru' gala' ga zoë' Dios, run bayudxi tséajlë'ëru' zoa cazë' Lë', en rubi'ë que nu ru'í ladxi' Lë'.

⁷ Cate' ni' Dios buzéajni'inë' Noé ca ral-la' ilaca le cabí rilé'ëninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupë'ë barco zxön na' nazí'í le Arca, ate' lë'e barco na' bulu'lá bönachi di'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönachi yödzülió ilátigaca, ate' bidéli'në' gúquië' tshaiu' lahuë' Dios, le ta'deli' nupa ta'yéajlë' Lë'.

⁸ Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzë'ë ladzë' para tsejë' lataj ni' ral-la' si'ë ca tu le guequi tsaz queë', ate' birúajë' ladzë' sal-la' biti' nózinë' gazxi na' ral-la' tsejë'.

⁹ Tu' guyéajlë'ë Abraham Dios, gúquië' ca tu bönni' zi'tu', en guzóë' luyú na' Dios guzxi' lu në'ë unödzejë' queë'. Guzóë' lu yu'u guídido', en lébisö ca gulunë' Isaac, en Jacob, zxi'ini xi'sóë' Abraham, nupa ni' guzxi' lu në'ë Dios unödzejë' quéguequi lë na' guzxi' lu në'ë unödzejë' queë' Abraham.

¹⁰ Caní benë' Abraham, tu' benë' löza idéli'në' yödzü na' rö'ö tsaz xilibi zö'ö que, le nuzóë' Dios xilibi zö'ö que, ate' gulu'ë le ga na' zoë' Lë' cazë'.

¹¹ Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bi' bí'ido'. Buzóanu-bi' bi'í bönni'do' sal-la' chigudödi izi queënu, tu' guyéajlë'ënu Dios gunë' ca rnna xtídzë'ë na' guzxi' lu në'ë queënu.

¹² Que lë ni na', sal-la' chibigúladë'ë Abraham, gula'cuá'abi' ziántëro'bi' zxi'ini xi'sóë'. Gula'cuá'abi' tsca rö'öba' böljaj lúzxiba, en tsca rö'ö yuzxi tu ra' nisa zxön, cunttu nu gaca ulaba léga'cabi'.

¹³ Yúgu'të bönni' ni gulátië', en biti' gula'zi'ë lë na' guzxi' lu në'ë Dios unödzejë' quégaquië', pero gula'yéajlë'ë Dios, ate' zi'tu' zi'tu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë náca'gaquië' ca bönni' zi'tu', en bönni' ta'dazë' yödzülió ni.

¹⁴ Yugu' bönni' tu'ë caní didza', tu'lu'ë ta'guiljë' tu lataj le gaca ládza'gaquië'.

¹⁵ La'tu' gula'zá' ládxi'gaquië' caní que luyú ga ni' bila'rúajë', le nácatë ulu'dzülinë' nacxi huöajgaquië' ni',

16 pero gula'zá' ládxi'gaquië' que luyú na' nácarö dxi'a, le rö' yehua' yubá. Que læ ni na' biti' rutuf'inë' Dios cate' ta'nnë' náquië' Dios queégaquië', tu' chinupë'ë tu yödzo queégaquië'.

17 Tu' guyéajlë'ë Abraham Dios, cate' guzxi' bë'ë Dios læ', budödë'-bi' bi'i Isaca queë' lahuë' Dios ca na' tu'dödë'-ba' yugu' böa' bëdxi tútigaquië'-ba' lahuë' Dios. Guzöë' sina' Abraham gútië'-bi' bi'i bönni' zí'alö queë' na' lahuë' Dios sal-la' nácabi' bi'i na' guzxi' lu në'ë Dios unödzejë' queë'.

18 Caní benë' sal-la' gudxë' Dios læ', gunné': "Lu ná'abi' bi'i Isaac quiu' ichísagaca'-bi' zxi'ini xi'sú'."

19 Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë-bi' lu yöl-la' guti sal-la' biti' guti cázabi'.

20 Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esaú ca zeaj naca le ulu'zí'ibi' xibé dza si' za'.

21 Tu' guyéajlë'ë Jacob Dios, cate' ni' chizóa gátië' gunábinë' Dios gun lá'ayë'-bi' tu tubi' zxi'inë' José, ate' guyéaj ládxi'ë Dios, ni' nayéchuë' lu xiyaga queë'.

22 Tu' guyéajlë'ë José Dios, cate' ni' chizóa gátië', bë'ë didza' que dza na' ila'rúajë' zxi'ini xi'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsöjcu'ë.

23 Tu' gula'yéajlë'ë Dios, cate' gúljabi' bí'ido' Moisés, xuz xiná'abi' bulu'cächë'-bi' idú ca tsonna beo', tu' bila'lé'enë' nácabi' bi'i bönni'do' na' lachi, en biti' guládxinë' bönni' rinná bé'enë' bönachi Egipto, bönni' na' gunná bë'ë ilútië'-bi' yugu' bi'i bönni'do' na'.

24 Tu' guyéajlë'ëbi' Moisés Dios, cate' guzxonbi', bí'ti'rö bë'ëbi' lataj nu uzóa læbi' bi'i bönni' queënu nigula zxi'inë' Faraón, bönni' na' rinná bé'enë' bönachi Egipto.

25 Caní benbi' tu' gúquibi' nácarö dxi'a nu usaca' z' læbi' tsözxön len bönachi queë' Dios ca uzí'ibi' xibé tu chí'isö yugu' le tu'zí' xibé nupa tun dul-la'.

26 Gúquibi' nácarö lesaca' nu ulidza ditaj læbi', ca na' gaca ca' queë' Cristo, ca idéli'bi' yugu' yöl-la' tsahui' queégaca bönachi Egipto, tu' guz'á ládxi'bi' ca naca le ubi'ë Dios queëbi'.

27 Gudödi ni', tu' guyéajlë'ë Moisés Dios, birúajë' luyú Egipto, en biti' gúdxinë' yöl-la' rilé queë' bönni' rinná bé'enë' bönachi Egipto, ate' bíá' gulënë' ca run nu rilé'e Dios, Nu na' biti' gaca ilé'eru'.

28 Tu' guyéajlë'ë Moisés Dios, benë' Laní Pascua ca gunná bé'enë' Dios læ', en buchéajë' rön ra' yu'u lídxigaquië', para cabí guti zxi'inigaquië' nu na' ral-la' usuniti yugu' bi'i bönni' zí'alö queégaca bönachi Egipto.

29 Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láhui'lö nisado' nazí'i le Nisa Xiná. Cate' gulé'ënnë' ila'dödë' ca' bönni' Egipto ni', gula'yëpinë' nisa, en gulátigaquië' lu Nisa Xiná na'.

30 Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzo Jericó yugu' dza idú gadxi dza, bila'guínnaj yugu' zö'ö gulún chí'i yödzo na'.

31 Tu' guyéajlë'ënu Rahab Dios, nigula ru'ínu lataj bönachi, biti' gútinu tsözxön len bönachi Jericó na' biti' gulún ca rnna xtídë'ë Dios, tu' bennu bal bönni' Israel na' buduyúlangaquië' le rácalen bönachi Jericó.

32 ¿Bízxirö ral-la' inniá'? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queë' Dios.

³³ Tu' gula'yéajlë'ë Dios, bulu'zõtjë' zían yödzo zxön.

Gulunë' le naca tsahui', ate' gula'déli'në'
le guzxi' lu në'ë Dios unödzejë' quegaquië'.

Bulu'sayjë' ruá'agacaba' bëdxi guixi'.

³⁴ Bulu'lë' yugu' lu guí' zxön.

Bila'rúajë' lu ná'agaca nupa gulë'ëni iluti légaquië' len gufé tuchi'.

Dios bunë' légaquië' tsutsu cate' ni' gula'cuidi'në'.

Bulu'huóáquië' ca' tsutsu lu gudil-la.

Bulu'láquië' bönni' guizxi yu rójáquië' gudil-la quegaquië' bönni' zi'tu'.

³⁵ Yugu' nigula dza ni' bulu'zi'ínu bi'i que queégacanu nubángacabi' lu yöl-la' guti.

Ia'bal-lë' bönni' ni' gulátie' lu ná'agaquië' bönni' ni' bulu'saca' zi'ë légaquië', en tu' cabí gulë'ënnë' ulu'cá'anë' Dios, biti' gula'zi'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' gulëquinë' nazáca'rö.

³⁶ Ia'bal-lë' biá' guléngaquië' yöl-la' rutitaj, en xíguia' que gubá'ayi, ate' gula'dzunë' lidxi guíë, nága'gaquië' du guíë.

³⁷ Bulu'ladxi' bönachi bal-lë' guiöj, en gula'chözë' ia'bal-lë'. Gula'zi' bë'ë légaquië', en gulútigaca zíaंगाquië' len gufé tuchi'. Gula'dödë' ná'alö ní'ilö, nácugaquië' guídi zxágacaba' bö'cu' zxila', en chivo. Guláquië' yechi', en gula'guí' gula'záquë'ë, ate' bulu'dxía bönachi légaquië' dö'.

³⁸ Caní guláquië' bönni' na', ate' biti' gulaca bönachi yödzülió ni lesaca' ulu'zi' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' zxan bulóaj, en yugu' yeru luyú.

³⁹ Yúgu'të' bulu'rúajë' tsahui' lahuë' Dios tu' gula'yéajlë'ë Lë', sal-la' biti' gula'zi'ë luyú ni le guzxi' lu në'ë Dios unödzejë' quegaquië'.

⁴⁰ Caní guca, tu' nupë'ë Dios ni'a queëru' tu le nácarö dxi'a para cate' únë' légaquië' idú dxi'a, rë'u ni gunru' légaquië' tsözxön.

12

Ral-la' uyuru-në' Cristo

¹ Que lë ni na', lësca' rë'u, tu' nacua' idú gásibi'ilö ga ni zóaru' ziantërö nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca tu le naca zi'í nuá'aru', enca' yúgu'të dul-la' nazöngaca rë'u, ate' lu yöl-la' ribóza zxön ladxi' queëru', ral-la' gunru' xichinë' Dios, le naca tsca xíti'ru' lu huitaj le zoa loru'.

² Ral-la' uyuru-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queëru' Lë'. Jesús gudí' guzxi'áquë'ë lë'e yaga cruz, en biá' gulënë' yöl-la' rutu'í que, tu' gú'unnë' idéli'në' yöl-la' rudzeja na' uzi'ë xibé, ate' yöjchö'ë cuita lë'ë ibëla Dios, ga ni' rö'ë rinná bë'ë.

³ Buli'yúë' Jesús, ca na' gudí' guzxi'áquë'ë le bulu'saca' zi'ë bönni' dul-la' Lë', para cabí icu'í'li', en para cabí gaca chopa ládxi'li'.

⁴ Ga ridxintë na' a dza, biti' bi biá' gulenli' ga idxintë nu gun libí'ili' huë' tu' ridá'baga'li' le naca dul-la'.

⁵ Nadxi ca' chizá' ral-la' ládxi'li' lë na' ruzéajni'inë' Dios libí'ili'. Nácali' ca yugu' zxi'ini cazë', ca na' nazúaj lu guichi le rnnë':

Zxi'ina', biti' uzú' tsólá'alö le gunë' Xanru',

cate' usëdi uzéajni'inë' li',

en biti' huóaj ládxu' cate' uní'inë' li'.

⁶ Xanru' runí'inè' nu nadxí'inè',
en rusèdi ruzéajni'inè' yúgu'tè nupa ta'zí' lu nè'e ilaca zxí'ini cazè'.

⁷ Ral-la' guá' ilenli' le uní'inè' Dios libí'ili', tu' runè' Dios caní' queéli' tsca nácali' zxí'ini cazè'. Biti' ca' zóabi' tubi' bí'ido' biti' uní'inè'-bi' xúzibi'.

⁸ Na'a, channò cabí runí'inè' Dios libí'ili' ca na' runè' quegaca yúgu'tè zxí'ini cazè', ní'irò nácali' ca yugu' bí'i lan, en biti' nácali' idú zxí'inè' Dios.

⁹ Ia'stú, cate' ní' nácaru' bí'ido', gula'cu'è xuz xiná'aru' luyú ni, bulu'ní'inè' rè'u, pero runru' légaquiè' bal. Ca' naca, ral-la' gúnrroru' ca rnna xtídzè'è Xúziru' zoè' yehua' yubá para sóaru' ibanru' tsaz.

¹⁰ Yugu' xuz xiná'aru', tu chí'isò bulu'ní'inè' rè'u tsca le guléquisinè' naca dxi'a, pero cate' runí'inè' Dios rè'u, naca para gaca tu le uzí'iru' xibé, para gácaru' idú lá'ayi ca naca cazè' Lè'.

¹¹ Le nácatè biti' nalá' lahui na'a le uzí'iru' xibé que le runí'inè' rè'u, pero run ga ruhu'íniru'. Channò gü'iru' lataj usèdi rè'u le runí'inè' rè'u, gun ga cözaru' dxí'ado', en ga gácaru' tsahui'.

Soa bönadxi queëru' channò cabí uzé nágaru' chí'è Dios

¹² Que lè ni na' buli'ún tsutsu ná'ali' le röjxéqui'guequi, enca' zxíbili' le ta'zxizi, en idipa ládxi'li' para gunli' le naca dxi'a.

¹³ Guli'sóa nöza tsahui', para cabí gunli' ga uca'ana nu ricuidi' ladxi' nöza na', pero guli'gún ga huóáca ladxi' nu na'.

¹⁴ Guli'güi' ládxi'li' cózalenli' dxi'a yúgu'tè bönachi, en gácali' tsahui' lahuè' Dios, tu' channò cabí gunli' caní, biti' gaca ilé'eli'-nè' Xanru'.

¹⁵ Guli'gún chí'i cuinli' para cabí soa nu uca'ana le ruzá' ládxe'è Dios queëru', en para cabí soa nu gaca ca tu guixi' silá', para cabí utsá libí'ili', en cabí gun ga cabí gácali' tsahui' zianli' libí'ili'.

¹⁶ Guli'gún chí'i cuinli' para cabí gun nu dzaga libí'ili' le ruá' dō', o le cabí naca tsahui', ca na' benè' Esaú, zxí'inè' Isáac. Esaú na' bėti'è le ral-la' gata' lu nè'è tu' náquiè' bí'i bönni' huaca queè' xuzè' para guzxi'è tu le do' gudahuè'.

¹⁷ Chínóz queézili' ca na' guca queè' Esaú gudödi ní' cate' gú'unnè' idéli'nè' le inabè' xuzè' lahuè' Dios para gaca le tsahui' queè'. Buéchi' ládxe'è xuzè' lè', pero biti' guta' lataj ubí'i ládxe'è Esaú na' sal-la' gudilaj ládxe'è le len yöl-la' ribödxi queè'.

¹⁸ Ca raca queéli' biti' naca ca guca queégaquiè' bönni' Israel. Légaquiè' gula'biguè'è gala' ga zoa tu guí'a le gaca nu can, ate' guyegui guí'a ni', en böáca chul-la lahui' dza tu' gurö'ö böaj gasaj, en guyécjada' bō'.

¹⁹ Bila'yönnè' ta'bödxi lúzuba' böa', enca' chí'è Dios Nu bē' didza'. Cate' bila'yönnè' lè ni, guláta'yuè' lahuè' Moisés para cabirö gü'ilenè' Dios légaquiè' didza'.

²⁰ Caní gulunè' tu' cabí guca guá' iléngaquiè' lè na' gunná bé'enè' Dios légaquiè', gunnè': "Channò tsöjlibiba' tuba' böa' guíxi'do'os guí'a ni, ral-la' ulu'ládxe'è-ba' guiöj, o ulu'dödè'-ba' yaga tuchi'."

²¹ Lè na' bila'lé'enè' ben gáxdida' légaquiè', ate' Moisés gunnè': "Radxi ridzöbida', en rizxízida'a."

²² Na'a, libí'ili' ral-la' gádxitèröli' tu' ribíga'li' gala' tu lu guí'a nazí'i le Sión, en ga zoa yödzö queè' Dios ban, le nazí'i le Jerusalén que yehua' yubá, ga na' nacu'è gubáz lá'ayi guizxi'yu queè' Dios.

²³ Ribíga'li' gala' ga ní' nudúbigaca zxí'ini cazè' Dios lahuè' Lè', nupa na' nazúajgaca láguequi lu guichi' ní' yehua' yubá, enca' ga zoè' Dios Nu ruchí'a

rusöröë' yúgu'të bönachi, en ga na' nacuá' yugu' bö' gulaca cazë' yugu' bönni' tsahui', tu' bunë' Dios légaquië' tsahui'.

²⁴ Ribíga'li' ca' ga zoë' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rön queë' le run ga runiti lahuë' Dios rë'u, rön na' run le nácáro dxi'a ca le ben xichönë' Abel, lë na' ben ga guchúguië' Dios queëbi' bi'i böchë'ë.

²⁵ Que lë ni na', guli'gún chi'i cuinli' para cabí tá'baga'li' Nu na' ruí' didza'. Biti' ca' bulu'lá nupa ni' gula'dá'baga' nu na' bulidza légaquië' luyú ni. Nácatërö löza bití' ca' uláru' rë'u channö tá'baga'ru' Nu na' rulidza rë'u, zoë' yehua' yubá.

²⁶ Dza ni' guzzizi luyú ni tu' biyön chi'ë Dios, pero na'a chiguzxí' lu në'ë, gunnë': "Ia'tú luzuisö, en calégasö luyú uxízia', pero lúzxiba ca' uxízia'."

²⁷ Cate' ni' rnnë': "Ia'tú luzuisö", lë ni rulu'í rë'u ral-la' udúa yugu' le gaca ila'zxízi, lë na' rö'ö yödzölió ni, ate' ulu'gá'ana le cabí gaca ila'zxízi, lë na' rö' yehua' yubá.

²⁸ Que lë ni na', tu' ral-la' idéli'ru' tu lataj ga inná bë'ëru', le cabí izxizi, ral-la' guíëru'-në' Dios: "Xclenu'", ate' lu yöl-la' ba'a ladxí', en lu yöl-la' radxi Lë' tseaj ládxi'ru' Lë' ca na' raza ládxi'ë Lë',

²⁹ tu' náquië' Dios queëru' ca tu guí' le rusuniti le cabí naca idú tsahui'.

13

Le ral-la' gunru' le raza ládxi'ë Dios

¹ Ral-la' idxí'tica'sili' luzá'ali' tuli' ia'tuli'.

² Guli'tsöjné ral-la' uzóali' lídxili' nu idxín ga zóali'. Cate' gulún caní bal-la bönachi, bulu'cuá' lídxiguequi gubáz lá'ayi que yehua' yubá queë' Dios, sal-la' bití' guléquibe'e nácagaquië' gubáz lá'ayi.

³ Guli'tsöjné nupa nadzúngaca lidxi guíë tsca nunli' légaquië' tsözxön, nadzunli' ca' lidxi guíë. Guli'gú' ládxi'li' yugu' bönni' ta'bía ládxi'gaca bönachi légaquië', tsca libí'ili' riguí' rizáca'lenli' légaquië' tsözxön.

⁴ Ral-la' gunli' bal yöl-la' nutsaga na', ate' tu tuë' bönni' ral-la' sóalenë'-nu nigula queë' lu yöl-la' ba'a ladxi' queë', tu' ichúguië' Dios quégaca nupa tun le ruá' dö', en nupa ta'guítsaj xibá que yöl-la' nutsaga na'.

⁵ Biti' bi uhuídi'li', pero guli'tsaza ládxi'li' tsca le dë queëli' na'a, tu' chigunnë' Dios: "Catu caz ucá'ana' li', en bití' ca' ubéaj ládxa'a li'."

⁶ Caní naca, huáca innaru' idú ládxi'ru' lë na' rnna:

Xanru' náquië' Nu rácalen neda'.

Biti' ca' gádxida' bi gun bönachi quia'.

⁷ Guli'tsöjné yugu' bönni' tu'yüë' libí'ili', nupa na' tu'sédinë' libí'ili' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégaquië' Dios.

⁸ Lëbisö ca náquië' Jesucristo, néaje, en na'a, en cá'tica'sö.

⁹ Biti' gü'ili' lataj yugu' xibá izá'a, en xibá nadzá' ichë'gaca libí'ili' nöza yúbölo. Naca dxi'a gunli' tsutsu icja ládxi'do'oli' ca naca le ruzá' ládxi'ë Dios queëli', en caléga ca nácagaca xibá que le rë'aj ráguru', lë na' bití' ulu'zí' xibé nupa tuí' ládxi'gaca léguequi.

¹⁰ Zoa queëru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö.

¹¹ Bixúz lo que yu'u lá'ayi na' gulu'ë xichóngacaba' böa' bēdxī lu lataj idú lá'ayi tu' nōzi dul-la', pero bulu'zēguiē bēla' cá'asō quégacaba' ga naca ní'ilō ra' yōdzō.

¹² Lēasca' caní gudí'i guzáquē'ë Jesús ní'ilō ra' yōdzō para bunē' bōnachi dxi'a len rōn queē cazē'.

¹³ Tsōjtá'aru'-nē' Jesús, sal-la' ila'bēaj bōnachi rē'u lu yōdzō, en sí'iru' tsōzxōn len Lē' lē na' bulu'lidza ditaj bōnachi Lē'.

¹⁴ Biti' zoa tu yōdzō queēru' yōdzōlió ni le soa tsaz, pero riguíljaru' lē na' sí' za'.

¹⁵ Que lē ni na', ral-la' cú'utica'siru'-nē' Dios yōl-la' ba, ugunru' dxin Lē' Jesucristo. Yōl-la' ba na' naca ca tu le rigú'uru' lahuē' Dios. Len ruá'a cuinru' guiēru'-nē' Dios: "Xclenu'" ni'a que le náquiē' Lē'.

¹⁶ Biti' gal-la lādxi'li' gunli' le naca dxi'a, en gácalenli' luzá'ali' tuli' ia'tuli', tu' naca lē ni ca tu le rigú'uru' lahuē' Dios le raza lādxi'ë Lē'.

¹⁷ Guli'gún ca rnna xtídza'gaquiē' böchi'ru' tu'yúē' libí'ili', en guli'gú' lataj ila'nná bē'enē' libí'ili', tu' tapa chi'ë bö' naca cázali', ca tunē' yugu' bōnni' ral-la' ila'guíxjō'ë lahuē' Dios le nūngaquiē'. Guli'gún caní para ilunē' dxin na' lu yōl-la' rudzeja quégaquiē', en calēga lu yōl-la' risēbi ladxi' quégaquiē', tu' cabí uzí'ili' xibé dxin na' ilunē' lu yōl-la' risēbi ladxi' quégaquiē'.

¹⁸ Buli'lidzē' Dios, inábili'-nē' gácalenē' netu', tu' runtu' löza soa dxi icja lādxi'do'otu', para cabí uxōsa netu', ate' ru'í'l lādxi'tu' gúntica'situ' le naca dxi'a.

¹⁹ Le nácáro lo, ráta'yua' loli' inábili'-nē' Dios ugu'ë neda' tu nōza para udxina' ga zóali' bayōntē'.

Dios uzá' lādxi'ë queēru' le gácalen rē'u

²⁰ Na'a, rinábitu'-nē' Dios, Nu run le rucá'ana rē'u tsahui', en Nu busubán Xanru' Jesucristo lu yōl-la' guti, Nu na' naca Bōnni' Lo Uyú Bō'cu' Zxila', tu' bulaljē' rōn queē' le run tsutsu didza' rucá'ana tsahui', le zoa tsaz,

²¹ rinábitu'-nē' gunē' ga gácali' idú tsahui', para gaca gunli' yúgu'tē dxin dxi'a, en gunli' ca rē'ënē' Lē', ate' gunē' queéli' le raza lādxi'ë Lē', tu' néquili' queē' Jesucristo. ¡Queē' Cristo gácatica'sō yōl-la' ba! ¡Ca' gaca!

²² Ráta'yua' loli', böchi' luzá'ado', güi'í lādxi'li' didza' ni ruzéajni'í libí'ili', tu' naca láti'do'os lē ni ruzúaja' queéli'.

²³ Ral-la' inózili' chiburúajbi' bi'í Timoteo, bi'í böchi'ru'do', lidxi guiē, ate' channō idxíntēbi' ga zoa' ni, gunbi' neda' tsōzxōn uduyútu' libí'ili'.

²⁴ Buli'gapa Dios böchi'ru' tu'yúē' libí'ili', enca' yúgu'tē bōnachi rō queē' Dios. Tu'gapa Dios libí'ili' bōnachi ta'yéajlē' Cristo nacua' luyú Italia.

²⁵ ¡Dios uzá' lādxi'ë queéli' yúgu'tēli'! ¡Ca' gaca!

LE BUZÚAJË' LU GUICH SANTIAGO

Santiago rugapë' Dios bönni' judío ta'dë'ë Cristo

¹ Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cõ' di'a dza quégaca bõnachi Israel, násilasili' idú yõdzõlió ni.

Yõl-la' réajni'i le runnë' Dios queëru'

² Böchi' luzá'ado', cate' gaca bi gaca queëli' le si' bë' libí'ili', ral-la' udzëjali' idú ládxi'li'

³ tu' nõz quézili', cate' bi raca queëli' le rizi' bë' libí'ili' ca réajlë'ëli' Cristo, lë ni rusedi libí'ili' cõzali' zõn ladxí'.

⁴ Guli'güi' ládxi'li' gaca idú yõl-la' zõn ladxí' queëli', para údxi gácali' bönni' ta'yéajni'inë', en biti' bi yadzaj queëli' ca nácacaca lë ni.

⁵ Channõ zoa ladaj libí'ili' nu biti' réajni'ini, nu na' ral-la' inabi-në' Dios, ate' Dios caz gunnë' yõl-la' réajni'i que, tu' runõdzjë' yõdxi yana' quégaca yúgu'të bõnachi, en biti' ca' réqui quézinë' gunnë' queëru'.

⁶ Na'a, nu bi rinabi-në' Dios, run bayudxi tséajlë' Lë', en cabí gaca chopa ladxí'. Nu raca chopa ladxí', raca que ca raca que bidxina' que nísado' cate' rutá bõ' le, ruzéaj bõ' le niló ná'aló.

⁷ Nu naca caní biti' ral-la' gun löza si' bi unõdzjë' Xanru'.

⁸ Bönni' na' reaj bõ' ládxi'da'ahuë' biti' ridzõlinë' nácalõ gunë'.

⁹ Channõ zoë' tu bönni' böchi'ru' réajlë'ë Cristo, en náquië' cá'asõ yõdzõlió ni, ral-la' udzëjanë' tu' chinadéli'në' tu lataj lo lahuë' Dios.

¹⁰ Bönni' böchi'ru' na' rilë'enë' yõl-la' tsahui' queë' ral-la' udzëjanë' cate' runë' Dios ga bíti'rõ ruzxõni ládxe'ë lë na' dë queë'. Nu ruzxõni ladxí' yõl-la' tsahui' que, gaca que nu na' ca raca que xiyija guíxi'do', la' ridõditë que.

¹¹ Caní naca, tu' gaca que nu na' ca raca que xiyija guíxi'do' na' cate' rilën gubidza, en rudzá'ada', la' ribídxitë guixi' na', en riguinnaj xiyija, en riniti yõl-la' lachi que. Lësca' caní gaca queë' bönni' rilë'enë' yõl-la' tsahui' queë', inítie' tsanni ní runë' dxin riguljë' yõl-la' tsahui' na'.

Le ta'zi' bë' rë'u

¹² Bica' ba bönni' böchi'ru' na' ruá' rilënë' le rizi' bë' lë'. Cate' chiburúajë' tsahui', idéli'në' yõl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böchi'ru' na' náquië' bica' ba tu' idéli'në' yõl-la' na'bán idú na' guzxi' lu në'ë Dios unõdzjë' quégaca nupa nadxí'iguequi Lë'.

¹³ Cate' bi raca queëru' le run ga guë'ëni'ru' gunru' le ruá' dõ', biti' ral-la' innaru': "Dios rizi' bë'ë rë'u len le naca xihui'." Dios biti' rizi' bë'ë nu bönni' len le cabí naca dxi'a.

¹⁴ Na'a, channõ nu bi raca que le rizi' bë' le len le cabí naca dxi'a, naca tu' rizë ladxí' le ruá' dõ', ate' lë ni ben ga gú'uni gun le ruá' dõ'.

¹⁵ Lë na' rizë ládxi'ru' le ruá' dõ' run ga gunru' dul-la', en cate' chibudxi benru' dul-la' na', la' dul-la' ná'asõ rusbaga' rë'u xíguia' gátiru'.

¹⁶ Böchi' luzá'ado', biti' si' ye'e la' cuínsili'.

¹⁷ Yúgu'të le naca dxi'a, en yúgu'të le naca idú le ruzi'iru' xibë', zá'gaca saca' xitsá'alõ, en ta'ruáj ga zoë' Xúziru' Dios, Nu ben yugu' le ta'yëpi yõsa lúzxiba,

yugu' le tu'tsá' cuínguequi, pero Lë' biti' rutsá' cuinë', en biti' rutsë'ë ca runë', rúnnatica'së' queëru' le naca tsahui'.

¹⁸ Ca rë'ëni quezínë' Dios, benë' ga nácaru' bönachi cubi queë'. Bugunë' dxin didza' queë' le naca idütë' li, para gácaru' ca tu gulapa zí'aló queë' ladaj yúgu'të nupa na' gurö cazë' Dios.

Le reaj lãdxi'ru'-në' Dios le naca li ladxi'

¹⁹ Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yönili', pero biti' ral-la' innëtëzili', en biti' ilëtëzili'.

²⁰ Nu na' riletëz biti' run le naca tsahui' lahuë' Dios.

²¹ Que lë ni na', guli'cá'ana yúgu'të le ruá' dö', en yúgu'të le zían le cabí naca tsahui', ate' lu yöl-la' nöxaj ladxi' guli'sí' lu ná'ali' didza' na' chinayaza icja lãdxi'do'oli', tu' huáca gun didza' ni ga uláli'.

²² Na'a, guli'gún ca rnna didza' ni, en cabí yönisili', tu' channö yönisili' didza' ni, si' yé'eli' la' cuínsili'.

²³ Nu riyónisö didza' ni, en biti' run ca rnna, nu ni naca ca tu bönni' ruyúë' lahuë' tu lu guié dxili,

²⁴ tu' ruyú cuinë', en söhuöjë', ate' la' ral-latë lãdxë'ë ca rinë'ë.

²⁵ Na'a, nu bönni' biti' ral-la lãdxë'ë le riyönnë', pero ruí' lãdxë'ë xibá queë' Dios le naca idú li, en le gaca gun ga uláru', ate' ugá'anë' tsutsu, en gúntica'së' ca rinná bë' xibá na', gaquië' bica' ba ca naca yúgu'të le runë'.

²⁶ Channö nu bönni' ladaj libí'ili' réquinë' naca dxi'a ca reaj lãdxë'ë Dios, pero biti' rapa chi'ë lúdxë'ë para cabí innësë' ca', bönni' ni rizí' yé'enë' la' cuínsë', ate' biti' raza lãdxë'ë Dios ca reaj lãdxë'ë bönni' na' Lë'.

²⁷ Le reaj lãdxi'ru'-në' Dios, le naca idú, en le naca dxi'a, naca gácalenru' yugu' bi'i uzëbido', enca' yugu' nigula nagá'ananu túzinu, cate' ta'guí' ta'zaca' nupa na', en cabí gútsa'ru' le cabí naca tsahui' le raca yödzölió ni.

2

Tuz ca ral-la' gunru' bönachi bal

¹ Böchi' luzá'ado', channö réajlë'ëli' Xanru' Jesucristo, Nu nácatëro lo, biti' ral-la' utsá'ali' ca gunli' bal tu tu bönachi.

² Channö tsázië' tu bönni' ga na' nudúbili', en nagu'ë xibön në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö,

³ channö gunli' bal bönni' na' nácuë' lari' nazáca'da', en guiëli'-në': "Gurö'ölen rë'u ga ni naca dxi'a", pero guiëli' bönni' yéchi'do' na': "Ná'asö guzui", o guiëli'-në': "Gurö'i lu yu ni."

⁴ Channö caní runli', rutsá'ali' ca runli' bal tu tu luzá'ali', en run cuinli' ca nu ruchi'a rusörö luzë'e, biti' naca dxi'a ca rizá' lãdxi'li'.

⁵ Böchi' luzá'ado', buli'zë nágali' lë ni. Dios gurö cazë' yugu' bönni', sal-la' téquiguequi bönachi yödzölió ni nácaqaquië' cá'asö, para ila'déli'në' yöl-la' tsahui' lahuë' Lë' tu' ta'yéajlë'ë Cristo, en gata' quégaquië' lataj ga ni rinná bë'ë Lë'. Gata' quégaquië' lë na' guzxi' lu në'ë Dios unödzejë' quégaca nupa ta'dxi'i Lë'.

⁶ Libí'ili' rucá'anali' cá'asö bönachi yechi' ca', en runli' bal yugu' bönni' dë yöl-la' tsahui' quégaquië', ate' bönni' na' dë yöl-la' tsahui' quégaquië' tu'saca' z'i'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlahui'.

⁷ Yugu' bõnni' na' dë yõl-la' tsahui' quégaquië' ta'nnë zi'ë ca' que Lë' Jesu-cristo le nazáca'tërö, en ca naca Lë' nazí'i lali': "Nupa Dá'gaca Cristo."

⁸ Runli' dxi'a channõ runli' idú ca rinná bë' xibá lo, le nazúaj lu guichi, en rna caní: "Ral-la' idxi'inu' luzó'o ca nadxí'i cuinu'."

⁹ Na'a, channõ rutsá'ali' ca runli' bal tu bõnachi, runli' dul-la', en nabága'li' xíguia' lu xibá queë' Dios, tu' riguítsjali' xibá na'.

¹⁰ Channõ runë' tu bõnni' idú ca rinná bë' xibá queë' Dios, pero channõ ichíxinë' ca naca tuz le rinná bë' xibá na', chinabáguë'ë xíguia' que idútë le rinná bë' xibá na'.

¹¹ Lë cazë' Dios gunné': "Biti' gunu' dul-la' le riguítsaj xibá que yõl-la' nutsaga na'", en gunné' ca': "Biti' gútiu' bõnachi." Na' a, channõ cabí runu' dul-la' le riguítsaj xibá que yõl-la' nutsaga na', pero rútiu' bõnachi, nabágu'u xíguia' que idútë xibá queë' Dios.

¹² Ca innali', en ca gunli', ral-la' gunli' ca ral-la' ilún nupa uchi'a usöröë' Dios légaquië' ca rinná bë' xibá na', le run ga uláru'.

¹³ Nupa cabí tu'huechi' ládxi'gaca luzé'eguequi, uchi'a usöröë' Dios léguequi, ate' cuntu nu huéchi' ladxí' léguequi, pero nupa na' tu'huechi' ládxi'gaca luzé'eguequi ulu'rúaj dxi'a cate' uchi'a usöröë' Dios léguequi.

Le ral-la' gunru' tu' réajlë'ëru' Cristo

¹⁴ Böchi' luzá'ado', biti' bi uzi'ë xibë tu bõnni' channõ innasë': "Réajlë'a Cristo", pero biti' runë' le naca tsahui'. Biti' gaca ulë' bõnni' na' channõ innasë' réajlë'ë Cristo.

¹⁵ Channõ nacu'ë böchi' luzá'aru' ta'yéajlë'ë Cristo, en biti' dë le ilácuë', en calëga le ilahuë',

¹⁶ ate' channõ tu nu dzaga libí'ili' guiësö légaquië': "Bõaj lídxili' tsáhui'do'. Chibõlaj budzé'eli'", pero channõ cabí unödzej quégaquië' lë na' ta'yádzjanë', biti' ca' gúcalen légaquië'.

¹⁷ Lësca' caní naca que nu bõnni' rnnasë' réajlë'ë Cristo. Channõ cabí runë' le naca bë' naca idú ca réajlë'ë Lë', biti' naca lesaca' yõl-la' réajlë' queë'.

¹⁸ Nadxi ca' guië' tu bõnni' luzé'ë: "Li' réajlë'ësu' Cristo, ate' neda' runa' le naca tsahui'. Biti' gaca ulu'inu' neda' réajlë'u Cristo channõ cabí zoa le naca tsahui' runu'. Neda' ulu'ida' li' réajlë'a Cristo ni'a que le naca tsahui' runa'."

¹⁹ Li' réajlë'u tuzë' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxi'zi tádxida' Lë'.

²⁰ Li', bõnni' biti' bi nõzinë'. Ral-la' inõzi quézinu' channõ zoa nu rnnasö réajlë' Cristo, pero biti' run le naca tsahui', biti' naca lesaca' yõl-la' réajlë' Lë' que nu na'.

²¹ Naca bë' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bõnachi ta'gú'u le tu'zegui' lahuë' Dios, sal-la' biti' buzégui'ë-bi'.

²² Na'a gaca inõzili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'.

²³ Caní guca lë na' nazúaj lu guichi lá'ayi le rna: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquië' Abraham tsahui'." Que lë ni na' guzxi'i lë: "Luzé'ë Dios."

²⁴ Na'a, rilë'e quézili' naca bë' rurúajë' tu bõnni' dxi'a ni'a que le runë', en calëgasö tu' réajlë'ë Dios.

²⁵ Lësca' caní guca queënu Rahab, nigula bë'ënu bõnachi lataj. Lësca' naca bë' burúajnu dxi'a tu' zoa tu le tsahui' bennu, lë na' bennu cate' ni' bennu

bönni' tu'yulan bal, en gúcalennu légaquié' para bulu'guélé'ë yöjhuójgaquié' nöza yúbölö.

²⁶ Ca na' raca que idüté le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, bití' naca lesaca'.

3

Yugu' le rnna lúdxí'ru'

¹ Böchi' luzá'ado', bití' guntëz zían cuinli' bönni' tu'sédinë' bönachi, tu' chinöz quezili' zítërö uchi'a usöröë' Dios rë'u, núlöru' rusédiru' bönachi.

² Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquié' idú tsahui', en raca inná be'e cuinë' ca naca yúgu'të le runë'.

³ Cate' rigú'uru' guié ruá'agacaba' böa' para gunru' ga ilunba' ca rë'ënu'ru', gaca inná bé'eru' légacaba' lu idüté le tunba'.

⁴ Buli'yú' ca' ca raca quéguequi barco. Sal-la' zxóntërö naca tu barco, en récjada' bö' ruzéaj le, cuídí'do'os naca në'e xiyágui barco na' le ruzecaj rudxí'i barco para tseaj gátí'tës ga guë'ënnë' bönni' rusë'ë le.

⁵ Lësca' caní naca lúdxí'ru'. Sal-la' cuídí'do'os naca, zíántërö le rnna lúdxí'ru' na'. Buli'yútsöca' ca run guí'. Sal-la' guí'do'os ribibiru', tu guí'a sibi huayégui.

⁶ Lësca' lúdxí'ru' na' naca ca tu guí'. Yúgu'të le ruá' dö' raca yödzölió ni rnna lúdxí'ru', en tu' dzaga lúdxí'ru' na' idüté le naca cázaru', que lë ni na' run ga raca xihui' idüté le nácaru'. Le rnna lúdxí'ru' ribequi guí', le ruzegui' rë'u ca naca yúgu'të le runru', ate' tu' rnna caní lúdxí'ru' na', naca que tsca chinaguéla'të guí' le nabequi' tu' xihui'.

⁷ Yúgu'tëba' böa' guixi' ta'daba' luyú, en yugu' böa' zoa xiligacaba', en yugu' böa' tá'ayöj lë'ëba' lu yu, enca' yúgu'tëba' böa' dzö'öba' lu nísado', huáca ila'nná be'e bönachi luyú ni légacaba',

⁸ pero cuntú nu bönni' gaca inná bé'enë' lúdxë'ë, tu' rnna lúdxí'ru' le ruá' dö', en bití' gaca nu uzaga' xinözi. Zíántërö le rnna lúdxí'ru' le naca ca tu le nachë' yöl-la' guti.

⁹ Len la' lúdxí'ru' ná'asö rulidza tsáhui'ru'-në' Dios Xuz, en rulidza díjaru' ca' yugu' bönni', ate' benë' Dios légaquié' ca naca cazë' Lë'.

¹⁰ Caní naca, len la' ruá'asiru' na' rulidza tsáhui'ru' bönachi, en rulidza díjaru' bönachi. Böchi' luzá'ado', bití' ral-la' gaca caní.

¹¹ Bití' ca' ta'lén nisa siziá', en nisa zöna' la' tuzi ga ta'lén.

¹² Böchi' luzá'ado', tu yaga higo bití' gaca cuía le ribía yaga olivo, ate' tu lubá uva bití' gaca cuía le ribía yaga higo na'. Lësca' caní, nitú ga rilén nisa bití' gaca ila'lén nisa zöna', en nisa siziá'.

Yöl-la' réajni'i le naca idú

¹³ Channö zoë' tu bönni' ládjali' rácadë'ë, en réajni'de'enë', lu yöl-la' nöxaj ladxi' queë' ral-la' ulu'ë náquié' caní ní'a que le naca tsahui' runë'.

¹⁴ Na'a, channö ruzxé'eli' luzá'ali', en runli' dxin para ila'gú'u bönachi libí'ili' yöl-la' ba, bití' ral-la' gun ba zxön cuinli' ca naca yöl-la' réajni'i queëli'. Nu run caní rizi' yë', en ridá'baga' le naca idüté li.

¹⁵ Yöl-la' réajni'i caní bití' naca le runödzjë' Dios, pero que yödzölió ni naca, enca' quégaca bönachi yödzölió ni, en que tu' xihui'.

¹⁶ Yugu' bönni' tu'zxé'enë' luzá'agaquié', en të'ënnë' ila'gú'u bönachi légaquié' yöl-la' ba, lësca' ta'dil-la' dídzë'ë, en tunë' yúgu'të le ruá' dö'.

17 Yugu' bönni' nápagaquië' yöl-la' réajni'i na' runödzejë' Dios: Tunë' le naca idú tsahui', en ta'bözë' dxí'ado'.

Nácagaquië' zxon ladxí', en nõxaj ladxí'.

Tu'huechi' ladxí'gaquië' bönachi, en tunë' le naca dxí'a.

Tuz ca tu'chi'a tu'söröë' luzá'agaquië', en biti' ta'béaj bë'ë luzá'agaquië'.

18 Nupa tu'i ladxí'gaca ıla'bequi dxi le raca, ta'böza dxí'ado', para gaca ca' dxí'a idütë le zeaj naca caz.

4

Nupa tun zxon le nacua' yödölió

1 ¿Bixz que na' ridíl-lali', en raca didza' bizxaj queëli'? Raca caní queëli' tu' rizë ladxí'li' zían le rizë ladxí'li' tu tuli', en que lë ni na' ridíl-laleni' luzá'ali'.

2 Zían le ruhuídi'li', en tu' cabí rizí'ili' le, que lë ni na' rútili' bönachi. Ruzxé'eli' le dë que luzá'ali', en tu' cabí ridéli'li' le, que lë ni na' rizóa ribö'öli', en ridíl-lali'. Biti' rata' queëli' le rë'ëni'li', tu' cabí rinábali'-në' Dios lë na'.

3 Sal-la' zoa bi rinábali', biti' bi rizí'ili', tu' cabí naca dxí'a ca rinábali', tu' rë'ëni'li' lë na' rinábali' para ugunli' le dxin ca raza ladxí'sili'.

4 Libí'ili', bönachi nusanli'-në' Dios, ¿naru' cabí nõzili' channö runli' zxon le nacua' yödölió ni, chinuhuóacali' ca nu biti' rilé'e Dios dxí'a? Núti'tës nu rë'ëni gun zxon le nacua' yödölió ni, nuhuóaca ca nu biti' rilé'e Dios dxí'a.

5 Biti' rnasö ca' le nazúaj lu guichi lá'ayi le rnna: "Dios risöl-lë'ë Dios Bó' Lá'ayi queëru', Nu zóalen rë'u, ate' Lë' nadxí'inë' rë'u, en rudúli'në' rë'u channö rusanru'-në'."

6 Na'a, zxöntëro le ruzá' ladxë'ë Dios queëru', tu' nazúaj lu guichi lá'ayi le rnna: "Dios ruzáguë'ë xinözguequi nupa tun ba zxon cuínguequi, pero ruzá' ladxë'ë quegaca nupa nácagaca nõxaj ladxí'."

7 Que lë ni na', guli'sóa nõxaj ladxí' lahuë' Dios. Guli'nná be'e tu' xihui', ate' uzxunnaj ga zóali'.

8 Guli'gúi' ladxí'li' sóaleni'-në' Dios, ate' Lë' idisóaleni' libí'ili'. Libí'ili', bönachi dul-la', guli'gaca tsahui', en bítirö gunli' dul-la'. Libí'ili', núlöli' reaj bö' ladxí'do'oli', en chopa le nadxí'ili', guli'gún dxí'a icja ladxí'do'oli'.

9 Guli'sëbi ladxí'li', en buli'huí'ini, en guli'cödxí. Na'a ruzxídxili, pero ral-la' cödxi'li'. Rudzëjali', pero ral-la' huí'inili'.

10 Guli'gaca nõxaj ladxí' lahuë' Xanru', ate' Lë' gunë' ga tsëpisëli'.

Biti' ral-la' ichugu bë'ëru' le run luzá'aru'

11 Böchi' luzá'ado', biti' innëli' que luzá'ali' tuli' ia'tuli'. Nu bönni' rinnë' que böchi' luzë'ë, en rilaga yudxë' le runë', bönni' ni rinnë' que xibá queë' Dios, en ruchi'a rusöröë' le rinná bë' xibá na'. Na'a, channö ruchi'a rusöröu' le rinná bë' xibá na', run cuinu' nu ruchi'a rusöröë' le, en biti' runu' ca rinná bë' xibá na'.

12 Na'a, tuzë' náquië' Dios, Nu ben xibá na', en náquië' ca' Nu ruchi'a rusöröë' le runru'. Lë cazë' gaca usölë' bönachi o usunítie' bönachi na'. Na'a, ¿núzxité run cuinu', rilaga yudxu' luzó'o?

Biti' gaca gunru' löza le gaca cuxö huidzaj

13 Na'a, buli'zë nágali', núlöli' rnnali': "Cuxö huidzaj tséajtu' yödö ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queëtu'."

¹⁴ Biti' nözili' bizxi gaca cuxö huidzaj. ¿Nacxi caz naca queëru', tsca zóaru' yödzölió ni? Nácaru' ca böchila le nalá' tu chí'ido'osö, en la' rinítitë.

¹⁵ Que lê ni na', caní ral-la' innali': "Channö guë'ënnë' Xanru', sóaru' ibanru', en tu ia'tú le gunru'."

¹⁶ Na'a, libí'ili', lu yöl-la' run ba zxön queëli' rigú'uli' yöl-la' ba la' cuínsili'. Yúgu'të le caní le runli' zeaj naca le ruá' dö'.

¹⁷ Channö nöziru' le naca dxi'a le ral-la' gunru', en biti' gunru' lê na', runru' dul-la'.

5

Santiago rusë'ë ládxi'gaquië' bönni' dë yöl-la' tsahui' quégaquië'

¹ Libí'ili', bönni' rilé'eli' yöl-la' tsahui', guli'cödxí, en guli'cödxí'a, tu' si' za' dza ilé'eli' yöl-la' yechi'.

² Chinaca ditaj yöl-la' tsahui' queëli', ate' chinutögacaba' le ráculi' böljado' que.

³ Chinaca que dumí oro, en dumí plata queëli' ca naca que guíë nazön yöni que, ate' yöni que na' naca ca tu le ruzegui libí'ili' didza', ate' gaca queëli' ca tu gu' le usuniti libí'ili'. Caní gaca queëli', tu' busó' butúbili' queézili' yöl-la' tsahui' dza ni zóaru' chiröjsétëgaca.

⁴ ¡Buli'yútsöca'! Yugu' bönni' huen dxin gula'lapë' yöla queëli' chita'naba yúdxinë' lázxaqaquië', tu' cabí riguízxañani' légaquië', ate' lê na' ta'nabë' bönni' huen dxin na' chibidxín didza' na' lahuë' Xanru', ate' Lë' rinná bé'enë' ni'a në'ë guizxi yu.

⁵ Benli' ga buné'eli', en güf'i gudágutica'sili' le rnna'sö queëli' lu yödzölió ni. Buxön cuinli', pero chizóa idxín dza údxi queëli'. Gaca queëli' ca raca queëba' bëdxi renni', chibú'u dza gütiru'-ba'.

⁶ Richúguli' quégaquië' bönni' tsahui', en rútili' légaquië', ate' légaquië' biti' ta'dá'baguë'ë libí'ili' cate' rútili' légaquië'.

Cözaru' zxön ládxi', en ulídzaru'-në' Dios

⁷ Na'a, böchi' luzá'ado', guli'cöza zxön ládxi' ga idxinrö dza huödë' Xanru'. Buli'yú ca runë' tu bönni' guz gú'una. Lu yöl-la' riböza zxön ládxi' ribözë' guiöjsiu', en guiöj cusu lin, ate' tódi ni' ulapë', en utubë' yöz zían.

⁸ Lë'sca' caní, libí'ili' na' réajlë'ëli' Cristo, guli'cöza zxön ládxi', en buli'tipa ládxi'li', tu' chizá' gala' dza huödë' Xanru'.

⁹ Böchi' luzá'ado', biti' innëli' que luzá'ali' tuli' ia'tuli', para cabí ibága'li' xíguia'. ¡Buli'yútsöca'! ¡Chirudzaga lo udxinë' Xanru', ate' uchi'a usöröë' le runli'!

¹⁰ Böchi' luzá'ado', buli'yú ca guca quégaquië' bönni' gulu'ë didza' uláz queë' Xanru'. Nácagaquië' ca tu le rulu'i ré'u ca ral-la' quí'i sáca'ru', en cözaru' zxön ládxi'.

¹¹ Na'a, nucuá'aru' légaquië' ca yugu' bönni' guláquië' bica' ba, nupa ni' gula'guí' gula'zaca'. Chibiyónili' ca benë' Job. Gulözë' zxön ládxi' sal-la' gudí'i guzácá'dë'ë, ate' nözili' ca' ca benë' Xanru' queë' ga búdxitë. Ruhuéchi'da' ládxë'ë Xanru' rë'u, en ruí'i ládxë'ë rë'u.

¹² Böchi' luzá'ado', le nácatërö lo naca lê ni rea' libí'ili': ¡Biti' uzötjali' Nu zoa yehua' yubá, en biti' uzötjali' le nacua' luyú ni, en biti' uzötjali' bití'tës bi run tsutsu xtídza'li'! Cate' innali' "Ön" ral-la' innásili' "Ön." Cate' innali' "Biti'" ral-la' innásili' "Biti'." Caní ral-la' gunli', para cabí ibága'li' xíguia' lahuë' Dios.

¹³ Channö riguí'i rizáca' nu dzaga libí'ili', ral-la' ulidza Dios nu na'. Channö zoa nu rudzeja, ral-la' gul-la' yöl-la' ba nu na'.

¹⁴ Channö re'e nu dzaga libí'ili', ral-la' ulidza bönni' gula tapa chí'ë bönachi queë' Cristo, para ulu'lidzë' Dios, en ila'nábinë' Lë' únë' bönni' huë' na'. Ral-la' ila'gu'ë lë' le za, en ulu'gunë' dxin Lë' Xanru'.

¹⁵ Cate' ulu'lidzë' Dios, en ta'yéajlë'ë gunë' Cristo ga huóáquië' bönni' huë' na', ní'iró gunë' Xanru' ga huóása uzóë', en channö benë' dul-la' bönni' huë' na', Xanru' uniti lahuë' lë'.

¹⁶ Que lë ni na', guli'xóalëpi dul-la' nabága'li' tuli' ia'tuli', en guli'naba que luzá'ali' tuli' ia'tuli' lahuë' Dios para únë' libí'ili', para urúaj yödzhóhuë' na' ré'eli'. Le rulidzë' tu bönni' tsahui' Dios, le runë' idú ládxë'ë, nácada' lesaca'.

¹⁷ Elías, bönni' ni' bë'ë didza' uláz queë' Dios, gúquië' tu bönni' yödzhólió ca nácaru' rë'u, pero cate' bulidzë' Dios, en gunábinë' Lë' para cabí galaj guióǵ, idú tsonna iz yu' xopa beo' biti' gulaj guióǵ luyú ni.

¹⁸ Gudódi ni' bulidzë' Dios leyúböló, ate' böálaj guióǵ, ate' bunödzej le gulazë' yugu' bönni' dza ni'.

¹⁹ Böchi' luzá'ado', lë ni ral-la' inözili'. Channö nunbë' nu bönni' dzáguië' libí'ili' le naca idútë li, en richixi riníguinë', ate' zoa nu gun ga ubí'i ládxë'ë bönni' na' richixi riníguinë',

²⁰ nu na' gun ga ubí'i ládxë'ë bönni' dul-la' na' gudë' ga yúböló, usölë' bönni' dul-la' na' lu yöl-la' guti, en gunë' ga uniti lahuë' Dios dul-la' zían nabáguë'ë bönni' na'. ¡Ca' gaca!

DÍDZA'DO' ZÍ'ALÖ BUZÚAJË' PEDRO

Pedro rugapë' Dios nupa ta'dá' Cristo

¹ Neda', Pedro, naca' gubáz nasöl-lë'ë Jesucristo. Ruzúaja' queéli' lu guichi ni, libí'ili' násilasili' zi'tu' gapa dë ládzali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia.

² Gurö cazë' Xúziru' Dios libí'ili' ca na' bucözë' dza ni'te, para guéquili' quez queë' lu në'ë Dios Bö' Lá'ayi, en gunli' ca rnna xtídzë'ë Cristo, en gácali' idú tsahui' ni'a que xichönë' Cristo. Rinábida'-në' Dios uzá' ládxë'ë queéli', en gunë' ga soa dxi icja ládxí'do'oli'.

Le rúntica'siru' löza

³ ¡Yöl-la' ba Dios, Xuzë' Xanru' Jesucristo! ¡Lu yöl-la' ruhuéchi' ladxi' zxön queë' bucubë' yöl-la' na'bán queëru' tu' busubanë' Jesucristo lu yöl-la' guti! ¡Lë ni run ga rúntica'siru' löza,

⁴ en gun ga idéli'ru' lë na' rapa chi'ë Dios queëru' yehua' yubá! Lë na' rapa chi'ë Dios, le unódzjë' quegaca bönachi queë', bití' iníti, en bití' itëbi, en bití' igula.

⁵ Tu' réajlë'ëli' Lë', lu yöl-la' huáca zxön queë', Dios gun chi'ë libí'ili' cate' idxinrö dza ni' uzí'ili' xibé yöl-la' rusölá idú na' chinupë'ë queëru', en ulu'ë lahui dza údxi.

⁶ Que lë ni na' rudzéjade'eli', sal-la' na'a ral-la' quí'i sáca'li' tu chí'ido' tu' taca zían le ta'zí' bë' libí'ili'.

⁷ Tu' ruá' rilenli' yugu' lë na' ta'zí' bë' libí'ili', naca bë' naca idú ca réajlë'ëli' Cristo. Lësca' caní rizi' bë'ëru' oro, le iníti, cate' ruchí'aru' le lu guí'. Que lë ni na', cate' chinazí' bë' yöl-la' réajlë' queéli' Cristo, le nácáro lesaca' ca oro, gaca queéli' yöl-la' zxön, en yöl-la' run bal dza ni' uluí'ihuahë' Jesucristo.

⁸ Libí'ili' nadxí'ili'-në' Cristo sal-la' catu caz bilé'eli' Lë'. Réajlë'ëli' Lë' sal-la' bití' rilé'eli'-në' na'a, ate' rudzéjali'. Yöl-la' rudzeja zxön queéli' le cabí gaca quíxjö'öru' tsca naca, naca idútë li.

⁹ Caní naca, tu' ridéli'li' yöl-la' rusölá que bö' naca cázali', le rata' queéli' tu' réajlë'ëli'-në' Cristo.

¹⁰ Dza ni'te yugu' bönni' gulu'ë didza' uláz queë' Dios bulu'sédë' dxí'ado' ca naca yöl-la' rusölá na' dë queëru' na'a, ate' gulu'ë didza' ca naca le ruzá' ládxë'ë Dios queëru'.

¹¹ Bö' Lá'ayi dzáguie' Cristo buzéajni'inë' zí'atëlö bönni' na' gulu'ë didza' uláz queë' Dios, en buluí'inë' légaquie' ca ral-la' quí'i sáquë'ë Cristo, enca' ca gaca queë' yöl-la' zxön tödi na'. Que lë ni na' gulu'í' ládxí'gaquie' ila'nözínë' bátaxi gaca lë ni, en nuzxi na' gaca que lë na' buluí'inë' Bö' dzáguie' Cristo légaquie'.

¹² Dios buluí'inë' bönni' na' gulu'ë didza' uláz queë' bití' naca tu le ila'lë'enë' légaquie', pero rë'u ni rilé'ëru' lë na' gulu'ë didza' que, ate' libí'ili' riyónili' na'a ca naca que. Yugu' bönni' tunë' libán que didza' dxi'a tu'ë didza' que lë ni, ate' zóalen yöl-la' huáca queë' Dios Bö' Lá'ayi légaquie', Nu na' risól-lë'ë Dios zoë' yehua' yubá queëru', ate' té'ënnë' gubáz lá'ayi queë' Dios ila'nözínë' ca naca lë na' gulu'ë didza' que dza ni'te.

Dios rulidzë' rë'u para gácaru' lá'ayi

¹³ Que lë ni na', guli'sóa ban ladxi', en guli'cözatica'sö bá'ado'. Idú ládxi'li' buli'zxöni ládxi'li' lë na' uzá' ládxi'ë queëli' Dios dza ni' ulufi lahuë Jesucristo.

¹⁴ Guli'gún ca rnna xtídzë'ë Dios, en biti' güi'ili' lataj yugu' le rizé ládxi'li' ila'chë' libí'ili' ga yúbölö, ca na' benli' dza ni' biti' núnbë'ënili'-në' Dios.

¹⁵ Ral-la' gácali' lá'ayi ca naca yúgu'të le runli', ca na' náquië' lá'ayi Dios, en bulídzë' libí'ili' para queúquili' queë'.

¹⁶ Lë'sca' caní nazúaj lu guichi lá'ayi, ca na' gunné' Dios le rnna: "Guli'gaca lá'ayi, tu' naca' neda' lá'ayi."

¹⁷ Rëli'-në': "Xuztu'" cate' rulídzali'-në' Dios, ate' Lë', lëbisö ca ruchi'a rusöröë' yúgu'të bönachi tsca naca le núngaca tu tu bönachi na'. Que lë ni na' ral-la' gádxili' Lë' tsanni ni zóali' yödzölió ni, le cabí naca idú ládzali'.

¹⁸ Dios busölë' libí'ili' lu lë na' gúcali' dza ni' cate' benli' ca nácagaca le cá'asö bulu'dödë' xuz xtó'oli' loli'. Nöz queúzili' böá'uë' libí'ili', calëga len tu le initi ca naca oro, en plata,

¹⁹ pero len xichönë' Jesucristo le nácatërö lesaca', tu' budödi cuinë', en güquië' ca tuba' bö'cu' zxila' nácaba' idú dxi'a, böa'do' tutië'-ba' lahuë Dios para ugúa dul-la'.

²⁰ Dios gurö cazë' Cristo zí'atëlö ca benë' yödzölió ni, ate' dza ni zóaru' na'a benë' ga bulufi lahuë' para uzí'ili' xibë'.

²¹ Ní'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquië' lo. Caní naca, réajlë'ëli'-në' Dios, en ruzxöni ládxi'li' Lë'.

²² Na'a, chinún cuinli' dxi'a tu' runli' ca rnna le naca idútë li, en naca idú ca nadxí'ili' yugu' böchi' luzá'ali' ta'yéajlë'ë Cristo. Que lë ni na', idú ládxi'li' ral-la' idxí'ili' luzá'ali' tuli' ia'tuli'.

²³ Chiböäljali' leyúbölö, calëga tu' nuzóagaca bönachi tati caz libí'ili', pero nuzóa Nu zoa caz libí'ili', en náljalenli' xtídzë'ë Dios, le naca ban, en le zóatica'sö.

²⁴ Caní naca, tu' nazúaj lu guichi lá'ayi le rnna: Yúgu'të bönachi nácagaca ca naca guixi'.

Yöl-la' lachi queguequi naca ca xiyija guixi' na'.

Ribidxi guixi' na', en riguinnaj xiyija,

²⁵ pero xtídzë'ë Dios zóatica'sö.

Didza' ni bidxín queëli' lu didza' dxi'a.

2

¹ Que lë ni na', guli'cá'ana yúgu'të le ruá' dö'. Bítirö si' yë'ëli', en biti' ubéaj dxi'a cuinli' lógaca bönachi. Bítirö uzxé'eli', en biti' innëli' que luzá'ali'.

² Ral-la' së ládxi'li' le naca queë' Dios Bö' Lá'ayi para gálali' ca na' tunbi' bi' huë'ënido, ta'zë ládxi'bi' nidxi'. Caní ral-la' gunli' ga idxinrö dza uláli',

³ channö réquibe'eli' náquië' Xanru' dxi'i ladxi'.

Cristo náquië' ca tu guiöj naca ban

⁴ Guli'biga' ga zoë' Xanru'. Náquië' ca tu guiöj naca ban. Náquië' ca tu guiöj bulu'cá'ana bönachi cá'asö pero naca tu le gurö cazë' Dios le nazáca'tërö.

⁵ Lë'sca' caní, libí'ili' nácali' ca yugu' guiöj nabángaca. Guli'güi' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixúz néquiqueuinë' quez queë' Dios, ate' lu në'ë Jesucristo gaca udödili' yugu' le runné' Dios Bö' Lá'ayi queëli' lahuë' Dios, lë na' raza ládxi'ë Dios.

⁶ Que lë ni na' nazúaj ca' lu guichi lá'ayi le rnna:

Rigu'a lu zö'ö yödzo Sión tu guiöj lo squin zö'ö,
le gurö caza' neda', en naca lesaca'.

Nu réajlé' Lè', biti' ichixi inigui.

⁷ Naca guiöj ni queëli' libí'ili' na' réajlé'ëli' Cristo tu le nazáca'da', pero quegaca nupa biti' ta'yéajlé' Cristo, naca ca na' nazúaj lu guichi lá'ayi le rnna: Guiöj na' bulu'zöé' bönni' tu'cu'è zö'ö tsólá'aló, tu' guléquiné' naca cá'asó, guiöj ni chinaca guiöj lo squin zö'ö.

⁸ Lësca' caní nazúaj lu guichi lá'ayi le rnna:

Guiöj ni gun ga tsöjchégu'gaca bönachi,
en gun ga tsöjtsö'ögaca.

Le nácaté yöjchégu'gaquié' bönni' biti' ta'yéajlé'ë Cristo, tu' gula'chíxiné' cate' bulu'zöé' xtídzé'ë Dios tsólá'aló. Dios bucu'è légaquié' para iluné' caní.

Nupa néquiquequi quez queë' Dios

⁹ Libí'ili' nácali' bönachi gurö cazé' Dios. Yúgu'téli' nácali' bixúz queë' Bönni' Unná Bè' Lá'ayi. Nácali' ca tu yödzo nequi quez queë' Dios. Nácali' bönachi que cazé' Dios. Caní nácali' para gaca gunli' libán que le zxön bené' Dios, Bönni' na' bulidzé' libí'ili' para birúajli' ga naca chul-la que dul-la', en guyázali' lu bení' idú queë'.

¹⁰ Zí'atélö biti' gúcali' bönachi queë' Dios,

pero na'a chinácali' bönachi queë'.

Zí'atélö cuntú nu buéchi' ladxi' libí'ili',

pero na'a Dios caz ruhuéchi' ládxé'ë libí'ili'.

Zóaru' nabanru' para gunru' ca rë'ëné' Dios

¹¹ Böchi' luzá'ado', nácali' ca bönachi zì'tu', en ridásili' yödzoilió ni. Que lé ni na', ráta'yua' loli', biti' gü'ili' lataj ila'nná be'e le rizésó ládxí'ili' libí'ili', yugu' le ta'díl-lalen bö' naca cázali'.

¹² Gulí'gún le naca dxi'a lógaca bönachi biti' núnbë'gaquié' Dios. Caní gaca, channó ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödé' Xanru' ila'gu'è Dios yöl-la' ba ni'a que le naca cázali'.

¹³ Tu' néquili' queë' Xanru', gulí'gún bal yúgu'té bönni' ta'nná bë'ë, bönni' na' nucuá'agaca bönachi légaquié', sal-la' náquié' bönni' rinná bé'ené' iduté yödzoilió, tu' náquié' bönni' lo unná bë',

¹⁴ o channó náquié' bönni' rinná bé'ené' tu yödzo, nu na' nuzóé' bönni' lo unná bë' na' para guné' xíguia' nupa tua' dö', en guné' bal nupa tun le naca dxi'a.

¹⁵ Caní rë'ëné' Dios gunli' para ila'bö' dxié' yugu' bönni' biti' bi nözguequiné', en biti' núnbë'gaquié' Lè', cate' ila'lé'ené' le naca dxi'a na' runli'.

¹⁶ Gulí'gaca ca yugu' bönni' nazángaquié', pero biti' ugunli' dxin yöl-la' nazán queëli' para gunli' le ruá' dö'.

Gulí'gaca ca yugu' bönni' nadó'ogaquié' queë' Dios.

¹⁷ Gulí'gún bal yúgu'té bönachi.

Gulí'dxf'i yugu' böchi' luzá'ali'.

Gulí'gadxi-né' Dios.

Gulí'gún bal bönni' na' rinná bé'ené' iduté yödzoilió.

Le gudí'i guzxáquë'ë Cristo ruzéajni' i rë'u ca ral-la' gunru'

18 Núlöli' nácali' bönni' nadó'ogaca, guli'gadxi bönni' xanli', en guli'gún légaquié' bal, calégasö gunli' bal yugu' bönni' xanli' na' nácagaquié' tsahui', en tu'i ládxi'gaquié' libí'ili', pero guli'gún bal ca' yugu' bönni' xanli' na' tu'saca' zi'ë libí'ili' lu dxin runli' quégaquié'.

19 Channö quí'í sáca'li', en biti' bi nabága'li', ate' guá' ilenli' lë na' tu' réquili' naca ca ré'ënë' Dios, urúajli' tsahui' lahué' Dios.

20 Na'a, channö ruá'ali' dö, ate' yugu' bönni' yúlahui' iluné' libí'ili' xíguia', ¿nacxi caz uzí'ili' xibé sal-la' len yöl-la' riböza zxon ladxi' queéli' guá' ilenli' lë na' gaca queéli'? Channö ribözali' zxon ladxi', en ruá' rilenli' le riguí' rizáca'li', ate' benli' le naca dxi'a, ní'irö urúajli' dxi'a lahué' Dios.

21 Dios bulidzë' libí'ili' para quí'í sáca'li' caní, tu' gudí'í guzzáquë'ë Lë cazë' Cristo uláz queéli', en buzóë' queéli' tu le ruluí'í libí'ili' ca ral-la' gunli', para quí'í sáca'li' ca na' gudí'í guzzáquë'ë Lë'.

22 Cristo biti' bi dul-la' benë', en catu caz guzxi' yë'ë.

23 Cate' bulu'dídza' yúdxinë' Lë',
biti' butsagui yúdxinë' légaquié'.

Cate' bulu'saca' zi'ë Lë',
biti' buzenë' légaquié' le bach,
pero budödi cuinë' lu në'ë Dios,
Nu na' ruchi'a rusöröë' le runru' ca sa'yéaj.

24 Lë cazë' Cristo guzxi'ë dul-la' queëru' lu idú le naca cazë' cate' ni' gútié' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquié' hué' uláz queëru' para huóácaru' rë'u dxi'a.

25 Gúcali' ca yugu' bö'cu' zxila' nanítigacaba', pero na'a budxinli' queë' Cristo, Nu ruyú libí'ili', en rapa chi'ë bö' naca cázali'. Náquié' queéli' ca tu' bönni' uyú bö'cu' zxila'.

3

Ca ral-la' ilún nupa nutsaga ná gaca

1-2 Lësca' caní, libí'ili' nigula, ral-la' gunli' bal bönni' que queéli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dxi'a runli', en ca na' nácali' ba'a ladxi', en runli' légaquié' bal, sal-la' biti' bi didza' ruí'ilenli' légaquié' ca naca queë' Cristo.

3 Yöl-la' lachi queéli' biti' naca le zoa láhuisö, tsca rupá'ali' ícjali', en tsca nácagaca le néquini oro nusí' cuinli', en lari' nazáca'da' náculi'.

4 Yöl-la' lachi queéli' ral-la' gaca le yu'u icja ládxi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahué' Dios.

5 Lësca' caní guca yöl-la' lachi quégacanu nigula gula'yéaj ládxi'nu Dios, nigula na' gula'cuá'anu dza ni'te. Bulu'zxöni ládxi'nu Dios, en gulunnu bal bönni' que quégacanu.

6 Caní bennu Sara, tu' bennu ca rnna xtídzë'ë Abraham, bönni' queënu, en bulídzanu lë', gunnú: "Xan." Libí'ili' ca' gunli' ca bennu Sara na' channö gunli' le naca dxi'a, en biti' bi gádxili'.

7 Lësca' caní, libí'ili', bönni', ral-la' gú'í ládxi'li' nigula que queéli'. Guli'gún légacanu bal, calégasö tu' nóta'gacanu ca yöl-la' nál-la' queéli', pero lësca' tu' nadéli'gacanu yöl-la' na'bán na' runnë' Dios queëru', lëbisö ca nadéli'li'

libí'ili'. Guli'gún caní para cabí uzaga' tu' xihui' xinözili' cate' ulídzali'-nē' Dios.

Huaguí'i huazáca'ru' sal-la' gunru' le naca dxi'a

⁸ Ga ruúdxitē, guli'gaca tuz tuli' len ia'tuli' yúgu'tēli', en guli'güf' ládxi'li' luzá'ali' tuli' ia'tuli'. Guli'gaca dxi'i ladxí', en zxön ladxí'.

⁹ Biti' ubí'ili', cabí guá'ali' dō' que nu ruá' dō' queéli', en bití' utsaga yúdxili' nu rutsaga yudxi libí'ili', pero caní ubí'ili', inábili'-nē' Dios gunē' ga gaca bica' ba nu na', tu' bulidzē' Dios libí'ili' para gácali' bica' ba.

¹⁰ Caní naca le nazúaj lu guichi lá'ayi le rnna: Nu bōnni' rē'ēnē' uzi' ē xibé yöl-la' na'bán queē', en cözē' dxí'ado', ral-la' ucá'anē' didza' xihui', en cabirō si' yē'ē.

¹¹ Ral-la' ucá'anē' le ruá' dō', en gunē' le naca dxi'a. Ral-la' güf' ládxi'ē cözē' zxön ladxí', en gúntica'sē' caní,

¹² Xanru' rapa chi'ē yugu' bōnni' tsahui' en ruzē náguiē' le tu'lidzē' Lē', pero ruzáguē'ē xinözguequi nupa tua' dō'.

¹³ ¿Nuzxi caz guá' dō' queéli' channō ruí' ládxi'li' gúntica'sili' le naca tsahui'?

¹⁴ Sal-la' quí'í sáca'li' cate' runli' le naca tsahui', gácali' bica' ba. Cuntu nu gádxili', en bití' ubi uguí'ili'

¹⁵ pero bulí'zxōni ládxi'li'-nē' Cristo, en gü'ili' Lē' lataj inná bé'enē' lu icja ládxi'do'oli'. Guli'sóa sina' quíxjōi'ili' yúgu'tē nupa ila'nabi libí'ili' bizx que runli' löza Cristo, en gunli' lē ni lu yöl-la' nōxaj ladxí' queéli', en lu yöl-la' run bal nupa na'.

¹⁶ Guli'gúntica'sō le naca dxi'a lahuē' Dios, en channō naca' nupa ta'nnē xihui' que le naca tsahui' runli' tu' réajlē'ēli' Cristo, ní'irō ulu'tuí' tu' nōzi le ta'nnē queéli'.

¹⁷ Channō quí'í sáca'li', dxí'arō gaca channō naca tu' runli' le naca dxi'a, en calēga tu' ruá'ali' dō', channō Dios rē'ēnē' quí'í sáca'li' caní.

¹⁸ Lē' cazē' Cristo gudí' guzáquē'ē, en gútiē' uláz queēru' para bugúē' dul-la' nabága'ru'. Lē' náquiē' dxi'a, pero gútiē' ni'a queēru', yugu' bōnni' dul-la'. Caní benē' para bunē' rē'u tuz len Dios. Lu yöl-la' bōnachi queē' gútiē' pero lu bō' naca cazē' ni zoē' nabanē' lu le cubi le naca cazē'.

¹⁹ Lu bō' naca cazē' guyijē' yōjenē' libán lógaca bō' nadzúngaca.

²⁰ Bō' ni gulaca cazē' yugu' bōnni', dza ni'te gula'dá'baguē'ē xtídzē'ē Dios, dza ni' zoē' Noé, cate' ni' gulözē' Dios lu yöl-la' ribōza zxön ladxí' queē', en bití' busiúdxē' légaquiē', tsanni ni' benē' Noé barco zxön na'. Lē'e barco na' bulu'lá nabábasō bōnachi lu nisa. Gulaca xunu' bōnachi, bōnni', en nigula.

²¹ Nisa ni' naca tu le rulu'í ca naca nisa ga na' ridílaru' nisa, le naca bē' nuláru' lu yöl-la' guti tu' bubanē' Jesucristo lu yöl-la' guti. Lē na' ridílaru' nisa bití' naca tu le run dxi'a le nácaru' láhuisō, pero rulu'í ruí' ládxi'ru' gaca dxi'a icja ládxi'do'oru' lahuē' Dios.

²² Jesucristo bubenē' yehua' yubá, ga na' yōjchō'ē cuita lē'ē ibēla Dios, en rinná bé'enē' yugu' gubáz lá'ayi, en nupa ni' ta'nná bē', en nupa nadéli'gaca yöl-la' zxön.

4

Ral-la' ugunru' dxin yöl-la' huáca queē' Dios para gunru' xichinē' Cristo

¹ Que lë ni na', ca na' gudí'i guzxaqué'ë Cristo lu le naca cazë', lësca' libí'ili' ral-la' soa cözali' quí'i sáca'li'. Nu na' riguí'i rizáca'a tu' da' le naca tsahui' chibucá'ana dul-la'.

² Na'a isí lo, ral-la' gúntica'sili' ca ré'ënë' Dios, en calëga ca rizësö ládxi'li' lu yöl-la' bönachi queëli'.

³ Tsca'ti' gaz le chibenli' chibenli'. Bítirö gunli' ca na' tun nupa biti' núnbë'gaca Dios. Dza ni'te benli' yugu' le cabí ral-la' gunli'. Guzë ládxi'li' le ruá' dö'. Guzúdxili'. Gudödi bë' gú'i gudáguli', en guyéaj ládxi'li' budó' guiöj budó' yaga, le rigútinë' Dios.

⁴ Na'a, tu'bánnë' bönni' tunë' caní tu' cabirö runli' tsözxön légaquië' cate' tunë' le ruá' dö' caní, en que lë ni na' tu'tsaga yúdxinë' libí'ili'.

⁵ Légaquië' run bayudxi ulu'lu'i cúngaquië' lahuë' Dios, ate' Lë' chizóa uchi'a usöröë' nupa nabángaca, en nupa chinátigaca.

⁶ Que lë ni na' guca libán que didza' dxi'a lógaca nupa chinátigaca, nupa na' Dios buchi'a busöröë' léguequi cate' ni' gula'cuá' yödzülió ni, ca na' ruch'i'a rusöröë' yúgu'të bönachi. Guca libán lóguequi para ila'cuá' lu yöl-la' na'bán lu bö' náca'gaca caz, ca na' zoa cazë' Dios lu yöl-la' na'bán.

⁷ Chizóa idxín dza údxi que yúgu'të le dë. Que lë ni na', guli'gaca ba'a ladxí', en buli'subán ládxi'li' para gaca ulídzali'-në' Dios.

⁸ Tu' runtë bayudxi, guli'dxi'i luzá'ali' tuli' ia'tuli', ate' channö dzágali' lu yöl-la' nadxí'i, gácali' sina' uniti loli' yugu' luzá'ali' tua' dö' queëli'.

⁹ Guli'gú'i lataj ila'cuá' böchi' luzá'ali' lúdxili', en biti' innëli' queégaquië'.

¹⁰ Ral-la' ugunli' dxí'ado' dxin yugu' le buzá' ládxië'ë Dios queëli', en gácalenli' luzá'ali' tuli' ia'tuli'.

¹¹ Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatica'sö queë' Dios yöl-la' ba, en yöl-la' unná bë'! ¡Ca' gaca!

Le ila'gu'i ila'zaca' bönachi ta'yéajlë' Cristo

¹² Böchi' luzá'ado', biti' ubánili' tu' nözi le ta'zi' bë'da' libí'ili'. Biti' naca tu le cabí núnbë'gaca bönachi.

¹³ Guli'dzéjadë'e tu' dë lataj queëli' gunli'-në' tsözxön Cristo lu le riguí'i rizáqué'ë Lë' ni'a que bönachi queë' para gaca udzëjali' ca' dza na' huödë' Cristo, cate' ilé'eli' yöl-la' zxon queë'.

¹⁴ Channö tu'dzaga yudxi bönachi libí'ili' tu' dá'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za' yehua' yubá. Bönachi yödzülió ni tu'dzaga yudxi Lë', pero libí'ili' runli'-në' bal.

¹⁵ Channö riguí'i rizáqué'ë nu bönni' dzáguië' libí'ili', ral-la' gaca caní tu' dë'ë Cristo, en calëga tu' rútië' bönachi, o ribanë', o ru'ë dö', o tu' yöjgútsë'ë ga yúbölö.

¹⁶ Na'a, channö núlöli' riguí'i rizáca'li' tu' dá'ali' Cristo, biti' ral-la' utuí'ili', pero guli'cu'ë Dios yöl-la' ba tu' nazí lali' bönachi queë' Cristo.

¹⁷ Chibidxín dza isí lahuë' Dios uchi'a usöröë' bönachi rö queë'. Channö zí'aló uchi'a usöröë' rë'u, ¿nácxitëro gaca queéga nupa biti' túngaca ca rnna didza' dxi'a queë' Dios?

¹⁸ Channö naca böniga ulu'lágaca nupa tun le naca dxi'a, ¿nácxitëro gaca queéga nupa ta'dá'baga' Dios, en tun dul-la'?

¹⁹ Caní naca, yugu' bönni' ni ta'guí'i ta'zaquë'ë tu' rë'ënë' Dios gaca caní, ral-la' ilúntica'së' le naca tsahui', en ulu'dödë' bö' nácagaca cazë' lu në'ë Dios, tu' ben cazë' Lë' légaquië', en runë' ca rnna xtídzë'ë.

5

Pedro ruzéajni'inë' nupa ta'yéajlë' Cristo

¹ Na'a, ruzéajni'ida' libí'ili', bönni' gula tapa chí'ili' nupa néquiquequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí'i guzáquë'ë Cristo, ate' guna' ca' tsözxön libí'ili', uzí'iru' xibé yöl-la' zxön na' ilá' lahui.

² Guli'gaca ca bönni' tu'yúë' bö'cu' zxila', gun chí'ili' bönnachi na' Dios gulu'ë lu ná'ali'. Guli'gún caní idú ládxi'li' ca rë'ënë' Dios, en calëga tu' run bayudxi queë'li', o tu' rizë ládxi'li' dumí. Guli'gún xichinli' tu rë'ënisili',

³ en calëga tu' rë'ënilí' inná bé'esili' nupa na' nagu'ë lu ná'ali'. Guli'gúf' ládxi'li' gácali' tu le ruluí' ca ral-la' ilaca nupa na' run chí'ili'.

⁴ Caní naca, cate' uluí' lahuë' Cristo, bönni' lo uyú bö'cu' zxila', idéli'li' tu le uzí'ili' xibé le catu caz initi.

⁵ Lë'sca' caní, bi'i cuidí', guli'gún ca ta'nnë' yugu' bönni' gula. Yúgu'tëli' ral-la' gunli' bal luzá'ali', tuli' ia'tuli', lu yöl-la' nöxaj ladxí' queë'li', tu' nazúaj lu guichi lá'ayi le rnna:

Dios ruzáguë'ë xinözguequi nupa tun ba zxön cuínguequi pero rácalenë' nupa nácagaca nöxaj ladxí'.

⁶ Guli'sóa nöxaj ladxí' lu në'ë Dios, ate' Lë' uchisë' libí'ili' cate' izá'a dza.

⁷ Guli'cú'u yúgu'të le run ga ruúbi ruguí'ili' lu në'ë Dios, tu' ruí'i ládxi'ë libí'ili'.

⁸ Guli'gaca ba'a ladxí', en buli'subán ládxi'li', tu' zoa tu' xihui', nu bití' rilé'e libí'ili' dxi'a, ridá idú gásibi'ilö, en naca ca tuba' bëdxi guixi' ribödxi'aba', riguiljba' nu gáguba'.

⁹ Guli'gaca tsutsu ca réajlë'ëli' Cristo, en guli'zága' xinöza tu' xihui', tu' nözili' ta'guí'i ta'záquë'ë böchi' luzá'ali' idútë yödzölió ni ca na' riguí'i rizáca'li' libí'ili'.

¹⁰ Ní'irö cate' chigudí'i guzáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë' cazë' Dios ruzá' ládxi'ë queëru' yúgu'të le ruzí'iru' xibé, en bulidzë' rë'u para uzí'iru' xibé yöl-la' zxön queë' le zoática'sö tu' nácaru' tuz len Jesucristo.

¹¹ ¡Gácatca'sö yöl-la' ba, en yöl-la' unná bë' queë' Lë'! ¡Ca' gaca!

Pedro ruzenë' didza' nupa ta'dá' Cristo

¹² Dídza'do' ni ruzúaja' queë'li' lu guichi lu në'ë Silvano. Réquida' náquië' böchi'ru' idú ladxí'. Rë'ënda' utipa' ládxi'li', en runa' ba nalí loli', le nácatë lë ni naca le ruzá' ládxi'ë queëru' Dios. ¡Guli'gaca tsutsu tu' ruzí'ili' xibé lë ni!

¹³ Yugu' bönnachi queë' Cristo nacua' Babilonia tu'gapa Dios libí'ili'. Dios gurö cazë' léguequi ca na' guröë' libí'ili'. Lë'sca' bi'i Marcos rugápabi' Dios libí'ili'. Nácabi' ca xzí'ini caza'.

¹⁴ Guli'gapa Dios luzá'ali' tuli' ia'tuli', en lu yöl-la' nadxf'i queë'li' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxi'do'oli', yúgu'tëli' na' néquili' queë' Jesucristo. ¡Ca' gaca!

DÍDZA'DO' BUROPI BUZÚAJË' PEDRO

Pedro rugapë' Dios nupa ta'dá' Cristo

¹ Neda', Simón Pedro, naca' huen dxin queë' Jesucristo, en gubáz nasöl-lë'ë Lë'. Rugapa' Dios libí'ili', réajlë'ëli'-në' Jesús. Lëbisö ca nazáca'gaca yöl-la' réajlë' queëli' Lë', en yöl-la' réajlë' queëtu' Lë'. Dios benë' ga réajlë'ëli' Lë' tu' naca cazë' tsahui', en tu' náquië' ca' Xanru' Jesucristo, Nu na' rusölá rë'u, tsahui'.

² Rinábida'-në' Dios gunë' ga gata' queëli' idütë le ruzá' ládxë'ë queëru', en gunë' ga soa dxi icja ládxi'do'oli' tu' núnbë'ëli'-në' Dios, enca' Xanru' Jesús.

Le nácagaca nupa ta'yéajlë' Cristo

³ Lu yöl-la' huáca zxön queë', Dios chibennë' queëru' yúgu'të le riquíniru' para gata' queëru' yöl-la' na'bán idú, en para gácaru' ba'a ladxi', tu' núnbë'ëru' Nu na' bulídza rë'u para gata' queëru' yöl-la' zxön queë', en le naca tsahui' queë'.

⁴ Tu' runë' caní, benë' ga gaca uzí'iru' xibé yugu' le zxön, en le naca tsahui' guzxi' lu në'ë gunnë' queëru', ate' tu' naca caní nuláru' lu le ruá' dö' raca yödžolió ni tu' ta'zë ládxi'gaca bönachi le cabí naca tsahui'. Nuláru' para gácaru' ca náquië' Lë cazë' Dios.

⁵ Que lë ni na':

Channö réajlë'ëli' Cristo,
guli'güi' ládxi'li' gácali' dxi'i ladxi'.

Channö chinácali' dxi'i ladxi',
guli'güi' ládxi'li' gata' ca' queëli' yöl-la' rácada'.

⁶ Channö nápalí' yöl-la' rácada',
guli'güi' ládxi'li' inná be'e cuinli'.

Channö rinná be'e cuinli',
guli'cöza zxön ladxi'.

Channö ribózali' zxön ladxi',
guli'sóa ba'a ladxi'.

⁷ Channö zóali' ba'a ladxi',
guli'dxi'i luzá'ali'.

Channö nadxi'ili' luzá'ali',
guli'dxi'i ca' yúgu'të bönachi.

⁸ Channö caní runli', en zeaj rárarö idú ca runli' caní, lë ni gun ga bití' gaca nítisö yöl-la' réajlë' queëli' Lë', ate' tseaj gácarö idú ca núnbë'ëli'-në' Xanru' Jesucristo.

⁹ Nu bönni' bití' ruí' ládxë'ë gunë' caní, náquië' ca tu bönni' nachul-la nanítie', tu' chizá' ral-la ládxë'ë bunë' Cristo lë' tsahui', en bugüë' yugu' dul-la' gubáguë'ë zí'atëlö.

¹⁰ Que lë ni na', böchi' luzá'ado', ral-la' güi'itëro ládxi'li' guéquibe'eli' bulidzë' Dios libí'ili', en gurö cazë' libí'ili'. Channö gunli' caní, bití' ca' ichixi iníguili'.

¹¹ Caní gaca, idú ládxë'ë Dios gúnnašë' queëli' lataj tsázali' ga inná bë'tica'së' Xanru' Jesucristo, Nu rusölá rë'u.

¹² Que lë ni na' gúntica'sa' ga tsöjnéli' yugu' lë ni sal-la' chinöz quézili' le, en rugunli' dxin le naca idütë li na' chiguzxi' lu ná'ali'.

13 Runi neda' ral-la' usubana' ládxi'li' ca nácagaca lë ni tsanni ni zoa' nabana'.

14 Ral-la' guna' caní tu' nözda' si' gátia'. Xanru' Jesucristo chigudxi cazë neda' gaca caní quia'.

15 Que lë ni na' ruí'ida' ládxa'a guna' ga tsöjnética'sili' yugu' lë ni tödi gátia'.

Nupa bila'lé'e yöl-la' zxön queë' Cristo

16 Biti' bëlentu' libí'ili' tu' didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bë' zxön. Netu' bilé'e quézitu' yöl-la' zxön queë'.

17 Bilé'etu' Lë' cate' Xúziru' Dios benë' Lë' bal, en bë'ë Lë' yöl-la' zxön, ate' biyön chi'ë Dios, le birúaj lataj bení' queë', cate' gunné': "Bönni' ni náquië' Zxí'ina'. Nadxí'ida' Lë', en raza ládxa'a Lë'."

18 Netu' biyön quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

19 Lë na' guca, naca bë'da' zeaj nácaté didza' gulu'ë yugu' bönni' uláz queë' Dios, ate' ral-la' gü'i ládxi'li' didza' na', tu' naca ca tu guí' ruzeni' tu ga naca chul-la ga idxintë dza uzení' lu icja ládxi'do'oli' Nu na' naca ca bölj hui sila queëru'.

20 Lë ni runda' bayudxi tséajni'ili': Cuntu nu bönni', rácasö queë' biti' gaca tséajni'inë' didza' bë'ë tu bönni' uláz queë' Dios.

21 Yugu' didza' gulu'ë yugu' bönni' uláz queë' Dios biti' ca' gulu'ë tu gulë'ëni quézinë', pero gulu'ë didza' uláz queë' Dios le guchízië' Dios Bö' Lá'ayi icja ládxi'do'gaquië'.

2

Ca nácagaca nupa tu'sédinë' le cabí nácaté

1 Yugu' bönni' ta'zi' yë'ë gula'cuá'lenë' bönachi Israel, en gula'nnë' nácagaquië' bönni' tu'ë didza' uláz queë' Dios. Lësca' caní yugu' bönni' ila'zi' yë'ë ila'cuá'lenë' libí'ili', en ulu'sédinë' libí'ili' le cabí nácaté. Lu yöl-la' sina' quégaquië' ulu'sédinë' libí'ili' xibá quégacasë' le gun ga soa bönadxi queëli' uca'anali' le naca idütë li. Ila'dá'baguë'ë ca' Xanru', Nu busölá rë'u. Le ilunë' gun ga usunítie' Dios légaquië'.

2 Zianli' libí'ili' gunli' légaquië' tsözoxön lu le ruá' dö' ilunë', ate' tu' gunli' bál-lal' caní ila'nnë' xihui' bönachi que didza' dxi'a le naca idütë li.

3 Lu yöl-la' ruhuidi' quégaquië' ulu'sédinë' libí'ili' le cabí nácaté, para gata' quégaquië' dumí queëli'. Chinarugu quégaquië' bönni' ni, ate' naca löza ila'nítie' tsaz.

4 Dios biti' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië' du guíë ga naca chul-la na', ga na' ta'bözë' dza usiúdxë' Dios légaquië'.

5 Lësca' caní, biti' buniti lahuë' bönachi gula'cuá' dza ni'te cate' gusöl-lë'ë nisa guiöj le busuniti yödzo'lió le beti bönachi nácagaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queë' Noé na' lu nisa.

6 Lësca' caní, Dios guchúguie' quégaca bönachi gula'cuá' yödzo' Sodoma, en yödzo' Gomorra. Busunítie' léguequi lu guí', ate' bulu'huóaca dö. Le guca quéguequi naca tu le rulu'i le run gadxi nupa tua' dö'.

7 Cate' busunítie' yugu' yödzo' na', Dios busölë' Lot, tu bönni' tsahui', lu guí' na'. Buí'nida' ládxe'ë Lot cate' bilé'enë' le xihui' gulún bönachi tuá' dö' na'.

8 Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxë'ë yúgu'të dza ni'a que yugu' le cabí naca tsahui' gulúngaca.

9 Caní naca, Xanru' nözinë' usölë' nupa na' tadxí Lë' lu na' nu run ga tsázagaca bönachi nöza dul-la', pero nucözë' xíguia' gunë' nupa bití' nácacaca tsahui' ga idxinrö dza ichúguië' quéguequi ila'niti tsaz.

10 Ichúguda'arö quégaquië' bönni' ni tunë' yugu' le ta'zë ládxë'ë le ruá' dö', en ta'dá'baguië' yöl-la' unná bë' queë' Xanru'. Nácacaguië' rugu ladxí', en zidi ladxí'. Bití' tádxinë' tu'lidza ditjë' gubáz lá'ayi ta'dë' lu bení'.

11 Gubáz lá'ayi na' nápagacatërë' yöl-la' unná bë', en yöl-la' huáca ca yugu' bönni' na', pero gubáz lá'ayi na' bití' tu'huázxjanë' nu ulu'zéguië' didza' lahuë' Xanru'.

12 Yugu' bönni' ni nácacaguië' ca böa' guixi', bití' bi ta'yéajni'iba', pero náljagacaba' para nu sön légacaba', en guti légacaba'. Ta'nnë' xihuë'ë que le cabí ta'yéajni'inë', ate' ila'nítië' tsaz ca raca quégacaba' böa' guixi' na'.

13 Dios ubi'ë quégaquië' le ila'guf'i ila'záquë'ë, tu' bulu'saca' zi'ë bönachi. Téquinë' naca xibágaquië' tu'zi'ë xibé le raca na'a dza. Nácacaguië' ca tu huë' nudzu', en tu le run ditaj cate' ni' tahuë' tsózxön len libí'ili', ate' tu'dzéjanë' tu' ta'z'í yé'enë' libí'ili'.

14 Lu yöl-la' rizë ladxí' quégaquië' le ruá' dö' tu'yúë'-nu yugu' nigula. Bití' nacu'ë dxisö túngaquië' dul-la'. Túngaquië' ga ta'chixi ta'nigui nupa bití' nácacaca tsutsu ca ta'yéajlë' Cristo. Ta'guljatica'së' yugu' le tu'huídi'në'. Dios chinuchúguië' quégaquië' ilátigaquië'.

15 Bulu'cá'anë' le naca idütë' li, ate' nachul-la nanítigaquië'. Tunë' ca benë' Balaam, xzí'inë' Beor, bönni' ni' bidxí'inë' dumí, ate' benë' le ruá' dö' tu' nazxjë'.

16 Dios buzenë' le bach Balaam na' tu' benë' le ruá' dö' na'. Tuba' búrrodo' bë'lenba' lë' didza' ca na' tu'í didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'bagá' queë'.

17 Nácacaguië' bönni' ni ca tu buduá' chibuí'i nisa que, enca' ca tu böaj le richë' bö' budunu'. Chinabá'a xilátjagaquië' lataj chul-la.

18 Caní nácacaguië' tu' tu'ë didza' yugu' le zxön lu yöl-la' bití' bi nözi quégaquië', en tu'gunë' dxin yugu' le ta'zë ládxí'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácacaca chul-la niti.

19 Të' bönachi ila'deli' yöl-la' rusólá, pero légaca cazë' nadzúngaquië', en tunë' bayudxi le ruá' dö'. Nadzúngaquië' yúgu'të bönni' lu na' bi rinná be'e icja ládxí'do'gaquië'.

20 Channö bulu'lë' lu le cabí naca tsahui' nacuá' yödzülió ni tu' gulúnbë'ë Xanru' Jesucristo, Nu rusólá rë'u, ate' ní'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácatë nabága'gacatërë' xíguia' ga røjsetë ca le gula'báguë'ë zí'aló.

21 Dxi'arö gaca quégaquië' la'tu' catu caz ilúnbë'ë Nu ruzóa rë'u nöza tsahui' ca le gaca quégaquië' channö gulúnbë'ë Lë', ate' ní'irö bulu'cá'anë' xibá lá'ayi bë'ë Dios quégaquië'.

22 Chibudxín quégaquië' didza' na' rnna:

Ruhuécjaba' bö'cu', ruhuóáguba' le si' gúbaba'.

Ruyázaba' cuchi na' si' gudíbiru'-ba' lu guna'.

3

Naca löza huödë' Xanru'

¹ Didza' ni naca le buropi ruzúaja' queëli' lu guichi, böchi' luzá'ado'. Lu irópatë guichi na' ruí'i ládxa'a usubana' ládxi'li' ca náacagaca lë ni.

² Guli'tsojné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsojné ca' xibá na' Xanru', Nu rusölá rë'u, gunná bé'enë' rë'u, lë na' bulu'sédinë' bönni' gubáz nasöl-lë'ë Lë' libí'ili'.

³ Ral-la' tsójnéli' lë ni naca lo. Dza tsöjsétëgaca ulu'lu'i lahuë' bönni' ilunë' le ta'zë ládxe'ë le ruá' dö'.

⁴ Ulu'titjë', ila'nnë': "¿Gazxi caz lë na' guzxi' lu në'ë Cristo? Gunnë': Huöda' leyübölö. Dza ni'te cate' gulatië' xuz xtó'oru', yúgu'të raca tuz ca guca cate' gusí lo rata' yödzülió ga ridxintë na'a dza."

⁵ Tu'zöë' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'lö nisa.

⁶ Len nisa ca' busunítië' Dios yödzülió dza ni'te cate' ni' gusöl-lë'ë nisa guiöj le beti' yugu' bönachi dul-la'.

⁷ Lúzxiba, en yödzülió ni le nacua' na'a dza, Dios nucu'ë léguequi ga idxinrö dza usunítië' léguequi lu guí'. Caní gaca tu' gunné' caní Dios caz. Uzéguie' léguequi dza ni' ichúguie' quégaca bönachi bití' náacagaca tsahui' gátigaca.

⁸ Biti' gal-la ládxi'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz náacagaca queë' ca tu dza.

⁹ Biti' ridzenë' Xanru' gunë' le guzxi' lu në'ë gunë'. Téquiguequi bal-la bönachi ridzenë', pero ribözë' zxon ladxí, en ruá' rilenë' rë'u tu' cabí rë'ënë' initi nitú bönachi, pero rë'ënë' ulu'bi' ládxi'gaca yúgu'të bönachi.

¹⁰ Tsáldo'os idxín dza huödë' Xanru' ca ridxinë' tu bönni' gubán chi'i dzó'ölö. Lu dza na' huadödi que lúzxiba len tu bö zxon. Ila'niti yúgu'të le nacua' lu guí' zxon. Ila'yegui yödzülió ni, en le nacua' yödzülió ni.

¹¹ Channö caní gaca, ila'niti yúgu'të lë ni, ¿bizxi caz ral-la' gunli'? Ral-la' gácali' ba'a ladxí, en udódi cuinli' lu në'ë Dios.

¹² Ral-la' cózali' dza huödë' Xanru', en güi'i ládxi'li' gunli' ga idxinrö bayön dza ni' cate' initi lúzxiba, ate' ila'niti yúgu'të le nacua' ni lu guí'.

¹³ Caní gaca, pero rë'u ribözaru' le guzxi' lu në'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

¹⁴ Que lë ni na', böchi' luzá'ado', tsanni ni ribözali' yugu' lë ni, guli'güi' ládxi'li' gácali' idú tsahui' lahuë' Dios, ate' gunli' ga cuntu nu bi gaca innë queëli', en cózali' dxí'ado' cate' idxinrö dza ni'.

¹⁵ Ral-la' inözili' ribözë' Dios zxon ladxí' para gata' quégaca bönachi lataj ulu'lágaca, ca na' gunné' ca' böchi'ru' Pablo. Buzúajë' queëli' lu guichi, zóalen lë' yöl-la' réajni'i na' bë'ë Xanru' queë'.

¹⁶ Yúgu'të lu guichi ruzúajë', ru'ë didza' ca náacagaca lë ni, sal-la' nútsa'gaca ca' léguequi yugu' didza' náacagaca böniga tséajni'iru'. Yugu' didza' caní tu'chixinë' bönni' bití' nözguequinë', en bönni' bití' naca idú ládxi'gaquië'. Lësca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

¹⁷ Chinöz quézili' lë ni, böchi' luzá'ado'. Que lë ni na' guli'gún chi'i cuinli', para cabí ila'z' ye'e bönachi bití' náacagaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo.

¹⁸ Guli'güi' lãdxi'li' gácarö idú ca núnbë'ëli'-në' Xanru' Jesucristo, Nu rusölä rë'u, ate' ruzí'ili' xibě'. ¡Yöl-la' ba Lë' na'a dza, en yúgu'të dza zá'gaca! ¡Ca' gaca!

DÍDZA'DO' ZÍ'ALÖ BUZÚAJË' JUAN

Didza' nabániru'

¹ Rusiyöntu' libí'ili' ca naca queë' Bönni' na' zoa cazë' dza ni'te, le biyöñitu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' LË'. Bönni' ni náquië' Jesús, lë' ca' Didza' Nabánigaca Bönachi.

² Bönni' na' nabánigaca bönachi bulufí' lahuë', ate' bilé'etu' LË'. Runtu' ba nali' queë', en rulu'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibudulu'í' lahuë' ga zóaru'.

³ Le bilé'etu', en le biyöñitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios.

⁴ Ruzúajtu' queëli' lu guichi lë ni para gaca udzéjaru' idú ládxu'ru'.

Dios náquië' bení'

⁵ Lë ni naca didza' biyöñitu' bë'lenë' Jesús netu', ate' le rusiyöntu' libí'ili'. Caní rna: Dios náquië' bení', ate' nitú le naca chul-la que dul-la' biti' zóalen LË'.

⁶ Channö innaru': "Nácaru' tuz len Dios", pero channö runru' le naca chul-la que dul-la', lë ni naca bë' rizí' yë'ëru', en biti' runru' le naca idútë li.

⁷ Na'a, channö runru' le naca tsahui', en ridaru' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxi'a, en rugúa yúgu'të dul-la' nabágaru'.

⁸ Channö rnaru': "Biti' bi dul-la' runru'", rizí' yé'ëru' la' cuínsiru', en biti' nazi' lu ná'aru' le naca idútë li.

⁹ Channö ixóalëpiru' lahuë' Dios dul-la' nabágaru', Lë' runë' ca rnnë', en náquië' tsahui'. Uniti lahuë' dul-la' nabágaru', en únë' rë'u tsahui', ugúë' yúgu'të le ruá' dö' dzaga rë'u.

¹⁰ Channö innaru': "Biti' bi dul-la' nabágaru'", naca ca innaru': "Dios rizí' yë'ë", ate' biti' runru' ca rna xtídzë'ë.

2

Cristo náquië' Nu rudödi xtídzaru' lahuë' Dios

¹ Libí'ili', zxi'ina'do', ruzúaja' queëli' lu guichi lë ni, para cabí gunli' dul-la'. Na'a, channö nútí'tës nu gun dul-la', zoa nu rudödi xtídzaru' lahuë' Dios Xuz, Lë' Jesucristo, Nu naca tsahui'.

² Naca cazë' Bönni' budödi cuinë', en gútië' para bugúë' dul-la' nabágaru' lahuë' Dios. Calégasö gútië' para bugúë' dul-la' nabágaru' rë'u, pero gútië' ca' para bugúë' dul-la' nabágaru' gaca bönachi idútë yödölió.

³ Channö runru' ca naca le gunná bé'enë' rë'u, nöziru' chinúnbë'ëru' Lë'.

⁴ Nu rna: "Neda' núnbë'a-në' Dios" pero biti' run ca rinná bë' xibá queë', nu ni rizí' yë', en biti' run le naca idútë li.

⁵ Nu run ca rna xtídzë'ë Dios, le nácatë nadxí'i nu ni Dios ca ral-la' gun. Channö runru' caní, nöziru' néquiru' queë' Dios.

⁶ Lë'sca' caní, nu rna: "Neda' néquida' queë' Cristo", ral-la' gaca nu na' ca na' gúquië' Cristo cate' gudë' yödölió ni.

Tu xibá cubi

⁷ Böchi' luzá'ado', ruzúaja' queéli' lu guichi xibá ni. Biti' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyónili' dza ni'te.

⁸ Lësca' naca ca ruzúaja' queéli' lu guichi tu xibá cubi, lë na' le nácatë benë' Jesús ca rnna, ate' runli' ca' libí'ili' ca rnna, tu' cheridödi que le naca chul-la que dul-la', ate' bení' idú chiruzení'.

⁹ Nu rnna: "Zoa' lu bení'", pero bití' rilé'e dxi'a böchi' luzé'e, nu ni ni run le naca chul-la que dul-la'.

¹⁰ Nu nadxí'i böchi' luzé'e zoa lu bení', ate' le run ga nu ichixi inigui bití' zóalen nu na'.

¹¹ Le naca chul-la que dul-la' run ga nu bití' rilé'e dxi'a böchi' luzé'e, en ga ridá nu na' ga chul-la. Bití' nözi ga zeaj, tu' run le naca chul-la na' ga nachul-la naniti nu na'.

¹² Ruzúaja' queéli' lu guichi, xzí'ina'do', tu' chibunít lahuë' Dios dul-la' nabága'li', tu' runë' le guzxi' lu në'ë gunë'.

¹³ Ruzúaja' queéli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queéli' lu guichi, bi'i ra'bán, tu' chibucúl-lali' tu' xihui'.

¹⁴ Chibuzúaja' queéli' lu guichi, xzí'ina'do', tu' núnbë'ëli'-në' Dios Xuz. Chibuzúaja' queéli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Chibuzúaja' queéli' lu guichi, bi'i ra'bán, tu' nácali' bi'i nál-la, en nazí' lu ná'ali' xtídzë'ë Dios, en chibucúl-lali' tu' xihui'.

¹⁵ Bití' idxí'isili' yódzölió ni, en calëga le dë yódzölió ni. Channö zoa nu nadxí'i yódzölió, bití' nadxí'i Dios Xuz.

¹⁶ Caní naca, tu' naca le tun bönachi yódzölió ni le cabí rë'ënë' Dios Xuz, pero naca le të'ëni bönachi yódzölió ni.

Tunë' le riyaza ladxi' yöl-la' bönáchisö quégaquië'.

Tunë' le ruá' dö' le ridani guiöj lógaquië'.

Tun ba zxon cuíngaquië' ni'a que le dë quégaquië'.

Caní náca gaca le ruá' dö' tunë'.

¹⁷ Huadödi que yódzölió ni, enca' que le ta'zë lädxi'gaca bönachi, pero nu run ca rë'ënë' Dios sóatica'sö.

Nu ru'i didza' idütë li, en nu rizí' yë'

¹⁸ Xzí'ina'do', chizóaru' dza údxi, en ca na' chibiyónili' huidë' bönni' ridá'baguë'ë Cristo, lësca' na'a chigusí lo nacu'ë zían bönni' ta'dá'baguë'ë Cristo. Que lë ni na' nöziru' chizóaru' dza údxi.

¹⁹ Bila'ruájë' bönni' caní ládjaru', pero bití' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Na'a, bila'ruájë' para gaca bé' bití' náca gacié' yúgu'të' tuz len rë'u.

²⁰ Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'të'.

²¹ Buzúaja' queéli' lu guichi, tu' chinözili' le naca idütë li, en calëga tu' cabí nözili' le. Nözili' ca' bití' ca' rizí' yë' nu nözi le naca idütë li.

²² ¿Nuzxi caz na' nu rizí' yë'? ¿Naru' cabí naca nu na' ridá'baga' náquië' Jesús Nu gusöl-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzë' Jesús, en ridá'baguë'ë ca' náquië' Jesús Xzí'inë' Dios.

²³ Núti'tës nu ridá'baga' Dios Xzí'ini, bití' ca' zóalenë' Dios Xuz nu na'. Núti'tës nu rnna yálajdo' Jesús náquië' Xzí'inë' Dios, lësca' zóalenë' Dios Xuz nu na'.

24 Na'a, guli'güi' lataj le biyönili' dza ni'te ugá'analentica'sö libí'ili'. Channö le biyönili' dza ni'te ugá'analentica'sö libí'ili', læsca' libí'ili' ugá'analentica'sili'-në' Dios Zxi'ini, enca' len Dios Xuz.

25 Le guzxi' lu në'ë Dios naca læ ni: Gunnë' gunnë' yöl-la' na'bán idú queëru'.

26 Chibuzúaja' queëli' lu guichi læ ni ca naca quegaca nupa ta'zi' ye'e libí'ili'.

27 Na'a, zóalenë' Dios Bô' Lá'ayi libí'ili'. Cristo gusöl-lë'ë Lë' queëli', ate' Lë cazë' zóalentic'a'së' libí'ili'. Que læ ni na' biti' riquinili' nu usedi libí'ili', tu' chizóalen Nu na' libí'ili', en rusedi libí'ili'. Didza' idútë li ru'ë Lë', en biti' rizí' yë'ë. Ca na' chinazédali', guli'sóalentic'a'së' Cristo.

28 Na'a, zxi'ina'do', guli'sóalentic'a'së' Cristo para cate' ulufi lahuë' Lë', gácaru' rugu ladxi', en biti' utuí'iru' sóaru' lahuë' Lë' cate' huödë'.

29 Channö nözili' náquië' Dios tsahui', ral-la' inözili' ca' yúgu'të nupa tun le naca tsahui' nácacaga zxi'inë' Dios.

3

Nupa nácacaga zxi'inë' Dios

1 Buli'yú ca nadxi'ide'enë' Dios Xuz rë'u, benë' ga nazí'i laru' zxi'inë' Dios caz. Que læ ni na' bönachi yödzülió ni biti' ca' núnbë'gaca le nácaru', tu' cabí gulúnbe'e Jesús.

2 Böchi' luzá'ado', na'a chinácaru' zxi'inë' Dios, en biti' naca bé'eni le ral-la' gácaru'. Nöziru' cate' uluí'i lahuë' Jesús, gácaru' ca náquië' Lë', ate' ilé'eru'-në' catëz náquië' Lë'.

3 Núti'tës nu run löza gaca ca náquië' Jesús, ruí'i ladxi' nu na' gaca dxi'a ca na' náquië' Jesús dxi'a.

4 Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá.

5 Nözili' buluí'i lahuë' Jesús para bugüë' dul-la' nabága'ru', en biti' bi dul-la' runë' Lë'.

6 Núti'tës nu dzaga Lë' biti' run dul-la'. Núti'tës nu run dul-la' catu caz bilé'e Jesús, en biti' núnbë'e Lë'.

7 Zxi'ina'do', guli'gún chi' cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'.

8 Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que læ ni na' budulufi' lahuë' Zxi'inë' Dios, para usunitië' yugu' le nun tu' xihui'.

9 Núti'tës nu naca zxi'inë' Dios biti' rúntica'sö dul-la', tu' zóalentic'a'sö le guzxi' lu në'ë Dios Xuz nu na'.

10 Caní naca bë' nupa nácacaga zxi'inë' Dios, en nupa nácacaga zxi'ini tu' xihui'. Núti'tës nu biti' run le naca tsahui', en biti' nadxi'i böchi' luzë'e biti' nequi queë' Dios.

Ral-la' idxi'iru' yugu' böchi'ru' ta'yéajlë'ë Cristo

11 Lë ni naca didza' biyönili' dza ni'te, le rnna: Ral-la' idxi'iru' luzá'aru' turu' ia'turu'.

12 Biti' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

13 Böcha'ado', biti' ubánili' channö cabí ta'lé'e bönachi yödzülió ni libí'ili' dxi'a.

14 Nöziru' chigudódiru' lu yöl-la' guti, en chidë yöl-la' na'bán idú queëru' tu' nadxi'iru' yugu' böchi'ru'. Nu biti' nadxi'i böchi' luzë'e, chinati caz nu na'.

15 Núti'tës nu bití' rilé'e dxi'a böchi' luzé'e, naca huëti bönachi nu na', ate' nözili' nu ruti bönachi bití' dë yöl-la' na'bán idú que.

16 Caní núnbë'ëru' yöl-la' nadxí'i le naca idú. Naca ca budödë' Jesús yöl-la' na'bán queë', en gútië' uláz queëru'. Lësca' caní rë'u ral-la' udödiru' yöl-la' na'bán queëru', para gácalenru' yugu' böchi'ru'.

17 Na'a, núti'tës nu dë yöl-la' tsahui' que, lë na' dë yödzölió ni, ate' rilé'e böchi' luzé'e, bi riyadzaj queë', en bití' ruhuéchi' ladxí' lë', bi unödzej queë', ¿naru' nadxí'itsö nu na' Dios?

18 Libí'ili', zxi'ina'do', ral-la' idxí'iru' luzá'aru', calëga len dídza'sö o lu yöl-la' rinnësö queëru', pero idú ladxí'ru', enca' len idútë yöl-la' run queëru' ral-la' idxí'iru' luzá'aru'.

Le runru' löza lahuë' Dios

19-20 Channö caní nadxí'iru' yugu' böchi' luzá'aru', nöziru' néquiru' que Nu na' naca idútë li, ate' lahuë' Dios huáca cö' dxi icja ladxí'do'oru' channö ruxösa ladxí'do'oru' rë'u, tu' rácada'arë' Dios ca ladxí'do'oru', ate' Lë' nözinë' yügu'të.

21 Böchi' luzá'ado', channö cabí ruxösa ladxí'do'oru' rë'u, dë le runru' löza lahuë' Dios

22 tu' nöziru' gunnë' queëru' bití'tës bi inábaru' lahuë'. Caní naca, tu' runru' ca rinná bë' xibá queë', en le raza ladxë'ë Lë'.

23 Lë ni naca xibá queë', para tséajlë'ëru'-në' Jesucristo, Zxi'inë' Dios, en idxí'iru' luzá'aru' ca na' chigunná bé'enë' rë'u.

24 Zóalen Dios nu run ca rinná bë' xibá queë', ate' Dios caz zóalenë' nu na'. Caní nöziru' dzágatica'së' Lë' rë'u, tu' chigusöl-lë'ë Dios Bö' Lá'ayi queëru'.

4

Le naca bë' zóalenë' Dios Bö' Lá'ayi rë'u

1 Böchi' luzá'ado', bití' tséajlë'ëli' núti'tës bönni' rnnë' zóalenë' Dios Bö' Lá'ayi lë', pero guli'sí' bë' bönni' na', channö zóalenë' Dios Bö' Lá'ayilë', tu' ta'dé' zían bönni' ta'zí' yë'ë yödzölió ni. Ta'nñë' tu'ë didza' uláz queë' Dios.

2 Caní gúnbë'ëli'-në' nu bönni' zóalenë' Dios Bö' Lá'ayi lë'. Nequi queë' Dios bönni' na' rnnë' yálajdo' ca bidë' Jesucristo, Nu gusöl-lë'ë Dios, rnnë' guca cazë' bönachi.

3 Lësca' caní, bití' nequi queë' Dios nu bönni' bití' rnnë' yalaj lulu ca bidë' Jesucristo, rnnë' bití' guca cazë' bönachi. Bönni' ni néquinë' que nu na' ridá'baga' Cristo, bönni' na' chibiyónili' ral-la' guidé', ate' na'a chiridë' yödzölió ni.

4 Zxi'ina'do', néquili' queë' Dios, en chibucúl-lali' nupa na' ta'zí' yë', tu' nárarö Nu na' zóalen libí'ili' yöl-la' huáca unná bë' ca nu na' ridá yödzölió ni.

5 Légaquië' nácaqaquië' bönachi yödzölió. Que lë ni na' tu'ë didza' que le naca que yödzölió, ate' bönachi yödzölió ni tu'zë nágagaca légaquië'.

6 Néquiru' rë'u queë' Dios. Nu nunbë' Dios ruzé nagui rë'u. Nu bití' nequi queë' Dios bití' ruzé nagui rë'u. Caní núnbë'ëru' nu na' yu'u le Bö' ruí'i didza' le naca idútë li, enca' nu na' yu'u le tu bö' rizí' yë'.

Náljalén Dios yöl-la' nadxí'i

7 Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' núti'tës nu nadxí'i luzé'e náljalén ca' Dios, en núnbe'e Dios.

8 Nu bití' nadxí'i luzé'e, bití' núnbe'e Dios, tu' náljalén Dios yöl-la' nadxí'i.

⁹ Caní bulu'e lahui Dios ca nadxí'inè' rë'u, gusól-lë'ë la's dui Zxí'ini cazë' yödžölió ni, para gata' yöl-la' na'bán idú queëru' ni'a queë' Lë'.

¹⁰ Caní naca bë' yöl-la' nadxí'i idú, calëga ca nadxí'iru'-në' Dios, pero ca na' Lë' bidxí'inè' rë'u, en gusól-lë'ë Zxí'ini cazë' para gútië', en caní bugúë' dul-la' nabága'ru'.

¹¹ Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'.

¹² Catu caz nu bilé'e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ládxi'ru'.

¹³ Nöziru' zóalenru'-në' Dios, ate' Lë' zóalenë' rë'u, tu' guchízië' Dios Bö' Lá'ayi rë'u.

¹⁴ Netu' bilé'etu' le benë' Dios Xuz, en runtu' ba nalí que. Lë' gusól-lë'ë Zxí'ini cazë' Nu rusölá bönachi yödžölió.

¹⁵ Nu bönni' rnnë' yálajido' náquië' Jesús Zxí'inè' Dios, Dios zóalen cazë' bönni' na', ate' lë' zóalenë' Dios.

¹⁶ Rë'u ni nöziru', en réajlë'ëru' nadxí'inè' Dios rë'u. Yöl-la' nadxí'i náljalën Dios, ate' nu bönni' nadxí'inè' luzë'ë, zóalenë' bönni' na' Dios, ate' Dios zóalenë' lë'.

¹⁷ Caní run dxin yöl-la' nadxí'i lu icja ládxi'do'oru', run ga bití'rö rádxiru' dza ichúguië' Dios quégaca bönachi ilátigaca. Ca náquië' Jesús, nácaru' ca' rë'u yödžölió ni.

¹⁸ Channö nadxí'iru'-në' Dios, bití' bi gádxiru'. Cate' nadxí'iru'-në' Dios idú ládxi'ru', runë' ga bití' rádxiru'. Nu radxi, rigufí' rizáca'a. Nu na' radxi, bití' nadxí'i Dios idú ládxi'.

¹⁹ Rë'u ni nadxí'iru'-në' Dios, tu' zí'alö bidxí'i quëzinë' Lë' rë'u.

²⁰ Channö nu inná: "Neda' nadxí'ida'-në' Dios", pero bití' rilé'e dxi'a böchi' luzë'e, nu ni rizí' yë'. Nu bití' nadxí'i böchi' luzë'e nu rilé'e caz, çnacxi caz gaca idxí'i Dios, en catu caz bilé'e Lë'?

²¹ Caní gunná bé'enë' Jesús rë'u. Gunnë': Nu nadxí'i Dios, ral-la' idxí'i ca' böchi' luzë'e.

5

Ca gaca idéli'ru' lu le raca queëru' yödžölió ni

¹ Núti'tës bönni' réajlë'ë Jesús náquië' Cristo, náquië' zxí'inè' Dios, ate' núti'tës bönni' nadxí'inè' Dios Nu buzóa lë', ral-la' idxí'inè' ca' luzë'ë nu naca bi'i queë' Dios.

² Caní réquibe'eru' nadxí'iru' yugu' bi'i queë' Dios. Naca caní channö nadxí'iru'-në' Dios, en runru' ca rinná bé'enë' rë'u.

³ Caní naca bë' nadxí'iru'-në' Dios. Naca caní channö runru' ca rinná bé'enë' rë'u, ate' lë' na' rinná bé'enë' rë'u bití' naca böniga.

⁴ Núti'tës bönni' náquië' bi'i queë' Dios ridéli'në' lu le raca yödžölió ni. Chibidéli'ru' lu le raca yödžölió tu' réajlë'ëru'-në' Dios.

⁵ ÇNuzxi na' rideli' lu le raca yödžölió? Run caní nu réajlë' náquië' Jesús Zxí'inè' Dios.

Dios Bö' Lá'ayi runë' ba nalí queë' Cristo

⁶ Caní blë'ë Jesucristo. Bidë' bidilë' nisa, en bulaljë' xichönë'. Calëgasö bidilë' nisa, pero lësca' bulaljë' xichönë'. Dios Bö' Lá'ayi náquië' Nu run ba nalí queë', tu' naca idútë' li didza' ru'ë Dios Bö' Lá'ayi.

⁷ Tsonna nupa tun ba nalí queë' Jesús yehua' yubá ni', Dios Xuz, en Dios Zxí'ini, lë' ca' Didza', en Dios Bö' Lá'ayi. Yonnë' ni nácaquië' tuz.

⁸ Lësca' caní, tsonna le tun ba nali' queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná.

⁹ Channö si' lu ná'aru' le tun ba nali' bönachi, le runë' ba nali' Dios nácatëro lesaca'. Lë na' benë' ba nali' Dios naca le benë' ba nali' queë' Jesús, gunnë' náquië' Zxí'ini cazë'.

¹⁰ Nu réajlë' Zxí'inë' Dios, nazí' lu në'e le nunë' ba nali' Dios. Nu cabí réajlë' Dios, naca ca rnna nu na': Dios rizí' yë'ë. Caní naca, tu' cabí guyéajlë' le benë' ba nali' Dios queë' Zxí'inë'.

¹¹ Lë ni naca le benë' ba nali' Dios. Gunnë' chibennë' yöl-la' na'bán idú queëru', ate' Zxí'inë' na' náquië' Nu nabániru' caní.

¹² Nu bönni' zóalenë' Zxí'inë' Dios lë', dë yöl-la' na'bán idú queë'. Nu bönni' bití' zóalenë' Zxí'inë' Dios lë', bití' dë yöl-la' na'bán idú queë'.

Ca nöziru' dë yöl-la' na'bán idú queëru'

¹³ Libí'ili' na' réajlë'ëli'-në' Zxí'inë' Dios, ruzúaja' queëli' lu guichi lë ni para inözili' chidë yöl-la' na'bán idú queëli', en para gaca idú ca réajlë'ëli'-në' Zxí'inë' Dios.

¹⁴ Lë ni naca le ruzxöni ládxi'ru' Lë'. Channö bi inábiru' Lë' ca rë'ënë' Lë', Lë' riyönnë' rë'u.

¹⁵ Channö nöziru' riyönnë' rë'u ca naca bi rinábiru' Lë', nöziru' ca' ideli' queziru' lë na' rinábaru'.

¹⁶ Channö ilé'ëru' böchi' luzá'aru' runë' dul-la' le cabí nachë' yöl-la' guti, ral-la' inábaru' queë' lahuë' Dios, ate' Lë' unödzejë' yöl-la' na'bán queë'. Caní rnníá': Ral-la' inábali' quégaca nupa tun dul-la' le cabí nachë' yöl-la' guti. Dë dul-la' le nachë' yöl-la' guti. Bití' rnníá' inábali' que nu run dul-la' caní.

¹⁷ Yúgu'të le cabí naca tsahui' naca dul-la', pero dë dul-la' le cabí nachë' yöl-la' guti.

¹⁸ Nöziru' bití' rúntica'sö dul-la' nu naca zxi'inë' Dios, tu' rapa chi'ë Zxí'ini cazë' Dios nu na', ate' tu' xihui' bití' sequí' bí gun que.

¹⁹ Nöziru' yú'uru' lu në'ë Dios, ate' yúgu'të bönachi tu'í ládxi'gaca le dë yödözölió ni yú'ugaca lu na' tu' xihui'.

²⁰ Na'a, nöziru' chibidë' Zxí'inë' Dios, en bennë' yöl-la' réajni'i queëru', para gúnbë'ëru' Nu na' naca idútë li. Zóalenru' Nu na' naca idútë li tu' zóalenru'-në' Jesucristo, Zxí'inë' Dios. Nu ni naca Dios idú, en Nu runna yöl-la' na'bán idú queëru'.

²¹ Zxí'ina'do', guli'gún chi'i cuinli' para cabí tseaj ládxi'li' yugu' budó' guiöj budó' yaga. ¡Ca' gaca!

DÍDZA'DO' BUROPI BUZÚAJĚ' JUAN

Núnbě'ëru' le naca idútë li, en yöl-la' nadxí'i

¹ Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxön len yúgu'të zxi'inu'. Nadxí'ida' libí'ili' tu' núnbě'ëru' le naca idútë li, en calégasö neda', pero lësca' yúgu'të nupa chinúnbě'gaca le naca idútë li ta'dxi'i libí'ili'.

² Nadxí'itu' libí'ili' tu' núnbě'ëru' le naca idútë li, le zóalenticasö rë'u.

³ Rinábida'-në' Dios Xuz, en Xanru' Jesucristo, Zxi'ini cazë' Dios, uzá' ládxe'ë queëli', en huéchi' ládxe'ë libí'ili', en gunë' ga soa dxi icja ládxi'do'oli' tu' núnbě'ëli' le naca idútë li, en nadxí'ili' luzá'ali'.

⁴ Budzëjade'eda' cate' biyönda' tunbi' zxi'inu' ca naca le naca idútë li, tu' tunbi' ca na' gunná bé'enë' Dios Xuz rë'u.

⁵ Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lëbisö lë na' gunná bé'enë' rë'u dza ni'te. Gunnë' ral-la' idxí'iru' luzá'aru'.

⁶ Caní naca bë' nadxí'iru'-në' Dios. Naca caní channö runru' ca rnna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyönili' dza ni'te.

Nupa të'ëni ila'z'i' ye'e rë'u

⁷ Lë ni riguíxjöi'ida' libí'ili', tu' chita'dá zían nupa ta'z'i' yë' yödzölió ni, nupa na' biti' ta'z'i' lu në'eguequi ca bidë' Jesucristo, gúquië' idú bönachi. Nu na' run caní, naca nu rizí' yë', en nu ridá'baga' Cristo.

⁸ Guli'gún chi'i cuinli' para cabí initi le nadéli'li' tu' guzxi' lu na'li' Cristo, pero guli'güü' ládxi'li' idéli'li' idútë le ral-la' sí'ili' lu në'ë Dios.

⁹ Núti'tës nu riguela' nöza yúbölö, en rucá'ana xtídzë'ë Cristo, biti' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxi'inë' nu na'.

¹⁰ Channö núti'tës nu za' ga zóali', en rusedi xibá yúbölö, biti' ulëbili' nu na' lídxili', en biti' guiëli' le: "Guyú'u len netu'."

¹¹ Nu rë le: "Guyú'u len netu'", run tsözxön nu na' ca naca le ruá' dö' run nu na'.

Runë' Juan löza idxinë' ga nacu'ë böchi' luzë'ë

¹² Sal-la' le zían ral-la' uzúaja' queëli' lu guichi, biti' rë'ënda' uzúaja' yúgu'të lu guichi. Runa' löza guída' ga zóali', ate' güi'iru' didza' ruá'a cuinru', para gaca udzëjaru' idú ládxi'ru'.

¹³ Zxi'ininu nigula zxilu', nigula rö queë' Dios, tu'gápabi' Dios li'. ¡Ca' gaca!

DÍDZA'DO' BUNNI BUZÚAJË' JUAN

Le naca tsahui' runë' bönni' lë' Gayo

¹ Neda', bönni' gula run chi'a bönachi queë' Cristo, rugapa' Dios li', Gayo dxi'i ladxi'. Nadxi'ida' li' tu' núnbë'ëru' le naca idútë li.

² Böcha'ado', rinábida'-në' Dios gunë' ga gaca dxi'a quiu' lu yúgu'të le runu', en su' ca' dxi'a, ca na' raca dxi'a que bö' naca cazu'.

³ Rudzėjada' tu' ta'dxinë' yugu' böchi'ru' ga zoa', en tunë' ba nalí quiu', ta'nnë' nacu' li ladxi', en runu' ca naca le naca idútë li.

⁴ Biti' bi dë le runrö ga rudzėjada' ca lë ni, riyönda' tun nupa náacagaca ca bi'i que caza' ca rnna le naca idútë li.

⁵ Böcha'ado', runu' le naca tsahui', rácalenu' böchi'ru', en runu' ca' le nácarö lesaca', rácalenu' böchi'ru' biti' núnbe'enu' légaquië'.

⁶ Yugu' böchi'ru' ni tunë' ba nalí quiu' lógaca bönachi queë' Cristo ni, ta'guíxjö'ë ca na' nadxi'ínu' légaquië'. Runu' le naca dxi'a, rugú'u légaquië' nöza, en rácalenu' légaquië' ca na' sa'yéaj gunu' quégaca nupa tun xichinë' Dios, para ulu'ú'ë nöza.

⁷ Légaquië' bila'rúajë' ni tu' nadxi'ígaquië' Jesús, en biti' bi ta'zi'ë lu ná'agaca bönachi biti' ta'dá' Cristo.

⁸ Que lë ni na' ral-la' gunru' bal bönachi tun caní, para gúnlenru' légaquië' dxin que le naca idútë li.

Le cabí naca tsahui' runë' Diótfrefes

⁹ Chibuzúaja' lu guichi le uzéajni'i bönachi queë' Cristo ni', pero Diótfrefes, bönni' ni' raza ládxë'ë gáquië' lo ládjagaquië', biti' runë' netu' bal.

¹⁰ Que lë ni na', channö huida' ga zóali, usá'a ládxi'li' cate' udúbili' ca náacagaca le runë'. Rizí' quídzë'ë netu', en rnnë' queëtu' le cabí nácatë. Biti' rizzön ládxë'ë tsa lë nisö, pero lësca' biti' runë' bal böchi'ru' ta'dxinë' ni', ate' ruzáguë'ë xinözguequi nupa ni' té'ëni ilún légaquië' bal, en rubéajë' nupa na' ladaj bönachi queë' Cristo.

¹¹ Böcha'ado', biti' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dö' catu caz bembë' Dios.

Le naca tsahui' runë' Demetrio

¹² Yúgu'të böchi'ru' tunë' ba nalí queë' Demetrio, ate' naca bë' runë' le naca idútë li. Lësca' netu' runtu' ba nalí queë', ate' nözili' nácatë lë ni runtu' ba nalí queë'.

Le rinabë' Juan lahuë' Dios

¹³ Ziánrö ca' le gú'unida' uzúaja' quiu' lu guichi, pero biti' rë'ënda' uzúaja' le lu guíchisö.

¹⁴ Na'a, runa' löza ilé'eteda' li', ate' güi'iru' didza' ruá'a cuinru'.

¹⁵ Rinábida'-në' Dios gunë' ga soa dxi icja ládxi'do'o. Nupa ni ta'dxi'i rë'u tu'gapa Dios li'. Lësca' li', bugapa Dios tu tu nupa ni' ta'dxi'i rë'u. ¡Ca' gaca!

DÍDZA'DO' BUZÚAJË' JUDAS

Judas rugapë' Dios nupa nulidzë' Dios

¹ Neda', Judas, tsaz naca' huen dxin queë' Jesucristo, en naca' ca' böchë'ë Jacobo. Rugapa' Dios libí'ili', nulidzë' Dios Xuz libí'ili', en nadxí'inë' libí'ili', en rapa chi'ë libí'ili' tu' nácali' tuz len Jesucristo.

² Rë'ënda' inözili' ca ruhuéchi'da' ládxë'ë Dios libí'ili', en nadxí'ide'enë' libí'ili', enca' ruzóadë'ë dxi icja ládxí'do'oli'.

Nupa tu' sedi le cabí nácatë

³ Libí'ili', böchi' luzá'ado', gúcada' ládxa'a uzúaja' queëli' lu guichi ca naca yöl-la' rusóla nadéli'ru', pero run bayudxi uchízia' icja nágali' para idú ládxí'li' tíl-lalenlí' nupa ta'dá'baga' le réajlë'ëru'-në' Dios, lë na' budödë' Dios tsaz lu ná'agaca nupa néquiguequi quez queë' para ulu'zë didza' que lógaca yúgu'të bönachi.

⁴ Caní run bayudxi guna' tu' bagáchi'sö chigula'yázalenë' bal-lë' bönni' rë'u, Dios buzóë' quégaquië' dza ni'te ichúguië' quégaquië' ila'nítië' tsaz. Biti' ta'yéaj ládxí'gaquië' Dios bönni' caní. Tu' zoa le ruzá' ládxë'ë Dios queëru', téquinë' huáca ilunë' le ruá' dö'. Ta'dá'baguë'ë Xanru' Jesucristo. Tuzë' Lë' rinná bé'enë' rë'u.

⁵ Chinöz quézili' lë ni, pero rë'ënda' usá'a ládxí'li' ca benë' Xanru' Dios. Sal-la' busölë' bönachi Israel cate' bubéajë' léguequi luyú Egipto, gudödi ni' busunitië' nupa bítsa'gaca ládjaguequi, en bití' gula'yéajlë' Lë'.

⁶ Lësca' caní, yugu' gubáz lá'ayi queë' Dios, nupa ni' bití' gulún xichíngaquië', pero bulu'cá'anë' xilátjagaquië', Dios busayjë' légaquië' tu lataj chul-la. Nága'gaquië' tsaz ni' ga idxinrö dza usiúdxë' Dios yödzólió ni.

⁷ Lësca' caní guca quégaca yödzö Sodoma, en yödzö Gomorra, enca' yugu' yödzö dzágagaca léguequi. Ca na' gulunë' gubáz lá'ayi na', gula'dá'baguë'ë Dios, lësca' caní gulunë' bönni' yugu' lu yödzö na'. Bulu'dödi cúngaquië' para gulunë' le ruá' dö', en le gula'zësö ládxí'gaquië' le tun ga nu rutu'i. Na'a, tu' busaca' zí'ë Dios légaquië' lu guí' le cabirö ulu, lë na' guca quégaquië' naca tu le run gadxi yúgu'tëru', para cabí gunru' la' lëbisö.

⁸ Sal-la' gulaca lë ni, la' canisö tunë' bönni' ni, bönni' röjácalenë' yëla ta'nënë'. Tun dí'tjanë' idütë le naca cazë'. Ta'dá'baguë'ë le rinná bé'enë' Dios rë'u, en ta'nnë' zí'ë quégaca nupa ta'nná bë' yehua' yubá.

⁹ Miguel caz, gubáz lá'ayi lo, cate' gudíl-lalenë' tu' xihui' para gaca u'ë idú le naca cazë' Moisés, bití' burúguinë' udxíë' dö' tu' xihui' na', pero gudxë' le: "Xanru' uzenë' li' bach."

¹⁰ Yugu' bönni' ni ta'nnë' zí'ë quégaca le runë' Dios, yugu' le bití' ta'yéajni'inë', ate' yugu' le ta'yéajni'inë' rácasö quégaquië' ca na' tunba' böa guixi' bití' ta'yéajni'iba', lë ni tu'gunë' dxin, en caní tu'dxía dö' cúngaquië'.

¹¹ Bica' bayechi' légaquië' tu' chigulunë' dul-la' ca na' benë' Caín, ate' lu yöl-la' ruhuidí' quégaquië' chigula'chixi gula'níguinë' ca na' guchixi guníguinë' Balaam para si'ë dumí, ate' chinarugu quégaquië' ilátië' ca na' gútië' Coré cate' gudá'baguië' Moisés.

¹² Yugu' bönni' ni tágulenë' tsözön libí'ili' cate' ráguli' yugu' güi' huagu lu yöl-la' nadxí' queëli'. Tunë' ga ta'chixi ta'nigui nupa dzágagaca libí'ili', tu' t'ë'aj

tagu lizë'. Nácagaquië' ca yugu' bönni' ral-la' ulu'gágugaquië'-ba' bö'cu' zxila', pero la' cuíngacasë' tu'gahuë'. Nácagaquië' ca böaj lúzxiba bití' nachë'gaca nisa, ate' ruá' bö' léguequi ná'alò ní'ilò. Nácagaquië' ca' ca yugu' yaga chibidxín dza bi ila'bía, pero bití' bi ta'bía. Nácagaquië' ca' ca yugu' yaga chigula'bidxi idú luí, en chinaládzu'gaca.

¹³ Nácagaquië' ca' ca nísado' cate' riyasa ridxía, ate' ribò' bidxina' que, lë na' rulu'í ca naca yöl-la' stu' tunë'. Nácagaquië' ca yugu' böljay lúzxiba nucá'anagacaba' xinözgacaba'. Dios chinunë' quégaquië' ila'yázië' tsaz lataj chul-la.

¹⁴ Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bönni' gubábalenë' le igadxi cò' zxi'ini xi'sóë' Adán. Gunnë': "Buli'yútsòca', zë'ë Xanru', ate' dzágagaca Lë' zían gayuá' bönachi néquiquequi quez queë'.

¹⁵ Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dò' ila'niti tsaz." Caní gunë' tu' nözi yúgu'të didza' zi' gula'nnë' bönni' dul-la' na' queë' Lë'.

¹⁶ Yugu' bönni' caní ta'nnë' queë', en ta'zí' quídzë', en tunë' ca naca le ta'zësò ládxi'gaquië'. Tu'ë didza' lu yöl-la' run ba zxon cuíngaqueië', en para ulu'zi'ë xibéguequi, tu'ë didza' le ta'gú'u bönachi yöl-la' zxon.

Judas rusë'ë ládxi'gaca nupa ta'yéajlë' Cristo

¹⁷ Na'a, böchi' luzá'ado', guli'sóajné yugu' didza' gulu'ë bönni' gubáz queë' Xanru' Jesucristo dza ni'te.

¹⁸ Yugu' bönni' na' gulë' libí'ili': "Yugu' dza tsöjsétégaca ulu'lu'í lógaquië' bönni' ulu'titjë' le naca lá'ayi, en ilunë' ca naca le ta'zësò ládxi'gaquië' le ruá' dò'."

¹⁹ Yugu' bönni' ni tunë' ga irúajli' choplö. Tu'ë didza' lu yöl-la' bönáchisö quégaquië', en bití' zóalenë' Dios Bö' Lá'ayi légaquië'.

²⁰ Na'a, böchi' luzá'ado', guli'sóca tsutsu lu yöl-la' réajlë' queëli' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi.

²¹ Buli'gá'analenë' Dios, Nu nadxí'i rë'u, en guli'còza dza ni' ulu'í lahuë' Xanru' Jesucristo, Nu ruhuéchi' ládxi'ë rë'u para gata' yöl-la' na'bán idú queëru'.

²² Guli'gún ga ila'dipa ládxi'gaca nupa raca chopá ládxi'gaca.

²³ Guli'gún ga ulu'lë', le gaca tsca ubéajli' légaquië' lu guí'. Lu yöl-la' radxi queëli' buli'huéchi' ládxi'li' ia'zíca'rö bönachi. Guli'gún chi'i cuinli', para cabí gunli' tsözxön légaquië', en cabí gútsa'li' le ruá' dò' tunë'.

Le rigú'uru' Dios yöl-la' zxon

²⁴⁻²⁵ Dios la's dui, Nu nözi caz yúgu'të, en Nu busólá rë'u ni'a que le benë' Xanru' Jesucristo, napë' yöl-la' huáca gun chi'ë libí'ili', para cabí ichixi iníguli', en usudxinë' libí'ili' lahuë' Lë' ga zoë' lu bení' idú. Gunë' ga gácali' idú tsahui', en ga udzëjadë'eli'. ¡Gaca caz queë' Dios yöl-la' ba, en yöl-la' zxon, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!

LE BULÚ'INĒ' DIOS JUAN Apocalipsis

Le bulu'e lahui Dios ca naca queë' Jesucristo

¹ Lë ni naca le bulu'e lahui Jesucristo, le bë'ë Lë' lataj Dios ulu'ínë' yugu' huen dxin queë' ca naca le run bayudxi ilácatë. Jesucristo gusól-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'ínë' neda' ca naca lë ni.

² Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nali que xtídzë'ë Dios, en que le benë' ba nali Jesucristo.

³ Bica' ba nu ulaba didza' ni, ate' bica' bágaca nupa ulu'zë' nágagaca nu na' ulaba xtídzë'ë Dios ni, en ilún ca rnna lë ni nazúaj lu guichi, tu' chizóa gaca.

Juan ruzúajë' le uzéajni'i gadxi cö' bönachi queë' Cristo

⁴ Neda', Juan, ruzúaja' lu guichi didza' ni le uzéajni'i gadxi cö' bönachi queë' Cristo nacua' luyú Asia. Dios, Bönni' zoa cazë', en guzóatica'së', en ral-la' huödë', rinábida-në' uzá' ládxë'ë queéli', en gunë' ga cö'ö dxi icja ládxi'do'oli', ate' dzágagaca gadxi bö' Lë' nacua' lahuë' Lë' ga ni' rö'ë rinná bë'ë.

⁵ Dzáguië' ca' Jesucristo Lë'. Jesús ni runë' ca rnnë', en runë' ba nali queë' Dios. Zí'alö Lë' bubanë' tsaz lu yöl-la' guti, en rinná bé'enë' bönni' ta'nná bë'ë yödzölió ni. Lë' nadxí'inë' rë'u, en gudibë' lë-la' tu' bugûë' dul-la' nabágaru' len xichönë' le bulaljë' lë'e yaga cruz, cate' gútië' uláz queëru'.

⁶ Jesucristo benë' ga rinná bë'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácatica'sö queë' yöl-la' unná bë'! ¡Ca' gaca!

⁷ ¡Buli'yútsöca'! ¡Zë'ë Cristo lu böaj lúzhiba! ¡Ila'lé'e Lë' yúgu'të bönachi, enca' nupa ni' gulún Lë' huë', en bétigaca Lë'! ¡Ila'bödxí yechi' yúgu'të bönachi yödzölió ni cate' ila'lé'e Lë'! ¡La'tu' gácatë caní! ¡Ca' gaca!

⁸ Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazë' yöl-la' huáca. ¡Zoa cazë' Lë', en guzóatica'së', en si' ulë'ë!

Rilé'enë' Juan yöl-la' zxön queë' Jesucristo

⁹ Neda', Juan, naca' böchi' luzá'ali', en tsözxön riguí' rizáca'lena' libí'ili', en tsözxön len libí'ili' ruzi'a xibë le rinná bë'ë Dios, en nadéli'da' yöl-la' riböza zxön ladxi' na' rnnë' Jesucristo queëru'. Nadzuna' tu luyú bidxi ni gatsaj láhui'lö nísado, nazí' i le Patmos. Nadzuna' tu' bena' libán que xtídzë'ë Dios, en tu' bena' ba nali queë' Jesucristo.

¹⁰ Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzu'la' chí'ë tu bönni' rulidzë' zidzaj. Biyön chí'ë ca ribödxí lúzuba' böa' bëdxí.

¹¹ Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusól-la' le quéguequi gadxi cö' bönachi quia' nacua' luyú Asia, nupa nacua':

Lu yödzö Éfeso,
lu yödzö Esmirna,
lu yödzö Pérgamo,

lu yödzo Tiatira,
 lu yödzo Sardis,
 lu yödzo Filadelfia,
 lu yödzo Laodicea.”

¹² Buécja’ para ilé’eda’ Bönni’ na’ rulidzè’ neda’. Cate’ buécja’, bilé’eda’ gadxi le nuá’gaca guí’ le néquiquequini oro.

¹³ Ladaj gadxi le nuá’gaca guí’ na’ bilé’eda’ tu Bönni’ riné’è ca tu bönni’. Nácué’ tu lari’ tunna le ridxín xini’è, en luchu’è nasíé’ tu le néquini oro.

¹⁴ Chiguíchido’os naca guitsa’ icjè’ ca naca zxila’ o ca riná’ bögui’, ate’ rëpi yösa bení’ guiöj lahué’ ca guí’.

¹⁵ Rëpi yösa bení’ ni’è ca guíé bronze dxílido’, le nudzé’eda’ lu guí’ ca bo’ yalaj. Zidzaj biyön chi’è ca riyön tu yegu zxön.

¹⁶ Lu në’è ibèla zxóagacaba’ gadxi böljaj bení’, ate’ rirúaj didza’ ru’è le naca ca tu guíé tuchi’ natuchi’ iropa la’a. Rëpi yösa bení’ lahué’ ca gubidza cate’ rudzá’a.

¹⁷ Cate’ bilé’eda’ Lè’ gudzö’a xini’è ca tu bönni’ nati. Ní’irö Lè’ guxóa në’è neda’ len në’è ibèla, en gudxè’ neda’: “Biti’ gádxinu’. Neda’ naca’ Bönni’ zoé’ zí’alö, en röjsétié’.

¹⁸ Naca’ Nu nabán caz. Gúti’a, ate’ na’a zóatíca’ sa’ nabana’. Dè lu na’a inná bé’eda’ yöl-la’ guti, en lataj ga nacua’ nupa nátigaca.

¹⁹ Buzúaj lu guichi lè na’ chibilé’enu’, en le raca na’a, enca’ le ral-la’ gaca tödi na’a.

²⁰ Lè ni naca le nagachi’ ca naca quégacaba’ gadxi böljaj bení’ na’ bilé’enu’ zxóagacaba’ lu na’a ibèla, en ca naca gadxi le nuá’gaca guí’ le néquiquequini oro. Gadxi böljaj bení’ na’ sa’yéajgacaba’ gadxi gubáz quégaca gadxi cö’ bönachi quia’, ate’ gadxi le nuá’gaca guí’ na’ sa’yéajgaca gadxi cö’ bönachi quia’ na’.”

2

Didza’ gusöl-lè’è yödzo Éfeso

¹ Gunné’ ca’ Bönni’ na’: “Buzúaj lu guichi didza’ ni isöl-lu’u queé’ gubáz quia’ zóalené’ bönachi quia’ lu yödzo Éfeso. Caní uzúaju’ lu guichi: Ru’è didza’ Bönni’ na’ zxóagacaba’ gadxi böljaj bení’ lu në’è ibèla, en ridé’ gatsaj láhuil’ö gadxi le nuá’gaca guí’ na’ néquiquequini oro.

² Caní rnní’a: Neda’ nöz quézida’ yugu’ le runli’, en ca rúnda’ali’ dxin. Nözda’ ribözali’ zxön ladxi’, en biti’ gaca guá’ ilenli’ nupa tua’ dö’. Nözda’ chiguzxí’ bë’èli’ nupa ta’nná nácagaca gubáz quia’ pero biti’ ca’ nácagaca, ate’ na’a nözili’ ta’zí’yè’.

³ Ribözali’ zxön ladxi’, en chigudí’i guxzaca’li’ tu’ dá’ali’ neda’, pero biti’ gucuidí’ ládxi’li’.

⁴ Na’a, dè tu le ruzegui libí’ili’ didza’: Bítirö nadxí’ili’ neda’ ca na’ bidxí’ili’ neda’ zí’alö.

⁵ Que lè ni na’, guli’tsojnë ca na’ benli’ zí’alö, lè na’ busanli’, ate’ na’a, buli’bí’i ládxi’li’, en guli’gún ca na’ benli’ zí’alö. Channö cabí ubí’i ládxi’li’, guídatia’ queéli’, ate’ ugúa’ le nuá’ guí’ queéli’ xilataj.

⁶ Na’a, zoa tu le rácalen libí’ili’. Biti’ rilé’eli’ dxi’a le tuné’ bönni’ nicolaíta, nupa na’ ta’yéaj ládxi’gaca budó’ guiöj budó’ yaga, en tun le ruá’ dö’, lè na’ lësca’ biti’ rilé’eda’ dxi’a.

⁷ Nu riyöni ral-la’ uzé’ nagui lè ni rnné’ Dios Bö’ Lá’ayi, ruí’ilené’ yugu’ cö’ bönachi quia’ neda’, Cristo, didza’, rnné’: Nupa ila’deli’ lu le raca yödzoilö,

guna' ga ilágugaca le ribía yaga da' gatsaj láchui'lö luyú lachi queë' Dios, le gun ga ila'cuá'tica'sö nabán."

Didza' gusöl-lë'ë yödzo Esmirna

⁸ Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquie' ca' Nu røjsete, Bönni' na' gútië', en bubanë' tsaz.

⁹ Caní rnnía': Neda' nöz quézida' le runli', en ca riguí' rizáca'li'. Nözda' nácali' yechi', pero le nácatë rilé'eli' yöl-la' tsahui' le naca idú. Nözda' ca' ca ta'nnë queëli' nupa ni' ta'nná nácacaga bönachi judío, pero biti' ca' nácacaga caní. Nupa ni ta'dá' Satanás, tu' xihui'.

¹⁰ Biti' ca' gádxili' le ral-la' quí' sáca'li'. Tu' xihui' na' gun ga idzunli' bál-lali' libí'ili' lidxi guié. Caní sí' bë' libí'ili', ate' quí' sáca'li' idú ca chi dza. Guli'tsajlë' neda' ga idxintë dza gátily', ate' neda' gunna' yöl-la' na'bán idú queëli'.

¹¹ Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' didza' yugu' cö' bönachi quia' neda', Cristo, rnnë': Nupa ila'deli' lu le raca yödzo'lió, biti' bi gun yöl-la' guti quéguequi, lë na' gaca le buropi luzuí quégaca nupa ila'cuá'tica'sö lu guí' gabila."

Didza' gusöl-lë'ë yödzo Pérgamo

¹² Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Pérgamo. Caní uzúaju' lu guichi: Ru'ë didza' Bönni' na' nu'ë guié tuchi' na' natuchi' iropa la'a.

¹³ Neda' nöz quézida' le runli'. Nözda' ca' zóali' ga ni rinná bë' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlë'ëli' neda'. Biti' busanli' le yugu' dza ni' cate' gulútië' Antipas, bönni' ni' béntica'së' ba nalí quia', en gútië' ga ni' zoa Satanás, tu' xihui'.

¹⁴ Na'a, dë tu chopa le tu'zegui libí'ili' didza': Nacuá'len libí'ili' bal-la bönachi lu yödzo Pérgamo, nazí' lu në'eguequi xibá queë' Balaam, bönni' ni' busédinë' Balac benë' ga gula'chixi gula'nigui bönachi Israel, ate' gulahuë'-ba' yugu' bôa' bëdxido' gulútigaquië'-ba' lógaca budó' guiöj budó' yaga, en gulunë' le ruá' dö'.

¹⁵ Lësca' caní nacua'len libí'ili' nupa ni' nazí' lu në'eguequi xibá quégaca bönachi nicolaíta, lë na' biti' rilé'eda' neda' dxí'a.

¹⁶ Que lë ni na', buli'bfí' ládxi'li' na'a. Channö cabí ubí' ládxi'li', guídatea' ga zóali', en til-lalena' légaquië' len didza' rirúaj ruá'a, le naca ca tu guié tuchi'.

¹⁷ Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzo'lió, guna' ga ilágugaca yöta maná nagachi'. Unödza' ca' tu guiöj chiguíchido' quégaquië', ate' lu guiöj na' nazúaj tu la cubi, cunttu nu nunbë' le, pero núpasö na' ila'zí'i le, ilünbë' e la na'."

Didza' gusöl-lë'ë yödzo Tiatira

¹⁸ Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guiöj lahuë' nácacaga ca guí', ate' ni'ë nácacaga ca guié bronce dxílido'.

19 Caní rnnë': Neda' nöz quézida' le runli'. Nözda' ca nadxf'ili' neda', en ca réajlé'ëli' neda'. Nözda' ca' ca runli' xichina' lu yöl-la' riböza zxon ladxi' queëli'. Nözda' nácarö idú ca runli' yugu' lë ni ca benli' z'älö.

20 Nacuá' tu chopa le tu'zegui libí'ili' didza': Ruí'ili'-nu lataj nigula na' lënu Jezebel, rnnanu ruí'inu didza' uláz queë' Dios, ate' ni'a que le rusédinu rizí' yé'enu bönni' tunë' xichina'. Rusédinu légaquië' le run ga tunë' le ruá' dö', en tahuë'-ba' böa' bédxido' ta'gu'ë légacaba' lógaca budó' guió' budó' yaga.

21 Neda' bë'a-nu lataj ubi'í ládxi'nu, pero biti' rë'ëninu ucá'ananu le ruá' dö' na' runnu.

22 Que lë ni na' chú'una'-nu tu le gátí'nu ga na' quí'í sáca'nu lu xihuë'ënu tsözxön len nupa gulún tsözxön len lënu le ruá' dö'. Caní guna' na'a channö cabí ulu'bí'í ládxi'guequi para cabirö ilún dul-la' na'.

23 Guna' ga ilátibi' zxf'ininu. Caní gaca, iléquibe'e yúgu'të cö' bönnachi quia' ruyúa' le ta'bequi ícaguequi, en le ta'zá' ládxi'gaca bönnachi, ate' ubi'a queëli' tsa naca le runli'.

24 Ia'zíca'li' zóali' yödzo Tiatira, núlöli' biti' nazi' lu ná'ali' lë na' rusédinu, en biti' nazëdali' lë na' ta'nná bönnachi ni' naca le nayéajni'í idú, pero le nácatë naca xtídza' Satanás, tu' xihui', rea' libí'ili': Biti' usubága'a libí'ili' ia'tú le ral-la' gunli'.

25 Na'a, lë na' chinazí' lu ná'ali', guli'gún chí'í ga idxintë dza huöda'.

26 Bönni' ni' ila'déli'në' lu le raca yödzoilió, en ilunë' ca rë'ënda' neda' ga údxitë, neda' guna' ga ila'nná bé'enë' bönnachi idútë yödzoilió.

27 Ca na' budödë' Xuza' Dios yöl-la' unná bë' lu na'a, neda' ca' guna' ga ila'nná bé'enë' yugu' yödzo, ate' gata' lu ná'agaquië' tu xiyaga guië, ate' ulu'zxuzxjë' bönnachi na' ca nu ruzxuzxaj zxiga' yó'öna néquini yu.

28 Gu'a ca' le naca ca bölaj hui sila quégaquië'.

29 Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' bönnachi quia' neda', Cristo, didza'."

3

Didza' gusöl-lë'ë yödzo Sardis

1 Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönnachi quia' lu yödzo Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' zxóagacaba' gadxi bölaj bení' lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquiguequi bönnachi zóali' nabanli'.

2 Buli'subán ládxi'li'. Guli'gún tsutsu le nacuá'len libí'ili', le chizóa ilátigaca, tu' réquibe'eda' le runli' biti' naca idú tsahui' lahuë' Dios.

3 Guli'tsöjnë na'a xibá na' biyönili' le guzxi' lu ná'ali'. Guli'gún ca rnna xtídze'ë Dios, en buli'bí'í ládxi'li'. Channö cabí usubán ládxi'li', guída' ga zóali' tsárido'os ca na' ridxinë' tsárido'os gubán, en biti' inözili' bizxi dza na' guída' ga zóali'.

4 Nacuá'len bal-la bönnachi libí'ili' lu yödzo Sardis, nupa biti' nácgaca xihui'. Ila'dalen nupa ni neda', nácgaca lari' chiguíchido'os le ruluí'í nuhuöácagaca idú tsahui', en nácgaca lesaca' gaca caní quéguequi.

5 Nupa ila'deli' lu le raca yödzoilió ugácu'a' léguequi lari' chiguíchido'os, en biti' usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahuë' Xuza' Dios, enca' lógaquië' gubáz lá'ayi queë'.

6 Nu riyöni ral-la' uzé nagui lé ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

Didza' gusöl-lë'ë yödzo Filadelfia

7 Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza' idútë li, en dë lu në'ë xzí'ini guié queë' David, bönni' gunná bë'ë. Bönni' na' ru'ë didza' risálajë' ga nu riyaza, ate' cuntu nu gaca usayaj le, en rusayjë' ga nu riyaza, ate' cuntu nu gaca isalaj le.

8 Bönni' ni rnnë': Neda' nöz quezida' le runli'. Nözda' náпали' láti'do'os yöl-la' huáca, pero runli' ca rnna xtída'a, en bití' rutuí'ili' rnnali' néquili' quia'. Que lé ni na' nuzó'a' loli' tu ga nu tsaz le nayalaj, ate' cuntu nu gaca usayaj le.

9 Buli'yútsöca', ta'dé' bönni' ni' Satanás, tu' xihui', en ta'z'í' yë'ë, ta'nnë' nácaquie' bönachi judío ta'yéaj ládxi'gaca Dios, pero bití' nácaquie' caní, guna' ga ila'dxinë' loli', en ulu'zechu xzíbigaquië' xinf'ali'. Ní'irö iléquibe'enë' nadxí'ida' libí'ili'.

10 Tu' benli' ca rnna xtída'a, en gulózali' xzön ladxi', gun chi'a libí'ili' dza na' ila'gu'i ila'zaca' yúgu'të bönachi lu yödzo'lió ni, lé na' gaca para sí' bë' léguequi.

11 ¡S'í' guída! Que lé ni na' guli'gún chi'i le náпали', para cabí gaca nu gun ga cabí sí'ili' lé na' ral-la' gunna' queéli'.

12 Núlöli' ni' idéla'li' lu le raca yödzo'lió, neda' guna' ga gácali' tsutsu ca nácaqaca ya'xzön, ate' sóali' yudo' ga na' zoë' Dios, en catu caza irúajli' ni'. Udá'a libí'ili' ca lé' Dios quia', enca' ca lé yödzo' queë' Dios le naca Jerusalén cubi, le huótaj irúaj yehua' yubá lu në'ë Dios. Lësca' udá'a libí'ili' La' cubi.

13 Nu riyöni ral-la' uzé nagui lé ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

Didza' gusöl-lë'ë yödzo Laodicea

14 Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Laodicea. Caní uzúaju' lu guichi: Ru'ë didza' Bönni' na' zoë' tsaz, Bönni' runë' ca rnnë', en ru'ë didza' idútë li ca runë' ba nalí, en náquië' ca' Bönni' na' gulén lu në'ë yúgu'të le benë' Dios.

15 Caní rnnë': Neda' nöz quezida' le runli'. Ca runli' naca ca nisa bití' naca ziaga, tu' cabí rucá'analí' tsaz neda', en bití' naca ca nisa zögui', tu' cabí dá'ali' neda' idú ládxi'li'. Dxi'arö gaca la' gácali' ca nisa ziaga o ca nisa zögui'.

16 Na'a, tu' nácali' ca nisa nati yúlasö, en bití' nácali' ca nisa ziaga, en bití' nácali' ca nisa zögui', chú'una' libí'ili' ca run nu ruhuébi nisa nati yula na'.

17 Libí'ili' rnnali' rilé'eli' yöl-la' tsahui' queéli', en raca dxi'a queéli', en bití' bi riyadzaj queéli', pero bití' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídisö!

18 Que lé ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yöl-la' tsahui' idú queéli'. Ral-la' gá'uli' ca' lari' chiguichi quia' le gáculi' para ígachi' yöl-la' xiguídidö queéli' le run ga nu rutuf'i. Ral-la' gá'uli' ca' quia' le gun ga ulu'huóca guió'j loli' para gaca ilé'eli' le naca quia'.

19 Neda' ruzeda' bach, en run zi'a yúgu'të nupa nadxí'ida' channö cabí tun le naca dxi'a. Que lé ni na', buli'bí'i ládxi'li', en guli'gún xichina' idú ládxi'li'.

²⁰ Buli'yútsöca', neda' caz zuína' ga nu riyaza, en rulidza'. Channö nütí'tës nu yöni chi'a, en isalaj quia', tsázia', en gágulena' nu na', ate' nu na' gágulen neda'.

²¹ Núlöli' idéli'li' lu le raca yödzölió, neda' guna' ga cõ'öli' tsözxón len neda' ga na' rö'a rinná bē'a, ca na' bené' ca' Xuza' quia' neda'. Bidéli'da' neda' lu le guca quia', ate' guró'lena' Xuza' tsözxón ga na' rö'è rinná bē'è.

²² Nu riyöni, ral-la' uzé nagui lē ni rnnē' Dios Bö' Lá'ayi, ruí'ilenē' didza' yugu' cõ' bõnachi quia' neda', Cristo."

4

Yöl-la' ba ta'gu'ë Dios yehua' yubá

¹ Gudödi gulaca yugu' lē ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'è bönni' na' biyönda' zí'aló, ate' bulidza zidzaj ca ribõdxi lúzuba' bõ'a bēdxi. Chi'ni bulidza neda', gunná: "Gudá xitsá'aló ni, ate' neda' uluí'ida' li' le run bayudxi ilaca tödi ni."

² La' ní'isõ guzóalenē' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'õ rinná bē', en bilé'eda' ca' Nu na' rö'õ lataj na'.

³ Rēpi yösa bení' Nu na' rö'õ lataj na', ca na' rēpi yösa bení' guiõj jaspe, en guiõj cornalina, yugu' guiõj nazáca'da'. Idú gásibi'iló lataj na' zoa biguita' le naca lachi ca naca guiõj esmeralda, le rēpida' yösa bení'.

⁴ Idú gásibi'iló lataj na' nacua' ca' ia'tapa uruá' lataj gapa ta'bõ' nupa ta'nná bē', ate' yugu' lataj na' rö'õgaquiē' tapa uru'ë bönni' gula, nácugaquiē' lari' chiguichido'os, en dxíagaca ícjagaquiē' le néquiguequini oro.

⁵ Ta'rúaj yösa, en guziú' rinné lu lataj lo ga ni' rö'õ Nu na', ate' bö zxón ru'u. Lahui' lo lataj na' tu'zeni' gadxi le ta'gú'u bení', le nácagaca gadxi bö' dzágagaca Dios.

⁶ Ca dödilö lahui lataj ni dē tu ca naca tu nísado' le rēpi yösa bení' ca guiõj jara.

Nacua' tapa nupa nabángaca cuiti lataj na', tsölá'a huéaj, ate' zían guiõj lógaca dxíagaca zaca' cúdzi'lõguequi, en lámhuilõguequi.

⁷ Tu nu nutsa' ladaj tapa ni nalá' ca nácaba' bēdxi guixi'. Nu na' buropi nalá' ca nácaba' bēdxi, ate' nu na' bunní nalá' lahui ca naca lo bönni', ate' nu budapi nalá' ca nácaba' bisía' ruzuba'.

⁸ Idápatē nupa ni, nacua' xopa xíligaca que queēguequi, ate' idá'alõguequi, en lē'elõguequi xíliguequi dxíada'gaca zían guiõj lõguequi. Rēla, en te ža biti' ta'cuá' dxisó, ta'nná:

¡Lá'ayi! ¡Lá'ayi! ¡Lá'ayi náquiē' Xanru' Dios!

¡Napa cazē' yöl-la' huáca!

¡Guzóa cazē' Lē', en zoa cazē', en chizóa ulé'!

⁹ Nupa na' nabángaca ta'gú'u yöl-la' ba Nu na' rö'õ rinná bē', en zóatica'sõ nabán. Tun bal Nu na', en tē Nu na': "Xclenu'." Bátati'tës tun idapa na' caní,

¹⁰ tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sõ, en tu'cu'ë le néquiguequini oro dxía ícjagaquiē' lahui' lo lataj ga ni' rö'õ rinná bē' Nu na', ta'nné:

¹¹ ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bē' tu' benu' yúgu'tē le dē!

¡Ca rē'eni quézinu' nacua', en gula'sí lo nacua'!

5

Tu guichi, en Bönni' náquië' Bõ'cu' Zxíla'do'

¹ Ní'irõ bilé'eda' tu guichi lu na' ibëla Nu na' r'õõ lataj lo. Guichi na' naca tu guichi nudubi, en dá'gaca didza' l'é'elõ, en láchuilõ. Naguela' guichi na' gadxi le nusáyajgaca le.

² Bilé'eda'-në' tuë' gubáz lá'ayi lo, ate' bë'ë zidzaj didza', gunné': "¿Nuzxi naca lesaca' uladzu' le naguéla'gaca guichi ni, en usalaj le?"

³ Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilõ luyú.

⁴ Ní'irõ gurõdxa' tu' cabí bidzõli nu naca lesaca' usalaj guichi na', en biti' bidzõli nu naca lesaca' ulaba le, en cuntu nu naca lesaca' uyú le.

⁵ Ní'irõ tuë' bönni' gula ni' gudxë' neda', gunné': "Biti' cõdxu'. Bönni' na' náquië' ca bëdxi guixi', en nabábalenë' zxi'ini xi'sóë' Judá, en náquië' ca' zxi'ini xi'sóë' David, chibidéli'në' lu yúgu'të le naca, en séqui'në' uládu'ë le naguéla'gaca guichi ni, en usalajë' le."

⁶ Ní'irõ bilé'eda'-në' Bönni' náquië' Bõ'cu' Zxíla'do', zuínë' lahui' lo lataj lo na' zoa gatsaj láchuilõ nupa na' nabángaca, en gatsaj láchuilë' ca' yugu' bönni' gula na'. Dxië' huë' ca naca que tu bõ'cu' zxíla' zoa nu bëti lëba' lahuë' Dios, nacua' gadxi lúzuba', en gadxi guiõj loba', le tu'lufi' ca nácgaca gadxi bõ' na' dzágagaca Dios, nasól-lë'ë léguequi iduté yõdzõliõ.

⁷ Gudõdë' Bönni' náquië' Bõ'cu' Zxíla'do', en gudëlë'ë guichi na' lu na' ibëla Nu na' r'õõ lataj lo na'.

⁸ Cate' chigudëlë'ë guichi na', bulu'zõa zxi'biguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bõ'cu' Zxíla'do'. Tu tuë' bönni' gula na' zõngaquië' le rul-la nazí'i le arpa, en nuá'agaquië' ca' yugu' zxi'ga'do' néquiguequini oro, yugu' le yúdzugaca yalaj, lë na' rulufi' yõl-la' rulidza Dios quegaca bõnachi queë'.

⁹ Tul-lë' tu le rul-la yõl-la' ba, le naca cubi, le rnna caní:

Nacu' lesaca' quél'u' guichi na',
 en uládu'u le naguéla'gaca le,
 tu' bë'u lataj yugu' bönni' gulútië' Li',
 ate' len xichõnu' bõá'uu' bõnachi para ilequi queë' Dios,
 nupa nácgaca bõnachi izá'a nacua' iduté yõdzõliõ,
 bõnachi tuí'i yúgu'të didza' yúbõlõ,
 en nabábagaca yúgu'të yõdzõ,
 en yúgu'të luyú nacua' iduté yõdzõliõ.

¹⁰ Benu' ga nácgacaquië' bönni' ta'nná bë'ë
 en ga nácgacaquië' bixúz queë' Dios queëru'.
 Benu' ga ta'nná bë'ë lu yu yõdzõliõ.

¹¹ Ní'irõ buyúa', en biyõnda' chí'igaquië' gubáz lá'ayi zían. Zían gáyü'ë, en gáyü'ë nacu'ë. Nacu'ë idú gásibi'ilõ lataj lo na' tsõzxõn len nupa na' nabángaca, enca' yugu' bönni' gula na'.

¹² Tu'ë zidzaj didza' yúgu'të', ta'nnë':
 ¡Bönni' na' náquië' Bõ'cu' Zxíla'do' gulútië',
 náquië' lesaca' gata' yõl-la' unná bë' lu në'ë,
 en yõl-la' tsahui', en yõl-la' réajni'i, en yõl-la' huáca!
 ¡Náquië' lesaca' gunru'-në' bal, en tseaj ládxi'ru' Lë',
 en cú'uru'-në' yõl-la' ba!

13 Ní'irō biyōnda' tul-la yúgu'tè le benè' Dios yehua' yubá, en lu yu yōdzōlió, en xzánilō luyú, en lu nísado'. Tul-la yúgu'tè le nacua' yugu' lataj na', ta'nná: jYöl-la' ba Nu na' rō'ō lataj lo, enca' Bōnni' na' náquiè' Bō'cu' Zxíla'do'! jGúntica'siru'-nè' bal en cú'utica'siru'-nè' yöl-la' ba, ate' inná bè'tica'sè' Lè'!

14 Idápatè nupa na' nabángaca ta'nná: “jCa' gaca!”

Ní'irō idapa uru'è bōnni' gula na' bulu'tsaga lógaquiè' lu yu, en gula'yéaj lādxi'gaquiè' Nu na' zóatica'sō.

6

Yugu' le naguela' gaca guichi

1 Ní'irō bilé'eda'-nè' Bōnni' náquiè' Bō'cu' Zxíla'do', ate' buládu'è tu le naguela' guichi na', ate' biyōnda' tu nu nutsa' ladaj idapa na' nabángaca, ate' biyōn chí'i ca guziú' rinnè, gunná: “jGudá uyú!”

2 Buyúa', en bilé'eda'-ba' tuba' bōa' chiguichi, ate' nu na' dxía lēba' zōn tu uxiti' yaga. Gulu'è lē' tu le néquini oro udxíè' icjè', ate' birúajè' ca tu nu nácatèrō lo para idéli'nè' lu gudíl-la.

3 Cate' buládu'è le buropi le naguela' guichi na', biyōnda' nu buropi na' nabán, ate' gunná: “jGudá uyú!”

4 Ní'irō birúajba' ia'tuba' bōa', nácaba' xiná. Bulu'dödè' lu nē'e nu na' dxía lēba' yöl-la' huáca unná bè' tsōjtúa yöl-la' ribōza dxi'a tsáhui'do' quégaca bōnachi, en gun ga iluti luzé'eguequi. Bulu'nōdzjè' queè' tu guíé tuchi' zxon.

5 Cate' buládu'è le bunni le naguela' guichi na', biyōnda' nu bunni na' nabán, ate' gunná: “jGudá uyú!”

Buyúa', en bilé'eda'-ba' tuba' bōa' gasaj, ate' nu na' dxía lēba' zōn tu zxigóns.

6 Biyōnda' ruí'i didza' tu chí'i gatsaj láhui'lō tapa na' nabángaca, ate' gunná: “Chopa guíé xzoa' xtila len lazxaj que tu dza huen dxin tu' gaca gubín, en xopa guíé xzoa' cebada len lazxaj que tu dza huen dxin, pero biti' gunu' ga yadzaj le naca za, en biti' bi' gunu' que xisi uva nal-la.”

7 Cate' buládu'è le budapi le naguela' guichi na', biyōnda' ruí'i didza' nu budapi na' nabán, ate' gunná: “jGudá uyú!”

8 Buyúa', en bilé'eda'-ba' tuba' bōa' gulaj, ate' nu na' dxía lēba' nazí'i le Yöl-la' Gutí, ate' zéajlen nu na' nu nazí'i le Lataj Chul-la. Bulu'dödè' lu nē'e nu na' inná be'e gatsaj tu gatsaj bōnachi nacua' yōdzōlió para guti léguequi len guíé tuchi', en len yöl-la' ridún, en len yugu' yōdzōhué', en len yugu' bōa' guixi' sínia' dzō'ōba' luyú.

9 Cate' buládu'è le guyu' le naguela' guichi na', bilé'eda' zxan bucugu yehua' yubá ni' yugu' bō' gulaca cazè' bōnni' ni' gulútiè' légaquiè' tu' gulunè' libán que xtídzè'è Dios, en tu' gulunè' ba nalí queé'.

10 Gululú'i zidzaj didza' yugu' bō' ni, gula'nná: “jXantu' Lá'ayi, runu' ca rno'! ¿Bátaxi caz uchi'a usorōu' queétu', en uzí'i lēbu' yugu' bōnni' nacu'è yōdzōlió tu' gulútiè' netu'?”

11 Bulu'nōdzjè' quéguequi yugu' lari' chiguíchido'os ilácué', en gulé' léguequi: “Ral-la' uzí' lādxi'li' ia'tú chí'ido'osō, ga idxinrō dza ila'dxin yúgu'tè luzá'ali' huen dxin queé' Cristo ni, yugu' bōnni' na' ral-la' iluti bōnachi légaquiè' ca' ca na' bétigaca libí'ili'.”

¹² Cate' buládu'ë le buzxopi le naguela' guichi na', buyúa', en bilé'eda' gudödida' budó' zxu' luyú. Bôáca gasaj gubidza, en guca ca tu lari' guitsa' gasaj, ate' bôáca beo' xiná ca naca rôn.

¹³ Gula'guinnaj bôlaj lúzxiba lu yu, le guca ca raca que yaga higo, cate' ta'guinnaj le ribía cate' rutá le bô' budunu'.

¹⁴ Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'të guí'ado', enca' yúgu'të gapa zoa luyú bidxi lu nísado'.

¹⁵ Ní'irö yugu' bönni' ta'nná bē'ë luyú, en yugu' bönni' lo, en yugu' bönni' ta'lé'enē' yöl-la' tsahui', en yugu' bönni' ta'nná bé'enē' bönni' rōjáquiē' gudilla, en yugu' bönni' dē lu ná'agaquiē', en yúgu'të nupa nadó'ogaca, en yúgu'të nupa biti' nadó'ogaca bulu'cachi' lógaquiē' gapa naca zxan bulóaj, en gapa naca lē'e guiōj lu guí'ado'.

¹⁶ Gulē' yugu' guí'ado' na', en yugu' lē'e guiōj na': "Guli'dubága' netu', en buli'cachi' netu', para cabí ilé'e Nu na' rō'ō lataj lo ni' netu', en para cabí ideli' yöl-la' rilé queē' Bönni' na' náquiē' Bō'cu' Zxíla'do' netu'.

¹⁷ Chibidxin dza ulu'i lahui yöl-la' rilé quegaquiē', ate' ¿nuzxi caz sequi' guá' ilén le?"

7

Tu gayuá' yu' tapa-un milē' bönni'

¹ Gudödi gulaca yugu' lē ni bilé'eda' tapa gubáz lá'ayi zuíguequinē' idapa la'a yödžolió. Tu'záguē'ë xinözgaca idapa bō' recja tsólá'a huéaj luyú, para cabí tsecja bō' luyú yödžolió, en para cabí tsecja lu nísado', en para cabí utá yaga.

² Bilé'eda' ca' ia'tuē' gubáz lá'ayi zē'ë rirúajē' ga rilén gubidza. Nu'ë tu le udē'ë nupa nácaaga queē' Dios ban le gaca bē' léguequi. Bē'ë zidzaj didza', en bulidzē' idapē' gubáz lá'ayi ni' nadödi lu ná'agaquiē' yöl-la' huáca unná bē' ilún dítjanē' luyú, en nísado'.

³ Gudxē' légaquiē': "Biti' gun dítjali' luyú, en nísado', en yugu' yaga cate' udá'arötu' tu le gaca bē' ra' xigágaquiē' bönni' huen dxin queē' Dios queēru'."

⁴ Biyönda' tsa nácaagaquiē' bönni' da' légaquiē' lē na' naca bē'. Nácaagaquiē' idú tu gayuá' yu' tapa-un milē' ladaj yúgu'të cō' xzí'ini xi'sóē' Israel.

⁵ Yugu' bönni' na' da' légaquiē' lē na' naca bē' nácaagaquiē':

Chinnu milē' di'a dza queē' Judá.

Chinnu milē' di'a dza queē' Rubén.

Chinnu milē' di'a dza queē' Gad.

⁶ Chinnu milē' di'a dza queē' Aser.

Chinnu milē' di'a dza queē' Neftalí.

Chinnu milē' di'a dza queē' Manasés.

⁷ Chinnu milē' di'a dza queē' Leví.

Chinnu milē' di'a dza queē' Isacar.

⁸ Chinnu milē' di'a dza queē' Zabulón.

Chinnu milē' di'a dza queē' José.

Chinnu milē' di'a dza queē' Benjamín.

Bönachi guízxi yu nácaagaca lari' chiguíchido'os

⁹ Gudödi guca lē ni buyúa', en bilé'egacada' bönachi zían, cuntu nu gaca ulaba léguequi. Nabábagaquiē' yúgu'të yödžö tuí' didza' yúbölö iduté yödžolió. Zuíguequinē' ca dödilö lahui lataj lo, ga na' rō'ë ca' Bönni' na' náquiē' Bō'cu' Zxíla'do', en nácaagaquiē' lari' chiguíchido'os, en zöngaquiē' zin.

¹⁰ Tu'ë zidzaj didza' yúgu'tè, ta'nnè:
 ¡Yöl-la' rusölá za' lu në'è Dios queëru', rö'è lataj lo ni,
 en za' ca' lu në'è Bönni' na' náquië' Bö'cu' Zxíla'do'!

¹¹ Zuíguequinè' yúgu'tè gubáz lá'ayi idú gásibi'ilò lataj lo na', enca' idú gásibi'ilò ga nacu'è bönni' gula, enca' idú gásibi'ilò ga nacu'á idapa na' nabángaca, ate' tu'tsaga lógaquië' lu yu ca dödilò lahui lataj lo na', en ta'yéaj ládxi'gaquië' Dios,

¹² ta'nnè:
 ¡Ca' gaca! ¡Yöl-la' ba Li', Dios queëtu'!
 ¡Napu' yöl-la' zxön, en yöl-la' réajni'!
 ¡Rëtu' Li': "Xclenu'", en runtu' Li' bal!
 ¡Napu' yöl-la' unná bë', en yöl-la' huáca!
 ¡Gácatica'sò caní quiu', Dios queëtu'!
 ¡Ca' gaca!

¹³ Ní'irö gunábinè' neda' tuë' bönni' gula na', gunnè': "¿Nupxi na' nácugaca lari' chiguichido'os, en gapxi bönni' légaquië'?"

¹⁴ Neda' gudxa' lé': "Xan, li' nöz quézinu'."

Lè' gudxè' neda': "Nupa ni gula'gu'i gula'záca'da'. Gula'guibè' lari' nácugaquië', en bulu'ún léguequi chiguichido'os len xichönè' Bönni' na' náquië' Bö'cu' Zxíla'do'.

¹⁵ Que lé ni na' nacu'è ca dödilò lahui lataj lo ga rö'è rinná bë'è Dios, en tunè' dxin lahuë' Lè' rëla, en tè dza lu yudo' queë'. Nu na' rö'ö lataj lo ni gun chi'i légaquië' tu' zóalentic'a'sò légaquië'.

¹⁶ Bítirö' ila'dunè', en bítirö' ila'bidxè' nisa, en bítirö' ila'yéguinë' gubidza, en bítirö' iléquinè' xilá

¹⁷ tu' uyüè' Bönni' na' náquië' Bö'cu' Zxíla'do' légaquië' ca nu uyú bö'cu' zxila'. Zoë' gatsaj láhui'lò lataj lo na'. Ichè'è légaquië' gapa ralaj nisa le ru'i yöl-la' na'bán, ate' Dios uzxië' lógaquië' nisa ta'bödxè'."

8

Le igadxi le naguela' guichi

¹ Cate' buládzü'è le igadxi le naguela' guichi na', gurö'ö dxi yehua' yubá idú gatsaj hora.

² Ní'irö bilé'egacada'-nè' gadxi gubáz lá'ayi na' zuíguequinè' lahuë' Dios, ate' bulu'dödè' lu ná'agaquië' gadxi lúzuba' böa' bëdxi.

³ Ní'irö bidè' ia'tué' gubáz lá'ayi, nu'è tu zxi'ga'do' néquini oro, en guzuínè' ra' bucugu yehua' yubá ni'. Gulú'udé'è yalaj lu në'è para ugutsè' le len yöl-la' rulidza Dios le gulún yúgu'tè bönachi queë' Cristo, en uzégui'è le lu bucugu na' néquini oro, le zoa lahui lo lataj lo na'.

⁴ Gurén dzön que yalaj na' zoa lu në'è gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rö'è Dios.

⁵ Ní'irö gubáz lá'ayi na' bulië' zxi'ga'do' na' len bo' yalaj dxía lu bucugu na', ate' gurú'unè' le luyú. Gunnè' guziú', ate' bö zidzaj biyön. Guyëpi yösa, en gudódi budó' zxu'.

Tu'cödxè' lúzuba' böa' bëdxi

⁶ Ní'irö igádxitè' gubáz lá'ayi na' zöngaquië' gadxi lúzuba' böa' bëdxi na' gula'cu'è sina' ulu'cödxè' léguequi.

⁷ Bucödxè' gubáz lá'ayi zí'alö lúzuba' böa' bëdxi, ate' gurö'ö guiöj bögui' yöla sunna, en guí nutsí'i rön, ate' bulu'huöxaj luyú. Guyegui tu cö' tsa tu tsonna

cō' le dē luyú ni, ate' guyegui ca' tu cō' tsa tu tsonna cō' yaga. Guyegui ca' yúgu'tē guixi' ya'a.

⁸ Bucōdxē' gubáz lá'ayi buropi na' lúzuba' bōa' bēdxi, ate' gubixi tu le naca ca tu guí' a zxōn régui lu nísado', ate' ia'látí'do'os ca gatsaj tu gatsaj nísado' na' bōáca rōn.

⁹ Guti tu cō' tsa tu tsonna cō' le nabángaca dzō'ō lu nisa zxōn na', ate' guca ditaj tu cō' tsa tu tsonna cō' le ta'dōdi lāhui'lō nisa na'.

¹⁰ Bucōdxē' gubáz lá'ayi bunni lúzuba' bōa' bēdxi, ate' bōxaj tu bōlaj lúzxiba, le régui ca tu guí' yōri gapa dē nisa yegu, enca' gapa ralaj nisa, ate' guca caní que ia'látí'do'os ca gatsaj tu gatsaj nisa na' rō'ō luyú.

¹¹ Bōlaj ni lēba' Ajenjo, le naca tu le silá', ate' bōáca silá' ia'látí'do'os ca gatsaj tu gatsaj nisa gapa na' dē nisa, en guca ca naca le silá' na', ate' gulati bōnachi zían ni'a que nisa na' bōáca silá'.

¹² Bucōdxē' gubáz lá'ayi budapi lúzuba' bōa' bēdxi, ate' bōáca chul-la ia'látí'do'os ca gatsaj tu gatsaj gubidza, en lēasca' caní guca que beo', ate' bōáca chul-la tu cō' tsa tu tsonna cō' bōlaj. Caní guca, bití' buzení' gubidza ia'látí'do'os ca gatsaj tu gatsaj dza, en bití' bulu'zeni' bōlaj, en beo' ia'látí'do'os ca gatsaj tu gatsaj réla.

¹³ Ní'irō buyúa', en biyōnda' ru'ē zidzaj didza' tuē' gubáz lá'ayi ridōdē' gatsaj lāhui'lō lúzxiba, en rnnē': "¡Bica' bayechi' libí'ili'! ¡Bica' bayechi' libí'ili'! ¡Bica' bayechi' libí'ili' zóali' luyú ni cate' ulu'cōdxē' ia'tsonnē' gubáz lá'ayi na' lúzuba' bōa' bēdxi!"

9

¹ Bucōdxē' gubáz lá'ayi guyu' lúzuba' bōa' bēdxi, ate' bilé'eda' nu naca ca tu bōlaj lúzxiba bōxaj luyú, ate' bulu'nōdzjē' nu na' zxi'ini guié que lataj chul-la.

² Gusaljē' lataj chul-la na', ate' gurén dzōn que lataj chul-la, le guca ca dzōn rirúraj ga tu zégui'ē bulá'do', ate' gula'chul-la gubidza, en lúzxiba ni'a que dzōn na'.

³ Lu dzōn na' bila'rúajba' bōchi'zu, yugu' le gula'zxóasiba' luyú, ate' Dios bē'ē légacaba' lataj iládu'ba' bōnachi ca tunba' xōjnō' dzō'ōba' luyú.

⁴ Gunná bé'enē' légacaba' bití' ilún dítjaba' guixi' rō'ō luyú, en bití' ilún dítjaba' yugu' le naca ya'a, en calēga yugu' yaga, pero gácasō iládu'ba' bōnachi na' bití' da' lē na' naca bē' nu nequi queē' Dios ra' xigágaquiē'.

⁵ Bití' bē'ē légacaba' lataj ilútiba' légaquiē', pero ulu'saca' zí'isiba' légaquiē' idú ca gayu' beo'. Riláda' ga tádu'ba' ca na' rilá ga rádu'ba' xōjnō'.

⁶ Yugu' dza na' ilē'ēnē' yugu' bōnni' iluti cuíngaquiē', pero bití' ila'zéqui'nē'. Ilē'ēninē' ilátie', pero ucuíta cuini yōl-la' guti.

⁷ Nalá'gacaba' bōchi'zu na' ca nácagacaba' bōa' nácagacaba' le néquiguequini guié, para tsójacaba' gudil-la. Dxíagaca ícagacaba' le nácagaca ca tu le néquini oro. Naca lógacaba' ca naca lógaca bōnachi.

⁸ Naca guítsa' ícagacaba' ca naca guítsa' ícjanu nigula. Nácagaca láyi'gacaba' ca nácagaca láyi'ba' bēdxi guixi'.

⁹ Nácagaca lúchú'ugacaba' le néquini guié. Ta'gú'u bō xíligacaba' ca na' ta'gú'u bō carreta ná'ayōjgacaba' bōa' ta'xíti'ba' lu gudil-la.

¹⁰ Nácagaca xibángacaba' ca naca xibángacaba' xōjnō', zoa lí'igacaba'. Lu xibángacaba' na' zoa le tu'dí'iniba', para ilunba' zí' bōnachi idú ca gayu' beo'.

¹¹ Zoa nu rinná be'e légacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

12 Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

13 Bucödxë' gubáz lá'ayi buzxopi lúzuba' böa' bëdxi, ate' biyönda' tu chi'i ruí'í didza' gatsaj láhul'lö tapa le náccagaca ca lúzuba' bëdxi dá'gaca tapa squin bucugu na' néquini oro, le ró'lahuë' Dios.

14 Chi'i ni ruí'ilen didza' gubáz lá'ayi buzxopi na' si' bucödxë' lúzuba' böa' bëdxi, en rnna: "Busedxi idápatë' gubáz xihui' na' nága'gaca ra' yegu Eufrates."

15 Ní'irö bulu'sedxë' tapa gubáz xihui' na', chinucözë' Dios léguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacua' yödzölió.

16 Biyönda' tsca náccagacuië' bönni' röjáquië' gudil-la dxíagacuië'-ba' böa', en dzágagacuië' tapa gubáz xihui' na'. Náccagacuië' idú chopa gayua' mil milë'.

17 Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'uguequi le naca guí'do'os, en ya'a ca lúzhiba, en gulaj. Náccagaca ícjagacaba' böa' na' ca ícjaba' bëdxi guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre.

18 Yugu' lë na' ta'rúaj ruá'agacaba' bëtigaca tu cö' tsa tu tsonna cö' bönachi nacua' luyú, lë na' náccagaca guí', en dzön, en lë na' ruzégui'da'.

19 Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' náccagaca xibángacaba' ca yugu' bëla zoa ícjagacaba' le tu'dí'iniba'.

20 Ia'zica'rö bönachi, nupa biti' gulati lu chopa ni tu'suniti, biti' bulu'bí'i ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guiöj budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca.

21 Biti' bulu'bí'i ládxi'guequi para cabirö iluti bönachi, en calëga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

10

Gubáz lá'ayi, nuá' lu në'ë tu guíchido'

1 Ní'irö bilé'eda'-në' ia'tué' gubáz lá'ayi nál-la, bö'tjë' birúajë' yehua' yubá, nácuë' böaj lúzhiba, en zoa ca tu biguita' ícjalë'. Répi yösa bení'lahuë' ca run gubidza, ate' náccagaca ni'ë ca ya'zxón ta'yegui.

2 Zoa lu në'ë tu guíchido' nayalaj, ate' tu ni'ë ibëla nulibë' lu nísado', en ia'tú ni'ë yögöla nulibë' luyú bidxi.

3 Ní'irö bë'ë zidzaj didza', ate' biyön chi'ë ca riyön cate' ribödxí'aba' bëdxi guixi', en cate' budxi bë'ë zidzaj didza' na', bila'yöni chí'igaca gadxi guziú'.

4 Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruí'í didza' yehua' yubá, rë neda': "Bucáchi'sö didza' ni gulufí' gadxi guziú' na'. Biti' uzúaju' didza' na' lu guichi."

5 Ní'irö gubáz lá'ayi na' bilé'eda'-në' zuiné' lu nísado', en luyú bidxi, guchisa në'ë ibëla zaca' lúzhibalö,

6 ate' ben tsutsu xtídzë'ë ni'a que Nu na' zoa caz, Nu na' ben yehua' yubá, en le nacua' ni', enca' yödzölió, en le nacua' ni', enca' nísado', en le nacua' ni', ate' gunné': "¡Bíti'rö tsel!

7 Cate' ucödxë' gubáz lá'ayi igadxi lúzuba' böa' bëdxi, usudxinë' Dios le nagachi' queë', lë na' buluf'inë' yugu' huen dxin queë', bönni' ni' gulu'ë didza' uláz queë'."

⁸ Ní'irō chí'i na' biyōnda' rirúaj yehua' yubá bē'len neda' didza' leyúbölö. Gunná: "Guyéaj, yōjxi' guíchido' nayalaj na' zōnē' gubáz lá'ayi na' nulibē' lu nísado', en luyú bidxi."

⁹ Guyija' ga na' zoē' gubáz lá'ayi na', en gunábida'-nē' gunnē' guíchido' na' quia'. Gubáz lá'ayi na' gudxē' neda', gunnē': "¡Guzxi', gudagu! Lu ru'u gaca zxixi ca naca bidxina'do' queēba' buz, pero lē'u huóaca silá'."

¹⁰ Guzxi'a guíchido' na' zōnē', en gudahua' le. Lu ruá'a guca zxixi ca naca bidxina'do' na', pero cate' budxi gudahua' le, bóaca silá' lē'a.

¹¹ Ní'irō gudxē' neda': "Ral-la' gu'u didza' leyúbölö uláz queē' Dios lógaca zían cō' bōnachi izá'a, en gapa nacua' yúgu'tē yōdzō, en gapa tu'i zían didza' yúbölö, en lógaca zían bōnni' unná bē'."

11

Chopē' bōnni' tunē' ba nalí

¹ Ní'irō bidxín nu benna tu gui quia' le naca ca tu yaga ribixi, en gudxi neda': "Guyásin, en burixi yudo' queē' Dios. Burixi ca' bucugu lá'ayi que, en bulaba nupa nacua' ni' ta'yéaj lādxi'gaca Dios.

² Bucá'ana ca' lō'a que yudo' na' dē ní'ilō, en biti' urixu' le, tu' nadōdi lu ná'agaca bōnachi izá'a, ate' ulu'libi ulu'léaj yōdzō lá'ayi na' idú ca chop-a-un beo'."

³ Gudxē' ca' neda': "Isól-la'a chopē' bōnni' ilunē' ba nalí quia', ate' ilu'ē didza' uláz quia' idú ca chinnu gayuá' yu' tsónnalalaj dza, nácugaquiē' lari' le naca bōdzádzado'."

⁴ Chopē' bōnni' ni tunē' ba nalí, nácagaquiē' chop-a yaga olivo na' nazúaj lu guichi lá'ayi ca naca quégaquiē', en nácagaquiē' ca' chop-a le nuá'gaca guí' na' nacua' lahuē' Dios, Xani yōdzólió.

⁵ Channō guē'ēni nu guá' dō' quégaquiē', irúaj guí' ruá'agaquiē' le usuniti nu na' rē'ēni guá' dō' quégaquiē', en guti nu na', enca' nupa ta'dá'baga' légaquiē'.

⁶ Chopē' ni dē lu ná'agaquiē' ulu'záguē'ē xinōza nisa guiōj lúzxiba, para cabí galaj guiōj tsca dza na' ral-la' ilu'ē didza' uláz queē' Dios, ate' dē lu ná'agaquiē' ca' ilunē' ga huóaca nisa rōn, en ilunē' ga gatsaj yōdzōhuē' yōdzólió. Ilunē' caní bálati'tēs luzuí ilē'ēnnē'.

⁷ Cate' údxi ilunē' ba nalí, irúajba' bōa' sínia' lataj chul-la, en tíl-lalenba' légaquiē', en ucúl-laba' légaquiē', en gútiba' légaquiē'.

⁸ Le gulaca cazē' ila'túlusō ca' la' nōza lu yōdzō zxōn, ga ni' gudē'ē ca' Xanru' lē'e yaga cruz, en ca rucúdzu'ru' didza', nazí'i le ca' Sodoma, enca' Egipto.

⁹ Idú ca tsonna dza yu' gatsaj bōnachi yúgu'tē yōdzō, en yúgu'tē bōnachi izá'a, en bōnachi tu'i zían didza' yúbölö, en bōnachi yúgu'tē luyú, ila'lé'eni le gulaca cazē', en biti' ilu'í lataj nu ucache' légaquiē' yeru ba.

¹⁰ Ulu'dzējade'e nupa nacua' yōdzólió tu' gulatiē', ate' lu yōl-la' rudzeja quéguequi ila'sól-la' le ulu'nōdzaj quégaca luzé'eguequi, tu' bulu'saca' zí'ē chopē' ni gulu'ē didza' uláz queē' Dios bōnachi nacua' yōdzólió.

¹¹ Ní'irō cate' chibizá'a tsonna dza yu' gatsaj na', Dios busubanē' légaquiē', ate' gula'yasē' gulazuínē', ate' guladxi gula'dzōbi yúgu'tē nupa bila'lé'e légaquiē'.

¹² Ní'irō bē' zidzaj didza' tu chí'i yehua' yubá, en gudxi légaquiē': "Guli'cuén ni."

Gula'benē' lu bōaj lúzxiba zaca' yehua' yubálö, ate' nupa na' gula'dá'baga' légaquiē' bila'lé'e légaquiē'.

13 La' n'ísö gudödida' budó' zxu', ate' biguinna' tu cö' tsa tu chi cö' yugu' yu'u dzö'ö lu yödzö na', ate' lu budó' zxu' na', gulati tsónnalalaj yu' chi gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

14 Chigudödi le buropi le rusuniti bönachi, ate' chizóa idxín le bunni le usuniti léguequi.

Rucödxë' gubáz lá'ayi igadxi lúzuba' böa' bëdxi

15 Bucödxë' gubáz lá'ayi igadxi lúzuba' böa' bëdxi, ate' gulu'í zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzölió nadödígaca lu në'ë Xanru' Dios, en lu në'ë Cristo.

Lë' inná bë'tica'së'.

16 Ní'irö idapa uru'ë bönni' gula na' rö'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxi'gaquië' Dios.

17 Ta'nné':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxön quiu', en risi lo' rinná bë'u!

18 ¡Gula'lé bönachi yugu' yödzö

pero chibidxín dza gunu' léguequi xíguia'!

¡Naca dza uchi'a usöröu' nupa chinátigaca!

¡Ubi'u quégaquië' huen dxin quiu',

yugu' bönni' gulu'ë didza' uláz quiu',

nupa néquiguequi quez quiu', en gulún bal Lo',

nupa nácacaca cá'asó, en nupa nácacaca lo!

¡Chibidxín dza usunitiu' nupa bulu'suniti yödzölió!

19 Ní'irö gualaj yudo' queë' Dios rö'ö yehua' yubá, ate' bilá' lahui gu'ina lá'ayi ga yu'u didza' rucá'ana tsahui' le nunë' Dios. Guyëpi yösa, en gulú'u bö zidzaj, en gunné guziú' luyú. Gudödi budó' zxu', en gurö'ö guiöj bögui yöla sunna.

12

Tunu nigula, en tuba' bëla zxön xitsini'

1 Ní'irö bilá' lahui yehua' yubá tu le naca bë'da', bulu'í lonu tu nigula nácanu le naca ca gubidza, en zoa zcan ní'anu beo'. Dxía ícjanu tu le néquini oro ga dxíagacaba' chinnu böljaj bení'.

2 Nigula ni chizóa soa bí'ido' queënu, en ribödxinu tu' rúdia' lë'ënu. Riguí' rizáca'nu ruzóanu bí'ido' queënu.

3 Ní'irö ia'tú le naca bë' bilá' lahui yehua' yubá. Buluí' loba' tuba' bëla zxön xitsini'. Nácaba' xiná gui'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'.

4 Len xibanba' gú'uyöjba' tu cö' tsa tu tsonna cö' böljaj lúzxiba, en gurú'unaba' légacaba' luyú. Guzuíba' bëla zxön xitsini' na' lonu nigula na' chizóa sóabi' bí'ido' queënu. Zóaba' sina' gáguba'-bi' bí'ido' queënu na' ca gáljabi' na'.

⁵ Buzóanu-bi' tubi' bi'i bönni'do' ral-la' inná bé'ebi' yúgu'të yödzö len tu xiyaga guié. La' bucuítatë'ë-bi' Dios bí'ido' queënu na', en buchisë'-bi' ga ni' zoa cazë' Lë', rö'ë lataj lo ga na' rinná bë'ë.

⁶ Buzúunnajnu nigula na', zéajnu lu lataj cá'asö, ga ni' chinupë'ë Dios lataj queënu. Ulu'gahuë'-nu ni' idú ca chinnu gayuá' yu' tsónnalalaj dza.

⁷ Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquië' lë' gula'díl-lalenë'-ba' bëla zxön xitsini' na'. Gula'dil-la bëla zxön na', en yugu' gubáz xihui' dá'gaca lëba'

⁸ pero biti' bila'deli' lu gudil-la na'. Que lë ni na' bí'ti'rö bidzöli xilátjagaca yehua' yubá.

⁹ Caní guca, gula'ru'unë'-ba' bëla zxön xitsini' na' ní'ilö. Nácaba' bëla na' zóaba' dza ni'te, lëba' tu' xihui'. Gula'ru'unë' tu' xihui' yödzölió, dzágagaca le gubáz xihui' na' dá'gaca le.

¹⁰ Ní'irö biyönda' tu chi' ruí' zidzaj didza' yehua' yubá, rnna: "Na'a chibidxin dza nulu'ë lahui yöl-la' rusöla nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'ru'unë' ní'ilö nu na' buzegui yugu' böchi' luzá'aru' didza'. Rëla, en të dza buzegui légaquië' didza' lahuë' Dios queëru'.

¹¹ Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nali queë'. Biti' gulul'i ládxi'gaquië' yöl-la' na' bán quegaquië', pero gulatië'.

¹² Que lë ni na' gaca yöl-la' rudzeja yehua' yubá. ¡Buli'dzeja libí'ili', zóali' ni'! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidxin ga zóali'! Riléde'e tu' xihui' na' tu' chiréquite'e ia'tú chí'isö dë lataj que."

¹³ Cate' gúquite'eba' bëla zxön xitsini' na' chigula'ru'unë'-ba' luyú, ní'irö yöjsóa régu'ba'-nu nigula na' buzóanu bi'i bönni'do' na' queënu.

¹⁴ Ní'irö Dios bë'ë-nu nigula na' chopa xíliba' bisia' nácagaca zxön para gaca sunu, en icuítanu ga na' zóaba' bëla zxön xitsini' na', en idxinnu xilátjanu lu lataj cá'asö. Ni' ulu'gahuë'-nu idú tsonna iz yu' gatsaj.

¹⁵ Bëla zxön xitsini' na' gúbaba' nisa zile zaca' cúdzulönu, le guca ca tu nisa yegu, en gú'uniba' gua'të nigula na'.

¹⁶ Ní'irö luyú gúcalen nigula na'. Guyalaj luyú na', en gü'i nisa yegu na' gúbaba' bëla zxön xitsini' na'.

¹⁷ Ní'irö bëla zxön xitsini' na' guléde'eba'-nu nigula na', ate' guyéjba' yöjtíl-lalenba' nupa nagá'anagaca queënu di'a dza queënu, nupa na' tun ca rnna le gunná bë'ë Dios, en nazí' lu në'eguequi le nunë' Jesucristo ba nali.

13

Chópaba' böa' sinya'

¹ Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sinya' dxíagaca gadxi ícjaba', en chi lúzuba'. Dxiagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a.

² Böa' sinya' na' bilé'eda'-ba' riná'aba' ca nácaba' tu bédxito', nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bédxi guixi'. Bëla zxön xitsini' na' budödiba' lu na'aba' böa' sinya' ni yöl-la' huáca queëba', enca' xilátjaba' ga rinná bë'ëba', en yöl-la' unná bë' zxön queëba'.

³ Dxíá huë' tu ícjaba' böa' sínía' na', le naca le guti lëba', pero buniti huë' na', ate' bulu'bani yúgu'të bönachi yödžölió, en yöjdá'gaca böa' sínía' na'.

⁴ Gula'yéaj ládxi'gaquië'-ba' bëla zxön xitsiní' na', tu' budödiba' yöl-la' unná bë' queëba' lu ná'aba' böa' sínía' na'. Gula'yéaj ládxi'gaquië'-ba' böa' sínía' na', en gula'nnë': "¿Nuzxi caz naca zxön ca naca zxön böa' sínía' na', en nuzxi caz sequí' tíl-lalen lëba'?"

⁵ Guta' lu ná'aba' böa' sínía' na' bë'ëba' didza' ba zxön, en didza' xihui' le rinnëba' queë' Dios. Idú ca chopa-un beo' guta' lu ná'aba' yöl-la' unná bë'.

⁶ Gusí loba' rinnëba' queë' Dios, en rinnë xíhui'ba' que Lë' Dios, en que lataj lá'ayi queë', en quégaca nupa nacua' yehua' yubá.

⁷ Guta' lu ná'aba' gudíl-lalenba' nupa néquiquequi quez queë' Dios, en bucúl-laba' légaquië'. Guta' ca' lu ná'aba' gunná bë'eba' yúgu'të bönachi izá'a, bönachi yúgu'të yödžö, en bönachi tuf'i yúgu'të didza' yúbólö, en bönachi iduté yödžölió.

⁸ Yúgu'të bönachi nacua' yödžölió gula'yéaj ládxi'gaca böa' sínía' na', nupa na' bití' nazúajgaca láguequi lu guichi que yöl-la' na'bán, guichi na' buzúajë' Bönni' na' náquië' Bö'cu' Zxíla'do' queë' Dios cate' sí' guta' yödžölió. Buzóa cazë' Dios gútië' Bönni' na' ní'a quégaca bönachi queë'.

⁹ Channö nu riyöni, ral-la' uzë nagui.

¹⁰ Nupa nucu'ë Dios idžungaca, ral-la' idžungaca, ate' nupa nucu'ë Dios para nu guti léguequi len gué tuchi', len guíë tuchi' ilátigaca. Que lë ni na', ral-la' ila'böza zxön ládxi' nupa néquiquequi queë' Dios, en ta'yéajlë' Lë'.

¹¹ Gudödi na' bilé'eda'-ba' ia'tuba' böa' sínía' gurenba' birúajba' lu yu. Dxíagaca chopa lúzuba' ca naca lúzuba' bö'cu' zxíla', en ru'íba' didza' ca na' ru'íba' didza' bëla zxön xitsiní' na'.

¹² Dë lu ná'aba' böa' sínía' ní yúgu'të yöl-la' unná bë' queëba' böa' sínía' bidxinba' zí'alö, cate' dzágaba' lëba'. Runba' böa' sínía' buropi ní ga ta'yéaj ládxi'gaca yúgu'të bönachi nacua' yödžölió böa' sínía' zí'alö na', böa' na' buniti huë' le guti lëba'.

¹³ Böa' buropi na' runba' ca' le náçagaca bë' ga ridxintë runba' ga ruhuöxaj guí' le za' lúzxiba, en ruhuöxaj luyú lógaca yúgu'të bönachi.

¹⁴ Rizí' yé'eba' bönachi nacua' yödžölió len le náçagaca bë' dë lu ná'aba' runba' loba' böa' sínía' zí'alö na'. Rinná bë'eba' bönachi nacua' yödžölió ilunë' tu budó' ca nácaba' böa' sínía' na' gúcaba' huë' que guíë tuchi', ate' nabanba'.

¹⁵ Dë lu ná'aba' runba' ga soa ibán budó' na' naca ca nácaba' böa' sínía' zí'alö na', en guí'i didza' budó' ní, en gun ga nu guti yúgu'të nupa bití' ila'yéaj ládxi'gaca le.

¹⁶ Benba' ga gudá' yúgu'të bönachi tu le naca bë' dá'gaca lëba', nupa náçagaca cá'asö, en nupa náçagaca lo, nupa ta'lé'e yöl-la' tsahui', en nupa náçagaca yechi', nupa bití' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'.

¹⁷ Cuntu nu gaca bí ga'u o bí guti' channö cabí da' nu na' lë na' naca bë', o channö cabí da' nu na' laba' böa' sínía' na', o le nabábaba' nuá'aba'.

¹⁸ Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínía' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

14

Le tul-lë' tu gayuá' yu' tapa-un milë' bönni'

¹ Gudödi ni' buyúa, en bilé'eda'-nè' Bönni' na' náquië' Bö'cu' Zxíla'do' zuiné' lu guí'ado' nazí'i le Sión. Nacuá'lené' Lè' tu gayuá' yu' tapa-un milé' bönni', da' ra' xigágaquië' Lè' Bönni' na' náquië' Bö'cu' Zxíla'do', enca' Lè' Xuzè'.

² Ní'irò biyönda' tu le rigú'u bö yehua' yubá, le rinné zidzaj ca rinné tu yegu zxön, en ca rinné guziú'. Biyönda' le riyón cate' ta'guínnië' lè'e tu le rul-la zè zían du que.

³ Tul-lè' tu le rul-la cubi, nacu'ë ca dödilò lahui lataj lo ni', enca' ca dödilò lahui ga na' nacuá' idapa nupa na' nabángaca len yugu' bönni' gula na'. Cúnturò nu gaca gul-la le rul-la ni, pero légacasè' tu gayuá' yu' tapa-un milé' bönni' ni, bönni' na' böá'uè' Cristo légaquië' ladaj bönachi yödzölíó.

⁴ Nácagaquië' bönni' ni idú ladxi'. Biti' gula'cuá'lené' nigula, tu' nácagaquië' idú bönni' ra'bán. Sójacalené' Bönni' na' náquië' Bö'cu' Zxíla'do' gátí'tés ga sa'yéajè'. Cristo caz böá'uè' légaquië' ládjagaca bönachi, ate' nácagaca nupa bulu'dödi cúngaquië' zí'alò queë' Dios, enca' queë' Bönni' na' náquië' Bö'cu' Zxíla'do'.

⁵ Catu caz gula'zí' yè'è, ate' cuntu nu gaca bi inné quégaquië' ga na' nacu'ë ca dödilò lahui lataj lo ga rø'ë Dios.

Didza' røjuá'gaquië' tsonna gubáz lá'ayi

⁶ Ní'irò bilé'eda' ia'tué' gubáz lá'ayi, ridödè' lu bö'ös lúzxiba, en røju'ë didza' dxi'a zóatica'sò para guné' libán que lógaca nupa nacuá' yödzölíó, bönachi idútè luyú, yúgu'tè bönachi izá'a, en bönachi tuí'i yúgu'tè didza' izá'a, en bönachi yúgu'tè yödzò.

⁷ Ru'ë zidzaj didza', rnné: "¡Gulí'gádxí Dios, en guli'cu'ë yöl-la' ba tu' chizóa uchi'a usørøë' bönachi! ¡Gulí'tséaj ládxe'ë Dios, nuné' lúzxiba, en luyú, en nísado', en gapa ralaj nisal!"

⁸ Ia'tué' gubáz lá'ayi søjnáhuë' gubáz lá'ayi ni, en rnné: "¡Chibudxi que yödzò Babilonia! ¡Chibudxi que yödzò zxön na'! Caní guca que, tu' gulún nupa nacuá' ni' ga gula'zí' lu náagaquië' bönni' yúgu'tè yödzò iluné' ca nácagaca le ta'zè ládxi'gaquië' le ruá' dö'."

⁹ Ia'tué' gubáz lá'ayi søjnáhuë' gubáz lá'ayi buropi ni, en ru'ë zidzaj didza', rnné: "¡Channò nu tseaj ladxi'-ba' böa' sínía' na', enca' budó' queë'ba', en guí'i lataj ta' ra' xígué o lu në'e le naca bè' da' lè'ba',

¹⁰ guné' Dios nu ni xíguia' lu yöl-la' rilé queë'! ¡Qui'i saca' nu na' lu guí', en lu lè na' ruzégui'da', lógaca gubáz lá'ayi, en lahuë' Bönni' na' náquië' Bö'cu' Zxíla'do'!"

¹¹ Cuéntica'sò dzön que guí' ga ni' quí'i saca' nu na'. Rëla, en te dza qui'i saca', ate' catu caz gata' lataj ulu'zí' ládxi'gaca nupa ila'yéaj ládxi'gaca-ba' böa' sínía' na', en budó' queë'ba'. Biti' ulu'zí' ládxi'gaca nupa ilufí'i lataj ta' laba' léguequi.

¹² Que lè ni na' nupa na' néquiguequi queë' Dios, en tun ca rnna le gunná bè'ë, en ta'yéajlè' Jesús, ral-la' ila'böza zxön ladxi'."

¹³ Ní'irò biyönda' chi'i nu ruí'i didza' yehua' yubá, en rø neda': "Buzúaj lu guichi lè ni: ¡Bica' bágaca nupa ilátigaca na'a si lo, nupa na' ta'yéajlè' Xanru'!"

Dios Bö' Lá'ayi rnné: "¡Ca' gaca! ¡Ulu'zí' ládxi'gaquië' lu dxin guluné', en ulu'zí'ë xibé ca sa'yéaj le guluné'!"

Tu'zì'è le rulá' huyí

¹⁴ Ní'irò buyúa, en bilé'eda' tu böaj lúzxiba chiguíchido'os, ate' lu böaj na' rø'ë tu bönni' náquië' ca náquië' Bönni' Guljè' Bönachi, ate' dxía icjè' tu le néquini oro, ate' zöné' tu guíe tuchi' lu në'ë.

¹⁵ Birúajë' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunnë': "¡Bugún dxin guié tuchi' quiu', en guchugu zxa' xtila, tu' chibidxin dza nu uzi' le! ¡Chinabídx do que le dë yödžölió!"

¹⁶ Ní'irö Nu na' rö'ö lu böaj na' bugún dxin guié tuchi' idútë yödžölió, ate' buzi'ë le rulá' luyú.

¹⁷ Ní'irö birúajë' tu gubáz lá'ayi lu yudo' zoa yehua' yubá. Nu'ë ca' tu guié tuchi'.

¹⁸ Birúajë' ia'túë' gubáz lá'ayi ra' bucugu ni', dë lu në'ë inná bé'enë' guí', ate' bë'ë zidzaj didza', en bulidžë' gubáz lá'ayi zí'alö na' nu'ë guié tuchi', gunnë': "¡Bugún dxin guié tuchi' quiu', en butubi tu' xóa huéaj le ta' bía lubá uva rö'gaca yödžölió, tu' chiná le ta' bía lubá uva!"

¹⁹ Ní'irö gubáz lá'ayi ni bugunë' dxin guié tuchi' idútë yödžölió, en butubë' le ta' bía lubá uva rö'gaca luyú, ate' yöjchú'unë' le ta' bía lubá uva na' lu yeru zxön ga izí xisi. Yugu' lë ni rulufi ca gunë' Dios, gunë' xíguia' bönachi nacua' yödžölió.

²⁰ Bulu'libë' le ta' bía lubá uva na' lu lerui zoa ní'lö ra' yödžö, ate' lu lerui na' birúaj rön, en gurén ga bidxintë ruá'agacaba' böa', en gudödi rön na' idú tsa gaca sá'aru' idú chinnu dza.

15

Yugu' gubáz lá'ayi nuá'gaquië' gadxi yödžöhuë'

¹ Bilé'eda' ia'tú le nácada' bë' yehua' yubá, le run ga nu rubani. Bila'ruajë' gadxi gubáz lá'ayi, nuá'agaquië' gadxi yödžöhuë' röjsétegaca, le ugunë' dxin Dios, údxi gunë' xíguia' bönachi yödžölió.

² Bilé'eda' ca' tu le naca ca tu nísado' le rëpi yösa bení' ca guiöj jara le nutsí'i guí'. Nupa na' bulu'xicja lu böa' sínia' na', en lu budó' queëba', en lu laba', zuígaca lu lë na' naca ca tu nísado', en nuá'agaquië' le tul-la, yugu' le bë'ë Dios queégaquië'.

³ Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bö'cu' Zxíla'do'. Ta'nnë':

¡Li', Xantu' Dios, zxöntëro nacu' Li'!

¡Zxöntëro naca yúgu'të le benu',

le tun ga rubánitu'!

¡Li' rinná bé'enu' yugu' yödžö!

¡Idú dxí'ado', en idú tsahui' naca ca bi runu'!

⁴ ¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Ila'dxin bönachi yúgu'të yödžö,

en ila'yéaj ládxi'guequi Li'

tu' ta'lé'e naca tsahui' yúgu'të le runu'!

⁵ Gudödi guca lë ni, buyúa', en bilé'eda' gualaj yudo' yehua' yubá ga ni' dë lataj lá'ayi que le naca bë' zóalenë' Dios bönachi queë'.

⁶ Bila'ruajë' gadxi gubáz lá'ayi lu lataj lá'ayi na', nuá'agaquië' gadxi yödžöhuë' na'. Nácugaquië' lari' nazáca'da' le rëpi yösa bení', en núga'gaca luchú'ugaquië' le néquigequini oro.

7 Ní'irō tu nu nutsa' ladaj idapa nupa na' nabángaca, bē' que queēgacuié' gadxi gubáz lá'ayi na' gadxi zxíga'do' néquiguequini oro, en yúdzugaca le rulu'i yöl-la' rilé queē' Dios, Bönni' zoa cazē.

8 Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queē' Dios. Cuntu nu sequi' tsaza lu lataj lá'ayi na' cate' gátsjarō gadxi yödžohuē' na' nuá'agaquie' gadxi gubáz lá'ayi na'.

16

Yugu' zxíga'do' yúdzugaca le rulu'i yöl-la' rilé queē' Dios

1 Ní'irō biyönda' chi'i nu ru'i zidzaj didza' lataj lá'ayi na', en rē gadxi gubáz lá'ayi na', rna: "¡Guli'tséaj! ¡Guli'tsöjlálaj gadxi zxíga'do' na' lu yödžolió, le yúdzugaca lē na' rulu'i yöl-la' rilé queē' Dios!"

2 Guyijé' gubáz lá'ayi zí'alō, en yöjlaljé' le yudzu zxíga'do' na' zönē' lu yödžolió. Lē na' yudzu zxíga'do' na' ben ga gutsaj yudzu' ya'a le riláda' iduté le naca caz nupa na' da' léguequi le naca bē' dá'gaca böa' sínia' na', enca' nupa na' ta'yéaj ládxi'gaca budó' queéba'.

3 Ní'irō guyijé' gubáz lá'ayi buropi, en yöjlaljé' le yudzu zxíga'do' na' zönē' lu nísado', ate' nisa na' böáca rön ca naca rön queē' tu bönni' nati, ate' gulati yúgu'tē nupa nabángaca nacuá' lu nísado' na'.

4 Guyijé' gubáz lá'ayi bunni, en yöjlaljé' le yudzu zxíga'do' na' zönē' gapa dē yegu, en gapa ralaj nisa, ate' gapa dē nisa na' bulu'huóaca rön.

5 Ní'irō biyönda' ru'ē didza' gubáz lá'ayi na' dē lu nē'ē rinná bé'enē' nisa na', rnnē: "¡Xantu' Dios Lá'ayi! ¡Zoa cazu', en guzóa cazu'! ¡Tshui' nacu' tu' richugu' caní quégaca bönachi

6 tu' bulu'laljé' rön quégaca nupa néquiguequi quez quiu', en quégaca nupa gulu'i didza' uláz quiu'! ¡Na'a, Li' runu' ga ilē'ajē' rön, tu' caní ral-la' gaca quegaquie'!"

7 Ní'irō biyönda' ru'i didza' tu nu zoa ra' bucugu yehua' yubá ni', rna: "¡Ca' gaca, Xantu' Dios, napa cazu' yöl-la' unná bē'! ¡Iduté li, en tsahui' naca ca richugu' quégaca bönachi!"

8 Guyijé' gubáz lá'ayi budapi na', en yöjlaljé' le yudzu zxíga'do' na' zönē' lu gubidza, ate' gubidza na', bē'ē Dios le lataj uzégui'da' bönachi len guí' que.

9 Gula'yégui'da' yúgu'tē bönachi tu ruzégui'da' gubidza, pero biti' bulu'bí'i ládxi'gaca, en biti' gula'gú'u Dios yöl-la' ba. Gula'nnē zi'i queē' Dios, Bönni' dē lu nē'ē inná bé'enē' yugu' lē ni tu'saca' zi' bönachi.

10 Guyijé' gubáz lá'ayi guyu' na', en yöjlaljé' le yudzu zxíga'do' zönē' lu xilataj böa' sínia' ga na' rinná bē'ēba', ate' guró'ō chul-la gapa rinná bē'ēba'. Ní'irō, tu' gula'gu'i gula'zaca' bönachi, gulá'guya'a lúdxí'guequi,

11 pero biti' bulu'bí'i ládxi'gaca para cabirō ilúngaca le ruá' dō' tunē'. Gula'nnē zi'i queē' Dios zoē' yehua' yubá tu' ta'gu'i ta'zaca', en tu' dxíagaca yudzu' ya'a na'.

12 Yuyijé' gubáz lá'ayi buzxopi na', en yöjlaljé' le yudzu zxíga'do' na' zönē' lu yegu zxön nazí'i le Eufrates, ate' gubidxi nisa yegu na' para ibá'a nöza ga ila'dōdi nupa ta'nná bē', nupa ila'rúaj zaca' ga rilén gubidza.

13 Ní'irō bilé'eda' bēla zxön xitsiní' na', en böa' sínia' na', en bönni' ru'ē didza' uláz quégacaba'. Bila'rúaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu.

14 Nácagaca yonna bö' ni bö' que tu' xihui', bö' na' tun le nácagaca bē' le ilún ga ulu'bani bönachi. Yójaca bö' xihui' na' idú yödzólió, en yójtúbigaca nupa ta'nná bē', para tsójáquiē' lu gudil-la na' gaca lu dza zxön queē' Dios, Bónni' napa cazē' yöl-la' unná bē'.

15 Caní rnnē' Dios: "¡Buli'yútsöca! Guída' tsárido'os ca ridxinē' tu bönni' gubán. Bica' ba nu zoa ban ladxí', en run chí'i le nacu nu na', en rúntica'só dxi'a, para cabí gun bayudxi ta xiguídisö, en para cabí utuf'i nu na' lahui' lógaca bönachi."

16 Yugu' bö' xihui' na' bulu'tubi yugu' bönni' ta'nná bē'ē, ate' bulu'dubē' tu lataj nazí'i le lu didza' hebreo: Armagedón.

17 Guyijē' gubáz lá'ayi igadxi na', en yöjlaljē' le yudzu zxíga'do' na' zönē' lu bö'ös, ate' bē' zidzaj didza' tu nu zoa lu lataj lá'ayi zoa yehua' yubá ga dē lataj lo na', rnná: "Chinaca."

18 Ní'irö guyēpi yösa, en gurö'öda' bö, en gunnē guziú'. Gudödida' budó' xzu', le gudödida'rö ca gudödi tsanni ni nacua' bönachi yödzólió.

19 Birúaj tsonna cö'ölö yödzö zxön na', ate' gula'guínnaj yödzö nacua' yödzólió. Yöjnenē' Dios le naca xihui' gulún bönachi yödzö zxön na' nazí'i le Babilonia, ate' lu yöl-la' rilé queē' benē' xíguia' nupa nacua' ni'.

20 Bila'gachi' yugu' luyú bidxi dzö'ö lu nísado', ate' bíti'rö gula'lá' yugu' guí'ado'.

21 Bóxaj ca' guió'j bögui' yöla sunna, le za' lúzxiba, en yöjsóa ícjagaca bönachi, ate' nál-li' tu tu guió'j bögui' na' ca tu gayuá' guié', ate' yúgu'tē bönachi gula'nnē xihui' queē' Dios tu' nözi guió'j bögui' na' tu' bulu'sáca'da' zi'i léguequi.

17

Dios richúguiē' queēnu nigula udá dzaga

1 Ní'irö bidxinē' tuē' gubáz lá'ayi ga zoa', nababē' gadxi gubáz lá'ayi na' gula'zönē' gadxi zxíga'do' na' néquiguequini oro. Bē'lenē' neda' didza', gunnē': "Gudá ni, ate' uluf'ida' li' ca gunē' Dios, gunē'-nu xíguia' nigula udá dzaga na', rö'önu lu nísado' zían.

2 Gula'cua'len lēnu nupa ta'nná bē' luyú yödzólió, en gulún le ruá' dö', ate' gula'zudxi nupa nacua' yödzólió ni, tu' gulunlen lēnu le bití' naca dxi'a."

3 Dios Bö' Lá'ayi guzóalenē' neda', ate' gubáz lá'ayi na' guchē'ē neda' tu lu lataj ca'asö, ate' bilé'eda'-nu tu nigula ni' dxíanu cúdzu'ba' tuba' böa' sínia', nácaba' xiná guí'ido'os. Dxiagaca gadxi ícjaba', en chí lúzuba', en dá'gaca ca' lēba' le ta'nnē xihui' queē' Dios.

4 Nigula na' dxíanu lēba' nácunu lari' xiná chul-la, en lari' xiná guí'ido'os. Nazí'i biquitaj queēnu le néquiguequini oro, en yugu' guió'j nazaca', en yugu' bugá. Lu ná'anu rö'ö tu zxíga'do' néquini oro, en yudzu le nácagaca xihui', en le ruá' dö' runnu.

5 Ra' xigánu dá'gaca ca lēnu, le tu'luí'i tu le nagachi', en ta'nná caní: "Yödzö Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzö'ö Yödzólió."

6 Gúquibe'eda' nazúdxinu nigula na' tu' bennu ga gulaj rön quégaca nupa néquiguequi queē' Dios, en quégaca nupa na' zoa nu bēti léguequi tu' gulún ba náli queē' Jesús. Cate' bilé'eda'-nu, bubánide'eda'.

7 Gudxē' gubáz lá'ayi na' neda', gunnē': "¿Bizx que rubáninu? Uzéajni'ida' li' lē na' nagachi', le ruluí'i ca naca nigula ni, enca' le ruluí'i ca naca böa' sínia' na' dxíanu-ba', böa' na' dxiagaca gadxi ícjaba', en chí lúzuba'.

⁸ Bõa' sînia' na' bilé'enu' guzóaba' zí'alò, pero biti' zóaba' na'a. Bõa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacua' luyú cabi nazúajgaca láguequi lu guichi que yöl-la' na'bán, le buzúajè' Dios dza ni'te quez cate' si' gata' yödzülió. Cate' ila'lé'eni bõa' sînia' na' guzóaba' zí'atëlò, pero biti' zóaba' na'a, ulu'bani tu' nubanba'.

⁹ Lè ni naca tu le uzéajni'i nu gaca tséajni'i: Gadxi ícjaba' na' tu'lui' gadxi gu'ado' gapa rò'õnu nigula na'.

¹⁰ Lësca' caní gadxi ícjaba' na' tu'lui' gadxè' bõnni' ta'nná bē'ē. Gáyu'è bõnni' ni chigudòdi quégaquiè'. Tuè' bõnni' ni rinná bē'ē na'a, ate' ia'túè' biti' ridxíninè', pero cate' guidè', inná bē'ē tu chí'ido'osò.

¹¹ Bõa' sînia' na' guzóaba', pero biti' zóaba' na'a, rulu'i' tu bõnni' izxunu', inná bē'ē. Nunè' tsòzxõn bõnni' gadxi na', ate' tòdi ni nítiè' tsaz.

¹² Chi lúzuba' na' bilé'enu' tu'lui' chiè' bõnni' ila'nná bē'ē. Biti' ta'z'íninè' yöl-la' unná bē', pero ila'zi'è yöl-la' unná bē' tu chí'ido'osò, en ila'nná bē'è tsòzxõn len bõa' sînia' na'.

¹³ Chiè' bõnni' ni, lèbisò nácagaquiè', ate' ulu'dödè' yöl-la' unná bē' quégaquiè', en le nazí' lu ná'agaquiè' lu ná'aba' bõa' sînia' na'.

¹⁴ Ila'díl-lalenè' Bõnni' na' náquiè' Bõ'cu' Zxila'do', pero Lè' ucul-lè' légaquiè', tu' náquiè' Xángaca yúgu'tè nupa nácagaca xan, en náquiè' Bõnni' rinná bé'enè' yúgu'tè nupa ta'nná bē'. Nupa nacua' len Lè', bulidzè' Dios léguequi, en guròè' léguequi, ate' tsaz dá'gaca Lè'."

¹⁵ Gubáz lá'ayi na' gudxè' ca' neda', gunnè': "Yugu' nísado' na' bilé'enu' gapa ni' rò'õnu nigula udá dzaga na', tu'lui' bõnachi yugu' yödzo, en yugu' bõnachi izá'a, en bõnachi tu'í yugu' didza' yúbólò, en bõnachi yugu' luyú.

¹⁶ Chi lúzuba' bõa' sînia' na' bilé'enu', en tu'lui' chiè' bõnni', biti' ila'lé'enè'-nu nigula udá dzaga na' dxi'a, ate' ulu'cá'anè'-nu cá'asò, en xiguídisò. Ilahuè' xipèla'nu, en ulu'zégui'è-nu len guí'.

¹⁷ Dios uchiziè' icja ládxi'do'gaquiè' chiè' bõnni' na' le gun ga ilunè' ca rē'èni quézinè' Lè', ate' ilácagaquiè' tuz, en ulu'dödè' yöl-la' unná bē' quégaquiè' lu ná'aba' bõa' sînia' na' para gaca ca rnna xtídzè'è.

¹⁸ Nigula na' bilé'enu'-nu rulu'i' yödzo zxõn na' rinná be'e nupa ta'nná bē' yödzülió ni."

18

Riguinnaj yödzo Babilonia

¹ Gudòdi na' bilé'eda'-nè' ia'túè' gubáz lá'ayi ruhuõtjè' rirúajè' yehua' yubá, en dè lu nè'è yöl-la' unná bē' zxõn, ate' guyèpi yõsa bení' luyú ni'a que yöl-la' bení' queè' gubáz lá'ayi na'.

² Bē'è zidzaj didza' gubáz lá'ayi na', gunnè':

¡Chibiguínnaj! ¡Chibiguínnaj Babilonia, yödzo zxõn na'!

¡Chibõáca xilataj tu' xihui', en xilátjagaca bõ' xihui' tun ditaj bõnachi!

¡Yugu' biguínmi xitsiní', en yugu' biguínmi xihui' tu'zóaba' xilátajgacaba' ni'!

³ Caní guca que yödzo na' ni'a que le gulún bõnachi nacua' ni'.

Gulunè' ga gulún bõnachi yúgu'tè yödzo ca nácagaca le ta'zèsò ladxi' le ruá' dõ'.

Nupa ta'nná bē' luyú yödzülió gulunlen légaquiè' le ruá' dõ',

ate' guta' yöl-la' tsahui' quégaquiè' bõnni' to'o tuti' nacu'è yödzülió

tu' guyánda' yugu' le nazaca' gula'zè ladxi' bõnachi ni'.

⁴ Ní'irò biyõnda' ruí'í didza' ia'tú nu zoa yehua' yubá, rnna:

Gulí'ruaj lu yödzo na', libí'ili' néquili' quia'

para cabí gunli' dul-la' tsözxön len légaquië',
en para cabí quí'i sáca'li' le gaca quégaquië'.

⁵ Nayánda' dul-la' nabága'gaquië',
en chinayasa nadxín caz lúxriba,
pero Dios röjnenë' le ruá' dö' núngaquië'.

⁶ Buli'bí'i quégaquië' ca na' gulunë' queëli'.

Buli'bí'i quégaquië' chopa cö' tsca le gulunë'.

Buli'bí'i quégaquië' chopa cö' tsca le naca xihui' gulunë' queëli'.

⁷ Guli'gún ga ila'guí'i ila'záquië', en ila'bödxi yéché'ë
tsca guca yöl-la' ba, en yöl-la' zxön guluf'i cuíngaquië'.

Ta'zá' ládxi'gaquië', ta'nnë':

Rö'ötu' ni, rinná bë'ëtu'.

Biti' nácatu' uzébi, en catu caz cödxí yéchi'tu'.

⁸ Que lé ni na', tu dzasö ila'dxín quégaquië' le ila'guí'i ila'záquië',
yöl-la' guti, en yöl-la' ribödxi yechi', en yöl-la' ridún.

Iléguië' lu guí', tu' napa cazë' yöl-la' huáca zxön Xanru' Dios.

Lë cazë' usiúdxë' quégaquië'.

⁹ Ní'irö gunné': "Ila'bödxi nupa ta'nná bë' luyú yödzülió, en gulún le ruá'
dö' tsözxön len légaquië', en bulu'zí' xibé le nequi quégaquië'. Ila'bödxë', en
ila'bödxi yéché'ë cate' ila'lé'enë' dzön que yödzü zxön na' régui.

¹⁰ Zí'tu' zí'tu'sö ila'cu'ë tu' iládxinë' ca gaca xíguia' le gaca que yödzü na', ate'
ila'nnë': ¡Bica' bayechi' Babilonia, yödzü zxön ni, le gúcada' lo! ¡Tu dzasö guca
xíguia' que!"

¹¹ Ní'irö gunné': "Ila'bödxë' ca' bönni' to'o tuti' nacu'ë yödzülió, en ila'bödxi
yéché'ë ní'a que yödzü na' tu' cabirö soa nu ga'u bi ilúti'ë ni."

¹² Cúnturö nu ga'u ni':

Le néquiguequini oro, en plata,
en yugu' guió'j zaca', en yugu' bugá,
en yugu' lari' nazáca'da', en lari' xiná chul-la,
en lari' dxí'ado', en lari' xiná guí'ido'os,
en yugu' yaga rilá' zxixi,
en le néquiguequini dxita nazáca'da',
en le néquiguequini yaga nazáca'da',
en le néquiguequini guíë cobre,
en le néquiguequini guíë,
en le néquiguequini guió'j jara.

¹³ Cúnturö nu ga'u ni':

Canel, en yugu' le rilá' zxixi, en yalaj,
en le rilá' zxixi que mirra, en que yöj olíbano,
en xisi uva nál-la, en le naca za,
en yiózja dxí'ado', en xzoa' xtíla,
en yugu' búrrodo', en yugu' bö'cu' zxíla',
en yugu' böa', en yugu' carreta,
en yugu' bönni' huen dxin, en ia'bal-la bönnachi.

¹⁴ Nupa na' to'o tuti' ilé légaquië', ila'nná:

Nadúagaca le guzé ládxi'li'.
Chigudödi quégaca yöl-la' tsahui',
en le náca'gaca lachi queëli',
ate' bíti'rö idzülió léguéqui.

¹⁵ Ní'irō gunnē': "Ila'bōdxē' bōnni' to'o tuti' na', tu' guta' quegaquiē' yōl-la' tsahui' tu' gulúti'ē lu yōdzō na', ate' ila'cu'ē zí'tu' zí'tu'sō tu' iládxinē' ca gaca xígúia' le gaca que yōdzō na', en ila'bōdxi yéché'ē."

¹⁶ Ila'nnē':

¡Bica' bayechi' yōdzō ni guca zxōn!
Guca ca tu nígula nácunu lari' nazáca'da',
en lari' xiná chul-la, en lari' xiná gu'ido'os,
en nazí'i biquitaj queēnu le néquiquequini oro
en le néquiquequini guiōj zaca', en yugu' bugá.

¹⁷ Tu dzasō guniti yōl-la' tsahui' que yōdzō ni.

Ní'irō gunnē': "Yúgu'tē bōnni' xan barco, en nupa nacuá' lē'egaca barco na', en nupa tu'sá' yugu' barco na', en nupa tun dxin lu nísado', ila'cu'ē zí'tu' zí'tu'sō."

¹⁸ Cate' ila'lé'enē' dzōn que yōdzō na' régui, ila'bōdxē', en ila'nnē': "¿Bízxilō yōdzō guca zxōn ca naca yōdzō ni?"

¹⁹ Ní'irō gunnē':

Ulu'dxiē' bēchtō ícjagaquiē'.
Ila'bōdxē', en ila'bōdxi yechē'ē, ila'nnē'.
¡Bica' bayechi' yōdzō ni guca zxōn!
Yōl-la' tsahui' que yōdzō ni ben ga guta' yōl-la' tsahui'
quégaca yúgu'tē nupa nácagaca xan barco lu nísado'.
Tu dzasō guniti yōdzō ni.

²⁰ Buli'dzeja ca gaca que yōdzō ni, libí'ili' zóali' yehua' yubá,
enca' libí'ili' néquili' queē' Dios,
libí'ili', bōnni' gubáz queē',
en libí'ili', bōnni' ru'ili' didza' uláz queē'.
Buli'dzeja, tu' chiguchúguiē' Dios que yōdzō ni
ni'a que bi gulún queéli' nupa nacuá' lu yōdzō ni.

²¹ Ní'irō tuē' gubáz lá'ayi nál-la buchisē' tu guiōj zxōn le naca ca tu guichi riyētu, ate' gurú'unē' le lu nísado', gunnē':

La' canísō gaca que yōdzō Babilonia,
tu' iguinnaj yōdzō na' guca lo,
ate' bíti'rō nu udzōli le.

²² Bíti'rō nu yōni lu yōdzō na' nupa ta'guinni lē'e le rul-la,
en calēga nupa tu'cōdxi gui
en calēga nupa tu'cōdxi lúzuba' bōa' bēdxi.
Bíti'rō udzōli bōnni' huen dxin ni',
en bíti'rō yōni bō rigú'u le rutu ni'.

²³ Bíti'rō uzení' nitú guí' lu yōdzō na',
en bití' yōni chí'ē bōnni' rutsaga nē'ē ni',
en calēga chí'ibi' bi'i nigula rutsaga ná'abi'.
Caní gaca sal-la' nácali' lo, libí'ili' rá'uli', en rúti'li' lu yōdzō ni,
en guzxi' yé'eli' bōnachi idútē yōdzōlió len yōl-la' gudzá' queéli'.

²⁴ Lu yōdzō ni gulaj xichōngaquiē' bōnni' gulu'ē didza' uláz queē' Dios,
en xichōngaca nupa néquiquequi queē' Dios,
enca' xichōngaca yúgu'tē bōnachi yōdzōlió,
tu' bētigaca nupa nacuá' yōdzō ni léguequi.

19

1 Gudödi lë ni biyönda' tu'í zidzaj didza' bönachi zían nacuá' yehua' yubá, ta'nná:

¡Yöl-la' ba Dios! ¡Yöl-la' rusólá runë',
ate' yöl-la' zxon, en yöl-la' unná bë' napë' Dios queëru'!

2 ¡Naca idütë li, en tsahui' ca rusiúdxë'!
¡Guchúguië' que yödzö na' naca ca tu nigula udá dzaga,
en quegaca bönachi lu yödzö na' ila'niti tsaz!
¡Gulún ditaj bönachi yödzölió tu' nözi le ruá' dö' gulunë'!
¡Dios buzí' lëbë' légaquië'
tu' gulútië' yugu' huen dxin queë'!

3 Leyúbölö gula'nnë': "¡Yöl-la' ba Dios! ¡Cuéntica'sö dzön ga régui yödzö na'!"

4 Idapa uru'ë bönni' gula ni' bulu'tsaga lógaquië' lu yu tsözxön len idapa nupa ni' nabángaca, en ta'yéaj ládxi'gaquië' Dios, Bönni' rō'ë lataj lo queë'. Gula'nnë': "¡Ca' gaca! ¡Yöl-la' ba Dios!"

5 Ní'irö biyönda' ru'í didza' tu nu zoa lataj lo na', rnna:
¡Guli'cu'ë Dios queëru' yöl-la' ba
yúgu'tëli' runli' xichinë', lib'ili' na' rádxili' Lë',
nácali' bönachi cá'asö, en bönachi lo!

Laní que yöl-la' rutsaga na' queë' Bönni' náquië' Bō'cu' Zxíla'do'

6 Biyönda' ca' nu ru'í zidzaj didza', le biyön ca riyön cate' tu'í didza' bönachi zían, en biyön ca' ca riyön ga ridödi tu yegu zxon, o ca riyön cate' rinnë guziú', ate' rnna:

¡Yöl-la' ba Dios tu' risí lahuë' rinná bë'ë!
¡Napa cazë' yöl-la' huáca!

7 ¡Ral-la' udzeja ládxi'ru', en uzi'iru' xibë',
en cú'uru'-në' yöl-la' ba
tu' chibidxín dza laní que yöl-la' rutsaga na'
queë' Bönni' na' náquië' Bō'cu' Zxíla'do'!
¡Si' lu në'ë Cristo nupa néquiquequi queë'!
¡Chinabá'a queëbi' bi'í utsaga ná'alenbi' Lë'!
¡Nácabi' le rulu'í nupa na' néquiquequi queë'!

8 ¡Dios ru'ë-bi' lataj gácubi' lari' nazáca'da'
le naca idú, en rëpi yösa bení'!

Lari' nazáca'da' na' rulu'í le naca tsahui' núngaca nupa néquiquequi queë' Dios.

9 Ní'irö gubáz lá'ayi na' gudxë' neda', gunné': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bō'cu' Zxíla'do'!"

Gudxë' ca' neda': "¡Yugu' didza' idütë li ni ru'ë didza' Dios caz!"

10 Buzóa zxiba' xini'ë gubáz lá'ayi na' para tseaj ládxa'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca nacu' li', en ca nácagaquië' böchi' luzó'o nazí' lu ná'agaquië' le naca idütë li ca naca queë' Jesús. ¡Guyéaj ládxi'ë Dios!"

Nupa tu'í didza' uláz queë' Dios, tu'í didza' le naca idütë li ca naca queë' Jesús.

Bönni' dxíë'-ba' bōa' chiguichi

¹¹ Ní'irō bilé'eda' nayałaj lúzxiba, ate' bulufi loba' tuba' bōa' chiguichi, ate' lē' Bōnni' dxíé'-ba', Nu Run Ca Rnna, enca' Nu Ru'i Didza' Le Nácate. Cani lē' tu' ruchi'a rusōrōē' ca naca le naca idútē li, enca' caní tsejē' gudil-la.

¹² Rēpi yōsa bení' guiōj lahuē', le nácagaca ca guí', en dxíagaca icjē' zían le néquiguequini oro. Nazúaj lahuē' tu le lē', le cuntu nu nōzi, pero tuzē' Lē' nōzinē'.

¹³ Nácué' tu lari' nē'aj rōn, en lē' ca' "Nu Naca Xtídzē'ē Dios."

¹⁴ Rōjnōgaquie' Lē' ni'a nē'ē guizxi yu nacu'ē yehua' yubá, dxíagaquie'-ba' bōa' chiguichi, en nácugaquie' lari' nazáca'da', le naca chiguichido'os, en biti' naca bōsaj.

¹⁵ Rirúaj ru'ē le naca ca tu guié tuchi' le gúninē' zi' bōnachi yugu' yōdzō. Inná bé'enē' légaquie' len tu xiyaga guí', en gunē' légaquie' xígua', le gaca quegaquie' ca raca que le ribía lubá uva, zoa nu rulibi léguequi, tu' riléde'enē' Dios, Bōnni' napa cazē' yōl-la' unná bē'.

¹⁶ Nazúaj lu lari' nácué', enca' lu xigatsjē' ca lē', "Bōnni' Rinná Bé'enē' Nupa Ta'nná Bē'", enca' "Bōnni' Náquie' Xángaca Nupa Nácagaca Xan."

¹⁷ Ní'irō bilé'eda'-nē' tuē' gubáz lá'ayi zuínē' lu gubidza, ate' bē'ē zidzaj didza', en gudxē'-ba' bōa' ta'daba' lúzxiba, rnnē': "¡Guli'dá, buli'dubi ga ni gáguli' laní zxōn queē' Dios!

¹⁸ Gáguli' xipéla'gaca nupa ta'nná bē', en xipéla'gaca nupa ta'nná bē' e bōnni' rōjáquie' gudil-la, en xipéla'gaca nupa nál-lagaca, en xipéla'gacaba' bōa', en xipéla'gaca nupa ta' bía légacaba', en xipéla'gaca yúgu'tē bōnachi, nupa biti' nadó'ogaca, en nupa nadó'ogaca, nupa nácagaca cá'asō, en nupa nácagaca lo."

¹⁹ Ní'irō bilé'eda'-ba' bōa' sínia' na', enca' yugu' bōnni' ta'nná bē'ē yōdzóliō, en bōnni' rōjáquie' gudil-la guizxi yu quegaquie', nudúbigaquie' para ilúnlenē' gudil-la Bōnni' dxíé'-ba' bōa' chiguichi, dzágagaca Lē' ni'a nē'ē guizxi yu.

²⁰ Bidzunba' bōa' sínia' na', enca' bōnni' na' bē'ē didza' uláz queéba', bōnni' na' benē' yugu' le nácada' bē' loba', en guzxi' yé'enē' nupa ni' gulu'í lataj nu uzúaj láhuiguequi lē na' naca bē' dá'gaca léba', en gula'yéaj lādxi'gaca budó' queéba'. Bōa' sínia' na', enca' bōnni' na' bē'ē didza' uláz queéba', gula'ru'unē' léguequi nabángacasō ca' ga rō'ō guí' zxōn le réguilen lē na' ruzégui'da'.

²¹ Bōnni' na' dxíé'-ba' bōa' chiguich bētiē' yúgu'tē nupa na' gudá'gaca léguequi len guíē tuchi' na' rirúaj ru'ē, ate' bulu'huóljaba' yúgu'tēba' bōa' na' ta'daba' lúzxiba, tu' guláguba' xipéla'guequi.

20

Chi gayuá' iz

¹ Gudōdi lē ni bilé'eda' ruhuōtjē' tu gubáz lá'ayi, zē'ē yehua' yubá, en zōnē' xzi'ini guíē que lataj chul-la, ate' nu'ē tu du guíē yōdx.

² Guzxōnē'-ba' bēla zxōn xitsiní' na', nácaba' bēla guzōaba' dza ni'te, bēla na' lēba' Tu' Xihui', enca' Satanás, ate' béguē'ē-ba', en bucá'anē'-ba' caní chi gayuá' iz.

³ Yōjchú'unē'-ba' lataj chul-la, en busayjē' lataj na', ate' budē'ē tu le riguela' le rusayaj lataj na' para cabirō si' yé'eba' bōnachi yugu' yōdzō ga izá'arō chi gayuá' iz na', ate' tōdi ni' ral-la' yédxiba' tu chí'ido'.

⁴ Ní'irō bilé'eda' yugu' lataj gapa ta'bō' nupa ta'nná bē', ate' nupa bila'deli' ulu'chi'a ulu'sōrō le raca ta'bō' yugu' lataj na'. Bilé'eda' ca' yugu' bō' gulaca caz bōnachi bulu'rixē' yénguequi yugu' bōnni' biti' nácagaquie' tshui' tu' gulún

ba nalí queë' Jesús, en tu' gulún libán que xtídzë'ë Dios. Yugu' bönachi ni bití' gula'yéaj láchigaca böa' sínía' na', en budó' queëba', en bití' gulu'i lataj nu uzúaj ra' xigáquequi, o lu né'eguequi lë na' naca bë' nu da' lëba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz,

⁵pero ia'zica' rübönachi nátigaca bití' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. ¡Yöl-la' guti le raca burópilö bití' bi gaca gun quéguequi, pero ilácagaca bixúz queë' Dios, enca' queë' Cristo, ate' ila'nná bë'len Lë' chi gayuá' iz na'!

⁶¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö bití' bi gaca gun quéguequi, pero ilácagaca bixúz queë' Dios, enca' queë' Cristo, ate' ila'nná bë'len Lë' chi gayuá' iz na'!

⁷Cate' izá'a chi gayuá' iz na', ulu'sané' Satanás ga na' nadzún.

⁸Urúaj Satanás, en tsöjzxi' ye'e bönachi yugu' yödzö nacua' idapa la'a yödzölió. Si' ye'e ca' bönachi yödzö Gog, en yödzö Magog, ate' utubi léguequi lu gudil-la'. Tsca nátagaca nupa ni, nátagaca ca naca yuzxi rö'ö tu ra' yegu zxön.

⁹Guizxi yusö gula'dödë' iduté luyú, ate' gula'cu'ë lë'ajlö lataj ga na' nacua' bönachi néquiquequi queë' Cristo, le naca yödzö na' nadxi'inë' Dios. Ní'irö benë' Dios ga böxaj guí' le birúaj yehua' yubá, le buzeguí' légaquië'.

¹⁰Tu' xihui' na' nazí' ye'e légaquië', yöjchú'unagaquië' le ga rö'ö guí' zxön que lë na' ruzégui'da', ga na' chizóaba' böa' sínía' na', enca' bönni' na' bë'ë didza' uláz queëba'. Ila'gui'i ila'zaca' ni' rëla, en te dza yugu'të iz zá'gaca.

Ta'dxín bönachi lahuë' Dios ga rö'ë ruchi'a rusöröë'

¹¹Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gula'nítité yödzölió, en lúzxiba, ate' bití'rö budzöli xilátjaguequi.

¹²Bilé'eda' ca' nupa chinátigaca, nupa nátagaca lo, en nupa nátagaca cá'asö, zuíguequinë' lahuë' Dios. Gula'yálaj guichi, en gualaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröë' Dios nupa na' chinátigaca tsca naca le nazúaj yugu' lu guichi na', lë na' gulúngaca.

¹³Lu nísado' bulu'rúaj nupa chinátigaca, nacua' lu nísado'. Lu yöl-la' guti, en lu lataj chul-la' bulu'rúaj nupa chinátigaca, gula'cuá' gapa ni', ate' buchi'a busöröë' Dios tu tu tsca naca le gulúngaca.

¹⁴Ní'irö yöjtsázagaca yöl-la' guti, en lataj chul-la' ga ni' rö'ö guí' zxön le naca lataj que yöl-la' guti le raca burópilö.

¹⁵Nupa bití' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

21

Tu lúzxiba cubi, en tu luyú cubi

¹Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bití'rö dë nísado'.

²Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë' Dios, en chinabá'a que ca nabá'a queëbi' bi'i nigula chizóa utsaga ná'alénbi' tu bönni'.

³Biyönda' ru'i didza' nu rnna yehua' yubá: "¡Buli'yútsöca! ¡Ga zoë' Dios zóalen bönachi! ¡Sóalenë' léguequi, ate' léguequi ilácagaca bönachi queë'! ¡Dios caz sóalenë' léguequi, en gáquië' Dios quéguequi!

⁴Dios uzxië' nisa ribödxí zoa guiój lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui'i saca', tu' chigudödi quégaca lë na' gulaca zí'alö."

5 Ní'irō Nu na' rō'ō lataj lo ni' gunná: “¡Buyútsōca! ¡Yúgu'tē ruúna' cubi!”

Gudxi ca' neda': “¡Buzúaj lu guichi lē ni, tu' naca idútē li didza' ni, en naca lōzal!”

6 Ní'irō gudxi neda': “¡Chinaca caz! ¡Neda' naca' Nu zoa zí'atēlō, enca' Nu rōjsete ca naca le risí lo, en le ruúdxitē! ¡Nu ribidxi nisa, neda' guna' ga gu'aj nisa na' runna yōl-la' na'bán!

7 Nupa ila'deli' lu le raca yōdzōlió, gaca quéguequi yúgu'tē lē ni. Neda' gaca' Dios quéguequi, ate' léguequi ilácagaca zxi'ini caza',

8 pero nupa tadxi, en nupa biti' ta'yéajlé' neda', en nupa nácagaca xihui', en nupa tuti bōnachi, en nupa tun le biti' naca tsahui', en nupa nácagaca udzá', en nupa ta'yéaj lādxi'gaca budó' guió'j budó' yaga, en yúgu'tē nupa ta'z' yē', chizōa ribōza xilátjaguequi lu guí', ga ni' rō'ō guí' zxōn que lē na' ruzégui'da', lē na' naca yōl-la' guti le raca burópilō.”

Yōdzō Jerusalén le naca cubi

9 Ní'irō tuē' gubáz lá'ayi nababē' gadxē' gubáz lá'ayi ni' gula'zōnē' gadxi zxi'ga'do' yúdxugaca gadxi yōdzōhuē' yōjsétegaca, bidē' ga zoa'. Gudxē' neda': “¡Gudá ni! ¡Uluf'ida' li' bi'i nigula na' si' utsaga ná'alēnbi' Bōnni' na' náquiē' Bō'cu' Zxí'la'do'!”

10 Guzōalēnē' Dios Bō' Lá'ayi neda', ate' guchē'ē' gubáz lá'ayi na' neda' tu lu gu'á sibi, en buluf'inē' neda' yōdzō lá'ayi Jerusalén, ruhuótaj, rirúaj yehua' yubá ga zoē' Dios.

11 Yōdzō ni rēpi yōsa bení' tu' zóalen le yōl-la' bení' queē' Dios. Rēpi yōsa bení' ca rēpi yōsa bení' tu' guió'j nazáca'da' ca naca guió'j guí'do'os nazí'i le jaspe. Naca yōdzō na' yení'ido' ca naca guió'j jara.

12 Zoa tu zō'ō zxōn, en sibi idú gásibi'ilō yōdzō na'. Lē'e zō'ō na' nacué' chinnu gapa nu riyaza. Ra' gapa nu riyaza na' nacué' chinnuē' gubáz lá'ayi tapa chí'ē. Tu tu ga nu riyaza na' nazúaj tu tu lágaca idxinnu cō' di'a dza zxi'ini xi'sōē' Israel.

13 Lē'e zō'ō le ruyú saca' ga rilēn gubidza nacué' tsonna gapa nu riyaza, en saca' ga za' bō' ziaga nacué' tsonna gapa nu riyaza, en saca' tsólá'a ga ridōdi gubidza beo' ziaga nacué' tsonna gapa nu riyaza, en saca' ga ribía gubidza nacué' ca' tsonna gapa nu riyaza.

14 Zxan zō'ō que yōdzō na' nacué' chinnu xilibi zō'ō, ate' lē'egaca xilibi zō'ō na' nazúajgaca lágauquiē' idxinnutē' bōnni' gubáz queē' Bōnni' na' náquiē' Bō'cu' Zxí'la'do'.

15 Gubáz lá'ayi na' ruí'ilenē' neda' didza' zōnē' tu yaga urixi le néquini oro para urixē' tsca naca yōdzō na', en tsca nácagaca gapa nu riyaza, en tsca naca zō'ō que.

16 Yōdzō na', lēdi'i nácagaca idapa la'a. Lēdi'i naca yōl-la' tunna que, en yōl-la' blaga' que. Len yaga na' burixē' tsca naca yōdzō na', naca idú tsca gaca nu sa' idú chinnu dza, ate' lēdi'i naca yōl-la' tunna que, en yōl-la' xitsá' que, en yōl-la' bōlága' que.

17 Burixē' ca' yōl-la' yōdx que zō'ō na', naca tu gayuá' yu' tapa-un dxita, tsca naca dxita que na' bōnachi, lē na' ruríxinē' gubáz lá'ayi na'.

18 Zō'ō na' néquini guió'j jaspe, ate' yōdzō na' néquini órotēz, le naca yení'ido' ca naca guió'j jara.

19 Yugu' xilibi zō'ō que yōdzō na' nazí'gaca biquitaj guió'j nazáca'da'gaca. Xilibi zō'ō zí'alō néquini guió'j jaspe. Le buropi néquini guió'j zafiro.

Le bunni néquini guiōj ágata.
 Le budapi néquini guiōj esmeralda.
²⁰ Le guyu' néquini guiōj ónice.
 Le buzxopi néquini guiōj cornalina.
 Le igadxí néquini guiōj crisólito.
 Le izxunu' néquini guiōj berilo.
 Le igá néquini guiōj topacio.
 Le idxí néquini guiōj crisoprasa.
 Le idxinéaj néquini guiōj jacinto.
 Le idxinnu néquini guiōj amatista.

²¹ Chinnu gapa nu riyaza na' ta'yájjani chinnu bugá. Tu tu ga nu riyaza na' riyájjani tuz bugá. Luyú la' nōza lo que yōdzō na' néquini órotéz, le naca yení'ido' ca naca guiōj jara.

²² Biti' bilé'eda' tu yudo' lu yōdzō na', tu' náquié' Xanru' Dios yudo' que, napa cazé' idútē yōl-la' unná bé', en lēsa' caní náquié' Bōnni' náquié' Bō'cu' Zxíla'do', náquié' yudo' que yōdzō na'.

²³ Biti' run bayudxi tsení'gaca gubidza, en beo' lu yōdzō na', tu' uzení' yōl-la' bení' queé' Dios lu yōdzō na', ate' lēsa' Bōnni' náquié' Bō'cu' Zxíla'do' náquié' le uzení' ni'.

²⁴ Bōnachi yugu' yōdzō, nupa nulágaca, ila'dá lu bení' que yōdzō na', ate' yugu' bōnni' ta'nná bé'ē yōdzólió idiguá'agaquié' yōl-la' tsahui' quégaquié' lu yōdzō na'.

²⁵ Catu caz tsáyajgaca gapa nu riyaza lu yōdzō na' lahui' dza, ate' lataj na' catu caz gaca rēla.

²⁶ Bōnachi yugu' yōdzō idiguá'agaquié' ni' le nácagaca lesaca', en yōl-la' tsahui' quéguequi.

²⁷ Tu le ruá' dō' biti' ca' tsaza ni', en calēga tu le naca xihui', en calēga nu rizí' yē', pero tsázagacasō ni' nupa nazúajgaca láguequi lu guichi queé' Bōnni' náquié' Bō'cu' Zxíla'do', ga na' nazúajgaca lágaca nupa nadéli'gaca yōl-la' na'bán.

22

¹ Ní'irō gubáz lá'ayi na' buluí'iné' neda' tu yegu yení'ido', le naca nisa yegu le runna yōl-la' na'bán. Rēpi yōsa bení' yegu na' ca rēpi yōsa bení' guiōj jara. Rirúaj yegu na' lu lataj lo ga rō'ē Dios, en ga rō'ē ca' Bōnni' náquié' Bō'cu' Zxíla'do'.

² Rizá' yegu ni gatsaj láhui'lō nōza lo que yōdzō na'. Tsólá'a huéaj ra' yegu na' rō'ō tu yaga le runna yōl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bōnachi yugu' yōdzō.

³ Biti' soa ni' nitú le dxía dō'. Soa lu yōdzō na' lataj lo ga rō'ē Dios, enca' ga rō'ē Bōnni' náquié' Bō'cu' Zxíla'do', ate' yugu' huen dxin queé' ila'yéaj lādxi'gaquié' Lē'.

⁴ Ila'lé'ené' lahué' Lē', ate' le nazí'i Lē' nazúaj ra' xigágaquié'.

⁵ Biti' gaca rēla ni', ate' nupa nacua' ni' biti' ila'quinna tu le cu'u bení', en calēga bení' que gubidza, tu' gáquié' Xanru' Dios bení' quégaquié'. Nupa nacua' ni' ila'nná bé'tica'sō.

Chizóa huödē' Cristo

⁶ Ní'irō gubáz lá'ayi na' gudxé' neda', gunné': "Didza' ni naca idútē li, en naca lōza. Xanru' Dios, Nu ruchiza Bō' Lá'ayi icja lādxi'do'gaquié' yugu' bōnni'

tu'ë didza' uláz queë', chigusöl-lë'ë gubáz lá'ayi queë' para uluf'inë' yugu' huen dxin queë' le ral-la' gácatë.

⁷ Caní rnnë' Jesucristo: ¡Chizóa huöda'! ¡Bica' ba nu run ca rnna didza' ruá'a uláz queë' Dios, le nazúaj lu guichi ni!"

⁸ Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzóa zxiba' xini'ë gubáz lá'ayi na' buluf'inë' neda' yugu' lë ni para guna' lë' zxön.

⁹ Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rnna le nazúaj lu guichi ni. ¡Ben zxön Dios!"

¹⁰ Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni.

¹¹ Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'."

¹² Rnnë' Jesús: "¡Chizóa huöda'! Nu'a lu na'a le nadéli'gaca bönachi, ate' ubi'a que queë'guequi tsca naca le gulúngaca.

¹³ Neda' naca' Nu zoa zí'atëlö, enca' Nu röjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

¹⁴ Ní'irö gunnë': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gaca nu riyaza lu yödzö na'!

¹⁵ Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládxi'gaca budó' guiöj budó' yaga, en nupa ta'yaza ládxi'gaca ta'zí' yë' ila'cuá' ní'ilö ra' yödzö na'.

¹⁶ Neda', Jesús, gusöl-la'a gubáz lá'ayi quia', ate' buluf'inë' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' di'a dza queë' David, enca' xzí'ini xisóë'. Naca' ca' bölaj hui sila."

¹⁷ Tu'ë didza' Dios Bö' Lá'ayi, enca' bi'i nigula utsaga ná'alenbi'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizë ladxí' le, ral-la' guídi, en guí'aj nisa le runna yöl-la' na'bán!

¹⁸ Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnní'a: Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni.

¹⁹ Lësca' caní, channö nu cúa bítitës didza' ni ruá'a uláz queë' Dios, en nazúaj lu guichi ni, Dios ugüë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj qué'guequi lu guichi ni.

²⁰ Xanru', Nu run ba nalí qué'guequi lë ni rnnë': "¡Ön! ¡Huödatea!"

¡Ca' gaca! ¡Gudá, Xantu' Jesús!

²¹ Rinábida'-në' Xanru' Jesucristo uzá' ládxe'ë queë'li' yúgu'tëli'. ¡Ca' gaca!